


Pajelwɔajan Dios
pejjamechan



New Testament in Guayabero (CO:guo:Guayabero)

Pajelwujaj Dios pejjamechan

New Testament in Guayabero (CO:guo:Guayabero)

copyright © 2009 Wycliffe Bible Translators, Inc.

Language: Guayabero

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guayabero

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 18 Apr 2025 from source files dated 29 Jan 2022
809259d4-ca58-5124-9a05-fd84078a3de3

Contents

San Mateo	1
San Marcos	60
San Lucas	96
San Juan	157
Hechos	201
Romanos	254
1 Corintios	278
2 Corintios	302
Gálatas	318
Efesios	327
Filipenses	335
Colosenses	340
1 Tesalonicenses	345
2 Tesalonicenses	350
1 Timoteo	353
2 Timoteo	360
Tito	365
Filemón	368
Hebreos	370
Santiago	387
1 San Pedro	393
2 San Pedro	400
1 San Juan	404
2 San Juan	410
3 San Juan	411
Judas	412
Apocalipsis	414

Mateo lelpox Jesucristo pejuwajan

*Ampilap Jesucristo pejuwajnapijiw
(Lc 3.23-38)*

¹ Xan, Mateo, amxot lelaxaelen Jesucristo pejuwajnapijiw pejuwalan. Jesucristo David pamon. Davidbej Abraham pamon.

² Abraham paxulan pawul Isaac. Isaac paxulan pawul Jacob. Jacob xabich paxipon. Kaen pawul Judá.

³ Judá paxi. Kaen pawul Fares. Asan pawul Zara. Japi pen pawul Tamar. Fares paxulan pawul Esrom. Esrom paxulan pawul Aram.

⁴ Aram paxulan pawul Aminadab. Aminadab paxulan pawul Naasón. Naasón paxulan pawul Salmón.

⁵ Salmón paxulan pawul Booz. Booz pen pawul Rahab. Booz paxulan pawul Obed. Obed pen pawul Rut. Obed paxulan pawul Isaí.

⁶ Isaí paxulan pawul David. Japon David, reypon Israel tñajñapijiwliajwa. Rey David paxulan pawul Salomón. Japon pen pawul Betsabé. Japow majt Urías pijow.

⁷ Salomón paxulan pawul Roboam. Roboam paxulan pawul Abías. Abías paxulan pawul Asa.

⁸ Asa paxulan pawul Josafat. Josafat paxulan pawul Joram. Joram paxulan pawul Uzías.

⁹ Uzías paxulan pawul Jotam. Jotam paxulan pawul Acáz. Acáz paxulan pawul Ezequías.

¹⁰ Ezequías paxulan pawul Manasés. Manasés paxulan pawul Amón. Amón paxulan pawul Josías.

¹¹ Josías paxi. Kaen pawul Jeconías. Japamatkoiyan judíos bu'fos esclavosliajwa Babilonia paklowax poxade, jaxotde malech tanbichliajwapi Babilonia paklowaxpijiwliajwa.

¹² Do baxael, judíos kofas wut, japi nawia pejtñajñu poxadin. Do jawut, Jeconías paxulanpon. Japon pawul Salatiel. Salatiel paxulan pawul Zorobabel.

¹³ Zorobabel paxulan pawul Abiud. Abiud paxulan pawul Eliaquim. Eliaquim paxulan pawul Azor.

¹⁴ Azor paxulan pawul Sadoc. Sadoc paxulan pawul Aquim. Aquim paxulan pawul Eliud.

¹⁵ Eliud paxulan pawul Eleazar. Eleazar paxulan pawul Matán. Matán paxulan pawul Jacob.

¹⁶ Jacob paxulan pawul José. José pijow pawul María. Japow Jesús pen. Jesúslap Cristo, Dios to'aspon jiw bu'welajwa.

¹⁷ David pamjiwkolapikal, Abraham suapich, puexa japi catorce. Do baxael, judíos bu'fos wut esclavosliajwa Babilonia paklowax poxade, japibej catorce matxajus wut, David suapich, pamjiwkolakal. Do baxael, Cristo nalaelt wut Judea tñajñaxot, japonbej catorce pamjiwkolakal, Babilonia paklowaxxot nawenpi suapich.

*Jesucristo nalaelt pow
(Lc 2.1-7)*

¹⁸ Jesucristo nalaelt wut, ma-aech. Jesucristo penaxaelpow, japow pawul María. José jumdut, asamatkoi japow fisliawapon. Pe José japow bu'moejs-el wutfuk, japow moejow Espiritu Santo pejpamamaxtat.

¹⁹ José chiekal pachaempon. Japonliajwa wepachaema-esal tasalaliajwapon japow jiw pejuwajnalel, masoxtat moejow xotow. Samata, José nejchaxoel kofsliajwapon María.

²⁰⁻²¹ José japox nejchaxoelaful wut, Dios pej-ángel jumtispon, xamoejt wut: "José, David pamon, ¡nabej nejchaxoele! María fis-elaliajwam nijowliajwa! María paxulch faenaxael. Japon nalaelsaxael Espiritu Santo pejpamamaxtat. Japon asamatkoi jiw bu'weyaxael. Samata, ¡wulduim Jesús wultat!" —tis José Dios pej-ángel, xamoejt wuton.

²² Puexa japoxan ja-aechlisox, me-ama Dios pejprofeta chajia jum-aech:

²³ "Kaeow pawis, chinax poi bu'moejs-esalpow, masoxtat moejowaxael. Japow paxulchaxael wut, poi yaxael. Pawulaxaelon Emanuel" —aech Dios pejprofeta. (Japawul jumchiliajwa: "Dios xatixot" —chiliajwa.)

²⁴ José nathikt wut, fitlison María pijowliajwa, me-ama Dios pej-ángel jumtispon, xamoejt wut.

²⁵ José bu'moejs-el María, japow moejow xot. María paxulan nalaelt wut, José wulduw paxulan Jesús wultat. Jum-aechon: "Pawulaxaelon Jesús" —aech José.

2

Ithaej matabijs patpox jumt julanlelsan

¹ Jesús nalaelt Belén paklowaxtat, Judea tuajnuxot. Japamatkoivan Herodes reypon Judea tuajnuxot. Japamatkoivan wut, ithaej matabijs pat juimt julanlelsan Jerusalén paklowaxxot.

² Pat wuti, wuajnaeemt wut, jum-aechi:

—¿Amxotkat nalaelt judíos pejrey? Xanal taenx ithaejt, yamxuch pijan, julan wut juimt julanlelsan. Samata, xanal fulaenx itpaeliajwan sitaeyax japoch yamxuch —aech ithaej matabijs.

³ Rey Herodes japox wultaen wut, xabich nejchaxoelon. Jerusalén paklowaxpijwbej japox wultaen wut, xabich nejchaxoeli.

⁴ Do jawut, Herodes to'a pejjiw wuljaesliajwapi puexa sacerdotespaklochow, judíos chanaekabuanapibej. Japi pat wut Herodesxot, Herodes wuajnaeemt wut, jum-aechon japiliajwa:

—¿Amxotkat nalaelsaxael Cristo, japon to'axespon Dios? —aech Herodes.

⁵ Japi jum-aech:

—Nalaelsaxaelon Belén paklowaxtat, Judea tuajnuxot. Jasox chajia jum-aech Dios pejprofeta lelpox, jum-aech wut:

⁶ 'Jiw tato'lan nalaelsaxael Belén paklowaxtat, Judea tuajnuxot. Japon tato'laxael Dios pejjiw, Israel tuajnupijiw. Samata, Belén paklowax kaes pejme pachaemaxael. Me-ama asapaklowaxan Judea tuajnuxot, jachiyaxil' —aech Dios pejprofeta chajia lelpox —aech sacerdotespaklochow, judíos chanaekabuanapibej, Herodesliajwa.

⁷ Samata, Herodes maliach wullala ithaej matabijs, japi fulaeliajwadin Herodes poxadin, japon Herodes matabijsliajwa yamxuchliajwa. Ithaej matabijs pat wut Herodesxot, Herodes jum-aech:

—¿Maswutkatjim xamal matxola taenam japa-ithaejt? —aech Herodes.

⁸ Do jawut, Herodes matabijt wut, to'apon ithaej matabijs Belén paklowax poxade. To'a wut, Herodes jum-aech japiliajwa:

—¡Xabua'de japoxade xaljamch chiekal jalwekaliajwam! Faenam wut, jxan najum-amde, xanbej fulaeliajwan itpaeliajwanbej tajsitaeyax japoch xaljamchliajwa! —aech Herodes.

⁹⁻¹⁰ Do jawut, ithaej matabijs follisi, rey Herodes to'as poxade. Do jawutbej, majt ithaejt taenpox, pejme taeni. Japi taen wut japa-ithaejt, xabich nejchachaemili. Do jawut, japi itafol wut, japa-ithaejt wuajna dukaful. Do baxael, japa-ithaejt napata-ek. Do jawut, japa-ithaejt nakthiandik xaljamch okxot.

¹¹ Do jawut, ithaej matabijs lowlisi ba. Jaxot taenlisi xaljamch, pen swapich, japow pawulpow Maria. Japi sitaen xot xaljamch, brixtat nuilisi xaljamch pejwuajnalel. Do jawut, fafaklisi pejcha-aelbaulx. Do jawut, juk wut, chaxduwlisipon oro, incienso, mirrabej. Puexa japoxan xabich ommaenkpoxan.

¹² Do jawut, ithaej matabijs jumtisi, xamoejt wut: “¡Herodes poxade nabej nawe!” —tisi. Samata, ithaej matabijs asanwamtlet joeya. Jasoxtat ithaej matabijs nawia pejtuajnuxoade.

José, pijow swapich, paxulan swapichbej, dukpox Egipto tuajnu poxade

¹³ Ithaej matabijs chijia wut, do japamadoitat, José moejt wut, xamoejton Dios pej-ángel. Do jawut, jumtispon: “¡Nande! ¡Bwflaem xaljamch, pen swapich, Egipto tuajnu poxade! ¡Jaxotde duilmach! Asamatkoi xam pejme jumchiyaxaelen xaljamch bunwiasliajwam. Malis xaljamch pen. Amalis Herodes xaljamch wulwekaxael boesaliajwaspon” —tisi, José xamoejt wut.

¹⁴ Dolisdo', José nathikt wut, japamadoitat bwflaechlison xaljamch Egipto tuajnu poxade. Malis xaljamch pen.

¹⁵ Egipto tuajnuxot piach duili. Do baxael, Herodes tur wut, pejme kaxa nawenlisi. Me-ama Dios pejprofeta chajia jum-aech Dios jum-aechpox, jum-aech wut paxulanliajwa: “Taxulan wullalaeyaxaelen pejme nawiasliajwa Egipto tuajnuxotdin” —aech Dios jum-aechpox paxulanliajwa.

Herodes keto'apox pejsoldaw yamxi beliajwas

¹⁶ Do jawut, Herodes pajut matabijt wut ithaej matabijs asanwamtlet joeyapox, jawut xabich palalapon japiliajwa. Samata, pejsoldaw keto'apon yamxi poejiwkal beliajwapi, kolewaechanpi, kaes jampibej, japi duili Belén paklowaxxot, paklowax tathoetlel duilpi paxibej. Jasox keto'apon, nejchaxoel xot ithaej matabijs chajia jum-aechpox Jesús nalaelsaxliajwa.

¹⁷ Japox ja-aechliso, me-ama Jeremías, Dios pejprofeta chajia lelpox jum-aech yamxi beyaxaespoxlajwa:

18 “Do jawut, puexa jiw jumtaeyaxael xabich wɛnowpoxan Rama paklowaxxot. Japi watho', Raquel pamojiw, xabich pinjemetat wɛnoeyaxaeli, paxi nejxaejwas xoti. Japi watho' kofaxil paxi nejxaejwaspoxan” —aech profeta Jeremías chajia lelpox.

19 Baxael, asamatkoi, Herodes tɔp wut, José Egipto tɔajɛxot Dios pej-ánel jɛntispon, xamoejt wut:

20 “¡Nathikde! ¡Buflaem yamxulan, pen sɔapich! ¡Nawem Israel tɔajɛɛn poxade, yamxulan boesasiapi, japi puexa chiekal tɔp xotlisi!” —tis José Dios pej-ánel.

21 Do jawut, José nant wut, bu'follison yamxulan Israel tɔajɛɛn poxade. Malis yamxulan pen.

22 Jawut, José wultaen waton Arquelao reypox Judea tɔajɛɛxot pax Herodes pejawelela, José xabich pejawelela Arguelaoliajwa. Samata, Joséliajwa pachaema-el namanaliajwapon japatɔajɛɛxot. Madoi José moejt wut, Dios jɛntispon. Do jawut, Dios fiachpon namanasamata Judea tɔajɛɛxot. Samata, matnoch xenton Galilea tɔajɛɛn poxaliajwade.

23 José bu'fol pijow, yamxulanbej, duilaliajwa Nazaret paklowaxxot. Samata, Dios pejprofeta chajia jum-aechpox Dios pijaxtat, japox ja-aechlisox. Profeta chajia jum-aech Jesúsliajwa: “Japon Nazaret paklowaxpijnaxael” —aechon.

3

Juan, jiw bautisan, dukpox pajilaxtat
(Mr 1.1-8; Lc 3.1-9, 15-17; Jn 1.19-28)

1 Do baxael, japamatkoiyan wut, Juan, jiw bautisan, naewɛajan jiw pajilaxtat, Judea tɔajɛɛxot, papat wuti japonxot.

2 Juan jiw naewɛajan wut, jum-aechon: “¡Kofim babijaxan isfulampoxan! ¡Isfuldelax Dios nejxasinkpoxan! ¡Dios puexa pejiw tato'laxaelmatkoi mox pawɛajna!” —aech Juan.

3 Isaías, Dios pejprofeta, chajia lelon Juanliajwa. Jaxot jum-aechon, lel wut: “Kaen aton pasaxael. Japon pinjemetat jiw naewɛajnafulaxael pajilaxtat. Japon jumchiyaxaelbej jiwliajwa: ‘¡Babijaxan isfulampoxan kofim wajpaklonliajwa! Me-ama jiw wɛajna nɛamt chiekal chaemt paklon pasliajwa, ¡xamalbej ja-amde nejne-jchaxoelaxantat! ¡Isfulde Dios nejxasinkpoxan!’ —chiyaxaelon pajilaxtat” —aech Isaías, chajia lel wut Juanliajwa.

4 Juan naxoelox bael camelloelat. Japox pakchowax. Pejcinturónmuat pabu'tkal. Pejnaxaeyax, me-ama sui'. Afpon miel.

5 Do jawut, Jerusalén paklowaxpijiw fɛlaeni Juanlel, taeliajwapi. Fɛlaenbej Judea tɔajɛɛpijiw. Mox duili Jordánlajxot, japibej fɛlaen. Japi jiw fɛlaen naewesliajwa Juan naewɛajanpoxan.

6 Japamatkoiyan japi pajut chapaei babijaxan ispoxan Dios beltaeliajwas. Do jawux, Juan japi jiw bautisa Jordánlajxot.

7 Do jawut, xabich fariseos, saduceosbej, fɛlaenbejpi Juan jiw bautisafɛlxot. Do jawut, Juan japi jiw taen wut, jum-aechon japiliajwa: “Xamal, me-ama jom, dukpi weliajwa jit boejtaen wut, ja-am. Pe asamatkoi, xamal tɔpam wut, weyaximil, pat wut kastikamatkoi.

8 Samata, ¡kofim babijaxan isfulampoxan! Do jawux, ¡isfulde Dios nejxasinkpoxan! Jasox isfulam wut, jiw matabijaxael, diachwɛajnakolax xamal babijaxan isfulampoxan kofamilis.

9 ¡Xamal nakaewa nabej najum-aeché: ‘Xatis Abraham pamojiwas. Samata, diachwɛajnakolax Dios xatis nakbu'weyaxael’ —nabej aeché nakaewaliajwa! Pe nakiowa, babijaxan isfulam wut, Dios xamal bu'weyaxil. Dios nejxasink wut, ampa-ia' Abraham pamojiw kiladofaxaelon.

10 Xamal naebaechnaechan liktam, naboes-elnaechan. Do jawux, jitat it-owam. Jachiyaxaellap-is Dios, xamal kastika wut, naexaxis-emil wut Dios” —aech Juan, jiw bautisan, babijaxan ispijliajwa.

11 Juan pejme jum-aech: “Diachwɛajnakolax xan jiw bautisax mintat, kofa wuti babijaxan isfulampoxan japi Dios naexaxisfulaliajwa. Pe mox pawɛajna kaen fɛlaeyaxaenpon, japon kaes pejme paklonaxael. Me-ama xan, jachiyaxilon. Xan omjinil japon pejkajachawaesnanliajwa. Fɛlaeyaxaenpon, japon Espiritu Santo to'axael jiw kachawaesfulaliajwas. Espiritu Santo pejpamamax, me-ama jit, jiw babijaxan ispi wetoejwaliajwas, japi jiw pachaemaliajwa Diosliajwa.

12 Lulpijin trigo matbokkiyan, batat cha-owaliajwa trigo. Trigobok, trigotonanbej, pelton lausliajwa. Jachiyaxaelbej fɛlaeyaxaelpon. Japon tamejaxael jiw pachaempikal Diosxotse, japi jiw, Dios naexasiti. Asew, babijaxan ispi, japi Dios naexaxis-eli, pelsaxaes jitatik, itkuawaxil poxadik” —aech Juan puexa jiwliajwa.

Jesús bautisapox
(Mr 1.9-11; Lc 3.21-22)

¹³ Do jawut, Jesús Galilea t̄aj̄n̄xot nakolt wut, f̄alaechon Jordánlajt poxade, Juan bautisaliajwas.

¹⁴ Do jawut, Juanlax jum-aech Jesúsliajwa:

—Xam kaes paklonam. Me-ama xan, jachi-emil. Samata, kaes pachaem xan nawoesa nabautisaliajwam —aech Juan Jesúsliajwa.

¹⁵ Pe Jesús jumnot wut, jum-aechon Juanliajwa:

—¡Xamlax isde japox amwut! Pachaem isliajwas puexa Dios naktato'alpox —aech Jesús Juanliajwa.

Do jawut, Juan ow-aech.

¹⁶ Jawut Juan bautisa Jesús. Jesús julan wut mintat, jawut taenon athu fafachpox. Jawut Espiritu Santo f̄aloēk a-utat japon pejmatw̄ajasik. Me-ama a-ut, kab̄uan-aech Espiritu Santo.

¹⁷ Do jawut, Dios pajut jum-aechsik: “Amponlap taxulan, xabich nejxasinkaxpon. Xan xabich nejchachaemlax japonliajwa” —aech Dios Jesúsliajwa.

4

Jesús xapaejaspox Satanás

(Mr 1.12-13; Lc 4.1-13)

¹ Do jawux, Jesús Espiritu Santo bu'fos pajilax poxade, jaxotde Jesús xapaejsliajwas Satanás babijax isliajwapon.

² Japamatkoiyan Jesús chinax naxae-el cuarenta matkoiyan Dios piach kaw̄uaj̄n̄af̄ulaliajwa. Samata, Jesús xabich litaxaela.

³ Do jawut, Satanás f̄alaēn xapaejsliajwapon Jesús babijax isliajwa. Do jawut, Satanás jum-aech Jesúsliajwa:

—Diachw̄uaj̄n̄akolax xam Dios paxulnam wut, jampi ia' to'im pan nadofaliajwa! —aech Satanás Jesúsliajwa.

⁴ Jesús jumnot wut, jum-aechon:

—Dios pejjamechan, chajia lelspos jum-aech: 'Jiw duilaxil naxaeayankalliajwa. Jiw wewe'pasbej Dios pejjamechan naexasisfulaliajwa' —aechox —aech Jesús Satanásliajwa.

⁵ Do jawut, Satanás pejme xapaejsliajwa wut, bu'fos Jesús Jerusalén paklowax poxade. Bu'fason Dios pejtemploba matw̄uaj̄ase, kaes athu poxase. Jaxotse nosas Jesús.

⁶ Do jawut, Satanás jum-aech:

—Diachw̄uaj̄n̄akolax xam Dios paxulnam wut, jma amxot diwmik satadik! Xam naxbijax-imil sat. Dios pejjamechan, chajia lelspos, jum-aech wut, jum-aechox:

'Dios to'axoek pej-á̄ngeles xam chiekal tataeflaliajwapi. Diwmik wut, xam jaelsabaxaeli naxbijasamatam ia', najalasaratambej' —aech Dios pejjamechan, chajia lelspos —aech Satanás Jesúsliajwa.

⁷ Jesús jumnot wut, jum-aechon:

—Xan diwaxinil. Dios pejjamechan, chajia lelspos, jum-aech wut, jum-aechbejpox: '¡Nabej xapaejs nejpaklokolan Dios, asb̄uan jumch taeliajwam diachw̄uaj̄n̄akolax xam weyaxaelam wut!' —aech Dios pejjamechan, chajia lelspos. Xan chiekal matabijtax Dios natataeflaxpox. Xan xapaejsaxinil tajpaklokolan Dios —aech Jesús Satanásliajwa.

⁸ Do jawux, Jesús xapaejtas wut Satanás, bu'fason pinam̄uax matw̄uaj̄ase, xabich athu poxase. Jaxotse Jesús it̄paeis pot̄uaj̄n̄uchan, popaklowaxanbej, ampathatat. It̄paeisbejpon puexa xabich pachaempoxan, ampathatatpi.

⁹ Do pejme Satanás jum-aech Jesúsliajwa:

—Puexa taenamponxan xam chaxdusaxaelen, xan tajw̄uaj̄nalel brixtat nukam wut, najum-am wutbej: 'Xam xabich pachaemam. Xam tajpaklokolan' —na-am wut —aech Satanás Jesúsliajwa.

¹⁰ Jesús jumnot wut, jum-aechon Satanásliajwa:

—Satanás, ¡chijiamde xanxot! Xam sitaeyaxinil. Dios pejjamechan, chajia lelspos, jum-aech wut, jum-aechox: 'Kaen, Dios, jiw pejjaklokolan. ¡japonkal sitaem! ¡Naexasisfuldebej!' —aech Dios pejjamechan, chajia lelspos —aech Jesús Satanásliajwa.

¹¹ Do jawut, Satanás chijia Jesúsxot. Jawutbej Dios pej-á̄ngeles f̄aloēk Jesús kajachawaesliajwapi.

Jesús t̄adutpox naew̄uaj̄n̄ax Galilea t̄aj̄n̄xot

(Mr 1.14-15; Lc 4.14-15)

¹² Do jawux, Jesús wultaen Juan, jiw bautisan, jiaspox jiw jebatat. Jawut Jesús nawia'an Galilea t̄aj̄n̄u poxadin.

¹³ Do jawut, nakoltison Nazaret paklowaxxot dukaliajwa Capernaum paklowaxxot. Japaraklowax Galilea pukabab̄'tat. Zabulón t̄aj̄n̄u, Neftalí t̄aj̄n̄ubej, jaxot mox.

¹⁴ Dolisdo', ampox ja-aech jachiliajwa Isaías chajia lelpox. Japon chajia lelpox jum-aech: ¹⁵⁻¹⁶ "Zabulón tuajnu, Nefitali tuajnu bej jaxot mox Galilea puka, Jordánlajt wesklel. Jaxot, Galilea tuajnu xot, asew jiw duil. Japi judíos-el. Japi matabija-el Dios pejtato'laxan. Samata, japi jiw, me-ama duili itkuataxxot, ja-aechi. Pe asajiw naewuajnas wuti, japi jiw naexaxisaxael Dios tato'alpox. Ja-aech wut, japibej bu'weyaxaes Dios. Do ja-aech wut, japi pejnechaxoelaxan, me-ama itliak wut, jachiyaxael. Do ja-aech wut bej, japi, me-ama nanuamsaxael itliakaxxot" —aech Isaías chajia lelpox.

¹⁷ Do japamatkoijan wut, Jesús naewuajan wut, jum-aechon: "Wuajna wechmatkoi mox pawuajna Dios puexa pejiw tato'laxaelpox. Samata, ikofim babijaxan isampoxan, isliajwam Dios nejxasinkpoxan!" —aech Jesús.

Jesús tadutpox cuatro nabaxisiw japon pejnachalaliajwas
(Mr 1.16-20; Lc 5.1-11)

¹⁸ Jesús laeja wut Galilea pukababu'tat, taenpon kolenje nabaxisiw. Kaen pawul Simón. Japon asawul Pedro. Asan pawul Andrés. Japi kolenje nakaewa. Japi xawawael baxi tarayatat pukaxot, japi nabaxisiw xot.

¹⁹ Jesús jum-aech japiliajwa:
—ixabuu't! ixan nakfulaem matabijaliajwam xan naewuajanaxpoxan! Xamal matabijam nabaxisaxan. Baxi xawawaelam wut, notam. Jasoxtatbej xamal itpaeyaxaelen jachiliajwam jiwliajwa, japi jiwbej tajnachalaliajwa, Dios pejiwaliajwabejpi —aech Jesús japiliajwa.

²⁰ Do jawut, pejew tarayan waela wuti, nakfollisi Jesús.

²¹ Jesús kaes fulaech wut, kolenje nabaxisiw taenpon. Japi kolenje, nakaewa. Kaen pawul Santiago. Asan pawul Juan. Japi Zebedeo paxi. Pax suapich, chaemti tarayan falkamtat. Jesús japi kolenje taduton japi pejnachalaliajwa.

²² Do jawut, pax waeltlisi falkamtat. Jawut japi kolenje nakfollisi Jesús.

Jesús xabich jiw naewuajanpox
(Lc 6.17-19)

²³ Jesús nanuamt puexa Galilea tuajnu xot. Naewuajnafubejpon judíos naewuaj nabachanxot chimiawuajan, Dios puexa pejiw tato'laxaelwuajan. Boejthubejpon jiw, nejmachwaxaetat bu'xaenki.

²⁴ Puexa Siria tuajnu pijiwbej wultaenapi Jesús. Samata, japi buflaen nejmachwaxaetat bu'xaenki Jesús poxadin. Buflaeni xabich nabijati xaeyaxantat. Buflaenbejpi asew dep webaespi pejmatruatanxot. Buflaenbejpi asew, me-ama na-achapi dep pijaxtat. Buflaenbejpi asew laelpaxilpi. Japi puexa Jesús chiekal boejthut.

²⁵ Xabich jiw Jesús fulafos. Japi Galilea tuajnu pijiw, Decápolis tuajnu pijiwbej, Jerusalén paklowaxpijwbej, Judea tuajnu pijiwbej, Jordánlajt wesklel duilpibej.

5

Jesús naewuajanpox jiw muaxxot

¹ Xabich jiw papat Jesús naewuajanxot jumtaeliajwa japon naewuajanpoxan. Jesús japi taen wut, muax kaesuapich athuxot ekon japi jiw naewuajnalialjwa. Pejnachala kaes chiekal mox Jesús ekxot.

² Do jawut, Jesús naewuajan pejnachala, xabich asew jiwbej.

Jesús naewuajanpox diachwuajnakolaxan jiwliajwa
(Lc 6.20-23)

³ Jesús naewuajan wut, jum-aechon pejnachalaliajwa, xabich asew jiwliajwabej, japamuaxxot: "Jiw pejnechaxoelaxtat jum-aech wut: 'Dios nakkajachawaes-el wut, xatis wajut isaxisal pachaempoxan' —aech wuti, nejchaxoel wut, japi jiw Dios kajachawaesaxaes. Ja-aech wut, japi xabich nejchachaemlaxael.

⁴ "Jiw nejxaejwaspi, nabijat xoti ampathatat, japi jiw Dios kajachawaesaxaes pachaemalialjwa. Ja-aech wut, xabich nejchachaemlaxaeli.

⁵ "Jiw pachaempi pejnechaxoelaxantat, japi nejchaxoel wut, nejchaxoela-el ampox: 'Xan kaes pejme pachaeman. Me-ama asew jiw jachi-enil' —chi-eli, nejchaxoel wut. Japi jiwlap Dios chaxduiyaxaes pachaempox, chajia jumduchpox. Ja-aech wut, xabich nejchachaemlaxaeli.

⁶ "Jiw isasiapi pachaempoxan Diosliajwa, Dios kajachawaesaxaes isliajwa japoxan. Ja-aech wut, japi jiw xabich nejchachaemlaxael.

⁷ "Asew jiw beltaen wuti asew, japi kajachawaet wutbej asew, japi jiwlap Dios kajachawaesaxaes. Dios beltaeyaxaesbejpi. Ja-aech wut, japi jiw xabich nejchachaemlaxael.

⁸ “Jiw pejnejchaxoelax pachaempi Diosliajwa, japi jiw taeyaxael Dios, duil wuti Diosxotse. Ja-aech wut, japi jiw xabich nejchachaemlaxael.

⁹ “Wuajanchaemtpi jiw nabe-elaliajwa, padaelmajiw swapich, japi jiwlap Dios paxiyaxael. Ja-aech wut, japi jiw xabich nejchachaemlaxael.

¹⁰ “Jiw nabijatpi asew jiw pijaxtat, naexaxisful xoti Dios tato'alpox, japi Dios kachawaesaxes. Ja-aech wut, japi jiw xabich nejchachaemlaxael.

¹¹⁻¹² “Xan nanaexasitam xot, asew jiw babejjamechan xamal jumchiyaxael. Isaxaelbejpi babijaxan xamalliajwa. Japibej jumchiyaxael xamalliajwa nejmachkichachajbaxtat. Ja-aech wut, Dios isaxael xabich pachaempox xamalliajwa japonxotse. Samata, ¡nejchachaemilde! Chajia xamal wuajna Dios pejprofetasbej nabijat, asew jiw is wut babijaxan japiliajwa” —aech Jesús, naewuajan wut japamuxxot.

Jesús pejnachala ampathatat, me-ama dom pachaempox, me-ama itliakaxbej, ja-aechi (Mr 9.50; Lc 14.34-35)

¹³ Do pejme Jesús jum-aech pejnachalaliajwa, xabich asew jiwliajwabej, naewuajan wuton muxxot: “Dom pachaem. Dom xakuenka-el wut, chiekal chaemil. Ja-aech wut, pachaem thokchaliajwa nuamtat jiw sae'enaliajwa. Xamal ampathatat, me-ama dom pachaem wut, ja-am. Ja-am wut, xamal pachaemaxaelam asew jiwliajwa ampathatat. Pachaema-emil wut asew jiwliajwa, xamal, me-ama dom thokchaxespi nuamtat, jachiyaxaelam.

¹⁴ “Xamalbej ampathatat, me-ama itliakam wut, ja-am. Itkuxataxot itliak wut, puexa jiw chiekal taen, me-ama paklowax muxmatwuajtat wut, ajil namoechaliajwa. Puexa jiw chiekal taeyaxael.

¹⁵ Jiw lámpara tamdut wut, cajóntat chamatakasaxil. Jiw lax athu cha-esaxael bamuxxnaetat puexa chiekal taeliajwa.

¹⁶ Samata, ¡xamalbej chiekal duilde asew jiw taeliajwa xamal isampoxan! Asew jiw taen wut xamal isampoxan, pachaempoxan, ja-aech wut, japi jiw naksiyaxael chimiajamechan nej-ax Diosliajwa, japon athuxotsepon” —aech Jesús, naewuajan wut muxxot.

Jesús naewuajanpox jiw Moisés chajia lelpoxliajwa

¹⁷ Do pejmebej, Jesús jum-aech pejnachalaliajwa, xabich asew jiwliajwabej muxxot: “Xamal nejchaxoelam wut xanliajwa, xamal jum-am: ‘Japon pat toesliajwa Moisés chajia lelpox, Dios pejprofetas lelpoxanbej’ —am xamal xanliajwa, nejchaxoelam wut. Xan pasenil toesliajwan japoxan. Xanlax patx chiekal isliajwan profetas lelpoxan xanliajwa.

¹⁸ Diachwuajnakolax xan jum-an. Ampathatat, thatbaxobej, toepa-el wutfuk, Dios pejtato'laxan, Moisés chajia lelpox, nakiowaxaelfuk. Chinax nafo'axil kaelet. Nafo'axilbej kaejame, Dios pejjame. Puexa Dios chajia jum-aechpox, japoxan diachwuajnakolax jachiyaxael.

¹⁹ Samata, nejmachjiw chiekal naexaxis-el wut puexa Dios pejtato'laxan, japi jiw naewuajan wutbej asew jiw chiekal naexaxis-elaliajwa puexa Dios pejtato'laxan, ja-aech wut, japi jiw chiekal sitaeyaxisal, Diosxotse wut, Dios tato'alxotse. Pe chiekal naexasitpilax puexa Dios pejtato'laxan, japi naewuajan wutbej asew jiw chiekal naexaxisliajwa puexa Dios pejtato'laxan, ja-aech wut, japi jiw xabich sitaeyaxaes Diosxotse, Dios tato'alxotse.

²⁰ Diachwuajnakolax xan jum-an. ¡Xamal naexaxisfulde Dios pejtato'laxan! Me-ama fariseos, judíos chanaekabuanapibej, ¡nabej ja-aech' xamal! ¡Xabich kaes naexaxisfulde Dios! Jachi-emil wut, xamalbej pasaximil Diosxotse, Dios jiw tato'alxotse” —aech Jesús, naewuajan wut muxxot.

Jesús jiw naewuajanpox palalasamata (Lc 12.57-59)

²¹ Do pejme kaes Jesús jum-aech pejnachalaliajwa, xabich asew jiwliajwabej, naewuajan wuton muxxot: “Dios pejjamechan, chajia lelpox, jum-aech wut, jum-aechox wajwuajnapijiwliajwa: ‘¡Nabej be! asew jiw! Asew jiw bam wut, asew jiw xamal kastika wut, xamalbej beyaxaeli’ —aechox. Xamal chajia japox chiekal matabijam.

²² Pe xamal pejme jum-an ampox. Nejmach-aton palala wut asan atonliajwa, japon aton pejbu'wuajan Diosliajwa. Ja-aech wut, japon aton kastikaxaeson Dios. Nejmach-aton jum-aech wutbej babejjamechan asan atonliajwa, japon aton pejbu'wuajan Junta Supremapijwliajwa. Samata, japon aton kastikaxaes. Nejmach-aton palala wut, jum-aech wutbejapon asan atonliajwa: ‘Xam atonam nejliaklanam’ —aech wuton asanliajwa, japon aton Dios kastikaxaes infernoxotdik.

²³⁻²⁴ “Xam xafolam wut nej-ofrenda Diosliajwa, jawut nejchafaetam wut aton palalapon xamliajwa, ¡jawut nej-ofrenda o'e altarxot Dios pejtemplobatat! ¡Jawut xabua'de japon aton poxade, palalapon xamliajwa! Faenam wut, ¡chiekal chaemde, japon aton swapich! Do

jawux, ikaxa fulaemen nej-ofrenda Dios chaxdusliajwam! Ja-am wat, Dios nejchachaem-laxael nej-ofrendaliajwa.

²⁵ “Xam babijax isam wat asanliajwa, japon xam bu'fol wat juez poxade jumchiliajwapon nejbu'wuaajanpoxliajwa, kaes pejme pachaem tamach chaemsliajwam japox wuaajan, japon suapich, pas-emil wutfuk juezxtot. Japox wuaajan chaems-emil wat, japon xam wiasaxael juezxtot jumchiliajwa nejbu'wuaajanpoxliajwa. Do jawux, japon xam wiasaxael soldawxot xam jeliajwa jiw jebatat.

²⁶ Diachwuaajnakolax xan jum-an: ‘Japon japox is wat, xam nakolsaximil jiw jebaxot, hasta puexa japoxan mos-emil wat’ —an xan” —aech Jesús pejnachalaliajwa, xabich asew jiwliajwabej.

Jesús naewwuaajanpox poejiw pakmola nejchaxoelasamata asew watho' bu'moejsaxan

²⁷ Do pejme kaes Jesús jum-aech pejnachalaliajwa, xabich asew jiwliajwabej, naewwuaajan wuton muaxxot: “Moisés chajia lelpox jum-aech: ‘iNabej bu'moejs asew watho', nijwaelpow!’ —aechox. Xamal chajia japox matabijam.

²⁸ Pe amwutjel, xan jum-anlax ampox. Xam pawis taenam wat, bu' moejsax bu'nejchaxoelam wat, ja-am wat, isam babijax japonejchaxoelaxtat japow pawisliajwa.

²⁹ “Isam wat babijax, taenam pox nej-itfutut, ja-am wat, kaes pejme pachaemaxael najut na-itfukusliajwam. Do jawux, jnej-itfut kutampox atuaj fo'im xamxot! Ja-am wat, kaes pejme pachaemaxaelam nej-itfut kaeyax, nafa' wat, Dios xam fo'asamata infierno poxadik.

³⁰ Isam wat babijax nejpoklake-etat, najut naketariowcham atuaj fo'aliajwam. Ja-am wat, kaes pejme pachaemaxaelam, xam nejke-e nafa' wat, Dios xam fo'asamata infierno poxadik” —aech Jesús, naewwuaajan wat muaxxot.

Jesús naewwuaajanpox poejiw, pels-elaliajwa pejwatho'

(Mt 19.9; Mr 10.11-12; Lc 16.18)

³¹ Do pejme kaes Jesús jum-aech pejnachalaliajwa, xabich asew jiwliajwabej, naewwuaajan wuton muaxxot: “Moisés chajia lelpox jum-aech: ‘Aton pijow fo'asia wat, japon pelfut lelaxael pijowliajwa. Japapelfutxot lelaxaelon, ma-aech xot fo'axaelon pijow. Do jawux, chaxdusaxaelon pijow japapelfut’ —aechox.

³² Pe amwutjel xan jum-anlax ampox. Poi asbuan jumch masoxtat pijow fo'axil, japow asan poi bu'moejs-el wat. Pe nakiowa, japon masoxtat pijow fo'a wat, ja-aech wat, japon pejbu'wuaajan Diosliajwa. Asan aton fit watbej fo'aspow, bu'moejtas wutbejpow, ja-aech wutbej, jarowbej pejbu'wuaajan Diosliajwa. Japon fo'aspow fit xot, japonbej pejbu'wuaajan Diosliajwa, bu'moejt xoton fo'aspow, Diosliajwafuk japow nakiowa pamal” —aech Jesús pejnachalaliajwa, xabich asew jiwliajwabej.

Jesús jiw naewwuaajanpox, machiyaxaeli, jumduw wat isaxaelpoxanliajwa

³³ Do pejme kaes Jesús jum-aech pejnachalaliajwa, xabich asew jiwliajwabej, naewwuaajan wuton muaxxot: “Xamal jumtaenambej nejwuaajnapijiw tato'laspox Dios. Japox jum-aech: ‘Xam jumdutam wat isaxaelampox Diosliajwa, japox chiekal isde!’ —aechox.

³⁴ Pe xan jum-an. Jumduwam wat isaxaelampox, ikaes asaxantat nabej jumdui! Jumduwampoxan isaxaelam wat, ichiekal jum-amde! iKaes asax nabej jum-aech' asew jiw asbuan jumch xamal naexasisliajwa jumduwampoxanliajwa! iNabej jum-aech': ‘Diachwuaajnakolax xan isaxaelen jumdutexpox, Dios pijaxtat jumdutxxot’ —nabej aech'! iNabej jum-aech'bej: ‘Diachwuaajnakolax xan isaxaelen jumdutexpox, puexa athuxotse pijaxtat’ —nabej aech', Dios pajut jaxotse duk xot!

³⁵ iNabej jum-aech'bej: ‘Diachwuaajnakolax xan isaxaelen jumdutexpox, jumdutxxot puexa ampathat pijaxtat’ —nabej ja-aech', Dios is xot ampathat! iNabej jum-aech'bej: ‘Diachwuaajnakolax xan isaxaelen jumdutexpox, jumdutxxot Jerusalén paklowax pijaxtat’ —nabej aech'bej, Dios kaen wajpaklokolan japon pejpaklowax xot!

³⁶ iNabej jum-aech'bej: ‘Diachwuaajnakolax xan isaxaelen jumdutexpox, tajnejchaxoelaxtat jumdutex xot’ —nabej aech' asanliajwa, xamal papoeilat kiladofaximil nejmatlat xot!

³⁷ Jumdutampox isaxaelam wat, ichiekal jum-amde: ‘Xan japox isaxaelen’ —amde! Is-eliasam wat, ikamta chiekal jum-amde: ‘Xan japox isaximil’ —amde! Kaes asaxan jumchiyaximil. Kaes asaxan jum-am wat, pelisdo' xam jumchiyaxaelam Satanás pijaxtat” —aech Jesús.

Jesús naewwuaajanpox jiw babijaxan ispi, japiajwa babijaxan is-elaliajwa
(Lc 6.29-30)

³⁸ Do pejme kaes Jesús jum-aech pejnachalalajwa, xabich asew jiwliajwabej, naewuajan wuton muaxxot: “Moisés chajia lelpox jum-aech: ‘Aton nej-iftut tabejt wut, japon pej-iftutbej xam tabejde! Aton nejbua’t jala wut, japon aton pejbua’tbej xam jalim!’ —aech Moisés chajia lelpox.

³⁹ Pelax xan jum-an. Aton babijax is wut xamliajwa, ixam nabej is babijax japonliajwa! Asan xam xutula wut, itapaem asaxulbej tulalajwapon!

⁴⁰ Asan xam dewatam xot, japon jumchisia juez pejwuajnalel xam dewatampoxanliajwa. Jawut, japon wuljow wut nejkamis, ijapox chaxdu’e! ¡Chaxdu’ebejpon thuch naxoelampox!

⁴¹ Soldawan xam xato’a wut kaekilómetro xalaeyax, ixam xalaem kolekilómetros!

⁴² Nejmach-aton, xabich wewe’paspon wut, japon wuljow wut malech, ¡chaxdu’e wuljowpox! Asan xam wuljow wut nijax, ¡el nabej aeche!” —aech Jesús, jiw naewuajan wut muaxxot.

Jesús naewuajanpox pejnachala nejxasinkalajwa padaelmajiw
(Lc 6.27-28, 32-36)

⁴³ Do pejme kaes Jesús jum-aech pejnachalalajwa, xabich asew jiwliajwabej, naewuajan wuton muaxxot: “Moisés chajia lelpox jum-aech: ‘¡Nejxasinkde nejnachala! ¡Pelax nejwes-lade nadaelmajiw!’ —aechox. Xamal japox chiekal matabijam.

⁴⁴ Pelax amwutjel xan jum-an. ¡Xamal nejxasinkde nadaelmajiw! ¡Japiliaw Dios kawuajandebej, japi is wut babijaxan xamallijaw!

⁴⁵ Ja-am wut, japi jiw matabijaxael, nej-ax Dios, japon paximpim, athuxotsepon. Nej-ax Dios to’a masxaeyax jiw babejchowliawja, pachaempiliawwabej. To’abejpon iam babej-chowliawja, pachaempiliawwabej.

⁴⁶ Xamal nejxasinkam wut xamal nejxasinkpikal, ja-am wut, xamal is-emil pachaempox asew jiwliawja. Impuesto kenoti Roma gobiernolijawja, japibej nakaebabejchow nanejx-asink.

⁴⁷ Kejacham wut xamal nejxasinkpikal, ja-am wut, xamal kaes pejme pachaempox is-emil asew jiwliawja. Dios naexaxis-elpi, japibej nakaewa nakejacha.

⁴⁸ ¡Isfulde puexa pachaempoxan! Me-ama nej-ax Dios, athuxotsepon, isful pachaempoxan, ¡xamalbej ja-amsfulde!” —aech Jesús, naewuajan wut muaxxot.

6

Jesús jiw naewuajanpox isliawja pachaempoxan

¹ Do pejme kaes Jesús jum-aech pejnachalalajwa, xabich asew jiwliajwabej, naewuajan wuton muaxxot: “Isaxaelam wut pachaempoxan, ¡japoxan isde! Japoxan isaxaelam wut, ¡nabej is asbuan jumch asew jiw xamal taelijawja pachaempoxan isampoxan! Japoxan isaxaelam wut asbuan jumch asew jiw taelijawja, ja-am wut, nej-ax Dios, japon athuxotsepon, chaxduiyaxil jumdutpoxan.

² “Samata, kejila kajachawaetam wut, ¡asew jiw nabej lae’, japi taelijawja xamal kajachawaetampox! Asew jiw lam wut kajachawaetampox taelijawja, ja-am wut, xamal, me-ama naekichachajbapijiw jachiyaxaelam. Naekichachajbapijiw pat wut judíos naewuaj nabachanxot, japi kajachawaet kejila, o, paklowaxthialaxanxot wutbej, japi japoxan is asew jiw taelijawas. Diachwuajnakolax xan jum-an. Japi asew jiw sitaens xot, japox, me-ama moch wut, jatispi. Samata, Dios mosaxisal japi jiw.

³ Xamallax kejila kajachawaetam wut, ¡nabej chapae’ asan aton! Nejnachalan, kaes nejxasinkamponbej, ¡nabej chapae’!

⁴ Kejila kajachawaetam wut, ¡kajachawae’e maliach! Do jawut, nej-ax Dios, taenpon maliach isampoxliawja, japon xamal mosaxael maliach kajachawaetampoxliawja kejila” —aech Jesús, naewuajan wut muaxxot.

Jesús chanaekabwanapox pejnachala, jumchiyaxaeli, Dios kawuajan wut
(Lc 11.2-4)

⁵ Do pejme kaes Jesús jum-aech pejnachalalajwa, xabich asew jiwliajwabej, chanaekabuana wut muaxxot: “Xamal Dios kawuajnam wut, ¡nabej kawuajne’, me-ama naekichachajbapijiw! Japi Dios kawuajan wut, nejxasink nuilalijawja asew jiw pejwuajnalel judíos naewuaj nabachanxot, o, paklowaxthialaxanxot wut. Diachwuajnakolax xan jum-an. Japi asew jiw sitaens xot, me-ama moch wut, jatispi. Samata, Dios mosaxisal japi.

⁶ Xamallax Dios kawuajnam wut, ¡fulaem nejba poxade, Dios kawuajnalijawjam wut! Ba lowam wut, ba faka’tam wutbej, do jawut, ¡nej-ax Dios kawuajande! Do jawutbej, nej-ax Dios, japon matabijtpon maliach isampoxanliawja, japoxanliawja xamal mosaxaelon.

7 “Dios kawuajnam wut, ꞑkaeyaxkal nabej kawuajne! Me-ama Dios matabija-eli kaeyax kawuajnak, ꞑxamal nabej ja-aeché! Japi nejchaxoel chiekal matabija-elaxtat: ‘Kaeyax kawuajnakas wut, Dios naknaewesaxael’ —aechi asbuán jumch, nejchaxoel wut.

8 Xamal, me-ama japi, ꞑnabej ja-aeché! Nej-ax Dios chajia chiekal matabijt xamal wewe’ppoxan, japon wuljoe-emil wutfuk.

9 Samata, xamal Dios kawuajnam wut, ꞑjum-amde: ‘Ax Dios, xam athupijnam, ꞑpuexa jiw xam nej sitae!’

10 ꞑPuexa nejjiw tato’laxaelammatkoi nej tuadus! Amwutjel xamxotse puexa nej-ángeles isfal, me-ama xam nejxasinkam. Jasoxtatbej puexa jiw, ampathatpijiw, ꞑnej is xam nejxasinkampoxan!

11 ꞑMa amwut xanal naxaeyaxan nachaxduim, nawewe’ppoxan!

12 ꞑXanal nabeltaem babijaxan isxpoxanliajwa! Me-ama asew jiw xanal beltaenx, japi babijaxan is wut xanalliajwa, ja-amdebej xanalliajwa!

13 ꞑNabej tapae’ Satanás xanal naxapaejalijwa, babijaxan isasamatan! ꞑXanal naka-jachawae’e babijaxan isasamatan! [Xam kaenam paklokolnam. Kaenambej kaes pejme xabich mamnikamponam. Xam kaenam xabich pachaemamponambej pomatkoichaliajwa. ꞑNej ja-aechfule’bej japox!'] —amde, Dios kawuajnam wut!” —aech Jesús, naewuajan wut muaxxot.

14 Do kaes pejme Jesús jum-aech pejnachalaliajwa, xabich asew jiwliajwabej, naewuajan wuton muaxxot: “Asew jiw beltaenam wut, japi babijaxan is wut xamalliajwa, ja-am wut, nej-ax Dios, athaxotsepon, beltaeyaxael xamal babijaxan isampoxanliajwa japonliajwa.

15 Xamal asew jiw beltae-emil wut, nej-ax Diosbej xamal beltaeyaxil!” —aech Jesús, naewuajan wut muaxxot.

Jesús naewuajan pejnachala machiyaxaeli, naxae-el wut piach Dios kawuajnalijwa wut

16 Do pejme kaes Jesús jum-aech pejnachalaliajwa, xabich asew jiwliajwabej, naewuajan wuton muaxxot: “Xamal naxae-emil wut Dios piach kawuajnalijwam, ꞑnejxuchantat nabej tampae! Me-ama naekichachajbapijiw, ꞑnabej ja-aeché’ xamal! Xan diachwuajnakolax jum-an. Japi asew jiw sitaens xot, me-ama moch wut, jatispi. Samata, Dios mosaxial japi jiw.

17 Xamal naxae-emil wut, Dios piach kawuajnalijwam wut, ꞑmin xukia’e! ꞑChiekal nachaemdebej!

18 Jasox isam wut, asew jiw matabijaxil xamal naxae-emilpox, Dios piach kawuajnalijwam wut. Nej-ax Dios, xamal taeyaximilpon, japonkal taeyaxael. Do jawut, nej-ax Dios matabijsaxael maliach isampox. Ja-am wut, Dios xamal mosaxael!” —aech Jesús, naewuajan wut muaxxot.

Jesús naewuajanpox pejnachala ommaenkpoxan Diosxotse

(Lc 12.33-34)

19 Do pejme kaes Jesús jum-aech pejnachalaliajwa, xabich asew jiwliajwabej, naewuajan wuton muaxxot: “ꞑNabej nejchaxoele’ owaliajwam ommaenkpoxan ampathatat! Am-pathatat owam wut ommaenkpoxan, japoxan toepaxael. Xoepaxaelbej. Kethaka nosaxaelbej japoxan.

20 ꞑChiekal nabichfulde Diosliajwa! Ja-amsfulam wut, pachaempoxan xamalliajwaxael Diosxotse. Jaxotse toepaxil. Xoepaxilbej. Kethaka ajilaxaelbej xamal wenosliajwa.

21 Diosxotse, jaxotse Dios xamal chaxduiyaxael pachaempoxan. Samata, nejchaxoelafalaxaelam pasliajwam Diosxotse” —aech Jesús, naewuajan wut muaxxot.

Jiw pej-itfutan, me-ama lámparas wut, ja-aechpox

(Lc 11.34-36)

22 Do pejme kaes Jesús jum-aech pejnachalaliajwa, xabich asew jiwliajwabej, naewuajan wuton muaxxot: “Lámparas chiekal itliak wut, puexa jiw batu chiekal taen. Ja-aechbej nej-itfutan. Xamal chiekal taenam, nej-itfutan pachaem wut.

23 Nej-itfutan chaemil wut, xamal chiekal taeyaximil. Me-ama itliaklan wut, jachiyaxaelam. Jachiyaxaelbej nejnejchaxoelaxan. Dios we-italiafa wut nejnejchaxoelaxan, ja-aech wut, nejnejchaxoelaxan chiekal pachaemaxael. Ja-am wut, Dios tato’alpox nejxasinkaxaelam isfalaliajwam. Chiekal duilaxaelambej. Pachaema-el wutlax nejnejchaxoelaxan, Dios naexaxisaximil. Samata, ꞑchiekal taem nejchaxoelampoxanliajwa! Babijaxan nejchaxoelam wut, ja-am wut, nejnejchaxoelax, me-ama itkuatax wut, jachiyaxael. Do ja-aech wut, xamalbej babejchow nadofaxaelam. Ja-am wut, xan nanaexaxisaximil!” —aech Jesús, naewuajan wut muaxxot.

Nabichan kolenje wut pejpaklochow, japiliajwa japon chiekal najupatanbichaxilpox
(Lc 16.13)

²⁴ Do pejme kaes Jesús jum-aech pejnachalaliajwa, xabich asew jiwliawwabej, chanaekabuan wut muaxxot: “Nabichan kolenje wut pejpaklochow, japijliawwabej chiekal najupatanbichaxil. Kaen paklonliawwabej chiekal tanbichaxaelon. Asan paklonliawwabej chiekal tanbichaxilon. Ja-aechlap-is nejxasinki Dios. Japi nejchaxoel wut platakak, japi chiekal nabichaxil Diosliawwabej” –aech Jesús, naewuajan wut muaxxot.

*Dios tataefulpox jiw xanaboejapi japon
(Lc 12.22-31)*

²⁵ Do pejme kaes Jesús jum-aech pejnachalaliajwa, xabich asew jiwliawwabej, naewuajan wuton muaxxot: “Xan ampox jum-an xamalliajwa, xabich nejchaxoelasamatam xaeliajwampoxan, feliajwampoxanbej. ¡Xabich nabej nejchaxoele'bej naxoeliasampoxan! Duila-esal naxaeyaxkalliajwa. Duila-esalbej naxoekalliajwa. Dios nakchaxduiful nakwewe'ppoxan duilialiajwas japoxantat. Samata, Dios nakchaxduiyaxael naxaeyaxan, naxoebej.

²⁶ Xamal taenam mia, papun wut. Japi mutha-el naxaeyaxan. Jola-elbejpi cha-owaliajwa naxaeyaxan. Pe nakiowa, nej-ax Dios, athupijin, chaxduiful naexaeyaxan mia xaeliajwa. Dios xamal kaes pejme nejxasink. Me-ama mia nejxasink wut, jachi-elon. Samata, nej-ax Dios xamal chiekal tataeflufal.

²⁷ Ja-aech wut, ¿ma-aech xotkat xamal nejchaxoelam japoxanliawwabej? Japoxan xabich nejchaxoelam wut, kaes matkoianliawwabej laepaximil.

²⁸ “¿Ma-aech xotkat xabich nejchaxoelam naxoeliasampoxan? ¡Taem naetalan, chimiatalan, yotat! Japi ti't wut, nabich-el chimialiajwa. Pe puexa chimiapi.

²⁹ Xan jum-an. Rey Salomón, japon wajwajnapijin, pejew naxoe xabich chimia. Naxoeipon chimia, kemaenk xot. Pe naetalan kaes chimiatalan. Me-ama rey Salomón pejew naxoe, jachi-el.

³⁰ Pola ti't wut yotat, Dios pijaxtat natala wut, nakola chimiatalan. Pe piachliawwabej-el. Kaematkoianliawwabej asbuan jumch. Do jawux, selil wut, tux. Do jawut, tajejas lausliawwabej. Pelax Dios xabich kaes tataeflaxael xamal. Me-ama naetalan tataeful wut, jachiyaxilon. Samata, ¡Dios chiekal xanaboejim naxoeliasampoxan chimia, kaeswapich wut nejxanaboejapan Diosliawwabej!

³¹ Samata, ¡xabich nabej nejchaxoele' xaeliasampoxan, feliasampoxanbej! ¡Xabich nabej nejchaxoele'bej naxoeliasampoxan! ¡Pelax Dioskal xanaboejim!

³² Jiw matabija-eli Dios, japi xabich nejchaxoelafal japoxanliawwabej. Nej-ax Dios, athupijin, matabijt xamal wewe'ppoxan.

³³ Samata, amwutjel kaes pejme pachaem xamal Dios naexaxisfulaliajwam, japon kaen nejpaklokolan. ¡Isfulde Dios jum-aechpoxan! Japox isam wut, Dios xamal chaxduiyaxael puexa wewe'ppoxan.

³⁴ Samata, ¡xabich nabej nejchaxoele' asamatkoi jachiyaxaelpoxliawwabej! ¡Kofim nejchaxoelampox kandiawaliawwabej! Samata, ¡ma amwut najutliawwabej nejchaxoelde, machiyaxaelam amwut! Ja-aech wut, Dios chaxduiyaxael xamal wewe'ppoxan” –aech Jesús, naewuajan wut muaxxot.

7

*Jesús buxfiatpox pejnachala, japi jumchisamata: “Japi jiw babejchow xot, wewe'pas Dios kastikaliajwas” –chisamatapi
(Lc 6.37-38, 41-42)*

¹ Do pejme kaes Jesús jum-aech pejnachalaliajwa, xabich asew jiwliawwabej, naewuajan wuton muaxxot: “¡Xamal asew jiwliawwabej nabej jum-aechel: ‘Ampi jiw babejchow. Samata, Dios kastikaxaesi’ –nabej aeche!’ Jaxox jum-am wut asew jiwliawwabej, asamatkoi Dios xamal jumchiyaxaelbej: ‘Xamal babejchowambej. Samata, xamalbej kastikaxaelen’ –chiyaxael Dios xamalliajwa.

² Jasoxtat Dios jumchiyaxael xamal, asew jiwliawwabej jum-am xot: ‘Ampi jiw babejchow. Samata, kastikaxaesi’ –am xot. Chaxduwam wut asew jiw wewe'paspojan, ja-am wut, Dios xamal chaxduiyaxael wewe'ppoxan.

³ Xamal najut kaes babijaxan isam wut, ¡nabej fias, asan aton babijax is wut! Aton, asan kajachawaesasia wut, cha-aelaxach ast it-okspon, japon pajutlax kaes pejme pinjiyax naetamat it-oks wut, jasoxtat japon aton, asan kajachawaesaxil.

⁴ Xamal najut kaes babijaxan isfulam wut, ¡asan nabej jum-aechel: ‘¡Natapaem xam kajachawaesliawwabej babijax is-elaliajwam!’ –nabej aeche!’

⁵ Ja-am wut, xamal naekichachajbapijwaxaelam. ¡Matxoele kofim najut babijaxan isampoxan! Do jawux, asan kajachawaesaxaelam, japon kofsliajwa babijaxan isampoxan.

⁶ “Xamal matabijam amprox. Wur duajsaximil Diosliajwapox. Wur, palalapi, duajtam wut Diosliajwapoxan, wur bej liklaxaelbej xam. Maranxotbej owaximil ommaenkproxan. Maranxot japoxan owam wut, maran japoxan asbuan jumch sae-enaxael” —aech Jesús, naewuajan wut muaxxot. (Samata, jiw sitae-el wut naewuajnasproxan Diosliajwa, japi jiw kaes naewuajnalisal.)

*Jesús naewuajanpox pejnachala, japi wewe'pasproxan wuljoelajwapi Dios
(Lc 11.9-13; 6.31)*

⁷ Do pejme kaes Jesús jum-aech pejnachalalajwa, xabich asew jiwliajwabej, naewuajan wuton muaxxot: “¡Dios wuljoem wewe'ppox! Wuljowampox japox Dios chaxdusaxael. Wulwekam wut wewe'ppox, japox faenaxaelam Dios pejkajachawaesaxtat. Xamal Dios kawuajnam wut, me-ama bafafaxot lam wut, ja-am xamal Dios kajachawaesliajwa.

⁸ Wuljoefulpon wewe'pasprox, japon Dios chaxdusaxaes. Wulwekafulpon japonbej faenaxael Dios pejkajachawaesaxtat. Dios kawuajnafulpon, japonbej Dios kajachawaesaxaes isliajwa japox.

⁹ “¿Xamalxot naxi wuljow wut pan, xamalkat xajupaxaelam naxulan chaxdusliajwam ia't?

¹⁰ Naxulan baxin wuljow wut, chaxdusaximil jom.

¹¹ Xamal babejchowam matabijam naxi chaxduilajwam pachaempoxan. Nej-ax Dios, athupijin, kaes pejme pachaem. Samata, nej-ax Dios pachaempoxan xamal chaxduiyaxael, xamal wuljowam wut.

¹² “Samata, jmatxoela isfulde pachaempoxan asew jiwliajwa! Me-ama xamal nejxasinkam asew jiw isliajwa pachaempoxan xamallajwa, japoxlap isfulde japi jiwliajwa! Jasoxtat naexaxisfulaxaelam puexa Moisés chajia lelpox, Dios pejprofetas chajia lelpoxbej” —aech Jesús, naewuajan wut muaxxot.

*Asew jiwliajwa xabich tampoelpox, japi naexaxisliajwa Dios
(Lc 13.24)*

¹³ Do pejme kaes Jesús jum-aech pejnachalalajwa, xabich asew jiwliajwabej, naewuajan wuton muaxxot: “¡Laleyax cha-aelaxachlel lem pasliajwam Diosxotse! Laleyax pinjiyax, nuamt pinjitpotbej, japoxan koleyax, pasliajwa infernoxotdik. Samata, xabich jiw fulalaej japoxadik, tup wuti ampathatat, kaes tampa xot fulaeliajwadik.

¹⁴ Laleyaxach tampoel jiw leliajwa pasliajwa Diosxotse. Nuamtbej cha-aelaxach. Samata, tampoel jiw fulaeliajwa pasliajwa Diosxotse. Ja-aech xot, kaeswapich jiw jaxotse pat, tup wuti ampathatat” —aech Jesús, naewuajan wut muaxxot.

*Pejbaech pachaem wut, matabijas japanae pachaempox
(Lc 6.43-44)*

¹⁵ Do pejme kaes Jesús jum-aech pejnachalalajwa, xabich asew jiwliajwabej, naewuajan wuton muaxxot: “¡Chiekal taem naekichachajbapijiwliajwa! Japi jiw, me-ama Dios pejprofetas wut, jachiyaxaeli. Pe japi profetaxil. ¡Nabej tapae' japi jiw xamal naekichachajbaliajwa! Japi jiw, me-ama pachaem wut, jachiyaxaeli. Pe pejnejchaxoelaxan xabich chaemil. Puexa japi naewuajanproxanbej, xabich chaemil asew jiwliajwa.

¹⁶ Xamal matabijaxaelam japi isproxantat. Japi jiw, me-ama na-e'naechan. Japanaechan naboese-el chimiabaech. Samata, japi jiw wejisal pachaempoxan Diosliajwa, naekichachajbapijiw wut.

¹⁷ Pachaemnae naboet wut, pachaembej pejbaech. Chaemilnae naboet wut, chaemil pejbaechbej.

¹⁸ Pachaemnae naboesaxil pejmachbaech. Chaemilnae naboesaxilbej pachaembaech.

¹⁹ Samata, puexa naebaechnaechan, pachaema-eli, japanaechan liksaxaes lausliajwas.

²⁰ Jachiyaxaesbej jiw, chaemili. Xamal chiekal matabijaxaelam, japi is wut babijaxan” —aech Jesús, naewuajan wut muaxxot.

*Jesús naewuajanpox kaeswapich jiw pasaxaelpox Diosxotse
(Lc 13.25-27)*

²¹ Do pejme kaes Jesús jum-aech pejnachalalajwa, xabich asew jiwliajwabej, naewuajan wuton muaxxot: “Jiw pasaxael Diosxotse, isful wut taj-ax Dios nejxasinkproxan. Asew jiw asbuan jumch jum-aech wut xanliajwa: ‘Jesús tajpaklon’ —aech wuti, japi pasaxil Diosxotse, is-el xoti Dios nejxasinkproxan.

²² Kastikamatkoi pat wut, xabich jiw jumchiyaxael xanliajwa: ‘Tajpaklon, xanal jiw xabich naewuajnox xamliajwa. Nijaxtat xabich dep to'ax nakolaliajwa jiw pejmatpuatanxot. Koechaxanbej isx xam nijaxtat’ —chiyaxael japi jiw xanliajwa.

²³ Xanlax tulaela jumchiyaxaelen japi jiwliajwa: ‘¡Chijiamde xanxot, xamal babijaxan isampim! Chinax xamal matabijs-enil’ —chiyaxaelen” —aech Jesús, jiw naewuajan wut muaxxot.

Jesús naksiyapox kolebaliajwa
(Lc 6.47-49)

²⁴ Do pejme kaes Jesús jum-aech pejnachalaliajwa, xabich asew jiwliajwabej, naewuajan wuton muaxxot: “Jiw chiekal naewet wut naewuajnaprox, naexasit wutbejpi tajtato'lanan, japi jiw chiekal nejchaxoel. Samata, japi jiw, me-ama bachan ispi sat tinkxot wut, ja-aechi.

²⁵ Tam thilan wut, pinamin wutbej, xabich pinajoewa wutbej, japabachan taxu'palaxil, chiekal isas xot sat tinkxot.

²⁶ Xan naewuajnaprox jiw naewet wut, pe naexasis-el wuti xan tato'laxpoxan, japi jiw, me-ama matabijsla wut, ja-aechi. Japi, me-ama bachan iapi thaejtat.

²⁷ Tam thilan wut, pinamin wutbej, xabich pinajoewa wutbej, japabachan chiekal juwal, japabachan ias xot thaejtat. Chiekal toepaxaelbej japabachan” —aech Jesús, naewuajan wut muaxxot.

²⁸ Do jawut, Jesús naewuajnaprox buxtoet wut, japi jiw jum-aech: “Jesús naewuajanproxan xabich pachaem” —aechi.

²⁹ Jasox jum-aechi, Jesús naewuajan xot Dios pijaxtat. Jesús naewuajan wut, me-ama judíos chanaekabuanapi, jachi-elon.

8

Jesús boejthutpox bu'xaenkpon leprawaxaetat
(Mr 1.40-45; Lc 5.12-16)

¹ Dolisdo', Jesús jiw naewuajnaprox buxtoet wut, bu'loek wuton muaxxot, xabich jiw fulafoson.

² Jawut leprawaxaetat bu'xaenkpon, fulaenon Jesúslel. Pat wuton Jesúsxot, brixtat nukon Jesús pejwuajnalel sitaeyax itraeliajwa Jesúsliajwa. Do jawut, jum-aechon:

—Tajpaklon, xan matabijtax xam xajupampox xan naboejthusliajwam. Naboejthusasian wut, jnaboejthu'e! —aech leprawaxaetat bu'xaenkpon.

³ Jesús pejke-etat jacha wut, jawut Jesús jum-aech bu'xaeyanliajwa:

—Xam boejthusasian. Malis xam boejthutx —aech Jesús japonliajwa.

Do jawut, kamta japon chiekal boejthutslison leprawaxae.

⁴ Do jawut, Jesús pejme jum-aech:

—jAsew jiw nabej chapae' xam boejthutpox! jMatxoela fulaemch sacerdote poxade, japon xam taeliajwa boejthutpox leprawaxae! Do jawut, jDios chaxdu'e, me-ama Moisés chajia lelpox jum-aech, leprawaxae xam chiekal boejthut xot! Jasoxtat jiw matabijaxael xam boejthutpox leprawaxae —aech Jesús japonliajwa.

Jesús boejthutpox soldawcapitán pamakan
(Lc 7.1-10)

⁵⁻⁶ Jesús pat wut Capernaum paklowaxxot, jawut soldawcapitán, Roma gobiernoliajwa nabistpon, pat Jesúsxot. Soldawcapitán wuljow wut, jum-aechon Jesúsliajwa:

—Tajpaklon, tamakan ok camatat tajbatat. Japon nansaxil. Laejaxilbejpon. Xabich nabijaton xaenkproxantat —aech soldawcapitán Jesúsliajwa.

⁷ Do jawut, Jesús jum-aech soldawcapitánliajwa:

—Xam nakfulaeyaxaelen nejba poxade namakan boejthusliajwan —aech Jesús.

⁸ Do jawut, soldawcapitán jum-aechon Jesúsliajwa:

—Tajpaklon, xan xabich pachaema-enil xam leliajwam tajba, xam kaes pejme paklokolnam xot. Ma amxot waxae to'am wut, tamakan chiekal boejthutlaxaeson.

⁹ Xanbej tajpaklochow. Japi naketo'a wut, xan tajut ow-an. Xanbej soldawcapitánan. Kaen soldawan keto'ax wut, japon na-ow-aech. Asan lax wut, japon fulaen. Tamakanbej keto'ax wut, keto'axpox japon chiekal jinawe-is. Xanbej jiw tato'lanam. Samata, ma amxot waxae to'am wut, tamakan chiekal naweboejthutlaxaes —aech soldawcapitán Jesúsliajwa.

¹⁰ Jesús japox jumtaen wut, nejchaxoelanukon, capitán xabich xanaboejtaspox. Samata, Jesús jum-aech puexa jiw jumtaeliajwa:

—Diachwuajnakolax xan jum-an. Israel tuajnxot xan xabich naxanaboejtpon, me-ama ampon capitán, jason tae-enil —aech Jesús jiwliajwa.

¹¹ Do pejme Jesús jum-aech japi jiwliajwa:

—Xamal jum-an ampxox. Xabich jiw, pothatapijiw, japi judíos-eli, pasaxael Diosxotse. Jaxotse chalaxaxaeli naxaeliajwa, wajwuajnapijiw suapich. Abraham, Isaac, Jacobbej, japi suapich, naxaeyaxaeli.

¹² Pelax xabich judíos pelsaxaes itkautax poxadik, 'Infierno' —tis poxadik. Jaxotdik xabich noeyaxaeli. Bua'tatisaxaelbejpi, xabich nabijasaxael xot —aech Jesús japi jiwliajwa.

¹³ Do jawut, Jesús jum-aech soldawcapitánliajwa:

—¡Nawia'mich nejba poxade! Namakan chiekal boejthulsison, xam xabich xan naxan-aboejtam xot —aech Jesús.

Do jawut, capitán pamakan chiekal boejthulspon.

*Jesús boejthutpox Simón Pedro paem
(Mr 1.29-31; Lc 4.38-39)*

¹⁴ Do asamatkoi, Jesús fulaech wut Pedro pejba poxade, jaxotde ba low wut, taenpon Simón Pedro paem bu'xaenkpox. Japow ok camatat. Xabich bu'tuajnikow.

¹⁵ Jesús kefit wut, jawut kamta chiekal boejthulsow. Do jawut, nant wut, pajut naxaeyaxan athukow Jesúsliajwa, asew jiwliajwabej.

*Jesús boejthutpox xabich jiw, bu'xaeya
(Mr 1.32-34; Lc 4.40-41)*

¹⁶ Do tuila wut, itkuatnik wutbej Jesúslel xabich jiw buflaeni asew jiw, dep webaesi pejmaturatanxot. Do jawut, Jesús kaejemetat dep to'a puexa dep nakolaliajwa jiw pejmaturatanxot. Jawutbej puexa asewbej, japi bu'xaeya, chiekal boejthuls.

¹⁷ Ampox ja-aech, me-ama Dios pejprofeta, Isaias, chajia lelpox jachiliajwa. Jum-aechox: "Japon xatis nakkajachawaesaxael, bichilas wut. Bu'xaenkas wut, nakboejthuxaxaelbejpon" —aech Isaias lelpox, jum-aech wut Jesúsliajwa.

*Asew jiw, nakanuamsasiapox Jesús
(Lc 9.57-62)*

¹⁸ Jesús taen wut xabich jiw masajiachpox, jawut jum-aechon pejnachalialiajwa: —¡Chijias puka we-enlelde falkamat! —aechon.

¹⁹ Do jawut, judíos chanaekabuanan mox soepan wut, jum-aechon Jesúsliajwa: —Jiw chanaekabuanan, xanbej xam nakanuamsasian, nejmachtuajnuchan poxade xam nanaamtam wut —aechon.

²⁰ Do jawut, Jesús jum-aech judíos chanaekabuananliajwa:

—Lam pejmathan moesliajwa. Miabej pejfenan. Xanlax, puexa jiw pakoewkolnan, ajil tajbakolaba xan damlathulaliajwan —aech Jesús judíos chanaekabuananliajwa.

²¹ Do jawut, asan pejnachalan jum-aechbej Jesúsliajwa:

—Tajpaklon, xan taj-ax xabich pati'in. ¡Xanfuk natapaem taj-axxot dukaliajwan! Taj-ax tup wut, do jawut, xam nakanuamsaxaelen —aechon Jesúsliajwa.

²² Do jawutbej, Jesús jum-aech japonliajwa:

—¡Xamlax xan nakfulaem! Xan nanaexasis-elpi, japi jiw, me-ama patapa wut, kabuan-aechi Diosliajwa. Japilap nakaewa namuthaxael, tup wut —aech Jesús japonliajwa.

*Jesús fiatpox joewa, truxanbej
(Mr 4.35-41; Lc 8.22-25)*

²³ Do jawux, Jesús falkam jul, pejnachala suapich.

²⁴ Jawut, chaflaech wuti, chalechkal pat iam, pinjiyax, Galilea pukaxot. Xabich pin-truxan, pinajoewabej. Xabich falkam min fajabas. Japox ja-aech wut, Jesús nejmach moejt.

²⁵ Do jawut, Jesús pejnachala thikalisipon. Jum-aechlisipon:

—Tajpaklon, ¡xanal nabu'wem, chabu'laxaes xot! —aechipon.

²⁶ Do jawut, Jesús jum-aech pejnachalialiajwa:

—¿Ma-aech xotkat xamal nejlewla? ¡Xamal xabicha-el nejxanaboejxan xanliajwa! —aech Jesús pejnachalialiajwa.

Samata, jawut, Jesús nant wut, fiatlison joewa, truxanbej. Do jawut, puka chiekal itnapatan.

²⁷ Do jawut, pejnachala xabich natachaema wut, nejchaxoelanuili japoxliajwa. Samata, nakaewa najum-aechi:

—¿Achankat ampon? Joewa, pukabej, naexasichpon —na-aechi nakaewa.

*Jesús to'apox dep nakolaliajwa, kolenje aton pejmaturatanxot
(Mr 5.1-20; Lc 8.26-39)*

²⁸ Jesús puka we-enlelde wut, Gadara tuajnuaxot chapa'apon, pejnachala suapich. Do jawut, kolenje poi fulaen Jesúslel. Japi fulaen patupamathanxotdin. Japi kolenje xabich chachoel dep pijaxtat. Samata, jiw pejlewla mox xenaliajwa japixot.

²⁹ Do jawut, nejlat wut, jum-aechi dep pijaxtat:

—Jesús, Dios paxulan, ¡xanal nabej natalias! ¿Ma-aech xotkat xam fulaeman xanallel nataliasliajwam xat toepax wuajna? —aechi.

³⁰ Jaxotde kaesuapich atuxachlejen xabich maran naxaelp.

³¹ Do jawut, japi dep jum-aech Jesúsliajwa:

—Xanal ampi poejixot nakolax nato'am wut, ¡natapaem leliajwan maranxot! —aech dep.

³² Do jawut Jesús jum-aech:

—Jaw, ¡xabua'de! ¡Lem maranxot! —aech Jesús japi depliajwa.

Do jawut dep nakola wut poejiwxot, lowlisi maranxot. Jawut, puexa maran dukp chuatadik. Do jawut puexa maran bu'al pukatat.

³³ Maran tataefulpi dukp pejlwut. Patlisi pejpaklowaxxot. Chapaeilisi puexa maranliajwa-aechpoxan, dep low wut maranxot.

³⁴ Do jawut, puexa japapaklowaxpijw fulaen Jesúsleldin. Do jawut, japi jiw taen wuti Jesús, to'api Jesús namanasamata japi pejtuaajuxot.

9

Jesús boejthutpox nabejkan, japon chinax laejaxilpon

(Mr 2.1-12; Lc 5.17-26)

¹ Do jawux, Jesús jul falkam, pejnachala swapich, chaliknaliajwa puka we-enlelde, pejpaklowax, Capernaum paklowax, poxaliajwade.

² Do jaxot Jesús pat wut, pejnachala swapich, jawut asew jiw chaxlaeni kaen nabejkan Jesúslel, japon chinax laejaxilpon. Japon ok camillatat. Jesús chajia matabijt japi pejxan-aboejxan japonliajwa. Samata, Jesús jum-aech nabejkanliajwa:

—Wua, ¡nejchachaemilde! Xam beltaenx, majt pachaemam wut babijaxan isampoxanliajwa—aech Jesús laejaxilponliajwa.

³ Jesús japox jum-aech wut, jawut, asew judíos chanaekabuanapi japox jumtaen wut, nakaewa najum-aechi: “Kaen Dios xajap jiw beltaeliajwa, japi babijaxan is wut. Samata, Jesús japox jum-aech wut, jum-aechon chaemilpox Diosliajwa”—aechi nakaewaliajwa.

⁴ Jesús chiekal matabijt japi nejchaxoelpon. Samata, jum-aechon japiliajwa:

—¿Ma-aech xotkat xamal nejchaxoelam babijaxan xanliajwa?

⁵ Kaes pejme tampa xan jumchiliajwan laejaxilponliajwa: ‘Xam beltaenx babijaxan isampoxanliajwa’—chiliajwan. Pe ja-an wut, jiw xan namatabijaxil xan puexa jiw pakoewkolnanponan. Jum-an wutlax nabejkan jumtaeliajwa: ‘¡Nande! ¡Laejim!’—an wut, japox jum-an wut, jiw diachwujnakolax xan namatabijsaxael xan puexa jiw pakoewkolnanponan.

⁶ Samata, xamal itpaeyaxaelen xan puexa jiw pakoewkolnanponan. Xan xajapx beltaeliajwan jiw babijaxan ispoxanliajwa ampathatat—aech Jesús judíos chanaekabuanapiliajwa.

Samata, Jesús jum-aechbej nabejkan jumtaeliajwa:

—¡Nande! ¡Nejcamilla fi'e! ¡Xalaemch nejba poxade! —aech Jesús.

⁷ Do jawut, nabejkan nant wut, fulaechlison pejba poxade.

⁸ Puexa jiw japox taen wut, xabich natachaemanuil wut, nejchaxoelanuilbejpi. Do jawut, nakaewa najum-aechi: “¡Dios xabich pachaem! Dios pejpamamax Jesús kalliajwa”—aechi nakaewaliajwa.

Jesús tadatpox Mateo pejnachalanliajwa

(Mr 2.13-17; Lc 5.27-32)

⁹ Jesús boejthut wut nabejkan, baxot nakolt wut, do jawut, xan nataenpon. Xan tajwul Mateo. Xan ekx impuesto mat-omwuljowbatat, mat-omwuljoeliajwan Roma gobiernoliajwa. Jesús xan nataen wut, najum-aechon:

—¡Xabua't! ¡Xan nakfulaem tajnachalnamliajwa! —aech Jesús xanliajwa.

Do jawut, xan nantax wut, Jesús nakfolxlison.

¹⁰ Asamatkoi, tajbatat Jesús naxael wut, xanal pejnachalwan swapich, impuesto mat-omwuljoew Roma gobiernoliajwa, japibej pat Jesúsxot. Do jawut, japibej chalak naxaeliajwa. Asew jiwbej, Moisés chajia lelpox naexasis-elpi, japibej pat jaxot. Japibej jaxot chalak naxaeliajwa, xanal swapich.

¹¹ Fariseos, japox taen wut, jum-aechi xanalliajwa, Jesús pejnachalwanpinliajwa:

—¿Ma-aech xotkat Jesús, nejchanaekabuanan, kaeyaxtat naxael, impuesto mat-omwuljoewpi swapich, asew babejchow swapichbej, japi naexasis-eli Moisés chajia lelpox? —aechi xanalliajwa, Jesús pejnachalwanpinliajwa.

¹² Jesús japox jumtaen wut, jum-aechon fariseosliajwa:

—Jiw nejchaempi, japi wewe'pa-esal jiw woen, bu'xaenka-el xoti. Jiw woen fulaen jiw bu'xaenkpi woeliajwa. Xanlap-is ja-an. Xan fulae-enil kajachawaesliajwan jiw pachaem wut, kabuan-aechpi. Xanlax fulaenx kajachawaesliajwan babejchow, japi kofaliajwa padujnejchaxoelaxan naexasisliajwapi Dios—aech Jesús.

¹³ Jesús pejme jum-aech fariseosliajwa:

—¡Chiekal nejchaxoelde Dios jum-aechpox, jum-aech wut: ‘Xan nejxasinkax xamal asew jiw beltaeliajwam, japi jiw kajachawaesliajwam. Xanlap japox kaes nejxasinkax. Me-ama ofrenda isam wut xanliajwa, japoxliajwa xan chiekal nejchachaemla-enillejen’—aech

Dios, chajia jum-aech wut! Xan tadusaxaelen jiw babejchow japi tajnachalaliajwa. Jiw jum-aechpilax: 'Xan kaes pejme pachaemen. Me-ama a sew jiw, jachi-enil' —aechpi, xan japi jiw tadusaxinil tajnachalaliajwa —aech Jesús fariseosliajwa.

*A sew jiw xae-elpox, piach Dios kawuajnalijwa wut
(Mr 2.18-22; Lc 5.33-39)*

¹⁴ Do jawux, Juan jiw bautisan pejnachala falaeni Jesúslel. Pat wuti Jesúsxot, japi jum-aech Jesúsliajwa:

—Xanal piach naxae-enil, Dios piach kawuajnalijwan wut. Fariseosbej ja-aech. ¿Ma-aech xotkat nejnachala, me-ama xanal jachi-el? —aechi Jesúsliajwa.

¹⁵ Do jawut, Jesús jum-aech wuajantat japi jiwliajwa:

—Pawis fitpon, fiesta is wut, taduchpi naxaeyaxaelfuk japonxot. Japi xabich ne-jchachaemlaxael, pajelnakijwan jaxot duk wutfuk. Asamatkoi a sew jiw japon buflaeyaxaes. Do jawut, taduchpi naxaeyaxil kaematkoijan suapich, xabich nejxaejwaxaes xoti. Jachiyaxaelbej asamatkoi tajnachalaliajwa, xan a sew jiw nabu'fol wut. Samata, japi kaematkoijan suapich naxaeyaxil, xan japixot ajilaxaelen xot —aech Jesús.

¹⁶ Jesús matabijt, fariseos naewuajnasiapox padujwuajan, pajelwuajan suapich. Samata, jawut Jesús jum-aech wuajantat japi liajwa: "Kaeow pawis pejyiaf wechachoe ps wut, xape'tow chachoe p xot. Pe yiaf xape's-elow pajelbu'chtat, itkias-esal wutfuk. Pajelbu'ch, itkias-esal p xot, xape't wutow, yiaf itkiat wut, mamu'al wut pejme, pajelbu'ch itki alaxael. Yiaf padujax kaes chachoe paxael, xape't xotow pajelbu'ch.

¹⁷ Jasoxtatbej jiw wulu-el pajelwino padujbu'choxatat. Wulu wuti pajelwino paduj-choxatat, japox choxa chathialfalaxael, pajelwino xabich xot pafak. Ja-aech wut, vino nafa'axael. Choxabej nafa'axael. Samata, jiw pajelwino wulu pajelbu'choxatat chatinkaliajwa choxa. Ja-aech wut, vino nafa'axil. Choxabej nafa'axil" —aech Jesús.

Amxot jum-aechow Jesús pawis boejthutpoxliajwa, asaow patupow mat-etpoxbejliajwa, pejme dukaliajwapow

(Mr 5.21-43; Lc 8.40-56)

¹⁸ Do jawux, Jesús naksiya wutfuk, kaen aton pat Jesúsxot. Japon judiospaklon. Pat wut, brixtat nukon Jesús pejwuajnalel, xabich sitaen xoton Jesús. Do jawut, jum-aechon:

—Taxalow ma jelnawetup. Pe xam ke-otam wut japowxot, taxalow nawemat-esaxaelam pejme dukaliajwa —aech paklon Jesúsliajwa.

¹⁹ Do jawut, Jesús nakfol paklon. Xanalbej, Jesús pejnachalwan, nakfolx Jesús.

²⁰⁻²¹ Dolisdo', Jesús fol wut, kaeow pawis moxdepow Jesús pejwulchakallel. Japow xabich nabijat. Pejlaw wut, jal matduka-el. Doce waechanlisox japow bu'xaenkprox. Japow mox wut Jesús pejwuchakallel, japow nejchaxoel: "Xan pejsunta-osax jajastax wut, Jesús naboejthusaxael!" —aechow, nejchaxoel wut. Samata, jajastow Jesús pejsunta-osaxmatdukax.

²² Do jawut, Jesús wultataen wut, taenpon japow pawis. Samata, Jesús jum-aech japowli-ajwa:

—Pawis, inechachaemilde! Amwutjel xam chiekal boejthul waxae, chiekal xan naxanaboej- tam xot —aech Jesús japowliajwa.

²³ Do jawux, Jesús pat wut paklon pejbaxot, taenon, a sew jiw toela nababa wut, patupow muthsliajwa wut. Jumtaenbejpon a sew jiw wunowpoxan japowliajwa.

²⁴ Samata, jum-aechon japi liajwa:

—jAmxot nakolim! Japow tupa-el. Japow moejt —aech Jesús japi jiwliajwa.

Japi wunowpi japox jumtaen wut, xafafoli Jesúsliajwa. Japi jiw bu'wuajanpaei Jesús.

²⁵ Do jawut, Jesús nakolax to'a tathoetade wunowpi patupow. Japi nakola wut, Jesús low patupow ochxot. Jesús patupow kefit wut, mat-eton patupow pejme dukaliajwa. Do jawut, japow nant.

²⁶ Puxela japatujnupijiw wultaena Jesús ispox patupowliajwa.

Jesús boejthutpox kolenje itliaklan

²⁷ Jesús nakolt wut paklon pejbaxot, kolenje itliaklan Jesús pejwuchakal fol. Japi nejlasful wut, jum-aechfuli:

—Jesús, David pamon, xanal nabeltaem! —aechfuli.

²⁸ Do jawux, Jesús asaba low wut, kolenje itliaklan mox soepa Jesúsxot. Do jawut, Jesús jum-aech japi kolenje itliaklanliajwa:

—¿Xamalkat xan nanaexasitam xajupxprox boejthusliajwan nej-itfutan? —aech Jesús.

Japi jumnot wut, jum-aechi:

—Diasdo' tajpaklon. Xam naexasitx —aechi.

²⁹ Do jawut, Jesús japi itfujacha wut, jum-aechon:

—Xamal chiekal naxanaboejam xot, nanaexasitam xotbej, ¡chiekal taem! —aech Jesús japi kolenje itliaklanliajwa.

³⁰ Do jawut, chiekal taenlisi. Do jawut, Jesús jum-aech nejthw'axtat japi kolenjeliajwa:

—¡Xamal asew jiw nabej chapae' xan isxpox xamalliajwa! —aechon.

³¹ Pe japi fulaech wut, nakiowa puexa japatwajnpjijw chapae'ful Jesús isaspoxlajwa japiajwa.

Jesús boejthw'pox buxw'wajanjan

³² Majt itliakalpi Jesúsxot chijia wuti, do jawut, asew jiw buflaen buxw'wajanjan Jesúsleidin. Japon naksiyaxil, dep webaes xoton pejmatp'uatat.

³³ Do jawut, Jesús to'a dep nakolsliajwa japon pejmatp'uatxot. Dep nakolt wut, do jawut, buxw'wajanjan tumadutlison naksiyax. Jawut, xabich jiw natachaemanuil wut, nejchaxoelanuuilbejpi. Jum-aechi:

—Majt chinax jasox tae-esal ampatwajnutat, Israel twajnxot —aechi.

³⁴ Pelax fariseos jum-aech:

—Jesús to'a wut dep, to'a dep pejpaklon pijaxtat —aech fariseos Jesúsliajwa.

Jesús jiw beltaenpox

³⁵ Jesús nanuamt puexa paklowaxanxot, puexa twajnxuchanxotbej, jiw naewwajnafulaliajwapon, judíos naewwaj nabachanxot. Jesús naewwajan chimiawwajan jiwliajwa, Dios puexa pejjiw tato'laxaelpox. Boejthusfulbejpon nejmachwaxaetat bu'xaenkpi.

³⁶ Jesús taen wut xabich jiw, pinamat, japi jiw beltaenpon, japi nabijat xot, wejisal xotbejpi asan kajachawaesliajwas. Taen wuton, japi jiw, me-ama ovejas napelti, ja-aech japi jiw Jesúsliajwa, wejisal xot asan tataeflaliajwas japi jiw.

³⁷ Do jawut, Jesús jum-aech xanal pejnachalwanliajwa, asew jiwliajwabej:

—Diachwajnakolax xan jum-an. Ampí jiw, me-ama trigo foel wut, ja-aechi, japi w'waj nawesful xot jumtaeliajwa chimiawwajan. Pe jiw xabich kaesapich, Dios pej-jamechan naewwajanpi.

³⁸ Samata, ¡kawwajande wajpaklokolan Dios, japon asew jiw to'aliajwa, naewwajanpi Dios pejjamechan!

10

Jesús pejnachalaxot makafitpox doce poejiw, japi apóstolesliajwa

(Mr 3.13-19; Lc 6.12-16)

¹ Jesús xanal nala, dosan pejnachalwan, japonxotaliajwan. Jesús natapaei xanal japon pijaxtat dep to'aliajwan, jiw pejmatp'uatxot bapi, nejmachwaxaetat bu'xaenkibej boejthusliajwan.

² Jesús xanal nawalduw apóstoles, dosanpin. Xanalxot kaen kolewulje. Matxoelawul pawulon Simón. Wulchakalwul pejwul, pawulon Pedro. Asan pawul Andrés. Japon Simón Pedro pakoewan. Asan pawul Santiago. Asan pawul Juan. Japon Santiago pakoewan. Japi kolenje Zebedeo paxi.

³ Asan pawul Felipe. Asan pawul Bartolomé. Asan pawul Tomás. Xan tawul Mateo. Xanlap majt impuesto mat-omwuljoenan Roma gobiernoliajwa. Asanbej pawul Santiago. Japon Alfeo paxulan. Asan pawul Tadeo.

⁴ Asan pawul Simón. Japon majt asamutp'ijin, celotemutp'ijin. Asan pawul Judas Iscariote. Japonlap Jesús wiasaxael padaelmajiwxot.

Jesús to'apox pejnachala japi naewwajnalialjwa Dios tato'laxaelpox jiw ampathatat

(Mr 6.7-13; Lc 9.1-6)

⁵ Jesús to'a wut padoce apóstoles, jum-aechon ampo: “¡Nabej fulae' judíos-eli pejt'wajnxuchan poxade! ¡Nabej fulae'bej Samaria twajnpjijw poxade!

⁶ ¡Xamallax fulaem judíoskal duil poxade! Japi, me-ama ovejas, napelti, ja-aechpi.

⁷ Fulaemch wut, japi jiw naewwajnam wut, jum-amde: ‘Dios puexa pejjiw tato'laxaelmatkoi malisox mox pawwajna’ —amdepi!

⁸ ¡Bu'xaenki boejthusfulde! ¡Tupi mat-embej pejme duilaliajwa! ¡Boejthusfuldebej lep-rawaxaetat bu'xaenki! ¡Dep to'imbej jiw pejmatp'uatxot nakolaliajwa! Xamal malech kenotam ampapamamax. Samata, ¡xamal nabej mat-omwuljoem, asew jiw boejthutam wut!

⁹ “Folam wut, ¡nabej xalae' plata!

¹⁰ ¡Nabej xalae'bej asew choxan! Mado', inaxoelam, ¡do japoxkal bu'laflaem! Mado' it'waxaj'waxoelam, ¡do japoxkalbej twaklaflaem! ¡Nabej xalae'bej asax naxliaxsliajwampox, twakxaliaxsliajwampoxbej! Folam wut, ¡masim fulaem! ¡Nabej xalae' kelachalanaeyan! Jiw naeweti Dios pejjamechan, japi xamal chaxduiyaxael wewe'ppoxan.

¹¹ “Nejmachpaklowax patam wut, tuajnuxotbej, iwulwekde kaen aton, japapaklowax-pijiw sitaenspon! Do jawut, japon kawuajande pejbatat duilaliajwam! Japon jaw-aech wut, jjababat duilafuldefuk! Hasta nakolaliajwam wut, jjabaxot nakolim asapaklowax poxaliajwam!

¹² Nejmach-aton pejba lowam wut, jum-amde: ‘iXamal Dios nej kajachawaes ampabaxot duilampim!’ —amde japabapijiwliajwa!

¹³ Japabapijiw pachaem wut xamalliajwa, ja-aech wut, Dios kajachawaesaxaes japabapijiw. Pe asew jiwlaw xamal bu’kula-el wut, ja-aech wut, Dios kajachawaesaxisal japabaxot duilpi.

¹⁴ Asew jiw xamal bu’kula-el wut, nejnaewuajna naewes-el wutbejpi, ifulaem asapaklowaxle! Fulaeliajwam wut, nejtuakxajoe jolde lalaliajwam as natacholnaliajwa! Jasoxtat japi jiw pajut chiekal matabijaxael babijax ispox xamalliajwa, Diosliajwabej, xamal bu’kula-el xoti.

¹⁵ Diachwuajnakolax xan jum-an. Asamatkoi, Dios jiw kastika wut, japapaklowaxpijiw xabich kaes pejme kastikaxaes. Me-ama Sodoma paklowaxpijiw, Gomorra paklowaxpijibej, kastikas wut, jachiyaxil Dios, japi jiw kastika wut” —aech Jesús xanal dosanpinliajwa.

Apóstoles nabijasaxaelpox asew jiw pijaxtat naexasit xoti Jesús

¹⁶ Do pejme Jesús jum-aech xanal dosanpinliajwa: “Xamal tajaxtat folam wut, ichiekal taem, to’ax xot jiw babejchow poxade! Me-ama ovejasliajwa chachachoe pejmachchoefxot wut, jachiyaxaelbej xamalliajwa. ichiekal matabijim! Me-ama jom xandadus-el chachoelexot, ixamalbej ja-amde! iNabej nabe’bej nakaewa! Me-ama a-u, jachiyaxaelam xamal.

¹⁷ ichiekal taem jiw babejchowliajwa! Japi xamal woeyaxaeli judiospaklochow poxade, japapaklowaxpijiwxot. Do jawux, judios naewuajnbachaxot xamal selsaxaeli.

¹⁸ Xan nanaexasitam xot, xamal buflaeyaxaelbejpi gobernadores poxade, reyes poxadebej. Samata, xamal bu’fol wuti, xamal japixotam wut, asew judios-elixotam wutbej, jum-amde xanliajwa!

¹⁹ Xamal japixot woeya wuti, ixabich nabej nejchaxoele’ naksiyaxaelampoxliajwa, jumnosliajwam wut paklochow! Jawut Espíritu Santo xamal kajachawaesaxael chiekal jumnosliajwam.

²⁰ Samata, xamal najut nijaxtat jumnosaximil. Nej-ax Dios pej-Espíritu Santo kajachawaesaxael xamal chiekal jumnosliajwam paklochow pejwuajnalel.

²¹ “Japamatkoiyantat asew pakoewkola buflaeyaxaes paklochow poxade, jaxotde beliajwas, japi tajnachala xot. Paxjiw, o, penjiwbej, buflaeyaxael paxi paklochow poxade jaxotde beliajwas, japi tajnachala xot. Paxibej buflaeyaxael pax, o, penbej, paklochow poxade jaxotde japi beliajwas, tajnachala xot.

²² Puexa ampathatpijiw xamal nejweslaxael, tajnachalwam xot. Pe nakiowa, xan nanaexasisifulam wut, hasta tupam wut, Dios xamal bu’weyaxael.

²³ Asapaklowaxpijiw babijaxan is wut xamalliajwa, xamal tajnachalwam xot, idukpaxaelam asapaklowaxle! Diachwuajnakolax xan jum-an. Xan, puexa jiw pakoewkolnan, nakolsaxaelen ampathatxot. Do jawux, naewuajnafulaxaelam Israel tuajnpijiw. Ja-amsfulam wut, xan chalechkal pasaxoekan wut ampathatasik, japamatkoiyantat, xamal toesaximilfuk tajwuajna jiw naewuajnafulampoxan potuajnucha, Israel tuajnuxot.

²⁴ “Estudiapon kaes pejme pachaema-el. Me-ama chanaekabuanaapon, jachi-el estudiapon. Nabichanbej kaes pejme pachaema-el. Me-ama pejpakon, jachi-elon.

²⁵ Estudiapon, toet wut estudiaxpox, japon nejchachaemlaxael, najurpe wuton, chanaekabuanaspon suapich. Nabistonbej nejchachaemlaxael, najurpe wuton, pejpakon suapich. Jiw xan nanejweslapi, japi jum-aech wut xanliajwa: ‘Xam depam’ —aech wuti, ja-aech wut, japi jiw xabich kaes pejme xamal bu’wuajnapaeyaxael, tajnachalwam xot” —aech Jesús xanal dosanpinliajwa.

Jesús naewuajnapox pejnachala, achanliajwa japi pejlowlaxaeli (Lc 12.2-7)

²⁶ Do jawux, Jesús pejme jum-aech xanal dosanpinliajwa: “iXamal nabej nejlewl’ jiw babejchowliajwa, japi xamal nejwesla wut, ajilaxael xot maliachpoxan! Maliachpoxan asamatkoi puexa chiekal tulaelaxaes. Asew jiw maliach jum-aechpoxan, japoxanbej asamatkoi puexa asew jiw naekuanchakowaxil jumtaeliajwa.

²⁷ Xan maliach niakal jum-anox, xamal jumchiyaxaelam puexa jiwliajwa. Xan jum-anpox nuthaklajametat maliach, nejlatam wut, jumchiyaxaelam puexa jiw jumtaeliajwa.

²⁸ iNabej nejlewl’ jiw babejchowliajwa, xamal boesasia wuti ampathatxot! Pe kaes japi machiyaxil beliajwa nej-aelan. Xamallax nejlewlaxael Diosliajwa, japon xajur xot xamal

beliajwa ampathatxot, nej-aelanbej to'aliajwa infierno poxadik, jaxotdik nej-aelan chiekal toepaliajwa.

²⁹ “Kolenje mian mowas kaekafefliajwa. Ja-aech, japi mia omjil xot. Pe nakiowa, Dios tapae-el wut, chinax kaen mian pajut pijaxtat patʔpan jopaxil.

³⁰ Diosliajwa xamal kaes pejme ommaenkam. Me-ama mia omjil, jachi-emil xamal. Dios matabijt, massuapich nejmatla kaenanula nejmatnaetanxot.

³¹ Samata, ʔxamal nabej nejlewl'e' asew jiwliajwa, xamal xabich kaes ommaenkam xot! Me-ama pin-iat mia, jachi-emil xamal” —aech Jesús xanal dosanpinliajwa.

Jesús pejwʔajan naexasiti, japi jumchiyaxaelpox Jesús pejiwpi
(Lc 12.8-9)

³² Do pejme Jesús jum-aech xanal dosanpinliajwa: “Jiw jum-aech wut, asew jiw pejwʔajnael: ‘Xan Jesús naexasitx’ —aech wuti, japi jiw tajnachalaxael. Xanbej jumchiyaxaelen taj-ax Diosxotse japiliajwa: ‘Ampi jiw xan tajnachala’ —chiyaxaelen.

³³ Pelax asew jiw, xan nanaexasiti, asew jiw pejwʔajnael jum-aech wuti: ‘Xanal Jesús pejnachala-enil’ —aech wuti, xanbej jumchiyaxaelen taj-ax Dios pejwʔajnael: ‘Ampi jiw tajnachala-el’ —chiyaxaelen” —aech Jesús xanal dosanpinliajwa.

Jesús paskpox japon pijaxtat ampathatpijw nadijalajwa
(Lc 12.51-53; 14.26-27)

³⁴ Do pejme Jesús jum-aech xanal dosanpinliajwa: “ʔXamal nabej nejchaxoele' xanliajwa: ‘Jesús pat ampathatat puexa jiw kaenejchaxoelaxtat duilliajwa’ —nabej aeche', nejchaxoelam wut! Xan pas-enil japoxliajwa. Xan patx jiw kaenejchaxoelaxa-el(a)liajwa.

³⁵ Xan patx poejiw, paxjiw suapich, watho'bej, penjiw suapich, pakalajiw suapichbej, paemjiw suapichbej, kaenejchaxoelaxa-el(a)liajwa.

³⁶ Jiw xan naxanaboejapi, japi asamatkoi pejiwkola padaelmajiw dofaxaelpi, japi xan nanaexasit xot.

³⁷ “Xamal kaes nejxasinkam wut nej-axjiw, nej-enjiwbej, xanlax xabich kaes nanejxasinka-emil wut, ja-am wut, xamal tajnachalwaximil. Kaes nejxasinkam xot naxi, xanlax xabich kaes nanejxasinka-emil wut, ja-am wutbej, xamal tajnachalwaximil.

³⁸ Xamal nanaexasis-emil wut, xan nakfulae-emil wutbej, nejlewla xot tupaliajwam xanliajwa, ja-am wut, xamal tajnachalwaximil.

³⁹ Xamal isfulam wut najut nejxasinkampoxan ampathatat, asamatkoi tʔpam wut, duilaximil Diosxotse. Pelax kofam wut najut nejxasinkampoxan isfulaliajwam xan tato'lapoxan, ja-am wut, asamatkoi tʔpam wut, duilaxaelam pomatkoicha Diosxotse” —aech Jesús xanal dosanpinliajwa.

Jiw is wut pachaempoxan Dios naexasitiliajwa, japi jiw Dios chaxduiyaxaes pachaempoxan
(Mr 9.41)

⁴⁰ Do pejme Jesús jum-aech xanal dosanpinliajwa: “Jiw chiekal xamal bu'kula wut, japi me-ama xanbej, chiekal nabu'kulti. Jawut xan nato'apon, bu'kulabejpi.

⁴¹ Jiw chiekal bu'kula wut Dios pejprofeta, naexasit xoton Dios, japi jiw kajachawaesaxaes Dios. Me-ama Dios kajachawaet profeta, japi jiwbej kajachawaesaxaes Dios. Jiw chiekal bu'kula wut asan pachaempon, Dios naexasit xoton, japibej kajachawaesaxaes Dios. Me-ama Dios kajachawaet pachaempon, jasoxtatbej japi kajachawaesaxaes.

⁴² Nejmachjiw is wut pachaempox jelxan nanaexasitponliajwa, o, japi jiw minkal chaxdut wuti wasotat japon min feliajwa, japon tajnachalan xot, ja-aech wut, japi jiw kaenanula diachwʔajnakolax Dios chaxduiyaxaes pachaempox, minkal chaxdut xoti tajnachala” —aech Jesús xanal dosanpinliajwa.

11

Juan, jiw bautisan, japon to'apox kolenje pejnachalan Jesús poxade
(Lc 7.18-35)

¹ Do jawut, Jesús naewʔajnax buxtoet wut, jaxot chijiapon jiw naewʔajnalajwa Dios pejjamechan asapaklowaxan poxaliajwade, Galilea tuajnuxot.

² Juan, jiw bautisan, jiw jebatat wultaefal Jesús isfulpoxan. Samata, pejnachalaxot asew to'apon japi wʔajnaemsliajwa Jesús.

³ Dolisdo', japi Jesúsxot pat wut, jum-aechi:

—Juan xanal nabuxto'a wut, jum-aechon xam wʔajnaemsliajwan: ‘ʔXamkatlap diachwʔajnakolax Cristowam, “Pasaxoekpon” —tisponam, jiw bu'welialjwam? Cristowam-emil wut, ʔxanalkat wʔajnawesfulaxaelenfuk asan, “Pasaxoekpon” —tispon?’ —aech Juan —aech Juan pejnachala Jesúsliajwa.

⁴ Do jawut, Jesús jum-aech Juan pejnachalaliajwa:

—iNawemch Juan poxade! Juanxot patam wut, ichapaempon xamal jumtaenamproxan, taenamproxanbej xan isfulax wut!

⁵ Juan chapaeyam wut, ijum-amopon: 'Majt itliakalpi, japi chiekal taenlisi. Majt nabejkpi, japibej chiekal laelplisi. Majt piach bu'xaenki leprawaxaetat, japibej chiekal boejthuls. Majt naekua'nikpi, japibej chiekal jumtaen. Tupibej, mat-ias pejme duilaliajwa' —amo, Juan chapaeyam wut! iChapaembejpon xan naewuajnafulaxprox kejila, japibej naexasisliajwa, bu'weliajwasbejpi Dios!

⁶ iJuan jum-amdebej: 'Nejmachjiw chiekal naxanaboejafal wut, naexasisful wutbejpon xan Cristowanponan, japi jiw nejchachaemlafulaxael' —amde Juan! —aech Jesús Juan pejnachalaliajwa.

⁷ Juan pejnachala nawia wut, do jawut, Jesús jum-aech Juanliajwa jiw chiekal jumtaelliajwa: "Juan, jiw bautisan, pajilaxtat wut, xamal fulaemch wut, ¿chiliajwakat fulaemch japoxade? Fulae-emil taeliajwam muifurtuat joewa ju'baspokkal.

⁸ Fulae-emilbej taeliajwam xabich chamoeyaxan naxoeipon. Xamal matabijam, chimianaxoeipi duila-el pajilaxtat. Chimianaxoeipi duil paklochow pejbachantat.

⁹ Xamallax pajilax poxade fulaemch taeliajwam profeta. Diachwuajnakolax xan jum-an. Japon Juan xamal taenam wut, taenam poklaprofeta.

¹⁰ Dios pejjamechan, chajia lelsprox, jum-aech Dios jum-aechprox xanliajwa Juan to'axaesproxliajwa:

'Wua, xam wuajna xan to'axaelen tajprofeta, japon jiw naewuajnafulaliajwa tajjamechan jiw naexasisliajwa, xam patam wut' —aech Dios jum-aechox xanliajwa.

¹¹ Diachwuajnakolax xan jum-an. Juan poklaprofetakolan. Poejiw ampathatpijiwxot ajil profeta kaes pejme pachaempi, me-ama Juan, jiw bautisan, jason. Pelax, Diosxotse wut, jaxotse puexa jiw chiekal isful Dios nejxasinkproxan. Japi kaes pejme pachaemaxael, Dios pejwuajnalel wut. Me-ama Juan ampathatat wut, jachiyaxili" —aech Jesús jiwliajwa.

¹² Jesús pejme jum-aech japi jiwliajwa: "Juan, jiw bautisan, chajia t'adut wut pejnaewuajnax, japamatkoiyantatbej xabich maenk nabeyaxan. Maenkbej jiw babejchow. Me-ama amwutjel, ja-aech. Japamatkoiyantatbej xabich jiw naexasisasia Dios tato'alpox. Pe asew jiw toesasia Dios pejiw, nejweslas xoti japi jiw.

¹³ Juan wuajna puexa asew profetas lelpoxan, Moisés lelpoxbej, jum-aech Dios puexa pejiw tato'laxaelpoxliajwa.

¹⁴ Xamal naexasisasiam wut ampox, inaexasi'e xan jum-anpox! Dios pejjamechan chajia jum-aech: 'Elías pejme pasaxael' —aechox. Japox jum-aech wut, jum-aechox Juan, jiw bautisanliajwa. Me-ama Dios pejprofeta Elías chajiakolaxtat is, ja-aechlap-is Juan. Samata, Juan wuajna chajia matabijas japon isaxaelpoxan.

¹⁵ Xamal matabijasiam wut Dios pejnejachaxoelaxan, ichiekal naewe'e xan jum-anpoxan!" —aech Jesús jiwliajwa.

¹⁶⁻¹⁷ Jesús pejme jum-aech japi jiwliajwa: "Ampamatkoiyantat jiw duili ampathatat, japi, me-ama yamxi wut, ja-aechi, kaenejchaxoelaxa-el xot. Me-ama yamxi chalak nakakujsliajwa plazaxot, ja-aech japi jiw. Yamxi chalak, pejnachala swapich. Do jawut, nakaewa najum-aechi: 'Xanal toela nababax xamal nababoelaliajwam. Pe thiataenam wut, nababoela-emil. Xanal jajui jajuwzbej, naebejjajui, xamal noeliajwam. Pe noe-emil' —aech yamxi, nakaewa nalot wut.

¹⁸ Ja-aechbej, Juan, jiw bautisan, japon fulaen wut Dios pejjamechan naewuajnalialiajwa. Juan naxae-el, piach Dios kawuajnalialiajwa wut. Fe-elbejpon vino. Ja-aech wut, xamal japonliajwa jum-amfulam: 'Juan ja-aech, pejmatp'watat dep webaes xoton' —amsfulam xamal.

¹⁹ Do jawux, xan puexa jiw pakoewkolnan, fulaenx. Xanlax naxae-ela-enil. Fe-ela-enilbej. Ja-an wut, xamal najum-am diachwuajnakolaxa-elpox xanliajwa: 'Japon xabich litabejni. Feyax nejxasinkbejpon saxa. Pejnachalabej babejchow. Asewbej, japon pejnachala, impuesto mat-omwuljoew Roma gobiernoliajwa' —na-amsfulam xanliajwa, babejjamechan jum-am wut. Me-ama yamxi, babejjamechan jum-aech wut nakaewaliajwa, ja-ambej xamal xanliajwa. Pe matabijasiapi Dios, japi jiw naexasisfulaxael Juan jum-aechproxan, xan jum-anpoxanbej. Ja-aech wut, japi matabijaxael diachwuajnakolaxprox Juanliajwa, xanliajwabej" —aech Jesús jiwliajwa.

*Asapaklowaxanpijw naexasis-elpox Jesús
(Lc 10.13-15)*

²⁰ Asapaklowaxanxot, Jesús xabich koechaxan isxot, japapaklowaxanpijw taen wut Jesús koechaxan ispoxan, japi jiw nakiowa kofa-el babijaxan isfulpoxan. Samata, Jesús japapaklowaxanpijw lot wut, jum-aechon:

²¹ “Corazín paklowaxpijiw, Betsaida paklowaxpijiwbej, xabich nabijasaxael, xabich kastikas wuti. Xan koechaxan isx wut, japi jiw chiekal taenpi. Chajia japoxan isaxaelen wut Tiro paklowaxpijiwliajwa, Sidón paklowaxpijiwliajwabej, japi japoxan taeyaxael wut, kofaxaeli padujnejchaxoelaxan isfulalijwa Dios nejxasinkpoxan. Naxoeyaxaelbejpi papopa. Chalaxaelbejpi jitthumbanxot asew jiw matabijalijwas xabich nejxaejwaspoxan japi babijaxan ispoxanliajwa.

²² Samata, diachwajnakolax xan jum-an. Asamatkoi, Dios jiw kastika wut, Corazín paklowaxpijiw, Betsaida paklowaxpijiwbej, Dios xabich kaes pejme kastikaxaesi. Me-ama Tiro paklowaxpijiw, Sidón paklowaxpijiwbej, jachiyaxisal, japi jiw kastikas wut.

²³ Capernaum paklowaxpijiw nejchaxoelaxael: ‘Xatis Dios nakbu’weyaxael, athuxotas wut’ —aechi, nejchaxoel wut. Pe japi Dios to’axaeks infierno poxadik, xan nanaexaxis-el xoti. Xan xabich isx koechaxan. Xan japoxan isx wut Sodoma paklowaxxot, japi kofaxael chajia babijaxan ispoxan. Ja-aech wut, pejpaklowax, Sodoma paklowax, chajiakolaxtat toejafaxisal.

²⁴ Diachwajnakolax xan jum-an. Asamatkoi, Dios jiw kastikaxael wut, Dios xabich kaes pejme kastikaxael Capernaum paklowaxpijiw. Me-ama Sodoma paklowaxpijiw kastikas wut, jachiyaxil Dios, japi jiw kastika wut” —aech Jesús japapaklowaxanpijiwliajwa.

*Jesús tadatpox pejnachala, japi damlathulalijwa japonxot
(Lc 10.21-22)*

²⁵ Asamatkoi, Jesús Dios kawajjan wut, jum-aechon: “Ax, xam athuxotse, ampathatlelbej, paklokolnam. Xabich pachaemambej. Estudia-elpi, xam kajachawaetam japi chiekal matabijalijwa nejamechan. Asewlax, me-ama xabich matabijs wut, kabuan-aechpi, japilax xam kajachawaes-emil japoxan matabija-elalijwa.

²⁶ Jasox xam isam, me-ama xam nejxasinkam” —aech Jesús, pax Dios kawajjan wut.

²⁷ Do jawutbej, Jesús pejme xanal pejnachalwan najum-aech: “Taj-ax natapaei puexa matabijslijan. Pe jiw diachwajnakolax xan namatabijs-el, ma-an xan. Taj-ax, kaen, xan chiekal namatabijt. Jiw matabija-elbej, ma-aech taj-ax. Xan kaenan taj-ax chiekal matabijtax. Xan jiw makanotxpi, japikal xan tapaeyaxaelen matabijalijwapi taj-ax.

²⁸ Puexa xamal damlampim judios chanaekabuanapi tato’laxtat, xabua’din xanlel xanxot damlathulalijwam, isfulalijwamambej Dios nejxasinkpoxan!

²⁹ Xan nejpaklonan. ¡Tajbichax chiekal isfulde! ¡Naexaxisfuldebej xan naewajjnapoxan! Xan xabich pachaeman xamallijwa. Samata, xamal chiekal damlathulaxaelam xanxot.

³⁰ Xabich tampoela-el xamal isliajwam xan to’axpoxan” —aech Jesús xanal pejnachalwanliajwa.

12

*Judios pejnapatamatkoitat Jesús pejnachala jolbalapox trigo
(Mr 2.23-28; Lc 6.1-5)*

¹ Do baxael, judios pejnapatamatkoi wut, Jesús, xanal japon pejnachalwan swapich, xenax trigolulan tuchade. Xanal trigo jolbalax xaelpalijwan, litaxaelax xot.

² Fariseos, xanal swapich, folpi, japi taen wuti xanal trigo jolbalaxpox, jawut jum-aechi Jesús jumtaelajwa:

—Jesús, ¡tae’nik nejnachala! Xatis, judiospis, nabichaxisal napatamatkoitat. Pe nakiowa, nejnachala trigo jolbala xaelpalijwa —aech fariseos.

³ Do jawut, Jesús jum-aech fariseosliajwa:

—Xamalkas matabijam wajwajnapijin, waj-am rey David, ispox chajiakolaxtat xabich litaxaela wuton, pejiw swapich.

⁴ Jawut rey David xananamsba, Dios pejba, lechon. Japabatutat wujna pan oel mesamatwajjat. Japapan Dios pej-ofrenda. Japapan rey David xael wut, chaxduwbejon pejnachala japi xaelijwa japapan. Moisés chajia lelpox jum-aech: ‘Japapan koew xaelijwa sacerdotes, japi nabisti Dios pejtemplobatat. Sacerdote-elpi xaeyaxil japapan’ —aech Moisés chajia lelpox.

⁵ Xamalkas xaljowam Moisés chajia lelpox. Japox jum-aech: ‘Napatamatkoitat wut, sacerdotes nabist Dios pejtemplobaxot. Nabist wuti napatamatkoitat, do japox babijaxael’ —aech Moisés chajia lelpox.

⁶ Diachwajnakolax xan jum-an. Ma amxot nukpon kaes pejme pachaem. Me-ama Dios pejtemploba, jachi-elon.

⁷ Xamalfak chiekal matabija-emil, Dios pejprofeta chajia lelox jum-aech wut Dios jum-aechpoxliajwa: “Xan nejxasinkax xamal asew jiw beltaelijwam. Japox kaes pejme pachaem. Me-ama choef xua’sax taj-ofrendalijwa, jachi-el” —aech Dios jum-aechpox. Chil xamal japox chiekal jummatabijaxaelam wut, jiw tasalaximil, babijaxan is-elpi.

⁸ ¡Xamalbej jummatbijim ampox! Xan, puexa jiw pakoewkolnan, xajuxp jumchiliajwan jiw isaxaelpox napatamatkoitat —aech Jesús fariseosliajwa.

*Jesús boejthutpox kemamlan
(Mr 3.1-6; Lc 6.6-11)*

⁹ Do jawux, Jesús buxtoet wut, fariseos suapich, nospaeyax, jawut fulaechon judíos naewuajnaba poxade.

¹⁰ Jesús japaba low wut, jaxot wuajna kemamlan ek. Jaxotbej asew judíos. Japi xabich tasalasiapi Jesús, is wuton asax. Samata, japi Jesús wuajna chaemt wut, jum-aechi:

—¿Moisés chajia lelpox tapaeikat bu'xaeyan boejthusliajwas napatamatkoitat? —aech judíos Jesúsliajwa.

¹¹ Jesús jumnot wut, jum-aechon:

—Napatamatkoitat nijan oveja jop wut pinamuthadik, xamal jusaxaelam.

¹² Jiw kaes pejme ommaenk. Me-ama oveja, jachi-el. Samata, naktapaei isliajwa pachaempox napatamatkoitat —aech Jesús fariseosliajwa.

¹³ Do jawut, Jesús jum-aech kemamlanliajwa:

—¡Keba'de! —aechon.

Keba't wut, pejke-e chiekal wepachaemlison. Me-ama asake-elel, wejatislison.

¹⁴ Fariseos jaxot nakola wut, pejme natamejapi japi nakaewa najumchiliajwa: “¿Machiyaxeskát Jesús boesaliajwas?” —nachiliajwapi nakaewa.

Profeta chajia jum-aechpox jachiyaxaelpox Jesúsliajwa

¹⁵ Jesús matabijit wut fariseos boesasiapox, do jaxot Jesús nakolt, judíos naewuajnabaxot. Jawut xabich jiw fulafoson. Jawutbej japixot Jesús puexa bu'xaeya boejthusful.

¹⁶ Jesús buxfiat wut boejthulspi, jum-aechon: “¡Xamal tulaela nabej chapae' asew jiw jumtaesamata xamal boejthutxpo!” —aech Jesús.

¹⁷ Jesús japi buxfiat wut, patlisoq Isaías, Dios pejprofeta, chajia jum-aechpox. Jaxot jum-aechox Dios jum-aechpox paxulanliajwa:

¹⁸ “Ama taxulan, makafitxpon jiw bu'weliajwa. Xabich nejxasinkaxpon. Xabich nejchachaemlaxbej japonliajwa. Xan taj-Espíritu Santo to'axaelen taxulanliajwa. Do jawux, taxulan naewuajna xael puexa judíos, judíos-elpibej, japi matabijaliajwa xan jiw bu'weyaxaelenpox japon pijaxtat.

¹⁹ Japon, asew jiw suapich, bu'nalosaxil. Jumseyaxilbejpon. Me-ama judíos pinjametat jum-aech, natameja wut, paklowaxthialaxanxot wut, jachiyaxil japon, naewuajan wut jiw.

²⁰ Jiw naexasiti tajjamechan, japi xabicha-el wut pejxanaboejaxan xanliajwa, japon japi jiw pelsaxil japonxot. Japi jiw kajachawaesfulaxaelon, hasta japon puexa jiw tato'al wut.

²¹ Puexa ampathatpijiw xanaboejaxaeli japon” —aech Dios jum-aechpox paxulanliajwa.

*Fariseos jum-aechpox Jesús pejpamamax, Satanás pejpamamax
(Mr 3.20-30; Lc 11.14-23; 12.10)*

²² Do jawux, itliaklan makxalaens Jesúslel. Japon buxwuajanjilbej. Japon dep webaesbej pejmatruatxot. Do jawut, Jesús japon boejthut, dep to'a wuton nakolsliajwa japon pejmatruatxot. Do jawutbej, japon chiekal pachaem taeliajwa, naksiyaliajwabej.

²³ Puexa jiw japox taen wut, xabich nejchaxoelanuili. Nakaewa nawuajna chaemsnapri: “¿Amponkatlap Mesías, David pamon?” —na-aechnapri nakaewa.

²⁴ Fariseos japox wultaen wut, jum-aechi japi jiw jumtaeliajwa: “Jesús dep to'a wut, to'aful Beelzebú pijaxtat, dep pejpaklon pijaxtat” —aech fariseos. (Satanás asawul Beelzebú.)

²⁵ Jesús matabijit fariseos nejchaxoelox. Samata, Jesús jum-aech fariseosliajwa: “Xan dep to'a-enil Satanás pijaxtat. Kaetwajnpijiw nadijakxael wut nabeliajwa, japatwajnpijiw natoesaxael nabeyaxtat. Kaepaklowaxpijiwbej nadijak wut nabeliajwa, japapaklowaxpijiwbej nabeyaxtat natoesaxael. Kaebapijiwbej nadijak wut nabeliajwa, ja-aech wut, japabapijiw natoesaxael nabeyaxtat.

²⁶ Jachiyaxaelbej Satanás. Pejjiw suapich, nadijak wut nabeliajwa, japi natoesaxael nabeyaxtat. Ja-aech wut, Satanás pejpamamax toepaxael.

²⁷ Xamal jum-am xanliajwa: ‘Jesús dep to'a Beelzebú pijaxtat’ —am xamal. Xan jachiyaxaelen wut, çachan pijaxtat nejnachalabej dep to'a nakolaliajwa jiw pejmatruatanxot? Xamal chiekal matabijam. To'a-eli Beelzebú pijaxtat. Samata, xamal jum-ampox xanliajwabej japox diachwuajnakolaxa-el.

²⁸ Xan dep to'ax Espíritu Santo pijaxtat. Ja-an wut, diachwuajnakolax xamalxot pat Dios tato'almatkoi.

²⁹ “Asew nakowasia wut asan pejbaxot, leyaxili bapijin wuajna wut, japon xabich mamnik watbej. Majt bapijin kuiyaxaes tathoetat. Do ja-aech wut, bapijin pejew nosaxaeli” —aech Jesús fariseosliajwa. (Jesús japox jum-aech fariseos chiekal matabijaliajwa Jesús xajuprox dep to'aliajwa.)

³⁰ Jesús pejme jum-aech fariseosliajwa: “Jiw xan nanejweslapi, japi tadaelmajiw. Is- elbejpi xan nejxasinkapoxan. Japi nawetabejsfulbej tajbichax.

³¹ “Diachwuajnakolax xan jum-an. Jiw xan nanaexasiti, japi jiw Dios beltaeyaxaes puexa babijaxan ispoxanliajwa, babejjamechan naksiyapoxanliajwabej Diosliajwa. Pelax jiw jum-aech wut babejjamechan Espíritu Santoliajwa, Dios beltaeyaxaisal japi jiw.

³² Jiw babejjamechan jum-aech wut xan puexa jiw pakoewkolnanliajwa, japi Dios kawuajan wut beltaeliajwas, japi Dios beltaeyaxaes. Jiw jum-aech wutlax babejjamechan Espíritu Santoliajwa, Dios beltaeyaxaisal japi jiw. Bu'wuajan toepaxilbejpi. Pomatkoicha pejbu'wuajnaaxaeli” —aech Jesús fariseosliajwa.

Pejbaech pachaem wut, matabijasprox japanae pachaempox
(Lc 6.43-45)

³³ Do pejme Jesús jum-aech fariseosliajwa: “Naebaechnaechan, pachaemnaechan, pe- jbaechbej pachaem. Naebaechnaechan, chaemilnaechan, pejbaechbej chaemil. Kaen- anula naebaechnaechan matabijas pejbaechtat.

³⁴ Xamal fariseos xabich chachoelam. Me-ama jom liklasia wut, ja-am xamal. ¿Machiyax- aelamat, ja-am wut jumchiliajwam pachaempoxan, xamal babejchowam wut? Babej- chowam xot, jumchiyaximil pachaempoxan.

³⁵ Jiw, pachaempi, jum-aech pachaempoxan, pejnechaxoelaxan pachaem xot. Jiw babejchowlax jum-aech pachaema-elpoxan, pejnechaxoelaxan chaemil xot.

³⁶ Xan jum-an xamalliajwa. Jiw chaemili Dios kastikas wut, japamatkoitat japi kaenanula kastikaxaes, jum-aech xoti pachaema-elpoxan.

³⁷ Xamal jum-am wut pachaempoxan, Dios kastikaxil. Pelax xamal jum-am wut pachaema-elpoxan, Dios kastikaxael xamal” —aech Jesús fariseosliajwa.

Babejchow keto'apox Jesús koechax isliajwa
(Mr 8.11-13; Lc 11.29-32; 12.54-56)

³⁸ Do jawux, kaesuaripich fariseos, judíos chanaekabuanapibej, jum-aechi Jesúsliajwa: —Jiw chanaekabuanan, xanal taesian koechax chiekal matabijaliajwan, diachwuajnakolax xam Dios to'akponam wut —aechi.

³⁹ Jesús jumnot wut, jum-aechon fariseosliajwa, judíos chanaekabuanapiliajwabej: —Xamal babejchowam, Dios naexasis-emilpim. Naketo'am isliajwan koechax asbwan jumch taeliajwam. Pe taeyaximil pajelkoechax. Pe taeyaxaelam, me-ama chajia Dios is profeta Jonásliajwa, jiw chiekal matabijaliajwa japon Dios to'aspon.

⁴⁰ Jonás tres matkoian pinbaxin pejwoejtat. Xanliajwabej, me-ama japox, jachiyaxael, xan puexa jiw pakoewkolnanliajwa. Nacha-osaxaeli muaxwuajtat tres matkoianliajwa —aech Jesús pejpatupaxliajwa.

⁴¹ Jesús pejme jum-aech fariseosliajwa, judíos chanaekabuanapiliajwabej: “Asamatkoi, puexa jiw babejchow Dios pejwuajnalel nuilaxael tasalaliajwas japi ispoxanliajwa, kastikaliajwasbej. Jawut Nínive paklowaxpijiw nuilaxael Dios pejwuajnalel xamal tasalali- ajwa, xan nanaexasis-emil xot. Chajiakolaxtat Jonás japi jiw naewuajan wut, japi jiw kamta kofa babijaxan ispoxan, japi isfulaliajwa Dios nejxasinkpoxan. Xan kaes pejme pachaeman. Me-ama Jonás, jachi-enil. Pelax xan chiekal nanaewes-emil. Xan nanaexasis- emilbej.

⁴² Jawutbej Saba tuajnapijiwpakokolow, nukaxael Dios pejwuajnalel xamal tasalaliajwa, xan nanaexasis-emil xot. Japow chajiakolaxtat xabich atuaj fulaen rey Salomón pejmatabi- jsax pajut chiekal jumtaeliajwa. Xan kaes pejme pachaeman. Me-ama rey Salomón, jachi- enil. Xamal naewuajna x chiekal matabijaliajwam Dios. Pelax xan chiekal nanaewes-emil. Xan nanaexasis-emilbej” —aech Jesús fariseosliajwa, judíos chanaekabuanapiliajwabej.

Dep pejme kaxa nawia'anpox leliajwa aton pejmatpuatxot
(Lc 11.24-26)

⁴³ Jesús pejme jum-aech fariseosliajwa, judíos chanaekabuanapiliajwabej: “Dep nakolt wut aton pejmatpuatxot, nanuamt xabich mamno'alxot. Wuwlekon asan pejmatpuatxot jaxot damlathulaliajwa. Faena-el wut, nejchaxoel wut, jum-aechon:

⁴⁴ ‘Xan pejme nawiasaxaelen aton pejmatpuat poxade, majt nakoltaxxot’ —aech dep, nejchaxoel wut. Do jawut, dep kaxa nawia'an wut, faenlison japon aton. Dep nejchaxoel atonliajwa: ‘Asan dep le-elfuk xan tajwulela. Samata, xabich pachaem xan pejme leliajwan japon pejmatpuatxot’ —aech dep, nejchaxoel wut.

⁴⁵ Do jawut, dep fulaech asew dep wuljaesliajwa. Japon dep tameja asew, siete dep. Japi siete dep kaes chaemil. Me-ama dep matxoelapijin, jachi-eli. Do jawut, puexa dep lowlisi japon aton pejmatpuatxot. Ja-aech wut, japon aton kaes pejme xabich nabijat. Me-ama majt nabijat wut, jachi-elon. Xamalbej jachiyaxaelam. Kaes pejme babejchowaxaelam" —aech Jesús fariseosliajwa, judíos chanaekabuanapilijawabej.

Jesús pen, japon pakoewbej, japi nospaesiapox, Jesús swapich
(Mr 3.31-35; Lc 8.19-21)

⁴⁶ Jesús xabich jiw naewuajan wut batat, jawut japon pen pat, pakoewbej. Japi tathoetat nuil. Japi wuajnowet nospaeliawapi, Jesús swapich.

⁴⁷ Samata, jawut kaen, jaxotpijin, mox soepan wut Jesúsxot, jum-aechon:

—Jiw chanaekabuanan, nej-en, nakoew swapich, pa'an. Japi ba faletlel nuil. Japi nospaesia, xam swapich —aechon.

⁴⁸ Do jawut, Jesús jumnot wut, jum-aechon:

—¿Achewkat, me-ama taj-en, takoewbej? —aechon.

⁴⁹ Do jawut, Jesús xanal japon pejnachalwanlel nataxdoefa wut, jum-aechon:

—Ampi tajnachalapi, me-ama takoewbej. Watho', me-ama taj-en.

⁵⁰ Jiw is wut taj-ax Dios nejxasinkpoxan, japon athuxotsepon, ja-aech wut, japilap, me-ama takoew, taj-enbej —aech Jesús.

13

Trigo pejuwajan, xasaljabapon
(Mr 4.1-20; Lc 8.4-15)

¹ Do jawut, japamatkoitat wut, Jesús nakolt baxot pukababu' poxaliajwade. Pat wuton, eklison jaxot.

² Jawut xabich jiw pat Jesúsxot. Jiw xabich xot, Jesús falkam jul ekaliajwa jaxot. Do jawut, jiw putat nama.

³ Do jawutbej, Jesús xabich wuajantat japi jiw naewuajan, japi chiekal matabijaliajwa.

Jum-aechon: "Aton fulaech pejlul poxade trigo xasaljabaliajwa.

⁴ Xasaljaba wut, asew trigo natacholan nuamtat. Jawux mia pat xaeliajwa japi trigo, oeli nuamtat. Do jawut, japi trigo xaeslisi.

⁵ Asew natacholan ia'xot. Jaxot as xanaja'al. Japi trigo kamta naboela, sat kaes tuajnik xot, sat kaeswapich xot sat.

⁶ Do xabich masxaenk wut, selnas wut, matkaens japi trigo, tathinkasnika-el xotdik.

⁷ Asew trigo natacholanpi na-e'lu tasiaptasxot. Japi trigo naboela wut, jawutbej na-e'lu naboela. Na-e'lu kaes atha. Samata, trigo ti'sax itfi'il. Samatabej, japi trigo naboes-el.

⁸ Asew trigo natacholan sat pachaemxot. Japi trigo puexa chiekal naboela. Trigoton chiekal ti'sful wut, chiekal naboet. Asew trigoton naboet cien trigofu. Asew trigoton naboet sesenta trigofu. Asew trigoton naboet treinta trigofu.

⁹ Xamal chiekal matabijiasiam wut Dios pejmatabijsax, ¿chiekal naewe'e xan naewuajnapox!" —aech Jesús.

Ma-aech xot Jesús xabich wuajantat naewuajan
(Mr 4.10-12; Lc 8.9-10)

¹⁰ Do jawut, xanal pejnachalwan mox soepax Jesúsxot. Jesús wuajnaemtax wut, jum-an:

—¿Ma-aech xotkat jiw xabich naewuajnam wuajantat? —an xanal.

¹¹ Jesús jumnot wut, jum-aechon: "Dios xamal tapaei chiekal matabijaliajwam Dios puexa pejiw tato'laxaelpox. Asew jiw japox matabijaxil. Japi asbuan jumch naewesaxael. Xamallax naewetam wut, chiekal matabijaxaelam, achax chiyaxael japawuajan.

¹² Chiekal tataeflafulpon tejew, japon kaes pejme chaxdusaxaelen. Asanlax chiekal nawetataeflafa-elpon tejew, japon kaeswapich nawetataefulpox, puexa kefisaxaeson.

¹³ Samata, xan jiw naewuajnapax wuajantat. Japi taen wut xan isxpojan, japi chiekal matabijaxil, ma-aech xot xan japoxan isx. Japi nanaewet wutbej xan jum-anpoxan, chiekal jummatabijaxili, achax chiyaxael japoxan.

¹⁴ Dios pejprofeta Isaías chajia lelox, jum-aech Dios jum-aechpox jiw jummatabijaxilox, naewuajnas wuti Dios pejjamechan:

'Jiw xabich naewesaxael. Pe japi jummatabijaxil naewuajnaspojan. Jiw taen wut ja-aechpoxan, japoxan japi jiw matabijaxil, achax chiyaxaelpox.

¹⁵ Japi matnaetink xot, matabijaxili chimiawuajan. Japibej, me-ama pajut naecho'takuka wut, ja-aechi jumtae-elaliajwa. Japibej, me-ama matseka wut, ja-aechi tae-elaliajwa. Samata, japi matabijaxil tajjamechan nanaexaxisliajwa. Samata, xan bu'weyaxinil japi jiw' —aech Dios jum-aechpox.

¹⁶ “Xamal taenamproxan, asew jiw japoxan taen wut, japi nejchachaemlaxael. Xamal jumtaenamproxan, asew jiw japoxan jumtaen wut, japiwej nejchachaemlaxael.

¹⁷ Diachwujnakolax xan jum-an. Xabich profetas, asew xabich pachaempibej, xabich taesiapi Mesias, xamal amwutjel taenampon. Pe japi tae-el, chajia wujajna tur xoti. Japi xabich jumtaesiabey chimiawujajan, xamal jumtaenamproxan. Pe japi jumtae-el” —aech Jesús xanal pejnachalwanliajwa.

Jesús chiekal chanaekabuwanapox trigo pejwujajan, xasaljabapon
(Mr 4.13-20; Lc 8.11-15)

¹⁸ Do pejme Jesús jum-aech xanal pejnachalwanliajwa: “iChiekal nanaewe'e xan naewujanaxprox! Chiekal chanaekabuwanaxaelen, achax chiyaxael trigo xasaljabapox.

¹⁹ Trigo natacholanprox nuamtat, japoxlap, me-ama Dios puexa pejjiiw tato'laxaelprox. Jiw naewet wut japox, chiekal jummatatabija-eli. Samata, Satanás fulaen japilel japi kofaliajwa Dios naexasisfulprox.

²⁰ Trigo, ia'xot natacholanpi, kamta naboelapi, japi trigo, me-ama asew jiw Dios pej-jamechan jumtaen wut, kamta naexasiti. Do jawut, xabich nejchachaemili.

²¹ Pe xabicha-el japi jiw pejxanaboejaxan Diosliajwa, chiekal naexasisfula-el xotfaki Dios. Japi jiw, me-ama trigo tathinkasnika-elpi. Chiekal ti'sfula-elbejpi. Dios naexasit xoti, asew jiw bu'wujajanpaeis wut, o, chaemilprox wepach wut, jawut japi jiw kaes xanaboe-jafula-eli Dios. Samata, kofapi Dios naexasisfulprox.

²² Trigo, natacholanpi na-e'lu tasiaptasxot, matxoelanaboelapi, japi trigo, me-ama asew jiw Dios pejjamechan jumtaeni. Japox jumtaen wut, naexasiti. Do jawux, asaxan nejchaxoel xoti, kofapi naexasitprox Dios pejjamechan, kaes nejchaxoelaful xoti ampathat-pijaxankal. Nejchaxoelafulbejpi kemaenkaliajwa. Xabich kaes plata kanasiapi. Samata, japoxan nejchaxoel xoti, kaes naexasisfula-eli Dios. Samatabej, xabicha-el japi pejxanaboejaxan Diosliajwa.

²³ Trigo, natacholanpi sat pachaemxot, japi, me-ama asew jiw. Dios pejjamechan jumtaen wuti, japi chiekal naexasit, matabija xoti, achax chiyaxaelprox. Japi jiw isful Dios nejxasinkproxan. Japi jiwlap, me-ama trigo natacholanpi sat pachaemxot. Asew jiw japixot chiekal is Dios nejxasinkproxan. Japi jiwlap, me-ama trigotonan naboeti cien trigofu. Asew jiw japixot kaeswapich is Dios nejxasinkproxan. Japi jiwlap, me-ama trigotonan naboeti sesenta trigofu. Asew jiw japixot chiekal is-el Dios nejxasinkproxan. Japi jiwlap, me-ama trigotonan naboeti treinta trigofu” —aech Jesús, xanal pejnachalwan nachanaekabuana wut trigowujajanliajwa.

Me-ama trigo ja-aechpi pejwujajan, japi kaewutje ti'tprox, trigo swapich

²⁴ Do jawux, Jesús jum-aech asawujajan: “Dios puexa pejjiiw tato'alpox, me-ama aton xasaljaba trigo pachaempi pejlultat, ja-aechlap-is japox. Japi trigo pachaem naboelaliajwa.

²⁵ Japon moejt wut, padaelman fulaech japon pejlul poxade. Japalulxot japon xasaljaba, me-ama trigo ja-aechpi. Xasaljabax ketoet wut, jaxot chijapon.

²⁶ Do baxael, trigo naboela wut, do jawutbej naboela, me-ama trigo ja-aechpi.

²⁷ Do jawut, lulpijin pamakjiw pat japon pejbaxot. Japi jum-aech: 'Tajpaklon, trigo xasaljabampi nejlultat majt, chiekal pachaempi. ¿Pe ma-aechxotkat naboelabej, me-ama trigo ja-aechpi nejlultat?' —aech pamakjiw.

²⁸ Lulpijin jum-aech: 'Kaen tadaelman xasaljaba, me-ama trigo ja-aechpi tajlulxot' —aechon pamakjiwliajwa. Do jawut, pamakjiw wujajnachaemt wut, jum-aechi: '¿Pachaemkat xamliajwa xanal tusliajwan, me-ama trigo ja-aechpi?' —aechi lulpijinliajwa.

²⁹ Do jawut, lulpijin jum-aech: 'El' —aechon. 'Me-ama trigo ja-aechpi, tutam wut, chatu saxaelambej trigo.

³⁰ Samata, itapaem, trigo swapich, kaewutje ti'sliajwa! Trigo chiekal ti't wut, jawut, to'axaelen matxoela tasiapsliajwas, me-ama trigo ja-aechpi. Do jawux, me-ama trigo ja-aechpi chamatakuiyaxaes. Do jawut, chanosaxaes, me-ama trigo ja-aechpi lausliajwas. Do baxael, trigo jola, trigo cha-owabatat nawecha-owaxael' —aech lulpijin” —aech Jesús pejnachalaliajwa.

Mostazafut pejwujajan
(Mr 4.30-32; Lc 13.18-19)

³¹ Do jawux, Jesús naewujajan wut jiw, asawujajantat jum-aechon: “Dios puexa pejjiiw tato'alpox, me-ama mostazafut, aton matht pejlultat. Do jawux, kamta wenaboeltas. Weti'tasbejpon.

³² Diachwujnakolax japafut kaes pejme cha-aelfut. Kaewaech wut, kamta ti't kaes athu. Me-ama asew lulxot muthasi, jachi-el. Ti't wut, chiekal nae. Samata, pachaem mia pejfenan

isliajwa japanaedalanxot” —aech Jesús mostazafutliajwa. (Jasoxtat japi jiw naexasit Dios tato'alpox majt kaesapich. Kaesapich matkoijan wut, kaes pejme xabichaxael jiw.)

*Levadura pejwajan
(Lc 13.20-21)*

³³ Do jawux, Jesús pejme jum-aech asawujantat jiwliajwa: “Dios puexa pejiw tato'laxaelpox, me-ama levadura. Kaeow pawis pan isliajwa wut, trigobelan thonpow, kaesapich levadurabej. Tanialtow levadura posapa, puexa pansap puthlialijwa. Do jawut, cha-etow levaduratat japansap puthlialijwa, pinasapaliawabej” —aech Jesús jiwliajwa. (Jachiyaxaelbej, asamatkoi Dios puexa pejiw tato'laxael wut. Pothata jiw xabich xajuraxael.)

*Ma-aech xot Jesús naewajan wujantat
(Mr 4.33-34)*

³⁴ Jesús naewajan wut jiw, wujantat naewajanpon. Masoxtat asbuan jumch naewajna-elon.

³⁵ Japox ja-aech, pat xot Dios pejprofeta chajia jum-aechpox, Mesías jumchiyaxaelpox: “Naewajnaaxaelen wujantat. Jumchiyaxaelen jiw majt matabija-elpoxan. Akaseskolaxtat Dios that is wut, amwutjelbej, japoxan jiw matabija-el” —chiyaxaelpox Mesías.

Jesús chiekal chanaekabnanapox wajan, me-ama trigo ja-aechpiliaw

³⁶ Jesús buxtoet wut, kejachapon japi jiw nawelilijwa. Do jawux, ba lowpon, xanal pejnachalwan sapich. Jaxot wuton, xanal mox soepax Jesús. Do jawut, xanal Jesús wujnachaemtax chiekal nachanaekabnanalijwa wajan, me-ama trigo ja-aechpiliaw.

³⁷ Do jawut, Jesús jumnot wut, najum-aechon xanallilijwa: “Trigo pachaempi xasaljabapon, japonlap xan, puexa jiw pakoewkolnanponan.

³⁸ ‘Lul’ —aech wut, jumchililijwa: ‘Jiw ampathatpijiw’. ‘Trigo pachaempi’ —aech wut, jumchililijwa: ‘Jiw tato'laspi Dios’. ‘Me-ama trigo ja-aechpi’ —aech wut, jumchililijwa: ‘Satanás tato'laspi ampathatat’.

³⁹ Me-ama trigo ja-aechpi xasaljabapon, japonlap lulpijin padaelman. Japon pawul Satanás. ‘Trigo jolax’ —aech wut, jumchililijwa: ‘Asamatkoi ampathatpijiw toesaxaes Dios’. ‘Trigo chatsiaps’ —aech wut, jumchililijwa: ‘Dios pej-ángeles’ —chililijwa.

⁴⁰ Japox jachiyaxael, that toepalilijwa wut jiw Dios naexasis-elpiliaw. Japi, me-ama trigo ja-aechpi, jitat lausaxaes.

⁴¹ Xan, puexa jiw pakoewkolnan, to'axaelen Dios pej-ángeles tamejalilijwapi jiw babi-jaxan ispi, asew jiwbej, japi, itpaeipi asew jiw babijaxan isliajwa.

⁴² Japi jiw pelsaxaes jit pinijyax poxadik. Jaxotdik xabich noeyaxaeli, bowaxaes xot jitat. Bua' tatisaxaelbejpi, xabich nabijasaxael xot.

⁴³ Dios naexasitilax, japi duilaxael pax Diosxotse. Jaxotse japi jiw xabich nejchachaem-laxael. Me-ama juimt matkoipijin itliak wut, jachiyaxael japi jiw. Xamal chiekal matabijiasiam wut Dios matabijtpox, ¡chiekal naewe'e xan jum-anpox!” —aech Jesús xanal pejnachalwanliajwa.

Xabich ommaeyaxan chafaenspox pejwajan

⁴⁴ Jesús pejme jum-aech wujantat xanallilijwa: “Dios puexa pejiw tato'alpox, me-ama xabich ommaeyaxan chamoestaspox lultat. Japox lulpijin chajia maliach chamutht pejlultat. Do baxael, asan chafaen chamoestaspox. Chafaen wut, do jaxot, kawutat pejme chamoeston japox. Japon xabich nejchachaemil. Do jawut, fulaechlison puexa pejew mowalilijwa, japaplatatat japalul chawujisliajwa, ommaeyaxan chamuthtasxot” —aech Jesús xanallilijwa. (Me-ama xabich ommaeyaxan chafaenpon xabich nejchachaemil, jachiyaxaellap-is, jiw matabija wuti wajpaklokolan Dios.)

Perlat pejwajan, japot xabich ommaenkpot

⁴⁵⁻⁴⁶ Do pejme Jesús jum-aech xanal pejnachalwanliajwa: “Dios puexa pejiw tato'alpox, me-ama perlas wujisan. Japon jalwek perlas, xabich pachaempi, wujisliajwa. Faen wuton kaet perlat, xabich ommaenkpot, jawut puexa pejew mowapon, japaplatatat wujisliawapon japot perlat” —aech Jesús xanallilijwa.

Chinchorro pejwajan

⁴⁷ Do jawutbej, Jesús jum-aech xanal pejnachalwanliajwa: “Dios puexa pejiw tato'alpox, me-ama chinchorro, pukaxot xawawaels wut, ja-aechox. Nejmachbaxi xawawaels.

⁴⁸ Chinchorro xabich baxi wulak wut, nabaxitpi chajolkafalde thejtade. Jaxotde chalaki baxi itfesliajwa. Pachaempikal jefaldiki canasta poxadik. Do jawut, chaemili pelsfuli asalel.

⁴⁹ Jasox jachiyaxaelbej, that toepaliajwa wut. Jawut Dios pej-ángeles faloeyaxoek jiw babejchow pejlel diajkaliajwa pachaempixot.

⁵⁰ Do jawux, babejchow pelsaxaeks jit pinjiyax poxadik. Jaxotdik xabich noeyaxaeli. Bua'tatisaxaelbejpi, xabich nabijasaxael xot" —aech Jesús xanalliajwa.

Pajelnaewuajnaex, padujnaewuajnaexbej

⁵¹ Jesús xanal nawuajnaexaemt wut, jum-aechon xanal pejnachalwanliajwa:

—¿Xamalkat jummatajibam xan naewuajnaexoxan? —aech Jesús xanalliajwa.

Xanal jumnotx wut, jum-an:

—Tajpaklon, diachwuajnakolax xanal puexa chiekal jumtaenx japoxan —an xanal.

⁵² Do jawut, Jesús jum-aech xanalliajwa:

—Judíos chanaekabuanapi matabija Dios puexa pejjiw tato'alpox. Japi xan nanaexasit wut, japibej tajnachalaxael. Me-ama aton pejbaxot xabich owa ommaenkproxan, asew pajel, asew paduj, ja-aechbej judíos chanaekabuanapi. Japi matabija pajelnaewuajnaexan, xan naewuajnaexoxan tajutliajwa. Japi matabijabej padujnaewuajnaexan, chajia lelsproxan. Puexa japoxan pachaem japi naewuajnalijwa jiw —aech Jesús xanalliajwa.

Jesús Nazaret paklowaxxotpox

(Mr 6.1-6; Lc 4.16-30)

⁵³ Do jawut, Jesús buxtoet wut wuajan naewuajanpox, falaechon Nazaret paklowaxxotpoxade.

⁵⁴ Do jawux, patlison Nazaret paklowax, pejtujajnakolaxxot. Jaxot tuaduton jiw naewuajnalijwa judíos naewuajnaexot. Japi jumtaen wut Jesús naewuajanpox, xabich nejchaxoelanuili. Samata, nakaewa najum-aechi:

—¿Amxotkat ampon puexa japoxan xabich matabijit? ¿Ma-aechon koechaxan isliajwa?

⁵⁵ ¿Diachkat ampon José carpintero nabichan paxulna-elkat? Jesús pen pawul María. Ampon pakoew ampilape. Kaen pawul Santiago. Asan pawul José. Asan pawul Simón. Asan pawul Judas.

⁵⁶ Jesús pakoewbej, watho', japi duil xaxisxot. ¿Amxotkaton faek puexa matabijsax, pamamaxbej? —na-aechi nakaewaliajwa.

⁵⁷ Samata, japi naexasis-el Jesús naewuajanpox. Do jawutbej, Jesús jum-aech pajutliajwa:

—Profetas sitaens popaklowaxanpijiw. Pelax profeta sitae-esal pejtujajnakolapijiw. Pe-jbapijiwbej sitae-esal —aech Jesús.

⁵⁸ Do jawutbej, Jesús jaxot xabich koechaxan is-el, naexasis-esal xoton.

14

Juan, jiw bautisan, boesaspox

(Mr 6.14-29; Lc 9.7-9)

¹ Japamatkoiyan rey Herodes, Galilea tuajnapijiw tato'lan, wultaen Jesús isfulproxan.

² Samata, Herodes jum-aech pamakjiwliajwa, jum-aech wuton Jesúsliajwa: "Japonlap Juan, jiw bautisan. Tup wut, mat-echpon. Japonlap pejme duk. Samata, japon isful koechaxan" —aech Herodes Jesúsliajwa.

³ Herodes chajia keto'a soldaw jaelsliajwapi Juan. Do jawut, Juan xawaech cadenamuatat. Do jawux, jiw jebatat jiaspon. Herodes japox is, pijow pejjetat. Japow pawul Herodías. Japow majt Felipe pijow. Felipe Herodes pakoewan. Do baxael, Herodes fe'en pakoewan Felipe.

⁴ Jasox Herodes is wut, Juan jum-aech Herodesliajwa: —Moisés chajia lelpox jum-aech: "¡Xam nakoewan pijow nijow dofaximil! ¡Japox chaemil!" —aechox —aech Juan Herodesliajwa.

⁵ Samata, Herodes japox jumtaen wut, japon boesasia Juan. Pe Herodes pejlwla judíosliajwa, japi xabich jum-aech xot: "Juan, jiw bautisan, japon Dios pejprofeta" —aech xot xabich jiw.

⁶ Pe baxael, Herodes pejcumpleños pat. Jawut, fiesta wut, Herodías paxulow nababoela taduchpi pejwuajnalel. Herodes xabich nejxasink japow nababoelapox.

⁷ Samata, Herodes jumdut chaxdusliajwa japow wuljoeyaxaelpox. Jum-aechbejpon: "Nawuljowampox chaxdus-ense wut, ¡Dios xan nej nakastike'!" —aech Herodes pajiwliajwa.

⁸ Do jawux, pen buxto'aspox jum-aechow Herodesliajwa:

—¡Ma amwut nachaxdu'e plaftat Juan, jiw bautisan, pejmatnaet! —aechow Herodesliajwa pen buxto'aspox.

⁹ Do jawut, Herodes xabich nejxaejwas Juanliajwa. Pe taduchpi jumtaen Herodes jumdutox. Samata, to'apon soldaw isliajwa japow wuljowpox.

¹⁰ Do jawut, Herodes soldaw keto'a Juan taxtasiapchaliajwas. Do jawut, Juan taxtasiapchas jiw jebatat.

¹¹ Jawut Juan pejmatnaet chaxlaens plaftat. Do jawutbej, japi chaxdut pansiw Juan pejmatnaet. Do japow pansiw pen chaxdutow Juan pejmatnaet, japow chiekal matabisliajwa Juan tappox.

¹² Baxael, Juan pejnachala pat chaxlaelajwa patapan Juan. Do jawut, chaxfollisipon. Muthlisipon. Do jawux, Juan pejnachala fulaech Jesús poxade. Jesúsxot pa'a wut, chapaeilisi Juan taxtasiapchaspo.

Jesús naxaeyaxan chaxduwpox cinco mil poejiw

(Mr 6.30-44; Lc 9.10-17; Jn 6.1-14)

¹³ Jesús jumtaen wut Juan boesaspox, Jesús chijia falkamtat asalel tamachaliajwa, xanal pejnachalwan suapich. Pe jawut, jiw matabija wut, japibej nakola paklowanxot wuajnade fulaelajwa putlel.

¹⁴ Samata, Jesús chapa'a wut falkamtat pukababu'tat, xabich jiw taenson putlel. Taen wuton japi jiw, xabich beltaenpon. Samata, jawut Jesús boejthut jiw bu'xaeya, japi buflaenspi.

¹⁵ Do jawut, tuila wut, xanal pejnachalwan mox soepax Jesús. Jawut xanal jum-an:
—Tuilalisox. Amxot tuajnuchan mox ajil. Amxotbej ajil naxaeyaxan wuajsliajwas. Samata, jampi jiw to'im tuajnuchan poxade, pajut pejew naxaeyaxan wuajsliajwa! —an xanal.

¹⁶ Jesús jumnot wut, jum-aechon xanalliajwa:
—Japi wewe'pa-esal atuj fulaeyax naxaeyaxan wuajsliajwa. ¡Xamal najut chaxduim naxaeyaxan japi jiw xaeliajwa! —aech Jesús xanalliajwa.

¹⁷ Xanal jumnotx wut, jum-an:
—Xanalxot asbuan jumch cinco pan, kolenje baxinbej. Xajupaxil puexa jiwliajwa —an xanal.

¹⁸ Do jawut, Jesús jum-aech xanalliajwa:
—¡Ampalel xalaemni! —aechon.

¹⁹ Do jawut, Jesús to'a jiw chalakaliajwa polaxot. Jawut chafiton cinco pan, kolenje baxinbej. Do jawut, athu natachaemse wut, gracias-aechon, panliajwa, baxiliajwabej, Dios kawuajnalajwa wut. Jawut jalkaful panes, baxibej. Jalkaful wut, pejnachalwan nachaxduifulon xanal sasfulaliajwan. Jawut sasfulax puexa jiwliajwa.

²⁰ Puexa jiw chiekal xael. Chiekal nafniabejpi. Kaechatoel wut xaeyax, xanal jiax matpirantat jiw mali. Wulux doce matpiran, baxitoerow, pan malsibej.

²¹ Jiw xaelpi, japi cinco mil poejiw. Watho' xajui-esal, yamxi suapich.

Jesús fulaenpox pukaminakaldin

(Mr 6.45-52; Jn 6.16-21)

²² Do japoxwux, Jesús xanal nato'a falkam julaliajwan, wuajna chaliknaliajwan. Jesús kaweta namanfuk jiw to'aliajwapon, pejbachan poxade japi jiw nawelliajwa.

²³ Puexa jiw nawia wut, japon jul muax matwuajase, tamach Dios kawuajnalajwa. Madoi wut, tamachon muaxxot.

²⁴ Jawut xanal falkamtat xabich atujajan. Truxan pinanul jujabas falkam, xabich joewa matalech xot falkam.

²⁵ Do jawut, naliana-el wutfuk, Jesús fulaen minakaldin xanal poxadin.

²⁶ Xanal japox taenx wut, xabich belwax. Do jawut, xanal pota na-oenkax, xabich belwax xot. Xanal jum-an:

—¡Yee, dep amka! —an xanal.

²⁷ Do jawut, xanal najum-aechon:

—¡Nabej nejlewle! ¡Xanpe! —aech Jesús xanalliajwa.

²⁸ Do jawut, Pedro jum-aech:

—Tajpaklon, xam Jesúsnam wut, ¡xanbej nato'im minakal fulaeliajwan xam poxade! —aech Pedro.

²⁹ Jesús jum-aech:

—¡Xabua'din! —aechon.

Do jawut, Pedro falkamxot nandikon minadik. Fulaechlison Jesús poxade minakalde.

³⁰ Pe jawut, Pedro xabich joewa wikax taen wut, xabich beljowpon. Do jawut, Pedro matkakiawafaldik. Do jawut, na-uwalison pejlwt. Jum-aechon:

—Tajpaklon, ¡xabua't! ¡Xan nabu'wem bu'la-elaliajwan! —aech Pedro.

³¹ Do jawut, Jesús makafit wut Pedro, jum-aechon:

—Pedro, ¿ma-aech xotkat xam chiekal naxanaboejs-emil? ¿Ma-aech xotbejkat nejchaxoelam: “Xan xajupaxinil fulaeliajwan minakalde” —amkat, nejchaxoelam wut? —aech Jesús.

³² Japi kolenje falkam jul wut, joewa chiekal toep.

³³ Do jawut, xanal brixtat nuilx falkamtat Jesús pejwuajnalel. Xanal jum-an:
—iDiachwuajnokolax xam Dios paxulnam! —an xanal.

Jesús boejthutpox jiw bu'xaeya Genesaret tuajnuxot
(Mr 6.53-56)

³⁴ Xanal chapatx puka wesklelde, Genesaret tuajnuxot.

³⁵ Japatuaajnupijiw, japi jiw matabijtpi Jesús. Samata, wultaen wuti Jesús chapatpox japatuaajnuxot, japi jiw buflaeni bu'xaeya Jesúslel.

³⁶ Japi wuljow Jesús tapanalajwa bu'xaeya jachaliajwa Jesús pejsumta-osax matdukafulpox. Do jawut, puexa japi jiw jacha wuti, chiekal boejthuslisi.

15

Jiw chajia nejchaxoelpox, babijax, japoxan is xoti, babejchow nadofa
(Mr 7.1-23)

¹ Kaesapich fariseos, judios chanaekabuanapibej, fulaen Jesúslel. Japi fulaen Jerusalén paklowaxxot. Pat wuti Jesúsxot, jum-aechi:

² —iMa-aech xotkat nejnachala kofa wajwuaajnapijw pejkabuananpoxan? iMa-aech xotbejkat majt xabich piach kekakias-eli, xaeliajwa wut? —aechi Jesúsliajwa.

³ Jesús jumnot wut, jum-aechon japijiajwa:

—iMa-aech xotbejkat xamal naexaxisfula-emil Dios tato'alpox? Xamal najut naexasisfulam naewuajnampoxankal.

⁴ Dios chajia jum-aech: 'iSitaem nej-ax, nej-enbej!' —aech Dios. Jawutbej Dios jum-aech: 'Nej-ax, nej-enbej, sitae-emil wut, xam tupaaxaelam kastikaxtat' —aech Dios.

⁵⁻⁶ Xamal, fariseospim, judios chanaekabuanampimbej jum-amla: 'Aton jum-aech wut paxliajwa, penliajwabej: "Xamal kajachawaesaxinil, puexa tejewpi Diosxot jumduxot xotlis chaxdusliajwan" —aech wuton, japon japox jum-aech, kajachawaesaxil xoton pax, penbej' —am xamal asbuan jumch. Jasoxtat xamal fariseospim, judios chanaekabuanampimbej, mastaenam Dios tato'alpox, najut xamal naewuajnampoxankal naexasitam xot.

⁷ iXamal naekichachajbapijwam! Isaías, Dios pejprofeta, diachwuajnokolaxpox chajia lel Dios jum-aechpox xamalliajwa. Japox jum-aech:

⁸ 'Ampi jiw, me-ama nasitaen wut, ja-aechi. Chimiajamechan naksiyabejpi xanliajwa. Pe pejnechaxoelaxantat xan nasitae-eli.

⁹ Japi nakawuajnaxtat najum-aech wuti: "Xam nejxasinkax" —na-aech wuti, japox xanliajwa omjil. Japi kawuajanpoxan, pajutliajwakal' —aech Dios jum-aechpox xamalliajwa.

¹⁰ Do jawut, Jesús jiw la kaes moxaliajwadin. Jawut jum-aechon:

—iChiekal najumtaem matabijaliajwam jumchiyaxaelenpox!

¹¹ Jiw naxaeyax xael wut, babejchow nadofaxil. iE! Pelax jiw jum-aechpoxan pejkaechantat, japoxantat japi jiw babejchow nadofaxael —aech Jesús jiwliajwa.

¹² Do jawut, xanal pejnachalwan mox soepax Jesús jumchiliajwan. Do jawut, xanal japon jum-an:

—iXamkat matabijtam fariseos palalapox, jumtaen wuti xam jum-ampox? —an xanal Jesúsliajwa.

¹³ Do jawut, Jesús jum-aech wuajantat xanalliajwa:

—Taj-ax Dios mutha-esalpi, japi tusaxaes pelsliajwas. Fariseos, me-ama mutha-esalpi taj-ax Dios. Ja-aech japi fariseos, jiw naewuajna-el xoti, me-ama Dios to'as. Samata, asamatko fariseos toesaxaes.

¹⁴ Samata, inabej nejchaxoele' xabich fariseosliajwa, japi, me-ama itliakla nakae-itliakla namakxafolpi wut, ja-aech xoti! Itliaklan, asan itliaklan makxafol wut, japi kolenje natacholnaxaek kaemuthadik, japi itliakal xot —aech Jesús xanalliajwa.

¹⁵ Do jawut, Pedro jum-aech Jesúsliajwa:

—iXanal chiekal nachanaekabuanim japawuajan! —aechon.

¹⁶ Jesús jumnot wut, jum-aechon xanalliajwa:

—iXamalkat-is chiekal jummatabija-emil japawuajan?

¹⁷ Xamal chiekal matabijam. Puexa naxaeyaxan xaelam wut, kaweta namana-el nejwoejtat. Baxael, nakoltox xaelampox.

¹⁸ Pelax jum-am wut babejamechan, japoxan nakola nejnejchaxoelaxanxot. Japoxantatbej xamal babejchow nadofaxaelam Diosliajwa.

¹⁹ Jiw pejnechaxoelaxanxot nakola babejnechaxoelaxan. Samata, nejchaxoele, jiw beyaxan, asew watho' bu'moejxaxanbej, natkowaxanbej, kichachajbaxanbej, babejamechan jumchiyaxanbej asew jiwliajwa, kaes asaxan babijaxan isaxanbej.

²⁰ Nejmachjiw japoxan isful wut, japoxantat japi jiw babejchow nadofaxael. Pelax, jiw xaelliajwa wut, majt xabich kekakias-el wut, japoxtat jiw babejchow nadofaxil Diosliajwa —aech Jesús xanalliajwa.

*Judíos-atowa-elpow, japow naexasitpox Jesús
(Mr 7.24-30)*

²¹ Jesús Genesaret tuajnuxot nakolt wut, xanalbej, japon pejnachalwan, nakolax, japon suapich. Jawut xanal fulaechx, japon suapich, Tiro paklowax poxade, Sidón paklowax poxadebej.

²² Jaxotde xanal pa'ax wut, Jesús mox soepnas pawis. Japow Canaán tuajnupijow. Jawut nejlasful wut, jum-aechfulow Jesúsliajwa:

—Tajpaklon, David pamon, jtaxulow nawebeltaem! Taxulow xabich nawenabijat, dep webaes xotow pejmatpuxatxot —aechow.

²³ Jesús jumnos-el japow. Do jawut, xanal pejnachalwan mox soepax Jesúsxot. Jawut xanal Jesús buxto'ax wut, jum-an:

—To'impow nawiasliajwa pejba poxade, japow xabich nejlasful xot wajwuchakal —an xanal, Jesús buxto'ax wut.

²⁴ Do jawut, Jesús xanal najum-aech:

—Judíos, me-ama ovejas napelti, ja-aechi, tataeflaspon wejisal xot. Samata, Dios xan nato'a judíoskal tataeflaliajwan —na-aech Jesús xanalliajwa.

²⁵ Do jawut, japow brixtat nuk wut Jesús pejwujnalel, jum-aechow:

—Tajpaklon, jxan nakajachawae'e! —aechow.

²⁶ Jesús jumnot wut, jum-aechon japowliajwa:

—Xan matxoela kajachawaesaxaelen wut xam, judío-atowa-emilpowam, ja-an wut, xan, me-ama kenosaxaelen yamxi xael wuti pan, japapan wur duajsliajwan —aech Jesús japowliajwa.

²⁷ Do jawut, japow jum-aech Jesúsliajwa:

—Tajpaklon, diachwujnakolax xam jum-am. Pe hasta wurbej xael panfuda', natacholani, wurpijiw pejmesabuxfalxot —aechow. (Japox jum-aechow, matabijt xot Jesús xajuprox kajachawaesliajwa judíos-elibej.)

²⁸ Do jawut, Jesús jum-aech:

—Pawis, xam xabich xan naxanaboejtam. Samata, kajachawaesaxaelen najum-ampox —aech Jesús japowliajwa.

Do jawut, japow paxulow pejmatpuxatxot dep wejissallisow.

Jesús boejthutpox xabich bu'xaeya

²⁹ Do jaxot Jesús chijia wut, laejalison Galilea pukababu'akal. Jawux julon mux. Jaxot eklison.

³⁰ Xabich jiw natamejal Jesúsxot. Japi jiw xabich bu'pat nabejka, itliaklabej, pejmuaxan, pejbechanbej, wenabejkaspibej, buxwujnajilabej, xabich asew bu'xaenkpibej. Bu'xaeya buflaensi owas Jesús pejwujnalel. Jawut Jesús puexa bu'xaeya chiekal boejthut.

³¹ Samata, buxwujnajila chiekal naksiya. Pejmuaxan, pejbechanbej, wenabejkaspi, japibej chiekal wepachaems. Nabejkabej chiekal laelp. Itliaklabej chiekal taen. Ja-aech wut, puexa jiw jum-aech: “¡Dios, Israel tuajnupijwas wajDios, xabich pachaem!” —aechi Diosliajwa.

*Jesús naxaeyaxan chaxduwpox cuatro mil poejiwliajwa
(Mr 8.1-10)*

³² Do jawux, Jesús xanal pejnachalwan nala kaes mox soepaliajwan. Japonxot xanal chiekal moxan wut, najum-aechon:

—Ampi jiw beltaenx, wejisal xot xaeliajwa. Japi xan nachala tres matkoije. Toellisi naxaeyaxan xafoli. Xan ampi jiw to'axinil naxae-elaxtat. To'ax wuti naxae-elaxtat pejbachan poxade, japi jiw xabich pejlit nuamtat boejjilaxaeli —aech Jesús xanalliajwa.

³³ Xanal jumnotx wut, jum-an:

—¿Amxotkat wujasaxaes naxaeyaxan puexa ampi jiwliajwa? Amxot mox ajil tuajnuchan naxaeyax wujsliajwas —an xanal.

³⁴ Jesús nawujnachaemt wut, jum-aechon:

—¿Xamalxot massapichkat pan? —aechon.

Xanal jumnotx wut, jum-an:

—Siete panes asbuan jumch. Kaesapich baxixbej —an xanal.

³⁵ Do jawut, to'apon jiw chalakaliajwa satat.

³⁶ Jawut chafitlison siete panes, baxixbej. Do jawutbej, gracias-aechon Diosliajwa panliajwa, baxixliajwabej. Jawut jalkafulon panes, baxixbej. Jawut xanal nachaxduifulon sasfulaliajwan. Do jawut, xanal satx puexa jiwliajwa.

³⁷ Puexa jiw chiekal xael. Chiekal nafniabejpi. Do baxael, xanal pejnachalwan chanotx malsi. Wulux siete matpiran.

³⁸ Naxaelpi cuatro mil poejiw. Watho', yamxibej, xajui-esal.

³⁹ Do jawut, Jesús jiw to'a naweliajwa pejbachan poxade. Do jawut, Jesús falkam jul, xanal suapich. Jawut chijian Magadán tujnu poxade.

16

Fariseos, saduceosbej, japi to'apox Jesús isliajwa koechax

(Mr 8.11-13; Lc 12.54-56)

¹ Fariseos, saduceosbej, fulaen Jesús taeliajwa, Jesús xapaesliajwapi. Samata, pat wuti jaxot, japi keto'a Jesús isliajwa koechax, asbuan jumch taeliajwa diachwujnakolax Jesús Dios paxulan wut.

² Jesús jum-aech: "Juint tuila wut, thatbaxo pasoe yax taenam wut, xamal jum-am: 'Kandiawa itwujnaxael' —am xamal.

³ Kandiawasap, thatbaxo pasoe yax taenam wut, itloejen da'ax taenam wutbej, xamal jum-ambej: 'Ampamatkoi iamaxael' —am xamal, matabijam xot. Pelax matabija-emil ampamatkoiyan Dios ispoخان. Samata, asbuan jumch naketo'am koechax xan isliajwan xamal taeliajwan.

⁴ Xamal babejchowam naketo'am xan koechax isliajwan. Pe xamal taeyaximil asakoechaxan. Xamal kaeyax asbuan jumch taeyaxaelam. Me-ama chajiakolaxtat Dios is profeta Jonásliajwa, jiw pajut chiekal matabijaliajwa Dios xajuprox mat-elialjwa jiw tui, japi pejme duilaliajwa, jasoxbej Dios isaxael xanliajwa" —aech Jesús fariseosliajwa, saduceosliajwabej.

Do jawut, Jesús chijia japixot. Japi tamach waelapon.

Jesús naewujaprox pejnachala, japi chiekal pajut natataeflialjwa fariseos naewujaproxan, saduceosbej

(Mr 8.14-21)

⁵ Do jawux, xanal Jesús pejnachalwan, Jesús suapich, chalixnax wut puka we-enelde, xanal nejkiowx pan xalaeliajwan.

⁶ Do jawut, Jesús xanal najum-aech:

—¡Chiekal taem fariseos pejlevaduraliajwa, saduceos pejlevaduraliajwabej! —aech Jesús.

⁷ Jawut xanal nakaewa najum-an:

—Jesús japox bej nakjum-aechbej, xatis nejkiows xot pan xalaeliajwas —an xanal.

⁸ Jesús matabijt xanal nakaewa jum-anprox. Samata, jum-aechon:

—Xan matabijt xamal nakaewa najum-anprox, pan nejkiowamproxliajwa. ¿Ma-aech xotkat nejchaxoelam panliajwa? Xamal chiekal xan naxanaboeja-emilfuk.

⁹ Xabich we'fuk chiekal matabijaliajwan. Nejchafaeka-emil xan jalkafalax wut cinco pan, me-ama kaes cinco mil jiw xaeliajwa. Jawut xamal wulum doce matpiran malsi.

¹⁰ Nejchafaeka-emilbej xan jalkafalaxprox siete panes, me-ama kaes cuatro mil jiwliajwa. Jawut xamal wulum siete matpiran malsi.

¹¹ ¿Ma-aech xotkat nakiowa xamal jummatabija-emil, xan jumchi-enil panliajwa? ¡Chiekal taem fariseos pejlevaduraliajwa, saduceos pejlevaduraliajwabej! —aech Jesús.

¹² Do jawut, xanal tajut chiekal matabijax Jesús naksiya-el levaduraliajwa, panliajwabej. Jesús japox jum-aech wut, jum-aechon xanal tajut chiekal natataeflialjwan fariseos pej-naewujanaxan, saduceosbej, japoxan chiekal pachaema-el xot.

Pedro jum-aechprox Jesúsliajwa: "Xam Cristowam, Dios athuxotse dukponan paxulnam"

(Mr 8.27-30; Lc 9.18-21)

¹³ Jesús pat wut Cesarea de Filipino tujnuxot, japon xanal nawujnachaemt wut, jum-aechon xanalliajwa:

—¿Achanan na-aechkat jiw xanliajwa, puexa jiw pakowkolnanliajwa? —aech Jesús.

¹⁴ Xanal jumnotx wut, jum-an:

—Asew jiw jum-aech xamliajwa: 'Japonlap, Juan, jiw bautisan. Mat-echpon pejme duk' —aech asew jiw xamliajwa. Asew jiw jum-aechbej xamliajwa: 'Japonlap Elías, Dios pejprofeta. Mat-echpon pejme duk' —aech asew jiw xamliajwa. Asew jiw jum-aechbej xamliajwa: 'Japonlap Jeremías, o, asan Dios pejprofetasxot. Mat-echpon pejme duk' —aech asew jiw xamliajwa —an xanal Jesúsliajwa.

¹⁵ Jesús pejme xanal nawujnachaemt wut, jum-aechon:

—Xamallax, ¿achan na-amkat xanliajwa? —aech Jesús.

¹⁶ Do jawut, Pedro jumnot wut, jum-aechon:

—Xam Cristowam, Dios athuxotse dukpon paxulnam —aechon.

¹⁷ Do jawut, Jesús jum-aech Pedroliajwa:

—Simón, Jonás paxulan, Dios is pachaempox xamliajwa. Japox xam najut nijaxtat matabijs-emil. Japox matabijtam taj-ax Dios, athupijin, pijaxtat.

¹⁸ Xam ampox jum-an. Pedro, xam, me-ama ia't mamnikpot, ja-am xanliajwa. Jum-ampo xanliajwa, japox diachwujnakolax. Samata, puexa xan nanaexaxisaxaelpi, me-ama xam, japiwej tajjiwaxael. Samatabej, patupax malechaxisal tajjiw.

¹⁹ Xam tapaeaxaelen jiw tato'lalialjwam Dios pijaxtat. Paklonaxaelambej japi jiwliajwa. Xam tapaeaxaelam wut jiw japoxan isliajwa, Diosbej athuxotse tapaeaxael japi jiw isliajwa japoxan. Xam fiasaxaelampoxan jiw is-elalialjwa, Diosbej athuxotse japoxan fiasaxael jiw is-elalialjwa —aech Jesús Pedroliajwa.

²⁰ Do jawut, Jesús xanal nabuxfiat chapaesamatanfuk asew jiw japon Cristopon.

Jesús jum-aechpox, japon tupaaxaelpoxliajwa

(Mr 8.31-9.1; Lc 9.22-27)

²¹ Do japamatkoitat wut, Jesús tuadut xanal, japon pejnachalwan, chiekal nachanaekabuanalialjwa japon fulaeaxaelpoxde, Jerusalén paklowax poxade. Jaxotde judios-ancianos, sacerdotepaklochowbej, judios chanaekabuanapibej, japi pijaxtat xabich nabijasaxaelon. Boesaxaesbejpon. Pe tres matkoi wut, Dios mat-esaxaeson pejme dukaliajwa.

²² Do jawut Pedro pejlel buflaechon Jesús, buxfiasliajwa Jesús jum-aechpox. Jawut, Pedro jum-aech nejth'axtat Jesúsliajwa:

—¡El! ¡Japox nej jachi-ele' xamliajwa! Xam jum-ampo Dios nejxasinka-el —aech Pedro.

²³ Jesús japox jumtaen wut, natachaemchapon Pedrolel. Do jawut, Jesús jum-aech Pedroliajwa:

—¡Chijiamde xanxot! Xam japox jum-am wut, jum-am Satanás pijaxtat. Xan nakajachawaes-emil, japox jum-am wut. Xam nejchaxoela-emil Dios pijaxan. Asbuan jumch nejchaxoelam ampathatpijaxankal —aech Jesús Pedroliajwa.

²⁴ Do jawut, Jesús najum-aech xanallialjwa:

—Xamal tajnachalwasiam wut, nejkiowde najut isfulasiampoxan! ¡isfulde pomatkoicha xan tato'laxpoxan! ¡Nejchaxoeldebej xamal nabijasaxaelampox, tupaaxaelampoxbej, taj-nachalwam xot!

²⁵ Najut nejxasinkampoxankal isfulam wut, asamatkoi tupaam wut, duilaximil Diosxotse. Pelax isfula-emil wut najut nejxasinkampoxan, isfulalialjwa xan tato'laxpoxan, ja-am wut, diachwujnakolax asamatkoi tupaam wut, pomatkoicha duilaxaelam Diosxotse.

²⁶ Xabich wut nejew ampathatat, japoxan omjil duilalialjwam Diosxotse. Dios kastikaxaelbej xamal, xabich xot nejbabijaxan. Xajupaximil nejew platatat mosliajwam pasliajwam Diosxotse.

²⁷ Xan, puexa jiw pakoewkolnan, Dios pijaxtat pejme pasaxoekan ampathatasik, Dios pej-ángeles suapich. Do jawut, xamal mosaxaelen xanliajwa nabistampoxan.

²⁸ Diachwujnakolax xamal jum-an. Asew jiw xamalxot, laelpifuk, japi xan nataeyaxael, puexa jiw pakoewkolnan, kaxaxoekan wut Dios pijaxtat puexa tajjiw tato'lalialjwan —aech Jesús xanal pejnachalwanliajwa.

17

Jesús xabich chaponanakthianpox Dios pijaxtat

(Mr 9.2-13; Lc 9.28-36)

¹ Do baxael, seis matkoiwux, Jesús fulaech wut, buflaechon Pedro, Santiagobej, Santiago pakoewanbej, japon pawulpon Juan. Japikal Jesús bu'fol pinamuax, xabich athu poxase.

² Jaxotse Jesús xabich chaponanakthianpon Dios pijaxtat pejnachala pejwujnajnel. Japon pejxubej xabich xunakthian. Me-ama juimt itliak wut, jaxu-aechon. Jawut japon pejnoxaelax, xabich papoeikolax. Xabich itliakbejpon.

³ Do jawut, chalechkal natulaelt kolenje. Japi wajwujnajnapijiw. Kaen Moisés. Asan Elías. Japi nospaei, Jesús suapich.

⁴ Do jawut, Pedro jum-aech Jesúsliajwa:

—Tajpaklon, pachaem xanal amxot, xamalxotan wut. Nejxasinkam wut, tres bua-at isaxaelen xamallialjwa. Kaeyax xamliajwa. Asax Moisésliajwa. Asax Elíasliajwabej —aech Pedro.

⁵ Pedro japox naksiya wutfuk, itloejen fuloek japi matwujasik. Japox itloejen xabich itliak. Japox itloejentutat Dios naksiya wut, jum-aechon: “Ampon taxulan, xabich nejxasinkaxpon. Japonliajwa xan xabich nejchachaemlax. ¡Naewesfuldepon!” —aech Dios.

⁶ Japox jumtaen wut, Jesús pejwajnalel nukapa-oeljabapi satat, xabich beljow xoti.

⁷ Do jawut, Jesús mox soepan japixot. Jacha wut, jum-aechon:

—¡Nanim! ¡Nabey belwe! —aech Jesús pejnachalialjwa.

⁸ Do jawut, japi natachaema wut, tae-ellisi asew kolenje, jaxot ajil xotlisi. Jesúska tamach taeni.

⁹ Muxxotsik baloek wutfuki, Jesús nejth'axtat buxfiat wut, jum-aechon pejnachalialjwa:

—¡Asew jiw nabey chapae' xamal taenamprox! Hasta xan, puexa jiw pakoewkolnan, Dios namat-et wut pejme dukalialjwan, jawut asew jiw chapaem xamal taenamprox! —aech Jesús pejnachalialjwa.

¹⁰ Do jawut, Jesús wujnachaemtas wut pejnachala, japi jum-aech Jesúsliajwa:

—¿Ma-aech xotkat judíos chanaekabuanapi jum-aech: 'Cristo pasaxilfuk. Elías matxoela pasaxael. Do jawux, Cristo pasaxael' —aechkat judíos chanaekabuanapi? —aech Jesús pejnachala.

¹¹ Do jawut, Jesús jumnot wut, jum-aechon pejnachalialjwa:

—Diachwujnakolax Elías matxoela pasaxael. Japon jumchixaxaelbey jiw pajut chiekal chaemsliajwa Cristo wujna.

¹² Pe xan jum-an. Elías patlison. Pe ampathatpijw japon matabijs-elipon. Naexasis-esalbejon. Japi jiw pajut isasiapox islisi japonliajwa. Me-ama japox, jasoxbey asew jiw isaxael xanliajwa. Xan, puexa jiw pakoewkolnan, xabich nabijasaxaelen japi pijaxtat —aech Jesús pejnachalialjwa.

¹³ Do jawut, Jesús pejnachala chiekal matabija, Jesús japox jum-aech wut, jum-aechon Juan, jiw bautisanliajwa.

Jesús nakolsax to'apox dep yamxulan pejmatpuxot

(Mr 9.14-29; Lc 9.37-43)

¹⁴ Jesús jiwxot pat wut, tres pejnachalan suapich, aton mox soepan Jesúsxot. Do jawut, brixtat nuk wut Jesús pejwajnalel, japon jum-aech Jesúsliajwa:

¹⁵ —Tajpaklon, itaxulan nawekajachawae'e! Pomatkoicha xabich nabijaton. Taxulan pin-iaveces jitlil jwal, pukalalbey, dep ketis wuton.

¹⁶ Taxulan buflaenx nejnachalalel, japi boejthusliajwa taxulan. Pe japi xajupa-el taxulan boejthusliajwa —aech japon Jesúsliajwa.

¹⁷ Do jawut, Jesús najum-aech xanal pejnachalwanliajwa:

—Xamal tajnachalwam, Dios chiekal xanaboeja-emilfuk. Nejnejchaxoelaxan chiekalal-elbey. Xabich pin-iamatkoijan xamalxotx. Xabich pin-iamatkoijan naewujnafulaxbey. Kajachawaetxbey Dios chiekal xanaboejalijwam. Pe xamal chiekal xanaboeja-emilfuk Dios. ¡Buflaeman yamxulan xanle! —aech Jesús xanalliajwa.

¹⁸ Do jawut, xanal buflaenx wut yamxulan, Jesús to'a nejth'axtat dep nakolsliajwa yamxulan pejmatpuxot. Do jawut, kamta dep nakolt yamxulan pejmatpuxot. Jawutbey yamxulan chiekal pachaemlison.

¹⁹ Do jawux, xanal pejnachalwan mox soepax Jesús wujnachaemsliajwan, japon tamachan wut. Do jawut, xanal wujnachaemtax wut, jum-an:

—¿Ma-aech xotkat xanal xajupa-enil dep nakolsax to'aliajwan? —an xanal.

²⁰ Jesús xanal najumnot wut, jum-aechon:

—Xamal xabicha-el nejxanaboejxan Diosliajwa. Diachwujnakolax xan jum-an. Chae-x Dios xanaboejam wut, jum-am wutbey: 'Diachwujnakolax Dios xajup puexa isliajwa' —am wut, nejchaxoelam wut, xamalbey xajupaxaelam dep to'aliajwam. Me-ama mostazafut cha-aelfut, ja-aechbey nejxanaboejxan. Xamal to'am wut ampamux asalelialjwa, mux diach napiasaxaeldo'. Puexa xabich xajupaxaelam isliajwam Dios pijaxtat, Dios chiekal xanaboejam wut —aech Jesús xanalliajwa.

[
²¹ Me-ama ampon dep, jason, asbuan jumch nakolsaxil masoxtat. Naxae-elaxtat Dios piach kawujnam wut, ja-aech wut, me-ama ampon dep, jason, nakolsaxael.]

Jesús pejme jum-aechpox pejpatpaxliajwa

(Mr 9.30-32; Lc 9.43-45)

²² Jesús nanam wut Galilea tuajuxot, xanal, japon pejnachalwan, naknanamtaxbey. Do jawut, Jesús xanal najum-aech:

—Xan, puexa jiw pakoewkolnan, xamalxot kaen nawiasaxael tadaelmajiwxot.

²³ Japi jiw xan naboesaxael. Do jawux, tux wut, tres matkoi wut, Dios namat-esaxael pomatkoicha pejme dukalialjwan —aech Jesús xanal pejnachalwanliajwa.

Jesús japox jum-aech wut, xanal, japon pejnachalwanpin, xabich nanejxajew.

Jesús motpox impuesto, mat-omwuljowspx Dios pejtemplobaliajwa

²⁴ Dolisdo', Jesús, xanal pejnachalwan swapich, patx Capernaum paklowaxxot. Do jawut, asew jiw fulaen Pedrolel. Japi impuesto mat-omwuljoew Dios pejtemplobaliajwa. Do jawut, japi jum-aech Pedroliajwa:

—¿Nejpaklonkat-is mosaxael impuesto, mat-omwuljowspx Dios pejtemplobaliajwa? — aechi Pedroliajwa.

²⁵ Pedro jumnot wut, jum-aechon japiliajwa:

—Diachwujnakolax tajpaklon mosaxael impuesto —aech Pedro japiliajwa.

Dolisdo', Pedro ba low wut, Jesús matxoelajum-aech Simón Pedroliajwa. Jum-aechon:

—Ampathatat paklochow kenot impuesto, mat-omwuljowspx gobiernoliajwa. ¿Achewkat mot impuesto? ¿Mosaxaelkat pejjiwkola? O, ¿mosaxaelkat asatwajnuhanpijiw? Simón, ¿achaxkat xam nejchaxoelam japoxliajwa? —aech Jesús.

²⁶ Simón Pedro jumnot wut, jum-aechon:

—Asatwajnuhanpijiw, japi mosaxael impuesto —aech Pedro.

Do jawut, Jesús pejme jum-aech:

—Ja-aech wut, paklochow pejjiwkola mosaxil impuesto.

²⁷ Pe jiw palalamata xatisliajwa, xam xabua' dik puka poxadik! ¡Aesamuat xalaem baxin juiliajwam! ¡Baxin, matxoelawaesapon, japon baxin chiekal juim! Do japon baxin juwam wut, japabaxin pejkaechaxot faenaxaelam kaekafef. Japakafef xajupaxael mosliajwam nej-impuesto, taj-impuestobej. ¡Japakafef xalaemch mosliajwam japa-impuesto! —aech Jesús Pedroliajwa.

18

Achan kaes paklonaxaelpox Diosxotse

(Mr 9.33-37; Lc 9.46-48)

¹ Do jawux, xanal mox soepax Jesús wujnachaemsliajwan. Wujnachaemtax wut, jum-an:

—¿Achankat xanalxot kaes pejme paklonaxael, Diosxotan wut? —an xanal.

² Do jawut, Jesús yamxulan la nukaliajwa japonxot. Do jawut, notlison yamxulan xanal tajwujnalel.

³ Do jawut, Jesús jum-aech:

—Diachwujnakolax xan jum-an. ¡Japanejchaxoelax malis kofim! Nejchaxoelam wut, inabey nejchaxoele': 'Xan kaes pejme pachaeman. Me-ama asew jiw, jachi-enil' —nabey aeche', nejchaxoelam wut! Yamxi jasox nejchaxoela-el. Xamallap-is jasox nejchaxoelaximil. Japox nejchaxoelafulam wut, xamal pasaximil Diosxotse.

⁴ Kaematkoisful nejchaxoelam wut: 'Xan kaes pejme pachaema-enil, me-ama asew jiw' —am wut, nejchaxoelam wut, xamal nejchaxoelaxaelam, me-ama ampon yamxulan. Ja-am wut, asamatkoi paklochwaxaelam Diosxotse.

⁵ Yamxi chiekal bu'kulam wut xan tajaxtat, ja-am wut, jawut xanbey nabu'kulsaxaelam —aech Jesús xanal pejnachalwanliajwa.

Jesús naewujanpox jiw babijaxan isasamata

(Mr 9.42-48; Lc 17.1-2)

⁶⁻⁷ Do pejme Jesús jum-aech xanalliajwa: "Pomatkoicha jiw babijaxan is, asew jiw to'as xoti. Pe jelxan nanaexasiti is wut babijaxan, asew jiw to'as xoti, to'api jiw babijaxan isliajwa, japi jiw xabich kastikaxaes Dios. Japiliajwa kaes pejme pachaemaxael ia' pinanul, jajaera, kaechariama ke'aliajwas, chakakofaliajwasdik mar poxadik, xabich so'nik poxadik, jaxotdik tupaliajwapi. Ja-aech wut, japi to'axil kaes asew jiw babijaxan isliajwa, jelxan nanaexasiti.

⁸ "Samata, nejke-echantat babijaxan isfulam wut, o, isfulam wutbej babijaxan nejtuakantat, inajut naketariowcham! ¡Najut natuaktariowchambej, atuaj pelsliajwam japoxan! Ja-am wut, kofaxaelam babijaxan isfulampoxan. Ja-am wutbej, pachaemaxaelam pasliajwam Diosxotse. Kofa-emil wut babijaxan isfulampoxan, ja-am wut, napelsaxaemk inferno poxadik. Jaxotdik toepaxil jit pinjiyax. Xabich chaemilaxael xamalliajwa kolekem wut, koletuakam wutbej, kaes babijaxan isfulam wut japoxantat.

⁹ Nej-iftutatbej taenampxotat babijaxan isfulam wut, kaenanula najut na-itfukuim, xam-alxot pelsliajwam atuaj! Ja-am wut, kofaxaelam babijaxan isfulampoxan. Ja-am wutbej, kaes pejme pachaemaxael xamalliajwa, kae-iftutam wut pasliajwam Diosxotse. Kofa-emil wut babijaxan isfulampoxan, jachi-emil wut, xamal napelsaxaemk inferno poxadik. Jaxotdik toepa-el jit pinjiyax. Xabich chaemilaxaelbej xamalliajwa, kole-iftutam wut, kaes babijaxan isfulam wut japoxantat" —aech Jesús xanal pejnachalwanliajwa.

*Ovejas tataefulpon faenpox pijan oveja, wenafo'aspon
(Lc 15.3-7)*

¹⁰ Jesús pejme jum-aech xanalliajwa: “¡Xamal chiekal taem! ¡Nabey nejchaxoele' yamxil-iajwa: 'Ampi yamxi omjil' —nabey aeche', nejchaxoelam wut! Dios pej-ángeles, japi duilpi athuxotse taj-ax Dios pejuwajnalel, tataefulpi yamxi. [

¹¹ Xan, puexa jiw pakoewkolnan, fuloekx ampathatxot jiw napelti bu'weliajwan.]

¹² “Cien ovejaspon, kaen oveja wenafo'as wut, diachwajnakolax japon noventa y nueve ovejas kaweta waelaxael muaxxot, wulwekaliajwapon oveja wenafo'aspon.

¹³ Japon faen wut oveja, wenafo'aspon, kaes pejme xabich nejchachaemlaxael japa-ovejaliajwa. Me-ama noventa y nueve ovejasliajwa nejchachaemil wut, jachiyaxilon, japi ovejas napels-el xot.

¹⁴ Nej-ax Diosbej, athuxotse dukpon, nejxasinka-elon aton nafa'aliajwa, naexasitpon Dios” —aech Jesús xanal pejnachalwanliajwa.

*Xatis beltaeyaxaespon asew jiw, babijaxan is wut xatisliajwa
(Lc 17.3)*

¹⁵ Do pejme Jesús jum-aech xanalliajwa: “Dios naexasitpon babijax is wut xamalliajwa, ¡xabua'de japon poxade, japon swapich, tamach nospaeliajwam! Japon xamal naewet wut, ja-aech wut, pejme chiekal pachaemaxaelam japonliajwa.

¹⁶ Pe japon naewes-elasia wut, ja-aech wut, ¡japon buflaem asew jiw, Dios naexasiti poxade, kaen o, kolenje, Dios naexasiti, japibej chiekal jumtaeliajwa nospaeyam wut, japon swapich, xamalliajwa babijax ispon!

¹⁷ Pe japon jaxot naexasis-elasia wut Dios naexasiti pejuwajnalel, ja-aech wut, buflaempon puexa Dios pejjamechan naexasiti natameja poxade, jaxot naewuajnalias was babijax ispon kofsliajwa. Jaxot naewuajnas wut, naexasis-el wuton, ja-aech wut, nejchaxoelde japonliajwa: ‘Ampon Dios naexasislan. Samata, japon, me-ama impuesto mat-omwuljoen Roma gobiernoliajwa, ja-aechon’ —amde, nejchaxoelam wut japonliajwa.

¹⁸ “Diachwajnakolax xamal jum-an. Ampathatat jiw fiatam wut babijaxan isasamata, japoxanbej Diosxotse fiasaxael. Ampathatat tapaeyam wut jiw isliajwa pachaempoxan, japoxan Diosxotsebej tapaeyaxael jiw isliajwa.

¹⁹ “Xan jum-an ampo xamalliajwa. Ampathatat xamal kolenam kaenejchaxoelaxam wut, kawuajnaxtat Dios wuljoeliajwam pachaempox, japox taj-ax Dios, athuxotsepon, japox isaxael xamalliajwa.

²⁰ Kolenje, o, tres, natameja wut xan tajaxtat nakawuajnalias, xan japixotaxaelen” —aech Jesús xanalliajwa.

²¹ Do jawut, Pedro mox soepan Jesús kawuajnachaemsliajwa. Jawut Pedro kawuajnachaemt wut, jum-aechon Jesúsliajwa:

—Tajpaklon, ¿mas veceskat xan beltaeyaxaelen, nawe-isful wut babijaxan xanliajwa? ¿Xankat beltaeyaxaelen hasta siete veces? —aech Pedro.

²² Do jawut, Jesús jumnot wut, jum-aechon:

—Xan jumchi-enil: “¡Hasta siete veces xam japon beltaem!” —chi-enil. Asan xabich piach babijaxan isful wut xamliajwa, japon beltaeflaxaelam kaematkoisful —aech Jesús Pedroliajwa.

Pamakan beltae-elpox asan nabichan

²³ Jesús pejme xanal najum-aech wuajantat: “Dios puexa pejjiw tato'alpox, me-ama kaen rey chaemt pamakjiwliajwa, japi dewatpoxan.

²⁴ Rey to'a pamakjiw kaenanula chaemsliajwa dewatpoxan. Japixot kaen xabich dewat pin-iat denarios. Japonbej pat reyxot.

²⁵ Dewatpon xajupa-el mosliajwapon rey. Samata, rey to'a asew pamak, dewatpon, mowaliajwas asanxot, jaxot japon esclavoliajwa. Rey to'abej dewatpon pijow mowaliajwas, japon paxibej, japon pejewbej, dewatpoxan mosliajwapon rey.

²⁶ Do jawut, dewatpon brixtat nuk rey pejuwajnalel wuljoeliajwapon beltaeyax. Do jawut, jum-aechon reyLIAJWA: ‘¡Na'afuk! ¡Xanfuk nabeltaem! Mosaxaelen puexa dewatx-poxan’ —aechon.

²⁷ Do jawut, rey beltaen dewatapon. Jawut rey jum-aech japonliajwa: ‘Xam nadewatam-poxan chiekal toep xanliajwa’ —aech rey. Samata, rey tapaei dewatpon nawiasliajwa pejba poxade, beltaens xoton dewatpoxanliajwa.

²⁸ “Do jawut, rey beltaenspon jaxot nakolt wut, xabu'kulton asan rey pamakan, japon suapich, kaeyaxtat nabistponje. Wuchakalpijin dewat kaesuapich plata, matxoelapatpon-liajwa reyxot. Rey beltaenspon xabich palala, taen wuton asan nabichan, kaeyaxtat nabistjepon. Jawut rey beltaenspon kaechariamajaelt wut, kaechariamale'apon matkaenjasliajwa asan nabichan, kaeyaxtat nabistjepon. Do jawut, jum-aechbejpon: ‘iNadewatampoxan xam namo'el! —aechon asanliajwa.

²⁹ Do jawut, kaesuapich dewatpon brixtat nukjaba rey beltaenspon pejwuaajnael. Xabich jum-aechon: ‘iNa'afuk! iXan nabeltaem! Xam mosaxaelen puexa dewatxapox’ —aechon.

³⁰ “Pe nakiowa, rey beltaenspon beltae-el asan nabichan. Japon nejwesla wuajnowesliajwa dewatxapox. Samata, kaesuapich dewatpon wiach soldawxot, japon jeliajwas jiw jebatat. Jaxot namanaxaelon puexa dewatpoxan mosliajwa.

³¹ Do jawut, asew rey pamakjiw, japox taen wut, xabich palalapi rey beltaensponliajwa. Samata, japi fulaech rey poxade japox chapaeliajwapi reyxot.

³² Do jawut, rey to'a pamakjiw wuljaesliajwas majt rey beltaenspon. Japon pa'an wut reyxot, rey jum-aech japonliajwa: ‘iXam xabich babejnam! Xan beltaenx puexa nadewatampoxanliajwa, nawuljowam wut beltaeyax.

³³ Pe xambej beltaeyaxaelam asan tamakan. Me-ama xan beltaenx, jachiyaxaelam asan tamakanliajwa. Pe xam beltae-emil asan tamakan’ —aech rey japonliajwa.

³⁴ “Do jawut, rey xabich palala japonliajwa. Samata, rey to'a japonbej kastikaliajwas, puexa mosliajwabejpon majt dewatpoxan” —aech Jesus, xanal nanaewuajan wut.

³⁵ Jesus pejme xanal najum-aech:

—Taj-ax, athuxotsepon, jachiyaxaelbej xamalliajwa, beltae-emil wut asan, Dios pej-jamechan naexasitpon, babijaxan is wut xamalliajwa —aech Jesus xanalliajwa.

19

Jesus naewuajanpox poejiw pelsasamata pejwatho'
(Mr 10.1-12; Lc 16.18)

¹ Do jawut, Jesus buxtoet wut naewuajna x beltaeyaxliajwa, chijjalison Galilea tuajnu xot. Jawa x patlison Judea tuajnu xot, Jordánlajt weslede, juimt julanlelsan.

² Xabich jiw Jesus fulafos. Jaxot Jesus boejthut jiw bu'xaea.

³ Do jawut, kaesuapich fariseos mox soepa Jesus xapaejsliajwapi. Do kawuajna chaemt wut, jum-aechi:

—iPoejiwkat tapaeis, nejmach masoxtat pelsliajwa pejwatho'? —aech fariseos.

⁴ Jesus jumnot wut, jum-aechon fariseosliajwa:

—iXamalkat xaljoe-emil Moisés chajia lelpox? Japox jum-aech: ‘Dios ampathat is wut, isbejpon jiw. Dios is aton, pawisbej’ —aechox.

⁵ Dios jum-aechbej: ‘Samata, aton fit wut pawis, japi nakolaxael paxxot, penxotbej, japon aton, pijow suapich, pejlel dukaliajwa’ —aech Dios.

⁶ Do ja-aech wut, japi kolenje, me-ama kaen wut, jachiyaxaeli. Ja-aech wut, japolis, me-ama majt kolenje wut, jachi-ellisi. Amwutjel japi, me-ama kaen wut, ja-aechlisi. Samata, aton fo'axil pijow, Dios pijaxtat nakjiya xot —aech Jesus fariseosliajwa.

⁷ Japi fariseos kaes wuajna chaemt wut, jum-aechi Jesúslija:

—Moisés chajia jum-aech: ‘Poejiw pelsasia wut pejwatho', matxoela lelaxael pelfut japow chaxdusliajwapon. Japon lelpox jumchiyaxael, ma-aech xot fo'axaelon pijow. Ja-aech wut, pachaem japon aton fo'aliajwa pijow’ —aech Moisés chajia lelpox. iMa-aech xotkat Moisés japox tapaei? —aech fariseos.

⁸ Do jawut, Jesus jum-aech fariseosliajwa:

—Xamal matnaetinkam xot, Moisés tapaei japox. Samata, Moisés xamal tapaei pelsliajwam nejwatho'. Majt, akaseskolaxtat, Dios nejxasink, aton pijow fit wut fo'a-elaliajwa, japowxot pomatkoicha laejaliajwapon.

⁹ Pe xan jum-an. Aton pijow fo'a wut asbuan jumch masoxtat, asaow fit wuton, japox xabich chaemil Diosliajwa, bu'moejt xoton asaow pawis, pijowkolwa-elpow. Pe pawis pakmolow, asan aton bu'moejt wut, ja-aech wut, Dios tapaei aton fo'aliajwa pijow —aech Jesus fariseosliajwa.

¹⁰ Do jawut, xanal pejnachalwan jum-an Jesúslija:

—Pachaema-el wut poejiw pejwatho' pelsliajwa, ja-aech wut, kaes pejme pachaemaxael poejiw watho' nos-elaliajwa, tamach laelpaliajwa —an xanal.

¹¹ Do jawut, Jesus xanal najumnot wut, jum-aechon:

—Puexa jiw najummatabijaxil xan jum-anpox. Dios tapaeispikal, japikal najummatabijaxael japox.

¹² Poejiwxot asew nakjiyaxil, uthjilax chanlaela xoti. Asew poejiw nakjiyaxil, uthjuks xoti. Asew poejiwbej nejxasinkaxil nakjiyalajwa, Dios puexa pejiw tato'almatkoi mox pawuajna xot. Xamal xajupam wut matabijalajwam xan jum-anpox, ichiekal matabijim! —aech Jesús xanal pejnachalwanlajwa.

Jesús kawuajnapox Dios yamxiliajwa

(Mr 10.13-16; Lc 18.15-17)

¹³ Asamatkoi jiw paxi buflaen Jesúslel, Jesús ke-osliajwa yamxi pejta'anxot Dios wekawuajnalajwapon japi yamxiliajwa. Xanal pejnachalwan japox taenx wut, japi jiw fiatx paxi buflaesamatapi Jesúslel.

¹⁴ Do jawut, Jesús najum-aech xanallajwa:

—¡Tapaem yamxi xanel buflaelajwadin! ¡Nabej fias! Diosxotse, Dios jiw tato'alxotse, japi jiw, me-ama ampi yamxi, ja-aech, kamta naexasit xoti Dios —aech Jesús.

¹⁵ Do jawut, Jesús ke-ot japi yamxi pejta'anxot Dios kawuajnalajwapon. Dios kawuajna buxtoet wut, jaxot chijjalison, xanal pejnachalwan suapich, asalel fulaelajwa.

Kemaeyan nospaeipox, Jesús suapich

(Mr 10.17-31; Lc 18.18-30)

¹⁶ Kaen pansian fulaen taelajwapon Jesús. Pat wuton Jesúsxot, wuajna chaemt wut, jum-aechon:

—Jiw chanaekabuanan, xam pachaemamponam, ¿achaxkat xan nawewe'p isliajwan pachaempox, pomatkoicha dukalajwan Diosxotse? —aechon.

¹⁷ Jesús jumnot wut, jum-aech:

—¿Ma-aech xotkat xan najum-am: 'Xam pachaemamponam' —na-amkat? Kaen Dios, japon pachaempon. Pasasiam wut Diosxotse, ¡naexasisfulde Dios tato'alpoxan! —aech Jesús.

¹⁸ Pansian wuajna chaemt wut, jum-aechon:

—¿Masoxkat, Dios tato'alpoxan, xan naexasisfulalajwan? —aechon.

Do jawut, Jesús jum-aech:

—¡Asew jiw nabej be'! ¡Asaow pawis, nijwa-elpow, nabej bu'moejsbej! ¡Nabej natkowe'bej! ¡Nabej kichachajbe'bej asan aton xam tasalalajwam, babijax is-el wuton!

¹⁹ ¡Sitaebej nej-ax, nej-enbej! ¡Nejxasinkdebej asew jiw! Me-ama xam najut nanejxasinkam wut, ja-amde asew jiwliajwa! —aech Jesús.

²⁰ Pansian jum-aech:

—Xam najum-ampoxan, xan chiekal naexasisfulax. ¿Pe achaxkat xan kaes nawewe'pfuk? —aechon.

²¹ Jesús jumnot wut, jum-aechon:

—Chiekal pachaemasiam wut, ¡xabua'de nejba poxade nejew mowalajwam! Mowam wut, ¡japaplata chaxduim kejila! Ja-am wut, xabichaxael nejew Diosxotse. Do jawux, ¡xam xabua'de xan naknanaamsliajwam, tajnachalnamlajwabej! —aech Jesús pansianlajwa.

²² Pansian japox jumtaen wut, xabich nejxaejwas, xabich kemaenk xoton. Samata, jawut Jesúsxot asbuan jumch chijjalison.

²³ Do jawut, Jesús xanal najum-aech:

—Diachwuajnakolax xan jum-an. Xabich tampoel kemaeya pasliajwa Diosxotse.

²⁴ Xamal chiekal matabijam. Camello pinjin xot, xajupaxil xensliajwadepon kuthatukre'wuaj poxade. Ja-aechbej kemaeyalajwa. Xabich tampoel kemaeya pasliajwa Diosxotse —aech Jesús.

²⁵ Xanal Jesús pejnachalwan japox jumtaenx wut, nejchaxoelanuilx. Do jawut, xanal jum-an Jesúsliajwa:

—¿Achankatlax bu'weyaxaes pasliajwa Diosxotse? —an xanal.

²⁶ Do jawut, Jesús xanal chiekal natachaem wut, najum-aechon:

—Jiw pajut pasaxil Diosxotse. Pelax Dios xajup puexa isliajwa. Samata, xajupbejpon jiw bu'welajwa. Kajachawaesaxaelbejpon jiw pasliajwa japonxotse —aech Jesús xanallajwa.

²⁷ Do jawut, Pedro jum-aech:

—Xanal puexa tejew waelax xam nakfulaelajwan. ¿Achaxkat Dios xanal nachaxduiyaxael? —aech Pedro Jesúsliajwa.

²⁸ Do jawut, Jesús jum-aech:

—Diachwuajnakolax xan jum-an. Xan, puexa jiw pakoewkolnan, tato'laxaelen wut ampathatat, pajelthat wut, jawut ekaxaelen tajtua-ekaxtat, xabich pachaempoxtat. Ja-aech wut, chiekal pachaemaxael puexa jiw tato'lalajwan. Xamal tajnachalwam chalakaxaelambej asatua-ekaxantat tato'lalajwam docemutanpijiw, Israel tujnapijiw.

²⁹ Xan tajaxtat xamal waelam wut nejew, nejbachan, nakoewbej, nej-enbej, nej-axjiwbej, naxibej, nejsatanbej, ja-am wut, Dios kaes cien veces chaxduiyaxael xamal. Asamatkoi tujam wutbej, pasaxaelam Diosxotse pomatkoicha duilalajwam jaxotse.

³⁰ Xabich jiw, paklochowpi, ampathatat. Pe japi Diosxotse wut paklochowaxil. Ampathatat xabich jiw, paklochowa-elpi, japilax Diosxotse wut, paklochowaxael — aech Jesús xanal pejnachalwanliajwa.

20

Nabichow pejwuaajan

¹ Do pejme Jesús xanal najum-aech wuaajantat: “Dios puexa pejiw tato'laxael wut, me-ama uvalulpijin, nabichow mot wut, jachiyaxaelpox. Lulpijin chijia foeljow nabichow wulwekaliajwa japon pejlulxot nabichliajwapi.

² Japon jumndut mosliajwa kaematkoibichax pa-ompoxtat. Jum-aechon: ‘Xamal mosaxaelen kaedenario’ — aechon. Jawut to'alison japi nabichliajwa pejlulxot.

³ Do jawux, juimt athuse wutlejen, lulpijin fulaech plaza poxade. Jaxotde taenlison poejiw, nuilalap wut is-elaxtat.

⁴ Japon jum-aech japiliajwa: ‘¡Xamalbej xabua'de tajlul poxade nabichliajwam! Xan mosaxaelen pachaempoxtat’ — aechon. Do jawut, japi ow-aech. Fulaechlisi nabichliajwa.

⁵ Juimt matnoch ek wut, lulpijin pejme fulaech plaza poxade wulwekaliajwa nabichow. Japon pejme faek nabichow. Do jawutbej, to'apon japi nabichliajwa japon pejlulxot. Do kaliax wut, lulpijin pejme fulaech wukwekaliajwa asew jiw. Faek wut, japibej to'apon nabichliajwa japon pejlulxot.

⁶ Juimt dach ek wut, lulpijin pejme fulaech plaza poxade. Jaxotde asew jiw taenon, japi nuilalap wut is-elaxtat. Do jawut, japon japi wuajnachaemt wut, jum-aechon: ‘¿Ma-aech xotkat xamal pomatkoicha asbuan jumch amxot nuilapam is-elaxtat?’ — aech lulpijin.

⁷ Japon jumnot wut, jum-aechi: ‘Xanal amxot nuilapax, kaen aton natadus-el xot nabichliajwan’ — aechi. Do jawut, lulpijin jum-aech japiliajwa: ‘Ja-aech wut, ¡xabua'de xamalbej tajlul poxade nabichliajwam!’ — aechon.

⁸ “Juimt tujop wut, lulpijin jum-aech pamakanliajwa, japon uwalul tataefulponliajwa: ‘¡Puexa nabichow laem! ¡japi puexa kaenanala mosfulde kaedenariotat! ¡Tuadu'e mosax wuchakalkolaxtat patixot! ¡Jasoxtat mosax toesfulde, matxoelanabisti suapichbej!’ — aech lulpijin.

⁹ Taduchpi nabichliajwa juimt dach ek wut, japi kaenanala moch kaedenario.

¹⁰ Jawut matxoelanabisti nejchaxoel: ‘Xatis kaes bej nakmosaxaelbejpon’ — aechi, nejchaxoel wut. Pe moch wut, japibej kaedenario moch.

¹¹ Matxoelanabisti kaedenario kenot wut, chiekal xanejchachaemla-eli. Do jawut, palalapi lulpijinliajwa.

¹² Samata, japi jum-aech lulpijinliajwa: ‘Wuchakalkolaxtat pati asbuan jumch nabist kaehora. Pe xanal najupanamotam, japi suapich. Xanal xabich kaes nabistax masxaeyaxtat’ — aechi.

¹³ Lulpijin jumnot wut, jum-aechon kaen nabichanliajwa: ‘Nabichan, xan is-enil babijax xamalliajwa. Xan chajia jum-an: “Xam mosaxaelen kaedenario” — an xan xamalliajwa.

¹⁴ ¡Xanwia'e motxprox! ¡Chijiamde! Wuchakalkolaxtat pati motxbej kaedenario. Jasoxtat xan motx, mosasian xot.

¹⁵ Xan tejew platatat isasianpoxan xa-isaxaelen. ¿Xamkat nusasiawlam, xan tasiawla-el xot tejew plata, xamal najupamotx xot, asew jiw suapich?’ — aech lulpijin.

¹⁶ “Xabich jiw, paklochow, ampathatxot. Pe japi Diosxotse wut, paklochowaxil. Xabich jiwbej, paklochowa-eli ampathatxot, japilax Diosxotse paklochowaxael” — aech Jesús.

Ampoxtat Jesús jum-aech tres veces japon pejpatuxpaxliajwa

(Mr 10.32-34; Lc 18.31-34)

¹⁷ Jesús fulaech Jerusalén paklowax poxade. Xabich jiw fulafoson. Do jawut, fulaech wutfuk, xanal dosan, japon pejnachalwan, nalapon asalelaxachliajwan. Do jawut, Jesús jum-aech xanalliajwa:

¹⁸ — Amwut fulaeyaxaes Jerusalén paklowax poxade. Jaxotde xan, puexa jiw pakoewkolnan, asan nawiasaxael sacerdotespaklochowxot, judíos chanaekabuanapixotbej. Japi natasalaxael asew jiw naboesaliajwa.

¹⁹ Do jawux, nawiasaxael judíos-elpixot nabuwuaajanpaeliajwa. Xabich namatwuaajselsaxaeli. Do jawuxbej, nakematamatlaxaeli cruztat xan tupaliajwan. Pe tres matkoi wut, Dios namat-esaxael pejme dukaliajwan — aech Jesús xanalliajwa.

Santiago pen, japowbej Juan pen, japow wuljowpox chamoeyax Jesús we-isliajwas

(Mr 10.35-45; Lc 22.24-30)

²⁰ Do jawux, Zebedeo pijow, paxi suapich, mox soepapi Jesúsxot. Japow brixtat nuk wut Jesús pejwuaajnalel, wuljowpox chamoeyax Jesús we-isliajwas.

²¹ Do jawut, Jesús jum-aech:

—¿Achaxasiamkat? —aechon.

Japow jumnot wut, jum-aechow:

—Asamatkoi, xam puexa jiw tato'lam wut, ikolenje taxulan tapaem xamxot naliachalakali-ajwa! ¡Tapaem japi puexa jiw tato'laliajwa, xam swapich, japi kolenje asew jiw xabich sitaeliajwasbej! —aechow Jesúsliajwa.

²² Jesús jum-aech Santiagoliajwa, Juanliajwabej:

—Xamal matabija-emil nawuljowamprox. Xan xabich nabijasaxaelen jiw pijaxtat. ¿Xamalbejkat xajwaxaelam nabijasliajwam, me-ama xan nabijasaxaelen, jachiliajwam? —aech Jesús.

Japi jumnot wut, jum-aechi:

—Diachwajnakolax xanalbej xajwaxaelen nabijasliajwan, me-ama xam nabijasaxaelam, jachiliajwanbej xanal —aechi Jesúsliajwa.

²³ Jesús jum-aech:

—Diachwajnakolax xamalbej nabijasaxaelam xan tajaxtat. Pe chalakaxaelamprox, xan swapich, tajpoklalel, tajsoenalelbej, puexa jiw tato'laliajwam, japoxliajwa xan tajut jumchiliajwan, taj-ax Dios natapae-el. Taj-ax Dios chajia jiw makanot japoxliajwa —aech Jesús.

²⁴ Xanal, asewan Jesús pejnachalwan, diezpin, japox wuljoeyax wultaenx wut, xabich talala japiliajwa.

²⁵ Do jawux, Jesús xanal nala mox soepaliajwan japonxot. Najum-aechon:

—Xamal matabijam asatajnuchanpijiwpaklochow, japi Dios naexasis-eli, jiw tato'al wut, tato'la-el pachaempoxtat. Japi jiw tato'al pamamaxtat, asew jiw itpaeliajwa japi kaes paklochowprox.

²⁶ Pelax xamal jasoxtat nakaewa natato'laximil. Xamalxot kaen paklonasia wut, japon matxoela kajachawaesnaxaeal xamal.

²⁷ Xamalxot kaen paklonasia wut, japon majt malech nabichaxael puexa xamalliajwa.

²⁸ Ja-aechlap-is xanliajwa, puexa jiw pakoewkolnan. Fulae-enilsik jiw xan naka-jachawaesliajwa ampathatat. Xanlax fuloekax xabich jiw kajachawaesfulaliajwan, wemosliajwanbej japi babijaxan ispoxanliajwa, tux wut cruztat —aech Jesús.

Jesús boejthutpox kolenje itliaklan

(Mr 10.46-52; Lc 18.35-43)

²⁹ Jesús nakolt wut, xanal pejnachalwan swapich, Jericó paklowaxxot, xabich jiw Jesús fulafos.

³⁰ Jaxot nuambabu'tat kolenje itliaklan chalak. Jumtaen wuti Jesús xensaxaelprox, nejlat wut, jum-aechi:

—Tajpaklon, David pamon, xanal nabeltaem! —aechi.

³¹ Do jawut, jiw buxfiat japi kolenje itliaklan boejlach chalakaliajwa. Japi jiw jum-aech:

—¡Nabej talias Jesús! —aech nakfolpi.

Ja-aech wut, japi kolenje itliaklan kaes pejme nejlasful wut, jum-aechfuli:

—Tajpaklon, David pamon, xanal nabeltaem! —aechfuli.

³² Do jawut, Jesús nukjaba wut, jum-aechon japiliajwa:

¡Xabua'din xanlel! —aechon.

Itliakla Jesúsxot wut, Jesús jum-aech, wujnachaemt wut:

—¿Xamal achaxasiamkat xan isliajwan xamalliajwa? —aech Jesús.

³³ Itliakla jumnot wut, jum-aechi:

—Tajpaklon, xanal na-itfuboejthu'e chiekal taeliajwan! —aechi.

³⁴ Do jawut, Jesús beltaen itliakla. Jawut Jesús itfujacha japi itliakla. Jawut itliakla chiekal wepachaemslisi pej-ifu. Chiekal taenbejpi. Dolis japi nakfollisi Jesús.

21

Jesús patpox Jerusalén paklowaxxot

(Mr 11.1-11; Lc 19.28-40; Jn 12.12-19)

¹ Xanal, Jesús swapich, moxan wut Jerusalén paklowaxxot, patx Betfagé paklowaxach xot. Jaxot xabich olivonaechan nuil muaxxot. Do jawut, Jesús pejnachalwanxot kolenje wujnachaemt wut.

² Fulaeliajwa wut, jum-aechon:

—¡Xabua'de Betfagé paklowaxach poxade! Jaxotde faenaxaelam bur, ke'tason, paxulan swapich. Joltam wut, bur buflaeman xanlel, burxulanbej.

³ Jaxotpijiw xamal wujnachaemt wut burliajwa, i Japon aton jum-amo: “Wajpaklon amwut nejsesich bur. Toet wut ispox, pejme wiasaxaelon bur” —amo japi! —aech Jesús, buxto'a wut kolenje pejnachalanliajwa.

⁴ Dolisdo', japox ja-aech, me-ama Dios pejprofeta chajia lelox jachiliajwa burliajwa. Profeta lelox jum-aech:

⁵ "Jumchiyaxaelam jumtaeliajwa Jerusalén paklowaxpijw: '¡Taem nejrey, xabich pachaempon, chaflaen wut xamallel bur jelti'santat!' —chiyaxaelam" —aech profeta lelox.

⁶ Do jawut, Jesús pejnachalan, kolenje, fulaechlisi. Islisi Jesús to'apox.

⁷ Do jawut, buflaenlisi bur, burxulan suapich, Jesúsleidin. Pejsumta-owa jolpi tamowaliajwapi burxulan. Do jawut, Jesús tua-ek burxulan.

⁸ Xabich jiw Jesúsxot. Asew japixot pejsumta-owa jol nuamtat ba'aliajwa Jesús fulaeyaxaen poxadin itpaeliajwa japi pejsitaeyax japonliajwa. Asew japixot wuajna owa naedax, pa-uafpi.

⁹ Xabich jiw wulak nuamtat. Asew jiw fol Jesús pejwuajnael. Asew fol wuchakal. Puexa jiw neilasful wut, jum-aechbalapi:

—¡Aleluya! ¡Pachaempon, wajwuajnapijin, rey David pamon! ¡Ampon fulaenpon Dios pijaxtat, xabich pachaempon! ¡Dios, athupijin, japon xabich pachaem! —aechbalapi, nejla'bala wut.

¹⁰ Do jawut, Jesús pat wut Jerusalén paklowaxxot, japapaklowaxpijw xabich taesia ja-aechox. Samata, nakaewa nawuajnachaemt wut, najum-aechi:

—¿Achanat ampon aton? —na-aechi nakaewa.

¹¹ Asew Jesús fulafolpoxot jumnot wut, jum-aechi:

—Ampon Jesús, Dios pejprofeta, Nazaret paklowaxpijin, Galilea tuajnapijin —aechi.

Jesús to'apox nakolaliajwa Dios pejtemplobatat mowapi, wuajtibej
(Mr 11.15-19; Lc 19.45-48; Jn 2.13-22)

¹² Jesús Jerusalén paklowax pat wut, Dios pejtemploba low wut, jaxot taenpon mowapi, wuajtibej, plata xanafokibej. Do jawut, Jesús japi nakolax to'a tathoetade. Plata xanafoki, pejmesan fuliaxabapon. Mowapibej a-u, japi pejtua-ekaxan wulaejabapon.

¹³ Jesús jum-aech japi jiwliajwa:

—Dios pejjamechan, chajia lelspx, jum-aech, Dios jum-aech wut pejtemplobaliajwa: 'Tajba kawuajnaba wulxael, jiw xan nakawuajnalialjwa' —aech Dios jum-aechpox. Pelax xamal Dios pejtemploba kethaka pejba padofam —aech Jesús.

¹⁴ Jesús Dios pejtemplobatat wut, itliakla, nabejkabej, japi mox soepa Jesúsxot. Jesús japi boejthut.

¹⁵ Sacerdotespaklochow, judíos chanaekabuapibej, taen wuti Jesús ispoxan, jawut xabich palalapi Jesúsliajwa. Jumtaenbejpi, yamxi nejlasful wut jum-aechfulpox Jesúsliajwa: "¡Wajpaklokolan, David pamon, xabich pachaempon!" —aechful wut yamxi Jesúsliajwa. Paklochow japox jumtaen wut, xabich kaes pejme palalapi Jesúsliajwa.

¹⁶ Samata, japi jum-aech Jesúsliajwa:

—¿Xamkat jumtaenam yamxi jum-aechfulpox xamliajwa? —aechi Jesúsliajwa.

Jesús jumnot wut, jum-aechon:

—Diasdo'. Xan chiekal jumtaenx, japi yamxi jum-aechful wut xanliajwa. ¿Xamalkat-is xaljo-e-emil Dios pejjamechan, chajia lelspx, jum-aech wut:

'Yamxi, kaes pajampibej, jumchiyaxael pachaempoxan xamliajwa' —aech wut chajia lelspx xanliajwa? —aech Jesús japi jiwliajwa.

¹⁷ Jawut Jesús waelapon japi jiw Dios pejtemplobatat. Nakoltlison Jerusalén paklowaxxot Betania paklowaxach poxaliajwade. Do jaxot chatuil wut, kawetapi.

Jesús jum-aechpox, higonae baechjil wut
(Mr 11.12-14, 20-26)

¹⁸ Kandiawasap wut, xanal, Jesús suapich, pejme fulaechx Jerusalén paklowax poxade. Do jawut, Jesús litaxaela, nuamtat fol wut.

¹⁹ Do jawut, taenpon higonae nuambabu'tat nuknae. Jawut, Jesús mox itfulaech wut, taenon higonae baechjilpox. Xabich pa-uafkalnae jumch. Jawut Jesús jum-aech higonaelialjwa:

—¡Xam kaes naboesaximil! —aech Jesús higonaelialjwa.

Do jawut, kamta higonae selil.

²⁰ Xanal pejnachalwan japox taenx wut, xabich nejchaxoelx. Xanal wuajnachaemtaw wut, jum-an Jesúsliajwa:

—¡Taem! ¿Ma-aech xotkat kamta higonae selil? —an xanal.

²¹ Jesús xanal najumnot wut, jum-aechon:

—Diachwuajnakolax xan jum-an. Xamal chiekal Dios xanaboejam wut, chinax nejchaxoela-emil wut: 'Dios nakajachawaesaxil' —chi-emil wut, nejchaxoelam wut, xamalbej jum-am wut higonaelialjwa, higonae selilaxael. Jachiyaxaelbej muaxliajwa. Samata,

jumchiyaxaelam wut ampanaxliajwa: 'Mux, xam amxot napia'e! iXabua'mik mar proxamik!' —chiyaxaelam wut, diachwujnakolax mux napiasaxael.

²² Samata, xamal Dios kawujnajm wut, nejchaxoelam wut amprox: 'Diachwujnakolax Dios nachaxduiyaxael puexa kawujnajxproxat wujowxprox' —am wut, nejchaxoelam wut, diachwujnakolax xamal Dios chaxduiyaxael puexa kawujnajmproxan —aech Jesús xanallijwa.

Jesús wujnachaemtasprox, achan to'aspon choef mowapi nakolax to'aliajwapon Dios pejtemplobata

(Mr 11.27-33; Lc 20.1-8)

²³ Do japoxwux, Jesús, xanal suapich, pejme patx wut, xanal lowx Dios pejtemploba. Jaxot Jesús jiw naewujajan. Naewujajan wut, sacerdotespaklochow, judios-ancianosbej, mox soerepari wujnachaemsliajwa Jesús. Japi jum-aech:

—¿Achankat xam to'a choef mowapi nakolax to'aliajwam tathoetade Dios pejtemplobaxot? —aechi.

²⁴⁻²⁵ Jesús jumnot wut, jum-aechon:

—Xanbej kaeyax xamal wujnachaemsaxaelen. iMajt chiekal najumno'e! ¿Achankat Juan to'as jiw bautisafulaliajwa? ¿Japoxkat Juan pajut isful? O, ¿Dioskaton to'as? O, ¿japoxkaton isful, jiw to'as xot? Xamal chiekal xan najumnotam wut, ja-aech wut, xanbej chiekal jumnosaxaelen xamal nawujnachaemtampoxliajwa —aech Jesús.

Do jawut, japi nakaewa najum-aech: "Xatis jumnoch wut, 'Juan Dios to'as xot, jiw bautisaful' —tis wut, Jesús nakjumchiyaxael: '¿Ma-aech totkat xamalbej naexaxisfula-emil Juan jum-aechfulpox?' —nakchiyaxael Jesús xatisliajwa.

²⁶ Jumtis wutlax: 'Juan jiw to'as jiw bautisafulaliajwa' —tis wut, jiw xabich palalaxael xatisliajwa, puexa jiw jum-aechfulxot Juanliajwa: 'Diachwujnakolax Juan, jiw bautisan, jum-aechful Dios pijaxtat' —aechful xot xabich jiw" —aech paklochow nakaewaliajwa. Samata, japi paklochow xabich pejlwla japox jumchiliajwa.

²⁷ Do jawut, japi jum-aech Jesúsliajwa:

—Jalape. Xanal matabija-enil, achan Juan to'as jiw bautisafulaliajwa —aechi.

Do jawut, Jesús jum-aech japiliajwa:

—Xanbej jumchiyaxinil xamalliajwa, achan xan nato'a japox isliajwan —aech Jesús sacerdotespaklochowliajwa, judios-ancianosliajwabej.

Aton kolenjepox paxulan

²⁸ Do jawux, Jesús wujnachaemt sacerdotespaklowchow, judios-ancianosbej. Jum-aechon:

—¿Achaxkat xamal nejchaxoelam ampawujajanliajwa? Kaen aton kolenje paxulan. Japon jum-aech kaen paxulanliajwa: 'Wua, iXabua'de amwut taj-uwalul poxade nabichliajwam!' —aech pax paxulanliajwa.

²⁹ Paxulan jumnot wut, jum-aechon paxliajwa: 'Ax, xan fulaeyaxinil nabichliajwan' —aechon paxliajwa. Pe baxael, japon ow-aech. Dolison fulaech pax pej-uwalul poxade nabichliajwa.

³⁰ Do jawux, japon jum-aech asan paxulanliajwa: 'Wua, iXambej xabua'de taj-uwalul poxade nabichliajwam!' —aech pax asan paxulanliajwa. Japon jumnot wut, jum-aechon paxliajwa: 'Ow, ax. Xan fulaeyaxaelen nabichliajwan' —aechon paxliajwa. Pe japon fulael. Kawetapon asbuan jumch batat.

³¹ ¿Achankat japixot kolenje is pax nejxasinkpox? —aech Jesús.

Naeweti jumnot wut, jum-aechi:

—Matxoe-la-ow-aechpon. Japon is pax nejxasinkpox —aechi.

Jawut Jesús jum-aech:

—Diachwujnakolax xan jum-an. Babejchow, impuesto mat-omwuljoew Roma gobiernoliajwa, watho', poejiw bu'moejtibej kanaliajwa plata, japi japoxan kofa wut, pasaxaeli Diosxotse, xanaboefaful xoti Dios. Pelax xamal pasaximil Diosxotse, xanaboeya-emil xot Dios, kofa-emil xotbej babijaxan isfulampoxan.

³² Juan, jiw bautisan, naewujajan jiw chiekal duilafulaliajwa Diosliajwa. Pe xamal naexaxis-emil japon jum-aechproxan, japon naewujajanproxanbej. Me-ama wuchakalpijin naexaxis-el pax to'asprox isliajwapon, xamalbej ja-am. Asewlex, impuesto mat-omwuljoew, watho'bej, asew poejiw bu'moejtpi, japi naexasit Juan naewujajanpox. Xamal taenam wut, japi naexasitpox Juan naewujajanpox, nejchaxoela-emil xamal kofaliajwam babijaxan isampoxan, Juan jum-aechpox naexaxisliajwam —aech Jesús sacerdotespaklochowliajwa, judios-ancianosliajwabej.

*Pamak babejchowpox
(Mr 12.1-12; Lc 20.9-19)*

³³ Jesús naewuajan wut, sacerdotespaklochow, judíos-ancianosbej, japiliajwa pejme jum-aechon wuajantat: “¡Naewe'e asawuajan! Kaen aton uva mutha. Do jawux, uwalul chaxajjalón ia'tat. Isbejpon uva-ufan jukax uwalulxot. Do jawux, isbejpon japalultat cha-aelbach, athupox, uwalul tataeflaliajwa, uva foi wut. Do jawut, uwalulpijin asew jiw pamakjiwliajwa wuljaeton pejlul piach wetataeflaliajwas, japon pejwulela. Japi bu'pat wut, jum-aechon japiliajwa: 'Xan fulaeyaxaelen asatujnulel atuaj. Xan ajinil wut, ¡tjalul xamal chiekal nawetataefalde!' —aech uwalulpijin. Do jawux, chijjalison.

³⁴ Do baxael, uva foi wut, uwalulpijin asew pamak to'a wewuljaesliajwas uva, japon pejewpi.

³⁵ Pe fulalaenapi uva wuljaesliajwa, japi jaelas tataefulpi uwalul. Fulalaenpixot asew baes. Asew tux. Asew ia'tat dadaps wut, matkaejabas.

³⁶ Ja-aech wut, uwalulpijin kaes pejme to'aful pamak uwalul tataefulpi poxade. Pe japi fulalaena wut, japibej jaketis.

³⁷ “Do baxael, uwalulpijin to'a paxulan. Japon uwalulpijin nejchaxoel: ‘Uwalul tataefulpi diachwuajnakolax bej nawesitaeyaxaelbejpi taxulan’ —aechon, nejchaxoel wut.

³⁸ Pe uwalul tataefulpi taen wuti uwalulpijin paxulan, nakaewa najum-aechi: ‘¡Tae'nik uwalulpijin paxulan! Asamatkoi pax naetux wut, uwalul japon pijax wulxael. Samata, ma amwut xatis ampon boesaxaes, uwalul wajkal chiekal namanaliajwa’ —na-aechi nakaewa.

³⁹ Japon pat wut uwalul tataefulpixot, jawut jaeltason. Do jawut, juchpon uwalulxot. Do jawutbej, boesaspon” —aech Jesús, japawuajantat naewuajan wut sacerdotespaklochowliajwa, judíos-ancianosliajwabej.

⁴⁰ Do pejme Jesús jum-aech japiliajwa:

—Uwalulpijin fulaen wut, ¿achaxkaton isaxael uwalul tataefulpiliajwa? —aech Jesús japiliajwa.

⁴¹ Jumnot wut, jum-aechi:

—Uwalulpijin, japon beyaxael beltae-elaxtat uwalul tataefulpi, babejchow. Do jawux, to'axaelon asew jiw japa-uwalul wetataeflaliajwas. Japilax, uva foei wut, kaewaechful wut, wewoeyafalaxael uwapijin pejewpi —aech japi jiw, jumnot wuti Jesúsliajwa.

⁴² Do jawut, Jesús jum-aech:

—Xamal matabijam, Dios pejjamechan, chajia lelspx, jum-aech wut, jum-aechox xanliajwa:

‘Jiw ia'ba is wut, kaet ia'tliajwa nakaewa najum-aechi: “Ampot ia't chaemil” —na-aechi nakaewa. Do jawux, asan aton japot ia't fit wut, jum-aechon: “Ampot ia't, puexa ia'xot, kaes pejme pachaem tuakso'pijaliajwa, ba chiekal mamnikaliajwa” —aech japon aton. Me-ama ampx, jasox Dios is Mesiasliajwa. Wajpaklon Dios jasox is xatis weliajwas Mesias pijaxtat. Samata, japox xabich pachaem xatisliajwa’ —aech Dios pejjamechan, chajia lels wut xanliajwa.

⁴³ Samata, xamal jum-an. Xamal xan nanaexaxis-emil xot, Dios tapaeyaxil xamal tato'laliajwam asew jiw. Dioslax tapaeyaxael asew jiw tato'laliajwapi asew jiw, japi jiw isful Dios nejxasinkpoxan. [

⁴⁴ Jiw fiap wut ia't pinjixot, xabich naxthuya wut, xabich naxkolaxaelbejpi. Pelax kaet ia't, pinjit, athusik, jiw matwuajasiq jopik wut, ja-aech wut, japi jiw chiekal matkaeyaxaes. Jasoxtat xamal nabijasaxaelam, xan nanaexaxis-emil xot, xan nanejwesla xotbej. Dios xamal kastikaxael infiernoxotdik pomatkoichaliajwa] —aech Jesús sacerdotespaklochowliajwa, judíos-ancianosliajwabej.

⁴⁵ Do jawut, sacerdotespaklochow, fariseosbej, jumtaen wuti uwalulwuajan, ia'wuajanbej, japi pajut matabija, Jesús japoxan jum-aech wut, jum-aechon japiliajwa.

⁴⁶ Samata, jawut jaelsasiapi Jesús jiw jebatat jeliajwa. Pe paklochow xabich pejlwla judíosliajwa, judíos nejchaxoel xot: “Jesús Dios pejprofeta” —aech xoti, nejchaxoel wut. Samata, paklochow nejchaxoel: “Jesús jaeltas wut, jiw bej nakbeyaxaelbej” —aechi, nejchaxoel wut.

22

*Rey pinjiyax fiesta is wut paxulan nakjiyaponliajwa, xabich jiw tadutpox
(Lc 14.15-24)*

¹ Jesús pejme jum-aech wuajantat jiwliajwa:

² “Dios puexa pejjiw tato'alpox, me-ama rey fiesta is wut paxulan nakjiyaponliajwa, ja-aechox.

³ Rey to'a pamak chajia taduchpi buflaeliajwa fiesta poadin. Chajia taduchpi kaenanula jum-aechi asbuan jumch: 'Xan fulaeyaxinil' —aechi kaenanula.

⁴ Samata, rey pejme asew pamak to'a chajia taduchpi jumchiliajwa japi fulaeliajwa fiesta poadin. Pamak to'aliajwa wut, jum-aechon pamakliajwa: 'Chajia taduchpi jum-amo: "Naxaeyaxan chiekal ketoetx fiestaliajwa. Keto'ax pak xua'asax, jelti'tpi, chiekal dalpi. Puexa chiekal ketoetx. Pe xaeyaxk we'p. iMa amwut nej xabuata taxulan, nakjiyapon, pejfiesta nakxaeiajwapi!" —amo chijia taduchpi' —aech rey, pamak to'a wut.

⁵ Rey pamak pat wut chajia taduchpixot, japi jum-aech rey buxtot'aspox. Pe chajia taduchpi owchi-el. Kaen chajia taduchpon, japon fulaech pejlulan poadie. Asanbej japixot fulaech pejew negocios poadie.

⁶ Chajia taduchpixot, asew jaelapi rey pamak. Do jawut, baesbejpi. Asew tuj japixot, baes wuti.

⁷ Do jawut, rey xabich palala. Samata, rey to'a pejsoldaw beliajwas pamak webaespi, pejbachan welausliajwasbejpi. Jasox is rey pejsoldaw.

⁸ Do jawux, rey jum-aech asew pamakliajwa: 'Puexa chiekal ketoech taxulan nakjiyapon pejfiestaliajwa. Matxoelataduchpi wepachaema-esal taxulan pejfiesta naktaeliajwa.

⁹ Samata, ixabua'de paklowaxthialaxan poadie! Jaxotde jiw taenam wut, itadu'e taxulan pejfiesta naktaeliajwapi!' —aech rey, pamak to'a wut.

¹⁰ Do jawut, rey pamak fulaechlisi paklowaxthialaxan poadie. Jaxotde xabich jiw faeki. Do jawut, buflaeni jiw pachaempi, babejchowbej. Do jawut, ba jiw xabich wuluk.

¹¹ "Do jawut, rey low puexa jiw taeliajwa. Jawut rey taen kaen aton, japon naxoela-el tuch sumta-otox, nakjiyapon pejfiesta naktaeliajwa wut naxoelox.

¹² Rey jum-aech japon atonliajwa: 'Taj-aton, iMa-aech xotkat xam naklowam taxulan pejfiesta naktaeliajwam, naxoela-emil wut tuch sumta-otampox fiesta naktaeliajwam?' —aech rey japon atonliajwa. Pe japon boejlach nuk.

¹³ Do jawut, rey jum-aech pamakliajwa: 'iAmpon aton mnaaxwasikuim! iTuakwasikuimbejpon! Do jawut, ifo'impon tathoetade, itkuatax poadie! Jaxotde xabich jiw noeyaxael. Bua'tatisaxaelbejpi, xabich nabijat xot' —aech rey japon atonliajwa.

¹⁴ Jasoxtat xabich jiw taduchpi. Pe kaesupich jiw makanoch duilaliajwa Diosxotse" —aech Jesus jiwliajwa.

*Impuesto mosaxliajwa, Jesus wuajnaemtaspox
(Mr 12.13-17; Lc 20.20-26)*

¹⁵ Do jawux, fariseos natameja wut, kaenejchaxoelax wuajnaemsliajwapi Jesus, Jesus asaxtat jumnot wut japi tasalaliajwa japoxtat.

¹⁶ Samata, fariseos buxtot'a asew japixot, asew jiwbej, Herodes pejmupijiwpi, Jesus poadie. Pat wuti Jesusxot, jum-aechi:

—Jiw chanaekabuanan, xanal matabijax, xam diachwuajnakolax chiekal jum-am. Naewuajnambej diachwuajnakolaxpox jiw chiekal duilaliajwa Dios nejxasinkpoxtat. Xam nejlewla-el paklochow nejchaxoelproxiajwa jiw naewuajnamproxiajwa. Samata, puexa jiw chiekal najupanaewuajnam.

¹⁷ Samata, xanal chiekal matabijasian. iPachaemkat xatis mosliajwas impuesto Roma tuajnapijiw tato'lanliajwa? O, iMosaxisalkat? —aechi Jesusliajwa.

¹⁸ Jesus pajut matabijt xapaetaspox. Samata, jum-aechon:

—iXamal jiw naekichachajbapijwam! iMa-aech xotkat naxapaetam?

¹⁹ iNa-itpaem kaekafef, japoxantat impuesto motampi! —aech Jesus.

Do jawut, xalaenlisi kaekafef Jesuslel.

²⁰ Jesus japi wuajnaem wut japakafefliajwa, jum-aechon:

—iAchan pejxu-aelkat ampakafefat? iAchan pejwalbejkat ama lelspx? —aech Jesus.

²¹ Japi jumnot wut, jum-aechi:

—Roma tuajnapijiw tato'lan, japon pejxu-ael, pejwalbej —aechi.

Samata, Jesus jum-aech:

—iJapon pejewpi, japon chaxduim, impuesto motam wut! iPe Dios pejewpi, Dios chaxduim! —aech Jesus, fariseosliajwa, Herodes pejmupijiwpi liajwabej.

²² Japox jumtaen wuti, xabich nejchaxoelanuili, Jesus chiekal jumnot xot. Samata, jawut jaxot waeltlisipon.

*Asamatkoi mat-eyaxaespx tpi, pejme duilaliajwa
(Mr 12.18-27; Lc 20.27-40)*

²³ Do jawuxbej, kaesupich saduceos pat Jesusxot wuajnaemsliajwapi Jesus. Puexa saduceos nejchaxoel: "Jiw tuj wut, kaelel chiekal napelt. Asamatkoi mat-eyaxisal pejme duilaliajwa" —aechi, nejchaxoel wut.

²⁴ Samata, jawut saduceos jum-aech ampawuajan Jesusliajwa:

—Jiw chanaekabuanan, Moisés chajia lelpox jum-aech: 'Aton pijow naxuwla-elaxtat naetup wut, patupan pakoewan naman wut, japon japow fisaxael. Ja-aech wut, japon naxuwla-xael japowtat, pakoewan taponliajwa' —aech Moisés chajia lelpox.

²⁵ Xanaxot majt kaen aton duk. Japon siete pakoew. Matxoelapijin pawis fit. Pe baxael, japon tup naxuwla-elaxtat pijowxot. Do jawut, wuchakalpijin japow fit, pakoewan naetupow.

²⁶ Pe baxael, japonbej, tup naxuwla-elaxtat japowxot. Do jawut, trespijin japow fit. Pe japonbej tup naxuwla-elaxtat japowxot. Jasox ja-aech japi sietepilijwa.

²⁷ Chinax kaen japixot naxuwla-el japowtat. Do jawux, taxdukakolaxtat japowbej tup.

²⁸ Puexa japi poejiw nakjiya japowtat. Tupi mat-ias wut, zsetepixot, achankat japow pijwaxael? —aech saduceos Jesúsliajwa.

²⁹ Jesús jumnot wut, jum-aechon saduceosliajwa:

—Xamal japox jum-am wut, nejmach jum-amslapam, matabija-emil xot Dios pej-jamechan, chajia lelpox. Matabija-emilbej Dios xajupox puexa isliajwa.

³⁰ Tupi mat-ias wut pejme duilalijwa, poejiw, watho' suapich, pejme nakjiyaxil. Me-ama Dios pej-ángeles Diosxotse nakjiya-el, jachiyaxael japi jiw.

³¹ Tupi mat-eyaxaes pejme duilalijwa. zXamalkat xalJoe-emil, Dios pajut jum-aech wut chajia lelsxot?

³² Dios ampox jum-aech Moisésliajwa: 'Xan amwutjel Abraham, Isaac, Jacobbej, japi pejdiosnan' —aech Dios. Samata, xatis chiekal matabijas, asamatkoi tups wut pejme duilaxaespx. Chiekal matabijasbej, wajwujnapijiw, chajia tupi, japi napels-el. Samata, Abraham, Isaac, Jacobbej, japi amwutjel Diosxotse duilafal —aech Jesús saduceosliajwa.

³³ Jiw japox jumtan wut, xabich nejchaxoelanuili Jesús jum-aechpoxliajwa.

*Dios pejtato' laxanxot, masox kaes pejme pachaem
(Mr 12.28-34)*

³⁴ Do jawut, fariseos natameja, waltaen wuti saduceos boejlach nuilpox, Jesús chiekal jumnot xot.

³⁵ Do jawux, fariseos matabija isaxaelpox Jesúsliajwa. Samata, kaen japixot, judíos chanaekabuanan, to'api Jesús poxalijwade. Do pat wuton Jesúsxot, jawut wujnachaemton xapaesliajwapon Jesús.

³⁶ Jum-aechon Jesúsliajwa:

—Jiw chanaekabuanan, Dios xabich tato'al jiw naexaxisliajwa. zAchatato'laxxotkat kaes pejme pachaem Dios tato'alpox jiw naexaxisliajwa? —aech judíos chanaekabuanan.

³⁷ Jesús jumnot wut, jum-aechon:

—Moisés chajia lelpox jum-aech: 'iChiekal nejxasinkde Dios nejpaklokolan! iNejxasinkdebej Dios puexa nejnejchaxoelaxtat, puexa nejmatpuatatbej!' —aechox.

³⁸ Japoxlap kaes pejme pachaem jiw naexaxisfulalijwa.

³⁹ Asawujajan, wuchakal pejwujajan, Dios tato'alpox, japox pachaembej jiw naexaxisfulalijwa. Japawujajan jum-aech: 'iChiekal nejxasinkde asew jiw! Me-ama xam najut nanejxasinkam wut, jachiyaxaelam asew jiwliajwa' —aech Moisés chajia lelpox.

⁴⁰ Japox kolewujajan, Dios tato'alpoxan, xabich pachaem jiw chiekal naexaxisfulalijwa. Puexa Moisés chajia lelpox pachaem, Dios pejprofetas lelpoxanbej. Japawujajan naknaewujajan, machiyaxaes Dios nejxasinkalijwas, asew jiwbej —aech Jesús judíos chanaekabuananliajwa.

*Cristo, rey David pamonpox, pe Cristo paklonbej Davidliajwa
(Mr 12.35-37; Lc 20.41-44)*

⁴¹⁻⁴² Fariseos natameja wutfuk, Jesús wujnachaemt wut, jum-aechon japilijwa:

—zXamal achaxkat nejchaxoelam Mesíasliajwa? zAchankat Mesías pam? —aechon.

Fariseos jumnot wut, jum-aechi Jesúsliajwa:

—Rey David, japon Mesías pam —aechi.

⁴³ Do jawut, Jesús jum-aech:

—Ja-aech wut, zma-aech xotkat rey David Mesíasliajwa Espiritu Santo pijaxtat jum-aechkat: 'Tajpaklon' —aechkat rey David Mesíasliajwa? Rey David chajia jum-aech:

⁴⁴ 'Dios naksiya wut tajpaklokolanliajwa, jum-aechon: "iEkde tajpoklalel jiw tato'lalijwam, xan suapich! Ekam wutfuk, xan malechaxaelen nadaelmajiw. Malechax wut nadaelmajiw, japi jiw xam naexaxisfulaxael, xam tato'lampox" —aech Dios tajpaklokolanliajwa' —aech rey David chajia lelox, jum-aech wut Mesíasliajwa.

⁴⁵ Rey David chajia jum-aechbej Mesíasliajwa: 'Tajpaklon' —aech rey David. Samata, Mesías rey David pamonkala-elon. Pebej Mesías paklon rey Davidliajwa —aech Jesús fariseosliajwa.

⁴⁶ Do jawut, fariseos matabija-el, machiyaxaeli, jumnosliajwa wuti Jesús. Do jawuxbej, pejlowlalisi kaes wuajnaechaemsliajwapi Jesús.

23

Jesús jum-aechpox jiw matabijaliajwa fariseos, judíos chanaekabuanapibej, pejbu wuajanpox

(Mr 12.38-40; Lc 11.37-54; 20.45-47)

¹ Do jawux, Jesús jum-aech jiwliajwa, xanal pejnachalwanliajwabej:

² “Judíos chanaekabuanapi, fariseosbej, japi jiw chanaekabuanana Moisés chajia lelpox. Japox japi pejbichax.

³ Samata, ixamal naexasisfulde japi naewuajanpox, naewuajan wuti Dios pejjamechan, Moisés chajia lelpoxliajwabej! isfulde puexa japi tato'alpoxan! iPe nabej is japi pajut ispoxan! Japi pajut is-el xamal naewuajanpoxan. Japi asaxan isfullax.

⁴ Japi xabich jiw tato'al jiw naexasisliajwa Dios tato'alpoxan. Japoxan xabich tampoel jiwliajwa. Japi paklochow pajut japoxan naexasis-el.

⁵ Puexa japi ispoxan is asew jiw asbuan jumch taeliajwas. Japi nejxasink pejmaktat duiliajwa cha-elcajax, pakbu'cajax. Nejxasinkbejpi pejmuaxanxot kuiliajwa japoxan. Japacajaxtat japi kaesapich Moisés chajia lelpox. Nejxasinkbejpi naxoeliasja pakchowaxan. Pejtuakji'anxot wewe'pas pejnaxoe. Pejnaxoe makmatduilxot baels, maarixan, jasi, puexa jiw chiekal taeliajwas.

⁶ Nejxasinkbejpi chalakaliajwa kaes pejme pachaempoxantat, fiestanxot wut. Judíos naewuajnaexachantat wutbejpi, japi majt chalak tua-ekaxantat, kaes paklochowpi chalaxaelpoxantat. Japoxantat chalaki puexa jiw sitaeliajwas.

⁷ Nejxasinkbejpi, jiw saludaliajwas xabich sitaeyaxtat, paklowaxthialaxanxot xabu'kulas wuti. Nejxasinkbejpi, jiw saludas wut jumchiliajwas: ‘iMoi, jiw chanaekabuanan!’ —chiliajwaspi’ —aech Jesús jiwliajwa, xanal pejnachalwanliajwabej.

⁸ Jesús kaes jum-aech jiwliajwa, xanal pejnachalwanliajwabej: “Pe xamal, xan nanaexasitam xot, me-ama nakoewkolnan wut, ja-an xamalliajwa. Xanlap nejchanaekabuananan kaekolnan. Samata, asew jiw xamalliajwa jumchiyaxil: ‘iMoi, jiw chanaekabuanan!’ —chiyaxil.

⁹ Xamal kaekolan nej-ax, athuxotsepon. Japon nej-ax Dios. Samata, ampathatat Dios pejjamechan xamal naewuajan wut, xamal jumchiyaximil nej-axkolna-elponliajwa: ‘Ax’ —chiyaximil.

¹⁰ Xan kaenan Cristowan, nejpaklokolan. Samata, asew jiw xamalliajwa jumchiyaxil: ‘Tajpaklokolan’ —chiyaxil xamalliajwa.

¹¹ Nejxasinkam wut asew jiw xamal sitaeliajwa, japi majt kajachawae'e! Ja-aech wut, xamal sitaeyaxael jiw.

¹² Nejmachjiw nejchaxoel wut pajutliajwa: ‘Xanal kaes pejme pachaeman. Me-ama asew jiw, jachi-enil’ —aech wuti pajutliajwa, asamatkoi Dios jumchiyaxaesi: ‘Xamal kaes pejme pachaema-emil’ —chiyaxaesi. Pe asew jiwlix nejchaxoel wut pajutliajwa: ‘Xanal kaes pejme pachaema-enil. Me-ama asew jiw, jachi-enil’ —aech wuti pajutliajwa, asamatkoi Dios japi jiw jumchiyaxaesi: ‘Xamal pachaemam. Me-ama asew jiw, jachi-enil’ —chiyaxaesi’ —aech Jesús jiwliajwa, xanal pejnachalwanliajwabej.

¹³ Jesús pejme jum-aech judíos chanaekabuanapiliajwa, fariseosliajwabej: “Xamal judíos chanaekabuanapijwam, xamalbej fariseos, jiw naekichachajbam. Samata, Dios xamal xabich kastikaxael. Xabich kaes pejme chaemilaxael xamalliajwa. Xamal naewuajnampoxantat, me-ama faka'am jiw pas-elaliajwa Diosxotse. Xamalbej najut pasaximil jaxotse. Tapae-emilbej asew jiw pasasiapi pasliajwa Diosxotse.

¹⁴ [“Xamal naekichachajbam watho', pamaljiw naetupspi, wenosliajwam puexa japi pejewpi. Do jawux, judíos naewuajnaaba lowam Dios piach kawuajnalijwam, asew jiw xamal taen wut jumchiliajwa xamalliajwa: ‘Diachwuajnakolax ampi xabich pachaem’ —chiliajwa jiw xamalliajwa. Samata, kaes pejme chaemilaxael xamalliajwa, Dios jiw kastika wut” —aech Jesús japox judíos chanaekabuanapiliajwa, fariseosliajwabej.]

¹⁵ Jesús pejme jum-aech judíos chanaekabuanapiliajwa, fariseosliajwabej: “Xamal judíos chanaekabuanapijwam, xamalbej fariseos, jiw naekichachajbam. Xamalliajwa xabich kaes pejme chaemilaxael, Dios jiw kastika wut. Nanuamtam potuajnuacha faekaliajwam judíos-eli japi nejnachalaliajwa. Asew faekam wut, naewuajnam matabijampox-anal. Japanaewuajnaaxtat japi jiw kaes pejme chaemil. Me-ama xamal, jachi-eli. Samata, japi asamatkoi tup wut, pelsaxaeks infierno poadik” —aech Jesús japox judíos chanaekabuanapiliajwa, fariseosliajwabej.

¹⁶ Jesús pejme jum-aech judíos chanaekabuanapilijwa, fariseosliawabej: “Xamal judíos chanaekabuanapilijwam, xamalbej fariseos, me-ama itliaklawam wut, ja-am. Dios pej-jamechan naewuajnam wut, xamal jum-am, chiekal matabijslaxtat: ‘Aton jumdut wut Dios pejtemplobapilaxtat, japajumduxax pa-omsa-el. Pe aton jumdut wutlax orotat, Dios pejtemplobatpox, japajumduxaxlax xabich pa-om’ —am xamal chiekal matabijslaxtat.

¹⁷ Jasoxtat xamal jiw naewuajnam wut, me-ama nejliallawam, itliaklawambej, ja-am, matabija-emil xot diachwujnakolaxpox. ¿Achaxkat kaes pejme jiw sitaeyaxael? ¿Oro, Dios pejtemplobatpox? O, ¿Dios pejtemploba? Jiw kaes sitaeyaxael Dios pejtemploba. Jiw sitaen japa-oro, Dios pejtemplobapilax xot.

¹⁸ Xamal chiekal matabijslaxtat jum-ambej: ‘Aton jumdut wut altartat, japajumduxax omjil. Pelax japon jumdut wut Dios pej-ofrendat, okpox altarmatwujtat, japajumduxaxlax xabich pa-om’ —am xamal chiekal matabijslaxtat.

¹⁹ ¿Achaxkat jiw kaes pejme sitaeyaxael? ¿Dios pej-ofrenda, altarmatwujtat okpox? O, ¿Dios pej-altar, Dios pejtemplobatpox? Jiw kaes sitaeyaxael Dios pej-altar. Me-ama Dios pej-ofrenda altarmatwujtat okpox, sitaen wut, jachiyaxil.

²⁰ Aton jumdut wut altartat, japon jumdux-el altartatkal. Jumdutbejpon puexa japa-altarmatwujtat oelpitatbej.

²¹ Aton jumdut wut Dios pejtemplobat, jumdux-el Dios pejtemplobatkal. Jumdutbejpon Diostat, Dios duk xot japatemplobat.

²² Aton jumdut wut thatbaxotat, japon jumdutbej Dios pejtua-ekaxtat, Diostatbej, Dios pajut ek xot japatua-ekaxtat” —aech Jesús japox judíos chanaekabuanapilijwa, fariseosliawabej.

²³ Jesús pejme jum-aech judíos chanaekabuanapilijwa, fariseosliawabej: “Xamal judíos chanaekabuanapilijwam, xamalbej fariseos, jiw naekichachajbam. Samata, Dios xamal xabich kastikaxael. Diakam Diosliaw puexa nejew. Nejew diez wut, kaeyax diajnam Diosliaw. Xamal diajkambej xabich cha-aexpi, naxaeyaxan mattholspoxan. Pelax naexasisfula-emil asaxan, kaes pejme pachaempoxan xamal isfulalijwam. Japoxan naexasisfulaxaelam wut, isfulaxaelam pachaempoxan asew jiwliaw. Asew jiw beltaeyaxaelambej. Chiekal duilafulaxaelambej kichachajba-emilpoxtat. Japoxan isfulam wut, kofaximil diajkampox nejew Dios pej-ofrendalijwa.

²⁴ Xamal paklochwam, me-ama itliaklawam wut, ja-am, nejchaxoelafulam xot kaes pachaema-elpoxan. Xamal nejchaxoelafula-emil kaes pejme pachaempoxanlax” —aech Jesús japox judíos chanaekabuanapilijwa, fariseosliawabej.

²⁵ Jesús pejme jum-aech judíos chanaekabuanapilijwa, fariseosliawabej: “Xamal judíos chanaekabuanapilijwam, xamalbej fariseos, jiw naekichachajbam. Samata, Dios xabich xamal kastikaxael. Xamal xaelijwam wut, majt xabich piach fuletelan tasfahan, platfahanbej, xabich kiatam. Pelax kias-emil patulelan. Xamal, me-ama japatasfahan, platfahanbej, ja-am, nejnejchaxoelaxan, me-ama xabich asda'nik xot. Xamal asbwan jumch babijaxan isfulam. Nejchaxoelafulambej kenosliawam asew jiw pejew.

²⁶ Xamal fariseos, matabijslaxtat jum-am xot, nejnejchaxoelaxantat, me-ama itliaklawam wut, ja-am. ¡Majt nejchaxoelde pachaempoxan! Do ja-am wut, xamal isfulampoxan pachaemaxael Diosliaw” —aech Jesús japox fariseosliawabej.

²⁷ Jesús pejme jum-aech judíos chanaekabuanapilijwa, fariseosliawabej: “Xamal judíos chanaekabuanapilijwam, xamalbej fariseos, jiw naekichachajbam. Samata, Dios xamal xabich kastikaxael. Diachwujnakolax xamal jiwam pachaema-emil. Xamal, me-ama patupamuthan wut, ja-am. Patupamuthan thuch matjoelas wut papoei, me-ama pachaem wut, kabuan-aech. Pe funiachdik xabich chaemil. Japamuthanxotdik patupa xoep pathikal namaelijwa.

²⁸ Xamal paklochwam, ja-ambej. Jiw xamal taen wut, me-ama pachaemam wut, pakabuan-am. Pe xabich nejchaxoelam jiw naekichachajbalijwam. Nejchaxoelambej asaxan, chaemilpoxan, isfulalijwam jiwliaw” —aech japox Jesús judíos chanaekabuanapilijwa, fariseosliawabej.

²⁹ Jesús pejme jum-aech judíos chanaekabuanapilijwa, fariseosliawabej: “Xamal judíos chanaekabuanapilijwam, xamalbej fariseos, jiwlis naekichachajbam. Samata, Dios xamal xabich kastikaxael. Diachwujnakolax xamal jiwam pachaema-emilpim. Chajiakolaxtat Dios pejprofetas, baespi, japi pejmuthanmatwujtat, xamal cha-aelbax isam, asew jiw japoxan taen wut nejchafaekalijwa. Chajiakolaxtat jiw tupi, japi pachaempi asew jiwliaw, japi pejmuthanbej chamuthachaemtam asew jiw matabijalijwa, taen wuti japamuthan.

³⁰ Do jawux, japoxan, koloeaxan, isax ketoetam wut, xamal jum-am: ‘Wajwujnapilijw suapich, chajiakolaxtat xanal duilaxaelen wut, xanal kajachawaesaxinil, japi babejchow ba wuti Dios pejprofetas’ —am xamal.

³¹ Japoxan xamal jum-am wut, najut chiekal jum-am, Dios pejprofetas bapi, japi pamojiwampox.

³² Nejuwajnapijiw babijax isax tuadutpox, ixamal chiekal toe'e!" —aech Jesús japox judíos chanaekabuanapiliajwa, fariseosliajwabej.

³³ Jesús pejme jum-aech judíos chanaekabuanapiliajwa, fariseosliajwabej: "ixamal xabich chachoelam! Me-ama jom, ja-am! Ja-am wut, imachiyaxaelamkat xamal weliajwam infiernoxotdik kastika-elaliajwa xamal?"

³⁴ Samata, xan to'axaelen Dios pejprofetas xamal poxade, matabijsbej, judíos chanaekabuanapibej, xamal naewuajnalijwapi. Pe xamal asew japixot beyaxaelam. Asew japixot kematamatlaxaelambej cruztat. Asew japixot selsaxaelam nejnaewuaj nabachanxot. Asewbej japixot dukp wut, nakiowa wulwekafulaxaelam paklowaxanxot, japi chakifolam wut.

³⁵ Jasoxtat xamal xabich nejuwajna xael puexa pachaempi beyaxaesproxantat. Samata, Dios xamal kastikaxael. Chajiakolaxtat nejuwajnapijin, Cain, boesa Abel. Do jawux, asew nejuwajnapijiw, japibej beful asew jiw, pachaempi. Do baxael, asew nejuwajnapijiw, japibej boesa Zacarias, japon Berequias paxulan. Japon Zacarias boesas temploba tathoetat, altar moxhot.

³⁶ Diachwuajnakolax xan jum-an. Xamal amwutjel laelpampim, nejuwajnapijiw xabich jiw befulpoxtat Dios xabich kastikaxael xamal" —aech Jesús japox judíos chanaekabuanapiliajwa, fariseosliajwabej.

*Jesús xabich nejxaejwaspox Jerusalén paklowaxpijiwliajwa
(Lc 13.34-35)*

³⁷ Jesús xabich nejxaejwas, nejchaxoel wut Jerusalén paklowaxpijiwliajwa. Samata, jum-aechon: "Xamal, Jerusalén paklowaxpijwam, Dios pejprofetas beflam. Asew xamalxot ia'tat dadapam, Dios buxto'aspi xamalxot. Me-ama kawema paxi pejba'buXFaltat tameja, xan jachisian xamal bu' weliajwan. Pelax xamal xan nanejwesla.

³⁸ iChiekal najumtaem! Nejpaklowaxxot Dios kaes jaxotaxil. Kaes kajachawaesaxilbejpon xamal.

³⁹ Ma amwut, xamal kaes nataeyaximil. Xan pejme patx wut, jawut xamal jumchiyaxaelam xanliajwa: 'iDios nej kajachawaesas fulaenpon Dios pijaxtat!' —chiyaxaelam, pejme nataeyaxaelam wut" —aech Jesús, nejxaejwas wut Jerusalén paklowaxpijiwliajwa.

24

*Jesús jum-aechpox Dios pejtemploba toesaxaesproxliajwa
(Mr 13.1-2; Lc 21.5-6)*

¹ Jesús nakolt wut Dios pejtemplobaxot, atuxach fulaech wut, xanal, pejnachalwan, mox soepax japonxot. Do jawut, xanal Jesús jum-an:

—iTaem Dios pejtemploba, asabachan, pinabachanbej, moxchalakbanchan! —an xanal.

² Do jawut, Jesús jum-aech xanalliajwa:

—Diachwuajnakolax xan jum-an. Xamal taenambachan, templobabej, puexa japabachan asamatkoi chiekal toesaxaes. Chinax kaet ia't namanaxil nakae-ia'tmatwujat —aech Jesús.

*That toepax mox pawujna wut, majt matxoela jachiyaxaelpoxan
(Mr 13.3-23; Lc 17.22-24; 21.7-24)*

³ Do jawux, xanal fulaechx, Jesús suapich, Olivonaechanmuax poxade. Pa'ax wut, Jesús ek muaxhot. Xanal tajkalan wut, mox soepax Jesús wuajnaechanmsliajwan. Do jawut, wuajnaechanmtax wut, jum-an:

—Jiw chanaekabuanan, ixanal nachanaekabuanim! iMaswutkat japox jachiyaxael xam jum-ampox Dios pejtemploba toesaxaesproxliajwa, asabachanbej? iAchaxkat xanal taeyaxaelen, mox pawujna wut, xam pejme pasliajwam wut? iAchaxbejkat xanal taeyaxaelen mox pawujna wut, that toepaliajwa wut? —an xanal Jesúsliajwa.

⁴ Jesús jumnot wut, jum-aechon:

—iChiekal taem asew jiw xamal naekichachajabasamata!

⁵ Xabich jiw fulaeyaxaen. Japi kaenanula pajut najumchiyaxael: 'Xan Cristowan' —nachiyaxaeli. Pe japi Cristowaxil. Jasoxtat xabich jiw naexaxisaxaes, naekichachajba wut jiw.

⁶ Asamatkoi, xamal wultaenam wut soldaw xabich asatujnuchanxot nabapox, ixamal nabej nejlewe!' Japoxan majt jachiyaxael, mox pawujna wut that toepaliajwa.

⁷ That toepax wujna, xabichaxael nabewuajan. Kaetujnapijiw nabeyaxael, nakaetujnapijiw suapich. Japoxan majt jachisfulaxael asatujnuchanelbej.

Jachiyaxaelbej, kaetajjnupijiw nabeyaxael wut, asatujjnuchanpijiw swapich. Japoxan majt jachisfulaxael asatujjnuchanlel. Asamatkoi asatujjnuchanlel naxaeyaxan ajilaxael. Asatujjnuchanlelbej sat najaesaxael potujjnucha.

⁸ Japoxan majt jachiyaxael, nabijasmatkoi tudut wut jiw nabijasliajwa. Me-ama pawis pejmatkoi wepach wut naxuwlaliajwa, xabich wexaenkas, jachiyaxaelbej jiwliajwa, tudut wut nabijasax —aech Jesús xanal pejnachalwanliajwa.

Jesús jum-aech pejnachala nabijasaxaelpox

⁹ Jesús pejme jum-aech xanal pejnachalwanliajwa: “Do jawutbej, asew jiw xamal woeyaxael xabich nabijasliajwam kastikaxtat. Xamal beyaxaelbejpi tupaliajwam. Puexa jiw xamal nejweslaxael, tajnachalwam xot.

¹⁰ Japamatkoiyan xabich jiw kofaxael Dios xanaboejapoxan. Ja-aech wut, japi nakaewa nanejweslaxael. Do ja-aech wut, japi nakaewaliajwa padaelmajiw nadofaxael. Asew japixot nakaewa nabuflaeyaxael paklochow poxade, jaxotde beliajwas bu'fospi.

¹¹ Japamatkoiyan xabich jiw, me-ama Dios pejprofetas wut, jachiyaxaeli. Pe japi profetaxil. Japi jachiyaxael xabich jiw naekichachajbaliajwa. Xabich jiw naexaxisaxaespi japi jum-aechpoxantat.

¹² Xabichfulaxael babijaxan isfulpi ampathatat. Samata, xabich jiw nakaewa nanejxasinkpoxan kofaxael.

¹³ Asew jiwlaw kofa-eli Dios xanaboejapoxan, hasta japi tup wut, japikal Dios bu'weyaxaes.

¹⁴ Chimiawuajan, Dios puexa pejiw tato'alwuajan, potujjnucha xabich jiw nawaajnaaxael puexa jiw matabijaliajwa. Do jawux, pasaxael that toepaxaelpox.

¹⁵⁻¹⁶ “iAmpox xaljowpon nej jummatabijs! Xamal xaljowam wut, iChiekal jummatabijim! Daniel, Dios pejprofeta, chajia lel wut, jum-aechon: ‘Satanas to'axaeson, xabich babejkolan, japon fulaeyaxaen’ —aechon. Samata, xamal japon, xabich babejkolan, taenam wut Dios pejtemplobaxot, japon tapaeyaxisalpon jaxotaliajwa, ja-aech wut, iPuexa Judea tuajjnupijiw nej dukpa pinamuaxan poxade!

¹⁷ Jawutbej, jiw pejbachanmatwuajantat nuili, baloek wut, inej le-ele'bej pejbachan poxade, pejew jukbaliajwa, xadukpaliajwa!

¹⁸ Jawutbej asew jiw, nabisti pejlulantat, ido jaxot kaweta kamta atuaj nej dukpe! iKaxa nej nawe-elepi pejbachan poxadin pejew ponan wuljaesliajwa!

¹⁹ Japamatkoiyan watho', moejowpi, asew watho'bej, yamxi mitan miatifuk, xabich nabijasaxael.

²⁰ Dios kawuajanafulaxaelam, japox pasasamata iama wut, napatamatkoi wutbej.

²¹ Xamal dukpam wut, japamatkoiyantat xabich xamal nabijasaxaelam. Hasta amwutjel xabicha-ellejen nabijasax ampathatat. Dios that is wut, amwutjelbej, jachi-elfuk nabijasax, me-ama ampamatkoiyan pasaxaelpox nabijasax. Jasoxtat jiw pejme xabich nabijasaxil.

²² Nabijasmatkoiyan kaes xabichaxael wut, jiw xajupaxil boejtaliasliajwa. Samata, Dios tapaeyaxil jiw xabich piach nabijasliajwa. Jachiyaxaes Dios makanochpi, Dios nejxasinkas xoti” —aech Jesús xanal pejnachalwanliajwa.

Xabich jiw naekichachajbasia Jesús pejwuajan naexasiti

²³ Jesús pejme xanal najum-aech: “Japamatkoiyan asew jiw xamalxot jum-aech wut: ‘iTae'nik! iMa amxot Cristo!’ —aech wuti, o, asew jiw jum-aech wutbej: ‘iTae'nik! iMa jaxotde Cristo!’ —aech wuti, iXamal nabej naexasis!

²⁴ Naekichachajbapijiw matxoela fulaeyaxaen. Japi, me-ama Cristo, jachiyaxael. Pe japi Cristowaxil. Asew pasaxaenbej, me-ama Dios pejprofetas jachiyaxaeli. Pe japi Dios pejprofetaxil. Japi isfulaxael koexaxan, japoxantat xabich jiw naekichachajbaliajwa. Nejxasinkaxaelbejpi naekichachajbaliajwa jiw naexasiti Dios, japi kofaliajwa Dios xanaboejapoxan.

²⁵ iChiekal taem! Xamal japox jum-an japi pasax wuajna chiekal najut natataeflaliajwam, japi xamal naekichachajbasamata.

²⁶ Asew jiw jum-aech wut xamalliajwa: ‘iMa amwutjel Cristo pajilaxxotde!’ —aech wut asew jiw, iXamal nabej naexasis! iNabej fulae'ebej japoxade! O, asew jiw jum-aech wutbej xamalliajwa: ‘iMa amxot, batutat, Cristo namoest!’ —aech wutbej asew jiw, iXamal nabej naexasis!

²⁷ Xan, puexa jiw pakowkolnan, pejme pasaxoekan wut, me-ama chamax nakliafcha wut, puexa jiw kaewutje kamta taena. Jachiyaxaelenbej, xan pejme pasaxoekan wut. Jasoxtat puexa jiw xan chalechkal kamta nataenaxael kaewutje.

²⁸ Puexa jiw matabija ampox. Choefan tup wut, jaxot thutha pask. Me-ama japox, jachiyaxael asamatkoi, xan pasaxoekan wut. Potujjnucha jiw, xan nanaexasitpi, japi matabijaxael, xan paskax wut” —aech Jesús xanal pejnachalwanliajwa.

*Jesús, puexa jiw pakoewkolan, pejme kaxaxoekpox
(Mr 13.24-37; Lc 17.26-36; 21.25-33)*

²⁹ Jesús pejme jum-aech xanalliajwa: “Nabijasmatkoijan toep wut, juimt matkoipijin itkua'nikaxael. Juimt madoipijinbej itliakaxil. Ithaejan natacholnaxaek. Do jawut, puexa thatbaxoxotsepi nachoelaxael.

³⁰ Do jawux, puexa jiw taen wut asax thatbaxoxot, jawut jiw matabijaxaeli, xan, puexa jiw takoewkolnan, fuloeyaxoekapox athusik. Samata, ampathatpijiw xabich belwaxael. Noeyaxaelbejpi. Do jawux, xan, puexa jiw pakoewkolnan, fuloekx wut itloejentat, jiw xan nataeyaxael. Jawut puexa jiw tato'laxaelen. Nakhianaxaelenbej Dios pijaxtat.

³¹ Do jawut, to'axaelen taj-angeles trompeta nababeliajwa. Japatrompeta thatmatdukaxkal thiajoeyaxaelpox. Do jawut, to'axaelen taj-angeles that xajupaliajwa. Do jawutbej, taj-angeles xanlel jiw buflaeyaxaen, makanotxpikal, japi jiw tajjiwliajwa” —aech Jesús xanalliajwa.

Jesús chanaekabwana pejnachala higonaeliajwa

³² Jesús pejme xanal najum-aech: “iChiekal nanaewe'e! Higonae pajel-uaf nakolax taenam wut, xamal matabijam waech mox pawuajnapoxlis.

³³ Jachiyaxaelbej, taenam wut xan jum-anpoxan. Matabijaxaelam mox tawuajnapox xan pejme pasliajwansik, puexa jiw tato'laliajwan, taj-ax Dios swapich.

³⁴ Diachwuajnakolax xan jum-an. Puexa japoxan, xan jum-anpoxan, diachwuajnakolax jachiyaxael. Japoxan asew jiw taeyaxael, jiw laelpifuk ampathatat.

³⁵ Thatbaxo, ampathatbej, toepaxael. Pelax tajjamechan toepaxil. Xan jum-anpoxan, diachwuajnakolax japoxan jachiyaxael” —aech Jesús xanalliajwa.

Puexa jiw matabija-elpox, maswut Cristo pejme kaxaxoek

³⁶ Do pejme Jesús xanal najum-aech: “Puexa jiw matabija-el, maswut xan pejme kaxaxoek. Dios pej-angeles, Diosxotsepi, japibej matabija-el. Xanbej, Dios paxulnan, japox matabijs-enil. Kaen taj-ax Dios japox matabijt.

³⁷ “Chajiakolaxtat, Noé ampathatat laeje wut, jiw pomatkoicha nejmach duil. Me-ama japox jachiyaxael, xan puexa jiw pakoewkolnan, pejme pasliajwan wut.

³⁸⁻³⁹ Chajiakolaxtat, that bu'lax wuajna, jiw xael. Afbejpi. Asew nakjiyabej. Ja-aech wut, japamatkoijan Noé pinjiyax barkam isax ketoet wut, lowpon japabarkam. Do jawut, chalechkal xabich iam thilnax tuadut. That puexa chiekal bu'al wut, puexa jiw chiekal bu'al. Jachiyaxaelbej japamatkoi, xan, puexa jiw pakoewkolnan, pejme kaxaxoek wut. Jiw duilafulaxael nejmach.

⁴⁰ Kolenje aton nabist wut lultat, kaen chalechkal buflaeyaxaes athu poxase. Asan kaweta namanaxael.

⁴¹ Koliowje kaeyaxtat trigo xatkiana wut, kaeow chalechkal buflaeyaxaes athu poxase. Asaow kaweta namanaxael.

⁴² “Samata, ipomatkoicha nawuajnawesfulde, xamal matabija-emil xot, maswut xan, nejpaklokolan, pejme kaxaxoekan!

⁴³ iPe xamal ampox matabijim! Bapijin matabijt wut, maswut kethakan pasaxael, jawut bapijin moejchaxilon. Naliasfulaxaelon chiekal wesfulaliajwa pejba kethakan lesamata. Ja-aech wut, kethakan natkowaxil japon pejbatat.

⁴⁴ Samata, ixamalbej chiekal nawuajnawesfulde! Xan, puexa jiw pakoewkolnan, chalechkal kaxaxoekan, asew jiw, ampathatpijiw, nawuajnawesfula-el wut” —aech Jesús xanalliajwa.

*Paklon kolenjepox pamakan, kaen pachaem, asan chiekal chaema-el
(Lc 12.41-48)*

⁴⁵ Jesús pejme jum-aech wuajantat xanal pejnachalwanliajwa: “Pamakan pomatkoicha chiekal nabist pejpaklonliajwa babijax nejchaxoela-elaxtat. Paklon ajil wut, japon chiekal tato'al asew nabichow. Naxaeyaxanbej chiekal chaxduwbejpon pomatkoicha, me-ama paklon to'anadoftas japox isfulaliajwa.

⁴⁶ Paklon pat wut, taen wutbejpon pamakan chiekal nabistpox, ja-aech wut, pamakan xabich nejchachaemlaxael.

⁴⁷ “Diachwuajnakolax xan jum-an. Paklon matabijt wut pamakan chiekal wenabistaspox japon pejwulela, ja-aech wut, pejpaklon to'axaeson puexa pejew tataeflaliajwa.

⁴⁸ Asan pamakan, chiekal pachaema-elpon pejpaklonliajwa, japon nejchaxoel: ‘Tajpaklon makach pasaxil’ —aechon, nejchaxoel wut.

⁴⁹ Samata, japon chiekal tataefla-el asew, pejpaklon pamak. Dolison, japi jiw be'kala. Do jawutbej, tuadutlison xaeliajwa, saxsliajwasbej, asew jiw swapich. Jasox ispon pomatkoicha.

⁵⁰ Do ja-aech wut, nejchaxoela-elon paklon pejpasax. Do jawut, chalechkal pejpkalon pasaxael.

⁵¹ Jawutbej, japon xabich kastikaxaes. To'axaesbejpon asew poxadik, naekichachajbapi poxadik, infernoxotdik. Jaxotdik xabich noeyaxaelon. Bua'tatisaxaelbejpon, xabich nabijasaxaek xot" — aech Jesús xanal pejnachalwanliajwa.

25

Diez watho', pansiachow, pejwujajan

¹ Do pejme Jesús jum-aech xanal pejnachalwanliajwa: "Xan, puexa jiw pakoewkolnan, pejme patx wut ampathatasik, taeyaxaelen asew jiw nawuajnwesfulpi. Japi jiwlap leyaxael Dios tato'axotse. Asew jiw nawuajnwesfula-elpi, japi jiwlap leyaxil Dios tato'axotse. Jumchiyaxaelen wujantat xamal chiekal matabijaliajwam. Asamatkoi diez watho', pansiachow, kaenanula xafoli lámpara pawis nakjiyaxaelpow pejba poxaliajwade. Dolisi, fulaechlisi japaba poxade wujnwesliajwa japon aton, nakjiyaxaelpon, japow swapich. Japon aton jaxot pat wut, japi watho' kaewutje nak-fulaeyaxael nakleliajwa fiestaxot.

² Japi watho'xot, cinco watho', pansiachow, chajia chiekal nejchaxoel isaxaelpoxliajwa. Asew cinco watho' pansiachow chajia chiekal nejchaxoela-el isaxaelpoxliajwa.

³ Dolisdo, watho' chajia chiekal nejchaxoela-eli xafoli pejlámpara. Pe xalae-eli olivosimint, lámpara wesiajwas wut pejme falaliajwa.

⁴ Asew watho', pansiachow, chajia chiekal nejchaxoeli, japilax kaenanula xafol olivosimintan batiajtat, pejlámpara wesiajwas wut pejme falaliajwa.

⁵ Japon aton, nakjiyaxaelpon, makach pas-el paxaxaelpon pejbaxot. Samata, japi watho' itmoejlsalisi. Do jawut, puexa moejtlisi.

⁶ Pinmadoi wut, kaen aton nejlakcha wut, jum-aechon: '¡Aton, nakjiyaxaelpon, fulaenlison mox! ¡Xabua't bu'kulaliajwam!' — aechon.

⁷ Puexa japi watho', pansiachow, nathikba wut, nanbapi. Kaenanula chaemsnapa pejlámpara.

⁸ Watho', chajia nejchaxoela-eli, jum-aech asew watho', cincopiliajwa: '¡Xanal nachaxdu'e cha-aeldoeh, olivosimint, xanal tajlámpara falaliajwan, itkakuawak xot!' — aechi asew watho'liajwa.

⁹ Asew, cinco watho', jumnot wut, jum-aechi: '¡E! Xanal nawexajupaxil pasimint xamalliajwa, xanalliajwabej. ¡Xabua'de olivosimintan mowa poxade kaes wujsliajwam!' — aechi.

¹⁰ Do jawut, japi watho' fulaech wut olivosimintan wujsliajwa, pasimintan wujsliajwa kijil wutfuk, japon aton patlison. Asew, cinco watho', chajia chiekal nejchaxoeli, nakfulaechlisi japon aton, nakjiyaxaelpon, pejfiesta poxade. Japi batutat wut, bafafa chiekal faka'tlisi.

¹¹ Do jawux, cinco watho', pasimintan wujsliajwa kijilpi, japibej pat japabaxot. Japi watho' jum-aech nakjiyaxaelponliajwa: '¡Tajpaklon, ba fafa'e xanal leliajwan!' — aechi.

¹² Japon jumno'an wut, jum-aechon: 'Diachwujnakolax xan jum-an. Chinax xamal matabijs-enil. Samata, ba fafasaxinil xamal leliajwam' — aech nakjiyaxaelpon cinco watho', pansiachowliajwa" — aech Jesús xanal pejnachalwanliajwa.

¹³ Do pejme Jesús jum-aech xanalliajwa: "Xamal xan nanaewetampim, ¡chiekal nawuajnwesfulde! Me-ama watho' chajia chiekal nejchaxoeli, ¡ja-amsfulde xamal, xan nawuajnwesfulam wut, matabija-emil xot, achamatkoit xan pasaxaelen!" — aech Jesús xanal pejnachalwanliajwa.

Aton tres pamak lapox, japon pejew plata wetataeflialiajwas

¹⁴ Jesús pejme xanal najum-aech wujantat: "Dios pejiw tato'alpox, me-ama kaen aton, lapon tres pamakjiw, fulaeyaxael wuton asatuajnwel. Do jawut, japi pat wut japonxot, kaenanula pamakjiwxot pejew plata waelapon, japi xanbichliajwa japaplata japon pejwulela.

¹⁵ Pamaktxot plata waela wut, nejchaxoelon: 'Tamakan kaes chiekal xajupon nawetataeflialiajwa plata, japon kaes pejme chaxdusaxaelen. Asan xajupa-elpon chiekal nawetataeflialiajwa plata, japon kaeswapich chaxdusaxaelen' — aechon, nejchaxoel wut. Samata, kaen pamakanxot waelton cinco platachoxa. Asan pamakanxot waelton koleplatachoxa. Asan, taxdukapijinxot kaeplatachoxa waelton. Do jawux, japon paklon chijialison atuaj, asatuajnwel.

¹⁶ Cinco platachoxa wewaeltason, japon chiekal xanbichful japaplata pejpkalon pejwulela. Samata, japon kaes pejme cinco platachoxa kana.

¹⁷ Koleplatachoxa wewaeltason, japonbej chiekal xanbichful japaplata. Ja-aech wut, japonbej kaes koleplatachoxa kana.

¹⁸ Kaeplatachoxa wewaeltason, japonlax asbuan jumch mutht kowpon chamuthsliajwa japaplatachoxa, chamoeliasjwabejpon.

¹⁹ “Do baxael, xabich pin-iamatkoijan wut, paklon nawi'anlison pamak poxadin. Pat wuton pamaktxot, lalison pamak matabijsliajwa, ma-aechi kaenanula, plata xanbist wuti japon pejwulela.

²⁰ Matxoelapatpon, japon cinco platachoxa wewaeltaspon, japon chaxdut pejpaklon diez platachoxa. Japon jum-aech: ‘Tajpaklon, xanxot cinco platachoxa waelsnadoftam. Xan pejme cinco platachoxa kanx’ – aechon paklonliajwa.

²¹ Paklon jumnot wut, jum-aechon pamakanliajwa: ‘Xam xabich pachaemam. Chiekal isfulambej xan to'axpox. Xam chiekal nawenabistam xot, kaeyaxach wut, samata, xam xabich kaes pejme tejew nawetataeflaxaelam. ¡Lemen! ¡Nejchachaemilde, xan suapich! – aech paklon pamakanliajwa.

²² Do jawut, koleplatachoxa wewaeltaspon, japonbej pat pejpaklonxot. Japon jum-aech: ‘Tajpaklon, xanxot koleplatachoxa waelsnadoftam. Xan pejme kanx koleplatachoxa. Ama cuatro platachoxa’ – aech pamakan.

²³ Paklon jumnot wut, jum-aechon pamakanliajwa: ‘Xam xabich pachaemam. Chiekal isfulambej xan to'axpox. Xam chiekal nawenabistam xot, kaeyaxach wut, samata, xam xabich kaes pejme tejew nawetataeflaxaelam. ¡Lemen! ¡Nejchachaemilde, xan suapich! – aech paklon pamakanliajwa.

²⁴ “Do jawut, asan pamakan pat, kaeplatachoxa wewaelsnadoftaspon. Japon jum-aech pejpaklonliajwa: ‘Tajpaklon, xan matabijtax, xam namak beltae-emil. Xam kanambej nabich-elaxtat.

²⁵ Samata, xan tajlewla xamliajwa. Samatabej, chamuthtax nejplatachoxa chamoestiajwan satat. ¡Ama nejplatachoxa! – aech pamakan.

²⁶ Paklon jumnot wut, jum-aechon: ‘Xam kewechanam. Babejnambej. Xam matabijtam, xan kanxpo x nabich-elaxtat.

²⁷ ¿Ma-aech xotkat tajplata bancopijiw poxade nawexalae-emil japi prestaliajwam kaes nawe-itamaestiajwam prestampoxtat? Chil xam jasox isam wut, chil amwutjel bancopijiw kaes plata nawewiat xam prestampoxtat’ – aech paklon pamakanliajwa.

²⁸ Do jawut, japon paklon jum-aech asew jaxotpilliajwa: ‘¡Kechafi'epon japaplatachoxa! ¡Japaplatachoxa chaxdu'e xan nachaxdutpon diez platachoxa!

²⁹ Tejew chiekal nawetataefulpon, japon kaes chaxdusaxaelen. Japonbej wenamanaxaes. Asanlax, chiekal nawetataefla-elpon tejew, japon kaes suapich nawetataeflaxpo x, kefsaxaeson.

³⁰ Ampon, kewechan nabichliajwa, ¡jaeldepon! ¡Fo'impon tathoetade, itkuatxax poxade, jaxotde kastikaliajwas! Jaxot xabich noeyaxaelon. Bu'a'tatisaxaelbejon, xabich nabijasaxael xot’ – aech paklon japonliajwa’ – aech Jesús xanal pejnachalwanliajwa.

Machiyaxaespo x ampathatpijiw, babejchow, kastikas wuti Dios

³¹ Do pejme Jesús jum-aech xanal pejnachalwanliajwa: “Xan, puexa jiw pakoewkolnan, pejme pasaxoekan wut, Dios pej-itliak namasajiasaxael. Xabich Dios pej-ángelbej namasajiasaxael, bu'pasaxoekan wut. Do jawut, puexa jiw pejpaklonaxaelen, ekx wut tajtuakaxtat.

³² Puexa ampathatpijiw natamejaxael tajwuajnael. Jawut xan jiw diajkaxaelen kolemutjelijaw. Me-ama ovejas tataeflan pejlel diajk ovejas cabrasxot, xanbej jachiyaxaelen.

³³ Jiw, xan nanaexasiti, tamejaxaelen tajpoklalel. Japi, me-ama taj-ovejas. Asew jiw lax, xan nanaexasis-elpi, japi tamejaxaelen tajsoenalel. Japi, me-ama cabras.

³⁴ Xan, paklokolnan, jumchiyaxaelen tajpoklalelpijiwliajwa: ‘¡Xamal xabu'din xanel, taj-ax Dios kajachawaetpim! Patlisox Dios xamal tato'laxaelpo x. Japoxliajwa taj-ax Dios chajia nejchaxoel, akaseskolaxtat that is wuton.

³⁵ Xan litaxaelax wut, xamal naxaeyax nachaxdutam xan xaeliajwan. Xan minsila wutbej, mint nachaxdutam min feliajwan. Xan atuajan wut tajtuajnu xot, nejbatat namanax nato'am.

³⁶ Xan naxoelaliajwan nawejil wutbej, nachaxdutam naxoelaliajwan. Bu'xaenkax wutbej, nataentam nakajachawaestiajwam. Jiw jebatatx wutbej, nataentam’ – chiyaxaelen tajpoklalelpijiwliajwa.

³⁷ Do jawut, xan nanaexasiti nawuajnachaemsaxael: ‘Tajpaklon, ¿maswutkat xam taenx, litaxaelam wut chaxdusliajwan naxaeyax? ¿Maswutbejkat xam taenx, minsila wut chaxdusliajwan mint?

³⁸ ¿Maswutbejkat xam taenx, nejtuajnu xot atuajam wut namanax to'aliajwan tajbatat? ¿Maswutbejkat xam kejimil naxoelax xanal chaxdusliajwan?

³⁹ ¿Maswutbejkat xam taenx, bu'xaenkam wut kajachawaestiajwan? ¿Maswutbejkat xam taenx, jiw jebatatam wut?’ – chiyaxaeli xan nanaexasiti.

⁴⁰ Xan, nejpaklonan jumnosaxaelen wut, jumchiyaxaelen: 'Diachwujnakolax jumchiyaxaelen. Puexa xamal isam wut pachaempoxan xan nanaexasitiliajwa, japoxan isam wut, xan, me-ama nakajachawaetam' —chiyaxaelen xan nanaexasitiliajwa.

⁴¹ "Do jawux, xan, puexa jiw pakoewkolnan, jumchiyaxaelen tajsoenalelpijiwliajwa: '¡Chijiamde xanxot! Dios xamal kastikaxael, babijaxan isam xot. ¡Xabua'de infierno poxadik! Jaxotdik pomatkoicha jit pinjiyax tamdadut. Japox jit itkuawaxil. Japajitxotdik Dios chaemt Satanás kastikaliajwas, puexa pejdepej.

⁴² Litaxaelax wut, nachaxdus-emil naxaeyax xan xaeliajwan. Minsila wutbej, nachaxdus-emil mint xan feliajwan.

⁴³ Atujajan wut tajtujajuxot, xan namanax. Nato'a-emil nejboxot moejsliajwan. Nawejil wutbej xan naxoelaliajwan, nachaxdus-emil naxoelax. Bu'xaenkax wutbej, xan natae-emil nakajachawaesliajwam. Jiw jebatatax wutbej, natae-emil' —chiyaxaelen tajsoenalelpijiwliajwa.

⁴⁴ Do jawut, japi jiw nawujajnachaxael: 'Tajpaklon, ¿maswutkat xanal xam kajachawaes-enil, xam litaxaelam wut, o, xam minsila wutbej, o, xam atujajam wutbej nejtuajjuxot, o, kejjimil wutbej naxoelaliajwam, bu'xaenkam wutbej, o, jiw jebatatam wutbej?' —chiyaxaeli xanliajwa.

⁴⁵ Do jawut, xan puexa jiw pakoewkolnan, japi jiw jumnosaxaelen: 'Diachwujnakolax xan jum-an. Xamal is-emil pachaempoxan jiw xan nanaexasitiliajwa. Japox is-emil xot japiliajwa, xamal is-emil pachaempoxan xanliajwa' —chiyaxaelen tajsoenalelpijiwliajwa.

⁴⁶ Do jawut, tajsoenalelpijiw chiyaxael infierno poxadik, jaxotdik pomatkoicha kastikaliajwas. Xan nanaexasitilax, japi athu poxaxoei, pomatkoicha duilaliajwa Diosxotse" —aech Jesús xanal pejnachalwanliajwa.

26

Judíospaklochow nejchaxoelpox jaelsliajwapi Jesús
(Mr 14.1-2, 10-11; Lc 22.1-2; Jn 11.45-53)

¹⁻² Do jawut, Jesús japoxan buxtoet wut, pejme jum-aechon xanal pejnachalwanliajwa:

—Xamal matabijam ampo. Kolematkoije we'pfuk Pascuafiestaliajwa. Jawut xan, puexa jiw pakoewkolnan, asan nawiasaxael asajiwxot japi nakematamatlaliajwa cruztat —aech Jesús.

³ Jawut sacerdotespaklochow, judíos-ancianosbej, natameja Caifás pejbaxot. Japon sacerdotespaklokolan.

⁴ Jaxot nospaeipi Jesús jaelsaxliajwa, jeliajwasbejpon jiw jebatat. Naekichachajbasiapi Jesús maliach buflaeliajwas, boesaliajwasbej Jesús.

⁵ Pe nakaewa najum-aechi:

—Jasox isaxisal fiestatata. Japox isas wut, jiw xabich palalaxael. Ja-aech wut, jiw bej chamamosaxaelbejpi Jesús —aech paklochow nakaewaliajwa.

Pawis perjumamintat matnaechafanpox Jesús
(Mr 14.3-9; Lc 7.37-38; Jn 12.1-8)

⁶ Baxael, Jesús Betania paklowaxxot wut, Simón pejbaxoton. Japon Simón, majt lepraxae waechpon.

⁷ Japon pejbaxot kaew pawis mox soepan Jesúsxot. Japow xafolow perjumamint alabastro-ia'batiajtat. Japaperjumamint xabich ommaenk. Jesús ek wut mesaxot, japaperjumamintat matnaechafanpow Jesús.

⁸ Xanal pejnachalwan japox taenx wut, xabich talala japowliajwa. Xanal nakaewa najum-an:

—¿Ma-aech xotkat japow tabejt japot, perjumamint?

⁹ Japot, perjumamint, xabich ommaenk. Japaperjumamint tabejs-el wutow, chil mowas wut, xabich plata kanaxaes. Ja-aech wut, pachaemaxael japaplata chaxduiliajwas kejila —an xanal.

¹⁰ Jesús japox jumtaen wut, jum-aechon xanalliajwa:

—¡Nej ja-aeché! ¿Ma-aech xotkat japox jum-am? Japow japox is wut xanliajwa, japow is pachaempox xanliajwa.

¹¹ Kejila pomatkoicha xamalxotaxael kajachawaesliajwam. Pelax xan xamalxotaxinil xabich piach.

¹² Japow perjumamint namatnaechafan wut, nachawujajnachaxemtow, asamatkoi xan tux wut, namuthsaxael xot.

¹³ Diachwujnakolax xan jum-an. Potujajucha naewuajan wuti chimiawuajan jiw bu'welija, japamatkoiyan wut, jumchiyaxaelbejpi japow ispo xanliajwa. Jasoxtat nejchafaekafulaxaeli japowliajwa —aech Jesús, xanal pejnachalwanliajwa.

Judas Jesús padaelman nadofapox
(Mr 14.10-11; Lc 22.3-6)

¹⁴ Xanal puexa padosanpinxot, kaen pawal Judas Iscariote. Japonlap fulaech sacerdotess-paklochow poxade.

¹⁵ Jaxotde pa'a wut, wuajna chaemt wut, jum-aechon:

—¿Massuapichkat xamal wulnamotam, xan wiasaxaelen wut Jesús xamalxot? —aech Judas.

Do jawut, paklochow jumnot wut, jum-aechi:

—Xanal mosaxaelen treinta platafachan, xam wiatam wut Jesús xanalxot —aechi.

Do jawut, Judas kaenejchaxoelax, japi suapich, japaplatalajwa.

¹⁶ Do jawutlejen, Judas tuadut wuajnowesliajwa pachaematkoï Jesús wiasliajwapon Jesús padaelmajiwxot.

Jesús xaelpox, pejnachala suapich, Pascuafiestanaxaeyax
(Mr 14.12-25; Lc 22.7-23; Jn 13.21-30; 1 Co 11.23-26)

¹⁷ Fiestamatkoï pat wut pan puthla-eli xaeliajwa, japafiestatat kolenje, Jesús pejnachalan, mox soepa Jesús wuajna chaemsliajwapi. Japi jum-aech:

—¿Amxotkat xanal naxaeyax isaxaelen, Pascuafiesta wut xatis xaeliajwas? —aechi.

¹⁸ Jesús jumnot wut, jum-aechon:

—¡Xabua'de paklowax poxade! Jaxot pa'mach wut, kaen aton, matabijtaspon, taeyaxaelam. ¡Japon jum-amo: 'Wajpaklon jum-aech: "Tajmatkoï moxlisox, nabijasaxaelenpox. Nejba poxaxaelen, tajnachala suapich, Pascuafiestanaxaeyax xaeliajwan" —aechon' —amo bapijin! —aech Jesús, buxto'a wut kolenje pejnachalanliajwa.

¹⁹ Do jawut, japi fulaechlisi. Islisi Jesús to'aspox. Pascuafiestanaxaeyax islisi xanal xaeliajwan.

²⁰ Do madoi wut, xanal dosan chalakx mesaxot, Jesús suapich.

²¹ Xanal naxaelax wutfuk, Jesús najum-aech xanalliajwa:

—Diachwuajnakolax xan jum-an. Kaen xamalxot xan nawiasaxaelon tadaelmajiwxot —aech Jesús.

²² Xanal xabich nanejxaejow, japox jumtaenx wut. Samata, xanal kaenanula Jesús wuajna chaemsfulax wut, jum-ansfulax:

—Tajpaklon, ¿xankatlap xam wiasaxaelen? —ansfulax xanal.

²³ Jesús jumnot wut, jum-aechon:

—Xan suapich, kaepflaft panax taxthotpon, japonlap xan nawiasaxael tadaelmajiwxot.

²⁴ Xan, puexa jiw pakoewkolnan, tupaxaelen, me-ama Dios pejjamechan chajia jum-aech japoxliajwa. Pe xan nawiasaxaelpon tadaelmajiwxot, japonliajwa xabich kaes pejme chaemilaxael. Japon nalaelsa-el wut ampathatat, kaes pejme pachaemaxael japonliajwa —aech Jesús.

²⁵ Do jawut, Judas, wiasaxaelpon Jesús padaelmajiwxot, wuajna chaemt wut, jum-aechon Jesúsliajwa:

—Tajpaklon, ¿xankatlap xam wiasaxaelen? —aech Judas.

Jesús jumnot wut, jum-aechon Judasliajwa:

—Xamaxaelam, me-ama xam najut jum-am —aech Jesús Judasliajwa.

²⁶ Do jawut, xanal naxaelax wutfuk, Jesús panax fit. Dios kawuajan wut, jum-aechon: "Ax, gracias-an xanal nachaxdutam xot ampapan" —aech Jesús. Do jawut, Jesús jalkafal panax, xanal pejnachalwan naxexadiajliajwa. Do jawut, Jesús najum-aech xanalliajwa:

—¡Xaem pan! Japapan, me-ama tajwit —aech Jesús.

²⁷ Do jawut, Jesús copa chafit puexa xanal kaenanula fiaflaliajwan. Do jawutbej, Dios kawuajan wut, gracias-aechon vinoliajwa. Do jawut, xanal nachaxduton vino copatat. Do jawutbej, jum-aechon:

—¡Ampavino puexa xamal kaenanula fiafulde!

²⁸ Ampot, me-ama tajjal. Xan tuxp wut, tajjal nakolaxael. Japox jiw naexasit wut, beltaeyaxaes babijaxan ispoخانliajwa, tajjal pijaxtat.

²⁹ Diachwuajnakolax xan jum-an. Pejme feyaxinil vino ampathatat. Dios puexa pejjiw tato'almatkoï pat wut, jawut pejme japamatkoïtat pajelt vino feyaxaelen Diosxotse, xamal suapich —aech Jesús xanalliajwa.

Pedro xanaliyaxaelpox Jesús pejnachalanpoxliajwa
(Mr 14.26-31; Lc 22.31-34; Jn 13.36-38)

³⁰ Do jawut, kaet jajuït jajuiyax buxtoetx wut, fulaechx muax poxade, olivonaechan nul poxade.

³¹ Do jawux, Jesús olivonaechan nulxot nabu'pa'a wut, jawut najum-aechon xanalliajwa:

—Ampamadoitait puexa xamal kaenanula nasalaxaelam nejlel xanxot, xan nejxanaboe-jampox kofaxaelam xot. Japoxliawabey Dios pejjamechan, chajia lelspx, jum-aech, Dios jum-aech wut xanliajwa: 'Boesaxaes ovejas tataeflan. Ja-aech wut, puexa pejew ovejas, nasalaxael' —aech Dios jum-aechpox xamalliajwa, xanxot nasalaxaelampox.

³² Asajiw xan naboesa wut, taj-ax Dios namat-esaxael pejme dukaliajwan. Do jawut, xan wuajnaxaele Galilea tuajnuxot xamal wuajna —aech Jesús.

³³ Do jawut, Pedro jum-aech:

—Puexa asew nejnachala kofa wut pejxanaboejaxan xamliajwa, xanlax kofsaxinil tajx-anaboejsax xamliajwa. Xan nakiowa xam xanaboejsfulaxaelen —aech Pedro Jesúsliajwa.

³⁴ Jesús jumnot wut, jum-aechon:

—Diachwuajnakolax xan jum-an. Ampamadoitait kawaema nejlae-el wutfuk, xam nax-analiyaxaelam. Tres veces jumchiyaxaelam: 'Xan japon aton matabijs-enil' —chiyaxaelam, xanaliw wut xanliajwa —aech Jesús Pedroliajwa.

³⁵ Pedro nejthu'axtat jum-aech:

—Nejmachjiw najum-aech wut: 'Xam boesaxaelen, Jesús pejnachalnam xot' —na-aech wuti, xan elchiyaxinil —aech Pedro Jesúsliajwa.

Xanal, Jesús pejnachalwan, kaenanula japox kaeyax jumanbey, Pedro matxoelajum-aechpox.

Pawulxot, Getsemani, Jesús Dios kawuajanpox
(Mr 14.32-42; Lc 22.39-46)

³⁶ Do jawux, Jesús, xanal pejnachalwan suapich, pa'ax pawulxot, Getsemani. Jaxot wut, xanal najum-aechon:

—jAmxot chalakde! Xan wuajnaxaechan, taj-ax Dios kawuajnalialjwan —aech Jesús.

³⁷ Do jawut, Jesús kaesuapich atuaxach buflaechon Pedro, kaes asan kolenjebey. Kaen japixot pawul Santiago. Asan pawul Juan. Japi kolenje, Zebedeo paxi. Do jawut, Jesús tuadut xabich nejxaejwalialjwas. Xabich nejchaxoelbejpon tuxaxaelpoxliajwa.

³⁸ Do jawut, jum-aechon tres pejnachalanliajwa:

—Xan xabich nanejxaejow. Me-ama kaen aton tuxaxael wut, ja-aech nanejxaejowpox. jAmxot xamal namaem! jNabey moejs! jNaliasfulde, xan suapich! —aech Jesús tres pejnachalanliajwa.

³⁹ Do jawut, Jesús kaes atuaxach tamach fulaechon. Jaxotde wut, brixtat nuklison sat makxabijnalialjwadik. Do jawut, pax Dios kawuajan wut, jum-aechon:

—Ax, nabu'wesiam wut, jnabu'wem nabijasaxaelenpox! jPe nabey is xan nejxasinkaxpox! jIsde xam nejxasinkampox! —aech Jesús.

⁴⁰ Jawut, kaxadin wut pejnachala poxadin, taenlison, japi moejt wut. Do jawut, Jesús jum-aech Pedroliajwa:

—¿Xamkat xajupa-emil kaehora naliasliajwam, xan suapich?

⁴¹ jNaliasfulde Dios kawuajnalialjwam! Ja-am wut, Dios xam kajachawaesaxael isasamatam babijax. Nejnejchaxoelaxtat isasiam xan jum-anpox. Pe nejbu't chiekal mamnikael, xam xabich itmoejsla xot —aech Jesús Pedroliajwa.

⁴² Jesús pejme fulaech wut, pax Dios kawuajan wut, jum-aechon:

—Ax, nabu'we-elasiam wut nabijasaxaelenpox, jIsde xam nejxasinkampox! Nabijasax nataesiam wut, xan nabijasaxaelen —aech Jesús pax Diosliajwa.

⁴³ Do jawut, Jesús pejme kaxadin wut, pejnachala nakiowa asbuən jumch moejtfuki, xabich itmoejsla xot.

⁴⁴ Do pejme Jesús japi waela jaxot. Fulaechon pejme pax Dios kawuajnalialjwa. Matxoelakawuajanpox, japox pejme jum-aechon. Jasoxtat Jesús kawuajan pax Dios.

⁴⁵ Do pejme kaxadin pejnachala poxadin. Pat wuton japixot, jum-aechon:

—¿Xamalkat nakiowa moejtamfuk? ¿Damlathulambej? Xan, puexa jiw pakoewkolnan, tajhora nawepat. Nawiasaxaelon babejchowxot.

⁴⁶ jNanim! jAmxot chijias! Fulaenlison mox nawiasaxaelpon tadaelmajiwxot —aech Jesús japi tres pejnachalanliajwa.

Jesús jaeltaspox padaelmajiw
(Mr 14.43-50; Lc 22.47-53; Jn 18.2-11)

⁴⁷ Jesús naksiya wutfuk xanallialjwa, jawut Judas pat. Japon kaen xanalxotpijin. Japontat dosan. Japon xabich jiw bu'pat. Japi jiw xafol espada, iwabey. Japibey nakfulaen, sacerdotespaklochow to'as xot, judios-ancianos to'as xotbejpi.

⁴⁸ Judas, japon Jesús wiasaxaelpon padaelmajiwxot, chajia chiekal jum-aechon japi jiw chiekal matabijalialjwa: "Xan xusuuyaxaelenpon, japonlap xamal jaelsaxaelam!" —aech Judas.

⁴⁹ Do jawut, Judas mox soepan wut Jesúsxot, jum-aechon Jesúsliajwa:

—Tajchanaekabuanan, xan patx —aech Judas.

Kejacha wut, xusuwpon Jesús.

⁵⁰ Do jawut, Jesús jumnot wut, jum-aechon Judasliajwa:

—Fulaemanpox isliajwam, jama japox isde! —aech Jesús Judasliajwa.

Do jawut, Judas jiw buflaenpi, japi mox soepa Jesúsxot. Do jawut, Jesús jaeltas buflaeliajwas.

⁵¹ Jesús jaeltas wut, kaen xanalxot kukcha pej-espada. Do jawut, japon asan nae-cho'chikchapon. Cho'chikchaspon nabist sacerdotespaklokolanliajwa.

⁵² Jesús jum-aech pejnachalanliajwa:

—¡Espada jem ta-akadik! Puexa jiw nabapi espadat, tɔpaxaelbejpi espadat.

⁵³ Xamal matabija-emil. Xan wuljowx wut taj-ax Dios, japon ma amwut to'axoek xabich pin-ia kola pej-ángeles xan nabu'welialjwa.

⁵⁴ Pe xan japox wuljoeyaxinil. Dios pejjamechan, chajia lelsprox, jum-aech najaelsliajwapox. Samata, ja-aechlisox —aech Jesús pejnachalanliajwa.

⁵⁵ Do jawut, Jesús wuajnaemta wut, jum-aechon buflaeyaxaespijliajwa:

—¿Ma-aech xotkat xamal xafolam espada, iwabej, xan najaelsasiam wut? ¿Xankat, me-ama natkowanen wut, kabuan-an xamalliajwa? Kaematkoisful xan ekx Dios pejtemplobaxot, jiw naewuajnalajwan. Jaxot xamal xan najaels-emil, Dios xamal tapae-el xotfuk.

⁵⁶ Dios pejjamechan profetas chajia lelpox jum-aech, japox jachiliajwa. Samata, japox ja-aechlisox —aech Jesús japi jiwliajwa.

Do jawut, xanal, japon pejnachalwan, Jesús tamach waeltax. Xanal padukpax tajlel.

Jesús nukpox judiospaklochow pejwuajnalel

(Mr 14.53-65; Lc 22.54-55, 63-71; Jn 18.12-14, 19-24)

⁵⁷ Jesús jaeltpi, japi buflaech Caifás pejba poxade. Caifás sacerdotespaklokolan. Japon pejbaxot judíos chanaekabuanapi, judíos-ancianosbej, wuajna natamejapi.

⁵⁸ Jesús bu'fos wut, Pedro atɔaxach wuchakal fol. Japi jiw bu'pat wut sacerdotespaklokolan pejbaxot, jawut Pedrobej pat japabafalmaktxot. Jaxot nak-ekon, temploba weti suapich, ketaeliajwa Jesús padaelmajiw isaxaelpox Jesúsliajwa.

⁵⁹ Do jawut, sacerdotespaklochow, puexa judíos-ancianosbej, japi nejchaxoel Jesús tasalaspoxtat boesaliajwas. Samata, wulweki wuajan, diachwuajnakolaxa-elox, Jesús xabich tasalaliajwapi.

⁶⁰ Xabich jiw fulaen tasalaliajwapi Jesús kichachajbapoxtat. Pe paklochow wepachaema-esal japoxantat tasalaliajwapi Jesús. Samata, wuajan faena-eli tasalaliajwapi Jesús. Baxael, asew kolenje fulaen paklochow poxadin.

⁶¹ Japi jum-aech amprox:

—Ampon aton majt jum-aech: 'Xan xajuxp toesliajwan Dios pejtemploba. Xajuxpbej pejme mat-esliajwan, tres matkoi wut' —aech ampon aton —aechi Jesúsliajwa.

⁶² Do jawut, sacerdotespaklokolan nant wut, jum-aechon Jesúsliajwa:

—¿Diachwuajnakolaxkat japi jiw jum-aechpox xamliajwa? ¿Xamkat japi jiw jumnosaximil? —aech sacerdotespaklokolan Jesúsliajwa.

⁶³ Pe Jesús boejlach nuk. Do jawut, sacerdotespaklokolan pejme jum-aech:

—¡Dios athɔpijin pijaxtat najum-amde diachwuajnakolaxpox! ¿Xamkatlap diachwuajnakolax Cristowam, Dios paxulnam? —aechon.

⁶⁴ Jesús jumnot wut, jum-aechon:

—Puexa xam jum-amprox xanliajwa, diachwuajnakolax. Xan, puexa jiw pakoewkolnan, ekaxaelen taj-ax Dios poklalel jiw tato'lialajwan. Taj-ax Dios xabich mamnik puexaliajwa. Xamal japox taeyaxaelam, xan fuloekx wut athulelsik itlojentat —aech Jesús.

⁶⁵ Do jawut, sacerdotespaklokolan japox jumtaen wut, pajut thiakchapon pijax, naxoelax, xabich palala xot. Do jawut, sacerdotespaklokolan kaes jum-aech:

—Ampon aton jum-aech Dios nejxasinka-elpox. Kaes asew jiw nakwewe'pa-el tasalaliajwas japon. Xamal najut chiekal jumtaenam, japon jum-aech wut japox Diosliajwa.

⁶⁶ ¿Achaxkat xamal nejchaxoelam ampon atonliajwa? —aech sacerdotespaklokolan.

Do jawut, japi puexa jumnot wut, jum-aechi:

—Ampon aton pejbu'wuajan. Samata, kastikaxaeson. Boesaxaesbejpon —aechi.

⁶⁷ Do jawut, Jesús xuloeyaspon. Xutulapasbejpon. Asew japixot ke-etat xuselbalapi Jesús.

⁶⁸ Ifumatakus wut, jum-aechipon:

—Xam Cristowam wut, ijum-amde! ¿Achankat xam xutulap? —aechi.

Pedro xanaliapox Jesús matabijtpoxliajwa

(Mr 14.53-54, 66-72; Lc 22.54-62; Jn 18.15-18, 25-27)

⁶⁹ Pedro ekfuk sacerdotespaklokolan pejbafalmaktxot. Jawut kaeow pawis, nabistow japabaxot, japow mox soepan Pedroxot. Do jawut, japow jum-aech Pedroliajwa:

—Diachwəajnakolax xam Jesús pejnachalnam, japon Galilea təajnrəpijn —aechow.

⁷⁰ Do jawət, Pedro pajutliajwa naxanalia wət puexa jiw pejwəajnalel, jəm-aechon:

—Xan matabijs-enil najəm-ampox —aechon.

⁷¹ Do jawət, Pedro fulaech bafafa poxade. Jaxotde Pedro asaow pawis pejme taenspon. Japowbej jəm-aech asew jaxot nulpi jəmtaeliasjwas:

—Ampon aton, nanuamt Jesús, Nazaret paklowaxpijn swapich —aechow.

⁷² Do jawət, Pedro pejme pajut naxanalia wət Jesúsliajwa, jəm-aechon:

—Dios chiekal matabijit, xan japon aton matabijs-enilpox —aech Pedro nejthə'axtat.

⁷³ Do jawətjejen, jaxotpijiw Pedro mox soepas. Japi jəm-aech:

—Diachwəajnakolax xambej Jesús pejnachalnam. Naksiyam wət, me-ama Galilea təajnrəpijiw naksiya wət, jajəm-am —aech japi Pedroliajwa.

⁷⁴ Do jawət, Pedro pejme jəm-aech:

—Diachwəajnakolax jəmchi-enil wət, ¡Dios xan nej nakastike! Xan japon aton matabijs-enil —aech Pedro japi jiwliajwa.

Do jawətjejen, kawaema nejla.

⁷⁵ Do jawət, Pedro nejchafaet Jesús jəm-aechpox, chajia jəm-aech wət: “Kawaema nejlae-el wətfuk, xam naxanalixaelam tres veces” —aech Jesús, jəm-aech wət. Do jawət, japabafalmaktxot Pedro nakolt tathoetade. Jaxotde xabich nowpon, xabich nejxaejwas xot.

27

Jesús wiachpox Pilatoxot

(Mr 15.1-5; Lc 23.1-5; Jn 18.28-38)

¹ Nalian wət, puexa sacerdotespaklochow, judíos-ancianosbej, natameja kaenejchaxoelaxliajwa boesaliajwas Jesús.

² Do jawəx, bə'foslison məaxmatakəiyaxtat gobernador Pilato poxade. Jesús wiach Pilatoxot. Pilato Judea təajnrəpijiw tato'lan, to'as xoton Roma təajnrəpijiw tato'lan.

Judas təppox

³ Do jawət, Judas, Jesús wiatpon padaelmajiwxot, taen wəton Jesús tasalaspox boesaliajwas, jawət xabich Judas nejxaejwas Jesúsliajwa, japon ispoxliajwabej. Samata, treinta platafahan pejme xapaton wiasliajwa sacerdotespaklochow natamejaxot, judíos-ancianos swapich, Dios pejtəmplobatat.

⁴ Judas jaxot pat wət, jəm-aechon japi paklochowliajwa:

—Xan babijax isx japon atonliajwa, babijax is-elponliajwa, bə'fos xoton boesaliajwas —aech Judas japiajwa.

Japi jəmnot wət, jəm-aechi:

—¿Ma-aech xotkat japox xanal najəm-am? Japox xam nijax. Xanal japox tajaxa-el —aechi Judasliajwa.

⁵ Do jawət, Judas japaplata thokcha Dios pejtəmplobatat. Do jaxot nakoltison tathoetade. Do jawəx, pajut nakaechariamake'ton naetat. Jawət dukjiklison patəpan.

⁶ Judas nakolt wət Dios pejtəmplobaxot, jawət sacerdotespaklochow notlisi japaplatafahan, Judas thokchapi Dios pejtəmplobatat. Not wət, nakaewa najəm-aechi:

—Ampaplatafachantat moch kaen aton boesaliajwas. Samata, ampaplatafahan kenosaxisal Dios pej-ofrendaliajwa —na-aechi nakaewaliajwa.

⁷ Do jawət, japi kaenejchaxoelax sat wəajsliajwa, japasatxot muthaliajwapi judíos-eli təp wət Jerusalén paklowaxxot. Japasat wəajtəxoti, majt pawəl Baexfa'san Pejsat.

⁸ Hasta amwətjel japasat pawəlfuk Jalsat, japaplatafachantat mot xoti kaen aton boesaliajwas.

⁹ Japox ja-aechlisox, me-ama Jeremías, Dios pejprofeta, chajia jəm-aechpox, jəm-aech wət: “Japi xalaeyaxael treinta platafahan wəajsliajwa baexfa'san pejsat. Japaplatafahanliajwa judíospaklochow kaenejchaxoelax mosliajwapi jas-omtat kaen aton boesaliajwas.

¹⁰ Do jawəx, japaplatafachantat wəajsaxaeli baexfa'san pejsat, me-ama Dios chajia jəm-aech” —aech Jeremías, chajia jəm-aech wət.

Jesús nukpox Pilato pejwəajnalel

(Mr 15.2-5; Lc 23.3-5; Jn 18.33-38)

¹¹ Jesús wiach wət gobernador Pilatoxot, jawət japon wəajnaeaemt wət, jəm-aechon Jesúsliajwa:

—¿Xamkatlap puexa judíos pejreynam? —aechon.

Jesús jəmnot wət, jəm-aechon:

—Diachwəajnakolax xan japonan, xam jəm-amponan —aech Jesús Pilatoliajwa.

¹² Sacerdotespaklochow, judíos-ancianosbej, pejme jaxot Jesús tasala wut, jawut Jesús kaes jumnos-el. Asbuan jumch boejlach nuklison.

¹³ Samata, Pilato Jesús wuajnaem wut, jum-aechon:

—¿Xamkat jumtae-emil japi jiw xam tasalapoxliajwa? —aech Pilato Jesúsliajwa.

¹⁴ Pe Jesús boejlach nuk. Chinax kaejame jumnos-elon. Samata, Pilato xabich nejchaxoelanik.

Pilato to'apox Jesús kematamatlaliajwas

(Mr 15.6-20; Lc 23.13-25; Jn 18.38-19.16)

¹⁵ Pilato pejkabuan, kaewaechful wut, Pascuafiesta wut, jitapaeipon kaen aton nakolsliajwa, jiw jebatat jiaspon, japon wuljowospon judíos.

¹⁶ Japamatkoiyantat kaen jiw jebatat jias. Japon xabich judíos matabijtas. Pawulon Barrabás.

¹⁷ Puexa judíos natameja wut, Pilato wuajnaem wut, jum-aechon judíosliajwa:

—¿Mason atonkat xamal nejxasinkam jiw jebaxot nakolsax tapaeliajwan? ¿Xamalkat nejxasinkam xan nakolsax tapaeliajwan Barrabás? O, ¿Jesús, japon pawalpon Cristo? —aech Pilato.

¹⁸ Pilato japox jum-aech, pajut matabijt xot, judíospaklochow wiat Jesús japonxot, xabich nusasiawal xoti Jesúsliajwa.

¹⁹ Pilato ek wutfuk pejtua-ekaxtat naewesliajwa Jesús tasalaspox, Pilato pijow jumxato'an. Jumxato'an wut, jum-aechow: “¡Nabej is babijax japon atonliajwa, chinax is-el xoton babijax! Xan xamoejtax wut, xabich nosbejchaeminal, nejchaxoelx wut japon atonliajwa” —aechow, jumxato'an wut Pilatoliajwa.

²⁰ Pe sacerdotespaklochow, judíos-ancianosbej, jum-aech xabich judíosliajwa: “¡Pilato wuljoem Barrabás nakolsax tapaeliajwa jiw jebaxot! ¡Pelax Pilato wuljoem japon to'aliajwa Jesús kematamatlaliajwa cruztat!” —aech paklochow xabich jiwliajwa.

²¹ Do pejme Pilato wuajnaem wut, jum-aechon puexa judíosliajwa:

—Japi kolenjexot, ¿masonkat xamal nejxasinkam xan nakolsax tapaeliajwan? —aech Pilato.

Do jawut, puexa judíos jum-aech Pilatoliajwa:

—¡Barrabás nakolsax tapaem! —aechi.

²² Do pejme Pilato wuajnaem wut, jum-aechon japiliajwa:

—¿Achaxkat isaxaelen Jesúsliajwa, japon pawalpon Cristo? —aech Pilato judíosliajwa.

Do jawut, puexa jumnot wut, jum-aechi:

—¡japonlax cruztat kematamatalde! —aechi.

²³ Do pejme Pilato jum-aech japi judíosliajwa:

—¿Achababijaxkat Jesús is xan to'aliajwan japon cruztat kematamatlaliajwas? —aech Pilato.

Japi nejlasful wut, jum-aechfuli:

—¡Cruztat kematamatalde! —aechfuli.

²⁴ Pilato matabijt japi judíos kaes naewesfula-esalpox. Xabich kaes nejlasfulbejpi, xabich palala xot. Samata, Pilato pamakan to'a min wuljaesliajwa. Jawut, xapa'an wut, Pilato kekakiat puexa judíos pejuajnalel. Jawut jum-aechon:

—Ampon aton boesas wut, japox wuajan xan xalaejaxinil. Japox wuajan xamal xalaelpaxaelam —aech Pilato judíosliajwa.

²⁵ Puexa judíos jumnot wut, jum-aechi:

—Diachwuajnakolax xanal japox wuajan xalaelpaxaelen, japon aton boesas wut. Taxibej xalaelpaxael japox wuajan —aech judíos.

²⁶ Do jawut, Pilato tapaei Barrabás nakolsliajwa jiw jebaxot. Do jawutbej, Pilato keto'a soldaw selsliajwapi Jesús. Selsax ketoet wut, Pilato to'a soldaw Jesús kematamatlaliajwas cruztat.

²⁷ Do jawutbej, Pilato pejsoldaw bu'follisi Jesús, Pilato pejba poxade. Jaxotde puexa soldaw masajiatlisi Jesús.

²⁸ Jawux Jesús wejoltas sumta-otox. Do jawutbej, xajoellisipon pakchowax, me-ama rey naxoelpox, pasoeyax jasox.

²⁹ Xakoeyapi na-e'lu matlua'sliajwapi Jesús. Jawut matlua'tlisipon. Chaxdutipon, me-ama rey kilachalapox poklake-elel. Do jawux, soldaw brixtat nanuili Jesús pejuajnalel taxaxaelaliajwa. Brixtat nanuil wut, bu'wuajanpaeipi Jesús. Taxaxaelaxtat jum-aechfullisi:

—¡Moi, judíos pejrey! —aechfullisi.

³⁰ Loeyasbejpon. Me-ama rey kelachalapox, japoxtat Jesús matnaebe'balas.

³¹ Do jawux, bu'wuaianpaeyax buxtoet wut, pejme joltlisipox, me-ama rey pijax, jasox. Pejme Jesús xajoels pejsumta-osax, japox Jesús pijaxkolax. Do jawut, bu'follisipon cruztat kematamatlaliajwapi Jesús.

Jesús kematamatlaspox cruztat
(Mr 15.21-32; Lc 23.26-43; Jn 19.17-27)

³² Do jawut, soldaw bu'fol wuti Jesús nakolaliajwa Jerusalén paklowaxxot, jawut xabu'kulti kaen aton. Japon pawal Simón, Cirene paklowaxpijin. Do jawut, japon Simón, xato'ason soldaw Jesús pijax cruz xalaeyax. Jesús kaes japox xalaeyaxil, japon mamnika-el xot kastixaxtat.

³³⁻³⁴ Jesús bu'pach muaxxot. Japamuax pawal Gólgota. (Japawal jumchiliajwa: “Mat-naethitmuax” —chiliajwa. Japamuax, me-ama aton matnaethit wut, kabuan-aechox.) Jaxotde bu'pa'a wut, soldaw chaxduti Jesús feliajwa vino, xasaxamint tanialtaspot, xabich boejtae-elaliajwa xaeyax. Pe Jesús xapaejla wut japavino, fe-elon.

³⁵ Do jawut, Jesús cruztat kematamatlas wut, soldaw nakakujt ia'xix, jasi, matabijaliajwa, achan kanaxael kaenanula Jesús pejnaxoe.

³⁶ Do jawux, soldaw chalak wesfulaliajwapi Jesús.

³⁷ Jesús pejmatnaetlelse tawlofach lelsipox chaduch. Japatawlofachxot lelsipox jum-aech, ma-aech xot Jesús kematamatlas cruztat. Lelsipox jum-aech: “Ampon Jesús, judíos pejrey” —aechox.

³⁸ Jawut, Jesús cruztat kematamatlas wut, japamuaxxot kolenje kethakan kaenanula cruztat kematamatlasbej. Kaen Jesús pejpoklalel chanuk. Asan Jesús pejsoenalel chanuk.

³⁹⁻⁴⁰ Asew jiw, jaxot xaxenapi, babejjamechan jum-aechi Jesúsliajwa. Matnaexawilt wut, jum-aechbejpi Jesúsliajwa:

—Xam chajia jum-am: ‘Xan Dios pejtemploba toesaxaelen. Do jawux, tres matkoi wut, pejme mat-esaxaelen’ —am xam. ¿Ma-aech xotkat amwutjel xam najut nabu'we-emil? Xam diachwuaajakolax Dios paxulnam wut, jma amwut najut baloemk cruzxotsik! —aech xaxenapi Jesúsliajwa.

⁴¹ Jawut sacerdotespaklochow, judíos chanaekabuanapibej, judíos-ancianosbej, japibej bu'wuaianpaei Jesús.

⁴² Nakaewa najum-aechi Jesúsliajwa:

—Asew jiw bu'wiapon. Pe pajut nabu'we-elon. Diachwuaajakolax ampon Israel tuajnupijiw pejrey wut, jma amwut nej baloeskon cruzxotsik! Do ja-aech wut, ixatis naexasisaxaesol!

⁴³ Dios xanaboejtbejpon. Jum-aechbejpon: ‘Xan Dios paxulan’ —aechon pajutliajwa. Samata, japon Dios nej bu'wes, Dios nejxasinkas wut! —na-aechi nakaewaliajwa Jesúsliajwa.

⁴⁴ Kolenje kethakan, kematamatlaspi cruztat, Jesús suapich, japibej jum-aech babejjamechan Jesúsliajwa.

Jesús tuppox cruztat
(Mr 15.33-41; Lc 23.44-49; Jn 19.28-30)

⁴⁵ Jesús cruztat wut, juimt matnoch ek wut, jawut xabich itkua'nik potuajnuacha. Tres horas itkua'nik.

⁴⁶ Do jawut, a las tres wut, Jesús nejlacha wut, jum-aechon: “Elí, Elí, ¿lema sabactani?” —aech Jesús. (Japox jum-aech wut, jumchiliajwa hebreojamet: “TajDios, tajDios, ¿ma-aech xotkat tamach nawaeltam?” —chiliajwapox.)

⁴⁷ Asew jiw, jaxoti, japox jumtaen wut, jum-aechi:

—Japon wullalat Elías, Dios pejprofeta —aechi.

⁴⁸ Jawutlejen kaen japixot najaet wuljaesliajwa esponja, xathosliajwa vino xathunkpotat. Esponja faen wut, xathoti esponja. Do jawut, nae-oefat matakupi Jesús suiliajwa japox.

⁴⁹ Asew jiw lax jum-aech:

—jMastaem! Taeyaxaes Elías bej fuloeyaxoekbej japon bu'weliajwas —aechi.

⁵⁰ Jesús pejme nejlakcha wut, jawut tujpison.

⁵¹ Jawut Dios pejtemplobatutat pinabu', duchpox batutat, najupathiakchakas athusik satleldik. Jawutbej sat xabich najaet. Pinanul ia' tatakbej.

⁵² Jawutbej patupamuthanxot pajut nafafa'bala. Do jawutbej, chajia tupi, majt laelpi ampathatat, japi Dios naexasiti, japi xabich pin-iat mat-ias pejme duilaliajwa ampathatat.

⁵³ Jesús tup wut, jawux, tres matkoi wut, Jesús mat-ech wut pejme dukaliajwa, jawut japi jiwbej, mat-iaspi, lowpi Jerusalén paklowaxxot. Xabich japapaklowaxpijiw taensi.

⁵⁴ Patupan Jesús chanuk wut cruztat, soldawcapitán, pejsoldaw suapich, jaxot weti Jesús, taen wuti puexa ja-aechpoxan, sat najaesax taen wutbejpi, puexa japi soldaw xabich pejlewla. Samata, jawut jum-aechi:

—jDiachwuaajakolax ampon aton Dios paxulan! —aechi.

⁵⁵ Do jawutbej, patupan Jesús chanukxot xabich watho' atuaxach nuili natachaemaliajwapi patupan Jesús. Japi watho' chajia nakfalaeni Jesús Galilea tñajñuxot. Japi watho' kajachawaetbejpi Jesús, nanuamt wut.

⁵⁶ Japi watho'xot, jaxotbej María. Japow Magdala paklowaxpijow. Jaxotbej asaow, pawulpow María. Japow Santiago pen. Japowbej José pen. Japow Zebedeo pijow.

Patupan Jesús ochpox muaxwñajtat

(Mr 15.42–47; Lc 23.50–56; Jn 19.38–42)

⁵⁷⁻⁵⁸ Jesús tıp wut, tuila wutlejen, kaen aton pawulpow José, japon pat gobernador Pilatoxot. Japon kemaeyan, Arimatea paklowaxpijin. Japonbej naexasit Jesús naewñajanpoxan. Dolisdo', José pat wut Pilatoxot, wuljowpon fisliajwa patupan Jesús muthsliajwa. Do jawutbej, Pilato to'a soldaw, japi chaxdusliajwapi patupan Jesús Joséliajwa.

⁵⁹ Do jawut, José fulaech patupan Jesús chanukxotde cruztat. Pa'a wuton, kuton patupan Jesús cruzxotsik. José xakoeya patupan sábanatat. Japabu' chimiabu', pajelbu'bej.

⁶⁰ José chajia asan aton wekowson muaxwñaj. Japawñaj José pajutliajwalach, asamatkoi tıp wut japawñajxot osliajwas. Samata, José japawñajxot oton patupan Jesús. Do jawux, ia't pinjit, jajaerat, matariamán japawñaj fakasliajwa. Do jawux, José japox ketoet wut, nawiaton.

⁶¹ Pe jaxot María, Magdala paklowaxpijow. Jaxotbej asaow María, japow pejwulxoelow. Japi koliojwe atuaxach chalax japawñaj wñajnalel taeliajwapi patupan Jesús cha-ochxot.

Patupan Jesús ochxot soldaw wesfulpox

⁶² Kandiawa wut, napatamatkoi wut, sacerdotespaklochow, fariseosbej, fulaech Pilatoxoxade.

⁶³ Pat wuti Pilatoxot, jum-aechi:

—Tajpaklon, Jesús kichachajbapijin. Xanal nejchaxoelx japon jum-aechpoxliajwa, laeja wutfakon. Jawut Jesús jum-aech: 'Tıp wut, Dios namat-esaxael pejme dukaliajwan, tres matkoi wut' —aech Jesús.

⁶⁴ Samata, soldaw to'im wesfulaliajwa tres matkoi japon ochxot! Jachi-emil wut, japon pejnachala bej jusaxaesbejpon. Do jawux, japi jiw naewñajnafulaxael wut, jumchisfulaxaeli: 'Japon mat-ech pejme dukaliajwa' —chisfulaxaeli. Ja-aech wut, xanalliajwa kaes pejme xabich chaemilaxael. Me-ama majt, jachiyaxil —aech sacerdotespaklochow, fariseosbej, Pilatoliajwa.

⁶⁵ Do jawut, Pilato jum-aech sacerdotespaklochowliajwa, fariseosliajwabej:

—¡Ama soldaw! ¡Buflaem chiekal wesfulaliajwapi patupanwñaj! —aech Pilato.

⁶⁶ Do jawut, paklochow bu'follisi soldaw patupanwñajpoxade. Jaxot pat wuti, xape'ti selló ia't, pinjixot. (Jasox ispi matabijaliajwa, asan aton japa-ia't matriaman wut taeliajwa.) Do jawut, soldaw jaxot waelas chamathawesfulaliajwapi patupanwñaj.

28

Patupan Jesús mat-echpox pejme dukaliajwa

(Mr 16.1–8; Lc 24.1–12; Jn 20.1–10)

¹ Napatamatkoi toep wut, dominkomatkoi wut, juimt julán wutbej, María, Magdala paklowaxpijow, asaow Mariábej, kaxa fulaechlisi patupanwñaj taeliajwa.

² Japi watho' fol wut, chalechkal sat xabich najat. Jawut Dios pej-ángel fulóek. Pask wut patupanwñajxotsik, japa-ia't, pinjit, matriamanlison kaelel. Do jawut, Dios pej-ángel ek japa-ia'tmatwñajtat.

³ Dios pej-ángel pona xabich nakthian. Me-ama chamax kaliaf wut, jakaliaf-aechon. Sumta-otox xabich papoeikolax.

⁴ Soldaw, wesfulpi patupanwñaj, taen wuti Dios pej-ángel, japi soldaw xabich tathulal pejléw. Do jawut, satat oeljabapi. Me-ama tıp wut, ja-aechi.

⁵ Do jawut, ángel jum-aech japi watho'liajwa:

—¡Nabej nejléwle! Xan matabijtax xamal wulwekam taeliajwam patupan Jesús, kematamatlaspon cruztat tupaliajwa.

⁶ Amxot ajillison. Japon mat-echlison pejme dukaliajwa, me-ama chajia jum-aechon. ¡Xabua'din xamal najut taeliajwam ochxoton!

⁷ Tae-emil wut patupan, ¡xamal xabua'de japon pejnachala poxade japi chapaeliajwam! ¡Jum-amo Jesús pejnachala: 'Cruztat tıpon mat-echlison. Amwutjel pejme duklison. Xamal wñajna japon wñajnaxaech Galilea tñajñuxotde. Jaxotde Jesús taeyaxaelam' —amo pejnachala! Japox xan jumchiliajwan Dios nabuxto'a xamalliajwa —aech ángel japi watho'liajwa.

⁸ Do jawut, japi watho' bichakal fulaech Jesús pejnachala poxade, Jesúsliajwa ja-aechpox chapaeliajwapi. Japi watho' xabich beljow. Pe jawutbej, xabich nejchachaemili.

⁹⁻¹⁰ Naaamtat fol wutfuki, Jesús chalechkal natulaelt japi watho' pejwuajnalel. Jesús moi-aech japi watho'liajwa. Do jawut, japi watho' mox soepa Jesúsxot. Brixtat nuili Jesús pejwuajnalel, xabich sitaen xoti. Jesús thijaeltas wut, jum-aechon japi watho'liajwa:

—¡Xabua'de tajnachala poxade chapaeliajwam xan nataenampox! ¡Tajnachala jum-amde Galilea tuajnua poxade fulaeliajwapi! Jaxotde xan nataeyaxaeli —aech Jesús, japi watho' buxto'a wuton.

Soldaw wesfulpi patupanwua, japi chapaeipox judiospaklochowxot

¹¹ Watho' fulaech wutfuk, do jawutbej, soldaw weti patupanwua, asew japixot soldaw, fulaechbej Jerusalén paklowax poxade. Jaxotde pa'a wut, japi soldaw chapaeilisi sacerdotespaklochowxot puexa japi taenpoxan, jumtaenpoxanbej, Jesúsliajwa.

¹² Do jawut, paklochow fulaech judios-ancianos poxade nospaeliajwa, japi swapich, kaenejchaxoelaxliajwa japoxliajwa. Do jawux, japi paklochow moti xabich plata soldaw kichachajbaliaw jiw.

¹³ Paklochow jum-aech soldawliajwa:

—Jum-amo jiw: 'Madoi, xanal moejax wut, Jesús pejnachala fulaen patupan natkowaliajwa. Japox ja-aech xanalliajwa' —amo puexa jiwliajwa!

¹⁴ Pilato japox wultaen wut, xanal nospaeyaxaelen, Pilato swapich. Ja-aech wut, xamal bu'wuaajan jilaxaelam —aech paklochow soldawliajwa.

¹⁵ Do jawut, soldaw ow-aechlisi japoxliajwa. Samata, kenoti plata. Jawut japi soldaw charaeful, me-ama paklochow buxto'as. Samata, judios xabich charaeful japawuaajan potuaajnucha. Amwutjelbej japawuaajan nakiowa charaefuluki.

Jesús to'apox pejnachala, japi naewuajnaliajwa jiw

(Mr 16.14-18; Lc 24.36-49; Jn 20.19-23)

¹⁶ Do jawux, xanal onsan pejnachalwan fulaechx Galilea tuajnua poxade. Jaxotde pa'ax wut, fulaechx pinamux poxade, Jesús nato'amux poxade.

¹⁷ Jaxotde xanal Jesús taenx. Do jawut, brixtat nuilx japon pejwuajnalel, xabich sitaenx xot. Xanalxot asew jiw chiekal naexasis-eli, Jesús tup wut mat-echpox pejme dukaliajwa.

¹⁸ Do jawutbej, Jesús mox soepan xanalxot. Jum-aechon:

—Taj-ax Dios natapaei puexa jiw tato'laliajwan, ampathatpijwi, athuxotsepibej.

¹⁹ Samata, xamal potuaajnucha jiw naewuajnafalde! Naexasit wuti taj-ax Dios, xan tajwuaajan naexasit wutbejpi, jawut japi jiw bautisaxaelam taj-ax Dios pijaxtat, xan Dios raxynan pijaxtatbej, Espíritu Santo pijaxtatbej.

²⁰ ¡Xamal naewuaajande asew jiw naexasisliajwa puexa xan tato'laxpoxan xamalliajwa! Xan diachwuajnaxolax xamalxotaxaelen pomatkoicha ampathatxot. Hasta ampathat toep wut, xan nakiowa xamalxotaxaelen —aech Jesús xanal pejnachalanliajwa.

Marcos lelpox Jesucristo pejuajan

Juan, jiw bautisan, pajilaxtat naewuajanpox

(Mt 3.1-12; Lc 3.1-9, 15-17; Jn 1.19-28)

¹ Chimiawuajan, Jesucristo pejuajan, tudut wut, ma-aech. Japon pajut Dios paxulan. Xan Marcos lelx ampafut jiw chiekal matabijaliajwa japawuajan.

² Profeta Isaías lel Dios jum-aechpox Jesucristoliajwa, jum-aech waton:

“Wua, xam wuajna xan to'axaelen tajprofeta, japon jiw naewuajnalijwa tajjamechan, xam naexasisliawapi, patam wut jaxot” —aech Dios, chajia jum-aech wut Jesucristoliajwa.

³ Isaías chajia lelpox jum-aech Juan, jiw bautisanliajwa:

“Aton pajilaxtat nejlat wut, jumchiyaxaelon jiwliajwa: ‘iThilde wajpakdokolan pasax wuajna! Samata, ikofim babijaxan isampoxan! Me-ama jiw wuajna nuamt chiekal chaemt wut paklon pasliajwa, ixamal ja-amde nejnejchaxoelaxan! iIsfulde Dios nejxasinkpoxan!’ —chiyaxaelon pajilaxtat, nejlat wut jiwliajwa” —aech Isaías chajia lelpox Juan, jiw bautisanliajwa.

⁴ Do baxael, Isaías chajia jum-aechpox, ja-aechlisox japon atonliajwa. Japon aton patlison. Japon pawul Juan. Do jawut, Juan jiw bautisaful pajilaxxot. Naewuajanbejpon. Jaxotde xabich jiw fulaen naewesliawwas Juan naewuajanpox.

⁵ Xabich Judea tuajnuapijw fulaen, Jerusalén paklowaxpijwbej. Jawut Juan jum-aechful japi jiwliajwa: “iKofim babijaxan isampoxan! iIsfulde Dios nejxasinkpoxan! Ja-am wut, Dios beltaeyaxael xamal babijaxan isampoxanliajwa. Do ja-aech wut, xamal bautisaxaelen” —aech Juan jiwliajwa. Samata, japamatkoian jiw jalpai babijaxan ispoxanliajwa, Dios beltaelias was babijaxan ispoxanliajwa. Do jawut, Juan japi jiw bautisa Jordánlajtat.

⁶ Juan pijax naxoelax isas camellolatat. Pejcinturónmuat pabukal. Pejnaxaeyaxan, me-ama sui'. Afpon miel.

⁷ Juan naewuajan wut, jum-aechon: “Mox pawuajna kaen aton fulaeliajwadin. Japon kaes pejme paklonaxael. Me-ama xan, jachiyaxilon. Xan omjinil japon pejkajachawaesnanliajwa.

⁸ Diachwuajnakolax xan jiw bautisax mintat, japi kofa wut babijaxan ispoxan. Pelax pasaxaelpon, japon kaes paklonaxael. Samata, to'axaelon Espiritu Santo jiw kajachawaesfulaliajwas” —aech Juan Cristoliajwa.

Jesús bautisaspo

(Mt 3.13-17; Lc 3.21-22)

⁹ Japamatkoian Jesús nakolt Nazaret paklowaxxot, Galilea tuajnuaxot. Fulaekon Juan poxadik. Jawut Juan bautisa Jesús Jordánlajtat.

¹⁰ Jesús jul wut mintat, jawut taenon athu fafachpox. Jawut Espiritu Santo fuloek a-utat japon pejmatwuajasi. Me-ama a-ut, kabuan-aech Espiritu Santo.

¹¹ Do jawut, Jesús jumtaenbej athusik jum-aechsikpox, Dios jum-aechsik wut ampo: “Xam taxulnam, xabich nejchachaemlax xamliajwa” —aech wut pax Dios Jesúsliajwa.

Jesús xapaejaspo Satanás

(Mt 4.1-11; Lc 4.1-13)

¹² Do jawux, Jesús bu'fos Espiritu Santo pajilax poxade.

¹³ Pajilaxxot wut, namanlison cuarenta matkoian. Jaxot pejmachoeffkal maenk. Do jawut, deppaklon pat. Japon pawul Satanás. Japon xapaeya Jesús babijax isliajwa. Do jawux, Satanás chijia Jesúsxot. Do jawutbej, Dios pej-ángeles fuloek japi kajachawaesliajwa Jesús.

Jesús tudutpox naewuajna Galilea tuajnuaxot

(Mt 4.12-17; Lc 4.14-15)

¹⁴ Asamatkoi Herodes, Galilea tuajnuapijw tato'lan, to'apon pejsoldaw Juan jaelsliawwas, jiw jebatat jeliawwasbejpon. Do jawux, Jesús fulaech Galilea tuajnu poxade. Jaxotde pa'a wut, jiw naewuajanlison chimiawuajan, Dios tato'laxaelpox pejiw.

¹⁵ Jesús jum-aech ampo jiwliajwa: “Patlisox japamatkoian, wuajnawesfulasmatkoian Dios tato'lialijwa pejiw. Samata, ikofim babijaxan isampoxan! iDios naexasisfulde japon xanaboejalijwam! Patlisox chimiawuajan xamal naexasisfulaliajwam” —aech Jesús japi jiwliajwa.

Jesús tadıtıpx cuatro nabaxisiw japon pejnachalaliajwas
(Mt 4.18-22; Lc 5.1-11)

¹⁶ Jesús Galilea pukababı'tat laeja wıt, kolenje nabaxisiw taenpon. Kaen pawıl Simón. Asan pawıl Andrés. Japon Simón pakoewan. Japi taraya xawaejaba pukatat.

¹⁷ Jesús jum-aech:

—ıXan nakfılaem! Xamal chiekal matabijam nabaxisaxan. Jasoxtatbej xamal chanaekabıanaxaelen jiw chiekal naewıajnalıajwam japi tajnachalaliajwa, Dios pejjı-walıajwabejpi —aech Jesús.

¹⁸ Do jawıt, pejew taraya waelapi asew jıwtat, nakfılaelıajwapi Jesús.

¹⁹ Jesús kaes fılaech wıt, asew kolenje, nabaxisiw, taenpon. Kaen pawıl Santiago. Asan pawıl Juan. Japon Santiago pakoewan. Falkamtat pejew taraya chaemti. Japi pax pawıl Zebedeo.

²⁰ Do jawıt, Jesús japi la nakfılaelıajwas. Do jawıt, nakfollısi Jesús. Pax Zebedeo waelti falkamtat, kajachawaeti sıapıch.

Aton dep webaesıpx pejmatrıatxot
(Lc 4.31-37)

²¹ Do jawıt, Jesús, pejnachala sıapıch, pat Capernaum paklowaxxot. Napatamatkoi wıt, lechi judıos naewıajnaba pıxade. Do jaxot Jesús tıadıt jıw naewıajnalıajwa.

²² Chiekal naewıajanpon Dios pejjamechan. Me-ama judıos chanaekabıanapi naewıajan wıt, jachi-elon. Samata, japi jıw xabıch nejchaxoelachalak, Jesús naewıajan xot Dios pıjaxtat.

²³ Judıos naewıajnabaxot, aton nuk. Japon dep webaes pejmatrıatxot.

Do jawıt, aton pejkaechatat dep nejlat wıt, jum-aech:

²⁴ —Jesús, Nazaret paklowaxpıjnam, ıxam achaxasıamkat xanalxot? ıXamkat fılaeman puexa xanal natoeslıajwam? Xam matabıjtax. Xam Dios paxılnam, xabıch pachaemamponam —aech dep, nejlat wıt aton pejkaechatat.

²⁵ Do jawıt, Jesús jum-aech nejthı'axtat deplıajwa:

—ıBoejlachdel! ıXam nakolde japon aton pejmatrıatxot! —aech Jesús deplıajwa.

²⁶ Do jawıt, japon aton xabıch tathılal dep pıjaxtat. Dep nejlakcha wıt, japon aton pejmatrıatxot nakoltlıson.

²⁷ Jawıt puexa jıw xabıch belwana, taen wıtı japox, Jesús dep to'apox. Nakaewa nawıajnachaemsnapi:

—ıMa-aech xotkat dep nakolt, to'a wıtın? ıAchaxkat amıpx, pajelnaewıajnax? Amıpon aton, me-ama Dios to'asıpon wıt, ja-aechon. Ja-aech wıt, dep nakolt —na-aechna jıw nakaewa.

²⁸ Do jawıt, Galilea tuajrıpıjıw potıajrıacha kamtalejen wıltıaenapi Jesúsıajwa.

Jesús boejthıpx Simón Pedro paem
(Mt 8.14-15; Lc 4.38-39)

²⁹ Jesús nakolt wıt judıos naewıajnabaxot, Jesús fılaech asaba pıxade Santiago, Juan sıapıch. Japaba Simón pejba, Andrés sıapıch. Japabaxot pat wıtı, lowpı.

³⁰ Jaxot Simón paem bı'xaenk Jesús pejpasax wıajna. Okow camatat. Xabıch bı'tuajrınikow. Jawıt asew japıxot chapıepı Jesús, Simón paem bı'xaenkıpx.

³¹ Samata, Jesús mox soepan japowxot. Kefıt wıt, japow mat-eton. Jawıt kamta japow chiekal boejthıls. Bı'tuajıax wejısalbejıpow. Do jawıt, japow pajut naxıaeyaxan athuk Jesúsıajwa, japon pejnachalaliajwabej.

Jesús boejthıpx xabıch jıw bı'xaeya
(Mt 8.16-17; Lc 4.40-41)

³²⁻³³ Tuıla wıt, itkuatrınik wıtbej, Capernaum paklowaxpıjıw bafıfaxot patı, Jesús dukbatatxot. Asew japıxot bı'pat xabıch bı'xaeya, dep webaesrıbej pejmatrıatıatıat.

³⁴ Do jawıt, Jesús xabıch bı'xaeya boejthıt, nejmıachwıaxıat bı'xaenkrı. Xabıch dep nakolax to'abejıpon, jıw pejmatrıatıanxot bıapı. Ja-aech wıt, Jesús tapıe-el dep nakrıyalıajwa, japi chiekal matabıja xot japon Cristo, Dios to'asıpon.

Jesús naewıajanıpx judıos naewıajnabıachıanxot
(Lc 4.42-44)

³⁵ Do kandıawasap wıt, nalıanawıajna wıt, Jesús nathıkt wıt, nakoltlıson japıabaxot. Fılaechon pajııax pıxade, tamıach pejlel Dios kawıajnalıajwa.

³⁶ Do jawıt, baxıael, Simón, pejnachala sıapıch, jalwekı Jesús.

³⁷ Faen wıt, jum-aechı Jesúsıajwa:

—Puexa jıw xam xabıch wııwek —aechı.

³⁸ Jesús jumınot wıt, jum-aechon:

—Chajias asapaklowaxan mox poxade. Japapaklowaxanpijiw naewuajnaaxaelen Dios pejjamechan. Samata, xan fuloekx —aech Jesús.

³⁹ Do jawut, Jesús nanuamt puexa Galilea tuajnuot. Kaenanuła judíos pejnaewuajnachantat, Jesús naewuajnaful judíos. Jiw dep webaespiwej, dep nakolax to'apon japi jiw pejmatpuatanxot.

Jesús boejthutpox bu'xaenkpon leprawaxaetat
(Mt 8.1-4; Lc 5.12-16)

⁴⁰ Kaen, bu'xaenkpon leprawaxaetat, fulaenon Jesúsleldin. Pat wuton, Jesús pejwuajnalel brixtat nukon, xabich sitaen xoton. Do jawut, jum-aechon Jesús jumtaeliajwa:

—Xan matabijtax xam naboejthusaaxaelampox. Xan naboejthusasiam wut, jnaboejthu'e! —aech leprawaxaetat bu'xaenkpon.

⁴¹ Jesús xabich beltaen xot, bu'xaeyan pejke-etat bu'jachapon. Do jawut, Jesús jum-aech: —Xam boejthusaaxaelen. Samata, malis chiekal pachaemam —aech Jesús.

⁴² Do jawut, kamta chiekal boejthulson leprawaxae. Pejbu't chiekal wepachaemslison.

⁴³⁻⁴⁴ Jesús to'a wut, jum-aechon nejthu'axtat:

—jAsew jiw nabej chapae' xam boejthutxpox! jXabua'delax sacerdote poxade, japon xam bu'taeliajwa boejthulpox leprawaxae! Do jawux, jchaxdu'e, me-ama Moisés chajia lelpox jum-aech Dios chaxdusliajwam ofrenda, leprawaxae xam chiekal boejthul xot! Jasoxtat xam jiw matabijaxael chiekal boejthulpox japawaxae —aech Jesús.

⁴⁵ Do jawut, leprawaxae boejthulspón fulaechlison. Pe owchi-elon Jesús jum-aechpox. Japon aton chapae'flax tuaduton puexa jiw jumtaeliajwa Jesús pejwuajan. Samata, Jesús tulaela pasaxil japapaklowaxanxot. Do jawut, Jesús atuaj nejjiat japapaklowaxan. Ja-aech wut, popaklowaxanpijiw fulaech Jesús poxade, taeliajwapi japon.

2

Jesús boejthutpox nabejkan, japon chinax laejaxilpon
(Mt 9.1-8; Lc 5.17-26)

¹ Asamatkoiyanwux, Jesús nawiat Capernaum paklowaxotdin. Jawut japapaklowaxpijiw nakaewa najum-aech Jesúsliajwa: “Jesús kaweta naman batat” —aechi.

² Samata, xabich jiw wuluk japabatat. Ba xajupa-el, xabich jiw wuluk xotbej japabafafat. Asew japixot atuxach bafafaxot nulje. Do jawut, Jesús naewuajan Dios pejjamechan puexa japi jiwliajwa.

³ Do jawut, kaen aton, laejaxilon, chaxfoson cuatro poejjiw, Jesús jiw naewuajan poxadin. Japi fulaen Jesús taeliajwa.

⁴⁻⁵ Cuatro poejjiw mox pasaxil Jesúsxot, xabich jiw wuajna ba wuluk xot. Samata, ba matwuajase chaxjulachi, me-ama choeranae poxase. Jaxotse bamatwuaj tukapi pinjiyax laejaxilon chakakofnaliajwadik Jesús poxadik. Chakakofan wut, nejchaxoeli: “Diachwuajnakolax Jesús boejthusaaxaes ampon aton chiekal laejaliajwa” —aech cuatro poejjiw, nejchaxoel wut. Jesús chajia matabijt japi nejchaxoelox. Samata, jum-aechon laejaxilon jumtaeliajwas:

—Wua, xam beltaenx babijaxan chajia isampoxanliajwa, —aech Jesús.

⁶ Kaesnapich judíos chanaekabuanapi jaxot chalak. Jumtaen wuti Jesús jum-aechpox, japi nejchaxoel:

⁷ “jMa-aech xotkat Jesús Dios sitae-el? Japon naksiya xatis jumchiyaxisalpox. Nejmachjiw japox jumchiyaxil. Jasox naksiya wuti, is babijax Diosliajwa. Kaen Dios xajup beltaeliajwa jiw babijaxan ispoخانliajwa” —aech judíos chanaekabuanapi, nejchaxoel wut.

⁸ Do jawut, Jesús chiekal matabijt japi nejchaxoelox. Samata, jum-aechon japiliajwa:

—jMa-aech xotkat xamal jasox nejchaxoelam xanliajwa?

⁹ Kaes pejme tampa xan jumchiliajwan laejaxilponliajwa: ‘Xam beltaenx babijaxan isampoxanliajwa’ —chiliajwan. Pe ja-an wut, jiw xan namatabijaxil xan puexa jiw pakoewkolnanponan. Jum-an wutlax nabejkan jumtaeliajwa: ‘jNande! jLaejim!’ —an wut, japox jum-an wut, jiw diachwuajnakolax xan namatabijaxael xan puexa jiw pakoewkolnanponan.

¹⁰ Xan ispoخانant xamal matabijaxaelam, diachwuajnakolax, xan puexa jiw pakoewkolnanponan, xajupx athuxotse, ampathatbej, jiw beltaeliajwan babijaxan ispoخانliajwa —aech Jesús judíos chanaekabuanapiliajwa.

Do jawut, Jesús jum-aech laejaxilpon jumtaeliajwa:

¹¹ —Xam jum-an: ‘jNande! jSumta-okampox fi'e! jXalaemchbej nejba poxade!’ —an xan —aech Jesús.

¹² Do jawut, laejaxilon nant wut, sumta-okpox fit wutbej, chajjalison. Jawut xabich jiw taenspon, fulaech wut tathoetade. Samata, puexa jiw natachaemason. Nakaewa najum-aechnapí:

—Dios, japon kaen, xabich mamnik. Majt chinax jasox tae-esal, me-ama amprox. Amwutjel jasox taens —na-aechi nakaewa.

*Jesús tadutpox Mateo pejnachalanliajwa
(Mt 9.9-13; Lc 5.27-32)*

¹³ Do jawux, Jesús fulaech wut pejme pukababu' poxade, jawut xabich jiw pat Jesúsxot. Do jaxot jiw naewhajanlison.

¹⁴ Do jawux, Jesús naewhajanpox buxtoet wut, fulaech wuton, taenon Levi. Japon asawul Mateo. Levi pax pawul Alfeo. Levi impuesto mat-omwuljoen Roma gobiernoliajwa. Levi ek impuesto mat-omwuljoebatat. Jaxot Jesús jum-aech:

—¿Xan nakfulaem tajnachalnamliajwa! —aech Jesús.

Do jawut, Levi nant wut, nakfollison Jesús.

¹⁵ Xabich jiw, impuesto mat-omwuljoew, asewbej naexasis-eli Moisés chajia lelpox, japi jiw nakfoli Jesús. Asamatkoi Jesús, pejnachala swapich, xael wuti Levi pejbatat, xabich impuesto mat-omwuljoew, asewbej naexasis-eli Moisés chajia lelpox, japijbej jaxot naxael.

¹⁶ Judíos chanaekabuanapixot, japi fariseos. Japi taen, Jesús xael wut, impuesto mat-omwuljoew swapich, asew jiw swapichbej, japi naexasis-eli Moisés chajia lelpox. Do jawut, japi fariseos wuajnaem wut, jum-aechi Jesús pejnachalaliajwa:

—¿Ma-aech xotkat Jesús xael impuesto mat-omwuljoew swapich, asew jiw babejchow swapichbej? —aechi.

¹⁷ Jesús japox jumtaen wut, jum-aechon fariseosliajwa:

—Jiw woen woe-el nejchaempi, bu'xaenka-el xoti. Fulaenpon woeliajwa bu'xaeya. Ja-anlap-is xan. Xan fulae-enil tadusliajwan pachaempi. Xanlax fulaenx tadusliajwan jiw babejchow, japi kofaliajwabej padujnejchaxoelaxan, naexasisliajwabejpi Dios —aech Jesús fariseosliajwa.

*Asew jiw xae-elpox, piach Dios kawuajnalialjwa wut
(Mt 9.14-17; Lc 5.33-39)*

¹⁸ Asamatkoi Juan, jiw bautisan, pejnachala naxae-el, piach Dios kawuajnalialjwa wuti. Fariseos pejnachalabej naxae-el, piach Dios kawuajnalialjwa wuti. Do jawut, asew jiw japixot pat Jesúsxot. Pat wut, jum-aechi Jesús jumtaeliajwa:

—Juan pejnachala, fariseos pejnachalabej, naxae-el, piach Dios kawuajnalialjwa wut. ¿Ma-aech xotkat nejnachala naxaelkatlax, piach Dios kawuajnalialjwa wut? —aechi Jesús jumtaeliajwa.

¹⁹ Jesús wuajantat jumnot wut, jum-aechon:

—Aton pawis fit wut, fiesta is wutbejpi, puexa jiw chiekal naxaeyaxael japonxot. Japi xabich nejchachaemlaxael, pajelnakjiyan dukaxael xotfuk jaxot.

²⁰ Asamatkoi japon asew jiw fe'naxaes wut, do jawut, taduchpi naxaeyaxil kaematkoiyan swapich, xabich nejxaejwaxaes xoti. Asamatkoi japox jachiyaxaesbej tajnachalaliajwa. Samata, tajnachala naxaeyaxil kaematkoiyan swapich, nejxaejwaxaes xoti, xan japixot ajilaxaelen xot, asew jiw xan nabu'fol wut —aech Jesús wuajantat wuajnaemtaspijiajwa.

²¹ Jesús pejme jum-aech wuajantat jiw nakiowa naexasisfulpiliajwa pejwuajnapijiw pejkabuananpox:

—Pawis pejyiaf wexaxarwas wut, xape'tow nakaepadujbu'ch. Xape's-elow pajelbu'ch. Pajelbu'ch xape't wut, itkiat wutbej, mamu'al wut, kaes itkialaxael. Itkial wut, padujyiaf kaes pinjiyax thialfalaxael xape'txotow.

²² Jiw wulu-elbej pajelvino, padujchoxantat, isasprox choefbu'tat choxaliajwa. Jiw wulu wut pajelvino, choxa chathialfalaxael, pajelvino xabich xot pafak. Ja-aech wut, nafu'axael vino, choxabej. Samata, jiw wulu pajelvino pajelchoxantat —aech Jesús, naewhajan wut jiw wuajantat.

*Judíos pejnapatamatkoitat Jesús pejnachala jolbalapox trigo
(Mt 12.1-8; Lc 6.1-5)*

²³ Asamatkoi, napatamatkoi wut, Jesús, pejnachala swapich, fol trigolulanxot. Pejnachala fol wut, trigo jolbalapi xaelpaliajwa, litaxaela xoti.

²⁴ Kaeswapichbej fariseos jaxot nakfol. Do jawut, japi jum-aech Jesúsliajwa:

—¿Ma-aech xotkat nejnachala japox is, xatis judíos naktapae-elpoxtat, napatamatkoitat wut? —aech fariseos Jesúsliajwa.

²⁵ Jesús jumnot wut, jum-aechon:

—Xamal matabijam, wajwuaɲnapijin, waj-am rey David, ispoɲ chajiakolaxtat, xabich litaxaela wuɲon, pejsoldaw suapich.

²⁶ Jawut David lech Dios pejba, xananuamsba. Japabatat wuaɲna pan oel mesamatwuaɲtat. Japapan Dios pej-ofrenda. Do jawut, rey David japapan xael. Do jawutbej, chaxduwpon pejsoldaw, japi xaeliajwa japapan. Japamatkoitat Dios pejbatat sacerdotespaklokolan, japon pawuɲpon Abiatar, Dios pejtubernaculobatapon. Moisés chajia lelpox jum-aech: “Japapan koew sacerdotes xaeliajwa, nabisti Dios pejbatat. Asew jiw xaeyaxil japapan” —aech Moisés chajia lelpox —aech Jesús.

²⁷ Jesús pejme jum-aech:

—Jiw wewe'pas napatamatkoi. Samata, Dios is napatamatkoi jiw damlathulaliajwa. Dios is wut jiw, is-el asbuan jumch jiw sitaeliajwa napatamatkoi.

²⁸ Samata, xan puexa jiw pakoewkolnan, xajupx jumchiliajwan jiw isaxaelpox napatamatkoitat —aech Jesús.

3

Jesús boejthutpox kemamlan

(Mt 12.9-14; Lc 6.6-11)

¹ Asamatkoi Jesús lech judíos naewuajna paxade. Japabatat wuaɲna ek kemamlan.

² Fariseosbej jaxot, japi natachaema taeliajwapi Jesús, kemamlan boejthut wut napatamatkoitat. Japi tasalaliajwapi Jesús, japon is wut asax.

³ Do jawut, Jesús jum-aech kemamlanliajwa:

—iNande! jiw pejwuaɲnalel nukde! —aechon.

⁴ Jawut, Jesús jiw wuaɲnachaemt wut, jum-aechon:

—iAchaxkat jum-aech Moisés chajia lelpox? iAchaxkat Dios naktapaei isliajwas napatamatkoitat? iNaktapaeikat isliajwas pachaempox? O, iisaxaeskat babijax? iNaktapaeikat boejthusliajwas bu'xaeyan? O, iboesaxaeskat japon aton? —aech Jesús.

Do jawut, puexa jiw boejlach nuil. Jumnos-elipon.

⁵ Jesús jiw masajachpi. Ulanatachaemton, japi jiw matnaetink xoti matabijaliajwa. Nejaxejwasbejpon, japi chiekal matabija-el xot. Do jawut, Jesús jum-aech kemamlanliajwa:

—iKeba'de! —aechon.

Keba't wut, pejke-e chiekal wepachaemslison.

⁶ Do jawut, fariseos jaxot taen wut, jaxot nakolapi. Baxael, natamejapi kaeyaxtat nospaeliajwapi, Herodes pejnachala suapich, boesaliajwapi Jesús.

Xabich jiw papasfulpox pukababu'tat, Jesús naewuajanpox jumtaeliajwa

⁷⁻⁸ Jesús fulaech, pejnachala suapich, Galilea puka paxade. Xabich jiw, Galilea tuaɲnupijiw, wuchakal fulaen. Wuchakal fulaenbej Judea tuaɲnupijiw, Jerusalén paklowaxpijiwbej, Idumea tuaɲnupijiwbej, Jordánlajt wesklelpijiwbej, Tiro paklowaxpijiwbej, Sidón paklowaxpijiwbej. Puexa japi fulaen, wultaen wati Jesús ispoɲanliajwa jiwliajwa Dios pijaxtat.

⁹⁻¹⁰ Jaxot Jesús pukababu'tat jiw naewuajan. Puexa jiw, bu'xaenki, Jesúslel fijabas, xabich asew jaxixot boejthut xoton. Japi bu'xaeya xabich jachasiapi Jesús. Jesús xabich jiw taen wut, pejnachala to'apon falkam waljaesliajwa, japon puka pamaklel chadukaliajwa falkamat, xabich jiw tabe'nasamatas.

¹¹ Jiw dep webaespi pejmatpuatanxot, japi Jesús taen wut, brixtat nuili japon pejwuaɲnalel. Dep nejla'bala wut, jum-aechbalapi jiw pejkaechantat:

—Xam diachwuaɲnakolax Dios paxuɲnam —aechbala dep jiw pejkaechantat.

¹² Jawut Jesús nejthu'axtat jum-aechon depliajwa:

—iNabej jum-aech' xan Cristowanponan! —aech Jesús depliajwa.

Jesús makanotpox doce apóstoles

(Mt 10.1-4; Lc 6.12-16)

¹³⁻¹⁴ Do jawux, Jesús pinamuax julach. Jaxot Jesús pejnachala la julaliajwase, makanochpikal. Natameja wut japonxot, Jesús wulduw asew jaxixot apóstoles. Japi puexa, docepi, japi chalaliajwa Jesús. Jesús japi tato'al jiw naewuajnalijwa.

¹⁵ Jesús chaxdutbej Dios pejppamamax apóstolesliajwa, dep nakolax to'aliajwapi, jiw pejmatpuatanxot webaespi.

¹⁶ Doce poejiw makanochpi, japi kaenanula pejwulan. Kaen pawul Simón. Jesús japon wulduw Pedrowultat.

¹⁷ Asan pawul Santiago. Asan pawul Juan. Japon Santiago pakoewan. Japi kolenje Zebedeo paxi. Jesús asawultat wulduw japi kolenje pejnachalan, Boanergeswultat. (Japawul jumchiliajwa: “Chamax Paxi” —chiliajwa.)

¹⁸ Asan pawul Andrés. Asan pawul Felipe. Asan pawul Bartolomé. Asan pawul Mateo. Asan pawul Tomás. Asan pawul Santiago. Japon Alfeo paxulan. Asan pawul Tadeo. Asan pawul Simón. Japon majt asamutprijin, celotemutprijin.

¹⁹ Asan pawul Judas Iscariote. Japonlap asamatkoi Jesús wiasaxael padaelmajiwxot.

Fariseos jum-aechpox Jesús pejpamamaxliajwa, Satanás pejpamamaxliajwabej (Mt 12.22-32; Lc 11.14-23; 12.10)

²⁰ Do jawux, Jesús ba lech wut, jawutbej, xabich jiw papasful japabaxot. Samata, Jesús, pejnachala swapich, xaeyaxil.

²¹ Jesús pakoew, pen swapich, waltaen wuti Jesús ispoxanliajwa, fulaeni Jesús poxadin, asalel buflaeliajwapi Jesús. Japi nejchaxoel wut, jum-aechi Jesúsliajwa: “Jesús na-acha” — aechi, nejchaxoel wut.

²² Do jawut, judíos chanaekabuanapi fulaen Jerusalén paklowaxxotdin. Japibej jum-aech: “Jesús to'a wut dep nakolaliajwa jiw pejmatpuatanxot, to'apon Beelzebú pejpamamaxtat” — aechi Jesúsliajwa. Satanás asawul Beelzebú.

²³ Jesús la judíos chanaekabuanapi jumchiliajwapon japi. Do japi pat wut, jum-aechon: “Satanás, dep pejpaklon, wepachaemaxisal dep to'aliajwapon, dep nakolaliajwa jiw pejmatpuatanxot.

²⁴ Kaetwajnipijiw nadijakaxael wut nakaewa nabeliajwa, japi natoesaxael nabeyaxtat.

²⁵ Kaebapijiw nadijakaxael wut nakaewa nabeliajwa, japibej natoesaxael nabeyaxtat.

²⁶ Jachiyaxaellap-is Satanás, pejiw swapich, nadijakaxael wut nakaewa nabeliajwa. Japi natoesaxael nabeyaxtat. Ja-aech wut, Satanás toepaxael” — aech Jesús judíos chanaekabuanapiliajwa.

²⁷ Jesús pejme jum-aech: “Kaen natkowasia wut asabatat, japon leyaxil, bapijin wuajna wut batat, japon mamnik wutbej. Majt bapijin muatat kuiyaxaeson. Do ja-aech wut, bapijin pejew nosaxael kethakan.

²⁸ “Diachwuajnakolax xan jum-an. Dios xajup beltaeliajwa, jiw jum-aech wut babej-jamechan Diosliajwa. Jiw babijaxan ispi, japi Dios beltaeyaxaesbej.

²⁹ Pelax jiw jum-aech wut babejjamechan Espíritu Santoliajwa, ja-aech wut, Dios beltaeyaxil japi jiw. Japi pomatkoicha kaelel pejbu wuajnaxael Diosliajwa” — aech Jesús.

³⁰ Jesús japox jum-aech judíos chanaekabuanapi, jum-aech xot: “Jesús webaes dep pejmatpuatxot” — aech xoti.

Jesús pen, japon pakoewbej, japi nospaesiapox, Jesús swapich (Mt 12.46-50; Lc 8.19-21)

³¹ Do jawux, Jesús pen, japon pakoewbej, pati Jesús jiw naewuajanxot. Jaxot pat wut, nuili tathoetlel. Do jawut, kaen aton to'api, jumchiliajwapon Jesús, Jesús nakolsliajwa tathoetade.

³² Xabich jiw Jesús masajiach. Do jawut, asew japixot jum-aech:

—Jiw chanaekabuanan, nej-en, nakoew swapich, ba tathoetlel nuil. Xam wulweki — aechi Jesúsliajwa.

³³ Do jawut, Jesús jum-aech:

—¿Achewkat, me-ama taj-en, takowebje? — aech Jesús.

³⁴ Do jawut, Jesús natachaemt wut, jum-aechon masajiachpiliajwa:

—Xamal tajjiwam, xamallap, me-ama taj-enjiwam, takowewjiwambej!

³⁵ Xamal isfulam wut Dios nejxasinkpoxan, ja-am wut, me-ama takowam, me-ama taj-enambej — aech Jesús.

4

Trigo pejwuajan, xasaljabapon (Mt 13.1-23; Lc 8.4-15)

¹ Asamatkoi Jesús tuadut jiw naewuajnalijwa pukababu'tat. Do jawut, xabich jiw papasful japonxot. Samata, falkam julon ekaliajwa japafalkamtat. Jasoxtat chadukon jiw naewuajnalijwa. Japi jiw putat nuil.

² Jesús xabich wuajnantat naewuajan jiw chiekal naewuajnalijwapon.

Do jawut, naewuajan wut, jum-aechon:

³ “¡Chiekal naewe'e ampawuajan! Kaen aton fulaech pejlul poxade, trigo xasaljabaliajwa.

⁴ Xasaljaba wut, asew trigo natacholan nuamtat. Do jawux, mia pat japatrigo xaeliajwas. Do jawutbej, japi trigo mia xaeslisi, nuamtat natacholanpi.

⁵ Asew trigo natacholan ia'xot, jaxot as xanaja'al. Japi trigo kamta naboela, sat kaeswapich xot.

⁶ Xabich masxaenk wut, japi trigo selnas, xabich tathinkasnika-el xotdik. Do jawut, tuplisi.

⁷ Asew trigo natacholan na-e'lu tasiaptasxot. Japi trigo naboela wut, do jawut, na-e'lu bej naboela. Na-e'lu tapae-el trigo ti'sax, na-e'lu kaes athu xot. Samata, japi trigo naboesaxil.

⁸ Asew trigo natacholan sat pachaemxot. Puexa japi trigo chiekal naboela. Ti't wut, trigoton chiekal naboet. Asew trigoton naboet treinta trigofu. Asew trigoton naboet sesenta trigofu. Asew trigoton naboet cien trigofu" —aech Jesús.

⁹ Jesús pejme jum-aech: "Xamal Dios pejnechaxoelax matabijasiam wut, ¡chiekal naewe'e xan jum-anpoxan!" —aech Jesús.

Ma-aech xot Jesús xabich wuajantat naewuajan
(Mt 13.10-17; Lc 8.9-10)

¹⁰ Do jawux, Jesús tamach wut, doce apóstoles suapich, kaes asewbej, japon pejnachalapi, jawut japi puexa wuajnachaemt wut, jum-aechi Jesúsliajwa:

—¿Achax jumchiyaxaelkat japawuajan? —aechi, wuajnachaemt wut Jesús.

¹¹ Jesús jumnot wut, jum-aechon:

—Dios xamal tapaei matabijaliajwam Dios pejjiw tato'alpox, xan japox naewuajna x wut. Pe asew jiw, xanaboeya-elpi Dios, jumtaeyaxael wuajankal asbuan jumch.

¹² Samata, japi jiw xabich natachaema. Pe japi taeyaxil. Japi bej xabich naewet jum matabijaliajwa, pe jum matabijaxili, japi Dios xanaboejasamata, Dios japi babijaxan ispoxnliajwa beltaesamatabej —aech Jesús pejnachalalijwa.

Jesús chiekal chanaekabuana poxo trigo pejuajan, xasaljabapon
(Mt 13.18-23; Lc 8.11-15)

¹³ Do jawut, Jesús pejme jum-aech pejnachalalijwa: "¿Xamalkat matabija-emil trigo xasaljabapon pejuajan? ¿Machiyaxaelamkat matabijaliajwam, naewuajna x wut asawuajan?" —aech Jesús pejnachalalijwa.

¹⁴ Do jawut, trigo pejuajan, xasaljabapon, Jesús chiekal chanaekabuana pejnachala. Jum-aechon: "Trigo xasaljabapon, japon, me-ama Dios pejjamechan naewuajanpon.

¹⁵ Trigo natacholanpi nuamatat, japox, me-ama Dios pejjamechan jiw naewuajnaspo x. Jumtaenpi naewuajnaspo x, asew japixot, matabijaxil, matnaetink xoti. Me-ama sat tink, ja-aech xot japi pejmatnaetan. Do jawut, Satanás pasaxael Dios pejjamechan jukaliajwa japi jiw pejmatpuatanxot. Samata, japi jiw naexaxisaxil Dios pejjamechan.

¹⁶ Trigo natacholanpi ia'matwajtat, as xanaja'alxot, japi trigo kamta naboela. Japi trigo, me-ama jiw. Japi jiw jumtaen wut Dios pejjamechan, chiekal naexasiti. Do jawutbej, nejchachaemili.

¹⁷ Pe jawutbej, naexasit xoti Dios, asew jiw bu'wuajanpaeis wuti, o, chaemilpo x wepach wutbej, do jawut, japi jiw kofa Dios naexasitpo x. Kaes naexaxis-ellisi, pejnechaxoelaxan kaes mamnika-el xot, chiekal naexaxis-el xoti Dios. Japi jiw, me-ama trigo tathinkasnikaelpi, chiekal ti'sfula-el. Ja-aechlap-is japi jiw, kofa xoti Dios naexasitox.

¹⁸ Asew jiw, me-ama trigo, naboelapi na-e'lu tasiaptasxot. Japi jiw naexasit Dios pejjamechan, naewuajna x wut. Do jawux, kofapi, pejnechaxoelaxan asaxan matakas xot.

¹⁹ Japi jiw nejchaxoel ampathatpijaxankal. Nejchaxoelbejpi kemaenkaliajwa. Xabich platasipi. Japanejchaxoelaxantat Dios pejjamechan matakas. Samata, Dios pejjamechan ti'sfulaxil japi pejmatpuatanxot.

²⁰ Asew jiw, me-ama trigo, natacholanpi sat pachaemxot. Japi jiw lax chiekal naexaxisful, Dios pejjamechan naewuajna x wut. Ja-aech wut, japi jiw isful Dios nejxasinkpoxan. Samata, asew japixot, me-ama trigoton naboeti treinta trigofu. Asew jiw japixot, me-ama trigoton naboeti sesenta trigofu. Asew jiw japixot, me-ama trigoton naboeti cien trigofu" —aech Jesús, pejnachala chanaekabuana wut trigowuajanliajwa.

Lámpara pejuajan
(Lc 8.16-18)

²¹ Jesús pejme jum-aech: "Lámpara tamdutam wut, asaxtat matakasaximil. Chaxaximilbej camabuxfaltat. Athu cha-esaxaelam atuaj itliakaliajwa.

²² Jachiyaxaelam tajnaewuajna xliajwa. Puexa tajnejchaxoelaxan, me-ama moechaspo xan. Pe asamatkoi puexa chiekal matabijaxaeli tajnaewuajna xpijxat. Puexa jiw tajnaewuajna x matabija-elpi, japi asamatkoi matabijaxael.

²³ Xamal Dios pejnechaxoelax matabijasiam wut, ¡xan jum-anpox chiekal naewe'e!" —aech Jesús.

²⁴ Jesús pejme jum-aech: "¡Chiekal nejchaxoelde xan jum-anox! Asew jiw wewe'pas wut, ¡xamal chaxduim xajrupmoxtat! Ja-am wut, xamalbej Dios chaxduiyaxael wewe'poxan. Dios kaes pejme xamal chaxduiyaxael pachaempoxan, chiekal matabijt xoton xamalliajwa.

²⁵ Dios pejew chiekal tataefulpon, japon kaes pejme chaxdusaxaes. Asanlax, chiekal tataefla-elpon Dios pejew, japon kaesapich tataefulpoخان, japoxan kefsaxaeson” —aech Jesús, jiw naewuajan wat.

Pafut ti'tpox pejwajan

²⁶ Do jawut, Jesús naewuajan pejnachala. Dios tato'al wat pejjiw, japox kaesfulaxael. Samata, Jesús jum-aech: “Dios pejjiw tato'laxaelpox kaesfulaxael ampathatat. Me-ama aton trigo xasaljaba wat satat, jachiyaxaellapi-is Dios tato'alpox pejjiw.

²⁷ Dolisdo', japi trigo naboela wat, ti'sful matkoi, madoibej. Trigo xasaljabapon moejt wat, japi trigo tamach ti'sful. Japon matabijs-el, ma-aech, trigo ti'sful wat.

²⁸ Japi trigo naboela satat. Naboela wat, ti'ti. Ti't wat, trigo naboet.

²⁹ Trigo chiekal ti't wat, pachaem jolaliajwa, pat wat pejmatkoi” —aech Jesús.

Mostazafut pejwajan

(Mt 13.31-32; Lc 13.18-19)

³⁰ Jesús pejme jum-aech: “Xamal chiekal matabijaliajwam, naewuajnaaxaelen wuajan, ma-aech Dios tato'laxaelpox pejjiw kaesfulaliajwa.

³¹ Dios puexa pejjiw tato'alpox, me-ama mostazafut. Kaen aton japafut mutht pejlultat. Kamta weti'tas wat, do chiekal naedo'. Diachwuajnakolax japafut kaes pejme cha-aelfut ampathatat.

³² Japafut muthtas wat, kamta ti't. Japanae, boejtachnaechlejen, kaewaech wat, ti't. Ti't wat, kaes athu. Me-ama asaxan jiw pejlulanxot muthapi, jachi-el. Samata, pachaem mia chalakaliajwa japadalantat, japanae pejnajelnaxtat” —aech Jesús.

Jesús naewuajan wat, xabich naewuajan wuajantat jiw jumtaeliajwa

(Mt 13.34-35)

³³ Jesús naewuajan wat, xabich naewuajan wuajantat jiw jumtaeliajwa. Jiw kaes xajupa-el wat japawuajan matabijaliajwa, Jesús buxkoft naewuajanpox.

³⁴ Pomatkoicha Jesús jiw naewuajan wuajantat. Do jawux, tamach wat, pejnachala sapich, Jesús chiekal chanaekabuana puexa pejnachala chiekal matabijaliajwa.

Jesús fiatpox joewa, truxanbej

(Mt 8.23-27; Lc 8.22-25)

³⁵ Japamatkoitat, chatuil wuti, Jesús jum-aech pejnachalaliajwa:

—jChijias puka we-enlelde! —aechon.

³⁶ Jawut pejnachala falkam jul. Jesús chajia wuajna falkamtat ek, jiw naewuajan xot. Do jawut, jaxot asew jiw waelapon pukababu'tat. Jawut, Jesús, pejnachala sapich, chaflaech wat, asafalkammochantat asew jiw wuchakal chafol.

³⁷ Do jawut, chalechkal xabich pinajoewa pat, xabich pintruxanbej. Falkam min wulakaful truxan fajabaxtat.

³⁸ Pe falkamta-ulel Jesús nejmach moejt. Taxu-oton taxu-osax.

Do jawut, pejnachala thikas wat, jum-aechi:

—jiw chanaekabuanan! ¿Xamkat nejchaxoela-emil xatis chabu'laxaesox? —aechi Jesúsliajwa.

³⁹ Do jawut, Jesús nant fiasliajwa joewa, truxanbej. Jawut jum-aechon pukaliajwa:

—jKaes nabej pintruxne! —aech Jesús.

Do jawut, chalechkal joewa chiekal toep. Puexa chiekal itnapatan.

⁴⁰ Do jawut, Jesús jum-aech pejnachalaliajwa:

—¿Ma-aech xotkat xamal nejlewla? ¿Chiekal xan naxanaboewa-emilfak xamal bu'weyaxaelenpox? —aech Jesús pejnachalaliajwa.

⁴¹ Do jawut, japi xabich natachaemanuil. Xabich pejlewlabepi. Samata, nakaewa najum-aechi:

—¿Achankat ampon? Joewa, pukabej, chiekal naexasichpon —na-aechi nakaewa.

5

Jesús to'apox dep nakolaliajwa aton pejmatpuatxot

(Mt 8.28-34; Lc 8.26-39)

¹ Jesús, pejnachala sapich, chapa'a Gerasa tuajnu, puka we-enlelde.

²⁻³ Jesús nant wat paputxot, kaen aton najae'an Jesúsleldin. Japon aton dep webaes pejmatpuatxot. Japon aton duk patupamuthanxot. Jiw ke'saxilipon. Cadenamuatatbej piach xawaesaxil.

⁴ Wuajna chajia pin-iaveces xawaekson cadenamuatantat. Tuakwasixawaekspox. Kewasixawaeksbejpon. Japon xawaeks wat, cadenamu likton. Jiw xajupa-el piach xawaesliajwapi, xabich mamnik xoton.

⁵ Pomatkoicha, pomadoichabej, japon jumch nanuamt muaxanxot, patupamthaxotbej. Nanuamt wut, xabich nejlaton. Ia'tat pajut naxkoljabapon naxbijabaxtat.

⁶ Japon aton dep webaes pejmatpuatxot, Jesús atuxach fulaeyax taen wut, najae'non Jesúslel. Pat wuton Jesús pejwuaajnalel, brixtat nukon.

⁷⁻⁸ Brixtat nuk wut, Jesús jum-aech depliajwa:

—Dep, ixamal nakolim japon pejmatpuatxot! —aechon.

Samata, dep aton pejkaechatat nejlat wut, jum-aechon:

—Jesús, ixam Dios athupijin paxulnam! ¿Achaxasiamkat xanalxot? ¡Xanal jum-an Dios pejwuaajnalel natalias-elaliajwam! —aech dep, nejlat wut.

⁹ Do jawut, Jesús wuajnachaemt wut, jum-aechon:

—¿Achawulamkat xam? —aech Jesús.

Japi dep xabich pin-iat. Samata, jumnot wut, jum-aechi:

—Xanal tajwul Xabich, xabich pin-iatan xot —aech japi dep.

¹⁰ Dep jum-aech Jesús to'asamata atuaj asatuaajnalel.

¹¹ Jaxot mox muaxxot maran pin-iakola naxaelp.

¹² Samata, dep xabich jum-aech:

—Ampon atonxot xanal nakolax nato'am wut, inatapaem maranxot leliajwan! —aech japi dep.

¹³ Do jawut, Jesús ow-aech dep wuljowpox. Dolisdo', dep nakola wut japon aton pejmatpuatxot, japi dep lowlisi maranxot. Japi maran xabich pin-iat, me-ama dos mil. Jawut puexa maran dukp chu'atadik. Mintat natacholan wut, jaxotdik puexa maran bu'al.

¹⁴ Do jawutbej, maran tataefulpi pejlewut dukp pejpaklowax poxade. Chapaeilisi taenpoxan. Paklowaxxot mox duilibej chapaepi. Jawut jiw fulaen pajut chiekal taeliajwa jumtaenpoxan.

¹⁵ Japi jiw Jesúsxot pat wut, taenlisi japon aton. Japon aton dep wejisallison pejmatpuatxot. Jesúsxot bu'la-eklison naxoelax, wepachaemsxot pejnechaxoelax. Jiw fulaeni, taen wuti japon, xabich pejlewlapi.

¹⁶ Taenpi Jesús ispox japon atonliajwa, maranliajwabej, japi chiekal chapaepi taenpoxan asew jiw, pa'anjiliajwa.

¹⁷ Do jawut, japatuaajnapijiw to'api Jesús asatuaajnalelialiajwa, Gerasa tuajnuxot namanasamata.

¹⁸ Do jawux, Jesús falkam jul wut, japon aton, dep wejisalpon pejmatpuatxot, xabich kawuaajan nakfulaeliajwapon Jesús.

¹⁹ Pe Jesús tapae-el japon aton nakfulaeliajwas. Do jawut, Jesús to'a japon aton pejjiw poxade nawiasliajwa. Jesús jum-aech:

—¡Nawia'mich nejba poxade! ¡Nejjiw chapaem puexa Dios ispox xamliajwa, Dios xam beltaen xot! —aech Jesús.

²⁰ Do jawut, fulaechlison Decápolis tuajnu poxade. Chapaefullison japapaklowaxanpijw Jesús ispox japonliajwa. Puexa jiw jumtaen wut, jum-aechnap: “¡Tae'nik ampon aton! ¡Chiekal pachaemlison!” —na-aechnap nakaewa.

Amxot jum-aechox Jesús pawis boejthutpoxliajwa, asaow patupow mat-etpoxbejliajwa, pejme dukaliajwapow

(Mt 9.18-26; Lc 8.40-56)

²¹ Jesús, pejnachala suapich, kaxa nawen puka we-enleldin falkamtat. Jesús chapa'an wut, xabich jiw papasful Jesúsxot pukababu'tat.

²² Jawut kaen aton pat. Japon pawul Jairo. Judíos naewuaajnabapijwixot, japon japixot paklonpon. Jesús taen wuton, brixtat nukjabapon Jesús pejwuaajnalel.

²³ Jairo xabich tadut Jesús nakfulaeliajwas japon pejba poxade. Jum-aechon:

—Taxulow xabich nawebu'xaenk. Mox pawuaajnapow tupaliajwa. ¡Xabua't! ¡Xan nakfulaem taxulowxot ke-osliajwam, boejthusliajwampow! —aech Jairo.

²⁴ Do jawut, Jesús nakfol Jairo. Jesús xabich jiw chalas. Japixot xabich jiw Jesús pejwuaajnalel fol. Asew fol Jesús wuchakallel. Jesús xabich tabe'nafulas.

²⁵ Do jawut, kaeow pawis wuchakal fol. Japow bu'xaenk. Xabich nabijatow. Pejlaw wut, jal chiekal matduka-el. Doce waechan jal chiekal matduka-elpox.

²⁶ Xabich jiw woew wualachipow. Pe chinax kaen aton japow boejthus-esal. Xabich nabijatow waspoxtat. Xadaeptbejpow puexa pejew plata nawoeyaxtat. Pe jal chiekal matduka-el.

²⁷⁻²⁹ Japow wultaen Jesús. Samata, Jesús mox wut, wuchakal folow. Jawut nejchaxoelow: “Xan Jesús pejnaxoelax jajastaxpoxtat naboejthusaxaelon” —aechow, nejchaxoel wut.

Samata, japow jajast Jesús naxoelax. Do jawut, japow chiekal boejthuls. Jal chiekal ajil. Pajut bu'boejaenpow chiekal boejthulsox.

³⁰ Jesús boejaen, pejpamamax wenakolsas wut. Samata, Jesús kaxa natachaemdik wut, jum-aechon:

—¿Achankat xan tajnaxoelax nawejajast? —aech Jesús.

³¹ Do jawut, Jesús pejnachala jum-aechi Jesúsliajwa:

—Jiw xam tabe'naful. ¿Ma-aech xotkat xam wuajjnachaemtam: '¿Achankat xan tajnaxoelax nawejajast?' —amkat xam? —aechi Jesúsliajwa.

³² Dolisdo' Jesús natadiajsful jiwlel taeliajwa, achan jajastason.

³³ Jawut japow tathulal pejlewt. Matabijtow wejatisox. Samata, brixtat nukow Jesús pejwuajnalel. Jawut chapaeipow wejatispox.

³⁴ Do jawut, Jesús jum-aech japowliajwa:

—Taj-atow, amwutjel xam pachaemam, chiekal naxanaboejta xot. ¡Xabua'de nejmach! Nejwaxae kaes ajil xamxot —aech Jesús.

³⁵ Jesús naksiya wutfuk, Jairo pamak pat Jairoxot. Japi jum-aech Jairo jumtaeliajwa:

—Naxulow tuplisow. Samata, inabey tadus jiw chanaekabuanan xam nakfulaeliajwa nejba poxade! —aechi.

³⁶ Jesús naekuanjiamt japi jum-aechpox, jumtaen wuton. Samata, Jesús jum-aech Jairoliajwa:

—¡Nabey nejlewlé' naxulow tuppoxliajwa! ¡Xanaboejsfulde Dios! —aech Jesús.

³⁷ Do jawut, Jesús nakiowa nakfolon. Jawut Jesús bu'fol Pedro, Santiagobej, Jairo pejba poxade. Bu'folbejpon Juan. Japon Santiago pakoewan. Jesús tapae-el kaes asew jiw nakfulaeliajwas Jairo pejba poxade.

³⁸ Pat wuti Jairo pejbaxot, Jesús jumtaen xabich jiw jumxan-elpoxan, jiw pinjametat wunowpoxanbej Jairo paxulow tuppoxliajwa.

³⁹ Ba lech wut, Jesús jum-aech:

—¿Ma-aech xotkat xamal xabich jumxan-elam? ¿Wunowambej? Japow tupa-el. Japow moejt —aech Jesús wunowpiliajwa.

⁴⁰ Japox jumtaen wuti, asbuan jumch xafafoli Jesúsliajwa. Do jawut, Jesús nakolax to'a jiw tathoetade. Jawut Jesús buflaech pejnachala batuchade, patupow och poxade. Buflaechbejpon patupow pax, japow penbej.

⁴¹ Jaxot Jesús patupow kefit wut, jum-aechon patupowliajwa:

—Talita cum —aech Jesús. (Japox jumchiliajwa hebreojametat: "Jam, xan jum-an: '¡Mat-e'e pejme dukaliajwam!' —an xan" —chiliajwa.)

⁴² Do jawut, kamta patupow mat-et. Mat-et wut, nantow. Jawut pajut chiekal laejepow. Japow doce waechan. Jawut puexa jiw jum-aech: "¡Taem patupow! ¡Laejapow pejme!" —aechi.

⁴³ Jesús nejthuxat xam jum-aech: "¡Nabey chapae' ampox asew jiw, xan isxrox xamalliajwa!" —aech Jesús jaxotpijiwliajwa. Do jawut, Jesús pejme jum-aech: "¡Chaxduim naxaeyax japow xaeliajwa!" —aech Jesús.

6

Jesús Nazaret paklowaxxotpox

(Mt 13.53-58; Lc 4.16-30)

¹ Jesús nakolt wut Capernaum paklowaxxot, fulaechon pejtuajnukolax poxade, pejnachala suapich.

² Pat wuti Nazaret paklowaxxot, do jawux, napatamatkoi wut, Jesús lech judíos naewuajnaba poxade. Jaxotde tuduton jiw naewuajnalialjwa. Jaxotbej xabich jiw jumtaen wut Jesús naewuajnapox, jawut, nakaewa nawuajjnachaemsna wut, jum-aechi:

—¿Amxotkat ampon japoxan xabich matabijt jiw naewuajnalialjwa? ¿Amxotkat matabijt-bejpon matabijsax? ¿Ma-aech xotkat japon xajup koechaxan isliajwa?

³ Ampon carpintero nabichan, María paxulan. Ampon pakoew ampilape. Kaen pawul Santiago. Asan pawul José. Asan pawul Judas. Asan pawul Simón. Jesús pakoewbej, watho', japi duil xatisxot —na-aechi nakaewa.

Samata, naexasis-eli Jesús naewuajanpox.

⁴ Do ja-aech wut, Jesús jum-aech japiliajwa:

—Profetas sitaens asapaklowaxanpijiw. Pelax pejpaklowaxkolapijiw sitae-esal. Pejjiw-kola, pejbapijiwbej, sitae-esal —aech Jesús japi jiwliajwa.

⁵ Samata, jaxot Jesús isaxil koechaxan. Kaesuapich jiw bu'xaeya boejthuton, jacha wut.

⁶ Jesús xabich nejchaxoelanuk japi jiwliajwa, naexasis-el xoti. Do jawut, Jesús fulaech asatuajnuchan mox poxade. Japalelde jiw naewuajnafaldepon.

Jesús to'apox pejnachala japi naewhajnaliajwa Dios tato'laxaelpox jiw ampathatat (Mt 10.5-15; Lc 9.1-6)

⁷ Do jawut, Jesús la doce apóstoles. Japi pat wut Jesúsxot, jawut, Jesús kaenanula kolenje to'apon japi paklowaxan poxaliajwa, naewhajnaliajwapi Dios pejjamechan. To'a wut pejnachala, jum-aechon: "Jiw xabu'kulam wut, dep webaesí pejmatpuatanxot, japi dep to'im nakolaliajwa japi jiw pejmatpuatanxot Dios pijaxtat!" —aech Jesús, to'a wut pejnachala.

⁸⁻⁹ Jesús kefiat pejnachala, nanuamt wut xalaesamata. Jum-aechon: "¡Nejkilachalanaeyankal xalaem! ¡Nabej xalae' naxaeyaxan, plata, nejchoxanbej! Mado' it'akxajolam, ido japoxkal tuaklaflaem! ¡Ja-amdebej naxoelaxliajwa! Mado' inaxoelam, ido japoxkal bu'laflaem!" —aech Jesús pejnachalaliajwa.

¹⁰ Jesús pejme jum-aech:

—Xamal paklowax patam wut, ¡kaebaxot duilde, jiw naewhajnaliajwam japapaklowaxpijiw! Asalel fulaeliajwam wut, do jawut, ¡japabaxot nakolim!

¹¹ Asew jiw xamal bu'kula-el wut, nejnaewhajnax naewes-el wutbejpi, ¡japapaklowaxxot nakolim, asapaklowax poxaliajwam! Nakolam wut, ¡nejtuakxajoe jolde lalaliajwam as natacholnaliajwa! Jasoxtat japi jiw pajut matabijaxael babijax ispox Diosliajwa, xamal bu'kula-el xoti —aech Jesús.

¹² Dolisdo', Jesús pejnachala follisi. Pat wuti, japapaklowaxanpijiw naewhajanlisi kofaliajwa babijaxan ispoxan, naexaxisliajwabejpi Dios.

¹³ Jesús pejnachala dep to'a jiw pejmatpuatanxot nakolaliajwa. Samata, xabich dep nakola. Xabich bu'xaeyabej boeñthuti, bu'xalot wuti jiw olivosimintat.

Juan, jiw bautisan, boesaspox (Mt 14.1-12; Lc 9.7-9)

¹⁴ Potuajnuha xabich jiw wultaena Jesús pejwajan. Rey Herodes, Galilea tuajnuapijiw tato'lan, japonbej wultaen Jesús ispoxan, jiw nakaewa nospaei wut Jesúsliajwa. Pe Herodes matabijs-el, achan Jesús. Jumtaenpon, jiw nakaewa najum-aech wut Jesúsliajwa: "Jesús, japonlap Juan, jiw bautisan. Mat-echpon pejme duk. Samata, xajapon koexaxan isliajwa" —na-aech wut jiw nakaewa Jesúsliajwa.

¹⁵ Asew japixot najum-aechbej Jesúsliajwa: "Jesús, japonlap profeta Elías. Mat-echpon pejme duk" —na-aechi nakaewa. Asew japixot najum-aechbej: "Jesús, japonlap profeta, me-ama majt duilpi" —na-aechi nakaewa Jesúsliajwa.

¹⁶ Herodes jumtaen wut jiw najum-aechpox Jesúsliajwa, japon jum-aech:

—Jesús, japonlap Juan. Xan tajsoldaw majt tajut keto'ax Juan taxtasiapchaliajwas. Amwutjel japon mat-ech. Samata, japon pejme duk —aech Herodes.

¹⁷ Juan laeja wut, Herodes keto'a pejsoldaw Juan jaelsliajwas. Do jawut, Juan jaeltas wut, jiaspon jiw jebatat. Jaxot cadenamuatat xawaechpon. Herodes japox is, to'as xoton pijow Herodías. Japow majt Felipe pijow. Japon Herodes pakoewan. Baxael, Herodes pakoewan Felipe fe'enpon.

¹⁸ Herodes pakoewan fe'en wut, Juan jum-aech Herodesliajwa: "¡Xam nakoewan pijow nijow dofaximil! ¡Japox chaemil isliajwa!" —aech Juan Herodesliajwa.

¹⁹⁻²⁰ Samata, Herodías japox jumtaen wutow, xabich nejweslapow Juan. Japow to'a pamal, japon keto'aliajwa pejsoldaw Juan boesaliajwas. Pe Herodes owchi-el, sitaen xoton Juan. Herodes matabijt, Juan xabich pachaempon. Samata, Herodes majt tapael Juan boesaliajwas. Juan naewhajanpox Herodes nejxasink. Pe kolenejchaxoelaxan xot, matabijs-elon isaxaelpox.

²¹ Do jawux, Herodes is wut pejcumpleaños, xabich wullalapon paklochow, soldawpaklochowbej, kaes kemaenkibej, Galilea tuajnuapijiw. Do jawut, wullalasi puexa chiekal patlisi Herodesxot. Do jawutbej, Herodiasliajwa chiekal wepachaemsow pamal keto'aliajwa, japonbej keto'aliajwa pejsoldaw Juan boesaliajwas. Nejchaxoelow japox.

²²⁻²³ Dolisdo', fiesta wut, Herodías paxulow pat. Japow tamach nababoela puexa jiw pejwajnalel, japi taeliajwa. Nababoela wut, Herodes, asew jiwbej, naxaelpi japonxot, xabich nejchachaemil, japow nababoela wut. Do jawut, Herodes jum-aech japowliajwa:

—¡Nejxasinkampox xan nawuljoem! Xan japox chaxdusaxaelen. Diachwajnakolax paeix. Nawuljowampox chaxdusaxaelen. Nejxasinkam wut, xan tato'laxtuajnu chiekal najupachadusaxaelen xam tato'laliajwam —aech Herodes japowliajwa.

²⁴ Do jawut, japox jumtaen wut, pen poxadepow wuajnachaeisliawapow pen. Penxot pat wut, chapaeipow paxon jumtisipox. Jawut jum-aechow penliajwa:

—En, zachaxkat xan taxon wuljoeyaxaelen? —aechow.

Do jawut, pen jumnot wut, jum-aech:

—Jam, ima amwut naxon wuljoem Juan, jiw bautisan, pejmatnaet! —aechow paxulowliajwa.

²⁵ Do jawut, japow Herodes poxade. Jum-aechow rey Herodes jumtaeliajwa:

—iMa amwut nachaxdu'e Juan pejmatnaet plaftat! —aechow.

²⁶ Do jawut, Herodes xabich nejxaejwas, jumtaen wuton japow wuljowpox. Samata, Herodes elchiyaxil japow wuljowpoxliajwa, chajia jumdut xotlison puexa paklochow pejwajnalel japow chaxdusliajwa wuljoeyaxaespos. Samata, Herodes chaxdusaxael japow wuljowpox.

²⁷⁻²⁸ Do jawut, Herodes pejsoldawan to'a Juan pejmatnaet chaxlaeliajwadin. Jawut soldawan fulaech jiw jeba poxade. Jaxotde pa'a wut, Juan taxtasiapchapon. Plaftat Juan pejmatnaet chaxlaens fiesta poxadin. Soldawan xapat wut, Herodias paxulow chaxduton Juan pejmatnaet. Do jawut, japow pen poxade chaxlaeliajwa Juan pejmatnaet.

²⁹ Juan pejnachala jumtaen wut Juan boesaspox, jawut fulaeni Juan patupan chaxlaeliajwa. Do jawut, chaxfollisipon muthsliajwa. Do jawut, muthslisipon.

Jesús naxaeyaxan chaxduwpox cinco mil poejiw

(Mt 14.13-21; Lc 9.10-17; Jn 6.1-14)

³⁰ Jesús pej-apóstoles buxtoet wuti naewuajanpoxan asapaklowaxanpijiw, kaxa nawenlisi. Pat wuti, natamejapi Jesúsxot. Jawut puexa chapaeilisi ispoxan, naewuajanpoxanbej.

³¹ Jaxot xabich jiw fulalaena. Samata, Jesús pejnachala xabich it-els xaeliajwa, jiw xabich xot. Samata, Jesús jum-aech:

—iChijias jiwjil poxade, xatis tamach damlathulaliajwas! —aech Jesús.

³² Do jawut, Jesús, pejnachala swapich, chaflaech falkamtat jiwjil poxade.

³³ Pe nakiowa, jawut xabich jiw fultaeni Jesús, chaflaech wut, pejnachala swapich. Matabijapi. Samata, xabich paklowaxanpijiw dukpde Jesús itjulaxaech poxade. Japi wujna pa'a.

³⁴ Jesús chapat wut falkamtat, Jesús xabich jiw taen paputlel. Taen wuton, japi jiw xabich beltaenon. Jawut Jesús nejchaxoel wut, jum-aechon: “Ampi jiw, me-ama ovejas, wejisal xoti taaeflaspon” —aech Jesús, nejchaxoel wut. Samata, tuadutlison xabich naewuajnalijwa.

³⁵ Kaliax wut, Jesús pejnachala moxlisi Jesúsxot. Do jawut, japi jum-aech Jesúsliajwa:

—Tuilalisox. Amxot ajil tuajnuhan. Ajilbej naxaeyaxan wuajsliajwas.

³⁶ Samata, jampi jiw to'im tuajnuhan poxade, naxaeyaxan wuajsliajwa! —aechi Jesúsliajwa.

³⁷ Jesús japox jumtaen wut, jum-aechon:

—iXamal najut chaxduim naxaeyaxan ampi jiw xaeliajwa! —aechon.

Do jawut, jum-aechi:

—iXamkat nejxasinkam xanal pan wuajsliajwan doscientos denariostat, puexa ampi jiw xaeliajwa? —aech Jesús pejnachala.

³⁸ Jesús wuajnachaemt wut, jum-aechon:

—iMasswapichkat pan xamalxot? iXabua'de taeliajwam jiwxot! —aech Jesús.

Do jawut, japi taen wut, jum-aechi:

—Asbuan jumch cinco pan xanalxot, kolenje baxinbej —aechi.

³⁹ Do jawut, Jesús to'a pejnachala puexa jiw kaenanula, pejmutan swapich, polaxot chalakaliajwa.

⁴⁰ Asamutan, pinamutan. Japamutanxot, me-ama cien jiw. Asamutan kaeswapich jiw. Japamutanxot, me-ama cincuenta jiw. Puexa jiw chalak, pejmutan swapich.

⁴¹ Do jawut, Jesús cinco pan chafit, kolenje baxinbej. Athulel natachaemsepon Dios kawuajnalijwa. Dios kawuajan wut, jum-aechon: “Ax, xan gracias-an ampapanliajwa, ampabaxiliajwabey, xanal nachaxduwampi” —aech Jesús, pax Dios kawuajan wut. Do jawut, jalkafullison pan. Jalkaful wut, pejnachala chaxduifullison japi sasliajwa, puexa jiw xaeliajwa. Ja-aechbejpon baxiliajwa.

⁴² Puexa jiw chiekal xael. Chiekal nafnialisi.

⁴³ Jiw xaeyax kaechatoel wut, malpi Jesús pejnachala jia matpirantat. Wulpi doce matpiran baxitoerow, pan malsibey.

⁴⁴ Japi jiw xaelpi, cinco mil poejiw. Watho', yamxi swapich, xajui-esal.

Jesús fulaenpox pukaminakaldin

(Mt 14.22-27; Jn 6.16-21)

⁴⁵ Do jawux, Jesús to'a pejnachala falkam julaliajwa, puka we-enlelde chalikaliajwa. To'aroni wujna chaflaeliajwa, Betsaida paklowaxlelde. Jesús kaweta namanfuk jiw to'aliajwa naweliajwa pejbachan poxade.

⁴⁶ Do jawux, jiw to'a wut, Jesús julach muax poxase tamach Dios kawuajnalijwa.

⁴⁷ Sesa itkuaatnik wut, Jesús tamach naman. Pejnachala falkamtat chafolfuki pukatukolaxtat.

⁴⁸ Taenon pejnachala xabich faetox. Joewa matalech falkam. Mox rawuajna wut nalianaliajwa, Jesús fulaen pukaminakal. Me-ama matnoch xensliajwa wut, ja-aechon.

⁴⁹⁻⁵⁰ Pejnachala taen wuti Jesús, pukaminakal fulaenox, nejchaxoeli: “i Tae'nik! i Ama dep fulaen!” —aech Jesús pejnachala, nejchaxoel wut. Samata, puexa japi xabich natachaema. Do jawut, pota na-oenkli, xabich pejlewla xot. Jawut Jesús jum-aech:

—i Nabej nejlewle! i Xanpe! —aech Jesús.

⁵¹ Do jawut, Jesús falkam juldik japixot. Jawut kaes wika-ellisox. Samata, japi chiekal natachaemachalak falkamtat.

⁵² Japi matabija-elfuk Jesús xajupox puexa isliajwa. Taen wuti koechax, Jesús is wut panliajwa, chiekal matabija-eli taenpox, matnaetink xoti matabijaliajwa.

Jesús boejthutpox jiw bu'xaeya Genesaret tuajnu xot
(Mt 14.34-36)

⁵³ Do jawut, Jesús, pejnachala suapich, puka we-enlede chapa'api, Genesaret tuajnu xot. Jaxot itjul wut, falkam ke'tlisi pukababu'tat.

⁵⁴ Japi nana wut falkamxot, jiw matabija japon Jesús.

⁵⁵ Do jawut, japi jiw kaxa dukpich asew jiw chapaeliajwa, japatuajnapijiw. Do jawut, bu'xaeya chaxlaens camillat Jesúsel japi boejthusliajwas.

⁵⁶ Jesús tuajnu xot poxade wut, paklowaxan poxade wutbejpon, Jesús fulaech poxade, jiw owas wuajna plazaxot, japi bu'xaenki, boejthusliajwaspi Jesús. Taen wuti Jesús, japi jiw jum-aech Jesúsliajwa:

—Ampi jiw, bu'xaeya, itapaem nejsumta-osax jachaliajwapi, matdukafupox! —aechi Jesúsliajwa.

Do jawux, puexa jachapi japox, japi chiekal boejthuslisisi.

7

Jiw chajia nejchaxoelpox, babijax, japoxan is xoti, babejchow nadofa
(Mt 15.1-20)

¹⁻⁴ (Fariseos, asew judiosbej, japi is pejwuajnapijiw isfulpoxan. Xaeliajwa wut, majt xabich piach kekakiati. Naxaeyaxan wuajt wuti plazaxot, pejbatat xapat wut, xaeliajwa wutbej, majt xabich piach kekakiati. Tasos, jarros, maram, camaxanbej, xabich piach kiati. Japi kaes asaxan isbej. Me-ama pejwuajnapijiw, jachi-eli. Kaes pejme xenapi japoxanliajwa. Japoxan ispi, nejchaxoel xot asbuan jumch: “Japoxan isx wut, babijaxan ispoxan xanxot ajilaxael” —aech xoti, nejchaxoel wut.)

Asamatkoi kaesuapich fariseos, judios chanaekabuanapibej, fulaeni Jerusalén paklowaxxotdin, Jesús poxadin. Pat wuti Jesúsxot, taeni Jesús pejnachala majt piach kekakiaselpox, xaeliajwa wut.

⁵ Samata, japi Jesús wuajnu xot wut, jum-aechi:

—¿Ma-aech xotkat nejnachala is-el, me-ama wajwuajnapijiw? Nejnachala xaeliajwa wut, majt xabich piach kekakias-eli —aech fariseos, judios chanaekabuanapibej, Jesúsliajwa.

⁶⁻⁷ Jesús jumnot wut, jum-aechon:

—Xamal, me-ama diachwuajnakolax Dios naexasitam wut, ija-am! Pe diachwuajnakolax Dios naexasis-emil. Isaías, Dios pejprofeta, diachwuajnakolax chajia jum-aech xamalliajwa, chajia lel wuton. Jum-aechon Dios jum-aechpox:

*Xamal naksiyam xan nasitaenamxotantat. Pelax nejnejchaxoelaxan xabich tuaj xanxot. Samata, xamal isampoxan xanliajwa, naksiyam wutbej chimiajamechan xanliajwa, o, xan nakawuajnapoxanbej, japoxan omjil xanliajwa. Naewuajnam wutbej, naewuajnam asew jiw pejnejchaxoelaxankal. Pelax xan tajnejchaxoelaxan, jiw naewuajna-emil —aech Dios jum-aechpox xamalliajwa’ —aech Isaías, chajia lel wut —aech Jesús fariseosliajwa.

⁸⁻⁹ Jesús pejme jum-aech fariseosliajwa:

—Xamal naexasis-emil Dios pejtato'lax. Naexasitamlax jiw naewuajanpoxankal. Asbuan jumch isam nejwuajnapijiw ispoxankal.

¹⁰ Moisés chajia lelpox jum-aech: ‘i Nej-ax, nej-enbej, sitaem! Babejjamechan jum-aechpon paxliajwa, penliajwabej, japon aton tuxaxael kastikaxtat’ —aech Moisés chajia lelpox.

¹¹ Xamal asbuan jumch naewuajnam nejwuajnapijiw isfulpoxan, japox pawal corbán. Samata, xamal jum-am: ‘Nemach-aton chajia jumdut wut pejew Dios chaxduiliajwa, japoxan japon aton chaxduiyaxil, pax, penbej, japoxan Diosliajwa xot’ —am xamal.

¹² Xamal japi jiw tapaeyam japox jumchiliajwa paxliajwa, penliajwabej: 'Xan chajia Dios jumduxtx chaxduiliajwa tejew. Samata, xamal kajachawaesliajwan, ajil' —chiliajwapi.

¹³ Asew jiw naewuajnam wut nejwuajnapijiw isfulpoxan, japoxantat Dios jum-aechpoxan kofam. Kaes asaxan naewuajnambej, me-ama japox —aech Jesús fariseosliajwa.

¹⁴ Do jawux, Jesús jiw la wut, jum-aechon:

—¡Puexa xamal chiekal naewe'e! ¡jummatabijimbej xan jumchiyaxaelenpox!

¹⁵ Jiw naxaeyax xael wut, babejchow nadofaxil. Jiw babijaxan is, chajia japoxan nejchaxoel xoti isliajwa.

¹⁶ Xamal Dios pejnechaxoelax matabijasiam wut, ¡chiekal naewe'e xan jum-anpox! —aech Jesús.

¹⁷ Jesús buxtoet wut jiw naewuajanpox, ba lechon, pejnachala suapich. Do jawut, pejnachala wuajnachaehtason, japi chiekal matabijaliajwa japawuajan, Jesús jiw naewuajanpoxliajwa.

¹⁸ Jesús jumnot wut, jum-aechon:

—¿Xamalkat-is matabija-emil japawuajan? ¿Matabija-emil jiw babejchow nadofaxilox, xael wut naxaeyax?

¹⁹ Naxaeyaxan jiw xael wut, pejnechaxoelaxan poxa-eldik. Woejt poxadik. Do jawux, nakoltox —aech Jesús.

Jesús japox jum-aech pejnachala chiekal matabijaliajwa, puexa naxaeyaxan pachaem-pox jiw xaeliajwa.

²⁰ Jesús pejme jum-aech:

—Jiw pejnechaxoelaxanxot nakola babejnechaxoelaxan.

²¹ Samata, jiw babijaxan is. Poejiw, tamach laelpi, nejchaxoel asew watho' bu'moejsaxan. Jiw nejchaxoelbej natkowaliajwa asew jiw pejew. Jiw nejchaxoelbej asew jiw beliajwa.

²² Poejiw pakmolapi nejchaxoelbej asew watho' bu'moejsliajwa. Jiw taen wut asew jiw pejew, japoxansiabejpi pajutliajwa. Jiw nejchaxoelbej isliajwa babijaxan asew jiwliajwa. Jiw nejchaxoelbej naekichachajbaliaw asew jiw. Jiw nejchaxoelbej babijaxan isliajwa pomatkoicha padala-elpoxan. Jiw nejchaxoelbej nusasiawlliajwa, asew jiw ketaen wut. Jiw nejchaxoelbej buxwuajnamaenkaliajwa asew jiwliajwa. Jiw pajut nejchaxoel wut, jum-aechbejpi: 'Xan kaes pejme pachaeman. Me-ama asew jiw, jachi-enil' —aechi, nejchaxoel wut. Jiw nejchaxoelbej nejmach duilaliajwa Dios naexaxis-elaxtat.

²³ Puexa japox babijaxan nakola jiw pejnechaxoelaxanxot. Samata, jiw babejchow nadofa japonechaxoelaxantat —aech Jesús.

*Judíos-atowa-elpow, japow naexasitpox Jesús
(Mt 15.21-28)*

²⁴ Jesús fūlaech, pejnachala suapich, Tiro paklowax poxade, asatuajnulelbej. Do jaxotde ba low wuti, Jesús maliach pasasia. Pe nakiowa, jiw taenson.

²⁵⁻²⁶ Samata, atow wultaen Jesús pasaxaelpox. Samata, fūlaechow Jesús taeliajwa. Japow judíos-atowa-el. Asatuajnu pijow. Pejtuaajnu pawul Sirofenicia. Pat wutow Jesúsxot, japow brixtat nuk Jesús pejwuajnalel, sitaen xotow Jesús. Paxulow kaweta batat, dep webaesow pejmatpuatxot. Samata, jum-aechow Jesúsliajwa:

—¡Xam dep to'im nakolsliajwa taxulow pejmatpuatxot! —aechow Jesúsliajwa.

²⁷ Do jawut, Jesús jum-aech:

—Paxipi majt naxaeyaxan chaxduw paxi xaeliajwa. Do jawux, pachaem wur duajsliajwa malsi —aech Jesús japowliajwa.

(Jasox Jesús jum-aech, matxoela kajachawaesaxael xoton judíos. Do jawux, kajachawaesaxaelon judíos-elpi.)

²⁸ Do jawut, japow jumnot wut, jum-aechow:

—Tajpaklon, pe yamxi xael wut, mesaxot cha-aex fadu' natacholan wut mesaxot, warbej xael. Samata, jnawoesa xan matxoela nakajachawae'e! —aechow.

²⁹ Do jawut, Jesús jum-aech:

—Xam kajachawaesaxaelen, chiekal najumnotam xot xanliajwa. Naxulowlis pachaem. Dep nakoltlis naxulow pejmatpuatxot. ¡Nawia'mich nejba poxade! —aech Jesús japowliajwa.

³⁰ Do jawut, chijialisow pejba poxade. Pejba pat wut, paxulow taenlisow, ok wut camatat. Dep wejisallisow pejmatpuatxot.

Jesús boejthutpox naetakua'nikron, buxwuajnajilbejpon

³¹ Do jawut, Jesús nakolt Tiro tuajnuxot. Do jawux, Sidón tuajnulel xentbejpon. Xenabejpon paklowaxan Decápolis tuajnulel. Do jawux, Galilea pukaxot paton.

³² Jaxot asew jiw buflaen naetakwatan Jesúslel. Japon aton buxwuaajanjilbej. Japi jiw jum-aech Jesúsliajwa:

—¡Ampon aton boejthu'e jumtaeliajwa! ¡Ke-o'ebaj japonxot naksiyalijwapon! —aechi.

³³ Do jawut, Jesús buflaech atuaxach buxwuaajanjilan, jiw ajilxot. Jawut Jesús natae-lanaetakwanwuaaj jacha pejkothiyatat. Do jawut, Jesús loya pejkothiya, japon aton kaech-ia'jachaliajwa japa-almintat.

³⁴ Dolisdo', Jesús athulel natachaemse wut, xabich fakjolchapon. Jum-aechon: “¡Efata!” —aech Jesús. (Japajame jumchiliajwa hebreojametat: “¡Nej fafas!” —chiliajwa.)

³⁵ Do jawut, chalechkal pejnaetakwanwuaaj chiekal wepachaemslison kolelelje. Pejkaech-ia't pachaembej naksiyalijwa. Naksiya wut, chiekal jumtampapon.

³⁶ Do jawut, Jesús jum-aech puexa jiwliajwa:

—¡Puexa xamal nabej chapae' amprox asew jiw! —aech Jesús japi jiwliajwa.

Jesús buxfiat wut, japi jiw nakiowa chapaeful asew jiw.

³⁷ Japi jiw nejchaxoelanuili. Samata, jum-aechnapí:

—¡Puexa Jesús ispoxan, chiekal ispon! Jesús boejthu wut, ¡hasta naetakwatabej chiekal jumtaen! ¡Buxwuaajnajilabej chiekal naksiya! —na-aechi nakaewa.

8

Jesús naxaeyaxan chaxduwpox cuatro mil jiwliajwa

(Mt 15.32-39)

¹ Asamatkoiyan xabich jiw pejme natamejal Jesúsxot. Japi jiw naxaeyaxan xaeliajwa jaxot ajil. Samata, Jesús pejnachala la moxliajwadin.

² Japi pat wut, jum-aechon:

—Ampi jiw beltaenx, wejisal xot xaeliajwa. Japi xan nachala tres matkoi. Toellisi naxaeyaxan xafoli.

³ To'ax wuti naxae-elaxtat pejbachan poxade, japi jiw xabich pejlit numtat mamnikaxil, asew jiw japixot xabich atuaj fulaenxot —aech Jesús.

⁴ Do jawut, pejnachala jumnot wut, jum-aechi:

—Amxot naxaeyaxan faekaxisal, jiw duila-el xot —aechi.

⁵ Dolisdo', Jesús wuaajnachaemt wut, jum-aechon:

—¿Masswapichkat pan xamalxot? —aech Jesús.

Jumnot wut, jum-aechi:

—Amxot siete panes —aechi.

⁶ Jesús puexa jiw chalakax to'a satat. Do jawut, siete panes Jesús chafit. Dios kawuaajan wut, jum-aechon:

—Gracias-an ampapan nachaxduwampiliajwa —aech Jesús.

Jawut pan jalkafulon. Do jawut, Jesús chaxduiful pejnachala, japi saslíajwa pan puexa jiwliajwa. Do jawut, Jesús pejnachala pan sasfullisi.

⁷ Jesús pejnachalaxot cha-aex baxix. Do jawut, Jesús pejme Dios kawuaajan baxixliajwa. Jawut jum-aechon:

—Gracias-anbej ampabaxixliajwa nachaxduwampi —aech Jesús.

Do jawut, to'abejpon pejnachala baxix saslíajwapi puexa jiwliajwa.

⁸ Puexa jiw chiekal xael. Chiekal nafniabejpi. Do baxael, pejnachala chanot malsi. Wulu siete matpiran.

⁹ Japi jiw xaelpi, me-ama cuatro mil jiw. Xaeyax kaechatoel wut, Jesús japi jiw to'a naweliajwa pejbachan poxade.

¹⁰ Do jawux, Jesús falkam jul, pejnachala swapich, chaflaeliajwa Dalmanuta tuajnu poxade.

Fariseos to'apox Jesús isliajwa koechax

(Mt 12.38-42; 16.1-4; Lc 11.29-32; 12.54-56)

¹¹ Do asamatkoi, fariseos pat wut Jesúsxot, japi chiekal wuaajnachaemt Jesús. Japi fariseos tasalasiapi Jesús, asax is wut. Samata, jum-aechi:

—¡Isde koechax xanal taeliajwan, chiekal matabijaliajwanbej, diachwuaajnokolax xam Dios to'aponam wut! —aech fariseos Jesúsliajwa.

¹² Do jawut, Jesús xabich fakjolcha, nejchachaemla-el xoton fariseosliajwa, naexaxis-el xotbejpi. Samata, Jesús jum-aech:

—Xamal nato'am xan koechax isliajwan asbuan jumch taeliajwam. Pe xamal taeyaximil pajelkoechax —aech Jesús fariseosliajwa.

¹³ Do jawut, Jesús chijia fariseosxot. Julon falkam chaflaeliajwa puka we-enlelde, pejnachala swapich.

Jesús naewhajanpox pejnachala, japi pajut chiekal natataeflaliajwa fariseos naewhajanpoxan, Herodesbej

(Mt 16.5-12)

¹⁴ Jesús pejnachala nejkiow naxaeyaxan xalaeliajwa. Japi asbuan jumch kaekolax pan xafoli.

¹⁵ Do jawut, Jesús jum-aech pejnachalaliajwa:

—¡Chiekal taem fariseos pejlevaduraliajwa, Herodes pejlevaduraliajwabej! —aechon pejnachalaliajwa.

¹⁶ Jesús pejnachala jumtaen Jesús jum-aechpox. Pe japi jummatabija-el. Samata, nakaewa nawhajnachaemt wut, najum-aechi:

—¿Achaxkat jum-aech Jesús? Jesús japox bej nakjum-aechbej, xatis nejkiows xot pan xalaeliajwas —aechi nakaewaliajwa.

¹⁷ Jesús matabijt pejnachala nakaewa najum-aechpox. Samata, Jesús whajnachaemt wut, jum-aechon:

—¿Ma-aech xotkat xamal nakaewa najum-am panliajwa? ¿Xamalkat jummatabija-emil, matnaetinkam xot?

¹⁸ Xamal taenam. Pe chiekal matabija-emil. Jumtae-emilbej. ¿Ma-aech xotkat xamal nejchaxoela-emil xan koechax isxpoxliajwa, ajil wut naxaeyaxan jiw xaeliajwa?

¹⁹ Xan jalkafulax wut cinco pan cinco mil poejiwliajwa, do jawut, ¿masmatpirankat xamal wulum japi jiw mali? —aech Jesús pejnachalaliajwa.

Japi jumnot wut, jum-aechi:

—Xanal wulax doce matpiran —aechi.

²⁰ Jesús pejme jum-aech pejnachalaliajwa:

—Xan jalkafulax wut siete panes cuatro mil jiwliajwa, jawut, ¿masmatpirankat xamal wulum japi jiw mali? —aech Jesús.

Jesús pejnachala jumnot wut, jum-aechi:

—Xanal wulax siete matpiran —aechi.

²¹ Do jawut, Jesús jum-aech pejnachalaliajwa:

—¿Xamalkat jummatabija-emilfuk? —aech Jesús.

Jesús boejthutpox itliaklan Betsaida paklowaxxot

²² Jesús, pejnachala swapich, chapa'a Betsaida paklowaxxot. Japapaklowaxxot asew jiw buflaeni itliaklan Jesúslel. Japi wuljow Jesús jachaliajwa itliaklan, japon chiekal taeliajwa.

²³ Jesús makxalaech wut itliaklan, buflaechon atnaxach, paklowax tathoetlel. Jesús itfux-alot almintat itliaklan. Do jawut, Jesús itfujacha wut itliaklan, jawut Jesús whajnachaemt wut, jum-aechon itliaklanliajwa:

—¿Xamkat taenamlejen? —aechon.

²⁴ Do jawut, itliaklan chiekal natachaemt wut, jum-aechon:

—Jiw laelp wut, me-ama naechan laelp wut, ja-itfu-an —aech itliaklan.

²⁵ Do jawut, Jesús pejme itfujacha. Jawut chiekal wepachaemslison pej-itfu. Chiekal taenbejpon.

²⁶ Jesús jum-aech:

—¡Nabej fulae' paklowax poxade! ¡Xabua'de nejba poxade! ¡Nawia'mich! —aech Jesús majt itliakalponliajwa.

Pedro jum-aechpox Jesúsliajwa: "Xam Cristowam, Dios to'asponam"

(Mt 16.13-20; Lc 9.18-21)

²⁷ Jesús boejthut wut itliaklan, fulaechon, pejnachala swapich, asatwajnuchan poxade, Cesarea de Filipolel. Fol wuti nuamtat, Jesús whajnachaemt wut pejnachala, jum-aechon:

—¿Achan na-aechkat jiw xanliajwa? —aech Jesús.

²⁸ Japi jumnot wut, jum-aechi:

—Asew jiw jum-aech xamliajwa: 'Japonlap Juan, jiw bautisan. Mat-echpon pejme duk' —aech asew jiw xamliajwa. Asew jiw jum-aechbej xamliajwa: 'Japonlap Elías, Dios pejprofeta. Mat-echpon pejme duk' —aech asew jiw xamliajwa. Asew jiw jum-aechbej xamliajwa: 'Japonlap Dios pejprofetaxot mat-echpon pejme duk' —aech asew jiw xamliajwa —aech Jesús pejnachala.

²⁹ Do jawut, Jesús pejme whajnachaemt wut, jum-aechon pejnachalaliajwa:

—Xamallax, ¿achan na-amkat xanliajwa? —aech Jesús.

Do jawut, Pedro jumnot wut, jum-aechon Jesúsliajwa:

—Xam Cristowam, Dios to'asponam —aech Pedro.

³⁰ Do jawut, Jesús buxfiat wut, nejthu'axtat jum-aechon pejnachalaliajwa:

—¡Japox asew jiw nabej chapae' xan Cristowanponan! —aech Jesús pejnachalaliajwa.

Jesús jum-aechpox, japon tɔpaxaelpoxliajwa
(Mt 16.21-28; Lc 9.22-27)

³¹ Jesús jum-aech pejnachalaliajwa, japon tɔpaxaelpoxliajwa:

—Xan, puexa jiw pakoewkolnan, xabich nabijasaxaelen. Judíos-ancianos, sacerdotespaklochowbej, judíos chanaekabuanapibej, japi xan najumchiyaxael: ‘Japon Cristowa-el, Dios to’aspona-el’ —chiyaxaeli xanliajwa. Samata, naboesaxael wut, tres matkoi wut, Dios xan namat-esaxael pejme dukaliajwan —aech Jesús.

³² Jesús japox jum-aech pejnachala chiekal matabijaliajwa jachiyaxaespoj japonliajwa. Jawut Pedro buflaechon Jesús pejlel nospaeliajwa tamach, Jesús suapich. Do jawut, Pedro buxfiat Jesús jum-aechpoxliajwa.

³³ Pe Jesús natfo’cha asew pejnachalalel taeliajwa. Do jawut, Jesús jum-aech Pedroliajwa: —¡Chijiamde xanxot! Xam japox jum-am, Satanás buxto’a xot. Xam nejchaxoela-emil Dios pijaxan. Asbuan jumch nejchaxoelam ampathatpijaxankal —aech Jesús Pedroliajwa.

³⁴ Do jawut, Jesús la pejnachala, jiwbej. Dolisdo’, puexa jiw pat wut japonxot, Jesús jum-aech:

—Xamal tajnachalwasiam wut, ¡najut babijaxan isampoxan, ma amwut kofim! ¡Potmatkoicha isfulde xan tato’laxpoxan! Asew jiw pijaxtat nabijatam wut, boesasia wutbejpi, ¡nakiowa xamal naexaxisfulde xan tato’laxpoxan!

³⁵ Ampathatat isam wut najut nejxasinkampoxankal, asamatkoi tɔpam wut, napelsaxaelam Diosliajwa. Ja-am wut, duilaximil Diosxotse. Kofam wutlax najut isfulampoxan, isfulam wutlax xan tato’laxpoxan, Dios chiekal naexaxisfulam wutbej, asamatkoi xamal tɔpam wut, napelsaximil Diosliajwa. Ja-am wut, pomatkoicha duilaxaelam Diosxotse.

³⁶ ¿Achaxkat aton kanaxael xabich wuton pejew ampathatat, asamatkoi tɔp wut, Dios kastikaxaes wuton?

³⁷ Aton mosaxil pejewtat pasliajwapon Diosxotse, japon pejew chiekal omjil xot Diosliajwa.

³⁸ Ampathatpijiw xabich is babijaxan. Japi nejchaxoela-elbej Dios. Japi jiw pejwuajnalel xamal nadala wut xanliajwa, tajnaewuajnxalijwabej, xanbej, puexa jiw pakoewkolnan, tadalaxaelen xamalliajwa. Xan jachiyaxaelen taj-ax Dios pejwuajnalel. Tadalaxaelen xamalliajwa, xan kaxa pasaxoekan wut ampathatasik taj-ax pijaxtat, taj-ax Dios pej-ángeles suapich —aech Jesús pejnachalaliajwa, asew jiwliajwabej.

9

¹ Jesús pejme jum-aech pejnachalaliajwa:

—Diachwuajnakolax xan jum-an. Asew jiw xamalxot pejpatɔpax wuajna taeyaxaeli, Dios puexa pejiw tato’al wut ampathatat —aech Jesús.

Jesús xabich chaponanakthianpox Dios pijaxtat
(Mt 17.1-13; Lc 9.28-36)

² Do jawux, seis matkoiyan wut, Jesús fɔlaech muax xabich athɔ poxase julaliajwa. Jawut bu’folon tres pejnachalan. Kaen pawul Pedro. Asan pawul Santiago. Asan pawul Juan.

³ Dolisi, pinamuaxxotse wut, Jesús xabich chaponanakthian. Pijax naxoelax xabich papoeikolax. Ampathatat jasox ajil xabich papoeikolax, me-ama japon pijax, jasox.

⁴ Do jawut, chalechkal kolenje aton natulaelt Jesúsxot. Japi judíos pejwuajnapijiw. Kaen pawul Elías. Asan pawul Moisés. Japi nospaei, Jesús suapich.

⁵ Do jawut, Pedro jum-aech Jesúsliajwa:

—Tajpaklon, pachaem, xanal amxotan wut. Nejxasinkam wut, xanal tres bua-at isaxaelen. Kaebu-at xamliajwa. Asabu-at Moisésliajwa. Asabu-at Eliasliajwabej —aech Pedro Jesúsliajwa.

⁶ Jesús pejnachala japox taen wut, xabich pejlewłapi. Samata, Pedro matabijs-el jumchiyaxaelpox.

⁷ Jawut itlojejen fɔloek japi pejmatwuajasik. Do jawut, japa-itloejentat Dios jum-aechsik: “Ampon taxulan, xabich nejxasinkaxpon, ¡japon naewesfulde!” —aech Dios.

⁸ Do jawut, Jesús pejnachala natadiajt wut, asew kolenje Jesúsxot chiekal ajillisi. Jesús tamach nukaful. Jawut taeni Jesúskał.

⁹ Do jawux, muaxxot baloek wuti, Jesús buxfiat pejnachala asew jiw chapaesamata japi taenpox. Jum-aechon:

—Xan, puexa jiw pakoewkolnan, hasta namat-et wut, xan pejme dukx wutbej, do jawut, xamal asew jiw chapaeyaxaelam taenampox —aech Jesús pejnachalaliajwa.

¹⁰ Japi ow-aech. Chapae-ellisi asew jiw. Nakaewa nawuajnachaemsnapi: “¿Ma-aech xotkat Jesús jum-aech: ‘Hasta namat-et wut, xan pejme dukx wutbej, do jawut, xamal asew jiw chapaeyaxaelam taenampox’ —nak-aechkat Jesús xatissliajwa?” —na-aechi nakaewa.

¹¹ Dolisdo', japi Jesús pejnachala, trespi, wuajnachaeamt wut, jum-aechi Jesúsliajwa:

—Xam Cristowam wut, zma-aech xotkat judíos chanaekabuanapi jum-aech Elíasliajwa: “Wajwuajnapijin Elías matxoela pasaxael. Do jawux, Cristo pasaxael” —aechkat judíos chanaekabuanapi? —aech Jesús pejnachala Jesúsliajwa.

¹² Jesús jumnot wut, jum-aechon:

—Judíos chanaekabuanapi jum-aechpox diachwuajnakolax. Japi jum-aechpox: ‘Matxoela pasaxael kaen, me-ama Elías, jason. Japon puexa jiw chanaekabuanaxael puexa jiw naexasisliajwa Dios. Jasox matxoela jachiyaxael Cristo pasax wuajna’ —aechox, japi jum-aechpox. Dios chajia jum-aechbej: ‘Puexa jiw pakoewkolan xabich nabijasaxael judíos pijaxtat’ —aech Dios. Xanlap japonan, puexa jiw pakoewkolnan —aech Jesús pejnachalali-ajwa.

¹³ Do pejme Jesús jum-aech pejnachalali-ajwa, trespilajwa:

—Diachwuajnakolax xan jum-an. Kaen, Elías jason, patlison. Pe asew jiw babijaxan isiapi, japi islisi babijax japonliajwa. Dios pejjamechan chajia jum-aech japonliajwa jumchiyaxaesox —aech Jesús Juan, jiw bautisan, pejpatwaxliajwa.

*Jesús nakolsax to'apox dep yamxulan pejmatwaxtot
(Mt 17.14-21; Lc 9.37-43)*

¹⁴ Dolisdo', Jesús, tres pejnachala swapich, fulaechlisi asew japon pejnachala poxade. Do jaxotde xabich jiw taenlisi, japi jiw matawiat wut asew Jesús pejnachala, japi kaweta namapi. Jaxot kaeswapich judíos chanaekabuanapi, wuajna nabunloti Jesús pejnachala, namapi swapich.

¹⁵ Puexa jiw taen wuti Jesús, xabich nejchachaemili. Samata, Jesúslel dukpdepi kejachali-ajwa.

¹⁶ Do jawut, Jesús wuajnachaeamt wut pejnachala, jum-aechon:

—¿Achaxkat xamal nabunlotam, judíos chanaekabuanapi swapich? —aech Jesús.

¹⁷ Kaen japixot jumnot wut, jum-aechon:

—Jiw chanaekabuanan, taxulan buflaenx xam dep to'aliajwam nakolsliajwa taxulan pejmatwaxtot. Taxulan naksiyaxil, pejmatwaxtot dep webaes xoton.

¹⁸ Dep pijaxtat chalechkal jawalon. Xabich kaechwathuamabejpon. Xabich buatitibejpon. Do jawut, xabich satat nadadolan. Xan jum-an nejnachala japi to'aliajwa dep nakolsliajwa taxulan pejmatwaxtot. Pe nejnachala xajupa-el to'aliajwapi dep —aech yamxulan pax.

¹⁹ Do jawut, Jesús jum-aech pejnachalali-ajwa:

—Tajnachala, xamal Dios chiekal xanaboeja-emil Dios xajupox dep to'aliajwa. Xabich pin-iamatkoivan xamalxotx. Japamatkoivantatbej xabich naewuajnafulax. Kajachawaetxbej Dios chiekal xanaboejalijawam. Pe xamal Dios chiekal xanaboeja-emilfuk. Buflaemen yamxulan xanle! —aech Jesús.

²⁰ Do jawut, yamxulan buflaenlisi Jesúsleldin. Dep taen wut Jesús, jawut dep pijaxtat yamxulan pejme satat jawal. Do jawutbej, yamxulan satat matariamam. Kaechwathuamabejpon.

²¹ Jesús wuajnachaeamt wut yamxulan pax, jum-aechon:

—¿Masmatkoivan naxulan jasox ja-aech? —aech Jesús.

Pax jumnot wut, jum-aech:

—Xabich chajia ja-aechon. Japox tuadut, jam wutlejen.

²² Pin-iaveces dep pijaxtat jawal jitlel kakamwalijawas. Minlebej jawal bu'lali-ajwa. Samata, xanal nabeltaem! Xajupam wut, xanal nakajachawae'e! —aech yamxulan pax.

²³ Jesús jum-aech yamxulan paxliajwa:

—¿Ma-aech xotkat xan najum-am: ‘Xajupam wut, xanal nakajachawae'e!’ —amkat xanliajwa? Xam Dios naexasitam wut, Dios kajachawaesaxael dep nakolsliajwa naxulanxot —aech Jesús.

²⁴ Do jawut, yamxulan pax nejlakcha wut, jum-aechon:

—Xan Dios naexasitx. Samata, inakajachawae'e kaes pejme chiekal Dios naexasisliajwan! —aech yamxulan pax.

²⁵ Jesús taen wut xabich jiw papasfulpox jaxot, jawut Jesús to'a dep nakolsliajwa yamxulan pejmatwaxtot. Jum-aechon:

—Dep, xam yamxulan buxwuajankijtam. Naetakuatambej. Inakolde japon yamxulan pejmatwaxtot! ¡Kaxa nabej nawias yamxulan pejmatwaxtot poxadin! —aech Jesús deplijaw.

²⁶ Do jawut, dep xabich pinjemetat na-ua wut, yamxulan jawal dep pijaxtat. Do jawut, dep nakolt yamxulan pejmatwaxtot. Yamxulan okaful satat. Me-ama tup wut, ja-aechon. Samata, xabich jiw jum-aech: “¡Taem! Yamxulan chiekal tuplison” —aech japi jiw.

²⁷ Do jawut, Jesús muaxfit yamxulan namat-esliajwa. Do jawut, yamxulan nant.

²⁸ Do japoxwux, Jesús, pejnachala suapich, ba lech wut, japi piajkal wut, pejnachala wuajnaemtas. Jum-aechi Jesúsliajwa:

—¿Ma-aech xotkat xanal xajupa-enil dep nakolsax to'aliajwan yamxulan pejmatruatxot? Me-ama xam, jachi-enil —aechi Jesúsliajwa.

²⁹ Jesús jumnot wut, jum-aechon:

—Me-ama ampon dep, jason, xamal najut nijaxtat xajupaximil to'aliajwam, majt Dios kawuajna-emil wut —aech Jesús.

Jesús pejme jum-aechpox pejpatupaxliajwa

(Mt 17.22-23; Lc 9.43-45)

³⁰⁻³¹ Jesús, pejnachala suapich, japatuajnuaxot nakola wut, fulaechlisi Galilea tuajnu poxade. Japi fulaech wut, Jesús nejxasinka-el asew jiw matabijsliajwas japon jaxotox, pejnachalalal naewuajnaaxael xoton. Do jawut, jum-aechon:

—Xan, puexa jiw pakoewkolnan, asan nawiasaxael tadaelmajiwxot japi naboosalijwa. Xan tupx wut, tres matkoi wut, Dios namat-esaxael pejme dukaliajwan —aech Jesús pejnachalialijwa.

³² Pe japi chiekal jummatubija-elfuk Jesús jum-aechpox. Japi buxdalabej kaes wuajnaemsliajwapi Jesús.

Achan kaes paklonaxaelpox Diosxotse

(Mt 18.1-5; Lc 9.46-48)

³³ Jesús pat, pejnachala suapich, Capernaum paklowaxxot. Batutat wuti, Jesús wuajnaemtas wut pejnachala, jum-aechon japijajwa:

—¿Achaxkat xamal jum-am, nuamtat folam wut? —aech Jesús pejnachalialijwa.

³⁴ Pe japi asbuan jumch boejlach. Jumnos-eli, padala xot. Japi majt nuamtat fol wut, nakaewa najum-aechi: “¿Achankat xatixot kaes paklonaxael?” —aechi nakaewalialijwa.

³⁵ Do jawut, Jesús ek. Ek wut, lalison doce pejnachala kaes moxliajwadin. Jawut jum-aechon japijajwa:

—Xamal puexa jiw tato'lasiam wut, ¡majt pamaknamde puexa jiw kajachawaesliajwam! —aech Jesús.

³⁶ Do jawut, Jesús yamxulan la moxliajwadin, pejnachala pejuwajnael. Do jawut, Jesús yamxulan islanuk wut, jum-aechon pejnachalialijwa:

³⁷ —Yamxulan bu'kultam wut xan tajaxtat, ja-am wut, jawut xanbej chiekal nabu'kulsaxaelam. Nabu'kultam wut, xan kaenan nabu'kuls-emil. Diosbej bu'kulsaxaelam, xan nato'apon —aech Jesús pejnachalialijwa.

Is-elpi chaemilpox Jesúsliajwa, japi, me-ama kajachawaetpox Jesús pijax naewuajna

(Mt 10.42; Lc 9.49-50)

³⁸ Do jawut, Jesús pejnachalan, pawulpon Juan, jum-aech Jesúsliajwa:

—Jiw chanaekabuanan, xanal kaen aton taenx, dep to'aful wut nakolialijwa jiw pejmatruatanxot. Japon aton xam nijaxtat dep to'a nakolialijwa jiw pejmatruatanxot. Pe wajmutpijna-el. Samata, xanal japon fiatx buxkofsliajwapon japox —aech Juan Jesúsliajwa.

³⁹ Jesús jumnot wut, jum-aechon:

—Japon japox is wut, ¡nej is! ¡Nabej fias! Japon koechaxan is wut xan tajaxtat, ja-aech wut, jumchiyaxilon babejjamechan xanliajwa.

⁴⁰ Jiw is-elpi babijaxan xatislialijwa, japi, me-ama nakkajachawaet wut, ja-aechi.

⁴¹ Diachwuajnakolax jum-an. Nejmach-aton xamal kajachawaet wut, tajjiwam xot, japon aton xamal chaxdut wut minkal feliajwam, japon aton Dios kajachawaesaxaes —aech Jesús, Juanliajwa naksiya wut.

Jesús naewuajanpox jiw babijaxan isasamata

(Mt 18.6-9; Lc 17.1-2)

⁴² Jesús pejme jum-aech pejnachalialijwa: “Pomatkoicha jiw babijaxan is, asew jiw to'as xoti. Pe jelxan nanaexasiti is wut babijaxan, asew jiw to'as xoti, to'api jiw babijaxan isliajwa, japi jiw xabich kastikaxaes Dios. Japijajwa kaes pejme pachaemaxael ia' pinanul, jajaera, kaexariama ke'aliajwas, chakakofaliajwas mar poxadik, xabich so'nik poxadik, jaxotdik tupaliajwapi. Ja-aech wut, japi to'axil kaes asew jiw babijaxan isliajwa, jelxan nanaexasiti.

⁴³⁻⁴⁴ Nejke-echantat babijaxan isfulam wutbej, ¡najut naketariowcham, kofaliajwam babijaxan isampoxan! Ja-am wut, kaes pachaemaxaelam, kaeke-em wut pasliajwam Diosxotse. Kofa-emil wut babijaxan isampoxan, ja-am wut, napelsaxaelam inferno poxadik. Jaxotdik toepaxil jit pinjiyax. Japajitxotdikbej tafil tupa-el.

⁴⁵⁻⁴⁶ Nejtuaakantat babijaxan isfulam wutbej, ¡najut natuaktariowcham kofaliajwam babijaxan isampoxan! Ja-am wut, kaes pachaemaxaelam kaetuakam wut pasliajwam

Diosxotse. Kofa-emil wut babijaxan isampoxan, jachi-elasiam wut, xamal napelsaxaelam infierno poxadik. Jaxotdik toepaxil jit pinjiyax. Japajixotdikbej tafil tupa-el.

⁴⁷⁻⁴⁸ Babijax isam wutbej, taenamox nej-itfutut, ja-am wut, inajut na-itfukuim xamal kofaliajwam babijaxan isampoxan! Do ja-am wut, kaes pachaemaxaelam pasliajwam Diosxotse, kae-itfutut wut. Kofa-emil wut babijaxan isampoxan, ja-am wut, xamal napelsaxaelam infierno poxadik. Jaxotdik toepa-el jit pinjiyax. Japajixotdikbej tafil tupa-el" —aech Jesús pejnachalaliajwa.

⁴⁹ "Puexa jiw, infiernoxoti, xabich nabijasaxael japajitat" —aech Jesús pejnachalaliajwa.

⁵⁰ Jesús pejme jum-aech: "Dom pachaem. Dom xakuenka-el wut, chaemil. Dom chaemil wut, pejmeliajwa pachaemaxil. Samata, xamal pachaemaxaelam ampathatat. Me-ama dom pachaem wut, jachiyaxaelam. Nejjiw suapich, duilam wut, jchiekal pachaemde!" —aech Jesús.

10

Jesús naewuajanpox poejiw pelsasamata pejwatho'
(Mt 19.1-12; Lc 16.18)

¹ Jesús nakolt wut Capernaum paklowaxxot, do jawut fulaechlison Judea tujnu poxade, Jordánlajt orientel poxade. Jaxotde pejme xabich jiw papasful japonxot. Do ja-aech wut, pejme taaduton jiw naewuajnalijwa, me-ama japon pejkabuan.

² Do jawut, fariseos mox soepapi Jesúsxot wuajnaemsliajwapi Jesús, Jesús asaxtat jum-aech wut japi tasalaliajwa japoxtat. Samata, fariseos jum-aech:

—¿Tapaéiskat poejiw pelsliajwa pejwatho'? O, ¿tapaes-ésalkat? —aech fariseos.

³ Jesús jumnot wut, jum-aechon:

—¿Achaxkat jum-aech Moisés chajia lelpox xamal najum-ampoxliajwa? —aech Jesús.

⁴ Japi jum-aech:

—Moisés chajia lelpox jum-aech: 'Aton pijow fo'asia wut, japon lelaxael pelfut. Japapelfutat jumchiyaxaelon, ma-aech xot fo'asiapon pijow. Do jawux, palelafut chaxdusaxaelon pijow. Do ja-aech wut, japapelfut chaxdut wut, pachaemaxael japon aton fo'aliajwa pijow' —aech Moisés chajia lelpox —aech fariseos Jesúsliajwa.

⁵ Do jawut, Jesús jum-aech fariseosliajwa:

—Moisés jasox lel, xamal matnaetinkam xot naexasisliajwam Dios.

⁶ Majt wajwuajna, Dios that is wut, kaen aton ispon. Kaeow atowbej ispon.

⁷ Samata, aton fit wut pawis, japi nakolaxael paxxot, penxotbej, japon aton, pijow suapich, pejlel dukaliajwa.

⁸ Do ja-aech wut, japi kolenje, me-ama kaen wut, jachiyaxaeli. Ja-aech wut, japolis, me-ama majt kolenje wut, jachi-ellisi. Amwutjel japi, me-ama kaen wut, ja-aechlisi.

⁹ Samata, aton fo'axil pijow, Dios pijaxtat nakjiya xot —aech Jesús fariseosliajwa.

¹⁰ Do baxael, Jesús, pejnachala suapich, batat wut, pejnachala wuajnaemtas watho' pelsaxliajwa.

¹¹ Do jawut, Jesús jumnot wut, jum-aechon pejnachalaliajwa:

—Aton fo'a wut pijow, japon aton asaow pawis fit wut, japon babijax is Diosliajwa, pijowliajwabej, bu'moejt xoton asaow, pijowa-elpow.

¹² Pawisbej pamal fo'a wut, asan poi fit wutow, japow babijax is Diosliajwa, pamalliajwabej, bu'moejt xotow asan poi, pamala-elpon —aech Jesús.

Jesús kawuajanpox Dios yamxiliajwa
(Mt 19.13-15; Lc 18.15-17)

¹³ Do baxael, jiw buflaen yamxi Jesús poxadin, Jesús ke-osliajwa yamxixot. Jawut pejnachala jum-aech yamxi buflaeniliajwa:

—¡Nabej buflae' yamxi Jesúsleldin! —aechi.

¹⁴ Jesús japox jumtaen wut, palalapon pejnachalaliajwa. Samata, jum-aechon:

—¡Tapaem yamxi buflaeliajwas xanlel! ¡Nabej fias! Dios pejjiw, duilaxaeli Diosxotse, japi, me-ama ampi yamxi, kamta naexasit xoti Dios pejtato'lax.

¹⁵ Diachwuajnakolax xan jum-an. Xamal Dios naexasitam wut, me-ama yamxi, jam wut, pasaxaelam Diosxotse. Dios naexasis-emil wut, pasaximil jaxotse —aech Jesús pejnachalaliajwa.

¹⁶ Do jawut, Jesús kaenanula yamxi isnot wut, jum-aechon yamxiliajwa: "Dios puexa xamal nej kajachawaesfule" —aech Jesús, ke-ot wut yamxixot.

Kemaeyan nospaeipox, Jesús suapich
(Mt 19.16-30; Lc 18.18-30)

¹⁷ Jesús pejme fulaeliajwa wut, kaen aton najae-en Jesúslel. Pat wut, Jesús pejwuajnalel brixtat nukon. Jawut, wuajnaemnt wut, jum-aechon:

—Jiw chanaekabuanan, xam xabich pachaemam. ¿Achaxkat xan nawewe'p isliajwan pomatkoicha dukaliajwan Diosxotse? —aechon.

¹⁸ Jesús jumnot wut, jum-aechon:

—¿Ma-aech xotkat xan najum-am: 'Xam xabich pachaemam' —na-amkat? Kaen Dios xabich pachaem.

¹⁹ Xam matabijtam Dios pejtato'laxan. Moisés chajia lelpox jum-aech: '¡Nabej boese' asan aton! ¡Nabej bu'moejs asaow pawis, nijwa-elpow! ¡Nabej natkowe'! ¡Nabej kechachajbe' asan aton tasalaliajwam, babijax is-elpon! ¡Nabej naekichachajbe'! ¡Nej-ax sitaem, nej-enbej!' —aech Moisés chajia lelpox —aech Jesús.

²⁰ Do jawut, japon kemaeyan jum-aech:

—Jiw chanaekabuanan, xam najum-amoxan, puexa japoxan xan tuadutx naexaxisliajwan, pansianan wut. Amwutjelbej nakiowa japoxan naexaxisfulax —aech kemaeyan.

²¹ Do jawut, Jesús natachaemt wut kemaeyan, beltaenlison. Do jawutbej, Jesús jum-aech: —Xamfuk kaeyax wewe'p isliajwam. ¡Xabua'de nejba poxade! ¡Puexa nejew mowim! Mowam wut, ¡japaplata chaxduim kejila! Ja-am wut, Dios xabich nejchachaemlaxael xamliajwa. Ja-am wutbej, Dios xam chaxduiyaxael xabich pachaempoxan japonxotse. Chaxduiyax daeptam wut, ¡xabua't xan naknanuamsliajwam, tajnachalnamliajwambej! —aech Jesús.

²² Kemaeyan jumtaen wut Jesús jum-aechpox, kemaeyan xabich nejxaejwas, xabich kemaenk xot.

²³ Jesús pejnachalalel natfo'cha wut, jum-aechon japi liajwa:

—Xabich tampoel kemaeya pasliajwa Diosxotse —aech Jesús.

²⁴ Pejnachala xabich nejchaxoelanuil, jumtaen wuti, Jesús japox jum-aech wut. Samata, Jesús pejme jum-aech pejnachalaliajwa:

—Takoew, diachwujnakolax xabich tampoel kemaeya pasliajwa Diosxotse.

²⁵ Xamal matabijtam camello pinjin xot, xajupaxil kuthatuyakre'wuj poxade xensliajwa. Kemaeyanliajwabej, tampoel japon pasliajwa Diosxotse —aech Jesús.

²⁶ Japox jumtaen wut, Jesús pejnachala xabich kaes pejme nejchaxoelanuili. Nakaewa nawujnachaemsna wut, najum-aechi:

—¿Achankatlx bu'weyaxaes? ¿Achankatlx pasaxael Diosxotse? —na-aechi nakaewa.

²⁷ Jesús japi natachaemt wut, jum-aechon:

—Jiw pajut pijaxtat pasaxil Diosxotse. Pelax Dios xajup puexa isliajwa. Samata, Dios xajup jiw bu'weliaw. Dios kajachawaesaxael jiw pasliajwa japonxotse —aech Jesús.

²⁸ Do jawut, Pedro jum-aech:

—Xanal puexa tejew waelax, xam nakfulaeliajwan —aech Pedro.

²⁹ Do jawut, Jesús jum-aech:

—Diachwujnakolax xan jum-an. Nejmach-aton Dios pejbichax nabichliajwa wut, japon waela wut pakoew, pen, pax, paxi, pejbabej, pejsatanbej, jasox is wuton, tajwujjan, chimiawujjan, naexasit xoton, ja-aech wut, japon aton Dios kaes pejme chaxduiyaxaeson.

³⁰ Me-ama kaes cien veces chaxduiyaxaeson ampathatat. Jachiyaxaeson, pakoew, pen, paxi, pejba, pejsatbej, puexa japoxan waela xoton. Japon laeje wutfuk ampathatat, jiw nejweslafulaxaeson. Samata, nabijasaxaelon, xan nanaexasit xot. Asamatkoi, japon tup wut, pasaxaelpon pachaemxotse, Diosxotse, pomatkoicha dukaliajwa.

³¹ Xabich jiw amwutjel paklochowpi ampathatat, asamatkoi japi Diosxotse paklochowaxil Dios pejwujnalel. Xabich jiw lax amwutjel paklochowael-pi ampathatat, japi lax asamatkoi paklochowaxael Diosxotse Dios pejwujnalel —aech Jesús.

*Ampoxtat Jesús jum-aech tres veces japon pejpatupaxliajwa
(Mt 20.17-19; Lc 18.31-34)*

³² Asamatkoi Jesús, pejnachala suapich, asew jiw suapichbej, japi fulaech Jerusalén paklowax poxade. Jesús matxoela fol. Pejnachala fol wut, nejchaxoeli: “¿Ma-aech xotkat Jesús pejlewla-el fulaeliajwa Jerusalén paklowax poxade?” —aechi, nejchaxoel wut. Asew jiw, wuchakal folpi, japi pejlewla. Do jawut, Jesús buflaech doce pejnachala asalel japi kal jumchiliajwapon. Jum-aechon asew jiw isaxaespox japonliajwa Jerusalén paklowaxxot.

³³ Jesús jum-aech: “Amwut Jerusalén paklowax poxaxaes. Jaxotde xan, puexa jiw pakoewkolnan, asew jiw nawiasaxael sacerdotespaklochowxot, judíos chanaekabuanaapixotbej. Japi natasalaxael asew jiw xan naboesaliajwa. Do jawux, xan nawiasaxaeli judíos-elixot.

³⁴ Japi nabu'wujjanpaeyaxael. Naloyaxaelbejpi. Xabich namatwujajselsaxaeli. Do jawux, naboesaxaeli. Tupx wut, tres matkoi wut, Dios namat-esaxael pejme dukaliajwan” —aech Jesús.

*Santiago, Juan swapich, wuljowpox Jesús we-isliajwas chamoeyax
(Mt 20.20-28; Lc 22.24-30)*

³⁵ Do jawut, Santiago, Juan swapich, japi Zebedeo paxi, mox soepapi Jesúsxot. Do jawut, jum-aechi:

—Jiw chanaekabuanan, xanal wuljowx xam nawe-isliajwam chamoeyax xanalliajwa — aechi Jesúsliajwa.

³⁶ Jesús jumnot wut, jum-aechon japi liajwa:

—¿Achaxkat we-isaxaelen, chamoeyax, xamalliajwa? — aech Jesús.

³⁷ Japi jumnot wut, jum-aechi:

—Xam jiw tato'lam wut ampathatat, xanal natapaem chalakaliajwan xam nejkolalelje! ¡Natapaembej xanal puexa jiw tato'laliajwan, xam swapich, xanalbej jiw nasitaeliajwa! — aechi Jesúsliajwa.

³⁸ Jesús jum-aech:

—Xamal matabija-emil nawuljowampox. Xan xabich nabijasaxaelen jiw pijaxtat. ¿Xamalkat-is xajupaxaelam nabijasliajwam, me-ama xan, jachiliajwam? Xanbej tɔpaxaelen asajiw pijaxtat. ¿Xamalkat-is xajupaxaelam tɔpaliajwam, me-ama xan, jachiliajwam? — aech Jesús japi liajwa.

³⁹ Japi jumnot wut, jum-aechi:

—Diachwajnakolax xanalbej xajupx nabijasliajwan, me-ama xam, jachiliajwan — aechi Jesúsliajwa.

Jesús jumnot wut, jum-aechon:

—Diachwajnakolax xamalbej tajaxtat nabijasaxaelam. Tɔpaxaelambej. Me-ama xan, jachiyaxaelam.

⁴⁰ Pe tajkolalelje xamal chalakaliajwampox, puexa jiw tato'laliajwambej, xan swapich, japoxliajwa taj-ax Dios xan natapae-el tajut japox jumchiliajwan. Taj-ax Dios, japon pajut tapaeyaxael tajkolalelje chalaxaxaelpi, xan swapich, japi liajwa chajia wechaemtas xotlisi — aech Jesús.

⁴¹ Asew Jesús pejnachala, diezpi, japox jumtaen wut, palalapi Santiagoliajwa, Juanliajwabej, wuljow xoti japox.

⁴² Do jawut, Jesús puexa pejnachala la, japi kaes moxliajwa Jesúsxot. Dolisi, japi kaes mox wut Jesúsxot, jawut Jesús jum-aech pejnachalaliajwa:

—Xamal matabijam asatɔajnuhanpijiw, Dios naexaxis-eli, paklochow, japi tato'al wut, tato'la-el pachaempoxantat. Japi jiw tato'al pamamaxtat asew jiw matabijaliajwas japi kaes pejme paklochowpox.

⁴³ Pelax xamal jasoxtat tato'laximil. Nejmach-aton xamalxot kaes xabich paklonasia wut, japon majt xamal kajachawaesfulaxael.

⁴⁴ Nejmach-aton kaes paklonasia wut xamalxot, japon majt, me-ama esclavo wut, jachiyaxaelon xamalliajwa.

⁴⁵ Ja-echlap-is xanliajwa. Xan, puexa jiw pakoewkolnan, fulae-enil ampathatat jiw xan nakajachawaesfulaliajwa. Xanlax fulaekx jiw kajachawaesfulaliajwan, jiw bu'weliajwanbej, wemosliajwan japi babijaxan ispoxan, tɔpx wut cruztat — aech Jesús pejnachalaliajwa.

Jesús boejthutpox itliaklan

(Mt 20.29-34; Lc 18.35-43)

⁴⁶ Jesús, pejnachala swapich, pat Jericó paklowaxxot. Do baxael, japapaklowax nako-laxxot nakolaliajwa wut, xabich Jerico paklowaxpijiwbej nafulchala. Do jaxot kaen itliaklan ek japannambabu'tat, jiw xaxenapi wuljoeliajwa platafahan. Japon pawul Bartimeo. Japon Timeo paxulan.

⁴⁷ Do jawut, jumtaen wuton Jesús, Nazaret paklowaxpijin, mox xensaxaelpox, jawut, japon itliaklan nejlasful wut, jum-aechfulon:

—Jesús, David pamon, xan nabeltaem! — aechfullison.

⁴⁸ Xabich jiw buxfiachpon boejlach ekaliajwa. Ja-aech wut, itliaklan kaes pejme nejlasful wut, jum-aechfulon:

—David pamon, xan nabeltaem! — aechfulon, nejlasful wut.

⁴⁹ Do jawut, Jesús japox jumtaen wut, nukjabapon. Jum-aechon:

—¡Jum-amde itliaklan xanlel fulaeliajwadin! — aech Jesús.

Do jawut, itliaklan las wut, jum-aechipon:

—¡Nejchachaemilde! ¡Nande! Jesús xam la moxliajwam japon poxade — aechipon.

⁵⁰ Do jawut, itliaklan thuch naxoelax asalelaxach fo'a. Do jawut, nancha wut, moxdepon Jesús poxade.

⁵¹ Jesús wuajnachamt wut, jum-aechon itliaklanliajwa:

—¿Achaxasiamkat xam? ¿Achaxkat isaxaelen xamliajwa? —aech Jesús itliaklanliajwa.
 Itliaklan jumnot wut, jum-aechon:
 —Jiw chanaekabuanan, i xan taesian! —aechon.
⁵² Jesús jum-aech:
 —i Xabua'de nejmach! Amwutjel xam pachaemam, chiekal naxanaboejtam xot —aech Jesús.
 Do jawut, itliaklan chiekal taenlison. Jawutbej, Jesús nakfollison.

11

Jesús patpox Jerusalén paklowaxxot
 (Mt 21.1-11; Lc 19.28-40; Jn 12.12-19)

¹ Jesús, pejnachala suapich, pat mox Jerusalén paklowaxxot. Japi pat Betfagé paklowaxachxot, Betania paklowaxachxotbej. Jaxot olivonaechan nuil mñaxleltat. Jaxot Jesús kolenje pejnachalan wuajna to'achon.

² To'a wut, jum-aechon:
 —i Xabua'de japapaklowaxach wuajnadexot! Jaxotde pa'mach wut, taeyaxaelam bur jelti'san, wu'ke'taspon. Japabur chinax aton tua-eka-esalfuk. ¡Jolde! Do jawut, jnawebuflaeman!

³ Jaxotpijin xamal wuajnaechaemt wut, jum-aech wuton: '¿Ma-aech xotkat bur joltam?' —aech wut, i jum-amo japon aton: 'Wajpaklon wewe'pas bur. Toet wut, pejme wiasaxaelon' —amo japon aton! —aech Jesús, buxto'a wut kolenje pejnachalanliajwa.

⁴ Do jawut, japi kolenje fulaechlisi. Patlisi japapaklowaxachxot. Jaxot bafafatabijla bur jelti'san taeni. Bur ke'tas nuammat. Do jawut, joltipon buflaeliajwadin Jesús poxadin.

⁵ Do jawut, jaxot nuili jum-aechi japijiajwa:
 —Xamal, ¿achaxkat isam? ¿Ma-aech xotkat bur joltam? —aechi.
⁶ Jesús pejnachala jumnot wut, jum-aechi Jesús buxto'aspo. Do jawut, jaxot nuili, japi tapaei Jesús pejnachala bur buflaeliajwa Jesús poxadin.

⁷ Do jawut, japi bu'pat wut Jesúsxot, tam-owalisi thuch naxoeipoxan Jesús tua-ekaliajwa. Do jawut, Jesús tua-eklison bur.

⁸ Jesús fulaeyaxaech poxade, xabich jiw thuch naxoeipoxan ba'a nuammat. Asew japixot cha-aelnaedalan tasiapa, pa-uafpi, owaliajwa nuammat Jesús pejwuajnalel, sitaen xoti Jesús.

⁹ Asew japixot matxoela fol. Asew jiw wuchakal folbej. Puexa jiw nejlasful, xabich nejchachaemil xoti Jesúsliajwa. Nejlasful wut, jum-aechfulbejpi:

—¡Aleluya! ¡Ampon fulaenpon Dios pijaxtat! Samata, i xabich pachaempon!
¹⁰ ¡Pachaempon, Israel tuajnapijiw pejrey! ¡Ampon rey chiekal tato'laxael! Me-ama wajwuajnapijin, rey David, chiekal tato'al wut, jachiyaxaelon. ¡Dios, athupijin, japon xabich pachaem! —aechfuli.

¹¹ Jasoxtat Jesús pat Jerusalén paklowaxxot. Dios pejtemplobaxot lech wut, puexa chiekal taenpon. Do jawut, Jesús nawiat, doce pejnachala suapich, Betania paklowaxach poxade, xabich tuila xotliso.

Jesús jum-aechpox, higonae baechjil wut
 (Mt 21.18-22)

¹² Kandiawa wut, Jesús, pejnachala suapich, nakola Betania paklowaxachxot. Do jawut, Jesús litaxaela.

¹³ Atuuajxach wut, taenon higonae xabich pa-uafpox. Samata, mox taechon, pabaech wut tusliajwa, xaeliajwabej. Pe mox taech wut, japanae xabich pa-uafkal, naebaech naboematkoiya-el xotfuk.

¹⁴ Do jawut, Jesús jum-aech higonaeliajwa:
 —¡Kaes naboesaximil! ¡Jiw kaes nejbaech xaeyaxilbej! —aech Jesús.
 Pejnachala jumtaen Jesús jum-aechpox.

Jesús to'apox nakolaliajwa Dios pejtemplobatat mowapi, wuajtibej
 (Mt 21.12-17; Lc 19.45-48; Jn 2.13-22)

¹⁵ Do jawut, Jesús, pejnachala suapich, pejme pat Jerusalén paklowaxxot. Do jaxotde wut, Jesús low Dios pejtemploba. Jaxot Jesús taen jiw mowapi, wuajtibej. Jesús to'a japi jiw nakolaliajwa tathoetade. Plata xanafokpi pejmesan wefulixabapon. A-u mowapi, japi pejtua-ekaxan wewuajababejpon.

¹⁶ Jesús tapae-elbej jiw xalaeliajwa pejew Dios pejtemplobatathoetlel.
¹⁷ Naewuajan wut, jum-aechon japi jiwliajwa:

—Dios pejjamechan, chajia lespox, jum-aech Dios jum-aechpox pejtemplobaliajwa: 'Tajba kawuajnaba wulxael, pothatapijiw xan nakawuajnalialjwa' —aech Dios jum-aechpox. Pe xamallax Dios pejtemploba kethaka pejba padofam —aech Jesús.

¹⁸ Sacerdotespaklochow, judíos chanaekabuanapibej, japi jumtaen Jesús jum-aechpox. Samata, nakaewa najum-aechi: “¿Machiyaxaeskát Jesús boesaliajwas?” —na-aechi nakaewa. Pe paklochow pejlewla Jesúsliajwa, puexa jiw xabich nejxasink xot Jesús naewuajanpoxan.

¹⁹ Tuila wut, Jesús Jerusalén paklowaxxot nakolt, pejnachala suapich.

Higonae majowpox
(Mt 21.20-22)

²⁰ Kandiawasap wut, Jesús, pejnachala suapich, xena wut, taenlisi higonae. Japanae chiekal majow. Tathinbej chiekal majow.

²¹ Pedro nejchafaet Jesús jum-aechpox higonaeliajwa. Samata, jum-aechon Jesúsliajwa: —Jiw chanaekabuanan, inatachaemde higonae! Kaeliw xam jum-ampox higonaeliajwa, diachwuajnakolax ja-aechlisox. Amwutjel chiekal majow —aech Pedro.

²² Do jawut, Jesús jum-aech pejnachalaliajwa:

—¡Dios chiekal xanaboejim japon xamal kajachawaesliajwa!

²³ Diachwuajnakolax xamal Dios chiekal xanaboejam wut, jum-am wut ampamuaxliajwa: ‘¡Napia’e amxot mar poxamik!’ —am wut, japamuax napiasaxael jaxot. Pelax xamal kolenejchaxoelaxam wut Diosliajwa, ja-am wut, japamuax napiasaxil.

²⁴ Samata, xamal jum-an. Dios kawuajnam wut, ¡chiekal xanaboejim japon wuljowampoxan xamal chaxduiliajwa! Jasoxtat kawuajnam wut, diachwuajnakolax Dios xamal chaxduiyaxael wuljowampoxan.

²⁵ Xamal Dios kawuajnam wut, nalala wutfak asan aton isopxliajwa, ¡xamal japon aton beltaem! Ja-am wut, waj-ax Dios, athupijin, xamal beltaeyaxaelbej babijaxan isampoxanliajwa.

²⁶ Xamal beltae-emil wut asew jiw, Diosbej xamal beltaeyaxil babijaxan isampoxanliajwa —aech Jesús pejnachalaliajwa.

Jesús wuajnachaehtaspox, achan to'aspon choef mowapi nakolax to'aliajwapon Dios pejtemplobatat

(Mt 21.23-27; Lc 20.1-8)

²⁷ Jesús, pejnachala suapich, pejme pati Jerusalén paklowaxxot. Do jawut, Dios pejtemplobaxot laelpi. Jaxot sacerdotespaklochow, judíos chanaekabuanapibej, ancianosbej, japi mox soepa Jesúsxot.

²⁸ Do jawut, Jesús wuajnachaehtas wut, jum-aechi:

—¿Achankat xam to'am choef mowapi nakolax to'aliajwam Dios pejtemplobatat? —aech paklochow, wuajnachaeht wuti Jesús.

²⁹ Jesús jumnot wut, jum-aechon:

—Xan-is xamal wuajnachaehtasaxaelen asax. ¡Majt chiekal najumno'e! Chiekal najumnotam wut, do jawux, xamalbej jumnosaxaelen xan nawuajnachaehtampox.

³⁰ ¿Achankat Juan to'as jiw bautisaliajwa? ¿Dioskaton to'as? O, ¿jiwkaton to'as Juan bautisaliajwa jiw? ¡Najumno'e! Chiekal najumnotam wut, do jawut, xamal jumchiyaxaelen, achan nato'apoxat japox xan isx —aech Jesús paklochowliajwa.

³¹ Do jawut, japi nakaewa najum-aechi: “Xatis jumtis wut: ‘Juan Dios to'as jiw bautisafulaliajwa’ —tis wut, Jesús nakjumchiyaxael: ‘¿Ma-aech totkat xamal naexasis-emil Juan jum-aechpox?’ —nakchiyaxael Jesús xatisliajwa.

³² Jumtis wutlax: ‘Juan jiw to'as jiw bautisafulaliajwa’ —tis wut, japox jumtis wut, jiw xabich palalaxael, puexa jiw jum-aech xot pejnechaxoelaxantat Juanliajwa: ‘Diachwuajnakolax Juan, jiw bautisan, jum-aech Dios buxto'aspojan’ —aech xoti” —aech paklochow nakaewaliajwa. Samata, japi paklochow xabich pejlewla jumchiliajwa japox Jesúsliajwa.

³³ Do jawut, paklochow jumnot wut, jum-aechi:

—Jalape. Xanal matabija-enil, achan Juan to'as jiw bautisaliajwa —aechi.

Do jawutbej, Jesús jum-aech:

—Xan-is xamal jumchiyaxinil, achan nato'a xan japox isliajwan —aech Jesús paklochowliajwa.

12

Pamak babejchowpox

(Mt 21.33-46; Lc 20.9-19)

¹ Jesús jiw naewuajan wut, wuajantat jum-aechon: “Kaen aton uva mutha. Do jawux, uwalul chaxajajal ia'tat. Isbejpon uva-ufan jukax uwalulxot. Do jawux, isbejpon japalultat cha-aelbach, athupox, uwalul tataeflaliajwa, uva foi wut. Do jawut, uwalulpijin asew pamakjiwliajwa wuljaet pejlul piach wetataeflaliajwas, japon pejwalela. Japi bu'pat wut,

jum-aechon: 'Xan fulaeyaxaelen asatwajnualel atwaj. Xan ajinil wut, xamal tajlul chiekal nawetataeflaxaelam' – aech uwalulpijin. Do jawux, chijjalison.

² "Asamatkoi, uva foi wut, uwalulpijin kaen pamakan to'a, japon wuljaesliajwa uva pejpaklonliajwa. Do jawut, fulaenlison uwalul poxadin.

³ Pe pat wuton uwalul tataefulpixot, japi jaelt fulaenpon uva wuljaesliajwa. Do jawut, baespon. Do jawutbej, ke-etat nawiasax to'aspon.

⁴ Do pejme uwalulpijin asan pamakan to'a. Jawut japon fulaenlison uwalul poxadin. Pat wuton uwalul tataefulpixot, japi jaelt fulaenpon uva wuljaesliajwa. Jawut xabich matnaeboesason. Jumtisbejpon babejjamechan. Do jawut, ke-etat nawiasax to'ason.

⁵ Do pejme uwalulpijin asan pamakan to'a japon wuljaesliajwa uva. Dolison, pat wut uwalul tataefulpixot, uwalul tataefulpi boesa fulaenpon uva wuljaesliajwa. Do jawut, uwalulpijin asew pamak to'a. Japi pat wut uwalul tataefulpixot, japibej baes. Asew japixot twp, fulaeni uva wuljaesliajwa.

⁶ "Do jawut, uwalulpijin kaen wenamans to'aliajwa. Wenamanspon uwalulpijin paxulan, xabich nejxasinkpon. Do jawut, japon taxdukakolaxtat to'apon paxulan. Uwalulpijin nejchaxoel paxulanliajwa: 'Uwalul tataefulpi, japi taen wut taxulan nawesitaeyaxaelipon' – aechon uwalulpijin, nejchaxoel wut.

⁷ Pe uwalul tataefulpi taen wuti uwalulpijin paxulan, nakaewa najum-aechi: '¡Tae'nik uwalulpijin paxulan! Asamatkoi pax naetup wut, japon pijax wulxael, uwalul. Samata, ma amwut boesaxaeson uwalul wajaxkal chiekal namanaliajwa' – na-aechi nakaewa.

⁸ Uwalulpijin paxulan pat wut japixot, japi jaeltason. Do jawutbej, boesason. Jawut jutipon uwalulxot" – aech Jesús jiw naewetiliajwa.

⁹ Do jawut, Jesús wuajnachaeht jiw naeweti japuwajan. Jum-aechon: "¿Achaxkat xamal nejchaxoelam uwalulpijinliajwa? ¿Achaxkat isaxael uwalulpijin uwalul tataefulpiliajwa? Xan tajut jum-an. Uwalulpijin chakifulaeyaxael uwalul tataefulpi kastikaliajwa, beliajwabejpon. Do pejme asew jiw tataeflax to'axaelon uwalul" – aech Jesús.

¹⁰ Jesús pejme jum-aech:

–Xamal bej xaljowambej Dios pejjamechan, chajia lelspx, jum-aech wut xanliajwa: 'Jiw ia'ba is wut, kaet ia'tliajwa nakaewa najum-aechi: "Ampot ia't chaemil" – na-aechi ia'tliajwa. Do jawux, asan aton japot ia't fit. Japon jum-aech japot ia'tliajwa: "Ampot ia't, puexa ia'xot, kaes pejme xabich pachaem taxso'tpijtliajwa, ba chiekal mamnikaliajwa" – aechon.

¹¹ Samata, japox xabich pachaem xatisliajwa' – aech Dios pejjamechan, chajia lelspx, xanliajwa – aech Jesús, jiw naewajan wut.

¹² Do jawut, paklochow pajut matabija, Jesús jiw naewajan wut uwalul tataefulpiliajwa, japox jum-aechon paklochowliajwa. Samata, jawut Jesús jaelsasias buflaeliajwas, Jesús jiw jebatat jeliajwas. Pe paklochow pejlwla jiwliajwa. Samata, Jesús waelti tamach. Do jawut, fulaechlisi pejlel.

*Impuesto mosaxliajwa, Jesús wuajnachaehtaspx
(Mt 22.15-22; Lc 20.20-26)*

¹³ Do jawux, paklochow to'a Jesús poxade, kaeswapich fariseos, Herodes pejmupijiwbej, Jesús asax jum-aech wut, tasalaliajwapi Jesús.

¹⁴ Do jawut, pat wuti Jesúsxot, jum-aechi:

–Jiw chanaekabanan, xanal matabijax xam diachwuajnakolax chiekal jum-am. Xam buxdala-elbej diachwuajnakolaxpox naewuajnaliam puexa jiwliajwa, nejlewla-el xot jiw nejchaxoelpox xamliajwa. Xam naewuajnam diachwuajnakolaxpox jiw chiekal duilaliajwa, me-ama Dios nejxasink. Samata, xanal matabijasian. ¿Pachaemkat xatis mosliajwas impuesto Roma tuajnupijiw tato'lan? ¿Mosaxaeskat? O, ¿mosaxilsalkat? – aech paklochow, wuajnachaeht wuti Jesús.

¹⁵ Jesús pajut matabijt tasalaxaespx, jumnot wuton asaxtat wuajnachaehtaspxliajwa. Samata, Jesús jum-aech japiliajwa:

–¿Ma-aech xotkat xan naxapaejtam? ¡Nawexalaeman kaekafef xan taeliajwan! – aech Jesús.

¹⁶ Do jawut, xalaenlisi kaekafef Jesúslel. Jawut Jesús wuajnachaeht wut, jum-aechon:

–¿Achan pejxu-aelkat ampakafefat? ¿Achan pejwulbejkat ama lelspx ampakafefat? – aech Jesús japiliajwa.

Do jawut, japi jumnot wut, jum-aechi:

–Roma tuajnupijiw tato'lan, japon pejxu-ael, pejwulbej – aechi.

¹⁷ Do jawut, Jesús jum-aech:

–¡Roma tuajnupijiw tato'lan, japon pejewpi japon chaxduim, motam wut impuesto! ¡Pe Dios pejewpi, Dios chaxduim! – aech Jesús.

Do jawut, japi jiw xabich natachaemana, Jesús chiekal jumnot xot.

Asamatkoi mat-eyaxaespox tupi pejme duilaliajwa
(Mt 22.23-33; Lc 20.27-40)

¹⁸ Saduceos asanejchaxoelax. Japi jum-aech: “Jiw tup wut, kaelel chiekal napelt. Asamatkoi mat-eyaxisalbej pejme duilaliajwa” —aechi asbuan jumch. Do asamatkoi, kaesapich saduceos pat jesús taeliajwa. Pat wuti, japi wuajnaemnt jesús.

¹⁹ Jum-aechi wuajantat:

—Jiw chanaekabuanan, Moisés chajia lelpox jum-aech: ‘Aton pijow naetup wut naxuwla-elaxtat, patupan pakoewan naman wut, japon japow fisaxael. Ja-aech wut, japon naxuwlaelaxael japowtat pakoewan tuponliajwa’ —aech Moisés chajia lelpox —aechi Jesúsliajwa.

²⁰ Do jawut, japi kaes jum-aech: “Kaen aton seis pakoew. Matxoelapijin pawis fit. Pe baxael japon tup naxuwla-elaxtat pijowxot.

²¹ Do jawutbej, wuchakalpijin japow fit. Pe baxael japonbej tup naxuwla-elaxtat japowxot.

²² Puexa japon pakoew, seisp, nadaepti nakjiyaxtat japowtat. Pe chinax kaen japixot naxuwla-el japowtat. Do jawux, taxdukakolaxtat japowbej tup.

²³ Tupi mat-ias wut pejme duilaliajwa, jawut sietepixot, ¿chankat pijowaxael japow?” —aech saduceos Jesúsliajwa.

²⁴ Jesús jumnot wut, jum-aechon saduceosliajwa:

—Xamal japox jum-am wut, nejmach jum-am, matabija-emil xot Dios pejjamechan, chajia lelpox, jum-aechpox. Matabija-emilbej Dios xajuprox puexa isliajwa.

²⁵ Tupi mat-ias wut japi duilaxael Diosxotse. Jaxotse poejiw, watho'bej, pejme nakjiyaxil. Me-ama Dios pej-ángelx nakjiya-el, jachiyaxaelbej, tupi mat-ias wut pejme duilaliajwa.

²⁶ ¿Xamalkat xaljoemil Moisés chajia lelpox, tupi mat-eyaxaespoxlialjwa pejme duilaliajwa? Japawuajanaxot Dios chajia jumdut wut, jum-aechon boejtchnaechxotdin. Jawut Dios jum-aech tupi mat-eyaxaespoxlialjwa pejme duilaliajwa. Do jawut, Dios jum-aech Moisésliajwa: ‘Xanfuk amwutjel Abraham, Isaac, Jacobbej, japi peJDiosnan’ —aech Dios.

²⁷ Samata, Dios naexasiti matabija, asamatkoi tup wuti pejme duilaxaelpox. Japi chiekal matabijabej, chajia wuajna tupi, japi napels-elpox. Samata, Abraham, Isaac, Jacobbej, japi amwutjel duilafal Diosxotse. Xamal saduceos chiekal matabija-emil, jum-am wut: ‘Jiw tup wut, chiekal kaelel napelt. Tupi mat-eyaxisal pejme duilaliajwa’ —am wut, —aech Jesús saduceosliajwa.

Dios pejtato'lanxot, masox kaes pejme pachaem
(Mt 22.34-40)

²⁸ Jesús chiekal jumnot wut, saduceos, fariseosbej, jawutbej kaen judíos chanaekabuananapumtaen. Samata, japonbej mox soepan Jesúsxot wuajnaemntliajwa. Do jawut, jum-aechon:

—Jiw chanaekabuanan, Dios xabich tato'al jiw naexasisliajwa. ¿Achatato'laxxotkat kaes pejme pachaem Dios tato'alpox jiw naexasisliajwa? —aech judíos chanaekabuanan.

²⁹ Jesús jumnot wut, jum-aechon:

—Amrawuajan kaes pejme pachaem jiw chiekal naexasisliajwa: ‘Israel pamojiwam, jumtaem chiekal! WajDios, japon kaen wajpaklokolan.

³⁰ Samata, ¿chiekal nejasinkde Dios wajpaklokolan! ¿Xabich nejasinkdebej Dios puexa nejnejchaxoelaxtat! ¿Xabich tanbichfuldebejpon puexa nejpamamaxtat!’ —aechox.

³¹ Asawuajan, wuchakal pejuwajan, Dios tato'alpox, japox jum-aechbej: ‘¿Chiekal nejasinkde jiw! Me-ama xam najut nanejasinkam wut, jja-amde asew jiwliajwa!’ Kolewuajan, Dios tato'alpoxan, japawuajanaxot, do kaes asawuajan ajil, xabich kaes pachaemwuajan —aech Jesús judíos chanaekabuananliajwa.

³² Do jawut, judíos chanaekabuanan jum-aech Jesúsliajwa:

—Jiw chanaekabuanan, xam naksiyam diachwuajnakolaxpox. Dios pejjamechan, chajia lelpox, jum-aech: ‘Dios kaen. Kaes asan Dios ajil’ —aechox.

³³ Diachwuajnakolax pachaem xatis Dios chiekal nejasinkalialjwas puexa wajnejchaxoelaxtat. Pachaembej Dios tanbichliajwas puexa wajpamamaxtat, nejasinkas xot Dios. Pachaembej asew jiw nejasinkalialjwas. Me-ama xatis wajut nanejasinkas wut, jachiyaxaes asew jiwliajwa. Japoxanlap xabich pachaem xatis isliajwas. Japoxlap kaes pejme pachaem Diosliajwa, naexasich wut japoxan. Me-ama choef chabowaspoxan altarmatwuajtat Dios pej-ofrendaliajwa, jachi-el japoxan —aech judíos chanaekabuanan.

³⁴ Jesús jumtaen wut judíos chanaekabuanan chiekal jumnotpox, jawut Jesús jum-aech judíos chanaekabuananliajwa:

—Xanfuk kaesapich wewe'p chiekal naexasisliajwam Dios —aech Jesús.

Dolisdo' jawut, jiw pejlewla kaes asax wuajnaechaemsaxtat xapaejsliajwapi Jesús.

Cristo, rey David pamonpox, pe Cristo paklonbej Davidliajwa
(Mt 22.41-46; Lc 20.41-44)

³⁵ Jesús jiw naewuajan wut Dios pejtemplobatat, Jesús wuajnaechaemt wut, jum-aechon japi naewetilajwa:

—¿Ma-aech xotkat judíos chanaekabuwanapi jum-aech: 'Cristo nalaelt wut, japon rey David pamonaxael' —aechkat judíos chanaekabuwanapi?

³⁶ David pajut jum-aech wut Espiritu Santo pijaxtat, jum-aechon Cristoliajwa:

'Dios jum-aech tajpaklokolanliajwa: "¡Ekde tajpoklalel jiw tato'lalajwam, xan suapich! Ekam wutfuk tajpoklalel, xan malechaxaelen nadaelmajiw. Malechax wut, japi jiw naexasifulaxael xam tato'lampoxan" —aech Dios tajpaklokolanliajwa' —aech rey David chajia lelsxot Cristoliajwa.

³⁷ David chajia jum-aechbej Cristoliajwa: 'Tajpaklokolan' —aechon Cristoliajwa. Samata, Cristo, diachwuajnakolax rey David pejpaklokolanpon. Pe Cristo David pamonbej —aech Jesús pajutliajwa, jum-aech wut jiw chiekal jummatajibialijwa japon Dios paxulanpon.

Xabich jiw nejchachaemil, jumtaen wuti Jesús jum-aechpox.

Jesús jum-aechpox jiw matabijialijwa fariseos, judíos chanaekabuwanapibej, pejbu'wuajanpox

(Mt 23.1-36; Lc 11.37-54; 20.45-47)

³⁸ Jesús pejme jiw naewuajan wut, jum-aechon:

—¡Chiekal taem! Me-ama judíos chanaekabuwanapi, ¡nabej ja-aech' xamal! Japi nejxasink pakchownaxoeyaxan jiw chiekal sitaeliajwas. Nejxasinkbejpi jiw saludaliajwas xabich sitaeyaxtat, xabu'kulas wut paklowaxthialaxanxot.

³⁹ Japi judíos naewuajnaabachantat wut, wuajna tuachalakaxan nuilpi paklochow kaes sitaenspi chalakaliajwapitat, japatua-ekaxantat japi chalax puexa jiw taeliajwas. Ja-aechbejpi, fiestanxot wut. Japi nejxasink chalakaliajwa kaes pachaempoxantat.

⁴⁰ Japi naekichachajba watho', pamaljiw naetupsi, wenosliajwa japi watho' pejew. Lowpi judíos naewuajnaaba piach Dios kawuajnalajwa, jiw taens wut jumchiliajwas: 'Diachwuajnakolax ampi jiw xabich pachaem' —chiliajwas. Samata, Dios xabich kastikaxaesi —aech Jesús judíos chanaekabuwanapiliajwa.

Pamal naetupspow, kejilpow, chaxdutpox ofrenda Diosliajwa
(Lc 21.1-4)

⁴¹ Asamatkoi Jesús mox ek ofrenda jiaxot Diosliajwa, templobatat. Jaxot Jesús taen, jiw jia wut plata. Xabich kimaeya plata xabich jiapi.

⁴² Do jawut, jaxot patbej pamal naetupspow. Japowbej jek kolekafef Dios pej-ofrendaliajwa. Japakafeaex, cobrefaex, xabich omjillejen.

⁴³ Jesús japox taen wut, lalison pejnachala kaes moxaliajwadin japonxot. Jaxot wuti, Jesús jum-aech pejnachalaliajwa:

—Diachwuajnakolax xan jum-an. Ampow, pamal naetupspow, xabich kejil. Pe Dios kaes pejme nejchachaemil japow pej-ofrendaliajwa. Japow, me-ama kaes pejme chaxdut wut, ja-aechow Diosliajwa. Me-ama puexa asew jiw, chaxduw wut, jachi-elow japow.

⁴⁴ Puexa asew jiw chaxduw ofrenda wenamaspoxantat. Japowlax wewe'paspoxanliajwa, puexa chaxdutow Diosliajwa —aech Jesús.

13

Jesús jum-aechpox Dios pejtemploba toesaxaespoxliajwa
(Mt 24.1-2; Lc 21.5-6)

¹ Jesús nakolt wut templobaxot, kaen pejnachalan jum-aech:

—Jiw chanaekabuwanan, ¡tae'nik Dios pejtemploba, asabachanbej! ¡Japabachan xabich chimiabachan! ¡Japa-ia'bej xabich pinanul! —aech Jesús pejnachalan.

² Jesús jum-aech:

—Xamal taenampi, pinabachan, japoxan asamatkoi chiekal toesaxaesi. Asatujnchanpijiw japabachan toesaxael. Dios pejtemplobabej toesaxaeli. Japox ja-aech wut, kaet ia't namanaxil nakae-ia'tmatwuajtat —aech Jesús.

That toepax mox pawuajna wut, majt matxoela jachiyaxaelpoxan
(Mt 24.3-28; Lc 17.22-24; 21.7-24)

³ Do jawux, Jesús, pejnachala suapich, fulaech Olivonaechanmuax poxade. Japamuax Dios pejtemplobatabijla ek. Jaxotde pa'a wut, Jesús ek, pejnachala suapich. Pedro, Santiago, Juan, Andrés, japi piakal wut, wuajnaechaemti Jesús.

⁴ Jum-aechi Jesúsliajwa:

—Jiw chanaekabuanan, jxanal chiekal nachanaekabuanim! ¿Maswutkat japox jachiyaxael, xam jum-ampox Dios pejtemplobaliajwa? ¿Achaxankat taeyaxaes, mox pawuajna wut, xam jum-ampoxan jachiliajwa wut? —aechi.

⁵ Jesús jumnot wut, jum-aechon:

—jChiekal taem asew jiw xamal naekichachajbasamata!

⁶ Xabich jiw pasaxael, me-ama xan. Japi pajut najumchiyaxael: ‘Xan Cristowan’ —nachiyaaxeli. Pe japi Cristowaxil. Xabich jiw naexaxisaesi, japi naekichachajba wut.

⁷ “Asamatkoi xamal wultaenam wut soldaw xabich nabapox mox, o, atuaj, jxamal nabej nejlewle! Japoxan majt jachiyaxael, mox pawuajna wut that toepaliajwa. Ja-aech wut, that toepax pasaxilfak.

⁸ That toepax wuajna, xabichaxael nabewuajan. Nakaetuajnpijiw nabeyaxael, nakaetuajnpijiw suapich. Japoxan majt jachiyaxael asatuajnnuchanel. Kaetuajnpijiw nabeyaxaelbej, asatuajnpijiw suapich. Japox majt jachiyaxael asatuajnnulel. Asatuajnnulel xabich sat najaesaxaelbej potuajnnucha. Naxaeyaxan xabich ajilaxaelbej. Majt japoxan jachiyaxael, nabijasax tuadusaxael wut jiw xabich nabijasliajwa. Me-ama watho’ naxuwlaliajwa wut, xabich wexaenkas, jachiyaxaelbej, japox tuadut wut, jiw nabijasaxaelpox.

⁹ “jXamal najut chiekal natataefalde! Asew jiw xamal buflaeyaxael paklochow poxade. Japi xamal kastikaxael judfos naewuajnabachanxot. Nuilaxaelam paklochow pejuwajnalel, tajnachalwam xot. Jaxotam wut, xamal naksiyaxaelam xanliajwa.

¹⁰ Matdukamatkoi wuajna, potuajnnucha xamal naewuajanaxaelam chimiawuajan, Dios jiw bu’weyaxaelpox.

¹¹ Xamal buflaech wuti paklochow poxade, jxabich nabej nejchaxoele’ jaxot naksiyaxaelampoxanliajwa! Jawut naksiyaxaelam Dios buxto’apoxan xamal naksiyaliajwam. Najut nijaxtat naksiyaximil. Naksiyaxaelam Espiritu Santo pijaxtat.

¹² Japamatkoiyan, xamal tajnachalwam xot, asew jiw xamalxot, pakoewkola buflaeyaxaes paklochow poxade, jaxotde beliajwas. Asew jiwbej xamalxot, paxjiw, o, penjjiwbej, buflaeyaxaes paklochow poxade, jaxotde beliajwas. Asew jiwbej xamalxot, paxi buflaeyaxaes paklochow poxade, jaxotde beliajwas.

¹³ Puexa jiw xamal nejweslaxael, tajnachalwam xot. Pe kofa-emil wut Dios xanaboejam-pox, ja-am wut, hasta tupam wut, Dios xamal bu’weyaxael.

¹⁴ “jXaljowpon nej matabijs ampox! Xamal xaljowam wut, jchiekal matabijim! Xamal taenam wut xabich babejkolan Dios pejtemplobatutat, jaxot tapaeyaxisalpon leliajwa, jaxot wutlison, ja-aech wut, jpuexa Judea tuajnpijiw nej dukpe pinamuxan poxade!

¹⁵ Do jawutbej, jiw nuili bachanmatwuajtat, baloek wut, inej le-ele’ pejbachan poxade pejew jukaliajwa, xadukpaliajwabejpi!

¹⁶ “Do jawutbej, jiw nabisti pejlulantat, jdo jaxot kaweta kamta atuaj nej dukpe! jJapi kaxa nej nawe-eledin pejbachan poxadin, pejew ponan wuljaesliajwa!

¹⁷ Do jawutbej, watho’, moejowpi, yamxi mitan miati, japi watho’ xabich nabijasaxael.

¹⁸ Dukpam wut xabich nabijasasamatam, jDios kawuajnafalde japox pasasamata, iama wut!

¹⁹ Dios that is wut, amwutjelbej, jachi-ellejen japanabijasax. Japamatkoiyantat xabich kaes nabijasaxaelam.

²⁰ Nabijasmatkoiyan piachaxael wut, jiw xajupaxil boejtaliasfulaliajwa. Samata, Dios tapaeyaxil piach, pejiw xabich nabijasliajwa. Jachiyaxael, Dios makanot wut Dios nejx-asinkaspi.

²¹ “Asew jiw xamalxot jum-aech wut: ‘jTae’nik Cristo!’ o, asew jiw jum-aech wutbej: ‘jJaxotde Cristo!’ —aech wutbej, jnabej naexasis!

²² Matxoela fulaeyaxaen naekichachajbapijiw. Japi pasaxaen, me-ama Cristo. Pe japi Cristowaxil. Asew jiw pasfulaxael, me-ama Dios pejprofetas. Pe japi Dios pejprofetako-laxil. Japi isaxael koechaxan, japoxantat japi jiw naekichachajbaliajwa. Naekichachajbasibejpi jiw, Dios naexasiti, japi jiw kofaliajwa Dios xanaboejapoxan.

²³ jChiekal taem! Xan ampox jum-an xamal chajia chiekal matabijaliajwam, asamatkoi xamal naekichachajbasamata japi jiw” —aech Jesús pejnachalaliajwa.

*Jesús, puexa jiw pakoewkolan, pejme kaxaxoekpox
(Mt 24.29-35, 42-44; Lc 17.26-36; 21.25-36)*

²⁴ Jesús pejme jum-aech pejnachalaliajwa:

—Nabijasmatkoiyan toep wut, juimt matkoi pijinn kamta kuatlaxael. Juimt madoipijinbej itliakaxil.

²⁵ Ithaejanbej natacholnaxael. Puexa thatbaxotatibej xabich nachoelaxael.

²⁶ Do jawut, xan, puexa jiw pakoewkolnan, athulelsik fuloekx wut itloejentat, jiw xan nataeyaxael, paskax wut, puexa jiw tato'lalijwan. Do jawut, itliakaxaelen Dios pijaxtat.

²⁷ Do jawutbej, xan to'axaelen tejew ángeles, pin-iakola, japi pothata xajupalijwa. Japi buflaeyaxaen jiw xanlel, xan makanotxpikal.

²⁸ “¡Chiekal nejchaxoelde, taenam wut higonae! Higonae pajel-uaf nakola wut, ja-aech wut, xamal matabijam waech mox pawuajnapox.

²⁹ Jachiyaxaelbej japoxan taenam wut, xan jum-anpoxan. Matabijaxaelam xan mox tawuajnapox pejme pasliajwan puexa jiw tato'lalijwan, taj-ax Dios suapich.

³⁰ Diachwuajnakolax xan jum-an. Puexa xan jum-anpoxan diachwuajnakolax jachiyaxael. Asew jiw xamalxot japoxan taeyaxael, laelpifuk ampathatat.

³¹ Thatbaxo, ampathatbej, toepaxael. Pelax tajjamechan toepaxil. Xan jum-anpoxan, japoxan diachwuajnakolax jachiyaxael.

³² “Puexa jiw matabija-el xan pasaxoekanmatkoi. Dios pej-ángelesbej matabija-el japox. Xanbej, Dios paxulnan, matabijs-enil japox. Kaen taj-ax Dios matabijt.

³³ “Samata, ¡xamal najut chiekal natataefulde! ¡Pomatkoicha nawuajnawesfuldebej, xamal matabija-emil xot xan pasaxoekanmatkoi!

³⁴ Xan pejme fuloekx wut athulelsik, me-ama kaen aton pejba naechijia wut, pejme kaxa nawia'an, xanbej jachiyaxaelen. Japon aton tamach waelapon pamak pejbatat. Pamak kaenanula bichax chaxduwpon. Jum-aechon kaen pamakanliajwa: ‘¡Tajba chiekal nawetataefulde, nawuajnawetam wut tajpasax!’ –aech aton pamakanliajwa. Do jawux, chijjalison atuuaj.

³⁵ Xamalbej nawuajnawetam wut, ¡me-ama ba tataeflan, ja-amsfulde xamal! Japon pomatkoicha ba chiekal tataeflaxael, matabijs-el xoton, maswut bapijin pejme pasaxael. Bej pasaxaelbejpon kaliax, o, pinmadoitat, o, nalianawuajna. O, pasaxaelon kandiaswasap.

³⁶ Pamakan matabijs-el, maswut pejpaklon pasaxael. Samata, pomatkoicha chiekal wuajnawesful, pejpaklon pat wut nejchachaemlialijwa japilijwa. Pejpaklon chamat-pasaxisal pamakan chiekal wuajnawesfula-esalpoxtat.

³⁷ Xamal jum-anpox, jum-anbej puexa asew jiwliajwa. ¡Chiekal nawuajnawesfulde!” –aech Jesús pejnachalalijwa.

14

Judiospaklochow nejchaxoelpox jaelsliajwapi Jesús (Mt 26.1-5, 14-16; Lc 22.1-2; Jn 11.45-53)

¹ Kaewaechful wut, judios is Pascuafiesta nejkiowasamata pejuwuajnapijiw nokolapox Egipto tuajuxot. Japafiestamatkoiyan wut, judios isbej asafiesta. Pan pihla-elpi xael, japafiesta wut. We'p wutfuk kolematkoiije judios tuadusliajwa Pascuafiesta isax, jawut sacerdotespaklochow, judios chanaekabuanapibej, natameja piajkal. Japi jaelsasia Jesús naekichachajbapoxtat boesalijwapi Jesús.

² Do jawut, nakaewa najum-aechi:

–Japox isaxisal fiestatat. Japox isas wut, jiw xabich palalaxael xatlisliajwa. Ja-aech wut, jiwbej chamamosaxaelbej Jesús –na-aech paklochow nakaepaklochowliajwa.

Pawis perjumamintat matnaechafanpox Jesús (Mt 26.6-13; Lc 7.37-38; Jn 12.1-8)

³ Jesús Betania paklowaxot wut, paton Simón pejbatat. Japon Simón majt leprawaxae waechpon. Japabatat Jesús xael wut, kaeow atow xapat perjumamint batiajtat. Japabatiajt isas ia't, pawulpot alabastro. Japaperjumamint xabich ommaenk. Isas nardokal. Do jawut, batiajtwathit jalnatow. Do jawut, japow ta'chafan Jesús.

⁴ Asew jiw japixot japox taen wuti, palalapi japowliajwa. Do jawut, nakaewa najum-aechi:

–¿Ma-aech xotkat japow tabejt perjumamint?

⁵ Japaperjumamint xabich ommaenk. Japaperjumamint mowas wut, xabich plata kanaxaes, me-ama trescientos denarios. Ja-aech wut, japaplata chaxduiyaxaes kejila –na-aechi nakaewa.

Jasoxtat jum-aechipow, tabejt xotow perjumamint japontat.

⁶ Do jawut, Jesús japox jumtaen wut, jum-aechon:

–¡Nej ja-aeché! ¿Ma-aech xotkat japox jum-am japowliajwa? Japow japox is wut, pachaeem xanliajwa.

⁷ Pomatkoicha xamalxotaxael kejila kajachawaesliajwam. Kejila kajachawaesiasiam wut, kajachawaesaxaelam nejmachmatkoiat. Pelax xan piachaxinil xamalxot.

⁸ Japow japox is wut, ispow xajuppoxtat. Japow perjumamintat nata'chafan wut, nachawuajnachaemt xan tajpatupaxliajwa namuthsliajwapox.

⁹ Diachwəajnakolax xan jum-an. Tajnachala potəajjnəcha jiw naewuajan wəti chimiawəajan, tajwəajan, asew jiw naexasit wət bu'wəliəjwas, do jawətbej, tajnachala jumchiyaxael japow ispoxliəjwa xanliəjwa. Jasoxtat puexa jiw nejchaxoelaxael japowliəjwa —aech Jesús pejnachalaliəjwa.

Judas Jesús padaelman nadofapox

(Mt 26.14-16; Lc 22.3-6)

¹⁰ Kaen Jesús pejnachalan, Judas Iscariote, japontat dosanpon, japon fəlaech sacerdotepaklochow poxade nospaeliəjwapon, japi səapich, asamatkoi Jesús wiasliəjwapon japixot.

¹¹ Paklochow japox jumtaen wət, xabich nejchachaemil. Do jawət, jum-aechi Judasliəjwa:

—Jesús wiatam wət xanalxot, xanal mosaxaelen —aechi.

Do jawət, Judas wəajnwəwet, ma ipachaemdo', japamatkoiat wiasliəjwapon Jesús padaelmajiwxot.

Jesús xaelpox, pejnachala səapich, Pascuafiestanaxaeəyax

(Mt 26.17-29; Lc 22.7-23; Jn 13.21-30; 1 Co 11.23-26)

¹² Matxoelamatkoi fiesta wət, judíos xael wət pan puthla-eli, japamatkoi patlisox. Japamatkoi ovejās jelti'tpi xua'at xaeliəjwa. Jawət Jesús wəajnachaemtas pejnachala. Japi jum-aech Jesúsliəjwa:

—¿Ampalelkat xanal naxaeəyax isaxaelen Pascuafiestanaxaeəyax xanal nabu'xaeliəjwam? —aechi.

¹³ Do jawət, Jesús to'a wət kolenje pejnachalan, jum-aechon:

—iXabu'a de Jerusalén paklowax poxade! Jaxotde kaen aton faenaxaelam, mint xafolpon. iJapon aton fəfəlaem!

¹⁴ Lech wət ba, jum-amo japabapijin: 'Jiw chanaekabuənanan jum-aech: ¿Ampabatutakat xan tajnachala bu'xaeəyaxaelen Pascuafiestanaxaeəyax?' —aech jiw chanaekabuənanan —amo bapijin!

¹⁵ Do jawət, bapijin xamal itpaeyaxael athə pejpiezax, japabatu pinjiəyax. Chajia wəajna chiekal chaemtas. Jaxot naxaeəyax xamal isaxaelam xatisliəjwa —aech Jesús, pejnachala to'a wət.

¹⁶ Do jawət, Jesús kolenje pejnachalan fəlaechlisi Jerusalén paklowax poxade. Jaxotde pa'a wəti, puexa, me-ama Jesús chajia jumtisi, japox ja-aech. Samata, jaxot islisi naxaeəyax Pascuafiestaliəjwa, Jesúsliəjwa, asew pejnachalaliəjwabej.

¹⁷ Tuila wət, Jesús, pejnachala səapich, pat japabaxot.

¹⁸ Do jawət, xael wət, Jesús jum-aech:

—Diachwəajnakolax xan jum-an. Kaen xamalxot, xan səapich xaelpon, japonlap xan nawiasaxael tadaelmajiwxot —aech Jesús.

¹⁹ Pejnachala japox jumtaen wət, xabich nejxaeəjwas. Samata, kaenanəla wəajnachaemt wət, jum-aechi Jesúsliəjwa:

—¿Xankatlap wiasaxaelen xam? —aechi Jesúsliəjwa.

²⁰ Jesús jumnot wət, jum-aechon pejnachalaliəjwa:

—Kaen, xamalxot dosampim, japonlap xan nawiasaxael tadaelmajiwxot. Kaepłafat, xan səapich, panax taxthotpon, japonlap xan nawiasaxael tadaelmajiwxot.

²¹ Xan, puexa jiw pakoeəwkolnan, naboesaxaeli. Me-ama Dios pejjamechan chajia jum-aech xanliəjwa, diachwəajnakolax japox jachiyaxael. Pe nawiasaxaelon tadaelmajiwxot, japonliəjwa kaes pejme chaemilaxael. Kaes pejme pachaemaxael, japon nalaels-el wət ampathatat —aech Jesús pejnachalaliəjwa.

²² Japi xael wət, Jesús panax fit. Do jawət, Jesús Dios kawəajan wət, jum-aechon: "Ax, gracias-an xanal pan nachaxdutampoxliəjwa" —aech Jesús, Dios kawəajan wət. Do jawət, Jesús jalkafəl pan, pejnachala kexadiəjliəjwa. Chaxduwpon pejnachala xaeliəjwa. Do jawət, Jesús jum-aech:

—iXaem ampapan! Japox, me-ama tajwit —aech Jesús.

²³ Do jawət, Jesús copa chafit puexa pejnachala fiəfəliəjwa. Do jawət, jum-aechon Diosliəjwa: "Ax, gracias-an ampotliəjwa nachaxdutampot" —aech Jesús pax Diosliəjwa. Do jawət, japot chaxdutilson japi puexa kaenanəla fiəfəliəjwa. Do jawət, japi kaenanəla puexa fiəfəl.

²⁴ Jesús jum-aech pejnachalaliəjwa:

—Ampot vino, me-ama tajjal. Xan təpəx wət puexa jiwliəjwa, tajjal nakolaxael. Japox jiw naexasit wət, beltaeyaxaəs babijaxan ispoxanliəjwa tajjal pijaxtat.

²⁵ Diachwəajnakolax xan jum-an. Pejme feəxanil vino ampathatat. Dios puexa pejiw tato'almatkoi pat wət, japamatkoi pat wət, pejme pajelt vino feəxaelen Diosxotse —aech Jesús pejnachalaliəjwa.

*Pedro xanaliyaxael pox Jesús pejnachalan pox liajwa**(Mt 26.31-35; Lc 22.31-34; Jn 13.36-38)*²⁶ Jajuiyax buxtoet wut salmos, fulaechlisi Olivonaechan tux poxade.²⁷ Jaxotde pa'a wut, Jesús chajia jum-aech pejnachalaliajwa:

—Xamal nasalaxaelam nejlel, puexa kofaxaelam xot xan naxanaboejampox. Jasox jum-aech Dios pejjamechan, chajia lels wut xanliajwa: 'Boesaxaes ovejas tataefulpon. Ja-aech wut, pejew ovejas nasalaxael pejlel' —aech Dios pejjamechan xanxot xamal nasalalialjwampox.

²⁸ Xan naboesa wuti, do jawux, Dios namat-esaxael pejme dukaliajwan. Do baxael, xamal wuajna xan pasaxaechan Galilea tuajnuaxotde —aech Jesús, chajia jum-aech wut pejnachalaliajwa.

²⁹ Do jawut, Pedro jum-aech:

—Puexa asew nejnachala kofa wut pejxanaboejawan xamliajwa, xanlax kofsaxinil tajx-anaboejsax xamliajwa. Xan nakiowa xam xanaboejsfulaxaelen —aech Pedro Jesúsliajwa.

³⁰ Jesús jumnot wut, jum-aechon Pedroliajwa:

—Diachwuajnakolax xan jum-an. Ampamadoitat kawaema nejlae-el wutfak koleveces, xan naxanaliyaxaelam wut, jumchiyaxaelam tres veces: "Xan japon aton matabijs-enil" —chiyaxaelam xanliajwa —aech Jesús Pedroliajwa.

³¹ Pedro pejme jum-aech nejthu'axtat:

—Lach nejmachjiw najum-aechal wut xanliajwa: 'Xam boesaxaelen, Jesús pejnachalnam xot' —na-aechal wut, xan tajut xanaliyaxinil —aech Pedro.

Puexa Jesús pejnachala japox kaeyax jum-aechi, Pedro matxoelajum-aechpox.

*Pawuxot, Getsemani, Jesús Dios kawuajan pox**(Mt 26.36-46; Lc 22.39-46)*

³² Do jawut, Jesús, pejnachala suapich, pat Getsemanixot. Jaxotde pa'a wut, jum-aechon pejnachalaliajwa:

—¡Amxot chalakde! Xan wuajnaxaechan taj-ax Dios kawuajnalialjwan —aech Jesús.

³³ Jesús buflaech Pedro, Santiago, Juanbej. Do jawut, Jesús xabich nejxaejwas. Xabich nejchaxoelbejpon japon tuxaxael pox liajwa.

³⁴ Jesús jum-aech pejnachalaliajwa:

—Xan xabich nanexaejow. Nejxaejwaxtat, me-ama tuxasian wut, ja-an. ¡Amxot chalakde! ¡Naliasfuldebej! ¡Nabej moejs! —aech Jesús pejnachalaliajwa.

³⁵⁻³⁶ Do jawut, Jesús tamach kaes tuuxach fulaech. Jaxotde brixtat nuk wut, sat makxabijindikon. Nejxasinka-elon japanabijasax moxprox japonliajwa. Samata, pax Dios kawuajan wut, jum-aechon: "Ax, xam xajupam puexa isliajwam. Xanliajwa asax isasiam wut, ¡nabu'wem nabijasaxaelenpox! ¡Pe nabej is xan nejxasinkaxpox! ¡Isde xam nejxasinkampox!" —aech Jesús, pax Dios kawuajan wut.

³⁷ Do jawut, Jesús kaxade pejnachala poxade. Pe Jesús pejnachala nakiowa moejt Jesús wuajna. Japixot pat wut, jum-aechon Simón Pedroliajwa:

—Simón, ¿ma-aech xotkat nakiowa moejtam? ¿Xamalkat xajupa-emil naliasliajwam kae-hora?

³⁸ ¡Naliasfulde Dios kawuajnalialjwam! Ja-am wut, Dios xamal kajachawaesaxael babijax isasamatam. Nejnejchaxoelaxantat isasiam pachaempoxan, xan jum-anpoxan. Pe nejbu'an chiekal mamnika-el japoxan isliajwam —aech Jesús Pedroliajwa.

³⁹ Pejme Jesús kaxade Dios kawuajnalialjwa. Majt kawuajanpox, pejme japox jum-aechon.

⁴⁰ Jesús buxtoet wut, pejme kaxadin wut, pejnachala nakiowa moejtfuki. Asbuun jumch moejti, xabich itmoejsla xot. Matabija-eli jumchiliajwa, padala xoti.

⁴¹ Jesús pejme kaxade Dios kawuajnalialjwa. Do jawux, pejme kaxadin wut pejnachala poxadin. Pat wuton japixot, japi nakiowa moejti. Do jawut, jum-aechon:

—¿Xamalkat moejtam, damlan xot? ¡Nadoklado' moejsax! Amwut xan, puexa jiw pakoewkolnan, nawiasaxael babejchowxot.

⁴² ¡Nanim! ¡Chijias amxot! Mox fulaenlison xan nawiasaxaelon tadaelmajiwxot —aech Jesús.

*Jesús jaeltaspox padaelmajiw**(Mt 26.47-56; Lc 22.47-53; Jn 18.2-11)*

⁴³ Jesús naksiya wutfak, Judas pat. Japon kaen Jesús pejnachalan, japontat doce. Xabich bu'paton jiw. Japi xafol espada, iwabej. Japi jiw fulaen, to'as xoti sacerdotespaklochow, judios chanaekabuapibej, judios-ancianosbej.

⁴⁴ Judas, wiasaxaelon Jesús padaelmajiwxot, japon chajia chiekal chanaekabuana japi jiw chiekal matabijalialjwapi Jesús. Jum-aechon: "¡Jaelde xan xusuiyaxaelenpon! ¡Chiekal

būflaem wesamatapon!" —aech Judas, chanaekabuana wut japi jiw chiekal matabijalijawa, achan Jesús.

⁴⁵ Do jawut, Judas mox soepan wuton Jesúsxot, kejacha wut, jum-aechon Jesúsliajwa:

—¡Tajpaklon, xan patx! —aech Judas.

Do jawutbej, xusuwpon Jesús.

⁴⁶ Jawut Jesús jaeltas būflaelijawas.

⁴⁷ Do jawut, Jesús pejnachalan, mox jaxot nukpon, jukcha pej-espada. Jawut nabichan cho'chikchapon. Cho'chikchaspon nabist sacerdotespaklokolanlijawa.

⁴⁸ Jesús jum-aech japi jiwliajwa:

—¿Ma-aech xotkat espada xafolam, iwabej, xan najaelsasiam wut? ¿Xankat, me-ama babejnan wut, kabuan-an xamallijawa?

⁴⁹ Kaematkoisful xamal naewuajjax Dios pejtemplobat. Jaxot najaels-emil, Dios tapae-el xotfuk xamal. Dios pejjamechan profetas chajia lelpox, jaxot chajia jum-aech japox chajilijawa xanlijawa. Samata, ja-aechlisox —aech Jesús.

⁵⁰ Do jawut, Jesús pejnachala puexa dukplisi asale. Jesús tamach waeltas.

⁵¹ Jawut kaen pansian ataxach wulchakal fol, Jesús jaeltas wut. Japon, wuchakalfolpon, naxkiat sábanabu'. Japonbej jaeltas.

⁵² Jaeltas wut, pejsábana wejaeltaspon. Jawut pejsábana jolchapon. Dolison bu'jumchawiapon.

Jesús nukpox judiospaklochow pejwuajnalel

(Mt 26.57-68; Lc 22.54-55, 63-71; Jn 18.12-14, 19-24)

⁵³ Japi būflaech Jesús sacerdotespaklokolan pejba poxade. Jaxotde natameja puexa sacerdotespaklochow, judios-ancianosbej, judios chanaekabuanapibej. (Japi paklochow natameja wut, japox pawal Junta Suprema.)

⁵⁴ Pedro ataxach wuchakal fol, Jesús bu'fos wut. Wuchakal paton sacerdotespaklokolan pejbafuimaktxot. Jaxot jit naksu'cha-ekon, Dios pejtemploba weti suapich.

⁵⁵ Do jawut, sacerdotespaklochow, puexa judios-ancianosbej, japi taesia Jesús tappox. Samata, japi nakaewa nawuajnaemti, Jesús pejbu'wuajan wut boesalijawapi Jesús. Pe faena-eli Jesús pejbu'wuajanpox tasalalijawapi.

⁵⁶ Xabich jiw kichachajba Jesús tasalalijawas. Japi wuajan chapaei wut, chiekal kaeyax chapae-eli, kichachajba xoti.

⁵⁷⁻⁵⁸ Asew jiw nana wut, jum-aechi:

—Xanal jumtaenx, Jesús jum-aech wut: 'Xan Dios pejba, jiw ispox, toesaxaelen. Do jawux, tres matkoi wut, xan asaba isaxaelen, jiw isaxilox' —aech wuton —aechi Jesúsliajwa.

⁵⁹ Jesús jum-aechpox japi chapaei wut, chiekal kaeyax pae-eli.

⁶⁰ Do jawut, sacerdotespaklokolan nanton puexa jiw pejwuajnalel, wuajnaemsliajwapon Jesús. Do jawut, wuajnaemti wut, jum-aechon Jesúsliajwa:

—¿Ma-aech xotkat xam jumnos-emil? ¿Diachwuajnakolaxkat japi jum-aechpox xamliajwa? —aech sacerdotespaklokolan.

⁶¹ Jesús boejlach nuk. Jumnos-elon wuajnaemtaspox. Sacerdotespaklokolan pejme wuajnaemti wut, jum-aechon Jesúsliajwa:

—¿Xamkat Cristowam, Dios to'asponam jiw bu'welijawa? ¿Xamkatlap Dios paxulnambej? —aechon.

⁶² Jesús jumnot wut, jum-aechon:

—Diasdo'. Xanlap japonan. Xan, puexa jiw pakoewkolnan, xan ekaxaelen taj-ax Dios pejpoklalel. Japon pamamakolan. Jaxotse xan ekaxaelen, taj-ax suapich, jiw tato'lalijawan wut. Xamal japox taeyaxaelam, xan fuloekx wut athuelsik itlojeantat —aech Jesús.

⁶³ Do jawut, sacerdotespaklokolan pijax, naxoelax, thiakchapon, xabich palala xot Jesúsliajwa, jumtaen xoton Jesús jum-aechpox. Do jawut, jum-aechbejpon:

—Kaes asew jiw nakwewe'pa-el ampon aton tasalalijawas.

⁶⁴ Xamal najut chiekal jumtaenam, ampon aton jum-aech wut Dios nejweslapox. ¿Xamal achax nejchaxoelam ampon aton jum-aechpoxliajwa? —aech sacerdotespaklokolan.

Do jawut, puexa chiekal kaeyax nejchaxoel wut, jum-aechi:

—Ampon aton xabich pejbu'wuajan Diosliajwa. Wewe'pas kastikalijawas, boesalijawas-bejpon —aechi.

⁶⁵ Asew japixot xuloyapi Jesús. Itfumatakusbejpon. Do jawut, xutulapason kerixtat. Tulapas wut, jum-aechipon:

—Xam Cristowam wut, jum-amde! ¿Achankat xam xutulap? —aechi.

Do jawux, asew, Dios pejtemploba weti, japibej tulap Jesús.

Pedro xanaliapox Jesús matabijtpoxliajwa

(Mt 26.57-58, 69-75; Lc 22.54-62; Jn 18.15-18, 25-27)

⁶⁶ Do jawut, Pedro bafulmaktat nuk wut, kaeow atow pat Pedro nukxot. Japow sacerdotespaklokolan tanbistow.

⁶⁷ Japow taen Pedro jit naksu'chanukpox. Do jawut, chiekal natachaemtow Pedro. Jawutbej jum-aechow:

—Xambej nanuamtam, Jesús Nazaretpijin swapich —aechow.

⁶⁸ Pedro pajut naxanalia wut, jum-aechon:

—Xan matabijs-enil xam najum-ampox. Xan japon aton matabijs-enil —aech Pedro.

Do jawut, fulaechlison bafafa poxade. Jaxot atuxach nuklison laleyaxxot. Do jawut, kawaema nejla.

⁶⁹ Japow pejme taen Pedro. Samata, jum-aechow aseb jiw jumtaeliajwas, jaxoti:

—¡Ama kaen nuk, Jesús pejnachalan! —aechow.

⁷⁰ Do jawut, Pedro pejme pajut naxanalia wut, jum-aechon:

—Diachwujnakolax xan japon pejnachalna-enil —aech Pedro.

Do jawux, jaxot nuili jum-aechbej:

—Diachwujnakolax xam Jesús pejnachalnam. Xambej Galilea tuajnujpinam —aechi Pedroliajwa.

⁷¹ Pedro jum-aech:

—Diachwujnakolax jumchi-enil wut, ¡Dios xan nej nakastike! Xan matabijs-enil japon aton —aech Pedro, pajut naxanalia wut.

⁷² Do jawut, kawaema pejme nejla wut, jawut Pedro nejchafaet Jesús chajia jum-aechpox, jum-aech wuton: “Kawaema nejlae-el wutfuk koleveces, xam naxanaliyaxaelam tres veces” —aech Jesús Pedroliajwa.

Do jawut, Pedro xabich nejxaejwas. Jawut xabich nowpon.

15

Jesús nukpox Pilato pejwujnalel

(Mt 27.1-2, 11-14; Lc 23.1-5; Jn 18.28-38)

¹ Nalian wut, sacerdotespaklochow, judíos-ancianosbej, judíos chanaekabuananapibej, puexa judíospaklochowbej, japi puexa natameja kaeyaxtat chiekal nospaeliajwa. Do jawux, Jesús bu'follisi muaxmatakuyaxtat Pilato poxade. Do jawut, wiatlisipon Pilatoxot.

² Do jawut, Pilato wujnachaemt wut, jum-aechon Jesúsliajwa:

—¿Xamkatlap diachwujnakolax reynam puexa judíosliajwa? —aech Pilato.

Jesús jumnot wut, jum-aechon:

—Diachwujnakolax xanlap japonan, xam najum-amponan —aech Jesús Pilatoliajwa.

³ Do jawut, sacerdotespaklochow nejmachwujantat xabich tasalapi Jesús.

⁴ Samata, Pilato pejme wujnachaemt wut, jum-aechon Jesúsliajwa:

—¿Xamkat jumtae-emil japi jum-aechpox nejbw'wujjanpoxliajwa? ¿Ma-aech xotkat xam jumnos-emil japi jum-aechpoxanliajwa? —aech Pilato Jesúsliajwa.

⁵ Do jawut, Jesús kaes jumnos-el. Boejlach nuklison. Samata, Pilato xabich nejchaxoelak Jesúsliajwa.

Pilato to'apox Jesús kematamatlaliajwas

(Mt 27.15-31; Lc 23.13-25; Jn 18.38-19.16)

⁶ Powaecha, Pascuafiesta wut, Pilato kaen aton nakolsax jitapaei, jiw jebatat jiaspon. Tapaeipon nakolsax judíos wuljowpon.

⁷ Jawut jiw jebatat jiaspixot, kaen japixot pawul Barrabás. Japon, asew swapich, jiw ba, japi chajia naba wut, Pilato pejsoldaw swapich.

⁸ Do jawut, xabich judíos pat Pilato pejbaxot. Pat wut, jum-aechlisi Pilatoliajwa:

—¡Kaen jiw jebatat jiason, tapaem nakolsliajwa, me-ama powaecha xam jitapaeiam, Pascuafiesta wut! —aechi Pilatoliajwa.

⁹ Pilato jumnot wut, jum-aechon:

—¿Xamkat nejxasinkam xan nakolsax tapaeliajwan judíos pejrey? —aech Pilato judíosliajwa.

¹⁰ Pilato japox jum-aech, nejchaxoel xoton: “Sacerdotespaklochow wiati xanxot Jesús, japi xabich nusasiawal xot Jesúsliajwa” —aech Pilato, nejchaxoel wut.

¹¹ Do jawut, sacerdotespaklochow buxto'a japi jiw wuljoeliajwa Barrabás nakolsax tapaeliajwas. Buxto'a wut, jum-aechi: “¡Jum-amde Pilato: ‘¡Nawoesa nakolsax tapaem Barrabás!’ —amde!” —aech sacerdotespaklochow. Samata, japi jiw wuljoeful Barrabás nakolsax tapaeliajwas.

¹² Pilato jumtaen wut japi jiw wuljoefulpox Barrabás, jawut Pilato japi jiw wujnachaemt wut, jum-aechon:

—¿Machiyaxaelenkat Jesús, japon pawulpon Judíos Pejrey? —aech Pilato.

¹³ Do jawut, japi nejlaxaxtat jumnot wut, jum-aechi:

—japoxlax kematamatelde cruztat tupaliajwa! —aech japi jiw, nejlaxful wut.

¹⁴ Pilato jum-aech:

—¿Achababijaxkaton is cruztat kematamatlaliajwas? —aech Pilato.

Pe kaes pejme nejlaxful wut, jum-aechfullisi:

—jKematamatelde cruztat! —aechfuli.

¹⁵ Do jawut, Pilato Barrabás nakolsax tapaei jiw jebaxot, japi jiw palalamata Pilato-liajwa. Do jawutbej, Pilato keto'a pejsoldaw Jesús selsliajwas. Selsax ketoech wut, Pilato keto'abej pejsoldaw Jesús kematamatlaliajwas cruztat.

¹⁶ Do jawut, Jesús bu'fos soldaw Pilato pejbafulmak poxade. Jaxotde puexa soldaw natameja.

¹⁷ Do jawut, xajoeslison pakchowax, me-ama rey pijax, jasox. Japox chikjiana pa-soeyaxlejen. Do jawut, na-e'lu xakoeyax ketoet wut, matlua'lisipon.

¹⁸ Do jawutbej, Jesús pejwujnalel jumtaxaxaelal wut, jum-aechi:

—jMoi, judíos pejrey! —aechi.

¹⁹ Do jawut, kaenanula soldaw ta'be'balapi naeyatat Jesús. Loyasbejpon. Jesús pejwujnalel brixtat nuili. Me-ama sitaen wut, ja-aechi Jesúsliajwa.

²⁰ Dolisi, ketaxaxaelax ketoech wut, joltlisi chikjiana pasoeyax. Do jawut, xajoeslison pejme pijaxkolax, naxoelax. Do jawut, bu'folisipon kematamatlaliajwas cruztat.

Jesús kematamatlaspox cruztat

(Mt 27.32-44; Lc 23.26-43; Jn 19.17-27)

²¹ Do jawut, kaen aton fulaen paklowax tathoetlel. Japon pawul Simón. Japon Cirene paklowaxpijin. Paxi pawul Alejandro, asan pawul Rufo. Simón xensliajwa wut, jawut soldaw xato'aspon xalaeliajwa Jesús pijax, cruz, Jesús xafolpox.

²² Japi soldaw buflaech Jesús muax poxade. Japamuax pawul Gólgota. (Gólgota jumchiliajwa hebreojametat. "Matnaethitmuax" —chiliajwa.)

²³ Jaxotde Jesús chaxduchlach vino, mirra taniaaltaspox, xabich wexaenkasamatas, kematamatlas wut. Pe Jesús fe-el.

²⁴ Do jawut, Jesús kematamatlas cruztat. Pejtukaanbej matamatlas. Do jawutbej, soldaw nakakujt ia'xix matabijaliajwa, achan kanaxael kaenanula Jesús pejnaxoe.

²⁵ Juimt atwajsan wut, a las nueve wut, Jesús kematamatlas.

²⁶ Jesús pejta' tabijla tablafach lelsपोx chaduch. Japox jum-aech, ma-aech xot Jesús kematamatlas cruztat. Japox jum-aech: "Ampon judíos pejrey" —aech lelsपोx.

²⁷ Jaxotde kematamatlasbej kolenje kethakan. Kaen chanuk Jesús pejpoklalel. Asan chanuk Jesús pejsoenalel.

²⁸ Jesús cruztat kematamatlas wut, asew kolenje suapich, japox ja-aechlisox, me-ama Dios pejjamechan, chajia lelsपोx, jum-aech: "Japon kastikaxaes. Me-ama babejen wut, jakechiyaxaeson" —aechox.

²⁹ Asew jiw, jaxot xaxenapi, jum-aech babejjamechan Jesúsliajwa. Matnaexawiltbejpi. Matnaexawilt wut, jum-aechi:

—Xam chajia jum-am: 'Dios pejtemploba xan toesaxaelen. Do jawux, tres matkoi wut, xan pejme mat-esaxaelen' —am xam, chajia jum-am wut.

³⁰ jAmwutjel najut nabu'wem! jBaloemk cruzxotsik! —aech jiw xaxenapi Jesúsliajwa.

³¹ Do jawut, sacerdotespaklochowbej, judíos chanaekabuanapibej, bu'wujajnpaeipi Jesús. Nakaewa najum-aechi:

—Asew jiw bu'wiapon. Pe pajut xajupa-elon nabu'weliajwa.

³² Diachwujnakolax Cristo wut, Israel tuajnapijiw pejrey wutbej, jamwutjel japon pajut nej baloesk cruzxotsik! Japox xatis taens wut, ja-aech wut, xatis japon naexaxisaxaes diachwujnakolax japon Cristo —na-aechi nakaewa Cristoliajwa.

Japi kolenjebej, cruztat kematamatlaspi, Jesús suapich, japibej bu'wujajnpaei Jesús.

Jesús tuppox cruztat

(Mt 27.45-56; Lc 23.44-49; Jn 19.28-30)

³³ Juimt matnoch ek wut, xabich itkuatnik tres horas. Japox ja-aech wut, ja-aech potuajnucha.

³⁴ Do jawux, a las tres wut, Jesús pinjemetat jum-aech: "Eloi, Eloi, ¿lema sabactani?" —aechon pejjametat, hebreojametat. (Japox jumchiliajwa: "Ax Dios, ax Dios, ¿ma-aech xotkat xan nakajachawaes-elaxtat nawaeltam tamach?" —chiliajwapox.)

³⁵ Asew jaxoti, japox jumtaen wut, jum-aechi:

—jumtaem! Japon wallalat Elías, Dios pejprofeta —aechi.

³⁶ Kaen japixot wəljəat esponja, paputhkax, xathosliajwa vino, xathuyamint. Do jawət, esponja matakupon nae-oeffat Jesús japox suiliajwa. Japon jum-aech asew jiw jaxotiliajwa: "Taeyaxaes. Elías bej fuloeyaxoekbej kusliajwapon Jesús cruzxotsik" —aechi.

³⁷ Do jawət, Jesús nejlakcha wət, təplison.

³⁸ Jesús təp wət, Dios pejtemplobat pinabə', duchpox batutat, najəpathiakchakas athulelsik satleldik.

³⁹ Soldawcapitán Jesús pejwəajnalel nukpon. Taen wəton Jesús təppox, jawət jum-aechon:

—jDiachwəajnakolax ampon Dios paxulan! —aech capitán.

⁴⁰ Jaxotbej watho' atəaxach nuil. Natachaemapi Jesús. Japixot María. Japow Magdala paklowaxpijow. Asaow pawəlpowbej, María, japow José pen, Santiago penbej. Japon Santiago kaes pansian. Jaxotbej asaow, pawəlpow Salomé.

⁴¹ Japi watho' Jesús naknanuamt, pejnachala suapich, Galilea təajnxot. Japi watho' kajachawaetbejpi Jesús, nanuamt wəti Galilea təajnxot. Xabich asew watho' jaxotbej nuil. Japi watho' fulaen, Jesús suapich, Jerusalén paklowax poxadin.

Patəpan Jesús ochpox məaxwəajtət
(Mt 27.57-61; Lc 23.50-56; Jn 19.38-42)

⁴²⁻⁴³ José Arimatea paklowaxpijin. Japon judiəspaklochowxot paklonbej, Junta Supremapijin. Japon xabich sitaens. Japon José wəaj nawet Dios puexa pejjiw tato' laxaelpox.

Napatamatkoi wəajna, japamatkoi puexa jiw chiekal chawəajnachaemt napataliajwa. Japamatkoi pawəl chawəajnachaemsmatkoi. Do jawət, japamatkoi kaliax wətlejen, José fulaech Pilato poxade. José pejlewla-el, pat wəton Pilatoxot. José kawəajan Pilato fisliajwapon patəpan Jesús.

⁴⁴ Pilato nejchaxoel: "Jesúskas kamta təp" —aechon, nejchaxoel wət. Samata, Pilato wullala soldawcapitán. Soldawcapitán pat wət, Pilato wəajnachaemt wət, jum-aechon soldawcapitánliajwa:

—jDiachwəajnakolaxkat Jesús təp? —aech Pilato.

⁴⁵ Soldawcapitán jumnot wət, jum-aechon:

—Diasdo'. Jesús təplison —aechon.

Do jawət, Pilato to'a pejsoldaw, japi soldaw tapaeliajwapi José xalaeliajwa patəpan Jesús.

⁴⁶ Do jawət, José wəajt chimiabə', sávana. Do jawəx, José fulaech patəpan chanuk poxade. José pat wət patəpan chanukxot, kuwpon Jesús kematamatlaspoxan, təakmatamatlaspoxanbej, cruztat. Do jawəx, José otlison patəpan Jesús məaxwəajtət. Do jawət, ia't pinjit, jajaerat, matariamān məaxwəaj fakasliajwa.

⁴⁷ Jawət María Magdalena paklowaxpijow, asaow Mariəbej, japow José pen, japi watho' taeni patəpan məaxwəajtət ochxot.

16

Patəpan Jesús mat-echpox pejme dukaliajwa
(Mt 28.1-10; Lc 24.1-12; Jn 20.1-10)

¹ Do jawəx, napatamatkoi toep wət, juimt tujop wət, María Magdalena paklowaxpijow, asaow Mariəbej, japow Santiago pen, Salomé suapich, xabejasapan wəajti patəpan Jesús joelaliajwa.

² Kandiasap wət, dominkomatkoi wət, juimt julan wət, japi watho' fulaechlisi patəpan och poxade.

³ Japi watho' nuamtat fol wət, nakaewa najum-aechi:

—Patəpan Jesús ochxot, japawəaj faka'ch ia't, pinjitat. jAchankat japot ia't wəlnakwematariamān xatis leliajwas patəpanwəaj? —na-aechi nakaewa.

⁴ Pe pat wəti patəpanwəajxot, japi watho' taen ia't fafatat nuka-elpox. Asalelaxach nukox.

⁵ Samata, japi watho' low patəpan ochxot. Jaxot kaen pansian taeni. Ekon poklalel. Naxoelox xabich papoeyax. Pakchowaxbejpo. Japi watho' beljow, taen wəti papoeyax naxoelan.

⁶ Do jawət, japon pansian jum-aech:

—jNabej belwe'! Xan matabijtax, xamal falaeman Jesús Nazaret paklowaxpijin taeliajwam, japon kematamatlaxtat cruztat təpon. Pe Jesús mat-echlison. Pejme amwətjel duklison. jTaem chiekal ochxot! Amxot ajillison.

⁷ jXabua'de japon pejnachala poxade japi chapaeliajwam! Chapaeyam wət, jPedrobej chapaem! jJum-amopi: 'Xamal wəajna Jesús wəajna xael Galilea təajnxo poxade. Jaxotde

Jesús taeyaxaelam. Me-ama chajia jum-aechon xamalliajwa, jachiyaxaelon' —amopi, chapaeyaxaelam wut! —aech ángel.

⁸Japi watho' japox jumtaen wut, jaxot nakolapi. Do jawut, dukplisi. Do jawutbej, xabich tathulal, beljow xoti. Chapae-eli asew jiw, xabich pejlwla xoti.

Jesús natulaelt pox María Magdalena paklowaxpijowxot
(Jn 20.11-18)

[
⁹Napatamatkoi toep wut, dominkomatkoiliajwa nalian wut, Jesús mat-ech pejme dukaliajwa. Mat-ech wut, matxoela natulaelton María Magdala paklowaxpijowxot. Jesús, tupa-el wutfak, siete dep nakolax to'apon japow pejmatpuatxot.

¹⁰María taen wut Jesús, jawut fulaechow Jesús pejnachala poxade. Japi wuajna now, nejxaejwas xoti Jesúsliajwa. Jawut María chapaei taenpox.

¹¹Jum-aechow:

—¡Jesús mat-echlison! ¡Amwutjel pejme duklison! ¡Xan tajut chiekal taenx Jesús! —aechow. Pe Jesús pejnachala naexasis-el japow chapaeipox Jesús taenpoxliajwa.

Jesús natulaelt pox kolenje pejnachalanxot
(Lc 24.13-35)

¹²Do jawux, Jesús natulaelt kolenje pejnachalanxot, japi laelp wut paklowax tathoetlel. Jesús natulaelt wut, me-ama asan wut, jakabuan-aechon japixot.

¹³Do jawux, japi kolenje nawia asew pejnachala poxade chapaeliajwa taenpox. Japibej naexasis-esal, chapaei wuti Jesús taenpox.

Jesús to'apox pejnachala, japi naewuajnalajwa jiw
(Mt 28.16-20; Lc 24.36-49; Jn 20.19-23)

¹⁴Do baxael, Jesús natulaelt once pejnachalaxot, japi naxael wut. Jaxot Jesús lot pejnachala. Lot wut, jum-aechon japiliajwa:

—¿Ma-aech xotkat xamal naexasis-emil? ¿Ma-aech xotbejkat matnaetinkam naexasisliajwam asew jiw, xamalxot nataeni, chapaei wuti xamal: '¡Jesús mat-echlison! ¡Amwutjel pejme duklison!' —aech wut japi jiw? —aech Jesús, lot wut pejnachala.

¹⁵Jesús pejme jum-aech pejnachalalajwa:

—¡Xabua'de puexa jiw naewuajnalajwam chimiawuajan, potuajnuhanpijijw!

¹⁶Xan nanaexasitpi, ¡japi bautisam Dios bu'weliajwas! Asew jiw naexasis-elpi, japilax Dios pelsaxaes infierno poxadik.

¹⁷Xamal naexasisaxaelpi, japi jiw tajaxtat to'axaeli dep nakolaliajwa jiw pejmatpuatanxot. Naksiyaxaelbejpi asew jiw pejjamechan, majt matabija-eljamechan naksiyalajwa.

¹⁸Japi jom jaela wut, liklaxisal. Veneno af wutbej, tuxaxili. Jiw bu'xaeya boejthuxaxael, pejke-etat jacha wut —aech Jesús pejnachalalajwa.

Jesús bu'fos pox athu poxase
(Lc 24.50-53)

¹⁹Do jawux, Jesús wajpaklokolan, naksiyax buxtoet wut pejnachalalajwa, Dios bu'foslison athu poxase. Ma amwutjel Jesús ek Dios poklalel jiw tato'lalajwa, Dios suapich.

²⁰Do jawux, Jesús pejnachala follisi potuajnucha jiw naewuajnalajwa. Dolis japi naewuajnalap chimiawuajan, Jesucristo pejwuajan. Ja-aech wut, Jesús kajachawaesful pejnachala. Naewuajan wuti chimiawuajan, isbejpi koexaxan. Samata, jasoxtat xabich jiw matabija chimiawuajan diachwuajnakolaxpox.]

Lucas lelpox Jesucristo pejuajan

Lucas tuadutpox lelalijwa Jesucristo pejuajan

¹⁻² Jesús tuadut wut naewuajna xampathatat, xabich jiw taenson. Asew japixot taen, Jesús nabijaj wut. Taenpi, japi jiw, potuajnu xam naewuajan Jesús pejuajan. Asew jiw jumtaenpi Jesús pejuajan, japi jiwbej lel jumtaenpoxan, asew jiwbej matabijalijwa Jesús pejuajan, japon naewuajanpoxanbej.

³⁻⁴ Xan Lucas wuajna xamta xam jiw matabijapi japawuajan, xanbej chiekal matabijsliajwan. Teófilo, puexa jiw xam sitaenponam, lelx ampawuajan xam chiekal matabijsliajwam Jesús pejuajan. Lelx wut ampawuajan, nejchaxoelx: “Xan lelx Jesús ispoxanlija, Teófilo chiekal matabijsliajwa diachwuajnakolaxpox, asew jiw majt naewuajanpoxanlija, Jesús pejuajanlija” —an, nejchaxoelx wut.

Dios pej-ánel jum-aechpox nalaelsaxaelpox Juan, jiw nabautisan

⁵ Rey Herodes, Judea tuajnu pijiw tato'al wutfuk, japamatkoian sacerdote duk. Japon pawul Zacarias. Sacerdotesxot kaemut pawul Abias. Zacarias japamatpijin. Pijow pawul Isabel. Japow Aarón pamow. Zacariasbej Aarón pamon. Judíosxot Aarón chiekal matxoe-lasacerdote.

⁶ Zacarias, pijow suapich, chiekal pachaempi Dioslija. Chiekal naexaxisfulbejpi Dios tato'alpox. Samata, chinax kaen aton jumchiyaxisal japilijwa: “Japi chiekal naexaxis-el Dios” —chiyaxisal.

⁷ Pe Isabel xijil, nafoena xot. Japow xabich pati'ow, pamal suapich.

⁸ Zacarias, pejmüt suapich, nalixa wut nabichlija Dios pejtemplobat, japon fol, pejmüt suapich, nabichlija Dios pejbichax.

⁹ Tuaduslija wut nabichlija Dios pejtemplobat, me-ama japi pejkabuan, majt natamejapi matabijalijwa, achan Dios makafisaxaes bowalijwa incienso. Jawut Zacarias makafich bowalijwapon incienso. Do jawut, lowpon Dios pejtemploba.

¹⁰ Zacarias incienso bowa wutfuk, xabich judíos Dios kawuajan tathoetlel.

¹¹ Do jawut, Dios pej-ánel chalechkal natulaelt Zacariasxot. Japon ánel nuk altar poklalel, incienso bowaxot.

¹² Zacarias taen wut ánel, xabich nejchaxoelon. Xabich beljowbejpon.

¹³ Do jawut, ánel jum-aech:

—Zacarias, ¡nabej nejlewlé! Dios xam jumtaen nejkawuajna xan. Nijow Isabel naxuwla xam naxulanlija. Wuldüyaxaelampon Juanwultat.

¹⁴ Xam xabich nejchachaemlaxaelam naxulanlija. Asew jiwbej xabich nejchachaem-laxael, xamal suapich, xaljamch nalaelt wut.

¹⁵ Naxulan xabich pachaemaxael Dioslija. Feyaxilon vino. Feyaxilbejpon saxa. Japoch xaljamch nalaelsaxael wut, chanlaelsaxael Espíritu Santo tato'laspox. Samata, japon isfulaxael Espíritu Santo tato'laspoxan.

¹⁶ Asamatkoi japon naewuajan wut, xabich judíos kofaxael babijaxan ispoxan, pak-lokolan Dioskal naexaxisfulalijwa.

¹⁷ Naewuajna xaelon wajpaklon wuajna Dios pejjamechan jiw jumtaelija. Me-ama chajiakolaxtat profeta Elías Dios pijaxtat jiw naewuajnaful wut, jachiyaxaellap-is Juan. Juan naewuajanpoxtat poejiw pejme pachaemaxael, paxi suapich. Jiw, majt Dios naexaxis-eli kaenejchaxoelaxaeli, Dios naexasiti suapich. Jasox Juan isful wut, jiw chiekal naexas-isfulaxael, wajpaklokolan pat wut —aech ánel, Dios buxto'aspox jumchilijwapon Zacarias.

¹⁸ Do jawut, Zacarias wuajna xamta wut ánel, jum-aechon:

—Xan xabich pati'nan. Tajowbej xabich pati'ow. ¿Machiyaxaelenkat xan matabijsliajwan, najum-ampoxan japoch xaljamchlija diachwuajnakolax wut? —aech Zacarias.

¹⁹ Dios pej-ánel jumnot wut, jum-aech:

—Xan Gabriel, Dioslija nabistaxponan. Dios nato'ak xam jumchilijwan japox.

²⁰ Xam naexaxis-emil xot xan jum-anox, ma amwut xam buxwuajnajilaxaelam. Hasta xan jum-anox pat wut naxulanlija, jawut xam pejme naksiyaxaelam —aech ánel.

²¹ Zacarias nospaei wutfuk, ánel suapich, jiw tathoetlel wuajna wut. Nakaewa nawuajna xamta wut, jum-aechi: “¿Ma-aech xotkat Zacarias piach kejil nakolslija Dios pejtemplobaxot?” —na-aechi nakaewa.

²² Do jawut, Zacarias nakolt wut, naksiyaxilon. Ja-aech wut, wuajna weti tathoetat nejchaxoeli: “Zacarias masoxtat bej taenbejpon Dios pej-ánel templobat” —aechi, nejchaxoel wut. Zacarias pejke-etat jiw chanaekabuanaful, naksiyaxil xotlison. Ja-aechfulon, buxwuajnajil xoton.

²³ Zacarías Dios pejbichax toet wat templobaxot, fúlaechon pejba poxade.

²⁴ Do jawux, Zacarías pijow, Isabel, moejow. Cinco juimtje pejbaxot kawetapow. Laeja-elow asalel. Nejchaxoel wat, jum-aechow:

²⁵ “Dios nakajachawaet. Samata, xan moejwax. Amwütjel kaes jiw najumchiyaxil: ‘Japow pawis naxwłaxil’ –nachiyaxil jiw xanliajwa, naxwłaxaelen xot” –aech Isabel, nejchaxoel wat.

Dios pej-ängel jum-aechpox Jesús nalaelsaxaelpox

²⁶ Isabel naxwłalajwa wat, tres juimtje wewe'pas wat, Dios to'ak pej-ängel Gabriel Nazaret paklowax poxadik, Galilea tuajnalel.

²⁷ Dios to'ak pej-ängel pawis poxadik, japow pawł María, taeliajwaspow. Japow chinax aton bu'moejs-esal. Chajia jumdutow asamatkoi nakjyialajwa, José swapich. Japon José, rey David pamon.

²⁸ Ángel pask María dukxot. Pat wat, jum-aechon:

–¡Moi, María! Dios xabich nejchachaemil xamliajwa. Pomatkoicha Dios xam chalafal –aech ángel.

²⁹ María japox jumtaen wat, xabich nejchaxoelow. Do jawut, pajut najum-aechow: “¿Achax chiyaxaelkat japox, ángel najum-aechpox?” –aechow, nejchaxoel wat.

³⁰ Pe Dios pej-ängel jum-aech Dios baxto'aspo:

–María, ¡nabey nejlewlé! Dios xabich nejchachaemil xamliajwa.

³¹ Mox nawujna xam moejwalajwam. Xam naxwłchaxael. Japoch xaljamch pawłaxael Jesús.

³² Japon paklonaxael. Tato'laxaelbejpon Dios pijaxtat. Jumchiyaxaeson: “Dios athupijin paxulan” –chiyaxaeson. Wajpaklon Dios pajut wulduyaxael japon reyliajwa. Me-ama pejuajnapijin David, jachiyaxaeson.

³³ Japon reyaxael, Dios pejiw pomatkoicha tato'lalajwapon. Japon pejtato'lax toepaxil –aech Dios pej-ängel Marialiajwa.

³⁴ María wuajnaemt wat, jum-aechow:

–¿Ma-aech xotkat japox wulja-aech xanliajwa, poi fis-enil wat? –aechow.

³⁵ Ángel jumnot wat, jum-aechon:

–Dios pej-Espíritu Santo fuloeyaxoek xam poxasik, me-ama itloegen. Do jawut, xam moejwaxaelam Dios pejpamamaxtat. Samata, yamxuch nalaelt wat, Dios pijnaxael. ‘Dios paxulan’ –chiyaxaeson.

³⁶ Nejwul-atow Isabel, pati'owpow, japow naxwłaxael. Jiw jumtispow: ‘Japow naxwłaxil’ –tispow, naxwłaxael. Japow moejowpox seis juimtelisox.

³⁷ Dios xajup puexa isliajwa. Ajil Dios xajupaxilpox –aech ángel Marialiajwa.

³⁸ María jum-aech:

–Xan Dios pamakwan. ¡Dios nej is xam najum-ampox! –aechow.

Do jawux, ángel chijia Maríaxot.

María fúlaechpox taeliajwa Isabel

³⁹ Dios pej-ängel chijia wat Maríaxot, do jawut, María thilt. Thilt wat, bichakal fúlaechow Judea tuajnalel, muaxan poxade, Isabel dukpaklowax poxade.

⁴⁰ Jaxotde pa'a wat, patow Zacarías pejbaxot. Do jawut, María moi-aech Isabelliajwa.

⁴¹ Isabel japox jumtaen wat, yamxuch, woejtatpoch, xabich nachoela. Do jawut, Isabel jum-aech Espiritu Santo pijaxtat.

⁴² Jum-aechow pinjemetat Marialiajwa:

–Dios is xabich pachaempox xamliajwa. Me-ama asew watho'liajwa, jachi-el Dios. Dios isaxaelbej xabich pachaempox naxulan, nalaelsaxaelponliajwa.

⁴³ Xam tajpaklon penaxaelam. Jachiyaxaelam xot, xan kaes pachaempowa-enil xam nataeliajwam.

⁴⁴ Xam ‘¡Moi!’ –na-am wat, xaljamch, woejtatpoch, xabich nachoela, xabich nejchachaemil xot.

⁴⁵ Xambej xabich nejchachaemlam, naexasitam xot ángel jum-aechpox, Dios pijaxtat jachiyaxaelpox –aech Isabel Marialiajwa.

⁴⁶ Do jawut, María jum-aech:

“Xan jum-an ampo, nejchaxoelx wat Diosliajwa. Dios xabich pachaem.

⁴⁷ Xan xabich nejchachaemlax, Dios nabu'weyaxael xot.

⁴⁸ Xabich nejchachaemlaxbej, Dios namakafit xot japon pamakwanliajwa. Dios xabich pachaem xanliajwa. Samata, xabich jiw jumchisfulaxael xanliajwa: ‘Dios is pachaempox Marialiajwa’ –chisfulaxael jiw xanliajwa.

⁴⁹ Dios xabich mamnik puexaliajwa. Iapon xabich pachaempox xanliajwa. Dios kaes pejme pachaem. Me-ama jiw, jachi-el. Kaes ajil, me-ama japon, jason.

⁵⁰ Dios beltaen jiw, japi sitaenpi Dios.

⁵¹ Dios is koechaxan, xabich pachaempoxan. Pe jiw nejchaxoelpi: 'Xan kaes pejme pachaeman. Me-ama asew jiw, jachi-enil' —aechi, nejchaxoel wut, japi jiw Dios mastaeayaxaes.

⁵² Dios chiekal toet jiw, tato'alpi ampathatpijiw, japi naexaxis-eli Dios. Asew jiw lax nakaewaliajwa jum-aechi: 'Xatis xabich kaes pejme pachaema-esal' —aech wuti pajutliajwa, nejchaxoel wut, japi Dios wulduiyaxaes asew tato'laliajwapi.

⁵³ Majt xabich litaxaelapi, japi Dios chaxduwslisi pachaempoxan. Kemaeyalax, Dios to'axaes ke-etat asalelaliajwa.

⁵⁴ Dios kajachawaet pejiw, japi judiospi. Nejkiowa-elon japi beltaeliajwa.

⁵⁵ Jasoxtat Dios jumdut wajwujnapijiwliajwa, Abraham, pamojiwbej" —aech María.

⁵⁶ María duk tres juimtje Isabel pejbaxot. Do jawux, María nawia'a pejba poxade.

Juan nalaelttox, japon jiw bautisanaxael

⁵⁷ Isabel wepach pejmatkoi naxuwaliajwa. Samata, naxuwalpow. Faenow poich.

⁵⁸ Pejiw, mox duilibej, japox wultaena wut, taechipow, nejchachaemil xot japowliajwa. Japi jiw matabija, Dios is pachaempox japowliajwa.

⁵⁹ Kaesemana wut yamxuch nalaelttox, japi jiw fulaen xaljamch circuncidaliajwapi, Dios pejmarkaxliajwa. Japox japi pejkabuan, judios xot. Jawut yamxuch wulduisias pax Zacarias pejwultat.

⁶⁰ Pe Isabel jum-aech:

—¡E! Pawalaxaelon Juan —aechow.

⁶¹ Pejiw jumnot wut, jum-aechi:

—Diachwujnakolax nejjiwxot chinax kaen pawula-el japawul —tispow.

⁶² Japi taxdoefa wujnachaemsliajwa yamxulan pax, pax wulduiliajwa paxulan, me-ama japon nejxasink.

⁶³ Pe jawut, Zacarias wujow tawlofach, jaxot lelaliajwa. Lelsox jum-aech: "Pawalaxaelon Juan" —aech Zacarias lelpox. Jawut puexa jiw xabich nejchaxoelanuil.

⁶⁴ Do jawut, chalechkal Zacarias pejme chiekal naksiyapon. Me-ama majt, ja-aechon. Naksiyapon pachaempoxan Diosliajwa. Jum-aechon: "Dios, xam xabich pachaemam" —aechon Diosliajwa.

⁶⁵ Puexa jiw, mox duili, xabich nejchaxoelanuil. Asew jiw Judea tuajnapijiw, muxanlel duili, nachapaeful jumtaenpox.

⁶⁶ Puexa jiw, pajut chiekal jumtaenpi, nawujnachaemsna wut, jum-aechi, nejchaxoel wut: "Japoch yamxuch ti't wut, ¿machiyaxaelkat?" —aechi, nejchaxoel wut, japi chiekal matabija xot Dios kajachawaesfulaxaespox.

Zacarias jum-aechpox

⁶⁷ Zacarias, japon yamxulan paxpon, jum-aech Espiritu Santo pijaxtat, jum-aech wuton Dios ispoxliajwa:

⁶⁸ "Xatis judios wajDios jumchisfulaxaes: 'Xam xabich pachaemam' —chisfulaxaes wajpaklon Diosliajwa. Japox jumchisfulaxaesbej, to'ak xoton paxulan, japon bu'weliajwa pejiw.

⁶⁹ Dios to'ak pamamakolan xatis nakbu'weliajwa. Japon, rey David pamon. David, Dios pamakan.

⁷⁰⁻⁷¹ Japoxliajwa Dios chajia buxto'a pejprofetas, jumduisiajwa wuton. Dios jumdut to'axaelpox kaen aton, japon nakbu'weliajwa wajdaelmajiwxot, puexa xatis jiw naknejweslapixotbej.

⁷² Dios nakbeltaeyaxael. Me-ama wajwujnapijiw jumduch, jachiyaxaelbej Dios xatisliajwa. Nejkiowaxilon chajia jumdutox wajwujnapijiwliajwa.

⁷³ Dios jumdut japox waj-am Abrahamliajwa.

⁷⁴ Jumdutpon nakbu'weliajwa wajdaelmajiwxot. Ja-aech wut, nakbu'weyaxaelon tanbichfulaliajwas wajlewla-elaxtat.

⁷⁵ Jasoxtat Dios tanbichfulas wut, chiekal isfulaxaes Diosliajwa, xatis babijax is-elaxtat pomatkoicha" —aech Zacarias, jum-aech wut judiosliajwa.

⁷⁶ Zacarias jum-aech paxulan Juanliajwa: "Wua, jiw jumchiyaxael xamliajwa: 'Dios athupijin pejprofeta' —chiyaxael jiw xamliajwa. Japox jumchiyaxaeli, naewujnafulaxaelam xot wajpaklon wujjna, asamatko pask wut, jiw chiekal naexasisliajwa wajpaklon.

⁷⁷ Jiw naewujnafulaxaelam matabijaliajwapi Dios bu'weyaxaespox, Dios beltaeyaxaes xoti babijaxan ispoxanliajwa.

⁷⁸ Dios nakbeltaen xot, Mesias fuloeyaxoek Diosxotsik xatisxotaliajwa. Me-ama juimt julan wut, jachiyaxoekon.

⁷⁹ Wajpaklokolan pat wut, japon jiw naewhajnafulaxael diachwajnakolaxpox. Majt jiw pejnejchaxoelaxtat, me-ama nanhamti itkuatxaxot. Ja-aechpi, japi asamatkoi chiekal pachaemaxael, naexasit wuti Mesías naewhajanpoxan. Jawut japi pejnejchaxoelaxan, me-ama itliak wut, jachiyaxael. Majt pejlowlapi tapaliajwa, japi pejlowlaxil, japon chiekal naewhajan wut. Japi chiekal duilafulaxael" —aech Zacarias, jum-aech wut paxulan Juanliajwa.

⁸⁰ Juan chiekal ti'sful wut, kajachawaesfulas Espiritu Santo. Chiekal ti't wuton, pajilaxxot dukon. Do jawut, tuaduton jiw naewhajnaliajwa. Japox ja-aech wut, judíos papasful Juan, jiw bautisanxot.

2

Jesús nalaeltpox (Mt 1.18-25)

¹ Mox pawhajna wut Jesús nalaelsliajwa, japamatkoiyan, Augusto tato'al puexa Roma paklowaxpijiw. Japonbej tato'al asatujnuchanpijiw. Japon to'a pejiw japi jiwwulan lelialajwa, xajuiliajwabej puexa jiw duili japatujnuchanxot, matabijsliajwapon massapich impuesto kaenanula mosaxaeli japi jiw.

² Japox matxoela ja-aech, jiwwulan lelialajwa wut, japon Cirenio gobernador wut Siria tuajnxot.

³ Puexa japi jiw to'as kaenanula fulaeliajwa pejwajnapijiw pejpaklowaxan poxade, japapaklowaxxot wullelialajwas, xajuiliajwasbejpi.

⁴ Samata, japamatkoi José nakolt Nazaret paklowax, Galilea tuajnxot. Do jawut, José fulaechlison Belén paklowax poxade Judea tuajnxotaliajwa, pejwajnapijin rey David, japapaklowaxxot nalaelt xot.

⁵ José bu'fol María. Japow José pijowaxael. Japow moejow.

⁶ Belén paklowaxxot wut, María pejmatkoi wepach naxwllialajwa. Jawut boejpunspow.

⁷ Do jaxot paxulch nalaelt, matxoelapijin. Yamxuch xakiach ponbu'. Ochon naxaeyaxan pak xalwujtholaxtat. Japi chakow jiw papatbatliajwa, ba xajupa-el xot.

Ovejas tataefulpi chapaeispor Jesús nalaelsax

⁸ Belén paklowaxxot mox, yoxot, jaxot ovejas tataefulpi chala pejew ovejasmutan madoi.

⁹ Do jawut, japixot chalechkal natulaelt Dios pej-ángel. Dios pijaxtat xabich itliakon japixot. Me-ama itliakax xabich itliak wut, ja-aechon. Ovejas tataefulpi japox taen wut, xabich beljowpi.

¹⁰ Do jawut, ángel jum-aech: "ixamal nabej belwe! Xan chimiawuajan xaloekx xamal xabich nejchachaemlialajwam. Japox xamalliajwa, puexa asew jiwliajwabej.

¹¹ Amwutjel Belén paklowaxxot, rey David majt dukxot, nalaelt Cristo. Japon paklokolan, Dios to'aspon, fuloekon athulelsik jiw bu'welialjwa.

¹² Xamal jalwekam wut, japoch yamxuch faenaxaelam, ponbu' xakiachpoch, ochpon pak naxaeyaxan xalwujtholspoxtat" —aech ángel ovejas tataefulpiliajwa.

¹³ Do jawut, Dios pej-ángelxot, xabich kaes ángeles chalechkal natulaelba. Japi jajuw wut, jum-aechi Diosliajwa: "Dios xabich pachaem" —aechi. Jum-aechbejpi:

¹⁴ "¡Puexa ampatatpijiw nej sitaepi Dios, athuxotse dukpon! ¡Nex pachaemabejpi, duil wut ampatatat! ¡Japi nej isfule Dios nejxasinkpoxan!" —aechful ángeles jajuiyaxtat.

¹⁵ Dios pej-ángeles kaxase wut athu poxase, ovejas tataefulpi nakaewa najum-aechi:

—Chijias Belén paklowax poxade taeliajwas ja-aechpox, ángel nakchapaeipox, Dios buxto'aspor —na-aechi nakaewa.

¹⁶ Do jawut, japi bichakal fulaech Belén paklowax poxade. Jaxot pa'a wut, taeni María, José suapich. Taenbejpi narianach, ok wut pak xalwujtholaxtat.

¹⁷ Ovejas tataefulpi japoch taen wut, asew jiw chapaeipi Dios pej-ángel jumtisox japochliajwa.

¹⁸ Puexa jiw japox jumtaen wut, xabich nejchaxoelanuili, ovejas tataefulpi chapaei wut japox.

¹⁹ María pajut boejlach nejchaxoelaful ovejas tataefulpi jum-aechpoxliajwa.

²⁰ Do jawut, ovejas tataefulpi nawia. Fol wut, jum-aechi: "Dios xabich pachaem. Is pachaempox" —aechi, taen xoti japox, jumtaen xotbejpi ángel jum-aechpox. Diachwajnakolax japi puexa taen, me-ama Dios pej-ángel jumtispi japoxliajwa.

Jesús buflaechpox Dios pejtemploba poxade

²¹ Yamxuch nalaeltpox siete matkoiyan xent wut, japoch yamxuch circuncidas Dios pejmarkaxliajwa. Do jawut, wulduwspow Jesús wultat. María moejowa-el wutfuk, Dios pej-ángel chajia jumtispow japawultat paxulan wulduiliajwa.

²² Moisés chajia lelpox judíos chiekal naexasit japi pachaemaliajwa Diosliajwa. Samata, cuarenta matkoian xent wut Jesús nalaeltlox, José, Mariabej, japi buflaech Jesús Jerusalén paklowax poxade, paxulan itpaelialjwapi Dios pejtemplobat. Jasox ispi, asamatkoi japoch xaljamch ti't wut Dios tanbichfulaliajwa.

²³ Jasox islisi, Moisés chajia lelpox jum-aech xot japoxliajwa: “Puexa yamxi poejiw, matxoelanaelapi, japi Dios tanbichaxael, ti't wut” —aech xotox.

²⁴ Do jawux, José, María suapich, ofrenda chaxduwpi Diosliajwa, Moisés chajia lelpox jum-aech xot japox isliajwa. Japox jum-aech: “iChaxdu'e kolenje cha-aex a-u, o, kolenje a-utxulan, Dios pej-ofrendaliajwa!” —aechox.

²⁵ Japamatkoiyan Jerusalén paklowaxxot aton duk, japon pawul Simeón. Japon chiekal pachaem Diosliajwa. Pomatkoicha chiekal naexasiton puexa Dios jum-aechpoxan. Simeón pejmatpaxot Espiritu Santo. Japon wuajnowet Cristo pasax, judíos bu'weyaxaespon.

²⁶ Espiritu Santo pijaxtat Simeón chajia matabijt, japon laeja wutfuk japon taeyaxaelpox Cristo, japon Dios jumduchpon.

²⁷ Samata, Espiritu Santo pijaxtat Simeón falaech Dios pejtemploba poxade. Do jawut, Simeón taen José, María suapich, bu'fol wuti Jesús isliajwa Dios to'aspox, me-ama Moisés chajia lelpox jum-aech.

²⁸ Jawut Simeón isfit Jesús. Do jawut, Dios kawuajan wut, jum-aechon:

²⁹⁻³⁰ “Tajpaklon Dios, najumdutampon tajut chiekal taenxlison, jiw bu'weyaxaelpon, ampon. Samata, amwutjel xan, nabistaxponan xamliajwa, inatapaem xan tupaliajwan, xabich nejchachaemlaxtat!

³¹ Xam ampoch to'am jiw bu'weliajwa, puexa jiw taeliajwa.

³² Japon pijaxtat judios-eli matabijaxael diachwuajnakolaxpox. Japon pijaxtatbej nejjiw, judíos, asew jiw sitaeyaxaes” —aech Simeón, Dios kawuajan wut.

³³ José, Mariabej, xabich nejchaxoelanuil, jumtaen wuti Simeón jum-aechpox yamxuchliajwa.

³⁴⁻³⁵ Do jawutbej, Simeón Dios kawuajan Joséliajwa, Maríaliajwabej, yamxuchliajwabej, Dios isliajwa pachaempox japiliajwa. Do jawutbej, Simeón jum-aech asamatkoi jachiyaxaesox Maríaliajwa:

—Asamatkoi xamliajwa, me-ama espadatat xua'la wuti, xabich xaenkaxael, jachiyaxael xamliajwa, naxulan asew jiw pijaxtat nabijasax taenam wut. Xabich israelitas japon naexasisaxisal. Japi napelsaxael. Xabich asew jiw lax naexasisaxaes japon. Japilax bu'weyaxaes. Xabich jiw babejjamechan jumchiyaxaespon. Jasoxtat asew jiw matabijaxael, achax pejnechaxoelaxanxot. Samata, asamatkoi xam xabich nejxaejwaxael —aech Simeón Maríaliajwa.

³⁶⁻³⁷ Jawut kaeow pawis jaxotbej Dios pejtemplobat. Japow Dios pejprofeta. Pawulow Ana, Fanuel paxulow. Japow Aser pamow. Xabich pati'ow. Ochenta y cuatro waechan. Pansiow wut, pamal fitow. Pamal fitpox siete waechan wut, pamal naetapspow. Pamal tup wut, do kaes nakjiya-elisow. Pin-iawaechan tamach laiejepow. Japow chinax nakols-el Dios pejtemplobaxot. Ja-aech japow, Dios pejbichaxan nabist xot. Pomatkoicha japow Dios kawuajnaful. Dios piach kawuajnalialjwa wut, xabich piach naxae-elow.

³⁸ José, María suapich, Dios pejtemplobat wut, Ana mox soepan japixot. Jawut gracias-aechow Diosliajwa, yamxuchliajwabej. Do jawut, jum-aechow yamxuchliajwa puexa Jerusalén paklowaxpijwaliajwa, japi wuajnoweti bu'weyaxaespox japon pijaxtat.

José, María suapich, bunwiatpox paxulch Nazaret paklowax poxade

³⁹ José, María suapich, toeti ispox, me-ama Moisés chajia lelpox jum-aech. Dolisi, paxulch bunwiati pejpaklowax poxade, Nazaret paklowax, Galilea tuajnelel.

⁴⁰ Jesús chiekal ti'sful. Mamnikbejpon. Jesús kaes matabijsful, Dios kajachawaesfulas xot.

Jesús jam wutfuk, nospaeipox, judíos chanaekabu'anapi suapich, Dios pejtemplobat

⁴¹ Kaewaechful wut, José, María suapich, Jerusalén paklowax poxade. Fulalaecha taeliajwa Pascuafiesta.

⁴² Jesús doce waechan wut, japon nakfol Jerusalén paklowax poxade, me-ama japi pejkabuan.

⁴³ Pascuafiesta toep wut, japi puexa fiesta taeni nawia wut pejbachan poxade, jawut Jesús naman Jerusalén paklowaxxot. José, María suapich, matabija-el Jesús kaweta namanpox Jerusalén paklowaxxot.

⁴⁴ José, María suapich, nuamtat fol wut, nejchaxoeli: “Jesúskas chajia wuajna nakfalaech wajjiwtat” —aechi, nejchaxoel wut. Samata, kaematkoi nejmach chiekal foli nuamtat. Do jawux, José, María suapich, tae-el wuti Jesús, jawut tuadutlisi wuajnachaemsliajwa pejjiw. Wuajnachaemtbejpi asew jiw, japi pejmatabijspon.

⁴⁵ Wulwek wuti pejiwxot, japi faena-el Jesús. Do jawut, José, María suapich, kaxa nawen Jerusalén paklowax poadin, jaxot wulwekaliajwapi Jesús.

⁴⁶ Tres matkoi wut, faenipon Dios pejtemplobaxot. Japon ek judíos chanaekabuuanapixot. Naeweton japi. Jesús wuajnachaehtbej matabijsaxtat.

⁴⁷ Jesús chiekal matabijt judíos chanaekabuuanapi jum-aechpox. Chiekal jumnotbejpon, wuajnachaehtas wut. Puexa jiw, japox jumtaen wut, xabich nejchaxoelachalaki, Jesús xabich matabijt xot.

⁴⁸ José, María suapich, taen wuti Jesús ekox, judíos chanaekabuuanapi suapich, xabich nejchaxoelanuili. María jum-aech Jesúsliajwa:

—Wua, xam jasox jachiyaximil xanalliajwa. Xan, nej-ax suapich, xabich nejchaxoelx, xam wulwekx wut —aechow.

⁴⁹ Jesús jumnot wut, jum-aechon:

—¿Ma-aech xotkat xamal xan nawulwekam? ¿Xamalkat matabija-emil xan taj-ax Dios pejbaxotaxaelenpox? —aech Jesús.

⁵⁰ Japi jumatabija-el, Jesús japox jum-aech wut.

⁵¹ Pe María nejchaxoelafal, Jesús jum-aech wut japox. Nejkiowa-elow. Jawux José, María suapich, Jesúsbej, nawia Nazaret paklowax poadi. Jesús Nazaret paklowaxxot duk wut, naexasisfulon José, Mariabej, puexa japi tato'alpoxan.

⁵² Jesús chiekal ti'sful. Kaes matabijsfulbejpon. Dios nejchachaemlafal Jesúsliajwa. Jiwbej nejchachaemlafal Jesúsliajwa.

3

*Juan, jiw bautisan, pajilaxxot naewuajanpox
(Mt 3.1-12; Mr 1.1-8; Jn 1.19-28)*

¹ Tiberio tato'al, puexa Roma paklowaxpijiw. Japonbej tato'al asapaklowaxanpijiw. Japon quince waechan tato'al wut, japamatkoiyan, Poncio Pilato Judea tuajnpijiw tato'al. Jawutbej Herodes Galilea tuajnpijiw tato'al. Herodes pakoewan, pawul Felipe, japon puexa Iturea tuajnpijiw, Tracnite tuajnpijiwbej, tato'al. Asan pawulpon Lisaniás, japon tato'al Abilinia tuajnpijiw.

² Jawut Anás, Caifás suapich, japi kolenje, sacerdotepaklokola. Japamatkoiyan Zacariás paxulan, japon pawulpon Juan, duk pajilaxxot. Jawutbej Juan baxto'as Dios, japon jiw naewuajnafalalajwa.

³ Samata, Juan nanuamt Jordánlajtxot, jaxot naewuajanpon jiw Dios pejjamechan. Juan naewuajan wut jum-aechon: “¡Kofim babijaxan isampoxan! ¡Isfulde Dios nejxasinkpoxan! Ja-amsfulam wut, Dios beltaeyaxael babijaxan isampoxanliajwa. Do jawut, xamal bautisaxaelen” —aech Juan, jiw naewuajnafal wut.

⁴ Juan, jiw bautisan, naewuajan wut jiw, patlisox Dios pejprofeta Isaiás chajia lelpox Juanliajwa. Isaiás chajia lel wut, jum-aechon:

“Kaen aton pajilaxxot nejlat wut, jumchisfulaxaelon jiwliajwa: ‘¡Kofim babijaxan isampoxan wajpaklonliajwa! Me-ama jiw chiekal nuamt chaemt wut paklon pasliajwa, jja-amde nejnejchaxoelaxan! ¡Isfulde Dios nejxasinkpox! ¡Ja-amsfulde!

⁵ Puexa tufatan as tholaxaes nuamt chiekal najupaliajwa. Puexa muaxan koeyaxaesbej sat chiekal najupaliajwa. Nuamanbej, jajiali, matnoch xatathalaxaes. Nuamanbej muthan wut, pe'axaes chiekal najupaliajwa.

⁶ Puexa jiw matabijaxael Dios to'aspon jiw bu'welijwa' —chiyaxaelon” —aech Isaiás chajia lelpox Juan, jiw bautisanliajwa.

⁷ Juan, jiw bautisanxot, xabich jiw papasful japi bautisaliajwas. Japi jiwxot, asew kofael wut babijaxan isopoxan, japibej nakiowa nakbautisasia. Me-ama asew jiw babijaxan isopoxan kofapi, jachisiapi. Samata, jawut, Juan jum-aech japi jiwliajwa: “Xamal, me-ama jom dukpi welijwa, jit patuajax boejtaen wut, ja-am xamal. Pe asamatkoi xamal weyaximil, babejkolax kastikaxmatkoi pat wut.

⁸ ¡Kofim babijaxan isfulampoxan! ¡Isfuldelax Dios nejxasinkpoxan! Japox ja-amsfulam wut, puexa jiw matabijaxael, diachwuajnakolax xamal babijaxan isampoxan kofampim. ¡Xamal nakaewa nabej najum-aeché! ¡Xanal Abraham pamojiwan! Samata, diachwuajnakolax Dios xanal nabu'weyaxael' —nabej aeche' najut! Xamal Abraham pamojiwam. Pe nakiowa babijaxan isam wut, Dios xamal bu'weyaxil. Dios nejxasink wut, xajjup ia' Abraham pamojiw dofaliajwa.

⁹ Naebaechnaechan, naboesfuli kaewaechful. Pe japanaechan kaes naboesfula-el wut, xamal liktam japanaechan. Do jawux, majow wut, jitat it-owam. Jachiyaxaelbej xamalliajwa, Dios kastika wut, naexasis-emil wut Dios” —aech Juan, jiw bautisan, babijaxan isfulpiliajwa.

¹⁰ Do jawut, japi wuajnaechaemt wut, jum-aechi:

—¿Machiyaxaelenkat xanal isfulaliajwan Dios nejxasinkpoxan? —aechi Juanliajwa.

¹¹ Juan jumnot wut, jum-aechon:

—Xamal koloeyax wut kamis, asan aton xabich kejl wut naxoelaliajwa, j Japon aton chaxdu'e naxoelax! Xamal naxaeyaxan wut, asan aton xabich wejisal wut xaeliajwa, j Japon aton chaxduim! —aech Juan.

¹² Do jawut, pejme asew jiw pat Juanxot. Japi mox soepa bautisaliajwas. Japi impuesto mat-omwuljoew Roma gobiernoliajwa. Japi jum-aech, wuajnaechaemt wuti Juan:

—¿Xanal machiyaxaelenkat isliajwan Dios nejxasinkpoxan? —aechi.

¹³ Juan jumnot wut, jum-aechon japiajwa:

—Xamal jiw mat-omwuljowam wut impuesto, jmat-omwuljoem nejpaklon to'apoxantat! jKaes pejme nabej mat-omwuljoe' jiw naekichachajbaliajwam! —aech Juan impuesto mat-omwuljoewliajwa.

¹⁴ Do jawut, soldawbej pat Juanxot. Japibej wuajnaechaemt wut, jum-aechi Juanliajwa:

—¿Machiyaxaelenkat xanal isfulaliajwan Dios nejxasinkpoxan? —aechi Juanliajwa.

Do jawut, Juan jumnot wut, jum-aech soldawliajwa:

—jXamal nabej bu'athiey' kenosliajwam asew jiw pejew! jNabej tasale'bej asew jiw, nejmachpijiw, japi pejew kenosliajwam! jXanejchachaemilde nejpaklon motpoxantat! —aech Juan soldawliajwa.

¹⁵ Xabich jiw wuajnaewesful Cristo pasaxaelpox, Japon Dios to'axoekspoon jiw bu'weliajwa. Samata, jiw jumtaen wut Juan naewuajanpox, japi nakaewa najum-aech: "Diachwuajnakolax Juan bej Cristobej" —na-aechi nakaewa.

¹⁶ Pe jawut Juan pajut chiekal jum-aech puexa jiwliajwa: "Diachwuajnakolax xan jiw bautisafulax mintat, jiw kofa wut babijaxan ispoxan. Asamatkoi xanwux asan fulaeyaxaen. Japonlax to'axael Espiritu Santo jiw kajachawaesfulaliajwas. Espiritu Santo pejpamamax, me-ama jit, jiw babijaxan ispoxan toejwaliajwas, jiw pejnechaxoelaxan pachaemaliajwa. Japon fulaeyaxaelpon kaes pejme paklonaxael. Me-ama xan, jachiyaxilon. Xan omjinil Japon pejkajachawaesnanliajwa.

¹⁷ Lulpijin trigo bokchalula trigokal namaeliajwa. Do jawut, trigo j Japon batat chawaliajwa. Trigobok, trigotonanbej, pelton lausliajwa jitat. Jachiyaxaelbej fulaeyaxaelon. Japon tamejaxael Diosxotse pachaempikal, japi jiw naexasiti Dios. Asewjiw, babijaxan ispi, naexaxis-elbejpi Dios, japi pelsaxaeks jitadik, itkuawaxil poxadik" —aech Juan jiwliajwa.

¹⁸ Jasoxtat Juan naewuajnafalbej jiw. Asawuajantat, pachaemwuajan, Juan naewuajnafal jiw.

¹⁹ Juan fiatbej Herodes, Galilea tuajnapijiw tato'lan. Fiat wut, jum-aechon Herodesliajwa, Japon fe'en xot pakoewan Felipe. Japow Felipe pijow. Japow pawul Herodias. Juan japox jum-aech Herodes nejchaxoelaliajwa, kaes asaxan babijaxan xabich isful xoton.

²⁰ Pe Herodes naexaxis-el Juan jum-aechpox. Pelax Herodes asax babijax pejme ispon, Juan jia xoton jiw jebatat.

Jesús bautisaspox

(Mt 3.13-17; Mr 1.9-11)

²¹ Asamatkoi, Juan jiw bautisa wut, jawutbej Jesús bautisas. Jesús bautisas wut, Dios kawuajan wuton, taenon athu'afachpox.

²² Jaxotsik Espiritu Santo fuloek, me-ama a-utlejen Jesús pejmatwuajasic. Do jawut, jumtaenbejpon athulelsk jumtiskaspoex. Dios pajut jum-aech:

—Xam taxulnam, xabich nejxasinkaxponam. Xamliajwa xabich nejchachaemlax —aech Dios Jesúsliajwa.

Ampilap Jesucristo pejuajnapijiw

(Mt 1.1-17)

²³ Jesús treinta waechan wut, tuadut naewuajnalialiajwa jiw. Jiw nejchaxoel Jesúsliajwa: "Japon José paxulan" —aechi asbuan jumch, nejchaxoel wut. José pax pawul Elí.

²⁴ Elí pax pawul Matat. Matat pax pawul Leví. Leví pax pawul Melqui. Melqui pax pawul Jana. Jana pax pawul José.

²⁵ José pax pawul Matatías. Matatías pax pawul Amós. Amós pax pawul Nahúm. Nahúm pax pawul Esli. Esli pax pawul Nagai.

²⁶ Nagai pax pawul Maat. Maat pax pawul Matatías. Matatías pax pawul Semei. Semei pax pawul Josec. Josec pax pawul Judá.

²⁷ Judá pax pawul Joanán. Joanán pax pawul Resa. Resa pax pawul Zorobabel. Zorobabel pax pawul Salatiel. Salatiel pax pawul Neri.

²⁸ Neri pax pawul Melqui. Melqui pax pawul Adi. Adi pax pawul Cosam. Cosam pax pawul Elmadam. Elmadam pax pawul Er.

²⁹ Er pax pawul Jesús. Jesús pax pawul Eliezer. Eliezer pax pawul Jorim. Jorim pax pawul Matat.

³⁰ Matat pax pawul Levi. Levi pax pawul Simeón. Simeón pax pawul Judá. Judá pax pawul José. José pax pawul Jonam. Jonam pax pawul Eliaquim.

³¹ Eliaquim pax pawul Melea. Melea pax pawul Mena. Mena pax pawul Matata. Matata pax pawul Natán.

³² Natán pax pawul David. David pax pawul Isaí. Isaí pax pawul Obed. Obed pax pawul Booz. Booz pax pawul Sala. Sala pax pawul Naasón.

³³ Naasón pax pawul Aminadab. Aminadab pax pawul Admin. Admin pax pawul Arni. Arni pax pawul Esrom. Esrom pax pawul Fares. Fares pax pawul Judá.

³⁴ Judá pax pawul Jacob. Jacob pax pawul Isaac. Isaac pax pawul Abraham. Abraham pax pawul Taré. Taré pax pawul Nacor.

³⁵ Nacor pax pawul Serug. Serug pax pawul Ragau. Ragau pax pawul Peleg. Peleg pax pawul Heber. Heber pax pawul Sala.

³⁶ Sala pax pawul Cainán. Cainán pax pawul Arfaxad. Arfaxad pax pawul Sem. Sem pax pawul Noé. Noé pax pawul Lamec.

³⁷ Lamec pax pawul Matusalén. Matusalén pax pawul Enoc. Enoc pax pawul Jared. Jared pax pawul Mahalaleel. Mahalaleel pax pawul Cainán.

³⁸ Cainán pax pawul Enós. Enós pax pawul Set. Set pax pawul Adán. Adán Dios isaspon atonliajwa.

4

Jesús xapaejaspox Satanás (Mt 4.1-11; Mr 1.12-13)

¹ Jesús duk wut, xabich kajachawaech Espíritu Santo. Samata, nawia'an wut Jordánlajtxotdin, Jesús Espíritu Santo bu'fos pajilax poxade.

² Jaxotde cuarenta matkoiyan kaweta wut, chinax xae-elon. Cuarenta matkoiyan toep wut, do jawut, Jesús xabich litaxaela. Jawut dep pejpaklon, Satanás, pat Jesúsxot. Paton xapaejalijwa Jesús, Jesús babijax isliajwa Diosliajwa.

³ Samata, Satanás xapaejt wut, jum-aechon Jesúsliajwa:

—Diachwujnakolax xam Dios paxulnam wut, jampot ia't to'im panax nadofalijawa! — aech Satanás Jesúsliajwa.

⁴ Jesús jumnot wut, jum-aechon:

—Dios pejjamechan, chajia lelspx, jum-aech: 'Jiw duilaxil naxaeyaxankallijwa. Jiw wewe'pasbej Dios pejjamechan naexasisfulalijwapi' — aech Dios pejjamechan, chajia lelspx — aech Jesús Satanásliajwa.

⁵ Do jawut, Satanás pejme xapaejsliajwa wut, bu'folon Jesús pinamux athu poxase Jesús itpaelijwas puexa tuajnuhan ampathatat.

⁶ Do jawut, Satanás jum-aech:

—Puexa ampatuajnuhan, paklowaxanbej, japoxan puexa xan tejew, xan malech nachaxdut xoton. Xanbej paklokolan ampatuajnuhanpijiwliajwa. Puexa japoxan xan malech chaxdusliajwan. Samata, chaxdusasianpon malech chaxdusaxaelen.

⁷ Tajwujnalel xam brixat nukam wut, najum-am wutbej: 'Xam xabich pachaemam. Xam tajpaklokolan' —na-am wut xanliajwa, puexa malech xam chaxdusaxaelen japatuajnuhan, japapaklowaxanbej — aech Satanás Jesúsliajwa.

⁸ Jesús jumnot wut, jum-aechon:

—Dios pejjamechan, chajia lelspx, jum-aech: 'Kaen Dios jiw pejpaklokolan. Japonkal sitaeyaxaes. Owchiyaxaesbejpon' — aech chajia lelspx — aech Jesús Satanásliajwa.

⁹ Do jawut, Satanás pejme bu'folon Jesús Jerusalén paklowax poxade, pejme xapaejsliajwapon Jesús. Jesús bu'fos Dios pejtemploba matwujase, kaes athu poxase. Jaxotse nosaspon. Jawut Satanás jum-aech:

—Diachwujnakolax xam Dios paxulnam wut, jaxmot diwmik sat poxadik!

¹⁰ Xam sat naxbijaximil. Dios pejjamechan, chajia lelspx jum-aech:

'Dios to'axoek pej-ángel xam chiekal tataeflaliawapi.

¹¹ Xam jopam wut, jaelsabaxaeli naxbijasamatam ia', najalasamatambej' — aechox, Dios pejjamechan, chajia lelspx — aech Satanás Jesúsliajwa.

¹² Jesús jumnot wut, jum-aechon:

—Xan diwaxinil. Xan chiekal matabijtax Dios natataefulprox. Dios pejjamechan, chajia lelsprox, jum-aechbej: ‘Nabej xapaeps Dios, nejpaklokolan, asbuan jumch taeliajwam japon xajur wut, o, xajura-el wuton weliajwa!’ —aech chajia lelsprox —aech Jesús Satanásliajwa.

¹³ Do jawut, Satanás kaes wejisal xot xapaesliajwa, chijjalison Jesúsxot. Jesús tamach waeltas. Pe asamatkoi Satanás pejme pasaxael pejme xapaesliajwapon Jesús.

Jesús tñadutprox naewñajna Galilea tñajna xot

(Mt 4.12-17; Mr 1.14-15)

¹⁴ Jesús pejme kaxadin, Galilea tñajna poxadin. Espíritu Santo kajachaxaesaxtat Jesús dukaful. Samata, japatñajnapijiw puexa chiekal naksiya Jesúsliajwa.

¹⁵ Jesús naewñajan judíos naewñajnabachaxot. Puexa jiw jumtaen wuti Jesús naewñajanpoxan, japi jum-aech chimiajamechan Jesúsliajwa.

Jesús Nazaret paklowaxxot

(Mt 13.53-58; Mr 6.1-6)

¹⁶ Jesús nawia'e Nazaret paklowax poxade, ti't poxade. Napatamatkoi wut, lechon judíos naewñajnaba poxade, pejkabuan xoton. Jaxot wut, nanton chanaexaljoeliajwa Dios pejjamechan, chajia lelsprox.

¹⁷ Jawut Jesús chaxduch xakoeyasfut xaljoeliajwa profeta Isaías chajia lelox. Dolison japafut ba'nat wut, faenon xaljoeyaxaelprox. Do jawut, xaljowprox jum-aechox:

¹⁸ “Dios pej-Espíritu Santo xan nachala, Dios pajut namakafit xot kejila naewñajnalajwan chimiawñajan. Dios nato'abej naewñajnalajwan babijaxan ispi, nabijatpipej Satanás pijaxtat. Japi pejnejaxoelaxan, me-ama jiw jebatat jiaspi, ja-aechpi. Dios nato'abej boejthúsliajwan itliakla. Dios nato'abej bu'welajwan jiw, jiw nabijati asew jiw pijaxtat.

¹⁹ Dios nato'abej naewñajnalajwan jiw amwutjel Dios bu'weyaxaelprox jiw” —aech Jesús pajutliajwa, chanaexaljow wuton Isaías chajia lelpox.

²⁰ Do jawux, Jesús chanaexaljoeyax toet wut, xakoeyapon japafut. Chaxduton judíos naewñajnaba kajachawaesan. Do jawut, Jesús ek. Puexa jiw, jaxot chalaki, xabich natachaemaspon.

²¹ Jesús pejme jum-aech japiliajwa:

—Xamal jumtaenam xan xaljowx wut Isaías chajia lelpoxliajwa, amwutjel japox patlisox xamalxot —aech Jesús pajutliajwa.

²² Do jawut, puexa japi jiw jum-aechi pachaempoxan Jesúsliajwa. Japi xabich nejchaxoelachalak, Jesús jum-aech xot chamoeyaxan. Samata, nakaewa najum-aechi:

—¿Diachwñajnakolax amponkatlap Jesús, José paxulan? —na-aechi.

²³ Jesús matabijt japi jiw nakaewa najum-aechprox. Samata, jum-aechon:

—Xamal nejxasinka-emil naexaxisliajwam xan jum-anox. Samata, xan najum-am asbuan jumch: ‘Xam asew boejthúsnam wut, jamxotbej jiw boejthú'e!’ —am xamal. Jumchiyaxaelambej amprox xanliajwa: ‘Xanal wultaenx, Capernaum paklowaxxot koexaxan isam wut. Amxot, nejpaklowaxxotbej, koexaxan isam wut, ja-aech wut, xanal naexaxisaxaelen xam naewñajnampoxan’ —chiyaxaelam xanliajwa —aech Jesús japi jiwliajwa.

²⁴ Jesús pejme jum-aech:

—Xan diachwñajnakolax jum-an. Puexa profetas sitae-esal pejtñajnakolaxpijiw.

²⁵⁻²⁶ Wajwñajnapijin, profeta Elías, Israel tñajnxot laeja wut, japamatkoiyan, tres waechan y medio iam thilna-el. Samata, xabich jiw litaxaelaful potñajna, naxaeyaxan ajil xot. Japamatkoiyan Israel tñajnxot xabich watho' duil, pamaljiw naetapspi. Pe Elías to'a-esal Dios kajachawaesliajwapon watho', japatñajnapijiw pamaljiw naetapspi. Elías to'aslax asatñajna poxade, kajachawaesliajwapon Sarepta paklowaxpijow, Sidón tñajnapijow, pamal naetapspow.

²⁷ Wajwñajnapijin, profeta Eliseo, laeja wut ampathatat, Israel tñajnxot duil xabich jiw, leprawaxae waespi. Pe japixot kaen boejthús-elon. Japonlax boejthut asatñajnapijin, Siria tñajnapijin, pawulpon Naamán —aech Jesús.

²⁸ Japox jumtaen wuti, puexa judíos naewñajnabatatpi xabich palalapi Jesúsliajwa. Japi matabija Jesús kajachawaesaxisalprox.

²⁹ Samata, xabich palala xoti, nanbapi. Do jawut, Jesús jaeltlisi. Bu'follisipon paklowax tathoetlel. Japapaklowax chiekal muaxmatwajtat. Jaxot chuut xabich atha. Samata, jaxot fo'asiapi Jesús.

³⁰ Pe jawut, Jesús xent japixot. Do jawut, Jesús chajia japatñajnxot.

Aton dep webaesprox pejmatpñaxot

(Mr 1.21-28)

³¹ Jesús fulaech Capernaum paklowax poxade, Galilea tuajnuel. Napatamatkoi wut, jaxot judíos naewuajnatbatat Jesús jiw naewuajan.

³² Japi jiw japox jumtaen wut, xabich nejchaxoelachalaki, Jesús naewuajan xot Dios pejkajachawaesaxtat.

³³ Judíos naewuajnabaxot, jaxot aton ekbej, pejmatpuatxot webaespon dep. Do jawut, japon aton nejlat wut, jum-aechon dep pijaxtat:

³⁴ —Jesús, Nazaret paklowaxpijnam, ixanal tamach natapaem! ¿Achaxasiamkat xanalxot? ¿Xamkat fulaeman xanal natoesliajwam? Xanal chiekal matabijax, xam Dios paxulnam, xabich pachaemamponam —aech dep, aton pejkaechatat nejlat wut.

³⁵ Do jawut, Jesús jum-aech nejthaxtat depliajwa:

—Dep, iboejlachde! iXam nakolde japon aton pejmatpuatxot! —aech Jesús.

Do jawut, japon aton satat xadapson dep puexa jiw pejwuajnalel. Do jawux, dep nakolt japon aton pejmatpuatxot tabejs-elaxtat.

³⁶ Puexa jiw xabich belwana, japox taen wut. Nawuajnaemsnapi nakaewa. Najum-aechi:

—¿Ma-aechon pejjametat dep nakolsliajwa, to'a wuton dep? Me-ama Dios to'ason wut, ja-aechon. Ja-aech wut, i dep nakolt! —na-aech nakaewa japi jiw.

³⁷ Do jawux, puexa Galilea tuajnujijiw naksiyapi Jesúsliajwa.

Jesús boejthutpox Simón Pedro paem
(Mt 8.14-15; Mr 1.29-31)

³⁸ Jesús nakolt wut judíos naewuajnabaxot, fulaechon Simón Pedro pejba poxade. Jesús wuajna Simón paem bu'xaenk. Xabich bu'tuajnikow. Jaxotpijiw jum-aechi Jesús boejthulialiajwas.

³⁹ Jesús najult Simón paem okxot. Jawut waxae to'apon japow boejthulialiajwas. Do jawut, japow kamta chiekal boejthus. Jawut nantow. Do jawutbej, japow pajut naxaeyaxan athukow Jesúsliajwa, asew jiwliajwabej.

Jesús boejthutpox xabich jiw bu'xaeya
(Mt 8.16-17; Mr 1.32-34)

⁴⁰ Juimt dach ek wut, jiw bu'xaeya buflaens Jesúslel. Japi nejmachwaxaetat bu'xaenkpi. Do jawut, Jesús jachaful pejke-etat kaenanula jiw bu'xaenkpi. Do jawutbej, japi jiw chiekal boejthuls waxae.

⁴¹ Asew bu'xaeyaxot, dep webaespi pejmatpuatanxot, japibej boejthuton. Dep nakola wut japixot, dep nejla'bala. Nejla'bala wut, jum-aechbalapi:

—iXam Dios paxulnam! —aechbalapi.

Dep japox jum-aech wut, Jesús buxfiat. Jesús tapae-el dep kaes naksiyaliajwa, japi chiekal matabija xot japon Cristo, Dios to'aspon jiw bu'weliajwa.

Jesús naewuajanpox judíos naewuajnabachanxot
(Mr 1.35-39)

⁴² Sesa itliakafal wut, Jesús nakolt paklowaxxot japon tamachaliajwa. Do jawut, jiw wulwekson. Faens wuton, japi jiw jum-aechi Jesúsliajwa:

—iNamandefuk xanalxot! iNabej fulae'fuk asatuajnule! —aechi.

⁴³ Pe Jesús jum-aech:

—Xan naewuajnaxaelen asapaklowaxanpijiwbej. Japi naewuajnafulaxaelen chimiawuajan, Dios puexa pejiw tato'laxaelwuajan. Dios nato'a japox isfulaliajwan —aech Jesús japi jiwliajwa.

⁴⁴ Samata, Jesús naewuajnafal jiw Dios pejjamechan judíos naewuajnabachanxot, Galilea tuajnuxot, Judea tuajnuxotbej.

5

Xabich baxi xawawaelpox
(Mt 4.18-22; Mr 1.16-20)

¹ Asamatkoi Jesús nuk pukababu'tat, Genesaret pukaxot. (Japapuka asawul, Galilea puka.) Xabich jiw Jesús tabe'nas, xabich jumtaesia xoti Jesús naewuajanpox Dios pejjamechan.

² Do jawut, Jesús taen kolefalkam, oel wut thaejtat. Japafalkam tujil, nana xot nabaxiti, kiasliajwapi pejew chinchorro.

³ Do jawut, Jesús jul Simón pejfalkamtat. Jawutbej to'apon Simón thiklaliajwa falkam atuaxachde chadukaliajwa. Jesús falkamtat ek. Do jawut, tuaduton jiw naewuajnalialiajwa, putat nuili.

⁴ Dolison, naewuajnax buxtoet wut, Jesús jum-aech Simónliajwa:

—¡Falkam fae'mach so'nik poxade! ¡Jaxotde xamal nejchinchorro pelsfulaxaemk baxi xawawaelaliajwam! —aech Jesús.

⁵ Do jawut, Simón jumnot wut, jum-aechon:

—Tajpaklon, pomadoicha xanal xabich nabaxitx. Xanal chinax kaen baxin xawaesa-enil. Pe xam naketo'am xot, chinchorro pelsaxaekan pejme —aech Simón Pedro.

⁶ Dolisi, jasox is wut, xabich baxi xawawaeli. Chinchorro mox pejxarsas, xabich xot baxi.

⁷ Simón, aeww jiw swapich, itwaeipi asafalkampijiw, japi pejmatabijs kajachawaesliajwas. Japafalkam chapat wut Simónxot, xabich baxi wuluti kolefalkam. Do jawut, mox pejchabu'lapi.

⁸ Simón Pedro japox taen wut, brixtat nukon Jesús pejwujnalel. Do jawut, jum-aechon Jestusliajwa:

—Tajpaklon, ¡napia'e xanxot! Xan babejnan —aech Simón Pedro.

⁹ Japox Simón Pedro jum-aech, japi puexa nejchaxoelanuil xot, xabich baxi xawawaelpoxliajwa.

¹⁰ Pedro chalaspi, ampilape. Kaen pawul Santiago. Asan pawul Juan. Japi Zebedeo paxi. Japibej nejchaxoelanuil pejfalkamtat. Do jawut, Jesús jum-aech Simónliajwa:

—¡Nabej nejlewlé! Amwutjel xam jiw tadusaxaelam japi Dios pejjiwaliajwa. Me-ama xamal baxi xawawaelam wut, notam. Jasoxtatbej xamal itpaeyaxaelen jachiliajwam jiwliajwa, japi jiw tajnachalialiajwa, Dios pejjiwaliajwabejpi —aech Jesús Simónliajwa.

¹¹ Do jawut, itjuldepi paputade, thaejtade. Do jawut, puexa pejew waelalisi Jesús nakfulaeliajwa.

Jesús boejthutpox bu'xaeyan leprawaxaetat
(Mt 8.1-4; Mr 1.40-45)

¹² Asamatkoi, Jesús asapaklowaxxot wut, kaen aton, bu'xaeyan, fulaen Jesúslel. Japon bu'xaenk leprawaxaetat. Taen wuton Jesús, brixtat nukon Jesús pejwujnalel, xabich sitaen xoton. Do jawut, natxatdik wut, sat makxabijindikon. Jawut jum-aechon Jesús boejthusliajwas:

—Tajpaklon, xan matabijtax xam xajupam naboejthusliajwam. Naboejthusasiem wut, ¡xan naboejthu'e! —aechon.

¹³ Jesús jacha wut, jum-aechon:

—Xam boejthusasiem. Malis xam chiekal pachaemam —aech Jesús.

Do jawut, kamta japon aton chiekal boejthus leprawaxae.

¹⁴ Jawut Jesús jum-aech nejthu'axtat:

—¡Asew jiw nabej chapae' xam boejthutpox! ¡Majt xabua'de sacerdote poxade, japon xam taeliajwa leprawaxae boejthulpox! Do jawux, ¡Dios chaxdu'e, me-ama Moisés chajia to'a chaxduiliajwa, xam leprawaxae chiekal boejthul xot! Jasoxtat jiw matabijaxael xam chiekal boejthulpox leprawaxae —aech Jesús japon atonliajwa.

¹⁵ Do jawut, puexa japatujnapijw waltaena Jesús ispox. Jiw japox waltaena wut, xabich jiw papasful Jesúsxot jumtaeliajwa Jesús naewuajanpox. Japi papatbej boejthusliajwas bu'xaenkpoxan.

¹⁶ Jesús boejthusful wut bu'xaeya, kaematkoisful atuaxach fulalaechpon jiwjilax poxade tamach Dios kawuajnalialiajwa. Jesús jasoxan ja-aech, boejthusful wuton bu'xaeya.

Jesús boejthutpox nabejkan, japon chinax laejaxilpon
(Mt 9.1-8; Mr 2.1-12)

¹⁷ Asamatkoi, Jesús jiw naewuajan wut, jaxot fariseos naewet, judíos chanaekabuanapi swapich. Japixot, asew jiw fulaen cha-aelpaklowaxanxot, Galilea tuajnueldin, Judea tuajnueldinbej. Asew jiw fulaenbej Jerusalén paklowaxxotdin. Jesús boejthusful wut bu'xaeya, puexa japibej taen, Jesús isful wut koexaxan Dios pijaxtat.

¹⁸ Do jawut, kaeswapich poejiw chaxpat kaen nabejkan. Japon ok camillatat. Japi poejiw nejchaxoel batuchade chaxleliajwapi nabejkan Jesús pejwujnalel cha-osliajwapi.

¹⁹ Pe japi chaxleyaxil nabejkan batuchade, wuajna xabich jiw batu wuluk xot. Ja-aech wut, ba matwujase chaxjulachi. Jaxotse bamatwuj pinjiyax tuakapi. Do jawux, jaxotsik chakakofanpi nabejkan Jesús pejwujnalel.

²⁰ Chakakofan wut, nejchaxoeli: “Ampon boejthusaxaes Jesús” —aechi, nejchaxoel wut. Jesús chiekal matabij japi nejchaxoelpox. Samata, Jesús jum-aech nabejkanliajwa:

—Xam babijaxan isampoxanliajwa beltaenx —aech Jesús.

²¹ Judíos chanaekabuanapi, fariseos swapich, japox jumtaen wut, nejchaxoeli: “¿Chankat ampon aton, jum-aechpon babejjamechan Diosliajwa? Japox jum-aech wuton, japox pachaema-el Diosliajwa. Kaen Dios xajup beltaeliajwa, jiw babijaxan ispoxanliajwa” —aechi, nejchaxoel wut Jesúsliajwa.

²² Do jawut, Jesús chiekal matabijt japi nejchaxoelox. Samata, wuajna chaemt wut, jum-aechon:

—¿Ma-aech xotkat xamal japox nejchaxoelam xanliajwa?

²³ Kaes pejme tampa xan jumchiliajwan laejaxilponliajwa: ‘Xam beltaenx babijaxan isampoxanliajwa’ —chiliajwan. Pe ja-an wut, jiw xan namatabijaxil, xan puexa jiw pakoewkolnanponan. Jum-an wutlax nabejkan jumtaeliajwa: ‘¡Nande! ¡Laejim!’ —an wut, japox jum-an wut, jiw diachwuajnakolax xan namatabijaxael, xan puexa jiw pakoewkolnanponan.

²⁴ Samata, xamal itpaeyaxaelen, xan puexa jiw pakoewkolnan xajuxpox jiw beltaeliajwan babijaxan ispoخانliajwa ampathatat —aech Jesús judíos chanaekabuanapiliajwa, fariseosliajwabej.

Samata, Jesús jum-aech nabejkan jumtaeliajwa:

—¡Nande! ¡Nejcamilla fi'e! ¡Xalaem nejba poxade! —aech Jesús.

²⁵ Do jawut, nabejkan nantlison puexa jiw pejwuajnale. Jawut fitlison pejcamilla. Fulaechlison pejba poxade. Fulaech wut, jum-aechfuldepon Diosliajwa: “Dios xam xabich pachaemam, naboejthutam xot” —aechfuldepon.

²⁶ Puexa jiw chiekal taen. Majt japon nabejkan, pajut laeja-el, japon amwutjel pajut chiekal laejalison. Samata, xabich jiw nejchaxoelanuil. Do jawut, chimiajamechan jum-aechi Diosliajwa. Dios xabich sitaenlisi. Jum-aechi:

—Amwutjel taens, Dios is wut koexach —aechi.

Jesús tadutpox Leví pejnachalanliajwa

(Mt 9.9-13; Mr 2.13-17)

²⁷ Jesús boejthut wut nabejkan, nakolton jiw natamejaxot. Do jawut, fulaech wut, taenon Leví. Japon impuesto mat-omwuljoen Roma gobiernoliajwa. Ekon impuesto mat-omwuljowxot. Jesús taen wut Leví, jum-aechon Levíliajwa:

—¡Xabua't! ¡Xan nakfulaem tajnachalnamliajwa! —aech Jesús.

²⁸ Do jawut, Leví nant wut, puexa pejew waela wut, Jesús nakfollison.

²⁹ Jawut Leví fiesta is pejbatat Jesúsliajwa. Xabich asew jiw pat jaxot, impuesto mat-omwuljoew Roma gobiernoliajwa. Kaes asew jiwbej pat jaxot. Japi puexa chalak xaeliajwa, Jesús suapich.

³⁰ Do jawut, fariseos, judíos chanaekabuanapibej, pat. Japi kaemt. Japi jum-aech Jesús pejnachalaliajwa:

—¿Ma-aech xotkat xaelam, afambej, impuesto mat-omwuljoew suapich, asew babejchow suapichbej? —aechi Jesús pejnachalaliajwa.

³¹ Jesús japox jumtaen wut, jum-aechon:

—Jiw woen woe-el nejchaempi, japi bu'xaenka-el xot. Jiw woen fulaen bu'xaenkpi woeliajwa.

³² Xanlap-is, ja-an. Xan pas-enil tadusliajwan, jiw pachaem wut, kabuan-aechpi. Xanlax patx babejchow tadusliajwan, japi kofaliajwa padujnejchaxoelaxan Dios naexaxisliajwapi —aech Jesús japiliajwa.

Asew jiw xae-elpox, piach Dios kawuajnalialiajwa wut

(Mt 9.14-17; Mr 2.18-22)

³³ Fariseos, judíos chanaekabuanapibej, jum-aech Jesúsliajwa:

—Juan pejnachala, xanal tajnachalabej, naxae-el piach Dios kawuajnalialiajwa wut. Pelax nejnachala, jachi-el. Japi asbuan jumch xael —aechi Jesúsliajwa.

³⁴ Do jawut, Jesús jum-aech:

—Aton pawis fit wut, fiesta is wut, taduchpi xaeyaxaelfak japonxot. Nejchachaemlaxaeli, pajelnakjiyan duk wutfak jaxot.

³⁵ Do asamatkoi, asew jiw fe'naxaeson. Do jawut, taduchpi naxaeyaxil kaematkoi suapich, xabich nejxaejwaxaes xoti. Jachiyaxaelbej, asamatkoi tajnachala nejxaejwaxaes wut, asew jiw xan nabu'fol wut. Samata, kaematkoi suapich naxaeyaxili, xan japixotaxinil xot —aech Jesús.

³⁶ Jesús jum-aech wuajantat japi jiwliajwa. Jum-aechon:

—Pawis pejyiaf, padujax, wexaxarwas wut, pejyiaf, pajelax, tasiaplaxilow xape'sliajwa padujax yiafxot. Japox is wut, tabesaxaelow pajelax yiaf. Yiafbu'ch, pajelax, najupa-el xot, pachaemaxil, padujax yiaf suapich.

³⁷ Aton wulu wutbej pajelvino padujchoxantat, japachoxan chathialfalaxael, pajelvino xabich xot pafak. Ja-aech wut, nabo'axael vino, choxan suapich.

³⁸ Samata, jiw wulu pajelvino pajelchoxantat, choxan nadadoe'aliajwa.

³⁹ Jiw af wut vino, piach cha-ekpot, ja-aech wut jiw fe-el, vino pajeltpot. Ja-aech, jiw nejchaxoel xot: ‘Vino piach, cha-ekpot, kaes pejme pachaem’ –aech xoti, nejchaxoel wut –aech Jesús.

6

Judíos pejnapatamatkoitat Jesús pejnachala jolbalapox trigo

(Mt 12.1-8; Mr 2.23-28)

¹ Asamatkoi, napatamatkoi wut, Jesús, pejnachala suapich, trigolulantutat fol wuti, japon pejnachala trigo jolbala xaelpaliajwa, litaxaela xoti. Kilaninapi boksliajwa trigofukal xaelpaliajwa.

² Jaxot kaesuapich fariseos nakfol. Japi nejchaxoel: “Jesús pejnachala sitae-el napatamatkoi, jolbala wuti trigo” –aechi, nejchaxoel wut. Samata, jum-aechi Jesús pejnachalaliajwa:

–Japox isaxisal napatamatkoitat. ¿Ma-aech xotkat xamal trigo jolbalam naktapaelmatkoitat? –aechi Jesús pejnachalaliajwa.

³ Jesús japox jumtaen wut, jum-aechon:

–Xamal xaljowam matabijaliajwam, wajwuaajnapijin, waj-am rey David, ispox chajiakolaxtat, xabich litaxaela wut, pejiw suapich.

⁴ Do jawut, David Dios pejba, xananuamsba, lechon. Japabaxot wuaajna pan oel mesamatwuaajtat. Japapan ofrenda Diosliajwa. Rey David japapan xael wut, chaxduwbejpon pejiw, japiwej xaeliajwa japapan. Pe Moisés chajia lelpox jum-aech: ‘Japapan koew sacerdoteskak xaeliajwa, japi nabisti Dios pejbatat. Asew jiw xaeyaxil japapan’ –aech Moisés chajia lelpox. Pe rey David Dios kastika-esal, xael wuton Dios pejew pan –aech Jesús fariseosliajwa. (Jasoxtatbej Jesús pejnachala kastikaxisal, trigo jolbala wut xaelpaliajwa napatamatkoitat.)

⁵ Jesús pejme jum-aech fariseosliajwa:

–Xan puexa jiw pakoewkolnan. Xan xajux jumchiliajwan jiw isaxaelpox napatamatkoitat –aech Jesús fariseosliajwa.

Jesús boejthutpox kemamlan

(Mt 12.9-14; Mr 3.1-6)

⁶ Asamatkoi, napatamatkoi wut, Jesús lech judíos naewuajna poxade. Jaxotde wut, tuaduton naewuajnalialjwa. Jaxot kaen aton ek, poklake-elel kemamalpon.

⁷ Judíos chanaekabuapani, fariseosbej, japi natachaema, Jesús boejthusaxael wut kemamlan napatamatkoitat, jawut tasalialjwas Jesús.

⁸ Jesús matabijt japi nejchaxoelox japonialjwa. Samata, Jesús jum-aech kemamlanliajwa:

–¡Nandel! ¡Nukde jiw pejwuaajnale! –aechon.

Kemamlan nant wut, nuklison jiw pejwuaajnale.

⁹ Do jawut, Jesús jum-aech japi jiwliajwa:

–Xamal wuaajnachaemsaxaelen. ¿Achaxkat jum-aech Moisés chajia lelox? ¿Achaxkat Dios naktapaei isliajwas napatamatkoitat?

¿Isaxaeskat pachaempox? O, ¿isaxaeskat pachaema-elpox? O, ¿boejthusaxaeskat? O, ¿boesaxaeskat ampon aton? –aech Jesús.

¹⁰ Do jawut, Jesús natachaemt jiw masajichpi. Jawut jum-aechon kemamlanliajwa:

–¡Kedolde! –aechon.

Kedolt wut, japon aton pejke-e chiekal wepachaems.

¹¹ Pe judíos chanaekabuapani, fariseosbej, japox taen wut, xabich palalapi Jesúsliajwa. Samata, nakaewa najum-aechi: “¿Machiyaxaeskat Jesús?” –na-aechi nakaewa.

Jesús pejnachalaxot makafitpox doce poejiw, japi apóstolesliajwa

(Mt 10.1-4; Mr 3.13-19)

¹² Asamatkoi Jesús fulaech pinamuax poxade Dios kawuajnalialjwa. Jaxotse pomadoicha Dios kawuajan.

¹³ Do kandiawasap wut, Jesús la pejnachala, japi fulaeliajwadin japonlel. Japi pat wut japonxot, japixot makanoton doce poejiw japi chalalialjwaspon. Do jawut, japi wulduwpon apóstoles.

¹⁴⁻¹⁵ Doce poejiw, makanochpi, kaen pawul Simón. Japon asawultat wulduws. Pawulon Pedro. Asan pawul Andrés. Japon Simón pakoevan. Asan pawul Santiago. Asan pawul Juan. Asan pawul Felipe. Asan pawul Bartolomé. Asan pawul Mateo. Asan pawul Tomás. Asan pawul Santiago. Japon Alfeo paxulan. Asan pawul Simón. Japon majt asamutprijin, celotemutprijin.

¹⁶ Asan pawul Judas, Santiago paxulan. Asan pawul Judas Iscariote. Japonlap asamatkoi wiasaxael Jesús, Jesús padaelmajiwxot.

Jesús xabich jiw naewuajanpox
(Mt 4.23-25)

¹⁷ Jesús baloek muaxxotsik, pej-apóstoles suapich. Baloek wut, najapnaxxot nuili. Xabich pejnachala natameja japonxot. Xabich asew jiwbej jaxot natameja. Japixot, asew Judea tuajnapijiw. Asew Jerusalén paklowaxpijiw. Asew Tiro paklowaxpijiw. Asew Sidón paklowaxpijiw.

¹⁸ Japi jiw puexa patlisi Jesús naewuajanxot jumtaelajwa, boejthusliajwasbejpi bu'xaenkpoxan. Nabijatpibej dep pijaxantat, japibej pat boejthusliajwas.

¹⁹ Samata, puexa japi jiw jachasiapi Jesús, Jesús boejthusful xot jiw.

Amxot jum-aechpox nejchachaemlax, nejchachaemla-elpoxbej
(Mt 5.1-12)

²⁰ Jesús natachaemt wut puexa pejnachalalajwa, jawut jum-aechon japilijawa: “Xamal najut nejchaxoelam wut: ‘Dios nakkajachawaes-el wut, xajupaxinil isliajwan pachaempoxan’ –am wut, Dios kajachawaesaxael xamal. Ja-aech wut, xamal xabich nejchachaemlaxaelam.

²¹ “Xamal isasiam wut pachaempoxan Diosliajwa, japon kajachawaesfulaxael isfulalajwam japoxan. Ja-am wut, xabich nejchachaemlaxaelam.

“Amwutjel nabijalalpampim, nabijatam xot ampathatat, Dios xamal kajachawaesaxael pachaemalajwam. Ja-am wut, xabich nejchachaemlaxaelam.

²²⁻²³ “Asew jiw nejweslaxael xamal. Japi isaxael chaemilpoxan xamallijawa. Jumchiyaxaelbejpi xamallijawa: ‘¡Xamal chijiamde nejle!’ –chiyaxaelbejpi. Jumchiyaxaelbejpi babejjamechan xamallijawa. Jumchiyaxaelbejpi asew jiw jumtaelajwa xamallijawa: ‘Ampi jiw chaemil, babejchow xot’ –chiyaxaelbejpi. Puexa japoxan jachiyaxael, xamal tajjiwam xot, xan puexa jiw pakoewkolnan. Japoxan ja-aech wut, ¡xamal xabich nejchachaemilde! Diosxote Dios xamal chaxduiyaxael xabich pachaempox. Samata, ¡nejchachaemilde, japamatkoi pasaxael wut! Xamal nejweslapi, japi jiw pejwajnapijiwbej chajia babijaxan is Dios pejprofetasliajwa.

²⁴ “Xamal kemaenkampim, xabich nabijasaxaelam, xanejchachaemlam xot ampathat-pijaxankal.

²⁵ “Amwutjel nejchaxoelam wut, jum-am: ‘Xan nejchachaemlax, puexa xabich xot tejew’ –am, nejchaxoelam wut. Pe asamatkoi xabich nabijasaxaelam. Me-ama asew kaematkoi nafnia wut, do jawux, pejme xabich litaxaelapi, xamalbej jachiyaxaelam.

“Amwutjel xafafolampim, asamatkoi xabich noeyaxaelam, nabijasaxaelam xot. Jawutbej nejchachaemlaximil.

²⁶ “Chajiakolaxtat Dios pejprofetakola-elpi chiekal duila-el, me-ama Dios nejxasink. Japi jiw chiekal naewuajna-elbej Dios pejjamechan, japilijawa jiw nejchachaemlaliajwas. Samata, japamatkoiyantat jiw jum-aech chimiajamechan profetakola-elpilijawa. Samatabej, ampamatkoiyantat jiw jum-aech wut chimiajamechan xamallijawa, ¡chiekal taem! Xamal chiekal bej duila-emilbej. Chiekal bej naewuajna-emilbej Dios pejjamechan. Ja-am wut, xamal asamatkoi xabich nabijasaxaelam” –aech Jesús pejnachalalajwa.

Jesús naewuajanpox pejnachala nejxasinkalijawa padaelmajiw
(Mt 5.38-48; 7.12)

²⁷ Jesús pejme jum-aech pejnachalalajwa: “Xamal xan nanaewetampim xan jum-anox. ¡Xamal nejxasinkde nadaelmajiw! ¡Isde pachaempoxan xamal nejweslapilijawa!

²⁸ Nadaelman nejchaxoel wut babijaxan xamal chapasliajwa, ¡xamallax nejchaxoelde japon chapasliajwas pachaempoxan! Asew jiw babejjamechan jum-aech wut xamallijawa, ¡Dios kawuajande japi jiw kastikasamatas!

²⁹ Aton, matxoela-ison babijax xamallijawa, ¡xamallax nabej is babijax japon atonlijawa! Samata, aton xamal ba'faselcha wut, ¡asaba'fale! nej selchapon! Aton xamal wenatkowa wut sumta-otampox, ¡nej fispanox pijaxliajwa! ¡Nijax Kamisbej nej fispan pijaxliajwa!

³⁰ Aton malech xamal wuljow wut, ¡japon chaxdu'e! Asan aton natkowa wut nijax, ¡nabej wuljoe' wiasliajwapon natkowapox!

³¹ ¡Amalis isde pachaempoxan asew jiwliajwa, me-ama xamal nejxasinkam japi jiw isfulalajwa xamallijawa!” –aech Jesús pejnachalalajwa.

³² Do jawut, Jesús pejme jum-aech pejnachalalajwa: “Xamal nejxasinkam wut jiw xamal nejxasinkpikal, ja-am wut, ¿ma-aech xotkat nejchaxoelam Dios pachaemaxaelpox xamallijawa? Jiw babejchowbej nakaebabejchow nanejxasink.

³³ Xamal isfulam wutbej pachaempox japi jiwliajwa, japi jiw isful xot pachaempox xamallijawa, ja-aech wut, ¿ma-aech xotkat nejchaxoelam: ‘Dios pachaemaxael xanliajwa’ –amkat, nejchaxoelam wut? Jiw babejchowbej nakaebabejchowliajwa is pachaempoxan.

³⁴ Xamal prestam wut jiw matabijampikal, ja-am xamal japi jiw pejme wewiasliajwa prestampox, prestampox nafa'asamata. Ja-am wutbej, ¿ma-aech xotkat nejchaxoelam Dios pachaemaxaelpox xamalliajwa? Jiw babejchow nakaebabejchow napresta pejme wewiasliajwas naprestapoxan.

³⁵ ¡Nejxasinkde nadaelmajiw! ¡Isdebej pachaempoxan japijiajwa! Prestam wut, ¡prestapoxan nabej wuajnawes! Ja-am wut, Dios isaxael xabich pachaempox japonxotse xamalliajwa prestapoxanliajwa. Ja-am wut, me-ama Dios athupijin, paxulan suapich, kaenejchaxoelax, jachiyaxaelambej xamal. Dios isful pachaempoxan jiw babejchowliajwa. Asew jiw Dios kajachawaechpibej, japi nejchaxoela-el Diosliajwa. Japi jiwliajwa, Dios is pachaempoxan.

³⁶ ¡Beltaem asew jiw! Me-ama nej-ax Dios puexa jiw beltaeful, ¡xamalbej ja-amsfulde!" — aech Jesús pejnachalaliajwa.

Jesús buxfiatpox pejnachala, japi jumchisamata: "Japi jiw babejchow xot, wewe'pas Dios kastikaliajwas" —chisamatapi

(Mt 7.1-5)

³⁷ Jesús pejme jum-aech pejnachalaliajwa: "¡Xamal asew jiwliajwa nabej jum-aech'e: 'Japi jiw babejchow' —nabej aech'e! Ja-am wut, Dios jumchiyaxil xamalliajwa: 'Xamalbej babejchowam' —chiyaxilon. ¡Nabej jum-aech'e'bej asew jiwliajwa: 'Japi wewe'pas Dios kastikaliajwas' —nabej aech'e'bej! Ja-am wut, Dios jumchiyaxilbej xamalliajwa: 'Xamal wewe'p xan kastikaliajwan' —chiyaxil Dios xamalliajwa. Asew jiw babijaxan is wut xamalliajwa, ¡beltaem! Ja-am wut, Diosbej xamal beltaeyaxael babijaxan isampoxanliajwa.

³⁸ Jiw wewe'pas wut, ¡chaxduim! Ja-am wut, Diosbej xamal chaxduiyaxael wewe'ppoxan. Asew jiw chaxduwam wut, Dios kaes pejme xamal chaxduiyaxael" — aech Jesús, pejnachala naewuajan wut.

³⁹ Jesús pejme jum-aech, pejnachala naewuajan wut: "Nakae-itliakla namakxalaeyaxil. Itliaklan asan makxafol wut, japi kolenje kaemuthadik natacholnaxaek.

⁴⁰ Estudiapon kaes pejme pachaema-el. Me-ama chanaekabuanaspon, jachi-elon. Pe asamatkoi, puexa matabijit wuton, japon najupaxael. Me-ama pejchanaekabuanan wut, jachiyaxaelon" — aech Jesús pejnachalaliajwa.

⁴¹ Do pejme Jesús jum-aech, naewuajan wut pejnachala: "Xamal najut kaes babijaxan isam wut, ¡xamal nabej naewuajne', asan aton babijax is wut! Aton, asan kajachawaesasia wut, cha-aelaxach, ast it-okspox, japon pajutlax kaes pejme pinjiyax naetamat it-oks wut, jasoxtat japon aton asan aton kajachawaesaxil.

⁴² Xamal kaes babijaxan isam wut, ¡nabej jum-aech'e' asanliajwa: 'Xam naewuajnaxaelen, babijax is-elaliajwam' —nabej aech'e', naekichachajbapijnam wut! ¡Majt xamal kofim babijaxan isfulampoxan! Ja-am wut, pachaemaxael asan aton naewuajnalijwam japon kofsliajwa babijaxan ispoxan" — aech Jesús pejnachalaliajwa.

Pejbaech pachaem wut, matabijaspon japanae pachaempox

(Mt 7.17-20; 12.34-35)

⁴³ Jesús pejme naewuajan wut pejnachala, jum-aechon: "Pachaemnae naboet wut, pejbaechbej pachaem. Chaemilnae naboet wut, pejbaechbej chaemil.

⁴⁴ Kaenanala naebaechnaechan matabijas pejbaechtata. Na-e'naexot tus-el higobaech. Ja-aechbej uvadunanliajwa. Uvadunan chajalka-eli na-e'naexot.

⁴⁵ Ja-aechbej jiwliajwa. Aton, wepachaemspoxon pejnechaxoelax, japon aton naksiya pachaempoxan. Aton, wepachaema-esalpon pejnechaxoelax, japonlax naksiya babej-jamechan. Japi kolenje japoxan naksiya, pejnechaxoelaxanxot nakolapoxan" — aech Jesús, naewuajan wut pejnachala.

Jesús naksiyapox kolebaliajwa

(Mt 7.24-27)

⁴⁶ Do jawut, Jesús pejme jum-aech, naewuajan wuton doce pejnachalaliajwa, asew jiwli-ajwabej: "Xamal naexaxis-emil wut xan jum-anpox, ¿ma-aech xotkat najum-am: 'Tajpaklon, tajpaklon' —na-amkat?

⁴⁷ Xanle fulaenpon, japon xan nanaewet. Nanaexasitbejpon xan jum-anpoxan. Xamal jumchiyaxaelen, achan kabuan-aech xanle fulaenpon.

⁴⁸ Japon aton ba isan, kabuan-aech. Kowpon sat tinkxot ba isliajwa. Nosnaechan muthapon. Do jawux, pejba toet wut, pinamin pat wut, japaba taxu'palaxil, chiekal isas xot sat tinkxot.

⁴⁹ Xan jum-anpox jumtaenpon, pe naexaxis-el wuton, japon aton, me-ama thaejtat ba ispon, kabuan-aechon. Nosnaechan muthapon thaejtat. Dolison pejba isax ketoet wut,

pinamin wut, japaba chiekal jwuwul, jaxot thaejtkaal xot. Samata, japaba chiekal toep" —aech Jesús, naewuajan wut doce pejnachalalajwa, asew jiwliawjabej.

7

Jesús boejthutpox soldawcapitán pamakan

(Mt 8.5-13)

¹ Jesús buxtoet wut naewuajnaex, fulaechon Capernaum paklowax poxade, doce pejnachala suapich.

² Capernaum paklowaxxot duk soldawcapitán, Roma gobiernoliajwa nabistpon. Japon capitán xabich nejxasink pamakan. Japon pamakan xabich bu'xaenk. Mox pawuajnapon tupaliajwa.

³ Japon capitán wultaen Jesús jiw boejthusfulpox. Samata, capitán to'a kaesupich judíos-ancianos japi buflaeliajwadin Jesús, boejthusliajwapon capitán pamakan.

⁴ Dolisi, Jesúsxot pa'a wut, xabich tadati Jesús. Jum-aechi Jesúsliajwa:

—Tajpaklon, kijum-amse, capitán xabich pachaempon. Samata, xam nakfulaem xanal japon pejba poxade, japon pamakan boejthusliajwam!

⁵ Japon capitán naknejxasink xatis judíos. Japonbej nawemot asew jiw isliajwa xanal tajnaewuajnalajwa —aech judíos-ancianos Jesúsliajwa.

⁶ Do jawut, Jesús nakfol japi. Dolison, mox wutlejen capitán pejba pasliajwa, capitán to'a pejnachala japi bu'kakulnalajwa Jesús. Do jawut, buxto'abejpon pejnachala japi jumchiliajwa Jesús: "Tajpaklon, xam kaes mox pasaximil tajcapitán pejba. Japon jum-aech: 'Xan kaes pachaema-enil Jesús pasliajwa tajba, japon kaes pejme paklon xot.

⁷ Samata, xan tajut fulae-enil wuljaesliajwan Jesús. ¡Jaxotde nej nawiaspon! ¡Nej jum-aechapon tamakanliajwa, japon boejthulalajwas! Ja-aech wut, tamakan naweboejthulaxaes.

⁸ Xanbej tajpaklochow. Japi naketo'a wut, xan ow-an. Xanbej soldawcapitánan. Kaen to'ax wut, japon na-ow-aech. Asan lax wut, japon fulaen. Tamakan keto'ax wut, japox chiekal jinawe-ispon. Jesúsbej tato'lan. Jum-aech wuton tamakanliajwa, tamakan chiekal boejthulaxaes' —aech soldawcapitán, xanal nabuxto'a wut xam jumchiliajwan" —aech soldawcapitán pejnachala Jesús jumtaeliajwa.

⁹ Jesús japox jumtaen wut, capitán jumxato'apox, japonliajwa xabich nejchaxoelanukon, xabich xanaboeltas xot. Do jawut, Jesús natfo'cha wut, natachaemton jiw fulafospilel. Do jawut, jum-aechon japiliajwa:

—Diachwuajnakolax xamal jum-an. Israel tuajnuxot aton tae-enil, xan xabich nax-anaboejtpon, me-ama japon aton, jason —aech Jesús soldawcapitánliajwa, jumtaeliajwa fulafospipon.

¹⁰ Jawut capitán to'asi nawia capitán pejba poxade. Pa'a wut, taenlisi capitán pamakan chiekal boejthulsipox.

Jesús mat-etpox pamal naetupspow paxulan, pejme dukaliajwa

¹¹ Asamatkoi Jesús fulaech wut Naín paklowax poxade, pejnachala nakfolspoon.

¹² Paklowax mox itwefol wuti, Jesús taen, asew jiw patupan muthsliajwa chaxfol wuti paklowax tathoetlel. Patupan pen, pamal naetupspow. Japow kaen paxulan tupon. Xabich jiw, Naín paklowaxpijw, fulchalas.

¹³ Jesús japow taen wut, beltaenpon. Do jawut, jum-aechon japowliajwa:

—¡Nabej wunoe! —aech Jesús.

¹⁴ Japox jum-aech wut, Jesús mox soepan patupanxot. Do jawut, Jesús camilla takuksaba wut, patupan chaxfoli chaxnuiljaba. Do jawut, Jesús jum-aech patupanliajwa:

—Pansian, xan jum-an xamliajwa: '¡Mat-e'e pejme dukaliajwam!' —an xan —aech Jesús.

¹⁵ Do jawut, patupan chalechkaal mat-et. Mat-et wut, naksiyalison. Do jawut, Jesús jum-aech japon penliajwa:

—Ma naxulan —aech Jesús.

¹⁶ Jiw japox taen wut, puexa xabich belwanapi. Jum-aechnapi:

—Dios xabich mamnik. Xajup puexa isliajwa. Poklaproftakolan patlison xatisxot. Dios fuloek kajachawaesliajwa pejjw —aechnapi Jesúsliajwa.

¹⁷ Xabich jiw, Judea tuajnujijw, mox duilibej Judea tuajnuxot, japi wultaena Jesús patupan mat-etpox.

Juan, jiw bautisan, japon to'apox kolenje pejnachalan Jesús poxade

(Mt 11.2-19)

¹⁸ Juan, jiw bautisan, jiw jebatat jias wut, pejnachala chapaeflas Jesús isfulpoxanliajwa. Asamatkoi Juan wallala kolenje pejnachalan, japi to'aliajwapon Jesús poxade.

¹⁹ Juan japi buxto'aliajwa wut, jum-aechon: "Jesús wuajnachaeamtam wut, jum-amopon: '¿Xamkatlap diachwuajnakolax Cristowam, jumduchponam puexa jiw bu'welijawam? Xam Cristowa-emil wut, ¿xanalkat kaes wuajnawesaxaelen asan pasaxaelpon?' —amo Jesús!" — aech Juan, buxto'a wut kolenje pejnachalan.

²⁰ Juan pejnachala pat wut Jesúsxot, jum-aechi ampox:

—Juan, jiw bautisan, xanal nabuxto'a xam wuajnachaeamsliajwan. ¿Xamkatlap diachwuajnakolax Cristowam, Dios jumduchponam puexa jiw bu'welijawam? Xam Cristowa-emil wut, ¿xanalkat kaes asan wuajnawesaxaelen, pasaxaelpon? —aech Juan pejnachala Jesúsliajwa.

²¹ Do jawut, japi pejwuajnalel Jesús xabich jiw bu'xaeya boejthut, bu'xaenki nejmachwax-aetat. Jiw, pejmatpuatxot dep webaespi, to'apon dep nakolaliajwa jaxot. Boejthutbejpon xabich itliakla japi taeliajwa.

²² Do jawut, Jesús jum-aech Juan pejnachalaliajwa:

—¡Xabua'de! ¡Nawem Juan poxade! Juanxot patam wut, juan chapaem koexaxan taenamoxan, wultaenamoxanbej! Juan chapaem wut, jum-amo: 'Itliakla chiekal taen. Nabejkabej chiekal laelp. Piach leprawaxaetat bu'xaenkpibej, japi chiekal boejthuls. Naetakwatabej chiekal jumtaen. Patupabej mat-ias pejme duilaliajwa' —amo Juan, chapaem wut! ¡Chapaembejpon naewuajnaxpoxan kejila, japibej naexasisliajwa, Dios bu'welijawasbejpi babijaxan ispoxanliajwa!

²³ Juan chapaem wutbej, jum-amopon: 'Nejmach-aton chiekal naxanaboesful wut, nanaexasisful wutbejpon xan Cristowanponan, japon aton nejchachaemlafalaxael' —amo Juan, chapaem wut! —aech Jesús Juan pejnachalaliajwa.

²⁴ Do jawux, Juan pejnachala nawia Juan poxade. Nawia wuti, jawut, Jesús tuadut jiw jumchiliajwa Juanliajwa. Jum-aechon: "Juan, jiw bautisan, pajlaxxot duk wut, xamal fulaemch japoxade. Fulae-emil taeliajwam muifartuat joewa ju'baspox.

²⁵ Xamal fulae-emildebej taeliajwam kaen aton chamoeyaxan naxoelpon. Xamal chiekal matabijam, chimianaxoeipi duila-el pajlaxtat. Jiw chimianaxoeipi duil chimiabachantat. Japi duil paklochow pejbachantat.

²⁶ Xamallax fulaemch taeliajwam profeta. Diachwuajnakolax jum-an. Xamal Juan taenam wut, taenam poklaprofetakolan.

²⁷ Dios pejjamechan, chajia lelsxot, jum-aech Dios najum-aechpox xanliajwa, Juan isaxaelpoxliajwa: 'Wua, xam wuajna tajprofeta to'axaelen japon jiw naewuajnafulaliajwa tajjamechan, xam patam wut jiw chiekal naexasisliajwa xam' —aech chajia lelsxot Dios najum-aechpox xanliajwa, Juan isaxaelpoxliajwa.

²⁸ Kaes pejme pachaempi, profetas, ajil, me-ama Juan, jiw bautisan, jasi. Pe nakiowa, Diosxotse wut, jaxotse japi jiw puexa chiekal isful Dios nejxasinkpoxan. Japi kaes pejme pachaemaxael Dios pejwuajnalel. Me-ama Juan ampathatat, jachiyaxili" —aech Jesús.

²⁹ Xabich jiw jumtaen Juan naewuajanpox. Impuesto mat-omwuljoewbej jumtaen. Japi naexasit wut, Juan japi jiw bautisa, japi matabija xot Dios xabich pachaempon.

³⁰ Fariseos, judíos chanaekabuapibej, naekuanjiamt Juan naewuajanpox. Isfula-eli Dios nejxasinkpox. Samata, Juan japi jiw bautisa-el.

³¹⁻³² Do pejme Jesús jum-aech jiwliajwa: "Ampamatkoiyantat jiw duilpi ampathatat, japi jiw, me-ama yamxi wut, ja-aechi, kaenejchaxoelaxa-el xot. Me-ama yamxi chalak paklowaxplaxot nakakujsliajwa, ja-aech japi jiw. Yamxi chalak wut, pejnachala suapich, nakaewa najum-aechi: 'Xanal tola nababax xamal nababoelaliajwam. Pe xamal nababoela-emil, jumtaenam wut toela. Xanal jajui jajuwxbej xamal noeliajwam. Pe xamal noe-emil, jumtaenam wut' —na-aech nakaewa yamxi, nalot wut plazaxot.

³³ Juan, jiw bautisan, japon ampathatat wut, Dios pejjamechan naewuajnafalon. Xabich piach naxae-elon, Dios kawuajnaliaw wut. Vino fe-elbejpon. Ja-aech wut, xamal jum-am: 'Juan dep webaes pejmatpuatxot' —amsfulam.

³⁴ Do jawux, xan, puexa jiw pakoewkolnan, fulaenx. Xanlax puexa xaelx. Puexa afxbej. Ja-an wut, xamal jum-ambej xanliajwa: 'Japon xabich xaemaenk. Femaenkbejpon vino. Pejnachala babejchowbej. Pejnachalabej impuesto mat-omwuljoew Roma gobiernoliajwa' —am xamal xanliajwa.

³⁵ Pelax jiw matabijasiapi Dios, japi naexasisful Juan jum-aechpoxan, xan jum-anpoxanbej. Japi matabijaxael diachwuajnakolaxpox Juanliajwa, xanliajwabej" —aech Jesús jiw naewetiliajwa.

Jesús taduchpox xaeliajwa fariseo pejbatat

³⁶ Fariseo-aton, pawulpon Simón, japon tadut Jesús xaeliajwa japon pejbatat. Samata, Jesús fulaech japon pejba poxade xaeliajwa, japon suapich. Jesús pat wut, ekon mesaxot.

³⁷ Japapaklowaxxot pawis duk. Japow asew poejiw bu'moejtpow plata kanaliajwa. Japow waltaen Jesús xaeyaxaelpox Simón pejbatat. Samata, japow fulaech japaba poxade Jesús taeliajwa. Japow xapat perjumamint alabastro-ia' batiajtat, chiekal wulukat.

³⁸ Dolisow, brixtat nuk Jesús pejtuaaktabijla, Jesús chafanaliajwas perjumamint. Japox isliajwa wut, chalechkal noeyax tuadutow, xabich nejxajewas xot babijaxan ispoxanliajwa. Pej-itmin natacholan Jesús pejtuaaktamet. Do jawut, pejmatlatat Jesús tuaaktamejoeipow. Tuaaktamesuwpow Jesús. Japaperjumamintat chafanpow Jesús pejtuaaktame.

³⁹ Simón, japon tadatpon Jesús xaeliajwa, taen waton japox, nejchaxoelon Jesúsliajwa: "Diachwajnakolax ampon profeta wut, matabixsaxaelon, achaow japow pawis. Matabixsaxaelbejpon japow babejowpow" —aech Simón, nejchaxoel wut Jesúsliajwa.

⁴⁰ Simón japox nejchaxoel wut, Jesús jum-aech:

—Simón, xam asax jumchisian —aech Jesús.

Simón jumnot wut, jum-aechon:

—Jiw chanaekabuanan, jum-amde najumchisiampox! —aechon.

⁴¹ Do jawut, Jesús jum-aech:

—Plata prestapijin, kolenje aton plata dewataspon. Kaen dewatas quinientos denarios. Asan dewataspon cincuenta denarios.

⁴² Japi kolenje plata kejl wewiasliajwapi prestaspon. Samata, prestapijin jum-aech japijajwa: 'Xamal nadewatampoxan xan kaes mat-omwuljoeyaxinil' —aechon. Japox jum-aech wut, ¿achankat japi kolenjexot kaes pejme nejxasinkaxaes? —aech Jesús Simónliajwa.

⁴³ Simón jumnot wut, jum-aechon:

—Kaes dewatpon, japon kaes nejxasinkaxaes —aech Simón Jesúsliajwa.

Do jawut, Jesús jum-aech:

—Diachwajnakolax xam chiekal xatbijam —aech Jesús Simónliajwa.

⁴⁴ Do jawut, Jesús natachaemt wut pawis, pejme jum-aechon Simónliajwa:

—Xam taenam pawis ispox. Nejba lowx wut, nachaxdus-emil min xan tajtuak kiasliajwan, me-ama xatis wajkabuan. Ampow pawislax natuakkiat pej-itmintat. Natuakmo'tbejpow pejmatlatat.

⁴⁵ Nejba patx wut, naxusui-emil chiekal nabu'kulsliajwam. Ampow pawislax, xan ba lowx wut, natuaksuw, nasitaen xotow.

⁴⁶ Chiekal nabu'kulsliajwam, xan namatnaechafana-emil olivosimint. Ampowlax perjumamint natuakchafan.

⁴⁷ Samata, jum-an: "Japow babijaxan ispoxanliajwa, wexabichaspoxan, beltaens, xabich xan nanejxasink xotow" —an xan. Jiw kaesapich babijaxan ispoxanliajwa beltaens wut, japi kaesapich itpaeyaxael pejnejaxasiyax Diosliajwa —aech Jesús Simónliajwa.

⁴⁸ Do jawut, Jesús jum-aech japowliajwa:

—Xam babijaxan isampoxanliajwa xan beltaenx —aech Jesús.

⁴⁹ Asew jiw tadutaspi xaeliajwa Simón pejbatat, japi nakaewa nakawajnaechaemt wut, jum-aechi:

—¿Achankat ampon hasta jiw babijaxan ispoxan beltaeliajwa? —na-aechi nakaewa.

⁵⁰ Jesús jum-aech pawisliajwa:

—Xabich naxanaboejtam xot, Dios xam bu'wia nejbabijaxan. Samata, xabua'de nejmach! —aech Jesús.

8

Watho' kajachawaetpox Jesús

¹ Jesús Simón pejbaxot wut, japoxwux, mathunlison xabich paklowaxan, cha-aelpaklowaxanbej. Jesús japapaklowaxanpijiw naewuajnaful chimiawuajan, Dios puexa pejiw tato'laxaelwuajan. Doce apóstolespi, japi chala Jesús.

² Chalasbejpon asew watho'. Japi watho' majt pejmatpuatantat dep webaesi. Jesús chajia dep to'a nakolaliajwa japi watho'xot. Japi watho'xot, Jesús boejthutbej, chajia majt bu'xaenk wuti. Japixot, kaew pawul María. Japow Magdala paklowaxpijow. Japow majt pejmatpuatat siete dep webaesi. Jesús dep to'a nakolaliajwa japow pejmatpuatxot.

³ Jaxotbej asaow. Japow pawul Juana. Japow Cuza pijow. Japon Cuza, rey Herodes pejba tataeflan. Jaxotbej asaow. Japow pawul Susana. Jaxotbej kaes asew watho'. Japi watho' pejewtat kajachawaeti Jesús, pejnachalabej.

Trigo pejwuajan, xasaljabapon

(Mt 13.1-23; Mr 4.1-20)

⁴ Xabich paklowaxanpijiw fulaen Jesús taeliajwa. Samata, xabich jiw natameja Jesúsxot. Jesús naewuajan wut, wuajantat jum-aechon:

⁵ “Kaen aton fulaech pejlul poxade, trigo xasaljabaliajwa. Xasaljaba wut, kaesupich natcholan nuamtat. Dolisdo', jiw xaxena wut, japi trigo sae'enas. Do jawux, japafu mia xaes.

⁶ Kaesupich trigo natcholan ia'xot. Jaxot as xanaja'al. Do jawux, japi trigo naboela wut, xabich masxaenk wutbej, japi trigo masxae selnas, sat chiekal pesnika-el xotdik.

⁷ Kaesupich trigo natcholan na-e'lu tasiaptasxot. Japi trigo naboela wut, jawutbej, na-e'lu naboela. Na-e'lu tapae-el trigo ti'sax, na-e'lu kaes athu xot.

⁸ Asew trigo natcholan sat pachaemxot. Japi trigo chiekal naboela. Ti't wut, trigoton chiekal naboet. Trigoton naboet wut, kaenanula hasta cien trigo naboet” —aech Jesus.

Jesus japox jum-aech wut, pinjametat jum-aechon: “Xamal matabijiasiam wut Dios pejnechaxoelax, jchiekal nanaewe'e xan jum-anpox!” —aech Jesus.

Ma-aech xot Jesus xabich naewuajan wuajantat

(Mt 13.10-17; Mr 4.10-12)

⁹ Pejnachala, japi wuajnachaemt Jesus, chiekal matabijasia xoti, achax chiyaxael japox wuajan, Jesus naewuajanpox.

¹⁰ Do jawut, Jesus jum-aech chiekal chanaekabuanalajwapon pejnachala: “Dios xamal tapaei matabijaliajwam Dios tato'laxaelpox pejjiw. Asew jiw naewuajna x wut wuajantat, jumtaeni. Pe japi matabijaxil, achax chiyaxael japox wuajan. Taen wuti koechaxan isxpropan, japi matabijaxil, ma-aech xot xan japoxan isx” —aech Jesus pejnachalaliajwa.

Jesus chiekal chanaekabuana pox trigo pejwuajan, xasaljabapon

(Mt 13.18-23; Mr 4.13-20)

¹¹ Do pejme Jesus jum-aech pejnachalaliajwa: “Amwut xamal chiekal chanaekabuana xaelen trigo xasaljabapon pejwuajan. Japon aton, trigo xasaljaba satat. Japawuajantat ‘Trigo’ —aech wut, japox jumchiliajwa: ‘Dios pejjamechan jiw naewuajnas pox jumtaelajwa, naexasislajwabejpi pejnechaxoelaxantat’ —chiliajwa japox.

¹² ‘Trigo, natcholanpi nuamtat’ —aech wut, japox jumchiliajwa: ‘Dios pejjamechan jiw naewuajnas wut, japajamechan jumtaeni, do jawut, kamta nejkiowbejpi jumtaenpoxan. Do jawutbej, Satanás pat japi jiw xot, japon, me-ama mia, Dios pejjamechan wenoslajwas jiw pejnechaxoelaxanxot. Samata, japi jiw Dios pejjamechan chiekal naexasisaxil Dios bu'weliajwas’ —chiliajwa japox.

¹³ ‘Trigo, natcholanpi ia'xot’ —aech wut, japox jumchiliajwa: ‘Jiw Dios pejjamechan jumtaen wut, japi jiw kamta naexasiti. Ja-aech wut, japi jiw nejchachaemil kaematkoiliajwa. Do jawux, Dios naexasit xoti, asew jiw bu'wuajanpaesipi. O, chaemilpox wetapachpi. Do jawut, japi kaes Dios xanaboeja-el. Samata, me-ama trigotathin kasnika-el wut, naboese-el, ja-aechlap-is japi jiw. Do jawut, Dios pejjamechan naexasitpox kofapi’ —chiliajwa japox.

¹⁴ ‘Trigo, natcholanpi na-e'lu tasiaptasxot’ —aech wut, japox jumchiliajwa: ‘Jiw Dios pejjamechan jumtaen wut, kamta naexasiti. Do jawux, kofalisi, asaxan matakas xot pejnechaxoelaxan, xabich nejchaxoel xotbej ampatatpijaxankal. Nejchaxoelbejpi xabich kemaenkaliajwa. Nejchaxoelbejpi isfulaliajwa pajut nejxasinkpoxan. Samata, pejxanaboejaxan Dioslajwa kaesfulaxil’ —chiliajwa japox.

¹⁵ ‘Trigo, natcholanpi sat pachaemxot’ —aech wut, japox jumchiliajwa: ‘Jiw jumtaen wut Dios pejjamechan, japi jiw chiekal naexasisful naewuajnas pox. Kofa-eli naexasisfulpox. Ja-aech wut, japi chiekal Dios xanaboejaful wut, me-ama trigoton xabich naboeti, ja-aech japi jiw’ —chiliajwa japox” —aech Jesus, chiekal chanaekabuana wut pejnachala.

Lámpara pejwuajan

(Mr 4.21-25)

¹⁶ Do pejme Jesus jum-aech pejnachalaliajwa: “Jiw lámpara tamdut wut, asaxtat matakasaxil. Cha-esaxilbej camabuxfaltat. Jiwlax athu cha-esaxael bamuaxnaetat, batu chiekal itliakaliajwa, lalenapi chiekal taeliajwa.

¹⁷ Ja-aechbej tajnaewuajna xilajwa. Puexa japoxan, moechas poxan, asamatkoi tulaelaxaesi. Puexa tajnaewuajna x, amwutjel matabija-esalpoxfuk, asamatkoi japoxan chiekal matabijaxaes” —aech Jesus pejnachalaliajwa.

¹⁸ Do pejme Jesus jum-aech pejnachalaliajwa: “jchiekal naewe'e xan jum-anpox! Tejew chiekal nawetataefulpon, japon aton kaes pejme chaxdusaxaelen. Asanlax chiekal nawetataefla-elpon tejew, kaesupich nawetataefulpox, kefisaxaeson” —aech Jesus pejnachalaliajwa.

Jesus pen, japon pakoewbej, japi nospaesiapox, Jesus suapich

(Mt 12.46-50; Mr 3.31-35)

¹⁹ Do jawut, Jesús pen, japon pakoewbej, mox pa'an Jesús naewuajanxot jiw. Pe japi leyaxil kaes mox pasliajwadin Jesúsxot, xabich wuajna jiw ba wulak xot.

²⁰ Do jawut, batutat aton jum-aech Jesúsliajwa:

—Jiw chanaekabuanan, nej-en, nakoewbej, pa'an. Japi nuil tathoetat. Xam taesiapi — aechon.

²¹ Do jawut, Jesús jum-aech jaxotiliajwa:

—Jiw jumtaenpi Dios pejjamechan, naexasit wutbejpi, japi jiw, me-ama taj-en, takoewbej, ja-aechi — aech Jesús.

Jesús fiatpox joewa, truxanbej

(Mt 8.23-27; Mr 4.35-41)

²² Asamatkoi Jesús jum-aech:

—iChijias puka we-enlelde! — aechon.

Do jawut, Jesús jul falkam, pejnachala suapich. Jawut chaflaechlisi.

²³ Pukatutat chafol wuti, Jesús nejmach moejt. Ja-aech wut, chalechkal xabich pinajoewa, pintruxanbej, pat. Falkamtu xabich min fajabas. Samata, xabich chachoel, chabu'laxael xoti.

²⁴ Jawut japi thikapi Jesús. Jum-aechipon:

—Tajpaklon, jathikde! — aechi.

Do jawut, Jesús nant wut, fiatlison joewa, truxanbej. Fiat wut, joewa chiekal toep, truxanbej. Jawut puka chiekal itnapatan.

²⁵ Do jawut, Jesús jum-aech pejnachalaliajwa:

—¿Amekat xamal xan naxanaboejampox? — aech Jesús.

Do jawut, puexa xabich belwanapi. Xabich nejchaxoelanuilbejpi. Samata, nakaewa najum-aechi:

—¿Achankat ampon aton? Joewa, pukabej, fiat wut, jnaexasichpon! — na-aechi nakaewa.

Jesús to'apox dep nakolaliajwa aton pejmatpuatxot

(Mt 8.28-34; Mr 5.1-20)

²⁶ Jesús, pejnachala suapich, puka we-enlelde chap'a Gerasa tuajnuaxotde. Gerasa tuajnu Galilea tuajnutabijla.

²⁷ Itjul wuti, Jesús putat nant wut, kaen aton japatuajnuapijin fulaen Jesúsleldin. Japon aton pejmatpuatxot dep webaes. Piach bu'jumchalaejapon. Duka-el batat. Japon duk tupi muthasxot.

²⁸ Jesúsxot pat wuton, japon nuk brixtat Jesús pejwuajnalel. Nejlat wut, jum-aechon:

—Jesús, iDios athupijin paxulan! ¿Achaxasiamkat xanxot? iXam jum-an natalias-elaliajwam! — aech japon aton pejmatpuatxot webaespon dep.

²⁹ Dep webaespon japox jum-aech, Jesús to'a xot dep nakolaliajwa japon aton pejmatpuatxot. Japon aton xabich mamnik dep pijaxtat. Jesús pas-el wutfuk, piniaeves japon aton dep pijaxtat xabich chachoel jiwliajwa. Chalechkal japon aton, me-ama na-achanat wut, ja-aech xoton. Samata, jiw muaxwasixawaekson cadenamuatat. Tuakwasixawaeksbejpon, asew jiw chiekal tataeflialiajwas. Jasoxtat japon xawaeks wut, cadenamua likton. Ja-aech wut, dep pijaxtat najaeton pajilax poxade.

³⁰ Jesús wuajna chaemt wut dep webaeson, jum-aechon:

—¿Achawulamkat xam? — aech Jesús.

Japon jumnot wut, jum-aechon:

—Xan tawul Xabich — aechon.

Jasox japon aton jum-aech, pin-iat dep webaes xoton pejmatpuatxot.

³¹ Dep xabich jum-aech Jesús to'asamatas inferno poxadik.

³² Muaxleltat pin-iat maran naxaelp. Samata, dep jum-aech Jesúsliajwa:

—Ampon atonxot nakolax nato'asiam wut, jnatapaem xanal leliajwan maranxot! — aech dep Jesúsliajwa.

Do jawut, Jesús tapaei dep leliajwa maran pejmatpuatanxot.

³³ Dolisdo', Jesús to'a dep nakolaliajwa japon aton pejmatpuatxot. Jawut dep low maranxot. Do jawut, japi maran dukr chuadidik, puka poxadik. Jaxotdik puexa maran chiekal bu'al.

³⁴ Do jawutbej, maran tataefulpi japox taen wut, pejlewt dukpi pejpaklowax poxade chapaeliajwapi taenpox. Do jawut, chapaelisi japapaklowaxpijiw, mox duilpibej.

³⁵ Do jawut, jiw fulaen pajut chiekal taeliajwa jumtaenpox. Pat wut Jesúsxot, taenlisi japon aton, ek wuton Jesús pejwuajnalel, dep wejisal xotlison. Bu'la-eklison naxoelax. Chiekal pachaemlison. Fulaenpi japox taen wut, xabich beljowpi Jesúsliajwa.

³⁶ Taenpi Jesús ispox japon aton chiekal pachaemaliajwa, japi chapaei taenpox fulaeniliajwa.

³⁷ Do jawux, puexa Gerasa tuajnupijiw xabich jum-aechi Jesús chijyaliawja japixot, xabich pejlwla xoti Jesúsliawja. Samata, Jesús falkam jul chijyaliawja japatuajnuxot.

³⁸ Do jawut, majt dep webaesón, xabich kawuajan nakfulaeliawwapon Jesús. Pe Jesús tapae-el japon aton nakfulaeliawwas. Jesús to'a japon aton namanaliawja pejtuajnuxot. Jum-aechon:

³⁹ —¡Nawiamach nejba poxade! ¡Néjjiw chapaem puexa Dios ispox xamliajwa! —aech Jesús. Dolisdo', majt dep webaesón, fulaechlison pejba poxade. Puexa paklowaxpijiw cha-paefullison Jesús ispox japonliawja.

Amxot jum-aechox Jesús pawis boeithutpoxliawja, asaow patupow mat-etpoxbejliawja, pejme dukaliajwapow

(Mt 9.18-26; Mr 5.21-43)

⁴⁰ Jesús Gerasa tuajnulel nawian wut puka we-enleldin, xabich jiw wuajnawechpon. Xabich nejchachaemili, Jesús taen wut.

⁴¹ Jawut Jairo pat Jesúsxot. Japon judíos naewuaj nabaxot tato'lan. Jairo taen wut Jesús, brixtat nukon Jesús pejwuajnalel. Sat makxabijindikbejpon. Jawut Jairo jum-aech Jesúsliawja:

—Xam tadutx nakfulaeliawwam tajba poxade.

⁴² Taxulow, kaekolowpow, doce waechanpow, mox pawuajna tupaliajwa —aech Jairo Jesúsliawja.

Do jawut, Jesús nakfol wut Jairo, jiw xabich pin-iat nakfolbej. Jiw xabichful Jesús pejwuajnalel, wuchakallelbej. Natabe'nafali.

⁴³ Japi jiwxot kaeow pawis wuchakal fol. Japow bu'xaenk. Pejlaw wut, jal chiekal wematduka-esal. Doce waechan japow jasoxtat bu'xaenkpox. Xabich jiw woew wualachipow. Pe chinax kaen boeithus-esal japow. Xadaeptow puexa pejew plata nawoeyaxtat.

⁴⁴ Japow Jesús wuchakallel moxdepow. Do jawut, Jesús sumta-otox matdukafulpox jajastow. Jawut japow kamta chiekal boeithus. Jalbej chiekal matduk.

⁴⁵ Do jawut, Jesús wuajnachaeht wut, jum-aechon:

—¿Achankat xan najajast? —aechon.

Jawut puexa jiw jum-aechna:

—¡Xanalxot xam jacha-enil! —aechi.

Jawut Pedro jum-aech:

—Tajpaklon, xam jiw xabich tabe'naful, nakfol xoti —aech Pedro.

⁴⁶ Do pejme Jesús jum-aech:

—Kaendo' najajast. Xan chiekal matabijtax kaen boeithutxpox —aech Jesús jiwliawja.

⁴⁷ Japow nejchaxoel: “Jesús matabijtx xan naboejthutx. Samata, xan nawoesa tulaela jumchiyaxaelen” —aechow, nejchaxoel wut. Do jawut, japow tathulal pejlwut. Jawut brixtat nukow Jesús pejwuajnalel. Jawutbej puexa jiw pejwuajnalel chapaeipow, ma-aech xot jajastow Jesús. Chapaeibejpow chiekal boeithulsox, jajast wutow Jesús naxoelpox.

⁴⁸ Jesús jum-aech japowliawja:

—Jam, amwutjel xam chiekal pachaemam, xan chiekal naxanaboejtam xot. ¡Xabua'de nejmach! —aech Jesús.

⁴⁹ Jesús naksiya wutfak, Jairo pamakan pat Jesúsxot. Japon jum-aech Jairo jumtaeliawja:

—Naxulow tuplisow. Samata, ¡nabej talias jiw chanaekabuanan, nejba poxade nakfulaesamata! —aech Jairo pamakan.

⁵⁰ Jesús jumtaen wut Jairo pamakan jum-aechpox, naekuanjamton. Samata, Jesús jum-aech Jairoliajwa:

—¡Nabej nejlewlé' naxulow tuppoxliawja! ¡Dioskal xanaboejde! Naxulow Dios mat-esaxaes pejme dukaliajwa —aech Jesús.

⁵¹ Jesús nakpat wut Jairo pejbaxot, tapae-elon asew jiw leliajwa. Jawut tapaeipon leliajwa Pedro, Santiago, Juan, Jairo, japon pijowbej. Japikal tapaeis leliajwa.

⁵² Wuajna tathoetlel puexa jiw xabich wunow. Do jawut, Jesús jum-aech wunowpiliajwa:

—¡Kaes nabej wunoe'! Japow tupa-el. Japow moejt —aech Jesús.

⁵³ Japi japox jumtaen wut, xafafoli. Jawut Jesús bu'wuajnapaeis. Japi chiekal matabija, japow diachwuajnakolax chiekal tup.

⁵⁴ Batutat wut, Jesús patupow kefit. Do jawut, pinjаметat jum-aechon patupowliawja:

—Jam, ¡mat-e'e pejme dukaliajwam! —aechon.

⁵⁵ Jesús japox jum-aech wut, patupow mat-et pejme dukaliajwa. Jawutlejen mat-ekchapow. Do jawut, nantlisow. Jesús to'a naxaeyax chaxdusliawwaspow.

⁵⁶ Japow pax, penbej, japox taen wut, xabich nejchaxoelanuili.

Jesús jum-aech japiliajwa:

—jAmpox asew jiw xamal nabej chapae', xan isxpox! —aech Jesús.

9

Jesús to'apox pejnachala japi naewuajnalijwa Dios tato'laxaelpox jiw ampathatat (Mt 10.5-15; Mr 6.7-13)

¹ Jesús la doce pejnachala, japi fulaeliajwadin japonlel. Pejnachala japonxot wut, Jesús jum-aech:

—Xamal xabu'kulam wut jiw, dep webaespi pejmatpuatantat, xan tajaxtat xajupaxaelam dep nakolax to'aliajwam. Xajupaxaelambej boeithusliajwam jiw bu'xaeya.

² Samata, xamal to'ax jiw naewuajnalijwam Dios puexa pejjiw tato'laxaelpox. Boeithusaxaelambej bu'xaeya.

³ Folam wut jiw naewuajnalijwam, jnabej xalae' nejkilachalanaeyan! jNabej xalae'bej choxan, naxaeyaxan, platabej! Mado' ituakxajoelam, jdo japoxxal tuaklafulaem! Jachiyaxaelambej naxoelaxliajwa. Mado' inaxoelam, jdo japoxxal bu'lafulaem!

⁴ Xamal paklowax patam wut, jkaebaxot duilde, jiw naewuajnalijwam japapaklowaxpijiw! Asapaklowaxlel fulaeliajwam wut, do jawut, jjabaxot nakolim!

⁵ Asapaklowaxpijiw xamal bu'kula-elasia wut, jjabapaklowaxxot chijiamde fulaeliajwam asapaklowax poxade! Jawut, jneituakxajoe jolde lulaliajwam as natacholnalijwa! Jasoxtat japi jiw pajut matajibaxael babijax ispox Diosliajwa, xamal bu'kula-el xoti —aech Jesús pejnachalaliajwa.

⁶ Do jawut, Jesús pejnachala follisi asatuajnuchan poxade. Naewuajnafullisi Dios pej-jamechan japatuajnuchanpijiw bu'weliajwas Dios. Boeithusfulbejpi bu'xaeya.

Rey Herodes matabijs-elpox, achan Jesús (Mt 14.1-12; Mr 6.14-29)

⁷ Rey Herodes, Galilea tuajnupijiw tato'lan, wultaen Jesús isfulpoxan. Pe matabijs-elon, achan Jesús. Wultaenbejpon, asew jiw jum-aech wut Jesúsliajwa: “Japon Juan, jiw bautisan, mat-echpon pejme dukaliajwa” —aech wut jiw Jesúsliajwa.

⁸ Herodes wultaenbej, asew jiw jum-aech wut Jesúsliajwa: “Japon profeta Elías, majt laejapon. Amwutjel japon mat-ech pejme dukaliajwa” —aech wut jiw Jesúsliajwa. Wultaenbejpon, asew jiw jum-aech wut Jesúsliajwa: “Profetas, majt laelpi, japixot kaen mat-echpon pejme duk” —aech wut jiw Jesúsliajwa.

⁹ Ja-aech wut, Herodes Juanliajwa jum-aech:

—Xan tajut tajsdaw majt keto'ax Juan taxtasiapchaliajwas tupaliajwapon. Samata, çachankat japon aton, jumtaeflaxpon, jiw jum-aechful wut japon xabich ispoxanliajwa? —aech Herodes.

Samata, Herodes xabich taesiapon Jesús.

Jesús naxaeyaxan chaxduwpox cinco mil poejiw (Mt 14.13-21; Mr 6.30-44; Jn 6.1-14)

¹⁰ Jesús pejnachala, japi apóstolespi, naewuajnafulpox buxtoet wut, nawenlisi Jesúslel. Japi natameja, pat wut Jesúsxot. Japi chapaei Jesús puexa ispoxanliajwa. Do jawut, Jesús bu'fol pejnachala Betsaida paklowax poxade, japikal tamachaliajwa.

¹¹ Jesús bu'fol wut pejnachala, xabich jiw fultaenson. Samata, japi jiw wuchakal fol. Pat wuti Jesúsxot, Jesús japi jiw chiekal bu'kula. Naewuajanbejpon Dios puexa pejjiw tato'laxaelpox. Boeithutbejpon jiw bu'xaeya.

¹² Tuila wut, Jesús mox soepas pejnachala, japi docepi. Jawut jum-aechi Jesúsliajwa:

—Amxot tuajnuchan ajil. Amxotbej ajil naxaeyaxan. Samata, jampi jiw jum-amde mox tuajnuchan poxade naxaeyaxan wuajsliajwa, moejsliajwabejpi! —aech apóstoles Jesúsliajwa.

¹³ Jesús jumnot wut, jum-aechon:

—jXamal najut chaxduim naxaeyaxan ampi jiw! —aechon.

Japi jumnot wut, jum-aechi:

—Xanaxot asbuan jumch cinco pan, kolenje baxinbej. çXamkat xanal nato'asiam naxaeyaxan wuajsliajwan puexa ampi jiw xaelliajwa? —aech Jesús pejnachala.

¹⁴ Jesúsxot patpi, me-ama cinco mil poejiw. (Watho', yamxi suapich, xajui-esal.) Do jawut, Jesús jum-aech pejnachalaliajwa:

—jKaenanula pejmutan suapich, nej chalake cincuenta jiw! —aech Jesús pejnachalaliajwa.

¹⁵ Jesús pejnachala jasox is. Jiw chalakax to'a wuti, puexa jiw chiekal chalak.

¹⁶ Do jawut, Jesús chafit cinco pan, kolenje baxinbej. Athu natachaemse wut, Jesús Dios kawuajan wut, gracias-aechon japapanesliajwa, kolenje baxinliawabej. Jawut jalkafulon panes, baxibej. Jalkaful wut, chaxduifulon pejnachala sasliajwa, puexa jiw xaelliajwa.

¹⁷ Do jawut, puexa jiw chiekal xael. Chiekal nafniapi. Xaeyax chiekal kaechatoel wut, Jesús pejnachala matpirantat jia namapi. Jawut wulupi doce matpiran namapi, baxitoerow, pan malsibej.

Pedro jum-aechpox Jesúsliajwa: "Xam Cristowam, Dios to'asponam"
(Mt 16.13-20; Mr 8.27-30)

¹⁸ Asamatkoi, Jesús Dios kawuajan wut, jaxotbej pejnachala. Jawut wuajna chaemt wut, jum-aechon pejnachalalajwa:

—¿Achan na-aechkat jiw xanliajwa? —aech Jesús.

¹⁹ Japi jumnot wut, jum-aechi:

—Asew jiw jum-aech xamliajwa: 'Juan, jiw bautisan, mat-echpon pejme duk' —aech jiw. Asew jiw jum-aechbej xamliajwa: 'Japon Elías, Dios pejprofeta, mat-echpon pejme duk' —aech asew jiw. Asew jiw jum-aechbej xamliajwa: 'Dios pejprofetas tupi, japixot kaen mat-echpon pejme duk' —aech asew jiw —aech Jesús pejnachala Jesúsliajwa.

²⁰ Do jawut, Jesús pejme wuajna chaemt wut, jum-aechon pejnachalalajwa:

—¿Xamallax, achana amkat? —aech Jesús.

Do jawut, Pedro jumnot wut, jum-aechon:

—Xam Cristowam, Dios to'asponam jiw bu'welajwam —aech Pedro Jesúsliajwa.

Jesús jum-aechpox, japon tuxaxaelpoxliajwa
(Mt 16.21-28; Mr 8.31-9.1)

²¹ Jesús nejthuxat baxfiat wut pejnachala, jum-aechon:

—¡Nabej chapae' asew jiw xan Cristowanponan!

²² Xan puexa jiw pakoewkolnan xabich nabijasaxaelen. Japamatkoi judíos-ancianos, sacerdotespaklochowebej, judíos chanaekabuana pibej, najumchiyaxael xanliajwa: 'Japon Cristowa-el, Dios to'aspona-el' —nachiya xaeli. Samata, japi naboesaxael. Xan naboesa wuti, tres matkoi wut, Dios namat-esaxael pejme dukalijwan —aech Jesús, jum-aech wut pejnachalalajwa.

²³ Do jawut, Jesús puexa jiwliajwa jum-aech:

—Xamal tajnachalwasiam wut, ¡najut isaxaelampoxan nejkiowde! ¡isfuldelax kaematkoisful xan tato'laxpoxan! Bej nabijasaxaelambej asew jiw pijaxtat. Xamal bej beyaxaelbejpi, tajnachalwam xot. Japoxan ja-aech wut, ¡xamal nakiowa naxanaboejafulde!

²⁴ Xamal isfulam wut ampathatat najut nejxasinkampoxan, asamatkoi tuxam wut, duilaximil Diosxotse. Kofam wutlax najut isfulampoxan ampathatat, isfulam wutlax xan tato'laxpoxan, asamatkoi tuxam wut, ja-am wut, pomatkoicha Diosxotse duilaxaelam.

²⁵ Xamal isfulam wut najut nejxasinkampoxan, xamal napelsaxaelam Diosxot. Xamal xabich wutbej nejew ampathatat, japoxan omjil xamal duilalijwam Diosxotse.

²⁶ Xamal nadala wut xanliajwa, tajnaewuajnanxanliajwabej, xanbej, puexa jiw pakoewkolnan, talaxael xamallijwa. Xanbej jachiyaxaelen xamallijwa, pejme fuloekx wut, kaxaxoekam wut ampathatlelsik taj-ax Dios pej-itliakaxtat, taj-ax Dios pej-ángeles pej-itliakaxtatbej.

²⁷ Diachwuajnakolax jum-an. Asew xamalxot, pejpatuxax wuajna, japi jiw taeyaxael Dios puexa pejiw tato'laxaelpox —aech Jesús jiwliajwa.

Jesús xabich chaponanakhianpox Dios pijaxtat
(Mt 17.1-8; Mr 9.2-8)

²⁸ Do jawux, ocho matkoiyan xent wut Jesús jum-aechpox, jawut Jesús bu'julach Pedro, Santiago, Juan, pinamuax poxase, Jesús Dios kawuajnalijwa.

²⁹ Jesús kawuajan wut Dios, pejxu xabich itliak Dios pijaxtat. Naxoelox xabich papoeikolax nadofapox. Xabich itliakbejpo.

³⁰ Do jawut, chalechkal natulaela kolenje aton. Japi, Jesús suapich, nospaei. Chalechkal kolenje natulaelapi, kaen Moisés, asan Elías.

³¹ Natulaelapi masajach Dios pej-itliakax. Japi nospaei wut, Jesús suapich, naksiyapi Jesús nabijasaxaelpox Jerusalén paklowaxxot, japon tuxaxaelpoxliajwabej.

³² Pedro, asew Jesús pejnachala suapich, xabich itmoejslapi. Pe moejs-eli. Do jawut, taenlisi, Jesús xabich itliak wut Dios pijaxtat. Taenbejpi kolenje aton, nuil wut Jesúsxot.

³³ Kolenje natulaelapi chijiyalijwa wut, Pedro jum-aech Jesúsliajwa:

—Tajpaklon, pachaem, xanal amxotan wut. Xam nejxasinkam wut, xanal isaxaelen tres bua-at xamallijwa. Kaeyax xamliajwa. Asabua-at Moisésliajwa. Asabua-at Elíasliajwabej —aech Pedro.

Pedro japox jum-aech matabijs-elaxtat.

³⁴ Pedro naksiya wutfuk, itlojejen fuloek japi matwuajjasik. Do ja-aech wut, Jesús pejnachala xabich pejlawa.

³⁵ Do jawut, itloejentutat Dios jum-aechsik: “Amponlap taxulan, makafitxpon. Jjapon chiekal naewesfulde!” —aech Dios.

³⁶ Dios buxtoet wut naksiyapox, Jesús pejnachala taenpi jaxotse Jesús tamachpox. Jesús pejnachala chinax kaen aton japamatkoiyantat chapae-eli taenpox muaxxotse.

Jesús nakolsax to'apox dep yamxulan pejmatpuxot
(Mt 17.14-21; Mr 9.14-29)

³⁷ Do jawux, kandiawa wut, Jesús pejnachala suapich, baloek muaxxotsik, Dios naksiyaxot. Jawut xabich jiw fulaen bu'kakulnaliajwapi Jesús.

³⁸ Japi jiwxot, kaen aton jum-aech pinjametat Jesúsliajwa:

—Tajpaklon, jnabeltaem! jTaem taxulan! Japon xabich kaekolan.

³⁹ Taxulan dep pijaxtat nejlaton. Chalechkal xabich wawua'tason. Wawua'tas wut, satat jxadapson. Do jawut, kaechwathuamapon. Xabich nabijaton dep pijaxtat. Dep nasiownik taxulan pejmatpuxot.

⁴⁰ Xan jum-an nejnachala, namapi amxot, japi to'aliajwa dep nakolsax. Pe japi xajupa-el dep nakolsax to'aliajwapi dep —aech japon aton.

⁴¹ Do jawut, Jesús jum-aech pejnachalaliajwa:

—Xamal tajnachala, Dios chiekal xanaboeja-emilfuk. Nejnejchaxoelaxan chiekla-elbej. Xabich pin-iamatkoijan xamalxotx. Xabich pin-iamatkoijan naewuajnafalaxbej. Kajachawaetxbej Dios chiekal xanaboejalijawam. Pe xamalfuk Dios chiekal xanaboeja-emil —aech Jesús pejnachalaliajwa.

Do jawut, Jesús jum-aech yamxulan paxliajwa:

—jBuflaemen naxulan xanle! —aech Jesús.

⁴² Paxulan bu'pat wuton Jesúsxot, japon yamxulan pejme xadapson dep satat. Xabich wawua'tasbejpon. Jawut Jesús dep nakolsax to'a. Dep nakolt wut, yamxulan chiekal pachaemlison. Jawut Jesús buflaech yamxulan pax poxade.

⁴³ Do jawut, puexa jiw nejchaxoelanuili, taen wati Jesús ispox Dios pijaxtat.

Jesús pejme jum-aechpox pejpatapaxliajwa
(Mt 17.22-23; Mr 9.30-32)

Puexa jiw nejchaxoelanuili wutfuk Jesús ispoxliajwa Dios pijaxtat, Jesús jum-aech pejnachalaliajwa:

⁴⁴ —jChiekal najumtaem jumchixaxaelenpox! jNabej nejkiowe! Xan, puexa jiw pakoewkolnan, asan nawiasaxael tadaelmajiwxot —aech Jesús, jum-aech wut japoxliajwa.

⁴⁵ Jesús pejnachala matabija-el Jesús jum-aechpox, Dios tapae-esal xoti matabijaliajwa. Jesús pejnachala buxdala kaes wuajnaemsliajwapi Jesús, chanaekabuanaliajwasbejpi.

Achan kaes paklonaxaelpox Diosxotse
(Mt 18.1-5; Mr 9.33-37)

⁴⁶ Asamatkoi Jesús pejnachala najum-aechi: “¿Achankat xatisxot kaes pejme paklonaxael?” —na-aechi.

⁴⁷ Jesús matabijit pejnachala nakaewa najum-aechpox. Samata, Jesús yamxulan la fulaeliajwadin. Do jawut, yamxulan notlison pejfuletlel, pejnachala pejwuajnalelbej.

⁴⁸ Do jawut, Jesús jum-aech pejnachalaliajwa:

—Xamal bu'kulam wut yamxi xan tajaxtat, me-ama ampon yamxulan, ja-am wut, xanbej nabu'kultam. Xan nabu'kultam wut, Diosbej bu'kultam, xan nato'apon. Xamalxot kaen jum-aech wut: ‘Xan pejme kaes omjinil. Me-ama asew jiw, jachi-enil’ —aech wuton, japon aton Diosxotse kaes pejme paklonaxael —aech Jesús pejnachalaliajwa.

Is-elpi chaemilpox Jesúsliajwa, japi me-ama kajachawaetpox Jesús pijax naewuajnax
(Mr 9.38-40)

⁴⁹ Jesús pejnachalan, pawulpon Juan, japon jum-aech Jesúsliajwa:

—Jiw chanaekabuanan, xanal aton taenx, xam nijaxtat to'a wut dep nakolaliajwa jiw pejmatpuxatanxot. Samata, xanal japon aton fiatx japox kofsliajwa. Japon wajmatpijna-el —aech Juan Jesúsliajwa.

⁵⁰ Jesús jumnot wut, jum-aechon:

—Japon japox is wut, inej ispon japox! jNabej fias! Jiw babijaxan is-elpi xatisliajwa, japi, me-ama xatis kajachawaet wajnaewuajnax —aech Jesús pejnachalaliajwa.

Jesús buxfiatpox Santiago, Juan suapich

⁵¹ Jesús pejmatkoi mox pawuajna wut athu poxaliajwase, fulaechon Jerusalén paklowax poxade, pejnachala suapich. Jesús pejlewla-el Jerusalén paklowax pasliajwa.

⁵² Samata, kolenje pejnachalan to'apon wuajnade, asatuajnu poxade, Samaria tuajnuel, jaxotde bapijin kawuajnalijwapi Jesús jaxot namanaliajwa kaematkoilijwa.

⁵³ Samaria tuajnupijiw chiekal matabija Jesús fulaeyaxaechpox Jerusalén paklowax poxade. Samata, Samaria tuajnupijiw nejxasinka-el Jesús pasliajwa japi pejtuajnuxot.

⁵⁴ Kolenje Jesús pejnachalan, japon Santiago, Juan suapich, japox jumtaen wut, jum-aechi Jesúsliajwa:

—Tajpaklon, xamkat nejxasinkam, xanal Dios kawuajntax wut wuljoeliasjan, Dios to'aliajwa jit athulelsik, japatuajnupijiw toejwaliajwas? —aech Santiago, Juan suapich.

⁵⁵ Jesús japox jumtaen wut, japi jum-aechpox, kaxa kawulel natfo'chapon. Jawut pejnachala buxfiaton kaes japox jumchisamatapi.

⁵⁶ Do jawux Jesús fulaech, pejnachala suapich, asatuajnux poxade.

Asew jiw, naknauamsasiapox Jesús

(Mt 8.19-22)

⁵⁷ Jesús, pejnachala suapich, asew jiw suapichbej, nuamtat fol wut, kaen aton jum-aech japixot:

—Jiw chanaekabuanan, xan nakfulaesian xam, nanuamtam wut nejmachtuajnuchan poxade —aechon.

⁵⁸ Do jawut, Jesús jum-aech:

—Lam pejmuthan moejsliajwa. Miabej pejfenan. Xanlax, puexa jiw pakoewkolnan, tajbakolax ajil damlathulaliajwan —aech Jesús.

⁵⁹ Jesús jum-aechbej asan atonliajwa:

—Xan nakfulaem! —aechon.

Japon aton jumnot wut, jum-aechon:

—Tajpaklon, taj-ax xabich pati'in. Taj-ax tux wut, do jawut, xam nakfulaeyaxaelen naknauamsliajwan —aech japon aton Jesúsliajwa.

⁶⁰ Jesús jum-aech:

—Xan nanaexaxis-elpi, japi jiw Diosliajwa, me-ama patupa wut, ja-aechi. Japi muthaxael patupa. Nej-ax tux wut, japi muthsaxael. Xamlax xan nakfulaem jiw naewuajnalijwam Dios puexa pejiw tato'laxaelpox! —aech Jesús japon atonliajwa.

⁶¹ Asan aton jum-aechbej Jesúsliajwa:

—Tajpaklon, xan-is xam nakfulaesian. iPe majt natapaem tajjiw kawuajnalijwan! Do jawux, xam nakfulaeyaxaelen —aechon Jesúsliajwa.

⁶² Jesús jumnot wut, jum-aechon japon atonliajwa:

—Aton nabist wut Diosliajwa, kaeyax nejchaxoelafala-el wuton, japon aton kaenejchaxoelaxa-el, Dios suapich. Samata, japon aton pachaema-el naewuajnalijwapon Dios puexa pejiw tato'laxaelpox —aech Jesús.

10

Jesús asew pejnachala, setenta y dospi, to'apox jiw naewuajnalijwa

¹ Do jawux, Jesús kaes jiw makanot pejnachalaliajwa, setenta y dos poejiw. Jawut Jesús japi poejiwxot, kaenanula kolenje wuajna to'apon. To'apon japi wuajna jiw naewuajnalijwa, puexa paklowaxanpijiw, puexa tuajnuchanpijiwbej, Jesús pasaxaelxot.

² Japi fulaeliasjan wut, jum-aechon: "Diachwuajnakolax jum-an. Xabich jiw wuajnwet chimiuwuajan jumtaeliasjan. Me-ama trigo foel wut, xabich pachaemlisi jolaliajwa, ja-aechbej amwutjel xabich jiw. Xamal kaesuapicham, Dios pejjamechan naewuajnapim. Samata, iwajpaklokolan Dios kawuajande japon to'aliajwa asew jiw, japibej Dios pejjamechan naewuajnafulaliajwa asew jiw!

³ Xabua'de xamal! Xamal folam wut xan tajaxtat, ichiekal taem, babejchow poxade to'ax xot! Me-ama pejmachoeff ovejaliasjan chachael, jachiyaxaelbej xamalliasjan, babejchowxotam wut.

⁴ Folam wut, inabej xalae' choxan, plata, asew tuaqxajoebej! Jiw xabu'kulam wut nuamtat, ipiach nabej nuile' nospaeliasjan, japi suapich! Ma ifulaemchdo', ido japapaklowax poxade fulaemch!

⁵ Ba leliasjan wut, imajt jum-amde japabapijiwliajwa: 'iDios xamal nej kajachawaes chiekal duiliasjan!' —amde japabapijiw!

⁶ Japi jiw chiekal duiliasjan wut, me-ama xamal jumchiyaxaelam, japi Dios kajachawaesaxaes chiekal duiliasjan. Pelax japi jiw nejwesla wut chiekal duiliasjan, japi chiekal duilaxil.

⁷ Tadut wuti xamal duiliasjan japi pejbaxot, xamalfuk duilde japabaxot! iNabej lalixle' asabachan poxade! Naxaeyaxan chaxduw wut, xamal nejmach xaem! iFembej! iNabej nadale', naxaeyaxan chaxduw wuti! Aton nabist wut asanliasjan, japon moch. (Xamal-bej Dios pejjamechan naewuajnafulam xot, jiw chaxduiyaxael naxaeyaxan xaeliasjanwam xamal, nabistam xot Diosliajwa.)

⁸ Paklowax patam wut, xamal chiekal jiw bu'kula wut, japi jiw xamal naxaeyaxan chaxduw wutbej, ixamal xaem!

⁹ Japaklowaxxot bu'xaenki, jboejthue! jjum-amdebejpi: 'Dios puexa pejiw tato'laxaelmatkoi mox pawuajna' – amde japi jiwliajwa!

¹⁰ Asapaklowax patam wut, japapaklowaxpijw xamal bu'kula-el wut, jnuilde japapaklowaxthialaxxot! Do jawut, japapaklowaxpijw jum-amde:

¹¹ 'Xanal tajtuakxajoe jolx lulalijaw as natacholnaliajwa. Jasox isx xamal najut chiekal matabijalijawam babijax isampox Diosliajwa, xanal nabu'kula-emil xot naewuajnalijawam Dios pejjamechan. jChiekal nanaewe'e jumchiyaxaelenpox! Dios puexa pejiw tato'laxaelmatkoi mox pawuajna' – amde japapaklowaxpijwliajwa!

¹² Diachwuajnakolax xamal jum-an. Asamatkoi, kastikamatkoi wut, japapaklowaxpijw xabich kaes pejme Dios kastikaxaespi. Me-ama Sodoma paklowaxpijw kastikas wut, jachiyaxilon" – aech Jesús pejnachalalijwa, setenta y dospilijaw, wuajna to'alijaw wuton japi.

Asapaklowaxanpijw naexaxis-elpox Jesús

(Mt 11.20-24)

¹³ Jesús jum-aech Corazín paklowaxpijwliajwa, Betsaida paklowaxpijwliajwabej: "Corazín paklowaxpijwam, Betsaida paklowaxpijwambej, xamal xabich nabijasaxaelam, Dios xabich kastikaxael wut. Xan koechaxan isx wut xamalxot, xamal taenam, pe xamal naexaxis-emil naewuajnajax wut Dios pejjamechan. Japakoechaxan chajia isaxaelen wut Tiro paklowaxpijwliajwa, Sidón paklowaxpijwliajwabej, japoxan taeyaxael wuti, japi jiw naexaxisaxael Dios pejjamechan. Ja-aech wut, kofaxaeli padujnechaxoelaxan isfulalijaw Dios nejxasinkpoxan. Ja-aech wutbej, naxoeyaxaeli papopa. Chalakaxaelbejpi jithumbaxot asew jiw matabijalijawas xabich nejxaejwasposx babijaxan ispoxanliajwa.

¹⁴ Samata, Corazín paklowaxpijwam, Betsaida paklowaxpijwambej, Dios xabich kastikaxael xamal. Me-ama Tiro paklowaxpijw, Sidón paklowaxpijwbej, jachiyaxil, japapaklowaxanpijw kastikas wuti Dios" – aech Jesús Corazín paklowaxpijwliajwa, Betsaida paklowaxpijwliajwabej.

¹⁵ Jesús jum-aechbej Capernaum paklowaxpijwliajwa: "Capernaum paklowaxpijwam, xamal nejchaxoelam wut, jum-am: 'Dios nakbuflaeyaxael xatis athu poxase' – am xamal, nejchaxoelam wut. Pelax Dios xamal to'axael infierno poxadik, xan nanaexaxis-emil xot" – aech Jesús Capernaum paklowaxpijwliajwa.

¹⁶ Jesús jum-aech pejnachalalijwa: "Xamal jiw naewuajnafalam wut, japi jiw xamal chiekal naewet wut, jawut xan nejchaxoelaxaelen japi jiwliajwa: 'Japi jiw xanbej chiekal nanaewet' – chiyaxaelen, nejchaxoelx wut japilijaw. Asew jiw xamal naexaxis-el wut, jawutbej xan nejchaxoelaxaelen japi jiwliajwa: 'Japi jiw xanbej nanaexaxis-el' – chiyaxaelen, nejchaxoelx wut japilijaw. Japi jiw xan nanaexaxis-el wut, jawutbej taj-ax Dios nejchaxoelaxael japilijaw: 'Japi jiw xanbej nanaexaxis-el' – chiyaxael taj-ax Dios, nejchaxoel wut japi jiwliajwa" – aech Jesús pejnachalalijwa.

Jesús pejnachala, setenta y dospi, kaxa pa'anpox Jesúsxot

¹⁷ Jesús pejnachala, setenta y dospi, naewuajanpoxan buxtoet wuti puexa paklowaxanpijw, puexa tuajnechanpijwbej, do ja-aech wut, kaxa nawenlisi Jesúslel. Xabich nejchachaemali. Pat wuti Jesúsxot, puexa chiekal chapaeipi Jesús jumtaelajwas:

– jTajpaklon, xam nijaxtat xanal dep to'ax wut, kamta dep nakola jiw pejmatruatanxot! – aechi, Jesús chapaei wut.

¹⁸ Do jawut, Jesús jum-aech pejnachala, setenta y dospilijaw:

– Diachwuajnakolax xan taenx, Satanás jopik wut athuxotsik Dios pijaxtat. Me-ama chamax nakliafcha wut, ja-aechon, jopik wut.

¹⁹ Xan chaxdutex tajpamamax malechaliajwam Satanás. Samata, xamal nanuamtam wut jom, afubej. Xamal malecham wut Satanás, japon xajupaxil xamal tabesliajwa.

²⁰ jPe nabej nejchachaemle' dep kamta jiw pejmatruatanxot nakolapoxliajwa, to'am wut! jNejchachaemildelax nejwulan Diosxotse lelsopoxliajwa! – aech Jesús.

Jesús xabich nejchachaemilpox

(Mt 11.25-27; 13.16-17)

²¹ Do jawut, Jesús xabich nejchachaemil Espíritu Santo pijaxtat. Samata, Jesús jum-aech pax Diosliajwa: "Ax, xamlap kaenam paklonam athuxotse, ampathatlelbej. Xam xabich pachaemam. Xam kajachawaetam estudia-elpi, japi chiekal matabijalijaw nejjamechan. Jasoxtat xam kajachawaetam jiw, nejxasinkam xot. Asew jiw lax, xabich matabijapi, japi jiw japoxan matabijaxil. Diachwuajnakolax jasox ja-am, xam nejxasinkam xot" – aech Jesús pax Diosliajwa.

²² Do pejme Jesús jum-aech pejnachalaliajwa: “Xan taj-ax natapaei puexa matabijsliajwan. Pe jiw diachwujnakolax xan namatabija-el, achanan xan. Taj-ax, Dios, japon kaen chiekal xan namatabijt. Jiwbej matabija-el, achan taj-ax. Xan kaenan taj-ax chiekal matabijtax. Xan makanotxpikal, japikallax matabijaxael taj-ax. Japikal tapaeix matabijaliajwapi taj-ax Dios” —aech Jesús pejnachalaliajwa.

²³ Do jawut, Jesús natfo'cha wut, jum-aechon pejnachalal: “Asew jiw, taenpi xamal amwutjel taenamponax, japi jiwbej xabich nejchachaemlaxael.

²⁴ Diachwujnakolax xan jum-an. Xabich profetas, reyesbej, taesiapi xamal amwutjel taenampon, japon Mesías. Xanlap japonan. Profetas, reyesbej, xan natae-el, tɔp xotlisi ampathatat xan pasax wujana. Xabich jumtaesiabejpi tajjamechan, amwutjel xamal jumtaenamponax. Pe jumtae-eli, tɔp xotlisi” —aech Jesús pejnachalaliajwa.

Samaria tuajnujpijin pejwujajan, japon pachaempon

²⁵ Judíos chanaekabuanan fulaen nospaeliajwa, Jesús swapich, xapaejsliajwabejpon Jesús. Xapaejsliajwa wut, jum-aechon:

—Jiw chanaekabuanan, ¿xan machiyaxaelenkat Dios nabu'weliajwa, Diosxotse pomatkoicha dukaliajwan? —aech, Jesús xapaejsliajwa wut.

²⁶ Jesús jumnot wut, jum-aechon:

—¿Achaxkat jum-aech Moisés chajia lelpox japoxliajwa? ¿Xaljowampox achax-aechbejkat? —aech Jesús.

²⁷ Judíos chanaekabuanan jumnot wut, jum-aechon:

—Moisés chajia lelpox jum-aech: ‘¡Nejxasinkde Dios, nejpaklokolan, puexa nejmatpuatat, puexa nejnejchaxoelaxtatbej! ¡Puexa nejpanamaxtatbej tanbichfulde, Dios nejxasinkam xot! ¡Nejxasinkdebej asew jiw! Me-ama xam najut nejxasinkam wut, ¡ja-amde asew jiwliajwa!’ —aech Moisés chajia lelpox —aech judíos chanaekabuanan.

²⁸ Do pejme Jesús jum-aech judíos chanaekabuananliajwa:

—Pomatkoicha japoxan ja-am wut, pomatkoicha xam dukaxaelam Diosxotse —aech Jesús.

²⁹ Pe judíos chanaekabuanan nejxasink Jesús nejchaxoelaliajwa japonliajwa japon pachaempoxliajwa. Samata, jum-aechon:

—¿Masikat xan jiw nejxasinkaxaelen? —aechon.

³⁰ Jesús jumnot wut, ampawujantat jum-aechon:

—Kaen aton Jerusalén paklowaxxot nakolt fulaeliajwa Jericó paklowax poxade. Nuamtat fol wut, kethaka jaeltason. Puexa pejew wenchpon. Bu'jolsbejpon. Do jawut, baeson. Jaxot bu'jumchawaelsnadofitpon paboejlan.

³¹ Do jawux, kaen sacerdot-aton fulaen japanuamtadin. Taen wuton wujana aton paboejlan okpox, asbuan jumch mox naejiaton xensliajwa. Do jawut, xenton.

³² Do jawux, sacerdotes kajachawaesan jaxot pat. Taen wuton wujana aton nuamtat okpox, japonbej mox jiat xensliajwa. Do jawut, japon xent.

³³ “Do jawux, Samaria tuajnujpijin fulaen japanuamtadin. Fulaen wut, taenpon aton wujana nuamtat okpox. Japonlax beltaen japonliajwa.

³⁴ Do jawut, mox soepandepox okpox poxade. Do jawutbej, itfanchan wuapon olivosimintat, vinotatbej. Itfanchan xape'abejpon. Do jawut, pejburtat ossepon. Jasoxtat bu'folon baespon kethaka. Do jawux, bu'paton nanuamtpi papatbatat. Jaxot chiekal tataefulpon japon aton.

³⁵ Do kandiawa wut, Samaria tuajnujpijin jut kolefanchan mosliajwapon bapijin. Jawut jum-aechon bapijinliajwa: ‘¡Ampon aton chiekal nawetataefulde xan tajwulela! Japon asaxan wewe'pas wut, ¡xam wujade japon atonliajwa! Jelow xan pejme kaxanax wut, xam mosaxaelen wujatmpoxan japonliajwa’ —aech Samaria tuajnujpijin bapijinliajwa. Ma amxot toep, ampawujajan, xam naewuajnauxwujajan.

³⁶ Tres poejiw taen kethaka baespon. ¿Masonkat tres poejiwxot nejxasink baespon? —aech Jesús judíos chanaekabuananliajwa.

³⁷ Judíos chanaekabuanan jumnot wut, jum-aechon:

—Beltaenpon kethaka baespon —aechon Jesúsliajwa.

Jesús jumnot wut, jum-aechon:

—¡Xamlap-is ja-amde! ¡Nejmachjiw beltaem!” —aech Jesús.

Jesús patpox Marta pejbaxot

³⁸ Jesús nuamtat fol wut, pejnachala swapich, jawut paton cha-aelpaklowaxachxot. Japapaklowaxachxot Marta pejba ek. Jawut chiekal bu'kultow Jesús, japon pejnachalabej.

³⁹ Marta pakoewow pawul María. María mox ek Jesús pejwujana le chiekal naewesliajwa Jesús naewuajanpox.

⁴⁰ Pelax Marta xabich xatsalt. Samata, Jesúsxot mox wut, jum-aechow:

—Tajpaklon, ζxamkat xanliajwa nejchaxoela-emil takoewow tamach nakixanchachaem-pox? ¡Takoewow to'im xan nakajachawaesliajwa! —aech Marta.

⁴¹ Jesús jumnot wut, jum-aechon:

—Marta, xam xabich nejchaxoelam isampoxanliajwa.

⁴² Xan naewuajnaprox kaes pejme pachaem xamal naewesliajwam. María xan naewesful xot, kaes pachaempox naewesfulpow. Chinax kaen aton wefisaxisal japox —aech Jesús.

11

Jesús chanaekabuanapox pejnachala, jumchiyaxaeli, Dios kawuajan wut
(Mt 6.9-15; 7.7-11)

¹ Jesús kaematkoisful Dios kawuajan. Asamatkoi, Dios kawuajnaprox buxtoet wut, kaen pejnachalan jum-aech Jesúsliajwa:

—Tajpaklon, ¡xanal nachanaekabuanim Dios kawuajnaprox! Me-ama Juan, jiw bautisan, chanaekabuanim pejnachala Dios kawuajnaproxliajwa, ¡xambej xanal nachanaekabuanim Dios kawuajnaprox! —aech Jesús pejnachalan.

² Do jawut, Jesús jum-aech pejnachalaliajwa:

—Xamal Dios kawuajnaprox wut, ¡jum-amde:

'Ax Dios, ¡puexa jiw xam nej sitae!' Puexa nejjiw tato'laxaelammatkoi, ¡japamatkoi nej tuadus!

³ ¡Kaematkoisful nachaxduim naxaeyaxan, xanal nawewe'ppoxanliajwa!

⁴ ¡Xanal nabeltaem babijaxan isxroxanliajwa! Me-ama xanal beltaenx, asex jiw babijaxan is wut xanalliajwa, ¡ja-amdebej xanalliajwa! ¡Nabej tapae'bej Satanás xanal naxapae-jaliajwa, xanal babijaxan isasamatan!' —amde, Dios kawuajnaprox wut! —aech Jesús pejnachalaliajwa.

⁵⁻⁷ Jesús pejme jum-aech:

—Xam nejnachalan pinmadoitat pat wut nejbaxot, jum-aech wuton: '¡Xan nachaxdu'e tres panes! Amwutjel tajnachalan pat tajbaxot. Tajbaxot ajil naxaeyax tajnachalan chaxdusliajwan' —aech wuton xamlliajwa, jawut jumchiyaxaelam batuxotdin: '¡Nabej natalias! Xanlis okx. Ba chiekal xatbe'tax. Tejew yamxi bu'okx. Samata, nansaxinil chaxdusliajwan nawujowampox' —chiyaxaelam batuxotdin.

⁸ Pe nejnachalan nakiowa wuljoeful wut, wuljoefulprox xam chaxdusaxaelam nejnachalan.

⁹ Samata, xamal jum-an amprox: '¡Wewe'ppoxan piach wuljoefulde Dios! Ja-amsfulam wut, Dios chaxdusaxaelbej xamal wuljoefulprox. Wulwekamproxbej faenaxaelam Dios pejkajachawaesaxtat. Dios kawuajnaprox wut kaematkoisful, japon xamal kajachawaesfulaxael. Ja-aech wut, me-ama Dios fafasaxael xamal leliajwam' —an xan.

¹⁰ Piach wuljoefulprox wewe'paspoxan, japon aton Dios chaxdusaxaes. Piach wulwekafulponbej, japon aton faenaxael Dios pejkajachawaesaxtat. Bafafatat piach laefulpon, japon aton Dios wefafasaxaes —aech Jesús, pejnachala naewuajan wut Dios kawuajnaprox.

¹¹ Jesús pejme jum-aech pejnachalaliajwa:

—Naxulan baxin wuljow wut, xamal naxi chaxduiyaximil jom.

¹² Naxulan kawaematabut wuljow wut, xamal naxi chaxduiyaximil afu.

¹³ Xamal babejchowam matabijam naxi chaxduiliajwam chamoeyaxan. Nej-ax Dios, athupijin, kaes pejme pachaem. Me-ama xamal jachi-elon. Samata, nej-ax Dios to'axoek Espiritu Santo xamal nejmaturatantotaliajwa, Dios kawuajnaprox wut —aech Jesús pejnachalaliajwa.

Fariseos jum-aechprox Jesús pejpamamax, Satanás pejpamamax
(Mt 12.22-30; Mr 3.20-27)

¹⁴ Aton naksiyaxilpon dep pijaxtat. Dolisdo', Jesús to'a dep nakolsliajwa japon aton nejmaturatxot. Dep nakolt wut, do jawut japon aton naksiyax tuadutilson. Jiw japox taen wut, xabich nejchaxoelauuili.

¹⁵ Asex japixot, fariseos, jum-aechi Jesúsliajwa: "Jesús to'a wut dep nakolsliajwa aton nejmaturatxot, Jesús to'a Satanás, dep pejpaklon pejpamamaxtat" —aechi.

¹⁶ Asex jiw jum-aechbej xapaejsliajwapi Jesús:

—¡Isde koechax xanal taeliajwan! —aechi.

¹⁷ Jesús matabijt japi nejchaxoelox. Samata, jum-aechon:

—Xan to'a-enil dep nakolaliajwa Satanás pejpamamaxtat. Kaetajnapijiw nadijakaxael wut nakaewa nabeliajwa, japi natoesaxael nabeyaxtat. Kaebapijiwbej nadijakaxael wut nakaewa nabeliajwa, japi natoesaxael nabeyaxtat.

¹⁸ Jachiyaxaelbej Satanás. Satanás, pejjiw nadijkaaxael wut nakaewa nabeliajwa, japi dep natoesaxael nabeyaxtat. Ja-aech wut, Satanás pejtato lax toepaxael nabeyaxtat. Xamal japox jum-an, najum-am xot xanliajwa: 'Jesús to'a dep nakolaliajwa jiw pejmatpumatxot Satanás pejpamamaxtat' —na-am xot xanliajwa.

¹⁹ Ja-aech wut, zachan pejpamamaxtatkat nejnachalabej dep to'a nakolaliajwa jiw pejmatpumatxot? Xamal matabijam japi to'a-el Satanás pejpamamaxtat. Samata, xamal jum-ampox xanliajwa, japox diachwujnakolaxa-el.

²⁰ Xan to'ax Dios pejpamamaxtat dep nakolaliajwa jiw pejmatpumatxot. Ja-aech wut, diachwujnakolax xamalxot patlisox, Dios puexa pejjiw tato laliajwapox —aech Jesús.

²¹ Do pejme Jesús jum-aech:

—Pamaman xawawet wuton kapetat pejbatat, asan aton wenosaxisal japon aton pejew.

²² Pe asan, kaes pamaman, fulaen wut, wujnapijin malechas wut, ja-aech wut, xawawetpox kefe'naxaeson. Ja-aech wutbej, japon pejew wenosaxaes wesasliajwas, asew jiw suapich —aech Jesús.

²³ Do pejme Jesús jum-aech:

—Xan nanejweslapi, japi jiw tadaelmajiw. Japi is-el xan nejxasinkapox. Japilax nawetabejt tajbichax —aech Jesús.

*Dep pejme kaxa nawia'anpox leliajwa aton pejmatpumatxot
(Mt 12.43-45)*

²⁴ Do pejme Jesús jum-aech:

—Dep nakolt wut aton pejmatpumatxot, dep nanuamt pajilaxxot. Wulwekon asan aton pejmatpumat, jaxot low wut damlathulaliajwa. Faena-el wut, dep nejchaxoel wut, jum-aechon: 'Xan pejme nawiasaxaelen aton pejmatpumatxot, nakoltaxxot' —aech dep, nejchaxoel wut.

²⁵ Dolisdo, dep kaxadin wut, faenlison japon aton, majt nakoltxoton. Do jawut, dep pajut najum-aech japon atonliajwa: 'Asan dep le-elfuk tajwulela. Samata, pachaem xan pejme leliajwan japon aton pejmatpumatxot' —aech dep, nejchaxoel wut.

²⁶ Do jawut, japon dep fulaechlison asew dep wujjaesliajwa. Faenon siete dep, japi dep kaes pejme chaemil. Me-ama dep matxoelapijin, jachi-el siete dep. Do jawut, puexa japi dep lowlisi japon aton pejmatpumatxot. Ja-aech wut, japon aton kaes pejme xabich nabijat. Me-ama majt, jachi-elon —aech Jesús.

Xabich nejchachaemlaxaelpox Dios pejjamechan naexasiti

²⁷ Jesús naksiya wutfuk depliajwa, naewetixot kaeow pawis nejlakcha wut, jum-aechow Jesús jumtaeliajwa:

—Pawis, xam faenpow, chaxti'apowbej xam ti'sliajwam, jipow nej nejchachaemle' xamliajwa! —aechow.

²⁸ Pe jawut Jesús jum-aech:

—Xabich kaes pejme nejchachaemlaxael xan nanaeweti, japibej naexasiti wuti Dios pejjamechan —aech Jesús.

*Babejchow keto'apox Jesús koexax isliajwa
(Mt 12.38-42; 16.1-4; Mr 8.11-13)*

²⁹ Xabich jiw masajati Jesús naewuajanpox jumtaeliajwa. Samata, Jesús jum-aech japi jiw jumtaeliajwa: "Xamal laelpampim, babejchowam. Nato'am xan koexax isliajwan asbuan jumch xamal taeliajwam. Pe xamal pajelkoexax taeyaximil. Me-ama chajia Dios is profeta Jonásliajwa jiw pajut matabijaliajwa japon Dios to'aspon, jasoxtatbej xamal matabijaxaelam, xan Dios nato'aponanpox.

³⁰ Dios chajia koexax is wut Jonásliajwa, Nínive paklowaxpijiw matabija. Jasoxtatbej xamal matabijaxaelam, Dios is wut koexax xanliajwa, jiw matabijaliajwa diachwujnakolax xan Dios nato'aponan puexa jiw pakoewkolnanliajwa, jiw bu'welijaen.

³¹ "Asamatkoi Dios puexa jiw kastikaxael, babijaxan ispi. Xamalbej Dios pejuwajnael nuilaxaelam kastikaliajwa. Japamatkoi Saba tuajnujijwipaklokoloel nukaxael Dios pejuwajnael japow xamal jumchiliajwa nejbu'wujjanpoxanliajwa, xan nanaexaxis-emil xot. Japow chajiakolaxtat xabich atuaj fulaen rey Salomón pejmatabijsax pajut chiekal matabijsliajwapow. Xan kaes pejme pachaeman. Me-ama Salomón, jachi-enil. Xan naewuajnael xamal matabijaliajwam Dios. Pe xamal naexaxis-emil.

³² Japamatkoi Nínive paklowaxpijiw nuilaxaelbej Dios pejuwajnael xamal jumchiliajwa babijaxan isampoxanliajwa, o, is-emil wut. Chajiakolaxtat japi naewuajnas wut Jonás, japi kamta kofa babijaxan ispoxan isfulaliajwa Dios nejxasinkpoxan. Xan kaes pejme pachaeman. Me-ama Jonás, jachi-enil. Pelax xamal xan chiekal nanaewes-emil" —aech Jesús.

Jiw pej-itfutan, me-ama lámpara wut, ja-aechpox
(Mt 5.15; 6.22-23)

³³ Jesús jum-aech: “Jiw tamdut wut lámpara, asaxtat matakasaxil. Cha-esaxilbej cajónbuxfaltat. Jiw lax athu cha-esaxael lámpara bamuaxnaetat, batu chiekal itliakaliajwa, batu lalenapi chiekal taeliajwa. Jasoxtat xanbej moech-enil diachwuajnakolaxpox Diosliajwa. Puexa chiekal tulaela itpaeix.

³⁴ Lámpara itliak batu puexa jiw chiekal taeliajwa. Ja-aechbej nej-itfutan. Xamal chiekal taenam, nej-itfutan chiekal pachaem xot. Nej-itfutan chaemil wut, chiekal taeyaximil. Me-ama itliaklan, jachiyaxaelam. Jachiyaxaelbej nejnejchaxoelaxan. Dios italiafa wut nejchaxoelaxan, chiekal pachaemaxael. Ja-am wut, naexasisaxaelam Dios tato'alpox isfulaliajwam. Duilaxaelambej chiekal. Nejchaxoelaxan chiekal pachaema-el wut, naexasisaximil Dios.

³⁵ Chiekal taem babijaxan isaxan nejchaxoelasamata! Xamal nejchaxoelam wut babijaxan isaxan, ja-am wut, nejnejchaxoelaxan, me-ama itkuatnik wut, jachiyaxael. Ja-am wut, xamal naexasisaximil xan naewuajnapoxan.

³⁶ Dios italiafa wut nejnejchaxoelaxan, xamal isfulaxaelam Dios tato'alpoxan. Ja-am wut, nejnejchaxoelaxan chinax chaemilaxil. Me-ama lámpara itliak batutat, jachiyaxael nejnejchaxoelaxan” —aech Jesús.

Jesús jum-aechpox jiw matabijaliajwa fariseos, judíos chanaekabuapanibej, pejbu'wuajanpox

(Mt 23.1-36; Mr 12.38-40; Lc 20.45-47)

³⁷ Jesús buxtoet wut, kaen fariseo taduton Jesús xaeliajwa japon pejbaxot. Do jawut, Jesús lech japon pejba poxade. Eklison mesaxot.

³⁸ Jesús xaeliajwa wut, majt xabich piach kekakias-elon. Fariseo japox taen wut, nejchachaemla-elon Jesúsliajwa.

³⁹ Jesús matabijt japon nejchaxoelox. Samata, Jesús jum-aech:

—Xamal fariseos xaeliajwam wut, majt xabich piach fuletletan xabich kiatam taso, platfanchanbej. Pelax patulelan kias-emil. Xamal fariseos, me-ama tasfanchan, platfanchanbej, xabich kiachpi, ja-am xamal. Xabich piach kekakiatam. Pelax nejnejchaxoelaxan, me-ama xabich as da'nik wut, ja-aech. Nejchaxoelambej nosliajwam asew jiw pejew. Isfulambej babijaxan.

⁴⁰ Xamal nejliaklawam! ¿Matabija-emilkat Dios puexa ispox nejbuanxot, isbejpon tathoetlel, funiachlelbej?

⁴¹ Samata, jisfulde pachaempoxan asew jiwliajwa! Ja-am wut, puexa jiw xamal matabijaxael nejnejchaxoelaxan, diachwuajnakolax pachaempox —aech Jesús fariseosliajwa.

⁴² Do pejme Jesús jum-aech fariseosliajwa: “iPuexa xamal, fariseos, Dios kastikaxael! Xamal xafolam ofrenda Dios chaxduiliajwam. Muthampi ti't wut, diajnam diezmuaxtjeliajwa. Kaemuaxt diajnam Dios chaxduiliajwam. Ja-ambej, menta-uafliajwa. Asew muthampibej Dios chaxduwam kaesuapich. Japoxan isfulam wut, pachaem. Pe kaeyax wewe'pfuk xamal isliajwam. Is-emil pachaempoxan asew jiwliajwa. Dios chiekal nejxasinka-emilbej. Japox koloe yax xamalliajwa we'pfuk” —aech Jesús fariseosliajwa.

⁴³ Do pejme Jesús jum-aech: “Puexa xamal fariseos, Dios kastikaxael, xabich nejxasinkam xot jiw jumchiliajwa: ‘Fariseos diachwuajnakolax paklochow’ —chiliajwa jiw xamalliajwa. Xamal judíos naewuajnapaxamich wut, tua-ekaxan itfetambej chalakaliajwam japoxantat, kaes paklochow chalakaliajwapoxan puexa jiw pejwuajnalel. Xamal jiw moi-aech wut paklowaxthilaxanxot, nejxasinkam jiw moichiliajwa sitaeyaxtat. Samata, Dios kastikaxael xamal” —aech Jesús.

⁴⁴ Do pejme Jesús jum-aech fariseosliajwa: “iPuexa xamal fariseos Dios kastikaxael! Xamal, me-ama patupamathan, marka-esalpi, jaxot jiw nejmach sae'an, matabija-el xot, xamallap-is ja-am. Jiw xamal taen wut, me-ama pachaemam wut, jakabuam-am. Pelax nejnejchaxoelaxan xabich chaemil” —aech Jesús.

⁴⁵ Judíos chanaekabuapanixot kaen jum-aech Jesúsliajwa:

—Jiw chanaekabuapanan, xam japox jum-am wut, jum-am xanalliajwa —aechon.

⁴⁶ Jesús jum-aech judíos chanaekabuapaniliajwa:

—iPuexa xamal judíos chanaekabuapanijwam, Dios kastikaxael xamal! Jiw naewuajnam wut, xabich naewuajnam japi jiw xabich kaes naexasisliajwa xamal naewuajnapoxan. Pe japi jiw xajura-el puexa japoxan naexasisliajwa. Chinax kajachawaes-emilbej japi jiw naexasisliajwa naewuajnapoxan —aech Jesús judíos chanaekabuapaniliajwa.

⁴⁷ Do pejme Jesús jum-aech judíos chanaekabuapaniliajwa: “Judíos chanaekabuapanijwam, iPuexa xamal Dios kastikaxael! Nejuwajnapijiw ampathatat laelp

wut, japi ba Dios pejjprofetas. Japi profetas pejmathanmatwuaajat xamal ampamatkoian isam cha-aelbax itpaeliajwam nejsitaeyax japi profetasliajwa.

⁴⁸ Pe japabax isam wut, itpaeyam xamal kaenejchaxoelaxampox, nejwuaajnapijiw suapich. Nejwuaajnapijiw ba Dios pejjprofetas. Xamal amwutjel cha-aelbax isam japi profetas pejmathanxot.

⁴⁹ “Japoxliajwa Dios chajia jum-aech matabijsaxtat: ‘Xan to’axaelen profetas, apóstolesbej, judiosliajwa. Xan japi to’ax wut, asew japixot beyaxaes. Asew japixot dukp wut, nakiowa chakifalaeyaxaes’ –aech Dios, jum-aech wut japiliajwa.

⁵⁰ Puexa profetas, baespi nejwuaajnapijiw pijaxtat, puexa japoxan pijaxtat, xamal, amwutjel laelpampimfuk, Dios kastikaxael.

⁵¹ Abel matxoela boesas pakoewan. Do baxael, xabich asew profetasbej beflas kaenanula nejwuaajnapijiw pijaxtat. Do baxael, Zacariasbej boesas. Nejwuaajnapijiw boesa wuti Zacarias, Dios pejtemplobafulmaktutat boesaspon, mox altar nukxot. Puexa profetas, baespi nejwuaajnapijiw pijaxtat, japoxliajwa ampamatkoiyantat xamal laelpampimfuk, Dios kastikaxael.

⁵² “iPuexa xamal, judíos chanaekabuanapijiwam, Dios kastikaxael! Xamal nejchaxoelam wut, nejchaxoelam: ‘Xatis chiekal matabijas Dios pejjamechan’ –am xamal, nejchaxoelam wut. Pe nakiowa, chiekal matabija-emil. Jiw naewuajnam wut, naewuajnam asawuajantat, Dios pejjamechana-elpoxantat. Samata, me-ama jiw bafafa xawaet wut, asew jiw lesamata, ja-ambej xamal Dios pejjamechanliajwa jiw naexasisamata. Ja-am xot, jiw pasasiapi Diosxotse, xamal tapae-emil, naewuajnam xot asawuajantat. Xamalbej najut nejxasinka-emil pasliajwam Diosxotse” –aech Jesús judíos chanaekabuanapiliajwa.

⁵³ Japoxan Jesús jum-aech wut, judíos chanaekabuanapi, fariseosbej, xabich palalapi Jesúsliajwa. Samata, xabich wuaajnachaemsfullisi taliasliajwapi Jesús.

⁵⁴ Ja-aechi, wuaajnachaemsful wut. Japi asbuan jumch wuaajnawet jumtaeliajwa Jesús jum-aech wut babejjamechan Diosliajwa, japoxtat japi tasalaliajwa Jesús pejbu’wuaajanpoxliajwa.

12

*Fariseos fiatpox, japi pajut ispoxan, asew jiw isasamata
(Mt 10.26-27)*

¹ Xabich jiw pin-iakola natameja Jesúsxot. Samata, nakaewa natabe'naful. Natuaksae'anbejpi. Jesús matxoelajum-aech pejnachalaliajwa: “iXamal chiekal taem fariseos chanaekabuanapoxanliajwa, xamal naekichachajbasamatapi! Fariseos asew jiw fiat japi pajut ispoxan, jiw isasamata.

² Moechaspoxan asamatkoi tulaelaxaes. Maliach jum-aechpoxanbej, asamatkoi puexa jiw tulaela jumtaeyaxael.

³ Madoj jum-ampoxan maliach, o, batutat nuthaklajametat jum-ampoxan, japoxanbej asamatkoi asew jiw tulaela chiekal jumtaeyaxael” –aech Jesús, pejnachala naewuajan wut.

*Jesús naewuajanpox pejnachala, achanliajwa japi pejlowlaxael
(Mt 10.26-31)*

⁴ Jesús pejme jum-aech pejnachalaliajwa: “Xamal tajnachala, jum-an ampox. iXamal nabej nejlewl'e' beyaxaelpi xamal! Xamal ba wuti, japi kaes machiyaxil xamalliajwa, isliajwa kaes wejisal xot.

⁵ Pelax xamal sitaeyaxaelam Dios, japon to'axael xot nej-aelan inferno poxadik” –aech Jesús.

⁶ Do pejme Jesús jum-aech pejnachalaliajwa: “Cinco mia mowas kolekafefliajwa. Ja-aech, japi mia omjil xotlejen. Pe ja-aech wut, Dios chinax kaen mianxot nejkiowaxil chiekal tataeflaliajwa.

⁷ Dios kaes pejme nejxasink xamal. Me-ama mia nejxasink wut, jachi-el, Dios nejxasink wut xamalliajwa. Dios matabijtbj massuapich nejmatla kaenanula xamalxot. Samata, iXamal nabej nejlewl'e'! Xamal xabich kaes pejme ommaenkam. Me-ama mia pin-iat, jachi-emil” –aech Jesús pejnachalaliajwa.

*Jesús pejwuaajan naexasiti, japi jumchiyaxaelpox Jesús pejjiwpi
(Mt 10.32-33; 12.32; 10.19-20)*

⁸ Do pejme Jesús jum-aech pejnachalaliajwa: “Xamal jum-an ampox. Japi jum-aechpi jiw pejwuaajnale: ‘Xanal Jesús pejnachalwan’ –aech wuti, japi tajnachalaxael. Xanbej, puexa jiw pakoewkolnan, jumchiyaxaelen japi jiwliajwa: ‘Ampi tajnachala’ –chiyaxaelen Dios pej-ángeles pejwuaajnale Diosxotse.

⁹ Asew jiwłax jum-aechpi asew jiw pejwñajnalel: 'Xanal Jesús pejnachala-enil' —aech wuti, xanbej jumchiyaxaelen japiliaw: 'Ampi jiw tajnachala-el' —chiyaxaelen Dios pej-ángeles pejwñajnalel Diosxotse" —aech Jesús pejnachalalajwa.

¹⁰ Do pejme Jesús jum-aech pejnachalalajwa: "Jiw jum-aech wut babejjamechan xanli-ajwa, xan puexa jiw pakowkolnanliajwa, japi Dios kawuajan wut beltaeyaxaesi japoxli-ajwa. Pelax jiw jum-aech wut babejjamechan Espíritu Santolijwa, japi jiw beltaeyaxisal Dios" —aech Jesús pejnachalalajwa.

¹¹ Do pejme Jesús jum-aech pejnachalalajwa: "Xamal buflaeyaxaeli judíos naewñajnabachan poxade, paklochow poxadebej. Ja-aech wut, inabej nejchaxoele' jumchiyaxaelampoxan, jumnosliajwam wut paklochow!"

¹² Xamal paklochowxotam wut, jawut chiekal matabijaxaelam Espíritu Santo pijaxtat jumnosliajwam japi paklochow" —aech Jesús pejnachalalajwa.

Jesús naewñajanpox jiw nejchaxoelasamata kemaeyaxliaw

¹³ Jiw natamejaxot, kaen aton jum-aech Jesúsliaw:

—Jiw chanaekabuanan, taj-ax tıp wut, takoewan, matxoelapijin, puexa taj-ax pejew xabich nosaxael. ¡Takoewan jum-amde xan tejwaxaelpi nachaxdusliawapon! —aechon Jesúsliaw.

¹⁴ Jesús jumnot wut, jum-aechon:

—Kaen aton xan nawuldui-el juezliawan, xamal nejew wediakliaw —aech Jesús.

¹⁵ Do jawut, Jesús jum-aech jiw natamejapi jumtaelajwa:

—¡Chiekal taem! ¡Nabej nejchaxoele' nejew xabichalijwa! Xamal xabich wut nejew, japoxantat kaes chiekal nejchaxoelaximil Diosliaw —aech Jesús.

¹⁶ Do jawut, Jesús naewñajan amprawñajan jiw natamejapiliaw. Jum-aechon: "Kaen aton kemaeyan duk. Xabich wepachaemspon pejlulan. Jol wut, xabich jolpon.

¹⁷ Kemaeyan nejchaxoel wut, nejchaxoelpon ampox: '¿Xan achaxkat isaxaelen? Xan ajil bachan tejew cha-owalijwan' —aechon, nejchaxoel wut.

¹⁸ Do jawut, kemaeyan kaes jum-aech, nejchaxoel wut: 'Xan matabijtax isaxaelenpox. Cha-aelbax puexa chiekal tusaxaelen. Dolisdo', japabawajלטat isaxaelen kaes pinabachan puexa tejew naxaeyaxan cha-owalijwan.

¹⁹ Do jawut, pinabachantat tejew naxaeyaxan cha-owax wut, nejchaxoelaxaelen: "Xan xabich tejew naxaeyaxan cha-owax pin-iawaechan xaeliaw. Samata, piach nabichax-inil. Damlathulaxaelen. Xaeyaxaelen. Feyaxaelenbej. Xabich nejchachaemlaxaelen" —chiyaxaelen, nejchaxoelx wut" —aech kemaeyan, nejchaxoel wut.

²⁰ Pe jawut, Dios jum-aech kemaeyanliaw: '¡Xam nejliaklanam! Matabijs-emil ampamadaitat xam tıpxaxaelampox. Samata, ¿achanliawakat naxaeyaxan cha-owam?' —aech Dios.

²¹ Jasox jatis japon atonliaw xabich tamejapon pejew pajutliaw. Dios nejchaxoel wut, jum-aechon japon kimaeyanliaw: 'Xanliaw ampon aton, me-ama xabich kejl wut, ja-aechon' —aech Dios, nejchaxoel wut japonliaw" —aech Jesús jiw natamejapi jumtaelajwa.

*Dios tataefulpox jiw xanaboejapi japon
(Mt 6.25-34)*

²² Jesús jum-aech pejnachalalajwa: "Xan jum-an ampox. ¡Nabej nejchaxoele' xaeliawampoxan, naxoelajwampoxanbej!"

²³ Xatis duila-esal naxaeyaxkallijwa, naxoekallijwabej. Dios nakchaxduw nakwewe'ppoxan japoxantat xatis duilalijwas. Samata, Dios nakchaxduiyaxael naxaeyaxan, naxoeyaxaespojanbej.

²⁴ Nejchaxoelam wut, ¡nejchaxoelde mialijwa! Mia naxaeyaxan mutha-el. Jola-elbejpi cha-owalijwa. Pe nakiowa, Dios chaxduw mia xaeliaw. Dios xamal kaes pejme nejxasink. Me-ama mia nejxasink wut, jachi-elon. Samata, nej-ax Dios xamal chiekal tataeflaxael.

²⁵ Ja-aech wut, ¿ma-aech xotkat xamal xabich nejchaxoelam? Xabich nejchaxoelam wut, ja-am wut, kaes kaematkoiliaw laelpaximil, xabich nejchaxoelam xot.

²⁶ Xajupa-emil wut japox isliaw, ¿ma-aech xotkat xabich nejchaxoelam japoxliaw, asaxanliawabej?" —aech Jesús pejnachalalajwa.

²⁷ Do pejme Jesús jum-aech pejnachalalajwa: "Nejchaxoelam wut, ¡nejchaxoelde naetalan, chimiatalanpox! Ti't wut, nabich-el chimialijwa. Pe puexa chiekal chimia. Xanlax jum-an. Rey Salomón majt laeja wut, japon xabich chimia naxoeipon. Pe kaes pejme chimia, naetalan.

²⁸ Cha-aelnaex, yotat nuili, Dios pijaxtat natala wut, xabich chimiatalan. Pe piachliawael. Asbuan jumch kaematkoiyen suapichliaw. Do jawut, tıp. Do jawutbej, tamejas

lausliajwas. Pe Dios xamal xabich kaes tataeful. Me-ama naetalan tataeful wut, jachi-el Dios. Samata, ¡Dios chiekal xanaboejim chimia xamal xajoelajwapon! Xamal wewe'pfuk Dios chiekal xanaboejalajwam.

²⁹ Samata, ¡xabich nabej nejchaxoele' xaeliajwampoxan, feliajwampoxanbej! ¡Dioskal xanaboejim!

³⁰ Dios naexasis-eli xabich nejchaxoel xaeliajwapoxan, naxoelajwapoxanbej. Xamallax nej-ax Dios. Japon matabijt xamal wewe'ppoxanliajwa.

³¹ ¡Xamal chiekal naexasisfulde Dios puexa pejiw tato'laxaelpox! Ja-amsfulam wut, Dios chaxduiyaxael xamal wewe'ppoxan" –aech Jesús pejnachalalajwa.

Jesús naewuajanpox pejnachala ommaenkpox Diosxotse

(Mt 6.19-21)

³² Do pejme Jesús jum-aech pejnachalalajwa: "¡Xamal nabej nejlewle', kaesuapicham wut! Dios xamal nejxasink xot, makanot asamatkoi xamal duilalajwam Diosxotse, jiw tato'lalajwambej jaxotse.

³³ ¡Nejew mowim! Mowam wut, ¡japapla chaxduim xabich wewe'paspi! Ja-am wut, Dios xabich nejchachaemlaxael xamallajwa. Dios isaxaelbej pachaempox xamallajwa Diosxotse. Jaxotse pasaxil kethaka nejew nosliajwa. Ajilaxaelbej itxaeyaxaeli. Jaxotsebej toepaxil nejew.

³⁴ Diosxotse, japon xamal chaxduiyaxael pachaempoxan. Samata, ¡nejchaxoelafulde pasliajwam japonxotse!" –aech Jesús pejnachalalajwa.

Jesús pejwuajan naexasiti thilsfulaxaelpox wuaj nawesfulalajwa Jesús pejpasax

³⁵ Jesús jum-aech pejme pasaxoekpoxliajwa: "Chalechkal xan pasaxoekon ampathatat. Xamal laelpampimpfuk, ¡chiekal thilsfulde, wuaj nawesfulam wut tajpasax!

³⁶ Xamal matabijam. Kaen paklon fiesta poxalajwade wut, to'apon pamak kawetalajwa, japi wesfulalajwa paklon pejba. Do jawux, paklon fiesta poxade. Do baxael, chalechkal paklon pa'an wut, bafafa daka wuton, kamta pamak wefafasaxaeson.

³⁷ Pamak naliasfulpoxat pejpaklon pat wut, ja-aech wut, japi nejchachaemlaxael paklonliajwa. Diachwuajnakolax xan jum-an xamallajwa. Paklon to'axaesi chalakalajwa paklon pejmexaxot. Do jawux, paklon pajut naxaeyax chaxduiyaxael japi pamak xaeliajwa.

³⁸ Pinmadoitat, o, nalianax mox rawuajna wut, paklon pat wut, japahoratat pamak nakiowa naliasful wut, japi nejchachaemlaxael.

³⁹ ¡Matabijimbej jumchiyaxaelenpox! Bapijin matabijt wut kethakan pasaxaelhoratat japon wenatkowalajwas, japon aton naliasfulaxael pejbatat, wuaj nawesfulalajwabejpon kethakan. Ja-aech wut, kethakan natkowaxil japon pejbatat.

⁴⁰ ¡Xamallap-is ja-amsfulde, xan nawuaj nawesfulam wut! Xanbej, puexa jiw pakoewkolnan, jachiyaxaelen. Chalechkal pasaxoekan, ampathatpijw nawuaj nawesfula-el wut" –aech Jesús pejnachalalajwa.

Paklon kolenjepox pamakan, kaen pachaem, asan chiekal chaema-el

(Mt 24.45-51)

⁴¹ Pedro wuajnachaemt wut, jum-aechon Jesúsliajwa:

–Tajpaklon, xam jum-ampox, wuajan, ¿japoxkat xanalkallajwa, o, puexa jiwliajwabej? –aech Pedro, wuajnachaemt wut Jesús.

⁴² Jesús jum-aech Pedroliajwa: "Xan jumchiyaxaelen wuajan, kaen nabichan, pachaemponliajwa. Japon pomatkoicha chiekal nabist paklonliajwa. Babijax nejchaxoela-elon. Paklon ajil wut, japon chiekal tato'laful asew nabichow. Naxaeyaxanbej chiekal chaxduwbejpon pomatkoicha, me-ama paklon to'ason japox isliajwa.

⁴³ Paklon pat wut, taen wutbejpon nabichan chiekal nabistpox, ja-aech wut, japon nabichan xabich nejchachaemlaxael.

⁴⁴ Diachwuajnakolax xan jum-an. Paklon matabijt wut nabichan chiekal nabistpox japon pejwulela, ja-aech wut, paklon to'axaeson puexa paklon pejew tataeflialajwa.

⁴⁵ "Pe nabichan chiekal nabich-el wut paklon pejwulela, japon nabichan nejchaxoelaxael: 'Tajpaklon xabich pin-iamatkoiyon pasaxil' –chiyaxaelon, nejchaxoel wut. Samata, chiekal tataeflaxilon asew nabichow. Be'balaxaelon poejiw, watho'bej. Do jawux, tuadusaxaelon xaeliajwa, saxsliajwasbej. Jasox isfulaxaelon pomatkoicha.

⁴⁶ Ja-aech wut, nejchaxoelaxilon paklon pasaxaelpox. Do jawut, chalechkal paklon pasaxael. Do jawutbej, nabichan xabich kastikaxaes. Jawux to'axaeson asew jiw poxade, Dios naexasis-eli poxade" –aech Jesús Pedroliajwa.

⁴⁷ Jesús pejme jum-aech pejnachalalajwa: "Nabichan matabijt wut paklon to'asox isliajwa, pe is-el wuton, ja-aech wut, nabichan xabich selsaxaes.

⁴⁸ Asew nabichow chiekal jummatabija-el wut paklon to'aspos, ja-aech wut, japi is paklon nejxasinka-elpox. Do ja-aech wut, japi kastikaxaes. Pe selsaxaes wut, xabich selsaxisal. Puexa paklochow chiekal isaxael pejbichaxan pachaempoxantat. Diosxotse wut, asamatkoi chapayaxaeli pejbichaxan ispoxanliajwa. Samata, kaes pejme pachaem isliajwa pejbichaxan pachaempoxantat, kastika-elalijwaspi Dios" —aech Jesús pejnachalialijwa.

Jesús paskpox japon pijaxtat ampathatpijiw nadialialijwa
(Mt 10.34-36)

⁴⁹ Do pejme Jesús jum-aech pejnachalialijwa: "Xan faloekx ampathatasik puexa jiw babijaxan ispoxan wemosliajwan, xan tux wut. Asew jiwxot xan nanaexaxisaxael. Pe asew jiw xan nanaexaxisaxil. Asamatkoi japi Dios xabich kastikaxaes. Tajnabijasax, tajtuxaxbej, toep wut, jawut xan xabich nejchachaemlaxaelen.

⁵⁰ Xabich babejkolax, nabijasax, nawewe'pfuk japox xan naxapaejsliawa. Xan xabich nabijasaxaelen, naboesa wuti. Samata, xabich nejchaxoelx tajpatuxaxliajwa.

⁵¹ Nejchaxoelam wut, jnabej nejchaxoele': 'Jesús fuloek potujnucha jiw chiekal kaenejchaxoelaxliajwa, chiekal duilialijwabej nabe-elaxtat' —nabej aeche', nejchaxoelam wut! Xan pas-enil japoxliajwa. Xan tajaxtat xabich jiw kaenejchaxoelaxil.

⁵² Kaebatat cinco jiw duil wut, japixot kaenejchaxoelaxil. Tres xan nanaexaxisaxael. Kolenje nanaexaxisaxil. El wut, kolenje xan nanaexaxisaxael. Tres nanaexaxisaxil.

⁵³ Kaebaxot pax, paxulan swapich, kaenejchaxoelaxil xan tajaxtat. Japixot kaen xan nanaexaxisaxil. Asan nanaexaxisaxael. Pen, paxulow swapich, jachiyaxaelbej. Japixot kaeow xan nanaexaxisaxil. Asaow nanaexaxisaxael. Paem, pakala swapich, jachiyaxaelbej. Japixot kaeow xan nanaexaxisaxil. Asaow nanaexaxisaxael!" —aech Jesús pejnachalialijwa.

Dios ispoxan judios chiekal matabija-el
(Mt 16.1-4; Mr 8.11-13)

⁵⁴ Jesús jum-aech jiwliajwa: "Amxot, Israel tuajnxot, itloejen fulaen wut juimt tujoplel, xamal japox taenam wut, jum-am: 'Amwut iam thilnaxael' —am xamal. Do jawux, japamatkoitat diachwujnakolax iam thilan, me-ama xamal jum-am.

⁵⁵ Surlel, wik wut, xamal jum-am: 'Amwut xabich masxaenkaxael' —am xamal. Do jawux, japamatkoitat diachwujnakolax xabich masxaenk, me-ama xamal jum-am.

⁵⁶ jXamal naekichachajbapijwam! Matabijam, xabich masxaenkaliaw wut, iam thilnaliaw wutbej. ¿Pe ma-aech xotkatlax xamal matabija-emil Dios ispoxan ampamatkoiyantat?" —aech Jesús jiwliajwa.

Jesús naewuajanpox asanliajwa xatis babijax isas wut, kamta chaemsliajwas
(Mt 5.25-26)

⁵⁷ Do pejme Jesús jum-aech jiwliajwa: "Nejchaxoelam wut, jnajt chiekal nejchaxoelde isfulalijwam pachaempoxan!

⁵⁸ Xamal isam wut babijax asan atonliajwa, japon aton xamal bu'fol wut juez poxade xamal kastikalialijwa, jchiekal jum-amde bu'folponliajwa, chaemsliajwam japox babijax, japon aton swapich! jJa-amde juez kastikasamata xam! Jasox jachi-emil wut, xamal wiasaxaelon jiw jebatat jelialjwa.

⁵⁹ Xan chiekal jum-an. Xamal jiw jebatat jia wuti, xamal kamta nakolaximil. Jaxot nakolaximil, mos-emil wut babijax isampoxanliajwa. Xam mosaxaelam puexa dewatampoxan jaxot nakolalialijwam" —aech Jesús jiwliajwa.

13

Jesús naewuajanpox jiw kofalialijwa babijaxan isfulpoxan naexaxisfulalialijwa Dios

¹ Jiw patpi Jesúsxot, japi jum-aech Jesúsliajwa:

—Galilea tuajnpjijiw pat Jerusalén paklowaxxot. Japi choef xua'at Dios pejtempobatad Dios chaxduilialijwapi ofrenda. Do jawut, Pilato to'a pejsoldaw japi jiw beliajwas. Baes wut, japi pejjal, choefjal swapich, matanialas —aechi Jesúsxot pati, chapaei wuti Jesús.

² Jesús jum-aech japi jiwliajwa:

—Xamal bej nejchaxoelambej: 'Japi japox wejatis, kaes babijaxan is xot. Me-ama asew jiw pejtujnpjijiw, jachi-el xoti' —bej ambej, nejchaxoelam wut.

³ Xan jum-an: 'Japi japox wejatis xamal najut kofalialijwam babijaxan isfulampoxan. Kofa-emil wut, asamatkoi tuxam wut, xamalbej Dios kastikaxael. Diosxotaximilbej' —an xan.

⁴ Ba, xabich athpox, Torre de Siloé pawaprox, chalechkal chajia jwwal Jerusalén paklowaxxot. Japox jwwal wut, dieciocho jiw matkaeyas. Xamal nejchaxoelam wut, bej jum-ambej matkaeyaspilijawa: 'Japi japox wejatis, kaes babijaxan is xot. Me-ama asew jiw, Jerusalén paklowaxpijw, jachi-el xoti' —bej ambej, nejchaxoelam wut.

⁵ Xan jum-an: '¡E! Japi jasox wejachi-esal. Xamallax kofa-emil wut babijaxan isfalamproxan, asamatkoi tapam wut, Dios xamalbej kastikaxael. Diosxotaximilbej' —an xan —aech Jesús jiwliajwa.

Higonae naboese-elpox pejwajan

⁶ Jesús naewajan wut jiw, higonaelajwa jum-aechon: "Kaen aton pejlul. Pejlututat higonae nuk, chajia muthtasnae. Lulpijin mox soepan japanae taelajwa, pabaech wut tsliajwa. Pe japanae baechjil.

⁷ Samata, lulpijin jum-aech pejlul wetataeflasponliajwa: '¡Taem ampanae! Ampoxtat tres waechan fulaenxprox, pabaech wut tsliajwan. Pe chinax naboese-el. Samata, ¡likde nae! ¡Kaes nabej tapaeis ampanae sat it-elalijwa!' —aech lulpijin.

⁸ Lul tataeflan jumnot wut, jum-aechon paklonliajwa: 'Tajpaklon, ¡ma ampawaechtatfuk tapae! Xan chabakasaeyaxaelen. Do jawut, abono chabakatholaxaelenbej.

⁹ Ja-an wut, japanae bej naboeseaxaelbej asawaestat. Pe japawaestat naboese-el wut, do jawut, japanae liksaxaelen' —aech lul tataeflan" —aech Jesús jiwliajwa.

Jesús boejthutpox napatamatkoitat kaew pawis, jajulow bu'xaeyaxtat

¹⁰ Asamatkoi, napatamatkoi wut, Jesús naewajan judios naewajnapaxot.

¹¹ Japabaxot kaew pawis ek, bu'xaenkprow. Pomatkoicha jajulwax chalaejapow. Chinax nadolsaxilow. Japow dieciocho waechan, ja-aech dep ketispxotat.

¹² Jesús taen wut japow, lapon. Japow pat wut Jesúsxot, jum-aechon japowliajwa:

—Xam boejthutx bu'xaenkampox —aech Jesús.

¹³ Jesús ke-ot japow pejta'tat. Jawut japow chiekal nadolt. Kaes jajulwa-elow. Do jawut, japow jum-aechful Diosliajwa: "Dios, xam isam xabich pachaempox xanliajwa. Xam xabich pachaemam" —aechow Diosliajwa.

¹⁴ Jawut judios naewajnapa tataeflan palala Jesúsliajwa, Jesús boejthut xot japow napatamatkoitat. Samata, judios naewajnapa tataeflan jum-aech jiwliajwa:

—Kaesemana seis matkoiyan nabichliajwas. Japamatkoiyan wut, xamal fulaeyaxaelam ampaleidin. ¡Nabej fulae! napatamatkoi wut Jesús boejthutliajwa xamal! —aech judios naewajnapa tataeflan.

¹⁵ Do jawut, Jesús jum-aech judios naewajnapa tataeflanliajwa, asew jiwliajwabej:

—¡Xamal naekichachajbapijwam! Chaemilam wut, me-ama pachaemam wut, pakabuam-am. Xamalbej najut nabistam napatamatkoitat. Xamal najut sitae-emil napatamatkoi. Nijan woei joltam buflaelijwam japon woei min felijawa. Woei-el wut, nijan bur joltam napatamatkoitat buflaelijwam, japon bur min felijawa.

¹⁶ Ampow, Abraham pamow, kaes pejme pachaem. Me-ama choefan, jachi-el. Dep ketispxotat dieciocho waechan japow bu'xaenk. Samata, napatamatkoitat japow boejthutx —aech Jesús judios naewajnapa tataeflanliajwa, asew jiwliajwabej.

¹⁷ Jesús japox jum-aech wut, Jesús padaelmajiw padala. Samata, asbuam jumch boejlach chalaki, padala xoti Jesúsliajwa. Asew judioslax nejchachaemil, jumtaen wuti Jesús jum-aechproxliajwa, taen wutbejpi koechax, Jesús ispxox.

Mostazafut pejwajan

(Mt 13.31-32; Mr 4.30-32)

¹⁸ Jesús jum-aech: "Jumchiyaxaelen wajan xamal chiekal matabijaliajwam, achax kabuanchiyaxael, Dios puexa pejiw tato'laxael wut.

¹⁹ Dios puexa pejiw tato'laxaelpox, me-ama mostazafut, ja-aechox. Kaen aton mutht japafut pejlul. Kamta wenaboeltas. Chiekal weti'tasbejpon. Ti't wut, naelido'. Samata, japadalantat mia is pejfenan tabu-owaliajwa" —aech Jesús. (Jasoxtat japi jiw naexasit Dios tato'alpox majt kaesapich. Kaesapich matkoiyan wut, kaes pejme xabichaxael jiw.)

Levadura pejwajan

(Mt 13.33)

²⁰ Do pejme Jesús jum-aech: "¿Masoxkat wajan chiekal pachaem xamal naewajnalijwan, matabijaliajwambej Dios tato'alpox puexa pejiw?

²¹ Dios puexa pejiw tato'laxaelpox me-ama levadura pan isas wut, jachiyaxael japox. Kaew pawis pan is wut, taniala tres taso trigobelan, levadura sapich. Do jawux, chatfuk posapa puthlaliajwa lewaduratat kaes pinasapaliajwa" —aech Jesús. (Jachiyaxaelbej, asamatkoi Dios puexa pejiw tato'laxael wut. Pothata jiw xabich xajwaxael.)

Asew jiwliajwa xabich tampoelpox, japi naexasisliajwa Dios
(Mt 7.13-14, 21-23)

²² Jesús Jerusalén paklowax poxade wut, asapaklowaxanxot, tuajnuchanxotbej, jiw naewuajnafalon.

²³ Do jawut, kaen aton wuajnachaehtas wut, jumtispon:

—Tajpaklon, ¿diachwuajnakolaxkat Dios kaesupich jiw bu'weyaxael? —tispon.

Jesús jumnot wut, jum-aechon:

²⁴ —Diosxotse pasliajwa, me-ama cha-aelaxach laleyax, ja-aechox. Xabich jiw nejxasink pajut pasliajwa. Pe jiw pajut pijaxtat pasaxil.

²⁵ Bapijin ba faka't wut, xamal namaeyaxaelam tathoetat. Lam wut, jumchiyaxaelam: 'Tajpaklon, ¡ba fafa'e xanal leliajwan!' —chiyaxaelam bapijin. Pe japon jumno'an wut, jumchiyaxaenon xamalliajwa: 'Xan matabijs-enil xamal. ¿Amxotpijwamkat xamal?' —chiyaxaen bapijin.

²⁶ Xamal jumchiyaxaelam: 'Xanallape, xam supich, kaeyaxtat naxaelaxpin, afxpinbej. Tajpaklowaxxot xam naewuajnamponam' —chiyaxaelam.

²⁷ Bapijin pejme xamal jumnosaxaen: 'Xamal matabijs-enil. Matabijs-enilbej amxotpijwam. Xamal babejchowam. ¡Chijiamde!' —chiyaxaelon.

²⁸ Xamal atwaj taeyaxaelam Abraham, Isaac, Jacob supich, puexa asew profetasbej. Japi Diosxotse amwutjel duil. Pe xamal pelsaxaekon infierno poxadik. Jaxotdik xamal xabich noeyaxaelam. Bu'a'tatisaxaelambej, xabich nabijasaxaelam xot.

²⁹ Xabich jiw, potuajnuhanpijiw, pasaxael Diosxotse. Japi jiw chalakaxael Diosxot. Naxaeyaxaelbejpi.

³⁰ Jiw amwutjel kaes paklochowpi, japi Diosxotse paklochowaxil. Asew amwutjel paklochowaxil, japi kaes paklochowaxael Diosxotse —aech Jesús aton, wuajnachaehtasponliajwa.

Jesús xabich nejxaejwaspox Jerusalén paklowaxpijiwliajwa
(Mt 23.37-39)

³¹ Jesús buxtoet wut wuajnachaehtasponliajwa, jawut kaesupich jaxot fariseos pat, Jesúsxot. Do jawut, fariseos jum-aech Jesúsliajwa:

—¡Ma amxot xam asalel chijiamde, rey Herodes fulaeyaxaen xot xam boesaliajwa! —aech fariseos Jesúsliajwa.

³² Jesús jumnot wut, jum-aechon:

—¡Xamal xabua'de Herodes poxade! Japon aton, me-ama lam wut, ja-aechon, jiw tabejsan xot. ¡Chapaempon xan isfulaxpoxan, nanaamtax wut! ¡jum-amopon, chapaeyam wut: 'Jesús jum-aech: "Amwutjel, kandiawabej, to'axaelen dep nakolaliajwa, jiw pejmatpuatanxot webaespi. Bu'xaenkpijbej boejthusaxaelen. Asakandiawa wut, toesaxaelen tajbichax' —aech Jesús' —amo Herodes!

³³ Amwut fulaeyaxaelen Jerusalén paklowax poxade. Jasoxtat pasaxaelen Jerusalén paklowax, jaxotde naboesaliajwapi, Dios pejprofetas jibaes xot Jerusalén paklowaxxot —aech Jesús fariseosliajwa.

³⁴ Jesús xabich nejxaejwas, nejchaxoel wut Jerusalén paklowaxpijiwliajwa. Samata, jum-aechon: "Xamal Jerusalén paklowaxpijwam, Dios pejprofetas pabam. Asew profetasbej ia'tat dadapam, Dios buxto'aspi xamal naewuajnalijwa. Me-ama kawaema paxi tameja pejba'buxfaltat, xan jachisian xamal bu'welijwan. Pe xamal xan nanejwesla.

³⁵ ¡Chiekal najumtaem! Nejpaklowaxxotaxil Dios. Kaes kajachawaesfulaxilbejpon xamal. Piach nataeyaximil. Xan pejme patx wut, jawut xamal jumchiyaxaelam xanliajwa: 'Dios nej kajachawaes fulaenpon Dios pijaxtat' —chiyaxaelam, pejme nataeyaxaelam wut' —aech Jesús, nejxaejwas wut Jerusalén paklowaxpijiwliajwa.

14

Jesús boejthutpox xabich bu'puthalpon

¹ Napatamatkoi wut, Jesús fulaech xaeliajwa kaen fariseospaklon pejba poxade. Jaxotdebej asew fariseos, japi Jesús padaelmajiw. Japi tataeful Jesús taeliajwapi, Jesús is wut babijax.

² Do jaxotde wut, kaen aton, pobu'ta xabich bu'puthalpon, japon nuk Jesús pejwuajnalel.

³ Do jawut, Jesús wuajnachaehtat judios chanaekabuanaapi, fariseosbej. Jum-aechon:

—¿Naktapaeikat bu'xaeyan boejthusliajwas napatamatkoiat? O, ¿ja-elkat? —aech Jesús japijliajwa.

⁴ Japi jumnos-el. Do jawut, Jesús bu'xaeyan muaxfit wut, Jesús chiekal boejthut bu'xaeyan. Do jawut, Jesús to'a japon nawiasliajwa pejba poxade.

⁵ Do jawut, Jesús jum-aech fariseosliajwa:

—Naxulan jop wut muthadik napatamatkoitat, o, nijan woei jop wutbej napatamatkoitat, xamal jusaxaelampon. ¿Diachwajnakolaxkat japox? —aech Jesús.

⁶ Japi wejisal jumnosliajwapi Jesús. Asbuan jumch boejlach chalaki.

Jesús naewuajanpox fariseos chalakasamata tua-ekaxan, kaes pachaempoxantat

⁷ Fariseospaklon pejbatat wut, Jesús taen, asew fariseos chalak wut tua-ekaxan, kaes paklochowpiliajwapi chalak wuti. Jesús japox taen wut, jum-aechon japi fariseosliajwa japoxan kofaliajwapi. Jesús naewuajan wut, jum-aechon japiajwa:

⁸ —Kaen aton xamal tadut wut nakjiyafiesta poxade, jaxotde xaeliajwam, inabej chalake' paklochow chalakaxaelpoxantat! Ja-am wut, asew bej pasaxaelbej taduchpi, japi kaes paklochowpi. Japi, me-ama xamal, jachi-eli.

⁹ Ja-aech wut, xamal tadutpon pasaxael xamalxot jumchiliajwa: '¡Ampatua-ekaxanxot xamal nanim, asew chalakaliajwa!' —chiyaxaelon xamalliajwa. Japatua-ekaxanxot xamal nanam wut, nanaxaelam xabich nadalaxtat.

¹⁰ Kaes pachaem xamal chalakaliajwam taxdukatua-ekaxantat, tadut wuti xamal xaeliajwam, fiestamatkoi wut. Do jawut, xamal tadutpon xamalxot pat wut, jumchiyaxaelon: '¡Amxot xamal nanim! ¡Chalakde kaes paklochow chalakpoxantat!' —chiyaxaelon xamalliajwa. Do jawut, xamal chalakaxaelam japatua-ekaxantat. Jaxot chalakam wut, puexa jiw, chalaki mesaxot, japox taeyaxael. Ja-aech wut, xamal kaes sitaeyaxael jiw.

¹¹ Nejmach-aton nejchaxoel wut pajutliajwa, nejchaxoelon ampox: 'Xan kaes pejme pachaeman. Me-ama asew jiw, jachi-enil' —aech wuton pajutliajwa, japon aton Dios jumchiyaxaes: 'Xam kaes pejme pachaema-emil' —chiyaxaelon. Asan atonlax nejchaxoel wut pajutliajwa: 'Xan pejme kaes pachaema-enil. Me-ama asew jiw, jachi-enil' —aech wuton pajutliajwa, asamatkoi japon aton jumchiyaxaes Dios: 'Xam kaes pejme pachaeman' —chiyaxaelon Dios —aech Jesús fariseosliajwa.

¹² Do jawutbej, Jesús jum-aech fariseospaklonliajwa, japon taduchpon Jesús:

—Xam asew jiw tadutam wut xaeliajwapi nejbatat, matnochpijx, o, kaliaxpijx, inabej tadus xam matabijtampikal! ¡Nabej tadusbej nejnachala, nakoew, nejjiwbej, kemaeyabej, mox duilibej nejboxot, asamatkoi japi xam tadusaxael xot xaeliajwam japi pejbatat! Jachiyaxaelam wut, xamal, me-ama xanafokam, xam matxoelatadutpi, japi xam tadutam wut xaeliajwa nejbatat.

¹³ Xam fiesta isam wut, ¡tadu'elax kejila, laelpaxilpibej, nabejkabej, itliaklabej!

¹⁴ Jasox isam wut, xam xabich nejchachaemlaxaelam, japi tadusaxil xot xam xanafonaliajwa tadutamoxliajwa. Jiw, pachaempi Dios pijaxtat, mata-eyamatkoi wut jiw pejme duilaliajwa, jawut Dios xam mosaxael japafiestaliajwa —aech Jesús taduchponliajwa.

Aton pinjiyax fiesta is wut, xabich jiw tadutpox
(Mt 22.1-10)

¹⁵ Kaen aton japixot jumtaen wut Jesús jum-aechpox, japon jum-aech Jesúsliajwa:

—Jiw xabich nejchachaemlaxael, Dios pejfiestaxot xael wuti Diosxotse —aech japon aton Jesúsliajwa.

¹⁶ Do jawut, Jesús wuajantat jumnot wut, jum-aechon:

—Kaen aton pamakjiw keto'a pinjiyax fiesta isliajwa. Do jawux, asan pamakan to'apon xabich jiw tadusliajwa.

¹⁷ Jawut, naxaeyaxan chiekal isax ketoet wut, pamakan pejme to'apon jiw jumchiliajwa: '¡Xabua't, puexa chiekal toetx xotlis!' —chiliajwapon jiw. Do jawut, fulaechon japox jumchiliajwa.

¹⁸ Pe tadutaspixot chinax kaen pas-el. Puexa kaenanula jumxato'a wut, jum-aechi, ma-aech xot fulaeyaxil. Kaen japixot jumxato'a wut, jum-aechon: 'Amwutjel xan sat wuajtax. Samata, xan japoxade fulaeyaxaelan japasat taeliajwan. ¡Nabej nalale' xanliajwa, fulaeyaxinil xot nejfiesta poxade!' —aechon, jumxato'a wut fiestapijinliajwa.

¹⁹ Asanbej jum-aech, jumxato'a wut: 'Xan diez woei wuajtax. Xan japi xapaeyaxaelon. ¡Nabej nalale' xanliajwa, fulaeyaxinil xot nejfiesta poxade!' —aechon, jumxato'a wuton fiestapijinliajwa.

²⁰ Asanbej jum-aech, jumxato'a wut: 'Xan amwutjel nakjiyax. Samata, xan fulaeyaxinil' —aechon, jumxato'a wut fiestapijinliajwa.

²¹ Pamakan to'aspon kaxa nawia'an wut, puexa chapaeipon pejpaklonxot. Do jawut, pejpaklon xabich palala. Jum-aechon pamakanliajwa: '¡Xabua'de bichakal paklowax poxade! ¡Jaxotde paklowaxthialaxanxot wulwekde jiw tadusliajwam kejila, laelpaxilpi, itliakla, nabejkabej! ¡Japi jiw buflaeman amxot xaeliajwapi!' —aech fiestapijin pamakanliajwa.

²² Dolisdo', pamakan japox is. Jawut jum-aechon pejpaklonliajwa: 'Tajpaklon, isxlis nato'ampox. We'pfak jiw xajupaliajwa puexa tua-ekaxan' —aechon pejpaklonliajwa.

²³ Do jawut, paklon pejme jum-aech pamakanliajwa: '¡Xabua'de! ¡Jiw pejme wulwekde nuamantat, lulnuamantatbej! Jiw tadatam wut, jum-bisnikde japi fulaeliajwadin tajba poxadin, tajba chiekal wulukaliajwapi!

²⁴ Diachwajnakolax xan jum-an. Matxoelatatxpi, chinax kaen japixot tajfiesta nakxaeayaxil' —aech fiestapijin —aech Jesús, ampawuajan naewuajan wut.

Jesús to'apox jiw nakfalaesiapi japon, majt japi chiekal nejchaxoelaliajwa (Mt 10.37-38)

²⁵ Jesús xabich jiw fulafos wut, kaxa natachaemdik wut, jum-aechon japi jiwliajwa:

²⁶ "Nejmach-aton fulaen wut xanlel tajnachalanliajwa, japon xan nanejxasinkaxael. Me-ama pax nejxasink wut, penbej, pijowbej, paxibej, pakoewbej, jachiyaxaelon, xan kaes nanejxasink wut japon aton. Me-ama pajut nanejxasink wut, jachiyaxaelbejpon xanliajwa.

²⁷ Nejxasinka-elpi xan tajxatat nabijasliajwa, japi jiw tajnachalwaxil.

²⁸ "Kaen aton xamalxot ba isliajwa wut, xabich athupox, japon majt chiekal nejchaxoelaxael, machiyaxaelon isliajwa japaba. Nejchaxoel wut, jumchiyaxaelon: '¿Xankat tajplatatat xajupaxaelen, ampaba isx wut chiekal toesliajwan?' —chiyaxaelon, nejchaxoel wut.

²⁹ Japon aton majt chiekal nejchaxoela-el wut ba isliajwa, ba isax tuadut wut, pejplata wexajupa-esal wut, japon aton pejba chiekal toesaxil. Ja-aech wut, jiw buwuajanpaeyaxaeson. Xafafolaxaesbejpon jiw, pejba chiekal toes-el xoton.

³⁰ Japi jiw jumchiyaxael: 'Japon aton tuadut ba isliajwa. Pe nakiowa, wexajupa-esal pejew plata pejba chiekal toesliajwa' —chiyaxaeson jiw.

³¹ Rey nabeliajwa wut, asatujnupijiw suapich, japon rey majt chiekal nejchaxoelaxael, machiyaxaelon. Nejchaxoel wut, jumchiyaxaelon: 'Xan tajsoldaw asbuun jumch diez mil. Tadaelman veinte mil soldaw. ¿Xankat, tajsoldaw suapich, malechaxaelen nachakifulaeyaxaenpi?' —chiyaxael rey, nejchaxoel wut.

³² Dolisdo', rey chiekal matabijt wut, jumchiyaxaelon: 'Xan malechaxinil tadaelman' —chiyaxael rey, nejchaxoel wut. Ja-aech wut, rey jumxato'axael wuajan xananuampitat, japox wuajan wechaemsliajwas, padaelman atuaj wutfuk.

³³ ¡Xamalbej majt chiekal nejchaxoelde, tajnachalwasiam wut! Nejew puexa waela-emil wut, ja-aech wut, tajnachalwaximil" —aech Jesús nakfalaesiaspiliajwa.

Jesús pejnachala ampathatat, me-ama dom pachaempox wut, ja-aechi (Mt 5.13; Mr 9.50)

³⁴ Do pejme Jesús jum-aech pejnachalaliajwa, xabich asew jiwliajwabej: "Dom xakuenk wut, pachaem. Dom xakuenka-el wut, chaemil. Pejmeliajwa pachaemaxil.

³⁵ Abonoliajwabej chaemil. Ja-aech wut, asbuun jumch pachaem thokchaliajwa. Xamal Dios pejnechaxoelax matabijasiam wut, ¡chiekal naewe'e xan jum-anpoxan!" —aech Jesús.

15

Ovejas tataefalpon faenpox pijan oveja, wenafo'aspon (Mt 18.10-14)

¹ Impuesto mat-omwuljoew gobiernoliajwa, asew jiw, babijaxan ispibej, japi pat Jesúsxot jumtaeliajwa Jesús naewuajanpox.

² Fariseos, judíos chanaekabuwanapibej, japi taen, asew jiw pat wut Jesúsxot. Jawut japi jum-aech babejjamechan Jesúsliajwa. Nakaewa najum-aechi:

—Jesús bu'kula jiw babejchow. Japi suapich, xaelbejpon —aechi Jesúsliajwa.

³ Samata, Jesús japox jumtaen wut, jum-aechon ampawuajan fariseosliajwa, judíos chanaekabuwanapiliajwabej:

⁴ "Xamalxot kaen aton cien ovejas wut, kaen oveja wenafo'as wuton, asew noventa y nueve ovejas waelaxaelon jalwekaliajwa wenafo'aspon.

⁵ Do faen wuton oveja, wenafo'aspon, xabich nejchachaemlaxaelon. Taka-osfulaxaenon oveja wenafo'aspon.

⁶ Dolison, ba pat wut, laeyaxaelon pejnachala, mox duilibej, chapaeliajwa wenafo'asponliajwa. Jawut jumchiyaxaelon: '¡Nejchachaemilde, xan suapich, xan pejme faenx xot tajan oveja, nawenafo'apon!' —chiyaxaelon pejnachalaliajwa.

⁷ Diachwajnakolax xan jum-an. Jachiyaxaelbej, Dios pej-ángeles nejchachaemil wuti Diosxotse, kaen aton koft wut babijaxan ispoxan ampathatat, japon naexasisfulaliajwa Dios. Dios pej-ángeles kaes pejme nejchachaemlaxael japon atonliajwa. Me-ama noventa y nueve jiw, pachaempiliajwa, Dios pej-ángeles nejchachaemil wut, jachiyaxili, japon atonliajwa" —aech Jesús fariseosliajwa, judíos chanaekabuwanapiliajwabej.

Pawis faenpox pejkafef, japox pejwuajan

⁸ Jesús naewuajan asawuajan fariseosliajwa, judíos chanaekabuanapiliajwabej. Jum-aechon: “Pawis diez kafefachan wut, kaekafef wenafo'as wutow, japow tamdusaxael lámpara japa-itliakaxtat batu athoesliajwa chiekal jalwekaliajwa pejkafe.

⁹ Dolisow, faen wut, laeyaxaelow pejnachala, mox duilibej, chapaeliajwa. Do jawut, jumchiyaxaelow: ‘¡Nejchachaemilde, xan suapich, pejme faenx xot tajkafe, nawenafo'a wut!’ —chiyaxaelow.

¹⁰ Diachwujnakolax xan jum-an. Jachiyaxaellap-is Dios pej-ángeles, nejchachaemil wut, kaen aton koft wut babijaxan ispoxan japon naexasisfulaliajwa Dios” —aech Jesús fariseosliajwa, judíos chanaekabuanapiliajwabej.

Pax beltaenpox paxulan, japox pejuwanan

¹¹ Jesús naewuajan asawuajan, fariseosliajwa, judíos chanaekabuanapiliajwabej. Jum-aechon: “Kaen aton kolenje paxulan.

¹² Wuchakalpijin jum-aech paxliajwa: ‘Ax, jamalis xan nachaxdu'e tejwaxaelpi!’ —aech wuchakalpijin. Do jawut, pax diajan wuchakalpijin pejewpi.

¹³ Jawux, kaematkoj suapich wut, wuchakalpijin puexa pejew mowa. Japaplata xafolon, chijia wut atuaj, asatuajnale. Jaxotde babijaxan isfuldepon. Jasoxtat puexa pejew, plata, chiekal xatoeton.

¹⁴ Puexa pejew plata chiekal xatoet wut, japamatkoijan piach naxaeyaxan ajil japatuajnxot, xabich piach iam thilna-el xot. Samata, japon litaxaelafal.

¹⁵ Do jawut, fulaechon japatuajnpijin bichax wuljoeliajwa. Bichax faen wut, paklon to'ason maran tataeflax, chaxajjalspi.

¹⁶ Do jawut, japon aton maran xaelpoxan, japonbej xaesia, xabich litaxaela xoton. Pe chinax chaxdus-esal japon xaeliajwa maran xaelpoxan.

¹⁷ Do jawut, japon pajut chiekal nejchaxoel wut, jum-aechon: ‘Pomatkoicha taj-ax pejbaxot xabich naxaeyaxan pamakjiw chaxduiliajwa. Taj-axxot naxaeyaxan nama. Xanlax amxot tajlit tuxaxaelen’ —aechon, nejchaxoel wut.

¹⁸ Do jawut, japon nejchaxoel wut, jum-aechon: ‘Xan nawoesa nawiasaxaelen taj-ax poxade. Patx wut taj-axxot, xan jumchiyaxaelen: “Ax, xan xabich babijaxan isx Diosliajwa, xamliajwabej.

¹⁹ Xan babejnan. Samata, xan tadala kaes naxulan napaeliajwam. Me-ama namakan tato'lam wut, jja-amde xanliajwa!’ —chiyaxaelen, taj-axxot patx wut’ —aechon, nejchaxoel wut.

²⁰ Dolison, japox nejchaxoel wut, chijjalison pax poxade nawiasliajwa.

“Do baxael, atuaxach fulaen wutlejen, pax taenson. Jawut pax xabich beltaen paxulan. Do jawut, najae'eron paxulan bu'kakunaliajwa. Jawut wujaelton paxulan. Wujaelt wut, xusuwpon paxulan.

²¹ Jawut paxulan jum-aech paxliajwa: ‘Ax, xan xabich babijaxan isx Diosliajwa, xamliajwabej. Xan babejnan. Tadala kaes naxulan napaeliajwam’ —aech paxulan paxliajwa.

²² Pe jawut, pax jum-aech, pamakjiw to'a wut: ‘¡Xabu'a'de! ¡Wuljae'e naxoelax kaes chamoe yaxpox! ¡Xajoembejpon! ¡Anillo kothiyaxajoeldebejpon! ¡Tuakxajoeldebejpon tuakxajoelax!

²³ Do jawux, ¡buflaeman pak jelti'san, kaes dalpon! ¡japon xua'alde! Amwut fiesta isaxaes xaeliajwa.

²⁴ Taxulanliajwa nejchaxoelx wut, jum-an: “Diachwujnakolax taxulan asatuajnutat bej nawetupbej” —an, nejchaxoelx wut. Pe laejapon. Nejchaxoelxbej: “Bej nafo'abejpon” —an, nejchaxoelx wut. Pe nawepaton’ —aech pax pamakjiwliajwa. Do jawux, fiesta isax taadutlisi.

²⁵ “Pakoewan pat wut pax pejbatat, matxoelapijin lultat nabistpon. Pej bichax kekoft wut, ba mox itwefulaen wut, thiataenpon jajuuyax. Thiataenbejpon nababoelax.

²⁶ Jawut matxoelapijin lapon pamakan. Wuajnachaemt wut, jum-aechon: ‘¿Ma-aech xotkat amwutjel fiesta isam?’ —aechon.

²⁷ Pamakan jumnot wut, jum-aechon: ‘Nakoewan pat. Samata, nej-ax xanal naketo'a pak jelti'san, kaes dalpon, xua'laliajwan’ —aech pamakan.

²⁸ Matxoelapijin japox jumtaen wut, xabich palalapon. Palala xot, ba le-elon. Samata, pax nakolde. Paxulan leyax to'aliajwa.

²⁹ Matxoelapijin jum-aech paxliajwa: ‘Xabich pin-iawaechan xam tanbistax. Chinax owchila-ela-enil, nato'am wut. Xanlax chinax kaen cabra, jelti'san, nachaxdus-emil, xan fiesta isliajwan, tajnachala suapich.

³⁰ Amwutjel naxulan pat, nejew plata xatoetpon watho'tat, poejiw bu'moejtpitat plata kanaliajwa. Japonliajwalax xam fiesta isam. Japonliajwabej namakjiw keto'am pak jelti'san xua'laliajwa, kaes dalpon’ —aech matxoelapijin paxliajwa.

³¹ “Pax jumnot wut, jum-aechon paxalanliajwa: ‘Wua, xam pomatkoicha xanxotam. Puexa xan tejewpi, japoxan xam nejwaxael.

³² Amwutjel pachaem fiesta isliajwas, puexa nejchachaemlialajwas. Nakoewanliajwa nejchaxoelx wut, jum-an: “Diachwua jnakolax asatajnutat taxulan bej nawetupbej” —an, nejchaxoelx wut. Pe laejapon. Nejchaxoelx wut, jum-anbej: “Bej nafa’obejpon” —an, nejchaxoelx wut. Pe nawepaton amwutjel’ —aech pax matxoelapijinliajwa” —aech Jesús fariseosliajwa, judíos chanaekabuanapilajwabej.

16

Pamakan maliach xatoesfulpox paklon pejew, japox pejwajan

¹ Jesús naewwajan wut pejnachala, asawujantat jum-aechon: “Kaen paklon xabich kemaenk. Japon paklon kaen pamakan, puexa wetataeflaspon. Pe pamakan maliach wexatoesful paklon pejew plata. Do ja-aech wut, asew jiw maliach chapaepi paklonxot, pamakan maliach wexatoesfulpox pejpaklon.

² Samata, paklon pamakan la wut, jum-aechon: ‘Xampil tejew maliach nawexatoesfulam. ¡Xalaeman cuenta lelamfat, pomatkoicha tejew mowam wut, wujtam wutbej xanliajwa! Ma amwut xam kaes puexa tejew nawetataeflaximil’ —aech paklon pamakanliajwa.

³ Do jawut, japon, paklon pamakan, nejchaxoel wut, jum-aechon: ‘¿Xan machiyaxaelenkat amwut? Tajpaklon najusaxael tajbichaxxot. Xan mamnika-enil sat nabichliajwan. Xan tadalabej asew jiw malech plata wujoelajwan.

⁴ ¡Aa, xan matabijtax isaxaelenpox! Japox isx wut, nabich-enil wut tajpaklonliajwa, asew jiw pejbaxot patx wut, chiekal nabu’kulaxaeli’ —aech pamakan, nejchaxoel wut.

⁵ Do jawux, japon kaenanula wallala pejpaklon dewati japi fulaeliawadin. Wullala wut, matxoelapatponliajwa jum-aechon: ‘¿Massuapichkat xam dewatam tajpaklon?’ —aechon matxoelapatponliajwa.

⁶ Matxoelapatpon jum-aech: ‘Xan dewatax nejpaklon ochocientos galones olivosimanan’ —aech matxoelapatpon. Do jawut, jusaxaespon pejpaklon pejbichaxxot, japon jum-aech: ‘Ama pelfat majt xam lelampox jasupich dewatampox. ¡Asafutat lelde dewatampox asbuan jumch cuatrocientos galones olivosimanan!’ —aech jusaxaespon. Jawut dewatpon japox is.

⁷ Do jawux, asan pat wut, jusaxaespon pejpaklon, japon jum-aech patponliajwa: ‘¿Massuapichkat xam dewatam tajpaklon?’ —aech jusaxaespon. Dewatpon jumnot wut, jum-aechon: ‘Xan dewatax nejpaklon cien trigobulan’ —aech dewatpon. Jusaxaespon pejpaklon jum-aech: ‘Ama pelfat majt xam lelampox jasupich dewatampox. ¡Asafutat lelde dewatampox asbuan jumch ochenta trigobulan!’ —aech jusaxaespon pejpaklon. Do jawut, dewatpon japox is. Jasox isful pejpaklon jusaxaespon asew jiwliajwabej, dewatpiliawaja japon pejpaklon.

⁸ Do japox isax ketoet wut, jusaxaespon pejpaklon xalaechon japi pel-uaf pejpaklon chaxdusliajwa. Do jawut, paklon matabij wut japox ispoxlajwa, jum-aechon pamakanliajwa, chijiyaxaelponliajwa: ‘Xam babijax isam xanliajwa, xabich matabijtam xot. Japox isam asamatkoi xamliajwa pachaemalajwa’ —aech paklon pamakan chijiyaxaelponliajwa. Dios naexasis-eli, kaes pejme matabija wuajslajwa, mowalajwabej. Me-ama Dios naexasiti, jachi-eli” —aech Jesús pejnachalalajwa.

⁹ Do pejme Jesús jum-aech pejnachalalajwa: “Diachwua jnakolax xan jum-an. ¡Nejplatatat, nejewtatbej, asew jiw kajachawae’e ampathatat, japi nabist wut Dios pejbichaxan! Japoxan xatoetam wut, asamatkoi, xamal tupam wutbej, Diosxotse xamal chiekal bu’kulaxaeli” —aech Jesús pejnachalalajwa.

¹⁰ Do pejme Jesús jum-aech pejnachalalajwa: “Aton asan pejew chiekal tataeflaful wut, kaeyaxachpoxan, chinax maliach xatoes-el wuton, japon aton xajup asan pejew chiekal tataeflajajwa, xabich wutbej. Asan chiekal tataefla-el wut asan pejew, kaeyaxachpoxan, japon xajupaxilbej asan pejew chiekal tataeflajajwa, xabich wut asan pejew.

¹¹ Xamal xajupa-emil wut chiekal tataeflajajwam asan pejew plata, ja-am wut, Dios to’axil xamal tataeflajajwam xabich kaes ommaenkpi, Dios pijaxan.

¹² Xamal xajupa-emil wut chiekal tataeflajajwam asan pejew, ja-am wut, chinax kaen aton xam chaxdusaxil nejewkolalajwa” —aech Jesús pejnachalalajwa.

¹³ Do pejme Jesús jum-aech pejnachalalajwa: “Pamakan, kolenje wut paklon, japiliawaja chiekal najupatanbichaxilon. Kaen paklonliajwa chiekal tanbichaxaelon. Asan paklonliajwa chiekal nabichaxilon. Ja-aechlap-is Dios nejxasinkpi. Japi nejchaxoel wut platak, chiekal nabichaxili Diosliajwa” —aech Jesús, naewwajan wut pejnachala.

¹⁴ Fariseos, japi xabich nejxasink plata, japi jumtaen Jesús, jum-aech wut pejnachalalajwa. Samata, japi bu’wujjanpaepi Jesús.

¹⁵ Do jawut, Jesús jum-aech fariseosliajwa: “Jiw jum-aech wat xamalliajwa: ‘Fariseos xabich pachaem’ —aech wuti, xamal xabich nejxasinkam japoxliajwa. Pelax Dios chiekal matabijt, xamal nejnejchaxoelaxan chiekal pachaema-elpox. Jiwliajwa pachaempox, japoxlax Diosliajwa chaemil’ —aech Jesús fariseosliajwa.

Amxot jum-aechpox Moisés chajia lelpoxliajwa, Dios puexa pejiw tato'laxaelpoxliajwabej

¹⁶ Jesús pejme jum-aech fariseosliajwa: “Juan, jiw bautisan, pas-el wutfuk, jiw naewuajnas Moisés chajia lelpox, japox jiw naexasisfulaliajwa. Japi jiw naewuajnasbej profetas chajia lelpox. Do jawux, Juan, jiw bautisan, pat wut, japon naewuajan chimiawuajan. Xan patx wutbej, naewuajnax chimiawuajan, Dios puexa pejiw tato'laxaelpoxliajwa. Samata, amwutjel puexa jiw xabich pasasia Diosxotse” —aech Jesús fariseosliajwa.

¹⁷ Jesús pejme jum-aech fariseosliajwa: “Ampathat, thatbaxobej, japoxan xabich tam-poel toepaliajwa. Pe kaes pejme xabich tam-poel toepaliajwa Moisés chajia lelpox, Dios pejjamechan xot. Puexa Moisés chajia lelpox, diachwuajnakolax puexa japoxan jachiyaxael” —aech Jesús fariseosliajwa.

Jesús naewuajanpox pejiw pelsamata pejwatho'
(Mt 19.1-12; Mr 10.1-12)

¹⁸ Jesús pejme jum-aech fariseosliajwa: “Aton pijow fo'a wut, fit wuton asaow, japon aton babijax is Diosliajwa, bu'moejt xot asaow pawis, pijwa-elpow. Dios nejchaxoelaful japon aton matxoelaftipowliajwa, japon aton nakiowa pijowfuk. Kaen aton, fo'aspow fit wut, japon aton babijax is Diosliajwa, japowfuk nakiowa pamal xot Diosliajwa” —aech Jesús fariseosliajwa.

Jesús naksiyapox kemaeyanliajwa, Lázaroliajwabej

¹⁹ Jesús naewuajan wut, ampawuajan jum-aechon fariseosliajwa: “Kaen aton xabich kemaenk. Pomatkoicha naxoeipon chimia. Pomatkoichabej fiesta ispon pejbatat. Kemaeyan chimianaxaeyaxan pejiw bu'xael.

²⁰ Jaxotbej kejilan, nabijatpon. Japon pawul Lázaro. Japon pobu'ta xabich sa'las. Pomatkoicha satat ekon kemaeyan pejbafafaxot.

²¹ Lázaro xaesia natacholampi kemaeyan pejmexaxot. Pomatkoicha wur fulalaena Lázaro bu'daeliajwas sa'la-itfahan.

²² Do asamatkoi wut, Lázaro tup. Japon Dios pej-ángeles bu'fos patupa papatxotse, Abrahamxotaliajwabejpon. Do jawux, asamatkoi, kemaeyan tupbej. Japon muthatas.

²³ “Kemaeyan tup wut, patupa papatxotbej japon pat, kastikaxaes xoton. Jaxotdik kemaeyan xabich nabijat. Kemaeyan natachaemse wut, taenpon atuaj Abraham. Taenbejpon Lázaro, Abraham suapich, wut.

²⁴ Samata, kemaeyan pinjametat jum-aech Abrahamliajwa: ‘Am Abraham, jxan nabeltaem, xabich nabijatax xot jitat! ¡Lázaro to'im min kothiyaxathosliajwa, xanle fulaelialwasik, nakaech-ia'thusliajwa!’ —aech kemaeyan.

²⁵ Abraham jumnot wut, jum-aechon: ‘Tamon, jxam chiekal nejchaxoelde! Xam laejam wut thatat, xabich nejmach nejew. Lázarolax laeja wut thatat, japon xabich nabijat, kejlil wut. Pe amwutjel, japon xabich pachaem amxot. Xamlax amwutjel nabijatam.

²⁶ Lázaro fulaeyaxil xam poxadik, chuut xabich athu xot, matnoch nukjik xotox. Samata, xambej ampalel julaximil’ —aech Abraham kemaeyanliajwa.

²⁷⁻²⁸ “Do jawut, kemaeyan jum-aech: ‘Am Abraham, xam jum-an. ¡To'im Lázaro taj-ax pejba poxadik japon naewuajnalialjwa cinco takoew! Ja-aech wut, japibej ampalelsik fulaeyaxil nabijasliajwa’ —aech kemaeyan.

²⁹ Jawutbej Abraham jum-aech: ‘¡Japi nej naexasis Moisés chajia lelpox, puexa profetas chajia lelpoxanbej!’ —aech Abraham kemaeyanliajwa.

³⁰ Kemaeyan jumnot wut, jum-aechon: ‘Am Abraham, japi naexasisaxil japoxan. Pe patupan, mat-echpon, pejme duk wut, japon natulaelt wut japixot, ja-aech wut, japi babijaxan ispoخان kofaxael. Do jawut, japi Dioskal naexasisaxael’ —aech kemaeyan Abrahamliajwa.

³¹ Do pejme Abraham jum-aech: ‘Japi naexasis-el wut Moisés chajia lelpox, puexa profetas chajia lelpoxanbej, japibej naexasisaxil patupan, mat-echpon, natulaelt wut japi naewuajnalialjwas’ —aech Abraham kemaeyanliajwa” —aech Jesús fariseosliajwa.

17

Jesús naewuajanpox jiw babijaxan isasamata
(Mt 18.6-9, 21-22; Mr 9.42-48)

¹ Jesús jum-aech pejnachalalajwa: “Asan aton pijaxtat asew jiw babijaxan is wut, japon aton xabich kastikaxaes Dios.

² Jiw babijaxan isasamata japon aton pijaxtat, kaes pejme pachaemaxael japon aton pinjit ia't, jajaerat, kaechariamake'sliajwas, chafo'aliajwas mar poxadik, xabich so'nik poxadik. Ja-aech wut, asew jiw babijaxan isaxil japon aton pijaxtat, jelxan nanaexasiti.

³ Samata, ichiekal taem xamal nijaxtat asew jiw babijaxan isasamata!

“Nejmach-aton, Dios pejjamechan naexasitpon, is wut babijax xamalliajwa, ijapon aton xamal fia'e kofsliajwapon babijax ispox! Dolison, japox babijax isax koft wut, ijapon aton beltaem!

⁴ Japon aton pomatkoicha babijax isful wut xamalliajwa, asamatkoi jum-aech wuton xamalliajwa: ‘Xan pejme isaxinil babijax xamalliajwa’ —aech wuton, ijapon aton xamal beltaem!” —aech Jesús pejnachalalajwa.

Jesús pejnachala, japi kaes Dios xanaboejasiapox

⁵ Apóstoles jum-aech Jesúsliajwa:

—¡Xanal nakajachawae'e kaes Dios xanaboejalijwan! —aechi.

⁶ Jesús jumnot wut, jum-aechon apóstolesliajwa:

—Xamal cha-aex xanaboejam wut Dios, jum-am wut: ‘Diachwajnakolax Dios xajup puexa isliajwa’ —am wut, nejchaxoelam wut, xamalbej xajupaxaelam isliajwam xabich Dios pijaxtat. Nejxanaboejxan xabicha-el wut Diosliajwa, me-ama mostazafut chaelfut, ja-aech wut, xamal jum-am wut ampanaeliajwa: ‘¡Dios ampanae nej tathinchakusas pukatutat nukaliajwa!’ —am wut, diachwajnakolax japanae, jachiyaxael —aech Jesús apóstolesliajwa.

Nabichan isfulaxaelpox tato'laspox

⁷ Do pejme Jesús jum-aech apóstolesliajwa: “Xamalxot kaen nabichan wut, japon to'axaelam nabichliajwa. Lulbichax kekoft wut, o, pak tataeflax koft wuton, xamal jumchiyaximil: ‘¡Lemen! ¡Ekde tajmesaxot, xanal swapich xaeliajwam!’ —chiyaximil.

⁸ Jumchiyaxaelam: ‘¡Naxaeyax isde xanal xaeliajwan! Xaelx wut, wuajnwesaxaelam, xanal asax nawewe'p wut kamta nawe-isliajwam. Kaechatoelx wut, xamwich xaeyaxaelam’ —chiyaxaelam nabichanliajwa.

⁹ Xamal graciaschiyaximil namakanliajwa, japon chiekal is wut to'ampoxliajwa. Japon japox chiekal isaxael, nabichan xot.

¹⁰ ¡Xamallap-is jachiyaxaelam! ¡Isfulde Dios tato'alpoxan! Isax toetam wut, ¡nakaewa najum-amde: ‘Xatis nabichwas wajpaklonliajwa. Samata, chiekal isaxaes wajpaklon naktato'alpoxan’ —chiyaxaelam nakaewaliajwa! ¡Nakaewa najumchiyaximil: ‘Asan aton bej nakjumchiyaxaelbej: ‘Xamal gracias-an, chiekal nabistam xot Diosliajwa’ —bej nakchiyaxaelbejpon’ —nabej aeche’ najutliajwa!’ —aech Jesús apóstolesliajwa.

Jesús boejthapox diez poejiw, leprawaxae waeispi

¹¹ Jesús Jerusalén paklowax poxade wut, Galilea tuajnulel babu'akal folon, Samaria tuajnulel.

¹² Do jawut, Jesús paklowaxach pasliajwa wut, jaxot diez poejiw fulaen bu'kakulnaliajwapi Jesús. Japi puexa bu'xaenk leprawaxaetat. Japi mox pasaxil Jesúsxot. Samata, atuaxach nuili.

¹³ Japi nejlat wut, jum-aechi:

—Jesús, jiw chanaekabuanan, ¡xanal nabeltaem! —aechi.

¹⁴ Do jawut, Jesús japi taen wut, jum-aechon:

—¡Xabua'de sacerdotes poxade japi taeliajwa xamal leprawaxae boejthulpox! —aech Jesús.

Do jawut, japi fulaech wut sacerdotes poxade, fulaeyaxtat chalechkal japi puexa chiekal boejthuls leprawaxae. Do jawut, chiekal pachaemlisi.

¹⁵ Kaen japixot taen wut pejbu't chiekal wepachaemspox, jawut tamach kaxadinpon Jesús poxadin. Dolison Jesúslel fulaen wut, pinjametat jum-aechfaldinpon Diosliajwa: “Dios, xam diachwajnakolax xabich pachaemam” —aechfaldinpon.

¹⁶ Dolison pat wut Jesúsxot, brixtat nuk wut Jesús pejwuajnalel, sat makxabijindikon graciaschiliajwa. Japon aton, Samaria tuajnujijin.

¹⁷ Do jawut, Jesús jum-aech asew jiwliajwa:

—¿Boejthulspikat, bej diezbejji? ¿Amxotkat asew nueve?

¹⁸ Ampon aton asatuajnujijin. Tamach kaxadinpon Dios jumchiliajwa: ‘Dios, xam diachwajnakolax xabich pachaemam’ —chiliajwa —aech Jesús jaxot nuilpiliajwa.

¹⁹ Do jawut, Jesús jum-aech boejthulspionliajwa:

—¡Nande! ¡Xabua'de nejmach! Xam chiekal boejthullis, chiekal naxanaboejtam xot —aech Jesús.

*Dios puexa pejjiw tato'lax tuadut wut, taeyaxisalpox
(Mt 24.23-28, 36-41)*

²⁰ Asamatkoi fariseos wuajnaemnt wut, jum-aechi Jesúsliajwa:

—¿Maswutkat tuadusaxael Dios puexa pejjiw tato'laxaelpox? —aechi.

Do jawut, Jesús jum-aech fariseosliajwa:

—Dios tuadut wut puexa pejjiw tato'alpox, japox xamal taeyaximil.

²¹ Samata, jiw jumchiyaxil: 'Ma amxot Dios puexa pejjiw tato'al' —chiyaxil. Jumchiyaxilbejpi: 'Ma jaxotde Dios puexa pejjiw tato'al' —chiyaxil jiw. Dios puexa pejjiw tato'alpox ma xamalxot tuadutlisox. Pe japox tae-emil —aech Jesús fariseosliajwa.

²² Do jawut, Jesús jum-aech pejnachalaliajwa:

—Xan, puexa jiw pakoewkolnan, asamatkoi puexa jiw tato'laxaelen ampathatat. Xamal xabich nejxasinkaxaelam xan nataeliajwam, xan puexa jiw tato'lax wut. Pe nataeyaximil, nawepas-el xotfuk tajmatkoi jiw tato'laliajwan.

²³ Asew jiw xamal kichachajbaxael. Jumchiyaxaeli: '¡Ma amxot Cristo!' —chiyaxaeli. El wut, asew jiw xamal jumchiyaxael: '¡Ma jaxotde Cristo!' —chiyaxaeli. Jaso x jum-aech wuti, jxamal nabej naexaxis! ¡Nabej fulae'ebej japoxade!

²⁴ Chamx nakliafcha wut, potuajnucha puexa jiw kaewutje taena. Xanlap-is jachiyaxaelen asamatkoi, xan, puexa jiw pakoewkolnan, pejme paskax wut. Kamta kaewutje puexa jiw nataenaxael.

²⁵ Pe matxoela xan xabich nabijasaxaelen. Ampathatpijw, amwutjel laelpi, japi xan nanejweslaxael.

²⁶⁻²⁷ Noé laeja wut ampathatat, xabich jiw nejmamach. Samata, xaeli. Afbejpi. Nakjiyabejpi. Japamatkoiyan, ja-aech wut, Noé pinjiyax barkam low wut, chalechkal xabich iam thilnax tuadut. Do jawut, sat bu'al. Puexa jiw chiekal tup. Jachiyaxaelbej asamatkoi, xan, puexa jiw pakoewkolnan, pasaxoekan wut. Jiw pomatkoicha nejmach duilafulaxael.

²⁸ Ja-aechlap-is Lot chajia laeja wut. Jiw xael. Afbejpi. Wuajtbejpi. Mowabejpi. Muthabejpi naxaeyaxan. Bachan iabejpi. Japi jiw pomatkoicha chiekal nejmach duilaful.

²⁹ Ja-aech wut, japamatkoiyan, Lot nakolt wut Sodoma paklowaxxot, chalechkal athulelsik natacholan azufre, me-ama ia'an. Pe japi jitan tamdadutpi. Japoxan ja-aech wut, puexa Sodoma paklowaxpijw chiekal toejwas.

³⁰ Jachiyaxaelbej xan, puexa jiw pakoewkolnan, pejme chalechkal pasaxoekan wut. Jasoxtat jiw nejmach duilafulaxael.

³¹ "Japamatkoitat jiw nejchaxoelaxil pejew. Xan chalechkal paskax wut, jiw, pejbachan-matwuajtat nuili, baloek wut, nejchaxoelaxili pejbachan leliajwa pejew jukaliajwa. Japamatkoiyantat asew jiwbej, pejlulanxot nabisti, do jawut, jaxot kamta japi dukpaxael. Kaxa naweyaxildini pejbachan poxadin pejew wuljaesliajwa.

³² ¡Nejchaxoelde Lot pijow wejatispoxliajwa! (Naexaxis-el wutow Dios jum-aechpox, japow domt nadofa.)

³³ Jiw isful wut pajut nejxasinkpoxan ampathatat, japi asamatkoi tup wut, duilaxili Diosxotse. Jiw tajaxtat kofa wutlax pajut isasiapoxan, japi jiw asamatkoi tup wut, pomatkoicha duilaxaeli Diosxotse.

³⁴ "Diachwuajnakolax xan jum-an. Chalechkal paskax wut, japamadoitat kolenje moejt wut kaecamatat, kaen buflaeyaxaes. Asan waelsaxaes.

³⁵ Koliowje kaeyaxtat xatkiana wut, kaeow buflaeyaxaes. Asaow waelsaxaes.

³⁶ [Kolenje aton kaelultat nabist wut kaeyaxtat, kaen buflaeyaxaes. Asan waelsaxaes."] —aech Jesús, pejnachala naewuajan wut.

³⁷ Jesús pejnachala japox jumtaen wut, jawut wuajnaemnt wut, jum-aechi Jesúsliajwa:

—Tajpaklon, ¿amxotkat japox jachiyaxael? —aechi.

Jesús jumnot wut, jum-aechon pejnachalaliajwa:

—Puexa jiw chiekal matabija ampox. Choefan, tupon, okxot, jaxot thutha pasliajwa piachaxil. Xan pasaxoekan wut, me-ama japox, jachiyaxael —aech Jesús, naewuajan wut pejnachala.

Jesús japox jum-aech wut, japox jumchiliajwa: "Potuajnucha jiw taeyaxael, Cristo fuloek wut, Dios markamatkoi pat wut" —chiliajwa japox.

¹ Dolisdo', Jesús naewuajan pejnachala kofa-elaliajwa Dios kawuajanpox. Do jawut, asawuajantat naewuajanbejpon.

² Jum-aechon: "Paklowaxxot juez duk. Japon juez chinax Dios naexasis-el. Sitae-elbejpon Dios. Sitae-elbejpon jiw.

³ Japapaklowaxxot pawis duk, pamal naetupspow. Asamatkoi japow fulaech juez poxade jumchiliajwa ampox. Do jawut, jum-aechow: "Tadaelman babijax is xanliajwa. Samata, jto'im soldaw japon aton kastikaliajwas!" —aechow juezliajwa.

⁴ Japow pin-iaveces papat juezxot majt jum-aechpox, japox pejme jumchiliajwa. Pe japon juez piach is-el japow jum-aechpoxliajwa. Do baxael, juez nejchaxoel: "Xan diachwujnakolax Dios sitae-enil. Sitae-enilbej jiw.

⁵ Pe japow japoxtat xan nataliasful. Samata, xan isaxaelen japow najum-aechpox kaxa pejme fulae-elaliajwadin xanlel, japoxtat kaes nataliasfula-elaliajwa' —aech juez, nejchaxoel wut" —aech Jesús, naewuajan wut pejnachala.

⁶ Do pejme Jesús jum-aech, naewuajan wut pejnachala: "Japon juez pachaema-el kajachawaesliajwapon japow.

⁷ Dioslax jachiyaxil. Japon isaxael pachaempox kajachawaesfulaliajwapon pejjiw, asew babijaxan is wut japi jiwliajwa.

⁸ Diachwujnakolax xan jum-an. Dios piachaxil kajachawaesliajwa pejjiw, asew jiw babijaxan is wut japijliajwa. Xan, puexa jiw pakoewkolnan, fuloekx wut pejme, ¿faenaxaelenkat jiw xan nawuajnaewesfulpi?" —aech Jesús, naewuajan wut pejnachala.

Fariseo, impuesto mat-omwuljoenbej, japi pejwujajan

⁹ Asew jiw nejchaxoelafal: "Xatis kaes pejme pachaems. Me-ama asew jiw, jachi-esal" —aechfuli pajutliajwa, nejchaxoel wut. Jesús naewuajan wut jum-aechon ampawuajantat japi jiwliajwa. Do jawut, jum-aechon:

¹⁰ "Kolenje fulaech Dios pejtemploba poxade Dios kawuajnalijwa. Kaen fariseo-aton. Asan impuesto mat-omwuljoen Roma gobiernoliajwa.

¹¹ Fariseo-aton nukaxtat Dios kawuajan. Pe japon jum-aechpoxan Diosliajwa pachaemael, jum-aech xoton: 'Dios, xan kaes pejme pachaeman. Me-ama asew jiw, jachi-enil. Samata, xan gracias-an xamliajwa. Asew jiw is pachaema-elpoxan. Asew jiwbej kethaknik. Asew jiwbej bu'moejt asew watho', pijowa-elpi. Me-ama japi jiw, xan jachi-enil. Me-ama amponbej, impuesto mat-omwuljoen gobiernoliajwa, xan jachi-enilbej.

¹² Xanlax koleveces posemana naxae-enil xam piach kawuajnalijwan. Kanxpi nabistax wut, xan diajnax diezmuaxtjeliajwa. Kaemuaxt diajnax xam chaxdusliajwan. Jasox isx pomatkoicha' —aech fariseo-aton, Dios kawuajan wut.

¹³ Impuesto mat-omwuljoen gobiernoliajwa, japon atuaxach tamach nuk jiwxot, Dios kawuajan wut. Jawut natachaems-elbejpon athulelse. Natxaton. Jawut najut namatiafdaka wut, jum-aechon Diosliajwa: 'Dios, xan tajut matabijtax babejnanponan. Samata, jxan nabeltaem!' —aechon, Dios kawuajan wut.

¹⁴ Diachwujnakolax jum-an. Japon, impuesto mat-omwuljoen gobiernoliajwa, japon beltaens Dios babijaxan ispoxanliajwa. Pelax fariseo-aton Dios beltae-esal, japon babijaxan ispoxanliajwa. Nejmach-aton nejchaxoel wut pajutliajwa: 'Xan kaes pejme pachaeman. Me-ama asew jiw, jachi-enil' —aech wuton pajutliajwa, asamatkoi Dios jumchiyaxaeson: 'Xam nejnejchaxoelax pachaema-el' —chiyaxaeson Dios. Asanlax nejchaxoelpon pajutliajwa: 'Xan kaes pejme pachaema-enil. Me-ama asew jiw, jachi-enil' —aech wuton pajutliajwa, japon aton asamatkoi Dios jumchiyaxaeson: 'Xam nejnejchaxoelax pachaem' —chiyaxaeson Dios" —aech Jesús naewetiliajwa.

Pajam yamxi buflaenspox Jesúslel

(Mt 19.13-15; Mr 10.13-16)

¹⁵ Pajam yamxi buflaens Jesúslel, Jesús ke-osliajwa yamxi pejta'anxot. Jesús pejnachala japox taen wut, fiati yamxi buflaeni buflae-elaliajwa Jesúslel. Jawut jum-aechi:

—jXamal nabej buflae' yamxi Jesúslel! —aechi.

¹⁶ Jesús japox jumtaen wut, jawut lapon yamxi buflaenpi buflaeliajwapi japonlel. Jawut jum-aechon pejnachalialiajwa:

—jTapaem yamxi xanlel buflaeliajwas! jNabej fias! Diosxotse duilpi, japi, me-ama ampi yamxi, ja-aech, kamta naexasit xoti Dios pejtato'lax.

¹⁷ Diachwujnakolax xan jum-an. Xamal Dios naexasitam wut, me-ama yamxulan pax naexasit, ja-am wut xamal, Diosxotse pasaxaelam. Naexasis-emil wut, pasaximil Diosxotse —aech Jesús.

Kemaeyan nospaeipox, Jesús suapich

(Mt 19.16-30; Mr 10.17-31)

¹⁸ Kaen judíospaklochowxot, japon wuajnaechaemt Jesús. Jum-aechon:

–Jiw chanaekabaanan, xam xabich pachaemam. ¿Achaxkat xan nawewe'p isliajwan, Diosxotse dukaliajwan pomatkoicha? –aechon.

¹⁹ Jesús jumnot wut, jum-aechon:

–¿Ma-aech xotkat najum-am: 'Xam xabich pachaemam' –na-amkat? Jiw xabich pachaempi ajil. Kaen Dios, japon xabich pachaem.

²⁰ Xam matabijtam Dios pejtato'laxan. Moisés chajia lelpox jum-aech: 'iNabej bu'moejs asaow pawis, nijwa-elpow! iNabej be'bej asew jiw! iNabej natkowe'bej asew jiw pejew! iPajilax nabej jum-aech'e'bej asan aton tasalaliajwam, babijax is-elpon! iSitaembej nej-ax, nej-en saapich!' –aech Moisés chajia lelpox –aech Jesús japon atonliajwa.

²¹ Do jawut, kemaeyan jum-aech:

–Xam najum-ampox, tuadutx naexasisliajwan, yamxuchan wut. Amwutjel nakiowa chiekal naexasisfulax –aech kemaeyan.

²² Jesús japox jumtaen wut, jum-aechon:

–Xamfak kaeyax wewe'p isliajwam. iPuexa nejew mowam! Mowam wut, jpaplata chaxduim kejila! Ja-am wut, Dios xam chaxduiyaxael xabich pachaempoxan japonxotse. Toetam wut chaxduiyax kejila, do jawut, ixabua't xan naknanuamsliajwam, tajnachalnali-ajwambej! –aech Jesús kemaeyanliajwa.

²³ Kemaeyan japox jumtaen wut, xabich nejxaejwas, xabich kemaenk xoton. Samata, owchi-elon Jesús jum-aechpox.

²⁴ Kemaeyan chijia wut Jesúsxot, Jesús jum-aech naewetiliajwa:

–Xabich tampoel kemaeya pasliajwa Diosxotse.

²⁵ Xamal chiekal matabijam camello pinjin xot, xajupaxil kuthatuaekre'wuaj poxade xensliajwa. Kemaeyanliajwabej, ja-aech. Tampoel japon pasliajwa Diosxotse –aech Jesús.

²⁶ Jesús jum-aechpox jumtaenpi, japi jum-aech Jesúsliajwa:

–¿Chankatlx bu'weyaxaes pasliajwa Diosxotse? –aechi.

²⁷ Jesús jum-aech:

–Jiw pajut pijaxtat pasaxil Diosxotse. Pelax Dios xajup uexa isliajwa. Samata, Dios xajup jiw bu'weliajwa. Dios kajachawaesaxael jiw pasliajwa japonxotse –aech Jesús.

²⁸ Do jawut, Pedro jum-aech Jesúsliajwa:

–Tajpaklon, xanal uexa tejew waelax xam nakfalaeliajwan –aech Pedro.

²⁹⁻³⁰ Do jawutbej, Jesús jum-aech pejnachalaliajwa:

–Diachwuajnakolax xan jum-an. Nejmach-aton naexasit wut Dios pejtato'lax, japon waelt wut pejba, pijow, pakoew, paxi, pax, penbej, ja-aech wut, japon aton Dios xabich kajachawaesaxaeson ampathatat. Asamatkoi tup wut, pasaxaelbejpon Diosxotse pomatkoicha dukaliajwa –aech Jesús.

Ampoxtat Jesús jum-aech tres veces japon pejpatupaxliajwa

(Mt 20.17-19; Mr 10.32-34)

³¹ Jesús la doce pejnachala, japikal tamachaliajwa. Do jawux, japikal wut, Jesús jum-aech: "Amwut Jerusalén paklowax poxaxaes. Chajia profetas lelpoxan jum-aech xan, uexa jiw pakoewkolnanliajwa, jachiyaxaelpox jaxotde.

³² Do jawux, xan, uexa jiw pakoewkolnan, nawiasaxael judíos-elpixot. Jawut nabu'wuajanpaeyaxaeli. Babejjamechan najumchiyaxaelbejpi. Naloyaxaelbejpi.

³³ Xabich namatwuajsel saxaelbejpi. Do jawux, tuxaxaelen. Tuxp wut, tres matkoi wut, Dios namat-esaxael pejme dukaliajwan" –aech Jesús, pajutliajwa jum-aech wut.

³⁴ Jesús pejnachala japox jumtaen wut, chiekal jummatatabija-eli, tampoel xot japi jummatatabijaliajwa. Jummatatabija-elbejpi, ma-aech xot Jesús japox jum-aech.

Jesús boejthutpox itliaklan

(Mt 20.29-34; Mr 10.46-52)

³⁵ Asamatkoi Jesús Jericó paklowax mox itwefol wut, wuajna ek itliaklan nuambabu'tat, jiw xaxenapi plata malech waljoeliajwa.

³⁶ Itliaklan jumtaen wut jiw pinamut xenaxaesox, jawut wuajnaechaemt wut, jum-aechon:

–¿Ma-aechkat? –aech itliaklan.

³⁷ Do jawut, xaxenapi jum-aechi itliaklanliajwa:

–iMalis fulaeyaxaen ampaleldin Jesús, Nazaret paklowaxpijin! –aechipon.

³⁸ Itliaklan japox jumtaen wut, nejlat wut, jum-aechfullison:

–Jesús, David pamon, ixan nabeltaem! –aechfulon.

³⁹ Jiw, matxoelafoli, buxfiatipon boejlach ekaliajwa. Ja-aech wut, japon itliaklan kaes pejme nejlasful wut, jum-aechfulon:

–David pamon, ixan nabeltaem! –aechfulon.

⁴⁰ Do jawut, Jesús japox jumtaen wut, nukjaba. Jawut to'apon itliaklan buflaeliajwas japonleldin. Dolisdo', Jesús wuajnaem wut, jum-aechon itliaklanliajwa:

⁴¹—Xam, zachaxasiamkat xan isliajwan xamliajwa? —aech Jesús.

Itliaklan jumnot wut, jum-aechon:

—Tajpaklon, xan pejme taesian —aechon.

⁴² Jesús jum-aech:

—jPejme taem! Xam chiekal xan naxanaboejtam xot, pejme chiekal taeyaxaelam —aech Jesús.

⁴³ Do jawut, itliaklan chiekal wepachaems pej-iftut. Chiekal taenbejpon. Do jawut, Jesús nakfollison. Nakfol wut, jum-aechfulon Diosliajwa: “Dios, xam xabich pachaemam” —aechfulon. Puexa jiw, japox taen wut, japijeb Diosliajwa jum-aechful: “Dios, xam diachwuajnakolax xabich pachaemam” —aechfuli.

19

Jesús nospaeipox, Zaqueo suapich

¹ Do jawux, Jesús pat wut Jericó paklowax, follison japapaklowax xensliajwa.

² Japapaklowaxxot aton duk, kemaeyan. Japon pawul Zaqueo. Japonbej paklon impuesto mat-omwuljoewliajwa, Roma gobiernoliajwa.

³ Zaqueo xabich taesia Jesús. Pe Zaqueo itfuxajupaxil taeliajwapon Jesús, japon maramatan xot. Taeyaxilon Jesús, xabich jiw Jesús masajiasfulas xot.

⁴ Samata, Zaqueo najae'a wuajnade, Jesús fulaeyaxaech poxade. Jaxotde Zaqueo jul naetat taeliajwapon Jesús.

⁵ Jesús japalel fulaen wut, Jesús taen Zaqueo, athu naetat wut. Do jawut, Jesús jum-aech:

—Zaqueo, jbaloemk! Amwut nejbaxotaxaelen —aech Jesús.

⁶ Do jawut, Zaqueo bichakal kamta balaelik. Xabich nejchachaemlaxtat Jesús chiekal bu'kalton Jesús namanaliajwa japon pejbatat.

⁷ Japi jiw japox taen wut, puexa nakaewa najum-aechi Jesúsliajwa: 'Jesús namanaxil Zaqueo pejbatat, japon babejen xot' —aechi.

⁸ Do jawux, Jesús Zaqueo pejbaxot wut, mesaxot ek wut, Zaqueo chalechkal nant. Jawut jum-aechon Jesúsliajwa:

—Tajpaklon, xan chiekal najumtaem! Puexa xan tejewpi, ma amwut najupadijnxaelen kejila chaxduiliajwan. Xan impuesto mat-omwuljowx wut, kaes mat-omwuljowxpi, japi pejplata pejme wewoeyaxaelen. Pe kaes cuatro veces japi wewoeyaxaelen —aech Zaqueo Jesúsliajwa.

⁹ Do jawut, Jesús jum-aech:

—Diachwuajnakolax xam amwutjellis Abraham pamonkolnam, Dios chiekal naexasitam xot, me-ama Abraham, ja-am xot. Samata, nejbapijiw Dios beltaeyaxaes japi babijaxan ispoanliajwa.

¹⁰ Xan puexa jiw pakoewkolnan, fulaenx jiw wulwekaliajwan, bu'weliajwanbej, japi napelti Diosliajwa —aech Jesús Zaqueo liajwa.

Paklon waelapox plata pamakjiwxot

(Mt 25.14-30)

¹¹ Jesús Zaqueo pejbatat wut, jiw jumtaen Jesús jum-aechpox. Mox xotlison Jerusalén paklowaxxot, jawut xabich jiw nejchaxoel Jesúsliajwa: “Jesús Jerusalén paklowaxxot pa'a wut, Dios tato'almatko'i pasaxael. Jawut Jesús paklokolan nadofaxael puexa jiw tato'laliajwa ampatuajnapijiw” —aech jiw, nejchaxoel wut Jesúsliajwa. Pefuk Jesús paklokolan dofaxil. Samata, Jesús naewuajan ampawuajantat japi jiw chiekal matabijaliajwa.

¹² Do jawut, jum-aechon: “Paklowaxxot kemaeyan duk. Japon wullalas asatujnulel wulduiliajwas reyliawapon, nawia'an wut puexa jiw pejtujnupijiw tato'laliajwapon.

¹³ Dolison, fulaeliajwa wut asatujnu poxade, lalison diez pamakjiw fulaeliajwadin japonlel. Pat wuti japonxot, kemaeyan waela kaenanula plata japixot. Jum-aechon: 'Tajwalela ampaplata nawexawuajsfalam wut, jmwafaldebej kaes plata nawekanaliajwam xanliajwa! Samata, xan pejme patx wut, tajplata kaes pejme nawewoeyaxaelam' —aech kemaeyan diez pamakjiwliajwa. Do jawut, fulaechlison, wullalas poxade.

¹⁴ Pe pejtujnupijiw nejweslas kemaeyan. Nejweslasbejpon japon japi pejreyliajwa. Samata, japixot asew jiw to'api kemaeyan wulduiyaxaes poxade, japi jumchiliajwa, jaxot pa'a wut: 'Japon xanal nejwesla tajreyliajwa' —chiliajwapi kemaeyanliajwa.

¹⁵ “Pe nakiowa kemaeyan wulduys reyliawaj. Do jawux, japon pejme nawian pejtujnu poxadin. Pat wuton pejbatat, to'apon pamakan wullalaeliajwas diez pamakjiw, japixot plata waelapipon, matabijisliajwa massuapich plata kaenanula japi kana.

¹⁶ Do jawut, matxoelapatron jum-aechon kemaeyanliajwa: 'Tajpaklon, xan diez veces kaes plata kanx, xanbistax wut nejew plata' —aechon.

¹⁷ Kemaeyan jumnot wut, jum-aechon: 'Xabich pachaem. Xam chiekal nabistam xanliajwa. Chiekal nawetataeflam kaeyaxachpox. Samata, amwut diez paklowaxanpijiw tato'laxaelam' —aech kemaeyan pamakanliajwa.

¹⁸ Do jawut, asan pamakan pat wut, japon jum-aech: 'Tajpaklon, xan cinco veces kaes plata kanx, xanbistax wut nejew plata' —aechon.

¹⁹ Kemaeyan jum-aech pamakanliajwa: 'Amwut xam cinco paklowaxanpijiw tato'laxaelam' —aech kemaeyan pamakanliajwa.

²⁰⁻²¹ "Do jawut, asan pamakan pat wut, japon jum-aech: 'Tajpaklon, ama nejplata. Xan chabaentax panyoelbu'tat, tajlewla xot xamliajwa, nejthun'nikam xot, xam beltae-emil xotbej namak. Namak nabistpoxantat xam kanam' —aech pamakan kemaeyanliajwa.

²² Kemaeyan jumnot wut, jum-aechon: 'Xam xabich babejnam. Chiekal natanbich-emil. Xam najum-ampoxtat xam kastikaxaelen. Xam najum-am: "Xam nejthun'nikam. Xam beltae-emilbej namak. Namak nabistpoxantat xam kanam" —na-am xanliajwa.

²³ Xam matabijtam wut xan tajkabuanpoxan, ¿ma-aech xotkat tejew plata presta-emil bancopijiw? Xam prestam wut plata, amwutjel bancopijiw kaes plata xam tawiasaxael. Prestampoxliajwa xam kaes mosaxaelbejpi. Samata, amwutjel plata nawewiatam wut, kaes nawewiasaxaelam' —aech kemaeyan pamakanliajwa.

²⁴ Do jawut, kemaeyan jum-aech jaxotpijiajwa: '¡Kechafi'e ampon aton, plata nawechabaentron panyoelbu'tat! ¡Japaplata chaxdu'e diez veces kaes plata kanpon!' —aech kemaeyan.

²⁵ Jaxot nuil jum-aech: 'Tajpaklon, japon xabich pin-iat. ¿Ma-aech xotkat pejme kaes chaxdusaxaelam japon?' —aechi kemaeyanliajwa.

²⁶ Kemaeyan jumnot wut, jum-aechon: 'Diachwujnakolax xan jum-an. Tejew chiekal nawetataefulpon, japon kaes pejme chaxdusaxaelen. Asanlax chiekal nawetataefla-elpon tejew, kaesuapich nawetataefulpox, kekusaxaeson.

²⁷ Pe tadaelmajiw, xan nanejweslapi japi pejreynanliajwa, ¡japi buflaeman ampalel xan tajwujnalel beliajwaspi!' —aech rey" —aech Jesús, ampawujajan naewujajan wut.

*Jesús mox patpox Jerusalén paklowaxxot
(Mt 21.1-11; Mr 11.1-11; Jn 12.12-19)*

²⁸ Jesús japox buxtoet wut Zaqueo pejbaxot, do jawut, Jesús fulaech Jerusalén paklowaxxot, pejnachala suapich.

²⁹ Mox Jerusalén paklowaxxot wut, jaxot muax. Japamuaxlelxot xabich olivonaechan nuil. Samata, japamuax pawul Olivonaechanmuax. Mox japamuaxxot kolepaklowaxach. Kaepaklowaxach pawul Betfagé. Asapaklowaxach pawul Betania. Jesús japapaklowaxxot mox fol wut, wujajna to'achon kolenje pejnachalan.

³⁰ Jesús japi to'aliajwa wut, jum-aechon:

—¡Xabua'de japapaklowaxach poxade! Jaxotde pa'mach wut, bur jelti'san, wake'taspon, taeyaxaelam. Japabur chinax kaen aton tua-eka-esalfak. ¡Jolde! Joltam wut, ¡nawebuflaeman japabur!

³¹ Jaxotpijin xamal wujajnachaemt wut, jum-aech wuton: '¿Ma-aech xotkat xamal bur joltam?' —aech wuton, ¡xamal jum-amde japon: 'Wajpaklon wewe'pas bur' —amde japon aton! —aech Jesús kolenje pejnachalanliajwa.

³² Do jawut, japi ow-aech wut, fulaechlisi japapaklowaxach poxade. Ja-aech japox, meama Jesús chajia jum-aech.

³³ Japi bur jolt wut, burpijiw wujajnachaemtasi. Jumtispí:

—¿Ma-aech xotkat xamal bur joltam? —tispí.

³⁴ Japi jumnot wut, jum-aechi:

—Wajpaklon wewe'pas bur —aechi.

³⁵ Do jawut, Jesús pejnachala bur buflaen Jesúsleldin. Jesúsxot bu'pat wuti, bur tam-owapi pejew, thuch pejsumta-owapi. Do jawut, Jesús tua-ek.

³⁶ Jesús burtat chaflaen wut, wujajna jiw pejsumta-owa jollisi nuamtat ba'aliajwa Jesús chaflyaexaenlel. (Jasox isi Jesús chiekal bu'kulaliajwapi, xabich sitaen xoti Jesús.)

³⁷ Jesús mox fol Olivonaechanmuaxxot. Jaxot nuamsik muaxlelasik, fulaeliajwa Jerusalén paklowax poxade. Jesús chaflae-el wut japoxadik, puexa jiw tuadut nejlasfalaliajwa, nejchachaemil xoti. Nejlasful wut, jum-aechfuli Diosliajwa: "¡Xam xabich pachaemam!" —aechfulisi. Jasox xabich jiw jum-aechful, majt chajia taen xoti, Jesús koechaxan is wut Dios pijaxtat.

³⁸ Jiw jum-aechfulbej Jesúsliajwa:

—Ampon, fulaenpon Dios pijaxtat, xabich pachaempon. Japon fulaen reyliajwa, xatis naktato'lalialjwa. Wuajanjilaxtat puexa jiw duilaxael athuxotse Dios pijaxtat. Dios, athupijin, japon xabich pachaem —aechful xabich jiw.

³⁹ Jiwxot, jaxot kaesuarich fariseos. Japi fariseos palala xot, jum-aechi Jesúsliajwa:

—Jiw chanaekabuanan, jampi jiw, nejnachala, buxfia'e jum-aechfulpoxan! —aechi Jesúsliajwa.

⁴⁰ Jesús jumnot wut, jum-aechon:

—Diachwujnakolax xan jum-an. Japi jiw buxfiatx wut boeijlachliajwa, ia'lax nelasfulaxael japi jiw jum-aechfulpoxanliajwa —aech Jesús fariseosliajwa.

⁴¹ Jesús Jerusalén paklowaxxot mox pat wut, paklowax taen wut, nowpon Jerusalén paklowaxpijwliajwa.

⁴² Jesús now wut, jum-aechon: “Xan xabich nejxasinkax Jerusalén paklowaxpijiw tajpasax matabijialijwa. Xan paskax japi jiw bu'welijwan xan tajaxtat, chiekal pachaemalijwapi Diosliajwa. Pe japi chiekal matabija-el. Xan nabu'kula-elbejpi. Samata, amwutjel japox chiekal toeplosix japi xan namatabijsliajwapox.

⁴³ Babejmatkoijan tapasfulaxaesi. Padaelmajiw chakipasaxaesi. Chamasajoeyaxaesbejpi. Chinax kaen aton japapaklowaxxot weyaxil.

⁴⁴ Ja-aech wut, Jerusalén paklowaxpijiw puexa chiekal toesaxaes. Pejbachan wetakaxaesbejpi. Chinax kaet ia't namanaxil nakae-ia'tmatwujtat. Jasox wejachiyaxaesi, xan namatabijs-el xoti, xan patxponan jiw bu'welijwan” —aech Jesús, now wut Jerusalén paklowaxpijwliajwa.

Jesús to'apox nakolalialjwa Dios pejtemplobatat mowapi, wujtibej

(Mt 21.12-17; Mr 11.15-19; Jn 2.13-22)

⁴⁵ Jesús Jerusalén paklowax pat wut, lowpon Dios pejtemploba. Jaxot Jesús taen mowapi. Taen waton japi Dios pejtemplobatat, nejth'axtat to'apon choef mowapi nakolalialjwa Dios pejtemplobatat.

⁴⁶ Jesús jum-aech japilialjwa:

—Dios pejjamechan, chajia lelspx, jum-aech Dios jum-aechpox pejtemplobalialjwa: ‘Tajba kawuajnaba wulxael, jiw xan nakawuajnalialjwa’ —aech Dios jum-aechpox pejtemplobalialjwa. Xamallax Dios pejtemploba kethaka pejba padofam —aech Jesús.

⁴⁷ Kaematkoisful Jesús naewuajan Dios pejtemplobatat. Pe sacerdotespaklochow, judíos chanaekabuanaipibej, asew judiospaklochowbej, japi nakaewa najum-aech: “¿Machiyaxaekat Jesús boesalialjwas?” —na-aechi nakaewa.

⁴⁸ Pelax japi matabija-el, achaxtat pachaem Jesús boesalialjwas, puexa jiw chiekal naewet xot Jesús naewuajanpoxan.

20

Jesús wujnachaemtaspx, achan to'aspon choef mowapi nakolax to'aliajwapon Dios pejtemplobatat

(Mt 21.23-27; Mr 11.27-33)

¹ Asamatkoi Dios pejtemplobaxot Jesús jiw naewuajan chimiawuajan, jiw bu'weyaxaesox. Ja-aech wut, sacerdotespaklochow, judíos chanaekabuanaipi, ancianosbej, mox soepapi Jesúsxot.

² Do jawut, jum-aechi:

—¿Xanal najum-amde ampox! ¿Achan pijaxtatkat xam to'am choef mowapi nakolalialjwa Dios pejtemplobaxot? ¿Achankat xam to'a japox isliajwam? —aechi Jesúsliajwa.

³ Jesús jumnot wut, jum-aechon japilialjwa:

—Xan-is xamal asax wujnachaemsaxaelen. ¿Pe xamal majt najumno'e!

⁴ ¿Achankat Juan to'as jiw bautisaliajwa? ¿Dioskaton to'as? O, ¿jiwkaton to'as? —aech Jesús.

⁵ Jesús japox jum-aech wut, japi nakaewa najum-aechna: “Jumnoch wut, ‘Juan Dios to'as jiw bautisafalalialjwa’ —tis wut, Jesús nakjumchiyaxael: ‘¿Ma-aech xotkat xamal Juan jum-aechpoxan naexaxis-emil?’ —nakchiyaxael xatis Jesús.

⁶ Juntis wutlax: ‘Juan jiwkal to'as jiw bautisafalalialjwa’ —tis wut, puexa jiw xatis ia'tat nakdadaepaxael nakmatkaejabaliajwa, palalaxael xoti xatisliajwa. Jasox isaxaeli xatisliajwa, puexa jiw jum-aech xot Juanliajwa: ‘Diachwujnakolax Juan, jiw bautisan, jum-aech Dios pijaxtat’ —aech xot jiw Juanliajwa” —na-aechi nakaewa.

⁷ Samata, japi jumnot wut, jum-aechi Jesúsliajwa:

—Jalape. Xanal matabija-enil, achan Juan to'as jiw bautisaliajwa —aechi.

⁸ Do jawut, Jesús jum-aech japilialjwa:

—Xan-is xamal jumchiyaxinil, achan pijaxtat xan japox isx —aech Jesús.

Pamak babejchowpox
(Mt 21.33-46; Mr 12.1-12)

⁹ Jesús pejme jum-aech, jiw naewuajan wut ampawuajan: “Aton mutha uva. Do jawux, uwalupijin asew jiw wuljaet, japi jiw piach tataeflialjwa japon pej-ualul, japon ajil wut. Japi bu'pat wut, jum-aechon: ‘Xan piach kijlaxaelen asatuajnulel atuaj. Xan tajwulela tajlul chiekal xamal nawetataeflaxaelam’ –aech uwalupijin. Do jawux, chijjalison japatuajnu poxade.

¹⁰ Do baxael, uva foi wut, uwalupijin kaen pamakan to'a pej-ualul wetataeflaspi poxadin, wewuljaesliajwaspon uva. Uwalul tataefulpi jaelti uwalupijin pamakan. Jawut baeson. Do jawut, to'ason ke-etat nawiasliajwa pejpaklon poxade.

¹¹ Do jawux, uwalupijin to'a asan pamakan. Uwalul tataefulpi babejjamechan jum-aech japonliajwa. Do jawut, japonbej baes. Ke-etat nawiasax to'ason pejpaklon poxade.

¹² Do pejme jawut, uwalupijin asan pamakan pejme to'a. Japonbej baes wut, xakolbalas. Do jawut, uwalul tathoetel fo'ason.

¹³ “Dolisdo', uwalupijin nejchaxoel wut, jum-aechon: ‘¿Machiyaxaelenkat xan? ¡Aa, xan matabijtax isaxaelenpox! Taxulan to'axaelen, xabich nejxasinkaxpon. Japi bej nawesi-taeyaxaelbejpi taxulan’ –aech uwalupijin, nejchaxoel wut.

¹⁴ Do jawut, paxulan to'alison japi poxade. Uwalul tataefulpi taen wuti, japon atuaj fulaen wut, nakaewa najum-aechi: ‘¡Tae'nik uwalupijin paxulan! Asamatkoi pax tep wut, japon pijax wulxael ampa-ualul. Samata, xatis amwat ampon boesaxaes, uwalul wajaxkal namanaliajwa’ –na-aechi nakaewa uwalul tataefulpi.

¹⁵ Do jawut, paxulan pat wut uwaluxot, jaeltason. Jawut juchpon uwaluxot. Do jawux, boesaspon” –aech Jesús jiw naewetiliajwa.

Do jawut, Jesús wuajnachaemt jiw naeweti japawuajan. Jum-aechon: “¿Achaxkat xamal nejchaxoelam uwalupijinliajwa? ¿Achaxkat japon isaxael uwalul wetataeflaspijiajwa?

¹⁶ Uwalupijin chakifalaejaxael beliajwapon uwalul wetataeflaspi. Do pejme asew tataeflax to'axaelon” –aech Jesús.

Naeweti matabija wut Jesús jum-aechpox, japi jum-aech Jesúsliajwa:

–¡Dios jasox nej is-ele' xanaliajwa! –aechi.

¹⁷ Jesús chiekal natachaemt wut, jum-aechon japi jiwliajwa:

–Xamal chiekal matabijam, Dios pejjamechan, chajia lelspxox, jum-aech wut, jum-aechox xanliajwa:

‘Jiw ia'ba is wut, kaet ia'tliajwa nakaewa najum-aechi: “Ampot ia't chaemil” –na-aechi nakaewa. Samata, mastaenipot. Do jawux, asan aton japot ia' fit wut, jum-aechon: “Ampot ia't, puexa ia'xot kaes pejme pachaem tuakso'pijtaliajwa, ba chiekal mamnikaliajwa” –aechon’ –aech Dios pejjamechan xanliajwa, chajia lelspxox.

¹⁸ Jiw fiap wut kaet ia't pinjixot, xabich naxthuya wut, naxkolaxaelbejpi. Pelax kaet ia't, pinjit, athulelsik jiw matwuajasic jopik wut, japi jiw matkaeyaxaes ia't. Jasoxtat xamal xan nanaexaxis-emilpim xabich nabijasaxaelam, xan nanejwesla xot. That toep wut, Dios xamal pomatkoicha kastikaxael infernoxot –aech Jesús.

¹⁹ Jesús japox jum-aech wut, sacerdotespaklochow, judíos chanaekabuapanibej, nejchaxoel: “Jesús japawuajan jum-aech wut, nakjum-aechon xatisliajwa” –aechi, nejchaxoel wut. Samata, jawut japi jaelsasiapi Jesús. Pe jaels-eli Jesús, pejlewla xoti jiwliajwa.

Impuesto mosaxliajwa, Jesús wuajnachaemtaspxox
(Mt 22.15-22; Mr 12.13-17)

²⁰ Asamatkoi sacerdotespaklochow, judíos chanaekabuapanibej, to'api jiw maliach tataeflialjwapi Jesús. Japi pat wut Jesúsxot, me-ama pachaem wut, kabuan-aechi. Samata, japi chiekal naewet, Jesús jum-aech wut babejjamechan gobiernoliajwa, jawut tasalaliajwapi Jesús gobernador pejwuajnalel, Jesús kastikaliajwasbej.

²¹ Samata, japi xapaejsliajwa wut, jum-aechi Jesúsliajwa:

–Jiw chanaekabuanan, xanal matabijtax xam jiw naewuajnaprox diachwuajnakolax. Kejila naewuajnam wut, chiekal naewuajnam. Najupanaewuajnam kejila, kemaenkpijeb. Xam naewuajnam japi jiw chiekal duilaliajwa, me-ama Dios nejxasink.

²² Samata, xanal chiekal matabijasian. ¿Pachaemkat xanal mosliajwan impuesto Roma tuajnapijiw tato'lan? –aechi, xapaejt wut Jesús.

²³ Pe Jesús matabijt japi xapaejtaspxox. Samata, jum-aechon:

²⁴ –¡Kaekafef nawexalaeman na-itpaeliajwam! –aech Jesús.

Jawut kaekafef, pawulox denario, xalaenlisi Jesúslel. Jawut Jesús wuajnachaemt wut, jum-aechon:

–¿Achan pejxu-aelkat ampakafefat? ¿Achan pejwulbejkat ama lelspxox ampakafefat? –aech Jesús japijiajwa. Japi jumnot wut, jum-aechi:

—Roma tuajnupijiw tato'lan, japon pejxu-ael, japon pejwulbej —aechi.

²⁵ Do jawut, Jesús jum-aech:

—¡Roma tuajnupijiw tato'lan, japon pejewpi mo'e, impuesto motam wut! Pe Dios pejewpi, japox xatis Dios xanaboejaspoxan, wajnejxasiyaxbej, japoxanlap xatis Dios chaxduiyax-aes —aech Jesús.

²⁶ Jesús chiekal jumnot xot, Jesús bu'wuañanjil jiw pejwuañnalel tasalaliajwas. Samata, maliach tataeflaspi asbuan jumch boeplach nejchaxoelanuili.

*Asamatkoi mat-eyaxaespo x tupa pejme duilaliajwa
(Mt 22.23-33; Mr 12.18-27)*

²⁷ Saduceos asanejchaxoelaxan. Japi jum-aech: “Jiw tux wut, kaelel chiekal napelt. Asamatkoi mat-eyaxisal pejme duilaliajwa” —aechi asbuan jumch. Do asamatkoi wut, asew saduceos pati Jesús taeliajwa. Jesúsxot wut, kaen japixot ampawuañan jum-aech Jesús jumtaeliajwa:

²⁸ —Jiw chanaekabuanan, Moisés chajia lelpox jum-aech: ‘Aton, pijowpon, japon aton tux wut naxawla-elaxtat pijowxot, tuxon pakoewan naman wut, japon japow fisaxael naxawliajwapon japowxot, pakoewan tuxonliajwa’ —aech Moisés chajia lelpox.

²⁹ Kaen aton seis pakoew. Matxoelapijin pawis fit. Pe baxael, japon tux xijilaxtat.

³⁰ Do jawut, wachakalpijin, japow fit, pakoewan naetuxow. Pe baxael, japonbej tux xijilaxtat.

³¹ Do jawutbej, trespijin, japow fit. Japow fit wuton, japonbej baxael tux xijilaxtat. Do jawux, cuatro namapi, japibej jasoxtat natoet nakjiyaxtat japowtat. Pe chinax kaen japowxot naxawla-el.

³² Do baxaelbej, japowbej taxdukakolaxtat tux.

³³ Puxa japi poejiw nakjiya japowtat. Baxael, tupa mat-eyaxaes wut, sietepixot, zachankat pijowaxael japow? —aech saduceos.

³⁴ Jesús jumnot wut, jum-aechon:

—Ampathatat poejiw watho' not.

³⁵ Dios makanochpi pasliajwa japonxotse, jaxotse pomatkoicha duilaxaeli. Japi tux wut ampathatat, asamatkoi mat-eyaxaes pejme duilaliajwa Diosxotse. Mat-eyaxaes poejiw, watho'bej. Pe japi pejme nakjiyaxil.

³⁶ Diosxotse wut, japi pejme tuxaxil. Me-ama Dios pej-ángeles, jachiyaxaeli. Dios taen wut japi jiw, me-ama paxi wut, jachiyaxaelon, mat-ia xoton japi pejme duilaliajwa.

³⁷ Moisés chajia lel Dios jum-aechpox tamdadusaxtat boejtachnaechxot. Samata, Moisés lelpoxtat matabijas tupa mat-esaxaespo x pejme duilaliajwa. Moisés lelpoxtat jum-aech Dios jum-aechpox: ‘Xanfik Abraham, Isaac, Jacobbej, japi pejDiosnan’ —aech Dios. Samata, xatis chiekal matabijas, baxael tux wut pejme duilaxaespo x.

³⁸ Xatis chiekal matabijas chajia tupa, japi napels-el. Samata, Abraham, Isaac, Jacobbej, japi amwutjel nakiowa duilaful Diosxotse. Puxa Dios pejiwspis tux wut ampathatat, duilafulaxaes Diosxotse —aech Jesús saduceosliajwa.

³⁹ Asew, judios chanaekabuanapi, jum-aechi Jesúsliajwa:

—Jiw chanaekabuanan, xam chiekal jumnotam saduceos —aechi.

⁴⁰ Do jawut, saduceos padala pejme wuañnachaemsliajwapi Jesús.

*Cristo, rey David pamonpox, pe Cristo paklonbej Davidliajwa
(Mt 22.41-46; Mr 12.35-37)*

⁴¹ Jesús wuañnachaemt wut, jum-aechon judios chanaekabuanapiliajwa:

—¿Ma-aech xotkat jiw matabija-el Cristo Dios paxulan? Diachwuañnakolax jiw jum-aech wut, jum-aechi Cristoliajwa: ‘Cristo nalaelt wut, japon rey David pamonaxael’ —aechi. Pe Cristo rey David pamonkala-el. Pe Cristo asanbej.

⁴² David chajia lel wut Salmosfutat, jawut pajut jum-aechon Cristoliajwa:

‘Dios jum-aech wut tajpaklonliajwa, jum-aechon: “¡Ekde tajpoklalel jiw tato'laliajwam, xan suapich!

⁴³ ¡Ekde jaxot, hasta xan malechaxaelen wut nadaelmajiw! Malechax wut, japi jiw xam namakjiwaxael tato'laliajwam” —aech Dios tajpaklonliajwa’ —aech rey David, chajia lel wut Cristoliajwa.

⁴⁴ David chajia jum-aech Cristoliajwa: ‘Tajpaklon’ —aechon. Samata, Cristo diachwuañnakolax David pamonkala-elon. Pe pejpaklonbejpon —aech Jesús, pajut najum-aech wut, jiw chiekal matabijaliajwa japon Dios paxulanpon.

Jesús jum-aechpox jiw chiekal matabijaliajwa judios chanaekabuanapi pejbu'wuañanpoxliajwa

(Mt 23.1-36; Mr 12.38-40; Lc 11.37-54)

⁴⁵ Puexa jiw jaxot naewet wut, Jesús jum-aech pejnachalaliajwa:

⁴⁶ “¡Chiekal taem! Me-ama judíos chanaekabuanapi, ¡xamal nabej ja-aeché! Japi nejxasink pakchowaxan, naxoeyaxan, jiw chiekal sitaeliajwas. Nejxasinkbejpi jiw moichiliajwas xabich sitaeyaxtat, paklowaxthialaxanxot xabukulas wut. Judíos naewuaj nabachanxot wut, wuajna tuachalakaxan nuili paklochow kaes sitaenspilajwa, japoxantat japi chalak puexa jiw taeliajwas. Ja-aechbejpi, fiestaxot wut. Nejxasink chalakaliajwa kaes pachaempoxantat.

⁴⁷ Japibej naekichachajba watho', pamaljiw naetupspi, natkowliajwa japi watho' pejew. Do jawut, judíos naewuaj naba lowpi Dios piach kawuajnalialjwa, asew jiw jumchiliajwasi: ‘Diachwuajnakolax ampi xabich pachaem’ —chiliajwasi. Samata, Dios xabich kastikaxaesi” —aech Jesús.

21

Pamal naetupspow, kejilpow, chaxdutpox ofrenda Diosliajwa
(Mr 12.41–44)

¹ Jesús asamatkoi Dios pejtemplobaxot wut, jawut taenpon kemaeya, plata jeyaxxot jia wuti plata Dios pej-ofrendaliajwa.

² Jaxot taenbejpon pamal naetupspow, japow jek wut kolekafefaex. Japakafefaex, cobrefaex, xabich omjillejen. Japow xabich kejil.

³ Do jawut, Jesús jum-aech pejnachalaliajwa:

—Diachwuajnakolax xan jum-an. Ampow pawis, pamal naetupspow, kejilpow. Pe Dios kaes pejme nejchachaemil japow pej-ofrendaliajwa. Japow, me-ama kaes pejme chaxdut wut, ja-aechow Diosliajwa. Me-ama puexa asew jiw, chaxduw wut ofrenda, jachi-el japow.

⁴ Puexa asew jiw chaxduw ofrenda wenamaspoxantat. Japowlax wewe'paspoxanliajwa, puexa chaxdutow Diosliajwa —aech Jesús pejnachalaliajwa.

Jesús jum-aechpox Dios pejtemploba toesaxaespoxliajwa
(Mt 24.1–2; Mr 13.1–2)

⁵ Dios pejtemplobaxot tathoetel wut, asew Jesús pejnachala jum-aechi Dios pejtemplobaliajwa: “¡Tae'nik ia', xabich chimiatan, japitat Dios pejtemploba chapachaemaliajwa! ¡Tae'nikbej asaxan asew judíos chajia chaxduwpi Dios pej-ofrendaliajwa, chiekal chapachaemaliajwa Dios pejtemploba!” —aech Jesús pejnachala. Do jawut, Jesús jum-aech:

⁶ —Asamatkoi asatwajnprijijw Dios pejtemploba tukaxaeli. Puexa taenampi, puexa japoxan chiekal toesaxaes. Chinax kaet, ia't, namanaxil nakae-ia'tmatwuajtat —aech Jesús, jum-aech wut pejnachalaliajwa japoxan jachiyaxaelpox.

That toepax mox pawuajna wut, majt matxoela jachiyaxaelpoxan
(Mt 24.3–28; Mr 13.3–23)

⁷ Jesús wuajnachaehtas wut pejnachala, jum-aechi:

—Jiw chanaekabuanan, ¿maswutkat japox jachiyaxael, xam jum-ampox Dios pejtemplobaliajwa? Mox pawuajna wut, ¿chaxkat taeyaxaes? —aechi Jesúsliajwa.

⁸ Jesús jumnot wut, jum-aechon:

—¡Chiekal taem, asamatkoi asew jiw xamal naekichachajbasamata! Xabich jiw fulaeyaxaen. Japi pajut kaenanula najumchiyaxael: ‘Xan Cristowan. Mox pawuajnalisox ampathat toepaliajwa’ —chiyaxaeli. Japi japoxan jum-aech wut, xamal nakfulaeyaximil japi jiw.

⁹ Asamatkoi xamal wultaenam wutbej nabewuajan asatwajnpuchanxot, ¡xamal nabej ne-ilewle! Japoxan majt jachiyaxael, ampathat toepax mox pawuajna wut. Japoxan ja-aech wut, that toepaxilfuk —aech Jesús.

¹⁰ Do jawut, pejme jum-aechon: “That toepaliajwa wut, xabichaxael nabewuajan. Nakaetwajnprijijw nabeyaxael. Japoxan majt xabich jachisfulaxael asatwajnpuchanel. Kaetwajnprijijw nabeyaxaelbej, asatwajnprijijw swapich. Japoxan majt xabich jachisfulaxael asatwajnpuchanel.

¹¹ Asatwajnpuchanel xabich sat najaesaxael. Najaesaxael wut, xabich chaemilaxael. Asatwajnpuchanel naxaeyaxan piach ajilaxaelbej. Xabichaxaelbej waxae. Jiw taeyaxaelbej, thatbaxo xabich nachoela wut. Do jawut, xabich jiw belwaxael” —aech Jesús, japoxanliajwa jum-aech wut.

¹² Do pejme Jesús jum-aech pejnachalaliajwa: “Japoxan wuajna, asew jiw xamal jaelaxael, tajnachalwam xot. Japi babijaxan is wut xamalliajwa, xamal nabijaxaxaelam. Xamal buflaeyaxaelbejpi judíos naewuaj nabachan poxade, jaxotde tasalaliajwapi xamal. Xamal jeyaxaelbejpi jiw jebatat. Asew jiw xamal buflaeyaxaelbej paklochow poxade. Samata, asatwajnpuchanprijijw tato'alpi, gobernadoresbej, japi pejwuajnalel xamal nulaxaelam, tajnachalwam xot.

¹³ Japoxan ja-aech wut, xamalliajwa pachaemaxael japi jiw chapaeliajwam tajwuaajan.

¹⁴ Xamal jaxota-emil wutfak, xabich nabej nejchaxoele' jumchiyaxaelampoxan, jumnosliajwam wut japi tasalapoxan, japi pejwuaajnalelam wut!

¹⁵ Do jawut, Dios kajachawaesaxael xamal chiekal jumnosliajwam. Ja-aech wut, kaen aton japixot matabijaxil xamal jumnosliajwa.

¹⁶ Nej-axjiw xamal woeyaxael paklochowxot. Nej-axjiwa-el wut, nej-enjiwaxael. Nej-enjiwa-el wut, nakoewaxael. Nakoewa-el wut, asewaxael nejjiwpi. Nejjiwa-el wut, nejnachalaxael. Ja-aech wut, asew xamalxot beyaxaes.

¹⁷ Puexa jiw, Dios naexasis-elpi, japi xamal nejweslaxael, tajnachalwam xot.

¹⁸ Pe chinax xamalxot kaen tabejsaxisal, Dios tapae-el wut.

¹⁹ Xamal kofa-emil wut nejxanaboexaxan Diosliajwa, ja-am wut, Dios xamal bu'weyaxael duilaliajwam pomatkoicha Diosxotse.

²⁰ "Asatuaajnuchanpijiw, soldaw, chakipach wut judios, Jerusalén paklowax masajoeya wutbejpi, jawut matabijaxaelam mox pawuaajnapox japapaklowax toesiajwas.

²¹ Judea tuajnupijiw japox taen wut, japi puexa nej dukpe pinamuaxan poxade! Asew jiw, Jerusalén paklowaxpijiw, japox taen wut, ipaklowaxxot nej nakole dukpaliajwa atuaaj! Asew jiw, pejlulanxot nabisti, ikaxa paklowaxlel nej nawe-elepi! Do jaxot, japi kaelel atuaaj nej dukpe!

²² Japamatkoijan japox jachiyaxael, kastikamatkoijan wut. Me-ama Dios pejjamechan, chajia lelspxox, jum-aech wut, jum-aechox, diachwuaajnakolax japox jachiyaxael.

²³ Japamatkoijan watho', moejowpi, watho'bej, paxi mitan miati, xabich nabijasaxael. Jiwbej, ampatuaajnupijiw, xabich nabijasaxael, kastikaxaes xoti Dios.

²⁴ Asew japixot beyaxaes espadatat. Asew muaxmatakuiyaxaes. Do jawux, buflaeyaxaes asatuaajnuchanlel. Ja-aech wut, asatuaajnuchanpijiw pasaxael Jerusalén paklowaxxotdin. Do jawut, Jerusalén paklowaxpijiw tato'laxaes asatuaajnupijiw. Japox jachiyaxael, hasta Dios markamatkoi pat wut. Japamatkoitat Jerusalén paklowaxpijiw kofaxaes tato'laspxox asatuaajnupijiw" —aech Jesús pejnachalaliajwa.

*Jesús, puexa jiw pakoewkolan, pejme kaxaxoekpox
(Mt 24.29-35, 42-44; Mr 13.24-37)*

²⁵ Jesús pejme jum-aech pejnachalaliajwa: "Xan pasliajwan wut, xabich chaemilaxael thatbaxo, juimt matkoipijin, juimt madoipijinbej, ithaejbej. Mar xabich thiachoenkaxael, truxan xabich pinijyaxan wut. Samata, jiw matabijaxil, achax nejchaxoelaxael, xabich belwaxael xoti.

²⁶ Jiw tuppbalaxael pejlewt, nejchaxoel wuti ampathatliajwa, jachiyaxaelpoxliajwa. Do pejme nejlialaxaeli. Puexa thatbaxotatpi, me-ama thatbaxo choelas wut, jasox jiw taeyaxael.

²⁷ Do jawut, xan, puexa jiw pakoewkolnan, itloejentat pasaxoekan wut, puexa jiw nataeyaxael, fuloekx wut. Jawut puexa jiw tato'laxaelen. Itliakaxaelenbej tajut Dios pijaxtat.

²⁸ Japoxan taenam wut, xan chajia jum-anpoxan, ixamal xabich nejchachaemilde! iXan nanaexasisfulde, mox xotlisox matkoi xamal bu'welijaan!" —aech Jesús pejnachalaliajwa.

²⁹ Jesús pejme jum-aech wuaajantat pejnachalaliajwa: "iChiekal nejchaxoelde, taenam wut higona, o, nejmachnaechanbej!

³⁰ Waech mox pawuaajna wut, japanaechan pajel-uaf nakola. Xamal japoxan taenam wut, jum-an: 'Waechlis mox pawuaajna' —am xamal.

³¹ Jasoxtatbej, xamal matabijaxaelam mox pawuaajnapox Dios puexa pejjiw tato'laxaelpox ampathatat.

³² "Diachwuaajnakolax xan jum-an. Puexa ampoxan xan jum-anpoxan, diachwuaajnakolax japoxan jachiyaxael. Japoxan asew jiw taeyaxaelbuk, ampathatat laelpi.

³³ Thatbaxo, ampathatbej, toepaxael. Pelax tajjamechan toepaxil. Chajia jum-anpoxan, diachwuaajnakolax japoxan jachiyaxael.

³⁴ "iChiekal taem! iNabey nejchaxoele' babijaxan isaxan, saxa feyaxanbej! iNabey nejchaxoele'bej ampathatpijajan! Japoxan nejchaxoelafulam wut, xan chalechkal paskax wut, xamal laepaxaelam Dios naexasis-elaxtat.

³⁵ Chalechkal paskax wut, xabich jiw nejmamachaxaeli nawuaajnawes-elaxtat.

³⁶ Samata, ixamal duilafulde xan naxanaboexampoxtat! iPomatkoicha Dios kawuaajnafuldebej nejnejchaxoelaxantat mamnikaliajwam Diosliajwa, boejtaliasfulaliajwam nabijasmatkoi pat wut! Japoxan boejtaliatam wut, xamal napelsaximil,

tajwuaajnalel nuilam wut, xan, puexa jiw pakoewkolnan, pejme patx wut” —aech Jesús pejnachalalajwa.

³⁷ Kaematkoisful Jesús naewuajan Dios pejtemplobaxot. Madoi wut, Olivonaechanmuaxxot moejton.

³⁸ Pomatkoicha, kandiaswasap, puexa jiw fulalaecha Dios pejtemploba poxade jumtaelajwapi Jesús naewuajanpoxan.

22

Judiospaklochow nejchaxoelpox jaelsliajwapi Jesús

(Mt 26.1-5, 14-16; Mr 14.1-2, 10-11; Jn 11.45-53)

¹ Mox pawuajna Pascuafiestalajwa. Japamatkoijan jiw xael pan lewadurajila.

² Japamatkoijan sacerdotepaklochow, judíos chanaekabuanapibej, natameja wut, nakaewa najum-aechi: “¿Machiyaxeskat Jesús boesalajwas?” —na-aechi nakaewa. Pe Jesús boesaxisalfak, japi pejlewla xoti jiwliajwa.

³ Do jawut, Satanás low Judas pejmatpuxatxot. Japon Judas Iscariote, kaen Jesús pejnachalan. Japontat doce.

⁴ Do jawut, Judas fulaech sacerdotepaklochow poxade, Dios pejtemploba wetipaklochow poxadebej. Jaxotde pa'a wut, jum-aechon:

—Xamal nejxasinkam wut, xan wasaxaelen Jesús xamalxot —aech Judas.

⁵ Paklochow japox jumtaen wut, xabich nejchachaemili. Do jawut, jum-aechi Judasliajwa:

—Xanalxot Jesús wiatam wut, xanal mosaxaelen plata —aechi.

⁶ Do jawut, Judas ow-aech. Samata, wuajnowetlison pachaemmatkoi, jiw ajil wut Jesúsxot, japamatkoitat wasliajwapon Jesús paklochowxot.

Jesús xaelpox, pejnachala suapich, Pascuafiestanaxaeyax

(Mt 26.17-29; Mr 14.12-25; Jn 13.21-30; 1 Co 11.23-26)

⁷ Dolisdo', pascuafiestalixox. Japafiestatat judíos xael pan lewadurajila. Japapascuafiesta wut, jiw xua'at ovejax jelti's.

⁸ Do jawut, Jesús to'a wut Pedro, Juan suapich, jum-aechon:

—¡Xabua'de naxaeyax isliajwam, ovejawi xaeliajwas Pascuafiestatat! —aech Jesús.

⁹ Japi wuajnaem wut, jum-aechi:

—¿Amxotkat xanal naxaeyax isaxaelen Pascuafiesta nabu'xaeliajwam? —aechi.

¹⁰ Jesús jumnot wut, jum-aechon:

—Jerusalén paklowax patam wut, kaen aton taeyaxaelam, mint xafol wuton kuarnatat. ¡Japon aton fulfalaem, ba lech poxade!

¹¹ Japabapijin jum-amo: “Jiw chanaekabuanan jum-aech: “¿Ampabatutatkat xan tajnachala bu'xaeyaxaelen Pascuafiestanaxaeyax?” —aech jiw chanaekabuanan' —amo bapijin!

¹² Japon bapijin xamal itpaeyaxael athu pejbatupijax, pinjiyax. Wuajna chajia chiekal chaemtas. Jaxotse naxaeyax isaxaelam xatistiajwa —aech Jesús, pejnachala to'a wut.

¹³ Do jawut, pejnachala fulaechlisi Jerusalén paklowax poxade. Pat wuti, puexa, me-ama Jesús chajia jum-aech, ja-aechlinox. Samata, jaxotse naxaeyax ispi Pascuafiestanaxaeyax xaeliajwa.

¹⁴ Xaeliajwa wut, Jesús, pejnachala suapich, japi apóstolespi, chalaklisi mesaxot.

¹⁵ Do jawut, Jesús jum-aech pejnachalalajwa:

—Xan xabich nejxasinkax, xamal suapich, xaeliajwan ampafiestanaxaeyax xan tupax wuajna.

¹⁶ Diachwuajnakolax xan jum-an. Xan pejme xaeyaxinil Pascuafiestanaxaeyax ampahatata. Asamatkoi, Dios xamal bu'wia wut, jawut pejme xaeyaxaelen, xamal suapich, Pascuafiestanaxaeyax Diosxotse —aech Jesús.

¹⁷ Do jawut, Jesús copa chafit puexa pejnachala fiaflalajwa. Jawut Jesús gracias-aech wut Diosliajwa, jum-aechon:

—¡Maj ampot! ¡Kaenanula xamal fiafulde!

¹⁸ Diachwuajnakolax xan jum-an. Pejme feyaxinil vino ampahatata. Hasta Dios puexa pejiw tato'al wut, jawut pejme vino feyaxaelen —aech Jesús.

¹⁹ Do jawut, Jesús panax fit wut, Dios gracias-aech wuton Diosliajwa, panax jalkafal pejnachala kexadiajliajwa. Chaxduw wut pejnachala xaeliajwa, Jesús jum-aech:

—Ampapan itpaei, me-ama tajwit, xan tupaxaelen xot xamalliajwa. Asamatkoi, pan xaelam wut, xan nanejchafaekaliajwam —aech Jesús pejnachalalajwa.

²⁰ Xaeyax kaechatoel wut, Jesús pejme copa chafit wut, jum-aechon:

—Ampavino itpaei, me-ama tajjal. Xan tupax wut, tajjal nakola wut, jiw xan nanaexasitpi, japi beltaeyaxaes babijaxan ispoxanliajwa, tajjal pijaxtat.

²¹ Nawiasaxaelpon tadaelmajiwxot, ma amxot nak-ekondo'.

²² Xan, puexa jiw pakoewkolnan, tɔpaxaelen, me-ama Dios pejjamechan chajia jum-aech. Pe nawiasaxaelpon tadaelmajiwxot, japon kaes pejme xabich nabijasaxael —aech Jesús pejnachalalajwa.

²³ Jesús pejnachala japox jumtaen wut, nakaewa najum-aechnapí:

—¿Achankat xatisxot Jesús wiasaxael japon padaelmajiwxot? —na-aechnapí nakaewa.

Jesús pejnachalaxot, japixot achan kaes paklonaxaelpox

(Mt 20.20-28; Mr 10.35-45)

²⁴ Do jawux, Jesús pejnachala nakaewa najum-aechi: “¿Achankat xatisxot kaes pejme paklonaxael?” —na-aechi.

²⁵ Jesús japox jumtaen wut, jum-aechon japilijwa: “Asatɔajnapijiw, Dios naexaxis-elpi, paklochow tato'las wut, tato'la-esal chamoeyaxtat. Ja-aech wut, paklochow nakiowa jiw nejxasinkas jumchilijwas: ‘Wajpaklochow xabich pachaem’ —chilijwas.

²⁶ Pelax xamal jasoxtat tato'laximil. Wuljoeyaximilbej pamamax najutlijwa. Xamalxot kaen paklonasia wut, japon majt xamal malech tanbichaxael, me-ama pamakan wut, jachilijwapon. Me-ama yamxalan pakoew pakdiachowxot wut, jachiyaxael japon aton.

²⁷ Paklon ek wut xaelijwa mesaxot, pamakan chiekal tataeflison, kamta islijaw pejpaklon to'aspox. Ja-aechon, paklon kaes tato'lan xot. Xanlax jachi-enil. Xamalxotx wut, puexa kajachawaesfulax xamal. Me-ama namaknan wut, ja-an xan xamallijwa” —aech Jesús pejnachalalajwa.

²⁸ Jesús pejme jum-aech pejnachalalajwa: “Xamal nachalafulam, Satanás piach xan naxapajkaful wut.

²⁹ Samata, tapaeyaxaelen xamal tato'lalijwam jiw. Me-ama taj-ax Dios xan natapaei puexa jiw tato'lalijwan, xamalbej jachiyaxaelen.

³⁰ Xan tajmatkoi pat wut jiw tato'lalijwan, jawut kaeyaxtat, xamal swapich, xaeyaxaelen. Feyaxaelenbej. Jawut chalakaxaelam asatɔ-ekaxanxot, paklochow pejtɔ-ekaxanxot, tato'lalijwambej docematanpijiw, Israel tɔajnapijiw” —aech Jesús pejnachalalajwa.

Pedro xanalijaxaelpox Jesús pejnachalanpoxlijaw

(Mt 26.31-35; Mr 14.27-31; Jn 13.36-38)

³¹ Jesús jum-aech Pedrolijwa:

—Simón, ¡chiekal najumtaem! Satanás wuljow Dios tapaelijwas xam xapaejslijwapon. Xabich xapaejsasiapon xam xan nakofslijwam.

³² Pe xan Dios kawɔajna xam xan nanaexasisfulalijwam. Pejme xam xan chiekal nanaexasitam wut, xam kajachawaesfulaxaelam asew tajnachala, japi kaes xan nanaexasisfulalijwa —aech Jesús Pedrolijwa.

³³ Simón Pedro jum-aech:

—Tajpaklon, asew jiw, jiw jebatat xam jia wuti, ¡japibej xan nej naje! Xam boesa wutbejpi, ¡japibej xan nej naboesa! —aech Simón Pedro Jesúslijwa.

³⁴ Jesús jumnot wut, jum-aechon:

—Pedro, xan chiekal jum-an xamlijwa. Amwut, kawaema nejlae-el wutfuk, tres veces xan naxanalijaxaelam. Jumchiyaxaelam: “Xan japon aton matabijs-enil” —chiyaxaelam xanlijwa —aech Jesús Pedrolijwa.

Jesús pejnachala pejme fol wut xalaeyaxaelpoxan, naewɔajnalijwa wuti Dios pejjamechan

³⁵ Do jawut, Jesús jum-aech pejnachalalajwa:

—Xamal to'ax wut Dios pejjamechan naewɔajnalijwam asapaklowaxanpijiw, xamal kefiatx xalaesamatam nejchoxan, plata, asatɔakxajoebej. Xamal masim folam wut, ¿pawewe'pkat asaxan? —aech Jesús, wɔajna chaemt wut pejnachala.

Japi jumnot wut, jum-aechi:

—Xanal nawewe'pa-el —aechi.

³⁶ Do pejme Jesús jum-aech:

—Xamal pejme folam wut, xamalxot pejchoxanpi, ¡japi nej xalae pejchoxan! Xamalxot pejplatapi, ¡japibej nej xalae pejplata! Xamalxot espada kejlpi, ¡thuch naxoelpox nej mowapi! Mot wuti, ¡japaplatatat nej wɔajspi pej-espada!

³⁷ Diachwɔajnakolax xan jum-an. Dios pejjamechan chajia jum-aech, japox diachwɔajnakolax jachiyaxael xanlijwa. Jum-aechox Dios pejjamechan xanlijwa: ‘Japon kastikaxaes. Me-ama babejen wut, jakechiyaxaeson’ —aechox xanlijwa. Puexa chajia lelspx, diachwɔajnakolax japox jachiyaxael xanlijwa —aech Jesús.

³⁸ Do jawut, pejnachala jum-aech:

—Tajpaklon, ama kole-espada —aechi.

Jesús jumnot wut, jum-aechon:

—Ma ampoxtat do mado' —aechon.

Pawulxot, Getsemani, Jesús Dios kawuajanpox
(Mt 26.36-46; Mr 14.32-42)

³⁹ Jesús nakolt wut Jerusalén paklowaxxot, Olivonaechanmuax poxade, me-ama japon pejkabuan. Pejnachala wuchakal fol.

⁴⁰ Jesús pa'a wut jaxotde, jum-aechon pejnachalaliajwa:

—Satanás xamal xapaejaxael. Samata, ¡Dios kawuajande! Ja-am wut, Dios xamal kajachawaesaxael babijax is-elaliajwam —aech Jesús.

⁴¹ Do jawut, Jesús atuaxachon pejnachalaxot tamachaliajwa. Me-ama ia't xadaps wut, jas-isdepon. Jaxotde brixtat nukon Dios kawuajnalijwa.

⁴² Dios kawuajan wut, jum-aechon: “Ax, nejxasinkam wut, ¡nabu'wem nabijasaxaelenpox! ¡Pe nabej is xan nejxasinkaxpox! ¡Isde xam nejxasinkampox!” —aech Jesús, pax Dios kawuajan wut.

⁴³ [Do jawut, chalechkal athulelsik Dios pej-ángel natulaelt Jesús mamnikaliajwa.

⁴⁴ Jesús xabich nejchaxoel tuxaxaelpoxliajwa. Samata, kaes pejme Jesús Dios kawuajnaful. Jawut xabich pasislanaton. Pejsis satat natacholan. Me-ama jal, ja-aech pejsis.]

⁴⁵ Jesús nant wut Dios kawuajanxot, kaxadin pejnachala poxadin. Jaxot japi taenpon, moejt wut. Japi xabich damal, nejxaejwas xoti.

⁴⁶ Do jawut, Jesús jum-aech pejnachalaliajwa:

—¿Ma-aech xotkat xamal moejtam? ¡Nanim! ¡Dios kawuajande babijax isasamatam, Satanás xamal xapaeja wut! —aech Jesús.

Jesús jaeltaspox padaelmajiw
(Mt 26.47-56; Mr 14.43-50; Jn 18.2-11)

⁴⁷ Jesús naksiya wutfuk, Judas xabich jiw bu'pat Jesúsxot. Japon Jesús pejnachalan, japontat doce. Do jawut, mox soepanlison Jesús xusuiliajwa.

⁴⁸ Pe jawut, Jesús jum-aech:

—Judas, ¿xamkat nawiasaxaelam tadaelmajiwxot naxusuyaxtat, xan, puexa jiw pakoewkolnan? —aech Jesús.

⁴⁹ Taen wuti ja-aechpox, Jesús pejnachala jum-aech:

—Tajpaklon, ¿xanalkat ampi jiw beyaxaelen espadatat, xam chamamosliajwan? —aech Jesús pejnachala.

⁵⁰ Do jawut, chalechkal kaen Jesús pejnachalan pej-espadatat boesa wut, kaen aton cho'chikchapon poklalel pejcho't. Japon aton nabist sacerdotespaklokolanliajwa.

⁵¹ Pe jawut Jesús jum-aech pejnachalanliajwa:

—¡Nadokal! —aechon.

Do jawut, cho'chikchaspon Jesús cho'jacha wut, jawut chiekal cho'koelon.

⁵² Pati Jesús jaelsliajwa, japi sacerdotespaklochow, temploba wetipaklochowbej, judíos-ancianosbej. Jawut Jesús jum-aech japiliajwa:

—¿Ma-aech xotkat xamal xafolam espada, iwabej, xan najaelsasiam wut? ¿Xankat xamalliajwa, me-ama babejnan wut, kabuan-an?

⁵³ Kaematkoisful Dios pejtemplobatat xan naewuajnafulax jiw xamalxot. Pe jaxot najaels-emil, Dios patapae-el xot xamal. Pe amwutjel, patlisox, me-ama Dios pejjamechan chajia jum-aech xanliajwa, japox jachiliajwa. Samata, amwutjel Satanás, tato'alpon itkuataxxot, xamal to'a xan najaelsliajwam —aech Jesús.

Pedro xanaliapox Jesús matabijtpoxliajwa
(Mt 26.57-58, 69-75; Mr 14.53-54, 66-72; Jn 18.15-18, 25-27)

⁵⁴ Do jawutlido', Jesús jaeltas japi. Jesús buflaech sacerdotespaklokolan pejba poxade. Jawut Pedro atuaxach fol wuchakal.

⁵⁵ Sacerdotespaklokolan, japon pejbafulmaktxot, temploba weti jit itfoti. Jaxot jit su'chalakax masajiati. Pedrobej jaxot naksu'cha-ek.

⁵⁶ Do jawut, kaeow pawis, japabatat nabistpow, chiekal natachaemtow Pedro, jit naksu'cha-ek wuton. Do jawut, jum-aechow jaxotpijiw jumtaeliajwas:

—Ama kaen, jaeltaspon pejnachalan —aechow Pedroliajwa.

⁵⁷ Pedro xanalia wut, jum-aechon:

—Pawis, xan chinax japon aton matabijs-enil —aech Pedro.

⁵⁸ Do jawux, asanbej pejme taenson. Japonbej jum-aech:

—Diachwuajnakolax xambej, japon pejmatpijnam —aechon Pedroliajwa.

Pedro jumnot wut, jum-aechon:

—jEl! iXan japon pejmupijina-enil! —aechon.

⁵⁹ Do jawux, kaehora wutlejen, asanbej pejme jum-aech:

—Diachwujnakolax ampon, jaeltaspon pejnachalan. Amponbej Galilea tuajnpijin — aechon.

⁶⁰ Pe Pedro pejme jum-aech:

—Xan matabijs-enil jum-amprox —aech Pedro.

Pedro jum-aech wutfuk, jawut kawaema nejla.

⁶¹ Kawaema nejla wut, Jesús wultataen wut, taenon Pedro. Do jawut, Pedro nejchafaet Jesús chajia jum-aechprox: “Amwut, kawaema nejlae-el wutfuk, xam tres veces xanliajwa naxanaliyaxaelam. Jumchiyaxaelam xanliajwa: ‘Xan japon aton matabijs-enil’ —chiyaxaelam” —aech Jesús, chajia jum-aech wut Pedroliajwa.

⁶² Do jawut, japabafalmaktxot Pedro nakolt tathoet poxaliajwade. Jaxotde xabich nowpon, xabich nejxaejwas xot.

Jesús bu'wujajnpaeispox

(Mt 26.67-68; Mr 14.65)

⁶³ Poejiw, weti Jesús, japi bu'wujajnpaeipi Jesús. Baesbejpon.

⁶⁴ Itfumatakusbejpon. Jawut pejme xutulapas. Kaenanula xutulapi jum-aechi Jesúsliajwa: —jum-amde, achan xam xutulap! —aechi.

⁶⁵ Japibej jum-aechi babejjamechan Jesúsliajwa.

Jesús nukpox judiospaklochow pejwujnalel

(Mt 26.59-66; Mr 14.55-64; Jn 18.19-24)

⁶⁶ Kandiasap wut, juimt julan wut, natameja judios-ancianos, sacerdotespaklochow, judios chanaekabuanapibej. (Japi puexa natameja wut, japox pawul Junta Suprema.) Jesús bu'fos wut, bu'pachpon Junta Suprema natamejaxot. Japi pejwujnalel wut Jesús jumtis:

⁶⁷ —iXanal jumtaelajwan xam jum-amde! ¿Xamkat diachwujnakolax Cristowan, Dios to'asponam jiw bu'welajwam? —aechi.

Jesús jumnot wut, jum-aechon:

—Xan jum-an wut: ‘Diasdo’ —an wut, xamal naexaxisaximil.

⁶⁸ Xamal wujnachaemtax wutbej, najumnosaximil.

⁶⁹ Pe xan, puexa jiw pakoewkolnan, ekaxaelen taj-ax Dios poklalel jiw tato'laliajwan, taj-ax suapich. Dios pamamakolan, japon xajup puexa isliajwa —aech Jesús.

⁷⁰ Jawut Jesús wujnachaemtas wut, jumtispon:

—¿Xamkatlap Dios paxulnam? —tispon.

Jesús jumnot wut, jum-aechon:

—iDiasdo! iXanlap japonan, najum-amponan! —aech Jesús.

⁷¹ Do jawut, japi nakaewa najum-aech:

—Xatis nakwewe'pa-el asew jiw nakjumchiliajwa Jesús pejb'u'wujajnpoxliajwa. Xatis wajut chiekal jumtaens, jum-aech wuton: ‘Xan Dios paxulnan’ —aech wuton. Japox jum-aech wut, jum-aechon Dios nejweslapox. Samata, kastikaxaeson —na-aech nakaewa Junta Supremapijiw.

23

Jesús nukpox Pilato pejwujnalel

(Mt 27.1-2, 11-14; Mr 15.1-5; Jn 18.28-38)

¹ Do jawut, japi jiw, Junta Supremapijiw, nana. Bu'follisi Jesús Pilato poxade.

² Jesús Pilato pejwujnalel wut, tuaduti Jesús tasalaliajwa. Jum-aechi:

—Xanal tajut chiekal jumtaenx. Ampon aton pejnaewujnaxtat jiw potujnuchanpijiw xabich palala. Jum-aechbejpon: ‘iNabej mos impuesto Roma gobiernoliajwa!’ —aechon. Jum-aechbejpon: ‘Xan Cristowan, Israel tuajnpijiw tato'laliajwan’ —aechon.

³ Do jawut, Pilato wujnachaemt wut, jum-aechon Jesúsliajwa:

—¿Xamkatlap diachwujnakolax judios pejreynam? —aech Pilato.

Jesús jumnot wut, jum-aechon:

—Diachwujnakolax, xan japonan, me-ama xam jum-am —aech Jesús.

⁴ Do jawut, Pilato jum-aech sacerdotespaklochowliajwa, puexa jiwliajwabej:

—Xanliajwa ampon aton bu'wujanjil kastikaliajwan —aech Pilato.

⁵ Pe nakiowa, japi xabich jumtisnik Jesús kastikaliajwas. Samata, kaes xabich jum-aechfuli:

—Ampon aton pejnaewujnaxtat potujnuchanpijiw xabich palala. Japox naewujnax tuaduton Galilea tuajnxot. Amwutjel japox naewujnaful amxotbej, Judea tuajnxot —aech paklochow Jesúsliajwa.

Jesús nukpox Herodes pejwajnalel

⁶ Pilato jumtaen wut Jesús majt naewwajanpox Galilea tuajnyxot, jawut, wuajnaemton judiospaklochow. Jum-aechon Jesúsliajwa:

—¿Japonkat Galilea tuajnypijin? —aech Pilato.

⁷ Paklochow jum-aech wut: “Amponlap Galilea tuajnypijin” —aech wuti, Pilato to'a soldaw buflaeliajwas Jesús gubernador Herodes poxade, japon Herodes puexa Galilea tuajnypijiw tato'lan xot. Japamatkoian Herodes Jerusalén paklowaxxot.

⁸ Herodes taen wut Jesús bu'fospox japonel, xabich nejchachaemilon. Herodes majt chajia taesapon Jesús, wultaeful xot Jesús koechaxan isfulpoxan. Samata, japonbej pajut chiekal taesia Jesús koechax ispox.

⁹ Herodes xabich wuajnaemtsful Jesús. Pe Jesús kaes jumnos-el wuajnaemtsfulaspoxan.

¹⁰ Jaxot nuil sacerdotespaklochow, judíos chanaekabuanapibej. Japi tasala Jesús xabich jumbisnikpoxat.

¹¹ Do jawut, Herodes, pejsoldaw swapich, bu'wujajnapaeipi Jesús. Xajoellisipon chamoe yax, me-ama rey pijax, jasox, japoxtat taxaxaelialiajwas. Me-ama judíos pejrey wut, ketison. Do jawux, Herodes pejsoldaw to'a Jesús pejme buflaeliajwas Pilato poxade.

¹² Majt Pilato, Herodes swapich, nadaelmataan. Pe japamatkoitat japi pejme najumchachaemil.

*Pilato to'apox Jesús kemamatlaliajwas
(Mt 27.15-26; Mr 15.6-15; Jn 18.39-19.16)*

¹³ Do jawux, Pilato wullala natamejlaliajwa sacerdotespaklochow, judiospaklochowbej, asew judiosbej.

¹⁴ Dolisi, natameja wut, Pilato jum-aech japiliajwa:

—Xamal ampon aton buflaeman xanlel. Xan najum-am: ‘Ampon aton pejnaewwajnaxtat potuajnychanpijiw xabich palalaful’ —na-am xamal. Xamal nejwujajnalel ampon chiekal wuajnaemtax bu'atasalampoxanliajwa. Ampon aton chinax babijax is-el kastikalialiajwas.

¹⁵ Herodes nejchaxoelbej: ‘Ampon aton babijax is-el’ —aech Herodes, nejchaxoel wut Jesúsliajwa. Samata, Herodes kastika-el Jesús. Asbuan jumch kaxa to'anpon Jesús xanlel. Amwutjel xamal chiekal matabijam. Ampon aton babijax is-el japoxtat tupaliajwa.

¹⁶ Samata, tajsoldaw keto'axaelen asbuan jumch selsliajwas. Do jawux, nakolsax tapaeyaxaelen —aech Pilato japiliajwa.

¹⁷ [Kaewaechful wut, Pascuafiesta wut, Pilato jitapaei kaen jiw jebatat jiaspon nakolsliajwa, jiw wuljowwapon. Pilato jasox is, jiw nejchachaemlaliajwa japonliajwa.]

¹⁸ Pilato japox jum-aech wut: “Jesús nakolsax tapaeyaxaelen” —aech wuton, judíos nejlasful wut, jum-aechfuli:

—¿Japon kematamatalde cruztat! ¡Barrabáslax nakolsax tapaem! —aechfuli.

¹⁹ Japon Barrabás majt naba, Pilato pejsoldaw swapich, Jerusalén paklowaxxot. Jiw babejpon. Samata, jiaspon jiw jebatat.

²⁰ Pilato tapaesia Jesús nakolsliajwa. Samata, pejme jum-aechon japi jiwliajwa.

²¹ Pe Pilato naksiya wut, japi jiw kaes nejlasful wut, jum-aechfuli:

—¿Japonlax kematamatalde cruztat tupaliajwapon! —aechfuli, nejlasful wut Jesúsliajwa.

²² Pilato pejme jum-aech japiliajwa:

—¿Ma-aech xotkat xamal jum-am: ‘¿Japon nej tupe!’ —amkat? ¿Achababijaxkaton is? Xanliajwa japon aton bu'wujajanjil japoxtat tupaliajwa. Samata, tajsoldaw keto'axaelen asbuan jumch selsliajwas. Do jawux, nakolsax tapaeyaxaelen japon —aech Pilato judiosliajwa.

²³⁻²⁴ Pe japi xabich jumbisnik wut, nejlasful. Jawut jum-aechfuli:

—¿Japon kematamatalde cruztat tupaliajwa! —aechfuli.

Japi xabich jumbisnik xot, Pilato baxael ow-aechlison.

²⁵ Samata, Pilato pejsoldaw to'a tapaeliajwapi nakosax Barrabás jiw jebaxot, japi wuljowwapon nakolsliajwa. Barrabás jiw jebatat majt jias, naba xoton, soldaw swapich, asew jiw ba xotbejpon. Do jawutbej, Pilato to'a Jesús kemamatlaliajwas cruztat, me-ama japi jiw wuljow japon isliajwa japox.

*Jesús kemamatlaspox cruztat
(Mt 27.32-44; Mr 15.21-32; Jn 19.17-27)*

²⁶ Do jawux, soldaw, japi bu'fol Jesús kemamatlaliajwas cruztat. Do jawutbej, paklowaxlel Simón fulaen. Japon Cirene paklowaxpijin. Xensliajwa wut, soldaw jaeltason. Do jawut, to'ason Jesús pijax cruz xalaeliajwa, Jesús xafolox. Jesús kaes xalaeyaxil, xabich boejil xotlison kastikaxtat. Dolisdo', japon Simón xafolon cruz Jesús pejwuchakal.

²⁷ Do jawut, xabich jiw Jesús pejwuchakal fol. Japixot xabich watho' wənow. Nowpi pinjametat, xabich nejxaejwas xoti Jesús.

²⁸ Jesús wəltataen wut japi watho'lel, jum-aechon:

—Watho', Jerusalén paklowaxpijwam, jxan nabej nawuəo'! jNawuəoem najutliajwa, naxiliajwabej!

²⁹ Nabijasmatkoi pat wut, jiw xabich nabijasaxael. Japamatkoitat jiw jumchiyaxael: 'Amwutjel wepachaems nafoenapi, asew xijilpiwej, paxi ajil xot nabijasliajwa' —chiyaxaeli.

³⁰ Japamatkoitat jiw jumchiyaxaelbej pinaməaxanliajwa, cha-aelməaxanliajwabej: 'Nat-acholnamik xanallelsik nakəlalajwam, jasoxtat namoehaliajwambej' —chiyaxaeli, kaes nabijasfula-elaliajwa.

³¹ Xan, babijax is-enilponan, nakematamatlaxaeli cruztat. Pe xabich babijaxan ispi, xabich kaes pejme nabijasaxael, wetapach wut nabijasmatkoi —aech Jesús japi watho'liajwa, wənowspiliajwa.

³² Dolisdo', soldaw bu'fol wuti Jesús, jawutbej bu'foli kolenje kethakan, japibej kaenanəla kematamatlaliajwas pejczuztat, Jesús suapich.

³³ Bu'pach wuti kaeməax pawəlxot, Matnaethitməaxxot, jaxot Jesús kematamatlas cruztat. Jaxotbej kolenje kethakan kematamatlas cruztat. Asan chanuk Jesús pejpoklalel. Asan chanuk Jesús pejsoenalel.

³⁴ Jesús cruztat wut, jum-aechon:

—Ax, jampi jiw beltaem! Matabija-eli ispoxlajwa —aech Jesús soldawliajwa.

Jesús kematamatali, japi soldaw nakakujti ia'xix matabijaliajwa, achan kanaxael kaenanəla Jesús pejnaxoe.

³⁵ Jiw jaxoti natachaema puexa ja-aechox. Jaxotbej judíospaklochow. Jawut japi bu'wəajanpaei Jesús. Nakaewa najum-aechi:

—Asew jiw bu'wiapon. Diachwəajnakolax ampon Cristo wut, Dios to'aspon wut jiw bu'welialajwa, jma amwut pajut nej nabu'wepon! —aechi Jesúsliajwa, bu'wəajanpaei wut.

³⁶ Soldawbej bu'wəajanpaeipi Jesús. Kaesəapich soldaw mox soera Jesúsxot. Duajsasiapi vino, xathuyamint, Jesús suiliajwa xabich wəxaenkasamatas.

³⁷ Jawut jum-aechi Jesúsliajwa:

—Xam judíospaklokolnam wut, jnajat nabu'wem! —aechi Jesúsliajwa.

³⁸ Jesús pejta'tabijla lelspx chaduch. Japox lelspx jum-aech: "Ampon judíos pejrey" —aechox.

³⁹ Asan kethakan cruztat kematamatlaspon, japonbej jum-aech bu'wəajanpaei Jesús:

—Xam Cristowam wut, Dios to'aponam wut jiw bu'welialajwam, jma amwut najut nabu'wem! Do ja-aech wut, jxanalbej nabu'wem! —aech kethakan Jesúsliajwa.

⁴⁰ Asan kethakan buxfiat pejnachalan bu'wəajanpaeipox. Do jawut, jum-aechon:

—jXam japox nabej jum-aeche' Jesúsliajwa! ¿Xamkat nejlewla-el Diosliajwa, xatisbej təpaxaes xot?

⁴¹ Xatis nabijatas nakkastikapoxtat, babijaxan isas xot. Amponlax chinax babijax is-el —aech kethakan pejnachalanliajwa.

⁴² Kethakan japox jum-aech wut, jum-aechon Jesúsliajwa:

—Jesús, xam puexa jiw tato'lax təadutam wut, jjawutbej xan nanejchadu'e! —aech kethakan.

⁴³ Jesús jumnot wut, jum-aechon kethakanliajwa:

—Diachwəajnakolax xan jum-an. Ma amwut, xam Diosxotaxaelam, xan suapich —aech Jesús kethakanliajwa.

Jesús təppox cruztat

(Mt 27.45-56; Mr 15.33-41; Jn 19.28-30)

⁴⁴ Jesús təpaliajwa wut, juimt matnoch ek wut, xabich itkəatnik tres hora potəajnya.

⁴⁵ Itkəatnik xabich, juimt chiekal itliaka-el xot. Do jawut, Dios pejtemplobatutat pinabu', duchpox batutat, najupathiakchakas.

⁴⁶ Do jawut, Jesús nejlakcha wut, jum-aechon pax Diosliajwa:

—Ax, jma amwut xan təpaxaelen! jXam xanaboajtəx taj-əspiritu chiekal nawetataeflaxaelampox! —aech Jesús.

Jesús japox jum-aech wut, təplison.

⁴⁷ Soldawcapitán taen wuton Jesús təpax, do jawut, jum-aechon Diosliajwa: "Dios, xam xabich pachaemam" —aechon. Jum-aechbejpon jaxoti jumtaeliajwa: "Diachwəajnakolax ampon aton chinax babijax is-el təpaliajwa jasoxtat" —aech soldawcapitán.

⁴⁸ Puexa japox taenpi, nawia wut pejbachan poxade, kaenanəla pajut namatiafdakapi, xabich nejxaejwas xot.

⁴⁹ Asew jiw, matabijapi Jesús, japi ataxach natachaemanuil. Jaxotbej watho' nuil, fulaenpi Galilea tujnuxot.

Patupan Jesús ochpox muaxwujtat
(Mt 27.57-61; Mr 15.42-47; Jn 19.38-42)

⁵⁰⁻⁵¹ Jerusalén paklowaxxot aton duk. Japon pawul José. Japon Arimatea paklowaxpijin, Judea tujnuxot. Japon pachaem. Chiekal dukbejpon Diosliajwa. Japon judiospaklochowxot, Junta Supremapijin. Pe japon kaenejchaxoelaxa-elon Junta Supremapijiw isopxliajwa Jesúsliajwa. Japon wujnawet Dios pejmatkoi tudusliajwapox, Dios pejiw tato'laxaelmatkoi.

⁵² Jesús tap wut, José fulaech Pilato poxade wuljoeliajwapon patupan Jesús muthsliajwabejpon. José wuljow wut, Pilato ow-aech.

⁵³ Do jawux, José pat wut patupan Jesúsxot, kuskulison Jesús cruzxotsik. Jawut José xakoeya patupan sábanabu'tat, pabujabu'tat, osliajwa muaxwujxot. Japamuxwuj pajelwuj. Patupan os-esalfak.

⁵⁴ José japox is napatamatkoi wujna, japamatkoi chawujnachaemsliajwa. Jawut, José japox isax ketoet wut, cha-aex we'puk nadusliajwa napatamatkoi.

⁵⁵ Japi watho', majt Jesús naknanuamti Galilea tujnuxot. Japi watho' wachakal fol, José fulaech wut muaxwuj poxade. Samata, taeni Jesús ochpox.

⁵⁶ Do jawut, japi watho' kaxa nawen wut pejba poxade, chaemtlisi perjumamin, xabejasapanbej, patupan joelaliajwa. Do jawut, japi napata, napatamatkoi xot. Me-ama Moisés chajia lelpox jum-aech, ja-aechlisi.

24

Patupan Jesús mat-ech pejme dukaliajwa
(Mt 28.1-10; Mr 16.1-8; Jn 20.1-10)

¹ Dominkomatkoi, kandiawasap wut, watho' fulaech patupanwuj poxade. Japi xafol chajia chaemtpi, perjumaminan, xabejasapanbej.

² Jaxot pa'a wut, taeni ia't pinjit, jajaerat, asalelaxach nukpox, patupanwujfafa xat-elspot.

³ Pe japi watho' japawuj low wut, tae-eli patupan.

⁴ Jawut xabich beljowpi. Matabija-eli isaxaelpox. Do jawut, chalechkal japi watho' taen kolenje Dios pej-ángeles, jaxot nuil wuti. Japi kolenje ángeles pejnaxoe xabich nakliafan. Me-ama chamx, jakaliaf-aech japi pejnaxoe.

⁵ Watho' pejlwla xot, brixtat nuili. Sat makxabijindikbejpi. Jawut Dios pej-ángeles jum-aech watho' liajwa:

—¿Ma-aech xotkat xamal wulwekam patupan? ¡Jesús mat-echlison pejme dukaliajwa!

⁶ Amxot ajil patupan. Ma amwutjel dukpon, mat-ech xot. ¡Nejchafae'e, xamalliajwa chajia jum-aech wuton, Galilea tujnuxot wuton!

⁷ Japon chajia jum-aech: “Xan puexa jiw pakoewkolnan, asew jiw nawiasaxael asajiwxot tupaliajwan, cruztat nakematamatlaliajwa. Tres matkoi wut, Dios namat-eyaxael pejme dukaliajwan” —aechon, chajia jum-aech wut —aech Dios pej-ángeles japi watho' liajwa.

⁸ Do jawut, japi watho' nejchafaet Jesús chajia jum-aechpox japiliajwa.

⁹ Watho' kaxa nawen wut Jesús ochxotdin, puexa japoxan chapaeipi once apóstolesxot, asew jiwliajwabej.

¹⁰ Japi watho' xot, kaeow pawul María. Japow Magdala paklowaxpijow. Asaow pawul Juana. Asaow pawul María. Japow Santiago pen. Kaes asew watho' bej japixot.

¹¹ Apóstoles jumtaen wut watho' jum-aechpox, jum-aechi, nejchaxoel wut: “Watho' pajut pejkaechantat faekalap” —aech apóstoles, nejchaxoel wut. Samata, naexaxis-eli watho' chapaeisxot.

¹² Asew naexaxis-el wut, Pedro najae'e Jesús muthas poxade. Pat wuton, patupanwuj natachaemsepon. Jawut taenon sábanabu'ankal. Do jawut, Pedro kaxadin wut, xabich nejchaxoelafal taenpoxliajwa.

Jesús natulaeltprox kolenje pejnachalanxot, fol wuti Emaús paklowaxniamtat
(Mr 16.12-13)

¹³ Dominkomatkoi wut, kolenje Jesús pejnachalan Jerusalén paklowaxxot nakola Emaús paklowax poxaliajwade. Emaús paklowax pasliajwa, me-ama once kilómetros.

¹⁴ Nuamtat fol wut, nospaefuli Jesús cruztat kematamatlaspoxliajwa.

¹⁵ Nospaeful wutfuki, Jesús pajut mox soepan japixot. Do jawut, Jesús nakfol japi.

¹⁶ Japi taen Jesús. Pe japi matabija-el japon Jesúspon, Dios tapae-esal xoti japi matabijsliajwa Jesús.

¹⁷ Do jawut, Jesús wujnachaemt wut, jum-aechon:

—¿Achaxkat xamal nospaelpam, nuamtat folam wut? —aech Jesús.

Japi nuiljaba. Xutampapi nejxajewaspox.

¹⁸ Kaen japixot pawul Cleofas. Japon jum-aech:

—¿Xamkat fulaeman Jerusalén paklowaxxot? ¿Xamkatlap kaenam matabijs-emilponam ja-
aechox ampamatkoijan Jerusalén paklowaxxot? —aech Cleofas Jesúsliajwa.

¹⁹ Jesús wuajna chaemt wut, jum-aechon:

—¿Achaxkat ja-aech Jerusalén paklowaxxot? —aech Jesús.

Do jawut, japi jum-aech:

—Jesús Nazaretpijin, Dios pejprofeta, japon xabich koexaxan is Dios pejpamamaxtat.
Jiw chiekal naewuajnafulbejpon Dios pijaxtat. Jasox isfulon xabich jiwliajwa.

²⁰ Sacerdotespaklochow, wajpaklochowbej, asajiwxot wiatipon tupalajwa. Samata,
cruztat kematamatlas.

²¹ Xanal nejchaxoelx japonliajwa: 'Xatis judíos japon nakbu'weyaxael asatwajnapijiw
naktato'alpox' —an xanal, nejchaxoelx wut japonliajwa. Pelisox tres matkoije japon
tupox.

²²⁻²³ Asew watho' xanalxot ampakandiawasap fulaech patupanwuj poxade. Pe patupan
Jesús ajil wut, kaxa naweni bachadin. Japi watho' xanal nachapaei, Dios pej-ángel^{es} natu-
laela wut japixot jumtispox. Jumtis japi watho': '¡Jesús mat-echlison! ¡Ma amwutjel pejme
dukliison!' —tis japi watho'. Japox xanal jumtaenx wut, xabich nejchaxoelx japoxliajwa.

²⁴ Do jawux, asew xanalxotpijw fulaech patupanwuj poxade pajut chiekal taeliajwa. Do
jawut, taeni puexa, me-ama watho' jum-aech. Pe tae-eli patupan Jesús —aechi Jesúsliajwa,
japi kolenje, Emaus paklowax poxade fulaechpi.

²⁵ Do jawut, Jesús jum-aech japiliajwa:

—Xamal xabich matnaetinkam. Naexasis-emil profetas chajia lelpox Cristoliajwa.

²⁶ Matabija-emilbej Dios pejjamechan. Cristo, Dios to'aspon jiw bu'welajwa, japon majt
xabich nabijasaxael. Do jawux, mat-eyaxaeson pejme dukaliajwa. Jiw tato'laxaelbejpon
Diosxotse —aech Jesús pajutliajwa.

²⁷ Do jawut, Jesús chiekal chanaekabuana Dios pejjamechan chajia jum-aechox japonli-
ajwa. Jawutbej chiekal chanaekabuanaapon Moisés chajia lelpoxliajwa. Do jawutbej, Jesús
chiekal chanaekabuana Dios pejprofetas chajia lelpox, jachiyaxaespox japonliajwa.

²⁸ Emaús paklowax pasliajwa wuti, jawut Jesús, me-ama matnoch xensliajwa wut, ja-
aechon.

²⁹ Pe japi kolenje xabich jum^{is}bnik japon namanaliajwa japixot. Jum-aechi:

—¡Namande xanalxot moejsliajwam! Tuilalisox. Itku^anikafulbejlisox —aechi.

Do jawut, Jesús ow-aech. Lowlison namanaliajwa, japi swapich.

³⁰ Chalak wutlisi mesaxot naxaeliajwa, jawut Jesús panax fit wut, gracias-aechon Diosli-
ajwa. Do jawut, panax jalnat wut, chaxduwpon japi kolenje.

³¹ Do jawutbej, japi chiekal matabija japon diachwujnakolax Jesúspon. Jawut chalechkal
Jesús naxaelcha.

³² Naxaelcha wuton, nakaewa japi kolenje najum-aechna:

—Diachwujnakolax xabich nejchachaemlas, nakfol wuton xatis, chiekal
nakchanaekabuana wutbejpon Dios pejjamechan, chajia lelpox —na-aechi nakaewa.

³³ Do jawut, kamta nanapi kaxaliajwade, Jerusalén paklowax poxade. Jaxotde pa'a wut,
wuajna natamejal once apóstoles, asewbej.

³⁴ Japi apóstoles jum-aech kolenje, jelpatiliajwa:

—Diachwujnakolax wajpaklon Jesús mat-ech. Pejme dukliison. Jesús natulaelt Simónxot
—aechi.

³⁵ Do jawut, japi kolenje, jelpati, chapaei, nuamtat fol wut japiliajwa ja-aechpox. Cha-
paeibejpi, Jesús panax jalnat wut japi xaeliajwa. Do jawutbej, pajut chiekal matabijapi,
diachwujnakolax japon Jesúspon.

Jesús natulaelt pox pejnachala natamejaxot

(Mt 28.16-20; Mr 16.14-18; Jn 20.19-23)

³⁶ Japi kolenje japox chapaei wutfak, jawut chalechkal Jesús natulaelt japixot. Do jawut,
Jesús japi kejacha wut, jum-aechon:

—¡Dios nej kajachawaes xamal chiekal duilaliajwam! —aechon.

³⁷ Xabich belwanapi, nejchaxoel wut, jum-aech xoti: "Ampon Jesús-el. Pej-ael" —aech
xoti, nejchaxoel wut.

³⁸ Jesús jum-aech:

—¿Ma-aech xotkat xamal puexa belwam? ¿Ma-aech xotbejkat naexasis-emil xan namat-
epoxliajwa pejme dukaliajwan?

³⁹ ¡Taem tajke-e, tajtuakanbej! Xanlap japonan. ¡Najacham! ¡Nataem chiekal! Espiritu wejisal pawí, pathibej. Me-ama xan, jachi-el —aech Jesús.

⁴⁰ Buxtoet wut, itpaelison pejke-e, pejtukaanbej.

⁴¹ Jesús pejnachala xabich nejchachaemil, pejme taen wuti Jesús. Pe chiekal naexasis-elfuki, diachwajnakolax japon Jesúskolan wut, xabich nejchaxoelanuul xoti. Do jawut, Jesús pejme jum-aech japiliajwa:

—¿Xamalkat naxaeyax xan xaeliajwan? —aech Jesús.

⁴² Jawut chaxdutipon baxin chabosan, jalnaspox.

⁴³ Do jawut, Jesús baxin fit. Jawut puexa pejnachala pejwajnael xaelon.

⁴⁴ Do jawutbej, Jesús jum-aech japiliajwa:

—Japoxanliajwa xamal chajia jum-an, tuxaxaelenpoxliajwa tupa-enil wutfuk, namat-esaxaelpoxliajwabej pejme dukaliajwan. Japoxanliajwa Moisés chajia lel, profetasbej. Salmosfutat lels japoxanliajwa. Samata, japoxan ja-aechlisox xanliajwa —aech Jesús pejnachalaliajwa.

⁴⁵ Do jawut, Jesús chiekal chanaekabuana pejnachala, japi chiekal matabijaliajwa Dios pejjamechan, chajia lelspxoxan, jum-aech wut Jesúsliajwa.

⁴⁶⁻⁴⁷ Jesús pejnachala chiekal chanaekabuana wut, jum-aechon:

—Dios pejjamechan chajia jum-aech xanliajwa: ‘Cristo, Dios to’aspon jiw bu’weliajwa, japon tuxaxael. Tuxpox tres matkoi wut, japon mat-esaxaes pejme dukaliajwa. Do jawux, pejjiw tudusaxael japon pejwajnan naewajnalialiajwa Jerusalén paklowaxxot. Do baxael, japi naewajnaxael asew jiw, asatujnuchanpijiw. Japox Cristo pejjiw isfulaxael jiw kofaliajwa babijaxan ispxoxan beltaeliajwasi Dios’ —aech Dios pejjamechan, chajia jum-aech wut xanliajwa.

⁴⁸ Diachwajnakolax japoxan chiekal ja-aechlisox. Amwutjel xamal najut chiekal taenam. ¡Japoxan xamal chapaefulde asew jiw!

⁴⁹ Xan to’axoekan Espiritu Santo xamalliajwa, Dios chajia jumdutpon xamal kajachawaesfulalialiajwapon. ¡Xamalfuk kawetaxaelam Jerusalén paklowaxxot wujnawesliajwam Espiritu Santo xamal nejmatpuatanxot pasliajwasik! Dolisdo’, Espiritu Santo pask wut, mamnikaxaelam Dios pijaxtat —aech Jesús pejnachalaliajwa.

Jesús bu’fospx athu poxase

(Mr 16.19-20)

⁵⁰ Do jawux, Jesús pejnachala bu’fol Jerusalén paklowaxxot, Betania paklowaxlel poxade. Pa’a wuti mox Betania paklowaxxot, Jesús muxaxxachot Dios kawujnalialiajwa pejnachalaliajwa, Dios kajachawaesfulalialiajwas japon pejnachala.

⁵¹ Jesús kawujnan wutfuk Dios pejnachalaxot, jawut Dios bu’foslison athu poxase.

⁵² Jesús pejnachala japox taen wut, brixtat nuili itpaeliajwa sitaeyax Jesúsliajwa. Do jawux, kaxa nawen wut Jerusalén paklowax poxadin, japi xabich nejchachaemil.

⁵³ Kaematkoisful, Dios pejtemplobatat Dios kawujnan wut, jum-aechi Diosliajwa: “Dios, xam xabich pachaemam” —aechfuli.

Juan lelpox Jesucristo pejuwajan

Cristo, Dios paxulan, japon dukpox ampathat wujna

¹ Majt akaseskolaxtat, ampathat is-esal wutfuk, Cristo wujna chajia duk, pax Dios suapich. Pe japonbej Dios. Samata, itpaeipon Dios pejmatabijsax jiw matabijaliajwa japoxan.

² Diachwujnakolax dukon, pax Dios suapich, akaseskolaxtat. Amwutjel japon nakiowa duk.

³ Dios pijaxtat Cristo is ampathat, thatbaxobej. Isbejpon puexa ampathatatpi, thatbaxotatpibej. Japoxan Cristo is-el wut Dios pijaxtat, puexa chiekal ajilaxael. Ajilaxael ampathat, thatbaxobej.

⁴ Cristo pijaxtat jiw laelp ampathatat. Japon tapae-el wut, jiw ampathatat laelpaxil. Tapaeibejpon jiw matabijaliajwa diachwujnakolaxpox Diosliajwa. Samata, Cristo, me-ama itliakax. Itliakon jiwliajwa.

⁵ Me-ama itliakax itkuataxxtot itliak wut, ja-aechbej Cristo. Itkuatax itkuasaxil itliakax. Satanás, me-ama itkuatax. Satanás xajupaxil toesliajwa Cristo.

Juan, jiw bautisan, naewujnapox

⁶ Dios pejprofeta, majt ampathatat laejapon, pawul Juan. Japon naewujnan jiw Dios buxt'o'aspoخان.

⁷ Samata, japon jiw naewujnan matabijtpoxan Cristoliajwa, japi jiw naexasisliajwabej Cristo.

⁸ Juan Cristowa-el. Japon to'as jiw naewujnaliajwa Cristo wujna.

⁹ Diachwujnakolax Cristo fuloek ampathatasik jiw matabijaliajwa, achan Dios.

¹⁰ Cristo chajiakolaxtat ampathat is Dios pijaxtat. Do jawux, Cristo pajut duk ampathatat. Pe ampathatpijiw matabija-el japon Cristopon, Dios paxulanpon.

¹¹ Paskon pejiwixotsik. Pe judios naexasis-el japon Dios paxulanpon.

¹² Pe asew jiw lax, naexasiti Cristo, japon Dios paxulanpon, japi jiw Dios tapaeis Dios paxi nadofaliajwa.

¹³ Japi penjiwxtot nalaelapoxtat, Dios paxi nadofa-el. Dios tapaei is xoti, japi Dios paxi nadofa Cristo pijaxtat.

¹⁴ Cristo nalaelt ampathatat, me-ama yamxi ampathatat nalaela wut, ja-aechon. Dukon xatixot ampathatat. Cristo xabich nejxasink puexa jiw. Diach paeibejpon. Xanal taenx pejpamamax, pax Dios chaxduchpox japon kaekolan paxulanliajwa.

¹⁵ Juan, jiw bautisan, chajia jum-aech jiw matabijaliajwa Cristo fulaeyaxoekpox. Samata, Juan pinjametat jum-aechon: "Xan chajia jum-an Cristoliajwa: 'Xan fulaenx japon wujna. Fulaeyaxaelpon, japon kaes pejme paklonaxael. Me-ama xan, jachiyaxilon, japon wujna chajia duk xot Diosxotse' —an xan" —aech Juan, jiw bautisan, Cristo pejpasaxliajwa.

¹⁶ Cristo xabich nejxasink puexa jiw. Samata, isful pomatkoicha pachaempoxan xatistliajwa.

¹⁷ Moisés, judios pejuwajnapijin, chajiakolaxtat japon naewujnan judios Dios tato'alpoxan. Baxael, Cristo pat japon chiekal jiw naewujnaliajwa Dios pejneixasiyax jiwliajwa. Naewujnanbejpon diachwujnakolaxpox.

¹⁸ Kaen aton tae-el Dios. Pe Dios paxulan, dukpon paxxotse, japon lax chiekal matabijit pax Dios. Samata, japon pijaxtat matabijas, ma-aech Dios.

Juan, jiw bautisan, wujnachaemtaspoخان jiw, japon Cristo wut

(Mt 3.11-12; Mr 1.7-8; Lc 3.15-17)

¹⁹ Asamatkoi wut, judiospaklochow. Jerusalén paklowaxpijiw, japi to'a sacerdotos Juan poxade. To'abej kajachawaetpi sacerdotos. Japi to'as wujnachaemsliajwapi Juan. Pat wuti Juanxot, japi jum-aech:

—¿Xamkat achanam? ¿Xamkatlap Dios to'asponam? —aechi Juanliajwa.

²⁰ Juan diachwujnakolax chiekal paei. Samata, jumnot wut, jum-aechon japi jiw chiekal jumtaeliajwa:

—Xan Cristowa-enil. Dios to'aspona-enil puexa jiw bu'welijaowan —aech Juan.

²¹ Japi pejme wujnachaemt wut, jum-aechi:

—¿Xamkat achanam? ¿Xamkatlap Elias, Dios pejprofetam? —aechi Juanliajwa.

Juan jumnot wut, jum-aechon japiajwa:

—Xan japona-enilbej —aechon.

Do jawut, pejme wujnachaemt wut, jum-aechi:

—¿Xamkatlap asanam 'Dios pejprofeta, fulaeyaxaelpon' —tisonam? —aechi Juanliajwa.

Jawut, Juan jumnot wut, jum-aechon:

—Xan japona-enilbej —aechon.

²² Japi pejme jum-aech:

—Xam Dios pejprofeta-emil wut, ¿achanamkat xam? Xanal xalaesian wuajan nato'apilajwa. ¿Achaxkat xanal najumchiyaxaelam xam najutliajwa? —aechi Juanliajwa.

²³ Do jawut, Juan jumnot wut, jum-aechon wuajnaemtaspiilajwa:

—Xan patx, pajilaxtat nejlasfulax wut jumchilijwan: '¡Kofim babijaxan isfulampoxan! ¡Ja-amde japox wajpaklonliajwa! Ja-am wut, me-ama jiw wuajna nuamt chiekal chaemt paklon pasliajwa, jachiyaxaelam nejnejchaxoelaxantat' —ansfulax, me-ama Isaías, Dios pejprofeta chajia jum-aech —aech Juan, jiw bautisan, wuajnaemtaspiilajwa.

²⁴ Fariseos to'aspibej, japi wuajnaemt wut, jum-aechi Juanliajwa:

²⁵ —Xam Cristowa-emil wut, Elías-emil wutbej, asan Dios pejprofeta-emil wutbej, ¿ma-aech xotkat xam jiw bautisam? —aechi Juanliajwa.

²⁶ Juan jumnot wut, jum-aechon fariseos to'aspilajwa:

—Xan jiw bautisax mintat, japi jiw babijaxan ispoxan kofapi. Pe asan xatisxotpon, japon xamal matabija-emilfak.

²⁷ Japon wuajna xan fulaenx. Fulaeyaxaelponliajwa xan pachaema-enil japon pejka-jachawaesnanliajwa, japon kaes pejme paklon xot. Samata, xan pachaema-enil jolsliajwan japon pejtuaqxajoelax —aech Juan fariseos to'aspilajwa.

²⁸ Jasoxtat Juan wuajnaemtas Betania paklowaxxot, Jordánlajt we-enlelde, juimt julanlelsan, Juan jiw bautisafulxot.

Cristo, me-ama Dios pejcordero, ja-aechpox

²⁹ Kandiawa wut, Juan taen Jesús, mox fulaen wut japonlel. Jawut Juan jum-aech jiwliajwa: "¡Tae'nik! Amponlap, me-ama Dios pejcordero, ja-aechpon. Japon asamatkoi tɔp wut, mosaxael puexa jiw babijaxan ispoxanliajwa.

³⁰ Japonliajwa xan chajia jum-an: 'Xan fulaenx japon wuajna. Fulaeyaxaelpon, japon kaes pejme paklonaxael. Me-ama xan jachiyaxilon, japon chajia wuajna duk xot Diosxotse' —an xan.

³¹ Majt japon xan chiekal matabijs-enil. Pe xan fulaenx jiw bautisaliawjan mintat, Israel tuajnɔpijiw matabijaliawjapi japon" —aech Juan jiwliajwa, jum-aech wuton Cristolijwa.

³² Do pejme Juan jum-aech jiwliajwa: "Xan taenx, Espiritu Santo athesik fuloek wut a-utat Jesús pejmatwuajjasik. Fulok wut, na-eton japonxot.

³³ Majt xan chiekal matabijs-enilfak, achan Cristo. Ja-an wut, Dios, xan nato'apon jiw bautisaliawjan mintat, chajia najum-aechon: 'Taenam wut Espiritu Santo, fuloek wut aton matwuajjasik na-esliajwa japonxot, japonlap Cristowaxael. Do jawux, japon to'axael Espiritu Santo xamal nejmatwuatanxotalijwa' —na-aech Dios.

³⁴ Xan japox taenx. Samata, Jesúsliajwa jum-an: 'Diachwuajnakolax japon Dios paxulan' —an xan" —aech Juan, jiw bautisan, jiwliajwa.

Jesús matxoelamakanotpox poejiw, japon pejnachalialijwa

³⁵ Do kandiawa wut, Juan, jiw bautisan, pejme jaxoton, kolenje pejnachalan suapich.

³⁶ Juan taen wut Jesús xensax, jawut jum-aechon japi kolenjelialijwa:

—¡Tae'nik ampon, me-ama Dios pejcordero, ja-aechpon! —aech Juan kolenje pejnachalanliajwa.

³⁷ Japi kolenje, Juan pejnachalan, jumtaen wuti Juan jum-aechpox, japi fulafol Jesús.

³⁸ Do jawut, Jesús waltataen wut, taenon fulafospi. Jawut wuajnaemt wut, jum-aechon japilijwa:

—¿Achaxkat xamal wulwekam? —aech Jesús japilijwa.

Japi jumnot wut, jum-aechi:

—Jiw chanaekabuanan, ¿amxotkat xam dukam? —aechi Jesúsliajwa.

³⁹ Jesús jumnot wut, jum-aechon japilijwa:

—¡Xabua't xan dukxot taelijwam! —aech Jesús japilijwa.

Do jawut, japi nakfol Jesús. Do jawutbej, japi taen Jesús dukxot. Jawut japi nama japonxot, xabich tuila xotlisox.

⁴⁰ Juan, jiw bautisan, jum-aechpox jumtaenpi, japixot kaen pawul Andrés. Japon Simón Pedro pakoewan.

⁴¹ Do buxtoet wut nospaeyax, Jesús suapich, jawut Andrés wulwek pakoewan, japon pawulpon Simón. Faen wut, jum-aechon pakoewanliajwa:

—Xanal taenx Mesías —aechon. ('Mesías' —aech wut, japajame jumchilijwa: 'Cristo, Dios to'aspon jiw bu'welijwa' —chilijwapox.)

⁴² Do jawut, Andrés buflaechon Simón Jesús poxade. Jesús taen wut, jum-aechon Simónliajwa:

—Xam nejwul Simón, Jonás paxulnam. Pe amwutjel xam nawulaxael Cefas —aech Jesús. (Japwul jumchiliajwa: 'Pedro' —chiliajwa.)

Jesús tadupox Felipe, Natanaelbej, japi japon pejnachalaliajwa

⁴³ Kandiawa wut, Jesús nejchaxoel Galilea tuajnu poxade fulaeliajwade. Jawut Jesús taen Felipe. Samata, Jesús jum-aech Felipeliajwa:

—¡Xan nakfulaem tajnachalnamliajwa! —aech Jesús Felipeliajwa.

⁴⁴ Felipe Betsaida paklowaxpijin. Andrésbej, Pedro suapich, japibej Betsaida paklowaxpijiw.

⁴⁵ Jawut Felipe fulaech Natanael wulwekaliajwa. Faen wut, jum-aechon:

—Xan taenx Mesías. Me-ama Moisés chajia lelpox jum-aech, ja-aechlisox. Japon patlison. Me-ama Dios pejprofetas chajia lelpoxan jum-aech japon pasaxaelpox, japox ja-aechlisox. Japon Jesús, José paxulan. Japonbej Nazaret paklowaxpijin —aech Felipe Natanaelliajwa.

⁴⁶ Natanael jum-aech Felipeliajwa:

—Nazaret paklowaxpijiw pachaema-el. Samata, japixot kaen aton ajil xabich pachaempon —aech Natanael.

Felipe jumnot wut, jum-aechon Natanaelliajwa:

—¡Xabua't xam taeliajwam Jesús! —aech Felipe Natanaelliajwa.

⁴⁷ Jesús taen wut Natanael fulaenox, do jawut, Jesús jum-aech Natanaelliajwa:

—¡Taem! Ama fulaen Israel tuajnuapijin, japon chinax jiw naekichachajba-el —aech Jesús Natanaelliajwa.

⁴⁸ Do jawut, Natanael wuajnaemta wut, jum-aechon Jesúsliajwa:

—¿Ma-aech xotkat namatabijtam? —aech Natanael Jesúsliajwa.

Jesús jumnot wut, jum-aechon:

—Xan taenx, xam ekam wut atuaj higonaebuxfaltat, nakoewan Felipe jumchi-el wutfuk xanliajwa —aech Jesús.

⁴⁹ Do jawut, Natanael jum-aech:

—Jiw chanaekabuanan, xam diachwuajnakolax Dios paxulnam, jasoxtat chajia atuaj namatabijtam xot. Xam judíos pejreynam —aech Natanael Jesúsliajwa.

⁵⁰ Jesús jum-aech Natanaelliajwa:

—Xam chiekal nanaexasitam, jum-an wut: 'Xan taenx, xam ekam wut higonaebuxfaltat' —an wut. Xam taeyaxaelam, kaes pejme pachaempoxan xan isx wut. Me-ama amprox, jachiyaxil —aech Jesús Natanaelliajwa.

⁵¹ Jesús pejme jum-aech:

—Diachwuajnakolax xan jum-an. Xamal taeyaxaelam, athu fafa'ch wut xan tajmatwuajasik. Do jawutbej, taeyaxaelam xabich Dios pej-ángeles fafa'chxotsik, jajulaxoei wut, xanxot, puexa jiw pakowekolnanxot. Do jawutbej, taeyaxaelam asew ángeles balaloeyaxoek wut xanxotsik —aech Jesús Natanaelliajwa.

2

Caná paklowaxtat fiesta ispo, aton nakjiya wut Galilea tuajnuaxot

¹ Do jawux, tres matkoi wut, kaen aton nakjiya Caná paklowaxtat, Galilea tuajnuaxot.

Jesús pen jaxotbej.

² Jesúsbej taduch taeliajwa nakjiyafiesta, xanal pejnachalwan suapich.

³ Dolis, baxael, vino wetoepslisi. Do jawut, Jesús pen jum-aech Jesúsliajwa:

—Japi vino wetoeps. ¿Achaxkat xam isaxaelam? —aechow paxulanliajwa.

⁴ Jesús jumnot wut, jum-aechon penliajwa:

—En, ¿ma-aech xotkat xan japox najum-am? Xan tajmatkoi nawepas-elfuk jiw itpaeliajwan, achanan xan —aech Jesús penliajwa.

⁵ (Jesús pen matabijit japon xajuprox isliajwa koechaxan.) Samata, jum-aechow naxaeyaxan cha-efulpiliajwa mesaxot:

—¡Isde puexa Jesús to'apox! —aechow.

⁶ Jaxot seis ia'kuanan chalak. Japakuanan xabich pinanul minliajwa, judíos xabich kekakiasliajwa xaeliajwa wut. Jasox pejkabuanan japi judíos. Kaenanula kuanan xajup, me-ama setenta litros.

⁷ Jesús jum-aech naxaeyaxan cha-efulpiliajwa:

—¡Puexa ampi kuanan min wuluim! —aechon.

Do jawut, chiekal min wululisi japakuanan.

⁸ Jawut Jesús jum-aech:

—¡Min powim! ¡Kaesuapich ampamin xalaemch nejpaklon poxade! —aech Jesús.

Do jawut, japi ow-aechlisi. Jawut xalaechlisi naxaeyaxan cha-efulpi pejpaklon poxade.

⁹ Pejpaklon vino xapaejla wut, matabijs-elon min vino nadofapot. Naxaeyaxan chafulpilax matabija japox, japi pajut min powa xot. Do jawut, pejpaklon la, pajelnakjiyan. Jum-aechon japonliajwa:

¹⁰ –Asew jiw fiesta is wut, vino pachaempot matxoela duajti jiw. Do jawux, taduchpi xabich af wut, vino omjilpot duajti. Xamlax vino, kaes pachaempot, xanal naduajtam amwatjel –aechon.

¹¹ Japox Jesús is wut Caná paklowaxxot, japoxlap matxoelapijax, koechax. Jesús japox is wut, itpaei pej pamamax. Samata, xanal, japon pejnachalwan, naexasitx diachwujnakolax Jesús Dios to'aspon.

¹² Do baxael, Jesús, pen swapich, japon pakoewbej, xanal pejnachalwanbej, fulaechx Capernaum paklowax poxade. Jaxotde kaematkoijan swapich xanal namax.

*Jesús to'apox nakolaliajwa Dios pejtemplobatat mowapi, wujtibej
(Mt 21.12-13; Mr 11.15-18; Lc 19.45-46)*

¹³ Moxsful Pascuafiesta, judíos pejfiesta. Samata, Jesús fulaech Jerusalén paklowax poxade, xanal japon pejnachalwan swapichbej.

¹⁴ Dios pejtemplobafalmaktxot, Jesús taen jiw mowapi pak, oveja, a-ubej. Jaxot taenbejpon, chalak wut plata xanafokpi jiwliajwa.

¹⁵ Jesús japox taen wut, muat fa'ton japi jiw selsliajwa. To'apon puexa japi jiw nakolaliajwa, puexa pej-ovejas swapich, pejew pak swapichbej. Plata xanafoki japi pejmexan wefulixabapon. Japi pejpata wenatacholnas satadik.

¹⁶ Jum-aechon a-u mowapilijwa:

–jAmpi a-u jukde ampabafalmaktxot! jTaj-ax pejba mowaba nabej padofa! –aech Jesús.

¹⁷ Do jawut, xanal japon pejnachalwan, nejchafaetx Dios pejjamechan chajia jum-aechpox Mesías jumchixaelpoxliajwa. Japox jum-aech: “Ax, xanbej xabich nejxasinkax jiw sitaeliajwa nejba. Pe ampi jiw sitae-el nejba. Samata, xan xabich talala japi jiwliajwa” –aechox.

¹⁸ Do jawut, judióspaklochow palaeyajametat jum-aechi Jesúsliajwa:

–jNajum-amde, ma-aech xotkat xam japox isam! ¿Achankat xam to'a? –aechi.

¹⁹ Jesús jumnot wut, jum-aechon:

–Xamal toetam wut ampatemploba, xan pejme mat-esaxaelen, tres matkoi wut –aech Jesús.

²⁰ Do jawut, judióspaklochow jum-aech:

–Ampatemploba isas wut, isas cuarenta y seis waechan. Xam xajupaximil pejme isliajwam ampatemploba tres matkoitat –aech judióspaklochow.

²¹ Jesús japox jum-aech wut, jumchi-elon templobaliajwa. Japon japox jum-aech wut, jum-aechon pajut pejbutiliajwa.

²² Samata, xanal, japon pejnachalwan, baxael, Jesús tɔp wut, mat-ech wutbejpon, pejme duk wuton, jawut, xanal nejchafaetx Jesús chajia jum-aechpox japon pajut pejbutiliajwa.

Jesús matabijtpox jiw pejnechaxoelaxan

²³ Jesús Jerusalén paklowaxxot wut, Pascuafiesta wut, xabich jiw naexasiti japon Cristopon, Dios to'aspon, taen wuti koechaxan, Jesús ispoxan.

²⁴ Pelax Jesús xanabojs-el japi jiw, matabijit xoton puexa jiwliajwa.

²⁵ Samata, Jesús wewe'pa-esal asew jiw chapaeliajwas jiwliajwa, pajut chiekal matabijit xoton jiw pejnechaxoelaxan.

3

Jesús nospaeipox, Nicodemo swapich

¹ Nicodemo, japon fariseos-aton. Japonbej paklon judíosxot.

² Do madoi wut, Nicodemo fulaech nospaeliajwa, Jesús swapich. Jesúsxot pat wut, jum-aechon:

–Jiw chanaekabuanan, xanal chiekal xam matabijtax xam Dios to'aponam xanal nanaewujnalijwam. Taenx, xam koechaxan isam wut Dios pej pamamaxtat. Xanal matabijaxbej ampxox. Dios chaxdusaxil wut pamamax, xam koechaxan isaximil –aech Nicodemo.

³ Do jawut, Jesús jum-aech:

–Diachwujnakolax xan jum-an. Aton nalaels-el wut pejme, japon Diosxotse pasaxil –aechon.

⁴ Nicodemo pejme wujnachaemt wut, jum-aechon:

–¿Machixaelkat aton pati'in wut, pejme nalaelsliajwa penxot? Aton pejme leyaxil pen pejwoejtat pejme nalaelsliajwa –aech Nicodemo.

⁵ Jesús jumnot wut, jum-aechon:

—Diachwajnakolax xan jum-an. Aton matxoela nalaelt penxot. Do jawux, nalaelsaxaelon Espiritu Santo pijaxtat. Aton nalaels-el wut Espiritu Santo pijaxtat, japon aton pasaxil Diosxotse.

⁶ Paxjiw isaspoxtantat nalaelapi, japi jiwkal. Pe Espiritu Santo pijaxtat nalaelapi, japi jiw duilafulaxael Dios pijaxtat.

⁷ JXam xabich nabej nejchaxoele', japox jum-an wut xamliajwa: 'Puexa jiw wewe'pas pejme nalaelaliajwa. Pejme nalaela-el wuti, japi Diosxotaxil' —an wut xamliajwa!

⁸ Joewa nejmach wik. Joewa nejmet wut, thiataens. Pe tae-esal joewa. Tae-esal amxot fulaen. Tae-esalbej ampoxade fulaech. Ja-aechlap-is Espiritu Santo, japon pijaxtat jiw pejme nalaela wut. Japi taeyaxisal waj-itfutut nalaela wuti Espiritu Santo pijaxtat —aech Jesús Nicodemoliajwa.

⁹ Do pejme Nicodemo wujnachaemt wut, jum-aechon:

—¿Achax chiyaxaelkat xam jum-ampox? —aechon.

¹⁰ Jesús jumnot wut, jum-aechon:

—Xam judios chanaekabuanamponam. Pe xam japoxan matabijs-emilfuk.

¹¹ Diachwajnakolax xan jum-an. Xanal jum-an matabijaxpoxan. Xanal jum-anbej taenpxoxan. Pe xamal naexaxis-emil xanal jum-anpoxan.

¹² Naexaxis-emil wut xan jum-anpox ampathatpijaxanliajwa, ¿machiyaxaelamkatlax matabijsliajwam, xan jum-an wut Diosxotsepoxanliajwa? —aech Jesús Nicodemoliajwa.

¹³ Jesús pejme jum-aech: "Nejmach-aton pajut pijaxtat pasaxil Diosxotse. Xanlax kaenan, puexa jiw pakowkolnan, Diosxotsik fuloekxponan. Chiekal matabijtax, ma-aech Diosxotse. Xanlap tajut pejme japoxaxoeyan.

¹⁴⁻¹⁵ (Chajiakolaxtat xabich jiw tuj pajilaxtat, xabich jom liklas wuti.) Asew jom liklaspoxtat chatupasia wut, Moisés jom-ael is broncet. Japox naetat athu chanoton israelitas tujax natoenasamata. Israelitas japox natachaema wut, kaes tujafula-eli. Asamatkoi xanliajwabej, me-ama japox jachiyaxael, xan, puexa jiw pakowkolnanliajwa, asew jiw nachanosaxael wut. Nejmachjiw xan nanaexasit wut, japi jiw xan bu'weyaxaelen pomatkoicha duilaliajwa Diosxotse" —aech Jesús Nicodemoliajwa.

Dios nejxasinkpox ampathatpijiw

¹⁶ Jesús pejme jum-aech Nicodemoliajwa: "Dios ampathatpijiw xabich nejxasink. Samata, xan kaekolnan, japon paxulnan, nato'akon ampathatasik xan tujaliajwan, mosli-ajwan ampathatpijiw babijaxan ispoxanliajwa. Xan nanaexasitpi, japi jiw asamatkoi tuj wut, napelsaxili. Japi jiw pomatkoicha duilaxael Diosxotse.

¹⁷ Dios xan nato'a jiw bu'weliawjan ampathatat. Dios xan nato'a-el jiw jumchiliajwan: 'Ampi jiw kastikaxaes, babijaxan is xot' —chiliajwan.

¹⁸ "Xan nanaexasiti Dios paxulnanponan, japi infierno poxaxildiki. Pelax xan nanaexaxis-elpi, japi infierno poxaxaek jaxotdik kastikalijwas, chajia jumtis xoti japi kastikalijwas, xan nanaexaxis-el xoti, xan kaenan, Dios paxulnanponan.

¹⁹ Xan nanaexaxis-elpijiajwa, japi jiwliajwa, chajia jumtis kastikaxaespox, babijaxan is xoti. Xan fuloekx ampathatasik jiw matabijaliajwa Dios. Xan, me-ama itliakax jiw chiekal matabijaliajwa Dios. Pe jiw nejxasinka-el japi matabijaliajwa Dios. Xan, me-ama itliakaxponan. Pe nakiowa, jiw namastaen. Japi jiw, babijaxan isasiapi, japox islisi. Samata, japi jiw kaes nejxasink itkuatax, isful xot babijaxan. Samata, xan namastaen xot, japi jiw kastikaxaes.

²⁰ Puexa jiw, babijaxan ispi, japi jiw xan nanejwesla, me-ama itliakaxponan xot, itraeyaxaelen xot japi babijaxan ispoxan. Japi jiw mox pas-el xanxot taesamatan, japi babijaxan is wut.

²¹ Pelax Dios naexasiti, japi isful pachaempoxan, me-ama Dios to'a. Ja-aech wut, japi jiw moxa xanxot. Isfulbejpi pachaempoxan, Dios nejxasinkpoxan, puexa jiw taeliajwas" —aech Jesús Nicodemoliajwa.

Juan, jiw bautisan, pejme jum-aechpox Jesúsliajwa

²² Jesús japox buxtoet wut, fulaechon, xanal pejnachalwan suapich, Judea tujajnael. Do jaxotde kaematkoian suapich xanal bautisax asew jiw.

²³⁻²⁴ Juan, jiw bautisan, jiw jebaxot je-esal wutfuk, japonbej bautisaful jiw Enón tujajnuxot, mox Salim tujajnuxot. Jaxot xabich minxot, Juan jiw bautisaful.

²⁵ Do jawux, Juan pejnachala nalot, asan judios-aton suapich. Japi nabunlot bautisax. Jawut najum-aechi nakaewaliajwa: "Nakbautisa wut, ¿achan pejbautisaxkat kaes pejme pachaem, xatis chiekal pachaemaliajwas Diosliajwa?" na-aechi.

²⁶ Do jawux, Juan pejnachala mox soepa Juanxot nospaeliajwa japoxliajwa. Jum-aechi Juanliajwa:

—Jiw chanaekabuanan, xatis Jordánlajt weskeldas wut, xam chajia jum-amponliajwa xanalliajwa, amwutjel japon jiw bautisafal. Xabich jiw fulafosbejpon —aech Juan pejnachala Juanliajwa.

²⁷ Do jawut, Juan jumnot wut, jum-aechon pejnachala chiekal jumtaeliajwapi Jesúsliajwa: —Dios pajut nejchaxoel kaenanula jiwliajwa, achan pejme pachaemaxael.

²⁸ Xamal najut chiekal xan najumtaenam, chajia jum-an wut: 'Xan Cristowa-enil. Xan asbuan jumch atonan, matxoelanato'aponan Cristo wuajna' —an wut, xan.

²⁹ Aton pawis fit wut pijowliajwa, pejnachala xabich nejchachaemil japon atonliajwa. Pejnachala wuajnowet nakjiyaxaelpon pasaxaelxot. Japon aton pat wut, nospaei wutbejpon, pejbabijnaw swapich, japon pejnachala xabich nejchachaemlaxael. Xanbej jan. Xabich nejchachaemlax, xabich jiw Jesús fulafos wut.

³⁰ Samata, Jesús kaes pejme xabich jiw fulnanuamsaxaeson. Xan ja-enil —aech Juan, pajutliajwa jum-aech wuton pejnachalialiajwa.

Jesús fuloekpox athulelsik

³¹ Aton ampathatpijin, japon diachwuajnakolax ampathatpijinkal. Samata, jum-aechon ampathatpijaxankal. Pelax Jesús, fuloekpon athulelsik, japon kaes pejme paklon. Me-ama asew jiw, jachi-elon.

³² Japonbej jum-aech taenpoxan, jumtaenpoxanbej, Diosxotse. Pe jiw naexasis-el japon jum-aechpoxan.

³³ Asew naexasit wut japon jum-aechpoxan, ja-aech wut, asew jiw matabijaxael Dios jum-aechpox diachwuajnakolax.

³⁴ Jesús, Dios to'aspon, jum-aechful Dios jum-aechpoxan, Espiritu Santo kajachawaesfulas xot.

³⁵ Dios xabich nejxasink paxulan. Samata, chaxduton pejpamamax paxulanliajwa, puexa tato'laliajwapon.

³⁶ Dios paxulan naexasiti, japi jiw pomatkoicha duilaxael Diosxotse. Pe naexasis-eli Dios paxulan, japi duilaxil Diosxotse. Japilax Dios xabich kastikaxaes.

4

Jesús nospaeipox, Samaria tuajnu pijow swapich

¹ Fariseos wultaen Jesús kaes pejme xabich pejnachalapox. Wultaenbejpi Jesús kaes pejme jiw bautisapox. Me-ama Juan, jachi-elpon.

² Jesús pajut jiw bautisa-el. Pe xanal, japon pejnachalwan, jiw bautisax.

³ Samata, Jesús matabijt wut fariseos wultaenspox japonliajwa, do jawut, nakolt wut Judea tuajnu xot, xanalbej nakolax, Jesús swapich. Nawiax kaxade, Galilea tuajnu poxade.

⁴ Xanal fulaechx Samaria tuajnu poxade, pasliajwa Galilea tuajnu.

⁵ Ja-an wut, xanal patx Sicar paklowax, Samaria tuajnu xot. Jaxot mox, Jacob chajia paxulan José chaxdutsat. Japasatbej José pamowjiwliajwa.

⁶ Jaxot minmuth, Jacob chajia kowpox. Do jawut, Jesús xabich damal, atuaj fol xoton. Samata, minmuthxot ekon, mox pawuajna wut juimt matnoch ekaliajwa.

⁷⁻⁸ Dolisdo', xanal, Jesús pejnachalwan, fulaechxlis paklowax poxade wuajsliajwan naxaeyaxan. Do jawut, Jesús tamach ekaful wut minmuthxot, kaeow pawis pa'an mint posliajwa. Japow Samaria tuajnu pijow. Do jawut, Jesús jum-aech japowliajwa:

—¡Mint xan nachaxdu'e feliajwan! —aech Jesús japowliajwa.

⁹ Samaria tuajnu pijow jum-aech Jesúsliajwa:

—¿Ma-aech xotkat mint nawuljowam, xam judios-atonam wut? ¿Xamkat matabijs-emil xan Samaria tuajnu pijowanpox? —aechow. (Judios pachaemaxil. Nospaeyaxilbejpi, Samaria tuajnu pijiw swapich, japi pejkabuan xot japox. Samata, japow jum-aech japox Jesúsliajwa.)

¹⁰ Do jawut, Jesús jumnot wut, jum-aechon japowliajwa:

—Xam matabijs-emilfuk Dios chaxdusaxaelpox. Matabijs-emilbej, mint wuljowpon. Chil xam xan namatabijtam wut, chil ja-aech wut, xam nawuljoeyaxaelam mint pachaempot. Ja-am wut, xam chaxdusaxaelam mint, me-ama Dios pejmint. Japot mint pomatkoichaliajwa —aech Jesús japowliajwa.

¹¹ Do jawut, japow jum-aech:

—Tajpaklon, minmuth xabich funiachdik. Xam kejimil posliajwam mint. ¿Amxotkat xam mint posaxaelam xan nachaxdusliajwam, Dios pejmint, pomatkoichaxaelpot?

¹² Xanal tajwuajnapijin, Jacob, ampaminmuth nawewaelsnadoft xanalliajwa. Japon pajut ampamin af, paxi swapich, pejchoefbej. ¿Xamkat kaes pejme paklonam, me-ama Jacob jachi-emil? —aechow Jesúsliajwa.

¹³ Jesús jumnot wut, jum-aechon japowliajwa:

—Puexa jiw, ampamin afpi, pejme minsila.

¹⁴ Pe xan jiw chaxduwx wut Dios pejmint, japamint af wuti, japi jiw kaes minsilaxil. Japamint xan chaxduiyaxaelen, me-ama min, nakolanmin satxotsin. Japamint, Dios pejmint. Japamint toepaxil. Japamin jiw af wut, pomatkoicha duilaxael —aech Jesús japowliajwa.

¹⁵ Do jawut, japow jum-aech:

—Japamint nachaxdu'e, xan pejme minsilasamatan, xan pejme fulaesamatanbej ampamimthlel, kaes mint pos-elaliajwanbej! —aechow.

¹⁶ Jesús pejme jum-aech japowliajwa:

—¡Xabua'de! ¡Wuljae'mich nejmol! ¡Do pejme kaxamin, nejmol swapich! —aech Jesús.

¹⁷ Japow jumnot wut, jum-aechow:

—Xan tamachpijwan —aechow.

Do jawut, Jesús jum-aech:

—Xam chiekal jum-am, 'Xan tamachpijwan' —am wut.

¹⁸ Pe xam cinco nejmol. Ampamatkoivan xam nakmoejtpon, japon nejmola-el. Dichwujnakolax xam chiekal jum-am, 'Xan tamachpijwan' —am wut —aech Jesús.

¹⁹ Japox jumtaen wut, jum-aechow:

—Tajpaklon, xamkas Dios pejprofetam.

²⁰ Xanal tajwujnapijiw, Samaria tuajnupijiw, Dios kawujajnan amparamaxxot, pejsitaeyax itraeliajwapi Diosliajwa. Xamal judíos jum-am: "Dios kawujajnaes Jerusalén paklowaxxot, wajsitaeyax itraeliajwas Dios" —am xamal —aechow Jesúsliajwa.

²¹ Jesús jumnot wut, jum-aechon japowliajwa:

—¡Xan nanaexasi'e! Kaematkoivan wut, puexa xamal fulaeyaximil amparamaxxot poxadin nejsitaeyax itraeliajwam Dios. Fulaeyaximilbej Jerusalén paklowaxxot poxade Dios kawujajnalajwam.

²² Xamal, Samaria tuajnupijwam, nejsitaeyax itpaeyam Dios. Pe xamal chiekal matabija-emilfuk Dios. Xanal judíos chiekal matabijtax Dios, xanal Dios namakanot xot japon pejiwaliajwan. Samata, Mesías, judíos-aton, japon nakbu'weyaxael ampatthatpijwas.

²³ Amwutjel, baxaelbej, jiw pejsitaeyax itpaeyaxael xabich nejthu'axtat Diosliajwa, Dios xabich nejxasink xoti.

²⁴ Dios, japon espíritu. Samata, jiw pajut taeyaxil japon. Samatabej, Dios naexasiti, japi chiekal sitaeyaxael Dios —aech Jesús Samaria tuajnupijwaliajwa.

²⁵ Do jawut, jum-aechow:

—Xan matabijtax Mesías fuloeyaxoekpox, japon pawul Cristo. Japon fuloek wut, puexa chiekal nakchanaekabuanaxaelon —aechow.

²⁶ Do jawut, Jesús jum-aech:

—Xanlap japonan, nospaeipon, xam swapich —aech Jesús japowliajwa.

²⁷ Do jawut, xanal, japon pejnachalwan, patx japonxot. Natachaemax wut, nejchaxoelanuixbej, Jesús nospaei xot, pawis swapich. Pe xanal wujajnaeems-enil, ma-aech xot Jesús nospaei, japow swapich. Wujajnaeems-enilbej achaxliajwa nospaeipon, japow swapich.

²⁸ Do jawut, jaxot pejkurnat waelsnadoftow. Fulaechlisow paklowaxxot poxade. Jaxotde pa'a wut, jum-aechow pejiwliajwa:

²⁹ —¡Xabua't taeliajwam kaen aton, xan najum-aechpon puexa chajia isxroxanliajwa! Japon bej Mesíasbej —aechow.

³⁰ Do jawut, puexa japi jiw nakola paklowaxxot. Fulaenlisi Jesúslel.

³¹ Jawutlejen, japi fulaen wutfuk, xanal Jesús kaechato'ax naxaeyax xaeliajwapon. Jum-an japonliajwa:

—Jiw chanaekabuanan, jnaxaeyax xaem! —an xanal.

³² Do jawut, Jesús xanal najumnot wut, jum-aechon:

—Amxot xabich tajnaxaeyax. Japanaxaeyax xamal matabija-emil —aech Jesús xanal pejnachalwanliajwa.

³³ Jawut xanalkal nawujajnaeemtax wut, jum-an:

—Asan chajia bej xalwujajnafosbejpon naxaeyax —an xanal.

³⁴ Pe jawut, Jesús xanal najum-aech:

—Jiw xael wut, chawulanejchachaemil. Xanlax nejchachaemlax, isx wut Dios nejxasinkpoxan, toetx xotbej isxroxan, japon nato'apoxan.

³⁵ Xamal jum-am: 'Naboela wut, we'p cuatro juimt jolaliajwa' —am xamal. Pelax xan jum-an: '¡Tae'nik jiw fulaenpi! Puexa japi thiltisi naewesliajwa Dios pejjamechan. Me-ama muthaspi jolaliajwa malisi pachaem, ja-aech japi jiw' —an xan —na-aech Jesús xanalliajwa.

³⁶ Jesús pejme xanal najum-aech:

—Trigo jolpi moch wut, nejchachaemili, toet wuti trigo jolax. Ja-aechlap-is Dios pejjamechan naewuajanpi, asew jiw naexasit wut. Asamatkoi japibej xabich nejchachaemlaxael Diosxotse. Matxoelanaewuajanpi Dios pejjamechan, japibej xabich nejchachaemlaxael. Puexa japi kaeyaxtat nejchachaemlaxael Diosxotse.

³⁷ Chajia jum-aechpox diachwujnakolax, jum-aech wutox: 'Asew jiw matxoela pela. Do jawux, asew jiw wachakal pat jolaliajwa' —aech wutox. (Japox jumchiliajwa: 'Asew jiw matxoela naewuajan Dios pejjamechan. Pe jawut, naeweti naexasis-el Dios pejjamechan. Do jawux, asew jiw pejme naewuajnas wuti, jawut japi jiw naexasitlisi chiekal Dios pejjamechan' —chiliajwa japox.)

³⁸ Xamal keto'ax jolaliajwam pela-emilxot. Asew jiw jaxot xabich matxoela nabist. Amwutjel pachaem xamal jolaliajwam, japi chiekal ti't xotlisi. Japox jumchiliajwa: 'Xamal jiw naewuajnam wut Dios pejjamechan, japi naexasisasia Dios pejjamechan. Majt japi jiw asew jiw naewuajnas Dios pejjamechan. Amwutjel pachaem, xamal wujna asew jiw chajia naewuajan xot Dios pejjamechan japatuajnpjijwaxot' —chiliajwa japox —aech Jesús xanalliajwa.

³⁹ Xabich Sicar paklowaxpijw, Samaria tuajnpjijw, naexasiti Jesús, japow chapaei xot Jesúsliajwa. Chajia jum-aechow: "Japon aton jum-aech xan puexa chajia isxpoxanliajwa" —aech xotow japi jiwliajwa.

⁴⁰ Do jawut, Samaria tuajnpjijw fulaen Jesúslel. Jawut fiatipon namanaliajwa japixot. Samata, Jesús jaxot naman kolematkoije.

⁴¹ Jesús pajut jiw naewuajan wut, xabich kaes jiw naeweti naexasichbejpon.

⁴² Do jawut, japatuajnpjijw jum-aechi japowliajwa:
—Amwutjel xanal naexasitx wut Jesús, xanal naexasis-enil xam nachapaeyampoxkalliajwa japonliajwa. Pe amwutjel, xanal tajut chiekal jumtaenx xot, Jesús pajut jum-aech wut, japow naexasitx. Samata, chiekal matabijtax japon Jesús diachwujnakolax Cristo, bu'weliawapon ampathatpijw —aech japi jiw japowliajwa.

Jesús boejthupox reyliajwa nabistpon paxulan

⁴³ Kolematkoije xent wut, Jesús chijia wut Sicar paklowaxxot, xanalbej, japon pejnachalwan, chijian, japon suapich. Fulaechx Galilea tuajnu poxade.

⁴⁴ Galilea tuajnu poxandax wut, xanal nejchaxoelx Jesús chajia jum-aechpoxanliajwa, pajutliajwa chajia jum-aech wut xanalliajwa: "Profetas sitaens popaklowaxanpijw. Pelax pejtujnakolaxpijw sitae-esal" —aech Jesús, jum-aech wut xanalliajwa.

⁴⁵ Xanal patx wut Galilea tuajnu xot, japatuajnpjijw xabich nejchachaemil, taen wuti Jesús. Samata, chiekal bu'kultipon, chajia taenxotipon, Pascuafiesta wut Jerusalén paklowaxxot. Japi taen, Jesús koechaxan is wut jaxotde. Samata, xabich nejchachaemili.

⁴⁶ Do jawux, Jesús, xanal suapich, kaxa nawenx Caná paklowax poxadin, Galilea tuajnu xot. Jaxot majt Jesús mint vino dofapon.

Xanal jaxotan wut, kaen aton pat. Japon reyliajwa nabistpon. Japonbej paklon. Japon paxulan xabich bu'xaenk Capernaum paklowaxxot.

⁴⁷ Japon aton jumtaen wut Jesús patpox Galilea tuajnu xot, do jawut japon, fulaen Jesús taeliajwa. Japon aton faen wuton Jesús, taduton Jesús nakfulaeliajwas japon pejba poxade, paxulan weboejthusliawas, paxulan mox pawujna xot tupaliajwa.

⁴⁸ Do jawut, Jesús jum-aech:

—Xamal nanaexasisaximil, xan is-enil wut koechaxan xamal taeliajwam —aech Jesús japon atonliajwa.

⁴⁹ Do jawut, reyliajwa nabistpon jum-aechon Jesúsliajwa:

—Tajpaklon, jxabua't xan nakfulaeliajwam, taxulan tupax wujna pasliajwam! —aech japon aton, reyliajwa nabistpon.

⁵⁰ Do jawut, Jesús jum-aech:

—iNawia'mich nejba poxade! Naxulan chiekal boejthuslison —aech Jesús japonliajwa.

Japon aton naexasit Jesús jum-aechpox. Samata, nawia'apon pejba poxade.

⁵¹ Reyliajwa nabistpon fol wutfuk, jawut pamak fulaen japon pejbaxot bu'kakulnaliajwapi nuamat. Do jawut, nuamat xabu'kakult, jum-aechi pejpaklonliajwa:

—Naxulan chiekal boejthuslison —aechi pejpaklonliajwa.

⁵² Japon wujnachaemt wut, jum-aechon:

—¿Achahora wutkat wujjach naweboejthus? —aechon.

Japi jumnot wut, jum-aechi:

—Boejthuson kaeliw, juimt matnoch ek wut —aechi pejpaklonliajwa.

⁵³ Do jawut, japon nejchaxoel. "Kaeliw, juimt matnoch ek wut, Jesús xan najum-aech: 'Naxulan chiekal boejthuslison' —na-aech Jesús xanliajwa" —aechon, nejchaxoel wut. Samata, japon, puexa pejjw suapich, bu'naexasiton Jesús.

⁵⁴ Japox Jesús is Galilea t̄aj̄n̄xot, w̄chakalkoechax, nawia'an w̄t Judea t̄aj̄n̄xot.

5

Jesús boejthutpox nabejkan, laejaxilpon, Betzata pukachxot

¹ Baxael, asamatkoi, judíos fiesta is w̄t, Jesús f̄ulaech Jerusalén paklowax poxade, japafiesta naktaeliasjwapon.

² Jerusalén paklowaxxot, jaxot cha-aelpukach. Japox poejiw ispoxx, paw̄lox Betzata hebreojametat. Jaxot mox leliajwa paklowax poxadin, ovejas laleyaxxot. Japapukachj̄mb̄'tat cinco bachan, cha-aelbax, chalak.

³ Japabachantat xabich jiw, b̄'xaeya, oel. Itliakla, laelpaxilpibej, mamalpibej, japi cha-aelbachantat oel.

⁴ [Dios pej-ángel papaska cha-aelpukach poxasik. Pat w̄t, min itjuiyapon pukach truxnaliasjwa. Min truxan w̄t, matxoelafulaekpon minadik, japon chiekal nejmachwaxae boejth̄us. Samata, japi jiw w̄aj̄nawet pukach truxnax.]

⁵ Jiw b̄'xaeyaxot, japixotbej kaen aton. Japon laejaxil. Japon laeja-elpoxlis, treinta y ocho waechanlisox.

⁶ Jesús jaxot pat w̄t, taenon japon nabejkan, laeja-elpon. Jesús matabij̄t w̄t japon aton nabijatox, laeja-el xoton pin-iawaechan, jaw̄t Jesús w̄aj̄nachaemt w̄t, j̄m-aechon:

—¿Xamkat laejasiam? —aech Jesús.

⁷ Laeja-elpon j̄mnot w̄t, j̄m-aechon Jesúsliasjwa:

—Jiw chanaekabaanan, xan chiekal tamachpijnan. Ajil taj-aton minadik nabuflaeliasjwa, pukach truxan w̄t. Xan f̄ulaesian w̄t minadik, asan aton matxoela jif̄ulaek minadik — aech japon aton.

⁸ Jesús j̄m-aech laeja-elponliasjwa:

—¡Nande! ¡Sumta-okampox fi'e! ¡Laejimbej! —aech Jesús laeja-elponliasjwa.

⁹ Do jaw̄t, japon aton chalechkal chiekal pachaempon. Sumta-okpox fit w̄t, xalaechlis-on. Japamatkoi napatamatkoi.

¹⁰ Samata, judíospaklochow japox taen w̄t, j̄m-aechi boejth̄uchponliasjwa:

—Ampamatkoi, napatamatkoi, Moisés chajia lelpox tapae-el sumta-okampox xalaejaliasjwam, napatamatkoi xot —aech judíospaklochow boejth̄uchponliasjwa.

¹¹ Japon aton j̄mnot w̄t, j̄m-aechon:

—Naboejthutpon naj̄m-aech: '¡Sumta-okampox fi'e! ¡Laejimbej!' —na-aechon —aech boejth̄uchpon.

¹² Samata, japi w̄aj̄nachaemt w̄t, j̄m-aechi:

—¿Achanat xam j̄m-aech: '¡Sumta-okampox fi'e! ¡Laejimbej!' —aechkat? —aech paklochow boejth̄uchponliasjwa.

¹³ Pe japon matabijs-el, achan boejth̄uchpon, jaxot xabich xot jiw. Jesúsbej jaxot chijjalison.

¹⁴ Baxael, Jesús pejme faen japon aton Dios pejtemplobaxot. Jaw̄t Jesús j̄m-aech:

—Amw̄t̄jel xam chiekal pachaemam. ¡Chiekal taem! ¡Kaes nabej is babijaxan, kaes xabich pejme nabijasasamatam! —aech Jesús japon atonliasjwa.

¹⁵ Do jaw̄x, japon aton f̄ulaech w̄t, faenpon judíospaklochow. Jaw̄t j̄m-aechon japiliasjwa:

—Xan naboejthutpon chiekal laejaliasjwan, pesal japon Jesús —aech japon aton judíospaklochowliasjwa.

¹⁶ Samata, judíospaklochow japox j̄mtaen w̄t, xabich palalapi Jesúsliasjwa. Do jaw̄x, japi judíospaklochow faen w̄ti Jesús, japi tasala Jesús, boejth̄ut xoton napatamatkoitat.

¹⁷ Pe Jesús j̄m-aech japiliasjwa:

—Dios, taj-ax, japon jiw kajachawaet pomatkoicha. Me-ama taj-ax, ja-anbej xan. Samata, xanbej jiw kajachawaetx pomatkoicha —aech Jesús japiliasjwa.

¹⁸ Jesús japox j̄m-aech w̄t, judíospaklochow xabich kaes pejme palalapi Jesúsliasjwa. Samata, jaw̄t boesasiapi Jesús, boejth̄ut xoton napatamatkoitat. Jaw̄t xabich boesasiabejpi Jesús, Jesús j̄m-aech xot: "Dios, taj-ax" —aech xoton. Japox j̄m-aech w̄t, j̄mchiliasjwa pajut: "Xan chiekal naj̄p̄x, Dios s̄apich" —chiliasjwapox.

Dios chaxdutpox pejpamamax paxalanliasjwa

¹⁹ Jesús j̄m-aech judíospaklochowliasjwa: "Diachw̄aj̄nakolax xan j̄m-an. Xan, Dios pax̄lnan, tajut isasianpoxan xan isaxinil. Taenxpoxan, taj-ax ispoxxan, japoxankal xan isfulax.

²⁰ Taj-ax Dios xan nanejxasink, xan japon pax̄lnan xot. Taj-ax puxa na-itpaei japon ispoxxan. Na-itpaejaxaelbejpon koechaxan kaes pejme pachaempoxan. Japoxan isx w̄t, xamal xabich nejchaxoelanuilaxaelam.

²¹ Taj-ax xajup patupa mat-elijawa, pejme japi jiw duilalijawa. Xanbej, japon paxulnan, xajupx patupa mat-elijawan pejme duilalijawapi. Patupa mat-esian wut, japi mat-eyaxaelen pejme duilalijawa.

²² Taj-ax Dios jumchi-elbej kaen atonlijawa: 'Japon aton pejbu'wujajan. Samata, japon kastikaxaes' —chi-el taj-ax Dios. Xanlax taj-ax Dios nachaxdut pejpamamax jumchilijawan puexa jiw pejbu'wujajanpiliijawa: 'Japi kastikaxaes, pejbu'wujajan xot' —chilijawan, japon paxulnan xot.

²³ Taj-ax Dios nachaxdut pejpamamax, xan Dios paxulnan xot, jiw nasitaelijawa. Me-ama taj-ax Dios jiw sitaens, xanbej najachiyaxael, jiw nasitaken wut. Xan nasitae-elpi, japi jiwbej sitae-el taj-ax Dios, japon xan nato'apon ampathatasik.

²⁴ 'Diachwujanakolax xan jum-an. Xan jum-anpoxan naewetpon, naexasit wutbejpon, xan Dios nato'akponan ampathatasik, japon aton pomatkoicha dukaxael Diosxotse. Japon aton tap wut, to'axisal kastikalijawas infernoxotdik. Japonlax pomatkoicha dukaxael Diosxotse.

²⁵ Diachwujanakolax xan jum-an. Patlisox babijaxan ispi jumtaelijawa tajjamechan, xan Dios paxulnanponan. Xan tajjamechan jumtaen wuti, naexasit wutbejpi, xan kajachawae-saxaelen japi jiw pomatkoicha duilalijawapi Diosxotse.

²⁶ Taj-ax Dios duk pomatkoichalijawa. Xanbej, Dios paxulnan, dukx pomatkoichalijawa, taj-ax Diosxotse. Samata, xan xajupx jiw kajachawaelijawan japi pomatkoicha duilalijawa Diosxotse.

²⁷ Xanbej puexa jiw pakoewkolnan. Samata, taj-ax nachaxdut pejpamamax, xan jiw jumchilijawan pejbu'wujajan wut, kastikalijawas wutbej, babijaxan is wuti.

²⁸ Amwutjel, jumtaenam wut xan jum-anpox, ixamal xabich nabej nejchaxoelanuile!' Asamatkoi pasaxael pejmatkoi puexa tapi jumtaelijawa tajjame.

²⁹ Samata, japi mat-eyaxaes pejmuthanxot pejme duilalijawa. Japi ispi pachaempoxan, ampathatat laelp wuti, japilap duilaxael Diosxotse. Pelax babijaxan ispi, ampathatat laelp wut, japi kastikaxaes infernoxotdik" —aech Jesus judiospaklochowlijawa.

Jesus naksiyapox pejpamamaxlijawa

³⁰ Jesus pejme jum-aech judiospaklochowlijawa: "Xan is-enil tajut isasianpoxan. Jiwlijawa jum-an wut: 'Japi pejbu'wujajan' —an wut, japox jumchiyaxaelen taj-ax Dios pijaxtat. Samata, chiekal jum-an, xan jum-an wut jiw pejbu'wujajanpoxanlijawa. Tajut jumchiyaxinil nejxasinkaxpoxan. Xan jum-an taj-ax Dios, nato'apon, nejxasinkpoxan.

³¹ Xan tajutlijawa tajaxtat jum-ansax wut, japoxan omjilaxael asew jiwlijawa.

³² Pe asanlax jum-aech wut pachaempox xanlijawa, japon jum-aech diachwujanakolaxpox.

³³ Xamal asew jiw to'am, japi Juan wujajnaemslajawa xanlijawa. Juan jumnotpox xanlijawa, japox diachwujanakolax.

³⁴ Xan nawewe'pa-el aton, japon jumchilijawa xan jum-anpoxan: 'Japon jum-aechpoxan diachwujanakolax' —chilijawapon xanlijawa. Xan japox jum-an xamal naexaxislijawam Juan jum-aechpox xanlijawa, xamal bu'welijawan babijaxan isampoxanlijawa.

³⁵ Juan, jiw bautisan, me-ama lampara itliakalijawa. Japon pejnaewujanax, me-ama itliak xot xamallijawa. Samata, japon xamal naewujajan wut, xamal nejchachaemlam, jumtaenam wut japon naewujajanpox asbuan jumch kaejuimanlijawa.

³⁶ Juan jum-aechpox xanlijawa, japox pachaem. Pelax xan isxpoxan, japoxan kaes pejme pachaem jiw xan namatabijalijawa. Xan amwutjel isxpoxan, japoxan taj-ax naketo'a islijawan, jiw matabijalijawa diachwujanakolax xan Dios nato'aponan.

³⁷ Taj-ax, xan nato'apon, japon pajut jum-aech xanlijawa: 'Xam isampoxan xabich pachaem' —aech taj-ax Dios. Xamal najut taj-ax pejjame jumtae-emil. Xamal najut taemilbej taj-ax.

³⁸ Dios pejjamechan namana-elbej nejnejchaxoelaxantat, xan nanaexaxis-emil xot, xan taj-ax nato'aponan.

³⁹ Xamal chiekal estudiam Dios pejjamechan, nejchaxoelam xot: 'Dios pejjamechan chiekal estudyax wut, matabijsaxaelen, machiyaxaelen Dios natapaelijawa dukalijawan pomatkoicha japonxotse' —am, nejchaxoelam wut. Dios pejjamechan jum-aech xanlijawa. Xan tajaxtat jiw pomatkoicha duilaxael Diosxotse.

⁴⁰ Pe xamal nejxasinka-emil xanlel fulaelijawam tajjiwalijawam. Samata, xamal duilax-imil pomatkoicha Diosxotse.

⁴¹ "Xan nejxasinka-enil jiw najumchilijawa: 'Xam pachaemamponam' —nachilijawa xanlijawa.

⁴² Xan matabijtaxbej, ma-aech xamal nejnejchaxoelaxan. Xamal Dios nejxasinka-emil.

⁴³ Fuloekx taj-ax pijaxtat. Pe xamal xan nanaexasis-emil. Asamatkoi, asan aton pat wut pajut pijaxtat naewuajnalijwa, japon atonlax xamal naexaxisaxaelam.

⁴⁴ Xamal nejxasinkam asew jiw jumchilijwa xamallijwa: 'Xamal pachaemampim' —chilijwa. Pe xamal nejxasinka-emil kaen Dios jumchilijwa xamallijwa. 'Xamal pachaemampim' —chilijwapon xamallijwa. Samata, xan nanaexasis-emil. Dios naexasis-emilbej.

⁴⁵ Xamalkas nejchaxoelam xan tasalaxaelenpox xamal taj-ax Dios pejuwajnalel. Xan tajut xamal tasalaxinil. Xamal tasalaxaelpon, japon Moisés, xamal xanaboejampon.

⁴⁶ Xamal chiekal naexasitam wut Moisés chajia lelpox, ja-aech wut, xanbej chiekal nanaexaxisaxaelam, Moisés chajia lelpox jum-aech xot xanlijwa.

⁴⁷ Pe xamal naexasis-emil wut Moisés chajia lelpox, xamalbej nanaexaxisaximil xan jum-anpoxan" —aech Jesús judiospaklochowlijwa.

6

Jesús naxaeyaxan chaxduwpox cinco mil poejiw
(Mt 14.13-21; Mr 6.30-44; Lc 9.10-17)

¹ Do asamatkoi wut, xanal, Jesús pejnachalwan, Jesús swapich, chaflaechx Galilea puka we-enlelde. Japowa puka asawul, Tiberias puka.

² Xabich jiw Jesús fulafos, taen xoti koechaxan, bu'xaeya boejthut wuton.

³⁻⁴ Do jawut, Pascuafiesta islijwa mox pawuajna, judios pejfiesta. Japamatkoitat, Jesús julach wut muax poxase, xanalbej, japon pejnachalwan, julachax japamuaxase. Jaxotse ek wut, xanalbej jaxotse chalaxx.

⁵ Jesús taen wut xabich jiw fulafospox, jawut jum-aechon pejnachalan Felipelijwa:

—¿Amxotkat naxaeyaxan wuajsaxaes ampi jiwlijwa? —aech Jesús Felipelijwa.

⁶ Jasoxtat Jesús wuajna chaemt Felipelijwa Jesús matabijslijwa, achax jumchiyaxael Felipe, jumnot wut. Jesús lax chajia matabijt isaxaelpox jiwlijwa.

⁷ Do jawut, Felipe jumnot wut, jum-aechon Jesúslijwa:

—Jalape. Doscientos denarios xajupaxil pan wuajslijwas, ampi jiw kaenanula cha-aex xaelijwa —aech Felipe Jesúslijwa.

⁸ Do jawut, Andrés, Jesús pejnachalan, japon Simón Pedro pakoewan, jum-aechon Jesúslijwa:

⁹ —Ma amxot yamxulan cinco pan, cebadapanes, kolenje baxichbej. Japanaxaeyax kaechxajupaxil puexa jiw xaelijwa —aech Andrés.

¹⁰ Do jawut, Jesús xanal, pejnachalwan, najum-aech:

—¡Puexa jiw to'im chalakalijwa! —aechon.

Jaxot xabich pola pachaem chalakalijwa. Samata, jaxot puexa jiw chiekal chalak. Chalakpi, me-ama kaes cinco mil poejiw. Watho' xajui-esal, yamxi swapich.

¹¹ Do jawut, Jesús panes not wut, Dios kawuajan wut, jum-aechon: "Ax, gracias-an ampanaxaeyax xanal nachaxdutampox" —aech Jesús. Kawuajna buxtoet wut, xanal nachaxduwpon panes salslijwan. Jawut xanal satx puexa chalakalijwa. Ja-aechbejpon baxichlijwa. Do jawut, xanal chaxduwx puexa jiw xaelijwa, puexa xaesiapox.

¹² Do jawut, puexa jiw chiekal nafnia wut, Jesús xanal najum-aech:

—¡Naxaeyaxan namapi no'e napelsamata! —aech Jesús.

¹³ Do jawut, xanal notx namapi. Wulax doce matpiran. Majt asbuun jumch cinco pan.

¹⁴ Japi jiw taen wut koechax, Jesús ispox naxaeyaxanlijwa, nakaewa najum-aechi:

—Diachwuajnakolax ampon Dios pejprofeta. 'Pasaxoekpon ampathatasik' —tison, japon patlison. Me-ama chajia lelpox jum-aech japonlijwa, diachwuajnakolax ja-aechlixox —na-aechi nakaewa Jesúslijwa.

¹⁵ Do jawut, Jesús pajut matabijt japi jiw buflaesiapox japon japi pejrelijwa. Samata, jawut chijapon japijot. Asalelaxach julpon muaxxot tamachalijwa.

Jesús fulaenpox puka minakaldin
(Mt 14.22-27; Mr 6.45-52)

¹⁶ Tuila wut, xanal, Jesús pejnachalwan, fulaekx puka poxadik.

¹⁷ Jesús pas-el wutfuk, xanal falkam julx, xabich tuila xot. Samata, tuadutx chaliknalijwan puka we-enlelde, paslijwan Capernaum paklowax.

¹⁸ Do baxael, puka xabich pintruxan, xabich wik xot.

¹⁹ Xanal xabich faetx. Puka pafatatan wut, me-ama cinco kilómetros, do jawut, kaen aton taenx atuaxach, fulaen wut minakal. Japon fulaen xanalleldin, falkamleldin. Xanal japon taenx wut, xabich belwax, matabija-enil xot japon Jesúspon, fulaen wuton minakal.

²⁰ Do jawut, Jesús najum-aech xanallijwa:

—¡Nabej nejlewlé! ¡Xanpe! —aech Jesús xanallijwa.

²¹ Do jawut, xanal nejhachaemlax, Jesús juldik wut xanal poxadik. Do jawutbej, kamta chapa'ax Capernaum paklowax.

Jiw wulwekpox Jesús

²² Do kandiawa wut, jiw, namapi puka we-enlelde, japi jiw wulweklisi Jesús. Japi jiw taen xanalkal tamach, Jesús pejnachalwan, chaflaechpox kaeyax falkamtat. Do jaxot kaes asafalkam ajil.

²³ Do jawut, asew jiw chatat falkammochantat. Japi chaflaen Tiberias paklowaxxotdin. Mox itjuli, Jesús panes chaxduwxot jiw xaeliajwa, Jesús Dios kawuajan wut.

²⁴ Japi jiw matabija wut jaxot ajilpox Jesús, xanalbej ajinilpox jaxot, japi jiwbej jul falkammochan, Capernaum paklowax poxaliajwadin Jesús wulwekaliajwapi.

Jesús, me-ama panax, ja-aechpox jiwliajwa

²⁵ Puka we-enleldin itjuldin wut, japi jiw taenlisi Jesús. Do jawut, japi jiw wuajnachaemt wut, jum-aechi Jesúsliajwa:

—Jiw chanaekabuanan, ¿maswutkat xam amxot patam? —aechi.

²⁶ Do jawut, Jesús jumnot wut, jum-aechon:

—Diachwuajnakolax xan jum-an. Xamal nawulwekam, chiekal nafniam xot, pan xaelam wut. Pe xamal matabija-emil, ma-aech xot xan koechaxan isx. Xan nanaexaxis-emilbej.

²⁷ ¡Nabej nabich naxaeyaxankalliajwa, japoxan asamatkoi toepaxael xot! ¡Nabisdelax naxaeyaxan toepaxilpoxanliajwa! Japoxanlap kaes pejme pachaem xamalliajwa, pomatkoicha duilaliajwam. Japoxanlap xamal chaxduiyaxaelen, xan, puexa jiw pakoewkolnan. Taj-ax Dios chajia nachaxdut pejpamamax puexa jiw chaxduiliajwan, naxaeyaxan toepaxilpoxan —aech Jesús japi jiwliajwa.

²⁸ Japi jiw Jesús wuajnachaemt wut, jum-aechi:

—¿Achaxkat xanal nawewe'p isliajwan Dios nejxasinkpox? —aechi.

²⁹ Jesús jumnot wut, jum-aechon:

—Dios nejxasink xamal xan nanaexaxisliajwam, xan Dios nato'aponan —aech Jesús japi jiwliajwa.

³⁰ Do jawut, japi jiw pejme wuajnachaemt wut, jum-aechi Jesúsliajwa:

—¿Masox koechaxkat pejme isaxaelam xanal taeliajwan? Koechax isam wut, ja-aech wut, xam naexaxisaxaelen diachwuajnakolax xam Dios to'aponam.

³¹ Wajwuajnapijiw pajilaxtat wuti, Moisés pijaxtat xaeli maná, me-ama Dios pej-jamechan, chajia lelspx, jum-aech wut, jum-aechox: 'Pan athupijiw, pawali maná, chaxduws wajwuajnapijiw, japi xaeliajwa' —aechox. ¿Xamkat-is xajupam koechax isliajwam, me-ama Moisés is? —aechi Jesúsliajwa.

³² Do jawut, Jesús jumnot wut, jum-aechon:

—Diachwuajnakolax xan jum-an. Moisés pajut chaxdui-el maná wajwuajnapijiw xaeliajwa. Pe taj-ax Dios chaxduiful athupijiw, maná. Wajwuajnapijiw maná xael wut, japi pomatkoicha duilaliajwa-el. Amwutjellax taj-ax to'ak athulelsik pan, diachwuajnakolax athupijax.

³³ Japapan Dios chaxdut, fuloekpox athuxotsik, ampathatprijw japapan xael wut pomatkoicha duilaliajwa Diosxotse —aech Jesús pajutliajwa.

³⁴ Japi jiw wuljow wut, jum-aechi Jesúsliajwa:

—Jiw chanaekabuanan, ¿xanal nachaxduim japapan pomatkoicha duilaliajwan! —aechi.

³⁵ Do jawut, Jesús jum-aech:

—Xanlap Dios pejpanan jiw bu'welijaowan pomatkoicha duilaliajwa Diosxotse. Xaelam wut naxaeyaxkal, asamatkoi xamal pejme litaxaelaxael. Minkal afam wutbej, xamal pejme minsilaxael. Xamallax xan nanaexasitam wut, pomatkoicha duilaxaelam pachampoxat. Ja-am wut, xamal, pejme litaxaelaxil. Minsilaxilbej.

³⁶ Pe xan jum-an xamalliajwa: 'Xan koechax isx wut, xamal taenam. Pefuk xamal xan nanaexaxis-emil' —an xan xamalliajwa.

³⁷ Puexa jiw, taj-ax nachaxduwpi, japikal koew xanlel fulaeyaxaen. Xan japi jiw mastaelaxinil. Japi jiw xanxotaxael tajnachalaliajwa.

³⁸ Xan pas-enil ampathat poxasik tajut nejxasinkaxpoxan isliajwan. Xan paskax taj-ax Dios, nato'apon, nejxasinkpoxan isliajwan.

³⁹ Taj-ax nejxasink chiekal tataeflialiajwan, nachaxduwpixot kaen wenafo'a-elaliajwas. Taj-ax nejxasinkbej japi jiw mat-elialiajwan japi pejme duilaliajwa, that toep wut.

⁴⁰ Taj-ax Dios nejxasink puexa jiw xan naxanaboelialiajwa, xan Dios paxulnan, japi jiw xan nanaexasit wutbej, japi pomatkoicha duilaliajwa Diosxotse. Taj-ax Dios nejxasinkbej xan japi mat-elialiajwan pejme duilaliajwa, that toep wut —aech Jesús japi jiwliajwa.

⁴¹ Do jawut, asew judíos nejweslapi Jesús. Jawut jum-aechi babejjamechan Jesúsliajwa, jum-aech xoton: “Xanlap Dios pejpanan, fuloekxponan athuxotsik” —aech xot Jesús pajutliajwa.

⁴² Japi nakaewa najum-aech Jesúsliajwa:

—¿Amponkat Jesús, José paxulana-el? Xatis chiekal matabijas japon pax, penbej. ¿Ma-aech xotkaton pajutliajwa najum-aech: ‘Xan fuloekxponan Diosxotsik?’ —na-aechkaton —aech japi jiw nakaewaliajwa.

⁴³ Do jawut, Jesús jum-aech judíosliajwa:

—¡Buxkofim babejjamechan nakaewa najum-ampoxan xan jum-anpoxanliajwa!

⁴⁴ Xamal xanlel fulaeyaximil tajnachalwamliajwa, taj-ax Dios, japon nato'apon, xamal makanos-el wut. Taj-ax Dios xamal makanot wut, xamal mat-eyaxaelen pejme duilaliajwam, that toep wut.

⁴⁵ Dios pejprofetasxot, japixot kaen chajia lelpox jum-aech: ‘Dios naewuajnaexael xabich jiwliajwa’ —aech chajia lelspox. Samata, xamal naewetam wut, naexasitam wutbej taj-ax Dios jum-aechpox, ja-am wut, xamal fulaeyaxaemen xanlel tajnachalwamliajwa.

⁴⁶ “Ampathatpijiw tae-eli taj-ax Dios. Xanlax kaenan taj-ax taenxponan, xan fuloekx xot Diosxotsik.

⁴⁷ Diachwuajnakolax xan jum-an. Xamal chiekal xan nanaexasitam wut, pomatkoicha duilaxaelam Diosxotse.

⁴⁸ Xanlap, me-ama Dios pejpanan jiw bu'welijwan, jiw pomatkoicha duilaliajwa Diosxotse.

⁴⁹ Chajiakolaxtat nejwuajnapijiw xael maná, duilalap wut pajilaxtat. Xael wuti maná, pomatkoicha ampahatata laelpaliajwa-el. Xabich pakdiachow wut, japi tɔp.

⁵⁰ Pe amwutjel, xan naksiyaxpan, fuloekpox athuxotsik. Aton, japapan xaelpon, japon Diosliajwa pomatkoicha laejaxaelon.

⁵¹ Xan fuloekxponan athuxotsik, xan japapanan. Jiw xan nanaexasit wut, japi pomatkoicha duilafulaxael Diosxotse. Chaxduiyaxaelenpan, japapan tajbu'tkolax. Xan tajut natapaeyaxaelen asajiw naboosaliajwa, ampahatpijiw bu'welijwan” —aech Jesús judíosliajwa.

⁵² Do jawut, nakaejudíos najum-aechi, jumtaen wuti Jesús jum-aechpox:

—¿Machiyaxaelkat, nakchaxduiyaxael wuton pejwit xatis xaeliajwas? —na-aechi nakaewa judíos.

⁵³ Jesús pejme jum-aech japi judíosliajwa:

—Diachwuajnakolax xan jum-an. Xae-emil wut tajwit, xan, puexa jiw pakoewkolnan, tajjal fe-emil wutbej, xamal pomatkoicha duilaximil Diosxotse.

⁵⁴ Tajwit xaeyaxaelpi, tajjalbej feyaxaelpi, japi jiw duilaxael pomatkoicha. Asamatkoi tɔp wuti, japi jiw xan mat-eyaxaelen pejme duilaliajwa, that toep wut.

⁵⁵ Tajwitlap, me-ama poklanaxaeyaxkolax. Tajjalbej, me-ama poklamintkolat.

⁵⁶ Japi jiw xael wut tajwit, af wutbejpi tajjal, japi duilaxael, xan suapich. Xanbej dukaxaelen pomatkoicha, japi suapich.

⁵⁷ Taj-ax Dios, nato'apon ampahatasik, japon duk pomatkoichaliajwa. Xanbej dukx pomatkoichaliajwa taj-ax pijaxtat. Jachiyaxaelbej tajwit xaelpi. Japibej pomatkoicha duilaxael xan tajaxtat Diosxotse.

⁵⁸ Pan fuloekpox Diosxotsik, me-ama maná, jachi-el. Chajiakolaxtat nejwuajnapijiw maná xael pajilaxtat. Do baxael, japi xabich pakdiachow wut, tɔpafɔl. Maná xael wuti ampahatata, pomatkoicha laelpaliajwa-el. Xan naksiyaxpox panliajwa, japapan xamal xaelam wut, pomatkoicha duilaxaelam Diosxotse —aech Jesús judíosliajwa.

⁵⁹ Jesús japoxan naewuajan, judíos naewuajnatat wuton, Capernaum paklowaxxot wut.

Xabich pejnachala Jesús kofaspox

⁶⁰ Do jawut, xabich jiw, fulnanuamti Jesús, japox jumtaen wut, nakaewa najum-aechi:

—Ampawuajan xabich tampoel xatis jummatabijaliajwas. Tampoelbej xatis naexasisliajwas. ¿Achankatlax xatisxot naexasisaxael Jesús naewuajanpoxan? —na-aechi nakaewa.

⁶¹ Do jawut, Jesús matabijt japi jum-aechpox babejjamechan japon naewuajanpoxanliajwa. Samata, wuajnaechaemt wut, jum-aechon:

—¿Japoxkat xamalliajwa chaemil, xan naewuajnapox? ¿Xamalkat nejxasinka-emil japox?

⁶² ¿Achaxkat xamal nejchaxoelaxaelam, taenam wut xan, puexa jiw pakoewkolnan, kaxa nawiasax wut Dios poxase?

⁶³ Espíritu Santo pijaxtat jiw pomatkoicha duilaxael Diosxotse. Jiw pajut pijaxtat xajm̄paxil pomatkoicha duilaliajwa. Samata, ampathatat laelpam wutfuk, xan jum-anpoxan naexasitam wut, Espíritu Santo kajachawaesaxael xamal pomatkoicha duilaliajwam Diosxotse.

⁶⁴ Pe asew jiw xamalxot xan nanaexasis-elfuk —aech Jesús fulafospiliajwa.

Jesús chajia matabijt asew japixot naexasisaxisalpox. Matabijtbejpon, japixot achan wiasaxaeson asamatkoi padaelmajiwxot.

⁶⁵ Jesús pejme jum-aechon fulafospiliajwa:

—Xan chajia jum-an: ‘Jiw fulaeyaxildin xanel tajnachalaliajwa, japi taj-ax Dios makanos-esal wut’ —an xan —aech Jesús fulafospiliajwa.

⁶⁶ Japox Jesús jum-aech wut, xabich jiw, Jesús fulafospi, waeltaslison. Do jawut, japi jiw kaes fulnanuams-ellisi Jesús.

⁶⁷ Do jawut, Jesús wuajnachaeamt wut, jum-aechon doce pejnachalaliajwa:

—¿Xamkat-is xanxot chijiyasiam? ¿Me-ama asew jiw, jachisiamkat-is xamal? —aech Jesús pejnachalaliajwa.

⁶⁸ Do jawut, Simón Pedro jumnot wut, jum-aechon Jesúsliajwa:

—Jiw chanaekabuanan, xamxot chijian wut, ¿achankat xanal naknanuamsaxaelen? Xam kaenam, naewuajnamponam, jiw pomatkoicha duilaxaelpox Diosxotse.

⁶⁹ Xanal naexasitx xam Cristowamponam, Dios to’asponambej. Xanal chiekal matabijaxbej xam Dios paxulnampox, babijax is-emilponam —aech Pedro Jesúsliajwa.

⁷⁰ Do jawut, Jesús jum-aech xanalliajwa:

—Diachwuajnakolax xamal makanotx, doce poejwam. Pe nakiowa, kaen xamalxot dep tato’las —aech Jesús.

⁷¹ Jesús japox jum-aech wut, jum-aechon Judasliajwa. Japon Simón Iscariote paxulan. Judastat, japontat, xanal dosan. Pe japon asamatkoi wiasaxaelon Jesús, Jesús padaelma-jiwxot.

7

Jesús pakoew naexasis-esalpox, japon Cristopon

¹ Do jawux, Jesús nanuamt Galilea tuajnuxot. Jesús wepachaema-esal nanuamsliajwa Judea tuajnuxot, judiospaklochow wulweks xoton boesaliajwas.

² Pelis fiesta moxsful, judios pejfiesta. Japafiesta wut, judios bua-antat duilalap. Japox ja-aechlap japi judios nejkiowa-elaliajwa chajiakolaxtat pejwuajnapijiw ispoxan, duil wut pajilaxtat.

³ Do jawut, Jesús pakoew jum-aechi Jesúsliajwa:

—¡Xam amxot kaweta nabej namane! ¡Xambej xabua’de Judea tuajnu poxade, jaxotpijiw, xam nejnachalapi, taeliajwa koexaxan isam wut jaxotde!

⁴ Xam nejxasinkam wut xabich jiw matabijaliajwa, achanam xam, ja-aech wut, ¡maliach nabej is koexaxan! ¡Japoxan isde tulaela jiw pejwuajnalel, puexa jiw chiekal taeliajwa! —aechi Jesúsliajwa.

⁵ Jesús pakoew naexasis-esal japon Cristopon. Samata, japi japox asbuan jumch jum-aechi Jesúsliajwa.

⁶ Do jawut, Jesús jum-aech pakoewliajwa:

—Xanfuk nawepas-el tajmatkoi fulaeliajwan Judea tuajnu poxade. Xamalliajwa nejmachmatkoiyan pachaem nanuamsliajwam.

⁷ Ampathatpijiw xamal nejweslaxil. Xanlax japi jiw nanejwesla, tulaela itpaeix xot babijaxan ispoxan.

⁸ ¡Xabua’de xamal fiesta poxade! Xanfuk fulaeyaxinil japoxade, nawepas-el xotfuk tajmatkoi fulaeliajwan japoxade —aech Jesús pakoewliajwa.

⁹ Jesús japox jum-aech wut, kaweta namanfukon Galilea tuajnuxot.

Jesús wachakal fulaechpox Jerusalén paklowax poxade, fiesta naktaeliajwapon

¹⁰ Jesús pakoew fulaech wut fiesta taeliajwa, do jawuxbej, Jesús wachakal fulaech fiesta taeliajwa. Jesús maliach pat fiestaxot. Maliach paton jiw matabijsamatas japon patpox.

¹¹ Fiesta wut, judiospaklochow wulweki Jesús. Japi jum-aech asew jiwliajwa:

—¿Amxotkat japon aton, pawulpon Jesús? —aechi.

¹² Dolisdo’, fiesta wut, xabich jiw nakaewa najum-aech Jesúsliajwa. Asew japixot jum-aech: “Jesús xabich pachaem” —aechi. Asewlax japixot jum-aech: “Japon pachaema-el. Jiw naekichachajban pedo” —aech asew Jesúsliajwa.

¹³ Pe japi jiw naksiya wut Jesúsliajwa, tulaela jumchi-eli, asew jiw jaxotpijiw jumtaesamatas, pejlewla xoti judiospaklochowliajwa.

¹⁴ Do jawux, cuatro matkoi wut fiestapox, Jesús Dios pejtemploba low. Do jawut, jaxot tuaduton jiw naewuajnalajwa.

¹⁵ Jawut judíos xabich natachaema, jumtaen wuti Jesús naewuajanpoxan. Nakaewa najum-aechi:

—¿Ma-aech xotkat xabich matabijton Dios pejjamechan, japon pinjiyax estudia-el wut? —na-aechi nakaewa.

¹⁶ Jesús matabijt japi jum-aechpox. Samata, jum-aechon:

—Tajnaewuajnxan tajut tajax-el. Dios nato'apon, japon nabuxto'apoxan, japoxan xan naewuajnxax jiw.

¹⁷ Xamal nejchaxoelam wut isliajwam Dios nejxasinkpoxan, najut matabijaxaelam, xan naewuajnxapoxan Dios pijaxan wut, o, xan tajut tajaxkal wut.

¹⁸ Aton jum-aech wut pajut pijaxtat, japon xabichasia asew jiw sitaeliajwas. Xanlax jum-an diachwuajnakolax taj-ax pijaxtat, asew jiw jumchiliajwa: 'Dios xabich pachaem' —chiliajwapi taj-axliajwa. Xan naekichachajba-enil, jum-an wut.

¹⁹ "Chajiakolaxtat Moisés chaxduch Dios pejtato'laxan, wajwuajnapijiwliajwa Moisés lelaliajwa japatato'laxan. Pe xamal amwutjel naexasis-emilfuk japox. Japatato'laxanxot Dios tapae-el asan aton boesaliajwam. ¿Ma-aech xotkat amwutjel xamal xan nawulwekam naboesaliajwam?" —aech Jesús judíos paklochowliajwa.

²⁰ Do jawut, judíos jum-aech:

—Xam na-acham, nejmatruatat dep ba xot. Samata, jasox xam jum-am. Xanal xam wulweka-enil boesaliajwan —aech judíos Jesúsliajwa.

²¹ Do pejme Jesús jum-aech japi judíosliajwa:

—Xamal xabich natachaemanuilam, xan isx wut kaeyax koechax napatamatkoitat.

²² Moisés keto'a wajwuajnapijiw circuncidaliajwa japi Dios pejmarkaxliajwa. Samata, xamal circuncidam puexa yamxi, poejiw, ocho matkoiyan wut nalaelapoxan. Japox Moisés pajut tuadus-el. Waj-amjiw japox is Moisés wuajna. Amwutjelfuk xamal nakiowa yamxi circuncidam, ocho matkoiyan wut nalaelapoxan. Yamxulan nalaeltox ocho matkoi wut, japamatkoi napatamatkoi wut, xamal nakiowa yamxulan circuncidam japamatkoiat.

²³ Lach napatamatkoitat xamal nakiowa circuncidam yamxulan. Japox isam xamal naexasisliajwam Moisés chajia lelpox. Ja-am wut, ¿ma-aech xotkat xan nalala xanliajwa, kaen aton boejthutx wut napatamatkoitat?

²⁴ Xamal taenam wut aton ispoxliajwa, ¡nejmach nabej jum-aech!: 'Japon babijax is' —nabej aech!, majt chiekal matabija-emil wutfuk japon aton pejbu'wuajanpoxliajwa! ¡Majt chiekal taemfuk! Do jawux, diachwuajnakolax japon aton pejbu'wuajan wut, jum-amde japon pejbu'wuajanpoxliajwa! —aech Jesús judíosliajwa.

Jesús pajut jum-aechpox amxot fulaenpon

²⁵ Jerusalén paklowaxxot duili, asew japixot nakaewa najum-aech Jesúsliajwa:

—Ampon atonlap paklochow wulwekspon boesaliajwas.

²⁶ Pe Jesús tulaela jiw naewuajan wut, chinax kaen aton jumchi-esal japon bu'wuajanpoxliajwa. Jaels-esalbejpon. Paklochow bej jum-aechbej pejnechaxoelaxantat: 'Japon diachwuajnakolax Cristo' —bej aechbejpi. Samata, jaels-esal Jesús.

²⁷ Pe Cristo fulaen wut, xatis matabijaxisal amxot fulaeyaxaenon. Xatislax matabijas, amxot Jesús fulaen. Samata, Jesús Cristowa-el —aech asew judíos.

²⁸ Jesús japox jumtaen wut, Dios pejtemplobaxot naewuajan wut, pinjametat jum-aechon:

—¡Diachwuajnakolax xamal namatabijtam xan! ¡Xamal chiekal namatabijambej, amxot xan fulaenx! Xan tajut tajaxtat fulae-enil. Xan fulaenx, taj-ax Dios nato'a xot. Dios naekichachajba-el. Dios jum-aech wut, diachwuajnakolaxpox jum-aechon. Pe xamal matabija-emil Dios.

²⁹ Xanlax matabijtax Dios, fuloekx xot Diosxotsik. Japon xan nato'a ampathasik fulaeliajwansik —aech Jesús.

³⁰ Jesús japox jum-aech wut, judíos jaelsasiapi Jesús, jiw jebatat jeliajwaspon. Pe japi judíos jaelsaxilfuk, Jesús wepas-esal xot pejmatkoi.

³¹ Pe xabich jiw jaxot naexasiti Jesús naewuajanpox. Samata, japi jiw jum-aech Jesúsliajwa:

—Ampon Cristo, Dios to'aspon. Kaes asan aton ajil koechaxan ispon, me-ama ampon aton, jason —aech xabich jiw Jesúsliajwa.

Fariseos jaelsasiapox Jesús, jeliajwapi jiw jebatat

³² Do jawut, fariseos jumtaen wuti jiw jum-aechpox Jesúsliajwa, jawut fariseos, sacerdotes-paklochowbej, to'api Dios pejtemploba weti, japi jaelsliajwa Jesús. Pe japi jaels-el Jesús.

³³ Dolisdo', Jesús jum-aech judíosliajwa:

—Xamalxotaxaelen asbuan jumch kaematkoianliajwa. Do jawux, xan kaxaxoeyan nato'apon poxase.

³⁴ Jawut, xan ajinil wut, xamal nawulwekaxaelam. Pe nafaenaximil, fulaeyaximil xot xan dukaxaelenxotse —aech Jesús judiosliajwa.

³⁵ Do jawut, judíos nakaewa nawuajnachaeamt wut, najum-aechi:

—¿Ampoxade Jesús fulaeyaxaechkat xatis japon faena-elaliajwas, walweks wut? Jesús bej fulaeyaxaechbej asew judíos poxade, asatwajnuchanlel duili poxade. Jesús bej naewuajnaxaelbej asatwajnuchanpijw, japi judíos-eli.

³⁶ ¿Achaxkat jumchixaxael, Jesús jum-aech wut: 'Jawut, xan ajinil wut, xamal nawulwekaxaelam. Pe nafaenaximil, fulaeyaximil xot xan dukaxaelenxotse' —aech wutkat Jesús? —aech judíos Jesúsliajwa.

Jesús naexasiti, japi pejnechaxoelaxan, me-ama min nakakolsanpox satxotsin, ja-aech

³⁷ We'p wut kaematkoí fiesta toepaliajwa, japamatkoí judíosliajwa kaes pejme pachae. Samata, japamatkoí jiw kaes pejme sitaen. Do jawut, Jesús nant wut, pinjametat jum-aechon:

—Xamal xabich minsila wut, kaes Dios matabijasiam wutbej, ¡xabua'din xanle!

³⁸ Dios pejjamechan, chajia lelspx, jum-aech Dios jum-aechpox: 'Xan naexasiti, japi pejnechaxoelaxan, me-ama min nakakolsanpox satxotsin, ja-aech' —aechox —aech Jesús judiosliajwa.

³⁹ Jesús jum-aech wut min nakakolsanpoxliajwa satxotsin, japox jum-aechon Espíritu Santolijwa. Japon pejwuaian naexasisaxaelpi, japi pejmatpuatanxot pasaxoek Espíritu Santo. Jawut, Jesús japox jum-aech wut, Espíritu Santo fulae-elsikfuk Jesús naexasitixotsik, Jesús atha poxa-else xotfuk to'aliajwapon Espíritu Santo.

Jiw kaenejchaxoelaxa-elpox naexasisliajwapi Jesús

⁴⁰ Asew jiw japixot jumtaen wut Jesús jum-aechpox, nakaewa najum-aechi:

—Diachwuaiankolax Jesús, 'Dios pejprofeta, fulaeyaxaelpon' —tispon —na-aechi nakaewa.

⁴¹ Asew jiwbej nakaewa najum-aech:

—Ampon Cristo, Dios to'aspon —na-aechi nakaewa.

Asew jiwlix Jesúsliajwa jum-aech:

—¡E! ¡Japon Cristowa-el! Cristo Galilea tuajnuapijnaxil.

⁴² Dios pejjamechan, chajia lelspx, jum-aech wut, jum-aechox: 'Cristo rey David pamonaxael. Nalaelsaxaelbejpon Belén paklowaxxot, David majt dukxot' —aech chajia lelspx —aech asew jiw.

⁴³ Samata, jiw kaenejchaxoelaxa-el Jesúsliajwa.

⁴⁴ Asew japixot jaelsasiapi Jesús jeliajwa jiw jebaxot. Pe japi jaels-eli Jesús.

Paklochow naexasis-elpox Jesús jum-aechpoxan

⁴⁵ Do jawux, Dios pejtemploba weti nawia fariseos poxade, sacerdotespaklochow poxadebej. Dios pejtemploba weti pat wut, jumtisi, wuajnachaeamtas wut:

—¿Amekat bu'patam Jesús? —tisi.

⁴⁶ Dios pejtemploba weti jumnot wut, jum-aechi:

—Japon jum-aech chimiajamechan. Me-ama asew jiw jum-aech wut, jachi-elon. Samata, xanal japon jaels-enil xamallel buflaeliajwan —aechi.

⁴⁷ Do jawut, fariseos jum-aech:

—¿Xamalkat-is naexasitam naekichachajbapijin jum-aechpoxan?

⁴⁸ Paklochowxot ajil, Jesús jum-aechpoxan naexasiti. Fariseosxotbej ajil.

⁴⁹ Jesús naexasiti, japi jiw matabija-el Moisés chajia lelspx. Samata, Dios kastikaxaesi —aech fariseos Dios pejtemploba wetiliajwa.

⁵⁰ Nicodemo, japon fariseo-aton, majt madoi fulaechpon Jesús taeliajwa, jawut jum-aechon fariseosliajwa:

⁵¹ —Moisés chajia lelspx nakjum-aech: 'Kamta to'aximil aton kastikaliajwas, majt chiekal matabija-emil wutfuk japon aton bu'wuajnapoxliajwa. Majt chiekal jumtaeyaxaelamfuk babijax ispon, naksiya wut xamalliajwa japon ispoxliajwa' —aechox —aech Nicodemo nakaefariseosliajwa.

⁵² Fariseos jumnot wut, jum-aechi Nicodemoliajwa:

—¿Xamkat-is Galilea tuajnuapijnjam? ¡Xam xabich estudiam Dios pejjamechan, chajia lelspx! Ja-am wut, xam matabijsaxaelam, Galilea tuajnuapijwxot Dios pejprofetas chiekal ajil —aech fariseos Nicodemoliajwa.

⁵³ [Do jawut, kaenanula fariseos nawia pejbachan poxade.

8

Pakmolow asan poi nakmoejtpox

¹ Jawut, Jesús Olivonaechanmuaax poxade.

² Kandiawa wut, itliakaful wut, Jesús kaxadin Dios pejtemploba poxadin. Do xabich jiw mox soepa Jesúsxot. Jesús ek wut, tuaduton jiw naewuajnalijwa.

³ Do jawut, judios chanaekabuapani, fariseosbej, buflaeni kaeow pakmolow Jesúsleldin. Japow faens, asan aton nakmoejt wut. Japon aton japow pamla-el. Do jawut, notipow puexa jiw pejwuajnalel, Jesús wuajnalelbej.

⁴ Japi jum-aech Jesúsliajwa:

—Jiw chanaekabuapanan, ampow, pakmolow, faens, asan aton bu'moejt wut.

⁵ Moisés chajia lelpox jum-aech: 'Watho', jasox ispi, ia'tat dadaepaxtat matkaejabaxaesii' —aechox. ¿Achaxkat xam jumchiyaxaelam japoxliajwa? —aechi Jesúsliajwa.

⁶ Jasoxtat japi xapaajt Jesús, asax jum-aech wut tasalalijwapi Jesús. Pe Jesús natxatdik wut, pejkothiyatat sat lelon.

⁷ Japi nakiowa japox kaeyax wuajnachaemsful. Do jawut, Jesús mat-et wut, jum-aechon:

—Xamalxot kaen aton chinax babijax is-el wut, japon aton ia'tat nej matxoeladaeppon japow! —aech Jesús.

⁸ Do jawut, Jesús pejme natxatdik pejkothiyatat sat lelalijwa.

⁹ Japi jumtaen wut Jesús jum-aechpox, kaenanula chijiasfullisi japowxot. Kaes chiekal pakdiachowpi matxoela chijiasful. Do jawux, wachakal chijiasful pansiachowpi. Do jawut, tamach waelti japow, Jesús saapich.

¹⁰ Jesús mat-et wut, wuajnachaemt wut, jum-aechon japowliajwa:

—Pawis, ¿amxotkat xam jum-aechpi nejbu'wuajanpoxliajwa? ¿Japixotkat kaen xam daep-el ia'tat? —aech Jesús japowliajwa.

¹¹ Japow jumnot wut, jum-aechow:

—Tajpaklon, amxot japi jiw ajillisi —aechow.

Do jawut, Jesús jum-aech japowliajwa:

—Xanbej to'axinil xam kastikalijwa nejbu'wuajanpoxliajwa. ¡Xabua'de nejmach! ¡Kaes nabej is babijaxan! —aech Jesús japowliajwa.]

Jesús, me-ama itliakaxpox ampathatpijiwliajwa

¹² Do jawux, Jesús pejme naewuajan wut, jum-aechon jiwliajwa:

—Xan ampathatpijiw kajachawaetx japi matabijalijwa Dios. Samata, xan, me-ama itliakax jiwliajwa. Xan nanaexasiti, japi jiw kaes nej is-ele' babijaxan. Jasoxtat xan kajachawaesaxaelen jiw matabijalijwa diachwuajnakolaxpox, japi chiekal duilalijwa ampathatxot —aech Jesús jiwliajwa.

¹³ Do jawut, fariseos jum-aechi Jesúsliajwa:

—Xam najut japox naksiyam. Samata, xanal matabija-enil, xam diachwuajnakolax paeayam wut —aech fariseos Jesúsliajwa.

¹⁴ Jesús jumnot wut, jum-aechon fariseosliajwa:

—Xan tajut japox naksiyax wut, diachwuajnakolaxpox jum-an. Xan tajut matabijtax amxot fulaenx. Pejme japoxaxaelen. Xamallax matabija-emil japox.

¹⁵ Xamal nijaxtat xanliajwa jum-am: 'Japon nej kastikas, is xoton babijaxan' —am xamal xanliajwa, chiekal matabija-emil wut. Xanlax jasoxtat jumchi-enil jiw pejbu'wuajanpoxanliajwa.

¹⁶ Pe jum-an wut jiw pejbu'wuajanpoxanliajwa, xan jumchiyaxaelen diachwuajnakolaxtat. Tajut japox jumchi-enil jiw pejbu'wuajanpoxanliajwa. Nato'apon, japon taj-ax, nakajachawaesaxael, xan jiw jumchilijwan wut japi pejbu'wuajanpoxanliajwa.

¹⁷ Moisés chajia lelpox jum-aech xamal chiekal matabijalijwam: "Kolenje kaeyax chiekal jum-aech wut asan aton ispoxliajwa, ja-aech wut, japox diachwuajnakolax" —aechox.

¹⁸ Xan tajut tajaxtat jum-an wut isxpoxanliajwa, taj-ax, japon xan nato'apon, japonbej japox kaeyax jum-aech xan isxpoxanliajwa —aech Jesús fariseosliajwa.

¹⁹ Do jawut, fariseos wuajnachaemt wut, jum-aechi Jesúsliajwa:

—¿Amxotkat nej-ax? —aechi.

Jesús jumnot wut, jum-aechon:

—Xamal xan namatabija-emil. Matabija-emilbej taj-ax. Xan namatabijaxaelam wut, jam wut, matabijaxaelambej taj-ax —aech Jesús fariseosliajwa.

²⁰ Jesús japoxan jum-aech wut, nukon ofrenda jiaxot, Dios pejtemplobat. Pe Jesús jaels-esal paklochow, jiw jebaxot jeliawas, pejmatkoi wepas-esal xotfakon.

Naexasis-eli Jesús pejwujajan, japi pasaxilpox ma Jesús jaxotaxaelxot

²¹ Jesús pejme jum-aech judiosliajwa:

—Xan pejme nawiasaxaelen wut falaenxot, xamal nawulwekaxaelam. Pe xamal tuxaxaelam babijaxan isampoxantat Dios beltae-el wut. Samata, pasaximil xan jaxotaxaelenxot —aech Jesús judiosliajwa.

²² Do jawut, judios nakaewa najum-aech:

—¿Jesúskat pajut bej nakijsaxaelbej? Samata, jum-aechon japox: 'Pasaximil xan jaxotaxaelenxot' —aechon —aechi nakaewa.

²³ Jesús pejme jum-aech:

—Xamal ampathatpijwamkal. Xan ampathatpijna-enil. Xan athupijnan.

²⁴ Samata, jum-an: 'Xamal tuxaxaelam babijaxan isampoxantat, Dios beltae-el wut' —an xan, naexasis-emil xot, xan jum-an wut tajutliajwa —aech Jesús.

²⁵ Do jawut, japi wujnachaemt wut, jum-aechi:

—¿Achanamkat xam? —aechi.

Jesús jumnot wut, jum-aechon:

—Xan naewujajna xam, chajia jum-an, achanan xan.

²⁶ Xan xabich xamal jumchilijwan nejbu'wujajanpoxanliajwa. Pe xan jumchiyaxinil. Jumchiyaxaelenlax ampathatpijiwliajwa taj-ax Diosxot jumtaenxroxankal. Kaes pejme asaxan jumchiyaxinil. Dios, xan nato'apon, jum-aech diachwujajnakolax —aech Jesús judiosliajwa.

²⁷ Japi jiw jumtaen Jesús jum-aechpox. Pe japi jummatabija-el, Jesús jum-aechpox pax Diosliajwa.

²⁸ Samata, Jesús pejme jum-aech judiosliajwa:

—Xan, puexa jiw pakoewkolnan, asajiw cruztat nakematamatal wut, jawut xamal chiekal matabijaxaelam xan diachwujajnakolax Cristowanponan. Matabijaxaelambej puexa xan isxroxan, japoxan tajut tajaxtat is-enil. Xamalbej matabijaxaelam puexa xan jum-anpoxan, japoxan jum-an, taj-ax Dios nabuxto'apoxan.

²⁹ Taj-ax, xan nato'apon, japon pomatkoicha xanxot. Tamach nawaels-elon, isfulax xot japon nejxasinkpoxan —aech Jesús judiosliajwa.

³⁰ Japox Jesús jum-aech wut, xabich jiw chiekal naexasiti japon Cristopon. Japi jiw chiekal xanaboejabejpi Jesús.

Amxot jum-aechpox Dios paxilijaw, Satanás paxilijawabej

³¹ Jesús jum-aech asew judiosliajwa, japi cha-aex naexasiti japon Cristopon:

—Naexasisfulam wut xan naewujajna xapox, ja-am wut, diachwujajnakolax tajnachalwaxaelam.

³² Xamal chiekal matabijam wut diachwujajnakolaxpox, xan jum-anpox, ja-am wut, xamal kaes esclavosximil —aech Jesús judiosliajwa.

³³ Judios japox jumtaen wut, jum-aechi Jesúsliajwa:

—Xanal Abraham pamojiwan. Chinax xanal esclavos-enil. ¿Ma-aech xotkat xanal najum-am: 'Xamal kaes esclavosximil' —na-amkat xanallijwa? —aech judios Jesúsliajwa.

³⁴ Jesús jumnot wut, jum-aechon japi judiosliajwa:

—Diachwujajnakolax xan jum-an. Puexa jiw, babijaxan ispi, japi jiw, me-ama esclavos wut, ja-aechi, kofa-el xoti babijaxan ispoxan.

³⁵ Esclavo-aton pomatkoicha dukaxil paklon pejbatat, japon paklon paxulna-el xot. Paklon paxulanlax dukaxael pomatkoicha pax pejbatat, japon paklon paxulan xot.

³⁶ Samata, xan Dios paxulan jiw bu'weyaxaelen, japi xan nanaexasit wut. Beltaeyaxaelenbej japi babijaxan ispoxanliajwa. Ja-aech wut, japi diachwujajnakolax bu'wujajnilaxael babijaxan ispoxanliajwa.

³⁷ Xan matabijtax diachwujajnakolax xamal Abraham pamojiwam. Pe xamal nejchaxoelam xan naboesaliajwam, naexasis-emil xot tajnaewujajna.

³⁸ Xan jum-ansfulax taj-ax na-itpaepoxan. Pelax xamal isfulam nej-ax tato'alpoxan —aech Jesús judiosliajwa.

³⁹ Do jawut, japi judios jum-aech Jesúsliajwa:

—Xanal Abraham pamojiwan. Japon, me-ama taj-ax xanallijwa —aech judios.

Jesús pejme jumnot wut, jum-aechon judiosliajwa:

—Diachwujajnakolax xamal Abraham pamojiwam wut, xamal isaxaelam pachaempoxan Diosliajwa. Me-ama nej-am Abraham chajiakolaxtat is Dios nejxasinkpoxan, xamalbej jachiyaxaelam.

⁴⁰ Xan jum-an diachwujajnakolaxpox xamallijwa, Dios na-itpaepox. Pe nakiowa, xamal nejchaxoelam xan naboesaliajwam. ¡Wajwujajnapijin Abraham chinax jasox nejchaxoelael, xamal nejchaxoelampox!

⁴¹ Xamalbej isam, me-ama nej-ax is —aech Jesús judíosliajwa.

Jawut judíos jum-aech Jesúsliajwa:

—Xanal pafliachxiya-enil. Xanal kaen taj-ax. Japon Dios. Diachwujnakolax xanal Dios paxin —aech judíos.

⁴² Jesús jumnot wut, jum-aechon judíosliajwa:

—Diachwujnakolax Dios nej-ax wut, xan nanejxasinkaxaelam, xan fuloekx xot Diosxot-sik. Amwutjel xamalxotx, Dios nato'a xot. Tajut tajaxtat fulae-enil.

⁴³ ¿Ma-aech xotkat tampoel tajjamechan xamal jummatabijaliajwam? Tampoel taj-naewwujnaxan, nejxasinka-emil xot chiekal nanaewesliajwam.

⁴⁴ Pe xamal nej-axpon, japon Satanás. Japon pejjiwambej. Isasiam nej-ax nejxasinkpoxan. Akaseskolaxtat Satanás bapon jiw. Amwutjel nakiowa ja-aechfulon. Nejxasinka-elbejpon diachwujnakolaxpox. Jumchi-elbejpon diachwujnakolaxpox. Japon jum-aech wut, jum-aechon naekichachajbaliajwa, naekichachajbapijin xot. Satanáslap matxoelanaekichachajbapijin.

⁴⁵ Pelax xan jum-an xot diachwujnakolaxpox, xamal xan nanaexasis-emil.

⁴⁶ Xamalxot, ¿achankat nataen xan tajbu'wujnaxpox? Xan jum-an wutlax diachwujnakolaxpox, ¿ma-aech xotkat xamal xan nanaexasis-emil?

⁴⁷ Dios pejjiwpi, japi jiw chiekal naewet Dios pejjamechan naexasisliajwa. Pe xamal Dios pejjiwa-emil xot, nejxasinka-emil naewesliajwam Dios pejjamechan —aech Jesús.

Abraham wujna Cristo dukpox

⁴⁸ Do jawut, judíos jum-aech Jesúsliajwa:

—Xanal jum-an wut xamliajwa: 'Xam Samaria tujnapijnam. Xambej nejmatpuatat dep webaponam' —an wut, diachwujnakolax xanal jum-an —aech judíos Jesúsliajwa.

⁴⁹ Do jawut, Jesús jumnot wut, jum-aechon judíosliajwa:

—Xan tajmatpuatat dep chiekal ajil. Xan sitaenx taj-ax Dios. Pe xamallax xan nasitae-emil.

⁵⁰ Xan walweka-enil sitaeyax tajutliajwa. Pelax taj-ax, Dios, nejxasink jiw xan nasitaeliajwa. Dios jumchiyaxaelbej pachaempoxan xanliajwa.

⁵¹ Diachwujnakolax xan jum-an. Xan jum-anpoxan naexasiti, japi tɔpaxil —aech Jesús.

⁵² Judíos japox jumtaen wut, jum-aechi:

—Amwutjel xanal chiekal matabijax, diachwujnakolax xam nejmatpuatat dep weba. Abraham, asew Dios pejprofetaspibej, puexa japi chajia tɔp. Xamlax jum-am: 'Xan jum-anpoxan naexasiti, japi tɔpaxil' —am xam.

⁵³ ¿Xamkat kaes pejme paklonam? ¿Me-ama wajwujnapijnin Abraham, jachi-emilkat xam? Japonbej chajia tɔp. Puexa Dios pejprofetaspi, japibej chajia tɔp. Xam najutliajwa nejchaxoelam wut, ¿achanamponam xam? —aech judíos Jesúsliajwa.

⁵⁴ Jesús jumnot wut, jum-aechon:

—Xan tajutliajwa jum-an wut pachaempox, japox xanliajwa pachaemaxil. Pe taj-ax pajut xan nasitaen. Japonliajwa xamal najut jum-am: 'Japon tajDios' —am xamal. Pebej japon xan taj-ax.

⁵⁵ Pe xamal matabija-emil Dios. Xanlax chiekal matabijtax Dios. Xan jum-an wut: "Xan matabijs-enil Dios" —an wut, ja-an wut, xan naekichachajbaxaelen xamal. Me-ama xamal, jachiyaxaelen. Diachwujnakolax xan chiekal matabijtax taj-ax Dios. Japon pejjamechan chiekal naexasisfulaxbej.

⁵⁶ Abraham, nejwujnapijnin, nejchachaemil, matabijt wuton xan fulaeyaxaelenpox ampathatasik. Amwutjel, nataekon. Samata, Abraham xabich nejchachaemil xanliajwa —aech Jesús.

⁵⁷ Do jawut, judíos jum-aechi Jesúsliajwa:

—Xamfuk pati'na-emil. Xambejfuk pas-emil cincuenta waechan jumchiliajwam: 'Xan taenx Abraham' —chiliajwam —aech judíos Jesúsliajwa.

⁵⁸ Jesús jumnot wut, jum-aechon:

—Diachwujnakolax xan jum-an. Xan Abraham wujna chajia dukx —aech Jesús.

⁵⁹ Do jawut, judíos ia' not dadaepliajwapi Jesús. Pe faena-eli, Jesús namoest xot jiwat. Do jawux, nakoltlison Dios pejtemplobaxot.

9

Jesús boejthutpox itliaklan

¹ Dolisdo', Jesús fol wut, xanal, japon pejnachalwan sɔapich, Jesús taen kaen itliaklan. Japon aton taeyaxil, jasox chanlaelt xoton.

² Do jawut, xanal wujnachaemtax wut, jum-an Jesúsliajwa:

—Jiw chanaekabuanan, ¿ma-aech xotkat japon aton jasox chanlaelt itliaklax? ¿Pax, pen suapichkat, babijaxan ispoxtantat, japon aton ja-aech? O, ¿japonkat pajut babijaxan ispoxtantat ja-aechon? —an xanal.

³ Jesús najumnot wut, najum-aechon xanalliajwa:

—¡E! Japon pajut babijaxan ispoxtantata-el. Pax, penbej, japi ispoxtantata-elbej. Japon aton itliakal amwutjel Dios itpaeliajwa pejpamamax, boejthuch wuton.

⁴ Matkoi wut, xatis nabichaxaesfuk. Pe madoi wut, nabichaxisal. Ja-aechbej xatisliajwa. Amwutjel pachaem nabichliajwas Dios pejbichax. Pe asamatkoi tupaes. Japamatkoitat, kaes nabichaxisal.

⁵ Xan ampathatatax wut, xan, me-ama itliakax ampathatpijwliajwa. Xan jiw kachawaesaxaelen japi chiekal matabijaliajwapi Dios —aech Jesús.

⁶ Jesús japox jum-aech wut, jawut sat loeyapon. Pej-almintat ju'apon sat assap isliajwa. Dolison, japa-assap mojtton pejkothiyatat itliaklan itfujoelaliajwa. Jawut itfujoelapon itliaklan.

⁷ Do jawut, Jesús jum-aech itliaklanliajwa:

—¡Xabua'de asew nawaen poxade, jaxotde itfukiasliajwam! Jaxotde cha-aelpukach, poejiw pajut ispox, pawlox Siloé —aech Jesús itliaklanliajwa. (Siloé jumchiliajwa: "To'aspon" —chiliajwa.)

Do jawut, itliaklan fulaechlison itfukiasliajwa. Itfukiat wut, kaxadin wuton, jawut chiekal taenlison.

⁸ Asew jiw, mox duili japon dukxot, asew jiwbej, japi taenpi, japon plata wuljow wut nuambabu'tat, japi puexa pejme taen wut japon, japi nakaewa najum-aech:

—¿Amponkatlap majt plata wuljowpon, nuambabu'tat ek wut? —aech japi jiw nakaewaliajwa majt itliakalponliajwa.

⁹ Asew japixot jum-aech:

—Diachwajnakolax chiekal japon. Asana-el —aechi.

Pe asew japixot jum-aechlax:

—¡Japona-elkatdo! Pe asan, me-ama japon, jakabuan-aechpon —aechi.

Do jawut, japon pajut chiekal jum-aech nejthu'axtat japi jiwliajwa:

—Diachwajnakolax xan chiekal japonan. ¿Ma-aech xotkat xamal xan chiekal namatabija-emil? —aechon.

¹⁰ Do jawut, wuajnaemtas wut, jumtispon:

—¿Ma-aech xotkat xam chiekal amwutjel taenam? —tispon.

¹¹ Majt itliakalpon jumnot wut, jum-aechon:

—Aton, pawulpon Jesús, japon xan nataen wut, pej-almintat assap ispon. Japa-assapat tajkole-itfulelje na-itfujoelapon. Do jawut, najum-aechon: '¡Xabua'de asew nawaen poxade, jaxotde cha-aelpukach, poejiw pajut ispox, pawlox Siloé! ¡Jaxotde itfukia'e!' —na-aech japon aton. Do jawut, xan fulaechx itfukiasliajwan. Jaxotde itfukiatx wut, tajkole-itfutje chiekal nawepachaem. Do jawut, chiekal taenxbej —aech majt itliakalpon.

¹² Do jawut, asew jaxotpijiw wuajnaemtas wut, jum-aechi:

—¿Amxotkat japon aton? —aechi, Jesúsliajwa wuajnaemtas wut.

Majt itliakalpon jumnot wut, jum-aechon:

—Jalape. Xan matabijs-enil amxotton amwutjel —aechon.

Fariseos wuajnaemtas majt itliakalpon

¹³⁻¹⁴ Jesús ju'a wut assap itliaklanliajwa japon taeliajwa, japamatkoi napatamatkoi. Samata, asew jiw bu'foli majt itliakalpon fariseos poxade.

¹⁵ Bu'pat wutispon fariseosxot, japi wuajnaemtaspon. Do jawut, jumtispon:

—¿Ma-aech xotkat xam amwutjel chiekal taenam? —tispon.

Japon jumnot wut, jum-aechon:

—Kaen aton assap na-itfujoela. Xan itfukiatx wut, jawut taj-itfut chiekal nawepachaem —aech majt itliakalpon.

¹⁶ Asew fariseosxot jum-aechi:

—Japon aton japox is wut, sitae-el napatamatkoi. Samata, Dios to'aspona-el —aechi.

Asewlax japixot jum-aech:

—Japon babejen wut, isaxilon koechaxan —aechi.

Samata, fariseos kaenejchaxoelaxa-el Jesúsliajwa.

¹⁷ Ja-aech wut, majt itliakalpon pejme wuajnaemtas. Jumtispon:

—Xamlax, ¿achaxkat jum-am nej-itfut boejthutponliajwa? —tispon.

Majt itliakalpon jumnot wut, jum-aechon:

—Japon Dios pejprofeta —aechon.

¹⁸ Judíos naexasis-el japon majt itliakalpox. Samata, judíos wullalapi japon pax, penbej, fulaeliajwadin.

¹⁹ Do jawut, pax, pen suapich, pat wut, wuajnaemtas wut, jumtispí:

—¿Diachwuajnakolaxkat ampon naxulan, itliaklax chanlaeltpon? ¿Ma-aech xotkaton amwutjel chiekal taen? —tispí, wuajnaemtas wut.

²⁰ Japon pax, pen suapich, jumnot wut, jum-aechi:

—Xanal chiekal japon matabijtax xamalxot nukpon, japon taxulan. Matabijtaxbej japon itliaklax chanlaeltpon.

²¹ Pe xanal matabija-enil, ma-aech xot amwutjel chiekal taenpon. Matabija-enilbej, achan itfuboejthuchpon. Taxulan pati'in. Samata, ¡xamal najut wuajnaemdepon! Japon pajut xamal jumchiyaxael —aech pax, pen suapich.

²² Japi jasox jum-aech, pejlewlax xoti judíosliajwa, judíos jum-aech xot: “Nejmach-aton jum-aech wut: ‘Jesús, japon Cristo, Dios to'aspon’ —aech wut, japon aton xanal tapaeyaxinil leliajwa wajnaewuajnaemtasot” —aech xot chajia judíos.

²³ Samata, japon pax, japon penbej, jum-aechi: “Taxulan pati'in. Samata, ¡xamal najut chiekal wuajnaemde japon!” —aechi.

²⁴ Do jawut, judíos pejme la majt itliakalpon fulaeliajwadin. Pat wuton japixot, jum-aechi japonliajwa:

—¡Diachwuajnakolax najum-amde Dios jumtaeliajwa! ¿Achankat japon aton? Xanal matabijtax, japon aton babejenpon —aech judíos.

²⁵ Japon jumnot wut, jum-aechon:

—Xan matabijs-enil japon aton babejen wut, o, babejna-el wut. Xanlax matabijtax ampox. Majt chinax xan tae-enil. Amwutjel chiekal taenx —aechon.

²⁶ Pejme wuajnaemtas wut, jum-aechipon:

—¿Achaxkat japon aton is xamliajwa? ¿Achaxkat isbejpon xam chiekal taeliajwam? —aech judíos majt itliakalponliajwa.

²⁷ Majt itliakalpon jumnot wut, jum-aechon:

—Xamal chiekal jum-an. Pe chiekal xan nanaexasis-emil. ¿Ma-aech xotkat kaes xabich jumtaesiam? ¿Xamalbejkat japon pejnachalwasiam? —aechon judíosliajwa.

²⁸ Do jawut, babejjamechan jumtis wut, jum-aechipon:

—Xam japon babejen pej-atonam. Xanallax Moisés pejiwwan.

²⁹ Xanal chiekal matabijax chajiakolaxtat Dios nospaeipox, Moisés suapich. Pe xanal matabija-enil, achan to'as Jesús —aech judíos.

³⁰ Majt itliakalpon pejme jumnot wut, jum-aechon:

—Japon xan na-itfuboejthut. Pe xamal matabija-emil, achan to'ason.

³¹ Xatis judíos chiekal matabijas Dios kajachawaesaxaelpox naexasiti Dios, nejxas-inkpipej Dios. Dios kajachawaes-el jiw babejchow, japi naexasis-eli Dios.

³² Ampathatat aton ajil, xajupon boejthusliajwa itliakla chanlaelapi. Majt jason aton tae-esal, me-ama japon, aton.

³³ Japon aton Diosxotsik fulae-el wut, xan naboejthusaxilon —aech majt itliakalpon.

³⁴ Do jawut, judíos palaeyajametat jum-aechi japonliajwa:

—Xam itliaklax chanlaeltam, nej-ax, nej-en suapich, xabich babijaxan is xot. Ja-am wut, ¿xamkat xanal nanaewuajnasiam? —aechi.

Do jawutbej, judíos nakolsax to'api japon aton judíos pejnaewuajnaemtasot.

Jiw matabija-elpi Dios, japi jiw, me-ama itliakla wut, ja-aechpox

³⁵ Jesús wultaen majt itliakalpon nakolsax to'aspox judíos pejnaewuajnaemtasot. Jesús japon aton faen wut, wuajnaemtas wut, Jesús jum-aech japon atonliajwa:

—¿Xamkat puexa jiw pakoewkolan naexasitam? —aech Jesús.

³⁶ Majt itliakalpon jumnot wut, jum-aechon:

—Jiw chanaekabuanan, ¡najum-amde! ¿Achankat puexa jiw pakoewkolan, xan naexasisli-ajwan japon? —aechon.

³⁷ Do jawut, Jesús jumnot wut, jum-aechon japonliajwa:

—Xam najut japon taenam. Xanlap japonan, puexa jiw pakoewkolnan, xam suapich, nospaeipon —aech Jesús.

³⁸ Do jawut, majt itliakalpon brixtat nuk Jesús pejwuajnalel, xabich sitaen xoton. Japon jum-aech Jesúsliajwa:

—Jiw chanaekabuanan, xam naexasitx —aechon.

³⁹ Do jawut, Jesús jum-aech:

—Xan fulaenx ampathatasik jiw diajkaliajwan kolemutje. Kaemut xan nanaexasisaxael. Japi majt, me-ama itliakla wut, ja-aechpi pejnechaxoelaxantat, amwutjel japi jiw chiekal taeyaxael. Matabijaxaelbeji diachwuajnakolaxpoxan. Asamut xan nanaexasisaxil. Japi,

me-ama itliakla wut, jachiyaxael pejnechaxoelaxantat, xan nanaexaxis-el xoti. Matabijax-ilbejpi diachwujnakolaxpoxan —aech Jesús majt itliakalponliajwa.

⁴⁰ Asew fariseos, japox jumtaen wut, jum-aechi:

—¿Xanalkat-is, me-ama itliaklawan Diosliajwa? —aechi.

⁴¹ Jesús jumnot wut, jum-aechon:

—Diachwujnakolax xamal nejnechaxoelaxantat, me-ama itliaklawam wut, ja-am. Dios chapaeyam wutbej babijaxan isampoxanliajwa, ja-am wut, xamal bu'wujanjilaxaelam Diosliajwa. Pe xamal jum-am: 'Xanal chiekal taenx. Itliaklawam-enilbej tajnechaxoelaxantat' —am xot, xamal nejbu'wujajan. Asamatkoi, tɔpam wut, nabijasaxaelam babijaxan isampoxantat —aech Jesús fariseosliajwa.

10

Ovejas tataeflan, pej-ovejas suapichpox

¹ Do jawut, Jesús jum-aech fariseosliajwa: “Diachwujnakolax xan jum-an. Le-elpon fafalel ovejas jiasxot, pe asalel julpon leliajwa, japon aton natkowan.

² Fafalel lowpon, japonlax ovejas tataeflan.

³ Fafa wesan wefafach japon leliajwa. Do jawut, kaenanula pejew ovejas laefulon pejwultat. Pejew ovejas jummatabijtas japon aton pejjame. Jasoxtat japon aton pejew ovejas juk jiasxot pola xaelpaliajwa.

⁴ Ovejas tataeflan puexa pejew ovejas bu'fol wut, japon matxoela fol. Pejew ovejas wuchakal fol, pejjame jummatabijtas xoton.

⁵ Ovejas asew jiw fulfulae-el, japi pejjamechan jummatabija-esal xot. Japi jiwxot dukpaxael ovejas, xabich pejlwla xoti” —aech Jesús fariseosliajwa.

⁶ Jesús japawujantat naewujajan wut, japi fariseos jummatabija-el Jesús jum-aechpox.

Jesús xabich pachaempox jiw tataeflialiajwa

⁷ Do jawut, Jesús pejme jum-aech fariseosliajwa: “Diachwujnakolax xan jum-an. Xan, me-ama laleyax, ovejas leliajwa jiasxot.

⁸ Puexa kichachajbapi, pati tajwujajna, me-ama Dios to'as wut, ja-aechi, japi jiw me-ama kethaka. Japi nawenatkowasia tajjiw. Pe tajjiw naexaxis-el japi kethaka naewujajanpoxan.

⁹ Xan, me-ama laleyax Diosxotse jiw pasliajwa. Xanlel lelpi, japi xan tataeflaxaelen. Japi, me-ama tejew ovejas. Jiasxot nakola wut, chimiapola faekaxaeli xaeliajwa. Do jawux, pejme jiasxot leyaxaeli.

¹⁰ “Kethaka fulaen ovejas natkowaliajwa, beliajwabejpi ovejas. Xan fulae-enil isliajwan, me-ama japox. Xan fulaenx jiw chiekal nejchachaemlialiajwa pejnechaxoelaxantat, pomatkoicha chiekal duilialiajwapi.

¹¹ Xan chiekal pachaeman jiw tataeflialiajwan. Me-ama ovejas tataeflan, pachaempon, pejew ovejas chiekal tataeflialiajwa, xanbej ja-an. Ovejas tataeflan nejchaxoel: ‘Asan aton tejew ovejas nawebeyaxael wut, xan tapaeyaxinil. Xanlax jumchiyaxaelen: “¿Xan naboessim!” —chiyaxaelen, tejew ovejas bu'welialjwan’ —aech ovejas tataeflan, nejchaxoel wut.

¹² Pe nabiston plata kanaliajwa, japon aton pejmachoeffan fulaeyax taen wut, ovejas tamach waelchaxaelon. Dolison, pejlel najaesaxael. Jasox isaxaelon, japon poklatataeflana-el xot ovejas. Jawut, pejmachoeffan ovejas bu'ajil wut, ovejas kaenanula pejlel nasalaxael.

¹³ Do jawut, japon aton pejlel najaet, asbuan jumch nabichankal xot plataliajwa. Japonliajwa ovejas omjil, pejwa-el xoton ovejas.

¹⁴⁻¹⁵ “Xan chiekal pachaeman jiw tataeflialiajwan. Me-ama ovejas tataeflan chiekal tataeful pejew ovejas, xanbej ja-an. Taj-ax Dios chiekal namatabijt. Xanbej taj-ax Dios chiekal matabijtax. Jasoxtat chiekal xan matabijtax, tajjiw, xan nanaexasiti. Japibej chiekal xan namatabijt. Xan tajut tapaeyaxaelen asew jiw xan naboesaliajwa, tajjiw bu'welialjwan. Me-ama ovejas tataeflan, tɔpaxael pejew ovejasliajwa chachoel wut japon atonliajwa, xanbej jachiyaxaelen.

¹⁶ Asew tajjiwpi, japibej xanliajwa, me-ama tejew ovejas, duilpi asatujanjuchanlel. Japi wujjaesaxaelen, xanxot kaeyaxtat duilialiajwa. Japi xan nanaexasisfulaxael. Buflaenx wut, puexa japi kaemtaxael. Xan, kaenan, japi jiw tataeflaxaelen.

¹⁷ “Taj-ax Dios xabich xan nanejxasink, tɔpaxaelen xot tajjiwliajwa, japi bu'welialjwan. Do jawux, taj-ax namat-esaxael pejme dukaliajwan.

¹⁸ Asew jiw xan naboesaxilfuk, xan tajut tapae-enil wutfuk. Xan tajut tapaeyaxaelen, maswut naboesaxaeli. Do jawux, Dios xan namat-esaxael pejme dukaliajwan. Japoxlap taj-ax Dios xan nato'a isliajwan” —aech Jesús fariseosliajwa.

¹⁹ Do jawut, judios jumtaen wut Jesús jum-aechpox, pejme kaenechaxoelaxa-eli.

²⁰ Xabich japixot jum-aech:

—Ampon aton na-acha. ¿Ma-aech xotkat xatis kaes wulnaewesfulas, dep tato'lanas? — aech judíos Jesúsliajwa.

²¹ Pe asew japixot jum-aech:

—Aton, pejmatp̄at̄at dep webaespon, jasox jumchiyaxil, naksiya wut. Dep xajupaxilbej itliaklan boejth̄usliajwa, chiekal taeliajwa aton —aechi.

Asew judíosxot nejweslapox Jesús

²² Asamatkoi, iama wut, judíos fiesta is Jerusalén paklowaxxot. Japafiesta judíos nejchax-oelaliajwa pejw̄ajnapijiw Dios pejtemploba chaemsax ketoetpox.

²³ Jawut Jesús Dios pejtemplobaxot laeja, pawulxot Pórtico de Salomón.

²⁴ Jaxot judíos, japi masajiat Jesús. W̄ajnaechaemtipon chiekal matabijaliajwa. Do jawut, japi jum-aech Jesúsliajwa:

—¿Masmatkoiyankat xanal w̄ajnaewesaxaelen matabijaliajwan, achanamkat xam? Xam diachw̄ajnakolax Cristowam wut, jama najum-amde xanal chiekal matabijaliajwan! — aech judíos Jesúsliajwa.

²⁵ Do jawut, Jesús jumnot wut, jum-aechon japi judíosliajwa:

—Xan chajia chiekal xamal jum-an: 'Xan Cristowan' —an. Pe xamal naexasis-emil. Xan koechaxan isx wut, japoxan isx taj-ax Dios pijaxtat. Japoxan isx matabijaliajwam, achanan xan xamalliajwa.

²⁶ Pe nakiowa, xamal xan nanaexasis-emil, xamal tajjiwa-emil xot. Me-ama tejew ovejas, jachi-emil.

²⁷ Tejew ovejas xan tajjame najummatabijt, xan naksiyax wut. Xanbej japi matabijtax. Samata, japi xan nafulafol.

²⁸ Jiw, xan nanaexasiti, kajachawaesaxaelen pomatkoicha duilaliajwa Diosxotse. Samata, japi jiw napelsaxil. Chinax kaen aton japi jiw nawenosaxil, xan nanaexasiti.

²⁹ Taj-ax Dios woeyapi jiw xanxot. Taj-axbej xabich pejpamamax. Me-ama jiw, jachielon. Samata, chinax kaen aton xajupaxil japi jiw taj-axxot wemakanosliajwas.

³⁰ Xan, taj-ax swapich, chiekal koewan —aech Jesús judíosliajwa.

³¹ Do jawut, judíos pejme noti ia' dadaepliajwapi Jesús.

³² Jawut Jesús jum-aech japi judíosliajwa:

—Taj-ax Dios pijaxtat xabich chamoeyaxan isx nejw̄ajnalel. ¿Achax chamoeyaxlia-jwakat xan ia'tat wulnabu'dadapam? —aech Jesús.

³³ Judíos jumnot wut, jum-aechi:

—¡E! Xanal ia'tat xam dadaepaxinil, chamoeyaxan isam xot. Xanal ia'tat dadaepxoptat xam matkaejabaxaelen, Dios sitae-emil xot. Xam naksiyam, me-ama waj-ax Dios, xam atonamkal wut —aech judíos Jesúsliajwa.

³⁴ Do jawut, Jesús jum-aech:

—Dios pejjamechan, chajia lelspx, jum-aech Dios jum-aechpox Dios makanochpi paklochowliajwa: 'Xan jum-an: "Xamal, me-ama dioses" —an xan' —aech Dios jum-aechpox japi Dios makanochpiliajwa.

³⁵ Xatis chiekal matabijas Dios pejjamechan diachw̄ajnakolax pomatkoichaliajwa. Samata, chajiakolaxtat Dios jum-aech wut paklochowliajwa: 'Xamal, me-ama dioses' — aech wut, diachw̄ajnakolax Dios jum-aech japiliajwa.

³⁶ Xanbej, Dios namakafitponan, japon xan nato'a ampathatpijiw bu'weliawjan. Jum-an wut: 'Xan Dios paxulnan' —an wut, ¿ma-aech xotkat xamal najum-am: 'Xam sitae-emil Dios' —na-amkat?

³⁷ Xan is-enil wut taj-ax nato'apoxan, ja-an wut, jxan nabej nanaexasis!

³⁸ Pelis xan isfulax wut taj-ax nato'apoxan, jxan nanaexasi' e isfulaxpoxantat, xamal xan nanaexasi-elasiyam wut xan jum-anpox taj-ax Dios nato'aponliajwa! Xan koechaxan isxpxoxan, taenam wut, jxamal najut chiekal matabijim xan Dios nato'aponanpox! Ja-aech wut, xamal chiekal matabijaxaelambej xan koewanpox, taj-ax Dios swapich —aech Jesús judíosliajwa.

³⁹ Do jawut, judíos pejme jaelsasiapi Jesús. Pe japixot wiapon.

⁴⁰ Do jawux, Jesús nawiat wut Jordánlajt we-enlelde, Juan majt jiw bautisafulxot, xanalbej Jesús pejnachalwan, Jesús swapich, nawiax. Do jaxot Jesús naman wut, xanalbej namax jaxot.

⁴¹ Do jaxot xabich jiw fulaen Jesús taeliajwa. Japi jiw Jesúsxot pat wut, nakaewa najum-aechi:

—Juan, jiw bautisan, chinax koechax is-el. Pe Juan puexa jum-aechpox amponliajwa, japoxan diachw̄ajnakolax, chiekal ja-aechlisox —na-aechi nakaewa Jesúsliajwa.

⁴² Do jawut, xabich jiw jaxot naexasiti Jesús, japon Dios to'asponpox.

11

Lázaro tɔppox

¹ Aton bu'xaeyan, pawulpon Lázaro, koliowje pakoewow swapich, dukon Betania paklowaxxot. Kaeow pawul María. Asaow pawul Marta.

² Martalap majt Jesús tɔakchafan perjumamint, xabich sitaen xotow Jesús. Do jawutbej, japow pejmatlatat tɔakjoeipow Jesús pejtɔak.

³ Japi koliowje asan aton to'a japon wuljaesliajwa Jesús. Buxto'a wut, jum-aechipon: —Jesús faenam wut, jum-amopon: 'Tajpaklon, nejnachalan Lázaro, nejxasinkampon, xabich bu'xaenk' —amo Jesús! —aechi, aton to'a wut.

⁴ Do jawux, Jesús japox jumtaen wut, jum-aechon xanal pejnachalwanliajwa: —Lázaro ampawaxaetat chiekal tɔpaxael. Pe kaelel tɔpaxilon. Japon bu'xaenk puexa jiw taeliajwa Dios xabich mamnikpon, jiw taeliajwabej xan, Dios paxulnan, tajpamamaxbej —aech Jesús.

⁵ Jesús kamta kajachawaesasia Marta, Mariábej, Lázaro bu'xaenkpxoxliajwa, Jesús japi xabich nejxasink xot.

⁶ Wulnaen wuton Lázaro bu'xaenkpxox, Jesús nakiowa kaweta namanfukon kolematkoije Jordánlajt we-enlelde.

⁷ Do baxael, Jesús jum-aech xanal pejnachalwanliajwa: —Chijias pejme Judea tɔajnu poxade —aechon xanalliajwa.

⁸ Xanal jum-an: —Jiw chanaekabuanan, kaematkoijan swapichlisox Judea tɔajnupejiw xam ia'tat dadaep-siapox matkaejabaliajwapi xam. Japi jiwfuk xam bej wuajnowesfulbej boesaliajwa. ¿Ma-aech xotkat xam pejme japoxade fulaesiam? —an xanal Jesúsliajwa.

⁹ Jesús pejme jum-aech xanalliajwa: —Diachwuajnakolax matkoi itliak doce horas. Samata, aton fia'paxil, nanuamt wut, puexa chiekal taen xoton.

¹⁰ Pe aton madoi nanuamt wut, japon fia'paxael, itkua'nik xot, puexa chiekal taeyaxil xotbejpon —aech Jesús, wuajantat jum-aech wuton xanal pejnachalwanliajwa.

¹¹ Japox jum-aech wut, pejme jum-aechon: —Wajnachalan Lázaro moejt. Xan japoxaxaechan thikaliajwanpon —aech Jesús.

¹² Xanal jum-an: —Jiw chanaekabuanan, Lázaro moejt wut, japon waxae boejthulaxaes —an xanal. ¹³ Jesús jum-aech wut: “Lázaro moejt” —aech wut, japox jumchiliajwa: “Lázaro chiekal tɔp” —chiliajwapox. Xanallax, Jesús pejnachalwan, japox jumtaenx wut, asbuun jumch nejchaxoelx: “Lázaro moejt wut, moejton. Me-ama madoi moejt wut, ja-aechon” —an xanal, nejchaxoelx wut.

¹⁴ Samata, Jesús xanal najum-aech chiekal matabijaliajwan: —Lázaro chiekal tɔp.

¹⁵ Lázaro tɔp wut, xan jaxota-enil. Japon tɔp xamal kaes pejme xan nanaexaxisliajwam. Samata, nejchachaemlax xamalliajwa. Amwut fulaeyaxaes patɔpan Lázaro poxade japon taeliajwas —aech Jesús.

¹⁶ Do jawut, Tomás, japon asawul Na-o'an, japon jum-aech xanalliajwa: —Xatisbej chijias tɔpaliajwas, japon swapich, asew jiw boesas wuton —aech Tomás xanalliajwa.

Jesús xajɔppox mat-eliajwa tɔpi, japi pejme duilaliajwa

¹⁷ Jesús, xanal nabu'pat mox Betania paklowaxxot. Jaxot asew jiw Jesús chapaei Lázaro tɔppox. Patɔpan Lázaro, ochpox muaxwuajtat cuatro matkoijelisox.

¹⁸ Betania paklowax mox Jerusalén paklowaxxot, me-ama tres kilómetros.

¹⁹ Jesús wuajna xabich judíos, Judea tɔajnupejiw, Jerusalén paklowaxxot fulaeni. Japi fulaen naknoeliajwapi Marta, Mariábej, Lázaro tɔp xot.

²⁰ Marta jumtaen wut Jesús fulaeyax, nakoltow baxot, xanal nabu'kakunaliajwa nuamtat. Mariálex kaweta batat naman.

²¹ Marta pat wut xanalxot, japow jum-aech Jesúsliajwa: —Tajpaklon, takoewan bu'xaenk wutfuk, xam amxotam wut, ja-aech wut, takoewan nawetɔpaxil.

²² Pe xan matabijtax. Dios puexa xam chaxdusaxael wuljowampox —aech Marta Jesúsliajwa.

²³ Jesús jumnot wut, jum-aechon: —Marta, nakoewan mat-esaxaes pejme dukaliajwa —aech Jesús.

²⁴ Marta jum-aech:

—Diasdo'. Xan matabijtax. Tupi mat-ias wut pejme duilaxael, that toep wut. Jawutbej takoewan mat-esaxaes pejme dukaliajwa —aech Marta.

²⁵ Do jawut, Jesús jum-aech:

—Xanlap mat-eyaxaelen tupi, japi pejme duilaliajwa. Xanbej kaenan jiw kajachawaes-nan pomatkoicha pejme duilaliajwa. Xan nanaexasiti, asamatkoi tup wut, japi mat-eyaxaes pejme duilaliajwa pomatkoicha.

²⁶ Ampathatat laelpi, xan nanaexasit wut, japi asamatkoi napelsaxil, tup wuti. Duilaxaeli pomatkoicha. Marta, ¿xamat xan nanaexasitam jum-anpox? —aech Jesús Martaliajwa.

²⁷ Do jawut, jum-aechow:

—Diasdo' tajpaklon. Xan naexasitx xanlap diachwujnakolax Cristowam. Xambej Dios paxulnam, Dios to'aponam ampathatasik fulaeliajwam —aechow Jesúsliajwa.

Jesús nowpox Lázaro ochxot

²⁸ Do jawut, Marta buxtoet wut, kaxadepow pejba poxade laeliajwa pakoewow María. Jawut Marta maliach jum-aech pakoewow Maríaliajwa:

—Jiw chanaekabuanan ma amxotlison. Xam xabua't-aechon taeliajwam —aech Marta Maríaliajwa.

²⁹ María japox jumtaen wut, nanchapow. Jawut fulaechlisow Jesús taeliajwa.

³⁰ Jesús pas-elfuk paklowax. Kawetafukon Marta bu'kakultasxot.

³¹ Do jawut, judíos batatpi, María shapich, taen wuti María bichakal nanchapox nakolsliajwa tathoetade, japi judíosbej wuchakal nakola. Nejchaxoeli: 'María patupanwuj poxaxaech jaxotde noeliajwapow' —aechi, nejchaxoel wut.

³² María pat wut Jesúsxot, Jesús pejwujnalel brixtat nukow, xabich sitaen xotow Jesús. Do jawut, jum-aechow:

—Tajpaklon, takoewan bu'xaenk wutfuk, xam amxotam wut, ja-am wut, takoewan tupaxil —aech María.

³³ Jesús taen wut María nowpox, taen wutbejpon judíos nowpox, japi chalapi María, Jesús jumbeltaen. Do jawut, Jesús xabich nejxaejwas.

³⁴ Jawut Jesús wujnachaemt wut, jum-aechon:

—¿Amxotkat patupan Lázaro otam? —aech Jesús.

Jawut japi jum-aech Jesúsliajwa:

—Tajpaklon, ¡xabua't taeliajwam! —aechi.

³⁵ Do jawutbej, Jesús now.

³⁶ Samata, Judea tuajnupijiw, jaxoti, nakaewa najum-aechi:

—¡Taem! Jesúsbej now, xabich nejxasink xoton Lázaro —na-aechi nakaewa.

³⁷ Asew japixot jum-aech Jesúsliajwa:

—Japon majt itliakla boejthut chiekal taeliajwa. ¿Pe ma-aech xotkat kamta pas-elon boejthusliajwa Lázaro, tupasamatabejpon? —aech japi jiw Jesúsliajwa.

Patupan Lázaro mat-echpox pejme dukaliajwa

³⁸ Do jawut, Jesús xabich nejxaejwas wut, mox soepanpon Lázaro ochwujxot, ia't pinjit fafa xat-elspot.

³⁹ Do jawut, Jesús jum-aech:

—¡Ia't matariamande! —aechon.

Pe Marta, Lázaro pakoewow, jum-aech Jesúsliajwa:

—Tajpaklon, xasaiebelison, cuatro matkoiije xotlisoj ochpox —aechow Jesúsliajwa.

⁴⁰ Jesús jumnot wut, jum-aechon:

—Xam chajia chiekal jum-an: 'Xan nanaexasitam wut, taeyaxaelam Dios pejpamamax' —an xan chajia —aech Jesús Martaliajwa.

⁴¹ Jawut asew japixot ia't pinjit matariamam, wujfafa xat-elspot. Do jawut, Jesús athu natachaemse wut, Dios kawujajan wut, jum-aechon:

—Ax Dios, xan gracias-an, xam najumtaenam xot.

⁴² Xan chiekal matabijtax, xam pomatkoicha xan nanaewetam, xam kawujajnax wut. Pe ampox xan jum-an ampi jiw matabijaliajwa, naexasisliajwabejpi xam nato'amponanpox ampathatasik —aech Jesús, Dios kawujajan wut.

⁴³ Kawujajnax buxtoet wuton pax Dios, Jesús nejlakcha wut, jum-aechon:

—Lázaro, ¡xabua't! ¡Nakolmen jaxot! —aech Jesús.

⁴⁴ Do jawut, patupan Lázaro wujxot nakoldin. Puexa pejbu't, pejmatnaetbej, sábanabu'antat xakoeyaspojan, chankoldinpon. Do jawut, Jesús jum-aech:

—¡Wejolde xakoeyaspojan! ¡Tapaem laejaliajwa! —aech Jesús.

Do jawut, Lázaro wejols sábanabu'an, xakoeyaspojanpon.

*Judíospaklochow nejchaxoelpox jaesliajwapi Jesús**(Mt 26.1-5; Mr 14.1-2; Lc 22.1-2)*

⁴⁵ Judíos, chalapi María, taen wuti Jesús ispox koechax Lázaroliajwa, japixot xabich naexasiti Jesús.

⁴⁶ Pe asew japixot fúlaech fariseos poxade. Pat wuti Jerusalénxot, chapaeipi fariseosxot Jesús ispox Lázaroliajwa.

⁴⁷ Do jawut, fariseos, sacerdotespaklochowbej, tamejapi Junta Supremapijiw. Natameja wut, nakaewa najum-aechi:

—¿Achaxkat isaxaes Jesúsliajwa? Japon xabich koechaxan isful.

⁴⁸ Japon tapaeis wut isfulpoxan, puexa jiw naexasisaxaeson. Ja-aech wut, Roma tuajnupijiwpaklochow to'axaeli soldaw, japi soldaw toesliajwa Dios pejtemploba, wajjiwbej —aech paklochow, nakaewa nospaei wut.

⁴⁹ Kaen japixot pawul Caifás. Japon sacerdotespaklokolan japawaechtata. Jawut japon jum-aech:

—Xamal matnaenejtinkam xot, matabija-emil.

⁵⁰ Kaes pejme pachaem kaen tamach tupaliajwa. Ja-aech wut, xabich jiw tɔpaxil. Toesaxisalbej wajjiw —aech Caifás.

⁵¹ Pe Caifás pajut pijaxtat japox jumchi-el. Japox jum-aechon Dios pijaxtat. Caifás japox jum-aech Jesúsliajwa, Jesús tɔpaxael xot puexa Israel tuajnupijiwliajwa.

⁵² Japikalliajwa Jesús tɔpaxil. Tɔpaxaelbejpon asajiwliawbaj, puexa ampathatpijiwliajwa, Dios naexasiti kaemutaliajwa. Japoxlap Dios nejxasink.

⁵³ Caifás japox jum-aech Jesús pejpatɔpaxliajwa. Do jawut, judíospaklochow nejchaxoelaful boesaliajwapi Jesús.

⁵⁴ Samata, Jesús kaes nanuams-el tulaela Judea tuajnuxot. Do jawut, xanal nabuflaechon paklowax, pawul poxade Efraín, mox pajilaxxot. Jaxot puexa xanal namax, Jesús swapich.

⁵⁵ Kaematkoijan swapich we'p Pascuafiestaliajwa, judiosliajwa. Samata, xabich judíos fúlaech Jerusalén paklowax poxade fiesta wuajna, japi chiekal ketoesliajwa, puexa we'poxan isliajwa. Japox judíos pejkabuan, Moisés chajia lelpox jum-aech xot. Japafiesta wuajna japox ja-aechi.

⁵⁶ Fulaenpi Jerusalén paklowaxlel, japi walwek Jesús. Pat wuti Dios pejtemplobaxot, japi nakaewa nawuajnachaeamt wut, jum-aechi:

—¿Jesúskat naktaeyaxael fiesta? O, ¿naktaeyaxilkaton? ¿Achaxkat xamal nejchaxoelam? —na-aechi nakaewa.

⁵⁷ Fariseos, sacerdotespaklochowbej, puexa jiw chajia buxto'a wut, jum-aechi: "Kaenam xamalxot Jesús taenam wut, jkamta xanal nachapaem!" —aech paklochow jiwliajwa. Japi japox jum-aech, jaelsasia xoti Jesús jeliajwapi jiw jebaxot.

12*Pawis perjumamintat tuakchafanapox Jesús**(Mt 26.6-13; Mr 14.3-9; Lc 7.37-38)*

¹ We'p wut seis matkoijan Pascualiajwa, Jesús fúlaech wut Betania paklowax poxade, xanal, japon pejnachalwan, nakfolxbej. Jaxotde Lázaro majt tɔp. Pe Jesús mat-et Lázaro pejme dukaliajwa.

² Jaxotde xanal pa'ax wut, asew jiw naxaeyaxan is pejsitaeyax itpaeliajwa Jesúsliajwa. Marta kajachawaet naxaeyaxan cha-eyaxan, Lázaro, asew jiwbej, taduchpi, xaeliajwa, Jesús swapich.

³ Do jawut, María xapat perjumamint tuakchafanalajwapow Jesús. Japamint xabich ommaenk. Japot, me-ama medio litro. Isas nardokal. Jawut tuakchafanpow Jesús, xabich sitaen xotow. Do jawut, pejmatlatat tuakjoeipow Jesús pejtuak. Samata, jawut japaba xabich xabejxat-ialnanik.

⁴⁻⁵ Do jawut, Judas Iscariote, Jesús pejnachalan, japon jum-aech:

—¿Ma-aech xotkat japaperjumamint mowa-esal plata chaxduiliajwas kejila? Bej pambej trescientos denarios —aech Judas. Judaslap wiasaxael Jesús padaelmajiwxot.

⁶ Judas japox jum-aech wut, nejchaxoela-elon jiw kejila kajachawaesliajwa. Japox jum-aechon, kethakan xot. Japon kaen platachoxa tataeful puexa xanal, Jesús pejnachalwanliajwapi. Japaplata japon pajut maliach jinatkowa.

⁷ Do jawut, Jesús jum-aech:

—¡Nej ja-aeché! Xan tajpatɔpaxliajwa japow cha-et perjumamint.

⁸ Kejila pomatkoicha xamalxotaxael kajachawaesliajwam. Pelax xan piachaxinil xamalxot —aech Jesús.

Judíospaklochow boesasiapox Lázaro

⁹ Xabich jiw fulaen xanallel taeliajwapi Jesús, taeliajwabejpi Lázaro, japon tɔp wɔt, Jesús mat-echpon pejme dukaliajwa.

¹⁰⁻¹¹ Jesús koechax is xot Lázaroliajwa, xabich jiw, Judea tɔajnpɔijiw, naexaxisful Jesús. Kaes naexaxis-ellisi sacerdotes naewɔajanpoxan. Japi naexaxisful Jesúska. Samata, sacerdotespaklochow nejchaxoel boesaliajwapi Jesús, Lázarobej.

Jesús patpox Jerusalén paklowaxxot

(Mt 21.1-11; Mr 11.1-11; Lc 19.28-40)

¹²⁻¹³ Do kandiawa wɔt, xabich jiw Jerusalén paklowaxxot poxade taeliajwapi Pascuafiesta. Japi matabija wɔt Jesús pasaxaenpox Jerusalén paklowaxxot, jawɔt, me-ama chia'waflejen tasiapapi xawisliajwa, owaliajwabej nɔamtat Jesús pejwɔajnalel, chiekal bɔ'kulsliajwapi, pejsitaeyax itpaeliajwabejpi. Fulaeyax taen wɔti nɔamtat, nejlasful wɔt, jum-aechfuli:

—¡Aleluya! ¡Ampon, fulaenpon Dios pijaxtat, japon xabich pachaem! ¡Pachaembejpon Israel tɔajnpɔijwas wajreyliajwa! —aechful xabich jiw Jesúsliajwa, nejlasful wɔt.

¹⁴ Jesús jelti'san bur faen. Do jawɔt, tɔa-eklison chaflaeliajwa Jerusalén paklowaxxot. Japoxliajwa Dios pejjamechan, chajia lelspos, jum-aech wɔt, jum-aechox:

¹⁵ “Xamal, Jerusalén paklowaxpijwam, ¡nabej nejlewlé! ¡Taem nejrey chaflaenpon bur jelti'santat!” —aechox chajia lelspos.

¹⁶ Xanal, Jesús pejnachalwan, chiekal matabija-enilfuk, achax chiyaxael japamatkoi. Do jawɔt, Jesús mat-ech wɔt, pejme duk wɔt, atha poxase wɔtbejpon, jawɔt xanal chiekal nejchafaetx chajia lelspos, jum-aech wɔt jum-aechox japonliajwa. Do jawɔtbej, xanal chiekal matabijax, ma-aech xot japoxan ispi Jesúsliajwa.

¹⁷ Japi jiw taen, Jesús la wɔt Lázaro mɔaxwɔajxotdin Lázaro mat-esliajwa pejme dukaliajwa. Japi chapaeful taenpox, a sew jiwbej matabijaliajwa japox.

¹⁸ Samata, xabich jiw nakola pejbachanxot bɔ'kakulnaliajwapi Jesús, wɔltaen xoti Jesús ispos, koechax.

¹⁹ Pe fariseos najum-aechi nakaewa:

—Xatissliajwa japox pachaema-el. ¡Tae'nik! ¡Puexa jiw Jesús xabich nakfos! —na-aech nakaewa fariseos.

A sew griegosxot wɔlwekxot Jesús

(Mt 10.38-39; 16.24-25; Mr 8.34-35; Lc 9.23-24; 17.33)

²⁰ Jerusalén paklowaxxot a sew griegos pat pejsitaeyax itpaeliajwa Diosliajwa. Patbejpi taeliajwa Pascuafiesta.

²¹ Japi jiw pat wɔt Jerusalén paklowaxxot, mox soepapi Felipejot, japon kaen xanalxotpijin. Japon Betsaida paklowaxpijin, Galilea tɔajnxot. Do jawɔt, japi jum-aechi Felipejiajwa: —Taj-aton, xanal Jesús taesian nospaeliajwan, japon suapich —aechi Felipejiajwa.

²² Do jawɔt, Felipe fulaech chapaeliajwapon Andrés griegos wɔlwekxot Jesús. Do jawɔtbej, Felipe, Andrés suapich, fulaechlisi Jesús poxade chapaeliajwapi japox. Jesúsxot pat wɔt, chapaellisi japox.

²³ Do jawɔt, Jesús jum-aech:

—Tajmatkoi patlis xan, puexa jiw pakoewkolnan, tɔpaliajwan, Dios namat-esliajwabej pejme dukaliajwan.

²⁴ Diachwɔajnakolax xan jum-an. Kaefut, me-ama trigofut, satat mɔths-esal wɔt, japafut naboelaxil. Japafut namanaxael kaefutliajwa. Asafutlax mɔthtas wɔt satat, pejbokt xoep wɔt, itxit namanpox naboelsaxael. Naboelt pox naboelsaxael. Naboet wɔt, xabichaxael pafu. Xanlap-is, jachiyaxaelen. Xan kaenan tɔpaxaelen xabich jiwliajwa, japi pomatkoicha duilaliajwa Diosxotse.

²⁵ Najut nejxasinkampoxan isfulam wɔt ampathatat, ja-am wɔt, duilaximil pomatkoicha Diosxotse. Pe ampathatat babijaxan isampoxan kofam wɔt, ja-am wɔt, pomatkoicha duilaxaelam Diosxotse.

²⁶ Xamal nabichasiam wɔt xanliajwa, ¡xan chiekal nanaewe'e! Jasox xamal ja-am wɔt, duilaxaelam, xan suapich, Diosxotse. Nabistam wɔt xanliajwa, taj-ax Dios pachaemaxael xamalliajwa —aech Jesús Felipejiajwa, Andrésjiajwabej.

Jesús jum-aechpox pejpatɔpaxliajwa

²⁷ Jesús pajutliajwa najum-aech: “Amwɔtjel xan xabich nejchaemilax, matabijtax xot xabich nabijasaxaelenpox. ¿Achaxkat xan jumchiyaxaelen taj-axliajwa? Xan wɔljoeyaxinil taj-ax nabɔ'weliajwa japanabijasaxliajwa. Japanabijasaxliajwa xan fuloekx.

²⁸ Samata, xan jumchiyaxaelen taj-axliajwa: ‘Ax, ¡isde pachaempox puexa jiw xam sitaeliajwa!’ —chiyaxaelen xan taj-axliajwa” —aech Jesús pajutliajwa.

Do jawɔt, Jesús jumtaen athusik, Dios pajut jum-aech wɔt ampo: “Isxlis japox. Kaes isaxaelenbej puexa jiw itpaeliajwan xabich tajpamamax” —aech Dios athusik.

²⁹ Jaxot jiw naeweti, japi chiekal jummatibija-el, Dios naksiyak wut. Asew japixot japox jumtaenpi, japi jum-aechi ampox:

—Me-ama iam najuw wut, jathia-aechox —aechi.

Jawut asewbej japixot jum-aech:

—Dios pej-angel naksiya Jesúsliajwa —aechi.

³⁰ Jesús jum-aech japiiajwa:

—Dios japox jum-aechsik wut, xan kaenanliajwa Dios japox naksiya-el. Xamalliajwabej Dios naksiya matabijaliajwam xan Dios nato'aponanpox.

³¹ Asamatkoi Dios kastikaxael puexa jiw, xan nanaexasis-elpi. Satanásbej kastikaxaes. Do jawut, Satanás kaes tato'laxil ampathatpijiw, Dios kefe'naxaes xoton tato'lax.

³² Xan nakematamatal wuti cruztat, do jawux, xabich jiw, ampathatpijiw, tajwuaian naexasisaxaeli —aech Jesús.

³³ Jesús japox jum-aech xanal chiekal matabijaliajwan japon tɔpaxaelpox cruztat.

³⁴ Asew jaxot naewetpi, japi jum-aech Jesúsliajwa:

—Moisés chajia lelpox jum-aech: 'Cristo pomatkoicha dukaxael. Japon toepaxil' —aechox. Cristo pomatkoicha dukaxael wut, ¿ma-aech xotkat xam jum-am: 'Puexa jiw pakoewkolan tɔpaxael cruztat' —amkat xam? ¿Achankat puexa jiw pakoewkolan? —aech japi jiw Jesúsliajwa.

³⁵ Jesús jum-aech:

—Xanfuk kaematkoiyan xamal naewuajnaaxaelen. Tajnaewuajnax, me-ama itliakax, ja-aechox. Naewuajnax wut, ¡chiekal matabijim tajnaewuajnax! Ja-am wut, xamal, me-ama nanuamsaxaelam itliakaxxot. Tajnaewuajnax jummatibija-elpi, japi, me-ama nanuamsaxaeli itkuataxxot.

³⁶ Xanlap, me-ama itliakaxponan. ¡Xamal xan nanaexasi'e, amxotx wutfuk! Ja-am wut, xamal tajjiwaxaelam —aech Jesús.

Jesús japox buxtoet wut, fulaechon asalel. Do jawutbej, Jesús namoest japi jiw faen-elaliajwaspon.

Ma-aech xot judíos naexasis-el Jesús

(Mr 4.12; Lc 8.10)

³⁷ Jesús kochaxan is judíos taeliajwa, naexasisliajwabejpi japon Dios to'asponpox. Pe japi japoxan taen wut, nakiowa naexasis-eli Jesús.

³⁸ Isaías, Dios pejprofeta, chajia jum-aechpox Cristoliajwa, amwutjel japox ja-aechlisox. Japoxliajwa Isaías chajia jum-aech Diosliajwa:

“Tajpaklon Dios, jiw naexasisaxil xanal tajnaewuajnaxpox xamliajwa. Naexasisaxilbejpi, taen wut nejpmamax” —aech Isaías Diosliajwa.

³⁹ Isaías lelpox jum-aechbej, ma-aech xot judíos naexasisaxil Jesús, Dios to'asponpox. Isaías jum-aech:

⁴⁰ “Japi jiw Dios itfumatakas, pejnechaxoelaxanbej. Samata, pajut pej-itfutut, me-ama taeyaxili. Pajut pejnechaxoelaxantat jummatibijaxilbejpi. Samatabej, japi Dios pejjamechan naexasisaxil kofaliajwa pejbabijaxan ispoxan” —aech Isaías, chajia jum-aech wut judíosliajwa.

⁴¹ Isaías japox chajia jum-aech, masoxtat taen xot Jesús pejpmamax. Isaías japox jum-aechbej Jesúsliajwa.

⁴² Pe nakiowa, xabich judíos naexasiti Jesús. Kaeswapichbej judíospaklochow, naexasiti Jesús. Pe japi tulaela naksiya-el jiw jumtaesamatas, pejlwla xoti fariseosliajwa, fiasasamatas leliajwa judíos naewuajnabachaxot.

⁴³ Japi judíos kaes nejxasinki jiw nejchachaemlialiajwas japiiajwa. Japi nejxasinka-el Dios nejchachaemilpoxliajwa japiiajwa.

Naexasis-elpi Jesús pejjamechan, japi jiw pejbu'wuaianpox

⁴⁴ Jesús pinjametat jum-aech jiwliajwa: “Xamal xan nanaexasitam wut, xankal nanaexasis-emil. Naexasitambej taj-ax, japon xan nato'apon.

⁴⁵ Xamal xan namatabijam wut, matabijambej xan nato'apon.

⁴⁶ Xan, me-ama itliakax. Fuloekx ampathatasik xan nanaexasiti namaesamata itkuataxxot.

⁴⁷ “Tajnaewuajnax jumtaenpi, naexasis-el wut, xan tajut japi tasalaxinil pejbu'wuaianpoxanliajwa. Xan fulae-enilsik ampathatpijiw tajut tasalaliajwan japi pejbu'wuaianpoxanliajwa. Xanlax fuloekx ampathatpijiw bu'welialjwan.

⁴⁸ Xan namastaenpi, japi naexasis-el wutbej tajnaewuajnax, xan tajut tasalaxinil japi jiw pejbu'wuaianpoxanliajwa. Japi tasalaxaes xan tajnaewuajnaxantat japi pejbu'wuaianpoxanliajwa, that teop wut.

⁴⁹ Xan tajut tajaxtat japox jumchi-enil. Taj-ax Dios, japon xan nato'apon, nabuxto'apoxan xan jum-an, naewuajna x wut.

⁵⁰ Xan matabijtax, taj-ax Dios pejtato'lax xabich pachaem. Japox jiw naexasit wut, pomatkoicha duilaxaeli Diosxotse. Samata, xan jum-anpoxan, japox jum-an, me-ama taj-ax Dios nabuxto'a" —aech Jesús.

13

Jesús tuakkiatpox pejnachala

(Mt 10.24, 40; 20.28; Mr 9.37; 10.45; Lc 6.40; 9.48; 10.16; 22.27; Jn 15.20)

¹ We'p wutfuk kaematko'i Pascuafiestaliajwa, do jawut, Jesús matabijt pejmatko'i wemoxspox pax Dios poxaliajwase. Xanal pejnachalwan, japon xabich nanejxasink am-pathatat. Samata, pax Dios poxaliajwa wut, jawutbej nakiowa Jesús nanejxasinkaful xanal pejnachalwan. Hasta japon tup wut, nakiowa nanejxasinkafulon xanal.

²⁻⁴ Pascuafiesta mox wut, Satanás pijaxtat Judas nejchaxoel wiasliajwapon Jesús padael-majiwxot. Judas, Simón Iscariote paxulan, Jesús padaelman nadofapon. Jesús pajut matabijt fuloekpox Diosxotse. Matabijtbejpon pejme japoxaxoepox. Matabijtbejpon pax Dios chaxduchpox pamamax puexa tato'laliajwa. Do jawut, xanal naxaelax wut madoipijax, Jesús mesaxot nant wut, jawut jolton pejsumta-osax. Do jawutbej, fatkakuton toalla.

⁵ Do jawut, kuanarxot mint fandikon platónadik. Do jawut, xanal natuakkiaton. Me-ama nabichan wut, ja-aechon xanalliajwa. Toalla, fatkakutpoxat, xanal natuakjoeipon.

⁶ Jesús kiasliajwa wut Simón Pedro pejtuak, jawut Pedro jum-aech:

—Tajpaklon, xamkat xan natuakkiasaxaelam? —aech Pedro Jesúsliajwa.

⁷ Jesús jumnot wut, jum-aech:

—Amwutjel xam matabijs-emilfuk xan isxpox. Baxael, matabijsaxaelam, ma-aech xot xan japox isx —aech Jesús Pedroliajwa.

⁸ Pedro pejme jum-aech Jesúsliajwa:

—¡E! Xan ketapaeyaxinil xam natuakkiasliajwam —aech Pedro.

Do jawut, Jesús jum-aech:

—Xam tuakkias-enil wut, xam tajnachalnaximil —aech Jesús.

⁹ Do jawut, Simón Pedro pejme jum-aech:

—Tajpaklon, xam tajtuakkal nabej kias! ¡Kia'ebey tajke-e, tajmatnaetbej! —aech Pedro Jesúsliajwa.

¹⁰ Jesús jumnot wut, jum-aechon Pedroliajwa:

—Jelnawaen pat wut asabatat, japon wewe'pa-esal pobu'ta kiasliajwas, jelnawaen xoton. Pachaem tuakkal kiasliajwas, tuak-asda'nik xot, sat sae'enas wut. Xamalbej ja-am, ajil babilaxan nejnejchaxoelaxanxot, chiekal xan nanaexasitam xot. Pe nakiowa, kaen xamalxot pachaema-el pejnechaxoelax —aech Jesús Pedroliajwa.

¹¹ Jesús matabijt, achan wiasaxaesoon padaelmajiwxot. Samata, Jesús japox jum-aech.

¹² Dolisdo', Jesús ketoet wut xanal pejnachalwan natuakkiatpoxan, pejme naxoelon pejsumta-osax. Do jawut, pejme ek wuton mesaxot, xanal najum-aechon:

—xamalkat matabijam xan isxpox xamalliajwa?

¹³ Xamal najum-am: 'Jiw chanaekabuanan' —na-am. 'Tajpaklon' —na-ambej. Diachwajnakolax xan nejpaklonan xamalliajwa.

¹⁴ Xan nejpaklonan wut, jiw chanaekabuanan wutbej, nakiowa patuakkiatx. Xan japox isx xamalbej jachiliajwam.

¹⁵ Japoxan xamal itpaeix chiekal matabijaliajwam, nakaewam naka-jachawaesfulaliajwam.

¹⁶ Diachwajnakolax xan jum-an. Nabichan kaes pejme sitae-esal asew jiw. Me-ama pejpaklon xabich jiw sitaens, jachi-esal nabichan. To'asponbej kaes pejme sitae-esal. Me-ama to'apon xabich jiw sitaens wut, jachi-esal japon aton. Xamal nabichwam xanliajwa. Samata, xamal kaes paklochowae-emil. Me-ama xan kaes paklonan, jachi-emil xamal. Kaes pejme pachaem xamal matabijaliajwam xan itpaexpoxan.

¹⁷ Xamal patuakkiatpox matabijam wut, xamalbej, me-ama japox isaxaelam wut nakae-waliajwa, ja-am wut, xabich nejchachaemlaxaelam.

¹⁸ "Xan matabijtax xamal, makanotxpim. Pe japox jum-an wut, jumchi-enil puexa xamalliajwa. Matabijtax, kaen xamalxot tadaelman nadofapox. Me-ama Dios pejjamechan, chajia lelspx, jum-aech wut, japox ja-aechlisox. Jum-aechox: 'Xan saapich, xaeyaxaelpon, japonlap tadaelman nadofaxael' —aech chajia lelspx.

¹⁹ Japoxliajwa ma amwutjel jum-an, jachi-el wutfuk japox. Do japox, ja-aech wut, xamal xan nanaexasisaxaelam, xan Cristoponanpox, Dios nato'aponan.

²⁰ Diachwajnakolax xan jum-an. Xamal sitaenam wut xan to'axpon, ja-am wut, xanbej nasitaenam. Xan nasitaenam wut, taj-ax Diosbej, sitaenam, japon xan nato'apon" —aech Jesús, xanal nachanaekabuana wut.

*Jesús jum-aech Judas wiasaxaespor padaelmajiwot
(Mt 26.20-25; Mr 14.17-21; Lc 22.21-23)*

²¹ Do jawut, Jesús japox jum-aech wut xanalliajwa, xabich nejxaejwason. Jawut Jesús jum-aech xanal, pejnachalwanliajwa, chiekal matabijaliajwan:

—Diachwajnakolax xan jum-an. Kaen xamalxot nawiasaxael tadaelmajiwot —aech Jesús.

²² Do jawut, xanal nakaewan nawajnachaeamsnax, xanal matabija-enil xot, achanliajwa Jesús japox jum-aech.

²³ Dolisdo', naxaelx wut, xan Juan, Jesús xabich nanejxasinkponan, mox ekx Jesúsxot.

²⁴ Samata, Simón Pedro xan nato'a wujnachaeamsliajwan, achanliajwa Jesús japox jum-aech.

²⁵ Do jawut, xan kaes mox chiekal soepnax Jesús wujnachaeamsliajwan. Jawut xan wujnachaeamtax wut, jum-an Jesúsliajwa:

—Tajpaklon, ¿achanliajwakat xam japox jum-am? —an xan Jesúsliajwa.

²⁶ Jesús najumnot wut, jum-aechon:

—Xan panax, taxthotxpro, kaen xamalxot chaxdusaxaelenpon, japonlap xan nawiasaxael tadaelmajiwot —aech Jesús xanliajwa.

Dolisdo', Jesús taxthot wut panax, jawut chaxduton Judas Iscariote, japon Simón Iscariote paxulan.

²⁷ Do jawut, Judas panax, taxthosax, kefit wut, jawut Satanás low Judas pejmatpuatxot. Jawut Jesús jum-aech Judasliajwa:

—Isaxaelampox isde kamtalejen! —aech Jesús.

²⁸⁻³⁰ Jesús japox jum-aech wut, Judas kamta chijiapon xanalxot. Judas chijia wut, madoiliso.

Puexa xanal, naxaelaxpin, matabija-enil, ma-aech xot Jesús japox jum-aech Judasliajwa. Asew xanalxot nejchaxoel: "Jesús bej to'abej Judas wujsliajwa naxaeyaxan Pascuafiestaliajwa. Japoxa-el wut, Jesús bej to'abej Judas chaxduiliajwa plata jiw kejila" —aechi, nejchaxoel wut. Japox nejchaxoeli, kaen Judas platachoxa xalaeja xot puexa xanalliajwa.

*Jesús waeltpox pajeltato'lax pejnachalaxot
(Jn 7.34; 15.12-17; 1 Jn 2.7; 3.23; 2 Jn 5)*

³¹ Judas chijia wut, Jesús jum-aech xanalliajwa:

—Tajmatkoi pat. Amwut xamal taeyaxaelam tajpamamax xan, puexa jiw pakoewkolnanponanpox. Xan isxproxantat taeyaxaelambej taj-ax Dios, xabich mamnikpon.

³² Xan isxproxantat xamal taeyaxaelam taj-ax Dios, japon xabich mamnikpon. Dios isproxantatbej xamal taeyaxaelam, xan Dios paxulan, xabich mamnixapronan. Dios japox isaxael kamtalejen.

³³ Tajnachala, xamalxotaxaelen kaehora suapichliajwa asbuan jumch. Xan ajinil wut, xamal nawulwekaxaelam. Me-ama judiospaklochow chajia jum-an: 'Xamal fulaeyaximil xan fulaeyaxaelen poxade' —anpox, japox amwutjel xamalbej jum-an.

³⁴ Pajeltato'lax namanaxael xamalxot naexasisfulaliajwam. ¡Nakaewa nanejxasinkde! Me-ama xan xamal nejxasinkax, ¡xamalbej ja-amsfulde nakaewaliajwa!

³⁵ Nakaewa nanejxasinkafulam wut, ja-amsfulam wut, potuajnachapijiw matabijaxael xamal tajnachalwampim —aech Jesús xanalliajwa.

*Pedro xanalixaxaelpox Jesús pejnachalanpoxliajwa
(Mt 26.31-35; Mr 14.27-31; Lc 22.31-34)*

³⁶ Simón Pedro wujnachaeamt wut, jum-aechon Jesúsliajwa:

—Tajpaklon, ¿ampoxaxaelamkat xam? —aech Pedro.

Jesús jumnot wut, jum-aechon:

—Xan fulaeyaxaelen poxade, xamfuk amwut fulaeyaximil. Pe baxael, fulaeyaxaelam —aech Jesús.

³⁷ Do jawut, Pedro jum-aech:

—Tajpaklon, ¿ma-aech xotkat amwut xam nakfulaeyaxinilfuk? Xan nejchaxoelx tupaliajwam xamliajwa —aech Pedro.

³⁸ Jesús jumnot wut, jum-aechon:

—¿Diachwajnakolaxkat xam nejchaxoelam tupaliajwam xanliajwa? Diachwajnakolax xan jum-an. Kawaema nejlaewajna, xan naxanalixaxaelam tres veces. Jumchixaxaelam: "Xan japon aton matabijs-enil" —chixaxaelam xanliajwa —aech Jesús Pedroliajwa.

14

Jesús, me-ama nuamtpox jiw pasliajwa Diosxotse
(Mt 7.7-11; 11.27; Lc 11.9-13; Jn 1.18; 6.46; 15.7, 16; 16.23-24; Hch 4.12; 1 Jn 3.21-22; 5.14-15)

¹ Jesús pejme jum-aech xanalliajwa: “¡Xamal xabich nabej nejchaxoele! ¡Dios xanaboejim! ¡Xan naxanaboejimbej, xan Dios paxulnan!

² Taj-ax Dios pejbaxot xabich batuchan jiw duilaliajwa. Ajil wut, xan japox jumchiyaxinil. Xanlap japoxaxoeyan xamal wuajnaechaemsliajwan, jaxotse nejmach pomatkoicha xamal duilaliajwam.

³ Toetx wut chaemsaxan, xan pejme kaxaxoekan xamal buflaeliajwanse. Samata, xamal xanxotaxaelam.

⁴ Xamal matabijam, xan fuloeyaxoeyan poxase, japot, nuamt, pase xan dukx jaxotse” – aech Jesús xanal pejnachalwanliajwa.

⁵ Tomás jum-aech Jesúsliajwa:
–Tajpaklon, xanal matabija-enil, xam fulaeyaxaelam poxade. ¿Machiyaxaelenkat xanal japot nuamt fulaeliajwan? –aech Tomás.

⁶ Jesús jumnot wut, jum-aechon:
–Xanlap kaenan, nuamtan, jiw pasliajwa taj-ax Diosxotse, jaxotse japi jiw duilaliajwa. Jum-anbej diachwuajnakolaxpox Diosliajwa. Xan kaenan xajupx kajachawaesliajwan jiw pomatkoicha duilaliajwa. Jiw pajut pijaxtat pasaxil taj-ax Diosxotse. Xan kaenan tajaxtatkat jiw pasaxael taj-ax Diosxotse, xan, me-ama nuamtan wut, ja-an xot.

⁷ Xamal chiekal xan namatabijam wut, chiekal pamatabijaxaelambej taj-ax Dios. Xanlap Dios paxulnan. Amwutjel xamal matabijam taj-ax Dios. Ja-am wut, me-ama najut taj-ax Dios pataenam, xan chiekal namatabijam xot –aech Jesús Tomásliajwa.

⁸ Do jawut, Felipe jum-aech:
–Tajpaklon, ¡xanal natapaem nej-ax taeyax! Ja-am wut, xanal kaes asax wuljoeyaxinil –aech Felipe Jesúsliajwa.

⁹ Do jawut, Jesús jumnot wut, jum-aechon:
–Felipe, pin-iamatkoian xamalxotx. Pe nakiowa, chiekal namatabijs-emilfuk. Xan nataenpi, japi taenbej taj-ax Dios. Ja-aech wut, ¿ma-aech xotkat xan nawuljowam taj-ax taeliajwam?

¹⁰ ¿Xamkat naexasis-emil taj-ax xanxotpox, xanbej taj-axxotaxpox? Xan kaenejchaxoelax, taj-ax suapich. Jum-an wut xamalliajwa japoxan, xan tajut tajaxtat jumchi-enil. Taj-ax, pijaxtat jum-ansfulax. Taj-ax xanxot dukpon, japon isful pejbichax xanxot.

¹¹ ¡Ampoxlap xamal chiekal naexasi'e! Xan taj-axxotx. Taj-axbej xanxot. Japox naexasis-emil wut, ¡japox naexasi'e, xan koechaxan isfulax xot!

¹² Xan jum-an diachwuajnakolax. Xan nanaexasiti, japibej isaxael koechaxan, me-ama xan. Do baxael, xan to'axaelen Espíritu Santo, taj-ax poxasax xot. Samata, xan nanaexasitpi kaes xabich koechaxan isaxael Espíritu Santo pijaxtat. Me-ama xan, jachiyaxili.

¹³⁻¹⁴ Puexa xan tajaxtat Dios wuljowam wut, xan japoxan isaxaelen, xamal matabijaliajwam, xan japoxan isx taj-ax Dios pijaxtat –aech Jesús Felipelialjwa.

Jesús jumdutpox to'aliajwa Espíritu Santo pejnachala poxasik

¹⁵ Jesús pejme jum-aech xanal pejnachalwanliajwa: “Xamal xan nanejxasinkam wut, ¡tajtato'lax chiekal naexasisfulde!

¹⁶ Xan taj-ax Dios wuljoeyaxaelen asan to'aliajwapon, japon xamal kajachawaesfulaliajwa. Samata, taj-ax Dios to'axoek Espíritu Santo. Japon asawul kajachawaesan. Japon pomatkoicha xamalxotaliajwa.

¹⁷ Espíritu Santo diachwuajnakolax jum-aech. Ampathatpijiw, xan nanaexasis-elpi, japi sitae-el Espíritu Santo, tae-el xoti, matabija-el xotbejpi. Pelax Espíritu Santo pomatkoicha xamal nejmatpuatanxotaxael kajachawaesfulaliajwa. Samata, chiekal matabijaxaelam Espíritu Santo.

¹⁸ “Xan amxot chijian wut taj-ax poxase, xamal tamach waelaxinil. Xan pejme kaxaxoekan xamal poxasik.

¹⁹ Kaeswapich matkoian wut, ampathatpijiw pejme xan nataeyaxil. Xamallax pejme nataeyaxaelam. Xan tux wut, Dios namat-et wut, pejme dukaxaelen. Samata, asamatkoi xamal xan tajaxtat pomatkoicha duilaxaelam Diosxotse.

²⁰ Espíritu Santo pask wut xamalxot, xamal matabijaxaelam xan taj-ax Diosxotaxpox. Ja-aech wut, xamal chiekal matabijaxaelambej xanxotampox. Do jawut, xanbej xamalxotaxaelen.

²¹ Matabijapi tajtato'lanan, japoxan naexasit wutbejpi, diachwuajnokolax japi jiw xan nanejxasink. Taj-ax Diosbej japi nejxasinkaxaes, xan nanejxasinkpi. Xanbej japi nejxasinkaxaelen. Ja-an wut, japi matabijaxael, achanan xan" —aech Jesús xanal pejnachalwanliajwa.

²² Asan Judas, japon Judas Iscariote-el. Japon wuajnachaemt wut, jum-aechon Jesúsliajwa: —Tajpaklon, ¿ma-aech xotkat xanalkal koewan amwut natapaeyaxaelam matabijaliajwan, achanamkat xam? ¿Ma-aech xotkatlax xam tapae yaximil ampathatpijiwbej matabijaliajwa, achanam xam? —aech Judas Jesúsliajwa.

²³ Jesús jumnot wut, jum-aechon Judasliajwa: —Xan nanejxasinkpi, japi naexasisfulaxael tajtato'lax. Ja-aech wut, japi nejxasinkaxaes taj-ax Dios. Xan, taj-ax Dios swapich, fulaeyaxaelen duilaliajwan, japi swapich.

²⁴ Jiw nanejxasinka-el wut, japi naexasis-el tajtato'lanan, tajnaewuajnanxanbej. Xan tajut tajaxtat naewuajna-enil. Japox taj-ax Dios pejnaewuajnanxan, japon nato'apon ampathatasik —aech Jesús Judasliajwa.

²⁵ Do jawux, Jesús jum-aech xanal, pejnachalwanliajwa: "Amwutjel xamal japoxan jum-an, xamalxotx wutfuk.

²⁶ Pe Espiritu Santo xan tajaxtat taj-ax Dios to'axoek xamal nejmatpuatan poxasik, japon, Espiritu Santo, xamal chanaekabuanaxael puexa Dios pijaxan. Kajachawaesfulaxaelbejpon nejchafaekaliajwam puexa chajia xan jum-anpoxan xamalliajwa.

²⁷ "Athu poxasax wut, xamal chiekal pachaemsfulaxaelam Diosliajwa. Samata, me-ama xan nejchachaemlax tajnejchaxoelaxtat, xamalbej jachisfulaxaelam. Me-ama ampathatpijiw, xan nanaexasis-elpi japi pejnechachaemlax, jachi-el tajnejchachaemlax. Samata, xamal xabich nabej nejchaxoele! ¡Xamal nabej nejlewlé! bej!

²⁸ Xamallis najumtaenam xan athu poxaxoeyanpox. Jumtaenambej pejme kaxaxoekpanox xamalxotaliajwan. Taj-ax kaes pejme paklon. Me-ama xan jachi-elon. Diachwuajnokolax xamal xan nanejxasinkam wut, xamal nejchachaemlaxaelam xanliajwa, xan jum-an wut: 'Xan taj-ax poxaxoeyan' —an wut.

²⁹ Xan japox jum-an xamalliajwa. Do baxael, japox ja-aech wut, jawut xamal xan nanaexasisaxaelam, xan chajia jum-an xot.

³⁰ "Kaes piach naksiyaxinil xamalliajwa, fulaeyaxael xot Satanás, ampathatpijiw tato'lan. Pe Satanás xan natato'laxil.

³¹ Ampathatpijiw matabijaxael, taj-ax xabich xan nanejxasinkpox. Samata, xan isfulax taj-ax Dios nato'apoxan.

"¡Nanim! ¡chijias amxot!" —aech Jesús xanal pejnachalwanliajwa.

15

*Jesús, me-ama uvanaech wut, ja-aechpox
(Jn 13.34; 15.17; 1 Jn 3.23; 2 Jn 5)*

¹ Do jawut, xanal nuamtat folx wut, Jesús jum-aech: "Xan, me-ama uvanaech wut, ja-an. Taj-ax, me-ama uvalul tataeflan wut, ja-aech.

² Uvanaedalan, naboes-elpi, tataefulpon japadalan pi'a pelsliajwa. Asadalan naboet wut, tataefulpon japadalan chiekal chaemsaxael, kaes pejme naboesliajwa. Xamal, me-ama japadalan wut, ja-am, tajjiwam xot, xan nanaexasitam xotbej.

³ Kamal naexasitam xan naewuajnapoxan. Samata, amwutjel taj-ax Dios beltaan babijaxan isampoxanliajwa.

⁴ Ampathatatam wut, xan naxanaboejafulde! Xanbej xamal chalafulaxaelen. Uvanaedalt tasiapchas wut, japadalt poklanaexota-el wut, uvaladt pajut tamach naboesaxil. Naboesliajwa wut, poklanaechantataxael. Xamalbej, me-ama japadalan wut, ja-amde! ¡isfulde pachaempoxan, xan naxanaboejam wut! Xan naxanaboeja-emil wut, isaximil pachaempoxan.

⁵ "Xan, me-ama uvanaech wut, ja-an. Xamal, me-ama japadalan wut, ja-am. Xamal xanxochfulam wut, isfulaxaelam Dios nejxasinkpoxan. Me-ama uvanaedalan xabich naboesaxael, jachiyaxaelambej xamal. Xan naxanaboeja-emil wut kajachawaesliajwan, ja-am wut, xamal najut nijaxtat isaximil pachaempoxan.

⁶ Xan naxanaboeja-elpi, japi isaxil pachaempoxan. Me-ama padalan pi'aspi, jachiyaxaesbej japi jiw. Japadalan majow wut, nosaxaes jitat it-owaliajwas jaxot jitat chiekal toejwaliajwaspi.

⁷ "Xan naxanaboejam wut, naexasisfulam wutbej xan naewuajnapoxan, ja-amsfulam wut, ¡wuljoesiampox taj-ax Dios, wuljoem! Japon japoxan xamal chaxduiyaxael, wuljowampoxan.

⁸ Isfulam wut pachaempoxan, Dios nejxasinkpoxan, ja-amsfulam wut, jiw matabijaxael diachwajnakolax xamal tajnachalwampim. Jasox ja-amsfulam wut, taj-ax sitaeyaxaes asew jiw.

⁹ Xamal nejxasinkax. Me-ama taj-ax xan nanejxasink wut, ja-an xan xamalliajwa. Samata, jxan naxanaboejim xamal nejxasinkaliajwan!

¹⁰ Xan naexasisfulax taj-ax tato'alpoxan. Samata, taj-ax xabich nanejxasinkaful. Xamal-bej naexasisfulam wut xan tato'laxpoxan, ja-am wut, xamalbej nejxasinkafulaxaelen.

¹¹ "Xan ampojan jum-an xamal nejchachaemlaliajwam. Me-ama xan nejchachaemlax xamalliajwa, xamalbej ja-amsfulde xanliajwa. Ja-amsfulam wut, kaematkoisful xabich nejchachaemlaxaelam.

¹² Japox jum-am wut, xamal to'ax nakaewa nanejxasinkaliajwam. Me-ama xamal nejxasinkax, ja-amdebej xamal, nakaewa nanejxasinkam wut!

¹³ Nejxasinkpon pejnachala, pejnachala beyaxaes wut asew jiw, japon pejnachalaliajwa jumchiyaxael: 'Tajnachala nabej nawebe!' jXankal naboesim!' —chiyaxaelon. Japon jasox jachiyaxael, kaes pachaempox isliajwa ajilxot pejnachalaliajwa.

¹⁴ Isfulam wut xan tato'laxpox, ja-am wut, itpaeyam xamal xan tajnachalwampimpo.

¹⁵ Samata, amwutjel xamal jumchiyaxinil: 'Xamal tamakjiwam xanliajwa' —chiyaxinil, xamal tajnachalwam xot. Pamak matabija-el pejpaklon puexa isaxaelpoxan. Pelax xamal tajnachalwam xot, naewwajna puexa taj-ax Dios xan najum-aechpoxan.

¹⁶ Xamal nejchaxoelam wut, jchiekal nejchaxoelde, xamal makanotx xot! Xamal xan namakafis-emil. Samata, to'ax asapaklowaxanpijw naewwajnafulaliajwam tajwujjan, isfulalijwambej pachaempoxan Diosliajwa. Japoxan isfulam wut, japox toepaxil. Ja-amsfulam wut, taj-ax Dios chaxdusaxael wuljowampoxan xan tajaxtat.

¹⁷ jXamal to'ax nakaewa nanejxasinkafulaliajwam!" —aech Jesús xanal pejnachalwanliajwa.

Ampathatpijw nejweslapox Jesús, japon pejnachalabej

(Mt 10.24; Lc 6.40; Jn 13.16; 17.14-18)

¹⁸ Jesús pejme jum-aech xanalliajwa: "Ampathatpijw, xan nanaexaxis-elpi, japi xamal nejweslaxael. Ja-aech wut, xamal nejchaxoelaxaelam japi xan matxoela nanejweslapox.

¹⁹ Xamal ampathatpijwamkal wut, jiw nejweslaxil xamal. Japi nejxasinkaxael xamal. Me-ama pejiw nejxasink wut, jachiyaxaeli xamalliajwa. Pe xamal makanotx, japixotam wut. Samata, ampathatpijw nejwesla xamal, kaes japixota-emil xot.

²⁰ jNejchaxoelde chajia jum-anpox, jum-an wut: 'Pamakan kaes paklona-el. Me-ama pejpaklon, jachi-el pamakan' —an wut! Xamalliajwa jachiyaxaelbej. Ampathatpijw babijaxan is wut xanliajwa, japibej isaxael babijaxan xamalliajwa. Asew jiwlaw naexasit wut tajnaewwajna, ja-aech wut, xamal naewwajnapox japi naexaxisaxaelbej.

²¹ Ampathatpijw babijaxan isaxael xamalliajwa, tajnachalwam xot, japi matabija-el xot taj-ax Dios, xan nato'apon.

²² "Xan fulae-enil wut japi jiw naewwajnalijwan, ja-an wut, japi jiw bu'wujjanjilaxael. Pe xan fulaenx wut, japi naewwajna xbej. Japi naexaxis-el tajnaewwajna. Samata, amwutjel jumchiyaxili: 'Xan bu'wujjanjinil' —chiyaxili.

²³ Xan nanejweslapi, japi nejweslabej taj-ax Dios.

²⁴ Xan japixot koexaxan is-enil wut, japi jiw bu'wujjanjilaxael. Pelis xan koexaxan isx japixot. Pe nakiowa, japi jiw xan nanejwesla. Nejweslabejpi taj-ax Dios.

²⁵ Chajia lelspx jum-aech: 'Masoxtat xan jiw nanejweslaxael' —aechox. Samata, ampathatpijw xan nanejwesla.

²⁶ "Xan Espiritu Santo to'axaelen xamal nejmatpuatanxotaliajwa. Japon asawul Kajachawaesan. Espiritu Santo jum-aech diachwajnakolaxpoxkal. Espiritu Santo fuloek wut taj-axxotsik, jumchiyaxaelon pachaempoxan xanliajwa.

²⁷ Xan tudutx wut jiw naewwajna, xamal xanxotam. Do jawux, hasta amwutjel, xan swapich, nanuamtam. Samata, xamalbej jumchiyaxaelam pachaempoxan xanliajwa" —aech Jesús xanal pejnachalwanliajwa.

16

Jesús pejnachala nabijasaxaelpox japon pijaxtat

¹ Jesús pejme jum-aech xanal pejnachalwanliajwa: "Xan jumchiyaxaelen ampojan, xamal tajnachalwam xot, nabijatam wut kofasamatam xan naxanaboejampox.

² Xan naexaxis-elpi, japi xamal jukaxael judíos naewwajna baxanxot. Ja-aech wut, xamal tapaeyaxili pejme leliajwam. Japi ba wuti xamal, japi nejchaxoelaxael: 'Xatis baes wut Jesús naexasiti, xatis isas Dios nejxasinkpox' —chiyaxaeli, nejchaxoel wut.

³ Japi isaxael babijaxan xamalliajwa, matabija-el xoti taj-ax Dios, xanbej.

⁴ Japox xamal jum-an nejnejchaxoelaxan mamnikaliajwa. Japamatkoi pat wut xamalliajwa, xamal nejchaxoelaxaelam chajia jum-anpoxliajwa” —aech Jesús xanal pejnachalwanliajwa.

Espíritu Santo isfulpoxan ampathatat

Do pejme Jesús jum-aech xanal pejnachalwanliajwa: “Xamal majt ampox jumchi-enil, tajut chiekal xamalxotx xot.

⁵ Pe amwut, xan taj-ax Dios, xan nato'apon, poxaxoeyan. Pe kaen xamalxot chinax nawuajnaemta wut, najumchi-el: ‘¿Xam ampoxaxaelamkat?’ —nachi-el.

⁶ Xamallax asbuan jumch nejchaemilam, japoxan jum-an wut.

⁷ Diachwuajnakolax xan jum-an. Kaes pejme pachaem xamalliajwa xan taj-ax poxaliajwanse. Xan taj-ax poxa-enil wut, Kajachawaesan pasaxil xamalxotsik, japon kajachawaesliajwa xamal. Xanlax athu poxasax wut, ja-an wut, to'axoekan Kajachawaesan xamal nejmatpreatanxotaliajwa.

⁸ Espiritu Santo pask wut, ampathatpijw chiekal pajut matabijaxael japi babijaxan ispoxanliajwa, pachaempoxanliajwabej. Espiritu Santo pijaxtat jiw matabijaxael Dios kastikaxaespoj babijaxan ispi.

⁹ Espiritu Santo pijaxtatbej jiw matabijaxael japi babijaxan ispox, xan nanaexaxis-el xoti Dios bu'welijaes.

¹⁰ Espiritu Santo pijaxtatbej jiw matabijaxael pachaempoxan isliajwa, xan taj-ax Dios poxaxoeyan xot. Xamal kaes nataeyaximil.

¹¹ Xan nanaexaxis-elpi, japi matabijaxael Espiritu Santo pijaxtat kastikaxaespoj, babijaxan is xoti. Satanásbej, ampathatpijw tato'lan, japon asamatkoi kastikaxaes.

¹² “Xan xabich kaes xamal jumchiliajwan. Pe xamal chiekal jummatbijaximil japoxan. Samata, kaes jumchiyaxinil amwutjel.

¹³ Pe Espiritu Santo fuloek wut, japon pijaxtat xamal chiekal matabijaxaelam puexa diachwuajnakolaxpoxan. Pajut pijaxtat naksiyaxilon. Japon jumchiyaxael taj-ax Dios jum-aechpoxan, tajnaewuajnanxanbej. Jumchiyaxaelbejpon asamatkoi jachiyaxaelpoxan.

¹⁴ Espiritu Santo kajachawaesaxael jiw xan nasitaeliajwa. Japon puexa taen, xan isxpoxan. Jumaenbejpon puexa tajnaewuajnanxan. Puexa japoxan xamal chiekal chanaekabuanaxaelon.

¹⁵ Puexa taj-ax matabijtpoxan, japoxan xanbej matabijtax. Samata, jum-an: ‘Puexa matabijtaxpoxan, Espiritu Santobej japoxan matabijt. Do jawut, Espiritu Santo xamal charaeyaxael, japoxan chiekal matabijaliajwam’ —an xan.

¹⁶ “Kaematkoi wutlejen, pejme xan nataeyaximil. Do jawux, kaesnapich matkoiyan wut xan pejme nataeyaxaelam” —aech Jesús xanal pejnachalwanliajwa.

Jiw nejxaejwaxaespi Jesúsliajwa, japi jiw pejme nejchachaemlaxaelpox (Mt 7.7-11; Stg 1.5-6)

¹⁷ Do jawut, xanal pejnachalwanpinxot, asew nakaewa najum-aech:

—¿Achax chiyaxaelkat Jesús jum-aech wut: ‘Kaematkoi wutlejen, kaes xan nataeyaximil. Do jawux, kaesnapich matkoiyan wut, xan pejme nataeyaxaelam’ —aech wutkat Jesús? ¿Achax chiyaxaelkat japox, pajutliajwa najum-aech waton: ‘Xan taj-ax Dios poxaxoeyan’ —aech wutkaton?

¹⁸ ¿Achax chiyaxaelkat, Jesús jum-aech wut: ‘Kaematkoi wutlejen’ —aech wutkat Jesús? Xanal chiekal matabija-enilful achaxliajwa Jesús naksiya —aech asew xanalxot.

¹⁹ Jesús matabijt asew xanalxot wuajnaemtasiaspox. Samata, jum-aechon japijiajwa: —Xamalliajwa chajia jum-an: “Kaematkoi wutlejen, kaes xan nataeyaximil. Do jawux, kaesnapich matkoiyan wut, xan pejme nataeyaxaelam” —an wut, ¿ma-aech xotkat xamal nakaewa nawuajnaemtam japoxliajwa?

²⁰ Diachwuajnakolax xan jum-an. Xamal nejxaejwaxael, xan tux wut. Nawuaoeyaxaelambej. Do jawut, ampathatpijiwlax, xan nanaexaxis-eli, japijiajwa nejchachaemlaxael, xan tux wut. Diachwuajnakolax xamal nejxaejwaxael xanliajwa. Pe nejnejxaejwax chalechkal toepaxael. Jawut nejchachaemilaxkal naliasaxael.

²¹ Pawis boeipuns wut naxawliajwa, waxaenkas. Jawut nabijatpox, wepach wut pejmatkoi. Pe paxuch nalaelt wut, japow nabijatpox, xaeyax, nejkiowpow. Japow chiekal nejchachaemil, paxuch nalaelt xot.

²² Xamal amwutjel ja-am, nejxaejow xot xanliajwa. Xamalfuk nejxaejwaxael ampatkoiyantat. Pe pejme xamal taeyaxaelen wut, japamatkoitat pejme xamal nejchachaemlaxaelam. Asew jiw toesaxil nejnejchachaemlax.

²³ “Japamatkoitat kaes xan nawuajnaemtasaximil matabijaliajwam, Espiritu Santo pajut xamal chanaekabuanafulaxael xot. Diachwuajnakolax xan jum-an. Taj-axbej chaxduiyaxael puexa xamal wujowampoxan xan tajaxtat.

²⁴ Hasta amwutjel, xamal taj-ax Dios chinax wuljoe-emil xan tajaxtat. Pe amwutjel xan tajaxtat taj-ax Dios wuljoe-flaxaelam. Taj-ax Dios chaxduiyaxael xamal wuljowampoxan xan tajaxtat. Ja-am wut, xabich nejchachaemlaxaelam nejnejchaxoelaxantat” —aech Jesús.

Jesucristo malechapox chaemilpoxan ampathatat
(Ro 8.37; 2 Co 2.14; Ap 3.21; 5.5)

²⁵ Jesús pejme jum-aech xanal pejnachalwanliajwa: “Me-ama majt wuajantat jum-an xamal naewuajna x wut, jasoxtat pejme naewuajna x wut. Pe asamatkoi jumchiyaxaelen xabich tampoela-elaxtat taj-ax Diosliajwa.

²⁶⁻²⁷ Japamatkoitat xamal najut xan tajaxtat taj-ax Dios wuljoe-yaxaelam, kawuajnam wut wewe'poxanliajwa. Xamalliajwa xan wewuljoe-yaxinil taj-ax Dios, taj-ax tapaei xot xamal najut wuljoeliam, nejxasink xoton. Taj-ax Dios nejxasink xamal, xan naejxasinkam xot, naexasitam xotbej xan fuloekponanpox Diosxotik.

²⁸ Xan fuloekx taj-axxot pasliajwan ampathatat. Amwut athu poxaxoeyan taj-ax poxase” —aech Jesús xanal, pejnachalwanliajwa.

²⁹ Do jawut, xanal japon pejnachalwan jum-an:

—Amwutjel xam jum-am chiekal tampapoxat. Kaes naewuajna-emil wuajantat.

³⁰ Amwutjel xanal matabijax xam puexa matabijtamponam. Xam chajia chiekal matabijtam xanal wuajnaemlasianpoxan xam. Samata, chiekal xanal chanaekabuanam wut, kaes nawewe'pa-el xam wuajnaemsliajwan. Samatabej, xanal chiekal naexasitx xam Diosxotik fuloemkponanpox —an xanal Jesúsliajwa.

³¹ Jesús jumnot wut, jum-aechon xanalliajwa:

—Xamal amwutjel xan chiekal nanaexasitam.

³² Pelis tajhora nawepat. Amwut xamal nasalaxaelam nejlel, asew jiw babijax isaxael xot xanliajwa. Tamach nawaelsaxaelam, nejlewla xot. Pelax xan tamachaxinil, taj-ax nachala xot.

³³ Xan japoxan jum-an xamal nejlewasamata, xamal xan naxanaboejam xot. Ampathatatam wut, nabijasaxaelam. Pe nabijatam wut, xamal nabej nejlewle! xanlis malechax chaemilpoxan ampathatat! —aech Jesús xanal pejnachalwanliajwa.

17

Jesús Dios kawuajanpox pejnachalialiajwa
(Jn 13.18)

¹ Jesús buxtoet wut jum-aechpox xanalliajwa, do jawut, athu natachaemsepon. Pax Dios kawuajan wut, jum-aechon: “Ax, tajmatkoi nawepat. Jiw itpaem xan mamnikaxponanpox, naxulnan xot! Ja-aech wut, xanbej itpaeyaxaelen xam xabich mamnikamponanpox.

² Xam natapaeyam puexa jiw tato'lialiajwan. Samata, xan naxulnan kajachawaesaxaelen xan nanaexasiti, japi pomatkoicha duilialiajwa xamxotse.

³ Ax, xam kaenam Diosnam. Do kaes asan, Dios, chiekal jil. Xanbej Cristowan, xam nato'amponan ampathatasik. Jiw xatis naknaexasit wut, japi jiw duilaxael pomatkoicha xatisxotse.

⁴ “Toetx tajbichax, xam nato'ampox isliajwan. Jiw, ampathatpijiw, itpaex xam xabich mamnikamponanpox, xam chiekal sitaelialiajwapi.

⁵ Ax, chajiakolaxtat, ampathat ajil wutfuk, jawut xanbej xamxotx. Jaxotse, xam suapich, puexa tato'lax xam nijaxtat. xamwutjel pejme jasox isde xanliajwa, xamxotaxaelen wut!

⁶ “Ampathatpijiwxot, asew xam makanotam, japi jiw xan nanaexasisfulialiajwa. Xan tajaxtat japi matabijaful, achanam xam. Majt japi jiw xam nejjiw. Pe amwutjel, japiwej xan tajjiw. Japi jiw naexasisfulbej nejamechan.

⁷ Japi jiw amwutjel matabija xam nijaxtat xan puexa isfulaxpox.

⁸ Majt najum-ampoxan, japoxan xan japi jiw naewuajna x wut. Amwutjel japi naexasisful japanaewuajna xan. Amwutjel japi pajut matabijabej diachwuajnakolax xan fuloekxponan xamxotik. Matabijabejpi xam nato'amponanpox.

⁹ “Xan nanaexasitpi, japi jiwliajwa xam kawuajna x wut. Xan kawuajna-enil ampathatpijiwliajwa, japi xam naexasis-elpilialiajwa. Xanlax kawuajna xam makanotampilialiajwa, japi xan nanaexasisful, xam nejjiw xot.

¹⁰ Xan tajjiwpi, japiwej puexa xam nejjiw. Puexa xam nejjiwpi, japiwej xan tajjiw. Japi jiw ispoxantat asew jiw, xan nanaexasis-elpi, nasitaen.

¹¹ “Xan kaes namanaxinil ampathatat, xam poxaxoeyan xot. Pelax tajjiw namaeyaxael ampathatat. Ax, pomatkoicha pachaemamponam, tajjiw chiekal nawetataeflaxaelam, asew jiw babijaxan isasamata japilialiajwa. Xam kawuajna x wut japi nakaewalialiajwa kaenejchaxoelaxliajwa. Me-ama xatis kaenejchaxoelax, japiwej jachisfulialiajwa.

¹² Xan, japi swapich, dukx wut, chiekal tataeflax xam nijaxtat. Nawenafo'a-el, xan nanaexasiti xot. Kaenlax japixot nafa'a, fulaeyaxaelpon inferno poxade. Me-ama nej-jamechan chajia lelspxox jum-aech japonliajwa, japox ja-aechlisox.

¹³ "Amwut xam poxaxoeyan. Ampox xam jum-an, ampathatxotx wutfuk, xan nanaexas-
itpi chiekal nejchachaemlialijwapi, me-ama xan nejchachaemlax wut, jachiliajwapi.

¹⁴ Xan japi naewuajna nejamechan. Samata, ampathatpijiw nejweslaspi, ampathatpijwa-el xoti. Xanbej ampathatpijna-enil.

¹⁵ Xan wuljoe-enil xam jukaliajwam xan nanaexasiti ampathatxot. Xanlax wuljowx japi nawetataeflaliajwam, Satanás naekichachajbasamatasbejpi.

¹⁶ Amwutjel japi ampathatpijwa-el. Me-ama xan ampathatpijna-enil, ja-aechbej japi.

¹⁷ ¡Kajachawaesfulde isfulaliajwapi xam nejxasinkampoxan, diachwujnakolaxpoxan!
Nejjamechan diachwujnakolax.

¹⁸ Xan to'ax japi naewuajnalijwapi ampathatpijiw, me-ama xam xan nato'am am-
pathatpijiw naewuajnafulaliajwan.

¹⁹ Xan thiltax isfulaliajwan xam nejxasinkampoxan. Japoxan xan isfulax xan nanaex-
asitiliajwa. Do jawux, japi isfulaxael xam nejxasinkampoxan. Jasox isful wut, isfulaxael
pachaempoxan, matabija xoti nejamechan, diachwujnakolaxpox.

²⁰ "Xam kawuajna xam wut, kawuajna-enil xan nanaexasitipikalliajwa. Kawuajna xam asew
jiwliajwa, japi asamatkoi naexasisaxaelpi tajwujjan, naewuajjan wut xan nanaexasiti.

²¹ Ax, xam kawuajna xam nanaexasitiliajwa, puexa japi kaenejchaxoelaxliajwa. Xatis
kaeyax chiekal nejchaxoes. Kawuajna xam japi keenejchaxoelaxliajwa, xatis swapich,
ampathatpijiw matabijaliajwa xam nato'amponpox ampathatxot.

²² Xan tajpamamax chaxdutz japi. Japox najur, me-ama xam nachaxdutampox. Jasox
isx japi kaenejchaxoelaxliajwa. Me-ama xatis kaeyax chiekal nejchaxoes, japi xoti jachilia-
jwa.

²³ Do jawut, japi chalaxaelen, me-ama xam xan nachalam chiekal kaenejchaxoelaxli-
ajwan, xam swapich. Do ja-aech wut, ampathatpijiw chiekal xan namatabijaxael xan
nato'amponpox. Do jawut, ampathatpijiw pajut matabijaxaelbejpi xam jiw nejxas-
inkampox, me-ama xan nanejxasinkam wut, ja-ampox jiwliajwa.

²⁴ "Ax, xan nejxasinkax jiw xanxotaliajwa, xam makanotampi xan nanaexasitiliajwa.
Nejxasinkaxbej puexa japi jiw matabijaliajwa xan xabich tajpamamaxpox, xam nachax-
dutampox, xam chajia xan nanejxasinkam xot, that is-esal wutfuk.

²⁵ Ax, xam xabich pachaemam. Ampathatpijiw xam matabija-el. Pe xan matabijtax xam.
Xan nanaexasiti matabija diachwujnakolax xan nato'amponpox.

²⁶ Xan jum-an nanaexasitiliajwa, ma-am xam. Japoxlap jumchisfulaxaelen. Do ja-
aech wut, japi jiw nakaewa nanejxasinkafulaxael. Me-ama xam xan nanejxasinkafulam
wut, jachiyaxaelbej japi jiw. Xanbej pomatkoicha japixotaxaelen" —aech Jesús, pax Dios
kawuajjan wut.

18

Jesús jaeltaspox padaelmajiw

(Mt 26.39, 47-56; Mr 14.36, 43-50; Lc 22.42, 47-53)

¹ Jesús buxtoet wut pax Dios kawuajjanpox, fulaech wuton, xanalbej, japon pejnachalwan,
nakfulaechx. Minlajt putkalpox xenax. Japaminlajt, putkalpox, pawul Cedrón. Xenaxxot
olivonaechan nuil. Olivonaechan nuilxot Jesús xanal nabu'pat.

² Judas, wiasaxaelpon Jesús padaelmajiw xot, japon chiekal matabijtax xanal jaxotaxaelen-
pox, jaxot chajia Jesús pin-iaveces jinatameja xot, xanal swapich.

³ Samata, Judas kaemut soldaw bu'pa'an jaxot. Bu'pa'anbejpon Dios pejtemploba weti.
Japi to'as sacerdotespaklochow, fariseosbej. Xafoli iwa, espadas, lanzasbej. Kelafolbejpi
baenthnaechan, xape'asi naetat italiafaliajwa, fol xoti madoi. Kelafolbejpi lámparas.

⁴ Jesús chajia matabijtax japonliajwa jachiyaxaspox. Samata, Jesús jaxot fulaech
bu'kakulnaliajwapon fulaeni. Do jawut, jum-aechon japi jiwliajwa:

—¿Achankat xamal wulwekam? —aechon.

⁵ Kaen japixot jumnot wut, jum-aechon Jesúsliajwa:

—Xanal wulwekx Jesús, Nazaret paklowaxpijin —aechon.

Jesús jum-aech:

—Xanlap nawulwekamponan —aechon.

Judas, wiasaxaelpon Jesús, japixot nukon.

⁶ Jesús jum-aech wut: 'Xanlap nawulwekamponan' —aech wut, japi soldaw, asew jiwbej,
chalechkal tuakre'xalaenki. Jawut satat oeljabapi.

⁷ Jawut, Jesús pejme wuajna xael wut, jum-aechon:

—¿Achanat xamal wulwekam? —aech Jesús.

Japi pejme jum-aech:

—Xanal wulwekx Jesús, Nazaret paklowaxpijin —aechi.

⁸ Jawut Jesús pejme jum-aech japiliajwa:

—Xan jum-an: ‘Xanlap nawulwekamponan’ —an xan. Xan nawulwekam wut, ampi, tajnachala, ¡chijiyax tapaem! —aech Jesús.

⁹ Japox ja-aechlisox, Jesús pajut jum-aechpox jachiliajwa: “Ax, nachaxdutampi, chinax kaen nawenafo’a-el” —aech Jesús, majt chajia kawuajan wut pax Dios.

¹⁰ Do jawut, Simón Pedro chalechkal pej-espada kukchapon. Jawut kaen aton, cho’chikchapon, poklalel pejcho’t. Japon pawul Malco. Japon nabist sacerdotespaklokolanliajwa.

¹¹ Do jawut, Jesús jum-aech Pedroliajwa:

—¡Nej-espada jemk ta-akadik! Diachwuajnakolax xan jum-an. Xan nabijasaxaelen. Memama taj-ax Dios chajia jum-aech nabijasliajwan, japox ma amwut jachiyaxael —aech Jesús.

Jesús nukpox Anás pejwuajnale

(Mt 26.57-58; Mr 14.53-54; Lc 22.54; Jn 11.49-50)

¹² Do jawut, soldawcapitán, pejsoldaw suapich, malis Dios pejtemploba wetibej, japi judíospi, japi jaelt Jesús. Do jawut, Jesús muatat kus.

¹³ Matxoela buflaechipon Anás pejba poxade. Japon Anás, Caifás puax. Caifás sacerdotespaklokolan japawaestat. (Anásbej majt sacerdotespaklokolan asawaestat.)

¹⁴ Caifás chajia jum-aech judíospaklochowliajwa: “Kaes pejme pachaem, kaen aton tamach tupliajwa. Jasoxtat xabich jiw tupaxil” —aech Caifás, chajia jum-aech wut.

Pedro xanaliapox Jesús matabijtpoxliajwa

(Mt 26.69-70; Mr 14.66-68; Lc 22.55-57)

¹⁵ Jesús bu’fos wut, Simón Pedro wuchakal atuaxach fol. Xan, tawulponan Juan, wuchakal atuaxach folxbej. Sacerdotespaklokolan xan namatabijt. Samata, xan tamach lowx bafulmaktxot Jesús pejuwachakal.

¹⁶ Pe Pedro naman tathoetat, bafafaxot. Do jawut, xan kaxandax. Sacerdotespaklokolan xan namatabijt xot, bafafa wetpow kawuajnx, Pedrobej leliajwa.

¹⁷ Pedro bafulmaktxot low wut, japow wuajnaemtasen. Japow jum-aech:

—¿Xamkatlap jaeltaspon pejnachalnam? —aechow.

Pedro jumnot wut, jum-aech:

—¡E! ¡Xan japon pejnachalna-enil! —aech Pedro.

¹⁸ Xabich thank xot, Caifás pamak, Dios pejtemploba wetibej, jit itfoti. Jaxot japi jiw jit su’chanuil. Pedrobej jaxot jit naksu’chanuk.

Sacerdotespaklokolan xabich wuajnaemtpox Jesús

(Mt 26.59-66; Mr 14.55-64; Lc 22.66-71)

¹⁹ Do jawut, sacerdotespaklokolan tuadutlison wuajnaemsliajwapon Jesús pejnachalapiajwa, naewuajanpoxliajwabej.

²⁰ Japon buxtot wut wuajnaemtasen, Jesús jum-aech:

—Xan tulaela jum-an jiw pejuwajnalel. Naewuajnaexbej judíos naewuajnaexbej, Dios pejtemplobaxotbej, judíos natameja wut. Xan malix naewuajna-enil.

²¹ ¿Ma-aech xotkat nawuajnaemtam japoxan? ¡Wuajnaemde najumtaenpi! Japi chiekal matabija xan jum-anpoxan. Japi jumchiyaxael, achax xan jum-an, jiw naewuajnaex wut —aech Jesús sacerdotespaklokolanliajwa.

²² Jesús japox jum-aech wut, kaen Dios pejtemploba wetpon ke-etat xuselchapon Jesús. Do jawut, jum-aechon:

—¿Ma-aech xotkat xam japox jum-am sacerdotespaklokolanliajwa? —aechon, palala xot.

²³ Jesús jumnot wut, jum-aechon:

—Babejjamechan jum-an wut, ¡najum-amde, achaxkat chaemil xamliajwa! Xan jum-anpox diachwuajnakolax wut, ¿ma-aech xotkat naxuselcham? —aech Jesús.

²⁴ Do jawut, japi wuajnaemtasen buxtot wut, Jesús kus wutfuk, Anás to’a soldaw Jesús buflaeliajwas Caifás poxade, jaxotde kaes pejme wuajnaemsliajwas Jesús, japon sacerdotespaklokolan xot.

Pedro pejme xanaliapox Jesúsliajwa

(Mt 26.71-75; Mr 14.69-72; Lc 22.58-62; Jn 3.14; 12.32)

²⁵ Pedro nakiowa jaxot jit naksu’chanuk. Jawut jaxot su’chanuili, japibej jum-aech Pedroliajwa:

—¿Xamkatlap jaeltaspon pejnachalnam? —aechi.

Pedro jumnot wut, jum-aechon:

—¡Xan jaeltaspon pejnachalna-enil! —aech Pedro.

²⁶ Sacerdotespaklokolan pamakan jaxot nuk. Japon cho'chikchaspon pejwul-aton. Japonbej wuajnaemnt wut, jum-aechon Pedroliajwa:

—¿Xamkat bej taenxbej, nukam wut, Jesús swapich, olivonaechanxot? —aechon.

²⁷ Pedro pejme xanalia wut Jesúsliajwa, jawut kawaema nejla. Me-ama Jesús chajia jum-aech, ja-aechlisox.

Jesús nukpox Pilato pejwuajnalel

(Mt 27.1-2, 11-14; Mr 15.1-5; Lc 23.1-5)

²⁸ Do kandiawasap wut, juimt jula-el wutfuk, judíos buflaeni Jesús Caifásxotdin, asaba poxade. Japaba, Pilato pejba, xabich pinaba. Japon gobernador Judea tuajnuaxot, to'as xoton Roma gobierno. Japabaxot pat wut, judíos le-el gobernador pejba, xaeyaxael xoti Pascuafiestanaxaeyax. Judíos leyaxael wut judíos-aton-a-el pejba, judíos xaeyaxil Pascuafiestanaxaeyax. Ja-aech judíos pejkabuanpox.

²⁹ Samata, Pilato nakolde pejbaxot nospaeliajwa, judíos swapich. Do jawut, jum-aechon japiliajwa:

—¿Achaxkat Jesús is xamal tasalaliajwam japon? —aech Pilato.

³⁰ Do jawut, judíos chiekal jumnos-el wut, jum-aechi asbuan jumch: —Japon aton babejna-el wut, xanal japon buflaeyaxinil xamlel —aech judíos Pilatoliajwa.

³¹ Do jawut, Pilato jum-aech judiosliajwa:

—¡Xamal najut japon aton buflaem kastikaliajwam, me-ama xamal nejkabuan! —aech Pilato judiosliajwa.

Judíos japox jumtaen wut, jum-aechi:

—Xam tapae-emil, xanal judíos tajut kastikaliajwan, boesaliajwanbej aton —aech judíos Pilatoliajwa.

³² Japox ja-aechlisox, me-ama Jesús chajia jum-aech, achaxtat tuxaxaelon.

³³ Do jawut, Pilato lechlison batuchade. Jawut jumxato'apon Jesús fulaeliajwa Pilatolel. Do jawut, Pilato jum-aech, Jesús wuajnaemnt wut:

—¿Xamkatlap diachwuajnakolax puexa judíos pejreynam? —aech Pilato Jesúsliajwa.

³⁴ Jesús jumnot wut, jum-aech:

—¿Xamkat najut nijaxtat japox xan nawuajnaemntam? O, ¿asew jiw jum-aech wut, jumtaenam xot, xan japox nawuajnaemntam? —aech Jesús Pilatoliajwa.

³⁵ Pilato jumnot wut, jum-aechon Jesúsliajwa:

—Xan judíos-aton-a-enil. Nejjiw, judíos, sacerdotespaklochowbej, japi xam buflaen xanlel jumchiliajwa xam nejbu'wuajnamproxliajwa. ¿Achababijaxkat isam japi palalaliajwapi xam-liajwa? —aech Pilato.

³⁶ Jesús jumnot wut, jum-aechon:

—Xan jiw tato'la-enil ampathatat. Xan jiw tato'lax wut ampathatat, tajjiw nabeyaxael judiospaklochow, pejiw swapich, akanajaels xan nawias-elaliajwapi judiospaklochowxot. Xan jiw tato'la-enil ampathatat —aech Jesús Pilatoliajwa.

³⁷ Do jawut, Pilato pejme wuajnaemnt wut, jum-aechon:

—¿Xamkatlap diachwuajnakolax reyponam? —aech Pilato.

Jesús jumnot wut, jum-aechon:

—Diachwuajnakolax, me-ama xam jum-am. Xanlap jiw reyponan. Samata, xan nalaeltax pawistat. Jasoxtat fuloekx ampathat poxasik jiw naewuajnalijwan diachwuajnakolaxpox. Puexa jiw matabijasiapi diachwuajnakolaxpox, japi jiw xan najumtaen. Japi jiwbej xan nanaexasit —aech Jesús.

³⁸ Do jawut, Pilato jum-aech:

—¿Achaxkat diachwuajnakolaxpox? —aechon.

Pilato to'apox Jesús kematamatlialiajwas

(Mt 27.15-31; Mr 15.6-20; Lc 23.13-25)

Doliso', Pilato wuajnaemnsax buxtoet wut, nakoldepon jumchiliajwa judíos. Do jawut, Pilato jum-aech judiosliajwa:

—Xan faena-enil babijax japon ispox. Kastikaxisalbejpon.

³⁹ Xamal nejkabuan. Pascuafiesta isam wut, xamal xan nawuljowam kaen aton jiw jebaxot jiaspon nakolsax tapaeliajwan. ¿Xamalkat nejxasinkam xan nakolsax tapaeliajwan jumtispon: 'Judíos pejrey' —tispon? —aech Pilato judiosliajwa.

⁴⁰ Judiospaklochow, asew jiw swapichbej, pinjametat jum-aechfuli Pilatoliajwa:

—¡Japona-el! ¡Barrabás nakolsax tapaem! —aech xabich jiw.

Barrabás jiw jebaxot jias, kethakan xot. Japon majt nababej, Pilato pejsoldaw swapich.

19

¹ Do jawut, Pilato keto'a soldaw Jesús selsliajwas. Samata, jawut, Jesús buflaech wut, jaxotde Jesús seltas pakmuat kabuanchiyaxtat.

² Ketoech wut selsax, xakoeyapi na-e'lu Jesús matlua'sliajwas. Do jawut, matlua'tas wut, xajojelsbejpon, me-ama rey pijax, jasox. Japox chikjiana pasoeayaxlejen.

³ Do jawut, me-ama jiw tato'lan wut, ketispon. Japi soldaw ketaxaxaelali Jesús. Do jawut, moxdepi Jesúsxot. Jawut jum-aechi Jesús pejwuaajnalel:

—iMoi, judíos pejrey! —aechi.

Jawut xuselbalas Jesús.

⁴ Pilato pejme nakolt pejbaxot. Do jawut, jum-aechon judíos pejwuaajnalel:

—iXan chiekal nanaewe'e! Jesús buflaenx xamal chiekal matabijaliajwam, chinax xan babijax faena-enil, japon ispox —aech Pilato.

⁵ Do jawut, Jesús xajojels pakchowax. Japox chikjiana pasoeayaxlejen. Xakoeyaspox, na-e'lu, matlua'tas Jesús. Jawut Pilato jum-aech:

—iTaem! iAma xamal tasalampon! —aechon judíosliajwa.

⁶ Do jawut, sacerdotespaklochow, Dios pejtemploba wetibej, Jesús taen wuti, nejlasful wut, jum-aechi Jesúsliajwa:

—iKematamatalde cruztat! iKematamatalde cruztat tupaliajwa! —aechfuli.

Pe Pilato jum-aech:

—iXamal najut buflaem cruztat kematamatlaliajwam! Xan chinax faena-enil babijax japon ispoxan kematamatlaliajwan cruztat —aech Pilato japi jiwliajwa.

⁷ Judíospaklochow jumnot wut, jum-aechi Pilatoliajwa:

—Moisés chajia lelpox xanal naexasisfulax. Japawuaajxot to'a, me-ama ampon aton, jason kastikalijawas, boesalijawasbejpon, japon pajut najum-aech xot: 'Xan Dios paxulnan' —na-aech xoton —aech judíospaklochow Pilatoliajwa.

⁸ Pilato jumtaen wut japi jum-aechpox Jesúsliajwa, jawut kaes pejme pejlewlapon Jesúsliajwa.

⁹ Samata, pejme pejba lechon, Jesús suapich. Jaxotde pejme Pilato wuaajnachaemt wut, jum-aechon Jesúsliajwa:

—iAmxotpijnamkat xam? —aech Pilato Jesúsliajwa.

Pilato japox wuaajnachaemt wut, Jesús kaes jumnos-el.

¹⁰ Do jawut, Pilato jum-aech:

—iXamkat kaes najumnosaximil wuaajnachaemtaxpox? iXamkat matabijs-emil xan xajuxpox xam nakolsax tapanalijwan, o, to'aliajwanlax soldaw cruztat xam kematamatlaliajwa, tupaliajwambej? —aech Pilato.

¹¹ Do jawut, Jesús jumnot wut, jum-aechon Pilatoliajwa:

—Dios tapaei xam tato'laliajwam ampatuajnapijiw. Dios tapae-el wut jiw tato'laliajwam, xam najut nijaxtat ampatuajnapijiw tato'laximil. Aton nawiatron xamxot, japon aton kaes pejme pejbu'wuaajan Diosliajwa. Me-ama xam, jachiyaxilon —aech Jesús Pilatoliajwa.

¹² Do jawut, Pilato nakolsax tapaeiapon Jesús. Pe judíos nejlasful wut, jum-aechfuli:

—Japon nakolsax tapaeiam wut, xam kaenejchaxoelaxa-emil, nejrey suapich, dukpon Roma paklowaxxot. Nejmach-aton rey nadofasia wut, japon aton Roma tuajnapijiw tato'lan padaelmanaxael —aech judíos Pilatoliajwa.

¹³ Pilato, japox jumtaen wut, lapon soldaw, japi buflaeliajwa Jesús japonlel. Do jawut, Pilato ek pejtua-ekaxtat. Jaxot pawul Gabata hebreojamet. Japox jumchiliajwa: "Ia' dadapopox, me-ama pisolejen" —chiliajwa japox.

¹⁴ Kaematkoï we'puk Pascuafiestaliajwa. Matnoch juimt ek wut, Pilato jum-aech judíosliajwa:

—iAmponlap nejrey! —aech Pilato Jesúsliajwa.

¹⁵ Pelisdo', judíos nejlasful wut, jum-aechfuli:

—iKematamatalde cruztat tupaliajwa! —aechful, judíos nejlasful wut.

Pilato wuaajnachaemt wut, jum-aechon:

—iXamalkat nejxasinkam nejrey kematamatlaliajwas cruztat? —aech Pilato judíosliajwa.

Sacerdotespaklochow jumnot wut, jum-aechi:

—iJapon xanal tajreya-el! iXanal kaen tajrey! iJapon Roma tuajnapijiw tato'lan! —aechi.

¹⁶ Do jawut, Pilato to'a soldaw Jesús buflaeliajwas, kematamatlaliajwas cruztat, tupaliajwabejpon. Do jawut, soldaw Jesús bu'fos kematamatlaliajwas cruztat.

Jesús kematamatlaspox cruztat

(Mt 27.32-44; Mr 15.21-32; Lc 23.26-43)

¹⁷ Do jawutbej, soldaw bu'follisi Jesús muax poxade. Japamuax pawul Matnaethimuaax. Jesús pajut xafol cruz. (Hebreojametap japamuaxliajwa jum-aechi: "Gólgota" —aechi.)

¹⁸ Japamaaxxot Jesús kematamatlas cruztat, kolenje kethakan saapich. Japi kaenanula kematamatlas pejcruztat. Jesús pejkolelelej chanuili.

¹⁹ Pilato to'a lalaliajwapi tawlaf chadusliajwa Jesús pejcruztat, jiw matabijaliajwa, ma-aech xot Jesús tɔpaxael cruztat. Samata, lelspx jum-aech: "Jesús, Nazaret paklowaxpijin, japon judíos pejrey" —aechox.

²⁰ Jesús kematamatlasxot mox Jerusalén paklowax. Samata, xabich judíos xaljow pale, tawlaftat chaduchpox. Japatawlaftat lels tresjamechantat. Kaejame lels hebreojametat. Segundojame lels latinjemetat. Tercerojame lels griegojemetat.

²¹ Do jawut, sacerdotespaklochow fulaech Pilato poxade. Pat wuti Pilatoxot, jum-aechi nejthua'axtat:

—¿Ma-aech xotkat lelampox jum-aech: 'Judíos pejrey' —aechkattox, lelampox? ¡Japox chaku'e! ¡Asax leldel! ¡Nej jum-aechepox: 'Jiw naewaajan wat, jum-aechon pajutliajwa: "Xan judíos pejreynan" —aechon' —nej ja-aechel lelampox! —aech paklochow Pilatoliajwa.

²² Pilato jumnot wat, jum-aechon:

—Ma xan iketo'ax, do japoxtat lelsliox —aech Pilato judíospaklochowliajwa.

²³ Jesús kematamatla-esal wutfuk, japi cuatro soldaw Jesús naxoeipoxan wejoltipon. Cruztat kematamatla wuti, Jesús naxoeipoxan japi soldaw not kaenanula xadadijpaliajwa. Matxoelapijax, pakchowax, naxoeldikpox, japoxbej wefitipon. Japox popbu'kal, ithoe-esal, chiekal baelspoxkal.

²⁴ Soldaw nakaewa najum-aech japoxliajwa:

—¡Xatis ampox nabej thiasis! Nakakuj saxaes ia'xix matabijaliajwas, achan kanaxael japox —na-aechi nakaewa.

Do jawut, nakakujtlisi ia'xix. Islisi japox, me-ama Dios pejjamechan, chajia lelspx, jum-aech Jesúsliajwa. Jum-aechox: "Diajkaxaeli xan naxoeipoxan nakaewaliajwa. Asbuan jumch nakakuj saxaeli matabijaliajwa, achan kanaxael matxoelapijax, naxoelax" —aech chajia lelspx japoxliajwa.

²⁵ Jesús cruztat chanukxot, japon pen jaxot mox. Jaxotbej Jesús penow. Japow pawl María, Cleofas pijow. Jaxotbej asaow María. Japow Magdala paklowaxpijow.

²⁶ Jesús pen taen wat moxpx, xanbej, Jesús nanejxasinkponan, mox nukx japowxot. Jawut Jesús jum-aech penliajwa:

—En, amwutjel xamliajwa juan, me-ama naxulan wat, ja-aechon —aech Jesús penliajwa.

²⁷ Jawut Jesús jum-aechbej xanliajwa:

—Juan, xam amwutjel taj-en, me-ama nej-en wat, ja-aechow. Samata, chiekal nawetataeflaxaelam —aech Jesús xanliajwa.

Japamatkoitat, Jesús tɔpaxwux, xan tajba poxadax wat, japow buflaechx tataeflaliajwan.

Jesús tɔppox cruztat

(Mt 27.45-56; Mr 15.33-41; Lc 23.44-49)

²⁸ Do jawut, Jesús matabijit puexa chiekal toepox japonliajwa, me-ama Dios pejjamechan, chajia lelspx, jum-aech, jachiliajwapox. Jesús jum-aech:

—Xan minsila —aechon.

²⁹ Jaxot vino, xathunkpot, cha-ek jarrotat. Kaen aton esponja, paputhkax, xathot japavino poxadik. Xathot wat, esponja xakoeya nae-oefat Jesús suiliajwa. Japanaeya pawl hisopo. Do jawut, xachosapon Jesús pejkaecha poxase.

³⁰ Do jawut, japox Jesús suw wat, vino, jum-aechon:

—Puexa, xan isxpxan, toetx —aechon.

Jawut, Jesús natxatdik wat, tɔplison.

Soldawan pejlantzata chenaxua'lapox patɔpan Jesús

³¹ Kaematkoï we'p wat Pascuafiestaliajwa, napatamatkoïyaxael xotbej, judíospaklochowliajwa wepachaema-esal Jesús kaes chanukaliajwa cruztat, asewbej. Japamatkoï, napatamatkoï, judíos kaes pejme sitaen, Pascuafiestamatkoïyaxael xot. Samata, jawut, chawuajnachaeamatkoï wat, judíospaklochow Pilato poxade wuljoeliajwa, japon keto'aliajwa soldaw bejalbalaliajwas cruztat kematamatlaspi, kamta japi tɔpaliajwalejen, jawux kuiliajwas cruzxotsik, muthaliajwasbejpi.

³² Do jawut, Pilato to'a wat soldaw, japi fulaech kematamatlaspi poxade. Pat wuti jaxot, matxoelapijin bejalchapi, japon tɔpa-el xotfuk. Asan, asalel chanukpon, bejalchasbej.

³³ Soldaw mox wat Jesúsxot, taeni Jesús tɔppox. Samata, Jesús bejalcha-esal.

³⁴ Do jawut, kaen soldawan Jesús chenaxua'la lanzatat, chiekal matabijsliajwa diachwujnakolax Jesús tɔp wat, o, ja-el wat. Jawut chalechkal jal nakola. Nakolabej min.

³⁵ Xan Juan lelx japoxan. Taenpxoxan diachwujnakolax. Samata, jum-an diachwujnakolaxpox, xamalbej chiekal naexasisliajwam xan jum-anpoxan Cristoliajwa.

³⁶ Japoxan ja-aech, me-ama Dios pejjamechan, chajia lelsprox, jum-aech japox jachiliajwa. Chajia jum-aechox: “Japon chinax kaethit wejalchaxisal” —aechox.

³⁷ Chajia asafat jum-aechbejprox lelsprox: “Taeyaxaeli kaen aton, chenaxua'laspon” —aechox.

Patupan Jesús ochpox muaxwujat

(Mt 27.57-61; Mr 15.42-47; Lc 23.50-56)

³⁸ Jesús tup wut, José, Arimatea paklowaxpijin, fulaechon Pilato poxade. Pat wuton Pilatoxot, José kawuajan Pilato, patupan Jesús xalaeliajwapon, osliajwabejpon muaxwujaxot. Japon José maliach naexasit Jesús, pejlewla xoton judiospaklochowliajwa. Do jawut, Pilato najaw-aech José xalaeliajwa patupan Jesús. Samata, fulaechon patupan poxade.

³⁹ Nicodemo, japon majt fulaechpon madoi nospaeliajwa, Jesús swapich, japon xapat treinta kilos xabejasapan Jesús kematamatlasxot. Japasapan, taniaias mirrasapan, álobelenbej, patupan joelaliajwaxotan.

⁴⁰ Do jawutbej, José, Nicodemo swapich, chaxfoli patupan Jesús. Mamochbu'antat, pokchobu'an, matxakoeyapi patupan, xabejasapan joelapi patupan. Ja-aech, judios is wut pejwujnapijiw pijax, patupan mutsliajwa wut.

⁴¹ Jesús cruztat kematamatlasxot, jaxot mox papijax, olivonaechan nuil. Jaxot pajelmuaxwujat patupanliajwa. Chinax kaen patupan japawujat os-esalfak.

⁴² Japawujat mox. Samata, jaxot patupan Jesús oti, chawujnachaemsmatkoï xot, napatamatkoï judiosliajwa xabich mox pawujana xotbej.

20

Patupan Jesús mat-ech pejme dukaliajwa

(Mt 28.1-10; Mr 16.1-8; Lc 24.1-12)

¹ Napatamatkoï toep wut, kandiawasap, itkuu'nik wutfak, María, Magdala paklowaxpijow, fulaech patupan Jesús och poxade. Mox fol wut, taenow ia't, pinjit, fafaxot matari-annasprox. Japot, ia't, majt faka'ch, patupan Jesús ochxot.

² Samata, najaetow Simón Pedro poxade. Jawutbej xan, Jesús xabich nanejxasinkponan, Simón Pedroxotx. Xanalxot pat wut, nachapaei wut, najum-aechow:

—Wajpaklon juch, wujaxot ochpon. Xanal matabija-enil amxot pejme otipon —naechow, nachapaei wut.

³ Xanal japox jumtaenx wut, Pedro swapich, fulaechx patupan Jesús och poxade.

⁴ Xanal dukpax. Xan kaes tabisla. Samata, xan matxoela patx patupan Jesús ochxot.

⁵ Do jawut, najulchax wujfafaxot taeliajwan wujtu. Jaxot wujtutat taenx mamochbu'ankal, pokchobu'an. Pe xan le-enilde wujtu.

⁶ Pedro pat wut wuchakal, japonlax low wujtu. Jaxot Pedrobej taen mamochbu'ankal.

⁷ Jaxot taenbejpon asabu', Jesús matnaexakoeyasbu', papijaxtat okafulpox, xakoeyasprox.

⁸ Xan matxoelapatxronan, wuchakal lowx. Xanbej taenx mamochbu'ankal, oel wut. Japox taenx wut, xan naexasitx Jesús diachwujnakolax mat-echpox pejme dukaliajwa.

⁹ Japamatkoïyan xanal chiekal jummatabilia-enilfak Dios pejjamechan, chajia lelsprox, jum-aech wut: “Mesías mat-esaxaes pejme dukaliajwa” —aech wutox.

¹⁰ Do jawux, xanal nawiax bachade, Pedro swapich.

Jesús natulaeltprox María Magdalena paklowaxpijowxot

(Mr 16.9-11)

¹¹ Xanalwux María Magdala paklowaxpijow pat patupan Jesús ochwujaxot. Wujfafaxot japow now. Now wut, natachaemsepow wujtuchade.

¹² Jawut taenow kolenje Dios pej-ángeles. Japi naxoeipox xabich papoei. Chalaki patupan Jesús majt ochxot. Kaen ek matnaetlel. Asan ek thitlel.

¹³ Japow wujnachaemtas wut Dios pej-ángeles, jumtispow:

—¿Ma-aech xotkat nowam? —tispow.

Japow jumnot wut, jum-aechow:

—Tajpaklon, patupan, amxot och. Pe asew jiw juchpon. Matabijs-enil amxot pejme otipon —aechow Dios pej-ángelesliajwa.

¹⁴ Japox jum-aech wut, natfo'cha wut, taenow kaen aton. Pe matabijs-elow japon Jesúsprox.

¹⁵ Do jawut, japon wujnachaemt wut, jum-aechon japowliajwa:

—¿Ma-aech xotkat xam nowam? ¿Achankat wulwekam? —aechon japowliajwa.

Japow nejchaxoel: “Ampon olivonaechan tataeflan” —aechow, nejchaxoel wut. Samata, jum-aechow:

—Patupan Jesús xam jutam wut, inajum-amde amxot otampon, xan japoxaliajwan patupan wulwekaliajwan! —aechow.

¹⁶ Do jawut, japon jum-aech:

—¡María! —aechon.

Japow natfo'cha japonlel. Do jawut, japow chiekal matabijt japon Jesúspon. Do jawut, brixtat nukjaba wut, jum-aechow hebreojametat:

—¡Rabuni! —aechow pejjametat. (Japajame jumchiliajwa: “Jiw chanaekabuanan” —chiliajwapox.)

¹⁷ Jesús pejme jum-aech:

—¡Nakikofde nathitakuktampox! Xanfuk taj-ax poxa-enilse. ¡Xabua'de tajnachala poxade! ¡Japi jum-amo ampox: ‘Xan waj-ax Dios poxaxoeyan’ —amo japi, chapaeyam wut! —aech Jesús Marialiajwa.

¹⁸ Do jawux, María, Magdala paklowaxpijow, fulaen xanallel, Jesús pejnachalwan poxadin. Pat wutow xanalxot, najum-aechow: “¡Xan wajpaklon taenx! ¡japon pejme duk!” —aechow. Nachapaeibeypow Jesús buxto'aspox.

Jesús natulaelt pox pejnachalaxot
(Mt 28.16-20; Mr 16.14-18; Lc 24.36-49)

¹⁹ Do madoi wut, japamatkoi, dominko wut, xanal, Jesús pejnachalwan, natamejlax batutat. Bafafachan chiekal xatbe'ax, tajlewlax xot judiospaklochowliajwa. Jawut chalechkal Jesús natulaelt batutat. Nuk wut xanal tajwujnalel, jum-aechon:

—Xan patx. ¡Puexa nej pachaema xamalxot! —aech Jesús.

²⁰ Japox jum-aech wut, xanal na-itpaeipon pejke-e kematamatlaspoxan, chenaxua'laspoxbej. Jawut xanal xabich nejchachaemlax, pejme taenx wut wajpaklon Jesús.

²¹ Jesús pejme xanal najum-aech:

—¡Puexa nej pachaema xamalxot! Me-ama taj-ax nato'a ampathatasik, xamalbej to'axaelen asew jiw naewujnalijawm —aech Jesús xanal pejnachalwanliajwa.

²² Do jawut, xanallel ful wut, jum-aechon:

—Espíritu Santo amwutjel xamalxot.

²³ Xamal jiw beltaenam wut, babijaxan ispi, japi kofa xot babijaxan ispoxan, ja-am wut, Diosbej beltaeyaxael japi jiw. Xamal beltae-emil wut jiw babijaxan ispi, japi kofa-el xot, ja-am wut, Diosbej beltaeyaxil japi jiw —aech Jesús xanal pejnachalwanliajwa.

Tomás taenpox Jesús, japon mat-echpon pejme dukaliajwa

²⁴ Tomás xanalotpijin, Jesús pejnachalan. Japontat puexa xanal dosan. Japon Tomás asawul Na-o'an. Jesús natulaelt wut xanalxot, jawut Tomás xanalxota-el.

²⁵ Do baxael, Tomás xanalxot wut, xanal jum-an Tomásliajwa:

—¡Xanal taenx wajpaklon Jesús! —an xanal Tomásliajwa.

Pe japon Tomás xanal najumnot wut, jum-aechon:

—Xan tajut tae-enil wut wajelan, kematamatlaspoxan, xan naexaxisaxinil xamal. Naexaxisaxinilbej, tajut tae-enil wut chenaxua'laspox. Xan xadonasian tajkothiyatat japon pejke-ewajelan. Jachasianbej tajke-etat japon chenaxua'laspox —aech jumch Tomás, asax paei wut.

²⁶ Do jawux, ocho matkoiyan xent wut, xanal, Jesús pejnachalwan, pejme natamejlax batutat. Bafafachan chiekal xatbe'ax. Jawut Tomás xanalxot. Do jawut, chalechkal Jesús natulaelt xanalxot batutat wut. Nuk wut xanal tajwujnalel, jum-aechon:

—Xan patx. ¡Puexa nej pachaema xamalxot! —aech Jesús.

²⁷ Do jawut, Jesús jum-aech Tomásliajwa:

—Tomás, ¡taem tajke-e! ¡Xadonde nejkothiyatat! ¡Xabua'din jachaliajwam nachenaxua'lapox! ¡Nabej jum-aech'e: ‘Xan naexaxisaxinil, tajut tae-enil wut Jesús mat-echpox, pejme duk wutlison’ —nabej aeche! ¡Nanaexasi'e xan namat-etxponanpox, pejme dukxponanpoxbej! —aech Jesús Tomásliajwa.

²⁸ Do jawut, Tomás nejthua'axtat jum-aechon:

—¡Xam tajpaklonam, tajDiosnambje! —aech Tomás Jesúsliajwa.

²⁹ Jesús jum-aech Tomásliajwa:

—Xamlis chiekal xan nanaexasitam, najut chiekal nataenam xot. Asew jiw xan nanaexaxisaxael natae-elaxtat. Japibej xabich nejchachaemlaxael —aech Jesús Tomásliajwa.

Ma-aech xot ampox pelfut lels

³⁰ Xanal, Jesús pejnachalwan, taenx, Jesús xabich kaes koechaxan is wut. Ampapelfutat puexa japoxan lela-enil.

³¹ Xan lelx koechaxanliajwa xamal chiekal matabijaliajwam, naexaxisliajwambej Jesucristo, Dios to'aspon, japon Dios paxulan. Xamal japon naexaxisfulam wut, pomatkoicha duilaxaelam Diosxotse.

21

Jesús natulaelt pox siete pejnachalaxot
(Lc 5.5-6)

¹ Do jawux, Jesús natulaelt wut Jerusalén paklowaxxot, pejme natulaelton, xanal Galilea pukaxotan wut. Japapuka asawul, Tiberias puka. Amwut japoxliajwa jumchiyaxaelen, ma-aech, Jesús natulaelt wut xanal pejnachalwanxot.

² Jesús natulaelt wut sietepinxot, kaen xanalxot pawul Simón Pedro. Asan pawul Tomás. Japon asawul Na-o'an. Asan pawul Natanael. Japon Caná paklowaxpijin Galilea tuajnuxot. Asan pawul Santiago. Japon xan takoewan. Xan, tawulpon Juan, jawut japixotanbej. Xanal kolenan Zebedeo paxin. Kaes asew kolenjebej jaxot. Japibej Jesús pejnachala.

³ Natamejlax wut, Jesús natulaels-el wutfak xanalxot, Simón Pedro xanal najum-aech:

—Xan nabaxisaxaelen —na-aechon.

Xanal jum-an:

—Bajal. Xanalbej falaeyaxaelen —an xanal.

Do jawut, falkam pajulx. Nabaxitx wut, japamadoitat, chinaxkatdo' kaen baxin xawaes-lax chiekal pama-an.

⁴ Nalian wut, Jesús natulaelt pukababu'tat. Pelax xanal, japon pejnachalwan, matabijja-enil, achan japon.

⁵ Jesús pinjаметat xanal nawuajnaechaemt wut, jum-aechon:

—iMoi! iMassapichkat xamal baxi xawawaelam? —aechon.

Xanal jumnotx wut, jum-an:

—Ajil. Chinax kaen baxin xawaes-enil —an xanal.

⁶ Jesús xanal najum-aech:

—iChinchorro fo'amik falkam poklale! Jaxot baxi xawawaelaxaelam —aech Jesús.

Jawut xanal ow-an. Jasox isx. Do jawut, chinchorro jusliajwan wut osliajwan falkamtat, xajupa-enil, chinchorro xabich chadewnik xot, baxi wulak xotbej.

⁷ Xan, xabich Jesús nanejxasinkponan, jum-an Pedroliajwa:

—japon wajpaklon! —an xan.

Simón Pedro xan jum-anpox jumtaen wut, jawut sumta-otox naxoelchapon, jolt xoton nabaxisliajwa. Do jawut, Pedro naxoelcha wut, diwk minadik. Joechlison Jesús poxade.

⁸ Xanal, Jesús pejnachalwan, namaxpin falkamtat, wuchakal chapatx thaejtade, xabich xot baxi chinchorrotat. Pukapamakt pasliajwan xabich ataja-el. Me-ama cien metros.

⁹ Xanal chapatx wut, nanax falkamtat. Jawut taenxbej jit, baxin ok wut jitmatwujjat, chabochpon. Okbej pan.

¹⁰ Do jawut, Jesús xanal najum-aech:

—iXalaemen kaesapich baxi, xawawaelampi, chabowaliajwam! —aechon.

¹¹ Do jawut, Simón Pedro falkam juldik baxi chadado'naliajwa chinchorrotat, thaejtat jusliajwapon. Japachinchorro xabich baxi, pinanul, wulak. Japi baxi ciento cincuenta y tres. Baxi pin-iat wut, chinchorro nakiowa liks-esal.

¹² Do jawut, Jesús jum-aech xanalliajwa:

—iXabu'a't, kandiawasappijax xaeliajwam! —aech Jesús xanalliajwa.

Chinax kaen xanalxot pawuajnaechaems-enil, achankat japon, xanal tajut chiekal matabijax xot japon wajpaklonpox.

¹³ Do jawut, Jesús mox soepan xanallel. Jawut fiton pan xanal nachaxduiliajwa. Ja-aechbejpon baxin chabochponliajwa.

¹⁴ Jesús natulaelt wut xanalxot, japoxtat tres veces natulaelton xanal pejnachalwanxot, pejpatuxawux, pejmat-esaxwuxbej.

Jesús nospaeipox, Simón Pedro sapich

¹⁵ Xanal kaechatoelx wut, Jesús wuajnaechaemt wut Simón Pedro, jum-aechon Simón Pedroliajwa:

—Simón, Jonás paxulan, i xamkat xan kaes nanejxasinkam? Me-ama tajnachala asew nejxasinkam wut i jachi-emilkat xam xanliajwa? —aech Jesús.

Pedro jumnot wut, jum-aechon:

—Diasdo', tajpaklon. Xam chiekal matabijtam xam nejxasinkaxpox —aechon.

Jesús pejme jum-aech Pedroliajwa:

—Jelxan nanaexasiti, i japi chiekal xam nawetataefulde! Me-ama ovejas tataeflan chiekal tataeful pejew corderos, i xambej ja-amde jelxan nanaexasitiliajwa! —aech Jesús Pedroliajwa.

¹⁶ Do pejme Jesús wuajnaechaemt wut, jum-aechon Pedroliajwa:

—Simón, Jonás paxulan, i xamkat xan kaes pejme nanejxasinkam? —aech Jesús Pedroliajwa.

Pedro pejme jumnot wut, jum-aechon:

—Diasdo', tajpaklon. Xam chiekal matabijtam xam nejxasinkaxpox —aech Pedro Jesúsliajwa.

Jesús pejme jum-aech Pedroliajwa:

—¡Chiekal nawetataefulde jelxan nanaexasiti! Me-ama ovejas tataeflan chiekal tataeflafal pejew ovejas, ixambej ja-amde jelxan nanaexasitiliajwa! —aech Jesús Pedroliajwa.

¹⁷ Do pejme kaes Jesús wuajnaemnt wut, jum-aechon Pedroliajwa:

—Simón, Jonás paxulan, ¿xamkat xan nanejxasinkam? —aech Jesús.

Do jawut, Jesús kaes wuajnaemnt xot, jum-aech xoton: “¿Xamkat nanejxasinkam?” —aech xot Jesús Pedroliajwa, Pedro jumnot wut, jum-aechon:

—Tajpaklon, xam puexa chiekal matabijtam. Matabijtambej xam nejxasinkaxpox —aech Pedro Jesúsliajwa.

Do jawut, Jesús jum-aech Pedroliajwa:

—¡Chiekal nawetataefulde jelxan nanaexasiti! Me-ama ovejas tataeflan chiekal tataeflafal pejew ovejas, ixambej ja-amde jelxan nanaexasitiliajwa!

¹⁸ Diachwuajnakolax jum-an. Xam pansianam wut, najut naxoelam. Ma fulaesium poxade fulaemch. Pe pati'nam wut, asamatkoi muaxxachosaxaelam asew jiw xam xajoe-laliajwa. Do jawut, xam buflaeyaxaeli nejxasinka-emil poxade —aech Jesús Pedroliajwa.

¹⁹ Japox Jesús chajia jum-aech matabijsliajwa, achaxtat Pedro tuxaxael, Cristo naexasit xoton. Do jawut, Jesús pejme jum-aech Pedroliajwa:

—¡Xan nakfulaem! —aech Jesús Pedroliajwa.

Pedro wuajnaemntpox Juanliajwa

(Jn 13.25)

²⁰ Do jawut, Jesús, Pedro suapich, laelp wut, Pedro kaxadik wultataek wut, xan nataenpon, wuchakal laejax wut. Jesús kaes xan nanejxasinkponan. Jesús xanal nabu'xael wut Pascuafiestanaxaeyax, jawut xan mox ekx Jesúsxot. Xan japon wuajnaemntax wut, jum-an: “Tajpaklon, ¿achankat xam wasaxael nadaelmajiwxot?” —an xan japamadoitat.

²¹ Do jawut, Pedro xan nataen wut, jawut wuajnaemnton Jesús. Jum-aechon xanliajwa:

—Tajpaklon, ¿machiyaxaeskatlax Juan asamatkoi? —aech Pedro Jesúsliajwa.

²² Jesús jumnot wut, jum-aechon:

—Xan nejxasinkax wut japon ampathatat laejaliajwa, hasta xan paskax wut pejme, ¡xam nabej nejchaxoele' japoxliajwa! ¡Xamlax pomatkoicha xan nanaexasisfulde! —aech Jesús Pedroliajwa.

²³ Samata, asew jiw, Jesús naexasiti, nakaewa najum-aech xanliajwa: “Juan tuxaxil” —na-aechful jiw nakaewa. Pe Jesús japox jum-aech wut, jumchi-elon xan tuxaxinilpoxliajwa. Jesúslax jum-aech xanliajwa: “Xan nejxasinkax wut japon ampathatat laejaliajwa, hasta xan paskax wut pejme, ¡xam nabej nejchaxoele' japoxliajwa!” —aech Jesús Pedroliajwa.

²⁴ Xan, Juan, tajut taenxoxan, tajut jumtaenaxbej, japoxan ampapelfutat lelx. Xan chiekal matabijtax puexa japoxan diachwuajnakolax.

²⁵ Jesús ampathatat wut, xabichaxael japapel-uafan. Samata, japapel-uafan bej xajupaxilbej ampathatat.

Apóstoles isful Jesús to'aspox

Jesús chajia jumdutpox pasliajwa Espiritu Santo

¹⁻² Xan Lucas, lelx ampapelut xamliajwa, Teófilo, xabich sitaenxponam. Asafut chajia xato'ax xamliajwa, matxoelalelxfut. Japafutat lelx Jesús ispoخان, naewuajnafulpoxanbej, tuadut waton isfulpoxan. Hasta Jesús bu'fos wut athu poxase, do jawut, kekoftax lelxpoxan japon isfulpoxanliajwa, naewuajnafulpoxanliajwabej. Chajia xato'ax japafut xamliajwa. Jesús Dios buflae-esal wutfuk athu poxase, Jesús pej-apóstoles, japi makanotripion, japi to'as Espiritu Santo pijaxtat naewuajnafulalajwa Cristo pejuwajan potuajnucha.

³ Jesús tup wut, mat-ech wut pejme dukaliajwa, jawut kamtalejen natulaelafal apóstolesxot. Samata, japi apóstoles chiekal matabija diachwuajnakolax Jesús mat-echpox pejme dukaliajwa. Jesús cuarenta matkoiyan natulaelafal apóstolesxot. Jesús naewuajnaful Dios puexa pejiw tato'laxaelpoxliajwa.

⁴ Buflae-esal wutfukon athu poxase, Jerusalén paklowaxxot wutfukon, apóstoles suapich, jawut jum-aechon: “Xan xamalxota-enil wut, inabej pankole'fuk ampapaklowaxxot! ¡Wuajnawe'e Espiritu Santo pasliajwa xamalxotsik! Taj-ax Dios japox chajia jumdut xamalliajwa. Xanbej chajia japox jum-an xamalliajwa.

⁵ Diachwuajnakolax Juan jiw bautisa mintat. Kaematkoiyan suapich wut, Espiritu Santo pasaxael xamalxotsik. Ja-aech wut, Dios xamal bautisaxael Espiritu Santotat” —aech Jesús apóstolesliajwa.

Jesús bu'fospox athu poxase

⁶ Apóstoles natameja wut, Jesús suapich, jawut japi wuajnachaemt wut, jum-aechi Jesúsliajwa:

—Paklon, ¿xamkat amwut tato'laxaelam xanalkal, judíos? Me-ama wajwuajnapijin, rey David, Israel tuajnuapijwkal tato'al, ¿xamkatlap-is jachiyaxaelam ma amwut? —aech apóstoles Jesúsliajwa.

⁷ Jesús jumnot wut, jum-aechon:

—Kaen, taj-ax Dios, matabijt maswut japox jachiyaxael. Dios tapae-el xamal matabijali-ajwam. Kaen, taj-ax Dios, jumchiyaxael, maswut japox jachiyaxael.

⁸ Pe Espiritu Santo pask wut xamalxotsik, ja-aech wut, Espiritu Santo pejpamamaxtat xamal naewuajnafulaxaelam tajwuajan potuajnuchanpijiw. Naewuajnafulaxaelam Jerusalén paklowaxpijiw, Judea tuajnuapijwbej, Samaria tuajnuapijwbej. Atuaj asatuajnuchanpijiwbej naewuajnafulaxaelam tajwuajan —aech Jesús apóstolesliajwa.

⁹ Jesús japox jum-aech wutfuk, apóstoles natachaema wutbej, Jesús bu'fos athu poxase. Jesús itloejentutat wut, apóstoles kaes tae-elisi Jesús.

¹⁰ Apóstoles fulnatachaema wutfuk, jawut kolenje Dios pej-ángeles chalechkal natulaelba apóstolesxot. Japi pejnaxoe xabich papoei.

¹¹ Do jawut, jum-aechi apóstolesliajwa:

—Xamal Galilea tuajnuapijwam, ¿ma-aech xotkat xamal natachaemanuilam? Japon Jesús pajut pejme asamatkoi xamalxotaxael. Me-ama amwutjel bu'fason, pejme jachiyaxaeson asamatkoi, pasliajwa wut ampathatasik —aech ángeles apóstolesliajwa.

Apóstoles makafitpox Matías, apóstolliajwapon

¹² Jesús athu poxase bu'fos wut olivonaechan nuilxot, apóstoles japamuaxxot kaxa nawen Jerusalén paklowax poadin. Japamuam, me-ama kolekilómetros. Napatamatkoi wut, judíos tapaeis jaskilómetros fulaeliajwa.

¹³ Jerusalén paklowaxxot apóstoles pat wut, lowpi ba. Do jawut, athu julachi batu poxase, japi moejt poxase. Japi apóstoles kaenanula pejuwan. Kaen pawul Pedro. Asan pawul Juan. Asan pawul Santiago. Asan pawul Andrés. Asan pawul Felipe. Asan pawul Tomás. Asan pawul Bartolomé. Asan pawul Mateo. Asan pawul Santiago. Japon Alfeo paxulan. Asan pawul Simón. Japon majt asamutpijin, celotemutpijin. Asan pawul Judas. Japon Santiago paxulan.

¹⁴ Dios kawuajnalialajwa wut, apóstoles natameja, Jesús pakoew suapich, Jesús penbej, pawulpow María, asew watho'bej. Japi kaenejchaxoelax Dios kawuajnalialajwa.

¹⁵ Japamatkoiyan kaeyaxtat natameja wut Jesucristo naexasitpikal, puexa japi cien-toveinte jiw. Do jawut, Pedro nant wut naksiyalialajwa, jum-aechon japiliajwa:

¹⁶ “Takoew, me-ama rey David chajia lel Espiritu Santo pijaxtat Judas isaxaelpoxliajwa, japox islison. Judas asew jiw bu'fol Jesús jaelsliajwas.

¹⁷ Judas majt Jesús pejnachalan, xanal suapich. Nabistbejpon Dios pejbichax.

¹⁸ Judas babijax is wut Jesúsliajwa, mochpon. Japaplatatat wuajton sat. Do jawut, pajut nakaechariamake't wut, diwkon. Jawut japamuatat dukjklison. Jasoxtat Judas pajut nakijt. Do jawux, Judas patupan jop wut, woejxalika wut, woej-wnakolsebejpon.

¹⁹ Jerusalén paklowaxpijiw japox wultaena wut, japasat walduwlisipox Acéldamawultat. Japi pejjametat, hebreojetametat, japawul jumchiliajwa: 'Jalsat' —chiliajwa.)

²⁰ Salmosfutat chajia jum-aechbej Judasliajwa:
'Pejba chajiwlabla wulxael. Chinax kaen aton dukaxil japabaxot' —aech Salmosfutat, chajia jum-aech wut Judasliajwa. Salmosfutat kaes jum-aechbej Judasliajwa: 'Asan nali-axsaxael japon pejbichax' —aech Salmosfutat —aech Pedro jiw natamejapiliajwa, cientoveinte jiwliajwa.

²¹ Pedro pejme jum-aech jiw natamejapiliajwa: "Asew xatisxot, pajut chiekal taeni Jesús ispoxan, pomatkoicha xanalxot wuton.

²² Japi xatis nakchala, Jesús bautisas wut Juan. Hasta Jesús athu poxase julach wutbej, japi nakiowa nakchalaful. Japixot, kaen xatis makafisaxaes, japon jiw naewuajnalijwa, xanal suapich, Jesús tuj wut mat-echpoxliajwa" —aech Pedro jiw natamejapiliajwa.

²³ Do jawut, japixot kolenje makafich. Kaen pawul Matías. Asan treswulje. Kaewul pawulon José. Asawul pawulon Barsabás. Taxdukapejwul pawulon Justo.

²⁴⁻²⁵ Japi kolenjexot kaen makafisiasiapi chiekal kaes pachaempon apóstolliajwa. Samata, apóstoles Dios kawuajan japi chiekal matabijaliajwa, achan japi kolenjexot makafisaxaes apóstolliajwa. Dios kawuajan wut, jum-aechi: "Wajpaklon Dios, xam matabijtam puexa jiw pejnechaxoelaxan. ¡Xanal na-itpaem, mason japi kolenjexot makafisaxaelam apóstolliajwa, Judas nafa' a xoton babijax isaxtat! Samata, Judas pejlel chijia. Fulaechon kana poxade" —aechi, Dios kawuajan wut.

²⁶ Do jawut, nakakujtlisi ia'xi jasi, chiekal matabijaliajwa, achan makafisaxaes apóstolliajwa. Ja-aech wut, matabijapi Matías makafichpox. Majt once apóstoles. Amwutjel japontat japi puexa pejme doce apóstoles.

2

Espíritu Santo paskpox Jesucristo pejuwajan naexasitixot

¹ Pentecostésfiesta wut, kaeyaxtat natameja Jesucristo pejuwajan naexasiti.

² Do jawut, chalechkal xabich jumsenk athusik, me-ama pinajoewa wut, jathia-aechsikox. Puexa jababatapi thiatan.

³ Me-ama jitkaech-ia'an, jasi, natulaelba kaenanula jiw pejta'tabijla.

⁴ Puexa jiw, jaxoti, xabich kajachawaech Espíritu Santo. Samata, jawut asajamechan naksiyax tuaduwpí. Majt matabija-eljamechan naksiyalijwa, japi jiw chalechkal naksiya Espíritu Santo pijaxtat.

⁵ Japamatkoiyan wut, xabich judíos pat Jerusalén paklowaxxot Pentecostésfiesta taeliajwa. Japi xabich atuajpijiw, asatuajnuhanpijiw. Japi, atuajpijiw, xabich naexasisiasiapi Dios. Matabijasiabejpi Dios pejjamechan.

⁶ Japi, atuajpijiw, thiatafol nejmetpox. Japox nejmet Jesucristo pejuwajan naexasiti natamejaxot. Dolisi jaxot japi natamejal. Jumtaenbejpi, kaenanula naexasiti Jesucristo pejuwajan naksiya wut majt naksiya-eljamechan. Thiatapatpi chiekal jumtaen, wenaksiyas xot japi pejjamechan. Samata, japi xabich nejchaxoel japoxliajwa.

⁷ Xabich natachaemapi, jumtaen wut, asew jiw wenaksiyas wut japi pejjamechan. Samata, nakaewa najum-aechi:

—Puexa ampi jiw Galilea tuajnuapijiwkal.

⁸ ¿Ma-aech xotkat japi jiw matabija naksiyalijwa wajjamechan? Japi majt matabija-el wajjamechan naksiyalijwa.

⁹ Kaenanula xatis asatuajnuhanpijwas. Xatisxot asew Partia tuajnuapijiw, asew Media tuajnuapijiw, asew Elam tuajnuapijiw, asew Mesopotamia tuajnuapijiw, asew Judea tuajnuapijiw, asew Capadocia tuajnuapijiw, asew Ponto tuajnuapijiw, asew Asia tuajnuapijiw. Japi jiw puexa fulaen asatuajnuhanxot.

¹⁰ Xatisxotbej asew Frigia tuajnuapijiw, asew Panfilia tuajnuapijiw, asew Egipto tuajnuapijiw, asew Libia tuajnuapijiw, mox duili Cirene paklowaxxot. Asew jiw xatisxot fulaen Roma paklowaxxot.

¹¹ Roma paklowaxlel pa'ani, japixot asew judíuskola. Asew japixot judíos nadofapi. Xatisxot asew jiw fulaenbej Creta tanaetxot. Asew jiw xatisxot fulaenbej Arabia tuajnuaxot. Puexa ampabatat natamejapi, naksiya wut Dios ispoxanliajwa, puexa xatis chiekal jumtaens, japi naksiya xot wajjamekolaxan —na-aechi nakaewa thiatapatpi.

¹² Japi jiw puexa xabich natachaema. Matabija-elbejpi, achax nejchaxoelaxaeli. Samata, nakaewa nawaajnuachae wut, jum-aechi:

—¿Puexa ampoخان achax chiyaxaelkat? —na-aechi nakaewa.

¹³ Asew japixot bu'wñajanpaei wut, jum-aechi ampoخ:

—¡Ampi jiw saxa saxtas! —aechi Jesucristo pejuwñajan naexasitiliajwa, asajamechan naksiya xoti.

Pedro naewñajanpox thiatapatiliajwa

¹⁴ Jesucristo pejuwñajan naexasiti jumtis wuti japox, do jawut, Pedro nant, once apóstoles suapich. Jawut pinjametat jum-aechon thiatapatiliajwa: “Xamal judíos fulaemanpi asatñajñchanlel, ¡xan chiekal nanaewe'e! Xamal Jerusalén paklowaxpijwam, ¡chiekal nanaewe'ebej! ¡Chiekal najumtaem xamal jumchiyaxaelenpox!

¹⁵ Ampí jiw asajamechan naksiyapi, naksiyapi Espiritu Santo pijaxtat. Ampí jiw saxsesal. Xamal nejmach jum-am ampiliajwa. Juimtlis atñajsan. Jas-is juimt, ekan wut, jiw fe-el saxan saxsliajwas.

¹⁶ ¡El! Profeta, pawulpon Joel, japon chajia lel Dios chajia jum-aechpox, Espiritu Santo pasaxoekpox.

¹⁷ Dios chajia jum-aech: ‘Cristo ampathatat wut, xan to'axaelen Espiritu Santo jiw kajachawaesliajwas. Jawut naxi, poejiw, watho'bej, jiw naewñajñaxael xan buxto'axpoxan. Poejiw, pansiachow, masoxtat taeyaxael xan itpaeyaxaelenpoxan. Me-ama xamoejt wut, taen, jachiyaxaeli. Poejiw, pakdiachowbej, moejt wut, taeyaxael xan itpaeyaxaelenpoxan, diachwñajñakolaxpoxan.

¹⁸ Japamatkoiyantat puexa tajjiw, xan nanaexasiti, poejiw, watho'bej, to'axoekan taj-Espiritu Santo japi pejmatpuatanxotaliajwa. Do jawux, japi naewñajñaxael xan buxto'axpoxan.

¹⁹ Thatbaxoxot koexachan isaxaelen puexa jiw taeliajwa. Japoxan jiw taen wut, natachaemanuilaxaeli. Ampathatxot xabichaxael jal. Xabichaxaelbej jit, itnumbej.

²⁰ Juimt, matkoipijin, itkñatnikaxael. Juimt, madoipijin, pasoenaxaelbej. Me-ama jal wut, jachiyaxael juimt, madoipijin. Japamatkoijan japoxan majt jachiyaxael, mox pawñajna wut paklokolan pejme pasliajwa. Jawut puexa jiw matabijaxael paklokolan diachwñajñakolax xabich mannixapoxan.

²¹ Puexa jiw wuljow wut paklokolan pijaxtat, japi jiw bu'weyaxaes' —aech Dios jum-aechpox profeta Joel lelfutat' —aech Pedro thiatapatiliajwa.

²² Thiatapatixot, asew Judea tñajñapijw. Japiliajwa Pedro jum-aech: “Xamal israelitas, ¡xan chiekal nanaewe'e jumchiyaxaelenpox! Jesús Nazaretpijin xanalxot wut, japon xabich koexachan is Dios pijaxtat. Ja-aech wut, xanal chiekal matabijtax japon Dios to'asponpox.

²³ Do jawux, Jesús wiach xamalxot. Do jawutbej, xamal japon wiatam asajiw babejchowxot cruztat kematamatlialiajwas. Dios chajia matabijt paxulanliajwa jachiyaxaespx. Samata, japox jatis japonliajwa.

²⁴ Do jawutbej, diachwñajñakolax Jesús chiekal tñp. Pe Dios mat-et Jesús pejme dukaliajwa. Ja-aech wut, Jesús malecha-esal patupax.

²⁵ Rey David chajia lel wut, lelon asamatkoj jachiyaxaespx Jesúsliajwa:

‘Tajpaklon jumchiyaxael: “Xan tajDios taenx. TajDios pomatkoicha xanxot. TajDios xan nachala. Samata, tajlewla-el.

²⁶⁻²⁷ Dios tamach nawaelsaxil muaxwñajxot. Tapaeyaxilbejpon tajbu't xoepaliajwa, Dios naexasisfulax xot. Samata, jajuiflaxaelen, nejchachaemlaxaelen xot. Nejmachaxaelenbej, Dios natataeflful xot.

²⁸ Dios na-itpaeyaxael, machiyaxaelen dukaliajwan pomatkoicha, isfulaliajwanbej Dios nejxasinkpoxan. Xan xabich nejchachaemlaxaelen, Dios xanxot wut' —chiyaxael tajpaklon' —aech rey David lelxot chajiakolaxtat Jesús jumchiyaxaelpox' —aech Pedro Judea tñajñapijwliajwa.

²⁹ Pedro pejme jum-aech Judea tñajñapijwliajwa: “Takoew, diachwñajñakolax xamal jumchiyaxaelen wajwñajñapijin Davidliajwa, chajiakolaxtat jiw tato'lanliajwa. Rey David tñp. Japon mñthtas. Xatis chiekal matabijas amxot mñthtason.

³⁰ Rey David, japonbej profeta. Japon jiw naewñajan Dios buxto'aspxan. David diachwñajñakolax matabijt Dios jumduchpox, chajia jumtis wuton: ‘Kaen namon puexa judíos tato'laxael' —tis wut David Jesúsliajwa.

³¹ David chajia matabijt Dios pijaxtat Cristo tñpaxaelpox. Matabijtbejpon Cristo mat-esaxaespx pejme dukaliajwa. Do jawut, jum-aechbejpon: ‘Cristo tñp wut, kaweta namanaxil muaxwñajtat. Pejbu't jaxot kaweta xoepaxilbej' —aech David.

³² Samata, Jesús tñp wut, Dios mat-echpon pejme dukaliajwa. Japox diachwñajñakolax. Puexa xanal chiekal taenx, Jesús pejme duk wut.

³³ Bu'fos wuton atha poxase tato'laliajwapon jiw, pax Dios suapich, jaxotse pax Dios Jesús chaxduch Espiritu Santo. Me-ama chajia jumduch, jatis japox Jesús. Do jawux, Jesús

to'ak Espiritu Santo xanalxotsik, xanal tajmatpuatanxotaliajwa. Xamal amxot taenamxox, jumtaenamxoxbej, japox Espiritu Santo pijax.

³⁴ Jesús bu'fos wut athu poxase, David tae-el, japon chajia wuajna tux xot. Pe David jum-aech, Dios pijaxtat matabijt xoton Dios jum-aechpox Jesúsliajwa:

'Dios jum-aech tajpaklokolan Cristoliajwa: "¡Ekde tajpoklalel jiw tato'laliajwam, xan suapich!

³⁵ Ekam wut, xan malechaxaelen nadaelmajiw. Xan malechax wut nadaelmajiw, japi jiw xam naexasisfulaxael, tato'lam wut" —aech Dios Cristoliajwa' —aech David, chajia jum-aech wut.

³⁶ "Tajjiw, xan nejxasinkax xamal chiekal matabijaliajwam amxox. Xamal kematamalam Jesús tupaliajwa cruztat. Pepon, amwutjel, Dios wulduws paklokolan. Wulduwsbejpon Cristo, Dios to'aspon xatis nakbu'weliajwa" —aech Pedro Judea tuajnujijwliajwa.

³⁷ Thiatapati jumtaen wuti Pedro jum-aechpox, japi xabich nejchaemil. Samata, Pedro wuajnachaehtas, asew apóstoles suapichbej:

—Takoew, ¿machiyaxaelenkat xanal tajbabijaxan ispoxanliajwa? —aechi Pedroliajwa.

³⁸ Pedro jumnot wut, jum-aechon Judea tuajnujijwliajwa:

—¡Kofim babijaxan isampoxan! ¡Isde Dios nejxasinkpoxan! Xamal kaenanula ja-am wut, Dios beltaeyaxael babijaxan isampoxanliajwa. Ja-aech wut, bautisaxaelam Jesucristo pijaxtat, chiekal naexasitam xot. Ja-aech wut, Dios to'axoek Espiritu Santo xamal nejmatpuatanxotaliajwasik.

³⁹ Dios chajia jumdut Espiritu Santo to'aliajwasik xamal nejmatpuatanxotaliajwa, naxixotaliajwabej, asatuajnuchanpijwliajwabej. Dios makanochpi, puexa japi jiw Dios pejjiwaxael. Espiritu Santo japi pejmatpuatanxotaxael —aech Pedro Judea tuajnujijwliajwa.

⁴⁰ Pedro xabich naksiya wut japiliajwa, chiekal naewuajanbejpon. Naewuajan wut, jum-aechon:

—¡Xamal nadajim jiw babejchowxot napelsasamatam, japi suapich! —aech Pedro.

⁴¹ Do jawut, japi jiw naexasiti Pedro jum-aechpox. Japi jiw bautisasbej. Japamatkoi xabich jiw naexasit Jesucristo pejwuajan. Japi jiw, me-ama tres mil.

⁴² Japi puexa chiekal naexasisful apóstoles naewuajanpoxan. Pejewpi kajachawaeti kaes wewe'paspiliajwa. Do jawut, japi puexa chiekal duillisi. Natamejafuli kaeyaxtat, Dios kawuajnalialjwa wut, xaeliajwa wutbejpi.

Ma-aechpox jiw, matxoela naexasiti Jesucristo pejwuajan

⁴³ Apóstoles Dios pijaxtat xabich koechaxan isful. Japoxan taen wut, puexa jiw xabich nejchaxoelanuil.

⁴⁴ Naexasiti Jesucristo pejwuajan chiekal kaenejchaxoelaxpi. Samata, chiekal duili. Japi pejew wut, nakaewa nakewawaeti. Me-ama kaenanula puexa pejewkola wut, ja-aechi pejewliajwa.

⁴⁵ Jesús pejwuajan naexasiti mowapi pejewkola kajachawaesliajwa asew jiw, xabich kejilpi. Pejsat wut, o, pejew wut, mowapi. Moch wut, japaplatatat kajachawaeti kejila.

⁴⁶ Pomatkoicha Dios pejtemplobatat natameja naexasiti Jesucristo pejwuajan. Japi nakaewa natadat xaeliajwa pejbachantat. Pomatkoicha ja-aech naexasiti Jesús pejwuajan, xabich nejchaxoelanuil xoti. Nejchaxoela-eli asax.

⁴⁷ Pomatkoicha Dios kawuajan wut, jum-aechi: "Xam xabich pachaemam" —aechi Diosliajwa. Puexa paklowaxpijiw, asew jiw suapich, wulnaksiyas wut Jesucristo pejwuajan naexasiti, wulnaksiyaspi chimiajamechantat. Kaematkoisful, asew jiw, jaxoti, naexasit Jesucristo pejwuajan Dios bu'weliajwas. Japibej kofa babijaxan ispoxan. Do jawux, japibej naknatameja, asew Jesucristo pejwuajan naexasiti suapich.

3

Nabejkan boeithusrox

¹ Kaliax wutlejen, judíos Dios jikawuajan Dios pejtemplobatat. Asamatkoi, kaliax wut, Pedro, Juan suapich, Dios pejtemploba poxade Dios kawuajnalialjwapi.

² Jaxotde, Dios pejtemplobaxot, kaen nabejkan, laejaxilon, wuajna ek. Japon nabejkax chanlaelt. Pomatkoicha pejiw buflalaenas wut, esnadoftas templobafafaxot, pawulxot Hermosafafa. Jaxot waljoeflon plata, jiw lalenapi.

³ Pedro, Juan suapich, Dios pejtemploba low wut, japi taen nabejkan. Do jawut, japon nabejkan wuljowpon plata.

⁴ Pedro, Juan suapich, japi natachaema nabejkan. Do jawut, Pedro jum-aech:

—¡Xanal chiekal natachaemde! —aechon nabejkanliajwa.

⁵ Japon nabejkan chiekal naewekcha. Do jawut, nejchaxoelon: "Plata bej nachaxdusaxaelbejpi" —aechon, nejchaxoel wut.

⁶ Pe Pedro jum-aech nabejkanliajwa:

—Xanal plata kejinil. Pe asaxtat xam kajachawaesaxaelen. Jesucristo, Nazaret paklowaxpijin pijaxtat, xam kajachawaesaxaelen laejaliajwam. ¡Nande! Nantam wut, ¡laejim! —aech Pedro.

⁷ Pedro japox jum-aech wut, pejpoklake-elel makafiton nabejkan, nansax kajachawaesliajwa. Do jawut, nabejkan nant wut, pejtuakan, pejtuakwasibej, chiekal wepachaemlison.

⁸ Do jawut, nabejkan nancha wut, diawjalapon. Jawut laejax tuadutlison jaxot. Jawut, Pedro, Juan swapich, Dios pejtemploba leliajwa wut, boejthulspón naklow. Dadiwjelison, laeja wut. Jum-aechfulbejpon Diosliajwa: “Dios, xam xabich pachaemam, naboejthutam xot” —aechfullison.

⁹ Do jawut, puexa jiw taenslison, laeja wut. Jumtaenbejpi, japon jum-aechful wut Diosliajwa.

¹⁰ Japi matabija, japon ek wut Dios pejtemplobafafaxot, pawulxot Hermosa. Pomatkoicha jaxot plata wuljowpon jiw lalenapi. Samata, jiw xabich natachaemanuil, taen wuti japon chiekal laejapox.

Pedro naewuajnapox jiw Dios pejtemplobatat

¹¹ Japon, majt nabejkan, laejalison, Pedro swapich, Juan swapichbej, Dios pejtemplobatat. Japalel pawul Pórtico de Salomón. Nadiajna-ellison japixot. Xabich jiw dadukpaxtat papat, japon taeliajwapi. Xabich nejchaxoelanuil.

¹² Pedro japox taen wut, jum-aechon: “Tajjiw, ¿ma-aech xotkat xamal nejchaxoelanuilam? Xamal bej nejchaxoelambej xanalliajwa: ‘Japi pajut nabejkan boejthut. O, japi Dios kajachawaech, xabich pachaem xoti Diosliajwa’ —ambej xamal, nejchaxoelam wut. Xanal tajut tajaxtat ampon boejthut-enil.

¹³ Wajwuajnapijiw, japi Abraham, Isaac, Jacobbej, japi pejDios xabich sitaen paxulan Jesús. Pe xamal wiatam paklochowxot japon boesaliajwas. Xamal nejwesla Jesús, Pilato pejbatat wut. Pilato tapaesia wut Jesús nakolsliajwa, xamalliajwa japox pachaema-el.

¹⁴ Pilato wuljoe-emil Jesús nakolsax tapaeliajwas, japon xabich pachaempon, chinax babijax is-elpon. Xamallax asbuan jumch wuljowam nakolsax tapaeliajwas babejen, jiw ben.

¹⁵ Dios to'aspon xatis nakkajachawaesliajwa pomatkoicha chiekal duilaliajwas, japon xamal tapaeyamla boesaliajwas. Pe boesas wuton, Dios mat-echpon pejme dukaliajwa. Jesús mat-ech wut, xanal tajut chiekal taenx, japon pejme duk wut. Japox xanal chapaeix xamal.

¹⁶ Ampon aton, majt nabejk, xamal chiekal matabijampon, majt xanal nejchaxoelx japon atonliajwa: ‘Diachwuajnakolax Jesús boejthutaxaeson’ —an xanal, nejchaxoelx wut. Samata, chiekal boejthulson, me-ama xamal taenam’ —aech Pedro japi jiwliajwa.

¹⁷ Dolisdo', Pedro pejme jum-aech: “Takoew, xan matabijtax xamal isampox, nejpaklochow swapich. Xamal tapaeyam wut Jesús kematamatlaliajwas cruztat, japox xamal isam, chiekal matabija-emil wut.

¹⁸ Jesús cruztat kematamatlas wut, patliso, me-ama profetas chajia jum-aech Dios pijaxtat: ‘Dios to'axoek paxulan ampathatasik boesaliajwas, japon jiw bu'weliajwa’ —aech profetas.

¹⁹ Samata, ¡kofim babijaxan isampoxan! ¡Dios xanaboejim, me-ama japon nejxasink xamal isliajwam! Ja-am wut, Dios pelsaxael kaelel babijaxan isampoxan. Do jawux, Dios kajachawaesaxael xamal chiekal nejchaxoelamaliajwam.

²⁰ Asamatkoi Dios pejme to'axoek paxulan ampathatasik, japon pawul Jesús. Dios chajia makafit japon Mesiasliajwa xamalliajwa.

²¹ Jesús ekfuk Diosxotse. Jachisfulaxaelon. Do baxael, Dios puexa chiekal chaemt wut pothata, Jesús pejme pasaxoek. Japoxliajwa chajia jum-aech Dios pejprofetas, japi wajwuajnapijiw.

²² Moisés chajia jum-aech Jesúsliajwa wajwuajnapijiw jumtaeliajwa. Jum-aechon: ‘Me-ama xan Dios nato'a profetaliajwan, Cristobej profetaxae. Dios makafisaxaeson profetaliajwa xamalxot. Naexasisaxaelam japon puexa jumchixaxaelpoxan.

²³ Puexa naexasis-elpi japon profeta jum-aechpoxan, japi jiw chiekal toesaxaes Dios’ —aech chajia Moisés Jesúsliajwa” —aech Pedro japi jiwliajwa.

²⁴ Pedro pejme jum-aech: “Profeta Samuel chajia jum-aechpox, japox patliso am-pamatkoiyantat. Samuelwux, puexa profetas, wuchakalpijiw, kaenanula jum-aechbej ampamatkoiyanliajwa.

²⁵ Dios chajia jumdutpoxan japi jiwliajwa, japoxan Dios chaxodusaxael xamal. Dios chajia jum-aech Abrahamliajwa: ‘Kaen namon pijaxtat puexa ampathatpijiw kajachawaesaxaelen’ —aech Dios Abrahamliajwa.

²⁶ Samata, Dios paxulan tɔp wut, Dios mat-et japon pejme dukaliajwa. Do jawux, matxoela to'apon xamal poxade japon xamal kajachawaesliajwa. Samata, Jesús xamal kajachawaesasia kofaliajwam babijaxan isampoxan, isliajwam Dios nejxasinkpoxan" — aech Pedro jiwliajwa Dios pejtemplobatat.

4

Pedro, Juan suapich, paklochow pejwuajnalel nuilpox

¹ Pedro, Juan suapich, jum-aech wutfuk jiwliajwa Dios pejtemplobaxot, jawut Dios pejtemploba wetipaklon, sacerdotes suapich, saduceos suapichbej, japi pat Pedroxot.

² Japi xabich palala Pedroliajwa, Juanliajwabej, jum-aech xoti, naewuajan wut: "Jiw tɔpi, baxael, mat-eyaxaespi pejme duilaliajwa. Japox diachwuajnakolax. Jesús tɔp wut, do jawux, mat-echpon pejme dukaliajwa" — aech xot Pedro, Juan suapich, naewuajan wut.

³ Do jawut, Pedro, Juan suapich, jaelas. Jawut jiasliski jiw jebatat, tuila xotlisox. Kandiawa jukaxaesi tasalaliajwas.

⁴ Xabich jiw Jesucristo pejwuajan jumtaen wut, naexasiti Jesús pejwuajan. Poejiw, watho'bej, xabich naexasiti. Xajus wut poejiwkak, puexa matxoelanaexasiti Jesucristo pejwuajan, jelnaexasiti suapichbej, japi puexa, me-ama cinco mil poejiw.

⁵ Kandiawa wut, Jerusalénxot natameja judíospaklochow, judíos-ancianosbej, judíos chanaekabuanapibej.

⁶ Jaxotdebej Anás pat. Japon majt sacerdotespaklokolan. Caifás, japon japawaestat sacerdotespaklokolan, pejiwkola suapich, patbejpon jaxotde. Asan, pawɔlpon Juan, Alejandro suapich, jaxot patbejpi.

⁷ Japi asew to'a buflaeliajwas Pedro, Juan suapich. Jawut Pedro, Juan suapich, bu'pach wut paklochow pejwuajnalel, do jawut, wuajnachaehtas wut, jumtiski:

—¿Achan pejpamamaxtatkat xamal boejthutam nabejkan? ¿Achan pejpamamaxtatbejkat xamal japox isam? —tis Pedro, Juan suapich.

⁸⁻⁹ Do jawut, Pedro jumnot wut, jum-aechon Espíritu Santo pijaxtat:

—Paklochiwampim, xamal ancianospiembej, xanal nawuajnachaehtam, chiekal matabijasiam xot nabejkan boejthulspoxliajwa. '¿Achaxtatkat nabejkan boejthul?' — am xamal.

¹⁰ Xamal nejwuajnalel chiekal jumchiyaxaelen xamal puexa chiekal matabijaliajwam, asew Israel tuajnu'pijiwbej. Ampon, majt diachwuajnakolax chiekal nabejk, xamal nejwuajnalel nukpon. Pe boejthuchpon Jesús, japon Nazaret paklowaxpijin. Japon xamal chajia pakematamatlam. Japon tɔp wut, Dios mat-echpon pejme dukaliajwa.

¹¹ Jesús makafich Dios, japon jiw bu'weliajwa. Pe xamal naexasis-emil japon jum-aechpoxan. Samata, xamal Dios bu'weyaxil. Me-ama jiw ia'ba is wut, kaet ia'tliajwa, nakaewa najum-aechi: 'Ampa-ia't chaemil' — aechi, do jawux, asan aton japot ia't fit wut, jum-aechon: 'Ampot ia't, puexa ia'xot kaes pejme pachaem tuakso'pijtalijwa, ba chiekal mamnikaliajwa' — aech japon aton. (Japot ia't, me-ama Cristo, Dios paxulan, Dios makafichpon.)

¹² Dios paxulan to'ak nakbu'weliajwa. Samata, kaen Jesús xajɔp nakbu'weliajwa. Ampathatat asan kaes ajil nakbu'weyaxaelon — aech Pedro paklochow wuajnalel.

¹³ Paklochow jumtaen wut Pedro jum-aechpox, jawut japi nejchaxoel: "Pedro, Juan suapich, pin-iawaechan xabich estudia-el. ¿Ma-aech xotkat japi pejlwla-el naksiyalijwa xatis wajwuajnalel? Japi Jesús pejnachala xot, chiekal matabija naksiyalijwa" — aech paklochow, nejchaxoel wut. Samata, natachaema wut, nejchaxoelachalakbejpi.

¹⁴ Jawut taenbejpi majt nabejkpon, nuk wut japixot. Samata, paklochow kaes asax wejisal jumchiliajwapi japi.

¹⁵ Do jawut, paklochow natamejaxot nakolax to'as tathoetade, tathoetlel nuilaliajwa. Pedro, Juan suapich, nakola wut, jaxot paklochow nakaewa najum-aech:

¹⁶ —¿Machiyaxaeskat ampi poejiw? Puexa Jerusalén paklowaxpijin chiekal matabija japi is koechax Dios pejpamamaxtat nabejkan boejthulaliajwas. Samata, xatis jumchiyaxisal: 'Japi japox is-el' —chiyaxisal.

¹⁷ Japi buxfiasaxaes kaes naewuajnasamata Jesucristo pejwuajan asew jiwliajwa. Ja-aech wut, asew jiw jumtaeyaxil Jesucristo pejwuajan — na-aech paklochow nakaewaliajwa.

¹⁸ Do jawut, Pedro, Juan suapich, laslisi pejme leliajwadin. Lasbej majt nabejkpon. Dolisi, len wut, jumtiski:

—¿Xamal kaes ma amwut nabej naewuajne' Jesucristo pejwuajan! —tislisi.

¹⁹ Do jawut, Pedro, Juan suapich, jumnot wut, jum-aechi:

—¿Xamal najut chiekal nejchaxoelde! ¿Achaxkat kaes pejme pachaem xanal isliajwan Dios pejwuajnalel? ¿Xanalkat isaxaelen xamal tato'lampox? O, ¿xanalkat isaxaelen Dios tato'alpox?

²⁰ Xanal buxkofaxinil taenxproxan Jesúsxot, jumtaenxproxanbej —aech Pedro, Juan suapich.

²¹ Japi japox jum-aech wut, paklochow pejme kaes bu'athiyaslisi Jesucristo pejwuajanliajwa kaes naewuajnasamatapi jiw. Bu'athiyas wut Jesús pejwuajanliajwa, jaxot nakolax tapaeislisi. Paklochow pejlwla kastikaliajwapi Jesús pejnachala. Samata, nakaewa najum-aechi: “Japi xatis kastikas wut, diachwuajnakolax xabich jiw palalaxael xatistliajwa, puexa jiw chiekal nejchachaemil xot Diosliajwa, nabejkan chiekal boeithuls xot” —na-aech paklochow nakaewaliajwa.

²² Majt nabejkpon, boeithuls wut Dios pijaxtat, japon aton, me-ama kaes cuarenta waechan.

Jesucristo pejwuajan naexasiti Dios kawuajanpox pejlwlasamata asew jiwliajwa

²³ Pedro, Juan suapich, nakolax tapaeis wut, fulaechlisi asew Jesucristo pejwuajan naexasiti poxade. Jaxotde pa'a wut, chapaeislisi paklochow buxfiachpox. Jum-aechi Jesucristo pejwuajan naexasitiliajwa: “Sacerdotespaklochow, ancianosbej, xanal nabuxfiat Jesucristo pejwuajan kaes naewuajnasamatan jiw” —aechi Jesús pejwuajan naexasitiliajwa.

²⁴ Japox jumtaen wut, Jesucristo pejwuajan naexasiti kaeyaxtat Dios kawuajani. Dios kawuajan wut, jum-aechi: “Tajpaklon, xam isam thatbaxo, isambej that, marbej. Isambej puexa thatbaxotatpi, empathatatpibej, marxotpibej.

²⁵ Chajiakolaxtat xanal tajwuajnapijin, taj-am David, nej-Espíritu Santo buxto'as jumchiliajwa. Samata, David chajia ampox jum-aech:

‘Asatuajnuapijw, judíos-eli, xabich palalaxael. Japi nejchaxoelaxaellach isliajwa chaemilpoxan xamliajwa. Pe japi xajupaxil isliajwa japoxan.

²⁶ Ampataajnuapijw, reyes, paklowaxpijw tato'alpibej, natamejaxael. Do jawut, nejchaxoelaxaeli nabeliajwa, nejjw suapich. Do jawutbej, nejchaxoelaxaeli toesliajwa Cristo, xam to'ampon jiw bu'weliajwa' —aech chajia David” —aech Jesucristo pejwuajan naexasiti, Dios kawuajan wut.

²⁷ Japi kaes Dios kawuajan wut, jum-aechi: “Chajiakolaxtat David lelpox jum-aech jachiyaxaelpox. Natamejapi ampapaklowaxxot, Herodes, Judea tuajnuapijw tato'lan, Poncio Pilatobej, japon wulduws Roma paklowaxxot judíos pejgubernadorliajwa Israel tuajnuaxot. Japi natameja wut, jaxot asatuajnuachanpijiwbej, judíos suapich, natameja. Puexa japi naknatameja kaeyaxtat nakaewa nawuajnachaeisliajwa: ‘¿Machiyaxaeskát Jesús boesaliajwas?’ —chiliajwa paklochow naxulan Jesúsliajwa, japon xam to'ampon jiw bu'weliajwa.

²⁸ Dolisido', japi jasox islisi, boesaliajwa wuti Jesús. Pe pajut pejnechaxoelaxtat japi japox is-el. Japi japox is, me-ama xam chajia nejchaxoelam japi japox isliajwa.

²⁹ Tajpaklon, xam matabijtam judiospaklochow xanal nathiyapox, nejjwan xot. Samata, ¡nakajachawae'e tajlewla-elaliajwan, naewuajna xwut nejwuajan!

³⁰ ¡Nakajachawae'ebej boeithusfulaliajwan jiw bu'xaenkpi! ¡Nakajachawae'ebej koexachan isliajwan naxulan Jesús pijaxtat!” —aechi puexa, Dios kawuajan wut.

³¹ Dios kawuajna xwutoet wut, chalechkal jaxot sat najuiya. Jawut puexa jiw kachawaesfulas Espiritu Santo. Samata, Espiritu Santo pijaxtat naewuajan wuti Dios pejjamechan, japi jiw pejlwla-el asew jiwliajwa.

Jesucristo pejwuajan naexasiti pejew wut, me-ama puexa pejew wut, ja-aechi

³² Puexa naexasiti Jesucristo pejwuajan, japi chiekal kaenechaxoelax. Japixot chinax kaen jumchi-el: “Xan kaenan ampoxan tejew” —chi-el, nejchaxoel wut. Pejewpi japoxan, me-ama puexa jiw pejew wut, ja-aechi.

³³ Apóstoles chapaeñal jiw jumtaeliajwa Jesús mat-echpox Dios, japon pejme dukpox. Apóstoles kachawaesfulas Dios, naewuajan wuti Jesús pejiwuajan.

³⁴⁻³⁵ Jesucristo pejwuajan naexasitixot, chinax kaen wewe'pa-esal. Asew pejsatan wut, o, pejbachan watbej, mowasia wut, mowapi. Moch wut, japaplata chaxduwpi apóstoles. Do jawux, apóstoles chaxduw japaplata xabich jiw wewe'paspiliajwa.

³⁶ Japixot kaen pawal, José. Japon nalaelt Chipre tanaetxot. Japon Leví pamon. Apóstoles wulduwson asawultat, Bernabéwultat. (Japawul jumchiliajwa: “Jiw nejlikapon nejxaejwasi” —chiliajwa japawul.)

³⁷ Bernabé mowa wut pejsat, puexa plata chaxduton apóstolesxot.

5

Ananías, pijow Safira suapich, naekichachajbasiapox apóstoles

¹ Bernabé mowa wut pejsat, Ananías, pijow Safira suapich, japibej mowa pejsat.

² Ananías moch wut, japon kaenejchaxoelax, pijow suapich, pejew plata diajnaliajwa. Do jawux, plata, diajanpi, chaxduton apóstolesxot. Me-ama puexa plata chaxdut wut, ja-aechon.

³ Pedro plata kefit wut, jum-aechon:

—Ananías, ¿ma-aech xotkat tapaeayam dep leliajwa nejmatpuatat? ¿Ma-aech xotbejkat naekichachajbasiam Espiritu Santo? Matabijtax, asew plata, sat-om, kaweta otam nejboxot.

⁴ Sat mowa-emil wutfuk, japasat chiekal nejsatkolax. Do jawux, sat mowam wut, mot wuti xam, japaplata chiekal nejewbej. ¿Ma-aech xotkat xanal naekichachajbasiam? Xanalkal naekichachajbasi-emil. Diosbej naekichachajbasiam —aech Pedro Ananíasliajwa.

⁵⁻⁶ Ananías japox jumtaen wut, patupan jumwalon. Do jawut, pansiachow fulaen xakiasliajwapi patupan Ananías. Do jawutbej, chaxfollisipon muthsliajwas. Jawut muthtlisipon. Jiw japox wultaena wut, xabich pejlewlapi.

⁷ Do jawux, tres horas wut, Ananías pijow pat Pedroxot. Japow matabijs-el pamal wetupspox.

⁸ Pedro wuajnachaeamt wut, jum-aechon:

—¡Najum-amde! ¿Diachwuajnakolaxkat xamal nejsat mowam wut, mowam ampa-omtat, jum-ampoxtat? —aech Pedro.

Japow jumnot wut, jum-aechow:

—¡Diachdo! Xanal japa-omtat tajsat pamowax —aechow, naekichachajba wut.

⁹ Pedro jum-aech:

—¿Ma-aech xotkat xam, nejmol suapich, kaenejchaxoelaxam naekichachajbaliajwam Espiritu Santo? ¡Chiekal naewe'e! Ampí, fulaeni, japi muthtlisi nejmol. Amwut xambej chaxlaeyaxaeli muthsliajwa —aech Pedro japowliajwa.

¹⁰ Do jawut, Safira patupow jumal Pedro pejwuajnale. Pansiachow len wut, taenlisipow patupow. Do jawutbej, japow chaxfos, naliamuthsliajwas pamal pejmuthxot. Jaxot muthtipow.

¹¹ Puexa naexasiti Jesucristo pejwuajan, asewbej, japox wultaena wut, xabich pejlewlapi Espiritu Santoliajwa.

Apóstoles xabich koechaxan ispox Dios pijaxtat

¹² Apóstoles xabich koechaxan is Dios pijaxtat jiwxot. Puexa naexasiti Jesucristo pejwuajan natameja Dios pejtemplobaxot. Japalel pawul Pórtico de Salomón.

¹³ Asew, naexasis-eli Jesucristo pejwuajan, japi pejlewla natamejalijwa, Jesús pejwuajan naexasiti suapich. Pe Jesucristo pejwuajan naexasiti, xabich jiw sitaens. Samata, naksiyas wut japiliajwa, chimiajamechantat wulnaksiyas.

¹⁴ Xabich asew poejiw, watho'bej, naexasiti Jesús pejwuajan. Japibej kaeyaxtat natamejaful, asew naexasiti suapich, Jesucristo pejwuajan.

¹⁵ Apóstoles fulaeyaxaennuamtadin, asew chajia matabija wut, bu'xaeya batuchanxot juks. Juks wut, owas furbu'tat. Owas nuambabu'tat boejthsliajwas, Pedro fulaen wut. Pedro pejnaselnaxtat xenchax wut, jawut bu'xaeya chiekal boejthuls.

¹⁶ Xabich jiw, asapaklowaxanpijiw, Jerusalén paklowaxxot mox duili, japibej buflaen bu'xaeya Jerusalén paklowax poxadin. Japi bu'xaeya puexa chiekal boejthuls. Buflaensbej dep webaesi pejmatpuatanxot, xabich dep taliachpi. Japi puexa chiekal pachaemlisi Dios pijaxtat.

Apóstoles bu'fospox kastikaliajwas

¹⁷ Sacerdotespaklokolan, pejnachala suapich, japi saduceos, xabich nusasiawali apóstolesliajwa.

¹⁸ Samata, apóstoles jaelas jiw jebatat jeliajwas.

¹⁹ Jiw jebatat jias wuti, japamadoitat Dios pej-ángel pask, japabafafachan fakakaliajwa, apóstoles jukaliajwas jaxot. Japi juks wut, ángel jum-aech apóstolesliajwa:

²⁰ “¡Xabua'de Dios pejtemploba poxade! Dios pejtemploba pa'mach wut, ¡jaxotde jiw naewuajande chimiawuajan, Jesucristo pejwuajan!” —aech Dios pej-ángel.

²¹ Do kandiawa, nalian wut, apóstoles is, me-ama Dios pej-ángel to'as isliajwa. Dios pejtemploba low wut, jaxot tuaduti jiw naewuajnalijwa.

Do jawut, sacerdotespaklokolan, pejiw suapich, wullala natamejalijwa puexa judíos-ancianos, asew paklochowpije. Japi natameja wut, japox pawul Junta Suprema. Do jawux, sacerdotespaklokolan to'a jiw jeba wetpi. To'a wut, jum-aechon: “¡Xabua'de jiw jeba poxade! ¡Apóstoles buflaemni ampale!” —aechon.

²² Dios pejtemploba weti, jiw jeba pa'a wut, apóstoles jaxot ajillisi. Samata, tamach kaxa nawenlisi, paklochow natameja poxadin.

²³ Pat wuti paklochow natamejaxot, jum-aechi:

—Jiw jeba pa'ax wut, chiekal fafaxawaech. Kolenje soldaw fafachanel chiekal wesfulbej. Bafaka' fafatx wut, chinax kaen jiw jebatutat tae-enil —aech Dios pejtemploba weti.

²⁴ Japox jumtaen wut, sacerdotespaklokolan, Dios pejtemploba wetipaklonbej, sacerdotespaklochowbej, nakaewa nawuajnachaemsnap. Najum-aechnap: “¿Ma-aech xotkat japi ajil? ¿Achaxkat kaes jachiyaxael?” —na-aechi nakaewa.

²⁵ Do jawutlejen, aton japixot pat. Japon jum-aech:

—Jiw jebatat jiampi, amwutjel japi jiw naewuajan Dios pejtemplobaxot —aech japon aton.

²⁶ Do jawut, Dios pejtemploba wetipaklon, pejiw suapich, pejme waljaeti apóstoles. Jaelas wut, chamoeyaxtat buflaens. Be-esal, pejlwla xoti jiwliajwa. Dios pejtemploba weti nejchaxoel: “Xatis baes wut apóstoles, jiw xabich palalaxael. Ja-aech wut, jiw xatis nakdadaepaxael ia'tat” —aechi, nejchaxoel wut.

²⁷ Apóstoles buflaens wut, paklochow, Junta Supremapijiw, japi pejuajnalel apóstoles nows. Do jawut, sacerdotespaklokolan jum-aech japiliajwa:

²⁸ —Xamal xabich buxfiatx jiw naewuajnasamatam Jesús pejuwajan. Pe xamal naexasis-emil. Xabich naewuajnam Jerusalén paklowaxpijiw japon pejuwajan. Japon kematamat-laxtat tɔp wut, japox xanal nakelajatom —aech sacerdotespaklokolan apóstolesliajwa.

²⁹ Pedro, aseb apóstoles suapich, jum-aechi:

—Xanal naexasisfulaxaelen Dios tato'apoxan. Jiw nato'a wut asaxan isliajwan, xanal japoxan naexasisaxinil, Dios pijaxana-el wut.

³⁰ Diachwuajnakolax xamal Jesús kematamatlam cruztat japon tɔpaliajwa. Pe Jesús tɔp wut, wajwuajnapijiw pejDios Jesús mat-ech pejme dukaliajwa.

³¹ Jesús amwutjel paklokolan nadofa. Amwutjel ek pax Dios poklalel jiw tato'laliajwa, jiw bu'welialjwabej. Jasox Jesús is judíos chiekal naexasisliajwa Dios, japi babijaxan ispoxan kaelel wepelsliajwasbej.

³² Japawuajan diachwuajnakolax, xanal jiw naewuajnafulaxwuajan. Espíritu Santobej itpaei diachwuajnakolaxpox japawuajan. Dios to'ak Espíritu Santo jiw pejmatpuatanxotaliajwa, japi jiw naexasiti Dios pejjamechan —aech Pedro paklochowliajwa.

³³ Jumtaen wuti Pedro jum-aechpox, puexa paklochow xabich palala. Do jawut, paklochow besiapi apóstoles.

³⁴ Japixot kaen pawul Gamaliel. Japon fariseo-aton, judíos chanaekabɔnanbej. Japon xabich jiw sitaens. Do jawut, Gamaliel nant wut, to'apon Dios pejtemploba weti, japi buflaeliajwa apóstoles batathoetade.

³⁵ Dolisido', apóstoles buflaech wut, Gamaliel jum-aech paklochowliajwa:

—Israelitas, ¡chiekal taem! ¡Majt chiekal nejchaxoelde isaxaelmpox japi poejiwliajwa!

³⁶ ¡Nejchaxoelde chajia ja-aechpox Teudasliajwa! Japon judíospaklonasia. Pin-iakolapon pejnachala, poejiwk'al, fulnanuamtas. Do baxael, japon boesas wut, japon pejnachala puexa dukp. Kaenanula pejlel chiekal nasali. Do baxael, japox chiekal toep.

³⁷ Do japonwɔx, censo is wut, puexa jiw wullelaliajwa wut, Judas, Galilea tuajnuapijin, japonbej xabich pejsoldaw fulnanuamtas nabeliajwa, gobierno pejsoldaw suapich. Pe japonbej boesas. Ja-aech wut, puexa pejnachala kaenanula nasal. Do ja-aech wutbej, japox chiekal toep.

³⁸ Samata, xamal naewuajna xampi apóstoles nakolax tapaeliajwam. Japi pajut pijaxtat naewuajnalap wut, japox asamatkoi chiekal toepaxael.

³⁹ Pe japi naewuajnaful wut Dios pijaxtat, xamal xajupaximil japox toesliajwam. Babijax isam wutbej japiliajwa, ja-am wut, xamal babijax isaxaelam Diosliajwa —aech Gamaliel paklochowliajwa.

Gamaliel japox jum-aech wut, paklochow kaenejchaxoelax.

⁴⁰ Do jawut, paklochow la apóstoles pejme leliajwadin. Low wut, kaenanula seltaslisi. Do jawut, pejme buxfiachpi jiw naewuajnasamata Jesucristo pejuwajan. Do jawutbej, kofaslisi.

⁴¹ Apóstoles nakola wut paklochowxot, xabich nejchachaemili, Dios tapaeis xot nabijasliajwa Jesús pijaxtat.

⁴² Do jawwɔx, pomatkoicha apóstoles naewuajnaful jiw chimiawuajan, Jesucristo pejuwajan. Japajamechan jiw naewuajnafuli Dios pejtemplobaxot, jiw pejbachantatbej.

6

Siete poejiw makanochpox kajachawaesliajwapi apóstoles

¹ Japamatkoiyantat, naexasiti Jesucristo pejuwajan kaes xabichful. Japixot xabich judíos. Aseb naksiyapi hebreojame. Aseb naksiyapi griegojame. Watho', pamaljiw naetɔpspi, aseb japixot xabich kejili. Samata, japi watho' kajachawaesfulas wewe'paspoanliajwa kaematkoisful. Poejiw, naksiyapi griegojame, naba'nalot, aseb poejiw suapich, japi

naksiyapi hebreojame. Nabu'nalot wut, jum-aechi: "Watho', naksiyapi griegojame, kaeswapich chaxduws naxaeyaxan. Me-ama watho', naksiyapi hebreojame, jachi-esal, japi watho' chaxduws wut" —aechi.

² Do jawut, doce apóstoles natameja wut, wullalapi puexa Jesucristo pejuwajan naexasiti, japixot natamejalijwa. Japi pat wut doce apóstolesxot, apóstoles jum-aech:

—Pachaema-el xanal kofalijwan jiw naewuajnapox Dios pejjamechan, xanal naxaeyaxankal chaxduiflialijwan kejila.

³ Samata, xamalxot siete poejiw makano'e, pachaempikal, chiekal matabijtpi, japi kachawaesfulaspi Espiritu Santo! Xanal japi to'axaelen naxaeyaxan sasliajwa kejilalijwa.

⁴ Xanallax Dios kawuajnafulaxaelen. Dios pejjamechan xanal jiw naewuajnafulaxaelenbej —aech apóstoles.

⁵ Apóstoles jum-aechpox puexa jiwliajwa chiekal wepachaems. Samata, puexa chiekal kaenejchaxoelaxpi. Do jawut, makafilisi Esteban. Japon Dios chiekal xanaboejsful. Japon kachawaesfulasbej Espiritu Santo. Makafichbej Felipe, Prócoro, Nicanor, Timón, Parmenas, Nicolásbej. Nicolás Antioquia paklowaxpijin. Japon judíos-atona-el. Japonbej chiekal naexasit Dios. Me-ama judíos, ja-aechon. Naexasitbejpon Jesucristo pejuwajan.

⁶ Do jawut, makanochpi buflaech apóstoles poxade. Apóstoles Dios kawuajan wut, japi keowa makanochpi pejta'antat Dios kachawaesfulalijwas, pejbichaxan isful wuti.

⁷ Do jawux, apóstoles, asewbej, Dios pejjamechan naewuajnafal wut, jiw xabich kaes pejme naexasit. Kaesfulbej Jerusalén paklowaxpijiw naexasisful Jesucristo pejuwajan. Xabich sacerdotesbej naexasit Jesucristo pejuwajan.

Esteban jaeltaspox

⁸ Esteban xabich kachawaechfulas Dios. Dios pijaxtatbej Esteban xajup isliajwa koexaxan. Samata, xabich koexaxan is jiwxot.

⁹ Asew judíos natameja pejnaewuajnapoxot. Japaba pawal Esclavos Libertados. Japanaewuajnapoxot jaxotbej judíos. Japi nabu'nalot, Esteban swapich, asanaewuajnapaxliajwa. Nabu'nalot wut, asew jiwbej nalot. Japi Cirene paklowaxpijiw. Asew Alejandría paklowaxpijiw. Asew Cilicia tuajnapijiw. Asew Asia tuajnapijiwbej.

¹⁰ Esteban naksiya wut, chiekal naksiyapon, Espiritu Santo kachawaech xot. Samata, jiw buxmaliacha-eli Esteban.

¹¹ Ja-aech wut, asew jiw japixot maliach moti asew jiw, japi buxlajlasijwa Esteban. Samata, japi jum-aech: "Xanal diachwuajnakolax jumtaenx, Esteban jum-aech wut babejjamechan Moisésliajwa, Diosliajwabej" —aech japi jiw, buxlajlat wuti Esteban.

¹² Jiw jumtaen wut Esteban buxlajachpox, jawut paklowaxpijiw xabich palala Estebanliajwa. Judíos-ancianos, judíos chanaekabuanapibej, japibej xabich palala Estebanliajwa. Samata, Esteban jaeltas. Do jawut, bu'folipon judíospaklochow poxade, Junta Suprema natameja poxade.

¹³ Paklochow wulwek asew poejiw kaenejchaxoelaxtat buxlajlasijwapi Esteban. Dolisi, kaenejchaxoelax wut, jum-aechlisi Estebanliajwa:

—Xanal jumtaenx, Esteban jum-aech wut babejjamechan Dios pejtemplobaliajwa, Moisés chajia lelpoxlajwabej. Japon chinax buxkofs-el, japoxan jum-aech wut.

¹⁴ Jumtaenxbej, Esteban jum-aech wut: 'Jesús, Nazaret paklowaxpijin, japon toesaxael Dios pejtemploba. Xatis kofaxaesbej wajkabuananpox, Moisés chajia nakwewaeltproxbej' —aech wut Esteban —aechi, buxlajlat wut Esteban.

¹⁵ Judíospaklochow, asewbej jaxot chalaki, japi Esteban taen wut, xabich natachaemapi, Esteban pejxu masoxtat xabich itliak xot. Me-ama Dios pej-ángel pejxu wut, jaxu-aechon.

7

Esteban wuajnaemtas wut, chiekal jumnotpox

¹ Esteban wuajnaemtas wut sacerdotespaklokolan, jumtispon:

—¿Diachwuajnakolaxtat japi jiw jum-aechpox xamliajwa? —aechon Estebanliajwa.

² Do jawut, Esteban jum-aech judíospaklochowliajwa, asew jiwliajwabej: "Takoew, tajpaklochowbej, xan chiekal nanaewe'e! Wajwuajnapijin Abraham majt Mesopotamia tuajnapoxot duk wut, chijiya-el wutfakon Harán paklowax poxade, wajDios, xabich pachaempion, japon natulaelt Abrahamxot.

³ Do jawut, Dios jum-aech Abrahamliajwa: 'iNejiw waelim! iNakoldebej nejtuajnapoxot! iFulaem asatuajnule!! Japatuajnu xan itpaeyaxaelen' —aech Dios Abrahamliajwa.

⁴ Do jawux, Abraham fulaech Caldea tuajnu poxade. (Japatuajnu asawul Mesopotamia.) Abraham fulaech dukalijwa Harán tuajnapoxot. Jaxot duk wut, Abraham pax tɛp. Do jawux, Abraham Dios to'as chijyalijwapon ampatuajnueldin, amwutjel xatis duilstuajnutat.

⁵ Abraham chaxdus-esal ampatuajnu pejtuajnəliajwa. Jəmduchlax, japon tər wət, pamojiw chaxdusliajwas ampatuajnu. Dios japox jum-aech wət, Abraham xijilfukon.

⁶ Dios chajia jum-aechbej Abrahamliajwa: “Namojiw duilaxael asatəajnapijiw pejtuajnəxot. Japatuajnuət esclavos wəlxaeli. Nabist wət, xabich nabichaxaeli japatuajnapijiwliajwa. Jachiyaxaeli cuatrocientos waechan, duil wəti japatuajnuət” —aech Dios Abrahamliajwa.

⁷ Do jawət, jumtisbejpon: ‘Xan kastikaxaelen namojiw tato'laxaespi malech tanbichliajwa. Namojiw nakolaxael wət japatuajnuət, pat wəti ampatuajnuət, xan nakawəjnafəlxaeli nasitəyaxtat’ —tis Abraham, Dios chajia jumtis wəton.

⁸ Abraham Dios keto'as puexa paxi, poejiw, circuncidaliajwa, Dios pejmarkaxliawapi, japox pejkabənanliajwabejpi. Abraham japox is nejchaxoelafəlxaliajwa Dios kajachawaesfulasprox. Samata, Abraham circuncida paxəlan, Isaac, ocho matkoiyan xent wət nalaeltox Dios pejmarkaxliawapon. Do baxael, asamatko, Isaac paxəlan, japon pawəl Jacob, ocho matkoi wət nalaeltox, japonbej circuncidas. Do baxael, Jacob doce paxipon. Japi kaenanəla nalaela wət, japibej circuncidas. Baxael, Jacob paxi docepi, japi pamojiw docemətjepe puexa” —aech Esteban.

⁹ Esteban pejme jum-aech: “Jacob paxi, japi wajwəajnapijiw, japi nusasiawal pakoewan José. Ja-aech wət, japi mowa José asajiwtat José esclavoliajwa, jiw fəlaechpi Egipto təajnu poxade, japixot José mowas. Pe José Dios chalas.

¹⁰ José Egipto təajnuət nabijat wət, Dios chiekal kajachawaesfulas. Dios kajachawaechbej José xabich matabijsliajwa. Samata, faraón, puexa Egipto təajnapijiw tato'lan, xabich nejchachaemil Josəliajwa. Ja-aech wət, faraón wəlduw José paklonaliajwa, puexa Egipto təajnu tataəflaliajwapon, faraón pejbabej tataəflaliajwapon” —aech Esteban.

¹¹ Esteban pejme jum-aech: “José wəlduws wət paklonaliajwa, do jawəx, kaesəapich waechan wət, puexa Egipto təajnapijiw, Canaan təajnapijiwbej, xabich nabijat, naxaeyaxan ajil wət. Wajwəajnapijiw japamatkoitat nabijatbej, naxaeyaxan piach ajil xot.

¹² Japamatkoiyan, majt naxaeyaxan ajila-el wətfək, José nabichow to'a trigobulan tamejalialjwa pin-iawaechantat. Do jawəx, posata xabich naxaeyaxan ajil wət, Jacob wəltəen Egipto təajnuət trigo mowapoxan. Samata, Jacob to'a paxi Egipto təajnu poxade trigo wəajsliajwapi. Do jawət, Jacob paxi fəlaech wət trigo wəajsliajwa, jawət japi matabija-eli José, taen wətipon.

¹³ Do jawəx, pejme fəlaech wət José pakoew trigo wəajsliajwa, jawət José tapaei pakoew matabijsliajwaspon. Ja-aech wət, faraón matabijt José pakoew. Matabijtbejpon acha-aton José.

¹⁴⁻¹⁵ Do jawət, José bəxxato'a pax fəlaeliajwadın, dukaliajwapon Egipto təajnuət. Do jawət, Jacob, paxi səapich, pamojiw səapichbej, puexa japi bəflaenpon Egipto təajnu poxadin. Dolisi, japatuajnu pat wət, jaxot Jacob, paxi səapich, duil. Jawət, puexa xajus wət, setenta y cincopi. Jacob xabich pin-iawaechan duk wət Egipto təajnuət, japatuajnuət təplison. Jacob paxi, wajwəajnapijiwpi, japatuajnuət təpafəl.

¹⁶ Jacob tər wət, chaxfollisipon Siquem paklowax poxade, Abraham chijia wəajtsat poxade. Japasat Hamor paxi mowa Abrahamxot. Jaxotde Jacob məthtas məaxwəajtat” —aech Esteban.

¹⁷ Esteban pejme jum-aech: “Do jawəx, pin-iawaechan wət, Abraham pamojiw xabich pin-ia kola Egipto təajnuət, mox pawəajna wət Dios chajia jumduəpox Abrahamliajwa.

¹⁸ Moxsfəl wət Dios jumduəpox Abrahamliajwa, japamatkoiyan asan rey tato'al puexa Egipto təajnapijiw. Japon rey matabijs-el José chajia ispoxan.

¹⁹ Samata, japon rey babijaxan is wajwəajnapijiwliajwa. Japon pijaxtat wajwəajnapijiw xabich nabijat. Japi paxi, poejiw, nalaela wət, pəlsax keto'as. Beyax weketo'asbejpi, kaes xabichfulasamata.

²⁰ Japamatkoiyan wət, Moisés nalaelt. Japon xabich chimian. Dios nejchachaemil japonliajwa. Moisés pax, pen səapich, tataəflas batat tres juimtelialjwa.

²¹ Do jawət, Moisés chaduch wət mintat, faraón paxəlow chaxti'aliajwa, me-ama paxəlan kolan wət, jachiliajwapow.

²² Samata, Moisés itpaeis Egipto təajnapijiw matabijtəpoxan. Moisés naksiya wət jiwliawə, chiekal naksiyapon. Xajəpbejpon xabich isliajwa” —aech Esteban.

²³ Esteban pejme jum-aech: “Moisés cuarenta waechan wət, nejchaxoelon: ‘Tajjiw, israelitas, taeyaxaelen’ —aechon, nejchaxoel wət.

²⁴ Do jawət, Moisés fəlaech wət, taenon Egipto təajnapijin, israelita-aton xabich selt wət. Samata, Moisés chamamot. Jawət Egipto təajnapijin boesapon.

²⁵ Do jawət, Moisés nejchaxoel: ‘Tajjiw, israelitas, pajut matabijaxael Dios nakajachawaesaxəlpox japi jukaliajwan Egipto təajnuət’ —aech Moisés, nejchaxoel wət. Pe israelitas japox nejchaxoela-ellax, Moisés nejchaxoelpox.

²⁶ Do kandiawa wut, Moisés taen, kolenje israelitas naba wut. Jawut Moisés kefiat wut, jum-aechon: ‘Xamal nakaejiwam nabeliajwam. ¿Ma-aech xotkat nakaewa nabam?’ —aech Moisés.

²⁷ Matxoelatwadutpon nabeyax, japon fiasaba Moisés. Do jawut, jum-aechon Moisésliajwa: ‘¿Achankat xam wuldudw taspaklonaliajwam? ¿Achankat xam wuldudwbej tajjueznamliajwa, xanal babijax isx wut natasalaliajwam?’

²⁸ ¿Xanbejkat wulnaboesam? ¿Me-ama kaeliw Egipto tujajnu pijin boesam, jachisiamkat xanliajwa?’ —aechon matxoelatwadutpon nabeyax Moisésliajwa.

²⁹ Moisés japox jumtaen wut, najaeton atuuaj Madián tujajnu poxade. Jaxotde Moisés dukon. Dolison, japatujajnu xot pawis fit. Do jawux, Moisés kolenje paxulan” —aech Esteban.

³⁰ Esteban pejme jum-aech: “Moisés cuarenta waechan duk wut Madián tujajnu xot, asamatkoi, pajilaxxot mox laeja wut pinamuaxxot, pawulxot Sinaí, jaxotde naech tamdadut. Jawut Dios, me-ama ángel, jitat natulaelt.

³¹ Moisés japox taen wut, chiekal natachaemton. Kaes mox chiekal falaech wut, Dios jum-aech naechxotdin Moisés jumtaeliajwa.

³² Jum-aechon: ‘Xanlap nejwujajnapijiw pejDiosnan. Abraham, Isaac, Jacobbej, xan japi pejDiosnan’ —aech Dios Moisés jumtaeliajwa. Do jawut, Moisés xabich tathual pejlwut. Samata, kaes natachaems-elon.

³³ Do jawut, Dios jum-aech Moisésliajwa: ‘Jolde nejtuakxajoelax, tajwujajnalel nukam xot!’

³⁴ Xan taenx tajjiw, israelitas, Egipto tujajnu xot xabich nabijat wut. Jumtaenxbej japi pejnoeyaxan. Samata, xamxot paskax japi jukaliajwan Egipto tujajnu xot. ¡Xabua’t! ¡Kaes moxmim xanle! Xam to’axaelen Egipto tujajnu poxade’ —aech Dios Moisésliajwa” —aech Esteban.

³⁵ Esteban pejme jum-aech: “Moisés nejweslas xot, israelitas jum-aechi Moisésliajwa: ‘¿Achankat xam wuldudw taspaklonaliajwam? ¿Achankat xam wuldudwbej tajjueznamliajwa, xanal babijax isx wut natasalaliajwam?’ —aechi Moisésliajwa. Jatis wut Moisésliajwa, Dios, me-ama ángel natulaelt wut naech tamdadutxot, Moisés nakiowa to’as Dios Egipto tujajnu poxaliajwade, israelitas pejpaklonaliajwapon, japi jukaliajwabejpon Egipto tujajnu xot.

³⁶ Do jawux, Moisés juk wajwujajnapijiw Egipto tujajnu xot. Koechaxan isbejpon Dios pijaxtat Egipto tujajnu xot, Mar Rojoxotbej. Pajilaxtatbej duil wuti cuarenta waechan, jaxotbej Moisés koechaxan is Dios pijaxtat.

³⁷ Moisés chajia jum-aech israelitasliajwa, Dios buxo’t’as wuton: ‘Me-ama Dios xan nato’a, jachiyaxaesbej kaen xamalxot asamatkoi. Japon Dios to’axaes profetaliajwa’ —aech Moisés Dios pijaxtat, chajia jum-aech wuton Cristoliajwa.

³⁸ Moisés, wajwujajnapijiw suapich, chajiakolaxtat natameja pajilaxxot, pinamuax, Sinaímuaxxot. Do jawut, Moisés julach japamuax matwujajase. Jaxotse Dios pajut jum-aech, ángeltat, Moisés jumtaeliajwa. Do jawux, Moisés naewujajnan wajwujajnapijiw Dios jum-aechpoxan, japi naexasisliajwa, amwutjel xatisbej naexasisliajwas” —aech Esteban.

³⁹ Esteban pejme jum-aech: “Wajwujajnapijiw kaxa nawesia Egipto tujajnu poxade, japi nejwesla xot Moisés. Naexasisfula-elbejpi Moisés jum-aechpox.

⁴⁰ Moisés asalel wut, wajwujajnapijiw jum-aech Aarónliajwa: ‘Ísde ídolos, japi, me-ama wajdioses nakchawujajnamatxoelaliajwa, xatis fos wut! Matabija-esal Moisésliajwa ja-aechpox, japon nakjukpon Egipto tujajnu xot’ —aech wajwujajnapijiw Aarónliajwa.

⁴¹ Do jawut, Aarón, japi suapich, ispon ídolo, me-ama pakxulax. Do jawut, choef xua’ati japox ídololiajwa. Me-ama Dioskolan pej-ofrendaliajwa wut, ja-aechi. Do jawux, fiesta ispi sitaeliajwapi ídolo, pajut ispox.

⁴² Samata, jawut Dios nadijan wajwujajnapijiw xot. Dios tapaeis japi kawujajnalapaliajwa ithaej. Japoxliajwa profeta chajia lel Dios jum-aechpox:

‘Xamal israelitas, pajilaxxot xamal laelpam wut cuarenta waechan, choef xua’asfulam ofrenda isliajwam. Pe japa-ofrenda xanliajwa-el.

⁴³ Xamallax xananuamtam ídolo pejbach, kawujajnalialjwam japabachtat. Kaeyax nej-ídolo japox nejdios, pawul Moloc. Asax nej-ídolo pawul Refán. Japoxan najut isampoxan, kawujajnalialjwam. Samata, tapaejaxaelen asajiw xamal buflaeliajwa atuuaj, Babilonia paklowax kaes pejme atuuaj poxade’ —aech Dios jum-aechpox profeta chajia lel xot” —aech Esteban.

⁴⁴ Esteban pejme jum-aech: “Wajwujajnapijiw duil wut pajilaxxot, xananuamtí Dios pejba, Dios kawujajnalialjwa japabatat. Japaba choefbu’ba. Moisés matxoela itpaeis Dios, japaba isliajwa wut, makechiyaxaelon. Do jawux, Moisés keto’a wajwujajnapijiw japaba isliajwa. Dolisi, japaba islisi. Me-ama Dios keto’as Moisés isliajwa japaba, islisi japoxtat.

⁴⁵ Do baxael, wajwujajnapijiw puexa pajilaxxot tupaful wut, namaefulpi, japiwich naliaxa japaba xananuamtisliajwa. Do jawux, Josué wajwujajnapijiw buflaen wut amptuajnu xot duilaliajwa, japababej xapati. Japamatkoiyantat Dios pejkajachawaesaxtat

wajwajnapijiw kefe'kafal wujna duili pejsatan. Do baxael, rey David Israel tujnapijiw tato'al wut, japabafuk nakiowa.

⁴⁶ Dios xabich nejchachaemil Davidliajwa. David xabich isasia Dios pejtemploba, israelitas Dios kawujnalijawa japatemplobat.

⁴⁷ Pe Dios ketapae-el David isliajwa Dios pejtemploba. Dioslax keto'a David paxulan, pawlpon Salomón, japon isliajwa Dios pejtemploba.

⁴⁸ Dios kaes pejme paklokolan. Japon duk athuxotse. Duka-elon jiw is bachantat. Japoxan profeta chajia lel, Dios jum-aech wut:

⁴⁹⁻⁵⁰ 'Xan tato'lax puexa athuxotse, ampathatatbej. Xan nawewe'pa-el tajba damlathulalijwan, xan tajut puexa isx xot. Samata, ¿achabakat nawe-isaxaelam?' —aech Dios, profeta lelxot' —aech Esteban.

⁵¹ Esteban pejme jum-aech: "¡Xamal matnaetinkam! Samata, Dios tato'alpox pomatkoicha naexasis-emil. Xamal nejxasinka-emil Dios pejjamechan jumtaelijwam, naexasisliawambej. Espíritu Santo tato'alpox naexasis-emil pomatkoicha. Samata, xamal najupam, nejwajnapijiw, suapich.

⁵² Nejwajnapijiw babijaxan is puexa profetasliajwa. Japibej beful profetas, chapaefuli Cristo pasaxaelpox, xabich pachaempon. Do baxael, Cristo pajut pat wut, xamal asajiwxot wiatam japon kematamatlialijwas cruztat tupalijwa.

⁵³ Moisés to'as ángeles japon lelialijwa Dios pejtato'laxan jiw naexasisliajwa japoxan jum-aechpoxan. Pe xamal japoxanbej naexasis-emil' —aech Esteban judiospaklochowliajwa, asew judiosliawabej.

Esteban ia'tat dadaps wut, matkaejabaspox

⁵⁴ Judiospaklochow, asew judios suapich, jumtaen wut, puexa Esteban jum-aechpoxan, xabich palalapi. Palala xot, xabich bua'tatiti.

⁵⁵ Esteban Espíritu Santo pejkajachawaesaxtat athu natachaemse wut, taenon Dios pej-itliakax. Jawut taenbejpon Jesús, nuk wut Dios poklalel.

⁵⁶ Do jawut, Esteban jum-aech:

—¡Tae'nik! Taenx Diosxotse nafafasepox. Taenxbej Jesús, puexa jiw pakoewkolan, nuk wut Dios poklalel —aech Esteban.

⁵⁷ Judiospaklochow, asewbej japixoti, pajut naekuantakuka kaes naewes-elalijwapi Esteban jum-aechpoxan. Do jawut, japi xabich pinjametat nejlat. Nejlat wut, puexa jiw itadukpas Esteban jaelsliajwas.

⁵⁸ Paklowaxxot juch wut, ia'tat dadaepaxaeli, japi jol pejsumtanaxoe. Pansian, pawlpon Saulo, japonxot owapi pejsumtanaxoe, japoxan japon tataeflialijwa. Do jawux, Esteban ia'tat dadaps.

⁵⁹ Esteban ia'tat dadaps wut, kawujjanpon Jesús. Kawujjan wut, jum-aechon: "Tajpaklon Jesús, ¡taj-ael nawebflaem xam poxase!" —aech Esteban.

⁶⁰ Do jawut, brixtat nuk wut, pinjametat jum-aechon: "Tajpaklon, ¡ampi jiw xam nabej kastike', is xoti ampababijax xanliajwa!" —aech Esteban. Japox jum-aech wut, Esteban tujlison.

8

Saulo wulwekafupox jaelalijwa Jesucristo pejwujjan naexasiti

¹ Esteban matkaejbas wut, Saulo xabich nejchachaemil. Samata, nejchaxoel wut, jum-aechon: "Xabich pachaemdo', Esteban tuj wut" —aechon, nejchaxoel wut.

² Pe Jesucristo pejwujjan naexasiti xabich wunowpi Esteban tujpoxliajwa. Asew poejiwxot, xabich pachaempi Diosliajwa, japi Esteban wuth. Xabich wunowbejpi.

³ Do jawut, judiospaklochow tuaduti wulwekax jaelalijwa Jesucristo pejwujjan naexasiti Jerusalén paklowaxxot, japi kastikalijwas. Saulobej wulwekaful naexasiti Jesucristo pejwujjan. Bachan lalowpon jaelalijwa poejiw, watho'bej. Jaela wut, buflaechon jiw jeba poxade. Samata, Jesucristo pejwujjan naexasiti dukp asapaklowaxanlel, asatujnuchanlelbej. Asew japixot dukp asapaklowaxan poxade Judea tujjuxot. Asew japixot dukpbej Samaria tujjnu poxade. Apóstoleslax dukpa-el. Japi nakiowa kaweta duil Jerusalén paklowaxxot.

Jesucristo pejwujjan naexasiti naewujjanpox Samaria tujjnupejiw

⁴ Jerusalén paklowaxxot dukpi, japi pat wut asapaklowaxanxot, japapaklowaxanpijw naewujjanpi chimiawujjan, Jesucristo pejwujjan. Jasox ja-aechi jiw naexasisliajwa, Dios bu'welialijwasbejpi.

⁵ Dukpixon kaen, najaeton kaepaklowax, pinjiyax, poxade, Samaria tujjnu poxade. Japon pawul Felipe. Japapaklowaxxotde wuton, japapaklowaxpijw naewujjanpon Jesucristo pejwujjan.

⁶ Japi jiw natameja wut, puexa chiekal naeweti Felipe naewuajanpox. Japi taenbej, Felipe is wut koechaxan Dios pijaxtat.

⁷ Xabich jiw, dep webaespi pejmatpuatanxot, japi Felipe boejthut Dios pijaxtat. Samata, dep nakola wut jiw pejmatpuatanxot, pinjаметat na-oe'bala. Xabich nabejkipibej, japi chiekal laelp. Asew jiw, laelpaxilpibej, japi puexa chiekal boejthuch.

⁸ Samata, japapaklowaxpijiw xabich nejchachaemil.

⁹ Japapaklowaxxot aton duk. Japon pawal Simón. Japon pinjoe'an. Xabich jiw naekichachajbapon pinjoe'axtat. Jum-aechfulon, jiw naekichachajba wut: "Xan xajux jiw boejthusliajwan. Kaes asan ajil, me-ama xan jason" —aechfulon.

¹⁰ Puexa jiw, japi jiw kejilpi, kemaenkibej, chiekal naewechpon. Japon jiw naewech wut, jiw jum-aech Simónliajwa: "Simón Dios kajachawaech xot, xajux japoxan isliajwa" —aechi.

¹¹ Japi jiw japon naexasisfulas, pinjoe'axtat pomatkoicha jiw naekichachajba xot.

¹² Pelax Felipe naewuajan Dios pejjamechan, Dios puexa pejiw tato'laxaelwuajan. Naewuajanbejpon chimiawuajan, Jesucristo pejwuajan. Jiw naexasit wut Felipe naewuajanpox, japi bautisas, poejiw, watho'bej.

¹³ Do jawut, Simón, me-ama diachwuajnakolax Jesucristo pejwuajan naexasit wut, ja-aechon. Do jawut, japonbej bautisas. Jawut Felipe pejnachalan nadofapon. Felipe koechaxan isful wut Dios pijaxtat, Simón japoxan taen wut, xabich nejchaxoelon.

¹⁴ Apóstoles, Jerusalén paklowax xoti, wultaen wut, Samaria tuajnapijiw chiekal naewetox Dios pejjamechan, japi apóstoles to'api Pedro, Juan suapich, taeliajwapi Samaria tuajnapijiw, naexasiti Jesucristo pejwuajan.

¹⁵⁻¹⁶ Pedro, Juan suapich, pat wut Samaria tuajnxot, Espiritu Santo pas-elsikfuk japi pejmatpuatanxot. Jesucristo pejwultatkal bautisas. Samata, Pedro Dios kawuajan, Juan suapich, Espiritu Santo pasliajwa japi pejmatpuatanxotsik.

¹⁷ Dios kawuajan wuti, ke-owapi jelnaexasiti pejta'antat. Do jawut, Espiritu Santo pask japi pejmatpuatanxotsik.

¹⁸⁻¹⁹ Simón japox taen wut, jum-aechon apóstolesliajwa:

—iNejpamamax xan naduajde xanbej koechaxan isliajwan! Xamal mosaxaelen platatat, xanbej ke-otx wut asew jiw pejta'antat pasliajwasik Espiritu Santo japi pejmatpuatanxot —aech Simón.

²⁰ Do jawut, Pedro jumnot wut, jum-aechon Simónliajwa:

—Xam jumch nejchaxoelam wuajsliajwam platatat, Dios malech nachaxdutpox. Samata, Dios fo'axael xam inferno poxadik. iNej nafa'e'bej nejew plata!

²¹ Xam nabichaximil Dios pejbichax, nejnejchaxoelax chiekal pachaema-el xot Diosliajwa.

²² iKofde japababejnechaxoelax! iDios xabich kawuajande xam beltaeliajwa nejchaxoelampoxliajwa, xam kastika-elaliajwa Dios!

²³ Xan matabijtax xam xabich nusasiawlam Jesucristo pejwuajan naexasitiliajwa. Babi-jax xam tapae-el isliajwam pachaempoxan. Samata, babijaxtat xam, me-ama asan aton matak wut, ja-am. Jasoxtat isaximil pachaempoxan —aech Pedro Simónliajwa.

²⁴ Simón jumnot wut, jum-aechon Pedroliajwa:

—iDios nawekawuajande xam najum-ampox jachisamata xanliajwa! —aechon Pedroliajwa.

²⁵ Do jawux, Pedro, Juan suapich, japi chapaei taenpoxan, majt Jesús ispoxan. Do jawux, japi naewuajanbej jiw Dios pejjamechan. Do jawuxbej, asapaklowaxanxot, Samaria tuajnxot, naewuajanpi chimiawuajan, Jesucristo pejwuajan. Do jawux, Pedro, Juan suapich, kaxa nawech Jerusalén paklowax poxade.

Felipe bautisapox Etiopía tuajnapijin

²⁶ Do jawux, Dios pej-angel pask Felipepox. Pask wut, jum-aechon Felipejwa: "iThilde! iXabua'de surlel japot nuamt, Jerusalén paklowaxxot falaechpot Gaza paklowax poxaliajwade!" —aech angel. Japot nuamt xende pajilax poxakal.

²⁷ Do jawut, Felipe thilt wut, falaechlison. Japanuamtat wut, Felipe taen Etiopía tuajnapijin. Japon plata tataeflan. Etiopía tuajnapijiwpaklokolow pejew plata puexa tataefulpon. Japon majt Jerusalén paklowax poxade Dios pejtemplobatat Dios kawuajnalijwa.

²⁸ Nawia'an wuton pejtujnu poxade, Etiopía tuajnapijin xaljoeful carrozatutat profeta Isaías chajia lelpox.

²⁹ Felipe japon taen wut, jawut Espiritu Santo to'ason. Espiritu Santo jum-aech: "iXabua'de! iMox pa'mich japacarrozal!" —aech Espiritu Santo.

³⁰ Felipe moxde wut, jumtaenlison, Etiopía tuajnapijin xaljoeful wut Isaías chajia lelpox. Do jawut, Felipe kawuajnaechaemt wut, jum-aechon:

—¿Xamkat xaljowampox jummatibijtam? —aechon.

³¹ Etiopía tuajnupijin jumnot wut, jum-aechon:

—¿Machiyaxaelamkat xan chiekal jummatibijsliajwan, asan aton ajil wut xan chiekal nachanaekabuanaliajwa? —aechon.

Do jawut, Etiopía tuajnupijin tadut Felipe julaliajwa japon pejcarrozatat kaeyaxtat chalakaliajwapi.

³² Etiopía tuajnupijin xaljow Jesúsliajwa chajia jum-aechox:

“Japon buflaeyaxaes boesaliajwas. Me-ama oveja bu'fos xua'asba poxade, jachiyaxaeson. Japon boejlachaxaelbej, bu'fos wut. Me-ama ovejas boejlach nuil, bu'latasiaplapi pejwuajnalel wut, jachiyaxaelbej japon.

³³ Nabijasaxaelon, babijax is-elpon kastikaxaes wut.

Paxi ajil xot, japi pejwuajan, pamojiwbej pejwuajan, ajilaxael. Jachiyaxaeson, boesaxaes xot” —aech Etiopía tuajnupijin, xaljow wut Isaías chajia lelpox Jesúsliajwa.

³⁴ Do jawut, Etiopía tuajnupijin wuajnaemnt wut, jum-aechon Felipeliajwa:

—¡Najum-amde! Ampox profeta lelox, ¿achanliajwakat jum-aechox? ¿Pajutliajwakat jum-aechon? O, ¿asanliajwakat jum-aechon? —aech Etiopía tuajnupijin.

³⁵ Do jawut, Felipe chiekal chanaekabwana Isaías chajia jum-aechpox Jesúsliajwa. Jawutbej chiekal chanaekabwanapon chimiawuajan, Jesucristo pejwuajan.

³⁶ Do jawut, kaes chaflaech wut, carrozzatat xensliajwa wut minxot, jawut Etiopía tuajnupijin jum-aech:

—Ama min. ¿Pachaemkat xan nabautisaliajwam? —aechon.

[

³⁷ Felipe jumnot wut, jum-aechon:

—Xam chiekal naexasitam wut Jesucristo pejwuajan, pachaem xam bautisaliajwan —aech Felipe.

Etiopía tuajnupijin jumnot wut, jum-aechon:

—Xan chiekal naexasitx diachwuajnakolax Jesucristo Dios paxulan —aechon.]

³⁸ Do jawut, Etiopía tuajnupijin keto'a pamakan japon frenaliajwa kawaei. Carroza okjaba wut, japi nana carrozaxot. Fulaechlisi minade. Do jawut, Felipe bautisa Etiopía tuajnupijin.

³⁹ Minwax, pat jul wut, Felipe masoxtat naxaelcha, Espíritu Santo bu'fos xoton. Etiopía tuajnupijin kaes tae-el Felipe. Dolisdo', Etiopía tuajnupijin chaflaech pejtuaajna poxade. Pejba pa'a wut, xabich nejchachaemilon.

⁴⁰ Felipe, Espíritu Santo bu'fos wut, buflaechpon Azoto paklowax poxade. Japaklowaxxot wuton, Felipe asapaklowaxanlel mathunafal naewuajnafulaliajwa chimiawuajan, Jesucristo pejwuajan. Cesarea paklowaxxot pat wut, jaxotde Felipe naman.

9

Saulo naexasitpox Jesucristo

(Hch 22.6-16; 26.12-18)

¹ Saulo buxkofs-el thiyafalpox Jesucristo pejwuajan naexasiti. Samata, fulaechon sacerdotspaklokolan poxade.

² Sacerdotspaklokolanxot, Saulo jum-aech: “¡Naweelde kaeswapich carta xan xalaeliajwan Damasco paklowax poxade, kaenanala judíos naewuajnaabachan tataefulpi itpaeliajwan japacartan! ¡Japacartantat nato'im xan jaxotde jaelaliajwan naexasiti Jesucristo pejwuajan, poejiw, watho'bej! Japi jaelax wut, ampalel, Jerusalén paklowaxleldin, buflaeyaxaelen jiw jebatat jeliajwas” —aech Saulo sacerdotspaklokolanliajwa.

³ Do jawut, japacartan welels wut, xalaechon Damasco paklowax poxade. Japapaklowax mox wut, chalechkal xabich itliakjala athusik japonxot.

⁴ Itliakjala wut, Saulo juwal satadik. Jawut jumtaenlison athusik jumtiskaspox. Juntison:

—Saulo, Saulo, ¿ma-aech xotkat xan nachakifolam? —tison.

⁵ Saulo wuajnaemnt wut, jum-aechon:

—Tajpaklon, ¿achanamkat xam? —aechon.

Jumnoch wut, jumtispon:

—Xan Jesús, xam nachakifolamponan.

⁶ ¡Nandel! ¡Fulaemch Damasco paklowax poxade! Jaxotde asan aton xam jumchiyaxael isaxaelampoxliajwa —tis Saulo.

⁷ Saulo swapich, foli, japox xabich beljatas. Aton pejjamekal jumtaenpi. Pe chinax tae-eli aton, naksiyapon.

⁸ Saulo nant wut, natachaemnt wut, tae-elon, itliakal xot. Tae-el xot, asew jiw makxafoson Damasco paklowax poxade.

⁹ Jaxotde pa'a wut, tres matkoi tae-elon. Jawut chinax naxae-elbejpon. Fe-elbejpon min.

¹⁰ Damasco paklowaxxot duk aton. Japon pawal Ananías. Japon chiekal naexasit Jesucristo pejwajaan. Ananías masoxtat jumtaen Jesús pejjame. Jawut Jesús jum-aech Ananíasliajwa:

—¡Ananías! —aechon.

Ananías jumnot wut, jum-aechon:

—Tajpaklon, xan ama amxotx —aechon.

¹¹ Jesús jum-aech:

—¡Nande! ¡Xabua'de paklowaxlelde, pawullel Matnochthialax! Japathialaxxotde, jaxotde Judas pejbaxot wuajnaemsaaxaelam: '¿Amxotkatlap Saulo duk, Tarso paklowaxpijin?' —chiyaxaelam, wuajnaemtam wut. Amwatjel Saulo Dios kawajaan.

¹² Dios kawajaan wut, masoxtat xam taenpon. Taenbejpon, xam patampox japon dukxot. Taenbejpon, xam ke-otam wut japon pejta'tat. Do jawut, pejme chiekal taenpon —aech Jesús Ananíasliajwa.

¹³ Ananías japox jumtaen wut Jesús jum-aechpox, jawut jum-aechon:

—Tajpaklon, xabich jiw nachapaei Sauloliajwa. Wultaenxbejpon xabich babijaxan ispox xam nejwajaan naexasitiliajwa Jerusalén paklowaxxot.

¹⁴ Japon ampalel to'anas sacerdotespaklochow, puexa xam nejwajaan naexasiti jaelaliajwa, buflaeliajwabejpon jiw jeba poxade —aech Ananías Sauloliajwa.

¹⁵ Pe Jesús jum-aech:

—¡Xabua'de! ¡Wulwekde Saulo! Xan japon makafitx tajwajaan naewuajnafulaliajwapon asajiw asatwajnaemtanpijw, japi pejreyesbej, Israel tuajnapijwbej.

¹⁶ Xan tajaxtat Saulo xabich nabijasaxael, naewuajan wuton tajwajaan judíos-eli —aech Jesús Ananíasliajwa.

¹⁷ Do jawut, Ananías fulaech Saulo duk poxade. Jaxot pa'a wut, ba lowpon. Jawut, ke-ot wut Saulo pejta'tat, jum-aechon:

—Takoewan Saulo, wajpaklon Jesús, japon taenampon, jumtaenamponbej, fulaeman wut naamtat, japon xan nato'a pasliajwan xamxot. Jasoxtat Jesús nato'a xam pejme chiekal taeliajwam, Espíritu Santo xam kajachawaesfulaliajwabej —aech Ananías Sauloliajwa.

¹⁸ Do jawut, Saulo pej-iftutxot koloeyax wejops, me-ama baxibok, jasox. Do jawut, Saulo pejme chiekal taen. Nant wut, bautisaslison.

¹⁹ Do jawut, xael wut, pejme chiekal pachaemlison. Jawut Damasco paklowaxxot Saulo dukfuk, naexasiti Jesucristo pejwajaan suapich, kaematkoijan suapichliajwa.

Saulo naewuajanpox Jesucristo pejwajaan Damasco paklowaxpijw

²⁰ Saulo tuadut naewuajnalialiajwa Jesucristo pejwajaan judíos naewuajnaembaemxot. Naewuajan wut, jum-aechon: “Jesús diachwajnakolax Dios paxulan” —aechon.

²¹ Japi jiw japox jumtaen wut, xabich natachaemapi. Nakaewa najum-aechi:

—Saulo majt Jerusalén paklowaxxot chakifol jaelaliajwa naexasiti Jesucristo pejwajaan. Japon chakifulaen amxot naexasiti Jesucristo pejwajaan jaelaliajwa, sacerdotespaklochowxot woeyaliajwa Jerusalén paklowaxxot —na-aech jiw nakaewa.

²² Saulo jiw naewuajan wut Jesucristo pejwajaan, pejlwla-elon naewuajan wut. Chiekal naewuajanbejpon Jesús diachwajnakolax Dios to'aspon jiw bu'weliajwa. Judíos, japi duili Damasco paklowaxxot, xajupa-el buxmalechaliajwapi Saulo naewuajanpox.

Saulo wiapox judíosxot

²³ Do jawux, pin-iamatkoijan wut, Damasco paklowaxxot judíos nejchaxoel boesaliajwapi Saulo.

²⁴ Pomatkoicha, pomadoichabej, Saulo wawech jiw nakakolaxot paklowaxxot boesaliajwas. Japapaklowax tathoetlel ia'kal chaxxajajials. Japox xabich da'nik. Xabich athubejpon. Saulo jumtaen jiw isaxaespon japonliajwa.

²⁵ Madoi wut, Saulo pejnachala chakakofnas canastatat xajajialslelsik tathoetlel. Jatis wut, Saulo wia.

Saulo apóstolesxotpox Jerusalén paklowaxxot

²⁶ Saulo Jerusalén paklowaxxot pat wut, naknatamejasiapon, naexasiti Jesucristo pejwajaan suapich. Pe japi asbuan jumch pejlwla japonliajwa. Jumch nejchaxoeli japonliajwa: “Saulo bej najiamjebej Jesucristo pejwajaan naexasitpox” —aechi Sauloliajwa, nejchaxoel wut.

²⁷ Pe nakiowa, Bernabé pejlwla-el Sauloliajwa. Samata, buflaechon Saulo apóstoles poxade, japon chiekal matabijsliajwas apóstoles. Bernabé bu'pat wut Saulo apóstolesxot, jawut jum-aechon japijajwa: “Saulo naamtat fol wut, taenon Jesús. Jumtaenbejpon, Jesús

jum-aech wut japonliajwa. Do jawux, Saulo Damasco paklowaxxot xabich pejlwla-el, naewuajnaful wuton jiw Jesucristo pejwujajan” —aech Bernabé.

²⁸ Do ja-aech wut, Saulo naman apóstolesxot dukaliajwa Jerusalén paklowaxxot. Nanuamtbejpon, japi suapich. Saulo naewuajjan wut jiw Jesucristo pejwujajan, xabich pejlwla-elon.

²⁹ Saulo nospaei wut judíos suapich, japi naksiyapi griegojame, nabunlotbejpon japon naewuajanpoxliajwa. Samata, japi Saulo boesax nejchaxoel.

³⁰ Asew Jesús pejwujajan naexasiti, jumtaen wuti Saulo boesaxaespo, japi buflaech Saulo Cesarea paklowaxxot. Jaxotde barkam duk fulaeyaxaelpox Tarso paklowaxxot. Japabarkamat Saulo to'as.

³¹ Do jawux, Jesús pejwujajan naexasiti, Judea tuajnujijiw, Galilea tuajnujijiwbej, Samaria tuajnujijiwbej, chiekal duil wujajanxilaxtat, kaes chakifulae-esal xot. Japi kaes Dios xanaboejaful kajachawaesfulaliajwas. Japibej isful Dios nejxasinkpoxan. Do ja-aech wut, kaes xabichful naexasiti Jesucristo pejwujajan, Espiritu Santo kajachawaesfulas xot.

Pedro boeithutpox Jesucristo pijaxtat pawulpon Eneas

³² Pedro mathun paklowaxan taeliajwapon naexasiti Jesucristo pejwujajan. Jawut fulaechbejpon Lida paklowaxxot.

³³ Jaxotde taenon aton. Japon pawul Eneas. Japon nabejkpox, ocho waechanlisox. Laejaxil xot, okon furbu'tat.

³⁴ Do jawut, Pedro jum-aech japonliajwa:

—Eneas, Jesucristo xam boeithusaxael. ¡Nande! ¡Najut nefurbu' chaemde! —aech Pedro.

Do jawut, Eneas nancha, chiekal boeithuls xoton.

³⁵ Puexa jaxot duili, Lida paklowaxpijw, Sarón tuajnujijiwbej, taeni majt nabejkpon, pachem wutlison. Do jawut, puexa japi naexasit Jesucristo pejwujajan. Do jawutbej, japi jiw kofa padujnejchaxoelaxan.

Dorcas tup wut, Dios mat-echpox pejme dukaliajwa

³⁶ Jope paklowaxxot pawis duk. Naexasitow Jesucristo pejwujajan. Japow pawul Tabita. Tabita —aech wut, griegojemetat, Dorcas —chiyaxael. Japow pomatkoicha is pachaempoxan asew jiwliajwa. Jiw kejila kajachawaetbejpow.

³⁷ Pedro Lida paklowaxxot wut, Dorcas bu'xaenk. Bu'xaenk wut, tupow. Dorcas tup wut, pejiw bu'kiachpow, me-ama japi pejkaban. Do jawux, athu piezaxxotse osas.

³⁸ Jope paklowaxxot Lida paklowaxxot. Pedro japapaklowaxxot. Naexasiti Jesucristo pejwujajan, japi wultaen Pedro Jope paklowaxxotpox. Samata, japixot kolenje to'as, japi wuljaesliajwa Pedro. Pa'a wuti Pedroxot, jum-aechi: “¡Xabua't! ¡Nabej nejthisle' Jope paklowaxxot xanal nakfulaeliajwam!” —aechi.

³⁹ Do jawut, Pedro nakfulaechlison japi. Pedro pa'a wut, bu'julachaspow patupow osas poxase. Jaxotse watho', pamaljiw naetupspi. Japi watho' xabich wanow Dorcas. Pedro low wut japapiezaxxot, japi watho' masajiachpon. Japi watho' itpaei Dorcas chaxduwspoxan, chabu'athowspoxanbej, japow tupa-el wut.

⁴⁰ Do jawut, Pedro puexa japi jiw nakolax to'a. Nakola wut, Pedro brixtat nuk Dios kawuajnalijwa. Jawut, Pedro patupow natachaemt wut, jum-aechon:

—Tabita, ¡najut mat-e'e! —aech Pedro.

Do jawut, patupow natachaemcha. Taen wutow Pedro, do jawut, pajut mat-etbejpow.

⁴¹ Pedro japow makafit nansliajwa. Do jawut, japow nant. Jawut Pedro la naexasiti Jesucristo pejwujajan, watho' pamal naetupspibej, itpaeliajwapon Dorcas mat-echpox pejme dukaliajwa.

⁴² Puexa Jope paklowaxpijw japox wultaena. Samata, japixot xabich jiw naexasit Jesucristo pejwujajan.

⁴³ Pedro namanfuk pin-iamatkoijan Jope paklowaxxot. Pedro duk Simón pejbatat. Japon Simón pakbu'an chaemsan.

10

Pedro naewuajanpox Cornelio pejbatat

¹ Cornelio duk Cesarea paklowaxxot. Japon soldawpaklon. “Batallón Italiano” —tis japamutpijw soldaw, japi Italia tuajnujijiw xot.

² Cornelio xabich pachaempon. Japon pijow, paxi, pamakjiw suapich, japi Dios naexasit. Jikajachawaeton judíos, japi kejilpi. Japon pomatkoicha Dios kawuajan.

³ Asamatkoi, a las tres wutlejen, Cornelio masoxtat taen Dios pej-ángel, pask wut japon pejbaxot. Do jawut, ángel jum-aech Cornelioliajwa:

—¡Cornelio! —aechon.

⁴ Cornelio taen Dios pej-ánel. Do jawut, xabich pejlowlapon. Jawutbej, wuajna chaemt wut, jum-aechon:

—¿Achaxasiamkat? —aech Cornelio.

Ánel jumnot wut, jum-aechon:

—Xam kawuajnaprox Dios jumtaen. Dios nejchachaemil xamliajwa, kajachawaesfulam xot kejila.

⁵ ¡Ma amwut, asew xamxot to'im Jope paklowax poxade japi wuljaesliajwa Simón! Japon asawul Pedro.

⁶ Simón duk pejwulxoelan pejbatat, pakbu'an chaemsan pejbatat. Japon pejba ek marbabu'tat —aech ánel.

⁷ Ánel japox buxtoet wut, athu poxasepon nawiaese. Do jawut, Cornelio kolenje pamakan lapon. Labejpon kaen soldawan. Japon soldawan naexasitbej Dios. Japon soldawan chiekal isbejpon, Cornelio to'a wut.

⁸ Dolisdo', japi pa'an wut Cornelioxot, Cornelio japi chapaei puexa ánel jumtispon. Do jawut, japi to'apon Jope paklowax poxade, wuljaesliajwapi Pedro.

⁹ Kandiawa, juimt matnoch ek wut, japi mox fulaen wut Jope paklowax pasliajwa, japi wuajna, Pedro julach ba matwuajase, najapnax poxase, Dios kawuajnalijwa.

¹⁰ Jawut Pedro litaxaela. Naxaeyax toejafa-elfak japonliajwa. Do jawut, Pedro masoxtat taen, Dios kawuajan wut.

¹¹ Taenon athu fafachpox. Taenbejpon pinjiyax, me-ama sábanabu', fulaeflik wut satlelsik. Japox sábanabu', me-ama nataelabuxsumkus wut, ja-aechox.

¹² Japasábanatutat nejmachchoef nuil. Jaxotbej jom, papunibej.

¹³ Do jawut, Pedro jumtaen jumtiskaspox athusik:

—Pedro, ¡nande! ¡Ampi choef bem xaeliajwam! —tis Pedro.

¹⁴ Pedro jumnot wut, jum-aechon:

—¡El, paklon! Xan choef chinax xae-enil chaemili, me-ama ampi choef, jasi, tajwuajnapijiw nakaechafiat xot, babijax isasamatan xamliajwa —aech Pedro.

¹⁵ Pejme athusik jumtiskas Pedro:

—Dios jum-aech wut: 'Pachaem xaeliajwa' —aech wut, ¡japoxliajwa xam nabej jum-aeché': 'Chaemil' —nabej aeché! —tis Pedro.

¹⁶ Pedro keto'as tres veces japi choef beliajwapon, xaeliajwabejpon. Do jawut, japasábana athu poxase chajulaful, choef suapich.

¹⁷ Pedro xabich nejchaxoel, masoxtat taen wut sábanabu', choef suapich. Samata, Pedro jum-aech, nejchaxoel wut "¿Masoxkat Dios xan nachanaekabu'anasia, taenx wut japox?" —aech Pedro, nejchaxoel wut. Pedro japox nejchaxoel wutfuk, Cornelio pamak patlisi bafafatat. Japi fulaen wutfuk, wuajna chaemti jiw: "¿Amxotkat Simón pejba ek, pakbu'an chaemsan pejba?" —aechi.

¹⁸ Dolisi pat wut Simón pejbxot, pinjemetat wuajna chaemt wut, jum-aechi: "¿Ampabaxotkatlap Simón Pedro duk?" —aechi.

¹⁹ Pedro nakiowa nejchaxoelfak japox ja-aechpoxliajwa bamatwuajtatse. Do jawut, Espiritu Santo jum-aech Pedroliajwa: "Tres aton pat. Japi pat xam wuljaesliajwa.

²⁰ Samata, ¡nande! ¡Balaemik! ¡Japi nejmach nakfulaem! Xan japi to'anax xot, japi fulaen" —aech Espiritu Santo Pedroliajwa.

²¹ Pedro balaek wut, jum-aechon pa'anpiliajwa:

—Xanlap nawulwekamponan. ¿Ma-aech xotkat fulaeman? —aech Pedro.

²² Japi jumnot wut, jum-aechi:

—Xanal fulaenx, tajpaklon Cornelio nato'a xot. Tajpaklon, japon soldawpaklon, xabich pachaempon. Japon Dios naexasitbej. Judíos jum-aech wut japonliajwa, jum-aechi chimi-ajamechan. Puexa judíos nejxasinkasbejpon. Kaeliw Dios pej-ánel jumtispon: '¡Asew xam to'im japi wuljaesliajwa Pedro! Japon pa'an wut, chiekal naewe'e japon xamal jumchiyaxaelpox!' —aech Dios pej-ánel Corneliolijwa —aechi Pedroliajwa.

²³ Pedro japox jumtaen wut, tapaeipon japi leliajwa ba. Do jawut, japabat namapi kaemadoilijwa. Dolisdo', kandiawa wut, Pedro nakfol japi. Asewbej, naexasiti Jesucristo pejuajan, Jope paklowaxpijw, japibej nakfoli Pedro.

²⁴ Kandiawa wut, Pedro pa'a Cesarea paklowaxxot. Japi wuajna, Cornelio, pejiwkola suapich, pejnachala suapichbej, tuadut natamejax japon pejbatat. Cornelio bu'wuajna wet pejiw Pedro pejpasaxliajwa.

²⁵ Pedro pat wut Cornelio pejbxot, Cornelio nakoldin bu'kulsliajwapon Pedro. Do jawut, Cornelio brixtat nuk Pedro pejuajnael, sitaeyaxtat chiekal bu'kulsliajwapon.

²⁶ Pe Pedro makafit Cornelio nansliajwa. Jawut Pedro jum-aech:

—jNandel! ¡Tajwuaajnalel xam brixtat nabej nuke'! Xan atonan. Me-ama xam, ja-an xan —aech Pedro Corneliolijawa.

²⁷ Pedro japox jum-aech wut Corneliolijawa, japi lowlisi Cornelio pejba. Jaxot Pedro xabich jiw taen, japi wuaajna natamejapi.

²⁸ Do jawut, Pedro jum-aech:

—Xamal chiekal matabijam. Tajwuaajnapijiw chajia lelox tapae-el nachalalijawan, judios-elpi suapich. Xanal natapae-elbej lelijawan judios-eli pejbachaxot. Japoxan xanal judios tajkabuan. Pe amwutjel xan matabijtax Dios nafias-el japoxanlijawa.

²⁹ Samata, namak nawuljaet wut, asax pae-enil japilijawa: 'Xan fulaeyaxinil' —chi-enil. Kamta nakfolx japi. Ma amwut matabijsasian, ma-aechxotkat nawuljaeti —aech Pedro, natamejapilijawa Cornelio pejbatat.

³⁰ Cornelio jumnot wut, jum-aechon:

—Cuatro matkoilisoX Dios kawuajnapox tajbatat kaliax, ampahora wutlejen. Chalechkal natulaelt wut, me-ama aton, jason, japon najum-aech. Naxoelox xabich itliak.

³¹ Japon najum-aech: 'Cornelio, xam kawuajnapox Dios jumtaen. Dios nejkiowa-el xam kajachawaesfulampox kejila.

³² Samata, jto'im namak Joep paklowax poxade buflaelijawadini Simón! Japon asawul Pedro. Japon duk pejwulxoelan pejbatat, pakbu'an chaemsan pejbaxot. Japon pejba ek mox marbabu'tat' —na-aech angel.

³³ Samata, tamak kamta to'ax xam wulwekalijawapi. Xam isam pachaempox tajjiwliawaja, nakfulaeman xot. Amwutjel xanal natamejjax Diosliawaja. Xanal puexa jumtaesian xam Dios buxto'apoxan xanal nanaewuajnalijawam —aech Cornelio Pedrolijawa.

Pedro naewuajanpox jiw Cornelio pejbaxot

³⁴ Dolisdo', Pedro tuadut wut jiw naewuajnalijawa, jum-aechon:

—Amwutjel ampoX matabijtax. Diachwuaajnakolax, Dios jiw taen wut, pothatapijiw puexa chiekal najupataenpon.

³⁵ Dios natxasisla-ele-el pothatapijiw, japi itpaei sitaeyax Diosliawaja, ispipej pachaempoxan.

³⁶ Xamal matabijam Dios xato'a chimiawuajan, Jesucristo pejwuajan, xanal israelitasliawan Dios nabeltaelajawa, isx wut babijaxan. Japon Jesucristo, paklokolan puexa jiwliawaja.

³⁷ Xamal chiekal matabijambej Jesús ispoxan judiosliawaja japi pejtuajnuchantat. Juan, jiw bautisan, naewuajnaful wut, japon jiw bautisafulbej. Japamatkoiyen Jesús ispoxan tuadut Galilea tuajnuXot.

³⁸ Xamal chiekal matabijambej, Dios chaxdut Jesúsliawaja, japon Nazaret paklowaxpijin, Espíritu Santo. Dios chaxdutebej pejpamamax Jesúsliawaja. Samata, Jesús isful pachaempoxan jiwliawaja. Boejthusfulbejpon jiw, nabijati Satanás pijaxtat. Diachwuaajnakolax Jesús xajup japoxan isfulalijawa, chalas xoton Dios.

³⁹ Xanal taenx Jesús isfulpoxan Jerusalén paklowaxxot, Judea tuajnuXot. Do jawux, asajiw Jesús kematamatlas cruztat tupalijawa.

⁴⁰⁻⁴¹ Jesús tup wut, tres matkoi wut, Dios mat-echpon pejme dukalijawa. Do jawux, xanalxot natulaelton. Asew jiwXot natulaels-elon. Dios chajia xanal namakanot, asamatkoi Jesús taelijawan, mat-ech wuton, pejme duk wut. Samata, Jesús xanalxot natulaelt, mat-ech wuton. Do jawut, xanal xaelx, Jesús suapich. Afxbej.

⁴² Jesús nabuxto'a xanal jiw naewuajnalijawan Dios wulduwpoX Jesús juezliawaja. Asamatkoi japon jiw babejchow pejel dijakaxael. Diajakaxaelbejpon pejlel jiw pachaempi. Jachiyaxaelon jiw laelpilijawa, jiw tupilijawabej.

⁴³ Puexa profetas chajia jum-aechi Jesús pasaxaelpoxliawaja ampathatat. Japi jum-aechbej: 'Jiw naexaxisaxaelpi japon, japi Dios beltaeyaxaes babijaxan ispoxanlijawa' —aechbej profetas, chajia jum-aech wut —aech Pedro, jiw naewuajan wut Cornelio pejbatat.

Judios-elpi pejmatpuatanxot paskpox Espíritu Santo

⁴⁴ Pedro naewuajan wutfuk, jawut Espíritu Santo pask, Pedro naewuajanpox naeweti pejmatpuatanxotsik.

⁴⁵ Judios, pati, Pedro suapich, japi chajia naexasiti Jesucristo pejwuajan. Japi xabich nejchaxoelanuil, taen wuti Espíritu Santo paskpox judios-eli pejmatpuatanxotsik.

⁴⁶ Japi matabija Espíritu Santo paskpox, naksiya xoti asajamechan, majt naksiya-eljamechan, japi jum-aechful xotbej Diosliawaja: "Xam xabich pachaemam" —aechful xoti Diosliawaja.

⁴⁷ Samata, Pedro jum-aech, japon suapich, patpi jumtaelajawa: "Espíritu Santo fuloek Cornelioxotsik, pejiwXotsikbej. Me-ama xatishliawaja, jatisbej judios-elpilijawa. Samata, japi jiw bautisas wut, xatis elchiyaxisal" —aech Pedro.

⁴⁸ Samata, Pedro to'a Cornelio, pejiw sʉapich, bautisaliajwas Jesucristo pejwʉaltat. Do jawʉt, japi jiw fiati Pedro namanaliajwa kaematko'i sʉapich japixot.

11

Pedro chapaeipox Jerusalén paklowaxpijiw, Dios buxto'aspox naewuajnalijwa judíos-eli

¹ Apóstoles, asewbej, naexasiti Jesucristo pejwʉajan, Judea tʉajnapijiw, japi wʉltaen judíos-eli chiekal naexasitox Jesús pejwʉajan.

² Samata, Pedro pat wʉt Jerusalén paklowaxxot, asew judíos, naexasiti Jesucristo pejwʉajan, japi loti Pedro.

³ Japi lot wʉt, jum-aechi Pedrolijawa:

—¿Ma-aech xotkat xam fulaemch taeliajwam judíos-eli? ¿Ma-aech xotbejkat, japi sʉapich, naxaelam? —aechi.

⁴ Do jawʉt, Pedro puexa chiekal chapaeiyax tʉaduton, akasestat ja-aech wʉt japox. Jum-aechon:

⁵ —Xan Jope paklowaxxotx wʉt, Dios kawuajnajx wʉt, masoxtat taenx. Taenx athusik fulalaeflik wʉt Dios kawuajnajxotsik, sábanabu' pinjiyax, me-ama nataelabuxsumkus wʉt, ja-aechox.

⁶ Xan chiekal taenx japasábanatutat nejmachchoef, jaxot nuil wʉt. Japi choef, cuatrotuakanpi, pejmachoejbej. Jaxotbej jom, miabej.

⁷ Jumtaenxbej, athusik najum-aechsik wʉt. Japajame najum-aech: 'Pedro, ¡nande! ¡Ampi choef bem xaeliajwam!' —na-aech japajame.

⁸ Xan jumnotx wʉt, jum-an athusik najum-aechipox: '¡El, paklon! Xan japi choef chinax xae-enil, chaemili, me-ama ampi choef, jasi, tajwʉajnapijiw nakaechafiat xot, babijax isasamatan xamliajwa' —an xan, athusik najum-aechsik wʉt.

⁹ Pejme najum-aech athusik: 'Xan jum-anox: "Pachaem xaeliajwa" —anox, japoxanliajwa xam nabej jum-aech': "Chaemil" —nabej aeché" —aechsik athusik najum-aechsikpox.

¹⁰ Japox ja-aech tres veces. Do jawʉx, sábanabu', choef sʉapich, athu chajulaful.

¹¹ Do jawʉt, xan dukxot pat tres poejiw. Japi Cornelio pamak. Japi fulaen Cesarea paklowaxxot xan nawuljaesliajwa.

¹² Do jawʉt, Espiritu Santo nato'a japi jiw nejmach xan nakfulaeliajwan. Seis wajkoew, xan nafulchala, naexasiti Jesucristo pejwʉajan. Do jawʉx, Cesarea paklowax patx wʉt, xanal, puexa folxpijin, lowx Cornelio pejba.

¹³ Cornelio nachapaei Dios pej-ángel natulaeltpox japon pejbatat. Do jawʉt, Cornelio jumtis ángel: '¡Namak to'im Jope paklowax poxade, japi buflaeliajwadin Simón Pedro!

¹⁴ Japon pa'an wʉt, xam naewuajnajaxaelon isaxaelampox Dios bu'weliajwa, nejiw sʉapich' —tis Cornelio Dios pej-ángel.

¹⁵ Xan tʉadutx wʉt japi naewuajnalijwan, jawʉt, Espiritu Santo pask japi pejmatpʉatanxot. Me-ama majt xatisxot Espiritu Santo pask wʉt, jatisbej judíos-elpilijawa.

¹⁶ Do jawʉt, xan nejchafaetx wajpaklon Jesús chajia nakjum-aechpox. Jesús chajia xanallijwa najum-aech: 'Diachwʉajnakolax majt Juan jiw bautisa mintat. Pelax Espiritu Santo pasaxael xamal nejmatpʉatanxotsik. Ja-aech wʉt, xamal, me-ama bautisaxaelam wʉt Espiritu Santo pijaxtat, jachiyaxaelam' —aech Jesús, chajia xanal najum-aech wʉt.

¹⁷ Diachwʉajnakolax Dios to'ak Espiritu Santo judíos-elpilijawebj. Me-ama xatisliajwa, jatisbej judíos-elpilijawa. Samata, xan elchiyaxinil, Dios japox is wʉt —aech Pedro, jumnot wʉt lotspilijawa.

¹⁸ Jesucristo pejwʉajan naexasiti, Jerusalén paklowaxpijiw, japox jumtaen wʉt, buxkofapi. Do jawʉt, Pedro kaes los-esal. Xabich nejchachaemillisi jumch Diosliajwa. Samata, jum-aechi:

—Diachwʉajnakolax, judíos-elibej Dios beltaens, kofa xot babijaxan ispoxan pachaemali-ajwapi Diosliajwa. Samata, asamatko'i kaeyaxtat duilaxaes Diosxotse pomatkoicha —aech Jerusalén paklowaxpijiw.

Naexasitpox Jesucristo pejwʉajan Antioquía paklowaxpijiw

¹⁹ Esteban ia'tat dadaps wʉt, tʉp wʉtbejpon, do jawʉtbej, judíospaklochow tʉadut chakifulaeyax Jesucristo pejwʉajan naexasiti beliajwas. Samata, Jesucristo pejwʉajan naexasitixot, asew dukp Fenicia tʉajnu poxade. Asew dukp Chipre tanaet poxade. Asew dukp Antioquía paklowax poxade. Dukpi japapaklowaxan poxade pat wuti, jaxot naewuajan chimiawuajan, Jesucristo pejwʉajan, judíoskal jumtaeliajwa. Judíos-eli naewuajna-esalfuk.

²⁰ Asew naexasiti Jesucristo pejwʉajan, Chipre tanaetpijiw, Cirene paklowaxpijiwbej, japi dukp wʉt, pati Antioquía paklowaxxot. Jaxot naewuajanpi chimiawuajan, wajpaklon Jesucristo pejwʉajan, judíos-elilijawebj.

²¹ Japi naewuajnaful wut Jesucristo pejuwajan, Dios kajachawaesfulas. Samata, xabich judíos-eli kofa pejuwajnapijiw naexasitpoxan. Japilax naexasit Jesucristo pejuwajan.

²² Naexasiti Jesucristo pejuwajan, Jerusalén paklowaxpijiw, wultaen judíos-eli, Antioquía paklowaxpijiw, naexasitox Jesucristo pejuwajan. Samata, Bernabé to'as taeliajwa Antioquía paklowaxpijiw.

²³ Bernabé pat wut Antioquía paklowaxxot, taenlison japi Dios kajachawaechpox. Samata, Bernabé xabich nejchachaemil. Do jawut, japon naewuajan puexa japi jiw kaes chiekal naexasifulaliajwa Jesús pejuwajan.

²⁴ Bernabé xabich pachaempon. Xabich kajachawaesfulas Espiritu Santo. Xabich Dios xanaboefsfulbejpon. Samata, ja-aech wut, xabich jiw naexasit Jesucristo pejuwajan.

²⁵ Do jawux, Bernabé fulaechon Tarso paklowax poxade wulwekaliajwapon Saulo.

²⁶ Faen wut, japon suapich, kaxa nawen Antioquía paklowax poxadin. Do jaxot duillisi kaewaechliajwa Jesucristo pejuwajan naexasitixot. Japi xabich jiw naewuajan Antioquía paklowaxxot. Jesucristo pejuwajan naexasiti japapaklowaxxot matxoela jumtis japijiajwa: "Cristianos" —tispi.

²⁷ Japamatkoiyan Bernabé, Saulo suapich, Antioquía paklowaxlel naewuajan wut, asew profetas, Jerusalén paklowaxpijiw, pat Antioquía paklowaxxot.

²⁸ Japi profetasxot, kaen pawul Agabo. Natameja wut naexasiti Jesucristo pejuwajan, jawut Agabo nant japixot jumchiliajwa Espiritu Santo buxto'asprox. Jawut jum-aechon: "Am-patujnuchanpijiw xabich litaxaelaxael, naxaeyaxan piach ajilaxael xot" —aech Agabo. Baxael, diachwuajnakolax japox ja-aech. Claudio, puexa Roma tuajnpijiw tato'al wut, japamatkoiyantat japox ja-aech, naxaeyaxjilaxan.

²⁹ Dolisdo' japamatkoiyantat Judea tuajnpijiw litaxaelaful. Samata, Antioquía paklowaxpijiw, naexasiti Jesucristo pejuwajan, kaenejchaxoelax plata xato'aliajwa naexasitiliajwa Jesucristo pejuwajan, Judea tuajnpijiwliajwa. Kaenanula xajupproxat owapi plata.

³⁰ Jaxox ispi, plata owa wut. Do jawut, Bernabé, Saulo suapich, to'as japaplata xalaeliajwa Judea tuajnu poxade chaxduiliajwapi ancianosxot.

12

Pedro jiaspox jiw jebatat

¹ Japamatkoiyantat Herodes, Judea tuajnpijiw tato'lan, tuadut babijaxan isliajwa Jesucristo pejuwajan naexasitiliajwa.

² Herodes keto'a pejsoldaw boesaliajwapi espadatat Santiago. Japon Juan pakoewan. Faens wut, boesaspon.

³ Herodes wultaen asew judíos xabich nejchachaemilox Santiago boesasproxliajwa. Do jawutbej, Herodes keto'a pejsoldaw Pedrobej jaelsliajwas, Pascuamatkoi wut. Japamatkoi-tat judíos pan jixael, puthla-eli. Do jawut, Pedrobej jaeltas.

⁴ Pedro jaeltas wut, Herodes keto'a pejsoldaw Pedro jeliajwas jiw jebatat. Jiw jebaxot cuatromutje soldaw, japi nalixafulaliajwa Pedro wesax. Kaenanula cuatromutjexot, jaxot cuatro soldaw. Herodes nejchaxoel wut, jum-aechon: "Pascuafiesta toep wut, Pedro jusaxaelen jiw jebaxot. Nosaxaelnon puexa jiw pejuwajnalel tasalaliajwason" —aech Herodes, nejchaxoel wut.

⁵ Japox ja-aech Pedroliajwa, jiw jebatat jias wuton. Chiekal wesfulas wesamata. Do ja-aech wut, naexasiti Jesucristo pejuwajan xabich Dios kawuajnaful nejthua'axtat Pedroliajwa.

Pedro kajachawaechpox Dios pej-ángel weliajwapon jiw jebatat

⁶ Madoi wut, Pedro jiw jebatat nataelamaaxwasixawaech cadenamuatat, kolenje soldaw suapich. Pedro nejmach moejt kolenje soldawtutat. Asew soldaw, kolenje, bafafa wesful. Kandiawa Herodes jiw pejuwajnalel nosaxaelon Pedro.

⁷ Pe japamadoitat Dios pej-ángel chalechkal natulaelt Pedroxotsik. Natulaelt wut, jiw jebatu xabich itliakjala. Pedro thikas ángel nathikslija. Jawut jumtispon: "¡Nandel!" —tispon. Jawut kolemuatje, cadenamuat, Pedro pejmuaxwasixot cadenamua jolpanik.

⁸ Do jawut, ángel pejme jum-aech Pedroliajwa: "¡Naxoelde! ¡Tuakxajoeldebej!" —aechon. Pedro ow-aech ángel jum-aechpox. Do pejme jawut, ángel jum-aech: "¡Naxoeldebej nejsumta-osax! ¡Xan nakfulaem!" —aech ángel.

⁹ Pedro nejmach fulafol Dios pej-ángel, matabijs-elaxtat diachwuajnakolax wut japox. Pedro japoxliajwa, me-ama xamoejt wut, ja-aechox.

¹⁰ Xenapi matxoelawetpon, soldawan, batufafaxot. Jawux xenapi asan, soldawan, wetpon. Pati taxdukafafa, anaelfafa. Japafafa nakolsliajwa paklowax poxaliajwade. Japafafa pajut nafafat japi wuajna. Samata, nejmach nakolapi. Do jawux, kaethialaxot lika wuti, Dios pej-ángel naxaelcha. Do jawut, Pedro tamachlison.

¹¹ Jawut Pedro pajut chiekal matabijt. Chiekal nejchaxoelison: “Amwutjel chiekal matabijtax, Dios to'ak pej-ánel xan nabu'welijwa Herodes pejsoldawxot. Puexa Herodes isaxaelpox xanliajwa judíos pejuwajnalel, nabijasaxaelenpox, japoxliajwa Dios pej-ánel nabu'wia” —aech Pedro, nejchaxoel wut.

¹² Japox Pedro pajut chiekal matabijt wut, fulaechon María pejba poxade. María, japow Juan pen. Japon asawul Marcos. Jaxotde xabich jiw natameja, Dios kawuajan xoti.

¹³ Pedro ba tathoetle la wefasliajwas. Do jawut, pansiw fulaen taeliajwa, achan la. Japow japabatat nabistpow. Pawulow Rode. Dolisow jum-aechow:

—¿Achanamkat xam? —aechow.

¹⁴ Pedro jumnot wut, japow chiekal jummatabijt Pedro pejjame. Samata, japow xabich nejchachaemil, jumtaen wutow Pedro pejjame. Do jawut, bafafas-elow Pedro leliajwa. Jumch kaxade najae'epow batuchade batupijiw chapaeliajwa. Chapaei wut jum-aechow:

—¡Pedro bafafaxot nuk,tathoetle! —aechow.

¹⁵ Japow jum-aech wut japox, batupijiw jumch jum-aech:

—¡Xam pawis na-acham! —aechipow.

Japow jum-aech:

—¡Diachwuajnakolax Pedro nuk tathoetle! —aechow.

Japi nakaewa najum-aech:

—¡El! ¡japona-el! Kaen ánel, bej tataeflasponbej —aechi nakaewa.

¹⁶ Japi japox jum-aech wut, Pedro nakiowa laeful bafafaxot. Jawut bafafat wuti, taen wuti Pedro, japi xabich beljow.

¹⁷ Pedro kexachok'cha puexa jiw chiekal boejlachaliajwa. Jawut chapaeipon jiw jebaxot Dios juchpox. Do jawut, jum-aechon:

—¡Santiago chapaem xan wiapox, asewbej, naexasiti Jesucristo pejuwajan! —aech Pedro.

Do jawux, Pedro nakolt wut japixot, fulaechon asalel.

¹⁸ Do nalian wut, soldaw, matabija-eli, achax nejchaxoelaxaeli. Matabija-elbeji, ma-aech Pedro weliajwa.

¹⁹ Herodes to'a pejsoldaw chiekal wulwekaliajwapi Pedro. Pe Pedro faena-esal. Pedro wia wut soldaw wesfulaspoxtat, japikal xabich wuajnachaemtas. Do jawux, Herodes asew soldaw kito'a Pedro wesfulaspi, japi soldaw beliajwas. Do jawuxbej, Herodes Judea tuajnujxot nakolt. Fulaechon Cesarea paklowax poxade, jaxotde kaematkoiyan suapich dukaliajwa.

Herodes woejxayax chatupox

²⁰ Herodes Cesarea paklowaxxot duk wut, palalapon Tiro paklowaxpijiwliajwa, Sidón paklowaxpijiwliajwabej. Herodes palala wut, pamak kefiaton naxaeyaxan xananuams-elaliajwa japapaklowaxpijiwliajwa. Samata, japapaklowaxanpijiw kaenejchaxoelax chiekal nospaeliajwa, Herodes suapich. Japi nospaesia, Herodes suapich, toepaliajwa Herodes palalapox, tapaeliajwabejpon naxaeyaxan xananuampi.

Herodes pejba tataefulpon, pawul Blasto. Japon chiekal xanaboejtas Herodes. Japapaklowaxanpijiw matxoela nospaei, Blasto suapich. Do jawux, buxto'api Blasto nospaeliajwa, Herodes suapich. Blasto ow-aech japi jum-aechpox. Do jawux, Blasto nospaei, Herodes suapich, toepaliajwa Herodes palalapox.

²¹ Herodes kaematkoi mark pasax tapaeliajwapon japapaklowaxanpijiw. Baxael, japi japonxot pa'an wut, Herodes wuajna naxoel xabich chamoeyax, japanatamejaxliajwa. Taa-ekax pinjiyax, chamoeyaxtat,skon. Do jawut, Herodes piach naksiya japi jiwliajwa.

²² Do jawut, jiw nejla'laba wut, jum-aechfuli: “¡Dios xatisxot! Herodes naksiya wut, me-ama Dios naksiya wut, ja-aechon. Me-ama aton naksiya wut, jachi-elon” —aechfuli, nejlat wut. Jasoxtat japi jiw nejla'bala Herodes nejchachaemlaliajwa japi jiwliajwa.

²³ Do jawut, Herodes buxfias-elxoton, jiw nejla'laba wut, japonliajwa: “¡Xan Dios-enil!” —chi-el xoton jiwliajwa, Dios pej-ánel ketison bu'xaenkaliajwa. Do jawut, Herodes woejx-aeayax chatup, xabich thewin woejxae xot.

²⁴ Pe Jesucristo pejuwajan naexasiti Dios pejjamechan potuajnuucha xabich naewuajnaful. Samata, xabich jiw naexasit japawuajan.

²⁵ Bernabé, Saulo suapich, pejbichax toet wut, nakola Jerusalén paklowaxxot. Do jawut, nawenlisi Antioquia paklowaxlel. Nawen wut, japi bu'fol Juan. Japon asawul Marcos.

13

Bernabé, Saulo suapich, diajnaspox Jesucristo pejuwajan naewuajnalialjwa asatujnuchanpijiw

¹ Antioquia paklowaxxot, naexasitixot Jesucristo pejuwajan, japixot asew profetas, asewbej judíos chanaekabuanaapi. Kaen profeta pawul Bernabé. Asan pawul Simón.

Japon asawul Pafoeyan. Asan pawul Lucio, Cirene paklowaxpijin. Kaen judíos chanaekbanapon pawul Saulo. Asan pawul Manaén. Japon, Herodes swapich, yamxulan wut, kaebatat ti'tpon. Do baxael, Herodes chiekal ti't wut, wulduwson Galilea tuajnapijiw tato'lalijwa.

² Asamatkoi, naexasiti Jesucristo pejuwanjan culto is wut, japamatkoitat naxae-eli, Dios piach kawuajnalijwa. Jawut Dios kawuajan wuti, Espiritu Santo jum-aech Dios kawuajanpiliajwa: “¡Bernabé, Saulo swapich, nawedijande! Xan bichax japiliajwa” —aech Espiritu Santo.

³ Do jawut, Jesucristo pejuwanjan naexasiti, Dios kawuajnaex baxtoet wut, jawut kewapi Bernabé pejta'tat, Saulo pejta'tatbej. Jawut pejme japi Dios kawuajan Bernabé, Saulo swapich, kajachawaesfulalijwaspi Dios. Do jawux, tapaeis Bernabé, Saulo swapich, fulaelijwa islija Dios pejbichax.

Bernabé, Saulo swapich, Chipre tanaetxotpox

⁴ Bernabé, Saulo swapich, Espiritu Santo to'as xot, fulaechi Seleucia paklowax poxade. Jaxotde pa'a wut, barkam juli Chipre tanaet poxalijwade.

⁵ Salamina paklowax chapat wut, Chipre tanaetxot, naewuajanlisi Dios pejjamechan judíos naewuajnaexanxot. Juan Marcos nakfolbej kajachawaeslija wapon japabichax, japi nabist wut.

⁶ Japi pat wut tanaetmatdukaxot, pati Pafos paklowaxxot. Jaxot wut, taeni judíos-aton. Japon pinjoe'an. Pawulon Barjesús. Japon xabich kichachajbamaenk. Jijum-aechbejpon: “Xan jum-an Dios nabuxto'apoxan” —ji-aechon.

⁷ Japon pinjoe'an kajachawaet Sergio Paulo, Chipre tanaetpijiw tato'lan. Japonbej matabijsmaenk. Dolisdo', Sergio Paulo wullala Bernabé, Saulo swapich, japi fulaelijwadin japonle, naewesasia xoton Dios pejjamechan.

⁸ Japon pinjoe'an, griegojamatet pawulon Elimas. Japon jum-aech babejjamechan Bernabélijwa, Saulolijwabej, Sergio Paulo naexasisasamata Jesús pejuwanjan.

⁹⁻¹¹ Barjesús japox jum-aech wut Bernabélijwa, Saulolijwabej, jawut Saulo, japon pawul Pablo, chiekal natachaemt wuton Barjesúslijwa, Pablo jum-aech Espiritu Santo pijaxtat Barjesúslijwa:

—¡Xam kichachajbapijnam! ¡Babej isnam, Satanás paxulnam! Puexa jiw is wut pachaemopoxan, ¡xam japi padaelmanam! Dios pejjamechanlijwa xam jum-am: ‘Japox diachwuajnakolaxa-el’ —am, xam naexasisasiapiliajwa, japi naexasisasamata Dios pejjamechan. Amwut, Dios xam kastikaxael itliakalijwam. Pin-iamatkoiyon taeyaximil itliakax —aech Pablo Barjesúslijwa.

Pablo japox jum-aech wut, Barjesús chalechkal kamta itliakal. Jawut wulwekon aton makxalaelijwas.

¹² Do jawut, Sergio Paulo japox taen wut, naexasitlison Jesús pejuwanjan. Naexasit wut, nejchaxoelon: “Diachwuajnakolax Jesucristo pejuwanjan xabich pachaem” —aechon, nejchaxoel wut.

Pablo, Bernabé swapich, naewuajanpox Pisidia tuajnulel

¹³ Pablo, Bernabé swapich, Juan Marcos swapichbej, Pafos paklowaxxot juli barkam. Do jawut, chaflaechi Perge paklowax poxade, Panfilia tuajnuxot chapaslija. Perge paklowaxxot chapat wuti, jawut chalechkal Juan Marcos nadijan japixot nawiaslija wapon Jerusalén paklowax poxade.

¹⁴ Do jawut, Pablo, Bernabé swapich, nakola Perge paklowaxxot, Antioquia paklowax poxade, paslija Pisidia tuajnulel. Jaxotde pa'a wut, napatamatkoi wut, japi low judíos naewuajnaexot. Jaxot chalaki.

¹⁵ Puexa chiekal chalax wut, chanaexaljowspi Moisés chajia lelpox. Chanaexaljowspejpi profetas chajia lelpoxan. Do jawut, japaba wetpi jum-aechi Pablolijwa, Bernabélijwabej:

—Takoew, xamal Dios pejjamechan xapatam wut, ¡xanal nanaewuajande Dios kaes chiekal xanaboelija! —aechi.

¹⁶ Do jawut, Pablo nant naewuajnalijwa. Jawut muaxxachok'chapon puexa jiw boejlach chalakalijwa. Jawut jum-aechon:

—Xamal judíos, ¡chiekal nanaewe'e! Xamal judíos-emili, sitaenampim Dios, ¡chiekal nanaewe'ebej!

¹⁷ Dios, japon xatis wajDios Israel tuajnapijwaslija, japon chajia makanot wajwuajnapijiw pejiwaliajwapon. Japi israelitas, Egipto tuajnuxot duil wut, xabich piniat, Dios kajachawaesfulas xot. Do jawuxbej, Dios pejkajachawaesaxtat wajwuajnapijiw nakola japatuajnuxot.

¹⁸ Do jawux, japi cuarenta waechan nanuamt wut pajilaxxot, babijaxan isful wutbejpi, Dios boejtaliasful. Dios nakiowa tataeflaspi.

¹⁹ Wajwəajnapijiw pejwəajna, Canaán təajnxot asajiw duil. Japi sietemət. Japi jiw xabich pin-iat. Pe nakiowa, Dios toet japi jiw, wajwəajnapijiw chaxdusliajwas ampatəajnu.

²⁰ Jacob, paxi səapich, Egipto təajnxot pat wəti, cuatrocientos cincuenta waechan wət, Dios chaxdut ampatəajnu Jacob pamojiw —aech Pablo, judíos naewəajan wət.

Pablo kaes jum-aech: “Dios ampatəajnu chaxdut wət Jacob pamojiw, do jawəx, wəlduwpon japixot asew juecesliajwa, japi judíos tato'lalijaw. Kaen juez təp wət, asan nalixat juezliajwa. Xabich pin-iawaechan wət, Samuel, japon profeta, taxdukapijin juez.

²¹ Do baxael, israelitas Dios kawəajan japixot Dios makafisliajwa kaen aton japi pe-jreyliajwa, tato'lalijawasbejpi. Samata, Dios wəlduw Saúl, japon reyliajwa israelitas tato'lalijawpon. Japon Saúl, Cis paxəlan, wajwəajnapijin Benjamín pamon. Japon Saúl reypon cuarenta waechanliajwa.

²² Asamatkoi Saúl Dios juchpon reypon. Do jawət, Dios wəlduw David japon reyliajwa. Dios jum-aech Davidliajwa: ‘David, Isaí paxəlan, xan nejchachaemlax xamliajwa, puexa chiekal nanaexaxisfulam xot xan tato'laxpoxan’ —aech Dios Davidliajwa.

²³ Do baxael, David pamojiwəx, kaen nalaelt. Japon pawł Jesús. Japon Dios to'as, xatis judíos nakbə'weliaw. Me-ama Dios chajia jumdut, ja-aechox.

²⁴ Jesús təadus-el wətfuk jiw naewəajna, majt Juan, jiw bautisan, puexa judíos naewəajnaful wət, jum-aechon: ‘İkofim babijaxan isfəlampoxan! İNaexaxisfulde Dios tato'alpoxan! Ja-am wət, xamal bautisaxaelen’ —aech Juan.

²⁵ Mox pawəajna wət Juan boesaxaesox, Juan chajia jum-aech: ‘Xan Cristowa-enil. Wəajnawesfulampona-enil. Xanwəx japon pasaxael, xamal wəajnawesfulampon. Japon kaes pejme pachaemaxael. Me-ama xan, jachiyaxilon. Samata, xan pachaema-enil japon pejtəakxajoelax jolsliajwan. Pachaema-enilbej japon pamaknanliajwa’ —aech Juan, chajia jum-aech wət Jesús pejpasaxliajwa —aech Pablo.

²⁶ Pablo pejme jum-aech: “Takoew, xamal Abraham pamojiwam, xamalbej judíos-emili, sitaenamjim Dios, Dios nakto'a xatis naexaxisliajwas ampajamechan nakbə'weliawabej babijaxan isaspoxan.

²⁷ Jerusalén paklowaxpijiw, japi paklochow, matabija-eli Jesús, japon Dios paxəlanpon. Chiekal matabija-elbejpi profetas chajia lelpoxan, chanaexaljows wət napatamatkoitat. Japi keto'a wət Jesús cruztat kematamatlaliawwas, japox islisi, me-ama chajia profetas lelpoxan jum-aech Jesúsliajwa.

²⁸ Jesús chinax babijax is-el. Samata, Jerusalén paklowaxpijiw, paklochowbej, faena-el Jesús tasalaliawwapi. Japi taesia xot Jesús təpax cruztat, japi wəljow Pilato, japon keto'aliawwa pejsoldaw, japi soldaw cruztat kematamatlaliawwapi Jesús.

²⁹ Jesús təp wət cruztat, puexa chiekal ja-aechlisox, me-ama profetas chajia lelpoxan jum-aech Jesúsliajwa. Do jawəx, asew kutipon cruzxot. Do jawət, otipon məaxwəajtat.

³⁰ Tres matkoi wət, Dios mat-et Jesús pejme dukaliajwa.

³¹ Do jawəx, japamatkoiyan wət, Jesús natulaela pejnachalaxot, japi naknanəamti japon Galilea təajnxot wət, Jerusalén paklowax poxade wətbej. Japi amwətjel naewəajnaful Jesucristo pejwəajan —aech Pablo judíos naewəajnabatat.

³² Pablo pejme jum-aech: “Xanal amxotan xamal naewəajnaliawwan chimiawəajan, Jesucristo pejwəajan, Dios chajiakolaxtat jumdutox wajwəajnapijiwliajwa.

³³ Xatis, wajwəajnapijiw pamojiws. Japi jumduchpox, amwətjel xatis japox nakwepat. Dios mat-et Jesús pejme dukaliajwa. Me-ama chajia lelspxo segundo salmosfutat jum-aech, ja-aechlisox. Dios chajia jum-aechpox jum-aech: ‘Xam taxəlanam. Xan nej-axnan’ —aechox segundo salmosfutat.

³⁴ Dios chajia jum-aech: ‘Diachwəajnakolax xan isaxaelen chajia jumdutoxpxo Davidliajwa’ —aechon. Dios japox chajia jumdut wət, jum-aechon Jesús mat-esaxaespxoliawwa pejme dukaliajwa, japon pejbə't xoepaxilpoxliawwabej.

³⁵ Asafutatbej chajia jum-aechox Diosliajwa: ‘Təpaeyaximil naxəlan pejbə't xoepax’ —aechox japafutat.

³⁶ Diachwəajnakolax David laeja wət ampathatat, naexaxisfulon Dios tato'laspxo. Ka-jachawaesfulbejpon jiw. Do jawəx, David təp wət, pejwəajnapijiw məthtasxot məthtipon. Do jaxot David pejbə't xoep.

³⁷ Pelax Jesús təp wət, mat-echpon Dios pejme dukaliajwa. Samata, xoepa-elon.

³⁸ Takoew, xamal matabijaxaelam naewəajnaprox Jesucristo pejwəajan. Jesús pijaxtat Dios nakbə'wia xatis.

³⁹ Naexasiti Jesucristo pejwəajan, Jesús pijaxtat Dios bə'weyaxaesi. Pelax Moisés chajia lelpox pijaxtat xatis japoxtat Dios nakbə'we-el.

⁴⁰ İChiekal taem isasamatam babijaxan wejachisamata, me-ama profetas chajia lelpoxan jum-aech, Dios jum-aechox:

41 'Xamal jum-ampim babejjamechan xan jum-anpoxliajwa, ixan chiekal nanaewe'e jumchiyaxaelenpox! Laelpam wutfuk, xan pinjiyax koechax isx wut, jiw japox xamal chapaei wut, diachwujnakolax xamal naexasisaximil. Xamal asbuan jumch xabich nejchaxoelanuilaaxaelam. Do baxael, tɔpam wut, napelsaxaelam Diosxot' —aech profetas lelpoxan, Dios chajia jum-aechpox! —aech Pablo, judíos naewuajnatat wut.

42 Pablo, Bernabé suapich, nakola wut judíos naewuajnataxot, asew japixot, judíos-eli, japi jum-aech: "Asasemana wut, napatamatkoi wut, jawut xanal pejme nanaewuajande japoxan!" —aechi.

43 Natamejax toep wut, jiw nawia wut pejbachan poxade, xabich judíos, judíos-elibej, Pablo, Bernabé suapich, japi xabich jiw fulafos. Judíos-eli japi chiekal naexasit Dios, me-ama judíos chiekal naexasit wati Dios, ja-aech judíos-eli. Pablo, Bernabé suapich, chiekal naewuajan fulafospi. Naewuajan wut, jum-aechon: "Dios xamal nejxasink xot, chiekal naexasisfulaxaelam pomatkoicha chimiawuajan, Jesucristo pejwuajan, jumtaenampox" —aech Pablo, Bernabé suapich.

44 Dolisdo', asasemana wut, pejme napatamatkoi wut, xabich jiw, japapaklowaxpijiw, natameja jumtaeliajwa Dios pejjamechan.

45 Judíos taen wut puexa jiw natamejapox, jawut japi judíos palalapi, xabich jiw naewet xot Pablo naewuajanpox. Samata, Pablo naewuajanpoxliajwa jum-aechi: "¡E! Japon Pablo chiekal matabijs-ellejen" —aechi. Do jawut, Pablo bu'wuajanpaeisbejpon.

46 Jawut Pablo, Bernabé suapich, jumnot wut, pejlwla-eli. Samata, jum-aechi judíosliajwa: —Xanal matxoela naewuajna xamal naexasisliajwam Dios, xamal judíoswam xot. Pe xamal nejxasinka-emil naexasisliajwam. Xamal nejchachaemla-emil pomatkoicha duilaxaelampoxliajwa Diosxotse. Samata, xamal kaes naewuajna ximil. Xanal fulaeyaxaelen naewuajnalijwan judíos-eli poxade.

47 Xanal jasox jachiyaxaelen, Dios nabuxto'a xot. Dios chajia jum-aech xanalliajwa: 'Xamal, me-ama itliakam wut, ja-am, xamal makanotx xot tajjamechan naewuajnafulaliajwam asatuajna xanpijiw. Puexa tajjamechan naexasiti, japi bu'weyaxaelen' —aech Dios, chajia jum-aech wut xanalliajwa —aech Pablo, Bernabé suapich, judíosliajwa.

48 Judíos-eli japox jumtaen wut, xabich nejchachaemili. Samata, nakaewa jum-aechnapi: "Xabich pachaem Dios pejjamechan" —na-aechnapi nakaewa. Judíos-eli, puexa japixot Dios makanoch, japi Dios naexasit pomatkoicha duilaliajwa Diosxotse.

49 Do jawux, puexa japatuajnapijiw jumtaen Dios pejjamechan, naewuajnas wut. Japixot xabich jiw naexasit Dios.

50 Ja-aech wut, asew judíos nejweslapi Pablo, Bernabé suapich. Samata, japi judíos nospaei, watho' suapich, japi watho' Dios sitaenpi. Japi watho' sitaensbej japapaklowaxpijiw. Japi judíos nospaeipibej, japapaklowaxpijiw paklochow suapich. Japi judíos bu'wuajanpaei Pabloliajwa, Bernabéliawabej, japapaklowaxpijiw palalaliajwa. Samata, paklochow, watho'bej, xabich palalapi. Do jawut, Pablo, Bernabé suapich, to'as fulaeliajwa asatuajnael.

51 Pablo, Bernabé suapich, to'as wut, japi matxoela tuak-asta'a. Jasox ispi judíos pajut chiekal matabijaliajwa, japi babijax ispox Diosliajwa, asalel to'as xoti babijaxtat. Do jawux, Pablo, Bernabé suapich, fulaech Iconio paklowax poxade.

52 Pe Antioquia paklowaxpijiw, Jesucristo pejwuajan naexasiti, xabich nejchachaemil, kajachawaesfulas xoti Espiritu Santo.

14

Pablo, Bernabé suapich, Iconio paklowaxxotpox

1 Pablo, Bernabé suapich, Iconio paklowaxxot pat wut, lowpi judíos naewuajnataxot, me-ama japi pejkabuan. Do jaxo, Jesucristo pejwuajan chiekal naewuajanlisi. Chiekal naewuajan xoti, xabich judíos naexasit. Xabich judíos-elibej naexasit.

2 Asew judíos, naexasi-eli Jesucristo pejwuajan, asaxan jum-aechi Jesucristo pejwuajan naexasitiliajwa, japi judíos-eli ulataeliajwas.

3 Samata, Pablo, Bernabé suapich, pin-iamatkoijan duil japapaklowaxxot. Pejlwla-eli naewuajan wut Jesucristo pejwuajan, matabija xoti Dios chalasxot. Pablo, Bernabé suapich, naewuajan Dios puexa jiw nejxasinkpox. Puexa jiw chiekal matabija japi jum-aechpoxan diachwujnakolax, japi koechaxan is xotbej Dios pijaxtat.

4 Japapaklowaxpijiw kolenejchaxoelax. Asew japixot kaenejchaxoelax judíos jum-aechpoxliajwa. Asewlax japixot kaenejchaxoelax Pablo, Bernabé suapich, jum-aechpoxliajwa.

⁵ Do jawut, kaeswapich judíos, judíos-elibej, kaenejchaxoelax, paklochow swapich, ia'tat dadaeplijawapi Pablo, Bernabé swapich, matkaejabalijawas.

⁶⁻⁷ Pablo, Bernabé swapich, chapaeis japox isaxaesox japilijawa. Samata, Pablo, Bernabé swapich, dukp Licaonia tuajnuelde, Litra paklowax poxade, Derbe paklowax poxadebej. Japapaklowaxan, moxxot asatuajnuchanbej, japi mathunalap naewuajnalijawa chimiawuajan, Jesucristo pejwuajan.

Pablo ia'tat dadapsox Litra paklowaxxot

⁸ Litra paklowaxxot aton nabejkan, laejaxilon, ek. Chinax laeja-elon, nabejkax chanlaelt xot.

⁹ Japon naewesful Pablo naewuajanpoxan. Pablo chiekal natachaemt wut nabejkanliajwa, jawut Pablo matabijet nabejkan chiekal xanaboejtpox Dios boejthulalijawaspon.

¹⁰ Samata, Pablo pinjametat jum-aech:

—jNande! —aechon nabejkanliajwa.

Jawut nabejkan matnoch nancha wut, diawjalapon. Do jawut, tuadutlison laejalijawa.

¹¹ Jiw taen wut Pablo ispoX, Licaonia tuajnupejiw tuaduti nejlax. Nejlata wut, jum-aechi: —jKolenje dioses pat xatisxot! jjapi jiw kabuan-aech! —aechi.

¹² Japi jiw jum-aech Bernabélijawa: “Ampon dios, pawul Zeus” —aechi. Jum-aechbejpi Pablolijawa: “Ampon dios, pawul Hermes” —aechi, Pablo kaes xabich naksiyamaenk xot.

¹³ Japapaklowax tathoetel Zeus pejtemploba ek. Japi pejdios pawul Zeus. Zeus pejsacerdote kaemt tor bu'pat Pablolijawa, Bernabélijawabej, japapaklowax laleyaxot. Tor wuxamasajiach naetalan, xakoeyasi. Japon sacerdote, jiw swapich, japi tor xua'asasiapi ofrenda isliajwapi Pablolijawa, Bernabélijawabej.

¹⁴ Pablo, Bernabé swapich, japox taen wut, we-isaxaesox, jawut pejnaxoe thialbapi, nejwesla xot we-isaxaesoxlijawa. Jawut fulaechlisi jiw natameja poxade. Jiwtutat wut, Pablo pinjametat wut, jum-aechon:

¹⁵ —jMa-aech xotkat xamal japox isaxaelam xanallijawa? jXanal dios-enil! jXanal jiwankal! Me-ama xamal, ja-an. Xanal fulaenx xamal naewuajnalijawan chimiawuajan, Jesucristo pejwuajan, kofalijambej isampoxan, xabich chaemil xot. jKofim babijaxan isampoxan! Dios, athuxotse dukpon, japon pejtato'lax naexasisfulde! Dios is thatbaxo, that, marbej. Isbejpon puexa taenspi thatbaxoxotse, thatlel, marxotbej.

¹⁶ Chajia wajwuajna Dios tapaei puexa jiw isliajwa pajut nejxasinkpoxan.

¹⁷ Dios isful pachaempoxan puexa jiwliajwa. Jasox Dios isful, jiw pajut chiekal matabijalijawa, ma-aech Dios. Dios to'a iam thilnalijawa, wajnaxaeyaxan muthaspi chiekal nakweti'sfulalijawa. Jasoxtat Dios nakchaxduw naxaeyaxan chawulanejchachaemlialijawas —aech Pablo sacerdotelijawa, jiwliajwabej.

¹⁸ Pablo jum-aechpox japi jumtaen wut, nakiowa tor xua'asasiapi ofrenda isliajwas Pablolijawa, Bernabélijawabej. Chinlejchkolaxtat japox is-eli.

¹⁹ Jawux judíos, Antioquia paklowaxpijiw, Iconio paklowaxpijiwbej, pa'an. Japi asaxan jum-aech japapaklowaxpijiwliajwa ulataelijawas Pablo, Bernabé swapich. Ulatiens wut, Pablo ia'tat dadaps. Dadaps wut, taenlisipon. Me-ama tap wut, ja-aechon. Samata, Pablo jolkas paklowax tathoetel.

²⁰ Pablo okxot masajiat Jesucristo pejwuajan naexasiti. Do jawut, Pablo nant. Jawutbej, pejme paklowax lowpon. Kandiawa wut, fulaechon, Bernabé swapich, Derbe paklowax poxade.

²¹ Derbe paklowaxxot Pablo, Bernabé swapich, naewuajan chimiawuajan, Jesucristo pejwuajan. Jaxot xabich jiw naexasit Jesucristo pejwuajan. Pablo, Bernabé swapich, pejme pa'an Litra paklowaxxot. Pejme pa'anbejpi Iconio paklowaxxot, Antioquia paklowaxxotbej.

²² Japapaklowaxanxot Pablo, Bernabé swapich, pejme naewuajan. Samata, Jesucristo pejwuajan naexasiti xabich kaes pejme Dios xanaboejapi. Pablo, Bernabé swapich, jum-aech: “jNaexasisfulde Jesucristo pejwuajan! Diachwuajnakolax xatis xabich nabijasaxaes ampathatat. Do japoxwux, pomatkoicha duilafalaxaes Diosxotse” —aech Pablo, Bernabé swapich.

²³ Japapaklowaxanxot Pablo, Bernabé swapich, poejiw makanoti, japi poejiw wuldulijawas ancianosliajwa, japi ancianos tataeflialijawa naexasiti Jesucristo pejwuajan. Ancianos makanoch wut, jawut puexa jiw naxae-el Dios piach kawuajnalijawa kajachawaesfulalijawas ancianos. Dios kawuajnax buxtoet wut, Pablo, Bernabé swapich, jum-aech ancianosliajwa: “Dios xamal kajachawaesfulaxael, achan xamal xanaboejampon” —aech Pablo, Bernabé swapich.

Pablo, Bernabé swapich, kaxa nawechpox Siria tuajnuelde, Antioquia paklowax poxade

²⁴ Pablo, Bernabé swapich, Pisidia tuajnu xena wut, pa'api Panfilia tuajnuaxot.

²⁵ Jaxotde, Perge paklowaxxot, japapaklowaxpijiw naewuajanpi Jesucristo pejuwajan. Do jawux, fulaechi Atalia paklowaxxot.

²⁶ Atalia paklowaxxot wut, Pablo, Bernabé suapich, barkam jul Antioquia paklowax naweliasjwa poxalijasjwade, toet xotlisi nanuamtox Diosliasjwa. Majt tuadusliasjwa wut jiw naewuajnaliasjwa, nakolapi japapaklowaxxot, Antioquia paklowaxxot, Siria tuajnulel. Japamatkoi Pablo, Bernabé suapich, nakolaliasjwa wut, Jesús pejuwajan naexasiti, japi Dios kawuajan Pablioliasjwa, Bernabéliasjwabej, japi kajachawaesfulaliasjwas Dios, jiw naewuajnalap wuti.

²⁷ Do jawut, Pablo, Bernabé suapich, chapati Seleucia paklowaxxot. Do jawux, japi pat Antioquia paklowaxxot. Jaxotde natamejapi puexa naexasiti Jesucristo pejuwajan. Jawut Pablo, Bernabé suapich, chapaei puexa Dios ispoxxot japiliasjwa. Chapaeibejpi Dios tapaeipox judíos-eli naexasisliasjwa Jesucristo pejuwajan.

²⁸ Pablo, Bernabé suapich, jaxot duili pin-iamatkoivan, Jesucristo pejuwajan naexasitixot.

15

Jerusalén paklowaxxot apóstoles, ancianos suapich, natamejapox

¹ Japamatkoi wut, asew Judea tuajnuapijiw pat Antioquia paklowaxxot. Japi jum-aech Jesucristo pejuwajan naexasitiliasjwa: “iXamal circuncidaxaelam Dios pejmarkaxliasjwa, me-ama Moisés chajia jum-aech! Circuncida-emil wut, Dios xamal bu'weyaxil” —aech Judea tuajnuapijiw.

² Pablo, Bernabé suapich, japox jumtaen wut, kaenejchaxoelaxa-el Judea tuajnuapijiw jum-aechpoxliasjwa. Samata, nabu'naloti, Judea tuajnuapijiw suapich. Do jawux, kaenejchaxoelaxa-el xoti, Antioquia paklowaxpijiw, Jesucristo pejuwajan naexasiti, nakaewa najum-aech: “To'axaes Pablo, Bernabé suapich, asew xatisxotibej, Jerusalén paklowaxxotde, jaxotde japi nospaeliasjwa, apóstoles suapich, ancianos suapichbej, circuncidaxliasjwa” —na-aechi nakaewaliasjwa.

³ Samata, Pablo, Bernabé suapich, asew jiw suapichbej, to'as fulaeliasjwa Jerusalén paklowaxxotde. Japi fol wutfuk, Fenicia tuajnuaxot, Samaria tuajnuaxotbej, japatuajnuachanpijiwliasjwa, Jesucristo pejuwajan naexasitiliasjwa, chapaeiful wut, jum-aechi: “Ampamatkoivan judíos-eli, kofa pejuwajnapijiw pejkabuapoxan. Amwutjel japi naexasisful Dioskal” —aech Pablo, Bernabé suapich. Japatuajnuachanpijiw japox jumtaen wut, xabich nejchachaemil.

⁴ Pablo, Bernabé suapich, asew jiw suapichbej, Jerusalén paklowaxxot pat wut, japi bu'kulas apóstoles, ancianosbej, asew Jesucristo pejuwajan naexasitibej. Pablo, Bernabé suapich, chapaei puexa japi ispoxxot, Dios kajachawaesfulas wut.

⁵ Do jaxot kaesuapich fariseos nana, japi naexasiti Jesucristo pejuwajan. Nana wut, jum-aechi:

—Judíos-eli, naexasiti Jesucristo pejuwajan, japibej circuncidaxaes Dios pejmarkaxliasjwa. To'axaesbejpi naexasisliasjwa Moisés chajia lelpox —aech japi fariseos.

⁶ Apóstoles, ancianos suapich, natameja kaeyaxtat japikal chiekal nejchaxoelaliasjwa circuncidaxliasjwa.

⁷ Do jawux, piach nospaei wut, Pedro nant naksiyaliasjwa. Jum-aechon:

—Takoew, xamal chiekal matabijam, Dios namakafit xamalxot chimiawuajan, Jesucristo pejuwajan, naewuajnaliasjwan judíos-eli naexasisliasjwa, japibej Dios bu'weliasjwas.

⁸ Dios chiekal matabijit kaenanula jiw nejchaxoelpoxan. Dios nak-itpaei nejchachaemilpox judíos-eliliasjwa, naexasit xoti Jesús pejuwajan. Samata, Dios to'ak Espíritu Santo japi pejmatruatanxotaliasjwabej, me-ama xatis, jachiliasjwapi.

⁹ Dios nejxasink judíos-eli. Me-ama xatis naknejasink wut, ja-aech Dios japiliasjwa. Japibej beltaens Dios, naexasit xoti Jesús pejuwajan.

¹⁰ Samata, ¿ma-aech xotkat xamal nejxasinka-emil Dios ispoxxot judíos-eliliasjwa? Moisés chajia lelpox xabich tampoel jiw chiekal naexasisliasjwa. Xatis judíos wajut chiekal naexasis-esalbej Moisés chajia lelpox. Wajwuajnapijiwbej chiekal naexasis-el japox.

¹¹ Xatis matabijas Dios naknejasinkpox. Samata, wajpaklon Dios malech nakbu'wia Jesús pijaxtat. Jatislap-is judíos-elpiliiasjwa —aech Pedro.

¹² Puexa japi boejlach chiekal chalak. Jumtaeni Bernabé, Pablo suapich, chapaeipox, isful wuti koexachan Dios pijaxtat, naewuajnaful wuti judíos-eli pejpaklowaxxot.

¹³ Naksiyax buxtoet wut, Santiago jum-aech apóstolesliasjwa, ancianosliasjwabej:

—Takoew xan chiekal, inanaewe'el

¹⁴ Simón Pedro chiekal nakjum-aech judíos-eli Dios kajachawaechpox, japi naexasit xoti Jesús pejuwajan. Samata, amwutjel chiekal matabijas, Dios tuadut makanosliasjwa judíos-eli, japi suapich, kaemutaliasjwas.

¹⁵ Japoxliajwa profetas chajia lelpox jum-aech judíos-eliliajwa: 'Japiliajwa Dios chajia jum-aech:

¹⁶ "Pejme fuloekx wut, xan puexa jiw kajachawaesxaelen japi chiekal nanaexasisliajwa. Me-ama chajiakolaxtat rey David, pejjiw suapich, chiekal nanaexasit, puexa jiw pejme jachiyaxaelbej.

¹⁷ Samata, judíos-eli xan nanaexasisaxael. Ja-aech wut, japi tajjiwaxael' —aech Dios, chajia jum-aech wut.

¹⁸ Jasox chajiakolaxtat wajpaklon Dios jum-aech xatis chiekal matabijaliajwas" —aech profetas chajia lelpox —aech Santiago apóstolesliajwa, ancianosliajwabej.

¹⁹ Santiago pejme jum-aech: "Xan nejchaxoelxpo judíos-elpiliajwa, amwut japox jumchiyaxaelen. Judíos-eli kofa pejwuajnapijiw pejkabuanpoxan Dioskal naexasisliajwa. Japi xatis kaes tato' laxisal Moisés chajia lelpoxan naexasisfulaliajwapi.

²⁰ Carta lelaxaes judíos-elpiliajwa fiasliajwas wewe' paspoxfuk. Japacartaxot lelaxaes kaechafiasliajwas choef xua' ataspi idololiajwa, japawi xaesamatapi. Lelaxaesbej fiasliajwas poejiw, asew watho' bu'moejsamata. Lelaxaesbej kaechafiasliajwas choef, kachariamakuspoxtat tupi, japawi xaesamatapi. Kaechafiasaxaesbejpi choef bu'alpi japawi xaesamatapi. Lelaxaesbej kaechafiasliajwas choefjalan fesamatapi.

²¹ Japacartaxot japoxan lelaxaes, Moisés chajia fiat xot japoxanliajwa. Pomatkoicha, natamatkoiyen wut, puexa paklowaxanxot jiw natameja wut, chanaexaljows Moisés chajia lelpox jiw naexasisliajwa. Wajwuajnapijiw tuadu wut japox" —aech Santiago apóstolesliajwa, ancianosliajwabej.

Apóstoles, ancianos suapich, carta lelpox judíos-elpiliajwa

²² Apóstoles, ancianos suapich, asew Jesucristo pejwuajan naexasiti suapichbej, kaenejchaxoelax carta lelpoxliajwa judíos-elpiliajwa. Samata, asew japixot makanoti, japi nakfulaeliajwa Pablo, Bernabé suapich, Antioquía paklowax poxade wut. Jawut makafich Judas. Japonbej pawul Barsabás. Makafichbej Silas. Japi kolenje chiekal sitaens Jesucristo pejwuajan naexasitixot.

²³ Japi xalaeyaxaelcarta, japacartatat japi lelpox jum-aech:

"Takoew, xanal apóstoles, ancianos suapich, lelx ampacarta xamalliajwa. Xamal saludax, naexasitampim Jesucristo pejwuajan, judíos-emilpim, Antioquía paklowaxpijwam, Siria tuajnujijwambej, Cilicia tuajnujijwambej.

²⁴ Xanal wultaenx asew judíos, xanalxoti, pa'apox xamalxotde. Japi xamalxot pa'a wut, naewuajan asaxan. Samata, xamal japox naewuajan wut, chiekal matnoch nejchaxoelalemil, naexasitam wut Jesucristo pejwuajan. Pe xanal japi to'a-enil xamal poxade.

²⁵⁻²⁶ Samata, xanal natamejax wut, kaeyax nejchaxoelx. Do jawut, xanalxot makafitx Judas, Silas suapich, japi xamal taeliajwa. Japi kolenje fulaech wut xamal poxade, fulaeyaxaelbej Bernabé, Pablobej, xamal taeliajwa. Bernabé, Pablo suapich, japi wajkoew, xanal xabich nejxasinkax japi. Japi nanuamt xabich chaxoelxot, wajpaklon Jesucristo pijaxtat nanuamt xoti.

²⁷ Puexa japi pat wut xamalxot, Judas, Silas suapich, chiekal chanaekabuanaxael xanal lelpox xamalliajwa.

²⁸ Xanal, Espiritu Santo suapich, kaenejchaxoelax. To'axinil xamal isliajwam tam-poelpoxan. Fiatlxax asaxan isasamatam pachaema-elpoxan.

²⁹ Samata, jnabej xae' pawí, choef, xua' ataspi idolosliajwa! ¡Chofjalan nabej fe'bej! ¡Nabej xae'bej pawí, choef, kaechariamakuspoxtat tupi! ¡Asew watho' nabej bu'moejsbej! Japoxan naexasisfulam wut, ja-am wut, chiekal duilaxaelam. Ajil kaes asaxan xamal jumchiliajwan. Dodo'. Ma amxot ampox toep" —aech carta, japi xalaeyaxaelpox.

³⁰ Do jawux, Jerusalén paklowaxpijwi, Jesucristo pejwuajan naexasiti, japi to'a Judas, Silas suapich, nakfulaeyaxaeli Bernabé, Pablo suapich, Antioquía paklowax poxade. Japi pat wut japapaklowaxxot, tameja japapaklowaxpijwi, naexasiti Jesucristo pejwuajan. Do jawut, carta chaxduti natamejaxtat.

³¹ Antioquía paklowaxpijwi xaljow wut carta, xabich nejchachaemil, chiekal chanaekabuanas xoti japacartatat.

³² Judas, Silas suapich, japi bej profetas. Japi naewuajan wut Antioquía paklowaxpijwi, japapaklowaxpijwi xabich nejchachaemil Dios kaes xanaboejapoxliajwa. Ja-aech wut, kaes Dios naexasitbejpi.

³³ Do jawux, pin-iamatkoiyen toep wut, Judas, Silas suapich, thilt, jiw to'as poxade naweliajwa. Japatuajnuxot nakolaliajwa wut, Jesucristo pejwuajan naexasiti kejachaspi. Do jawut, jumtispi: "¡Dios xamal chiekal nej chale!" —tispi.

³⁴ [Jawut Silas namanasia xot, jaxot namanpon.]

³⁵ Pablo, Bernabé suapich, Antioquia paklowaxxot namafuki-is. Japi, xabich asew jiw suapichbej, chiekal chanaekabuana Jesucristo pejwuajan. Naewuajnafalbejpi japawuajan.

Pablo, Bernabé suapich, pejme fulaeyaxaelpox naewuajnalijwapi jiw Jesucristo pejwuajan

³⁶ Do jawux, pin-iamatkoivan wut, Pablo jum-aech Bernabélijawa:

—Pejme fulaeyaxaes taelijwas wajkoew, naexasiti Jesucristo pejwuajan. Majt naewuajnasxot Jesús pejwuajan, japapaklowaxanpijiw pejme taeyaxaes, ma-aechi, amwutjel duilaful wut —aech Pablo.

³⁷ Do jawut, Bernabé nejchaxoel buflaelijwapon Juan Marcos.

³⁸ Majt Juan Marcos bu'fol wuti, japon asbuun jumch nawiat, Panfilia tuajnuxot wuti. Samata, Pablolijawa chiekal wepachaema-esal pejme buflaelijwapon Juan Marcos.

³⁹ Pablo, Bernabé suapich, kaenejchaxoelaxa-el wut buflaelijwapi Juan Marcos, do jawut, Pablo, Bernabé suapich, nadija. Jawut Bernabé bu'fol Juan Marcos. Do jawut, Bernabé, Juan Marcos suapich, juli barkam Chipre tanaet poxalijwade.

⁴⁰ Do jawutbej, Pablo makafit Silas chalalijwas. Asew japixot Dios kawuajan kachawaeslijwas Pablo, Silas suapich, jiw naewuajan wut. Do jawux, japibej chijia.

⁴¹ Pablo, Silas suapich, jiw naewuajan Jesucristo pejwuajan naexasiti, Siria tuajnupijiw, Cilicia tuajnupijiwbej, kaes pejme chiekal naexasislijwapi Dios.

16

Timoteo chalapox Pablo, Silasbej

¹ Pablo, Silas suapich, pa'a Derbe paklowaxxot. Do jawux, Listra paklowax poxadepi. Jax-ode wut, kaen taeni. Japon pawul Timoteo. Japon chiekal naexasit Jesucristo pejwuajan. Pen judíos-atow. Japow chiekal naexasit Jesucristo pejwuajan. Timoteo pax griego-aton.

² Naexasiti Jesucristo pejwuajan, Listra paklowaxpijiw, Iconio paklowaxpijiwbej, jum-aechi chimiajamechan Timoteolijawa.

³ Pablo nejchaxoel buflaelijawa Timoteo. Samata, jum-aechon Timoteolijawa: “Keto'axaelen xam circuncidaliawwa, me-ama xanal judíos, xam jachilijwam. Ja-aech wut, judíos xambej chiekal bu'kulaxaeli. Fulaeyaxaeslel xabich judíos maenk. Nej-ax griego-aton xot, xampi matabijaxael circuncida-emilpox” —aech Pablo Timoteolijawa. Samata, Timoteo circuncidas.

⁴ Do jawux, Pablo, Silas, Timoteo suapich, follisi. Kaenanula paklowaxanxot pa'a wut, japi chiekal chanaekabuana naexasiti Jesucristo pejwuajan. Japi chiekal chanaekabuana apóstoles, ancianos suapich, Jerusalén paklowaxxot natameja wut fiatpoxanlijawa.

⁵ Samata, naexasiti Jesucristo pejwuajan kaes pejme chiekal naexasiti. Kaematkoisful jiw kaes naexasisful Jesucristo pejwuajan.

Pablo masoxtat taenpox Macedonia tuajnupijin

⁶ Pablo, Silas, Timoteo suapich, Espiritu Santo tapae-esal naewuajnalijawa Jesucristo pejwuajan Asia tuajnuxot. Samata, japi matnoch xena Frigia tuajnu, Galacia tuajnubej.

⁷ Japi pat Misia tuajnumatduktot. Jaxot pat wut, fulaesiapi Bitinia tuajnu poxade. Pe pejme tapae-esal Espiritu Santo.

⁸ Samata, matnoch xenapi Misia tuajnu. Do jawux, pati Troas paklowaxxot, marbabu'tat.

⁹ Troas paklowaxxot madoi wut, Pablo masoxtat taen, Macedonia tuajnupijin nuk wut. Xabich tadut wut, jum-aechon: “¡Xabuu't Macedonia tuajnueldin xanal nakajachawaeslijwam!” —aech Macedonia tuajnupijin.

¹⁰ Pablo japox taen wut, kamta thilton Macedonia tuajnu poxalijwade. Xan Lucas jawutbej thiltax. Xanal nakaewa najum-an: “Diachwuajnakolax, Dios nakwullala xatis naewuajnalijwas chimiawuajan, Jesucristo pejwuajan, japatuajnupijiw” —na-an xanal.

Pablo Filipos paklowaxxotpox, pejnachala suapich

¹¹ Troas paklowaxxotan wut, xanal julx barkam. Matnoch chafolx Samotracia tanaet poxade. Kandiawa wut, xanal chapatx Neápolis paklowax.

¹² Jaxotan wut, fulaechx putlel Macedonia tuajnuel, Filipos paklowax poxalijwan. Japatuajnuel Filipos paklowax kaes pinjiyax. Me-ama asapaklowaxan, jachi-el. Japapaklowaxxot xabich Roma paklowaxpijiw duil. Jaxot kaematkoivan suapich xanal namaxfuk.

¹³ Xanal Filipos paklowaxxotan wutfuk, napatamatkoi wut, nakolax paklowax tathoetlel, nawel poxalijwande. Xanal nejchaxoelx: “Ampalel judíos bej natamejabej, Dios kawuajnalijawa wut” —an xanal tajnejchaxoelaxtat. Do baxael, faenx wut judíos naewuajnaba, jaxot xanalbej chalax, natamejapi suapich. Jaxot chimiawuajan, Jesucristo pejwuajan, xanal naewuajnax watho'kal.

¹⁴ Japi watho'xot, asaow pawəl Lidia. Japow Tiatira paklowaxpijow. Lidia mowa chimiab'u'an, pasoeibu'an. Japabu'an xabich ommaenk. Japow Dios naexasit. Dios kawuajanbejpow. Xabich naewetow Pablo naewuajanpox, Jesucristo pejuwajan. Japow chiekal naewet wut, jummatajibjotow Pablo naewuajanpox, Dios kajachawaech xot. Samata, Lidia chiekal naexasit Jesús pejuwajan.

¹⁵ Do jawux, japow bautisas, puexa pejiw suapich. Do jawut, jum-aechow:

—Xamal nejchaxoelam wut xanliajwa: “Diachwuajnakolax ampow pawis naexasit Jesús pejuwajan” —am wut xanliajwa, ma amwut, xamal nakfulaeyaxaelam tajba poxade duilali-ajwan kaematkoi suapich —aechow xanalliajwa.

Do jawux, xanal nakfolx japow pejba poxade.

¹⁶ Asamatkoi, xanal fulaechx wut Dios kawuajnalialjwan, taenx pawis, pansiaw. Japow dep webaes pejmatpuatxot. Dep pijaxtat xabich xajupow jumchiliajwa, jachiyaxaelpoxan. Japow esclava. Japow pejpaklochow xabich plata kana japow jum-aechpoxantat. Japow matxoelajum-aech wut asew jiwliajwa wejachiyaxaespox asamatkoi, xabich mochipow. Moch wut, japaplata japow pejpaklochowliajwa.

¹⁷ Japapaklowaxxot japow fulnanuamt Pablo, xanal suapich. Nafulnanuamt wut, nejlasfulow. Nejlasful wut, jum-aechow:

—Ampi poejiw, Dios athupijin pejiw. Ampu xamal jumchiyaxael: ‘Machiyaxaelam weliajwam Diosxotse’ —chiyaxaeli —aechow, nejlasful wut.

¹⁸ Jasox ja-aechow pin-iamatkoian, xanal nafulnanuamt wut. Samata, Pablo naewesla kaes jumtaeliajwa japow jum-aechpoxan. Samata, kaxa natfo'chapon. Do jawut, Pablo jum-aech japow pijan, dep, jumtaeliajwa:

—Dep, xam Jesucristo pijaxtat nakolde ampow pejmatpuatxot! —aech Pablo.

Do jawut, kamta dep nakolt japow pejmatpuatxot.

¹⁹ Japow pejpaklochow matabija wut japi kaes plata kanaxilox japow pijaxtat, xabich palalapi. Samata, japow pejpaklochow jaelti Pablo, Silas suapich. Jaelas wut, bu'fos japapaklowaxpijiw tato'alpi nabisti poxade.

²⁰ Do jawut, Pablo, Silas suapich, nows jueces pejuwajnalel. Pawis pejpaklochow jum-aech juecesliajwa, japi buxlajaslialjwas:

—Ampi judios uldukaful wajpaklowaxpijiw.

²¹ Japi naewuajnalap pejkabuananpox. Xatis japox isaxisal, Roma tuajnapijwas xot —aechi.

²² Japox jumtaen wut, japapaklowaxpijiw xabich palalapi Pabloliajwa, Silasliajwabej. Do jawut, jueces keto'a soldaw, Pablo, Silas suapich, wejolaliajwas pejnaxoe. Do jawux, xabich bu'jumchaselstaslisi naeyatat.

²³ Do jawux, selsax kekofas wut, jias jiw jebatat. Jiw jeba wetpon to'as chiekal wesfulaliajwas japi wesamata.

²⁴ Jiw jeba wesana japox jumtaen wut, batu pejpiezaxxot jiajon japi. Tawlaftat tuakwasixawaeksbejpi wesamata.

²⁵ Japamadoitat, pinmadoi wut, Pablo, Silas suapich, Dios kawuajan. Do jawut, jajuwpi Dios jumtaeliajwas. Asew, jaxot jiaspi, naewet.

²⁶ Do jawut, jiw jebaxot chalechikal itliakjala. Jawut jaxot xabich najuiya. Me-ama sat najaet wut, ja-aech. Do jawut, puexa bafafachan pajut nafafa'bala. Puexa jiw, jaxot jiaspi, pejmuaxanxot cadenamua wejajolpas.

²⁷ Jiw jeba xabich najuiya wut, jiw jeba wesana nathikcha. Bafafachan jumch nuilax taen wut, pej-espada kukchapon pajut naxua'laliajwa. Jiw jeba wesana nejchaxoel: “Jiasi puexa chiekal wia. Samata, tajpaklochow xankal naboesaxael” —aechon, nejchaxoel wut.

²⁸ Do jawut, Pablo nejlakcha wut, jum-aechon:

—iNajut nabej naxua'le'! iXanal puexa ma amxotan! —aech Pablo.

²⁹ Jiw jeba wesana to'a wexalaeliajwas itliakax. Itliakax wexalaens wut, bichakal najae'non Pablolal, Silaslelbej. Do jawut, japon xabich tathulal pejlewt. Pablo, Silas suapich, pejuwajnalel brixtat nukon, sitaen xot.

³⁰ Do jawut, jiw jeba wesana juton Pablo, Silas suapich, jiw jebaxot. Do jawut, jiw jeba wesana wuajnaechaemt wut, jum-aechon:

—Tajnachala, imachiyaxaelenkat xan Dios naba'welialjwa? —aech jiw jeba wesana.

³¹ Japi jumnot wut, jum-aechi:

—iXam naexasi'e wajpaklon Jesucristo pejuwajan! Ja-am wut, Dios xam bu'weyaxael. Nejbapijiw naexasit wutbej, japibej Dios bu'weyaxaes —aech Pablo, Silas suapich, jiw jeba wesana liajwa.

³² Do jawut, Jesucristo pejuwajan naewuajanlisipon, puexa pejbapijiwbej.

³³ Do jawut, japamadoitat, jiw jeba wesana matwuaaj-itfakiaton, Pablo, Silasbej, xakolbal-aspoxan. Do jawut, Pablo bautisa jiw jeba wesana, pejiw suapich.

³⁴ Do jawux, jiw jeba wesana pejba poxade buflaechon Pablo, Silas suapich. Do jawut, naxaeyax chaxduwpon Pablo, Silasbej. Jiw jeba wesana, pejjijw suapich, xabich nejchachaemil, Dios naexasit xoti.

³⁵ Kandiawasap wut, jueces buxto'a soldaw jumchiliajwa amprox: "jijw jeba wesana jum-amde amprox! ijnej tapaepon nakolaliajwa Silas, Pablo suapich, jiw jebaxot!" —aech jueces, buxto'a wut soldaw. Dolis, japi soldaw pa'a wuti jiw jebaxot, jum-aechi jueces buxto'asprox jiw jeba wesaniajwa.

³⁶ Do jawux, jiw jeba wesana soldaw buxto'asprox jum-aechon Pabloliajwa, Silasiajwabej: —Jueces nato'a xamal jukaliajwan. Samata, ima amwut nejmach nakolim! —aech jiw jeba wesana.

³⁷ Pablo japox jumtaen wut, jum-aechon soldawliajwa, wuajan xapa'anjiliajwa: —Jueces babijax is xanalliajwa, asbuan jumch xamal keto'a wuti xanal namatwuajseliliajwam naeyatat puexa jiw pejwuajnalel. Do jawux, xamal to'api jiw jebatat xanal najeliajwa. Amwutjel maliach nato'asia jasoxtat nakolaliajwan. Xanal Roma tuajnujijwan xot, jasox jiw tato'alpi isaxil, majt nawuajnaeems-el wut chiekal matabijaliajwa, diachwuajnakolax babijax isx wut, o, is-enil wut. ijueces pajut nej fulae'an xanal najukaliajwa! —aech Pablo soldawliajwa.

³⁸ Do jawut, soldaw kaxafulaech jueces poxade japox chapaeliajwapi Pablo jum-aechprox. Jueces japox jumtaen wut japi kolenje Roma tuajnujijwprox, jawut jueces pejlewla.

³⁹ Samata, jueces pajut pa'an Pablo jiasxot, Silas suapich. Do jawut, japi jueces jum-aech: —Xanal tadala, babijax isx xot xamalliajwa —aech jueces.

Jawux jueces pajut juk Pablo, Silas suapich. Do jawut, jueces xabich to'api Pablo, Silas suapich, chijiyaliajwa japapaklowaxxot.

⁴⁰ Pablo, Silas suapich, jiw jebatat nakola wut, jawut fulaechi Lidia pejba poxade. Jaxotde Pablo, Silas suapich, taen naexasiti Jesucristo pejwuajan. Do jawut, naewuajanlisi japi kaes Dios chiekal pejme naexasisfulaliajwa. Japox buxtoet wut, chijialisi japapaklowaxxot.

17

Pablo, Silas suapich, jalweksprox jaelaliajwas Tesalónica paklowaxxot

¹ Pablo, Silas suapich, fulaech wut, xenapi Anfípolis paklowax, Apolonia paklowaxbej. Dolisi, patlisi Tesalónica paklowaxxot. Jaxot judíos naewuajnaba ek.

² Napatamatkoi wut, Pablo fulaech judíos naewuajnaba poxade, japon japox pejkabuan xot. Jaxotde Pablo natameja, napatamatkoi wut. Jasox ja-aech Pablo, tres veces napatamatkoi wut. Jaxotde Pablo judíos naewuajan wut, wuajnaeentas wutbej, Pablo chiekal jumnot Dios pejjamechan, chajia lelsprox, jum-aech wut, jum-aechproxantat.

³ Jum-aechbejpon:

—Dios pejjamechan, chajia lelsprox, jum-aech wut, jum-aechox: "Cristo, Dios to'aspon puexa jiw bu'weliajwa, japon majt nabijasaxael. Tupaxaelbejpon. Do jawux, Dios mat-esaxaesona pejme dukaliajwa" —aechox. Japox chajia jum-aechox, patlisox. Xamal naewuajnaprox Jesúsiliajwa, japonlap Cristo, Dios to'aspon puexa jiw bu'weliajwa —aech Pablo, naewuajan wut.

⁴ Asew judíos, jaxoti, naexasiti Pablo naewuajanprox. Do jawut, japi kaemutlisi, Pablo, Silas suapich. Xabich asew, naksiyapi griegojame, Dios naexasiti, japibej naexasit Pablo naewuajanprox Jesucristoliajwa. Xabich watho', jiw matabijaspi, japibej naexasit Pablo naewuajanprox.

⁵ Ja-aech wut, asew judíos, japi naexasis-elpi Jesucristo pejwuajan, xabich nusasiowal. Samata, tamejapi asew babejchow, japapaklowaxplaxaxot nanuamti. Japi suapich, xabich nejlasful. Japapaklowaxpijiw xabich nejtasalas japi nejlasfulproxantat. Jasón pejbafafa xabich pi'la wut, asew japixot low japaba. Japi jalwek Pablo, Silas suapich, woeyaliajwas jiw natamejaxot.

⁶ Faena-el wuti Pablo, Silas suapich, ja-aech wut, japi jaelt Jasón, asewbej, naexasiti Jesucristo pejwuajan. Jaelas wut, jolkas paklochow poxade. Babejchow nejla'bala wut, jum-aechi, bu'pach wuti paklochow pejwuajnalel:

—Pablo, Silas suapich, japi pijaxtat, puexa paklowaxanpijiw nakaewa na-mlataen. Amwutjel ampalel fulaeni.

⁷ Japi pat wut, Jasón chiekal bu'kult pejbatat. Puexa japi jiw naexasis-el wajrey, Roma tuajnujijin, tato'alpox. Japi jum-aech: 'Asan wajrey. Pawulpon Jesús' —aech japi —aech babejchow, buxlajtat wuti Pablo, Silas suapich, paklochow pejwuajnalel.

⁸ Japox jumtaen wuti, puexa japi jiw, paklochowbej, xabich palalapi naexasitiliajwa Jesucristo pejwuajan.

⁹ Do jawut, Jasón to'as multa mosax paklochowxot. Asew swapich, naexasiti Jesucristo pejuwanjan, japi mot wutbej multa paklochowxot, paklowchow jum-aech: "Ampi plata xamal pejme wewoeyaxaelen, Pablo, Silas swapich, chijia wut ampapaklowaxxot" —aech paklochow. Do jawut, kofaslisi.

Pablo, Silas swapich, patpox Berea paklowaxxot

¹⁰ Jasón, asew swapich, kofas wut, do madoi wut, naexasiti Jesucristo pejuwanjan to'api Pablo, Silas swapich, Berea paklowaxxot poxaliajwade. Berea paklowaxxot pa'a wut, fulaechi judios naewwanjnaba poxade.

¹¹ Judios, Berea paklowaxpijiw, kaes pejme pachaempi. Me-ama judios, Tesalónica paklowaxpijiw, jachi-eli. Pablo naewwanjan wut Jesús pejuwanjan, japi chiekal naewet. Berea paklowaxpijiw pomatkoicha estudia Dios pejjamechan, chajia lelspx, chiekal matabijaliajwa, Pablo, Silas swapich, naewwanjanpoxan, diachwuanjakolax wut, o, ja-el wut.

¹² Samata, xabich judios naexasiti Jesucristo pejuwanjan. Xabich griegosbej naexasiti Jesucristo pejuwanjan. Griegos paklochowbej naexasiti Jesús pejuwanjan.

¹³ Asew judios, Tesalónica paklowaxpijiw, japox wultaen wut, Pablo Jesús pejuwanjan naewwanjanpox Berea paklowaxxot, japiwej fulaen Berea paklowaxxot poxadin. Berea paklowax pa'an wuti, xabich nejlasfali. Japapaklowaxpijiw xabich nejtsalas.

¹⁴ Naexasiti Jesucristo pejuwanjan, jum-aechi Pablolijwa: "¡Xam amxot kamta nakolde! ¡Marle fulaemch!" —aechi. Pe Silas, Timoteo swapich, nakiowa namafuki Berea paklowaxxot.

¹⁵ Pablo fulaech wut marle, asew japixot fulchallaspon Atenas paklowaxxot poxaliajwade. Pablo jaxotde pa'a wut, buwxato'apon Silas, Timoteolijwabej. Jum-aechon, buwxato'a wut: "Xamal kolenam xajupam wut fulaelajwam, ¡xabua'din xan nafaenaliajwam Atenas paklowaxxot!" —aech Pablo, buwxato'a wut. Do jawut, Pablo fulchalapi, pejme kaxa nawen.

Pablo naewwanjanpox Atenas paklowaxpijiw

¹⁶ Pablo wuanjnewet wut Silas, Timoteobej, mathunpon Atenas paklowax. Pablo taen japapaklowaxxot xabich idolos nuilpox. Pablo japoxan taen wut, xabich nejxaejwaspon.

¹⁷ Samata, Pablo, nakaiejudios swapich, nabu'nalot Jesucristo pejuwanjanliajwa, judios naewwanjnabatat wuton. Ja-aechbejpon judios-elilijwa, Dios naexasiti. Kaematkoisful papati plazaxot, japi swapichbej, Pablo nabu'nalot Jesucristo pejuwanjanliajwa.

¹⁸ Do jawux, asew Pablo faens. Japi epicúreos. Japi naexasit Epicuras naewwanjanpox. Asewbej Pablo faens. Japi estoicos. Japi naexasit Zeno naewwanjanpox. Japi epicúreosxot, estoicosxotbej, japi jum-aech babejjamechan Pablolijwa. Jum-aechi:

—Ampon aton, matabijsna-el wut, ¿chaxankaton naksiya? —na-aechi nakaewa Pablolijwa.

Asew nakaewa najum-aechbej Pablolijwa:

—Japon naewwanjan asatujnapijiw pejdiosesliajwa —na-aechi nakaewaliajwa.

Jasoxtat japi, Pablo swapich, nabu'nalot, naewwanjan xoton chemiawwanjan, Jesucristo pejuwanjan, jiw tpi pejme mat-eyaxaespxotliajwabej.

¹⁹ Do jawut, japi Pablo bu'fol pachaempoxtat paklochow natameja poxade, pawuxot Areópago. Jaxotde bu'pa'as wut, japi jum-aech:

—¡Najum-amde pajelnaewwanjnax, xam jiw naewwanjanmwuanjan!

²⁰ Xam naewwanjan asawwanjan, xanal matabija-enilwuanjan. Pe xanal chiekal matabijasian, achax chiyaxael xam jiw naewwanjanpoxan —aechi Pablolijwa.

²¹ Puexa Atenas paklowaxpijiw, asew jiwbej, japi asatujnuchanpijiw jaxot duili, japi pajelnaewwanjnax xabich nejxasink jumch naewesliajwa, naksiyalijwabej.

²² Do jawut, Pablo nant japi pejuwanjanel Areópagoxot. Jawut jum-aechon: "Atenas paklowaxpijwam, xan matabijtax xabich nejchaxoelampox nejdiosesliajwa.

²³ Xan taenx xabich maenkpoxan, xamal natamejlamxot, nejdioses kawuanjalijwam. Taenxbej kae-altar. Japa-altarleltat lelspx taenxbej. Japox jum-aech: 'Ampa-altar, dios matabija-esalpon pej-altar' —aech lelspx. Japadios xamal najut matabija-emilbej, kawuanjan wut. Japadiosliajwa ma amwut xamal jumchiyaxaelen chiekal matabijaliajwam" —aech Pablo Areópagoxot.

²⁴ Pablo pejme jum-aech: "Dios is ampathat. Ampathatat taenspoxan, japoxan Dios ispoxan. Tato'albejpon japonxotse, ampathatatbej. Samata, Dios duka-el poejiw isbatat.

²⁵ Dios chinax asax wewe'pa-esal asan aton we-isljwas. Japon pijaxtat puexa xatis chiekal duilafulas. Puexa nakwewe'ppoxan nakchaxduwbejpon" —aech Pablo.

²⁶ Pablo pejme jum-aech: "Dios majt kaen aton is. Do baxael, japon pamojiw pothata xajup, amwutjel xabichaliajwa nejmachjiw. Dios chajia nejchaxoel, amxot kaenanula, pejmutan swapich, duilaxael jiw. Nejchaxoelbejpon, maswut tuxaxaeli.

²⁷ Dios jasox is jiw wulwekaliajwaspon, jiw naexasisliajwasbejpon. Diachwujnakolax kaenanula xatisxot Dios atuaja-el.

²⁸ Dios pijaxtat duils. Nanuamtasbej. Nabistasbej. Asew nejwujnapijiwxot chajia lel wut, jum-aechi: 'Xatis Dios paxis' –aechi.

²⁹ Dios paxis xot, nejchaxoes wut, nejchaxoelaxisal: 'Dios, me-ama ídolos, jiw pajut ispoxan orotat, platatatbej, ia'tatbej' –chiyaxisal. Jiw japoxan is pejnechaxoelaxantat.

³⁰ Dios kastika-el nejwujnapijiw, isful wut babijaxan, matabija-el xotfuki Dios. Pe amwutjel, Dios to'a pothatapijiw jiw kofaliajwa babijaxan isfulpoxan, naexasisfulalijwapi Dios tato' alpoxan.

³¹ Dios chajia kaematkoï mark jumchiliajwapon ampathatpijw pejba'wujapanpoxliajwa. Dios markamatkoï pat wut, Dios makafichpon, japon jumchiyaxael jiw pachaempi Diosliajwa, o, jiw chaemili Diosliajwa. Jesús tup wut cruztat, Dios mat-echpon pejme dukali-ajwa. Samata, xatis chiekal matabijas, Jesús diachwujnakolax Dios makafich japon jumchiliajwa, masi jiw pejba'wujapan ampathatxot" –aech Pablo.

³² Atenas paklowaxpijw japox jumtaen wut, jiw tupi mat-eyaxaespox pejme duilalijawa, asew japixot bu'wujapanpaepi Pablo japoxliajwa. Asew japixot jum-aech Pablolijawa:

–Amwutjel xanal najum-ampox, asamatkoï pejme najumchiyaxaelam xanal kaes naewesliajwan –aech asew Pablolijawa.

³³ Do jawut, Pablo buxtoet wut, nakolton japi natamejaxot.

³⁴ Asew japixot nakfoli Pablo. Japi naexasiti Jesucristo pejwujapan. Kaen japixot pawul Dionisio. Japon Areopagomutpijin. Kaeow pawul Dámaris. Japowbej naexasit Jesucristo pejwujapan. Asew jaxotpi, japi naexasitbej Jesucristo pejwujapan.

18

Pablo Corinto paklowaxpijw naewujapanpox

¹ Do japoxwux, Pablo Areopagoxot nakolt wut, fulaechlison Corinto paklowax poxade. Dolison, pat Corinto paklowaxxot.

² Jaxotde Pablo faen judíos-aton. Japon Ponto tuajnapijin, pawulon Aquila. Pijow pawul Priscila. Pablo wujajna japi kolenje pa'a Corinto paklowaxxot. Japi chajia nakola Italia tuajnuel, Claudio, Roma tuajnapijiw tato'lan, to'as xoti nakolalijawa Roma paklowaxxot. Claudio chajia to'a puexa judíos nakolalijawa Roma paklowaxxot. Pablo faen wut Aquila Corinto paklowaxxot, nakfulaechon japi pejba poxade japi taeliajwa.

³ Pablo duk japi pejboxot. Japi itthow carpabu'an mowalijawa. Pablo nabist, japi swapich, matabijt xoton japabichax.

⁴ Napatamatkoïyan wut, Pablo fulalaecha judíos naewujajnaba poxade. Jaxot Pablo naewujapan judíos, judíos-elibej, naexasisliajwapi Jesucristo pejwujapan.

⁵ Silas, Timoteo swapich, pa'an wut Macedonia tuajnuel, jawut Pablo kekoft carpabu'an itthoeyax, pomatkoïcha naewujajnalijwapon Dios pejjamechan. Pablo naewujapan wut judíos, jum-aechon: "Jesús diachwujnakolax Cristo, japon xatis wujajnawechpon nakbu'welijawa" –aech Pablo, naewujapan wut judíos.

⁶ Judíos naexasis-eli Jesús pejwujapan, japi xabich palala Pablolijawa. Samata, japi babejjamechan jum-aech Pablolijawa. Samata, jawut Pablo jolcha pejsunta-osax. Jawut lulapon, japi pajut matabijalijawa babijax ispox Diosliajwa. Jum-aechon:

–Xamal najut nijaxtat napelsaxaelam, naexasis-emil xot xan naewujajnaxpox. Xan tajaxtat napelsaximil. Xamal naexasis-emil xot, judíos-elpilax naewujajnafulaxaelen Jesucristo pejwujapan –aech Pablo judíosliajwa.

⁷ Do jawut, Pablo nakolt judíos naewujajnabaxot. Fulaecheon asaba poxade. Japabapijin pawul Ticio Justo. Japon Dios xabich nejxasink. Japon pejba chiekal mox naxsoep, judíos naewujajnaba swapich.

⁸ Crispo, judíos naewujajnaba wesán, japon, puexa pejjiw swapich, asew swapichbej, naexasit Jesucristo pejwujapan. Xabich asew, judíos-eli, Corinto paklowaxpijw, jumtaen wut Jesucristo pejwujapan, japibej naexasit. Do jawut, japi bautisas.

⁹⁻¹⁰ Asamatkoï, madoi wut, Pablo masoxtat taen, Dios jum-aech wut japonliajwa. Jawut Dios jum-aech: "Xam chalafulax. Xam asew jiw kechaemilaxil. Ampapaklowaxxot xabich tajjiw nawemaenk. Samata, ¡nabej nejlewlé! ¡Nakiowa naewujajnafulde tajjamechan! ¡Nabej boejlache!" –aech Dios Pablolijawa.

¹¹ Ja-aech wut, Pablo pejléwla-el. Samata, Pablo duk Corinto paklowaxxot kaewaech y medio. Japamatkoïyantat Dios pejjamechan naewujajnafulon japapaklowaxpijw.

¹² Japamatkoïyantat, Galión gobernador Acaya tuajnuexot. Galión gobernador wut, judíos kaenejchaxoelax jaelsliajwapi Pablo. Do jawut, Pablo jaeltas. Jawut buflaecheon gobernador poxade, japon jiw tato'al wut ekxot.

¹³ Japi jum-aech gobernadorliajwa:

—Ampon aton naewuajnaful jiw naexasisliajwa Dios. Japon naewuajanpox najura-el Moisés chajia lelpox suapich, xanal naexasitxpo —aechi gobernador pejuwajnalel.

¹⁴ Pablo naksiyaliajwa wut gobernador pejuwajnalel, jawut Galión jum-aech judiosliajwa:

—Xamal judios chiekal matabijam ampo. Ampon aton natkowa wut, babijax xabich is wutbejpon, ja-aech wut, xamal chiekal naewesaxaelen.

¹⁵ Pe ampon is-el babijaxan. Xamal judios asbuan jumch nalala japon naewuajanpoxliajwa. Nalalabej japon naexasis-el xot nejkabuananpoxan, xamal naexasitampo. Samata, xamal najut chaemde japox! Xan japoxan tataefla-enil chaemsliajwan —aech Galión judiosliajwa.

¹⁶ Do jawut, gobernador Galión to'a judios nakolaliajwa japonxot.

¹⁷ Judiosxot kaen pawul Sóstenes. Japon judios naewuajnaba wesana. Do jawut, nakola wuti, griegos, jaxoti, jaelti Sóstenes gobernador Galión pejuwajnalel. Jaxot Sóstenes baes. Galión japox taen wut, chinax kefi-as-elon japi griegos.

Pablo pejme nawia'anpox Antioquia paklowax poxadin

¹⁸ Pablo duk pin-iamatkoivan Corinto paklowaxxot. Baxael, Pablo fulaeliajwa wut, ke-jachapon naexasiti Jesucristo pejuwajan. Pat wuton Cencrea paklowaxxot, fulaeliajwa wut barkamtat, jawut Pablo pajut namatnaelaxaxoton jiw matabijsliajwas, chajia jumdutpox toet xotlison Diosliajwa. Pablo jul wut barkam Siria tuajnu poxaliajwa, japabarkamtat julbej Aquila, pijow suapich.

¹⁹ Chapat wuti Éfeso paklowaxxot, jaxot Pablo waela Aquila, pijow suapich. Do jawut, tamach fulaechlison judios naewuajnaba poxade. Jaxot Pablo nospaei, judios suapich, japi natamejaxot.

²⁰ Do jawut, Pablo fiach namanaliajwa japixotfik. Pe Pablo owchi-el.

²¹ Jawut jum-aechon, kejacha wut: “Dios nejxasink wut, xamal pejme taeyaxaelen” —aech Pablo japi jiwliajwa.

Do jawux, Pablo pejme barkam jul wut, chaflaechon Éfeso paklowax poxade.

²² Cesarea paklowaxxot pat wuton, jawut putlel Pablo fulaech Jerusalén paklowax poxade. Jaxotde taenon naexasiti Jesucristo pejuwajan. Do jawux, Antioquia paklowax poxadepon.

²³ Antioquia paklowaxxot pin-iamatkoivan naman wut, do jawux, fulaechon Galacia tuajnu poxade, Frigia tuajnu poxadebej. Kaenanula japapaklowaxanxot, pat wuton, naewuajan japi kaes Dios xanaboelaliajwa.

Apolos naewuajanpox Jesucristo pejuwajan Éfeso paklowaxxot

²⁴ Japamatkoivantat kaen judios-aton pat Éfeso paklowaxxot. Japon pawul Apolos. Japon Alejandria paklowaxpijin. Naewuajan wut, puexa jiw chiekal naewechpon, naewuajanpox pachaem xot. Japon chiekal matabijt Dios pejjamechan, chajia lelpox.

²⁵ Apolos naewuajan Jesucristo pejuwajan. Samata, matabijton Dios jiw bu'weyaxaelpox Jesús pijaxtat. Nejxasinkbejpon jiw naewuajnalialjwa Jesúsristo pejuwajan. Pe japon matabijt Juan bautisapoxkal.

²⁶ Apolos judios naewuajnatat naewuajan wut, pejlwela-elon naewuajnalialjwa. Priscila, Aquila suapich, jumtaen wuti japon naewuajanpoxan, jawut buflaechipon pejba poxade nospaeliajwapi tamach, japon suapich, kaes chiekal naewuajnalialjwapon jiw Jesucristo pejuwajan.

²⁷ Do baxael, Apolos fulaeliajwa wut Acaya tuajnu poxade, Éfeso paklowaxpijiw, naexasiti Jesucristo pejuwajan, japi kajachawaet Apolos. Apolos carta welels xalaeliajwa Acaya tuajnupijiw poxade, japixot pa'a wut, chiekal bu'kulsliawwaspon. Dolison, pat wut Acaya tuajnuxot, japon xabich kajachawaet Acaya tuajnupijiw, japi naexasiti Jesucristo pejuwajan Dios pejkajachawaesaxtat.

²⁸ Apolos naewuajan judios Jesús pejuwajan. Dios pejjamechan chajia jum-aechox Jesúsliawja, japoxbej Apolos naewuajnaful puexa jiwliajwa. Naewuajanbejpon japi jiw chiekal matabijalialjwa, Jesús diachwajnakolax, Mesías, Dios, to'aspon puexa jiw bu'weliawja. Samata, judios boejlach nuil. Japi judios elchiyaxil Apolos jum-aechpoxliajwa Jesúsliawja.

¹ Apolos Corinto paklowaxxot wutfuk, Pablo fulaech pasliajwa Éfeso paklowax poxade. Pinauaxan xenafulon, fol wut. Éfeso paklowax pa'a wut, jaxot faenon Jesucristo pejuuajan naexasiti.

² Pablo japi wuajna chaemt wut, jum-aechon:

—Jesucristo pejuuajan naexasitam wut, ¿Espiritu Santokat pask nejmatriatanxot? —aech Pablo.

Japi jumnot wut, jum-aechi:

—Xanal chinax jumtae-enil Espiritu Santopoxliajwa —aechi.

³ Pablo pejme wuajna chaemt wut, jum-aechon:

—Xamal bautisa wut, ¿achanejchaxoelaxkat japox xamalliajwa? —aech Pablo.

Japi jumnot wut, jum-aechi:

—Juan, jiw bautisan, chajia jum-aechpox bautisaxliajwa —aechi.

⁴ Pablo jum-aech:

—Juan bautisa jiw, babijaxan ispoxan kofapi, japi naexasiti Dios. Juan jum-aechbej, jiw bautisafal wut: 'Xanwux kaen pasaxael. ¿japon xamal naexasi'e!' —aech Juan Jesús pejpasaxliajwa —aech Pablo Éfeso paklowaxpijiwliajwa.

⁵ Éfeso paklowaxpijiw japox jumtaen wut, kaes chiekal naexasiti Jesús pejuuajan. Jawut bautisas Jesús pijaxtat.

⁶ Pablo ke-ot wut japi pejta'antat, Espiritu Santo fuloek japi pejmatriatan poxasik. Do jawut, chalechkal japi jiw naksiya majt matabija-eljamechan. Naksiyabejpi Dios buxto'aspoxan naksiyaliajwa.

⁷ Puexa japi poejiw, doce.

⁸ Pablo duk Éfeso paklowaxxot tres juimtje. Naewuajnafulon Dios pejjamechan judíos naewuajna baxot. Naewuajan wut, chinax pejlewla-elon. Naewuajanbejpon Dios puexa pejiw tato'laxaelprox, japi naexasitpi Dios. Ja-aechon judíos chiekal naexasisliawas naewuajanpox.

⁹ Asew japixot naexasis-el, matnaetink xoti naexasisliawja. Samata, japi jum-aech babej-jamechan Jesucristo pejuuajanliajwa. Ja-aech wut, Pablo nadijan judíos naewuajna baxot. Do ja-aech wut, Jesucristo pejuuajan naexasiti bu'folon Tirano pej-escuelaba poxade. Escuelabaxot Pablo pomatkoicha naewuajan Jesucristo pejuuajan.

¹⁰ Ja-aech Pablo kolewaechje. Samata, puexa jiw Asia tuajnuxot duili, japi judíos, judíos-elibej, jumtaen Jesucristo pejuuajan.

¹¹ Pablo koechaxan isbej Dios pijaxtat.

¹² Pablo jachapoxan, panuelbu'an, asaxanbej, japoxan bu'xaeya xabu'jachas wut, japi jiw chiekal boejthals nejmachwaxae. Asew jiw, dep webaespi pejmatriatanxot, depbej nakola.

¹³⁻¹⁴ Asew judíos, nanuamt asapaklowaxan poxade. Japi pajut pijaxtat dep to'a nakolaliajwa jiw pejmatriatanxot. Jasox ispi, japi Esceva paxi. Japi sietepi. Esceva, japon sacerdotespaklon. Japi Esceva paxi jumtaen Jesucristo pejuuajan. Samata, japi dep to'a wut, jum-aechi dep nakolaliajwa: "Dep, ¿xamal to'ax nakolaliajwam Jesús pijaxtat, japonliajwa amwutjel Pablo naewuajnaful!" —aech Esceva paxi.

¹⁵ Asamatkoi, Esceva paxi dep to'a wut, dep jumnochpi. Juntispi dep: "Xan matabijtax Jesús. Matabijtaxbej Pablo. Pe xamal, ¿achewamkat?" —tispi dep.

¹⁶ Do jawut, dep, aton pejmatriatxot webaespon, japon aton dep pijaxtat wultadiowpon Esceva paxi. Japon aton dep pijaxtat xabich bapon Esceva paxi. Japi xabich malechasbej. Baes wut, bu'jolsi. Xabich xakolbalasbejpi. Do jawut, japi bu'jumchadukp, nakola wuti baxot.

¹⁷ Esceva paxi japox wejatis wut, puexa Éfeso paklowaxpijiw wultaena, judíos, judíos-elibej. Samata, puexa xabich jiw pejlewla. Jasoxtat puexa jiw sitaen Jesucristo pejuuajan.

¹⁸ Xabich jiw, Jesucristo pejuuajan naexasiti Pabloxot papasful. Ja-aech wut, puexa majt babijaxan ispoxan tulaela jiw pejuuajnalel chapaepi.

¹⁹ Asewbej, majt pinjoe'iwpi, japi xalaen pejew, pel-uaf. Japapel-uaf pinjoe'ax matabijalialjwa. Japi pel-uaf bowapi puexa jiw pejuuajnalel. Japapel-uaf xabich ommaenk. Japapel-uafan pa-om, cincuenta mil platafachan, isaspi platafachankolaxtat.

²⁰ Jasoxtat Dios pejjamechan pothata xajup. Samata, puexa jiw matabija Dios xabich mamnikpon.

²¹ Do jawux, Pablo nejchaxoel: "Xan pejme taeyaxaelen Macedonia tuajnu'pijiw, Acaya tuajnu'pijiwbej. Do jawux, pejme fulaeyaxaechan Jerusalén paklowax poxade. Jerusalén paklowaxpijiw taenx wut, do jawux, chaflaeyaxaechan Roma paklowax poxade, jaxotde jiw taeliajwanbej" —aech Pablo, nejchaxoel wut.

²² Dolisdo', Pablo to'a kolenje pejnachalan, Timoteo, Erasto suapich, Macedonia tuajnũ poxade. Pe Pablo namanfuk Asia tuajnũxot kaematkoivan suapichliajwa.

Éfeso paklowaxpijiw palalapox Pablolajwa

²³ Japamatkoiyantat, Éfeso paklowaxpijiw xabich palala, jiw kaes naexasisful xot Jesucristo pejuwajan.

²⁴ Ja-aech, jiw palala wut Demetrio pijaxtat. Demetrio platanaelsaptat kejus nejmach isliajwa. Platanaelsaptat isfulon xabich cha-aelbax. Japabax ispon, me-ama japi pejdios Artemisa pejtemploba, ta'la-aechbax. Demetrio japabax mowa wut, xabich plata kanapon, nabisti japon suapich.

²⁵ Demetrio tameja nabisti, japon suapich, asewbej, japi nabisti asabichaxan, me-ama japabichax. Natameja wut, Demetrio jum-aech: "Xamal chiekal matabijam ampabichaxtat xatis xabich plata kans chiekal duilalajwas.

²⁶ Xamal taenam Pablo. Jumtaenambejpon. Japon xabich jiw naewuajan wut, jum-aechfulon: 'Ídolos, jiw pajut ispoxan, dioskola-el' –aechon. Samata, xabich jiw naexasit Pablo naewuajanpoxan Jesúsliajwa. Koew ampapaklowaxpijiw, jachi-el. Xabich puexa Asia tuajnũpijiwbej naexasit Pablo naewuajanpoxan.

²⁷ Xatisliajwa japox chaemil. Jiw kaes nakwuaajsaxil mowasi. Kaes sitaeyaxilbejpi wajdios, pawulpox Artemisa. Sitaeyaxilbejpi japox pejtemploba. Amwutjel puexa jiw, ampapaklowaxpijiw, Asia tuajnũpijiwbej, asew jiwbej asatuajnuchanel duili, kawuajnafulbejpi Artemisa. Jiw Pablo naewuajanpox naexasit wut, ja-aech wut, japi kaes kawuajnajil Artemisa" –aech Demetrio, jiw tameja wut.

²⁸ Demetrio pejnachala japox jumtaen wut, xabich palalapi Pablolajwa. Samata, nejlaful wut, jum-aechfuli: "¡Artemisa, Éfeso paklowaxpijwas japox wajdios, pamamakolax!" –aechfuli.

²⁹ Japox jumtaen wut, Éfeso paklowaxpijiw xabich palalapi Pablolajwa. Samata, jawut, jaeltas Gayo, Aristarco suapich. Japi Macedonia tuajnũpijiw, Pablo fulchalapi. Jaelas wut, buflaech pinaba poxade, paklowaxpijiw natamejaba poxade.

³⁰ Pablo fulaesia jiw natamejaba poxade, naksiyalajwapon jiw pejuwajnalel. Pe pejnachala tapae-esal Pablo fulaeliajwa naksiyalajwa.

³¹ Do jawut, Asia tuajnũpijiwpacklochow, Pablo matabijtaspi, japibej buxxato'a Pablo fulaesa mata jiw palalapi poxade.

³² Jiw natamejaxot kaenejchaxoelaxa-el xoti, asew nejlaful wut, jum-aechful kaeyax. Asewbej nejlaful wut, asaxan jum-aechful. Japixot jiw nakaewa najum-aech: "¿Ma-aech xotkat xatis natamejlas?" –na-aechi nakaewa.

³³ Do jawut, pawulpon Alejandro fijabas jiw pejuwajnalel nukaliajwapon. Asew japixot Alejandro chapaeis, ma-aech xot jiw natameja. Do jawut, Alejandro muaxxachok'cha puexa jiw boejlachliajwa. Alejandro jumnosasia natamejapi, japi kaes palala-elaliajwa judiosliajwa.

³⁴ Japi Éfeso paklowaxpijiw matabija wut Alejandro judios-atonpox, xabich piach nejlaful, me-ama kolehora. Nejlaful wut, jum-aechfuli: "¡Artemisa, Éfeso paklowaxpijwas japox wajdios, pamamakolax!" –aechfuli.

³⁵ Do jawux, japapaklowax tataefulpon buxfiat puexa jiw boejlachliajwa. Jawut, boejlach wut, jum-aechon: "Éfeso paklowaxpijwam, pothatapijiw matabija xatis nakwewaeltox tataeflialajwas wajdios Artemisa pejtemploba. Japox pamamakolax. Japox pej-ael, me-ama ia't, athulelsik jopikpox. Japoxbej xatis tataeflas.

³⁶ Kaen aton jumchiyaxil japoxliajwa: 'Diachwuajnakolaxa-el' –chiyaxil. Samata, ¡kaes nabej nalale! ¡U!boejthulde! ¡Nabej is asax, majt chiekal nejchaxoela-emil wutfuk!

³⁷ Ampi kolenje, buflaemanpi, babijax is-el Artemisa pejtemplobaxot. Babejjamechan jumchi-elbejpi wajdiosliajwa.

³⁸ Demetrio, japonliajwa nabistibej, asan aton tasalasia wuti, japi buflaeyaxael paklochow poxade, jaxotde tasalalajwapi japon aton paklochow nabistxot. Ja-aech wut, kaenanula tasalaspí naksiyaxael pajut jumnosliajwa.

³⁹ Xamal asaxan jumchisiam wut paklochow natamejaxot, jaxot japoxan jumchiyaxaelam.

⁴⁰ Wajpaklochow bej naktasalaxaelbej, xatis natamejlas xot babijaxtat. Naktasala wut, xatis jumchiyaxisal japoxliajwa" –aech paklowax tataefulpon.

⁴¹ Japox buxtoet wut, to'apon jiw pejbachan poxade naweliajwa. Do jawut, puexa ow-aechlisi.

20

Pablo fúlaechpox Macedonia tuajnu poxade, Grecia tuajnu poxadebej

¹ Éfeso paklowaxpijiw ulboejthul wut, Pablo tameja naexasiti Jesús pejwuaajan, japi jiw kaes naewuajnalajwapon, japi kaes chiekal Dios xanaboejalajwabej. Do jawut, Pablo buxtoet wut, kejacha wut, fúlaechon Macedonia tuajnu poxade.

² Macedonia tuajnu pa'a wut, taenon naexasiti Jesucristo pejwuaajan, duil wuti, kaenanula pejmutan swapich. Dios pejjamechan naewuajnafulon kaes japi jiw chiekal Dios xanaboejalajwapi. Do jawux, Macedonia tuajnu xot nakolt wut, fúlaechon Grecia tuajnu poxade.

³ Pat wuton Grecia tuajnu xot, tres juimtelajwama namanon. Do jawux, Pablo barkam nakfúlaelajwama wut Siria tuajnu poxalajwade, Pablo waltaen judíos wuaj nawesaxaes pox boesalajwas. Pablo japox jumtaen wut, nejchaxoelon putel pejme kaxa nawiaslajwama Macedonia tuajnu poxade.

⁴ Pablo fúlchalaspi, kaen japixot pawul Sópater. Japon Berea paklowaxpijin, Pirro paxulan. Asan pawul Aristarco. Asan pawul Segundo. Japi kolenje, Tesalónica paklowaxpijiw. Asan pawul Gayo, Derbe paklowaxpijin. Asan pawul Timoteo. Asan pawul Tíquico. Asan pawul Trófimo. Tíquico, Trófimo swapich, japi Asia tuajnu pijiw.

⁵ Japi puexa wuaj nadelisi barkamat, xan Lucas, Pablo swapich, nawuaj naweslajwama Troas paklowaxxot.

⁶ Pan puthla-eli xaefiestawux, xanal Filipos paklowaxxot barkamat chijian. Cinco matkoijan wut, Troas paklowaxxot xanal chapatx. Wuaj nadelisi japapaklowaxxot, xanal nawuaj naweti. Japapaklowaxxot xanal namax siete matkoijanlajwama.

Pablo mathunpox Troas paklowaxxot

⁷ Napatamatkoi wut, xanal natamejlax, naexasiti Jesucristo pejwuaajan swapich, pan xaelialjwan. Me-ama Jesús, pejnachala swapich, chajia is, xanal japox isx. Pablo japamadoit jiw xabich naewuajan, kandiawa fúlaeyaxael xoton asapaklowax poxade. Samata, Pablo naewuajan hasta pinmadoit.

⁸ Pablo naewuajan athu pejpiezaxxotse, xanal natamejjaxxot. Jaxotse xabich lámpara tamdadusnuil.

⁹ Jaxotsebej pansian. Japon pawul Eutico. Japon ek ventanatat. Pablo xabich piach naewuajan xot, pansian moejbalalison. Do jawut, moejcha wut, jopdikon ventanaxotsik. Tres piezaxxotsik jop wut, japon chiekal xamatkaeya. Xanal baloekx wut japon taelialjwan, diachwuajnakolax japon chiekal tux.

¹⁰ Do jawut, Pablo baloek pansian taelialjwama. Jaxot pa'ak wut, Pablo brixtat nuk patupan pejwuaajnale. Pablo patupan wutakukt wut, jum-aechon Jesucristo pejwuaajan naexasitilajwama:

—¡Xamal nabej nejlewlé! ¡Ampon mat-echlison pejme laejalajwama! —aech Pablo.

¹¹ Do jawut, Pablo julach kaxase, asew swapich. Do jawut, Pablo pan jalnat wut, puexa jiw xael, japon swapich. Do jawut, nakiowa naewuajanfukon. Nalian wut, Pablo buxkofft. Do jawux, fúlaechon.

¹² Pansian xamatkaeyapon, mat-ech wut, buflaechipon pejbachade. Ja-aech wut, puexa japi jiw xabich nejchachaemil.

Pablo nakolt pox Troas paklowaxxot chafaelialjwama Mileto paklowax poxade

¹³ Xanal wuajna fúlaechx, Pablo nato'a xot chafaelialjwanbej barkamat Aso paklowax poxade, japapaklowaxxotde Pablo faenialjwan. Jasox xanal Pablo nato'a, nejchaxoel xoton putel fúlaeyax.

¹⁴ Xanal faenx wut, Pablo Aso paklowaxxot, do jawut, xanal, Pablo swapich, chafolx barkamat Mitilene paklowax poxalajwan.

¹⁵ Do jawux, kandiawa wut, Mitilene paklowaxxot barkamat chafaelchx wut, paxentax Quío paklowaxtabijla. Do kandiawa wut, chapatx tanaetpaklowax, pawul pox Samos. Do pejme asakandiawa wut, Mileto paklowax chapatx.

¹⁶ Xanal fúlae-enil Éfeso paklowax poxade, Pablo thilt xot makachlasamatan Asia tuajnu xot. Pablo nejchaxoel kamta paslajwama Jerusalén paklowaxxot Pentecostésfiesta wuajna.

Pablo wullalapox ancianos, Éfeso paklowaxpijiw

¹⁷ Pablo Mileto paklowaxxot wutfuk, wullalapon ancianos, Éfeso paklowaxpijiw. Japi paklochow Jesucristo pejwuaajan naexasiti.

¹⁸ Dolisido', ancianos pat wut, Pablo jum-aech: “Xamal chiekal namatabijam xan, akasestat patx wut ampatuajnu xot, Asia tuajnu xot. Ampatuajnu xotx wut, xamal matabijam, man xan, dukx wut xamalxot.

¹⁹ Pomatkoicha Diosliajwa nabistax, xamalxotx wut. Nejchaxoelx wut, kaematkoi nejchaxoela-enil: 'Xan pejme kaes pachaeman. Me-ama asew jiw, jachi-enil' —chi-enil, nejchaxoelx wut. Asamatkoi xan xabich nowx, jiw naexasis-el wut Dios. Xamal matabijam xan nabijataxpoخان, judíos naboesasia wut.

²⁰ Ja-an wut, xan nakiowa buxkofs-enil naewuajnaخpoxan, xamal matabijaliajwam japoxan. Xamal naewuajnafulax, kaeyaxtat natamejlam wut. Kaenanula nejbachanxot naewuajnaخbej.

²¹ Judíos, judíos-elibej, jum-an naewuajnaخ wut: '¡Kofim babijaxan isfulampoxan! ¡Naexasifulde Dios! ¡Xanaboejimbej wajpaklon Jesucristo!' —ansfulax, naewuajnafulax wut.

²² Amwut Jerusalén paklowax poxaxaechan, Espíritu Santo nato'a xot. Xan matabijs-enil, achax jachiyaxael jaxotde xanliajwa.

²³ Xan ampoxxal matabijtax Espíritu Santo pijaxtat tajutliajwa. Nejmachpaklowax-anxot patx wut, xan bej najeyaxaelbeji jiw jebaxot. Xabich bej nabijasaxaelenbej. Nejmachpaklowaxanxotx jiw naewuajnaخ wut, Espíritu Santo japox chajia najum-aech xan matabijsliajwan.

²⁴ Xan tajlewla-el japoxanliajwa. Nejchaxoela-enilbej tupaxaelenpox. Pelax xan xabich nejchaxoelx Dios pejbichax toesliajwan. Tajpaklon Jesús nato'a naewuajnalialjwan chimiauwajan, Dios puexa jiw nejxasinkpoxliajwa" —aech Pablo ancianosliajwa.

²⁵ Pablo pejme jum-aech ancianos, Éfeso paklowaxpijwliajwa: "Xamalxot chajia naewuajnaخ Dios puexa pejiw tato'laxaelpox. Amwutjel xan chiekal matabijtax. Chinax kaen xamalxot pejme kaes xan nataeyaxil ampathatat.

²⁶ Samata, xamal ampoخ jumchiyaxaelen. Xamalxot asew jiw naexasis-el wut Dios, japi napelt wut, xan tajnaewuajnaختat japi napelsaxil.

²⁷ Xamal puexa naewuajnaخ Dios pejjamechan chiekal matabijaliajwam. Chinax kaejame namana-el jumchi-eniljame.

²⁸ ¡Xamal duilafalde babijaxan is-elaxtat! Jesús mot pejjaltat jiw pejbabijaxan ispoخانliajwa. Samata, japi jiw chiekal tataefulde, Espíritu Santo japabichax xamal chaxdut xot! Me-ama owejas tataeflan chiekal tataeflafal pejew owejas, ¡xamalbej ja-amde naexasitiliajwa Jesucristo pejwuajan!

²⁹ Xan matabijtax ampoخ. Xan chijian wut, asew jiw pasaxael xamalxot japi pijaxtat xamal kofaliajwam Jesucristo pejwuajan naexasitampoخ. Me-ama lobos pat toesliajwa owejas, jachiyaxael japi jiw, xamalxot pat wuti.

³⁰ Asew jiw xamalxotbej asaxan naewuajnaخael naekichachajbalialjwa xamal, Jesucristo pejwuajan naexasitampim. Ja-aech wut, naekichachajbapijiw asew jiw xamalxot buflaeyaxaes, japi suapich, naknatamejalialjwa asabachantat.

³¹ Samata, ¡najut chiekal xamal natataefulde! ¡Nejchaxoelde tres waechanlisox xamal kaenanula naewuajnaخpox matkoi, madoibej! Asamatkoi nowxbej xamallialjwa, naewuajnaخ wut" —aech Pablo ancianos, Éfeso paklowaxpijwliajwa.

³² Pablo pejme jum-aech ancianos, Éfeso paklowaxpijwliajwa: "Takoew, xamal tamach waelaxaelen. Pe Dios xamal tataeflaxael. ¡Dios naexasisfulde! Dios naknaewuajan pejjamechan xatis matabijaliajwas Dios naknejxasinkpox. Dios mamnik. Japon xajur kajachawaesliajwa xamal kaes Dios chiekal xanaboejalialjwam. Dios xajurpej chaxduiliajwa chajia puexa jumdutpoxan, makanochpi japon pejiwliajwa.

³³ Xan dukx wut xamalxot, taenx wutbej asew pejew plata, naxoebej, japoxanliajwa xan chinax nejchaxoela-enil tejewliajwa.

³⁴ Xamal chiekal matabijam. Xan kejinil wut, tajut nabistax faenaliajwan nawewe'poxanliajwa, tajnachala wewe'paspoخانliajwabej.

³⁵ Japox ja-an xamal matabijaliajwam. ¡Xamallap-is jachiyaxaelam, nabistam wut asew jiw wewe'paspi kajachawaesliajwam! ¡Nejchafaekde wajpaklon Jesús jum-aechpox! Jum-aechon: 'Asew nakchaxduw wut, xanejchachaemlas. Pe kaes pejme xabich nejchachaemlas, xatis asew jiw chaxduws wut' —aech Jesús" —aech Pablo ancianosliajwa.

³⁶ Do jawux, Pablo buxtoet wut, puexa ancianos suapich, brixtat nuilisi Dios kawuajnalialjwa.

³⁷⁻³⁸ Do jawut, puexa nowpi. Kaenanula japi wudeti Pablo. Xusuibalabejpi, xabich nejxaejwas xot, Pablo jum-aech xot: "Chinax kaen xamalxot pejme xan nataeyaxil ampathatat" —aech xot Pablo. Do jawut, japi fulchala Pablo barkamxotdik.

21

Pablo chaflaechpox pasliajwa Jerusalén paklowax

¹ Do jaxot xanal waelax wut ancianos, barkam julx. Matnoch chaflaechx Cos paklowax poxade. Do kandiawa wut, Rodas paklowax poxandax. Rodas paklowaxxot chaliknax wut, Pátara paklowax poxande.

² Pátara paklowaxxot chapatx wut, jaxot asabarkam duk. Japabarkam fúlaeyaxaech Fenicia tñajñu poxade. Xanal japabarkam julx. Do jawut, chafolx.

³ Chafolx wut, chaxentax Chipre tanaet surlel. Do jawux, chaflaechx Siria tñajñu poxade. Siria tñajñulel, Tiro paklowaxxot, chapatx. Japabarkam xabich xafol xot japapaklowaxpijwliajwa, jaxot tunoti japabarkam.

⁴ Tiro paklowaxxot faekx naexasiti Jesucristo pejwñajan. Japixotan namaxfak siete matkoiyan. Japi Espíritu Santo pijaxtat chajia matabija Pablo nabijasaxaelpox. Samata, japi fiat Pablo fúlaesamata Jerusalén paklowax poxade.

⁵ Siete matkoiyan toep wut, japixot xanal chijian. Puexa jiw, pejwatho'jiw swapich, paxi swapichbej, xanal nafulchalapi paklowax tathoetade. Jaxot xanal brixtat nuilx thaejtat Dios kawuajñaliajwan.

⁶ Do jawut, xanal kejchax, chijiyaliajwan wut. Do jawutbej, xanal barkam julx wut, japi nawia pejbachan poxade.

⁷ Tiro paklowaxxot xanal chaliknax wut, do jawux, chapatx Tolemada paklowax. Do jaxotde, chapa'ax wut, kaes chaflae-enil minlel. Tolemada paklowaxxot naexasiti Jesucristo pejwñajan saludax. Japixot namax kaematkoiliajwa.

⁸ Do kandiawa wut, xanal chijian Tolemada paklowaxxot. Do jawut, Cesarea paklowax patx wut, Felipe pejba poxandax. Japon Felipe chimiawñajan, Jesucristo pejwñajan, jiw naewuajñafal. Japon chajia makafich, asew seis poejiw swapich, kachawaesfulaliajwapon apóstoles. Xanal namax japon pejbatat.

⁹ Japon cuatro paxulow. Japi tamach laelp. Japi watho' profetas. Samata, japi watho' naewuajñan Dios buxtó'aspoxxan jiwliajwa.

¹⁰ Felipejot kaematkoian swapich namax wut, jawut Felipe pejbaxot kaen profeta pat. Japon Judea tñajñupijin, pawalon Agabo.

¹¹ Agabo pat wut, xanal tajwñajñalel Pablo pejcinturónmuat jolchapon. Japacinturónmuatat pajut tñakwasike'lapon. Mñaxwasike'labejpon. Do jawut, jum-aechon xanalliajwa:

—Espíritu Santo najum-aech Pabloliajwa: 'Jerusalén paklowaxxot pat wut, judíos makachiyaxaeson ampacinturónmuatpijin. Do jawux, wiasaxaeson asatñajñupijiwxot, judíos-elixot' —aech Espíritu Santo —aech Agabo, jum-aech wut Pabloliajwa.

¹² Xanal japox jumtaenx wut, Cesarea paklowaxpijiw swapich, xabich fiatx Pablo fúlaesamata Jerusalén paklowax poxade.

¹³ Pablo najumnot wut, jum-aechon xanalliajwa:

—Xamal nowam wut, xanbej nanejxaejow. Dios nejxasink wut, pachaem xan namatakuiliajwa, naboesaliajwabej Jerusalén paklowaxxot, wajpaklon Jesús pijaxtat —aech Pablo.

¹⁴ Xanal Pablo fiatx wut, na-owchi-elon Jerusalén paklowax poxade fúlae-elaliajwa. Samata, jawut xanal tapaeixpon fúlaelaliajwa. Do jawut, xanal jum-an:

—Dios nejxasink wut, japox jachiyaxaeson —an xanal.

¹⁵ Jawut tejew chaemtax xalaeliajwan. Do jawut, xanal fúlaechx Jerusalén paklowax poxade.

¹⁶ Asew Cesarea paklowaxpijiw, naexasiti Jesucristo pejwñajan, xanal nafulchala Mnasón pejba poxade. Mnasón Chipre tanaetpijin. Japon kaes chajia wuajna naexasit Jesucristo pejwñajan. Japon pejbaxot xanal namax kaematkoianliajwa.

Pablo taenpox Santiago Jerusalén paklowaxxot

¹⁷ Xanal Jerusalén paklowaxxot patx wut, naexasiti Jesucristo pejwñajan chiekal nabu'kula. Xabich nejchachaemili, xanal nataen wut.

¹⁸ Kandiawa wut, Pablo xanal nakfol taeliajwapon Santiago. Jaxotbej wuajna puexa ancianos natameja.

¹⁹ Xanal patx wut Santiagoxot, Pablo puexa kejacha. Do jawut, chiekal chapaeipon puexa ispoxxan, Dios kachawaesfulas wut, judíos-elixot wut.

²⁰ Japox jumtaen wut, Santiago, ancianos swapich, chimiajamechan jum-aechi Diosliajwa. Do jawut, jum-aechi Pabloliajwa:

—Takoewan Pablo, xam chiekal matabijtam ampoxx. Xabich pin-iat judíos naexasiti Jesucristo pejwñajan. Pe japi nakiowa nejchaxoelafal: 'Xatis naexasich wut Jesucristo pejwñajan, naexasisfulaxaesbej Moisés chajia lelpox, Dios pejtato'laxxot' —aechi, nejchaxoel wut.

²¹ Asew judíos jum-aech xam naewuajnampoxliajwa: 'Pablo naewuajan wut asatajnupijiw, judíos, jum-aechon: "¡Moisés chajia lelpox xamal nabej naexasis! Xamal wewe'pa-el naxi circuncidaliajwam Dios pejmarkaxliajwa. Wajkabuanpox, wajwajnapijiw isfulpox, ¡xatis japox kofaxaes!" —aech Pablo, naewuajan wut asatajnupijiw, judíos' —aech asew judíos xamliajwa —aech Santiago, ancianos swapich, Pablo jumtaeliajwa.

²² Santiago pejme jum-aech Pablolijwa:

—Judíos wultaen wut xam patampox amxot, japi natamejaxael nakaewa najumchiliajwa. ¿Machiyaxaeskat xatis japi judíos chiekal matabijaliajwa asew judíos jum-aechpox kichachajbapox xamliajwa?

²³ Ampox isaxaes puexa jiw matabijaliajwa xam naexasisfulampox Moisés chajia lelpox. Ma amxot cuatro poejiw, xatisxot. Japilis toet chajia jumduwpoخان, Diosliajwa isaxaelpoxan.

²⁴ ¡Japi, cuatro poejiw, buflaem Dios pejtemploba poxade! ¡Dios pejtemplobaxot isde, japi swapich, isaxaelpoxan, japi pachaemaliajwa Diosliajwa! Japi kaenanula ofrenda chaxduiyaxael Diosliajwa. Xam kaenam wemosaxaelam japi poejiwliajwa. Do jawut, japi matnaelaxaxosaxael, asew jiw taens wut nejchaxoelaliajwas japiliajwa: 'Toet xotlisi ispox, pajut namatnaelaxaxoti' —chiliajwa asew jiw. Judíos taen wut xam kachawaetampox cuatro poejiw, puexa judíos pajut matabijaxael, xambej naexasisfulam Moisés chajia lelpox. Jasoxtat japi pajut matabijaxael asew jum-aechpox xamliajwa, diachwajnakolaxa-elpox.

²⁵ Judíos-eli, naexasiti Jesucristo pejwajan, japiliajwalax, xatis chajia lels, xatis kaeyax nejchaxoes xot. Japi xaeyaxil choefwi, xua'atasi ídolos-ofrendaliajwa. Choefjal feyaxilbeji. Xaeyaxilbeji pawt, choef, kachariamakuspoxtat tupi. Poejiw bu'moejsaxilbej, asew watho' —aech Santiago Pablolijwa.

Pablo jaeltaspox Dios pejtemplobaxot

²⁶ Dolisdo', kandiawa wut, Pablo japi, cuatro poejiw, bu'fol Dios pejtemploba poxade. Pajut ispon, japi swapich, isaxaelpoxan, japibej pachaemaliajwa Diosliajwa. Do jawut, Pablo low Dios pejtemploba jumchiliajwapon sacerdots, maswut japi toesaxael Diosliajwa isliajwapox, jumduwpoخان. Japamatkoitat japi kaenanula Dios chaxduiyaxael ofrenda.

²⁷ Japoxan toesliajwa we'p wut siete matkoiyan, asew judíos, japi Asia tuajnapijiw, taen Pablo, Dios pejtemplobatat wut. Do jawut, japi jum-aech babejjamechan Pablolijwa, puexa judíos ulataeliajwapi Pablo.

²⁸ Samata, jawut, japi nejlasful wut, jum-aechfuli: "Takoew, ¡xanal nakajachawae'e ampon aton jaelsliawan! Ampon aton naewuajnaful puexa paklowaxanpijw, japi naexasis-elaliajwa Moisés chajia lelpox. Jum-aechbejpon: 'Dios pejtemploba pachaema-el' —aechon. Isbejpon naktapae-elox ampateploibat, bu'low xoton griegos" —aech judíos Pablolijwa.

²⁹ Nejlasful wut, japox jum-aechfuli, chajia taen xoti Pablo, Tróximo swapich, Éfeso paklowaxpijin, bu'mathan wuton Jerusalén paklowax. Judíos, Asia tuajnapijiw, nejchaxoel: "Pablo buflaen judíos-atona-elon, Dios pejtemplobale!" —aechi, nejchaxoel wut. Pe japi nejchaxoelpox diachwajnakolaxa-el.

³⁰ Samata, Jerusalén paklowaxpijw palalapi Pablolijwa, Asia tuajnapijiw japox jum-aech wut. Puexa jiw dadakpana Pabloxot pasliajwa. Japi jaelt Pablo. Jaelt wut, Pablo jolkas Dios pejtemploba tathoetade. Jawut Dios pejtemplobafafachan faka'bapi.

³¹ We'p wut cha-aekolaxach Pablo boesaliajwas judíos, jawut, Roma tuajnapijin, soldawpaklon, jumtaen wajan, Jerusalén paklowaxpijw xabich palalapox.

³² Do jawut, soldawpaklon tameja soldaw, paklochowbej. Jawux, natameja wut, japi dukpdepi xabich jiw natameja poxade. Judíos taen wuti soldawpaklon, soldaw swapich, kekofbapi Pablo beyax.

³³ Soldawpaklon moxde Pablo poxade jaelsliawapon Pablo. Jasoxtat Pablo jaeltas buflaeliajwas. Soldawpaklon to'a soldaw japi muaxwasixawaesliajwapi Pablo kolecadenameatje. Do jawut, soldawpaklon wujnachaemt wut, jum-aechon judíosliajwa: "¿Achankat ampon aton? ¿Achababijaxkaton is?" —aech soldawpaklon.

³⁴ Asew japixot nejlasful wut, jum-aechful kaeyax. Asew nejlasful wut, asaxan jum-aechfulbej. Samata, soldawpaklon chiekal matabijs-el, xabich nejlat xoti. Samata, to'apon Pablo buflaeliajwas, soldaw duil poxade.

³⁵ Pablo bu'fos soldaw pejba poxade. Pat wuti julaliajwaxot japaba poxase, Pablo soldaw taxnoch julaliajwaxot. Jasox is soldaw, judíos xabich palala xot Pablolijwa.

³⁶ Xabich judíos wachakal folpi. Nejlasful wut, jum-aechfuli: "¡Boesam japon aton!" —aechfuli.

Pablo jumnotpox judíos pejuwajnalel

³⁷ Pablo bu'lelijawas wut soldaw pejbaxot, jawut Pablo kawuajan wut soldawpaklon, jum-aechon griegojemetat:

—Xam suapich, nospaesian kaejamechan —aechon.

Soldawpaklon wuajnaechaemt wut, jum-aechon:

—¿Xamkat naksiyam griegojame?

³⁸ Xam naksiyam wut griegojame, xam diachwuajnakolax Egipto tuajnujina-emil. Japon Egipto tuajnujijin, pejiw suapich, chajia bunbapon, Roma gobierno pejsoldaw suapich. Do jawux, najaeton, pejiw suapich, pajilax poxade. Japi, me-ama cuatro mil poejiw —aech soldawpaklon Pablolijawa.

³⁹ Pablo jumnot wut, jum-aechon:

—Xan japona-enil. Xan judíos-atonan, Tarso paklowaxpijan. Tarso paklowax kaes pejme pinjiyax. Me-ama, asapaklowaxan Cilicia tuajnuxot, jachi-el. ¡Xan natapaem naksiyalijwan ampi judíoslijawa! —aech Pablo.

⁴⁰ Do jawut, soldawpaklon tapaei Pablo naksiyalijawa. Samata, Pablo nuk bu'julachaxot. Do jawut, Pablo muaxxachok'cha puexa jiw boejlachalijawa. Judíos boejlach wut, Pablo naksiya hebreojemetat.

22

¹ Ampoxlap Pablo jum-aech judíoslijawa Jerusalén paklowaxxot: “Takoew, xamal pakdi-achowambej, ¡xan chiekal nanaewe'e jumchiyaxaelenpox xamal chiekal matabijalijwam xan babijaxan is-enilpox!” —aech Pablo judíoslijawa.

² Pablo hebreojemetat naksiya wut, japi judíos xabich boejlach nuil. Do jawut, Pablo pejme jum-aech wut, jum-aechon:

³ “Xan judíos-atonan. Nalaeltax Tarso paklowaxxot, Cilicia tuajnuxot. Amxot Jerusalén paklowaxxot ti'tax. Xan estudiax wut, Gamaliel na-itpaei. Chiekal nachanaekabuwanapon Moisés chajia lelpox, wajuwajnapijiw naexasitox. Pomatkoicha nejchaxoelx: ‘Puexa tajpamamaxtat isaxaelen Dios tato'alpoxan puexa jiw islijawa japoxan’ —an, nejchaxoelx wut. Me-ama xamal amwutjel nejchaxoelam, xan majt japox nejchaxoelx chiekal naexasislijawan Dios.

⁴ Majt xan xabich chakanamuamtax naexasiti Jesucristo pejuwajan. Jaelax wut, jiax jiw jebatat poejiw, watho'bej. Do jawux, baespi.

⁵ Sacerdotespaklokolan, judíos-ancianosbej, japoxan chiekal taen, xan isx wut. Japi nawelex carta xan xalaelijwan wajkoew judíos, Damasco paklowaxxot duilixot chaxduislijawan japox carta. Do ja-aech wut, xan Damasco paklowax poxadax naexasiti Jesucristo pejuwajan wulwekalijwan, faekx wut buflaelijwan Jerusalén paklowax poxadin, amxot kastikalijwas” —aech Pablo.

Pablo chapaeipox judíosxot, ma-aechon naexasislijawa Jesús

⁶ Pablo pejme jum-aech: “Xanal nuamtat folx wut, matnoch juimt ek wut, Damasco paklowaxxot moxan wut, chalechkal masoxtat xabich itliakjala athusik, xan folxxtosik.

⁷ Jawut juxlax satadik. Do jawutbej, jumtaenx athusik najum-aechsikpox. Japajame najum-aech: ‘Saulo, Saulo, ¿ma-aech xotkat xam nachakifolam?’ —na-aechox athusik.

⁸ Xan wuajnaechaemt wut, jum-an: ‘Tajpaklon, ¿chanaamkat xam?’ —an xan. Athusik najumnot wut, najum-aechpox: ‘Xan Jesúsnan, Nazaretpijinan. Xam nachakifolamponan’ —na-aechon athusik.

⁹ Xan nakfolpi, japibej taen itliakax. Pe japi jummatabija-el athusik najum-aechpon.

¹⁰ Xan pejme wuajnaechaemt wut, jum-an: ‘Tajpaklon, ¿achaxkat xan isaxaelen?’ —an xan. Tajpaklon Jesús najum-aech: ‘¡Nandel! ¡Fulaemch Damasco paklowax poxade! Jaxotde asan aton xam jumchiyaxael isaxaelampox’ —na-aech Jesús.

¹¹ Japox itliakax taenx wut, xan itliaklan nadofax. Kaes tae-enil. Samata, xan nakfolpi namakxafol Damasco paklowax poxade” —aech Pablo.

¹² Pablo pejme jum-aech: “Damasco paklowaxxot aton duk. Japon pawul Ananías. Japon nejxasink Dios. Chiekal naexasitbejpon Moisés chajia lelpox. Puexa judíos, Damasco paklowaxxot duili, naksiya chimiajamechan japonlijawa.

¹³ Do jawux, Ananías fulaen xan dukx poxadin. Pat wuton xanxot, jum-aechon: ‘Takoewan Saulo, ¡pejme taem!’ —aech Ananías. Do jawut, xan pejme chiekal taenx.

¹⁴ Do jawut, Ananías pejme najum-aech: ‘Wajuwajnapijiw pejDios, japon xam makafit matabijslijawam islijawam japon nejxasinkpoxan. Dios xam makafitbej taelijwam Jesús, chinax babijax is-elon. Dios xam makafitbej Jesús pejuwajan jumtaelijwam.

¹⁵ Xam xabich nanuamsaxaelam potuajnucha Jesucristo pejuwajan jiw naewuajnalijwam. Jiw chapaeiyaxaelam taenamponan, jumtaenamponanbej.

¹⁶ ¡Kaes nabej wuaj nawes! ¡Nande! ¡Bautisam! Bautisam wut, ¡wajpaklon Jesús wuljoem xam beltaeliajwa, puexa babijaxan isampoxanliajwa! —na-aech Ananías’ —aech Pablo judíosliajwa.

Pablo chapaeipox judíos, japon Dios to'aspox judíos-eli naewuajnalijwa

¹⁷⁻¹⁸ Pablo pejme jum-aech: “Do jawux, Damasco paklowaxxot nawia'nax wut, amxot Jerusalén paklowaxxotx wut, Dios pejttemploba poxadax Dios kawuajnalijwan. Chalechkal masoxtat taenx paklokolan Jesús. Jawut Jesús najum-aech: ‘¡Ampapaklowaxxot xam kamta chijiamde! Ampí jiw xam naexasisaxil xanliajwa naewuajnampoxa’ —na-aech Jesús.

¹⁹ Xan jawut, Jesús jumnotx wut, jum-an: ‘Tajpaklon, japi judíos matabija, xan asew jaelax judíos naewuaj nabachanxot, japi naexasiti nejuwan. Do jawux, japi jiw jiax jiw jebatat japi kastikalijwas.

²⁰ Japi judíos chiekal matabijabej xan kaenejchaxoelxpo, japi swapich, japi matkaejaba wut Esteban ia'tat, Esteban naewuajan wut jiw nejuwan. Esteban matkaejabas wut, japi judíos pejsumta-owa xan wetataeflax, japoxan’ —an xan Jesúsliajwa, masoxtat taenx wut.

²¹ Do pejme Jesús najum-aech: ‘¡Xabua'de! ¡Atuaj fulaemch asatuajnujpijwlede! Xam to'axaelen judíos-elpi poxade’ —na-aech Jesús’ —aech Pablo judíosliajwa.

Soldawpaklon kastikasiapox Pablo

²² Do jawut, judíos naeweti xabich palalapi, jumtaen wuti Pablo jum-aechpox judíos-elilijwa. Kaes naewes-elisi Pablo jum-aechpox. Japi nejlasax tuadut wut, jum-aechi: “¡Ampon aton kaes laejax nabej tapaetis ampathatat! Samata, ¡nej boesason!” —aech judíos.

²³ Judíos xabich palala xot, nejlasful. Do jawutbej, jolpi thuch naxoeldikpoxan. Japoxan xawisful wut, athulel as thobjapi.

²⁴ Ja-aech wut, soldawpaklon to'a pejsoldaw Pablo buflaelijwas soldaw pejbatu poxade. Pablo, bu'low's wut, soldawpaklon keto'a pejsoldaw Pablo selsliajwas, pajut chiekal chapaelijwapon, ma-aech xot judíos palala Pablolijwa.

²⁵ Pablo muaxwasikus wut selsliajwas, jawut jum-aechon soldawcapitánliajwa: —Xan Roma tuajnujpinan. Xamal tapae-eli masoxtat asbuan jumch selsliajwam aton, majt matabija-emil wut, japon aton pejbu'wuajnujpoxlajwa —aech Pablo.

²⁶ Soldawcapitán jumtaen wut Pablo jum-aechpox, jawut fulaechon chapaelijwa soldawpaklon. Jaxot pa'a wut, jum-aechon:

—Japon aton, Roma tuajnujpinan. ¿Machiyaxaelamkat japon atonliajwa? —aech capitán.

²⁷ Soldawpaklon mox soepan wut Pabloxot, wuajnujchaemt wut, jum-aechon:

—¿Diachwuajnakolaxkat xam chiekal Roma tuajnujpinan? —aech soldawpaklon.

Pablo jumnot wut, jum-aechon:

—Jn, diachwuajnakolax xan chiekal Roma tuajnujpinan —aech Pablo.

²⁸ Soldawpaklon japox jumtaen wut, jum-aechon:

—Xan diachwuajnakolax chiekal Roma tuajnujpinan-enil. Me-ama asew nalaelapi Roma tuajnujxot, xan jachi-enil. Pelax xan xabich plata motx, me-ama chiekal Roma tuajnujpinan wut, jachilijwan —aech soldawpaklon.

Do jawut, Pablo jumnot wut, jum-aechon:

—Xan diachwuajnakolax chiekal Roma tuajnujpinan, taj-ax Roma tuajnujpinan xot —aech Pablo.

²⁹ Do jawut, japi soldaw, selsasiapi Pablo, jumtaen wuti japox, sels-elisi. Asbuan jumch kofapi. Soldawpaklon matabijt wut Pablo Roma tuajnujpinan, japonbej pejlewla Pablolijwa, keto'a xoton pejsoldaw muaxwasixawaesliajwas Pablo cadenamuatat.

Pablo chapaeipox judíospaklochow pejuajnalel Jesús pejuwan naexasitpoxliajwa

³⁰ Kandiawa wut, soldawpaklon chiekal matabijsasia, ma-aech xot judíos tasalapi Pablo. Samata, soldawpaklon to'a natamejalijwa sacerdotespaklochow, puexa judíospaklochowbej. Do jawut, Pablo juch wut, cadenamu muaxwasijolson. Nochpon puexa jiw pejuwanalel natamejaxot.

23

¹ Puexa judíospaklochow natameja wut, japox pawul Junta Suprema. Pablo japi pejuwanalel nuk wut, chiekal natachaemt on japi. Jawut jum-aechon:

—Takoew, Dios matabijt xan chiekal dukxpo Diosliajwa pomatkoicha —aech Pablo.

² Jawut Ananías, sacerdotespaklokolan, keto'a mox nuili Pabloxot, Pablo xuselchaliawjas.

³ Pablo japox jumtaen wut, jum-aechon Ananíasliajwa:

—¡Xam, naekichachajbapijnam, isam Dios nejweslapox! ¡Asamatkoi Dios xam kastikaxael! Xam amxot ekam xan najumchiliajwam tajb'u'wuaianpox Moisés chajia lelpoxliajwa. Pelax xam najut naexaxis-emil Moisés chajia lelpox. ¿Ma-aech xotkat najut babijax isasiam, keto'am xot asew jiw xan naxuselchaliajwa? Moisés chajia lelpox jasox tapae-el —aech Pablo.

⁴ Jaxot mox nuili, japi jum-aech Pablolijwa:

—¿Ma-aech xotkat xam babejjamechan jum-am sacerdotespaklokolanliajwa? Xam sitae-emil Dios makafichpon —aechi Pablolijwa.

⁵ Pablo japox jumtaen wut, jum-aechon:

—Takoew, xan matabijs-enil japon sacerdotespaklokolanpon. Dios pejjamechan, chajia lelpox, jum-aech: '¡Nabej jum-aech' palaeyajamechan jiw tato'lanliajwa!' —aech chajia lelpox —aech Pablo.

⁶ Do jawut, Pablo pajut matabijt judiospaklochow, kaenejchaxoelaxa-elox. Japixot kaemut saduceos. Asamut fariseos. Samata, Pablo pinjаметat jum-aech:

—Takoew, xan fariseos-atonan. Naexasitx fariseos naewuajanpox, tajwuaianpajiw fariseos xot. Amxot natasalam, xan naexaxisfulax xot tupi mat-eyaxaesopoxliajwa pejme duilialijwa —aech Pablo.

⁷ Pablo jum-aechpox jumtaen wuti, fariseos tuadut najumchiliajwa, saduceos suapich. Do jawut, palala xoti nadijapi natamejaxot.

⁸ Saduceos naexaxis-el fariseos naexasitpoxan. Saduceos nejchaxoel: "Jiw tup wut, mat-eyaxisal pejme duilialijwa. Ajilbej ángeles. Jiw pej-aelanbej ajil" —aech saduceos, nejchaxoel wut. Pelax fariseos japoxan nejchaxoela-el.

⁹ Puxa nejlasful wut, najum-aechful. Fariseosxot, asew judios chanaekabuanapi. Japi nana wut, jum-aechi:

—Ampon aton isa-el babijax. Bej naewuajnasbejpon kaen ángel, o, bej naewuajnasbejpon espíritu —aechi Pablolijwa.

¹⁰ Fariseos xabich kaes palala saduceosliajwa, jasox naksiya wuti. Soldawpaklon japox taen wut, nejchaxoelon: "Japi bej boesaxaelbejpi Pablo" —aechon, nejchaxoel wut. Samata, soldawpaklon keto'a pejsoldaw Pablo judiosxot jusliajwas, buflaeliajwas pejme soldaw pejbatu poxade.

¹¹ Asamadoidede wut, Jesús natulaelt Pabloxot. Jawut Jesús jum-aech Pablolijwa: "Pablo, ¡nabej nejlewlé! Me-ama amxot Jerusalén paklowaxxot naksiyam wut xanliajwa, jachiyaxaelambej Roma paklowaxxot, patam wut" —aech Jesús Pablolijwa.

Judios nejchaxoelpox boesaliajwapi Pablo

¹² Do kandiawa wut, asew judiosxot, kaenejchaxoelax boesaliajwapi Pablo. Do jawutbej, nakaewa najum-aechi: "Naxaeyaxisal. Feyaxisal. Hasta xatis Pablo boesas wut, jawut pejme naxaeyaxaes. Pablo boesa-esal wut, xaes wut, ¡Dios xatis nej nakkastike!" —na-aechi nakaewa japikal.

¹³ Japi nakaewa japox najum-aechpi, me-ama kaes cuarenta poejiw.

¹⁴ Boesasiapi Pablo, japi falaechlisi sacerdotespaklochow poxade, judios-ancianos poxadebej. Pa'a wuti, jum-aechi ampox:

—Xanal naxaeyaxinil. Feyaxinil. Hasta xanal boesax wut Pablo, jawut xanal xaeyaxaelen. Xanal jum-anbej: 'Pablo tupa-el wut, xaes wut, ¡Dios nej nakkastike' xatis!' —an xanal.

¹⁵ Do jawut, xamal paklochowam, ancianos suapich, ¡wuljoem soldawpaklon Pablo buflaeliajwas ampaeldin, nejwuaianalel nukaliajwapon! ¡Soldawpaklon jum-amde: 'Xanal tajut pejme chiekal wuajnachaemsasian Pablo, jumchiliajwan pejb'u'wuaianpoxliajwa' —amde soldawpaklon! Dolisdo', Pablo buflaens wut soldaw, xanal wuajnawesaxaelen nuamfatat kamta boesaliajwan Pablo, pas-el wuton amxot —aech japi paklochowliajwa.

¹⁶ Pablo pafaman wultaen wut puax wuajnawesaxaesox nuamfatat boesaliajwas, do jawut, Pablo pafaman fulaech soldaw pejba poxade puax chapaeliajwapon japox.

¹⁷ Pablo japox jumtaen wut, lapon soldawcapitán. Capitán pat wut Pabloxot, Pablo jum-aech capitánliajwa:

—¡Ampon pansian buflaemch nejpaklon poxade, wuaian xapa'an xoton! —aech Pablo capitánliajwa.

¹⁸ Do jawut, capitán buflaechon pansian pejpaklon poxade. Pat wuton pejpaklonxot, capitán jum-aech:

—Pablo, jaeltason, xan nala wut, buflaeyax nato'apon ampon pansian xam poxade. Japon xapa'an wuaian xam chapaeliajwa —aech capitán pejpaklonliajwa.

¹⁹ Do jawut, soldawpaklon pansian pejlel buflaech wut, wuajnachaemt wut, jum-aechon pansianliajwa:

—¿Achaxkat najumchiyaxaelam? —aech soldawpaklon pansianliajwa.

²⁰ Pansian jum-aech:

—Judíos kaenejchaxoelax xam wuljoelajwa, kandiawa to'aliajwam taj-uax Pablo judiospaklochow poxade. Me-ama chiekal wuajnachemsliajwa wut, jachiyaxaeli taj-uax boesaliajwa.

²¹ Japi xam wuljow wut, jnabej ow-aeché! Me-ama kaes cuarenta poejiw wuajnewesaxaes nuamfata taj-uax boesaliajwas. Nakaewa chajia najum-aechi: 'Naxaeyaxisal. Feyaxisal. Hasta xatis Pablo boesas wut, jawut, pejme xaeyaxaes. Pablo boesa-esal wut, naxaes wut, ¡Dios nej nakkastike' xatis!' —na-aechi nakaewa. Japi wuajnewet xam to'aliajwam taj-uax Pablo —aech Pablo pafaman, chapaei wut soldawpaklonliajwa.

²² Soldawpaklon japox jumtaen wut, jum-aechon pansianliajwa:

—Ampox, najum-ampox, ¡chinax kaen aton nabej chapae! —aechon.

Do jawut, soldawpaklon pansian to'a nawiasliajwade pejba poxade.

Pablo to'aspox gobernador Félix poxade

²³ Soldawpaklon lapon kolenje pejcapiñanes. Japi pat wuti japonxot, jum-aechon japiliajwa:

—¡To'im thilsliajwa doscientos soldaw fulaeliajwa, fulaeyaxaeli tuaktat! ¡To'imbej thilsliajwa asew setenta soldaw, kawaeitat chafleaeyaxaeli! ¡To'imbej thilsliajwa doscientos soldaw, lanzaspijw, fulaeliajwa! Ampamadoitat, a las nueve wut, nakolaxaelam Cesarea paklowax poxaliajwam.

²⁴ ¡Xamal chaemde kawaei Pablo chaflaeliajwa! Bu'folam wut, ¡chiekal buflaem chamoeyaxtat gobernador Félix poxade! —aech soldawpaklon.

²⁵ Do jawut, soldawpaklon carta xato'a pejsoldawtat. Japacartaxot jum-aechon:

²⁶ “Gobernador Félix, xam puexa jiw xabich sitaenponam, saludos xato'ax xamliajwa. Xan, Claudio Lisias, lelx ampox carta xamliajwa.

²⁷ Judíos ampon aton jaelt. Boesasiapipon. Xan matabijtax wut japon Roma tuajnuapijipon, wuljae'ax, tajsoldaw suapich, japon boesa-elaliajwas.

²⁸ Xan nejchaxoelx: ‘¿Achaxliajwakat japon tasalas?’ —an, nejchaxoelx wut. Samata, buflaechx judiospaklochow poxade.

²⁹ Japi paklochow tasalapi Pablo Moisés chajia lelpoxliajwa. Pe Pablo bu'wuajanjil boesaliawas. Bu'wuajanjilbejpon jeliawas jiw jebatat.

³⁰ Xan wultaenx kaesupich judíos kaenejchaxoelaxpox maliach boesaliawapi Pablo. Samata, tajsoldaw to'ax buflaeliajwapi xam poxade. Tasalasiapi japi xan to'ax nejwuajnalel pejme chiekal jumchiliajwapi, tasalasia wuti. Dodo'. Ma amxot ampox toep” —aech carta, soldawpaklon xato'apox.

³¹ Do madoi wut, soldaw bu'follisi Pablo Antipatris paklowax poxade, pejpaklon to'as xoti.

³² Kandiawa wut, soldaw, tuaktat foli, pejme kaxa nawen pejba poxadin. Asew soldaw kawaeitat chafoli, japi, Pablo suapich, chaflaech Cesarea paklowax poxade.

³³ Soldaw Cesarea paklowaxxot pat wut, gobernadorxot carta wiati. Pablobej wiach.

³⁴ Gobernador carta xaljoeyax buxtoet wut, wuajnachaeht wut, jum-aechon Pabloliajwa: —¿Amxotpijnamkat xam? —aechon Pabloliajwa.

Pablo jumnot wut, jum-aechon:

—Xan Cilicia tuajnuapijan —aech Pablo.

³⁵ Jawut gobernador jum-aech:

—Xam naewesaxaelen, tasalapi pa'an wut —aech gobernador.

Do jawut, gobernador to'a pejsoldaw Pablo wesfulaliajwas, wesamatapon. Pablo wech pinabaxot, Herodes majt dukbaxot.

24

Pablo naksiyapox gobernador Félix pejwuajnalel

¹ Do jawux, cinco matkoiyan xent wut, Ananías, sacerdotespaklokolan, pat Cesarea paklowaxxot. Bu'paton asew judíos-ancianos, asanbej, pawulpon Tértulo. Japon abogado. Xabich matabijt jiw jumchiliajwapon, jiw pejbu'wuajan wut. Japi pat gobernador Félixxot jumchiliajwapi Pablo pejbu'wuajanpoxliajwa.

² Pablo buflaens wut paklochowxot, Tértulo tuadut jumchiliajwa Pablo pejbu'wuajanpoxliajwa. Jum-aechon Félixliajwa:

—Gobernador, xam nijaxtat xanal chiekal duilx pachaempoxantat ampatuajnutat. Xam xabich matabijtam xot nejmach isliajwam, amwutjel kaes pejme pachaem ampatuajnu. Me-ama majt, jachi-el.

³ Xanal nejhachaemlax, xam puexa isampoxanliajwa ampatuajnutat. Samata, xamliajwa xabich gracias-an xanal, xam xabich sitaenxot.

⁴ Xan nejxasink-enil xam itsasliajwan. Pe kaesupich kaes jumchiyaxaelen. ¡Xanaluk kaes nanaewe'e jum-anpox!

⁵ Xanal matabijax, ampon aton, xabich babejen. Ampon potuajnuca nanuamt naewuajnalijwa judíos. Japon pejnaewuajnextat xabich judíos nasal. Japonlap paklon kaemutpijwliajwa. Japamut Nazaretmutpijw.

⁶ Isasiapon Dios pejtemplobatat Dios tapae-elox. Bu'lesiapon asew jiw judíos-eli Dios pejtemplobaxot. Samata, xanal japon jaeltax. [Xanal japon kastikasian, me-ama xanal tajkabuan.

⁷ Pe jawut, soldawpaklon, pawalon Lisias, pejsoldaw supich, pat. Japi soldaw xanal nakife'an ampon aton.

⁸ Nakife'an wut, nato'abejpon xam poxaliawjan.] Amwutjel xam najut japon wuajnucaemsaxaelam chiekal matabijsliajwam, diachwuajnakolax wut xanal jum-anpox japon pejbu'wuajanpoxliajwa —aech Tértulo gobernador Félixliajwa.

⁹ Tértulo buxtoet wut, asew judíos, Ananías supich, pati, japi jum-aech gobernadorliajwa: “Tértulo jum-aechpox Pablolliajwa, puexa japoxan diachwuajnakolax” —aechi.

¹⁰ Do jawut, gobernador muaxxachok'cha Pablowich naksiyalijwa. Samata, Pablo jum-aech gobernadorliajwa:

—Xam ampatuajnujijw pejgobernadornam, pin-iawaechan tato'lamponam. Samata, xan nejhachaemlax jalpaeliawjan xan isfulaxpoxan xam chiekal matabijsliajwam.

¹¹ ¡Xam najut wuajnucaemde asew amxotpijw chiekal matabijsliajwam, diachwuajnakolax wut, o, el wut, xan jumchiyaxaelenpox xamliajwa! Doce matkoiyanlisox Jerusalén paklowaxxot patxpo, Dios kawuajnalijwan Dios pejtemplobatat.

¹² Dios pejtemplobaxotx wut, judíos chiekal matabija, chinax asew jiw supich, nalos-enilpox. Judíos pejnaewuajnuabachanxotx wutbej, Jerusalén paklowaxthialaxanxotx wutbej, asew jiw palala-el tajnaewuajnuaxliajwa.

¹³ Ampi poejiw, xan natasala matabijs-elaxtat tajbu'wuajanpoxliajwa.

¹⁴ Xan jumchiyaxaelenpox, diachwuajnakolax. Tajwuajnujijw pejDios naexasisfulax. Nakiowa tanbichfulaxbej japonliajwa, me-ama pajelwuajan, chimiawuajan, Jesucristo pejwuajan, jum-aechful. Ampi judíos pajelwuajanliajwa jum-aechi ampo: ‘Japox diachwuajnakolaxa-el’ —aechi. Pe japawuajan diachwuajnakolax. Xanbej naexasisfulax puexa Moisés chajia lelpox, profetas lelpoxanbej.

¹⁵ Xam judíos naexasit Dios mat-eyaxaelpox tapi pejme duilaliawja, pachaempi, pachaema-elpibej. Xanbej japox chiekal naexasitx.

¹⁶ Samata, xan chiekal dukx. Babijax is-enil Diosliajwa, jiwliawwabej —aech Pablo gobernadorliajwa.

¹⁷ Pablo pejme jum-aech gobernadorliajwa:

—Kaewaechan supich nanuamtax wut asatuajnuchanlel, japoxwux, pejme nawia'nax Jerusalén paklowax poxadin. Xapa'nax plata kejila kajachawaesliawjan. Xapa'naxbej isliawjan ofrenda Diosliajwa.

¹⁸ Japa-ofrenda isliawjan wut, isx nawewe'ppox isliawjan pachaemalijwan Diosliajwa. Do jawut, judíos, Asia tuajnujijw, nataen wut Dios pejtemplobatatx wut, jiw xabicha-el xanxot. Chinax jiw jumxan-ele-el Dios pejtemplobaxot xan tajaxtat.

¹⁹ Asia tuajnujijw, xan nataenpi Dios pejtemplobaxot, japi nej fulae'an xam nejwuajnalel natasalaliawja xan babijax isxpoxliajwa!

²⁰ Xan nataenpi Dios pejtemplobaxot, japi fulaeyaxil wut, jamxoti nej jum-aech, xan tajbu'wuajan wut, chajia natasala wuti puexa judíospaklochow pejwuajnalel!

²¹ Xan judíospaklochow pejwuajnalel majt pinjamatat jum-an: ‘Amxot xamal jum-am tajbu'wuajanpoxliajwa, xan naexasitx xot tapi mat-eyaxespox pejme duilaliawja’ —an xan. Japox jum-an xot, japi xan natasala —aech Pablo gobernadorliajwa.

²² Gobernador Félix xabich matabijt Jesucristo pejwuajanliajwa. Samata, Pablo jum-aechpox jumtaen wut, jumchi-elfukon isaxaelpox Pablolliajwa. Jawut jum-aechon Tértuloliawja, asew jiwliawwabej:

—Lisias, puexa soldawpaklon, amxot pa'an wut, kaes pejme chiekal matabijsaxaelen xam jum-ampo Pablo pejbu'wuajanpoxliajwa —aech gobernador.

²³ Do jawut, gobernador Félix jum-aechon soldawcapitánliajwa:

—¡Pablo wesfulde wesamata! ¡Pe nabej kewasixawaes! ¡Asbuan jumch masox nej laeje! ¡Tapaem pejnachala taeliawwas, chaxduiliawwasbej wewe'paspoxan! —aech gobernador capitánliajwa.

²⁴ Do jawux, kaematkoiyan supich wut, gobernador Félix, pijow supich, pejme pa'an Cesarea paklowaxxot. Pijow pawal Drusila. Japow judíos-atow. Félix pat wut, to'apon

soldaw buflaeliajwa Pablo. Pablo pa'an wut gobernadorxot, chapaeipon, ma-aech jiw naexasisliajwa Jesucristo pejwuaajan.

²⁵ Do jawut, Pablo jum-aech Félixliajwa:

—Dios to'a jiw pachaemaliajwa, chiekal duilaliajwabej. Dios to'abej jiw is-elaliajwa babijaxan, pajut isasiapoxan. Asamatkoi Dios babejchow kastikaxael —aech Pablo gobernadorliajwa.

Félix japox jumtaen wut, xabich pejlewlapon, chiekal duka-el xot. Samata, jum-aechon:

—¡Ma amxot nej doklefuk! ¡Nakolde xanxot! Pejme xam wullalaeyaxaelen, na-it-ele-el wut tajbichax —aech Félix Pabloliajwa.

²⁶ Gobernador Félix nejchaxoel: “Pablo bej namosaxaelbej plata xan nakolsax tapaeliajwan” —aech gobernador, nejchaxoel wut. Samata, Pablo pin-iamatkoian wullalas nospaeliajwapon, japon suapich.

²⁷ Jasox ja-aechful kolewaechje. Do jawux, Félix nakoft gobernadorpox. Nakoft wut, asan naliixt gobernadorliajwa. Japon pawul Porcio Festo. Félix nakolt wut, nejchaxoel: “Pablo tapaeixinil nakolsax jiasxot, judíos nejchachaemlaliajwa, xan suapich” —aech Félix, nejchaxoel wut. Samata, Félix nakolt wut, tapae-elon Pablo nakolsliajwa jiasxot.

25

Pablo nukpox Festo pejwuaajnalel

¹ Festo pat Cesarea paklowaxxot gobernador nadofaliajwa Judea tuajnuxot. Do jawux, tres matkoian xent wut, fulaechon Jerusalén paklowax poxade.

² Jerusalén paklowaxxot pa'a wut, sacerdotepaklochow, judíospaklochowbej, jum-aechi Festoliajwa:

—Japon Pablo xabich babijaxan is xanalxot.

³ ¡Xam isde pachaempox xanalliajwa, Cesarea paklowax pejme xam patam wut! ¡To'im nejjiw Pablo buflaeliajwas Jerusalén paklowax poxadin! —aech judíos Festoliajwa.

Jasox wuljowpi, Pablo buflaens wut, asew japixot nuamfatat wuaajnewesliajwa Pablo, boesaliajwasbej.

⁴ Festo jumnot wut, jum-aechon:

—Pablo Cesarea paklowaxxot jias jiw jebatat, wesfulasbejpon wesamata. Kaematkoi suapich wut, pejme japoxaxaechan.

⁵ Samata, asew xamalxot, paklochow, xan suapich, fulaeyaxael, Cesarea paklowax poxadax wut. Japon Pablo babijax is wut, japox nejpaklochow jumchixaxael —aech Festo judíosliajwa.

⁶ Gobernador Festo Jerusalén paklowaxxot namanfuk kaes kaesemanaliajwa. Dolison nawiat Cesarea paklowax poxade. Kandiawa wut, ekon paklokolan ekpoxtat, tato'laliajwa wut jiw. Jawut to'apon pejsoldaw Pablo buflaeliajwas japonleldin.

⁷ Pablo low wut, judíos mox soepa Pabloxot, japi patpi, Festo suapich, Jerusalén paklowaxpijiw. Japi judíos xabich tasalapi Pablo. Pe japi puexa jum-aechpoxan, diachwuaajnakolaxael.

⁸ Pablo jumnot wut, jum-aechon:

—Xan chinax babijax is-enil. Naexasisfulax Moisés chajia lelpox, fiatpoxbej. Dios pejttemplobaxot babijax is-enilbej. Roma tuajnupijiw tato'lanliajwa chinax babijax is-enilbej —aech Pablo japiliajwa.

⁹ Pelax gobernador Festo nejxasink judíos nejchachaemlaliajwa japonliajwa. Samata, Festo wuaajnaechamt wut, jum-aechon Pabloliajwa:

—¿Xamkat fulaesiam Jerusalén paklowax poxade, jaxotde tajwuaajnalel judíos xam tasalaliajwa nejbu'wuaajnapoxliajwa? —aech Festo Pabloliajwa.

¹⁰ Pablo jumnot wut, jum-aechon:

—Gobernador, xam nabistam puexa Roma tuajnupijiw tato'lan pijaxtat. Pachaem am-paklowaxxot judíos jumchiliajwa xam nejwuaajnalel xan natasalaliajwa, xan babijax isx wut. Xam chiekal matabijtam, xan chinax babijax is-enil judíosliajwa.

¹¹ Diachwuaajnakolax xan babijax isx wut, xan tajut xanaliyaxinil nakastikaliajwa, naboesaliajwabejpi. Diachwuaajnakolaxael wut natasalapox, xam nawiasaximil japi jiwxot. Xan babijax isx wut, kawuaajnasian nejpaklon, Roma tuajnupijiw tato'lan, japon pejwuaajnalel judíos xam natasalaliajwa —aech Pablo gobernador Festoliajwa.

¹² Samata, jawut Festo nospaei, pejiw suapich, chiekal matabijsliajwa, jumnosliajwa Pablo jum-aechpox. Festo nospaeayax buxtoet wut, pejiw suapich, jum-aechon Pabloliajwa:

—Xamlis nakawuaajnam to'aliajwan Roma tuajnupijiw tato'lan poxade. ¡To'axaelendo' jaxotde judíos xam tasalaliajwa japon pejwuaajnalel! —aech gobernador Festo Pabloliajwa.

Pablo nukpox rey Agripa wuaajnalel

¹³ Festo naksiyax buxtoet wut, Pablo suapich, kaematkoi suapich wut, rey Agripa, pakoewow Berenice suapich, pa'an Cesarea paklowaxlel kijachaliajwapi Festo, japon gubernador pajelan xot.

¹⁴ Jaxot duil wutfuki kaematkoian suapich, Festo chapaei rey Agripa Pablo ispoxanliajwa. Jum-aechon:

—Gobernador Félix nakolt wut, jiw jebatat jiaspon, nakolsax tapae-elon.

¹⁵ Xan Jerusalén paklowaxxotx wut, sacerdotespaklochow, judíos-ancianosbej, japi najum-aech jiw jebatat jiasponliajwa: 'Japon aton xabich babijax is xanalxot' —aechi. Japi nato'alach japon kastikaliajwan, boesaliajwanbejpon.

¹⁶ Xan japi jum-an: 'Puexa Roma tuajnujijiw tato'lan chinax jasox tapae-el kastikaliajwas, boesaliajwasbej, matabija-esal wutfuk, aton pejbu'wuajanpoxliajwa. Kaen aton babijax is wut, japon tasalaxaes gubernador pejwuajnalel. Dolisdo', japon aton, pejbu'wuajanpon, pajut jumnosaxael kastika-elaliajwas' —an xan judíosliajwa, japon aton tasalapiliajwa.

¹⁷ Samata, judíos ampapaklowaxxot nakpa'an wut japon aton tasalaliajwas, kamtalejen, kandiawa wut, xan ekx ekaxxot, jiw tato'laliajwan wut. Do jawux, to'ax tajsoldaw japon aton buflaeliajwas xanlel.

¹⁸ Xan nejchaxoelx wut japon atonliajwa, jum-an: 'Diachwuajnakolax Pablo xabich babijaxan bej isbej' —an, nejchaxoelx wut. Pe japon aton pat wut, judíos chinax jumchi-el japon babijax ispoxliajwa.

¹⁹ Judíos pejnaexaxisaxliajwa japon aton tasalapi. Bu'naloti Jesús pejpatupaxliajwa. Japon aton chajia jum-aech Jesús pejpatupaxliajwa: 'Jesús mat-ech Dios pejme dukaliajwa' —aech japon aton, pawulpon Pablo.

²⁰ Xan matabijs-enil, achax isaxaelen Pabloliajwa. Xan wuajnachaemtax wut, jum-an Pabloliajwa: '¿Xamkat fulaesiam Jerusalén paklowax poxade, jaxotde judíos xam tasalaliajwa nejbu'wuajanpoxliajwa?' —an xan japonliajwa.

²¹ Pelis, Pablo nakawuajan xan to'aliajwan Roma paklowaxpijiw tato'lan poxade, jaxotde tasalaliajwaspon judíos Roma paklowaxpijiw tato'lan pejwuajnalel. Samata, tajsoldaw to'ax Pablo wesfulaliajwas. Barkam fulaeyaxael wut Roma paklowax poxade, jawut japon to'axaelen wajpaklokolan poxade —aech gubernador Festo rey Agripaliajwa.

²² Do jawut, rey Agripa jum-aech Festoliajwa:

—Xanbej japon jumtaesian —aech rey Agripa.

Festo jumnot wut, jum-aechon:

—Kandiawa xam najut jumtaeyaxaelam japon —aech Festo.

²³ Kandiawa wut, rey Agripa, Berenice suapich, chamoeyaxan naxoeipi. Fulaech wut jiw natameja poxade, japabaxot pat wut, lowpi. Do jawut, xabich soldawpaklochow, japapaklowaxpijiw paklochowbej, lowlisi. Do jawux, Festo to'a pejsoldaw Pablo buflaeliajwas japi natameja poxadin.

²⁴ Bu'pat wuti Pablo, Festo jum-aech:

—Rey Agripa, xanal suapich, natamejlampimbej, xamal puexa chiekal taenam ampon aton, nejwuajnalel nukpon. Puexa judíos, Jerusalén paklowaxpijiw, ampapaklowaxpijiwbej, Cesarea paklowaxpijiw, japi jum-aech Pablo pejbu'wuajanpoxliajwa. Japi wuljoeful pinjemetat xan kastikax keto'aliajwan, tajsoldaw boesaliajwasbejpon.

²⁵ Xan nejchaxoelx Pabloliajwa: 'Pablo babijax is-el kastikaliajwas, boesaliajwasbej' —an xan, nejchaxoelx wut. Jasox nejchaxoelx wut, Pablo pajut xan nakawuajan to'aliajwan Roma paklowaxpijiw tato'lan poxade, jaxotde judíos tasalaliajwapi Pablo pejbu'wuajanpoxliajwa japon pejwuajnalel. Samata, japon to'axaelen japoxade.

²⁶ Pe xan chiekal matabijs-enil Pabloliajwa lelaxaelenpox, pelfat xato'aliajwan wut wajpaklokolan, Roma tuajnujijinliajwa. Samata, xan to'ax tajsoldaw buflaeliajwapi Pablo, xam, rey Agripa, nejwuajnalel nukaliajwapon, xamal asewam nejwuajnalelbej nukaliajwa, chiekal wuajnachaemsliajwam. Wuajnachaemsax buxtoetam wut, bej matabijsaxaelenbej lelaxaelenpox carta Pabloliajwa.

²⁷ Xan to'axinil jiaspon jiw jebatat Roma tuajnuj poxade, matabijs-enil wut, achababijaxliajwa judíos tasalapi japon —aech Festo rey Agripaliajwa.

26

Pablo jalpaeipox rey Agripa jumtaeliajwa

¹ Rey Agripa jum-aech Pabloliajwa:

—Xam buxfafonasiam wut judíos xam tasalapoxanliajwa, ¡najut naksiyam! —aech rey Agripa Pabloliajwa.

Do jawut, Pablo muaxxachok'cha japon naksiyaliajwa:

²⁻³ “Rey Agripa, xam xabich matabijtam xanal judíos tajkabuananpoxan. Matabijtambej xanal kaenejchaxoelaxa-enilpox. Samata, xabich nejchachaemlax xam nejwajnalnel naksiyalijwan, tajut chiekal jumchiliajwan, judíos natasalapoxanliajwa. Xam wuljowx chiekal xan nanaewesliajwam jumchiyaxaelenpox” —aech Pablo.

Pablo jalpaeipox majt naexasis-elpox Jesucristo pejwujajan

⁴ Pablo pejme jum-aech rey Agripaliajwa: “Puexa judíos matabija, ma-an xan, pansianan wut, dukx wut tajtujnutat, Jerusalén paklowaxxotbej.

⁵ Japi chiekal namatabijabej xan fariseos pejmuprijanpox. Xam japi wujnachaemtam wut, japi jumchiyaxael xan chiekal naexasisfulaxpox fariseos naewujjanpoxan. Fariseos naewujjanpox kaes pejme xabich tampoel tajjiw naexasisliajwa, japi kaes xabich naexasit xot Moisés chajia lelpox. Me-ama asew jiw, jachi-el japi.

⁶ Dios chajia jumdut tajwujnapijiw mat-eyaxaesopox, tur wuti pejme duilaliajwa. Japox xan naexasisfulax xot, judíos jumch natasalapi.

⁷ Puexa xanal judíos, docemutanpijwan, wujnawesfulax tupi mat-eyaxaesopox pejme duilaliajwa. Samata, puexa xanal Dios kawujnafulax. Pomatkoicha chiekal tanchifulaxbej Dios. Rey Agripa, xan ampox wujnawesfulax xot, asew judíos natasala.

⁸ ¿Ma-aech xotkat xamal naexasis-emil Dios mat-eyaxaelpox tupi pejme duilaliajwa? ¿Ajilkat Dios isaxilpox?” —aech Pablo rey Agripaliajwa.

Pablo jalpaeipox majt chakifolox jaelaliajwa naexasiti Jesucristo pejwujajan

⁹ Pablo pejme jum-aech rey Agripaliajwa: “Xan naexasis-enil wutfuk Jesucristo pejwujajan, xan tajut nejchaxoelx: ‘Jesús, Nazaret tujnuprijin, jaron pejwujajan naexasiti, xan chakifulaeyaxaelen japi jaelaliajwan’ —an xan, nejchaxoelx wut.

¹⁰ Jasox isx Jerusalén paklowaxxot. Sacerdotespaklochow natapaei xot, xabich Jesucristo pejwujajan naexasiti, japi jiw jebatat jiax. Do jawux, japi baes wut, xan xabich nejchachaemlax japoxliajwa.

¹¹ Pin-ivaces kastikax naexasiti Jesucristo pejwujajan, japi kofaliajwa naexasisfulpox Jesucristo pejwujajan. Japox isfulax puexa, judíos naewujnabachanxot. Do jawutbej, xabich talala xot, chakifolx naexasiti Jesucristo pejwujajan, asapaklowaxanxot duilibej” —aech Pablo rey Agripaliajwa.

Pablo jalpaeipox, ma-aechon naexasisliajwa Jesucristo pejwujajan

¹² Pablo pejme jum-aech rey Agripaliajwa: “Asamatkoi Damasco paklowaxpijw, Jesucristo pejwujajan naexasiti, xan chakifolx sacerdotespaklochow nato'a xot.

¹³ Samata, nuamtat folx wut, jumt matnoch ek wut, chalechkal xan, nakfolpibej, taen folxxot, chalechkal xabich itliakjala wut athusik. Japox xabich kaes pejme itliak. Me-ama jumt matkoipijin itliak wut, jachi-el.

¹⁴ Puexa xanal pajuwulax satadik. Do jawut, xan jumtaenx, hebreojametata najum-aech wut athusik: ‘Saulo, Saulo, xam xotkat xam nachakifolam? Jasox isam xot, xam najut chiekal natabejtam’ —na-aech athusik.

¹⁵ Do jawut, xan jum-an: ‘Tajpaklon, çachanamkat xam?’ —an xan. Jaron najumnot wut, najum-aechon: ‘Xan Jesúsnan, xam nachakifolamponan.

¹⁶ ¡Nande! Xamxot natulaeltax xan natanbichliajwam. Asew jiw chapaeyaxaelam xan nataenamxox. Chapaeyaxaelambej xan itpaeyaxaelenpoxan.

¹⁷ Judíosxotam wut, judíos-elixotam wutbej, xam kajachawaesaxaelen asew jiw xam boesasamata. Amwutjel xam to'ax judíos-eli poxade.

¹⁸ Xam to'ax judíos-eli naewujnalijwam Dios pejjamechan. Japi naexasisaxael Dios, kaes nejchaxoelasamata babijaxan isaxan. Japi duilaxael Dios pijaxtat. Satanás pijaxtataxil. Japi naexasisaxael tajwujjan. Ja-aech wut, xan tajaxtat Dios beltaeyaxaes babijaxan ispoxanliajwa. Samata, Dios taens wut, japi babijaxan chiekal wejilaxaes. Samata, japi jiw duilaxael, Dios pejjiw suapich, makanochpi suapich’ —na-aech Jesús” —aech Pablo rey Agripaliajwa.

Pablo jalpaeipox, ma-aechon, isful wut Jesús to'aspox

¹⁹ Pablo pejme jum-aech Rey Agripaliajwa: “Rey Agripa, xan ow-an najum-aechpon athusik.

²⁰ Ow-an wut, tudutx jiw naewujnalijwan, Damasco paklowaxpijw. Do jawux, Jerusalén paklowaxpijw naewujnax. Judea tujnuprijwbej naewujnax potujnucha. Judíos-elibej naewujnax. Japi puexa naewujnafulax babijaxan ispoxan kofaliajwa. Naewujnax naexasisliajwapi Dios. Naewujnaxbej isliajwa pachaempoxan, asew jiw matabijaliajwas, diachwujnakolaxpox japi babijaxan ispoxan kaelel kofapox.

²¹ Japoxliajwa judíos naba'ajaelt, Dios pejtemplobaxotx wut. Do jawut, naboesasiabejpi.

²² Dios nakajachawaesful naewuajnalijawan Dios pejjamechan puexa jiwliajwa, kejila, paklochowliajwabej. Xan japi naewuajnajax wut, naewuajnajax chajia jum-aechpox profetas, Moisésbej, jachiyaxaelpoxanliajwa. Japoxkal xan naewuajnafulax.

²³ Profetas chajia jum-aech wut, jum-aech: 'Dios to'a wut Cristo, japon nabijasaxael. Boesaxaesbejpon. Japon tup wut, do jawux, Dios mat-eyaxaeson pejme dukaliajwa. Japonlap matxoela mat-esaxaes pejme dukaliajwa puexa jiw wuajna pomatkoichaliajwa. Japon mat-esaxaes wut pejme dukaliajwa, japon naewuajnajaxael diachwuajnakolaxpox judíos, judíos-elibej, japi bu'weliawas. Jiw naexasit wut Jesús pejuwajan, japon pijaxtat bu'weyaxaes' —aech profetas, chajia jum-aech wut Jesúsliajwa" —aech Pablo rey Agripaliajwa.

Pablo naewuajanpox rey Agripa naexasisliajwa Jesucristo pejuwajan

²⁴ Gobernador Festo jumtaen wut Pablo jum-aechpox, pinjametat jum-aechon Pabloliajwa:

—¡Pablo xam na-acham! ¡Na-achan nadofam, xabich estudiam xot! —aech Festo.

²⁵ Do jawut, Pablo jumnot wut, jum-aechon:

—Gobernador Festo, xam puexa jiw sitaenponam, xan na-acha-enil. Xan jum-anpox diachwuajnakolax.

²⁶ Ma amxot ekpon, rey Agripa, japon chiekal matabijt xan jum-anpoxan. Samata, japon pejuwajnale chiekal jum-an puexa. Rey Agripa chajia matabijt xan jum-anpox Jesúsliajwa. Jesús ampathatat is wut, maliach is-elon —aech Pablo gobernador Festoliajwa.

²⁷ Do jawut, Pablo jum-aech rey Agripaliajwa:

—Rey Agripa, ¿xamkat naexasitam profetas chajia jum-aechpox, japox diachwuajnakolaxpox? Xan nejchaxoelx, xamlis naexasitam japox —aech Pablo rey Agripaliajwa.

²⁸ Rey Agripa jumnot wut, jum-aechon:

—Pablo, ¿xamkat nejchaxoelam: 'Ma amwut ampon naexasisaxael Jesucristo pejuwajan' —amkat, nejchaxoelam wut xanliajwa? —aech rey Agripa Pabloliajwa.

²⁹ Pablo jum-aech:

—Rey Agripa, xamkalliajwa nejchaxoela-enil. Pelax Dios kawuajnajax puexa xamal naexasisliajwam Jesucristo pejuwajan. Amwutjel naexasis-emil wut, Dios kawuajnajax asamatkoi naexasisliajwam. Nejaxsinkax xamal, xan najumtaenampim, naexasisliajwam Jesucristo pejuwajan. Xan nejaxsinkaxbej xamal, me-ama xan puexa naexasitx Jesucristo pejuwajan, jachiliajwam. Me-ama xan jiw jebatat najia, xamallax jachiyaximil, naexasitam wut Jesucristo pejuwajan —aech Pablo rey Agripaliajwa.

³⁰ Do jawut, rey Agripa nant. Gobernador Festobej nant, Berenice saapich. Do jawut, asewbej, jaxot chalakpi, puexa nana.

³¹ Matxoelananapi falaech pejlel nospaeliajwa japoxliajwa. Nospaei wut, nakaewa najum-aechi Pabloliajwa:

—Japon aton chinax babijax is-el kastikaliajwas, boesaliajwasbejpon. Jiw jebatat jeyax-isalbejpon —na-aechi nakaewa Pabloliajwa.

³² Rey Agripa jum-aech gobernador Festoliajwa:

—Pablo nakawuajna-el wut tato'laliajwan Roma tuajnupijiw tato'lan poxade, japon pejuwajnalel judíos tasalaliajwas, xan chajia tapaeyaxaelen Pablo nakolsliajwa jiw jebatat —aech rey Agripa.

27

Pablo bu'fospox Roma paklowax poxade

¹ Gobernador Festo, asew saapich, nejchaxoeli to'aliajwa Pablo Roma paklowax poxade, Italia tuajnuxot. Samata, Pablo, asew, jiw jebatat jiaspi saapich, woeyas soldawcapitánxot. Japon pawul Julio. Japamutpijiw soldaw pawul, Emperadormutpijiw.

² Xanal barkam julx, falaenpox Adramitio paklowaxxot. Xan, Lucas, nakfolx Pablo. Aristarcobej xanal nakfol. Japon Tesalónica paklowaxpijin, Macedonia tuajnuxot. Japabarkam, ma nakosaxael, itjulafulaxael paklowaxanxot, Asia tuajnuxot.

³ Do kandiawa wut, xanal chatatx Sidón paklowaxxot. Julio, soldawcapitán, sitaenpon Pablo. Samata, Sidón paklowaxxot chatatx wut, Pablo tapaeis pejnachala, jaxotpijiw, taeliajwapon, wewe'pasopoxan chaxduiliajwasbej Pablo.

⁴ Do jawux, chaflaechx Sidón paklowaxde. Joewa chaknawamatalet xot, chaxentax Chipre tanaet orientelel, joewajillel, chaflaeliajwan.

⁵ Pachaxentaxbej Cilicia tuajnux, Panfilia tuajnubej. Do jawux, chatatx Mira paklowax, Licia tuajnuxot.

⁶ Xanal Mira paklowaxxotan wut, Julio faen asabarkam, Alejandría paklowaxlel pa'nox. Japabarkam fulaeyaxael Italia tʉajnu poxade. Samata, xanal japabarkam julx nakflaeliajwan japabarkamtat.

⁷ Joewa xabich nachaknawamatalesful xot, pin-iamatkoivan bijiat chafolx. Xentax Gnido paklowaxtabijla. Do jawut, mox chaxentax Salmón paklowax, chijiasliajwan Creta tanaetlel, joewajillel chafaeliajwan.

⁸ Bijiat chafolx Creta tanaetlel, pamakakal. Chapatx Buenos Puertosxot, mox Lasea paklowaxxot.

⁹ Pin-iamatkoivan napelt xot, iama pasful. Chachoelafullisox marlel chafaeliajwa. Samata, Pablo japi naewuajan wut, jum-aechon:

¹⁰ –Tajjiw, xan chiekal matabijtax ampachafleayax xabich chachoelaxael xatisliajwa. Jelowdik taenam. Ampabarkam xafoli napelsaxael. Nafu'axaelbej ampabarkam. Puexa xatis bej bu'laxaesbej –aech Pablo.

¹¹ Soldawcapitán naexaxis-el Pablo jum-aechpox. Barkampijin, barkam isanbej, japi kolenje jum-aechpoxkal soldawcapitán naexasit. Japi jum-aech: “Pachaempoxtat chapasaxaes” –aechi asbuán jumch.

¹² Buenos Puertosxot pachaema-el barkam dukaliajwa, jaxot iama chatoepaliajwan. Samata, japi puexa nejchaxoel: “Kaes pachaem amxot nakolaliajwas, chapasliajwas Fenice paklowax, Creta tanaetxot. Japataetauakso'txot pachaem barkam dukaliajwa, iama chaxensliajwas. Jaxot joewa xaxena matwuajase” –aechi, nejchaxoel wut.

Pinajoewa barkam xafospox Creta tanaetxot

¹³ Buenos Puertosxotan wut, joewa bijiat pasful wuchakallel. Asew xanalxot nejchaxoel: “Pachaem chafaeliajwas” –aechi, nejchaxoel wut. Samata, pachafolx Creta tanaetlel, pamakakal.

¹⁴ Do jawut, chalechkal xabich pinajoewa pasful barkam poklalel.

¹⁵ Japajoewa xanal nachaknawaxafol tanaet tathoetlel. Barkam xajiasaxil joewalel, joewa xabich kaes mamnik xot. Samata, japi tapaei joewa xalaeliajwas barkam.

¹⁶ Cha-aeltanaeta-ulel pachaxentax. Japataeta pawl Cauda. Jaxotde xabich joewa wika-el. Barkamta-utat kanaw ke'tas. Jasoxtat japakanaw fol. Japakanaw osliajwan wut barkamtat, xabich bichaxtat pa-otx. Japox kanaw xabich dewnik.

¹⁷ Do jawux, kanaw pa-otx wut barkamtat, barkam fatkuifulisi pinamuatantat, tablofachan kakupasamata. Jawut nabisti barkamtat pejlowlapi, nejchaxoel xoti: “Lukpox, pawulox la Sirte, jaxot bej cha-okjabaxaesbej” –aechi, nejchaxoel wut. Samata, jolpi velasbu'an joewa xabich xalaesamata barkam. Ja-aech wut, barkam kaes bijiat fol.

¹⁸ Do kandiawa wut, xabich pinajoewaful. Xabich iambej. Do jawutbej, barkam xafolpoxan taadutlisi chapelisliawa minadik, barkam kaes jaje'kaliajwa.

¹⁹ Do asakandiawa wut, barkam xa-ispil pelti minadik.

²⁰ Pin-iamatkoivan tae-enil juimt matkoipijin. Ithaejbej tae-enil, madoi wut. Xanal nejchaxoelx: “Bej chabu'laxaesbej” –an xanal, nejchaxoelx wut, kaes pejme xabichful xot joewa, iambej.

²¹ Pin-iamatkoivan xanal chinax naxae-enil. Do jawut, Pablo nant japixot. Jum-aechon: –Tajjiw, chiekal nanaexasitam wut, ja-aech wut, kaes pachaemaxael chafleae-elaliajwas, Creta tanaetxotas wut. Ja-aech wut, nabijasaxisal. Napelsaxilbej barkam xafolpoxan.

²² ¡Pe xamal nabej nejchaemile! Japoxliajwa! Xamalxot chinax kaen tʉpaxil. Barkamkal nafa'axael.

²³ Xanxot madoi ángel natulaelt. Japon to'as Dios. Diosliajwa, xan tanbistaxponan.

²⁴ Ángel najum-aech: 'Pablo, xam nabej nejlewlé! Xam fulaeyaxaelam Roma paklowax poxade, jaxotde nukaliajwam Roma tʉajnujijiw tato'lan pejwuajnalel. Dios xam bu'weyaxael xot, asew jiwbej bu'weyaxaes, puexa folpi ampabarkamtat' –na-aech ángel, xanxot natulaelt wut.

²⁵ Samata, ¡puexa xamal nabej nejlewlé! Xan Dios xanaboejtax. Matabijtax Dios nakbu'weyaxaelpox, me-ama ángel najum-aech.

²⁶ Joewa nakchaknawaxalaeyaxael tanaet poxade. Jaxotde cha-okaxaes –aech Pablo puexa japabarkamtat folpiliajwa.

²⁷ Catorce madoivan xent wut barkamtat, chalixaxfuk mar Adriáticoxot, xabich xot joewa. Japamadoi, pinmadoit wut, barkamtat nabisti nejchaxoel: “Bej chapachbej sat” –aechi, nejchaxoel wut.

²⁸ Samata, xajutlisi muat, mas-is so'nikpox. So'nikpox treinta y seis metros. Kaes chafulaech wuti, pejme xajuti. So'nikpox veintisiete metros.

²⁹ Do jawut, japi pejlwla, nejchaxoel xoti: “Ia'botxot bej chakulaxaesbej” –aechi, nejchaxoel wut. Samata, jawut barkamta-ulel cuatro padewaxan, pawulpi anclas, ke'api

pelsliawadik minadik, japadewaxantat barkam kaekawutat dukafalialijwalejen. Jasox is wuti, pejdioses kawuajan kamta nalialialijwa.

³⁰ Pe jawut, barkamtat nabisti, japikal nejchaxoel tamach weliajwapi barkamxot, ia'botxot chakula-el wutfuki. Samata, kanaw, ottox barkamtat, japi pejme dusasiak minadik japi tamach weliajwa japoxtat. Japi jum-aech asew naekichachajbalialijwa: "Barkam-oeffel xanal padewaxan pelsaxaekan" —aechi.

³¹ Do jawut, Pablo chiekal matabijt wut japi isaxaelpox, jawut jum-aechon soldawcapitanlijaw, japon pejsoldawlijawabej:

—jBarkamtat nabisti kaweta napata-el wut barkamtat, xamal weyaximil! —aech Pablo.

³² Soldaw jumtaen wut Pablo jum-aechpox, japi soldaw muu tasiapbala, kanawmuu, kanaw jopaliajwa minadik.

³³ Kandiawa, nalian wut, Pablo kaechato'a puexa jiw xaelialijwa. Jum-aechon:

—Catorce matkoiyan chiekal naxae-esal, xabich nejchaxoels xot.

³⁴ Samata, jxuem mamnkaliajwam, tupa-elalijwambej! jE-ese! Puexa chiekal weyaxaes —aech Pablo.

³⁵ Pablo japox jum-aech wut, panax fitlison. Puexa jiw pejwujnalel Dios kawuajan wut, jum-aechon: "Waj-ax Dios, gracias-an xanal nachaxdutampox, panax" —aechon. Do jawut, panax jalnat wut, xaelon.

³⁶ Do jawutbej, puexa jiw nejkofo xabich nejchaxoelpoxan. Jawut japibej xael.

³⁷ Puexa xanal, barkamtat chafolaxpin, doscientos setenta y seis jiwian.

³⁸ Do jawut, xael wuti, ma xaesiapoxantat xael wuti, do jawux, trigobulan chapelti minadik, barkam kaes chiekal jaje'kaliajwa.

Barkam cha-okjaba wut, tablofachan xakusabasopox

³⁹ Sesa itliakaful wut, barkamtat nabisti taen wuti tanaet, matabija-eli. Taeni tanaetukso't. Japatanaetukso'txot taenbejpi thaejt. Taen wut japathaejt, cha-itjulasiapi japathaejt poxade.

⁴⁰ Jawut anclas juka-eli. Do jaxot asbuan jumch kaweta anclamua tasiapbalapi. Barkamkanaefachan, koloeyax pinjiyax, ta-ulel xatbe'aliajwapox, joli. Do jawutbej, matx-odelavelabu', xakoeyasopox, jolti felsliawadik, japavelabu'tat joewa xalaelialijwa barkam. Do jawut, barkam joewa xafos wut, barkam moxsfulde thaejt pasliajwa.

⁴¹ Jawut chalechkal barkam pa-oeffel okjaba lukxot. Atuajfuk thaejt chapasliajwan. Barkam pa-oeffel okjaba wut, jukaxil japox, barkam. Barkam ta-ulel xabichful xot truxan, tablofachan kakupax tuadat.

⁴² Soldaw besia, jiw jebatat jiaspi, japi bu'fospi, jow wut, weyaxael xoti.

⁴³ Pe soldawcapitan ketapae-el, Pablobej boesaxaes xot. Samata, capitán puexa jiwliajwa jum-aech: "Min joeyax matabijampim, jmatxoela joem thaejt pasliajwam!"

⁴⁴ Asewam, min joeyax matabija-emilpim, jwuchakal chajoem tablofachantat! O, jpachajoem barkamtoerowtat, po'alpitat!" —aech capitán jiwliajwa. Do jasoxtat xanal puexa chiekal wiax.

28

Pablo Malta tanaetxotpox

¹ Xanal puexa chiekal wiax wut, jawut matabijtax japatanaet pawulpox Malta.

² Malta tanaetpijiw chiekal pachaempi xanallialijwa. Do jawut, xabich iam thilan xot, xabich thunk. Samata, jaxot pinajit itfoti. Xanal nataduti jit naksu'chalakaliajwan.

³ Pablo i not wut jit it-owaliajwa, jawut jom, paxaechan, nankolcha jit tuajaxtat. Do jawut, jom kelaliklas wut, Pablo kexadukson.

⁴ Malta tanaetpijiw japox taen wut, nakaewa najum-aechi: "Ampon aton jiw baen. Di-achwujnakolax marxot wiapon. Pelax wajdios kaes tapaeaxaisal laejalialijwapon. Samata, jom laliklison tupalialijwa" —aechi nakaewa Malta tanaetpijiw.

⁵ Do jawut, Pablo kelula wut, jom jopdik jitadik. Pe Pablo kelaliklas wut jom, ma-aechon asbuan jumch chiekal. Me-ama jom kelalika-esal wut, ja-aech Pablo.

⁶ Puexa jiw, Malta tanaetpijiw, wujnawet Pablo keputhax. O, el wut, chalechkal patupan juwlaxaelpox. Japox piach wujnawetox chinax jachi-el wut, japi jiw asax nejchaxoel Pablialijwa. Nakaewa najum-aechi: "Pablo, bej diosbej" —na-aechi nakaewa.

⁷ Malta tanaetpijiw tato'lan, pawul Publio. Xanal jit su'chalakaxxot, jaxot mox Publio pejtujaju. Samata, Publio pejbaxotan wut, xanal chiekal nabu'kulapon. Jaxot tres matkoi xanal chiekal duilx.

⁸ Jawut, Publio pejbaxotan wut, Publio pax camatat ok, xabich bu'tuajnik xoton. Woejx-aenkbejpon. Pablo fulaech Publio pax taelialijwa, japon bu'xaeyan. Pablo pat wut Publio

paxxot, Pablo Dios kawuajan bu'xaeyanliajwa. Dios kawuajna x buxtoet wut, Pablo ke-ot bu'xaeyan pejbu'tat. Jawut Publio pax chiekal boejthuls waxae.

⁹ Pablo wultaens wut, jawut asew bu'xaeya, japatanaetpijiw, fulaeni Pablo poxadin. Japibej chiekal boejthuls.

¹⁰ Japi, Malta tanaetpijiw, xanal xabich nakajachawaet. Do jawux, baxael, japatanaetxot tres juimtje wut, xanal barkam pejme julx chijiyaliawjan wut, nachaxduwpi puexa nawewe'ppoxanliawjan, chafolx wut.

Pablo Roma paklowax patpox

¹¹ Xanal Malta tanaetxotan wut, iama chatoepx, tres juimtje wut. Do jawux, barkam julx. Japabarkam jaxot iama chatoepbej, fulaenpox Alejandria paklowaxxot. Japabarkam-oeffel nows koloeyax ael-isaspoخان. Japoxan, me-ama dioses. Kaeyax pawul Cástor. Asax pawul Pólux.

¹² Japabarkamtat xanal chafolx. Chapatx Siracusa paklowaxxot, Sicilia tanaetxot. Japapaklowaxxotan tres matkoiliawja.

¹³ Do jawux, jaxot chijian wut, pamakakal chafolx marxot. Regio paklowax chapatx. Do jaxot pejme chijian. Kandiawa wut, wuchakal pasful wikax. Pejme jakandiawa wut, chapatx Puteoli paklowaxxot.

¹⁴ Japapaklowaxxot xanal faekx Jesucristo pejuwajan naexasiti. Japi natadut kaesemana duilaliawjan japi pejbachanxot. Do jawux, pütel folx Roma paklowax pasliawjan.

¹⁵ Roma paklowaxpijiw, naexasiti Jesucristo pejuwajan, chajia jumtaeni xanal pasax-aelenpox Roma paklowaxxot. Samata, asew japixot wuajna nabu'kakulan Foro de Apio paklowaxxot. Asew japixot wuajna nabu'kakulan Tres Tabernas paklowaxxot. Pablo japi taen wut, xabich nejchachaemil. Samata, gracias-aechon Diosliawja.

¹⁶ Patx wut Roma paklowaxxot, Pablo jiw jebatat je-esal. Pejlelel dukax to'as. Kaen soldawan asbuan jumch wesfulas, Pablo najaet wut, wesamata.

Pablo naewuajanpox Jesucristo pejuwajan Roma paklowaxxot

¹⁷ Xanal Roma paklowax patx wut, tres matkoi xent wut, Pablo wullala fulaeliajwadin judiospaklochow, Roma paklowaxxot duili. Pat wuti, natameja wutbejpi, Pablo jum-aech:

—Takoew, xan chinax babijax is-enil judiosliawja. Wajwuajnapijiw pejkabuanaanpoxliawbej, japoxliawja xan babijax is-enil. Jasox is-enil wut, Jerusalén paklowaxxotx wut, judios najaelt. Najaelt wut, nawiatu Roma tuajnapijiw paklochowtat natasalaliawja.

¹⁸ Roma tuajnapijiw paklochow nawuajnachaemt wut, natapaesia xan nakolsliawjan jiw jebaxot, faena-el xot xan nakastikaliawja, naboesaliawbejpi.

¹⁹ Judios nejwesla Roma tuajnapijiw paklochow xan nakolsax natapaeliajwa jiw jebaxot. Samata, xan kawuajna xato'aliajwa Roma tuajnapijiw tato'lan poxade, japon pejuwajnalel judios xan natasalaliawja. Pe xan ajil tasalaliawjan judios pejbu'wuajanpoxliawja.

²⁰ Samata, xamal wullalax chiekal nataeliajwam, nospaeliajwasbej. Puexa xatis judios wuajnaewech, pawulpon Mesías, xan japon naexasitx. Samata, nataenam cadenamuatat, namuaxwasixawaesaxtat —aech Pablo.

²¹ Japi jumtaen wut Pablo jum-aechpox, jawut jum-aechi:

—Judea tuajnapijiw xanal chinax carta naxto'a-el xamliawja. Asew judios, Jerusalén paklowaxpijiw, pa'ani, japibej chinax nachapae-el babejuwajan xamliawja.

²² Pe xanal chiekal jumtaesian matabijialiajwan xam nejchaxoelampox. Xanal wultaenx pajelwuajan, Jesucristo pejuwajan, naexasitampox, asew potuajnapijiw jum-aech wut: 'Japox diachwuajnakolaxa-el' —aech wuti —aech judios, Roma paklowaxpijiw, jumnot wuti Pablo.

²³ Do jawut, japi kaematkoi mark pejme natamejalialiajwa. Japamatkoi pat wut, xabich judios pat kandiawasapkolaxtat natamejalialiajwa Pablo dukxot. Do jawut, Pablo tuadut naksiyalialiajwa Dios puexa pejiw tato'laxaelpox. Naewuajanbejpon Moisés chajia lelpox jum-aechpox Jesúsliawja. Profetas chajia lelox naewuajanbejpon jum-aechpox Jesúsliawja. Pablo jasoxtat naewuajan, japibej naexasisliawja Jesucristo pejuwajan. Tuila wut, Pablo buxkoft naewuajanpox.

²⁴ Asew japixot naexasit Pablo jum-aechpox. Asew lax japixot naexasis-el.

²⁵ Asew japixot kaenejchaxoelaxa-el xot, nakolasiapi jaxot. Nakola-el wutfuk, Pablo jum-aech:

—Profeta Isaías chajia jum-aechpox Espiritu Santo pijaxtat wajwuajnapijiwliawja, diachwuajnakolax chajia jum-aechon:

²⁶ ‘¡Xabua’de! ¡jüm-amde puexa judíos: “Xamal naewesfulaxaelam naewuajanaxpoxan. Pe chiekal jümmatabijaximil xan jüm-anpoxan. Taeflaxaelambej xan itpaeyaxaelen-poxan. Pe nakiowa, japoxanliajwa jümmatabijaximil.

²⁷ Xamal matnaetinkam, nejwesla xot jümmatabijaliajwam. Naewes-emil chiekal jümmatabijaliajwam. Matsekaxaelam tae-elaliajwam, matabijasamatambej. Jachiyaxaelam wüt, kofaximil babijaxan isfulampoxan. Naexasisaximilbej Dios. Samata, Dios xamal bu’weyaxil” —amde judíos! —aech profeta Isaías, chajia jüm-aech wüt wajwüajnapijiwliajwa.

²⁸ ¡Xamal chiekal matabijam ampox! Xanal naewuajnaaxaelen chimiawuajan Jesucristo pejwuajan judíos-eli. Japi chiekal naewesaxael. Ja-aech wüt, Dios bu’weyaxaes japi babijaxan ispoxanliajwa —aech Pablo judíosliajwa, duili Roma paklowaxxot.

²⁹ [Do jawüt, Pablo japox buxtoet wüt, judíos nawia pejbachan poxade. Fol wüti, japoxliajwa nakaewa nabünlofali.]

³⁰ Roma paklowaxxot Pablo duk kolewaechje arriendabatat. Japabatat Pablo chiekal bu’kulafal fulaeni japon taeliajwas.

³¹ Pablo pejlewla-el, jiw naewuajan wüt. Jiw naewuajnafulon Dios puexa pejjiw tato’laxaelpox. Naewuajnafulbejpon paklon Jesucristo pejwuajan. Chinax kaen aton jaxot buxfias-esal, Pablo naewuajnaful wüt jiw.

Pablo lelpox carta Roma paklowaxpijiwliajwa

Pablo lelpox carta Roma paklowaxpijiwliajwa

¹ Xan Pablo, nabistaxponan Jesucristoliajwa, lelx ampox carta. Dios namakafit apóstolliajwan, jiw naewuajnalijwan chimiawuajan Dios bu'weliajwa jiw.

² Japawuajan Dios chajia jum-aech pejprofetatat, japi lel wut Dios pejjamechan.

³ Japawuajan wajpaklon Jesucristoliajwa, Dios paxulan. Jesucristo ampathatat nalaelt wut, japon rey David pamon.

⁴ Do baxael, wajpaklon Jesucristo tux wut, Dios mat-ech wuton pejme dukaliajwa, jawut jiw pajut chiekal matabija diachwuajnakolax Jesús Dios paxulan. Dios tapaei wajpaklon Jesucristo puexa tato'laliajwa.

⁵ Xan Jesucristo namakafit xot, Dios natapaei apóstolliajwan. Samata, Dios xan nato'a naewuajnalijwan Jesucristo pejuwajan judiospi, judios-elpibej, japi jiw naexasisliajwa Jesucristo pejuwajan.

⁶ Xamal, Roma paklowaxpijwam, Dios matxoela makanot Jesucristo pejiwaliajwam. Samata, amwutjel chiekal duilam, naexasitam xot Jesucristo pejuwajan.

⁷ Samata, xan ampox carta xato'axaelen xamalliajwa. Dios nejxasink xamal. Samata, xamal makanoton Jesucristo pejiwaliajwam. Xan waj-ax Dios kawuajnax, wajpaklon Jesucristobej, xamal kajachawaesliajwapi babijax isasamatam, duilam wut, asew jiw suapich.

Pablo taesiapox Roma paklowaxpijiw

⁸ Xan gracias-an Diosliajwa kaenanula xamalliajwa, potuajnuchanpijiw jum-aech xot chimiamechan xamalliajwa, Jesucristo chiekal xanaboejam xot.

⁹ Xan xabich nabistax Diosliajwa, jiw naewuajnax wut Jesucristo pejuwajan, Dios paxulan pejuwajan. Dios chiekal matabijit xan Dios kawuajnaxpox xamalliajwa.

¹⁰ Xan buxkofsenil Dios kawuajnaxpox japon natapaeliajwa, xan fulaeliajwan xamal poxade. Dios natapaei wut, xamal taeyaxaelen.

¹¹ Xamal taesian. Xamal naewuajnasianbej Dios pejjamechan kaes xanaboejalijwam Dios.

¹² Xamalxotx wut, xatis naexasichpis Dios, nakaewa nakajachawaesaxaes Dios kaes chiekal xanaboejalijwas.

¹³ Takoew, xan nejxasinkax xamal matabijaliajwam ampox. Xan xabich nejchaxoelx pin-iamatkoivan xamal taeliajwan. Pe asaxan nakiowa xabich na-it-el xot, xamal tae-enil. Xamalxotx wut, naewuajnasian Jesucristo pejuwajan, kaes asew jiwbej naexasisliajwa Jesús pejuwajan. Xabich asew jiw, asatuajnuchanpijiw, japi chiekal naexasit Jesucristo pejuwajan. Xanlap japox nejxasinkax xamalxotbej jachiliajwa.

¹⁴ Dios nato'a xan jiw naewuajnalijwan chimiawuajan, Jesucristo pejuwajan. Samata, jiw naewuajnaxaelen, xabich matabijapi, xabich matabija-elpibej.

¹⁵ Samata, xan fulaesian Roma paklowax poxade xamal naewuajnalijwan Jesucristo pejuwajan.

Chimiawuajan, Jesucristo pejuwajan

¹⁶ Xan buxdala-el Jesucristo pejuwajan naewuajnalijwan. Japawuajan jiw naexasit wut, japi jiw Dios bu'weyaxaes babijaxan ispoxanliajwa. Xanal judios, matxoelanaexasitxpin japawuajan. Amwutjel xamalbej, judios-emilpim, naexasitam Jesucristo pejuwajan.

¹⁷ Xatis chiekal matabijas wut Jesucristo pejuwajan, chiekal matabijasbej Dios ispox, Jesucristo tux wut xatisliajwa. Naexasich wutbej Jesús pejuwajan, jatis wut, xatis babijaxan isapoxan ajil Diosliajwa. Dios pejjamechan, chajia lelpox, jum-aech wut, jum-aechox: "Ampi jiw babijaxan ispojan wejisa, chiekal xan naxanaboeja xoti. Samata, japi bu'wuajanjil xanliajwa" —aech Dios, nejchaxoel wut japi jiwliajwa.

Puexa ampathatpijiw pejuwajanpox Diosliajwa, is xoti babijaxan

¹⁸ Xatis matabijas Dios, athuxot dukpon, japon xabich puexa jiw kastikaxael, babijaxan ispi. Xabich babijaxan is xoti, japi tapae-esal matabijaliajwa diachwuajnakolaxpox Diosliajwa.

¹⁹ Japi jiw matabijaliajwapi Dios, wetampoela-esal, Dios pajut kajachawaesaxaes xoti japi jiw chiekal matabijaliajwa.

²⁰ Jiw taeyaxil Dios, japon espíritu xot. Pe nakiowa, babijaxan ispi taen wuti Dios ispojan, japi jiw pajut matabijaxael, Dios diachwuajnakolax duk. Pe nakiowa, japi jiw matabijaxael, ma-aech Dios. Japi matabijaxael, ma-aech Dios, nejchaxoel wut Dios ispojanliajwa

ampathatat. Samata, japi jiw jumchiyaxil asew jiwliajwa: “Xanal matabijaxinil, ma-aech Dios pejnechaxoelaxan” —chiyaxili.

²¹ Babijaxan ispi, japi jiw matabija Dios pomatkoicha dukpox. Pe nakiowa, japi jiw sitae-eli Dios. Japibej chinax kaematkoï graciaschi-el Diosliajwa, Dios ispoxanliajwa japiliajwa. Japi jiw nejchaxoelafal nejliaklaxan. Samata, matabija-el diachwujnakolaxpox Diosliajwa. Matabija-elbejpi pachaempoxan isliajwa, isasamatabej pachaema-elpoxan.

²² Japi jiw nakaewa najum-aech: “Xatis kaes pejme matabijas” —na-aechi. Diachwujnakolax japi matabija-el. Japi nejliakla xot, japoxan najum-aech.

²³ Japi Dios xanaboeja-el, xajuron puexa isliajwa, asamatkoï tuxaxilponbej. Japi idolos xanaboeja, pajut ispoxan. Japi pejew idolos, ael-isas, me-ama jiw, mia, jom, choefbej.

²⁴ Samata, Dios koft japi jiw pajut babijaxan isasiapoxan isliajwa. Japi babijaxan isful, xabich padalapoxan nakaewaliajwa.

²⁵ Nejweslabejpi naexasisliajwa diachwujnakolaxpox, Dios pejjamechan. Dios sitae-elbejpi. Kawuajna-elbejpi Dios, japon xajuron puexa isliajwa. Japilax naexasit diachwujnakolaxa-elpoxan, kichachajbapoxanbej. Asbuan jumch sitaeni Dios ispoxan. Japoxan japi kawuajan. Me-ama kajachawaesliajwas wut, ja-aechi japoxanliajwa. Pelax jiw, naexasiti Jesús pejuwan, japi pomatkoicha jumchiyaxael Diosliajwa: “Dios xabich pachaem” —chiyaxaeli.

²⁶ Samata, Dios koft japi jiw pajut babijaxan isasiapoxan isliajwa, padalapoxan. Samata, watho' nejxasinka-el nosliajwa poejiw. Japi watho' nakaewatho'a nabu'moejt isliajwa isasiapoxan.

²⁷ Ma-is poejiw ja-aech. Nejxasinka-eli nosliajwa watho'. Poejiw nakaepoejwa nabu'moejt isliajwa padalapoxan. Samata, japi jiw amwutjel xabich Dios kastikas.

²⁸ Sitae-el xoti Dios, Dios koft japi jiw isfulaliajwa babijaxan, isaxilpoxan.

²⁹ Japi jiw is puexa babijaxan. Nejchaxoeli asew jiw pejew natkowaliajwa. Japi is babijaxan asew jiw tabesliajwa. Japi nusasiowal, kitaen wut asew jiw pejew. Japi asew jiw bu'aba. Japi nejxasink nakaewa nalosax. Japi nejxasink naekichachajbaxan. Japi is babijaxan asew jiw nabijasliajwa. Japibej buxwuajanmaen.

³⁰ Japi jum-aech babejjamechan asew jiwliajwa puexa asew jiw pejuwanalel. Japi Dios padaelmajiw. Japi jum-aech babejjamechan asew jiwliajwa, sitae-el xoti asew jiw. Japi nejchaxoel: “Xan kaes pejme pachaeman. Me-ama asew jiw, jachi-enil” —aechi, pajutliajwa nejchaxoel wut. Japi nakaewa najum-aech: “Isaxaes asaxan babijaxan asew jiwliajwa, jiw matabija-elpoxan” —na-aechi nakaewaliajwa. Do jawux, japi jiw is japoxan, babijaxan. Japi naexasis-el paxjiw, penjiwbej, fiach wut.

³¹ Japi nejliakla. Is-el jumduwpxoxan, asew jiwliajwa isaxaelpoxan. Japi nejxasinka-el asew jiw. Japibej beltae-el asew jiw.

³² Japi chiekal matabija Dios fiachpoxan. Japi matabija Dios pelsaxaespxox, babijaxan is xoti asew jiwliajwa. Pe nakiowa, japi jiw babijaxan is asew jiwliajwa. Asbuan jumch japi jiw nejchachaemil, asew jiw babijaxan is wut asewliajwa.

2

Babijaxan ispi, asamatkoï japi jiw Dios kastikaxaespxox

¹ Xamal jum-am wut asew jiwliajwa: “Japi jiw babijaxan is. Samata, Dios kastikaxaes” —am wut, jasox jum-am xot, xamalbej Dios kastikaxael, babijaxan isam xot.

² Matabijas. Asamatkoï Dios jiw kastika wut, kaes babijaxan ispi, japi jiw kaes kastikaxaes. Kaeswapich babijaxan ispi, kaeswapich kastikaxaes.

³ Xamal jum-am wut babijaxan ispi: “Japi jiw Dios kastikaxaes” —am wut, jasox jum-am wut, xamalbej diachwujnakolax weyaximil, Dios pejkastikamatkoï pat wut.

⁴ Xamal japox jum-am wut asew jiwliajwa, chiekal nejchaxoelaximil. Dios xabich piach kajachawaet, xamal kofaliajwam babijaxan isampoxan.

⁵ Me-ama matabija-emil wut, ja-am Diosliajwa, chiekal naexasis-emil xot Dios. Nakiowa babijaxan isam xot, kastikamatkoï pat wut, puexa babijaxan ispi Dios kastikas wut, xamalbej Dios kastikaxael, japi jiw suapich.

⁶ Japamatkoï jiw, kaenanula babijaxan ispi, kastikaxaes. Xabich babijaxan ispi, japi xabich kastikaxaes. Xabich babijaxan is-elpi, japi xabich kastikaxisallejen.

⁷ Asew jiw nejxasink Dios nejchachaemlialajwa japiliaw. Samata, japiliaw tampoel wut, japi nakiowa isful pachaempoxan. Ja-aech wut, Dios tapaeayaxesi duilialajwa pomatkoicha japonxotse. Jaxotse pomatkoicha itliak Dios pej-itliakax.

⁸ Asew jiw naexasis-eli Dios. Japi is babijaxan. Samata, Dios palala xot, japi jiw kastikaxaelon.

⁹ Puexa jiw, babijaxan ispi, judios, judios-elpibej, nabijasaxael.

¹⁰ Jiw, ispi pachaempoxan, judíos, judíos-elpibej, puexa japilax, pomatkoicha duilaxael Diosxotse. Jaxotse itliak Dios pej-itliakax. Dios nejchachaemlaxael japi jiwliajwa. Chiekal duilaxaelbejpi.

¹¹ Dios kastika wut babijaxan ispi, chiekal taeyaxaelon. Samata, puexa judíos, judíos-elpibej, kastikaxaelon.

¹² Judíos-elpi matabija is-elaliajwa babijax. Pe nakiowa, japi babijaxan is. Samata, judíos-elpi Dios kastikaxaes. Judíos matabija Moisés chajia lelpox tapae-el isliajwa babijaxan. Pe nakiowa, japi judíos is babijaxan. Samata, japi kastikaxaes Dios.

¹³ Judíos chiekal naexaxisaxael wut Moisés chajia lelpox, japi bu'wuaanjilaxael. Pe judíos puexa chiekal naexaxis-el Moisés chajia lelpox. Samata, amwutjel japi judíos pejbu'wuaan Diosliajwa.

¹⁴ Judíos-elpi chinax matabija-el Moisés chajia lelpox. Chiekal ma-aechi. Pe nakiowa, japi pajut pijaxtat naexasit wuti Moisés chajia lelpox, ja-aech wut, japi pajut chiekal matabija isliajwa pachaempoxan.

¹⁵ Japi is wut pachaempoxan, me-ama pajut matabija wut, ja-aechi Moisés chajia lelpoxli-ajwa. Judíos-elpi pajut matabija, is wut pachaempoxan. Matabijabejpi, is wut babijaxan.

¹⁶ Asamatkoi Dios to'axael Jesucristo, japon kaenanula jiw jumchiliajwa, maliach ispi pachaempoxan, o, pachaema-elpoxanbej. Xan japoxliajwa jum-an, naewuajnax wut jiw Jesús pejwuaan.

Amxot jum-aechpox judíosliajwa, Moisés chajia lelpoxliajwabej

¹⁷ Xamal judíos nakaewa najum-am: "Xatis judíos kaes pejme pachaems. Me-ama asew jiw, jachi-esal. Chiekal matabijasbej Moisés chajia lelpox. WajDios xatiskalliajwa" —am xamal nakaewaliajwa.

¹⁸ Xamal matabijam isliajwam Dios nejxasinkpoxan, matabijam xot Moisés chajia lelpox. Samata, isfulaxaelam pachaempoxan.

¹⁹ Xamal nejchaxoelam wut, jum-am: "Xatis chiekal matabijas Dios. Samata, asew jiw naewuajnaxaes, japi matabija-eli Dios. Japi jiw, me-ama itliakla. Me-ama nanuamtibej itkuataxot, ja-aech japi jiw" —am xamal, nejchaxoelam wut.

²⁰ Xamal nejchaxoelambej: "Xatis xajups asew jiw naewuajnalijwas, matabija-elpi asax, asew jiwbej, chiekal matabijaliajwapi Dios. Xatis xajups japi jiw naewuajnalijwas puexa diachwuaajakolaxpox Diosliajwa, matabijas xot Moisés chajia lelpox" —am xamal asbuan jumch, nejchaxoelam wut.

²¹ Xamal naewuajnam wut asew jiw naexaxisliajwa Moisés chajia lelpox, ¿ma-aech xotkat xamal najut chiekal naexaxis-emil Moisés chajia lelpox? Asew jiw naewuajnam wut, jum-am: "¡Nabej natkowe' asew jiw pejew!" —am xamal. ¿Pe ma-aech xotkat xamal najut natkowam asew jiw pejew?

²² Asew jiw naewuajnam wut, jum-am: "Xamal, nejwatho'pim, jasew watho' nabej bu'moejs!" —am xamal. ¿Pe ma-aech xotkatlax xamal nejwatho' asew watho' naebu'moejtam? Jum-ambej, asew jiw naewuajnam wut: "¡Xanal nejwesla ídolos!" —am xamal. ¿Pe ma-aech xotkatlax xamal lowam ídolos templobachanxot nosliajwam ommaenkpi, japatemplobachanxoti?

²³ Asew jiw naewuajnam wut, jum-ambej: "¡Moisés chajia lelpox pachaem!" —am xamal. ¿Pe ma-aech xotkatlax xamal najut chiekal naexaxis-emil Moisés chajia lelpox? Xamal babijaxan isfulam xot, asew jiw sitae-el Dios.

²⁴ Dios pejjamechan, chajia lelpox, jum-aech wut, jum-aechox: "Xamal babijaxan isfulam xot, judíos-elpi jum-aech babejjamechan Diosliajwa" —aechox.

²⁵ Xamal judíos, diachwuaajakolax circuncidam Dios pejmarkaxliajwa. Japox isam matabijaliajwam Dios pejjiwampox. Circuncidax xamalliajwa xabich pachaem, chiekal naexasitam wut Moisés chajia lelpox. Pe chiekal naexaxis-emil wut Moisés chajia lelpox, ja-am wut, nakiowa Diosliajwa, me-ama circuncida-emil wut, ja-amfuk.

²⁶ Judíos-elpi, circuncida-esalpi, japi is wut pachaempoxan, me-ama Moisés chajia lelpox to'as, ja-aech wut, japi jiw Diosliajwa, me-ama circuncidas wut, ja-aechi.

²⁷ Judíos-elpi, circuncida-esalpi, Moisés chajia lelpox naexasit wut, asamatkoi japi jiw Diosxotse tasalaxaeli kastikaliajwas judíos, circuncidaspi, chiekal naexaxis-el xoti Moisés chajia lelpox. Judíos asbuan jumch matabija Moisés chajia lelpox. Pe chiekal puexa naexaxis-eli.

²⁸ Judíos najum-aech nakaewa: "Xatis Dios pejjiw, judíos xot" —na-aechi nakaewa. Puexa judíosxot Dios pejjiwael, japi judíos xot. Circuncidaxtat puexa judíosxot Dios pejjiwael.

²⁹ Diachwuaɲnakolax judíoskolapi, Dios pejiwpi, kaelel chiekal kofa babijanan ispoxan. Japibej Espiritu Santo kajachawaesfulas. Japibej isful pachaempoxan Dios nejchachaemlaliaɲwas japiliaɲwa. Japoxan japi is-el asbuan jumch ampathatpiɲiw nejchachaemlaliaɲwas japiliaɲwa.

3

¹ Japi judíos wut, ¿ma-aech xotkat kaes pejme xabich pachaem judíosliaɲwa? ¿Ma-aech xotbejkat kaes pejme xabich pachaem, japi, judíos circuncidas wut?

² Japi judíos kaes pejme wepachaems pin-ianejchaxoelaxanliaɲwa. Matxoelanejchaxoelax judíosliaɲwa wepachaemspox, ampxolape. Dios waelt pejjamechan judíos peɲwuaɲnapijiwxot.

³ Asew judíosxot naexasis-el Dios pejjamechan. Ja-aech wutkat, ¿Dios isaxil jumdutpox judíosliaɲwa?

⁴ ¡El! Puexa jiw kichachajbapiɲiw wut, Dios nakiowa isaxael puexa jumdutpoxan. Japoxliaɲwa Dios pejjamechan, chajia lels wut, jum-aechox:

“Dios, puexa xam jum-ampox jiwliaɲwa, japox diachwuaɲnakolax wulxael. Chinax kaen aton jumchiyaxil xamliaɲwa: ‘Dios jum-aechpox diachwuaɲnakolaxa-el’ –chiyaxil kaen aton” –aech Dios pejjamechan, chajia lelspx, jum-aech wut.

⁵ Xatis kaes babijanan isas wut, jiw pajut kaes matabijaxael, Dioslax is pachaempoxan. Ja-aech wut, jumchiyaxisal: “Dios xatis nakkastikaxil, babijanan isas wut” –chiyaxisal. Xatis japox jumtis wut, me-ama Dios pejiwa-esal wut, jachiyaxaes xatis.

⁶ Samata, jasox jumchiyaxisal, diachwuaɲnakolaxa-el xot. Xatis jumtispx diachwuaɲnakolax wut, ja-aech wut, Dios ampathatpiɲiw kastikaxil.

⁷ Xan xabich jiw kichachajbaxaelen wut, ja-an wut, jiw pajut chiekal matabijaxael, Dioslax kichachajba-el. Samata, Dios xan nakastikaxil, xan xabich jiw kichachajbaxaelen wut.

⁸ Ja-aech wut, pachaemaxael xan asew jiw jumchiliaɲwan: “Kaes babijanan isas wut, xabich pachaemaxael” –chiliaɲwan, jiw pajut matabijaliaɲwa, Dios kaes pejme pachaem. Asew jiw jum-aech babejjamechan xanliaɲwa: “Pablo jiw naewuaɲjan wut, to'a kaes babijanan isliaɲwa” –aechi. Japi jiw japox jum-aech xot, japi jiw Dios kastikaxaes.

Chinax kaen aton babijanan isla-elpx

⁹ ¿Judíoskat kaes pachaem Diosliaɲwa? ¿Me-ama asew jiw, jachi-elkat? ¡El! Xan chajia jum-an: “Puexa ampathatpiɲiw, judíos, judíos-elpiɲibej, babijanan is” –an xan.

¹⁰ Dios pejjamechan, chajia lelspx, jum-aech wut, jum-aechox:

“¡Puexa jiw is babijanan ampathatat! ¡Chinax kaen aton isla-el babijanan!

¹¹ Aton ajilbej, matabijtpon Dios nejchaxoelpoxan. Aton ajilbej, wulwekpon Dios.

¹² Puexa jiw babijanan is, pejnejchaxoelaxantat xabich atuaɲ xoti Diosliaɲwa. ¡Kaen japixot ajil isliaɲwa pachaempoxan!

¹³ Japi jum-aechpox xabich pachaema-el. Samata, tampoela-el asew jiw beliaɲwas, japi jum-aech wut japox. Kichachajbamaenkbejpi. Japi jum-aechpox asew jiwliaɲwa, me-ama jombua'nael wut, ja-aech. Samata, japox asew jiw xabich tabejtas.

¹⁴ Japi jum-aech wut, jum-aechbejpi babejjamechan, nejwesla xoti asew jiw.

¹⁵ Chakifolbejpi beliaɲwa jiw.

¹⁶ Nejmachtuaɲnuchanxot pat wutbejpi, japatuaɲnuchanpiɲiw bapi. Samata, japi pijaxtat potuaɲnuchanpiɲiw xabich nabijat.

¹⁷ Japi jiw matabija-elbej chiekal duilaliaɲwa, asew jiw suaɲpich.

¹⁸ Nejchaxoela-elbejpi sitaeliaɲwa Dios” –aech Dios pejjamechan, chajia lelspx.

¹⁹⁻²⁰ Xatis chiekal matabijas. Dios pejjamechan waelt judíos naexasisliaɲwa. Pe judíos chiekal naexasis-el japox. Samata, kaen judíos jumchiyaxil: “Xan bu'wuaɲjanjinil Diosliaɲwa” –chiyaxilon. Puexa judíos, judíos-elpiɲibej, pajut chiekal matabijaxael japibej pejbu'wuaɲjan Diosliaɲwa, kaen aton puexa chiekal naexasisaxil xot Dios chajia waelt-pox. Dios pejjamechan waelt, xatis babijanan isas wut wajut nejchaxoelaliaɲwas: “Diachwuaɲnakolax xatis isas babijanan” –chiliaɲwas, nejchaxoels wut.

Jesús peɲwuaɲjan naexasiti, japi Dios bu'weyaxaespx

²¹ Amwutjel Dios naktapaei matabijaliaɲwas chimiawuaɲjan, Jesús peɲwuaɲjan. Samata, chiekal matabijas, ma-aech xot Dios xatis nakbeltaen, isas wut babijanan. Dios xatis majt nakbeltae-el, isas wut babijanan, Moisés chajia lelspx naexasich xot. Chajiakolaxtat profetas lel Dios isaxaelpx xatis nakbu'weliaɲwa.

²² Kaenanula nejchaxoels wut: “Diachwuaɲnakolax Jesucristo tap cruztat xanliaɲwa” –tis wut wajut, japox nejchaxoels wut, babijanan isaspoxan ajilaxael Diosliaɲwa. Asew

jiwliajwabej jachiyaxael. Ajilaxael babijaxan, japi ispoxan Diosliajwa, naexasit wut Jesucristo tuppox cruztat japiliajwa.

²³ Puexa jiw babijaxan is. Samata, japi napelt Diosliajwa.

²⁴ Pe ja-aech wut, Dios nakiowa kajachawaet japi jiw malech bu'weliajwa japi babijaxan ispoxanliajwa, naexasit xoti Jesucristo tuppox cruztat japiliajwa.

²⁵ Dios tapaei Jesucristo tupaliajwa cruztat nakwemosliajwa kaenanula xatis babijaxan isaspoxanliajwa. Xatis naexasich wut Jesucristo tuppox babijaxan isaspoxanliajwa, Dios xatis nakbeltaen babijaxan isaspoxanliajwa. Jesucristo tup wut, motbejpon wajwuaajnapijiw babijaxan ispoxanliajwa. Ja-aech wut, xatis chiekal matabijas Dios mastae-elpox, wajwuaajnapijiw babijaxan is wut. Dios chajia matabijt Jesucristo tupaaxaelpox wajwuaajnapijiw pejwulela. Samata, wajwuaajnapijiw majt babijaxan is wut, japi kastika-esal Dios.

²⁶ Wuajneweton Jesucristo pasliajwa tupaliajwa puexa jiw bu'weliajwapon. Samata, Dios nejxasinka-el kaes jiw babijaxan isliajwa. Babijaxan ispi naexasit wut Jesucristo tuppox bu'weliajwas, ja-aech wut, japiwej bu'weyaxaes.

²⁷ Jesucristo tup jiw bu'weliajwa. Japox japi jiw naexasit wut, Dios beltaenspi babijaxan ispoxanliajwa. Japi pajut ispoxantat Dios bu'we-esal, babijaxan is wut. Samata, japi pajutliajwa jumchiyaxil asew jiw sitaeliajwas: "Xan isx pachaempoxan Diosliajwa. Samata, babijaxan isxpoxan ajil Diosliajwa" –chiyaxil jiw.

²⁸ Samata, xatis chiekal matabijas. Jesucristo tuppox cruztat asew jiw naexasit wut, ja-aech wut, japi babijaxan ispoxan Diosliajwa wejisal. Pe japi babijaxan ispoxan wejila-esal Diosliajwa, naexasit xoti Moisés chajia lelpox. Japi chiekal naexasisaxil japox.

²⁹ Dios judioskalliajwa-el. Japon Dios puexa asewliajwabej.

³⁰ Dios kaen. Kaes asan Dios ajil. Judiosliajwa, asew jiwliajwabej, puexa japi Dios chiekal taen. Jiw kaenanula naexasit wut Jesucristo tuppox cruztat japiliajwa, ja-aech wut, japi babijaxan ispoxan Diosliajwa wejilaxaes.

³¹ Xatis, Jesús pejwuaajan naexasichpis. Jesucristo tup xot cruztat kaenanula xatisliajwa, nejchaxoela-esal: "Kofas Moisés chajia lelpox, Jesucristo tuppox naexasich xot kaenanula xatisliajwa" –chi-esal, nejchaxoels wut. ¡E! Xatis naexasich wut Jesucristo tuppox, jatis wut, naexasichbej Moisés chajia lelpox.

4

Abraham chiekal naexasitpox Dios jumduwspoxan

¹ Ma-aech xotkat Abraham, wajwuaajnapijin, babijaxan wejisal Diosliajwa?

² Abraham pachaempoxan isaxael wut babijaxan ispoxan wejilaliajwas, ja-aech wut, japon pajut japox jumchiyaxael asew jiw jumtaeliajwas. Pe Dios matabijt. Abraham japox jumchi-el.

³ Dios pejjamechan, chajia lelpox, jum-aech wut, jum-aechox: "Abraham naexasit xot Dios jumdutpox japonliajwa, japon babijaxan ispoxan wejisal Diosliajwa" –aechox.

⁴ Aton nabist wut asanliajwa, japon moch. Plata malech chaxdus-esal. Chaxduch, nabist xoton.

⁵ Pelax Dios to'a-el jiw nabichliajwa nabichaxtat mosliajwapi Dios japi babijaxan ispoxanliajwa. Aton jum-aech, nejchaxoel wut: "Dios bu'wia jiw. Samata, diachwuaajnakolax Dios xan nabu'weyaxael, jumdut xoton jiw bu'weliajwa" –aech wuton, japon aton wejilaxaes babijaxan ispoxanliajwa Diosliajwa.

⁶ Rey David chajiakolaxtat chapaeipon jiw, japi jiw babijaxan ispoxan wejisalpi Diosliajwa. Japi ja-aech, naexasit xoti Dios chajia jum-aechpoxan. Dios to'a-el japi jiw isliajwa bichaxan, babijaxan ispoxan wejilaliajwas.

⁷ David chajiakolaxtat jum-aech japi jiwliajwa:

"Japi xabich nejchachaemil, Dios beltaens xoti babijaxan ispoxanliajwa, kaelel wepeltas xotbejpi!

⁸ ¡Aton nejchachaemil, Dios beltaens wuton babijaxan ispoxanliajwa!" –aech David chajiakolaxtat.

⁹ David japox jum-aech wut, jumchi-elon judioskalliajwa. Japon jum-aech asewliajwabej. Xan chajia jum-an. Abraham naexasit, Dios jumduws wut. Samata, Abraham babijaxan ispoxan Diosliajwa wejisal.

¹⁰ Abraham babijaxan ispoxan wejisal wut Diosliajwa, jawut Abraham circuncida-esalfuk. Pe nakiowa, Abraham babijaxan ispoxan wejisal Diosliajwa.

¹¹ Abraham babijaxan ispoxan wejisal wut Diosliajwa, do baxael, japon circuncidas. Japox puexa jiw pajut matabijaliajwa, Abraham babijaxan ispoxan wejisal, Dios xanaboejt xoton. Samata, judios-elpibej, circuncida-esali, nejchaxoel wut: "Diachwuaajnakolax Dios

isaxael jumdutox" — aech wuti, japibej Diosliajwa, me-ama Abraham paxi wut, jachiyaxaeli. Ja-aech wutbej, japi babijaxan ispoxan wejilaxaes Diosliajwa.

¹² Judíos, circuncidaspi, japi Dios xanaboeja wut, me-ama Abraham paxi wut, jachiyaxaeli. Judíosbej nejchaxoel wut, me-ama majt Abraham nejchaxoel wut: "Diachwujnakolax Dios isaxael nakjumdutpox" — aech wuti, japi judíos, me-ama Abraham paxi wut, jachiyaxaeli Diosliajwa.

Abraham chiekal naexasit xot Dios jumduchpox, japox wejatispon

¹³ Chajiakolaxtat Abraham Dios jumtis: "Xam puexa ampatuajnu chaxdusaxaelen. Baxael, asamatkoi xam tupam wut, naxi, namojiwbej, chaxdusaxaelen ampatuajnu" — tis Abraham. Dios japox jumchi-el, Abraham naexasit xot Moisés chajia lelpox. Abraham nejchaxoel xot: "Diachwujnakolax Dios isaxael najumdutpox xanliajwa" — aech xoton, nejchaxoel wut, Dios japox jum-aech Abrahamliajwa. Abraham Dios jumtisipox xanaboejsful xot, babijaxan ispoxan wejisalpon Diosliajwa.

¹⁴ Dios chajia jumchiyaxael wut chaxdusliajwa japatuajnu naexasitpikal Moisés chajia lelpox, ja-aech wut, Dios chaxdusaxil japatuajnu Abraham pamojiw, chiekal naexasis-el xoti puexa Moisés chajia lelpox. Jachiyaxael wut, japi Dios xanaboejapoxliajwa asbuan jumch masox namaeyaxaeli. Dios jumdutpox japatuajnu chaxdusliajwas, japoxbej jachiyaxael japiilajwa.

¹⁵ Puexa jiw, naexasis-elpi Moisés chajia lelpox, japi Dios kastikaxaes. Moisés chajia lelpox ajil wut, jiw babijaxan is wut, ja-aech wut, bu'wujanjilaxaeli. Samata, Dios kastikaxisal japi jiw.

¹⁶ Abraham chiekal xanaboejt Dios. Samata, Dios jumduch chaxdusliajwas malech japatuajnu, paxilijaw, pamojiwliawabej. Dios japox jum-aech wut Abrahamliajwa, japox judiosliajwa, asew jiwliawabej, japi jiw Dios xanaboejaxaelpi japi kajachawaesliajwas Dios, me-ama Abraham xanaboejt Dios, jachilijaw japi jiw. Samata, puexa xatis Dios xanaboejaxaes. Jatis wut, Diosliajwa xatis, me-ama Abraham pamojiws wut, jachiyaxaes.

¹⁷ Dios pejjamechan, chajia lelsipox, jum-aech, Dios jum-aech wut Abrahamliajwa: "Xam naexasitam xan jumdutpox. Samata, asew jiwbej naexasisaxael xan jum-anpox. Ja-aech wut, japi, me-ama naxi wut, jachiyaxael japi jiw. Xabich pin-iamutan wulxaeli" — aech Dios Abrahamliajwa. Abraham nejchaxoel: "Dios xajup tupi mat-elijaw pejme duilalijaw. Dios xajupbej to'aliaw, majt ajil wut nejmach isliajwa" — aech Abraham, nejchaxoel wut Diosliajwa.

¹⁸ Puexa jiw chiekal matabija Abraham pijow naxuwlawilpox. Pe nakiowa, Abraham xanaboejsful xot Dios chajia jumtisipox paxulanliajwa, nejchaxoelafulon: "Dios nachaxdusaxael najumdutpox" — aech Abraham, nejchaxoel wut. Samata, Abraham pijow moejow. Do jawux, naxuwalow. Faenow poich. Do, xabich baxael, xabichbejpon pamojiw. Ja-aech japox, Abraham chiekal xanaboejsful wut Dios jumtisipox.

¹⁹ Nalaels-el wutful paxulan, Abraham xabich pati'in. Kaewaechan suapich, wewe'pas cien waechanliawapon. Abraham pijow, Sara, naxuwlawil, pati'ow xot. Pe nakiowa, Abraham xanaboejsful Dios jumtisipox.

²⁰ Nejchaxoel wut, nejchaxoela-elon: "Dios najum-aechpox diachwujnakolaxa-el" — chielon, nejchaxoel wut. Abraham xanaboejsful Dios chajia jumtisipox. Samata, jum-aechon Dios jumtaelias: "Xam xabich pachaemam" — aechon Diosliajwa.

²¹ Abraham nejchaxoel: "Diachwujnakolax Dios xajup nawe-isliajwa najum-aechpox" — aechon, nejchaxoel wut.

²² Samata, Abraham babijaxan ispoxan Diosliajwa wejisal.

²³ Japawujajan lela-esal xatis jumchilias Abrahamliajwa: "Japon Abraham xabich pachaem, Dios xanaboejsful xot" — chiliaswas.

²⁴ Japawujajan lelsbej xatis wachakalpijwas matabijalijwas Dios nakkajachawaesaxaelpox. Me-ama Abraham Dios kajachawaech, jachiyaxaelbej xatisliajwa, Dios nakkajachawaet wut. Ja-aech wut, xatis babijaxan isaspoxan ajilaxael Diosliajwa, xanaboejas wut Dios, japon mat-etron wajpaklon Jesucristo pejme dukalijaw.

²⁵ Jesús tup nakwemosliajwa xatis babijaxan isaspoxanliajwa. Japon tupox tres matkoi wut, mat-echpon pejme dukalijaw. Japon tup xot xatisliajwa, babijaxan isaspoxan chiekal nakwe-ajil Diosliajwa.

5

Xatis bu'wujanjisalpox Diosliajwa

¹ Xatis kaenanula chiekal bu'wujanjisal Diosliajwa. Xatis jatis, naexasich xot wajpaklon Jesucristo tupox xatisliajwa. Samata, amwutjel Jesús pijaxtat xatis pachaems Diosliajwa.

² Dios nakbeltaen xatis babijaxan isaspoخانliajwa, xatis naexasich xot wajpaklon Jesucristo tuppox cruztat xatisliajwa. Xatis chiekal matabijas asamatkoi pomatkoicha duilaxaespoخ Diosxotse. Samata, xabich nejchachaemlas.

³ Xatis xabich nabijatas wutbej, nejchachaemlas, xajupaxaes xot kaes boejtaliasliajwas.

⁴ Boejtaliach wut nabijataspoخ, Dios nejchachaemlaxael xatisliajwa. Ja-aech wut, asamatkoi Dios nakchaxduiyaxael pachaempox.

⁵ Dios to'a Espiritu Santo wajmatpuatanxotaliajwa. Ja-aech wut, Espiritu Santo nakkachawaet matabijaliajwas Dios xabich naknejxasinkpox. Samata, xatis wuaj nawesfulas asamatkoi Dios nakchaxdusaxaelpox, xabich pachaempox.

⁶ Majt xatis chajia babijaxan isas wut, xatis wajut weyaxisal. Samata, Cristo tupp xatisliajwa. Me-ama Dios chajiakolaxtat nejchaxoel japon tupaliajwa, japox ja-aechlisox xatisliajwa.

⁷ Aton asatujnupijin boesaxaes wuton asew jiw, kaen xatisxot jumchiyaxil: "japon aton xamal nabej boese! jXanlax naboessim!" —chiyaxilon. Pe boesaxaespon xabich pachaem wut, kaen xatisxot bej jumchiyaxaelbej: "jAmpon aton nabej boese', xabich pachaem xoton! jXanlax naboessim!" —bej chiyaxaelbejpon.

⁸ Pe xatis isas wut babijaxan, Dios nakiowa nakkachawaet. Dios to'ak paxulan tupaliajwa kaenanula xatis nakbu'weliajwa. Ja-aech wut, chiekal matabijas Dios xabich naknejxasinkpox.

⁹ Jesucristo tupp nakbu'weliajwa. Samata, amwutjel pachaems Diosliajwa. Samatabej, nakkastikaxilon.

¹⁰ Majt xatis Dios padaelmajiws, isfulas xot babijaxan. Pe amwutjel, Dios paxulan tupp xot cruztat, Dios nakbeltaen xatis babijaxan isaspoخانliajwa, chiekal pachaemaliajwas japonliajwa. Samata, amwutjel chiekal matabijas japon nakbu'weyaxaelpox.

¹¹ Diachwuajnakolax xatis nejchachaemlas, Dios nakbu'weyaxael xot. Chiekal nejchachaemlasbej, pachaems xot Diosliajwa wajpaklon Jesucristo pijaxtat.

Amxot jum-aechpox Adánliajwa, Jesucristoliajwabej

¹² Adán matxoela is babijax. Jawutbej, tuadut patupax. Do baxael, puexa ampathatpijiwbej babijaxan is. Do jawux, patupax xajup puexa jiwliajwa, japi jiwbej babijaxan is xot.

¹³ Moisés chajia lelpoخ ajil wutfuk, jawut ampathatpijiw babijaxan is. Pe nakiowa, Dios kastika-el, ajil xotfuk Dios fiatpox jiw babijaxan isasamata.

¹⁴ Adán laeja wut, hasta Moisés laeja wutbej, jiw babijaxan isful wut, japi jiw Dios kastika-esalfuk. Japi jiw babijaxan isful wut, Dios fias-el japi jiw babijaxan is-elaliajwa. Me-ama Adán fiach, jachi-esal japi jiw. Ja-aech wut, japi jiw nakiowa tupp kaen Adán pijaxtat, puexa jiw babijaxan isful xot. Pe baxael, Cristo pat wut, is pachaempox puexa jiwliajwa.

¹⁵ Adán is pachaema-elpox. Japox najupa-el, Dios malech nakwe-ispoخ suapich, Jesucristo pijaxtat. Kaen Adán babijax is xot, puexa jiw tupp. Dios nakwe-ispoخ Jesucristo pijaxtat, japox xabich pachaem puexa nejmachjiwliajwa, pomatkoicha duilaliajwapi Diosxotse.

¹⁶ Adán matxoela is babijax. Do baxael, puexa jiw babijaxan isful. Samata, japi jiw pejbu'wuajan Diosliajwa. Baxael, japi jiw Dios beltaens babijaxan ispoخانliajwa Jesucristo pijaxtat. Ja-aech wut, japi babijaxan ispoخان wejisal Diosliajwa.

¹⁷ Puexa jiw kaenanula tupaful, Adán chajiakolaxtat babijax is xot. Japibej tupp, pajut babijaxan is xot. Do baxael, Jesucristo tupp wut, Dios nakbeltaen kaenanula xatis babijaxan isaspoخانliajwa. Ja-aech wut, xatis babijaxan isaspoخان ajil Diosliajwa. Samata, Dios chiekal xanaboejas xot, Dios nakkachawaet chiekal duilaliajwas.

¹⁸ Puexa jiw, ampathatpijiw pejbu'wuajan Diosliajwa, Adán matxoela is xot babijax. Jesucristolax is pachaempox, japi jiw bu'wuajanjilaliajwa Diosliajwa. Samata, Dios tapaeyaxaes duilaliajwa pomatkoicha japonxotse.

¹⁹ Adán naexasis-el, Dios to'as wut. Samata, ampamatkoiyan xabich jiw babijaxan is. Pelax Jesucristo naexasit Dios to'aspoخ. Samata, Jesucristo pijaxtat xabich jiw babijaxan ispoخان ampamatkoiyantat wejisal Diosliajwa.

²⁰ Xabich chajiakolaxtat Dios waelt pejjamechan Moiséstat. Moisés japox chajia lel jiw fiasliajwa babijaxan isasamata. Pe nakiowa, japi jiw babijaxan is. Japi matabija Moisés chajia lelpoخ. Pajut matabijabejpi, is wut babijaxan. Majt japoxan pajut matabija-el. Jiw kaes xabich babijaxan isful wut, nakiowa beltaeflaxpi Dios babijaxan isfulpoخانliajwa. Kaes kachawaetbejpon asamatkoi japi jiw kofaliajwa babijaxan ispoخان.

²¹ Puexa xatis babijaxan isas. Samata, tuppaxaes. Wajpaklon Jesucristo tupp xot xatisliajwa, Dios nakbeltaen babijaxan isaspoخانliajwa. Samata, babijaxan isaspoخان ajil Diosliajwa. Naktapaeyaxaelbejpon duilaliajwas pomatkoicha japonxotse.

6

Jesucristo pejuwajan naexasiti kaes babijaxan isaxilpox

¹ Asew jiw nejchaxoel wut, bej nejchaxoelaxaelbej chiekal matabija-elaxtat: “Dios naknejaxasink xot, nakbeltaen xatis babijaxan isaspoxanliajwa. Samata, kaes pejme isaxaes babijaxan. Jatis wut, Dios kaes pejme nakbeltaeyaxael babijaxan isaspoxanliajwa” —chiyaxaelbej japi jiw, nejchaxoel wut.

² ¡Xatis kaes babijaxan nabej istis! Tupon kaes babijax isaxil, tup xotlison. Xatisbej jachiyaxaes babijaxanliajwa.

³ Xamal chiekal matabijam. Xatis nakbautisa wut, Jesucristo pejiw. Samata, xatis kaenanula wajut chiekal nejchaxoelaxaes: “Jesucristo kimatamatlas wut cruztat, xatisbej Diosliajwa, me-ama cruztat tups wut, japon suapich, jatis” —chiyaxaes, nejchaxoels wut.

⁴ Cristo tup wut, mathtas. Xatisbej nakbautisa wut, me-ama, Jesucristo suapich, nakmutha wut, jatis xatis, kofas xot babijaxan isaspoxan. Jesús tup wut, pax Dios mat-echpon pejme dukaliajwa. Amwutjel, xatisbej, me-ama Dios nakmat-iapis wut, jatis pejme duilaliajwas pajelnejchaxoelaxantat.

⁵ Jesucristo tup wut cruztat, jawut xatis, me-ama kaebu'tas wut, jatis, japon suapich. Do jawux, Jesucristo mat-ech wut pejme dukaliajwa, jawut xatisbej, me-ama nakmat-ia wut, jatis xatis chiekal pejme duilaliajwas, isliajwasbej Dios nejxasinkpoxan.

⁶ Xatis matabijasbej. Jesús tup wut cruztat, jawutbej wajpadujnejchaxoelaxan, me-ama nakwematamatal wut cruztat, Jesús suapich, ja-aechox. Samata, babijaxan isasiaspoxan amwutjel Dios chiekal nakwetoet. Kaes babijaxan isaxisal.

⁷ Aton tup wut, kaes babijaxan isaxillison. Xatisbej jachiyaxaes. Kaes babijax isaxisal.

⁸ Xatis, Jesucristo suapich, me-ama tups wut, jatis xot, chiekal xanaboejas asamatkoi duilaxaespox Diosxotse, Jesucristo suapich.

⁹ Xatis matabijasbej. Jesucristo tup wut, mat-echpon pejme dukaliajwa. Amwutjel kaes tupaxillison. Pomatkoicha dukafalaxaelon.

¹⁰ Jesucristo kaetupaxtat jiw bu'wiapon. Amwutjel dukafal wut, isful Dios nejxasinkpoxan.

¹¹ Samata, xamalbej kaenanula nejchaxoelam wut, ¡chiekal nejchaxoelde: “Xan nejxasinkaxpoxan isliajwan, babijaxan, amwutjel japoxanliajwa, xan, me-ama tupx wut, jan. Samata, kaes babijaxan isaxinil. Isfulaxaelenlax Dios nejxasinkpoxan, nabistax xot Jesucristoliajwa” —amde, nejchaxoelam wut!

¹² Samata, ¡asew watho' nabej babijne' bu'moejsliajwam najut isasiampoxan isliajwam!

¹³ Xamal majt, me-ama patupawam wut, ja-am Diosliajwa. Pe amwutjel, xamal, me-ama Dios mat-iapi wut, ja-am pejme duilaliajwam. Samata, ¡xamal, najut nabej nawoeye' babijaxanxot isfulaliajwam japoxan! ¡Xamallax najut nawoeyam Diosxot isfulaliajwam pachaempoxan!

¹⁴ Xamal chiekal matabijaxaelam isasamatam babijaxan, najut isasiampoxan. Moisés chajia lelpox, kaes xamal tato'lafula-el. Pe amwutjel, Dios pajut chiekal xamal tato'laful. Dios kajachawaesfulbej xamal.

Jesús pejuwajan naexasiti, me-ama esclavos wut, ja-aechi, isfulxot pachaempoxan

¹⁵ Dios nakbeltaen xot xatis babijaxan isaspoxanliajwa, amwutjel Moisés chajia lelpox kaes naktato'la-el. Ja-aech wut, ¿pachaemkat xatis jumchiliajwas: “¡Babijaxan isaxaes, isasiaspoxan!” —chiliajwas? ¡El! ¡Xatis kaes nabej nejchaxoelatis babijaxan isliajwas!

¹⁶ Xamal chiekal matabijam. Xatis asew pej-esclavos wut, wajpaklon naktato'alpoxan chiekal naexasisfulaxaes. Jachiyaxaesbej, babijaxanxot nawoeyas wut isfulaliajwas babijaxan. Asamatkoi, tups wut, diachwujnakolax napelsaxaesbej Diosliajwa. Dios naexasich wutlax, chiekal duilafalaxaes Diosliajwa.

¹⁷ Xamal majt babijaxan isam, najut isasiampoxan. Amwutjellax chiekal naexasitam Dios pejjamechan, asew, naexasiti Jesús pejuwajan, xamal naewuajanpox. Samata, Dios kawuajnax wut, gracias-an xamal Roma paklowaxpijwamliajwa, Dios xabich xamal kajachawaet xot.

¹⁸ Dios xamal kajachawaet babijaxan isampoxan kofaliajwam, majt isampoxan. Samata, amwutjel isam pachaempoxan, Dios nejxasinkpoxan.

¹⁹ Xamal xajupa-emil Dios pejjamechan, xabich tampoelpoxan, matabijaliajwam. Samata, chiekal naewuajnax matabijaliajwam. Xamal majt asew watho' bu'moejtam, nijwa-elpi. Asaxan babijaxan isambej. ¡Amwutjellax najut chiekal nawoeyam Diosxot isliajwam pachaempoxan, Dios nejchachaemlaliajwa xamalliajwa!

²⁰ Majt xamal xabich babijaxan isam wut, is-emil pachaempoxan, Dios nejxasinkpoxan.

²¹ Majt kamal babijaxan isampoxan, amwutjel japoxanliajwa xamal xabich nadala, pachaema-el xot japoxan. Jiw nakiowa babijaxan is. Pe japi napelsaxael pomatkoicha Diosliajwa.

²² Amwutjel Dios kajachawaet xot, xamal kofam majt babijaxan isfulampoxan. Samata, xamal najut nawoeyam Diosxot japon tanbichfulalialjwam. Japox pachaem xamallialjwa, chiekal duilam xot, me-ama Dios nejxasink. Baxael, asamatkoi tɔpam wut, duilaxaelam Diosxotse pomatkoicha.

²³ Jiw babijaxan is wut, mosaxaes pejpatɔpaxtat. Napelsaxaelbejpi Diosliajwa. Pelax xatis Dios pejiw, Jesús pejwɔajan naexasichpis, Dios naktapaeyaxael Diosxotse pomatkoicha duilalialjwas, wajpaklon Jesucristo sɔapich.

7

Amxot jum-aechpox nakjyaxliajwa, Moisés chajia lelpoxliajwabej

¹ Takoew, xamal matabijam Moisés chajia lelpox. Samata, matabijambej, jiw tato'las Moisés chajia lelpox naexasisliajwa, laelp wuti ampathatat. Pe japi tɔp wut, wewe'pa-esal Moisés chajia lelpox.

² Jachiyaxaelbej pawis, pamalpow. Japow fo'axil pamal, asan aton fisliajwa. Pe pamal tɔp wut, ja-aech wut, Moisés chajia lelpox tapaei japow asan aton fisliajwa.

³ Japow pamal naetɔpa-esal wut, asan aton naebumoejt wutow pamal, japow pawis babijax isaxael Diosliajwa. Japow pamal tɔp wut, ja-aech wutɔax, japow tapaei fisliajwa asan aton pamallijwapow. Fit wutow asan aton, japox chaemilaxil Diosliajwa.

⁴ Takoew, pawis pamalpow, japow naexasit pamal tato'laspoxan. Xamalbej majt ja-am, naexasitam wut Moisés chajia lelpox. Pe Jesucristo tɔp wut cruztat, jawutbej xatis, me-ama, Cristo sɔapich, tɔps wut cruztat, jatis. Jatis wut, Moisés chajia lelpox, me-ama toep wut, ja-aech xatiliajwa kaes naexasisamatatas. Samata, japox kaes naexasisaxisal. Amwutjel xamal Jesucristo pejiwam, japon tɔp wut, mat-ech pejme dukalialjwa. Samatabej, isfulam Dios pijax bichax.

⁵ Majt xatis Jesús pejwɔajan naexasis-esal wut, wajut babijaxan isasiaspoxan isas. Jawutbej Moisés chajia lelpox japoxan naktapae-el. Pe xatis japox jumtaens wut, kaes asbuan jumch namaekchas babijaxan isliajwas. Samata, ampathatat laelpas wut, diachwɔajnokolax chiekal napelslapas Diosliajwa.

⁶ Pelax amwutjel, Cristo sɔapich, me-ama tɔps wut, jatis xot, kaes naexasisaxisal Moisés chajia lelpox. Duils Dios tanbichliajwas. Espiritu Santo nakkajachawaet xot, nejchaxoels pajelnejchaxoelaxan Dios tanbichliajwas. Samata, japabichax isas wut, nejchaxoela-esal Moisés chajia lelpox naexasisliajwas.

Amxot jum-aechpox Moisés chajia lelpoxliajwa, puexa jiw babijaxan ispoxanliajwabej

⁷ Asew jiw nejchaxoel wut, bej jumchiyaxaelbejpi ampox: "Moisés chajia lelpox pachaema-el" —bej aechbejpi, nejchaxoel wut. Ajil wut Moisés chajia lelpox, ja-aech wut, jiw matabijaxil pachaema-elpoxan isasamata. Moisés chajia lelpox jum-aech: "Xam taenam wut asan pijax, jnabej nejchaxoel' xam nijaxliajwa!" —aechox. Japox ajil wut, xan matabijsaxinil pachaema-elpox, nejxasinkax wut asan pijax xan tajaxliajwa.

⁸ Xan matabijtax Moisés chajia lelpox. Nafiat is-elalijwan babijaxan. Do jawut, xan kaes asbuan jumch namaekchax babijaxan isliajwan. Nafiatpoxan naexasis-enil. Samata, xabich nejchaxoelx isliajwan japoxan. Ajil wut Moisés chajia lelpox, xan nejxasinkaxinil japoxan, babijaxan, isliajwan.

⁹ Moisés chajia lelpox matabijs-enil wutfuk, xan nejchaxoelx: "Xan kaes pejme pachae-man" —an, nejchaxoelx wut. Do jawux, tajut chiekal matabijtax Moisés chajia lelpox. Jawutbej tajut chiekal matabijtax chiekal naexasis-enilpox Moisés chajia lelpox. Samata, matabijtax Dios nakastikaxaelpox, xan nakiowa isx xotfuk babijaxan.

¹⁰ Dios waelt Moisés chajia lelpox xan naexasisliajwan, chiekal dukalijwanbej. Xan chiekal naexasis-enil xot Moisés chajia lelpox, xan tajut matabijtax nafa'axaelenpox Diosliajwa, babijaxan isx xot.

¹¹ Do jawut, chiekal nejchaxoelx: "Xan naexasisaxaelen Moisés chajia lelpox chiekal dukalijwan" —an, nejchaxoelx wut. Xan nejxasinka-enil isliajwan Dios natapae-elpox. Pe ja-an wut, xan nakiowa asbuan jumch namaekchax babijax isliajwan. Samata, Moisés chajia lelpox chiekal naexasis-enil xot, nafa'ax Diosliajwa.

¹² Moisés chajia lelpox tato'alpoxan, fiatpoxanbej, pachaem jiw naexasisliajwa.

¹³ Asew jiw nejchaxoel wut, bej nejchaxoelaxaelbejpi: "Moisés chajia lelpox chiekal pachaema-el. Japox naexasis-esal wut, Dios xatis nakkastikaxael" —bej chiyaxaelbejpi, nejchaxoel wut. ¡E! Japox chaemila-el. Xatis wajut babijaxan isas xot, Dios nakkastikaxael.

Dios japox chajia waelt tato'laxan Moisésat xatis wajut matabijaliajwas, babijaxan isas wut.

¹⁴ Xatis matabijas. Moisés chajia lelpox Dios chajia waelt ampathatat chiekal xatis laelpaliajwas. Pe nakiowa, chiekal puexa naexasis-esal Moisés chajia lelpox. Asbuan jumch kaes namaekchas isliajwas babijaxan.

¹⁵ Xan isasian pachaempoxan. Pe nakiowa, japoxan is-enil. Asax nejxasinka-enilpox isliajwan, japoxlax isx. Ja-an wut, baxael tajut chiekal nejchaxoelx: "Ma-aech xot xan japox isx" —an, tajut nejchaxoelx wut.

¹⁶ Isx wut nejxasinka-enilpox, xan xabich nanejxaejow, japox isx wut. Samata, xan tajut matabijtax. Moisés chajia lelpox pachaem, nakfiat xot babijax isasamatas.

¹⁷ Baxael, tajut chiekal nejchaxoelx: "Xan babijaxan isxpojan tajut is-enil. Tajnejchaxoelax nato'a xan babijaxan isliajwan" —an, nejchaxoelx wut.

¹⁸ Xan tajut matabijtax tajnejchaxoelax, xabich pachaema-elpox. Xan nejxasinkax isliajwan pachaempoxan. Pe nakiowa, japoxan isaxinil.

¹⁹ Samata, xan is-enil nejxasinkaxpojan. Isxlax nejxasinka-enilpoxan.

²⁰ Tajut nejchaxoelx wut, jum-an: "Japoxan xan tajut is-enil. Tajnejchaxoelax, pachaema-elpox, nato'a isliajwan babijaxan" —an, nejchaxoelx wut.

²¹ Xan tajut matabijtax. Pachaempox isasian wut, jumch isx babijax.

²² Nejxasinkax naexasisliajwan Moisés chajia lelpox.

²³ Pe nakiowa, tajbabejnechaxoelax natapae-el chiekal nejchaxoelaliajwan. Samata, isx babijaxan.

²⁴ Xan xabich nabijatax! jBabijaxan isx xot, bej nafo'axaelenbej pomatkoicha Diosliajwa! ¿Achankat xan nakajachawaesaxael nabu'weliajwa nafo'a-elaliajwan Diosliajwa?

²⁵ Kaen Dios xan nabu'weyaxael nejchaxoelasamatan babijaxan. Samata, Dios kawuajnax wut, gracias-an Diosliajwa, nakajachawaet xoton. Dios to'a wajpaklon Jesu-cristo xatis nakkajachawaesliajwa. Samata, naexasis-enil tajnejchaxoelax. Xan matabijtax naexasisaxaelenpox Moisés chajia lelpox. Pe nakiowa, tajnejchaxoelax nato'a babijaxan isliajwan.

8

Chiekal duilpox, Jesús pejwuajan naexasiti, kajachawaesfulas xoti, Espíritu Santo

¹⁻² Xatis majt napeltas Diosliajwa. Pe amwutjel, naexasich xot Jesús pejwuajan, Dios nakkastikaxil. Espíritu Santo nakkajachawaet xot, chiekal duils Diosliajwa. Jesús tup wut cruztat, Dios nakbeltaen babijaxan isaspojanliajwa. Xatis kaes is-esal isasiaspojan, pachaema-elpoxan.

³ Xatis chiekal naexasis-esal puexa Moisés chajia lelpox. Samata, xatis wajut weyaxisal babijaxan isaspojanantat. Pe nakiowa, Dios nakbu'weliajwa to'a paxulan nalaelsliajwa ampathatat. Japon pejbu't, me-ama xatis wajbu'an wut, ja-aech. Do baxael, japon tup wut cruztat, nakwemot xatis babijaxan isaspojanliajwa. Ja-aech wut, Dios toet babijaxan xatis isaspojan.

⁴ Dios japox is xatis isliajwas pachaempoxan, me-ama Moisés chajia lelpox jum-aech. Wajnejchaxoelaxan, babijaxan, nakt'o'a isliajwas pachaema-elpoxan. Amwutjel japoxan is-esal. Isas Espíritu Santo nakt'o'apoxan.

⁵ Nejchaxoelaxan, babijaxan, jiw to'as isliajwa babijaxan. Pelax Espíritu Santo tato'laspi, japi nejchaxoel isliajwa Espíritu Santo nejxasinkpojan.

⁶ Jiw nejchaxoelpeji wewe'paspojanxal pajutliajwa, japi jiw napelsaxael Diosliajwa. Japibej Dios kastikaxaes. Asewax, nejchaxoelpeji Espíritu Santo nejxasinkpojanxal, japi jiw chiekal duilaxael, asew jiw swapich. Asamatkoi japi jiw duilaxaelbej Diosxotse.

⁷ Jiw, nejchaxoelpeji babijaxan isaxan, japi Dios padaelmajiw. Japoxan nejchaxoel xoti, nejweslapi naexasisliajwa Moisés chajia lelpox. Japi japox naexasisaxilbej.

⁸ Samata, jiw babijaxan is, pajut nejxasinkpojan. Is-el Dios nejxasinkpojan.

⁹ Amwutjel Espíritu Santo diachwuajnakolax xamal nejmatpuatanxot duk xot, isfulam Espíritu Santo nejxasinkpojan. Is-emil majt najut isfulampoxan, nejxasinkampoxan isliajwam. Jiw pejmatpuatanxot Espíritu Santo duka-el wut, japi jiw Cristo pejiwa-el.

¹⁰ Xamal Jesucristo pejiwam xot, pomatkoicha duilaxaelam Diosxotse, babijaxan isampoxan ajil xot Diosliajwa. Pefuk xamal ampabu'tam xot, majt tupaxaelam, isam xot babijaxan.

¹¹ Jesús tup wut, Dios mat-echpon pejme dukaliajwa. Samata, xamalbej asamatkoi tupam wut, Dios mat-eyaxael pejme duilaliajwam, Espíritu Santo duk xot nejmatpuatanxot.

¹² Takoew, isaxaes Dios nejxasinkpojan. Isaxisal wajut nejxasinkaspojan, babijaxan.

¹³ Isam wut babijaxan, najut nejxasinkampoxan, asamatkoi tupam wut, xamal napelsaxaelam Diosliajwa. Babijaxan isampoxan kofam wut, Espiritu Santo xamal kajachawaet xot, ja-am wut, xamal duilaxaelam pomatkoicha Diosxotse.

¹⁴ Espiritu Santo jum-aechpoxan ispi, japi jiwlap Dios paxi.

¹⁵ Amwutjel Espiritu Santo nakkajachawaet. Dios to'a wut Espiritu Santo xatisxotaliajwa, to'a-elon xatis wajlewliajwa Dios nakkastikaxaelpoxliajwa. Diachwujnakolax xatis Dios paxis. Samata, Espiritu Santo nakkajachawaet xatis jumchiliajwas Dios: "¡Taj-ax Dios!" –chiliajwas.

¹⁶ Espiritu Santo nakkajachawaet xot, xatis chiekal matabijas Dios paxispi.

¹⁷ Xatis Dios paxis xot, asamatkoi Dios nakkajachawaesaxael, japon nakjumdut xot. Jawut xatis, Jesucristo swapich, jiw tato'laxaes Diosxotse. Jesucristo majt nabijat, asew jiw babijax is wut japonliajwa. Xatis nabijatas wutbej, Jesús pejwujajan naexasich xot, asamatkoi Diosxotse duilaxaes, Dios pej-itliakaxxotse.

Nejchachaemilpox naexasiti Jesús pejwujajan

¹⁸ Xatis nabijatas ampahat. Xan japox nabijasaxliajwa nejchaxoela-enil. Pelax xan nejchaxoelx asamatkoi nakwepachaemaxaelpoxliajwa, Jesucristo pejme pask wut.

¹⁹ Dios ispi ampahat, japi xabich piach wujjanawet Dios jumchiyaxaelpox jumtaeliajwapi: "Ampi jiw, taxi" –chiyaxaelpox xatisliajwa.

²⁰ Xabich chajiakolaxtat, Dios ampahat is wut, do baxael, Adán babijax is wut, Dios jum-aech kastikaxaelpox ampahatliajwa. Samata, asamatkoi, Dios markpox, matkoi, pat wut, Dios ampahat toesaxael Dios nakjumchiyaxael, jathat xaliaxsliajwa.

²¹ Dios pajelthat xaliast wut, puexa Dios ispoxan pejme pachaemaxael. Jawut ajilaxael patupax. Ajilaxaelbej xoepax. Japoxan jachiyaxael, Dios chaxduiyaxael wut paxiliajwa pachaempoxan.

²² Xatis matabijas, puexa nejmach, ampahatpijij, nabijat. Me-ama kaeow pawis boejpuns wut yamxuch nalaelsliajwa, ja-aech japox.

²³ Xatis nabijatasbej. Matabijas Espiritu Santo wajmatpumatxotpox. Samata, asamatkoi Dios kaenanula nakchaxduiyaxael pajelbu't, xatis Dios paxis xot. Jatis wut, kaes tupaxisal. Japamatkoitat xatisliajwa Dios nakjumchiyaxael: "Ampi taxi" –chiyaxaelon.

²⁴ Xatis chiekal naexasich Jesucristo tupox xatisliajwa. Samata, matabijas Dios nakbu'xaliaxaxaelpox pajelbu'taliajwas. Japox xatis wujjanawech. Xatis ma amwut, pajelbu'tas wut, ja-aech wut, nakwewe'paxil wujjanawesliajwas pajelbu't, nakbu'xaliaxaxaelpox.

²⁵ Tae-esal xotfuk wujjanawechpox, nakiowa wujjanawesfulaxaes.

²⁶ Espiritu Santo nakkajachawaesful, wajxanaboejaxan chiekal mamnika-el xot Diosliajwa, chiekal matabija-esal xotbej Dios kawujjanaliajwas. Samata, Espiritu Santo Dios nakwekawujjanafal xatisliajwa.

²⁷ Dios matabijt xatis nejchaxoelspoxan. Samata, Espiritu Santo Dios kawujjan wut xatisliajwa, matabijton, Espiritu Santo nakwekawujjan xot, me-ama Dios nejxasink.

Nejchachaemlaxaelpox Jesús pejwujajan naexasiti, wepach wut pachaema-elpoxan

²⁸ Xatis, Dios nejxasinkaspis, chiekal matabijas ampox. Naktapat wut pachaema-elpoxan, o, pachaempoxanbej, ja-aech wut, japoxan pachaemaxael xatisliajwa. Dios chajia nejchaxoel xatisliajwa asamatkoi jachiyaxaelpox.

²⁹ Dios chajia matabijt xatis naexasisaxaespoj Jesús pejwujajan. Dios chajia nejchaxoelbej xatis, japon paxi wut, jachiliajwas. Samata, Jesucristo, me-ama wajkoewan, matxoe-lapijin, ja-aechon. Xatis, me-ama wachakalpijwas wut, jatis.

³⁰ Me-ama Dios chajia nejchaxoel asamatkoi xatis japon paxiliajwas, jasoxtat Dios nakmakanot japon pejiwaliajwas. Samata, xatis, Jesús pejwujajan naexasich wut, pachaems Diosliajwa, majt babijaxan isaspoxan ajil xot Diosliajwa. Samata, asamatkoi, xatis jiw tato'laxaes, Jesucristo swapich.

³¹ Jatis wut, zachaxkat kaes xatis jumchiyaxaes? Dios xatis nakkajachawaet wut, ichinax kaen aton nakmalechaxil xatisliajwa!

³² Dios pasiowla-el paxulan japon tupaliajwa, xatis nakbu'weliajwa. Samata, matabijas, Dios nakchaxduiyaxael puexa xatis nakwewe'poxan.

³³ Dios nakmakanot japon pejiwaliajwas. Samata, chinax kaen aton naktasalaxil babijaxan isaspoxanliajwa, xatis majt babijaxan isaspoxan chiekal ajil xot Diosliajwa.

³⁴ Chinax kaen aton to'axilbej nakkastikaliajwa babijaxan isaspoxanliajwa, Jesucristo tup wut, mot xoton xatis babijaxan isaspoxanliajwa. Tup wut, Dios mat-echpon pejme dukaliajwa. Amwutjel ek pax Dios poklalel. Samata, Jesús Dios kawujjanafal xatis nakkajachawaesfulaliajwa.

³⁵ Chinax kaen aton xajupa-el asax isliajwa, Cristo nakkofaliajwa xatis naknejxasinkpox. Nabijatas wut, Cristo nakiowa naknejxasinkaxael. Puexa chiekal pachaema-el wutbej xatisliajwa, Cristo nakiowa naknejxasinkaxael. Asew jiw babijaxan is wutbej xatisliajwa, Dios chiekal xanaboejas xot, Cristo nakiowa naknejxasinkaxael. Xabich litaxaelas wutbej, nakwe-ajil wutbej naxoeliasjwas, wu nakiowa Cristo naknejxasinkaxael. Chachoel wutbej, asew jiw nakbesia xot, Cristo nakiowa naknejxasinkaxael.

³⁶ Dios pejjamechan, chajia lelspx, jum-aechox David jum-aechpox Diosliajwa: “TajDios, xanal pomatkoicha asew jiw nabesia, nejjowan xot. Me-ama ovejas tadukafulas wut xua'asliajwas, jachisiabejpi asew jiw xanalliajwa” —aechox.

³⁷ Xatis nabijatas wut, babijaxan naktpat xot, nakiowa mamnikafulaxaes, Cristo naknejxasinkpon nakkajachawaesful xot.

³⁸ Xan chiekal matabijtax ampx. Chinax kaeyax, asax, xajupaxil xatis nakdiajkaliajwa Dios naknejxasinkpox. Wajpatupax, wajnabijasaxbej, japoxanbej nakdiajkaxil Dios naknejxasinkpox. Angeles, depbej, nakdiajkaxil Dios naknejxasinkpox xatis. Asaxan babijaxan naktpat wut xatisliajwa, asamatkoi pasaxaelpoxanbej, japoxanbej xatis nakdiajkaxil Dios naknejxasinkpox.

³⁹ Puexa Dios ispxoxan athuxotse, thatxotbej, japoxan xatis nakdiajkaxil Dios naknejxasinkpox. Asewbej, Dios ispxoxan, kaeyax nakdiajkaxil Dios naknejxasinkpox. Xatis matabijas Dios naknejxasinkpox, to'a wuton wajpaklon Jesucristo tupaliajwa puexa xatis babijaxan isaspxoxanliajwa.

9

Dios makanotpx judios japon pejjiwaliajwa

¹ Xan jum-anpxoxan diachwujnakolax. Kichachajba-enil, Jesús pejwuajan naexasitx xot. Espiritu Santo nakajachawaet xot, matabijtax xan jum-anpxoxan xamalliajwa, japoxan diachwujnakolax.

² Xan xabich nanejxaejow, asew judios naexasis-el xot Jesús pejwuajan. Xabich nanejxaejowbej, nejchaxoelx wut japiliajwa.

³ Samata, xan nejchaxoelx japiliajwa: “Dios natapaeyaxael wut, nejxasinkax xan nafo'aliajwan Diosliajwa, Cristo pej-apostol-elaliajwanbej, tajjiw judioslax Dios bu'weliajwas” —an, nejchaxoelx wut. Pe Dios natapaeyaxil japox jachiliajwan.

⁴ Tajwujnapijiw, judios, Israel pamojiw, japi makanoch Dios japon pejjiwaliajwapi. Ja-aech wut, Dios japixot. Samata, japi taen pomatkoicha Dios pej-itliakax. Chajia jumtisbejpi kajachawaesliajwas. Japiliajwa waeltas Moisés chajia lelpox japi naexasisfulaliajwa. Samata, israelitas matabija Dios kawuajnafulaliajwa. Matabijabejpi Dios chajia jum-aechpox bu'weliajwas.

⁵ Abraham, Isaac suapich, Jacobbej, japi judios pejwujnapijiw. Cristo nalaelt judiosxot. Samata, Cristo judios-aton. Japon pajutbej Dioslape, puexa jiw tato'laliajwa. Samata, pomatkoicha puexa jiw jumchiyaxaeson: “Japon xabich pachaem” —chiyaxaeson. Jasox jachiyaxael japonliajwa.

⁶ Judiosxot asew jiw naexasis-el Dios chajia jum-aechpox. Samata, Dios is-el chajia jum-aechpox japi jiwliajwa. Ja-aech wut, xatis jumchiyaxisal: “Dios is-el puexa judiosliajwa chajia jum-aechpox” —chiyaxisal xatis. Dios kaesuapich makanot judiosxot japon pejjiwaliajwa. Dios puexa makanos-el judios japon pejjiwaliajwa.

⁷ Abraham xabich pamojiw. Pe nakiowa, puexa Abraham pamojiw Dios pejjiwela-el. Dios chajia jum-aech Abrahamliajwa: “Xam kolenje naxulan. Pe kaen, naxulan Isaac, pamojiw, japi namojiwkola walxael” —aech Dios Abrahamliajwa.

⁸ Samata, xatis chiekal matabijas, puexa Abraham pamojiw Dios pejjiwaxil. Dios naexasitikal, japi diachwujnakolax Abraham pamojiwkolaxael. Japi Dios paxiyaxaelbej.

⁹ Abraham xijil wutfuk, Dios chajia jum-aech Abrahamliajwa: “Kaewaech wut, pejme xamxot pasaxaelen. Jawut nijow Sara paxulchaxaelisow” —aech Dios, jumdut wut Abrahamliajwa.

¹⁰ Do jawux, kaewaech wutlejen, Isaac nalaelt, pat wut Dios jumdutpox. Do jawux, piniawaechan wut, Isaac pijow fit. Japow pawul Rebeca. Moejow wut, kolenje na-o'a faekow.

¹¹⁻¹³ Na-o'a nalaela-el wutfuk, japi is-el wutfuk babijaxan, is-el wutbejfuli pachaempoxan, Dios jum-aech Rebecaliajwa: “Matxoelapijin tato'laxaes pakoewan, wachakalpijin” —aech Dios Rebecaliajwa. Baxael, japiliajwa Dios pejjamechan, chajia lelspx, jum-aechox, Dios jum-aech wut: “Xan kaes nejxasinkax wachakalpijin, pawulpon Jacob. Matxoelapijin, pawulpon Esaú, nejxasinka-enillejen” —aech Dios. Jasoxtat Dios makanotbej jiw nejxasinkpipon pejjiwaliajwa. Dios jiw makanot wut pejjiwaliajwa, jumchi-elon: “Xan jiw makanosaxaelen, ispi pachaempoxan” —chi-el, Dios nejchaxoel wut.

¹⁴ Xatis jumchiyaxial: “Dios jasoxtat makanot wut, japox chiekal pachaema-el” – chiyaxial. Dios puexa ispoxan xabich pachaem.

¹⁵ Dios jum-aech Moisésliajwa: “Xan aton beltaesian wut, japon aton beltaeyaxaelen” – aech Dios.

¹⁶ Aton nejxasink wut Dios beltaelajwas babijaxan ispoxanliajwa, o, nejxasinka-el wuton beltaelajwas, pe nakiowa, Dios nejxasink wut, japon aton Dios beltaeyaxaes babijaxan ispoxanliajwa. Aton xabich Dios tanbist wut, o, tanbich-el wut, pe nakiowa, Dios nejxasink wut, japon aton beltaeyaxaes.

¹⁷ Dios pejjamechan, chajia lespox, jum-aech Dios jum-aechpox rey, Egipto tuajnupijinliajwa: “Xam tapaeix xot, amwutjel xam puexa ampatuajnpijiw tato'lam. Xan koechaxan isaxaelen xamal nabijasliajwam, tajjiw tapae-emil wut nakolaliajwa nejtuajnxot. Puexa ampathatpijiw namatabijaxael xan, diachwuajnakolax xan Diosnanponan” – aech Dios rey Egipto tuajnupijinliajwa.

¹⁸ Samata, Dios jiw beltaesia wut, beltaeyaxaelon. Naexasis-elpi Dios tato'alpox, japi jiw Dios tapaeis naexasis-elaliajwa Dios tato'alpox.

¹⁹ Pe xamal bej jumchiyaxaelambej xanliajwa: “Jiw naexasis-el wut Dios tato'alpox, japi jasox tapaeis jachisfulaliajwa pomatkoicha. Ja-aech wut, japi Dios kastikaxial” – bej chiyaxaelambej xanliajwa.

²⁰ Xamal jasox nabej jum-aech' Diosliajwa! jNabej jum-aech'bej: “Dios is pachaema-elpox” – nabej aeche'! Baext xajupaxael wut naksiyalajwa, jumchiyaxil baex fa'sanliajwa: “Xam na-isam baextat. jMa-aech xotkat xan na-isam baextat?” – chiyaxil baext.

²¹ Baex fa'sanliajwa tampoela-el isasiapoxan isliajwapon bux-astat. Japonliajwa tampoela-el isliajwa baext, chimiat, esliajwa puexa jiw taeliajwa. Japonliajwa tampoela-elbej asat isliajwa, xachat-etpotliajwa.

²² Diosbej ja-aech. Isasiapoxan ispon jiwliajwa. Japon xabich kastikaxael jiw, babijaxan ispi, pajut japi jiw matabijaliajwa japon xabich palalapox, pejpamamaxbej. Pe Dios piach xabich boejtaliat jiw babijaxan ispi kastika-elaliajwapon. Japilach chiekal toesaxaespi, Dios kastikas wut.

²³ Dios bu'weyaxaelpi, japi jiw bu'weyaxaelon. Dios nakbeltaen xatis babijaxan isaspox-anliajwa, jiw pajut matabijaliajwa, japon xabich pachaempon. Dios chajia nakmakanot, nalaela-esal wutfuk japon pejjiwaliajwas, pomatkoicha duilaliajwas japonxotse.

²⁴ Dios nakmakanot wut japon pejjiwaliajwas, judioskal makanos-elon. Makanotbejpon judios-elpi. Puexa xatis Dios nakmakanot japon pejjiwaliajwas.

²⁵ Profeta Oseas chajia lelpox jum-aech, Dios jum-aech wut judios-elpilajwa:

“Majt tajjiwa-elpi, japiliajwa xan jumchiyaxaelen: ‘Ampi jiw, tajjiw’ – chiyaxaelen. Japi jiw, majt nejxasinka-enilpi, amwut japiliajwa jumchiyaxaelen: ‘Ampi jiw, tajjiw, xan japi nejxasinkax’ – chiyaxaelen.

²⁶ Japiliajwabej, xan majt jum-an: ‘Xamal tajjiwa-emil’ – an, asamatkoi japi jiw xan nanaex-asisaxael. Jawut asew jiw jumchiyaxaes japiliajwa: ‘Ampi jiw, Dios pomatkoicha dukpon, japon paxi’ – chiyaxaespi” – aechox profeta Oseas chajia lelpox, Dios jum-aech wut judios-elpilajwa.

²⁷ Profeta Isaías chajia ampox jum-aech judiosliajwa: “Israel pamojiw xabich pin-iataxael. Me-ama thaejbelen marxot xabichjim, jachiyaxael Israel pamojiw. Pe japixot kaesapich Dios bu'weyaxaes.

²⁸ Asamatkoi potuajnuchanpijiw, babijaxan ispi, kamta kastikaxaespi Dios” – aech profeta Isaías judiosliajwa.

²⁹ Profeta Isaías chajia jum-aechbej:

“Dios, xajup puexa isliajwa. Dios nakbeltaeyaxil wut, puexa xatis chiekal naktoesaxaelon. Me-ama Sodoma paklowaxpijiw, Gomorra paklowaxpijiwbej, chiekal toech wut, jachiyaxaelbejpon xatisliajwa, Dios naktoesaxael wut xatis” – aech profeta Isaías.

Amxot jum-aechpox judiosliajwa, Jesúsliajwabej

³⁰ Xatis matabijas. Majt judios-elpi nejchaxoel wut, chiekal nejchaxoela-el: “jMachiyax-aes pachaemaliajwas Diosliajwa, babijaxan isaspoxanliajwa?” – chi-eli, nejchaxoel wut. Amwutjel judios-elpi Jesús pejwuajan chiekal naexasit xoti, japi majt babijaxan ispoxan wejisallisi Diosliajwa.

³¹ Judioslax nakaewa najum-aech: “Moisés chajia lelpox chiekal naexasich pachaemaliajwas Diosliajwa” – aech judios nakaewaliajwa. Pe nakiowa, judios chiekal naexasis-el Moisés chajia lelpox. Samata, nakiowa judios babijaxan isful.

³² Naexasis-eli Jesús tuppox japiliajwa, japi nakiowafuk pejubu'wuajan Diosliajwa. Asbuan jumch nakaewa najum-aechi: “Xatis naexasich wut Moisés chajia lelpox, pachaemaxaes

Diosliajwa” —aechi asbuan jumch nakaewa. Samata, judíos babijaxan is xot, napelti Diosliajwa.

³³ Dios pejjamechan, chajia lelspx, jum-aech, Dios chajia jum-aechpox paxulan to'axoekpoxliajwa:

“Xan to'axaelen taxulan Jerusalén paklowax poxadik, japon jiw bu'weliajwa japi babijaxan ispoxanliajwa. Asew jiw japon xanaboejaxili. Japi jiw chiekal napelsaxael xanliajwa. Asew jiw lax, taxulan xanaboejaxaelpi. Japilax napelsaxil xanliajwa” —aech Dios, chajia jum-aech wut.

10

¹ Takoew, xan nejxasinkax puexa judíos Dios bu'weliajwas. Samata, Dios kawuajntax japiliajwa.

² Judíos xabich isasia Dios nejxasinkpoxan Dios nejchachaemlaliajwa japiliajwa. Pe japoxan is wut, Diosliajwa japoxan pachaema-el, chiekal matabija-el xoti isliajwa Dios nejxasinkpoxan.

³ Japi judíos pajut chiekal matabija-el Dios isaxaelpox japi babijaxan ispoxan chiekal ajilaliajwa Diosliajwa. Samata, japi chiekal matabija-el wut, nejchaxoel: “Xatis naexasich wut Moisés chajia lelpox, chiekal pachaemaxaes Diosliajwa” —aechi asbuan jumch, nejchaxoel wut. Samata, ja-aech wut, japi naexasis-el Jesús tuppox japiliajwa pachaemaliajwapi Diosliajwa, me-ama Dios nejxasink japi naexasisliajwa Jesús pejwuajan.

⁴ Japi judíos naexasisaxael wut Jesucristo tuppox puexa jiwliajwa, ja-aech wut, japi babijaxan ispoxan ajilaxael Diosliajwa. Samata, ja-aech wut, japi nejchaxoelaxil ampx: “Xatis naexasisaxaes Moisés chajia lelpox pachaemaliajwas Diosliajwa” —chiyaxili, nejchaxoel wut.

⁵ Asew jiw chiekal matabija-el xot, nejchaxoel: “Xatis diachwuajnakolax naexasich wut Moisés chajia lelpox, babijaxan isaspxan ajilaxael Diosliajwa” —aechi asbuan jumch, nejchaxoel wut. Jasi jiwliajwa Moisés chajia lelpox jum-aech: “Aton chiekal naexasit wut puexa xan lelpox, japon pomatkoicha dukaxoei Diosxotse” —aechox. Pe aton puexa chiekal naexasisaxil Moisés chajia lelpox.

⁶ Pelax chiekal naexasich wut Jesucristo tuppox babijaxan isaspxanliajwa, jatis wut, Dios nakbeltaeyaxael xatis babijaxan isaspxanliajwa nakbu'weliajwa. Samata, Dios pejjamechan jum-aech: “Xamal nejchaxoelam wut, jnabej nejchaxoele”: ‘¿Achan Dios poxaxoei buflaeliajwasik Cristo, japon nakkajachawaesliajwa pachaemaliajwas Diosliajwa?’ —nabej aeche’, nejchaxoelam wut, japon fuloek xotlison!

⁷ ¡Xamal nabej nejchaxoele'bej: ‘¿Achankat fulaeyaxaek tupi pej-aelan duil poxadik, jaxotsin Cristo buflaeliajwasin nakkajachawaesliajwa pachaemaliajwas Diosliajwa?’ —nabej aeche’, nejchaxoelam wut!” Cristo jaxota-eldik. Chajia mat-echpon. Ma amwutjel duklison pejme.

⁸ Dios pejjamechan, chajia lelspx, jum-aech wut, jum-aechox: “Dios pejjamechan xamal chiekal naexasitam. Samata, jum-am Dios pejjamechanliajwa. Nejchaxoelambej japoxanliajwa” —aechox. Japajamechan xamal naewuajntax naexasisliajwam Cristo tuppox xamalliajwa.

⁹ Xatis ampx nejchaxoels wut: “Diachwuajnakolax Jesús tux wut cruztat, Dios mat-echpon pejme dukaliajwa” —tis wut, xatis jumtis wutbej asew jiw nakjumtaeliajwa: “Jesús tajpaklon” —tis wut xatis, Dios nakbu'weyaxael.

¹⁰ Pe xatis kaenanula jumtis wut: “Jesucristo cruztat tux xanliajwa” —tis wut, nejchaxoels wut, ja-aech wut, babijaxan isaspxan ajil Diosliajwa. Xatis asew jiw jumtis wut: “Jesucristo, japon tajpaklon” —tis wut, Dios nakbu'weyaxael.

¹¹ Dios pejjamechan, chajia lelspx, jum-aech wut, jum-aechox jiw Jesús xanaboejaxaelpiliajwa: “Jiw xanaboeja wut Cristo, japi jiw napelsaxil japonliajwa” —aechox.

¹² Judíos, judíos-elpibej, Dios puexa chiekal taen. Dios paklon puexa jiwliajwa. Jiw Dios kawuajan wut, Dios kajachawaet japi jiw.

¹³ Xatis japox matabijas, Dios pejjamechan, chajia lelspx, jum-aech wut, jum-aech xotox: “Puexa jiw wajpaklon Dios kawuajan wut bu'weliajwas, japi jiw bu'weyaxaes” —aech xotox.

¹⁴ Jiw kawuajntaxil Dios bu'weliajwas, naexasis-el wuti Jesucristo tuppox japi jiw babijaxan ispoxanliajwa. Naexasisaxilbejpi Jesús pejwuajan, jumtae-el wut Jesucristo pejwuajan. Jiw jumtaeyaxilbej Jesucristo pejwuajan, asan aton ajil wut naewuajnalijwas japon pejwuajan.

¹⁵ Asan aton fulaeyaxilbej naewuajnalijwa Jesús pejwuajan, japon aton to'a-esal wut. Dios pejjamechan, chajia lelspx, jum-aech wut, jum-aechox Jesús pejwuajan naewuajntaxaelpiliajwa: “¡Xabich pachaemdo!, japi jiw xapat xot chimiawuajan asew jiw naewuajnalijwa!” —aechox.

¹⁶ Xabich jiw naewet Jesucristo pejuwajan. Pe kaeswapich jiw naexasit japawujan Dios bu'weliawjas. Majt chajia japox ja-aechbej. Jiw naexasis-el profeta Isaías jum-aechpox. Ja-aech wut, profeta Isaías jum-aech Diosliawja: "Tajpaklon Dios, xabich jiw naexasis-el chimiawujan, naewujnax wut. Jumch kaeswapich naexasit" —aech profeta Isaías.

¹⁷ Naexasiti Jesucristo pejuwajan, japi jiw naexasit japawujan, naewet xoti japawujan.

¹⁸ Judios jumtaen Jesús tuppox japi babijaxan ispoxanliawja. Pe nakiowa, japi japox naexasis-el. Samata, Dios pejjamechan, chajia lelspx, jum-aech wut, jum-aechox:

"Dios pejjamechan naewujnaxaelpi, japi jiw potujnucha naewujnaxael Dios pejjamechan" —aechox.

¹⁹ Judios chiekal jumtaen Jesús tuppox japi babijaxan ispoxanliawja. Pe japi naexasis-el japox. Moisés chajia jum-aech judios naexasisaxilpox. Jum-aechbejpon judios-elpilijawja japi Dios naexasisaxaelpox. Japoxanliawja Moisés chajia lelpox jum-aech judiosliawja:

"Dios jum-aech xamallijawja: 'Asatujnupijiw, judios-elpi, japi tajjiwaxael. Samata, xamal nusasiowlaxaelam japilijawja. Japi majt matabija-elpi tajjamechan. Pe asamatkoi judios-elpi, japi xan nanaexasisaxael. Samata, xamal nalalaxael japilijawja' —aech Dios xamallijawja" —aech Moisés chajia lelpox.

²⁰ Baxael, Isaíasliawja chachael wut, nakiowa lelon Dios chajia jum-aechpox judios-elpilijawja: "Judios-elpi majt nejchaxoela-el xan nanaexasisliawja. Asamatkoi japi xan nanaexasisaxael. Judios-elpi, japi asew jiw wujnachaems-eli xanliawja, japi xan tapaeyaxael nanaexasisliawja" —aech Dios judios-elpilijawja, profeta Isaías chajia lel wut.

²¹ Profeta Isaías chajia lel Dios jum-aechpox judiosliawja: "Pomatkoicha xan nejxasinkax judios. Pe japi naexasis-el xan pachaemalijwan japilijawja" —aech Dios.

11

Asew judiosxot Dios bu'weyaxaespx

¹ ¿Dioskat koft pejiw judios? ¡El! Dios kofs-el pejiw judios. Xanbej judios-atonan, Abraham pamonan, Benjamin pamonanbej.

² Chajiakolaxtat Dios makanot pejiwaliajwa tajwujnapijiw, israelitas. Samata, amwutjel Dios nejwesla-el israelitas. Xamal matabijam Dios pejjamechan jum-aechpox profeta Eliasliawja. Japon Dios kawujan wut, tasalapon israelitas. Jum-aechon:

³ "Tajpaklon Dios, israelitas xabich beful nejprofetas. Toetbeji nejew altar. Xan kaenan namanx nejprofetas beflaspixot, xam kawujnaxponan. Xanbej israelitas naboesasia" —aech profeta Elías Diosliawja.

⁴ Do jawut, Dios jum-aech profeta Eliasliawja: "¡Xam kaena-emil! Xan tajjiw, siete mil poejiw, israelitas. Japi chiekal xan nanaexasisful. Japi israelitas nuila-elbej brixtat kawujnaliajwapi idolo, pawlox Baal" —aech Dios profeta Eliasliawja.

⁵ Amwutjelbej Dios kaeswapich jiw makanot japon pejiwaliajwa, beltaen xoton.

⁶ Dios beltaen xot, jiw makanoton pejiwaliajwa. Makanos-elon, japi is xot pachaempoxan. Pe japilax makanoch, beltaens xot babijaxan ispoxanliawja.

⁷ Ja-aech wut, xan nejchaxoelx judiosliawja. Japi pachaemasia Diosliawja. Pe nakiowa, pachaema-el, is-el xoti Dios nejxasinkpoxan. Kaeswapich japixot makanoch Dios pejiwaliajwa. Japilax chiekal pachaemsful Diosliawja. Asew judios pejnechaxoelaxan, me-ama matakas wut, ja-aechi naexasis-elalijawja Jesús pejuwajan. Samata, japi judios, naexasis-el Jesucristo tuppox japi babijaxan ispoxanliawja.

⁸ Dios pejjamechan, chajia lelspx, jum-aech wut, jum-aechox judiosliawja, japi naexasisaxilpilijawja Dios: "Japi judios Dios pejjamechan makachi matabija-el. Samata, japi judios chajia xaljow wut Dios pejjamechan, chajia lelspx, japi nakiowa naexasis-el. Amwutjelbej nakiowa japi naexasis-el Dios pejjamechan. Samata, japi pejnechaxoelaxan, Diosliawja, me-ama itliakla wut, ja-aechi. Naekuta wutbej, ja-aechi" —aech Dios pejjamechan, chajia lelsxot judiosliawja.

⁹ Rey Davidbej chajia jum-aech judios naexasisaxilpox Dios:

"Judios is wut fiesta, japi chiekal matabija-el wut, nejchaxoeli ampx: 'Dios nejchachaemil xatlisliawja, ampafiesta isas xot japonliawja. Samata, Dios nakkajachawaesaxael' —aechi asuan jumch, nejchaxoel wut. Asamatkoi japi nejchachaemil wut, fiestan is xoti, pe jawut, japi judios chalechkal kastikaxaesi Dios.

¹⁰ Japi judios chiekal matabija-elbej Dios ispoxan, taen wuti. Samata, japi judios pomatkoicha nabijasaxael" —aech rey David, chajia jum-aech wut judiosliawja, Dios naexasisaxilpilijawja.

Dios bu'weyaxaelpox judios-elpi

¹¹ Judios naexasis-el Jesús tuppox japi babijaxan ispoxanliawja Dios bu'weliawjas. Samata, japi judios napelt Diosliawja. Pe nakiowa, japi judios pomatkoicha napelsaxil.

Judíos naexasis-el wut Jesús pejuwajan, ja-aech wut, Dios tapaei judíos-elpi naexasisliajwa Jesús pejuwajan. Judíos-elpi naexasit wut Jesús pejuwajan, judíos japox taen wut, japi palaxael judíos-elpilajwa. Samata, ja-aech wut, judíosbej naexasisaxael Jesús pejuwajan Dios bu'weliawjas.

¹² Samata, amwutjel pachaem judíos-elpilajwa, Dios tapaeis xot japi naexasisliajwa Jesús pejuwajan japi Dios bu'weliawjas. Asamatkoi kaes pejme xabich pachaemaxael judíosliajwa, xabich judíos naexasit wut Jesús pejuwajan.

¹³ Xamal, judíos-emilpim, xan jumchixaxaelen ampox, nejxasinkaxpox xamal matabijali-ajwam. Dios nato'a xamal, judíos-emilpim, naewuajnalajwan Jesús pejuwajan. Samata, chiekal xamal naewuajnajx.

¹⁴ Nejxasinkax tajiww judíos nusasiowlalajwa xamal, judíos-emilpimilajwa. Ja-aech wut, judíosbej naexasisaxael Jesús pejuwajan, japiwej Dios bu'weliawjas.

¹⁵ Xabich judíos naexasis-el Jesús pejuwajan. Judíos-elpilax naexasit Jesús pejuwajan. Samata, japi amwutjel xabich pachaem Diosliajwa. Asamatkoi, judíosbej naexasit wut Jesús pejuwajan, ja-aech wut, japox chiekal pachaemaxael. Amwutjel judíos, me-ama patupa wut, ja-aechi Diosliajwa. Asamatkoi, judíos Jesús pejuwajan naexasit wut, japi judíos Diosliajwa, me-ama Dios mat-iaspi wut pejme duilalajwa, jachiyaxaeli.

¹⁶ Pawis pan is wut, matxoelapan chaxdut watow Diosliajwa, ja-aech wut, puexa asep panbej, me-ama Dios pejew wut, ja-aech. Kaen aton Dios chaxdut wutbej naetathinan, puexa japanaedalan, japanaebaechbej, puexa, me-ama Dios pejew wut, ja-aech. Abraham chajiakolaxtat Dios makafich wut pej-atonliajwa, judíos pejuwajnapijinliawwabej, ja-aech wut, Abraham pamojiwbej, me-ama puexa Dios pejiww wut, ja-aechi Diosliajwa.

¹⁷ Judíos, me-ama olivonaedalt. Xamal, judíos-emilpimbej, me-ama ul pej-olivonaedalt wut, ja-am xamal Diosliajwa. Olivonaepijin daltasiapcha. Daltasiapchaxot japabok-tuchadik no'kon ul pej-olivonaedalt, isliajwapon injerto. Ja-aech wut, naetuminan leful japa-olivonaedalt poxase chiekal ti'sfulalajwa japanaedalt. Dios jasox is xamal, judíos-emilpimilajwa. Judíos, Dios makanoch japon pejiwaliajwa. Pe nakiowa, japi judíos naexasis-el Jesús pejuwajan. Samata, Dios koft japi. Xaliexasbejpi. Amwutjel xamal, judíos-emilpim, Jesús pejuwajan chiekal naexasitam xot, Dios pejiwwam.

¹⁸ ¡Xamal nabej nejchaxoele': "Xatis Dios nakmakanot japon pejiwaliajwas, judíos-esalpis. Samata, kaes pejme pachaems. Me-ama judíos, jachi-esal" —nabej aeche', nejchaxoelam wut! Xamal chiekal matabijam. Naetuminan fulae-eldik tathinan poxadik ti'sfulalajwa tathinan. Pelax naetuminan fulaloecha padalan poxase chiekal pachaemalajwa japadalan. Ja-amlap-is xamal, judíos-emilpim. Judíos pachaema-el Diosliajwa xamal nijaxtat. Xamallax judíos pijaxtat pachaemam Diosliajwa. Samata, nejchaxoelam wut, ¡nabej nejchaxoele': "Xatis kaes pejme pachaems" —nabej aeche'!

¹⁹ Nakaewa xamal bej najum-ambej: "Olivonaepijin daltasiapcha. Daltasiapchaxot no'kon boktuchadik ul pej-olivonaedalt, japadalt jaxot ti'sfulalajwa. Dios jasox is, koft wuton judíos. Jawux xatis, judíos-esalpis, nakmakanot japon pejiwaliajwas" —bej ambej xamal nakaewa, judíos-emilpim.

²⁰ Olivonaepijin daltasiapcha, pachaema-eldalt. Do jaxot no'kon ul pej-olivonaedalt. Xamal, judíos-emilpim, me-ama ul pej-olivonaedalt no'kasdalt olivonaedalt daltasiapchaxot, ja-am xamal. Naexasitam xot Jesús pejuwajan, Dios xamal makanot japon pejiwaliajwam. Samata, nejchaxoelam wut, ¡nabej nejchaxoele': "Xan kaes pejme pachaeman. Me-ama judíos, jachi-enil" —nabej aeche', nejchaxoelam wut! ¡Xamallax najut chiekal natataeflaxaelam kofasamatam Dios naexasitam pox!

²¹ Dios koft judíos, naexasis-el xoti Jesús pejuwajan. Dios jachiyaxaelbej, xamal naexasisfula-emil wut Jesús pejuwajan.

²² Samata, nejchaxoelam wut, ¡chiekal nejchaxoelafulde! Dios xabich pachaem. Pachaem xoton, kastika jiw, babijaxan is wut. Kastikabejpon judíos, naexasis-el wuti Jesús pejuwajan. Dios xamal beltaen xot, tapaei naexasisfulalajwam Jesús pejuwajan. Xamal naexasisfula-emil wut, Dios kastikaxaelbej xamal.

²³ Judíos naexasit wut Jesús pejuwajan, ja-aech wut, japi pejme Dios pejiwwaxael. Dios mamnik xot, tampoela-el japonliajwa pejme makanosliajwapon judíos japon pejiwaliajwa.

²⁴ Olivonaepijin daltasiapcha wut, japon xajup pejme asadalt nosliajwadik, no'kasdalt ti'sfulalajwa jaxot. Dios, me-ama japox is, xamal makanot wuton, judíos-emilpim, japon pejiwaliajwam. Samata, pachaem pejme Dios makanosliajwa judíos japon pejiwaliajwa, judíos pejuwajnapijiw majt pejiww xoton.

²⁵ Takoew, xamal ampox jumchiyaxaelen, majt jiw matabija-elpo, xamal nejchaxoelasamatam judiosliajwa: “Xatis kaes pejme matabijas” —chisamatam, nejchaxoelam wut. Asew judiosxot xabich naexasis-el Jesús pejuwajan. Pe asamatkoi judios naexasisaxael Jesús pejuwajan, xabich judios-elpi naexasit wut Jesús pejuwajan.

²⁶ Ja-aech wut, xabich judios naexasisaxael Jesús pejuwajan Dios bu'weliawas. Dios pejjamechan, chajia lelspx, jum-aech wut, Dios jum-aech Jesúsliajwa:

“Xabich jiw bu'weyaxaelpon, pasaxael Jerusalén paklowaxxot. Japon pijaxtat judios kofaxael babijaxan ispoخان.

²⁷ Ja-aech wut, xan isaxaelen chajia jumduxpox japi pejuwajnapijiwliajwa, beltaeyaxaelen wut judios babijaxan ispoخانliajwa” —aech Dios.

²⁸ Asew judios naexasis-el wut Jesús pejuwajan, japi judios Dios padaelmajiwaxael. Samata, judios-emilpim, Dios tapaei naexasisliajwam Jesús pejuwajan. Ja-aech wut, Dios nakiowa nejxasink judios, makanot xoton pejuwajnapijiw pejiwaliajwa.

²⁹ Dios nejchaxoel wut, kaeyax chiekal nejchaxoelon. Kaes asax nejchaxoela-elon nejchaxoelpoxliajwa. Kofsaxilon judios pejiwpx. Dios nakiowa kajachawaesaxael japi judios.

³⁰ Xamal, judios-emilpim, majt naexasis-emil Dios. Pe amwutjel, judios naexasis-el xot Jesús pejuwajan, Dios xamal beltaen.

³¹ Asamatkoi judiosbej jachiyaxaes. Amwutjel japi judios naexasis-el Jesús pejuwajan. Pe nakiowa, asamatkoi, Dios beltaeyaxaes. Me-ama amwutjel xamal, judios-emilpim, Dios beltaen babijaxan isampoxanliajwa, jachiyaxaesbej asamatkoi judiosliajwa.

³² Dios puexa jiw to'a chiekal duilaliajwa. Pe jiw, Dios naexasis-elpi, amwutjel japi Dios tapaeis jasoxtat duilaliajwa. Pe asamatkoi, Dios puexa jiw beltaeyaxael babijaxan ispoخانliajwa.

³³ Aton puexa matabijsaxil, ma-aech Dios xabich pachaempox, Dios matabijtpoxanbej, Dios pejnechaxoelaxanbej. Kaen aton chanaekabu'nanxilbej Dios nejchaxoelpoxan isaxaelpoxanliajwabej. Kaen aton matabijsaxilbej, ma-aech xot Dios japoxan is, isasia wut.

³⁴ Dios pejjamechan, chajia lelspx, jum-aech wut, jum-aechox: “Xatis matabijaxisal Dios pejnechaxoelaxan. Xatisbej naewujnaxisal Dios.

³⁵ Dios chinax kaen aton dewas-el. Samata, aton jumchiyaxil: ‘Dios xan nadewat, asax chaxdutex xot’ —chiyaxilon” —aechox Dios pejjamechan, chajia lelspx.

³⁶ Puexa ampathatati, japoxan Dios ispoخان. Samata, puexa japoxan Dios pejew. Tataefulbejpon puexa. Samata, pomatkoicha xatis jumchiyaxaes Diosliajwa: “¡Xam xabich pachaemam!” —chiyaxaes. ¡Jasox nej ja-aech!

12

Jesús pejuwajan naexasiti, japi duil Dios tanbichliajwa

¹ Takoew, xamal chiekal matabijam, Dios nakbeltaen, xatis majt babijaxan isas wut. Samata, xamal to'ax. Me-ama kaenanula ofrenda chaxduwam wut, ¡ja-amde xamal Diosliajwa! ¡Xamal najut nawoeyam Diosxot isliajwam Dios nejxasinkpoxan! ¡Isfulde Dios pejbichax Dios nejchachaemlialjwa xamallialjwa! ¡Japoxan isfulde, Dios xabich sitaenam xot!

² ¡Nabej is babijaxan! Me-ama Dios naexasis-elpi is babijaxan, ¡xamal nabej ja-aechel! ¡Tapaem Dios kajachawaesliajwa, xamal nejchaxoelampoxan babijaxan kofalijawam! Nejchaxoelam wut, ¡nejchaxoelde Dios pijaxan! Ja-am wut, xamal chiekal duilaxaelam. Matabijaxaelambej Dios nejxasinkpoxan isliajwam. Japoxan pachaem. Pachaempoxan isam wut, ja-am wut, Dios nejchachaemlaxael xamallialjwa.

³ Dios nabeltaen xot, japon xan nato'a pejbichax nabichliajwan. Samata, puexa xamal jum-am ampo. Nabichfulam wut Diosliajwa, nejchaxoelam wutbej, ¡nabej nejchaxoel: “Xan asabichax nabichasian, Dios pejbichax, kaes pejme pachaempox, jiw kaes chiekal nasitaeliajwa” —nabej aechel, nejchaxoelam wut! Jasox nejchaxoelasamatam, ¡majt chiekal nejchaxoelde chiekal matabijaliajwam, ma-am xamal Dios pejbichaxanliajwa, Dios xamal chaxduwbichaxan!

⁴ Kaenanula wajbu'antat maenk pathi, pawibej, kaes asaxanbej, japoxan kaenanula isfulaliajwa isaxaelpoxan.

⁵ Xatisbej xabich pin-iatas. Pe nakiowa, kaebu'tas, Cristo swapich. Xatis kaenanula nabistas asabichaxan Diosliajwa. Jatis wut, ¡nakaewa nakajachawaesaxaes!

⁶ Dios nakchaxduw kaenanula pejbichaxan, me-ama japon nejchaxoel japabichaxan nakchaxduiliajwa japon tanbichliajwas. Samata, xatis xabich pachaems wut asew jiw naewujnaliajwas Dios pejjamechan, jatis wut, ¡Dios xanaboejaxaes naewujnaliajwas asew jiw!

⁷ Xatisbej xabich pachaems wut kajachawaesliajwas asew jiw, naexasiti Jesús pejwuaajan, ijapi jiw kajachawaesaxaes! Atonbej xabich pachaem wut chiekal chanaekabuanaaliajwa Jesús pejwuaajan naexasiti, ijapon aton nej chanaekabuane asew jiw!

⁸ Asanbej xabich pachaem wut chiekal naewuajnalajwa asew jiw japi kaes Dios chiekal xanaboelijaliajwa, ijapon aton chiekal nej naewuajne' japi jiw nejchachaemlaliajwa! Asanbej xabich pachaem wut kajachawaesliajwa pejewtat jiw kijlpi, ijapon aton nej kajachawaesfulde japi jiw! Asanbej xabich pachaem wut jiw chiekal tato'laliajwa, ijapon aton chiekal jiw nej tato'le' japi jiw! Asanbej xabich pachaem wut asew jiw kajachawaesfulaliajwa, xabich wewe'paspi, ijapon aton xabich nej kajachawaesfulde nejchachaemlaxtat!

Machiyaxaelpox Jesús pejwuaajan duil wut

⁹ ¡Nakaewa chiekal nanejxasinkafulde! ¡Xamal nabej nejxasinke'bej pachaema-elpoxan! ¡Isfulde pachaempoxan!

¹⁰ Nejxasinkam wut asew jiw, Jesús pejwuaajan naexasiti, ijapi nejxasinkafulde! Me-ama nakoewkola nejxasinkam wut, ¡ja-amsfulde asew jiwliajwabej! Japi jiwliajwa nejchaxoelam wut, ¡nejchaxoelde: "Japi jiw kaes pejme pachaem. Me-ama xan, jachi-elpi!" —amde, nejchaxoelam wut! ¡Nakaewa nasitaembej!

¹¹ ¡Nabichliajwam nabej kiwesle'! Nabistam wut Dios pejbichax, ¡nabichfulde puexa nejpa-mamaxtat!

¹² Asamatkoi duilaxaelam pomatkoicha Diosxotse. Samata, ¡nejchachaemlafulde! Nabijatam wut asew jiw pijaxtat, naexasitam xot Jesús pejwuaajan, ¡boejtaliasfulde! Ja-am wut, ¡pomatkoicha Dios kawuajnaxaelam! ¡Nabej buxkofe' Dios kawuajnafulamprox!

¹³ ¡Dios naexasiti kajachawaesfulde wewe'paspoanliajwa! Japi, naexasiti Jesús pejwuaajan, pat wuti nejbachanxot, ¡chiekal bu'kulim!

¹⁴ Nabijatam wut, jiw babejchow babijax is xot xamalliajwa, naewuajnam xot Jesús pejwuaajan, Dios kawuajnam wut, ¡jum-amde: "Dios, ¡xam japi jiw kajachawae'e tapasasamatas babijaxan" —amde! Dios kawuajnam wut japi jiwliajwa, ¡nabej nejchaxo-oele: "Japi nej tapasas babijaxan xam kastikaliajwam japi jiw!" —nabej aeche', Dios kawuajnam wut!

¹⁵ Asew jiw nejchachaemil wut, ¡xamalbej nejchachaemilde, japi suapich! Asew jiw now wut asaxliajwa, ¡xamalbej noem, japi jiw suapich!

¹⁶ ¡Kaenejchaxoelaxde, asew jiw suapich, chiekal duilaliajwam! Xamal nejchaxoelam wut, ¡nejchaxoelde: "Xan kaes pachaeman. Me-ama asew jiw kijila, xan jachi-enil!" —amde! ¡Nabej nejchaxoelbej: "Xan kaes pejme matabijtax. Me-ama asew jiw, xan jachi-enil!" —nabej aeche', nejchaxoelam wut!

¹⁷ Asew jiw babijaxan is wut xamalliajwa, ¡xamallax nabej is babijax japi jiwliajwa wetawiasliajwam japox babijax! ¡Isfulde pachaempoxan puexa jiwliajwa!

¹⁸ ¡Ma ixajupamdo', do japoxtat xamal isfulde chiekal duilaliajwam, asew jiw suapich!

¹⁹ Takoew, xamal nejxasinkaxpim, asew jiw babijax is wut xamalliajwa, ¡xamal nabej is babijaxan japiajwa! Japoxliajwa nejchaxoelam wut, ¡nejchaxoelde: "Asamatkoi japi Dios kastikaxaes, babijax is xoti xanliajwa" —amde, nejchaxoelam wut! Japox Dios pejjamechan, chajia lelsprox, jum-aech wut, Dios jum-aech: "Jiw babijaxan ispi asew jiwliajwa, japi jiw xan tajut kastikaxaelen" —aech Dios, jum-aech wut.

²⁰ Dios pejjamechan, chajia lelsprox, jum-aech wutbej, Dios jum-aech: "Nadaelman litaxaela wut, ¡chaxdu'e naxaeyax! O, minsila wutbejpon, ¡chaxdu'e mint! Japoxan isam wut, nadaelman pajut xabich padalaxael, majt babijax is xoton xamalliajwa" —aech Dios, jum-aech wut.

²¹ Asew jiw babijaxan is wut xamalliajwa, ¡boejtalia'e! ¡Kamta nalalaximilbej babijax isasamatam japi jiwliajwa! ¡Isfulde pachaempoxan japi jiw babijaxan ispijiajwa xamalliajwa! Ja-am wut, pachaempoxan isaxtat malechaxaelam babijax.

13

¹ Puexa jiw chiekal naexasisaxael jiw tato'la. Japi jiw tato'al, Dios tapaeis xot. Dios tapaeis xotbej, japi xajup puexa jiw tato'laliajwa.

² Samata, jiw naexasis-el wut jiw tato'la, japijib sitae-el Dios tato'alpox. Naexasis-el wuti, asamatkoi Dios kastikaxaes japi jiw.

³ Jiw, ispi pachaempoxan, japi pejlewla-el jiw tato'alpiliajwa. Pe babijaxan ispi, japi jiwliax pejlewla jiw tato'alpiliajwa. Xamal nejlewlasamata jiw tato'alpiliajwa, ¡isfulde pachaempoxan! Ja-am wut, jiw tato'alpi nejchachaemlaxael xamalliajwa.

⁴ Japi tato'al jiw, Dios tapaeis xot puexa xamalxot chiekal pachaemaliajwa. Babijaxan isam wat, xamal nejlewlaxael jiw tato'alpiliajwa. Jiw tato'alpi, japi Dios tapaeis jiw kastikaliajwa, babijaxan ispi.

⁵ Samata, ¡chiekal naexasisfulde jiw tato'alpi! Xamal japi chiekal naexasitam wat, nejchaxoelam wat, ¡nabej nejchaxoele': "Jiw tato'alpi xan naexasitx nakastikasamata" —nabej aeche', nejchaxoelam wat! ¡Nejchaxoelafuldelax: "Jiw tato'alpi naexasisaxaelen, pachaem xot naexasisliajwan" —amsfulde, nejchaxoelam wat!

⁶ Samata, xamal impuesto motam jiw tato'alpi chiekal xanbichfulaliajwa japaplata, me-ama Dios tato'las japi.

⁷ Samata, jiw tato'alpi kaenanula dewatam wat, ¡mo'e! Nabistpi jiw tato'alpiliajwa, japibej xamal mat-omwuljow wat, impuesto dewatampoxan, ¡mo'e japox impuesto! Asew jiw, sitaenspi, ¡japibej xamal sitaem!

⁸ ¡Xamal asew jiw nabej dewas! ¡Xamallax asew jiw nejxasinkafulde! Xatis asew jiw nejxasinkas wat, jatis wat, kaewutje naexasich puexa Moisés chajia lelpox.

⁹ Moisés chajia lelpox jum-aech: "Xam nijowponam, ¡asew watho' nabej bu'moejs! ¡Nabej be'bej asew jiw! ¡Nabej natkowe'bej asew jiw pejew! ¡Nabej nejxasinke'bej asew pejew nejewliajwa!" —aech asafutat Moisés chajia lelpox. Moisés lelbej asawuajan. Puexa japawuajanxot jum-aechpoxan, jumchiliajwa ampox: "¡Asew jiw nejxasinkde! Me-ama xamal najut nanejxasinkam wat, ¡ja-amsfulde asew jiwliajwa!" —chiliajwa japox.

¹⁰ Jiw nejxasink wat asew jiw, japi jiw is-el babijaxan asew jiwliajwa. Samata, japi jiw ja-aech wat, kaewutje naexasiti Moisés chajia lelpox jum-aechpoxbej.

¹¹ Xatis asew jiw nejxasinkaxaes, mox pawuajna xot Jesucristo pejme pasliajwa ampathatasik. Samata, ¡xamal nabej buxkofe' jiw naewuajnalijwam wajpaklon Jesucristo pejuwajan! Akasesat naexasich wat Jesús pejuwajan, nejchaxoels: "Jesucristo makach bej pasaxilbej" —tis, nejchaxoels wat. Amwatjel mox pawuajna Jesucristo pejme pasliajwa ampathatasik, xatis nakbuflaeliajwa Dios poxase.

¹² Mox pawuajna matkoiyan toepaliajwa, xatis ampathatat laelpaspisliajwa. Moxsulbej matkoi xatis duilaliajwaspox Diosxotse. Samata, kofaxaes babijaxan isaspoxan. Amwutlax isfulaxaes Dios nejxasinkpoxan.

¹³ Babijaxan isaxisal chiekal duilaliajwas. Samata, feyaxisal saxa naksaxsliajwa. Najajinaxisalbej fiestanxot. Bu'moejsaxisalbej asew watho'. Nabu'moejsaxisalbej nakaepoejwa. Kaes asaxan babijaxan isaxisalbej. Nabeyaxisalbej. Nusasiowlaxisalbej asew jiwliajwa.

¹⁴ Xatislax wajpaklon Jesucristo pejiw xot, chiekal duilaxaes, japon nakkajachawae-saxael xot. Isaxisal babijaxan, wajut isasiaspoxan.

14

Nakaewa najumchiyaxilpox babejamechan Jesús pejuwajan naexasiti

¹ Asew jiw, naexasiti Jesús pejuwajan, japi jiw chiekal Dios xanaboeja-elpifuk. ¡Japi jiw xamal chiekal bu'kulim, pat wuti xamal natamejlamxot! ¡Japi swapich, nabej nabunlos Jesús pejuwajan naexasitampoxliajwa, japi kaenejchaxoelaxa-el wat japawuajanliajwa!

² Asew, naexasiti Jesús pejuwajan, chiekal matabija puexa naxaeyaxan pachaempox xaeliajwa. Asew jiw japixotlax chiekal matabija-elfuk xatis naewuajnaspojan. Samata, japi jumch nejchaxoel: "Xan nejmachpawi xaelx wat, Diosliajwa pachaemaxinil!" —aechi, nejchaxoel wat. Ja-aech wat, japi jiw nejmachpawi xae-el.

³ Nejmachnaxaeyaxan xaelpon, nej nejchaxoela-ele': "Xan kaes pachaeman. Me-ama nejmachnaxaeyaxan xae-elpon, xan jachi-enil" —nej chi-ele'pon, nejchaxoel wat nejmachnaxaeyaxan xae-elponliajwa. Nejmachnaxaeyaxan xae-elponbej nej nejchaxoela-ele': "Xan kaes pachaeman. Me-ama nejmachnaxaeyaxan xaelpon, jachi-enil" —nej chi-ele'pon, nejmachnaxaeyaxan xaelponliajwa, japon Dios makafich xot Dios pej-atonliajwa.

⁴ ¿Achanamkat xam babejamechan jumchiliajwam nabistpon asanliajwa? Pejpaklon japon jumchiyaxaes, chiekal nabist wat, o, chiekal nabich-el waton. Dios xajup kachawaesliajwa nabistpon Diosliajwa.

⁵ Asew jiw, naexasiti Jesús pejuwajan, japi jum-aech: "Ampamatkoi kaes pejme sitaeyaxaes, me-ama asamatkoiyan, jachi-el xot" —aechpi. Pe asew jiw jum-aechpi: "Puexa matkoiyan chiekal najupasitaeyaxaes" —aechpi. Kaematkoi kaes pejme sitaenpi, japi kaenanula chiekal matabijaxael, ma-aech xot kaes pejme sitaenpi japamatkoi. Asew jiw jum-aechpibej: "Puexa matkoiyan chiekal najup" —aechpi, japi jiwbej chiekal matabijaxael, ma-aech xot najupasitaenpi japamatkoiyan.

⁶ Napatamatkoi wut, aton nabich-el Dios sitaeliajwa. Nejmachnaxaeyaxan xaelpon, japoxan japon xael wut, gracias-aechpon Diosliajwa. Asan, nejmachnaxaeyaxan xaelponbej, japoxan xae-elpon Diosliajwa. Japonbej asanaxaeyax xael wut, gracias-aechpon Diosliajwa.

⁷ Laelpas wut, wajut isasiaspoxan isaxisal. Xatis tups wutbej, tupsaxisal, wajut nejxasinkas xot tupaliajwas.

⁸ Laelpas wutlax, isfulaxaes Dios nejxasinkpoxan. Tups wutbej, tupsaxaes Diosliajwa. Laelpas wut, nabichaxaes Diosliajwa. Baxael, tups wutbej, nakiowa Dios pejiwswulaxaes.

⁹ Cristo tıp wut cruztat, moton puexa jiw babijaxan ispoxanliajwa. Do jawut, mat-echbepon pejme dukaliajwa. Ja-aech Cristo puexa jiwpaklonaliajwa, jiw tupiliajwa, laelpiliajwabej.

¹⁰ Samata, babejjamechan jumchiyaximil asew jiwliajwa, naexasiti Jesús pejwujajan. Ne-jchaxoelaximilbej japiliajwa: "Ampi jiw pachaema-el Diosliajwa" –chiyaximil, nejchaxoelam wut. Asamatkoi puexa xatis nuilaxaes Dios pejwujajnel. Jawut xatis kaenanula Dios nakjumchiyaxael: "Xam nabistampoxan xanliajwa xabich pachaem" –chiyaxaelon kaenanula xatisliajwa. O, Dios jumchiyaxael xatisliajwa: "Xam nabistampoxan xanliajwa, japoxan pachaema-el" –chiyaxaelon xatisliajwa.

¹¹ Dios pejjamechan, chajia lelspxox, jum-aech Dios jum-aechpox: "Xan pomatkoichaxaelen. Jum-an diachwujajnakolaxpox. Asamatkoi puexa jiw brixtat nuilaxael xan tajwujajnel nasitaeliajwa. Jawut puexa jiw jumchiyaxael xanliajwa: 'Diachwujajnakolax xam Dios xabich mamnikam' –chiyaxael puexa jiw xanliajwa" –aech Dios jum-aechpox.

¹² Diachwujajnakolax japox jachiyaxael asamatkoi. Kaenanula xatis Dios pejwujajnel wajut jumchiyaxaes puexa isaspoxanliajwa.

Babijax isaxilpox Jesús pejwujajan naexasiti, asew jiw, Jesús pejwujajan naexasiti, isasamatabej, japox babijax

¹³ Asamatkoi, xatis Dios wujajnalels wut, kaenanula wajut jumchiyaxaes puexa isaspoxanliajwa ampathatat. Samata, xatis jumchiyaxisal asew jiwliajwa, japi naexasiti Jesús pejwujajan: "Japi jiw duil wut, chiekal duila-el. Babijaxan ispi" –chiyaxisal. Xatislax kaenanula wajutliajwa chiekal nejchaxoelaxaes: "Xan babijax isaxinil asew jiwbej, Jesús pejwujajan naexasiti, isasamata babijax, kofasamatabejpi Jesús pejwujajan naexasitpox" –chiyaxaes, nejchaxoels wut.

¹⁴ Xan Jesús pejwujajan naexasitx xot, matabijtax, Dios natapaei nejmachnaxaeyaxan xaeliajwan. Pelax asan nejchaxoel wut naxaeyaxanliajwa: "Asew jiw nakaechafiatpoxan, japoxanbej Dios xan nakaechtapae-el. Pe nakiowa, japoxan xaelx wut, diachwujajnakolax xan chawulatajbu'wujajnaxaelen Diosliajwa" –aech wuton, ijapon aton japanaxaeyaxan nej xae-ele', kaechafiach xoton!

¹⁵ Xamal nejxasinkam wut asew, Jesús pejwujajan naexasiti, japi swapich, xaelam wut, jnabej itfuxabijs japi jum-aechpoxliajwa: "Japox xaeliajwa pachaema-el" –aechpoxliajwa! Pe nakiowa, japox itfuxabijtam wut, ja-aech wut, japi jiw xaeyaxaelbej japanaxaeyax. Do jawut, xaeyax kaechatoel wut, nejchaxoelaxaeli: "Xan tajbu'wujajan Diosliajwa. Samata, nafa'axaelen Diosliajwa" –chiyaxaeli, nejchaxoel wut. Cristo tıp japiliajwa. Samata, ijapox nabej xae'!

¹⁶ Xamal matabijam, isaxaelampox pachaem wut, pe asew jiw jum-aech wut japoxliajwa: "Japox pachaema-el isliajwas" –aech wut, ja-aech wut, ijapox xamal nabej is! Xamal japox nakiowa isam wut, japi jiw jumchiyaxael babejjamechan xamalliajwa.

¹⁷ Xatis naexasich xot Jesús pejwujajan, naexasich Dios naktato'alpox. Xatisbej xabich nejchaxoelaxisal xaeyaxaespoxliajwa, feyaxaespoxliajwabej. Pelax xatis nejchaxoelaxaes isliajwas pachaempoxan Espiritu Santo pijaxtat pachaemaliajwas Diosliajwa, nejchachaemlialiajwasbej.

¹⁸ Xatis isas wut pachaempoxan, diachwujajnakolax nabistas Cristoliajwa. Samata, Dios nejchachaemlaxael xatisliajwa. Asew jiw naksitaeyaxaelbej.

¹⁹ Samata, kaenejchaxoelaxaes chiekal duilaliajwas, asew jiw swapich. Nakaewa naka-jachawaesfulaxaesbej kaes mamnikaliajwa wajxanaboejxan Diosliajwa.

²⁰ ¡Asew jiw, nabej tabejs Jesús pejwujajan naexasiti naxaeyax xaelampoxtat! Diachwujajnakolax puexa naxaeyaxan pachaem xatis xaeliajwas. Pe asew nejchaxoel wut: "Ampoxan xaes wut, xatis wajbu'wujajnaxaes Diosliajwa" –aech wuti, jnawoesa nabej xaetis! Japi jiw itfuxabijtas wut, ja-aech wut, japi jiw bej xaeyaxaelbej japox naxaeyax.

²¹ Samata, asew jiw, Jesús pejwujajan naexasiti, japox xae-el wuti, o, kilewla wutbejpi jachaliajwa, kaes nawoesa pachaem japox naxaeyaxae-elaliajwam, fe-elaliajwambej. Pe nakiowa, itfuxabijtam wut, ja-am wut, japi jiw xaeyaxael japox naxaeyax. O, feyaxaelbejpi

vinomin. Ja-aech wut, japoxliajwa nejchaxoelaxaeli: “Xan babijax isx Diosliajwa” – chiyaxaeli, nejchaxoel wut.

²² Xamal nejchaxoelam wut: “Nejmachnaxaeyaxan pachaem xaeliajwas” –am wut, asew jiw, nejmachnaxaeyax xae-elpiliajwa, japox naxaeyax xaelam wut, ixam najut nabej kaechjalpae! Dios matabijit puexa nejchaxoelampoxan. Jesús pejwuaajan naexasiti, japi nejchaxoel wut: “Xan babijax is-enil Diosliajwa” –aech wuti, nejchaxoel wut, japi jiw xabich nejchachaemil Diosliajwa.

²³ Jesús pejwuaajan naexasitpon nejchaxoel wut: “Diachwuaajnokolax, xan pawit xaelx wut, tajbu'wuaajnaxaelen Diosliajwa. Samata, kaes pachaemaxael xae-elaliajwan” –aech wut japon aton, pe nakiowa, xael wut, diachwuaajnokolax japon aton pejbu'wuaajnxael Diosliajwa. Ja-aech wut, japon isaxil pachaempox Diosliajwa. Japon aton nejchaxoel wutbej asaxliajwa: “Japox isx wut, xan tajbu'wuaajnaxael Diosliajwa” –aech wuton, pe nakiowa, is wut, diachwuaajnokolax japon aton pejbu'wuaajan Diosliajwa.

15

Jesús pejwuaajan naexasiti isaxaelpox pachaempoxan asew jiwliajwa

¹ Xatis, Dios chiekal xanaboejaspis, kajachawaesaxaes asew jiw, japi chiekal xanaboejal-elpi Dios. Isaxisalbej wajut nejxasinkaspoxan.

² Xatislax isaxaes pachaempoxan asew jiwliajwa, japi naexasiti Jesús pejwuaajan. Japoxan isaxaes japi jiw kaes pejme Dios xanaboejalijwa.

³ Cristobej ampathatat wut, is-el pajut nejxasinkpoxan. Pelax japon is Dios nejxasinkpoxan. Dios pejjamechan, chajia lelspx, jum-aech Cristo jumchiyaxaelpox Diosliajwa: “Jiw jum-aech wut babejjamechan xanliajwa, japi japoxan jum-aech wut, jum-aechbejpi xamliajwa” –aechox.

⁴ Dios pejjamechan, chajia lelspx, jum-aech xatis chiekal matabijaliajwas. Samata, xatis Dios pejjamechan naexasich xot, nabijatas wut, nakiowa Dios chiekal xanaboejax-aes. Nejchaxoelaxaesbej: “Dios diachwuaajnokolax isaxael jumdutox nakbu'welialjwa” – chiyaxaes, wajut nejchaxoels wut.

⁵ Asew jiw xatis naktaliat wut, ja-aech wut, Dios nakkajachawaet wajxanaboejxan kaes mamnikaliajwa japonliajwa. Samata, Dios kawuaajnax xamal kajachawaesliajwa chiekal duilaliajwam. Me-ama Jesucristo ampathatat chiekal duk, xamalbej jachiliajwam.

⁶ Samata, xamal kaenejchaxoelaxaelam jumchiliajwam Diosliajwa, wajpaklon Jesucristo pax: “Xam xabich pachaemam” –chiliajwam Diosliajwa.

Chimiauuaajan, Jesús pejwuaajan, jumtaenpox judios-elpi

⁷ Nakaewa chiekal nabu'kalim! Me-ama Jesucristo xamal chiekal bu'kula, jja-amde! Xamal ja-am wut, asew jiw sitaeyaxael Dios.

⁸ Xan xamal jum-an. Jesucristo fuloek ampathatlelsik kajachawaesliajwa judios. Samata, japox patlisox, Dios chajia jumdutox judios pejwuaajnapijiwliajwa. Ja-aech wut, puexa jiw chiekal matabija, Dios nejkiowa-el chajia jumdutox.

⁹ Jesucristo fuloekbej bu'welialjwa judios-elpi, japi jumchiliajwa Diosliajwa: “Xam xabich pachaemam” –chiliajwa, Dios beltaens xoti babijaxan ispoxanliajwa. Japoxliajwa Dios pejjamechan, chajia lelspx, jum-aech Jesucristo jumchiyaxaelpox pax Dios jumtaeliajwa: “Potuajnuhanpijiwliajwa, judios-elpiliajwa, jumchiyaxaelen: ‘Dios xabich pachaem’ –chiyaxaelen xamliajwa. Jajuiyaxaelenbej japi matabijaliajwa, xam xabich pachaemamponam” –aech Dios pejjamechan, chajia lelspx, Jesucristo jumchiyaxaelpox pax Diosliajwa.

¹⁰ Dios pejjamechan, chajia lelspx, asafutxot jum-aechbej:

“Xamal asatuajnuchanpijwam, judios-emilpim, jnejchachaemilde, judios swapich, japi Dios pejjiwpi!” –aechox Dios pejjamechan, chajia lelspx.

¹¹ Dios pejjamechan, chajia lelspx, jum-aech wut, jum-aechbejpx:

“Puexa xamal, asatuajnuchanpijwam, judios-emilpim, Diosliajwa jum-amde: ‘Dios, xam xabich pachaemam’ –amde!” –aech Dios pejjamechan, chajia lelspx.

¹² Profeta Isaías chajia lel wut, lelbejpon Jesús nalaelsaxaelpox ampathatat:

“Japon nalaelt wut, Isaí pamonaxael. Japon pati'in wut, potuajnucha jiw tato'laxael. Jiw jumchiyaxael japonliajwa: ‘Kaenanula xatis nakbu'weyaxaelon’ –chiyaxael jiw japonliajwa” –aech profeta Isaías chajia lelpox Jesúsliaw.

¹³ Xatis matabijas Dios nakbu'weyaxaelpox Jesucristo pijaxtat. Samata, Dios kawuaajnax xamal kajachawaesliajwa nejchachaemlialijwam Espiritu Santo pijaxtat, xamal wuaajnawesfulam wut Dios isliajwa pachaempoxan xamalliajwa. Xan Dios kawuaajnaxbej xamal chiekal duilaliajwam, asew jiw swapich, Dios chiekal xanaboejam xot.

¹⁴ Takoew, xan matabijtax, xamal asew jiw xabich kajachawaetam. Matabijtaxbej, xamal xabich matabijam Dios. Xamalbej matabijam nakaewa chiekal nanaewuajnalijawm.

¹⁵ Ampacartaxot lelx asawuajan, xamal nejkiowasamatam majt chajia matabijamwuajan. Ja-an, Dios nato'a xot isliajwan japox.

¹⁶ Dios nato'a Jesucristo pejuwajan naewuajnalijawan judíos-elpi. Samata, naewuajnax japawuajan, chimiawuajan, japibej Dios bu'welijwas. Amwutjel judíos-elpi kajachawaech xot Espiritu Santo, japi Jesús pejiwliwi. Samata, Dios nejchachaemil japi jiwliajwa.

¹⁷ Xan nabistax wut Jesucristoliajwa, japon chiekal nakajachawaesful. Samata, nejchaxoelx: "Xan isxprovan Diosliajwa, xabich pachaem" – an, nejchaxoelx wut.

¹⁸ Wajpaklon Jesucristo chiekal nakajachawaesful naewuajnalijawan judíos-elpi, japibej naexasisliajwa Dios. Xan jum-anpoxan japi najumtaen wut, taen wutbejpi isxprovan, japibej naexasit Jesús tuprox japiliajwa. Samata, xan japoxanliajwa chiekal chapaeix asew jiwliajwa.

¹⁹ Espiritu Santo pijaxtat xan koechaxan isxbej. Amwutjel toetx potuajnucha naewuajnaxpox chimiawuajan, Jesucristo pejuwajan, japon nakbu'wiapon. Xan majt tuadutx naewuajnax Jerusalén paklowaxxot. Do jawux, naewuajnax japawuajan asa tuajnuchanlelbej. Piiria tuajnu poxdaxbej naewuajnalijawan.

²⁰ Jesús pejuwajan jumtae-elpi, japapaklowaxanpijiw poxdaxbej, japi naewuajnalijawan Jesús pejuwajan, Dios bu'welijwasbejpi. Asew jiw wuajna chajia naewuajanxot, japapaklowaxanxot xan nejxasinka-enil naewuajnalijawan Jesús pejuwajan.

²¹ Xan naewuajnax wut Jesús pejuwajan, patlisox, me-ama Dios pejjamechan, chajia lelspx, jum-aech wut, jum-aechox:

"Jiw jumtae-elpi Dios to'axoekspon pejuwajan, japi jiw jumtaeyaxael japon pejuwajan. Jiw naewuajna-esalpi japawuajan, japi jiw naewuajnaxaes japon pejuwajan" – aech chajia lelspx.

Pablo nejchaxoelpox taeliajwapon Roma paklowaxpijiw

²²⁻²³ Pin-iaveces xamal xabich taesian. Pe xabich potuajnucha naewuajnax xot Jesús pejuwajan, xamal taeyaxinilfik. Mawutkal tajbichax chiekal toetx. Samata, xamal taeyaxaelen.

²⁴ España tuajnu poxaxaechan wut, majt xamal taeflaxaelen. Do jawut, xabich nejchachaemlaxaes, xamal taeflax wut. Jawux nakajachawaesaxaelam, España tuajnu pox-aliajwan wut.

²⁵ Pe amwut, xan majt xalaeyaxaelen ofrenda Jerusalén paklowaxpijiw poxade, japi naexasiti Jesús pejuwajan.

²⁶ Asew, naexasiti Jesús pejuwajan, Macedonia tuajnupijiw, Acaya tuajnupijiwbej, plata owa ofrenda xato'aliajwa Jerusalén paklowaxpijiw poxade kijilalialjwa, japi naexasiti Jesús pejuwajan.

²⁷ Macedonia tuajnupijiw, Acaya tuajnupijiwbej, japi judíos-el. Pe nakiowa, japi nakaewa najum-aech: "Ofrenda xato'axaes judíosliajwa, japi naexasiti Jesús pejuwajan, japi Jerusalén paklowaxpijiw, kajachawaesliajwas. Japi matxoela matabija Jesucristo pejuwajan Dios bu'welijwas. Amwutjel xatisbej japi pijaxtat matabijas Jesús pejuwajan. Samata, judíos kajachawaesaxaes wewe'paspojanliajwa" – aechi nakaewaliajwa. Samata, ofrenda owapi.

²⁸ Samata, xan majt xalaeyaxaechan ofrenda Jerusalén paklowax poxade. Do jawux, España tuajnu poxadax wut, majt pasaxaelen xamalxot. Do jawux, España poxaxaelen.

²⁹ Xan patx wut xamalxot, chapaeaxaelen wut Cristo puexa nakajachawaetpoxanliajwa, xabich nejchachaemlaxaelam.

³⁰ Takoew, xamal naexasitam wajpaklon Jesucristo pejuwajan. Xatis nakaewa nanejx-asinkas Espiritu Santo pijaxtat. Samata, xan jum-an xamal Dios kawuajnalijawm Dios nakajachawaesliajwa.

³¹ ¡Dios kawuajande xan japon nakajachawaesliajwa asew judíos, Jesús pejuwajan naexasis-el, babijax isasamata xanliajwa, Judea tuajnuxotx wut! ¡Dios kawuajandebej Jerusalén paklowaxpijiw xanejchachaemlialiajwa ofrenda, xalaeyaxaelenpi japi jiwliajwa!

³² ¡Dios kawuajandebej xanliajwa xabich nejchachaemlialiajwan, chiekal damlathulalialjwanbej, xamalxot patx wut!

³³ Xan Dios kawuajnax puexa xamal Dios kajachawaesliajwa chiekal duilialijawm, asew jiw suapich. ¡Jasox nej ja-aech!

¹ Wajkoewow Febe pa'a wut xamalxot, ¡chiekal bu'kulimpow! Japow kajachawaet Cencrea paklowaxpijiw, Jesús pejwuaian naexasiti.

² Xamalxot pa'a wutow, ¡chiekal bu'kulimpow, Jesús pejwuaian naexasit xotow! Me-ama xatis chiekal naba'kulas wut, ¡ja-amdepow, majt japow kajachawaet xotow naexasiti Jesús pejwuaian! Xanbej japow nakajachawaet. Samata, ¡japow kajachawae'e wewe'pasoxanliajwa!

³ ¡Nawesaludam Aquila! ¡Nawesaludambej japon pijow, japow pawul Prisca! Japi nabist Jesucristo pejbichax, xan swapich.

⁴ Asew jiw xan naboesasia wut, japon Aquila, pijow Prisca swapich, nakajachawaet. Japi nakajachawaet wut, japiliajwabej xabich chachoel, xan nakajachawaet xoti weliajwan. Samata, xan gracias-an japiliajwa. Xan kaenan japox jumchi-enil. Puexa naexasiti Jesús pejwuaian, judíos-elpi, japibej gracias-aech Aquilaliajwa, Priscaliajwabej.

⁵ Asew, naexasiti Jesús pejwuaian, Aquila pejbaxot culto is wut natamejapi, ¡japi jiwbej nawesaludam! ¡Nawesaludambej tajnachalan Epeneto! Japon matxoea naexasit Jesús pejwuaian, puexa Asia tuajnapijiw naexasis-el wutfuk Jesús pejwuaian.

⁶ ¡Nawesaludambej wajkoewow María! Japow xabich nabist Dios pejbichax xamalxot.

⁷ ¡Nawesaludambej Andrónico, Junias swapich! Japi judíos. Me-ama xan, ja-aechi. Asew jiw xan najia wut jiw jebatat, jawut japibej jias. Japi chiekal matabijas apóstoles. Japi kolenje naexasit Jesús pejwuaian, xan naexasis-enil wutfuk Jesús pejwuaian.

⁸ ¡Nawesaludambej tajnachalan Ampliato! Japonbej naexasit Jesús pejwuaian.

⁹ ¡Nawesaludambej Urbano! Japonbej nabist Jesucristo pijax bichax. ¡Nawesaludambej tajnachalan Estaquis!

¹⁰ ¡Nawesaludambej Apeles! Japon xabich nabijat, naexasit xot Jesús pejwuaian. Pe kofs-elpon naexasitpox Jesús pejwuaian. ¡Nawesaludambej Aristóbulo pejiwi!

¹¹ ¡Nawesaludambej Herodión! Japonbej judío-aton. ¡Nawesaludambej Narciso pejiwi, japi naexasiti Jesús pejwuaian.

¹² ¡Nawesaludambej wajkoew Trifena, Trifosabej! Japi watho' nabist Dios pijax bichax! ¡Nawesaludambej wajkoewow Pérsida! Japow xabich nabist Dios pijax bichax.

¹³ ¡Nawesaludambej Rufo! Japon xabich matabijtas naexasiti Jesús pejwuaian, chiekal naexasit xoton Jesús pejwuaian. ¡Nawesaludambej japon pen! Japow, me-ama taj-en wut, ja-aechow xanliajwa.

¹⁴ ¡Nawesaludambej Asíncrito, Flegontebej, Hermesbej, Patrobasbej, Hermasbej! ¡Nawesaludambej asew japixoti, japi naexasiti Jesús pejwuaian!

¹⁵ ¡Nawesaludambej Filólogo, wajkoewow Juliabej! ¡Nawesaludambej Nereo, japon pakoe-wow Olimpasbej! ¡Nawesaludambej asew japixoti, japi naexasiti Jesús pejwuaian!

¹⁶ Xamal, naexasitampim Jesús pejwuaian, nakaewa nasaludam wut, ¡nakijacham! Puexa naexasiti Jesús pejwuaian xato'a saludos xamalliajwa.

¹⁷ Takoew, xan jum-an xamal najut chiekal natataeflialijwam asew jiw naekichachajbasamata xamal. Japi naewuaianpox najupa-el xamal naexasitamwuaian. Japi jiw naewuaian wut, jiw kaenejchaxoelaxa-el nakaewaliajwa japi jiw pejnaewuajnextat. Samata, japi naewuaian wut, ¡nabej naewes! ¡japixot xamal nadiajim!

¹⁸ Japi nabich-el wajpaklon Jesucristoliajwa. Japilax pajut isasiapoxan is. Japi naewuaianpox, me-ama diachwuaiankolax wut, ja-aechox. Pe diachwuaiankolaxa-el japi naewuaianpox. Japi jiw naekichachajbamaenkbej.

¹⁹ Puexa jiw chiekal matabija xamal naexasitampox Jesús pejwuaian. Samata, xan nejchachaemlax. Nejaxasinxax xamal matabijaliajwam isliajwam pachaempoxan. ¡Nabej tapae' asew jiw xamal naekichachajbajaliajwa isliajwambej babijaxan!

²⁰ Dios nakajachawaet kaenejchaxoelaxliajwas chiekal duilaliajwas. Dios kajachawae-saxaelbej xamal kamta malechaliajwam Satanás. Xan wajpaklon Jesucristo kawuajnx japon xamal kajachawaesliajwa.

²¹ Timoteo saludos xato'a xamalliajwa. Japon, xan swapich, nabist Diosliajwa. Lucio, Jasónbej, Sosipaterbej, japibej saludos xato'a xamalliajwa. Japibej judíos, me-ama xan.

²² Xan, Tercio, lelx ampox carta, Pablo jum-aechfulpoxan. Xanbej saludos xato'ax xamalliajwa, puexa xatis wajpaklon Jesús pejiwi's xot.

²³ Gayobej saludos xato'a xamalliajwa. Xan amwutjel dukx japon pejbaxot. Japon, Gayo, tapaei puexa jiw, naexasiti Jesús pejwuaian, japi natamejalijwa japon pejbatat. Erastobej saludos xato'a xamalliajwa. Japon tesorero, plata tataeflan, Corinto paklowaxliajwapi. Wajkoewan Cuartobej saludos xato'a xamalliajwa.

²⁴ Xan wajpaklon Jesucristo kawuajnx japon xamal kajachawaesliajwa. ¡Jasox nej ja-aech'e!

Pablo jum-aechpoxan, ampox carta toesliajwa wut

²⁵ Пвеха хатис јумчиѡахаес Диослијѡа: “јХам хабич пачаемам!” —чиѡахаес. Диос хажур наккајачаѡаеслијѡа каес чиекал ханабоејалијѡас Диос. Јапох чиекал матабијас, јум-аечх хот Јесус пејѡајан, чимиѡѡајан, јиѡ бѡ'ѡеѡаеспохлијѡа. Хан јаѡѡајан наѡѡајнах. Јаѡѡајан мајт малиах пејѡајан. Мајт Диос чаѡае-ел јаѡѡајан каен атон матабијслијѡа.

²⁶ Чајиаколахтат профетас чиекал матабија Јесус паслијѡапох, Диос чајиа чаѡаеис хоти. Самата, профетас јапохлијѡа лел, Диос кито'ас хот. Јапон Диос, поматкоичапон, амѡѡтјел јапон нактаѡаеи чиекал матабијалијѡас Јесуcrito пејѡајан. Диос бѡхто'абел пејјиѡпи, јапи наѡѡајналијѡа јаѡѡајан потѡајнѡча јиѡ наѡѡајалијѡа.

²⁷ јКаен Диос матабијсан! Самата, Јесуcrito тѡр хот хатислијѡа, јпоматкоича јумчиѡахаес: “Диос, јХам хабич пачаемам!” —чиѡахаес! јЈасох неј ја-аечхе'!

Matxoelacarta, Pablo lelpox, Corinto paklowaxpijiwliajwa

Pablo lelpox carta Corinto paklowaxpijiwliajwa

¹⁻² Xan, Pablo, Dios namakafit Jesucristo pej-apóstolliajwan. Samata, Dios nato'a jiw naewhajnaliajwan Jesús pejwajaan potwajnuha. Ampox carta lelx, wajkoewan Sóstenes swapich, xamal Dios pejiwam, Corinto paklowaxpijwamliajwa. Xamal japon pejiwam, Jesucristo tɔp xot xamalliajwa. Dios xamal tadɔt, asew jiw swapich, japon pejiwaliajwam chiekal duilaliajwam japonliajwakal. Asewbej, tadɔchpi japon pejiwaliajwa, japi potwajnuha duilpi, kawhajan wajpaklon Jesucristo. Jesucristo paklon puexa xatisliajwa, japi jiwliajwabej.

³ Waj-ax Dios, wajpaklon Jesucristobej, kawhajnax xamal kajachawaesliajwa, chiekal duilaliajwambej, asew jiw swapich.

Dios kajachawaepox Corinto paklowaxpijiw, japi Cristo pejiw xot

⁴ Xan Dios kawhajnax wɔt, gracias-an Diosliajwa, japon xamal pomatkoicha kajachawaesful xot, Jesucristo pejiwam xot.

⁵ Xamal Jesucristo pejiwam xot, Dios xamal chiekal kajachawaet. Samata, xamal xajɔpam tanbichliajwam Diosliajwa. Chiekal matabijambej Dios pejjamechan jiw chiekal naewhajnaliajwam.

⁶ Ja-am wɔt, xamal chiekal naexasitam Jesús pejwajaan.

⁷ Samata, ampamatkoiyan xamal wɔajnawetam wajpaklon Jesucristo pejme pasliajwasik. Xamal Dios kajachawaesaxael chiekal nabichliajwam Diosliajwa.

⁸ Dios xamal kajachawaesaxael chiekal naexasisfulaliajwam, kaen aton xamal tasalasangata, wajpaklon Jesucristo pejme pask wɔt.

⁹ Xanal chiekal matabijax Dios xamal kajachawaetpox, is xoton jumɔutpox. Dios xamal tadɔt japon pejiwaliajwam duilaliajwam pomatkoicha japonxotse, Dios paxalan swapich, wajpaklon Jesucristo.

Nasalpox Jesús pejwajaan naexasiti, kaenejchaxoelaxa-el xoti

¹⁰ Takoew, wajpaklon Jesucristo xan nabɔxtɔ'a xot, xamal jum-an kaenejchaxoelaxliajwam, duilam wɔt. ¡Asalel nabej nasale!

¹¹ Cloé, japow pejiw, xan nachapaei. Samata, wɔltaenx xamal kaenejchaxoelaxa-emilpox. Samata, ampox carta lelx xamal naewhajnaliajwam.

¹² Asew jiw xamalxot jum-aech: “Xanal kaes nejxasinkax Pablo naewhajanpox. Samata, xanal Pablo pejiwan” —aech japi jiw. Asew jiw xamalxot jum-aechbej: “Xanal kaes nejxasinkax Apolos naewhajanpox. Samata, xanal Apolos pejiwan” —aechi. Asew jiw xamalxot jum-aechbej: “Xanal kaes nejxasinkax Pedro naewhajanpox. Samata, xanal Pedro pejiwan” —aech asew jiw. Asew jiw xamalxot jum-aechbej: “Xanal kaes nejxasinkax Cristo naewhajanpox. Samata, xanal Cristo pejiwan” —aechi.

¹³ Cristo kaekolan. Japon, me-ama xabich wɔt, jachi-elon. Samata, xatis Cristo pejiwsw xot, nasalaxisal, kaemɔch xotlis. Xan, Pablo, cruztat nakimatamatla-el. Xamalxot asew jiw bautisa-esalbej tajjiw nadofaliajwa. Samata, xamal jumchiyaximil xanliajwa: “Xanal Pablo pejiwan” —chiyaximil.

¹⁴⁻¹⁵ Xamalxot jiw xabich bautisa-enil. Asbuan jumch bautisax kolenje. Bautisax Crispo, Gayobej. Samata, xamalxot asew jiw jumchiyaxil xanliajwa: “Pablo xan nabautisa japon pej-aton nadofaliajwan” —chiyaxil japi jiw xanliajwa. Samata, xan nejchachaemlax, jiw japox jumchiyaxil xot.

¹⁶ Amwɔtjel xan nejchafaetx asew kaes bautisaxpi. Bautisaxbej Estéfanax, pejiw swapich. Jalape. Kaes asew bautisax wɔt, xan nejkiowxlis.

¹⁷ Cristo nato'a-el jiw bautisaliajwan. Japon xan nato'a pejwajaan jiw naewhajnaliajwan, japi Dios bu'weliajwas. Naewhajnax wɔt Cristo pejwajaan, me-ama aton, xabich matabi- jsan wɔt, xan jachi-enil. Pe jachiyaxaelen wɔt, jiw asbuan jumch jumchiyaxael xanliajwa: “Pablo xabich matabijit” —chiyaxaeli. Jachiyaxael wɔt, naexasisaxili Cristo tɔppox cruztat japiliajwa.

Amxot jum-aechpox Dios pejpamamaxliajwa, matabijsaxliajwabej

¹⁸ Asew jiw pejbu'wajaan wɔtfuk, japi tɔp wɔt, infierno poxaxaek, naexasis-el xoti Cristo tɔppox cruztat japiliajwa. Cristo pejpatɔpax japiliajwa, me-ama nejliaklax wɔt, wejatisipox. Pelax xatis Dios nakbu'weyaxaelpis, chiekal matabijas, Dios nakka- jachawaesfulaxaelpox.

¹⁹ Dios pejjamechan, chajia lelsprox, jum-aech wut, jum-aech Dios jum-aechpox: "Jiw xabich matabijapi, japi matabijapoxan xan toesaxaelen. Asamatkoi xan tajaxtat japi jiw chiekal matabijaxael japi matabijapoxan pachaema-elpox, diachwujnakolaxael xot" –aechox.

²⁰ Asew jiw ampathatpijiw pajutliajwa jum-aech: "Xanal xabich matabijax" –aechi asew jiw jumtaeliajwas. Asew jiwbej pajutliajwa jum-aech: "Xanal xabich matabijax jiw chanaekabuaneliajwan" –aechi asew jiw jumtaeliajwas. Asew jiwbej pajutliajwa jum-aech: "Xanal chiekal matabijax puexa ampathatpijixanliajwa" –aechi asew jiw jumtaeliajwas. Pe Dios jum-aech puexa japi jiwliajwa: "Japi pejmatabijsaxan, nejliaklaxan, pajut nejchaxoelpoxankal xot" –aech Dios japi jiwliajwa.

²¹ Dios xabich pejmatabijsax. Me-ama ampathatpijiw pejmatabijsax, jachi-el Dios pejmatabijsax. Dios tapae-el japi jiw matabijaliajwa Dios pejmatabijsax. Dios jiw bu'weyaxael, naexasit xoti chimiawuajan, Cristo tupprox cruztat japiliajwa. Pe nakiowa, asew jiwliajwa Jesus pejwuajan, me-ama nejliaklaxwuajan wut, wejatisipox.

²² Xanal naewuajnx wut judios, japi xabich taesia koexaxan naexasisliajwa xan naewuajnxpoxan. Judios-elpi xabich nejxasink matabijaliajwa ampathatpijixan. Japi jiw xan naewuajnx wut, najum-aechi xanliajwa: "Xam naewuajnxpoxan najur wut tajwuajnapijiw naewuajnxpoxan, ja-aech wut, xanal naexasisaxaelen xam naewuajnxpoxan" –aech judios-elpi xanliajwa.

²³ Pe xanal nakiowa japi naewuajnx Cristo tupprox cruztat japiliajwabej. Judios japawuajan jumtaen wut, nejxasinka-elpi japawuajan. Judios-elpiwej, jumtaen wut japawuajan, me-ama nejliaklax wut, wejatisipox.

²⁴ Xanal naewuajnx Cristo tupprox cruztat xatisliajwa. Dios makanot judios japon pejiwaliajwa. Makanotbejpon judios-elpi japon pejiwaliajwa. Puexa japi jumtaen wut Cristo tupprox cruztat, japi chiekal matabija Dios pejpamamax, Dios pejmatabijsaxbej, Dios chajia nejchaxoel xot, Cristo tup wut puexa japi bu'welijaowan.

²⁵ Jiw jumtaen wut Cristo tupprox cruztat jiw bu'welijaowan, japox, me-ama nejliaklax wut, wejatisipox. Pe amwutjel, japox kaes pejme matabijsax. Me-ama ampathatpijiw pejmatabijsax, jachi-el japox. Dios tapaei wut Cristo tupaliajwa cruztat, japon tup wut, me-ama Dios mamnika-el wut, ja-aechon. Dios mat-et wut Cristo pejme dukaliajwa, jawut jiw matabija Dios pejpamamax, Dios kaes pejme mamnikpox. Me-ama jiw pejpamamax, jachi-el Dios pejpamamax.

²⁶ Takoew, xamal najut chiekal nejchaxoelde ma amwut xan jumchiyaxaelenpox! Dios xamal makanot wut japon pejiwaliajwam, xamalxot xabicha-el matabijapi ampathatpijixan. Xabicha-elbej paklochow paxi.

²⁷ Dios makanochpi, japi Dios pejiwaliajwa, japi jiw, me-ama matabijsla wut, ja-aechi asew jiwliajwa. Pe japi Dios kajachawaech xot, kaes pejme matabijs wut, ja-aechi. Me-ama ampathatpijiw matabijtpi, jachi-el japi jiw. Ja-aech wut, ampathatpijiw, xabich matabijtpi, xabich padalaxaeli. Dios makanot jiw japon pejiwaliajwa, japi jiw, me-ama mamnika-el wut, ja-aechi asew jiwliajwa. Pe japi jiw Dios kajachawaech xot, kaes pejme xabich mamnik Diosliajwa. Me-ama ampathatpijiw mamnik wut, jachiyaxil japi jiw. Ja-aech wut, ampathatpijiw, xabich mamnikpi, japox taen wut, xabich padalaxaeli.

²⁸ Dios makanot jiw japon pejiwaliajwa mastaenspi asew jiw. Japi jiw, me-ama pachaema-el wut, ja-aechpi paklochowliajwa. Ja-aech Dios, makanot wut jiw japon pejiwaliajwa, asamatkoi paklochow xabich padalaliajwa.

²⁹ Samata, aton nejchaxoelaxil: "Xan kaes pejme pachaeman. Me-ama asew jiw, jachi-enil xot, Dios namakafit japon pej-atonanliajwa" –chiyaxilon, nejchaxoel wut.

³⁰ Dios pajut puexa nakmakanot Jesucristo pejiwaliajwas. Dios naktapaeibej chiekal matabijaliajwas japon pejjamechan, Cristo tup xot cruztat. Samata, xatis babijaxan isaspoxan ajil Diosliajwa. Isfulasbej Dios nejxasinkpoxan. Dios nakkajachawaetbej xatis babijax isasamatas.

³¹ Samata, xatis jiw jumchiyaxes Dios nakkajachawaetpoxliajwa. Dios pejjamechan, chajia lelsprox, jum-aech wut, jum-aechox: "iAton pajut ispoxan, japon chapaeyaxil asew jiw asbuon jumch japon aton sitaeliajwas! Japon atonlax chapaesia wut ispoxanliajwa, ijapon nej chapae' asew jiw Dios kajachawaechpoxan, asew jiw japox jumtaen wut japi Dios sitaeliajwa!" –aech Dios pejjamechan, chajia lelsprox.

2

Jesucristo kimatamatlasprox cruztat

¹ Takoew, xamalxot majt patx wut, xan chimiawuajan naewuajnx, maliach matabijtaxpoxan Diosxot. Japawuajan majt asew jiw matabija-el. Xamal japawuajan naewuajnx

wut, chiekal naewuajna chiekal jummatajibialijwam. Naewuajna wut jarawuajan, me-ama xabich matabijtax wut, jachi-enil.

² Xan xamalxotx wut, kaes asaxan nejchaxoela-enil matabijsliajwan. Xanlax nejchaxoelafulax naewuajnafulaliajwan Jesucristo pejuwan, cruztat kimatamatlaspox.

³ Xamal nejwajnalel naewuajna wut, tajlewt tathulax. Chiekal mamnika-enil wut, ja-an xan.

⁴ Naewuajna wut chimiawuajan xamal naexasisliajwam, me-ama xabich matabijnsan wut, jachi-enil. Espiritu Santo xan nakajachawaet xamal naexasisliajwam naewuajna xoproxan.

⁵ Dios nakajachawaet xotbej, xamal naexasitam xan naewuajna xoproxan. Japoxan naexasis-enil, xamal matabijam xot ampathatpijiw matabijapoxan.

Espiritu Santo nakkajachawaetpox xatis matabijaliajwas Dios matabijtpoxan

⁶ Cristo chiekal xanaboejapixot, jaxot xan Dios pejjamechan naewuajna, japi jiw kaes chiekal matabijaliajwapi Dios. Xan naewuajna xoproxan najupa-el ampathatpijiw naewuajna xoproxan. Najupa-elbej paklochow naewuajna xoproxan. Asamatkoi puexa japi jiw chiekal toepaxael.

⁷ Xan jiw naewuajna wut, naewuajna Cristo tuppox cruztat japi bu'weliajwas Dios. Japoxliajwa Dios chajiakolaxtat, that is-el wutfuk, tamach nejchaxoelon: "Japox jachiyaxaelen jiw bu'weliajwan" —aech Dios, tamach nejchaxoel wut. Ampamatkoiyan xanal jarawuajan jiw naewuajna, majt jiw matabija-elwuajan.

⁸ Cristo ampathatat wut, paklochow, ampathatpijiw tato'alpi, matabija-eli jarawuajan. Japi jarawuajan chiekal matabijaxael wut, kimatamatlaxili Cristo tupaliajwa cruztat. Jaronlap, kaen, tato'laxael puexa ampathatpijiw, Diosxotsepibej.

⁹ Paklochow japi matabija-el Jesús, japon Cristopon. Me-ama Dios chajia jum-aech Cristo tupaliajwa, ja-aechlisi japox. Dios pejjamechan, chajia lelsपो, jum-aech wut, jum-aechox: "Jiw, nejxasinkpi Dios, japi jiwliajwa Dios chaemt pachaempoxan, majt chinax kaen aton tae-elpoxan, jumtae-elpoxanbej, nejchaxoela-elpoxanbej" —aech Dios pejjamechan, chajia lelsपो.

¹⁰ Dios naktapaei matabijaliajwas Cristo tuppox xatisliajwa, Espiritu Santo nakkajachawaet xot. Espiritu Santo puexa chiekal matabijit. Chiekal matabijitbejpon puexa Dios nejchaxoelpoxan.

¹¹ Xatis chiekal matabijaxisal asew jiw nejchaxoelpoxan. Pelax jiw pajut chiekal matabija nejchaxoelpoxan. Ja-aechbej Espiritu Santo. Japon chiekal matabijit Dios nejchaxoelpoxan, japon pajut Dios xot.

¹² Dios nejchaxoelpoxan xatis matabijaxisal wajut wajnejchaxoelaxantat. Espiritu Santo, fuloekpon athxotsik, japon nakkajachawaet xatis matabijaliajwas Dios isपो xatisliajwa.

¹³ Xanal xamal naewuajna wut, naewuajna-enil tajut matabijaxoproxan. Xamal naewuajna Espiritu Santoxot matabijtaxoproxan. Xanal jiw naewuajna Dios pejjamechan, japi jiwlis pejmatpuatanxot Espiritu Santopi.

¹⁴ Jiw, naexasis-eli Jesús pejuwan, japi pejmatpuatanxot jil Espiritu Santo. Samata, nejxasinka-eli xanal naewuajna xoproxan, xanal matabijaxoproxanbej Espiritu Santoxot. Japoxanliajwa, japi jiw asbu'an jumch nejchaxoel: "Japoxan nejliaklaxan" —aechi, nejchaxoel wut. Japi xanal naewet wut, najummatibija-el, Espiritu Santo kajachawaes-esal xot. Samata, japi jiw chiekal jummatibija-el Dios pejjamechan.

¹⁵ Pelax jiw, pejmatpuatanxoti Espiritu Santo, japi jiw chiekal nejchaxoel Dios pijaxan matabijaliajwa. Japiliajwa asew jiw jumchiyaxisal: "Xamal jum-ampoxan diachwuajnakolaxa-el" —chiyaxael.

¹⁶ Japoxliajwa Dios pejjamechan, chajia lelsपो, jum-aech wut, jum-aechox: "Jiw pajut chiekal matabijaxil wajpaklon Dios nejchaxoelpoxan. Jiw naewuajna xilbej Dios" —aech Dios pejjamechan. Xatis wajmatpuatanxot Espiritu Santo. Samata, xatis matabijas Cristo nejchaxoelpoxan. Jatis wut, nejchaxoels, me-ama Cristo nejchaxoel.

3

Chiekal nabichaxaelpox Diosliajwa Jesús pejuwan naexasiti

¹ Takoew, xamalxot majt naewuajna wut, puexa Dios pejjamechan chiekal naewuajna-enil. Ja-an xan, xamal naewuajna wut, xamal chiekal naexasis-enil xotfuk Espiritu Santo tato'alpox, xamal jelnaexasitam xotbefuk Cristo pejuwan. Samata, xamal, me-ama yamxi wut, ja-am Cristo pejuwan naexasitampoxliajwa.

² Xamal majt matxoela naewuajna tampapoxan Cristoliajwa, chiekal matabijaliajwam. Me-ama yamxuch pen mit miach, naxaeyaxan xaeyaxil xot, ja-an xan, xamal naewuajna wut tampapoxan Cristoliajwa. Pe amwutjel, nakiowa xamal ja-amfuk. Nejnejchaxoelaxan

kaes chiekal ti's-el, matabija-emil xot Cristoliajwa. Samata, xamal chiekal matabijaximil kaes xabich tampoelpoxan Cristoliajwa.

³ Xamal, me-ama asew jiw, Dios naexasis-elpi, ja-amfuk. Xamalbej nusasiowlam asew jiwliajwa. Nalotambej. Jasoxan isam xot, diachwujnakolax xamal, me-ama asew jiw, ja-am.

⁴ Me-ama asew jiw, Dios naexasis-eli, duil wut kaenejchaxoelaxa-el, ja-ambej xamal. Xamalxot asew jiw jum-aech: "Xanal Pablo pejjiwjan" —aechi. Asew jiw xamalxotbej jum-aech: "Xanallax Apolos pejjiwjan" —aechi. Japoxan xamal amwutjel nakiowa jum-amfuk. Samata, duilam wut, kaenejchaxoelaxa-emil.

⁵ Xan, Apolos bej, kaes pejme pachaema-enil. Apolosbej kaes pejme pachaema-el. Xan, Apolos suapich, nabistax Diosliajwa. Samata, xanal naewuajna x wut, xamal chiekal naexasitam Jesucristo pejwujjan. Kaenanula xanal chiekal nabistax, me-ama Dios nato'a.

⁶ Xan matxoela naewuajna x Dios pejjamechan, xamalxot x wut. Do jawux, Apolos xamal naewuajan. Japon xamal kaes naewuajan, me-ama Dios nejxasink xamal duilalijawam. Xan majt xamalxot naewuajna x wut Dios pejjamechan, me-ama muthax wut, ja-an nejmatpuatanxot. Do jawux, xan muthaxpi, Apolos, me-ama min matfalan, ja-aechon xamalliajwa. Dios chiekal is xotbej pejbichax nejmatpuatanxot, xamal, me-ama xan muthaxpi wut, chiekal ti'tpi, ja-am xamal.

⁷ Muthapon kaes pejme pachaema-el. Min matfalanbej kaes pejme pachaema-el. Dioslax kaes pejme pachaem. Dios kajachawaet xot, puexa muthaspi chiekal ti'sfal.

⁸ Muthapi, min matfalpibej, kolemutje. Pe japi jiw puexa chiekal najur Diosliajwa. Dios mosaxaespi Diosxotse kaenanula nabisti ampathatat.

⁹ Xan, Apolos suapich, kaebichax nabistax Diosliajwa. Xamal, me-ama Dios pejlulan wut, ja-am xanal nabichliajwan. Xamal Dios pejjiwam xotbej, me-ama Dios isfulba wut, ja-ampox.

¹⁰ Xan matxoela naewuajna x xamal Cristo pejwujjan. Samata, xan, me-ama Dios pejba tuadutxponan wut, ja-an Diosliajwa. Amwutjel Apolos xamal kaes naewuajnaful Cristo pejwujjan. Samata, japonbej, Dios pejba isan wut, ja-aechon. Xanwux, Apolosbej, japon, Dios pejba nabichan wut, ja-aechon. Kaenanula Diosliajwa nabisti chiekal nabichaxael Dios pejba chiekal pachaemaliajwa.

¹¹ Xamal naewuajna x Jesús pejwujjan, xamalbej tuadusliajwam Dios xanaboejampox. Xan Jesús pejwujjan xamal matxoela naewuajna x wut xamalxot, japanaewuajna x, me-ama bases, bapijax, ja-aechox, Dios pejba isliajwa. Japabases matxoela isas satat japaba chiekal mamnikaliajwa. Jesucristo, japon pajut, me-ama bases Dios pejbaliajwa.

¹² Aton ba isliajwa wut, bases isax toet wut, japabasesmatwujajt asan japaba isaxael, toepaxilba. Ja-aech wut, isaxaelon orotat. Ja-el wut, ba isaxaelon platatat. Ja-el wut, ba isaxaelon ia'antat, xabich ommaenkpotantat. Ja-el wut, asan aton isaxael toepaxaelba. Ja-aech wut, esaxaelon tawloba. Ja-el wut, ba esaxaelon baba-uafba. Ja-el wut, esaxaelon maklejbutu-uafba.

¹³ Cristo pejme fuloek wut, jitat xapaejaxaelon bichaxan, kaenanula pejjiw nabistpoxanliajwa. Do jawut, Cristo pejjiw, japi kaenanula matabijaxael, chiekal nabist wut, o, chiekal nabich-el wut.

¹⁴ Cristo xapaejaxael wut japi pejbichaxan, japabichaxan pachaem wut, japi, nabistpi Cristoliajwa, chiekal mosaxaespi Diosxotse.

¹⁵ Japi nabistpoxan, pachaema-el wut, mosaxisali Cristo. Japi ispoxan wetoejwaxaes jitat. Pe nakiowa, napelsaxili Diosliajwa. Samata, japi jiw, me-ama wiapi jit pejba wematwujajtamdaduch wut, ja-aechiyaxael japi jiw.

¹⁶ ¿Xamalkat matabija-emil, Dios pejtemploba wut, ja-ampox, Espíritu Santo nejmatpuatanxot duk xot?

¹⁷ Aton Dios pejtemploba tabej wut, japon atonbej Dios boesaxaeson. Japaba Dios pajutliajwa. Xamal, Dios pejtemploba wut, ja-am, japon pejjiwam xot.

¹⁸ ¡Najut nabej naekichachajbe! Xamalxot kaen aton nejchaxoel wut ampox: "Xan kaes pejme matabijtax. Me-ama asew jiw, ampathatpijiw, matabijs, xan jachi-enil" —aech wuton, japon kofsaxael japanejchaxoelax. Japon nejchaxoelaxael: "Xan matabijs-enil. Me-ama asew, ampathatpijiw, matabijs, xan jachi-enil" —chiyaxaelon, nejchaxoel wut. Japon aton diachwujnakolax asamatkoi matabijsanaxael.

¹⁹ Ampathatpijiw pejmatabijsaxan, japoxan Diosliajwa nejliaklaxan. Japoxanliajwa Dios pejjamechan, chajia lelspxox, jum-aech wut, jum-aechox: "Dios kajachawaet ampathatpijiw pejmatabijsaxat, pajut chiekal matabijaliajwa japi pejmatabijsaxan nejliaklaxanpox" —aech Dios pejjamechan.

²⁰ Dios pejjamechan, chajia lelspx, jum-aech wut, jum-aechbejpx: “Jiw pejmatabijsaxan, Diosliajwa, japox nejliaklaxan” —aech Dios pejjamechan, jum-aech wut japoxanliajwa.

²¹ Samata, xamal kaes pejme nejxasinkam wut asan naewuajanpx Jesús pejwuajan, xamal nejchaxoelaximil: “Xatis kaes pejme pachaems. Me-ama asew, Jesús pejwuajan naexasiti, jachi-esal” —chiyaximil, nejchaxoelam wut. Puexa xanal Jesús pejwuajan naewuajna, Dios nato'a xot. Dios puexa ampathatat ispi, japoxan, puexa xamalliajwa.

²² Xan Pablo, Apolosbej, Pedrobej, xanal Dios panto'apin, xamal naewuajnalijwan. Dios ampathatat is amwutjel xamal duilalijwam, asamatkoianliajwabej. Dios tapaeibej xamal asamatkoi tupalijwam. Dios puexa japoxan tapaei ampathatat xamalliajwa.

²³ Xamal, Cristo pejjiwam, isfulaxaelam Cristo nejxasinkpoxan. Cristo, Dios paxulan, japonbej isful pax Dios nejxasinkpoxan.

4

Nabistpoxan apóstoles

¹ Xamal nejchaxoelam wut, inejchaxoelde xanalliajwa: “Pablo, asew jiwbej, paklochowael. Japi jiw, me-ama xatis, ja-aechi. Japi nabist Cristoliajwa. Japi naknaewuajan majt jiw matabija-elpoxan, Dios to'as xoti” —amde, nejchaxoelam wut xanalliajwa!

² Xamal chiekal matabijam. Aton nabist wut pejpaklonliajwa, japon chiekal isaxael puexa tato'laspoxan.

³ Xanbej isfulax, tajpaklon natato'alpoxan. Samata, xamal, asew jiw suapich, jumchiyaxaelam wut xanliajwa: “Pablo chiekal naewuajnafula-el jiw. Ispoxan chiekal isfula-elbejpon” —chiyaxaelam wut xanliajwa, xan japoxliajwa nejchaxoelaximil. Isfulaxpoxanliajwa nejchaxoela-enilbej: “¿Xankat chiekal isfulax Dios natato'alpoxan? O, ¿xankat chiekal isfula-enil Dios natato'alpoxan?” —chi-enil, xan tajut nejchaxoelx wut.

⁴ Xan tajut matabijs-enil, babijax isx wut Diosliajwa, nabistax wut japonliajwa. Xanfuk tajut chiekal matabijs-enil, Dios chiekal naexasitx wut, o, chiekal naexasis-enil wutbej. Asamatkoi Dios pajut chiekal xan najumchiyaxael japoxanliajwa.

⁵ Samata, jxamal nabej nejchaxoele' asew jiwliajwa, nabisti Diosliajwa: “Japi chiekal nabich-el Dios to'aspx” —nabej aeche', nejchaxoelam wut! jAsbuan jumch wajpaklon Jesús wuajnaewesaxaelam pejme pasliajwasik! Jesús pask wut, japon pajut puexa jiw chiekal itpaeyaxael japi kaenanula ispoxanliajwa. Maliach ispoxanbej tulaela itpaeyaxaelon. Japon itpaeyaxaelbej, ma-aech xot jiw kaenanula japoxan is. Do jawux, Dios jumchiyaxael kaenanula jiwliajwa nabisti japonliajwa: “Xam diachwuajnakolax chiekal nabistam xanliajwa. Samata, xan xabich nejchachaemlax xamliajwa” —chiyaxael Dios kaenanula japi jiwliajwa.

⁶ Takoew, jxan chiekal nanaewe'e tajutliajwa jumchiyaxaelenpx, Apolosliajwabej! Chiekal nanaewetam wut, jxamal chiekal naexasi'e Dios pejjamechan, chajia lelspx! Dios pejjamechan, chajia lelspx, jum-aech wut, jum-aechox ampx, fiat wut: “Jum-am wut, jnabej jum-aech': 'Ampon kaes pejme xabich pachaem. Me-ama asan aton, jachi-elon' —nabej aeche'!” —aech Dios pejjamechan. Samata, nejchaxoelam wut, jnabej nejchaxoele': “Ampon aton, Dios pejjamechan naewuajanpon, kaes pejme pachaem. Me-ama asan aton, Dios pejjamechan naewuajanpon, jachi-el japon aton” —nabej aeche', nejchaxoelam wut!

⁷ ¿Chankat xamal jum-aech: “Xamal kaes pachaemampim. Me-ama asew jiw, jachimilpim” —aechkat xamalliajwa? Xamal amwutjel nejewpoxan, japoxan, Dios xamal chaxduw. Dios xamal chaxduw wut, ¿ma-aech xotkat japoxanliajwa jum-am, me-ama xamal najut chiekal faekam wut, ja-amkat?

⁸ Xamal asbuan jumch nejchaxoelam: “Xatis xabich matabijas Dios pejjamechan, asew jiw naknaewuajan xot. Samata, nakwe'pa-el japi kaes naknaewuajnalijwa” —am xamal, nejchaxoelam wut. Xamal japox nejchaxoelam wut, diachwuajnakolaxa-el. Chiekal matabijam wut Dios pejjamechan, xamal, me-ama tajpaklochowam wut, jachiyaxaelam. Diachwuajnakolax Dios pejjamechan naexasiti pejpaklochowam wut, ja-am wut, xanal nejchachaemlaxaelen xamalliajwa.

⁹ Xan tajut nejchaxoelx: “Dios natapaei puexa xanal apóstolespin ampathatpijiw xanal nanejweslaliaw. Japi jiw jum-aechbej: 'Xatis apóstoles beyaxaes' —aechi. Samata, puexa ampathatpijiw, Dios pej-ángelbej, chiekal xanal natachaemapi taeliajwa jachiyaxaelpox xanalliajwa” —an xan, nejchaxoelx wut.

¹⁰ Asew jiw nejchaxoel xanalliajwa: “Japi Cristo pejjiw xot, nejliakla” —aechi xanalliajwa, nejchaxoel wut. Pe xamallax najutliajwa asbuan jumch nejchaxoelam wut, jum-am: “Xatis Cristo pejjiw xot, xabich matabijas” —am, nejchaxoelam wut. Nakaewa najum-ambej xanalliajwa: “Japi mamnika-el” —am xamal xanalliajwa. Xamallax najut

nejchaxoelam wut, jum-am: “Xatis kaes pejme mamnikas” —am xamal. Asew jiw xanal nasitae-el. Pelaxi xamal japi jiw sitaen.

¹¹ Xanal jiw naewuajntax wut asapaklowaxanxot, nabijatax. Amwutjelbej nakiowa nabijatax. Xanal asamatkoi litaxaelax. Minsilabej. Nawejilbej chamoeyaxan chiekal nanoelajwanlejen. Jiw babijaxan isfulbej xanalliajwa. Tajbachan nawejilbej, xabich nanuamtax xot asatwajnuchannelle.

¹² Asamatkoi xanal xabich damlax, xabich nabistax wut tejew wuajsliajwan. Asew jiw jum-aech babejjamechan xanalliajwa. Ja-aech wut, xanallax Dios kawuajntax japi jiw Dios kajachawaesliajwas. Asew jiw babijaxan isful wut xanalliajwa, xanal talala-el japi jiwliajwa.

¹³ Asew jiw babejjamechan jum-aech wut xanalliajwa, xanallax jum-an chimiajamechan japi jiwliajwa. Asew jiwliajwa, xanal, me-ama xabich pachaema-elpoxan wut, ja-an japijiajwa. Pomatkoicha, hasta amwutjel, jasoxtat xanal duilafulax.

¹⁴ Xan ampox lelx wut, lela-enil xamal nadalaliajwa. Xanlax lelx ampox xamal naewuajnalajwan. Xamal naewuajntax wut, me-ama taxikola naewuajntax wut, ja-an xamalliajwa, xamal nejxasinkax xot.

¹⁵ Xamal naewuajntax wut Jesús pejuwajan, naexasitam japawuajan Dios xamal buweliawja babijaxan isampoxanliajwa. Samata, xan, me-ama nej-axnan wut, ja-an xamalliajwa, Jesús pejuwajan naewuajntax wut, naexasitam xot. Do jawux, Jesús pejuwajan naexasitam wut, xabich asew jiw kaes xamal chanaekabuana chiekal matabijaliajwam.

¹⁶ Amwutjel xamal jum-an chiekal duilaliajwam. Me-ama xan xamalxot chiekal dukx wut, jxamalbej ja-amde, duilam wut!

¹⁷ Samata, Timoteo to'ax xamal poxade, japon xamal naewuajnalajwa, chiekal duilaliajwam, me-ama xan chiekal dukx, jachiliajwam. Xan Timoteo xabich nejxasinkax, chiekal naexasit xoton Jesús pejuwajan. Samata, Timoteo, me-ama taxulan, jabuan-an. Timoteo xamal chapaeyaxael nejchaxoelaliajwam, ma-an xan, majt dukx wut xamalxot, Jesús pejuwajan naexasitx xot. Me-ama xan potwajnuacha naewuajntax, jachiyaxael Timoteo, xamalxot wut.

¹⁸ Asew jiw xamalxot pajut nejchaxoel: “Xatis kaes pejme pachaems, xabich matabijas xot. Samata, Pablo xatis bej naktaeyaxilbej kaes naknaewuajnalajwa” —aech japi jiw, pajut nejchaxoel wut xanliajwa.

¹⁹ Pe nakiowa, Dios natapaei wut, kaematkoiyon suapich wut, xamal taeyaxaelen. Xan japi jiw tajut chiekal taeyaxaelen, matabijsliajwan, diachwuajnakolax japi jiw mamnik wut Espiritu Santo pijaxtat. Jachi-el wut, xan tajut chiekal matabijsaxaelen, japi jiw asbuan jumch pajut jum-aechpoxankal.

²⁰ Dios pejiw matabijaxaes, isful wut pachaempoxan, Dios kajachawaech xoti. Japi jiw asbuan jumch pajut jumdui-el isliajwa pachaempoxan.

²¹ Xamalxot patx wut, xamalxot nejxasinkam xan kastikaliajwan, xamal babijaxan isam xot? O, xamalxot nejxasinkam xan chiekal naewuajnalajwan, xamal nejxasinkax xot?

5

Corinto paklowaxpijiw, Jesús pejuwajan naexasitixot, dukpox xabich babijax ispon

¹ Kaen aton xabich babijax is xamalxot, fit xoton pax pijow. Jiw, naexasis-eli Jesús pejuwajan, jasox is-el, me-ama japox.

² Pe xamal japon aton fias-emil. Asbuan jumch xamal najutliajwa nejchaxoelam: “Xatis kaes pejme pachaems. Me-ama asew jiw, jachi-esal” —am xamal, nejchaxoelam wut. jJasox xamal nabej nejchaxoele! jXamal xabich nadalaxaelam japon atonliajwa! jXamal to'im japon aton chijiyaliajwa xamalxot, pejme kaxa-elaliajwapon!

³ Diachwuajnakolax amwutjel xan tajut xamalxota-enil. Pe nakiowa, nejchaxoelx wut, xan tajut, me-ama xamalxotx wut, ja-an. Matabijtax japon aton babijax ispox. Samata, xanliajwa japon aton wewe'pas kastikax. Xamal japon aton kastikaxaelam, xan jaxota-enil wut.

⁴ Xamal natamejlam wut jumchiliajwam japon aton babijax ispoxliajwa, jawut xan nejchaxoelaxaelen xamalliajwa. Jawutbej wajpaklon Jesús xamal kajachawaesaxael chiekal matabijaliajwam, machiyaxaelam japon atonliajwa.

⁵ Japon, xabich babijax ispon, jxamal to'impon chijiyaliajwa xamalxot, Satanás tato'laspi poxaliajwapon! Jaxotde xabich nabijat wut, pajut chiekal nejchaxoelaxaelon. Ja-aech wut, japon pejme chiekal naexasisaxaelbej Jesús pejuwajan. Ja-aech wut, japon bu'weyaxaes asamatkoi, Jesús pejme pask wut.

⁶ jXamal najut nabej nejchaxoele': “Xatis kaes pejme pachaems. Me-ama asew jiw, jachi-esal” —nabej aeche', nejchaxoelam wut, japon, xabich babijax ispon, xamalxot duk xoton!

Xamal chiekal matabijam. Aton babijax isful wut xamalxot, japon aton tabejsaxael puexa Jesús pejwujajan naexasiti.

⁷ Samata, japon aton, babijax isax nejxasinkpon, xamal chijiyax to'im tabejsasamatapon asew jiw xamalxot! Japon aton, me-ama padujpansap, levadura kitanialassap, ja-aech japon aton, babijax isax nejxasink xot. Pe xamal pajelnejchaxoelaxan, Jesús kajachawaet xot babijax isasamatam. Ja-am wut, Diosliajwa, me-ama pajelsap, levadura kitaniala-esal sap pan isliajwa, ja-am xamal. Cristo tap xot cruztat nakbu'weliawja babijaxan isapoxanliajwa, Diosliajwa japon, me-ama wajan Cordero, Pascuafiesta wut boesaspon, jakitison.

⁸ Samata, xatis nejchachaemlas. Me-ama judíos nejchachaemil Pascuafiesta wut, jatisbej xatis. Judíos pelt padujpansapan, japasapan ajilalijwa japixot. Jachiyaxesbej xatis. Samata, majt babijaxan isapoxan kofaxaes kaes is-elalijwas babijaxan.

⁹ Majt asacarta xamallijwa lelx wut, jaxot chiekal chanaekabuanax nachalasangamatam jiw, babijaxan isaxan nejxasinkpi suapich, asew watho' bu'moejsax nejxasinkpi suapichbej.

¹⁰ Naexasis-elpixot Jesús pejwujajan, asew watho' bu'moejt. Asew japixotbej, pejew wut, xabich nejpas-esal pejew. Xabich jumch kaesasiapi. Asew nejxasink natkowax. Asew nejxasinkbej ídolos kawuajna. Japacarta xato'ax wut, xato'a-enil xamal nadijalijawam japi jiwxot. Jiw babijaxan ispi, japi pothata xajup. Samata, nakolaximil japi jiwxot. Japixot xamal nakolasiam wut, nakolaxaelam ampathatat.

¹¹ Xan chajia asacarta lelx wut, naewuajnasian amprox. Aton jum-aech wut: "Xan naexasitx Jesús pejwujajan" – aech wuton, pe japon aton nakiowa asew watho' bu'moejt wut, ijasi jiw suapich, xamal nabej nanuams! Xamalxot asan aton pejew wut, japon aton nejpas-esal wutbej, xamalxot asan aton ídolo kawuajjan wutbej, ijasi jiw suapich, xamal nabej nanuams! Xamalxot asan aton jum-aechful wut babejjamechan asew jiwliawja, xamalxot asan aton saxa feyax nejxasink wutbej, xamalxot asan aton nejxasink wutbej natkowax, ijasi jiw suapich, xamal nabej nanuams! Jiw ja-aechpi, xamal tadut wut xaelijwa, ijapi jiw suapichbej, nabej naxae'!

¹²⁻¹³ Dios xan natapae-el jumchilijwan naexasis-elpilijwa Jesús pejwujajan: "Ampi jiw, babijaxan is. Samata, japi xabich kastikaxaes" – chilijwan. Dios pajut japox jumchiyaxael japilijwa. Xabich kastikaxaesbejpi. Xamalxotlax naexasiti Jesús pejwujajan babijax is wut, Dios tapaei xamal najut jumchilijwam, chaemsliajwambej: "Ampi babijaxan is. Samata, xatis wajut japi kastikaxaes" – chilijwam. Samata, jto'im japon aton xamalxot chijiyalijwa, xabich babijax is xoton!

6

Wujajan chaemsaxaelprox, Jesús pejwujajan naexasiti wujajan wut nakaewalijwa

¹ Xamalxot asan babijax is wut xamallijwa, japon aton nabej buflae' juez poxade japox wujajan juez xamal wechaemsliajwa! Xamallax tadusaxaelam asew jiw, Jesús pejwujajan naexasiti, japi kajachawaesliawja japox wujajan chaemsliajwam.

² Xamal chiekal matabijam. Cristo asamatkoi fuloek wut, jawut naexasichpis Jesús pejwujajan Dios naktapaeyaxael jumchilijwas kaenanula naexasis-eli Jesús pejwujajan: "Xam babijaxan isam. Samata, Dios xam kastikaxael" – chilijwas. Samata, xamal amwutjel chiekal matabijam wujajan chaemsliajwam, asew jiw xamalxot pejbu'wujajan wut. Puexa japox chiekal tampa xamallijwa.

³ Xamal chiekal matabijambej. Asamatkoi xatis jumchiyaxesbej kaenanula asew ángeles, babijaxan ispiilijwa: "Xam nejbu'wujajan Diosliajwa, babijaxan isam xot. Samata, Dios xam kastikaxael" – chiyaxes. Samata, xatis amwutjel matabijas wajut chaemsliajwas, wujajan wut xatisxot.

⁴ Samata, xamalxot wujajan wut, ¿ma-aech xotkat aton bu'folam juez poxade japon juez wujajan wechaemsliajwa? Japi juez, Jesús pejwujajan naexasis-el. Xamal fulaeyaximil juez poxade japox wujajan juez wechaemsliajwa.

⁵ Xamal japox jum-an nadalalijwa. Xamalxot wujajan wut, ¿xamalxotkat kaen aton ajil, chiekal matabijtpon wujajan chaemsliajwa?

⁶ Xamal Jesús pejwujajan naexasitam xot, kaen xamalxot babijax is wut, ¿nabej buflae' juez poxade japon aton tasalalijwam jaxotde!

⁷ Japon aton bu'folam wut jueces poxade, japi jueces, Jesús pejwujajan naexasis-eli, japi wultaen wut japox, pachaemaxil xamallijwa. Naexasis-elpi Jesús pejwujajan matabijaxael xamal chiekal duila-emilprox. Samata, ¿babijaxan ispon nabej buflae' juez poxade! Jel-naexasiti Jesús pejwujajan, babijaxan is wut xamallijwa, kaes pachaem tapaelijwam japi japoxan isliawja. Japi nejew natkowa wut, tapaeyaxaelam natkowalijwa.

⁸ ¡Pelax xamal babijaxan isfulam nakaewaliajwa! ¡Wenatkowambej asew jiw, naexasiti Jesús pejwajan!

⁹⁻¹⁰ ¡Xamal najut nabej naekichachajbe! Xamal chiekal matabijam, babijaxan ispi, japi duilaxil Diosxotse. Samata, ¡nabej is pachaema-elpoxan, najut isasiampoxan! Poejiw, asew watho' bu'moejtpi, japiwej duilaxil Diosxotse. Jiw idolos kawuajanpi, japiwej duilaxil Diosxotse. Pejwatho'pi, asew watho' naebu'moejtpi, japiwej duilaxil Diosxotse. Nakaepojwa nabu'moejtpi, japiwej duilaxil Diosxotse. Jiw kithakabeb, duilaxil jaxotse. Jiw pejew wut, jumch xabich kaesasiapi, japiwej duilaxil jaxotse. Saxa femaenkpi, japiwej duilaxil Diosxotse. Jiw, buxwuajanmaenkpi, japiwej duilaxil Diosxotse. Asew jiw, naekichachajbapi wenosliajwa asew jiw pejew, japiwej duilaxil Diosxotse.

¹¹ Asew jiw xamalexot majt babijaxan isful. Pe amwutjel, japi is-el babijaxan, Dios webeltaens xot babijaxan ispoxanliajwa, Jesucristo tup xot cruztat japijajwa. Diosliajwa japi jiw pachaemlisi. Samata, japi Dios pejiw. Espiritu Santobej kajachawaech naexasisliajwapi Dios.

Isaxilpox babijax Jesús pejwajan naexasiti

¹² Asew jiw jum-aech: "Amwutjel xan na-it-ele-el majt nafiatpox. Samata, isasianpoxan isaxaelen" —aechi. Pe xatis puexa isasiampoxan isas wut, chiekal duilaxisal Diosliajwa. Diachwuajnakolax xan na-it-ele-el puexa isasianpoxan isliajwan. Pe xan tajut natapaeyaxinil tajnejchaxoelax natato'lalijwa babijaxan isliajwan, japox babijax, me-ama tajpaklon wut, jachliajwan.

¹³ Asew jiw jum-aech wutbej: "Naxaeyaxan tajwoejtliajwa. Tajwoejtbej naxaeyaxanliajwa" —aech wuti, japi jum-aechpox, diachwuajnakolax. Pe Dios asamatkoi toesaxael naxaeyaxan, wajwoejanbej. Dios nak-is-el asew watho' bu'moejsliajwas. Dios nak-is japon tanbichtliajwas. Dios nakkajachawaech xatis chiekal mamnikaliajwas.

¹⁴ Wajpaklon Jesús tup wut cruztat, Dios mat-echpon pejme dukaliajwa. Asamatkoi xatisbej Dios nakmat-eyaxael pejme duilalijwas.

¹⁵ ¡Xamal matabijaxaelam, xatis kaenanula Cristo pejiws xot, me-ama Cristo pejbu't wut, jatis! Samata, asew watho' bu'moejsaxisal, plata kanapi poejiw bu'moejsaxtat.

¹⁶ ¡Xamalbej matabijaxaelam, kaen aton japow bu'moejt wut, japi, me-ama kaen wut, ja-aechlisi! Dios pejjamechan, chajia lelspx, jum-aech wut, jum-aechox japoxliajwa: "Japi kolenje, me-ama kaen wut, ja-aechlisi" —aechox.

¹⁷ Naexasitron Cristo pejwajan, japon, Cristo suapich. Japi, me-ama kaen wut, ja-aechi Diosliajwa.

¹⁸ Samata, ¡nabej bu'moejs asew watho'! Nejmachbabijaxan jiw is wut, pejbu'an tabejesal. Pe nakiowa, aton asew watho' bu'moejt wut, japon aton pajut natabejt Diosliajwa.

¹⁹ ¡Xamalbej matabijaxaelam! ¡Xamal Diosliajwa, me-ama Espiritu Santo pejttemploba wut, ja-am, Espiritu Santo duk xot nejmatpuatanxot! Pe Dios to'a Espiritu Santo dukaliajwa xamal nejmatpuatanxot. Nejbu'anbej xamal najutliajwa-el isliajwam babijaxan.

²⁰ Xamal Dios wuajt. Cristo tup wut cruztat, japon mot xamal babijaxan isampoxanliajwa. Samata, ¡kaes babijaxan nabej is! Babijaxan is-emil wut, jiw sitaeyaxael Dios.

7

Pablo naewuajanpox Jesús pejwajan naexasiti nakjiyaxliajwa

¹ Majt xamal carta xato'am wut xanliajwa, japacartaxot nawuajnachaemtam nakjiyaxliajwa. Amwut nawuajnachaemtampoxliajwa amxot lelaxaelen xamal chiekal chanaekabuanalijwan nakjiyax. Kaes pejme pachaem, aton tamach laejaliajwa, pawis fis-elalijwa.

² Pe poejiw xabich asew watho' bu'moejt xot, jasox isasamata, kaes pejme pachaem kaenanula poejiw nakjiyalijwa, kaenanula watho'bej nakjiyalijwa, asbuan jumch asew poejiw bu'moejsasamata watho'.

³ Kaenanula poejiw chiekal laelpaxael pijowxot. Jachiyaxaelbej kaenanula watho'. Chiekal laelpaxaeli pamalxot.

⁴ Kaenanula watho' pamalpi, japi watho' pajutliajwa-el pejbu'an. Japi pejbu'an pamallijwa. Jachiyaxaelbej poejiw pejwatho'pi. Japi poejiw pejbu'an pajutliajwa-el. Japi pejbu'an pijowliajwa.

⁵ Samata, xamal, watho'am, ¡nabej nejwesle' kaeyaxtat moejsliajwam, nejmol suapich! Xamal poejwam, ¡ja-amdebej! Pelax xamal, nijow suapich, kaenejchaxoelaxam wut Dios piach kawuajnalijwam, ¡jawut kaeyaxtat nabej moejs, nijow suapich! Jachiyaxaelam asax nejchaxoelasamatam, piach Dios kawuajnalijwam wut. Dios kawuajna x buxtoetam wut, nijow suapich, pejme kaeyaxtaxaelam. Jasox isaxaelam xamal babijaxan isasamatam, Satanás naekichachajbasamatam xamal.

⁶ Xan ampox lelx wut, to'a-enil puexa xamal nakjiyaliajwam. Pe ampox xan lelx xamal chiekal matabijaliajwam. Nakjiyasiam wut, ¡nakjiyim!

⁷ Neexasinkax xamalbej tamach laelpaliajwam, me-ama xan pawis fis-enil, jachiliajwam. Dios kaenanula jiw kajachawaet duilaliajwa, me-ama Dios nejxasink. Samata, asew jiw nakjiyaxael. Asew nakjiyaxil.

⁸ Xamal poejwam tamach laelpampim, xamal watho'am tamach laelpampimbej, xamal watho'am nejmol naetupimbej, puexa xamalliajwa jum-an ampox. Pachaem nakjiyalaliajwam, me-ama xan, jachiliajwam.

⁹ Pe xamal boejtaliasaximil wut, ¡nakjiyim, kaes nejchaxoelasamatam asaxan isaxan, japow swapich!

¹⁰ Xamal, nakjiyampim, jumchiyaxaelen. Japox tajnejchaxoelaxa-el. Pe japox, Dios nejchaxoelpox, jumchiyaxaelen. Xamal watho'am, ¡nabej pels nejmol!

¹¹ Pawis pamal fo'apow, japow asan aton fisaxil. O, japow nospaeyaxael, pamal swapich, pejme nawoeyaliajwa, chiekal pachaemaliajwapi. Poejiwbej pelsaxil pejwatho'jiw.

¹² Asew jiw, xamalxotpijiw, xan japi jumchiyaxaelen tajut nejchaxoelxprox nakjiyaxliajwa. Japox wajpaklon Jesús nabuxto'a-el. Jesús pejwajaan naexasitpon, japon pijow, Jesús pejwajaan naexasis-elpow wut, pe pijow nejxasink wut laejaliajwa pamalxot, ja-aech wut, japon aton fo'axil pijow.

¹³ Jesús pejwajaan naexasitpow, japow pamal, naexasis-elpon wut Jesús pejwajaan, pe japon nejxasink wut laejaliajwa pijowxot, ja-aech wut, japow fo'axil pamal.

¹⁴ Naexasis-elpon Jesús pejwajaan, japon aton Dios kajachawaesaxaes pijow pijaxtat. Pawisbej, naexasis-elpow wut Jesús pejwajaan, japow Dios kajachawaesaxaes pamal pijaxtat. Do ja-aech wut, japi paxibej Dios kajachawaesaxaes. Dios kajachawaes-el wut, japi paxi, me-ama asew, Jesús pejwajaan naexasis-eli paxi wut, jachiyaxael japi paxi.

¹⁵ Pawis, Jesús pejwajaan naexasitpow, japow pamal, naexasis-elpon wut Jesús pejwajaan, japon aton pijow fo'asia wut, ¡nej fo'epon pijow, japow tamach laejaliajwa! Atonbej, Jesús pejwajaan naexasitpon, japon pijow, Jesús pejwajaan naexasis-elpow wut, japow fo'asia wut pamal, ¡nej fo'epow pamal, japon aton tamach laejaliajwa! Dios jasox nejxasink xamal chiekal duilaliajwam wajaanjilaxtat.

¹⁶ Xamal watho'am, kaenanula nejmol, naexasis-elpon wut Jesús pejwajaan, xamal chiekal laelpam wut, nejmol swapich, ja-am wut, nejmol bej naexasisaxaelbej Jesús pejwajaan. Xamal poejwambej, kaenanula nijow, naexasis-elpow wut Jesús pejwajaan, xamal chiekal laelpam wut, nijow swapich, ja-aech wut, nijow bej naexasisaxaelbej Jesús pejwajaan.

¹⁷ Ma akasestat xamal iduilamdo' naexasis-emil wutfuk Jesús pejwajaan, ¡do jaxot xamal nakiowa duilafulde! Ma akasestat xamal inabistamdo' naexasis-emil wutfuk Jesús pejwajaan, ¡do japabichaxan nabichfulde! Japox xan potuajnjucha naewuajnax naexasiti Jesús pejwajaan.

¹⁸ Jesús pejwajaan naexasitpon, circuncidas wut Dios pejmarkaxliajwa, japon nejxaejwaxisal circuncidaspoxliajwa. Asan Jesús pejwajaan naexasit wut, japon circuncida-esal wut, ¡japon kito'axil circuncidaliajwas!

¹⁹ Circuncidax, o, circuncida-elxotbej, japoxan koloeyaxanxot, Diosliajwa kaes asax pejme pachaema-el. Japoxan koloeyax chiekal najup. Kaes pejme pachaempox naexasisliajwas Dios tato'alpox.

²⁰ Jesús pejwajaan naexasiti kaenanula ma iduildo', do jaxot duilafulaxaeli. Ma japi inabistdo' akasestat naexasit-el wutfuk Jesús pejwajaan, do japoxan japi nabichfulaxael.

²¹ Asew jiw xamalxot esclavospi. Naexasit wuti Jesús pejwajaan, ¡japi nej nejchaxoela-ele' malech nabistpoxliajwa paklochowliajwa! ¡Nejmach chiekal nej nabichpi nabistxot! Japi pejmatkoi wepach wut nakolaliajwa, ¡nej nakole paklochowxot!

²² Kaen esclavo naexasit wut wajpaklon Jesús pejwajaan, japon Jesús pamakan. Pe japon, esclavo-el wut, ja-aechbejpon. Japon nabist wut paklonliajwa, jawutbej, me-ama nabiston Jesúsliajwa. Aton, esclavo-elpon, naexasit wut Jesús pejwajaan, japon aton Cristo pejesclavo wut, ja-aechon.

²³ Dios xamal wuajt wut, moton xabich ommaeyaxtat. Samata, asew jiw tato'al wut babijaxan isliajwam, ¡xamal nabej is japoxan!

²⁴ Samata, Jesús pejwajaan naexasitampim, kaenanula duilamxot, ¡do jaxot xamal duilafulde! Nabistampox, ¡japoxbej nabichfulde! Xamal kaenanula ja-am wut, Dios kajachawaesaxael.

²⁵ Xamal nakjiya-emilpim, naewuajnaxaelen nakjiyaxliajwa, majt nawuajnaemtampon. Wajpaklon Jesús nabuxto'a-el japox xamal naewuajnalijwan. Pe xan tajut nejchaxoelxprox xamal jumchiyaxaelen. Dios nabeltaen xot, natapaei japon pejjamechan jiw naewuajnalijwan. Samata, xamal naewuajnaxaelen.

²⁶ Xatis amwõtjel duilafulas pachaema-elmátkoiyantat. Samata, xan nejchaxoelx: “Kaes pejme pachaem, nakjiya-esal wõt tamach laelpaliajwas” –an, nejchaxoelx wõt.

²⁷ Samata, xamal poejwam kaenanula nijow wõt, ¡ nabej fo'e! ¡Chiekal kaelel bu'laelpde nejwatho'! Xamal poejwam, nakjiya-emil wõt fuk, ¡nabej wulweke' watho' nakjiyalajwam!

²⁸ Fitam wõt nijow, japox chaemila-el. Pansiawbej fit wõt pamal, japoxbej chaemila-el. Pe nakjiyapi, japi jiwliajwa asamatkoi xabich timpoelaxael wewe'paspoخانlajwa. Samata, xan nejxasinkax jumchiliajwan, xamal poejwam kaenanula watho' notam wõt bunbijasasamatam.

²⁹ Takoew, xan nejxasinkax xamal jumchiliajwan ampoخ. Matkoiyam xabich xatis nakwewe'pa-el laelpaliajwas. Samata, peiwatho'pi, japibej wajpaklon Diosliajwa xabich nabichaxael. Me-ama tamach laelpe xabich nabist Diosliajwa, jachiyaxaelbej peiwatho'pi.

³⁰ Puexa jiw nejchaxoelaxael nabichliajwa Dios pijax bichax. Jiw wetups wõt pejiw, xabich nejxaejwas wõtbej, xabich nabichaxaelpe Dios pijax bichax. Nejxaejwaxkal japi boejxatataeyaxil. Jiw nejchachaemilpi, japibej xabich nabichaxael Dios pijax bichax, me-ama nejchachaemla-el wõt, jachiliajwapi. Jiw pejew wõt, japibej pasiowlaxil pejew. Japibej xabich nabichaxael Diosliajwa.

³¹ Pejew xabich mowapi, pejew mowa wõt, japi jiw nejchaxoelaxil pajutliajwakal. Japibej Diosliajwa xabich nabichaxael, asamatkoi puexa ampathat chiekal toepaxael xot. Samata, puexa jiw pejewkalliajwa xabich nejchaxoelaxil.

³² Xan nejxasinkax xamal nejchaxoela-elaliajwam ampathatpijajan. Pawis fis-elpon, japon nejchaxoelaful nabichliajwa wajpaklon Dios pejbichax, Dios nejchachaemlialajwa japon atonliajwa.

³³ Pijowponlax nejchaxoel ampathatpijajan. Nejchaxoelbejpon puexa isliajwa pijow chiekal nejchachaemlialajwa japonliajwa.

³⁴ Pawis, pamal fis-elpow, japow nejchaxoel wajpaklon pijax bichax. Japow nejchaxoel Dios tanbichliajwa. Pawis, pamalpowlax, japow nejchaxoel ampathatpijajan. Nejchaxoelbejpon puexa isliajwa pamal chiekal nejchachaemlialajwa japowliajwa.

³⁵ Japox jum-an wõt, xamal fis-enil nakjiyasamatam. Pe japox jum-an xamal naewuajnalajwan chiekal nejchaxoelaliajwam. Nejxasinkax xamal chiekal duilaliajwam. Nejxasinkaxbej puexa xamal chiekal tanbichliajwam wajpaklon Dios.

³⁶ Aton chajia jumdut wõt pawis fisliajwa, japow chiekal ti't wõt, japon aton nejchaxoel: “Xan japow fitx wõt, japox pachaemaxael xanliajwa” –aechon, nejchaxoel wõt. Ja-aech wõt, japon aton japow pawis fisaxael. Japox chaemila-el.

³⁷ Asan aton jum-aech wõt: “Xan pawis fisaxinil” –aech wõtton, nejchaxoel wõt, japox pachaem japonliajwa.

³⁸ Samata, aton fit wõt jumdutpow, japox chiekal pachaem japon atonliajwa. Asanlax, pawis fis-el wõt, japon atonliajwa japox kaes pejme pachaem.

³⁹ Pamal laeja wõt, japow pamalxotaxael. Fisaxilow asan. Jasox jum-aech Dios pej-jamechan, chajia lelspx. Pelax pamal tup wõt, ja-aech wõt, pachaem japow asan fisliajwa. Japow fisaxael Jesús pejuwanjan naexasitpon.

⁴⁰ Xan nejchaxoelx: “Pamal naetupsow, asan fis-el wõt, ja-aech wõt, kaes pejme nejchachaemlaxael japow” –an, xan nejchaxoelx wõt. Xan jasox nejchaxoelx, Espiritu Santo nakajachawaet xot.

8

Chœf xua'atpox ídolos-ofrendaliajwa, japawi nama wõt, asew jiw xael

¹ Majt xamal carta xato'am wõt xanliajwa, nawuajnachaemtam: “¿Chœf xua'taspi ídolos-ofrendaliajwa, japawi naman wõt, pachaemkat xaeliajwas?” –na-am xamal, nawuajnachaemtam wõt. Asew, naexasiti Jesús pejuwanjan, japawi xaeliajwa nejxasinkael. Puexa xatis chiekal matabijas japawi pachaempox xaeliajwas. Pe nejchaxoels wõt: “Xatis kaes pejme chiekal matabijas. Me-ama asew, Jesús pejuwanjan naexasiti, xaelpe japawi, xatis jachi-esal” –tis wõt, nejchaxoels wõt, japanejchaxoelax pachaemaxil. Samata, nejchaxoelaxial japox. Kaes pachaem, nejchaxoelaliajwas: “Xatis nejxasinkas japi jiw, xae-elpe japawi. Samata, xatis xaejaxial japawi japi jiw nakkaechataesamata” –chiyaxaes, nejchaxoels wõt. Jatis wõt, xatis japi jiw kajachawaesaxaes chiekal naexasisliajwapi Dios.

² Aton pajut nejchaxoelpon: “Xan japoxanliajwa puexa chiekal matabijtax” –aech wõtton, japon aton pajut nanaekichachajba. Japon wewe'pas puexa kaes chiekal matabisliajwa.

³ Dios nejxasinkpon, japon aton Dios matabijtas.

⁴ Xatis chiekal matabijas. Ídolos chinax pachaema-el, asbuan jumch japoxan ídolos xot. Puexa ídolos, japoxan Dios-el. Kaen Dios athuxotse duk. Jiw choef xua'at wut ídolos-ofrendaliajwa, japox ofrenda asaxliajwa chinax pachaema-elbej.

⁵ Jiw chiekal matabija-el. Samata, asbuan jumch jum-aechi: "Ampathatat xabich maenck dioses, athuxotsebej" —aechi.

⁶ Pelax xatis chiekal matabijas. Kaen waj-ax Dios. Do japon chiekal kaekolan. Do kaes asan Dios ajil, me-ama Dios, jason. Dios puexa is xatis duilaliajwas, japon nejxasinkpoxan isliajwas. Chiekal matabijasbej. Kaen, wajpaklon Jesucristo. Japon Dios to'as puexa isliajwa. Japon nakkajachawaet xot, laelpas ampathatat.

⁷ Puexa naexasiti Jesús pejwuajan, japi chiekal matabija-el ídolos chinax pachaema-elpox asaxliajwa. Asew jiw japixot majt ídolos kawuajan. Amwutjel japi jiw chiekal Dios xanaboeja-elfuki. Samata, japi jiw xael wut namanwi, ídolos-ofrendaliajwawi, japi jiw nejchaxoel: "Xatis japawi xaes xot, isas pachaema-elpox" —aechi, nejchaxoel wut.

⁸ Xatis chiekal matabijas. Jiw choef xua'at wut ídolos-ofrendaliajwa, japawi xaes wut, o, xae-sal wutbej, Diosliajwa japoxan koloeyaxan chiekal pachaem.

⁹ Pachaem xatis japawi xaeliajwas. ¡Pe chiekal taeyaxaes! Asew, naexasiti Jesús pejwuajan, jum-aech wut: "Dios nejxasinka-el japawi xaeliajwas" —aech wuti, ja-aech wut, ¡nabej xae' japawi! Xamal kaechataen wuti, ja-aech wut, japibej xaeyaxaelbej japawi. Xael wuti, kaenanula nejchaxoelaxaeli: "Xan babijax isx Diosliajwa" —chiyaxaeli, nejchaxoel wut. Jasox japi nejchaxoelaxael, chiekal xanaboeja-el xotfuki Dios.

¹⁰ ¡Xamal nabej xae' japawi, ídolos pejtemplobaxoti! Xamal chiekal matabijam. Xaelam wut japawi, japox chaemila-el. Pe nakiowa, xaelam wut, asan Jesús pejwuajan naexasitpon, japon chiekal Dios xanaboejs-el wutfuk, xamal kaechataen wuton, ja-aech wut, japon aton bej xaeyaxaelbej japawi. Ja-aech wut, japon aton japawi xael wut, nejchaxoelaxaelon: "Xan babijax isx Diosliajwa, xaelx xot japawi" —chiyaxaelon, nejchaxoel wut.

¹¹⁻¹² Xamal chiekal matabijam, japawi pachaem jiw xaeliajwa. Japawi xaelam wut, ja-am wut, asew jiw, chiekal xanaboeja-el-pifuk Dios, japibej xaeyaxael japawi. Samata, kaes pejme pachaem xamal xae-elaliajwam japawi, japi jiwbej xaesamata japawi. Xamalkalliajwa Cristo tupa-el. Japiliajwabej Cristo tup. Xamal xaeyaxaelam wut japawi, japibej xaeyaxael wut, ja-aech wut, japi nejchaxoelaxael: "Xan isx babijax Diosliajwa" —chiyaxaeli, nejchaxoel wut. Ja-aech wut, xamal isaxaelam babijax Cristoliajwa.

¹³ Samata, xan nejchaxoelx: "Xan xaelx wut japawi, asew jiw, naexasiti Jesús pejwuajan, xaeyaxaelbej japawi. Do jawux, japi nejchaxoelaxael: 'Xan Diosliajwa babijax isx, xaelx xot japawi' —chiyaxaeli, nejchaxoel wut" —an xan, nejchaxoelx wut. Samata, kaes pejme pachaem xan japawi xae-elaliajwan, asew naexasiti Jesús pejwuajan xaesamatabej japawi.

9

Dios tapaeipox apóstoles wuljoeliajwa Jesús pejwuajan naexasiti, japi wewe'paspoxanliajwa

¹ Cristo xan namakafit apóstolliajwan. Japonbej xan nato'a jiw naewuajnalijwan, me-ama asew apóstoles, jachiliajwan. Xanbej tajut chiekal taenx wajpaklon Jesús. Xamal naewuajnax japon pejwuajan. Samata, xamal chiekal naexasitam japon pejwuajan.

² Asew jiw nakaewa najum-aech xanliajwa: "Pablo Jesucristo pej-apóstola-el" —na-aechi. Xamallax matabijam diachwuajnakolax xan Jesucristo pej-apóstolan. Naewuajnax wut Jesús pejwuajan, xamalbej naexasitam. Samata, xamal najut chiekal matabijam diachwuajnakolax xan Jesucristo pej-apóstolan.

³ Xan ampox lelaxaelen, asew jiw jum-aech xot asaxan xanliajwa.

⁴ Xanal apóstoles, Jesús pejiwan, Dios tanbistax xot, japon xanal natapai xamal nachax-duiliajwam naxaeyaxan.

⁵ Xan tajow fitx wut, Jesús pejwuajan naexasitpow, xanbej tajow buflaeyaxaelen, jiw naewuajnax wut Jesús pejwuajan. Me-ama asew apóstoles, Pedrobej, wajpaklon Jesús pakoewbej, japi bu'nanuam pejwatho', jiw naewuajan wuti Jesús pejwuajan, xanbej jachiyaxaelen, tajow fitx wut.

⁶ Asew, naexasiti Jesús pejwuajan, xamal naewuajan wuti Cristo pejwuajan, japi naxaeyaxan wewe'pas wut, xamal kajachawaetam. Xanlax, Bernabé suapich, tajut nabistax. Xanal koewan ja-anlapax, xamal nakajachawaesamatam.

⁷ Xamal chiekal matabijam. Aton nabist wut, japon moch pajut naxaeyaxan wuajsliajwa. Soldaw-atonbej pejpaklon chaxduws naxaeyaxan japon xaeliajwa. Nabistponbej uwalul pejpaklonliajwa, japon aton kaechtapais kaesupich uva xaeliajwa. Asanbej, oveja tataefulpón, japonbej pejpaklon kaechafias-esal, leche sae'a wut mat-uffeliajwa.

⁸⁻⁹ Nejchaxoelam wut, jnabej nejchaxoele': "Pablo pajut pejnejchaxoelaxtat japox faen jumchiliajwa" —nabej aeche', nejchaxoelam wut! Moisés chajia lelpox jum-aech: "Woei xanbistam wut trigo matbokanalajwa, jwoei bozal nabej kaechxoele' trigo xaeliajwa!" —aechox. Moisés chajia lelpox woelilajwakal japox lela-elon.

¹⁰ Moisés chajia lelpox nakjum-aech xatis chiekal matabijalajwas, naktanbistpi chiekal mosliajwas. Sat xawawakanpon paklonliajwa trigo pelaliajwa, nabist wut, nejchaxoelon: "Asamatkoi trigo foel wut, tajpaklon kaeswapich trigo nachaxdusaxael namosliajwa tanbistaxpox" —aechon, nejchaxoel wut. Trigo matbokanpi nejchaxoelbej: "Trigo matboknax kitoetx wut, tajpaklon kaeswapich trigo nachaxdusaxael" —aechi, nejchaxoel wut. Do jawux, kaenanula chaxduwspi, trigo matboknax toet wut.

¹¹ Xamal naewuajnax wut Jesús pejwuajan, ja-an wut, japawuajan, me-ama muthax nejmatpwanxot. Samata, pachaem xamal xanal nakajachawaesliajwam, nawewe'p wut.

¹² Xamal kajachawaetam asew, japi xamal naewuajan wut Jesús pejwuajan. Kaes pejme pachaemaxael xanal matxoela nachaxduiliajwam, japi chaxdui-emil wutfuk japoxan.

Dios natapaei xanal japoxan xamal nachaxduiliajwam, Jesús pejwuajan naewuajnax wut. Pe nakiowa, xamal wuljoe-enil nachaxduiliajwam. Xanallax tajut nabistax natataeflialajwan. Xanal wuljowx wut, xamal nejchaxoelam wut, asax nejchaxoelaxaelam xanalliajwa. Ja-an wut, xamal naexaxisaximil naewuajnaxpox Jesús pejwuajan.

¹³ Xamal chiekal matabijam. Dios pejtemplobat nabistpi, japi xaeyaxael naxaeyaxan, Dios pej-ofrendapi. Altarxot nabistpi, japi choef xua'at wut Dios pej-ofrendaliajwa, japipej xaeyaxael japawi, wediakaswi japiliajwa.

¹⁴ Ja-aechbej, asew Jesucristo pejwuajan naewuajan wut. Wajpaklon Jesucristo japi tapaeis chaxduiliajwas, naxaeyaxan wewe'pas wuti.

¹⁵ Xanbej wajpaklon Jesucristo natapaei xamal nakajachawaesliajwam, naxaeyaxan nawewe'p wut. Pe nakiowa, xamal wuljoe-enil nakajachawaesliajwam. Ampacarta lela-enilbej xamal wuljoelajwan kajachawaesax. Xan nejxasinka-enil xamal wuljoelajwan naxaeyaxan xan xaeliajwan. Xanliajwa, kaes pejme pachaem tajlit tupaliajwan.

¹⁶ Xan asew Jesús pejwuajan naewuajnax wut Dios bu'welialjwas, nejchaxoelx wut, nejchaxoela-enil: "Xan kaes pejme pachaeman. Me-ama asew jiw, jachi-enil" —chi-enil, nejchaxoelx wut. Wajpaklon Jesucristo nato'a jiw naewuajnalajwan japon pejwuajan. Japawuajan jiw naewuajnaxinil wut, asamatkoi Dios wuajnalelan wut, japox xabich pachaemaxil xanliajwa.

¹⁷ Xan tajut tajaxtat naewuajnax wut, ja-an wut, wuajnawesaxaelen jiw xan namosliajwa. Pe xan tajut tajaxtat naewuajna-enil japawuajan. Xan jiw naewuajnafulax japawuajan, wajpaklon Dios nato'a xot.

¹⁸ Dios natapaei xan jiw namosliajwa, naewuajnax wut. Pe nakiowa, xan jiw naewuajnax wut Jesús pejwuajan japi Dios bu'welialjwas, xan mat-omwuljoe-enil. Nejchachaemlax wut, japox nejchachaemlax, me-ama xan jiw namot wut, ja-an.

¹⁹ Xan esclavo-enil. Malech nabistpona-enil puexa jiwliajwa. Pe nakiowa, me-ama esclavo wut, ja-an. Puexa jiw malech naewuajnax Cristo pejwuajan japi jiw naexaxisliajwa.

²⁰ Diachwuajnakolax xan nawewe'pa-el naexaxisliajwan Moisés chajia lelpox, naexasitx xot Jesucristo pejwuajan. Pe xan judiosxotx wut, me-ama Moisés chajia lelpox naexasitx wut, ja-an, japi judiosbej naexaxisliajwa Cristo pejwuajan.

²¹ Judios-elpi Moisés chajia lelpox naexaxis-el. Samata, xan japixotx wutbej, Moisés chajia lelpox naexaxis-enil wut, ja-an judios-elpibej naexaxisliajwa Cristo pejwuajan. Ja-an wut, xan kofs-enil Dios pejjamechan naexasitxpxox. Naexaxisfulax, me-ama wajpaklon Jesucristo nato'a.

²² Jiw, jelnaexasiti Jesús pejwuajan, japi chiekal xanaboeja-elfuk Dios. Samata, xan japixotx wut, me-ama japi, ja-an, japipej chiekal naexaxisliajwa Cristo pejwuajan. Xan puexa jiw naewuajnax wut, isfulax, me-ama japi, japipej chiekal naexaxisliajwa Jesús pejwuajan Dios bu'welialjwasbejpi.

²³ Xan ja-an japixotx wut, puexa jiw chiekal naexaxisliajwa Cristo pejwuajan Dios bu'welialjwas. Samata, Dios xan nakajachawaesaxael wut, kajachawaesaxaelbejpon japi jiw, me-ama Dios chajia jum-aech kajachawaesliajwa.

²⁴ Xamal chiekal matabijam, puexa jiw xabich dukp kanaliajwa premio. Pe japixot kaen, matxoelapatpon, japon premio kana. Xamalbej ja-am, Diosliajwa xabich nabistam wut.

²⁵ Dukpaxaelpi premio kanaliajwa, kaenanula chiekal nejchaxoel xabich najaesliajwa, me-ama asew, jachi-elaliajwa. Samata, dukpaxaelpi pajut chiekal natataeful kanaliajwa premio, nuaf-uafcorona. Japox corona piachliajwa-el, selnaxaes xotox. Xatis Diosliajwa xabich nabistas kanaliajwas Dios pijax premio. Japox premiolax pomatkoichaliajwa.

²⁶ Me-ama aton matnoch xabich najaet markasxot pasliajwa, xan jachiyaxaelen. Puexa tajpamamaxtat isaxaelen. Me-ama wajpaklon Dios nato'a, jachiyaxaelen. Ja-an wut, japonliajwa tanbistaxpoxan, kaeyax, nawenafo'axil.

²⁷ Samata, tajut chiekal natataeflax babijax isasamatan. Jasox isx tajpaklon, Jesús, nejchachaemlaliajwa, xan jiw naewuajnajx wut japon pejwuajan. Asew naewuajnajx wut Jesús pejwuajan, japamatkoijan xan chiekal duka-enil wut, Dios pajut xan nato'axael kofsliajwan japon pijax bichax.

10

Pablo fiatpox Corinto paklowaxpijw idolos kawuajnasamata

¹ Takoew, xan naewuajnajx xamal nejkiowasamatan. Wajwuajnapijiw nakola wuti Egipto tuajnuxot, japi fulafol Moisés. Jawut itloejen athu dukaful japi pejwuajnalel. Samata, japi japox, itloejen, fulafol. Do jawut, Dios japi kajachawaech likaliajwapi Mar Rojo.

² Jiw bautisas wut, bautisas mintat. Ja-aech wut, japi Dios pejjiw. Jatislap-is wajwuajnapijiw, fulafol wuti itloejen, Moisés suapich. Fulaechbejpi Mar Rojo poxade, min najupanadijan poxade, likaliajwa we-enlelde. Ja-aech wut, puexa israelitas Diosliajwa, me-ama bautisas wut, ja-aechi. Ja-aech wut, japi jiw Dios pejjiwlisi.

³ Japibej kaeyax naxaeyax xael pomatkoicha, Moisés suapich. Pejnaxaeyax fulaloeka athulelsik.

⁴ Puexa japibej kaemin affi, Dios chaxduchmin, nakolamin ia'botxot. Samata, japa-ia'bot, Cristo wut, ja-aech, israelitas wia xot, tupsia wuti minsit.

⁵ Pe nakiowa, xabich jiw japixot is Dios nejxasinka-elpoxan. Samata, japi xabich tɔp, pajilaxtat wuti.

⁶ Puexa israelitas japox wejatis, xatisbej isasamatas babijaxan.

⁷ Samata, ixamal nabej kawuajne' idolos! Me-ama asew tajwuajnapijiw, inabej ja-aech'e' xamal! Dios pejjamechan, chajia lelspx, jum-aech wut, jum-aechox japiliajwa: "Jiw is wut fiesta idolosliajwa, chalak xaeliajwa, feliajwabej. Do jawux, kaechoel wut, nanapi nababoelaliajwa" —aechox.

⁸ ixatis nabej bu'moejstis asew watho! Me-ama asew tajwuajnapijiw, inabej jachitis! Tajwuajnapijiw japox is wut, kaematkoij tɔp veintitres mil jiw, Dios kastikas xoti.

⁹ Me-ama asew tajwuajnapijiw, japi is babijaxan Dios palalaliajwa, xatislax japox jachiyaxisal. Tajwuajnapijiw asbuñan jumch babijax is wut, japixot xabich jom liklas. Do jawut, chatupbejpi jom liklaspoxan.

¹⁰ Asew tajwuajnapijiw jum-aech babejjamechan Diosliajwa. Ja-aech wut, Dios to'a ángel japi beliajwas. Samata, ixamalbej nabej jum-aech'e' babejjamechan Diosliajwa!

¹¹ Tajwuajnapijiw japoxan wejatis, xatis wachakalpiwasbej nejchaxoelasamatas babijaxan isliajwas. Japoxanliajwa Dios pejjamechan, chajia lelspx, jum-aech wut, jum-aechox xatis chiekal matabijaliajwas isasamatas babijaxan.

¹² Jesús pejwuajan naexasitron, nejchaxoel wut: "Xan chiekal naexasitx Jesús pejwuajan. Diachwuajnakolax babijax isaxinil" —aech waton, nejchaxoel wut, japon pajut chiekal natataeflaxael, asamatkoij babijax isasamata.

¹³ Xamal matabijaxaelam. Satanás xamal xapaewa wut babijaxan isliajwam, xamal koewam japon xapaexaxil. Asew, Jesús pejwuajan naexasitibej, xapaexaxaes. Satanás xatis nakxapaewa wut, Dios nakiowa nakkajachawaesaxael babijaxan isasamatas. Me-ama Dios chajia jumdut nakkajachawaesliajwa, jachiyaxael Dios xatisliajwa. Samata, Satanás xamal xapaewa wut, Dios kajachawaesaxael kaes mamnikaliajwam Dios xanaboejampoxliajwa. Ja-am wut, babijax isaximil.

¹⁴ Samata, xamal takoew, nejxasinkaxpim, inabej kawuajne' idolos!

¹⁵ Xamal chiekal matabijam. Chiekal nejchaxoelambej. Samata, nejchaxoelam wut, ichiekal nejchaxoelde chiekal matabijaliajwam xan jum-anpoxan, japoxan diach chiekal wuajnakolax wut, o, japoxan diachwuajnakolaxa-el wut!

¹⁶ Xatis Santa Cena xaes wut, japox nejchaxoelaliajwas, wajpaklon Jesucristo suapichaspx. Jawut, vino afs wutbej, nejchaxoelaliajwas Cristo tɔppox cruztat xatisliajwa. Panbej jalkas wut xaeliajwas, japox nejchaxoelaliajwas, Cristo boesaspx xatis nakbu'welialjwa.

¹⁷ Xatis, Jesús pejwuajan naexasichpis, xabich pin-iach. Pe nakiowa, kaeyax panax xaes. Samata, xatis, Cristo suapich, kaebu'tas.

¹⁸ ichiekal nejchaxoelde judiosliajwa! Japi choef xua'at wut ofrenda isliajwa Diosliajwa, japi japawi xael wut, chiekal kaenejchaxoelax Diosliajwa.

¹⁹ Xan lelx wut, jumchi-enil: "Ídoloslap Dios" —chi-enil. Xan jumchi-enilbej: "Pawi idolosliajwapi, kaes pejme pachaem, asawi idolosliajwa-elwi, jachi-el" —chi-enil.

²⁰ Jiw, naexasis-elpi Dios pejjamechan, choef xaa'at wut ofrenda isliajwa idololijwa, japi jiw nejchaxoel: "Ampawi chaxdutz ofrenda idololijwa" —aechi, nejchaxoel wut. Diachwaa'jnokolax idololijwa-el. Japi choef xaa'at deplijwa. Japawibej Diosliajwa-el. Samata, xan nejxasinka-enil xamal isliajwam japox ofrenda, japi jiw suapich.

²¹ Xamal Santa Cena xaelam wut, vino afambej nejchaxoelalijwam Jesucristo tuppox. Asew jiw, Dios pejjamechan naexasis-elpi, fiesta is wut idololijwa, japafiesta deplijwa. Samata, xamal japi jiw suapich, nabej xae'! jNabej fe'bej, japi jiw suapich!

²² Xatis nejxasinka-esal babijax isliajwas wajpaklon Jesús palalasangata, japon kaes pejme mamnik xot. Me-ama xatis, jachi-elon.

Chiekal duilaxaelpox Jesús pejwaa'jan naexasiti

²³ Asew jiw jum-aech: "Majt nafiatpoxan, amwutjel japoxan chiekal toep. Samata, xan na-it-ele-el. Isasianpoxan isaxaelen" —aech asew jiw asbuan jumch. Japi jum-aechpox diachwaa'jnokolax. Pe puexa japi isasiapoxan, is wuti, japoxan pachaemaxil kaes xanaboejalijwapi Dios.

²⁴ Nejchaxoelam wut, jnabej nejchaxoele' pachaempoxan isliajwam najutliawakal! Pelax nejchaxoelde isliajwam pachaempoxan asew jiwliajwa.

²⁵ Pawi mowaxot waa'jtam wut, japawi nejmach xaeyaxaelam. Japawi xaelam wut, pachaem Diosliajwa. Samata, pawi mowaxot waa'jtam wut, nabej waa'jnachaems: "¿Ampawikat ofrenda idolosliajwawi?" —nabej aeche'. Pawi mowapi xamal waa'jnachaemtam wut, jumnosaxaeli: "Diachdo', ampawi, ofrenda idolosliajwawi" —chiyaxaeli xamallijwa. Japox jumtaenam wut, nejchaxoelaxaelam: "Japawi xaelx wut, Diosliajwa japox pachaemaxil" —chiyaxaelam, nejchaxoelam wut. Samata, pawi waa'jtam wut, jnabej waa'jnachaems!

²⁶ Ampathat, puexa ampathatatpibej, japoxan wajpaklon Dios pejew. Samata, pachaem xatis xaelijwas japawi.

²⁷ Jesús pejwaa'jan naexasis-elpon, xamal tadut wut xaelijwam, jnejmach xaem! Xaelijwam wut, jnabej waa'jnachaems: "¿Ampawikat, ofrenda idolosliajwawi?" —nabej aeche'!

²⁸ Pe jawut, asan, Jesús pejwaa'jan naexasitpon, jum-aech wut: "Ampawi xaes wut, Diosliajwa pachaemaxil" —aech wuton, jxamal nabej xae' japawi! Pe nakiowa, xamal japawi xaelam wut, diachwaa'jnokolax japon aton tabejsaxaelam.

²⁹ Xamal chiekal matabijam, puexa pawi pachaem xaelijwas. Pe nakiowa, asew jiw jum-aech wut japawilijwa: "Pachaema-el ampawi xaelijwas" —aech wuti, jxamalbej nabej xae' japawi!

Asan, Jesús pejwaa'jan naexasitpon, xan jum-anpox jumtaen wut, japon asbuan jumch jumchiyaxilbej: "Dios natapaei xaelijwan ofrenda idololijwawi. Samata, xan nejmach chiekal xaelx. ¿Ma-aech xotkat majt xaelxpoxan wulkaechakoftax?" —chiyaxil japon aton.

³⁰ Xan xaelijwan wut, gracias-an Diosliajwa. ¿Ma-aech xotkat asan aton asbuan jumch jumchiyaxael xanliajwa: "Japon pejb'u'waa'jan Diosliajwa, xael xoton japawi, ofrenda idololijwawi" —nachiyaxaelkat?

³¹ Puexa isaxaelampoxan, xaeyaxaelampoxanbej, feyaxaelampoxanbej, puexa japoxan isam wut, jchiekal isde, puexa jiw Dios sitaelijwa!

³² Samata, jxamal nabej is babijaxan nakxataesamata, tabejsasamatambej, judíos, judíos-elpibej, asew, Dios naexasitibej!

³³ Puexa xan isxpoxan, isx puexa asew jiw nejchachaemlialijwa. Isx wut pachaempoxan, nejchaxoela-enil: "Ampoxan xan tajutliajwa" —chi-enil, nejchaxoelx wut. Japoxan xan isx puexa asew jiw wepachaemalijwas. Japox nejchaxoelx, nejxasinkax xot japi jiwbej Dios bu'welijwas.

11

¹ Xan isfulax Cristo isfulpoxan. jXamalbej japoxan isfulde!

Machiyaxaelpox watho', cultoxot wut

² Takoew, xamal nejchaxoelam xanliajwa. Xan jum-anpoxanbej xamal naexasisfulam. Samata, xan xabich nejchachaemlax xamallijwa.

³ Xan jum-an xamal chiekal matabijalijwam ampox. Dios paklon Cristolijwa. Cristobej paklon kaenanula poejiwliajwa, japi naexasiti japon pejwaa'jan. Kaenanula poejiwbej paklochow pejwatho'liajwa.

⁴ Samata, aton matlua't wut panuelbu', Dios kawaa'jnaliajwa wut, o, Dios buxto'aspos jiw naewaa'jnaliajwa wutbej, ja-aech wut, wajpaklon Jesucristo padalaxael japon atonliajwa.

⁵ Kaeow pawis Dios kawaa'jnaliajwa wut, o, Dios buxto'aspos jiw naewaa'jnaliajwa wutbej, matlua's-el wut panuelbu', ja-aech wut, pamal padalaxael pijowliajwa, japow, me-ama ta'laxaxoch wut, jachiyaxael xotow pamallijwa.

⁶ Pawis nejxasinka-el wut panuelbu' matlua'sliajwa, ja-aech wut, pajut nata'laxaxosaxaelpow. Pe nejxasinka-el wut pajut namatfunaliajwa, o, pajut nata'laxaxosliajwa ta'dalasangata, ja-aech wut, ¡nej matlua's panuelbu'!

⁷ Dios is wut aton, me-ama Dios pajut wut, ja-aech japon aton. Samata, poejiw matlua'axil panuelbu'. Japi chiekal pachaem wut, puexa jiw nejchaxoelaxael Diosliajwa: “Dios xabich pachaem” —chiyaxael jiw, nejchaxoel wut. Atow chiekal pachaem wutbej, puexa a sew jiw nejchaxoelaxael japow pamalliajwa: “Ampow pamal xabich pachaem” —chiyaxael a sew jiw, nejchaxoel wut japowliajwa.

⁸ Dios aton is wut, kus-elon pawis pejchena. Dioslax kut aton pejchena isliajwapon pawis.

⁹ Dios aton is wut, is-elon japon aton kajachawaesliajwa pawis. ¡E! Dios is pawis, japow kajachawaesliajwa japon aton.

¹⁰ Samata, atow matlua'saxael panuelbu', naexasiti Jesús pejwuaan natamejabat wut. Do ja-aech wut, Dios pej-ángeles nejchaxoelaxael japowliajwa: “Diachwuaajnakolax ampow pawis pamal chiekal sitaen” —chiyaxael Dios pej-ángeles japowliajwa.

¹¹ Xatis, naexasichpis Jesús pejwuaan, chiekal matabijas. Watho' chiekal jil wut, xatis poejiw, machiyaxil. Watho' bej machiyaxil, poejiw chiekal jil wut.

¹² Dios is wut atow, aton chenakuton atow isliajwapon. Do jawux, poejiw nalaela watho'xot. Dios pijaxtat japox ja-aech.

¹³ Xamal najut nejchaxoelam wut, ¡chiekal nejchaxoelde ampoxliajwa! Jesús pejwuaan naexasitampim natamejam wut natamejabat, ¿pachaemkat pawis matlua's-elaxtat Dios kawuaajnalialjwa? ¡E! Japox chiekal pachaema-el.

¹⁴ Wajut chiekal matabijas. Poejiw matlatapai wut kasnikaliajwa, japox xabich padalapox.

¹⁵ Watho'lax matlakasnik wut, japox pachaem japi watho'liajwa. Pe Dios jasox chajia tapaei watho' matlakasnikaliajwa, japow pejmatlatat, me-ama matnaematakach wut, jachiliajwaspow.

¹⁶ Kaen aton naexasis-el wut xan jum-ampox, japon matabijsaxael xanal kaenejchaxoelaxanpox, a sew jiw swapich, naexasiti Jesús pejwuaan, matlakasnikpoxliajwa.

Santa Cena xael wut, a sew jiw xabich xaelpox

¹⁷ Xan lelx wut, lela-enil xamal jumchiliajwan ampox: “Santa Cena xaelam wut, chiekal isam” —chiliajwan. ¡E! Xamal natamejam wut Santa Cena xaeliajwam, chiekal is-emil.

¹⁸ Xamal natamejam wut Santa Cena xaeliajwam, chiekal kaenejchaxoelaxa-emil. Asbuan jumch xamal nasalam, Santa Cena xaeliajwam wut. Japoxliajwa a sew jiw xan nachapaei xamal ja-ampoxan. Jawut xan nejchaxoelx: “Japox diachwuaajnakolax bej ja-aechbej” —an xan, tajut nejchaxoelx wut.

¹⁹ Xamalxot a sew nakaewa najum-aech: “Xatis kaes pejme naexasich Jesús pejwuaan. Me-ama a sew xatisxot, jachi-esal. Samata, wajlel chalaxaes” —aechi nakaewaliajwa.

²⁰ Samata, natamejam wut nejchaxoelaliajwam wajpaklon Jesucristoliajwa, japox Santa Cena Jesucristoliajwa-el.

²¹ Santa Cena xaelam wut, xamal najut matxoela xaelam xapatampoxam, naxaeyaxan. Xamal a sew jiw xasala-emil. A sew jiw xamalxot xabich af wut, saxtas. A sew jiw lax, kijilpi, nejmupijjwa-elpi, japi kaechkow. Litaxaelapi.

²² ¡Xamal jasox nabej ja-aech! Asamatkoi, Santa Cena xaeliajwam wut, fulaeliajwam wut, xamal xabich litaxaelam wutbej, ¡nejbachantat majt cha-aex xaem! ¡Fembej! ¿Ma-aech xotkat sitae-emil a sew jiw, naexasiti Jesús pejwuaan, pat wut Santa Cena xaeliajwa? A sew xamalxot, kijilpi, japi xamal xabich datam. Xamal japoxan isam wut, pachaema-el japijiajwa. Samata, xan nejchachaemla-enil xamalliajwa, japox wultaenx wut.

*Jiw Santa Cena xael nejchaxoelaliajwa Jesús tuxpox
(Mt 26.26-29; Mr 14.22-25; Lc 22.14-20)*

²³ Xamal chajia chiekal chanaekabuanax Santo Cenaliajwa, xan matabijtaxpoxan Cristoxot. Wajpaklon Jesús, pejnachala swapich, madoi xael wut Santa Cena, jawut panax fiton. Japamadoi, kaen pejnachalan wasaxaeson padaelmajiwxot.

²⁴ Do jawut, Jesús panax fit wut, pax Dios kawuaan wut, gracias-aechon. Jawut panax jalkafulon. Jawut jum-aechon pejnachalaliajwa: “Ampox panax, tajwit wut, ja-aech. Asamatkoi, xamal xaelam wut Santa Cena, kaenanula nejchaxoelaliajwam xan isxpoxliajwa” —aech Jesús pejnachalaliajwa, bu'xael wut Santa Cena.

²⁵ Do jawux, xaeyax kaechatoel wut, Jesús vinomint chafit wut, jum-aechon: “Ampot vinomint, me-ama tajjal wut, ja-aech. Diachwuaajnakolax Dios chajia jumdut bu'weliajwa tajjal pijaxtat makanotxpi. Samata, Santa Cena xaelam wut, xamal nejchaxoelaxaelam xan tuxpox xamalliajwa” —aech Jesús pejnachalaliajwa.

²⁶ Samata, xamal Santa Cena xaelam wut, jawut asew jiw japox taen wut, nejchaxoelaxael wajpaklon tuppox. Xamal japox isfulaxaelam, hasta wajpaklon Jesús pejme pask wut.

Jiw chiekal nejchaxoelaxaelpox Santa Cena xael wut, chiekal nejchaxoelaliajwa wajpaklon tuppoxliajwa

²⁷ Jiw natamejal wut Santa Cena xaeliajwa, jawut chiekal nejchaxoelaxaelpi wajpaklon tuppoxliajwa. Japox chiekal nejchaxoela-el wuti, babijax isaxael, sitae-el xoti wajpaklon tuppox japijiajwa.

²⁸ Samata, pan xaeliajwa wut, vino feliajwa wutbej, jawut kaenanula jiw chiekal nejchaxoelaxael. Jawutbej, jiw pejbu'wuaajan wut Diosliajwa, japoxliajwa Dios kawuajnaxaeli Dios beltaeliajwas. Do ja-aech wut, pachaem japi xaeliajwa pan, feliajwabejpi vino.

²⁹ Pe masoxtat asbuan jumch jiw pan xael wut, af wutbejpi vino, majt chiekal nejchaxoela-el wut wajpaklon tuppoxliajwa cruztat jiwliajwa, japi jiw pejbu'wuaajnaxael Diosliajwa. Kastikaxaesbejpi Dios.

³⁰ Samata, jasoxtat xamalxot xabich jiw bu'xaenk. Asew chiekal mamnika-elbej. Asew tpebej, sitae-el xoti Santa Cena.

³¹ Xatis kaenanula wajut chiekal nejchaxoelaxaes wut babijax isaspoxanliajwa, japoxan kofas wutbej, jatis wut, wajpaklon nakkastikaxil.

³² Xatis babijaxan isaspoxan kofa-esal wut, jatis wut, wajpaklon nakkastikaxael xatis babijaxan kofaliajwas. Jasoxtat Dios nakbu'weyaxael nakpelsasamatas, Jesús pejwuaajan naexasis-eli suapich.

³³ Takoew, xamal natamejlam wut Santa Cena xaeliajwam, asew jiw pas-el wutfuk, jwujnawe'e! Puexa jiw pat wut, do ja-aech wut, jnaxaem kaeyaxtat!

³⁴ Natamejlam wuaaja, asew xamalxot xabich litaxaela wut, japi pejbachantat majt naxaeyaxael. Japi jachiyaxael, asew jiw kaechkowsamata natamejlamxot, Dios kastikasamatas japi jiw. Xamal kaes asaxanliajwa majt nawuajnachaemtam. Jelow japox tajut chiekal chanaekabuanalax, paslax wut xamalxot.

12

Espíritu Santo kajachawaesfulaspox Jesús pejwuaajan naexasiti Dios tato'alpox isfulaliajwa

¹ Takoew, lelaxaelen xamal chiekal matabijaliajwam. Kaenanula naexasiti Jesús pejwuaajan, japi jiw Espiritu Santo kajachawaesfulas Dios tato'alpoxan isfulaliajwa.

² Xamal chiekal matabijam. Majt naexasis-emil wutfuk Jesús pejwuaajan, Satanás xamal naekichachajbaful. Samata, ídolos, naksiya-elpoxan, xamal kawuajnam.

³ Samata, xan nejxasinkax xamal chiekal matabijaliajwam. Aton jum-aech wut babej-jamechan Jesúslija, japon pejmatpuatxot jil Espiritu Santo. Asan aton jum-aech wutlax: "Jesús tajpaklon" —aech wut, japon pejmatpuatxot Espiritu Santo duk.

⁴ Jesús pejwuaajan naexasiti kaenanula nabist asabichaxan, Dios pejbichaxan. Espiritu Santobej kajachawaesfulas japi jiw Dios tato'alpoxan isfulaliajwa.

⁵ Japi jiwbej kaenanula chiekal nabist Diosliajwa. Japi pejbichaxan kaenanula najupa-el. Pe japi jiw nabist kaen wajpaklon Diosliajwa.

⁶ Japi jiw kaenanula asabichaxan nabist, Dios pejbichaxan. Samata, Dios puexa japi jiw kaenanula kajachawaesful chiekal isfulaliajwa japon pejbichaxan.

⁷ Jesús pejwuaajan naexasiti, japi jiw kajachawaesfulas Espiritu Santo chiekal isfulaliajwa Dios pejbichaxan, puexa asew, naexasiti Jesús pejwuaajan, wepachaemaliajwas japoxan.

⁸ Asew Jesús pejwuaajan naexasitixot kajachawaesfulas Espiritu Santo. Samata, japi naewuajan wut, asew jiw chiekal naewechpi. Do ja-aech wut, japi jiwbej chiekal duilafal. Asew jiw, naexasitpixot Jesús pejwuaajan, Espiritu Santo kajachawaesfulas xot, japi jiw xajup chiekal chanaekabuanaliajwa asew jiw chiekal matabijaliajwa japajamechan.

⁹ Asew Jesús pejwuaajan naexasitixot, Espiritu Santo kajachawaesfulas xot, japi jiw chiekal xanaboejapi Dios. Asew naexasitpixot Jesús pejwuaajan, Espiritu Santo kajachawaesfulas xot, japi jiw xajup, jiw bu'xaenk wut boejthasliajwa.

¹⁰ Asew naexasitpixot Jesús pejwuaajan, Espiritu Santo kajachawaesfulas xot, japi jiw xajup koexaxan isliajwa. Asew naexasitpixot Jesús pejwuaajan, Espiritu Santo kajachawaesfulas xot, japi jiw xajup jiw naewuajnalijwa Dios buxto'aspoxan. Asew naexasitpixot Jesús pejwuaajan, Espiritu Santo kajachawaesfulas xot, japi jiw xajupaxael matabijaliajwa, asew jiw jum-aech wut Espiritu Santo buxto'aspoxan, o, dep buxto'aspoxanbej. Asew naexasitixot Jesús pejwuaajan, japi jiw Espiritu Santo kajachawaesfulas xot, xajupaxael naksiyalijwa asajame, japi majt matabijaeljame naksiyalijwa. Asew naexasitixot Jesús pejwuaajan, japi jiw Espiritu Santo kajachawaesfulas xot, xajupaxael jumatabijaliajwa, asew jiw naksiya wut asajame.

Do jawux, japi jiw xajwaxaelbej a sew jiw chiekal chanaekabuanaliajwa japajame jum-aechproxan.

¹¹ Puexa japi jiw, Jesús pejwujajan naexasitixot, japoxan ja-aech, Espíritu Santo japi kajachawaesfulas xot. Espíritu Santo kaenanula jiw kajachawaet, me-ama japon nejxasink jiw kajachawaesliajwa.

Kaebu'tpox Cristo suapich naexasiti Jesús pejwujajan

¹² Aton pejbu'txot xabich pathi, pawibej. Kaes a sewbej. Pe nakiowa, kaebu't. Jatisbej xatis, Jesús pejjiws. Xabichas. Pe nakiowa, kaebu'tas, Cristo suapich.

¹³ Puexa xatis nakbautisa kaemutaliajwas. Dios to'a kaen Espíritu Santo wajmatpuatanxotaliajwa. Xanal judiospin, xamal judios-emilpimbej, xanal esclavos-enilpin, xamal esclavospimbej, puexa xatis wajmatpuatanxot kaen Espíritu Santo.

¹⁴ Kaenanula wajbu'antat, xabich pathi, pawibej.

¹⁵ Aton pejtuak naksiyaxael wut, jumchiyaxilpox: "Xan ke-e-enil. Samata, xan ampabu'tpijaxa-enil" –chiyaxil tuakliajwa. Tuak japox jumchiyaxael wut, japox pachaemaxil, japabu'tpijax xot.

¹⁶ Aton pejnaecho'tbej naksiyaxael wut, jumchiyaxilbej: "Xan itfuta-enil. Samata, xan ampabu'tpijaxa-enil" –chiyaxilbej naecho't. Naecho't japox jumchiyaxael wut, japox pachaemaxil, japabu'tpijax xot.

¹⁷ Japon pejbu't puexa itfukal wut, jumtaeyaxilon. Puexa pejbu'txot naecho'ankal wutbej, japon aton jaenxataeyaxil.

¹⁸ Samata, Dios aton is wut, nejmach puexa ispon, pathiliajwa, pawiliajwabej, kaes asaxanliajwabej pachaemaliajwa.

¹⁹ Aton pobu'ta itfukal chanlaelt wut, o, naecho'ankal chanlaelt wutbejpon, ja-aech wut, japon aton pejbu't ajlaxael.

²⁰ Diachwujnakolax aton pejbu'tat xabich pathi, pawibej, kaes asaxanbej. Pe nakiowa, japon aton kaebu't.

²¹ Aton pej-itfut naksiyaxael wut, jumchiyaxil ke-elija: "Ke-e, xam nawewe'pa-el" –chiyaxil ifut ke-elija. Aton pejmatnaetbej naksiyaxael wut, jumchiyaxil tuakliajwa: "Tuak, xam nawewe'pa-el" –chiyaxil matnaet tuakliajwa.

²² Puexa xatis wajbu'antatpi xabich pachaem. Nejchaxoels wut wajbu'antatpiliajwa, me-ama nakwewe'pa-el wut, jatis japoxanliajwa. Pe japoxan diachwujnakolax ajil wut wajbu'axot, xabich nakwewe'paxael japoxan.

²³ Xatis chiekal naxoeis wajdalapoxanxot, nejchaxoels xot: "Pachaema-el, a sew jiw nabu'taeliajwa" –tis xot, nejchaxoels wut.

²⁴ Pe wajmuax, wajthitbej, wajmatnaetbej, pachaem a sew jiw nakwetaeliajwa. Samata, jaxot naxoe-esal. Dios is wut wajbu'an, wajbu'axot asaxan, me-ama xatis nakwewe'pa-el wut, ja-aech japoxan. Jaxot chiekal naxoeis wut, jatis wut, japoxan, me-ama xatisxot nakwewe'p wut, jachiyaxael.

²⁵ Wajthit, wajwibej, kaes asaxanbej, wajbu'antat nasalaxil. Japon xan kaenanula wajbu'antat chiekal nakaewa natataeflafal.

²⁶ Nakwexaenk wut wajbu'axot, pobu'ta chiekal pachaema-esal. Do jawux, xaenkpox boejkijil wut, ja-aech wut, chiekal pejme nejchachaemlas.

²⁷ Kaenanula xamal, puexa Cristo pejbu'tam wut, ja-am.

²⁸ Samata, xamal kaenanula Dios chaxduw asabichaxan. Dios matxoela makanot a sew jiw, japi Jesús pej-apóstolesliajwa. Do jawux, makanoton a sew jiw profetasliajwa, japi a sew jiw naewuajnalija, me-ama Dios buxto'as. Makanotbejpon a sew jiw chanaekabuanapiliajwa japon pejjamechan. To'abejpon a sew jiw koexaxan isliajwa. To'abejpon a sew jiw, bu'xaenkpi boeithusliajwa. To'abejpon a sew jiw, japi kajachawaesliajwa a sew jiw. To'abejpon a sew jiw, japi paklochowliajwa Jesús pejwujajan naexasitiliajwa. To'abejpon a sew jiw chalechkal asajamechan naksiyalija, japi majt naksiyaljamechan.

²⁹ Puexa jiw apóstoles-el. Puexa jiw profetas-elbej. Puexa jiw chanaekabuana-piya-elbej. Puexa jiw koexaxan ispiya-elbej.

³⁰ Puexa jiw boeithupiya-elbej bu'xaenkpi. Puexa jiw chalechkal asajame naksiyalpibej, majt naksiyaljame. Puexa jiw jummatibija-elbej, a sew jiw asajamechan naksiya wut chiekal chanaekabuanaliajwa a sew jiw.

³¹ Pachaem, xamal nejchaxoelam wut: "Xan nejxasinkax Dios nachaxdusliajwa pijax bichax, kaes chiekal pachaempox" –am wut.

Nejxasinkaxaepox a sew jiw

Amwut xamal naewuajnaexaelen kaes chiekal pachaempox. Japon nakaewa nanejxasinkaspox.

13

¹ Xan naksiyaxaelen wut asajametat, ángeles pejjametatbej, pe asew jiw, xan nanaeweti, nejxasinka-enil wut, asajametat naksiyaxaelenpox pachaemaxil xanliajwa. Me-ama platillo, o, campana nejmetpox, jiw daka wut, jachiyaxael xan naksiyaxpox japi jiwliajwa.

² Asew jiw nejxasinka-enil wut, xan Dios nabuxto'apox jiw naewuajnaxaelen wut, japox pachaemaxil xanliajwa. Matabijsaxaelen wutbej maliach Dios matabijtpoxan, japoxbej pachaemaxil xanliajwa, nejxasinka-enil wut asew jiw. Xabich nejmach matabijsaxaelen wutbej, japox pachaemaxil xanliajwa, nejxasinka-enil wut asew jiw. Xan xabich Dios xanaboejsaxaelen wutbej, Dios kawuajnaxaelen wut pinamuax nawexaliaxsliajwa asalel, japamuax nawexaliast wut, japoxbej pachaemaxil xanliajwa, nejxasinka-enil wut asew jiw.

³ Xan puexa tejew chaxduiyaxaelen wutbej kijila, xan tajut natapaeyaxaelen wutbej asew jiw naboesaliajwa, japoxanbej pachaemaxil xanliajwa, asew jiw nejxasinka-enil wut.

⁴ Aton, nejxasinkpon asew jiw, japon aton matabijt palala-elaliajwa, asew jiw babijaxan isful wut japonliajwa. Japonbej matabijt kajachawaesliajwa asew jiw. Japonbej nusasiowla-el, taen wuton asew jiw pejew. Japon aton pajutliajwa nejchaxoel wutbej, nejchaxoela-elon: "Xan kaes pejme xabich pachaeman. Me-ama asew jiw, jachi-enil" — chi-elon, nejchaxoel wut pajutliajwa.

⁵ Aton, nejxasinkpon asew jiw, japon aton chiekal pachaembej asew jiwliajwa. Japon nejchaxoel wutbej, nejchaxoela-el faekaliajwa wepachaemspoxan japon pajutliajwakal. Japon aton kamta palala-elbej. Beltaenbejpon asew jiw, japi babijaxan is wut japonliajwa.

⁶ Aton, nejxasinkpon asew jiw, japon aton nejchachaemla-el, asew jiw babijaxan is wut. Asew jiw is wutlax pachaempoxan, ja-aech wut, japon aton xabich nejchachaemil japoxanliajwa.

⁷ Aton, nejxasinkpon asew jiw, japon aton nabijat wut, japi jiw babijaxan is wut japonliajwa, japon aton nakiowa nejxasinkaful japi jiw. Palala-elbejpon, japi jiwliajwa babijaxan isful wut japonliajwa. Japon nejchaxoelbej japi jiwliajwa: "Japi jiw asamatkoi bej pachaemaxaelbeji" — aechon, nejchaxoel wut japi jiwliajwa.

⁸ Nejxasiyax asew jiwliajwa, japox asamatkoi toepaxil. Asamatkoi profetas buxkofaxael jiw naewuajanpoxan, Dios buxto'aspoxan. Asew jiw chalechkal asajame naksiya wut, matabija-eljame naksiyaliajwa, japipej japox buxkofaxael. Jawutbej jiw pejmatabijsaxan toepaxaelbej.

⁹ Wajmatabijsaxan xabicha-el. Chiekal puexa matabija-esal. Profetasbej Dios buxto'aspoxan jiw naewuajnaliajwa, japoxbej xabicha-el.

¹⁰ Majt puexa chiekal matabija-esalpojan, puexa xatis Diosxotas wut, jawut japoxan chiekal matabijaxaes.

¹¹ Xan yamxuchan wut, naksiyax, me-ama yamxi naksiya. Nejchaxoelx wutbej, nejchaxoelx, me-ama yamxi nejchaxoel. Matabijtax wutbej, matabijtax, me-ama yamxi matabija. Pelis xan pati'nan wut, nejchaxoela-enil, me-ama yamxi nejchaxoel.

¹² Xatis matabijaspojan Diosliajwa xabicha-el. Me-ama chapot, itnasuxanpot, chiekal itathu'la-el taeliajwas, ja-aechbej xatis matabijaspojan Diosliajwa. Pe asamatkoi, puexa chiekal matabijaxaes Dios. Me-ama Dios xatis chiekal nakmatabijt, jachiyaxaes, xatis chiekal matabijas wut Dios.

¹³ Dios xanaboejaspox toepaxil. Dios nakjumdutpox wuajnawesfulaspoxbej, japox toepaxil. Nakaewa nejxasinkaspoxbej toepaxil. Japoxan tresxot, kaes pejme pachaempox, japox nakaewa nanejxasinkaspox.

14

Espíritu Santo kajachawaetpox jiw naksiyaliajwa majt matabija-eljame

¹ ¡Xamal kaenejchaxoelde nejxasinkaliajwam asew jiw! Asew jiw nejxasinkam wut, ¡Dios kawuajande Espiritu Santo xamal kajachawaesliajwa Dios pejbichaxan isliajwam! ¡Kaes Dios kawuajandebej Espiritu Santo xamal kajachawaesliajwa, me-ama Dios buxto'a xamal jiw naewuajnaliajwam!

² Asew jiw Espiritu Santo kajachawaech chalechkal naksiyaliajwa, majt matabija-eljame. Japi naksiya japajame Dioskal jumtaeliajwas. Naksiya-eli jiw jumtaeliajwas. Kaen aton jummatabijs-el, japi naksiya wut.

³ Asewlax Espiritu Santo kajachawaech wut, matabijapi jiw chiekal naewuajnaliajwa Dios buxto'aspoxan. Ja-aech wut, naexasiti Jesús pejuwajan kaes Dios xanaboejaxaeli. Samata, japi jiw xabich nejchachaemlaxael.

⁴ Asewbej Espiritu Santo kajachawaech wut, chalechkal naksiyapi majt matabija-eljame, japi kaes Dios xanaboejaxael. Asewlax, Espiritu Santo kajachawaech xot, japi jiw

naewuajan Dios buxto'aspoخان Jesús pejuwajan naexasiti, japi jiw kaes xanaboejalijawa Dios.

⁵ Xan nejxasinkax puexa xamal chalechkal naksiyalijawam majt matabija-emiljame. Pe xan kaes nejxasinkax xamal Espiritu Santo kajachawaeslijawa, asew jiw naewuajnalijawam xamal Dios buxto'apoxan. Japoxan kaes pejme pachaem. Me-ama chalechkal majt matabija-emiljamechan naksiyampoxan, jachi-el japoxan. Pachaem chalechkal xamal naksiyalijawam majt matabija-emiljamechan. Pe japajamechan naksiyam wut, jawut asan aton chanaekabuanaxael xamal jum-ampoxan, naexasiti Jesús pejuwajan chiekal jummatabijalijawa. Ja-aech wut, japi kaes Dios xanaboejaxael.

⁶ Takoew, xamalxot patx wut, chalechkal naksiyaxaelen wut majt matabijs-eniljame, diachwuajnokolax xamal jummatabijaximil japajame. Ja-aech wut, japox pachaemaxil xamallijawa. Pelax xamalxot naewuajnax wut wajjаметat Dios nachanaekabuanapoxan, ja-an wut, xamal chiekal najummatabijaxaelam. Ja-aech wutbej, xamal kaes chiekal Dios xanaboejaxaelam.

⁷ Asew jiw Espiritu Santo kajachawaech xot, chalechkal naksiya majt matabija-eljamechan. Ja-aech wut, kaen japixot jummatabijsaxil japajamechan jum-aechpoxan. Jachiyaxaelbej, kaen aton arpa chiekal daka-el wut. Jiw thiamatabijaxil jajuulijawa japajajuit. Jachiyaxaelbej, kaen aton toela chiekal nababe-el wut. Jiw thiamatabijaxil jajuulijawa.

⁸ Jachiyaxaelbej, kaen soldawan chiekal nababe-el wut trompeta natamejlalijawa soldaw, japon pejmatpijwabelijawa, padaelmajiw suapich. Soldaw thiamatabijaxil. Ja-aech wut, thiatadukpaxili natamejlalijawa nabelijawa, padaelmajiw suapich.

⁹ Xamal jachiyaxaelam, Espiritu Santo kajachawaet wut chalechkal naksiyalijawam majt matabija-emiljamechan. Xamal naeweti jummatabijaxil, xamal naksiyam wut japajamechan. Asbuan jumch japox nafa'axael.

¹⁰ Xabich asajamechan maenk ampathatat. Pe nakiowa, kaejame naksiyapi nospaei wut, chiekal najummatabijalijawa.

¹¹ Asew jiw asajametat naksiya wut, xan jummatabijsaxiniljame, ja-aech wut, xan nejchaxoelaxaelen japi jiwliajwa: "Ampi jiw bej asatwajnapijiwbej" —chiyaxaelen, nejchaxoelx wut japilijawa. Xanbej naksiyax wut asajametat, japibej xan najummatabijaxil. Asbuan jumch nejchaxoelaxaeli xanliajwa: "Pablo, asatwajnapijinbej" —chiyaxaeli, nejchaxoel wut.

¹² Xamal nejxasinkam Espiritu Santo kajachawaetpox kajachawaeslijawam asew, naexasiti Jesús pejuwajan. Samata, japi naewuajande chiekal jummatabijalijawa, japi kaes chiekal Dios xanaboejalijawa!

¹³ Kaen aton chalechkal matabijs-eljame naksiya wut, Espiritu Santo kajachawaech xot, japon aton Dios nej kawuajne' kajachawaeslijawam naksiyapox pajut chiekal jummatabijslijawa japajamechan jum-aechpoxan! Do jawut, japon aton chiekal chanaekabuanaxael asew jiw japajamechan jum-aechpoxan.

¹⁴ Xan Dios kawuajnax wut matabijs-eniljemetat, xan japajame naksiyax wut, naksiyax Espiritu Santo nakajachawaesaxtat. Pe xan jummatabijs-eniljemetat Dios kawuajnax wut, xan tajut jummatabijsaxinilbej.

¹⁵ Ja-an wut, ¿machiyaxaelenkat xan? Xan tamachan wut, matabijs-eniljemetat Dios kawuajnaxaelen Espiritu Santo pijaxtat. Pe xan asew jiwxotx wut, Dios kawuajnaxaelen tajjemetat puexa jiw chiekal jummatabijalijawa. Jachiyaxaelenbej, xan jajuixaxaelen wut. Tamachan wut, jajuixajuixaxaelen matabijs-eniljemetat. Pelax asew jiwxotx wut, jajuixaxaelen tajjemetat puexa jiw chiekal najummatabijalijawa.

¹⁶ Xamal Espiritu Santo kajachawaet wut, matabija-emiljemetat Dios gracias-am wut, ja-am wut, asan aton, jelnaexasitpon Jesús pejuwajan, japon xamal jumtaen wut, jummatabijsaxilon japox. Samata, japon kaenejchaxoelaxil, xamal suapich, Dios kawuajnam wut.

¹⁷ Xamal matabija-emiljemetat Dios kawuajnam wut, gracias-am wut, japox chiekal pachaem Dioslijawa. Pe asew jiw japajame jummatabija-el wut, ja-aech wut, japi jiw kaes chiekal Dios xanaboejaxili, jummatabija-el xoti, Dios kawuajnam wut.

¹⁸ Xan gracias-an Dioslijawa, kaes xabich naksiyax xot matabijs-eniljamechan. Me-ama puexa xamal, xan jachi-enil.

¹⁹ Pe naexasiti Jesús pejuwajan Dios pejjamechan jumtaelijawa natameja wut, kaes pejme pachaemaxael naewuajnalijawan kaesuapich tajjemetat, naeweti chiekal xan najummatabijalijawa. Pelax pachaemaxil jiwliajwa, piach naewuajnaxaelen wut jummatabija-eljemetat.

²⁰ Takoew, ¡xamal nabej nejchaxoele', me-ama yamxi nejchaxoel! ¡Pelax xamal babijax-anlijawa, me-ama yamxim wut, ja-amde! Xamal pakdiachwam xot, ¡chiekal nejchaxoelde!

²¹ Dios pejjamechan, chajja lelsprox, jum-aech Dios jum-aechprox: “Xan asamatkoi to'axaelen asajame naksiyapi, asatuajnuchanpijiw, japi jiw xamal naewuajnalijwa. Pe xamal naexaxisaximil tajjamechan, japi jiw xamal naewuajan wut” —aechox.

²² Aton chalechkal naksiya wut asajame, matabijs-eljame naksiyalijwa, Jesús pejwuajan naexaxis-eli japox taen wut, pajut matabijalijwapi Dios xajupprox japibej kajachawaesli-ajwas. Samata, japi jiw bej naexaxisaxaelbejpi Jesús pejwuajan. Pelax kajachawaechpi Espiritu Santo, japi jiw naksiyalijwa Dios buxto'asproxan jiw naewuajnalijwapi, japox Jesús pejwuajan naexasitikal jumtaelilijwa.

²³ Xamal natamejlamxot kaewutje puexa xamal chalechkal naksiyam wut asajamechan, matabija-emiljamechan, jawut, asan aton pat wut, Jesús pejwuajan naexaxis-elpon, japon aton nejchaxoelaxael xamallilijwa: “Ampi jiw na-acha” —chiyaxaelon, nejchaxoel wut xamallilijwa.

²⁴ Xamal natamejlamxot Espiritu Santo kajachawaet wut jumchililijwam Dios buxto'apoxan jiw naewuajnalijwam, jawut, asan aton xamalxot pat wut naexaxis-elpon Jesús pejwuajan, xamal jumtaen wut, japon aton pajut matabijsaxael pejbu'wuajanpox Dioslilijwa, babijaxan is xoton. Xabich nejchaxoelaxaelbejpon babijaxan isproxanlilijwa.

²⁵ Nejchaxoelaxaelbejpon: “Xan puexa nejchaxoelxproxan Dios matabijit” —chiyaxaelon, nejchaxoel wut. Do jawut, Dios kawuajan wut, brixtat nukaxaelon Dios sitaelilijwa. Jawut japon aton jumchiyaxael xamallilijwa: “Diachwuajnakolax Dios xamalxot” —chiyaxaelon.

Culto chiekal isaxaelprox Jesús pejwuajan naexasiti

²⁶ Takoew, natamejlam wut Dios pejjamechan naeweslilijwam, asew jiw xamalxot jajuiyaxael Dioslilijwa. Asew naewuajnaaxael jiw. Asew jumchiyaxael Dios buxto'asproxan jiw naewuajnalilijwa, Espiritu Santo kajachawaech wut. Asew chalechkal naksiyaxael matabija-eljamechan, Espiritu Santo kajachawaech wut. Japi jum-aechproxan, asew jiw chiekal chanaekabuanaaxael jiw chiekal jummatatabijalilijwa japox, Espiritu Santo kajachawaech wut. Jasox jachiyaxaelam puexa Jesús pejwuajan naexasiti kaes pejme chiekal xanaboelilijwapi Dios.

²⁷ Asew jiw xamalxot chalechkal naksiya wut matabija-eljamechan, Espiritu Santo kajachawaech wut, ja-aech wut, Dios tapaeis japi kolenje, o, tres atonbej, naksiyalilijwa japi matabija-eljamechan. Japi naksiya wut, kaenanula naksiyaxael. Japi jiw Dios tapae-esal kaewutje kamta naksiyalilijwa. Japi kaenanula naksiyapoxan buxtoet wut, do jawut, asan xamalxot chanaekabuanaaxael puexa jaxot naeweti japajamechan chiekal jummatatabijalilijwa.

²⁸ Asew jiw xamalxot naksiyasia wut matabijs-eljame, jaxot aton ajil wut japon chiekal chanaekabuanaalilijwa puexa jiw jummatatabijalilijwa, ja-aech wut, kaes pacham, japi jiw naksiya-elalilijwa matabijs-eljame. Ja-aech wut, japi kaenanula boejlach Dios kawuajnaaxael.

²⁹ Asew jiw xamalxot jum-aech wut Dios buxto'asproxan, japoxan japi jiw naewuajnalilijwa, Dios tapaeis japi kolenje, o, tres aton wut, jumchililijwa. Japi kaenanula jum-aech wut, asew chiekal naewesaxespi japi naksiyapoxan jummatatabijalilijwa, diachwuajnakolax Dios buxto'asprox jum-aech wut. Ja-el wut, japi pajut asbuan jumch jum-aechlappoxkal.

³⁰ Jaxot kaen aton ek wut, jawut chalechkal japon Dios buxto'as wut jumchililijwa, ja-aech wut, matxoelanaksiyapon, boejlach nukaxaelfuk asan aton Dios buxto'asprox jumchililijwa.

³¹ Ja-am wut, jxamal kaenanula jiw naewuajande Dios buxto'apoxan, puexa jiw chiekal jummatatabijalilijwa! Ja-am wut, puexa naexasiti Jesús pejwuajan, japi nejchachaemlaxaelbej, jummatatabija wuti japoxan.

³² Xamalxot kaen aton jumchisia wut Dios buxto'asprox, japon jumchiyaxilfuk japox. Asew jiw naksiyax buxtoet wut, do jawut, japon jumchiyaxael Dios buxto'asprox.

³³ Dios nejxasinka-el kamta kaewutje puexa jiw jumchililijwa, natameja wut.

Samata, xamalbej natamejlam wut, me-ama asew jiw, naexasiti Jesús pejwuajan, kaewutje jumchi-el naksiyaxaelpox, jxamalbej ja-amde!

³⁴ Xamal natamejlam wut culto isliajwam, watho' boejlach chalaxael naeweslilijwa naewuajanpoxan. Tapae-esal watho' naksiyalilijwa. Watho' kaenanula chiekal naexasisaxael pamal, Dios japox to'a xot.

³⁵ Watho' kaes matabijasia wut cultotat naewetpoxanlilijwa, jawut kamta watho' wuajnaemsaaxilfuki pamal matabijasiapox. Pejbachanxot pat wut, japi watho' wuajnaemsaaxael pamal. Puexa watho' jachiyaxael jumxan-elasamata cultotat.

³⁶ Xamal matxoela tuadui-emil Dios pejjamechan asew jiw naewuajnalilijwa. Xamalbej Dios pejjamechan naexasitam wut, xamal koewam Dios pejjamechan naexasitampiya-emil. Samata, jxamal najutlilijwa nejchaxoelde isaxaelampoxan Dioslilijwa!

³⁷ Asan aton xamalxot jum-aech wut: “Xanlap Dios pejprofetan, Dios nabuxto'aponan jiw naewuajnalajwan” —aech wuton, japon aton pajut chiekal matabijsaxael, xan lelxpox Dios nakito'a lelalajwan japox. Asan atonbej jum-aech wut: “Espiritu Santo nakajachawaet asew jiw kajachawaesliajwan” —aech wuton, japonbej pajut chiekal matabijsaxael, xan lelxpox Dios nakito'a lelalajwan.

³⁸ Japon aton nejxasinka-el wut naexasisliajwa xan lelxpox, Dios nakito'apox, xamal japon aton nabej naexasis, japon aton naewuajan wut!

³⁹ Takoew, nejxasinkde asew jiw naewuajnafulalajwam xamal Dios buxto'apoxan! jNabej buxfiasbej, asew jiw Espiritu Santo kajachawaech wut, chalechkal matabijs-eljame naksiya wut!

⁴⁰ Natamejlam wut culto isliajwam, jchiekal culto isde!

15

Jesucristo tup wut, tres matkoi wut, Dios mat-echpox pejme dukaliajwa

¹ Takoew, xan majt xamal naewuajnax Jesús pejwuajan Dios bu'weliajwa xamal. Samata, xamal japawuajan naexasitam xot, chiekal duilam. Xan nejxasinkax japox nejchaxoelalajwam.

² Japawuajan chiekal naexasisfulaxaelam wut, Dios xamal bu'weyaxael babijaxan isampoxanliajwa. Naexasis-emil wut, Dios xamal bu'weyaxil.

³ Xamal naewuajnax, majt xan nanaewuajanwuajan, Jesús pejwuajan. Japawuajan kaes pejme pachaem. Me-ama asawuajan, jachi-el. Cristo tup cruztat babijaxan isaspojan nakwemosliajwapon, me-ama Dios pejjamechan, chajia lelspxox, jum-aech japox jachiliajwa.

⁴ Cristo tup wut, jawux muaxwuajtat ochpon. Do jawux, tres matkoi wut, Cristo mat-ech pejme dukaliajwa. Me-ama Dios pejjamechan chajia jum-aech, ja-aechlisox.

⁵ Do jawux, Cristo natulaelt Pedroxot. Jawux pejme natulaelton doce apóstolesxot.

⁶ Do jawux, kaes quinientos wajkoew natamejaxot natulaelton. Asew japixot tup, padiachow xotlisi. Xabich asew japixot laelpfuk.

⁷ Do jawux, pejme Cristo natulaelt Santiagoxot. Jawux puexa apóstolesxotbej pejme natulaelton.

⁸ Do baxael, taxdukaxtat xanxot natulaelton. Asew jiw matxoela taen japon. Do jawux, xabich pin-iamatkoiyen wut, xanbej taenx japon. Samata, xan, me-ama kaes pachaema-enil wut, ja-an, taxdukaxtat taenx xot Cristo.

⁹ Xan majt chakifolx jaelalajwan naexasiti Jesús pejwuajan jeliajwan jiw jebatat. Samata, amwutjel xan nejchaxoelx: “Puexa apóstolesxot xan kaes pejme pachaema-enil. Me-ama puexa asew apóstoles pachaem Jesúsliajwa, xan jachi-enil” —an, nejchaxoelx wut. Samata, xan kaes pachaema-el apóstollajwan.

¹⁰ Pe nakiowa, Dios nabeltaen xot, namakafit amwutjel xan apóstollajwan. Xan xabich kaes nabistax Diosliajwa. Me-ama puexa asew apóstoles nabist wut Diosliajwa, xan jachienil. Samata, Dios nafa'a-el xanxot. Xan tajut tajaxtat is-enil Dios pijax bichax. Dios nabeltaen xot, nakajachawaet japabichax isfulalajwan.

¹¹ Xan naewuajnax xamal Jesús pejwuajan. Asew apóstolesbej xamal naewuajan japawuajan. Kaes pejme pachaempox xanliajwa, xamal naexasisliajwam Jesús pejwuajan, naewuajnaxpox.

Asamatkoi Dios mat-eyaxaelpox tupi, pejme duilalajwa naexasiti Jesús pejwuajan

¹² Xamal naewuajnax wut, jum-an: “Cristo tup wut, tres matkoi wut, Dios mat-echpon pejme dukaliajwa” —an xanal. ¿Ma-aech xotkat asew jiw xamalxot jum-aech: “Dios mat-eyaxil jiw tupi pejme duilalajwa” —aechkati xamallajwa? Jasox japi jiw jumchiyaxil.

¹³ Diachwuajnakolax Dios mat-eyaxil wut tupi pejme duilalajwa, Cristobej mat-esaxisal pejme dukaliajwa, tup wuton.

¹⁴ Cristo mat-es-esal wut pejme dukaliajwa, xanal naewuajnaxpox, japox pachaemaxil jiwliajwa. Ja-aech wutbej, xamal Dios xanaboejampox bu'weliajwa pachaemaxil xamallajwa.

¹⁵ Cristo mat-es-esal wut pejme dukaliajwa, xanal jum-anpox Dios ispoxlajwa, japox diachwuajnakolaxil. Dios mat-eyaxil wut tupi pejme duilalajwa, Cristo tup wutbej, japon chiekal kaelel tupaxael. Mat-esaxisalbejpon pejme dukaliajwa.

¹⁶ Dios mat-eyaxil wut tupi pejme duilalajwa, ja-aech wut, Cristobej mat-esaxisal pejme dukaliajwa.

¹⁷ Ja-aech wut, xamal Dios xanaboejampox bu'weliajwa, japoxbej pachaemaxil xamallajwa. Ja-aech wut, Dios xamal kastikaxael, babijaxan isfulam xot.

¹⁸ Ja-aech wutbej, chajia tupi, Cristo pejwuajan naexasiti, japibej napelsaxael Diosliajwa.

¹⁹ Xatis ampalthatat laelpas wut, wuajnowesfulas Cristo nakchaxdusaxaelpox. Dios nakmat-eyaxil wut pejme duilalajwas, ja-aech wut, puexa jiw xatisliajwa nakwuljumchiyaxael: “Ampi jiw xabich nabijaslap, wuajnoweslap xoti jilpox” —chiyaxael jiw xatisliajwa. Samata, kaes pejme xatis nabijasaxaes. Me-ama puexa asew jiw nabijat wut, jachiyaxisal xatis.

²⁰ Pe diachwuajnakolax Cristo matxoela mat-ech pejme dukaliajwa.

²¹ Patupax tuadut, kaen Adán, matxoelapijin, babijax is wut puexa jiw tupaliajwa. Kaen Cristo tup wut cruztat, Dios mat-ech pejme dukaliajwa. Samatabej, asamatkoi jiw, tupi, japi jiw Dios mat-eyaxaes pejme duilalajwa.

²² Adán, wajwuajnapijin, tup xot, xatisbej, wuchakalpijwas, tupaxaes. Xatis, Jesús pejuwajan naexasichpis, Cristo pejiwus xot, Dios nakmat-eyaxael pejme duilalajwas. Me-ama Cristo mat-echpon pejme dukaliajwa, jachiyaxaelbej Dios xatisliajwa, asamatkoi nakmat-eyaxael wut pejme duilalajwas.

²³ Dios markpox, matkoi, pat wut, jawut jiw tupi, japi naexasiti Jesús pejuwajan, kaenana mat-eyaxaes. Dios matxoela mat-et Cristo pejme dukaliajwa. Pejme japon pask wut ampalthatasik, japamatkoi puexa jiw, naexasiti Jesús pejuwajan, mat-eyaxaesbej pejme duilalajwa.

²⁴⁻²⁵ Do jawut, Cristo chiekal toesaxael padaelmajiw. Kaen namanaxil, japi asew jiw tato'alpi. Do jawutbej, Cristo naliaxsaxael potuajnuha jiw tato'lalajwa. Do jawux, Cristo wiasaxael pax Diosxot jiw tato'alpox.

²⁶ Jawux japon toesaxael patupax. Ja-aech wut, jiw kaes tupaxil.

²⁷ Dios pejjamechan, chajia lelspx, jum-aech wut, jum-aechox: “Cristo asamatkoi tapaeyaxaes puexa jiw tato'lalajwa” —aechox. Pe nakiowa, Dios pejjamechan, chajia lelspx, jumchi-el: “Cristo puexa jiw tato'al wut, Diosbej tato'laxaelon” —chi-elox.

²⁸ Cristo puexa tato'al wut, japamatkoi japon pajut natapaeyaxael pax Dios tato'lalajwas. Samata, Dios puexa tato'laxael.

²⁹ Xan ampox lelaxaelen chiekal matabijalajwam. Asew jiw xamalxot pejiw wetups wut, bautisa-esalpi, japi, laelpi, kawuajan bautisaliawwas pejiw, tupiliajwa: “iXan nabautisam! Xan nabautisam wut, iBautisa-esalpon, tupon, japon Diosxotsepon, me-ama bautisas wut, jachiliajwapon jaxotse!” —aech pejiw tupiliajwa. Jiw tup wut, asamatkoi mat-eyaxisal wut pejme duilalajwa, zma-aech xotkat japi kawuajan bautisaliawwas pejiwliawwa, japi tupiliajwa?

³⁰ Ajil wut mat-eyax jiw pejme duilalajwa, zma-aech xotbejkat pomatkoicha xabich chachael wut xanallajwa, xanal nakiowa naewuajna Jesús pejuwajan? Ja-aech wut, japox xanallajwa pachaemaxil. Dios xanal namat-eyaxil wut pejme duilalajwan.

³¹ Takoew, diachwuajnakolax pomatkoicha xanliawwa chachael, asew jiw naboesasia xot. Xan nejchachaemlax, xamal naexasitam xot wajpaklon Jesucristo pejuwajan.

³² Xan xabich nabijatax Eféso paklowaxxot. Japapaklowaxpijwaxot, asew jiw xan nanejwesla. Japi jiw xabich chachael xanliawwa. Pejmachoef wut, ja-aechi xanliawwa. Xatis asamatkoi puexa chiekal tupaxaes. Mat-eyax ajil wut jiw pejme duilalajwa, ja-aech wut, zachaxkat xatis kanaxaes Diosliawwa isaspoxan? Mat-eyax ajilaxael wut jiw pejme duilalajwa, ja-aech wut, kaes pachaemaxael isliawwas asew jiw jum-aechpoxan. Japi asbuan jumch jum-aech: “iXabich xaeyaxaes! iXabich feyaxaesbej naksaxsliawwa! Jasox isfulas wut, inejchachaemlaxaes, mox pawuajna xot tupaliajwas!” —aech asew jiw.

³³ iJapi jiw, japox jum-aechpi, xamal nabej tapae' naekichachajbaliawwa! Xamal pachaemam wut, pe nejnachala, babejchow wut, ja-aech wut, xamalbej babejchowaxaelam.

³⁴ iXamalbej nabej nejliakle! iKaes babijaxan nabej isbej! Asew jiw xamalxot, japi jiw matabija-el Dios. Xan japox jum-an xamal nadalalajwa.

Machiyaxaespxo tupi, asamatkoi mat-eyaxaes wut pejme duilalajwa

³⁵ Kaen aton xamalxot wuajnaemsaxael wut, bej jumchiyaxaelbejpon: “zMachiyaxaelkat jiw, tupi, mat-eyaxaes wut pejme duilalajwa? Tupi mat-ias wut pejme duilalajwa, zjapi pejbuan makabuanchiyaxaelkat?” —bej chiyaxaelbej, japon aton wuajnaemnt wut.

³⁶ Japon japox wuajnaemsaxael wut, japon wuajnaemntpox, nejliaklax wulxael. Jesfut muthtas wut, naboelt. Jesfubokt xoeq satat.

³⁷ Jesfut, o, asafutbej, muthtas wut, muthtas pafut. Naboelt pox muths-esal.

³⁸ Muthtasfut, japox naboelt wut, me-ama pafut, kabuanchi-el. Boelnakola, me-ama Dios nejxasink japafut naboelalajwa. Nejmach-asafu boelnakola wut, me-ama majt pafut wut, jakabuanchi-el.

³⁹ Ja-aechlap-is jiw pejbuan. Najupa-elbej, choef suapich, mia suapichbej, baxi suapichbej.

⁴⁰ Xatis taenspoxan thatbaxotat, ampathatat taenspoxanbej, japoxan kaenanula chiekal najupa-el. Thatbaxotat pachaempoxan najupa-el, ampathatat xabich pachaempoxan suapich.

⁴¹ Ja-aechbej juimatkoipijin, madoipijin suapich. Kaenanula chiekal najupa-itliaka-el. Puexa ithaejbej kaenanula chiekal najupa-itliaka-el.

⁴² Ja-aechbej jiw tapi, Dios mat-ias wut, japi pejme duilaliajwa. Jiw tap wut, muthas. Do japoxan jaxot kaweta xoepdik. Japi jiw Dios mat-ias wuti, pajelbu'anaxaelpi pejme duilaliajwa. Pajelbu'an wut, japi jiw kaes tapaxil. Kaes japi pejbu'an wexoepaxisalbejpi.

⁴³ Patupan muthstas wut, muthstaspox pachaema-el. Mamnika-elbejpo. Samata, chinax kaen aton japox nejxasinka-el. Pelax Dios mat-esaxaelpox pejme dukaliajwa xabich pachaemaxael. Mamnikaxaelbejpo.

⁴⁴ Muthstaspox satat naman. Jaxot xoepbejpo. Pelax Dios mat-esaxaelpox pejme dukaliajwa, japox athupijax wulxael. Xatis ampathatat laelpas wut, wajbu'an chabu'alaelpas. Pe asamatkoi duilaxaes kaenanula pajelbu'antat Diosxotse.

⁴⁵ Dios pejjamechan, chajia lelsपो, jum-aech wut, jum-aechox: "Adán matxoela isas. Do jawut, dukafulon, Dios kajachawaech xot" —aechox. Do jawux, Adán tap wut, baxael, Cristo nalaelt, me-ama Adán, ja-aechon. Pe Cristo kaes pejme pachaem. Me-ama Adán, jachi-elon. Cristo tap xot xatislajwa, Dios naktpaeyaxael duilaliajwas pomatkoicha Diosxotse.

⁴⁶ Wajbu'an, me-ama ampathatpijw pejbu'an wut, ja-aech. Pe asamatkoi, Dios nakmat-eyaxael wut pejme duilaliajwas, me-ama Diosxotse duilpi pejbu'an wut, jachiyaxael kaenanula wajbu'an.

⁴⁷ Adán Dios matxoela isas asthumbatat ampathatpijinliajwa. Baxael, Jesús, wachakalpijin, japon fuloek athuxotsik.

⁴⁸ Puexa xatis wajbu'an, me-ama Adán pejbu't wut, ja-aech, isaspox asthumbatat. Pe asamatkoi, Cristo pejwuajan naexasichpis, wajbu'an, me-ama Cristo pejbu't wut, jachiyaxael.

⁴⁹ Amwutjel wajbu'an, me-ama Adán pejbu't wut, ja-aech. Asamatkoi wajbu'an, me-ama Cristo pejbu't wut, jachiyaxael.

⁵⁰ Takoew, ampox lelaxaelen xamal chiekal matabijaliajwam. Jiw pejbu'an wutluk ampathatat, japi jiw, japabu'an suapich, fulaeyaxilse Dios poxase duilaliajwa jaxotse. Ampathatat jiw pejbu'an pomatkoichaliajwa-el.

⁵¹ Xan nejxasinkax xamal matabijaliajwam asew jiw matabija-elpo. Cristo pejme pasliajwa wut, puexa xatis tapaxisal. Cristo pask wut, puexa xatis, tupa-esalpisfik, tapi suapichbej, jawut Dios puexa wajbu'an nakwexaliaxaxael.

⁵² Taxdukatrompeta jiw thiataen wut, jawutbej tapilis Dios mat-eyaxaes pejme duilaliajwa. Xatisbej, laelpaspisfik, Dios nakwexaliaxaxael wajbu'an pajelbu'antat pomatkoicha duilaliajwas.

⁵³ Xatis ampathatat taps wut, wajbu'an xoepaxael. Japoxan asthumba nadofaxael. Samata, Dios nakbu'xaliaxaxael kaes pejme pachaemaxaelbu'an, xoepaxilbu'an.

⁵⁴ Dios nakwexaliaxa wut wajbu'an, ja-aech wut, pejme tapaxisal, me-ama Dios pejjamechan, chajia lelsपो, jum-aech wut, jum-aechox: "Dios malechaxael patupax. Samata, Dios japi jiw mat-ia wut pejme duilaliajwa, japi jiw pejme tapaxil.

⁵⁵ Patupax kaes malechaxil jiwliajwa. Patupax kaes mamnikaxilbej jiwliajwa" —aech Dios pejjamechan.

⁵⁶ Jiw pejlwla tupaliajwa, Dios kastikaxaes xoti babijaxan ispoxanliajwa. Dios japi jiw kastikaxael, naexasis-el xot Moisés chajia lelsपो.

⁵⁷ Xatis taps wut, napelsaxisal Diosliajwa. Wajpaklon Jesucristo tap cruztat Dios nakbu'weliajwa. Samata, xatis graciastis Diosliajwa.

⁵⁸ Takoew, xamal nejxasinkaxpim, Diosliajwa nabistampoxan, japoxan napelsaxil xamalliajwa. Samata, jnabej kofe' Dios naexasitampox! ¡Dios chiekal xanaboejim xamal kajachawaesfulaliajwa! ¡Kaes pejme xabich nabisde japonliajwa!

16

Pablo kito'apox Corinto paklowaxpijw ofrenda owaliajwa

¹ Ma amwutjel lelx xamal to'aliajwan plata owaliajwam, xato'aliajwam Jerusalén paklowaxpijwliajwa, japi naexasiti Jesús pejwuajan. Me-ama xan kito'ax Galacia tuajnpupijw ofrenda owaliajwa Jerusalén paklowaxpijwliajwa, xamalbej ja-amde!

² Xamal kaedominkoful wut, kanampi, kaesuapich diajnaxaelam plata owaliajwam Jerusalén paklowaxpijwliajwa. Asew jiw xamalxot, kaes kanapi, kaes plata owaxael

ofrendaliajwa. Jachiyaxaelam ofrenda owax kitoesliajwam, xan pas-enil wutfuk xamalxot. Xamal kitoetam wuf ofrenda owax, xamal kaes kito'axinil ofrenda owaliajwam Jerusalén paklowaxpijiwliajwa, xan patx wuf.

³ Xamalxot pa'ax wuf, poejiw, najut makanotampi, to'axaelen Jerusalén paklowax poxade japi plata xalaeliajwa. Xan carta lelaxaelen japi nawexalaeliajwa Jerusalén paklowaxpijiw poxade. Japi jaxot xapa'a wuf, japaplata chaxdut wufi, japox cartabej chaxdusaxaelpi.

⁴ Pachaem wuf, xan tajut japi buflaeyaxaelen Jerusalén paklowax poxade.

Pablo nejchaxoelpox pejme taeliajwa Corinto paklowaxpijiw

⁵ Xan amxot chijian wuf, majt Macedonia tuajnux poxaxaelen. Do jawux, xamal Corinto paklowaxpijwam taeyaxaelen.

⁶ Xamalxotx wuf, piach bej nakdukaxaelenbej xamalxot. Ja-an wuf, iama chatoepaxaelenbej xamalxot. Do jawux, xamal nakajachawaesaxaelam, xan fulaeliajwan wuf.

⁷ Patx wuf xamalxot, xan nejxasinka-enil kamta chijiyaliajwan xamalxot. Dios natapai wuf, piach dukaxaelen xamalxot.

⁸ Amwutfuk namanaxaelen Éfeso paklowaxxot. Pentecostésfiesta toep wuf, do jawux, fulaeyaxaelen Macedonia tuajnux poxade.

⁹ Amwutfuk amxot, Éfeso paklowaxxot, pachaem xan jiw naewuajnalijwan Jesús pejuwajan. Samata, namanxfuk amxot. Jiw xabich nejxasink naewesliajwa Jesús pejuwajan. Pe nakiowa, asew jiw japixot xabich nejxasinka-el xan naewuajnapox.

¹⁰ Timoteo pa'a wuf xamalxotde, ichiekal bu'kulim japon nejchachaemlaliajwa! Timoteo chiekal nabist wajpaklon Jesúsliajwa. Me-ama xan chiekal nabistax wuf, ja-aech Timoteo.

¹¹ Samata, Timoteo xamalxot wuf, chiekal sitaeyaxaelam. Japon kajachawaesaxaelam, fulaen wuf xan nataeliajwa. Xan Timoteo wuajnowetx, asew, naexasiti Jesús pejuwajan suapich.

¹² Xamal nawuajnachaeamtam Apolosliajwa. Xan xabich to'ax Apolos, asew suapich, japi naexasiti Jesús pejuwajan, nakfulaeliajwapon xamal taeliajwa. Pe Apolos owchi-el. Asamatkoi fulaeyaxaelpon xamal taeliajwa.

Pablo xabich saludos xato'apox, carta lelax kitoesliajwa wuf

¹³ Ichiekal taem Satanás xamal naekichachajbasamata! ¡Dios chiekal xanaboejimbej! ¡Xamal chinax asaxliajwa nabej nejlewe'bej!

¹⁴ Isam wuf pachaempoxan asew jiwliajwa, ¡puexa japoxan isfulde, japi nejxasinkam xot!

¹⁵ Takoew, xamal matabijam Estéfanos, japon pejiw suapich, matxoela naexasiti Jesús pejuwajan Acaya tuajnuxot. Japibej xabich kajachawaet asew jiw, naexasiti Jesús pejuwajan.

¹⁶ Xan nejxasinkax xamal chiekal naexasisliajwam, me-ama japi, ja-aechpi, xamal to'a wuf. Asew jiwbej, japi suapich nabistpi, chiekal naexasisaxaelambej.

¹⁷ Xan nejchachaemlax, asew xamalxotpijiw pa'an wuf. Japi pa'anpi, Estéfanos, Fortunato, Acaicobej. Xan japiliajwa nejchaxoelx: "Ampi jiw xan nakajachawaet xot, me-ama Corinto paklowaxpijiw nakajachawaet wuf, ja-aechi xanliajwa" —an xamal Corinto paklowaxpijwamliajwa, nejchaxoelx wuf.

¹⁸ Samata, japi jiw pat wuf, xan xabich nejchachaemlax. Kaes pejme chiekal Dios xanaboejtaxbej. Japi xamal kajachawaet wuf, kaes Dios chiekal xanaboejam. Xan ja-anbej. Samata, ¡jasi jiw xamal chiekal sitaem!

¹⁹ Asia tuajnuxpijiw, naexasiti Jesús pejuwajan, saludos xato'a xamalliajwa. Aquila, pijow suapich, japow pawul Prisca, asew jiwbej, Aquila pejbaxot natamejapi, xabich saludos xato'a xamalliajwa. Jasoxtat puexa japi jiw saludos xato'a xamalliajwa, kaen, wajpaklon Jesucristo, pejiwxsot.

²⁰ Puexa naexasiti Jesús pejuwajan, amxotpijiw, saludos xato'abej xamalliajwa. Me-ama asew jiw, Jesucristo pejuwajan naexasiti, nakaewa nasaluda wuf, ¡ja-amdebej xamal!

²¹ Xan Pablo, amxot tajut lelx xamal saludaliajwan.

²² Jiw, nejweslapi wajpaklon Jesucristo, japi jiw Dios kastikaxaes. ¡Nej xabuata wajpaklon Jesús!

²³ Xan wajpaklon Jesucristo kawuajnax xamal chiekal kajachawaesliajwa.

²⁴ Puexa xamal saludax, nejxasinkax xot xamal, xatis wajpaklon Jesucristo pejiwxsot.

Wachakalcarta, Pablo lelpox, Corinto paklowaxpijwliajwa

Pablo lelpox carta Corinto paklowaxpijwliajwa

¹ Xan Pablo, Dios namakafit Jesucristo pej-apóstolliajwan, Dios nanejxasink xot. Xan ampox carta lelx, Timoteo suapich, xamal Jesús pejuuajan naexasitampimliajwa, Corinto paklowaxpijwam. Lelxbej ampox carta puexa Acaya tuajnujpijwliajwa, Jesús pejuuajan naexasitiliajwa.

² Waj-ax Dios, wajpaklon Jesucristobej, japi kawuajna xamal kajachawaesliajwa, chiekal duuliajwam, asew jiw suapich.

Pablo lelpox xabich nabijatpoxanliajwa

³ Xatis wajpaklon, Jesucristo pax Diosliajwa, graciastis. Waj-ax Dios nakbeltaen. Pompatkoicha nakkajachawaetbejpon, nabijatas wut nejchachaemlialiajwas.

⁴ Xanal nabijatax wut asaxanliajwa, Dios nakajachawaet nejchachaemlialiajwan. Samata, xanal xajux, naewuajna xamal kajachawaesliajwan, asew jiw nabijat wut, japiwej nejchachaemlialiajwa. Me-ama xanal Dios nakajachawaet, xanalbej naewuajna xaelen asew jiw kajachawaesliajwan.

⁵ Xanal Jesucristo pejiwan xot, nabijatax wut, Dios nakiowa nakajachawaet nejchachaemlialiajwan.

⁶ Samata, xanal nabijatax wut, xajux xamal naewuajnalialiajwan xamalbej nejchachaemlialiajwan, asamatkoi nabijatam wut. Xajuxaxaelenbej xamal naewuajnalialiajwan Dios kaes xanaboejalialiajwan xamal bu'welialiajwapon. Samata, nabijatam wut, me-ama xanal majt nabijatax, ja-am wut, jnabej boexatatae' nabijatampoxkal!

⁷ Xanal matabijax. Xamal nabijatam wut, Dios kajachawaesaxael. Me-ama xanal nakajachawaet wut, jachiyaxaelbejpon xamallialiajwa. Samata, xamal nabijatam wut, Dios kajachawaesaxael nejchachaemlialiajwan, jachiyaxaelbejpon xamallialiajwa.

⁸ Takoew, xanal nejxasinkax xamal nejchaxoelalialiajwan xabich nabijataxpo, Asia tuajnu xotan wut. Xanal jaxot nabijatax wut, nejchaxoelx: "Xabich nabijatas. Samata, kaes bej machiyaxisalbej nabijataspoxanliajwa. Xatis nakbeyaxaelbeji" —an xanal, nejchaxoelx wut.

⁹ Xanal xabich nejchaxoelxbej: "Diachwuajnakolax Dios naktapaeibej tupalialias" —an xanal, nejchaxoelx wut. Japox ja-aech xanal Dios xabich xanaboejalialiajwan. Japon xajux tujibej mat-elialiajwa pejme duuliajwam. Samata, xanal amwutjel chiekal matabijax. Xatis wajut wajaxtat xanaboejaxisal, xajuxaxisal xot welialias.

¹⁰⁻¹¹ Asew jiw xabich chachoel wut xanallialiajwa, Dios nakiowa nabu'wia. Amwutjelbej Dios nakiowa nabu'wia, chachoel wut xanallialiajwa. Xamal Dios kawuajnafalam wut xanallialiajwa, Dios nakajachawaesfulaxael xanal welialiajwan. Ja-aech wut, xabich asew jiw taen wut Dios nakajachawaetpox, graciaschiyaxaelpi Diosliajwa.

Ma-aech xot Pablo fulae-el Corinto paklowaxpoxade

¹² Xanal potuajnu xamalbej naewuajna xamalbej, xamalxotan wutbej, chiekal duilx, me-ama Dios nejxasink. Samata, xanal nejchachaemlax. Xanal chiekal duilx, Dios nakajachawaet xot. Tajut tajaxtat, matabijaxpoxantat, xanal chiekal duila-enil.

¹³ Xanal cartan lelx wut, jaxot kaes asaxan lela-enil. Samata, japacartan xaljawam wut, chiekal matabijaxaelam. Xan nejxasinkax, cartan xaljawam wut chiekal matabijalialiajwan xanal lelxpoxan.

¹⁴ Asew jiw, xamalxotpijw, chiekal matabija xanal isxpojan. Jesucristo pejme pask wut ampathatasik, nejxasinkax japamatkoi xamal xabich nejchachaemlialiajwan xanal isxpojanliajwabej. Xanalbej xabich nejchachaemlaxael xamal isampoxanliajwa.

¹⁵ Samata, nejchaxoelx xamal taelialiajwan kolevecas.

¹⁶ Xan nejchaxoelx ampox: "Macedonia tuajnu poxadax wut, matxoela taeyaxaelen Corinto paklowaxpijw. Do jawux, baxael, Macedonia tuajnu xot nawia'nax wut, pejme taeyaxaelen Corinto paklowaxpijw. Do jawut, japixotx wut, japi nakajachawaesaxael Judea tuajnu pasliajwan" —an, nejchaxoelx wut.

¹⁷ Pe fulae-enil xamal taelialiajwan. Xan japox nejchaxoelx wut, diachwuajnakolax fulaesian xamal taelialiajwan. Me-ama xabich asew jiw nejchaxoel asax isliajwa, do jawux, is-elipox, xan jachi-enil.

¹⁸ Dios chiekal matabijt xanal naekichachajba-enilpox. Xanal isaxinil wut asax, “Japox diachwajnakolax isaxaelen” —chi-enil.

¹⁹ Xan Pablo, Silvano suapich, Timoteobej, xamalxot naewuajna x Jesucristo pejuwajan. Jesucristo, Dios paxulan, is-elasia wut, jumchi-elon: “Xan japox isaxaelen” —chi-elon.

²⁰ Puexa Dios chajia jumdutpoxan, japoxan Jesucristo is xatisliajwa. Samata, xatis Dios jumtis: “¡Xam xabich pachaemam!” —tis.

²¹ Dios xatis nakkajachawaet kofasamatas Jesús pejuwajan naexasichpox. Dios nakmakanotbej japon pejiwaliajwas.

²² Dios to'ak Espíritu Santo wajmatpuatanxotaliajwa nakkajachawaesliajwa. Ja-aech wut, xatis matabijas japon pejiwspox. Samata, xatis chiekal matabijas, Dios chajia jum-aechpox diachwajnakolax japon isaxael japox xatisliajwa.

²³ Xan majt nejchaxoelx xamal taeliajwan. Pe fulae-enilfuk, xan nejxasinka-enil xot xamal losliajwan, is-emil xot xan to'axpox. Dios chiekal matabijt xan jum-anpox diachwajnakolax.

²⁴ Xanal matabijax, xamal chiekal naexasitam Jesús pejuwajan. Samata, xanal to'a-enil xamal naexasisliajwam japawajan. Xanallax nejxasinkax xamal kajachawaesliajwan chiekal nejchachaemlialajwambej.

2

¹ Samata, nejchaxoelx wut, jum-an xamalliajwa: “Kaes pachaem, tae-elaliajwan Corinto paklowaxpijw. Xan japi taenx wut, losaxaelenbej. Lotx wut, japi nejxaejwaxaes” —an, nejchaxoelx wut xamalliajwa.

² Xamal nejchachaemlam wut, xanbej nejchachaemlax. Xamal losaxaelen wut, xamal nejxaejwaxael. Jachiyaxaelam wut, xanbej nanejxaejwaxael, xamal losaxaelen wut.

³ Samata, xan tajut xamal tae-enilfuk. Cartakal asbuan jumch xato'ax xamalliajwa nejxaejwasamata, xamal lotx wut. Nejchachaemlaxinil, xamalxot pa'ax wut, losaxaelen xot. Xan fulaechx wut xamal poxade, xamalbej nejchachaemlaximil.

⁴ Xan japox carta lelx wut, xabich nejchaxoelx xamalliajwa. Nowxbej. Lela-enil carta xamal nejxaejwaliajwa. Xan lelxlax xamal najut chiekal nejchaxoelaliajwam xamal xabich nejxasinkaxpox.

Pablo Corinto paklowaxpijw to'apox beltaeliajwapi aton, majt xabich babijax ispon

⁵ Xan tamach nanejxaejwa-el japon atonliajwa, xamalxot xabich babijax is wut. Puexa xamalbej nejxaejow. Xan nejxasinka-enil japon aton tasalaliajwan.

⁶ Puexa xamal japon aton fiatam, babijax is wut. Fiatambejpon culto is-elaliajwa, xamal suapich. Samata, japon koft babijax ispo. Amwatjel japon aton tapaeyaxaelam pejme culto isliajwa, xamal suapich.

⁷ ¡Amwatjel xamal japon beltaem! ¡Naewuajandebejpon kofsliajwa nejxaejwaspox! Ja-aech wut, japon kofsaxil naexasitpox Jesús pejuwajan.

⁸ Samata, xamal jum-an japon aton pejme chiekal bu'kulaliajwam, japon pajut chiekal matabijsliajwa xamal nejxasinkampox japonliajwa.

⁹ Majt xan lelx wut carta xato'aliajwan xamal poxade, japacarta xato'ax chiekal matabijsliajwan, xamal naexasisaxaelam wut xan xato'axpox japon atonliajwa.

¹⁰ Xamal beltaenam wut japon aton, ja-am wut, xanbej japon aton beltaeyaxaelen. Xan japox ja-an wut, Cristo taeyaxael beltaenxpo japon atonliajwa. Xan jachiyaxaelen xamal chiekal matabijaliajwam, xamalbej jachiliajwam.

¹¹ Xatis jachiyaxaes Satanás naknaekichachajbasamata. Xatis chiekal matabijas, ma-aech Satanás, jiw naekichachajbasia wut.

Pablo xabich nejchaxoelpox Titoliajwa, Troas paklowaxxot wuton

¹² Pa'ax wut Troas paklowaxxot jiw naewuajnalialjwan Jesús pejuwajan, Dios nakajachawaet xot, xabich pachaemlax naewuajnalialjwan japawajan.

¹³ Wajkoewan Tito faena-enil xot Troas paklowaxxot, xan xabich nejchaxoelx Titoliajwa. Samata, Troas paklowaxpijw kijachax, xan fulaeliajwan wut Macedonia tujnu poxade, jaxotde Tito faenaliajwan.

Dios kajachawaech xot, apóstoles xajwppox jiw naewuajnalialjwa Jesús pejuwajan

¹⁴ Xanal gracias-an Diosliajwa, japon nakajachawaet xot, Jesús pejiwan xot. Xanal potuajna x naewuajna x wut Jesús pejuwajan, Dios nakajachawaet. Xanal Jesús pejuwajan potuajna x jiw naewuajna x atuaj. Me-ama incienso bowas wut, xabich atuaj xabej-ok, ja-aech Jesús pejuwajan naewuajna x pox. Samata, naexasiti Jesús pejuwajan jum-aechi Jesús pejuwajanliajwa: “Ampawuajan xabich pachaem” —aechi.

¹⁵ Dios nejchachaemil, xan jiw naewuajna x wut Jesucristo pejuwajan. Incienso bowas wut, puexa jiw xabejtaena. Ja-aechbej, Jesús pejuwajan xanal naewuajna x wut. Puexa

jiw jumtaen japawuajan. Asew jiw naexasit Dios bu'welijawas. Asew jiw lax naexasis-el japawuajan.

¹⁶ Jiw naexasis-elpi napelsaxael Diosliajwa. Asew jiw lax bu'weyaxaes. Xanal Jesús pejwuajan naexasitx, Dios nakajachawaet xot. Samata, xanal xajux jiw naewuajnalijawan Jesús pejwuajan, japi Dios bu'welijawas.

¹⁷ Asew jiw naewuajan Jesús pejwuajan asbuan jumch mosliajwas. Xanallax jachi-enil. Jiw naewuajnax wut japawuajan, chiekal naewuajnax. Kichachajba-enil, Dios nato'a xot, Cristo pejiwan xotbej.

3

Pajelwuajantat Dios jumdutpox jiw bu'welijawa

¹ Xamal naewuajnax wut Jesús pejwuajan, xanal tajutliajwa jumchi-enil: "Xanal kaes pejme pachaeman. Me-ama asew jiw, jachi-enil" —chi-enil tajutliajwa. Asew jiw pat wut xamalxot Jesús pejwuajan naewuajnalijawa, japi carta xapat, asew jiw welelspox japilijawa. Japox, carta lelspx, jum-aech: "Ampi jiw, Jesús pejwuajan naewuajanpi" —aechox. Samata, xamal chiekal bu'kulam japi jiw, pat wuti xamalxot. Xanallax xamalxot patx wut, carta xapas-enil xamal itraelijawan chiekal namatabijaliajwam, chiekal nabu'kulaliajwambej. Xanal nawewe'pa-elbej xamal lelaliajwam carta xanal xalaeliajwan asew jiw poxade chiekal japi namatabijaliajwa, chiekal nabu'kulaliajwabejpi.

²⁻³ Xamal naewuajnax Cristo pejwuajan. Samata, amwutjel chiekal duilam. Chiekal duilampox Cristo nejxasink jiw matabijaliajwa. Cristo lela-el cartan jiwliajwa. Lela-elbejpon ia'fachantat. Me-ama chajia Moisés lel, jachi-el Cristo. Pelax Cristo Espiritu Santo to'a lelaliajwa pejjamechan nejmatpuatantat, xamal pajelnejchaxoelaxanliajwa. Samata, amwutjel xamal chiekal duilam xot, asew jiw chiekal matabija xamal Jesucristo kajachawaesfulpox.

⁴ Xanal matabijax, Dios nato'a xamal naewuajnalijawan Jesús pejwuajan. Dios nakajachawaetbej japoxan isliajwan, Jesucristo pejiwan xot.

⁵ Xanal tajut isaxinil Dios pejbichax. Pe nakiowa, Dios nakajachawaet xot, japox bichax nabistax.

⁶ Dios xanal nakajachawaet jiw naewuajnalijawan pajelwuajan. Japawuajan jiw to'a-esal Moisés chajia lelpox naexasisliajwapi. Japawuajanbej najupa-el, Moisés chajia lelpox suapich. Espiritu Santo nakajachawaet xot, xanal jiw chiekal naewuajnax, japi jiw chiekal duilaliajwa, me-ama Dios nejxasink. Moisés chajia lelpox xatis wajut puexa chiekal naexasis-esal. Samata, chiekal napelsaxaes Diosliajwa. Naexasis wutlax pajelwuajan, Espiritu Santo nakajachawaesfulaxael chiekal duilaliajwas pomatkoicha Diosxotse.

⁷ Dios majt lel tato'laliajwapoxan ia'fachantat. Do jawut, japa-ia'fachan chaxduton Moisés. Jiw japox chiekal puexa naexasis-el. Ja-aech wut, japi pejbu'wuajan Diosliajwa. Napeltbejpi Diosliajwa. Dios chaxdut wut Moisés japa-ia'fachan, Moisés pejxu xabich itliak. Samata, israelitis teayaxili Moisés pejxu. Moisés xu-itliakpox bijiat toepaful.

⁸ Kaes pejme pachaem pajelwuajan. Ampamatkoijan japawuajan naexasich Dios nakbu'welijawa, Espiritu Santo duk xot wajmatpuatanxot.

⁹ Dios tato'alpoxan pachaem. Jiw pajut matabija kastikaxaespx, xabich babijaxan is xoti. Pe kaes pejme pachaem pajelwuajan Dios nakbu'welijawa babijaxan isaspxanliajwa. Xatis naexasich xot pajelwuajan, babijaxan isaspxan Diosliajwa chiekal ajil.

¹⁰ Pachaem Dios tato'alpoxan, Moiséstat waeltpox. Pe baxael, Dios wachakalwaeltpox, pajelwuajan, japawuajan kaes pejme chiekal pachaem. Samata, amwutjel majt Dios waeltpox Moiséstat, japox chiekal pachaema-ellejen.

¹¹ Dios tato'alpoxan, waeltpox Moiséstat, japox wuajan pachaem. Pe baxael, wachakalwuajan pat wut, kaes pejme pachaem japawuajan. Japawuajanlax namanaxael pomatkoichaliajwa.

¹² Xanal matabijax, japawuajan namanaxael pomatkoichaliajwa. Samata, xanal tajlewla-el jiw naewuajnalijawan japawuajan.

¹³ Jiw naewuajnax wut, chiekal chanaekabuana xapawuajan. Chajiakolaxtat Dios tato'alpoxan, waelt Moiséstat. Japawuajan Moisés chiekal chanaekabuana wut israelitis, japi chiekal jummatabija-el. Japamatkoijan, Moisés xu-itliak wut, panuelbu' xumatakaton israelitis taesamata, Moisés pejxu itliakpox toepafulpox.

¹⁴ Moisés naewuajan wut israelitis, japi chiekal jummatabija-el chanaekabuanaspxan, japi pejnechaxoelaxan, me-ama matakas wut, ja-aech xoti. Amwutjelbej israelitis pamojiw, japi pejnechaxoelaxan, me-ama matakas wut, ja-aech. Israelitis naewuajnbaxot chanaexaljows wut Moisés chajia lelpox, japox chiekal jummatabija-eli. Pelax israelitis

pamojiw naexasisaxael wut Jesús tæppox japilijawa, ja-aech wut, japi chiekal matabijaxael Moisés chajia lelpox.

¹⁵ Amwutjelbej israelitas pamojiw chiekal jummatabija-el, xaljow wut Moisés chajia lelpox. Japi pejnechaxoelaxan, me-ama matakas wut, ja-aech xoti jummatabija-el.

¹⁶ Pe nakiowa, asew israelitas naexasit wajpaklon Jesucristo pejwajaan. Samata, japi chiekal matabija, xaljow wut Moisés chajia lelpox.

¹⁷ Wajpaklon Jesucristo kaenejchaxoelax, Espiritu Santo suapich. Espiritu Santo duk wajmatpuatanxot. Samata, Espiritu Santo nakkajachawaesful isasamatas babijaxan. Ja-aech wut, nakwewe'pa-el Moisés chajia lelpox naexasisfulalijawas.

¹⁸ Samata, xatis babijax isaxisal. Jatis wut, asew jiw matabijaxael, diachwujnakolax Dios chiekal pachaempon. Espiritu Santo nakkajachawaet xot, xatis chimianejchaxoelaxan. Jatis wut, wajnechaxoelaxan, me-ama Jesucristo nejchaxoel wut, jachiyaxael.

4

¹ Dios xanal nabeltaen xot, nato'a nabichlijawan japon pejbichax. Samata, xanal nejchaxoela-enil kofalijawan.

² Xanal is-enil padalapoxan. Asaxbej is-enil jiw naekichachajbaliawjan. Dios pejjamechan naewuajna x wut, kaes asaxan jiw naewuajna-enil. Dios chiekal matabijt xanal jum-anpoxan, puexa japoxan diach chiekal wuajnakolax, puexa jiw pajut chiekal matabijalijawa. Xanal naewuajna x wut xabich pachaem.

³ Naewuajna x wut, chiekal naewuajna x wut puexa jiw chiekal matabijalijawa Dios bu'weliawas. Pe japi naexasis-el wut xanal naewuajna x wut, ja-aech wut, japi jiw pomatkoicha pajut napelsaxael Dioslijawa.

⁴ Japi naexasis-el wut japawajaan, pejnechaxoelaxan, me-ama itku'a'nik. Pelax naexasiti Jesús pejwajaan, japi pejnechaxoelaxan, me-ama itliak. Samata, Satanás, paklonpon ampathatpijiwlijawa, japon nejxasinka-el jiw naexasislijawa Jesús pejwajaan. Cristo, pax Dios suapich, kaenejchaxoelax.

⁵ Xanal naewuajna x wut, naewuajna-enil nasitaelijawam, naxanaboejalijawambej. Pelax xanal naewuajna x wut xamal sitaelijawam wajpaklon Jesucristo. Xanal nabistaxpin xamallijawa, Jesucristo nejxasinkax xot.

⁶ Dios akaseskolaxtat ampathat is wut, puexa chiekal itku'a'nik wut, jawut Dios to'a itliakalijawa. Jatisbej xatis, Jesús pejwajaan naexasichpis. Amwutjel wajmatpuatanxot, me-ama itliak wut, ja-aech, Dios pejiw xot. Xatis Jesús pejwajaan chiekal matabijas xot, matabijas, Dios xabich pachaempon.

Dios kajachawaetpox pejiw, xanaboejapi japon

⁷ Xanal tajut tajaxtat mamnika-enil. Me-ama kuarnat piachlijawa pachaemaxil, ja-anbej xanal. Dios nakajachawaet xot, xanal mamnikax. Ja-an wut, jiw nejchaxoel xanallijawa: "Japi japox is wut, pajut pijaxtat is-el. Japox ispi, Dios kajachawaet xot" —aech jiw xanallijawa, nejchaxoel wut.

⁸ Xanal nabijatax wut, nejchaemila-enil. Asbu'an jumch nejchachaemlax. Xanal asaxanlijawa xabich nejchaxoelx wut, nakiowa Dios xanaboejax nakajachawaeslijawa.

⁹ Asew jiw babijaxan is xanal nabijaslijawan, Dios pejiwan xot. Pe nakiowa, Dios nakajachawaet. Tamach xanal nawaela-elon. Asew jiwbej nabesia wut, japi xajupa-el, Dios nakajachawaet xot.

¹⁰ Xanal falaech poxade, jaxotde chaxoel. Asew jiw nejchaxoel nabelijawa. Me-ama Jesús boesas, jachisiabejpi xanallijawa. Samata, puexa jiw pajut matabija, xanal chiekal duilx, Jesús nakajachawaet xot.

¹¹ Pomatkoicha chaxoel xanallijawa, asew jiw nabesia xot, Jesús pejiwan xot. Ja-aech wut, puexa jiw pajut matabija, xanal chiekal duilx, Jesús nakajachawaesful xot.

¹² Asew jiw xanal nabesia wut, nakiowa xamal naewuajna x wut Jesús pejwajaan. Samata, xamal japawajaan naexasitam xot, pomatkoicha duilxaelam Diosxotse.

¹³ Dios pejjamechan, chajia lelspx, jum-aech wut, jum-aechox: "Xan xanaboejtax Dios chajia jum-aechpoxan nakajachawaeslijawa. Samata, japox jum-an asew jiwlijawa" —aech Dios pejjamechan, chajia lelspx. Samata, xanalbej nejchaxoelx: "Dios xatis nakkajachawaesaxael" —an xanal, nejchaxoelx wut. Samata, asew jiw naewuajna x wut pejjamechan.

¹⁴ Wajpaklon Jesucristo tæp wut, Dios mat-echpon pejme dukalijawa. Samata, xatis chiekal matabijas. Diachwujnakolax asamatko'i xatis tæps wut, baxael, Dios nakmat-eyaxaelbej xatis pejme duilalijawas. Dios nakmat-ia wut pejme duilalijawas, japon nakbu'flaeyaxael japonxotalijawas.

¹⁵ Chajja xan nabijatax wut, asew jiw babijaxan is wut xanalliajwa, xanal nakiowa naewuajnxax xamal Jesús pejwuajan. Ja-an wut, xabich xamal naexasitam naewuajnxaproxan. Dios xabich xamal kajachawaesful. Samata, xamal chiekal naewuajnam wut asew jiw Jesús pejwuajan, Dios kajachawaesful japi jiw naexasisliajwa japawuajan. Samata, Diosliajwa gracias-aechi. Japibej chiekal matabija Dios, xabich pachaempon.

¹⁶ Samata, xanal nejchaxoela-enil buxkofaliajwan naewuajnxaproxan. Kaematkoisful, xanal kaes pakdiachwan wut, ja-an wut, nakiowa kaes chiekal Dios xanaboejafulax.

¹⁷ Xanal nabijatax wut ampathatat, nakiowa nabistax Jesucristoliajwa. Nabijataxpox piachaxil. Asamatkoi japox chiekal toepaxael. Ja-aech wut, Dios xanal nachaxdusaxael pachaempon. Japox toepaxil.

¹⁸ Xanal nejchaxoela-enil ampathatpijixan, taenxpojan. Xanallax nejchaxoelx Diosxotsepojan, taeyaxisalpojan. Ampathatpijixan, taenxpojan, japoxan toepaxael. Diosxotsepojan, japoxanlax, toepaxil. Japoxan pomatkoichaliajwa.

5

¹ Thaejtxot bua-at, kaspox, piachliajwa-el. Ja-aechlap-is wajbu'an. Wajbu'an pomatkoichaliajwa-el ampathatat. Xatis chiekal matabijas. Diosxotse toepaxilba, japaba Dios chiekal chaemt asamatkoi xatis duilaliajwas, tups wut.

² Xatis laelpas wutfuk, xabich nejxasinkas wajbu'an nakwexaliaxaliajwa pajelbu'analiajwas, duilaliajwas pomatkoicha Diosxotse.

³ Jachiyaxaes puexa xatis, asamatkoi, nakbu'xaliaxaxael wut. Samata, kaenanula xatis asabu'anaxaes.

⁴ Xatis laelpas wutfuk, xabich nejxasinkas nakbu'xaliaxaliajwa wajbu'an. Japox jum-an wut, jumchi-enil: "Xan tajbu'txot nakolsasian" —chi-enil. Pe xatis kaenanula pajelbu'anaxaes. Pe asamatkoi, tups wut, duilaxaes toepaxilbu'antat Diosxotse. Wajbu'an, ampathatpijix, amxot kaweta toepaxael.

⁵ Diosxotse Dios nakwechaemt pajelbu'an xatisliajwa. Samata, Dios to'ak Espiritu Santo xatis wajmatpuatanxotaliajwa. Samata, chiekal matabijas. Diachwuajnakolax Dios jumdut xatis wajbu'an, pajelbu'analiajwas.

⁶ Samata, xanal nejchaxoela-enil kofaliajwan jiw naewuajnxapox. Xanal chiekal matabijax. Ampathatat xanal laelpax wut, me-ama atuajan wut tajpaklon Jesucristoxot, ja-an.

⁷ Amwutjel xanal Jesucristo tae-enil. Pe nakiowa, Jesucristo chiekal xanaboejax naka-jachawaesliajwa. Chiekal xanaboejaxbej asamatkoi duilaliajwan Jesucristoxotse.

⁸ Samata, xanalliajwa kaes pejme pachaem tupaliajwan, duilaliajwan tajpaklon Jesucristoxotse.

⁹ Samata, laelpax wut, o, tups wutbej, nejxasinkax xanal isliajwan Dios nejxasinkpox.

¹⁰ Asamatkoi xanal kaenanula nuilaxaelen Jesucristo pejwuajnale. Japamatkoi japon xanal kaenanula nachaxduiyaxael. Xanal chiekal tanbistax wut, nachaxduiyaxael xabich pachaempon. Pe chiekal nabich-enil wut japonliajwa, xanal nachaxduiyaxilon. Ja-aech wut, xanal masox namaeyaxaelen.

Amwutjel xatis pachaemspox Diosliajwa, Jesucristo tuj xot

¹¹ Xanal chiekal matabijax Jesucristo chiekal sitaeyaxaelenpox, asamatkoi nuilaxaelen xot japon pejwuajnale. Samata, xanal jiw xabich naewuajnxax japibej naexasisliajwa Jesucristo pejwuajan. Dios chiekal matabijt xanal isfulaxpojan. Xanal nejxasinkax xamalbej chiekal matabijaliajwam xanal isfulaxpojan.

¹² Xamal chapaeix wut tajut isxpoxan, xanal jumchi-enil: "Xanal kaes pachaeman. Me-ama asew jiw, jachi-enil" —chi-enil tajutliajwa. Xanal japox chapaeix xamal chiekal namatabijaliajwam, nejchachaemlaliajwam xanalliajwa, nakajachawaesliajwam, asew jiw natalasa wut. Xanal natalasalapi, japi jiw jum-aech asew jiw chiekal sitaeliajwas. Japi, pachaem wut, kabuan-aechi. Pe japi pejnechaxoelaxan chaemil.

¹³ Potuajnucha xanal naewuajnxax wut Jesús pejwuajan, asew jiw nakaewa najum-aech xanalliajwa: "Japi jiw na-acha" —na-aechi xanalliajwa asbu'an jumch. Diachwuajnakolax xanal, na-achax wut, ja-an, nabistax xot Diosliajwa. Diachwuajnakolax xanal na-acha-enil. Potuajnucha xanal naewuajnxax xot Jesús pejwuajan, japox pachaem xamalliajwa.

¹⁴ Cristo nanejxasink xanal. Samata, pomatkoicha nabistax japonliajwa. Nejchaxoelxbej: "Cristo tuj wut cruztat, tuj puexa xatisliajwa. Samata, Diosliajwa, Cristo suapich, cruztat tups wut, jatis. Samata, Cristo mot babijaxan isaspoxanliajwa" —an xanal, nejchaxoelx wut Cristo tuppoxliajwa.

¹⁵ Cristo tɔp puexa jiw bu'welijawa, japi kaes isasamata pajut isasiapoxan. Japilax isfulaxael Cristo nejxasinkpoxan. Japon tɔp wut, mat-echbejpon pejme dukaliajwa japi jiwliawja.

¹⁶ Samata, xanal amwutjel nejchaxoela-enil babijax isliawjan. Me-ama asew jiw, naexasis-eli Jesús pejwuajan, nejchaxoel babijaxan isliawja, xanal jachi-enil amwutjel. Majt xanal isx babijaxan Jesucristoliajwa. Pe amwutjel, jasox chiekal nejchaxoela-enil.

¹⁷ Jesús pejwuajan naexasitpon, japon aton pajelnejchaxoelax, padujnejchaxoelaxan koft xoton. Ja-aech wut, nejchaxoelon pachaempoxankal.

¹⁸ Dios nakajachawaet xot, xanal pajelnejchaxoelaxan. Samata, amwutjel xanal pachae-man Diosliawja, Cristo tɔp xot xatistliawja. Dios nabuxto'a xanal jiw naewuajnalijwan japi naexasisliawja Jesús pejwuajan, pachaemaliajwapi Diosliawja.

¹⁹ Jesucristo tɔp cruztat puexa jiwliawja, japi pachaemaliajwa Diosliawja, naexasit wuti Jesús tɔppox. Ja-aech wut, Dios beltaeyaxael japi jiw babijaxan ispoxanliawja. Japawuajan xanal Dios nabuxto'a jiw naewuajnalijwan.

²⁰ Xanal Jesucristo pejiwan xot, naewuajnx japon pejwuajan. Xamal naewuajnx wut, me-ama Dios pajut naewuajan wut, ja-an xanal. Samata, xanal jum-an Jesucristo pijaxtat xamal chiekal pachaemaliajwam Diosliawja.

²¹ Jesucristo babijax is-el. Pe xatis babijaxan isaspoxantat, Jesucristo, me-ama babijaxan is wut, ja-aechon Diosliawja. Samata, Jesucristo kimatamatlas cruztat. Samata, amwutjel xatis bu'wuajanjisa Diosliawja, naexasich xot Jesucristo tɔppox xatistliawja.

6

¹ Xanal nabistax xot Diosliawja, xamal jum-an mastaesamatam Dios beltaenpox babijaxan isampoxanliawja.

² Dios pejjamechan, chajia lelsbox, jum-aech wut, jum-aechox Dios jumchiyaxaelpox, asamatkoi Dios jiw beltaeyaxaelpoxliawja:

“Xan xamal kajachawaesaxaelen, pat wut tajmatkoi xamal bu'welijawan” —aech Dios. ¡Naewe'e! ¡Ma amwut, ampamatkoi, xamal Dios bu'weyaxael!

³ Xanal nejxasinkax chiekal nabichliawjan Diosliawja. Ja-an xanal, asew jiw japox taen wut, japibej chiekal naexasisliawja Dios pejjamechan. Ja-aech wut, japi jiw jumchiyaxil: “Dios pejjamechan pachaema-el” —chiyaxili.

⁴ Xanal chiekal isx Dios pejbichax, jiw japoxan taen wut pajut chiekal matabijaliajwa xanal Dios pejiwanpox. Samata, xabich nabijatax wut, asaxan nawewe'p wutbej, puexa pachaema-el wutbej xanal isliawjan, xanal nakiowa boejtaliasfulax.

⁵ Naeyatat namatwuajself wutbej, jiw jebatat najia wutbej, xabich asew jiw palala wut, naboesasia wutbejpi, puexa japoxanliawja xanal xabich boejtaliasfulax. Xabich nabistax wutbej tajut natataeflialijwan, asamadoi chiekal moeys-enil wutbej, Dios pejjamechan jiw naewuajnx xot, asamatkoiyan xabich litaxaelax wutbej, puexa japoxanliawja xanal xabich boejtaliasfulax. Puexa japoxan natapat wut, nakiowa jiw naewuajnafulax Dios pejjamechan. Ja-an wut, jiw pajut chiekal matabija xanal Dios pejiwanpox.

⁶ Jiw pajut chiekal matabijaliajwa xanal Dios pejiwanpox, asax babijax is-enil. Chiekal matabijaxbej chimiawuajan, Jesús pejwuajan, jiw naewuajnalijwan. Xabich piach boejtaliasfulaxbej, asew jiw babijaxan is wut xanallijwa. Asew jiwliawja xanal isxbej pachaempoxan. Jiw chiekal naewuajnxbej, Espiritu Santo nakajachawaet xot. Chiekal nejxasinkaxbej asew jiw.

⁷ Naewuajnxbej diachwuajnakolaxpoxkal Jesús pejwuajanliawja, Dios nakajachawaesful xot. Isxbej pachaempoxan asew jiwliawja, xanal babijaxan namalechasamata. Japoxan babijaxan potuajnucha xajɔp.

⁸ Asamatkoi jiw nasitaen. Asamatkoi jiw nasitae-el. Asamatkoi asew jiw chimia-jamechan jum-aech xanallijwa. Asew jiwlix jum-aech babejjamechan xanallijwa. Jum-an wut diachwuajnakolaxpoxan, asew jiw japoxan jumtaen wut, xanallijwa jum-aechi: “Japi kichachajbapijw” —aechi asbuan jumch xanallijwa.

⁹ Jiw, chiekal xanal namatabijapi, japi xanal nataen wut, me-ama namatabija-el wut, ja-aechi xanallijwa. Asamatkoi xabich chachoelbej xanallijwa, asew jiw nabesia xot. Pe xanal nakiowa duilafulax. Asamatkoiyan asew jiw xabich nakastikabej. Pe nakiowa, tɔpa-enil.

¹⁰ Asamatkoiyan, asew jiw babijaxan is wut xanallijwa, xanal nanexajew. Pe nakiowa, nejchachaemlax tajnejchaxoelaxantat. Xanal kijinil. Pe nakiowa, xanal naewuajnxapi, japi jiw, me-ama kimaenk wut, ja-aechi Diosliawja, japi naexasit xot xanal naewuajnxpoxan. Ampathatat xanal kijinil wut, ja-an. Pe Dios nakajachawaet xot, xanal xabich tejew, toepaxilpoxan.

¹¹ Takoew, xamal Corinto paklowaxpijwam, xanal puexa jum-anpoxan, japoxan diach chiekal wuajnakolax. Samata, tulaela chiekal jum-an japoxan xamal chiekal matabijalialjwam. Xanal xabich nejxasinkax xamal.

¹² Xanal kofa-enil xamal nejxasinkaxpox. Amwutjel xamallax xanal chiekal nanejxasinka-emil. Me-ama majt nanejxasinkam wut, jachi-emil.

¹³ Xamal naewuajnajx wut, me-ama kaen aton paxi naewuajan wut, ja-an xanal xamalliajwa. ¡Xanal nanejxasinkde! Me-ama xanal xamal nejxasinkax wut, ¡ja-amsfuldebej xanalliajwa!

Xatis, me-ama Dios pejtemploba wut, jatispox

¹⁴ ¡Xamal, Jesús pejwuajan naexasitampim, Jesús pejwuajan naexasis-eli suapich, nabej nakjiye! ¡japi suapich, piach nabej nabichbej, kaenejchaxoela-emil xot! Xamal isam pachaempoxan. Pelax japi jiw is pachaema-elpoxan. Japoxan najura-el. Itliakax, itkuatax suapich, najura-el. Ja-amlap-is xamal. Babijaxan ispi suapich, xamal, japi suapich, najura-emil.

¹⁵ Cristo kaenejchaxoelaxa-el, Satanás suapich. Ja-aechbej Jesús pejwuajan naexasiti. Xamal kaenejchaxoelaxa-emil, asew jiw, Jesús pejwuajan naexasis-eli suapich.

¹⁶ Ja-aech Dios pejtemplobaliajwa, ídolo pejtemplobaliajwabey. Japakolebachanxot ajil kaenejchaxoelaxpox. Xatis, me-ama Dios pejtemploba wut, jatis. Dios pajut chajia jum-aech japoxliajwa:

“Xan tajjiwxot dukaxaelen. Japi suapich, nanuamsaxaelenbej. Xan japi pejDios wulxaelen. Japibej tajjiw wulxael” —aech Dios.

¹⁷ Samata, Dios pejme jum-aech:

“Jiw babijaxan is xamal duilamxot. Samata, ¡jaxot nakolim asalel duilaliajwam! ¡Xamal nabej is babijaxan, japi jiw ispoxan! Ja-am wut, xamal tajjiwaxaelam.

¹⁸ Xan nej-axnaxaelen xamalliajwa. Xamalbey taxi wut, jachiyaxaelam” —aech Dios, xabich mamnikpon.

7

¹ Takoew, japox Dios chajia nakjumdut xatis chiekal matabijalialjwas. Samata, ¡chiekal duilaxaes babijaxan isasamatas Diosliajwa! Babijaxan majt isas, japoxan chajia nejchaxoels xot isliajwas, ¡puexa japoxan chiekal kofaxaes, duilaliajwas, me-ama Dios nejxasink!

Pablo nejchachaemilpox Corinto paklowaxpijiwliajwa

² ¡Xamal nabej kofe' xanal nanejxasinkampox! Xamalxotan wut, chinax babijax is-enil kaen atonliajwa. Tabejs-enilbej asan aton pejnechaxoelax japon babijax isliajwa. Chinax kaen aton naekichachajba-enilbej.

³ Xanal japox jumchi-enil xamal losliajwan. Chajia jum-an xamal pomatkoicha nejxasinkaliajwan, hasta xan tux wut ampathatat.

⁴ Xan matabijtax, xamal naexasisaxaelam cartaxot lelxpox. Xan jiw chapaeix xamal isampoxan. Japoxan chapaeix wut, xabich nejchachaemlax xamalliajwa. Xan nabijatax wut, nakiowa xabich nejchachaemlax, xamal nejchaxoelx xot.

⁵ Macedonia tuajnxot xanal pa'ax wut, chiekal damlathula-enil, naewuajnafulax xot. Amwutjelbej nakiowa chiekal damlathula-enilfuk. Potuajnxucha jiw naewuajnajx wut Jesús pejwuajan, puexa chiekal pachaema-el xanalliajwa. Potuajnxucha chiekal pachaema-el xanalliajwa. Xabich asew jiw nabu'alot Jesús pejwuajan, naewuajnajx wut. Samata, nejchaxoelx: “Japi nawetabejsaxael naewuajnajxapox” —an, nejchaxoelx wut.

⁶ Dios kajachawaet jiw nejxaejwaspi, japi jiw nejchachaemlaliajwa. Japon xanalbey nakajachawaet nejchachaemlaliajwan, Tito pa'an xot.

⁷ Tito pa'an wut, xanal nejchachaemlax. Titobej xabich nejchachaemil xamalliajwa. Samata, xanalbey nejchachaemlax. Japon xanal nachapaei xamal xabich nataesiampox. Nachapaeibejpon xamal xabich nejxaejowpox xanalliajwa, majt ja-aechpoxanliajwa. Nachapaeibejpon xamal nakajachawaesasiampox, asew jiw nabu'alot wut naewuajnajxapoxliajwa. Puexa japoxan jumtaenx wut, xan xabich nejchachaemlax xamalliajwa.

⁸ Carta, matxoelalelxpox, xato'ax wut xamal poxade, japox carta xaljowam wut, xamal nejxaejow. Xan japox carta lelx wutfuk, nejchaxoelx: “Xan nejchachaemla-enil ampox carta lalialjwan, Corinto paklowaxpijiw xaljow wut, nejxaejwaxaes xoti” —an, nejchaxoelx wut. Do jawux, xamal japox carta xaljowam wut, diachwuajnakolax xamal nejxaejow. Pe nejxaejowpox piacha-el. Samata, xan nanejxaejwa-el, japox carta lelx wut.

⁹ Xan nejchachaemla-enil xamal nejxaejowpox, japox carta xaljowam wut. Xanlax nejchachaemlax, xamal nejxaejow wut, kofam babejnechaxoelaxan. Pe amwutjel, isfulam

Dios nejxasinkpoxan. Samata, Dios xabich nejchachaemil xamalliajwa. Carta xato'ax wut xamalliajwa, nejnejchaxoelaxan tabejs-enil.

¹⁰ Kaen aton nejxaejwas wut babijaxan ispoxanliajwa, Dios xajup japon aton beltaeliajwas. Ja-aech wut, japon aton nejxaejwaspox wetoepaxaes. Asan atonlax, babijaxan ispon, kofs-el wut babijax, ja-aech wut, japon aton Dios beltaeyaxisal.

¹¹ Xamal xabich nejxaejow, xaljowam wut carta japon aton xamalxot xabich babijax isponliajwa. Do jawux, xamal isam Dios nejxasinkpox japon atonliajwa. Samata, Dios xabich nejchachaemil xamalliajwa. Xamal chiekal matabijam, ma-am majt xamal. Japon aton fias-emil, xabich babijax is wut. Jawutbej xamal nalala japon atonliajwa, nejlewla xot Dios kastikaxael xot xamal. Samata, japon aton fiatam xot, asew jiw matabija xamal kaenejchaxoelaxa-emilpox, japon aton ispoxliajwa. Amwutjel xamal xabich nataesiam.

¹² Japox carta lelx wut, xan lela-enil asbuan jumch xamal to'aliajwan japon aton kastikaliajwam. Lela-enilbej japox carta japon aton, pax swapich, chaemsliajwa babijax. Dios matabijt, ma-aech xot lelx japox carta. Xan lelx xamal chiekal najut matabijaliajwam, diachwujnakolax xanal nanejxasinkampox.

¹³ Samata, xanal nejchachaemlax, majt nanejxaejow xamalliajwa.

Xanal kaes pejme xabich nejchachaemlax, taenx wut Tito xabich nejchachaemilpox, xamal chiekal bu'kulam xoton.

¹⁴ Tito fulaeliajwa wut xamal poxade, xan japon jum-an xamalliajwa: "Corinto paklowaxpijiw chiekal naexasisaxael ampox carta, xato'axpox" —an Titoliajwa. Diachwujnakolax xamal japox carta xaljowam wut, xan lelxpox chiekal naexasitam. Samata, xanal, Tito swapich, nejchachaemlax xamalliajwa. Me-ama xan chajia jum-an Titoliajwa, diachwujnakolax japox ja-aech.

¹⁵ Japon Tito nejchaxoel wut xamalliajwa, nejchaxoelon, ma-am xamal, japon naexasitam wut, xamal tato'al wuton. Nejchaxoelbejpon, ma-am xamal, chiekal bu'kulam wut, sitaenam xoton. Samata, amwutjel xamal kaes pejme xabich nejxasinkon.

¹⁶ Xan matabijtax, xamal isampoxan puexa chiekal pachaem. Samata, xabich nejchachaemlax.

8

Jesús pejwujjan naexasiti ofrenda owapox kajachawaesliajwa kijila, Judea tuajnujpijiw

¹ Takoew, xamal chapaeyaxaelen chiekal matabijaliajwam, ma-aech Dios, kajachawaet wut Macedonia tuajnujpijiw, japi naexasiti Jesús pejwujjan.

² Japi jiw nabijat, asew jiw babijaxan isas wut japiajwa, Jesús pejwujjan naexasiti xoti. Pe nakiowa, japi jiw nejchachaemil. Japi jiw, xabich kimaenka-el. Pe nakiowa, japi jiw ofrenda owa kajachawaesliajwa asew jiw. Japixot asew xabich owa. Me-ama kimaenk wut, ja-aechi.

³ Xan tajut chiekal taenx, japi owa wut. Jawut nejchaxoelx: "Japi kaes xabich owa, owa wuti ofrendaliajwa" —an, nejchaxoelx wut. Japi japox to'a-esal. Japi japox pajut is, isasia xot.

⁴ Xanalliajwa japi jiw xabich najum-aech: "Xanalbej natapaem ofrenda owaliajwan kajachawaesliajwan naexasiti Jesús pejwujjan, Jerusalén paklowaxpijiw" —aech japi jiw xanalliajwa.

⁵ Xanal nejchaxoelx wut, jum-an: "Japi jiw kijil xot, xabich bej owaxaelbejpi kaeyaxach" —an, nejchaxoelx wut. Pe nakiowa, japi xabich owa. Japilap matxoela nawoeya Diosxot isfulaliajwa Dios tato'alpoxan. Do japoxwux, xanal najum-aechi: "Xamal nejxasinkam wut xanal natato'laliajwam, xanal natato'alde! Xanal japoxan isfulaxaelen, me-ama Dios nejxasink" —aechi xanalliajwa.

⁶ Xanal taenx wut Macedonia tuajnujpijiw kaenanula ofrenda owaliajwa, jawut xanal Tito to'ax xamal poxade. Tito jum-an: "Xam majt kajachawaetaem Corinto paklowaxpijiw, tudut wuti ofrenda owax kajachawaesliajwapi Jerusalén paklowaxpijiw. xam amwut pejme fulaem japi ofrenda owax kito'aliajwam, kitoesliajwabepi!" —an xan Titoliajwa, xamal poxaliajwa wuton.

⁷ Xamal kaes chiekal pachaemam, duilam wut Diosliajwa. Chiekal xanaboejambej Dios. Chiekal matabijambej Dios pejjamechan. Samata, chiekal xajupam asew jiw naewujnaliajwam Dios pejjamechan. Nejxasinkambej chiekal isliajwam Dios pejbichaxan. Xanal xabich nanejxasinkambej. Xamal ja-am xot, xkaes pejme owim ofrenda kajachawaesliajwam Jerusalén paklowaxpijiw!

⁸ Xamal jum-an wut: “Macedonia tuajnupijiw xabich plata owa ofrendaliajwa Jerusalén paklowaxpijiwliajwa” —an wut, japox jumchi-enil xamal to’aliajwan, me-ama japi, jachiliajwam. Japox jum-an xamal chiekal matabijaliajwam. Xamal owam wut ofrenda, me-ama Macedonia tuajnupijiw, ja-am wut, asew jiw taeyaxael xamal diachwajnakolax Dios nejasinkampim.

⁹ Xamal matabijam, wajpaklon Jesucristo nakkajachawaet, xatis naknejxasink xot. Wajpaklon Jesucristo pas-el wutfuk ampathatasik, xabich kimaenkon. Puexa tato’albejpon. Jawux ampathatat xabich nabijat Jesucristo. Me-ama kijilan xabich nabijat wut, ja-aech Jesucristo xamal kajachawaesliajwa. Ja-aech xoton, xamalliajwa asamatkoi pachaemxael Diosxotse.

¹⁰ Chajia, asawaech wut, xamal tuaduwwam plata owax ofrendaliajwa kajachawaesliajwam Jerusalén paklowaxpijiw. Xamal ja-am, xabich nejasinkam xot japox isliajwam. Ampamatkoiyan pachaem xamal plata owax kitoesliajwam. Japox jum-an, xan tajut nejchaxoelxpo.

¹¹ Majt xamal xabich kajachawaesiasiam Jerusalén paklowaxpijiw. ¡Amwutjel xamal kajachawae! ¡Owim ofrenda xajupampoxtat!

¹² Xamal owam wut puexa xajupampoxtat, ja-am wut, Dios nejchachaemlaxael xamalliajwa. Nejew kaesupich owam wut asew jiw kajachawaesliajwam, ja-am wut, Dios nejchachaemlaxael xamal asew jiw kajachawaetampoxliajwa. Dios to’a-el, xamal xabich ajil wut nejew owaliajwam asew jiw kajachawaesliajwam.

¹³ Xamal to’a-enil puexa nejew owaliajwam ofrendaxot, kajachawaetam wut kijila. Puexa nejew owam wut, ja-am wut, xamal najutliajwa nameyaxil.

¹⁴ Xan nejasinkax xatis nakaewa nakajachawaesliajwas, asew jiwliawabej, japi wewe’pas wut. Amwutjel xamal xajupam kajachawaesliajwam kijila, Jerusalén paklowaxpijiw. Asamatkoi, xamalliajwa ajil wut, japiwej xamal kajachawaesaxael. Ja-aech wut, kaen xamalxot wewe’paxisal wewe’paspoxan.

¹⁵ Japoxliajwa Dios pejjamechan, chajia lelspxot, jum-aech wut, jum-aechox: “Aton xabich naxaeyaxan notpon pajutliajwakal, japon aton wenamana-esal. Asan, aton, naxaeyaxan kaesupich notpon, japon aton wewe’pa-esal” —aech Dios pejjamechan.

Tito fulaechpox Corinto paklowax poxade, kolenje pejnachalan suapich

¹⁶ Xan nejasinkax xamal kajachawaesliajwan ofrenda owampox kitoesliajwam. Tito-bej Dios pijaxtat japox nejchaxoel. Samata, gracias-an Diosliajwa.

¹⁷ Samata, Tito to’ax xamal taeliajwa, kajachawaesliajwabejpon ofrenda owampox kitoesliajwam. Japon ow-aech. Japon pajut pijaxtat xamal xabich taesiabejpon.

¹⁸ Tito, pejnachalan suapich, to’ax. Tito pejnachalan matabijas puexa Jesús pejwuajan naexasiti, Macedonia tuajnupijiw. Sitaensbejpon puexa japi jiw, japon chiekal jiw naewuajan xot Jesús pejwuajan.

¹⁹ Tito pejnachalan, to’as puexa Jesús pejwuajan naexasiti, Macedonia tuajnupijiw, japon, xan suapich, fulaeliajwa Jerusalén paklowax poxade. Ofrenda xalaeliajwan wut Jerusalén paklowaxpijiwliajwa, japon nachalaxael, kaes chiekal japi nejchachaemlaliajwapi Diosliajwa. Japi pajut chiekal matabijaxaelbej xatis kajachawaesiaspox, nakaejiws xot.

²⁰ Xanal ofrendaplata pin-iat xafolx wut Jerusalén paklowaxpijiwliajwa, japon buflaeyaxaelen, asew jiw xan najumchisamata: “Pablo kaesupich dijanbej ofrendaplata pajutliajwa” —nachisamata asew jiw xanliajwa.

²¹ Dios matabijt xanal puexa ofrenda chaxdusaxaelenpox. Pe nakiowa, nejasinkax puexa jiw chiekal pajut matabijaliajwa xanal puexa ofrenda chaxduiyaxaelenpox japi jiw.

²² Tito, pejnachalan suapich, kaes asanbej to’axaelen, Jesús pejwuajan naexasitpon. Japon xabich nakajachawaet. Amwutjel japon xamal xabich kajachawaesasia, wultaen wuton Jerusalén paklowaxpijiw kajachawaesiasampox.

²³ Xamalxot asew jiw wuajnaeemt wut Titoliajwa, xamal jumchiyaxaelam: “Japon Tito, Pablo pejnachalan. Japon xanal nakajachawaet” —chiyaxaelam. Kolenje, Tito nakfulaeyaxaespi, xamalxot asew jiw wuajnaeemt wut japi kolenjelialjwa, xamal jumchiyaxaelam: “Ampi kolenje to’as naexasiti Jesús pejwuajan, Macedonia tuajnupijiw. Ampi kolenje chiekal pachaem. Samata, asew jiw chiekal sitaen Cristo” —chiyaxaelam japi kolenjelialjwa.

²⁴ Japi, tres poejiw, xamalxot pa’a wut, chiekal bu’kulaxaelam japi pajut chiekal matabijaliajwa xamal nejasinkampox. Ja-am wut, puexa jiw, naexasiti Jesús pejwuajan, chiekal matabijaxael xamal diachwajnakolax nejasinkam naexasiti Jesús pejwuajan. Japox wultaen wuti, chiekal matabijaxael xan majt jum-anpoxan xamalliajwa, japox diachwajnakolax, xamal puexa jiw nejasinkampox.

9

Asew jiw owapox ofrenda Jesús pejwñajan naexasitiliajwa

¹ Diachwñajnakolax we'pa-el, xan lelx wut xamal pejme kito'aliajwan ofrenda owaliajwampox naexasitiliajwa Jesús pejwñajan, Jerusalén paklowaxpijiwliajwa.

² Xan chiekal matabijtax xamal xabich japi kajachawaesasiampox. Samata, xabich nejchachaemlax xamalliajwa. Chajia Macedonia tuajñupijiw jum-an xamal Corinto paklowaxpijwamliajwa: “Acaya tuajñupijiw, Corinto paklowaxxot duilpi, chajia, asawaestat, owapi ofrenda kajachawaesliajwa Jerusalén paklowaxpijiw. Amwutjelbej nakiowa owafuki ofrenda” —an xamalliajwa. Dolis jawut, Macedonia tuajñupijiw wultaen xamal kajachawaesasiampox Jerusalén paklowaxpijiw. Do jawut, Macedonia tuajñupijiwbej ofrenda owa kajachawaesliajwapi Jerusalén paklowaxpijiwliajwa.

³ Samata, amwutjel Tito to'ax xamal poxade, pejnachala swapich, xamal kajachawaesliajwa, ofrenda owampox kitoesliajwam Jerusalén paklowaxpijiwliajwa. Xan tajpasax wñajna, xamal ofrenda owax kitoes-emil wut, ja-am wut, japox pachaemaxil xanliajwa, xamalliajwa chajia jum-an xot Macedonia tuajñupijiwliajwa.

⁴ Xamal poxaxaechan wut, Macedonia tuajñupijiw xan nakfalaen wut, xamal toes-emil wutfuk ofrenda owampox, ja-am wut, japox pachaemaxil xanliajwa. Japox jachiyaxael, xamalliajwa chajia jum-an xot: “Japi xabich kajachawaesasia Jerusalén paklowaxpijiw” —an xot. Japox pachaemaxilbej xamalliajwa, ofrenda owampox kitoes-emil wutfuk.

⁵ Samata, nejchaxoelx Tito wñajna to'aliajwan, Tito pejnachalabej. Japi xamal kajachawaesaxael kamta kitoesliajwam ofrenda owampox. Xan pasax wñajna, puexa xamal chiekal kitoesaxaelam ofrenda owax nejmach chalakaliajwa. Jasox najut isaxaelam, nejxasinkam xot. Japox isam wut, jnabej is, xamal kito'ax xot!

⁶ Xamal nejchaxoelam wut, jnejchaxoelde ampo! Cha-aellulx muthapon, wenakolas wut, kaeyaxach wenakolas. Pelax pinjiyax lul muthapon, xabich pin-iat wenakolas. Jachiyaxaelbej ofrenda owam wut asew jiwliajwa. Pin-iat owam wut kajachawaesliajwam asew jiw, ja-aech wut, asamatkoi asew jiw xamal pin-iat chaxduiyaxaelbej.

⁷ Samata, xamal kaenanula owasiam wut, jowim! Owam wut, jawut, nejchaxoelam wut, jnabej nejchaxoele: “Xan diachwñajnakolax nejxasinka-enil japi jiw kajachawaesliajwan. Pe nakiowa, nakito'a xot, kajachawaetxlejen” —nabej aeche', nejchaxoelam wut! Dios nejxasink, aton chaxduw wut nejchachaemlaxtat asew jiw.

⁸ Dios xajup chaxduiliajwa puexa xamal wewe'ppoxan. Samata, xamalliajwa puexa wewe'paxil. Japoxan wenamaeflaxaelbej kajachawaesliajwam jiw kijila.

⁹ Dios pejjamechan, chajia lelspx, jum-aech wut, jum-aechox: “Aton pejew chaxduw wut kijila, Dios nejkiowaxil. Japon aton mosaxaes pachaempoxan. Japoxan pomatkoichaliajwa. Japoxbej toepaxil” —aechox.

¹⁰ Dios is naebaechpa-uthanpi jiw muthaliajwa. Isbejpon pafupi jiw pelaliajwa. Dios kajachawaet wut, muthasi chiekal ti'sfalbej. Do jawux, ti't wut, pachaembej xaeliajwa. Jachiyaxaelbej, Dios xamal chaxduw wut puexa wewe'ppoxan. Samata, xajupaxaelambej kajachawaesliajwam asew jiw.

¹¹ Ja-aech wut, Dios xamal xabich chaxduiyaxael. Samata, xamal xajupaxaelam asew jiw xabich chaxduiliajwam, japi wewe'pas wut. Xamal ofrenda owaxaelam xanal xalaeliajwan Jesús pejwñajan naexasitiliajwa, Jerusalén paklowaxpijiwliajwa. Japa-ofrenda japi chaxdutz wut, graciaschiyaxaelpi Diosliajwa.

¹² Asew, Jesús pejwñajan naexasiti, xamal kajachawaetam wut, kajachawaesaximil wewe'paspxankalliajwa. Kajachawaesaxaelambej japi jiw xabich graciaschiliajwapi Diosliajwa.

¹³ Jasoxtat ofrenda owam wut kajachawaesliajwam Jerusalén paklowaxpijiw, japi chiekal matabijaxael, diachwñajnakolax xamal chiekal naexasitam Jesús pejwñajan. Japi jumchiyaxaelbej Diosliajwa: “Xam xabich pachaemam” —chiyaxaelpi, xamal ofrenda pin-iat owam xot japijiajwa, puexa asew, Jesús pejwñajan naexasitiliajwabej.

¹⁴ Samata, japi jiw Dios kawñajna xamal xamalliajwa, xabich nejxasink xoti xamal. Ja-aech wut, japi pajut matabijaxael Dios xabich xamal kajachawaetpox.

¹⁵ Dios paxulan to'a ampathatasik tupaliajwa xatisliajwa. Japox xabich pachaem! Samata, xatis puexa graciastis Diosliajwa. Xatis japox chiekal chanaekabñanaliajwas tampol.

10

Pablo xajupprox tato'laliajwa Jesús pejwñajan naexasiti, japon apóstol xot

¹ Xan, Pablo, chiekal xamal jumchisian asaxan. Me-ama Jesús ampathatat chiekal jum-aech, xanbej jachisian xamalliajwa. Xamalxota-enil wut, asew jiw nabe'wñajanpaei wut, jum-aechi: “Pablo amxot duk wut, naknaewñajan wutbej, pejlwla wut, ja-aechon. Pelax

atʉaj wʉton, carta lel wʉt xatis naknaewʉajnalijawa, pejlewla-el wʉt, ja-aechon” —aech asew jiw, xanlijawa nabaʉwʉajanpaei wʉt.

² Xamal jum-an amwʉtjel kofalijawam babijaxan isampoxan. Japoxan kofam wʉt, asamatkoi xamalxot patx wʉt, losaxinil. Xamalxot asew jiw jum-aech xanlijawa: “Pablo duka-el, me-ama naexasiti Jesús pejwʉajan duil wʉt, jachi-elon. Japon duk, me-ama Jesús pejwʉajan naexasis-eli duil wʉt, ja-aechon” —aech asew jiw xanlijawa. Jiw jum-aechpi japox xanlijawa, xan pa'ax wʉt, japi jiw losaxaelen.

³ Diachwʉajnakolax xanal chiekal jiwankal. Me-ama asew jiw, xanalbej, ja-an. Jesús pejwʉajan naewʉajnax wʉt, me-ama, Satanás suapich, nabax. Pe nabe-enil kirixtat. Me-ama ampathatpijiw kirixtat naba, xanal jachi-enil.

⁴ Xanal, me-ama ampathatpijiw, naba wʉt espadatat, jachi-enilbej. Xanallax Dios nakajachawaet xot, xajʉpx Satanás malechaliajwan. Dios nakajachawaesful xotbej, toesaaxaelen jiw natasalapoxan.

⁵ Dios nakajachawaesful xotbej, buxmalechaxaelen asew jiw pajutlijawa najum-aechpi: “Xanal kaes pejme pachaeman. Me-ama asew jiw, jachi-enil” —aechpi pajutlijawa. Japi jiw asax jum-aech, xan jiw naewʉajnax wʉt asew jiw matabijasamatapi Dios. Xan japi jiw buxmalechax wʉt, ja-an wʉt, asew jiw chiekal naexasisaxael Jesús pejwʉajan.

⁶ Xamal chiekal naexasitam wʉt xanal to'axpox, ja-am wʉt, puexa, asew jiw, xanal naexasis-elpi, japi kastikaxaelen.

⁷ Xamal chiekal taenam jiw kabʉan-aechpoxan. Pe diachwʉajnakolax xamal matabija-emil japi nejchaxoelpoxan, pejmatpuatatant ma-aechbejpi. Asew jiw xanal nabaʉwʉajanpaei. Japi pajut jum-aech asew jiwlijawa: “Xanal nabistax Cristoliajwa” —aechi pajutlijawa. Japi jiwbej pajut matabijaxael, xanalbej nabistax Cristoliajwa.

⁸ Xamal nejchaxoelambej xanlijawa: “Pablo pomatkoicha nakchapaie Dios makafichpox apóstolliajwa” —ambej, xamal nejchaxoelam wʉt xanlijawa. Diachwʉajnakolax Cristo nato'a xamal naewʉajnalijawan japon kaes chiekal xanaboejalijawam. Cristo nato'a-el tabeslijan xanaboejampon japonlijawa. Samata, xan tadala-el jiw jumchilijawan: “Dios namakafitpox apóstolliajwan” —chilijawan.

⁹ Xan nejxasinka-enil xamal nejchaxoelalijawam xanlijawa: “Pablo xatis nakbeljasasia cartaxot lelpoxtat” —chilijawam. Xan carta lela-enil asbʉan jumch xamal japox nejchaxoelalijawam beljasax.

¹⁰ Asew jiw xanlijawa nakaewa najum-aech asbʉan jumch: “Pablo carta xato'a wʉt xatislijawa, xabich mamnik wʉt, ja-aechon. Japacarta xabich tampoelbej xatis chiekal jummatajibijalijawas. Pelax Pablo xatisxot naknaewʉajan wʉt, mamnika-el wʉt, ja-aechon. Chiekal naewʉajna-elbejpon” —aech asew jiw nakaewa xanlijawa.

¹¹ Japi jiw, japox jum-aechpi xanlijawa, chiekal matabijaxael xan isaxaelenpox japilijawa, xamalxot pa'ax wʉt. Me-ama cartaxot lelpox jum-aech, japoxlap pejme xan jachiyaxaelen japi jiwlijawa.

¹² Japilax nejchaxoel pajutlijawa: “Xatis kaes pejme pachaems. Me-ama asew jiw, jachiesal” —aechi, nejchaxoel wʉt. Japi pajut asew jiw chapaeibej, is wʉt pachaempoxan, asew jiw sitaelijawas. Japoxan chapaei wʉt, japi, me-ama nejliakla wʉt, ja-aechi. Samata, chapaeipoxan pachaema-el. Xanal nejxasinka-enil japox nejchaxoelalijawan.

¹³ Dios xanal nato'a islijawan japon pejbichax. Samata, Dios nato'alel xan jiw naewʉajnax Jesús pejwʉajan. Dios nato'abej xamal, Corinto paklowaxpijwam, naewʉajnalijawan. Xamal chapaeix wʉt xanal isxpoxan, kaes pejme asaxan chapae-enil xamal kaes nasitaelijawam. Dios nato'apoxankal islijawan, japoxankal xamal chapaeix.

¹⁴ Samata, xanal Dios nato'a xot, xamalxot patx wʉt, naewʉajnax chimiawʉajan, Jesucristo pejwʉajan. Xanallap matxoele naewʉajnax japawʉajan xamalxot, asew jiw naewʉajna-el wʉtʉuk.

¹⁵ Xamal naexasit Jesús pejwʉajan, asew jiw naewʉajnas xot. Samata, japilijawa xanal jumchi-enil: “Japi naexasit Jesús pejwʉajan, xanal naewʉajnax xot” —chi-enil. Xanal kaes naewʉajnasian, xamal kaes Jesucristo xanaboejalijawam. Dios nato'apoxkal, japoxkal xanal nabichaxaelen.

¹⁶ Naewʉajnax buxtoetx wʉt xamalxotde, jawʉx, fulaeyaxaelen asapaklowaxan poxade, kaes pejme atʉaj poxade. Jaxotan wʉt, xanal naewʉajnaaxaelen Jesús pejwʉajan. Xanal nejxasinka-enil naewʉajnalijawan asew jiw wʉajna chajia naewʉajanxot.

¹⁷ Jiw chapaei wʉt pajut ispoxanlijawa asew jiwlijawa, ja-aech wʉt, chapaeiyaxaelbejpi Dios kajachawaechpox japoxan islijawa. Ja-aech wʉt, asew jiw jumtaens wʉt, japi jiw sitaeyaxael Dios. Japi chapaeiyaxil pajut ispoxanlijawa asbʉan jumch asew jiw sitaelijawas.

¹⁸ Chinax kaen aton pajutlijawa jumchiyaxil: “Xan isxpoxan xabich pachaem” —chiyaxil pajutlijawa. Dios jum-aech wʉtʉax japon atonlijawa: “Xam isampoxan xabich pachaem” —aech wʉt, japox xabich pachaemaxael.

11

Pablo tasalapox apóstoles-elpi, patpi Corinto paklowaxxot

¹ Asew jiw pajut ispoxan chapaei, asbuan jumch asew jiw sitaeliajwas. Xanbej tajut ispxoxan xamal chapaeix wut, chiekal naewe'e!

² Jasox xamal jum-an, xamal xabich nejxasinkax xot. Me-ama xamal nejxasinkam Dios, xanbej ja-an, xamalliajwa. Nejxasinkax xamal nejxasinkaliajwam Cristo. Me-ama pawis nejxasink pamalkal, xamalbej ja-amde, nejxasinkam wut Cristo!

³ Chajiakolaxtat Eva naekichachajbas Satanás. Samata, xan xamalliajwa nejchaxoelx: "Satanás bej naekichachajbaxaesbejpi. Japi naekichachajbas wut, kofaxaeli Cristo nejxasinkpox" —an, nejchaxoelx wut xamalliajwa.

⁴ Asew jiw, xamalxot patpi, japi jiw pat naewuajnalijwa asawuajan, Satanás to'aspox. Japawuajan najupa-el, Jesús pejwuajan suapich, xanal naewuajnaprox. Japi xamal naewuajan wut, chiekal naewetam. Xanal naewuajnaprox Espiritu Santo nejmatpuatanxotaliajwa, japawuajanliajwa japi jiw naewuajan asawuajantat. Xanal naewuajnaproxbej, chimiawuajan, Dios xamal bu'weliajwa, japi japoxliajwa naewuajan wut, naewuajanbej asawuajantat.

⁵ Japi pat wut xamalxot, nejchaxoelam japi jiwliajwa: "Diachwuajnakolax ampi jiw kaes pejme pachaem, apóstoles xot" —am, nejchaxoelam wut. Japi pajutliajwa nejchaxoelbej: "Xatis kaes pejme pachaems. Me-ama asew jiw jachi-esal" —aechi, nejchaxoel wut pajutliajwa. Xanlax japox nejchaxoela-enil: "Japi kaes pejme pachaem. Me-ama xan, jachi-el" —chi-enil, nejchaxoelx wut japi jiwliajwa.

⁶ Xan tajut chiekal matabijtax. Jiw pejwuajnael naksiyax wut, chiekal naewuajna-enil. Me-ama aton xabich matabijtpox naewuajan wut, xan jachi-enil. Pe nakiowa, xan tajut matabijtax, xamal chiekal chanaekabuanax. Samata, xamal chiekal matabijam naewuajnaproxan, chiekal naewuajnaprox xot Jesús pejwuajan.

⁷ Xamal naewuajnaprox wut Dios bu'weliajwa xamal, mat-omwuljoe-enil. Ja-an wut, xamalliajwakat isx babijax? ¡E! Xan japox isx wut, is-enil babijax. Xan na-it-ele-el wut, nabistax tajut wuajsliajwan tejew.

⁸ Xamal naewuajnaprox wut Jesús pejwuajan, asatwajnuhanpijiw, Jesús pejwuajan naexasiti, japi plata naxto'a wuti xanliajwa, xan kifix japaplata tejew wuajsliajwan. Ja-an wut, xan kaes xajupx xamal naewuajnalijwan.

⁹ Xamalxotx wut, asax nawewe'p wut, xamal wuljoe-enil nachaxduiliajwam. Jesús pejwuajan naexasiti, Macedonia tuajnupijiw, nachaxduw xan nawewe'poxanliajwa. Ja-an, xan dukx wut xamalxot taliasasamatan. Jachiyaxaelenbej, pejme xamalxotx wut.

¹⁰ Xan naexasitx diachwuajnakolax, Cristo pejwuajan. Samata, xan jum-anpox, diachwuajnakolax. Xan jum-an wut: "Acaya tuajnupijiw mat-omwuljoe-enil, naewuajnaprox wut Jesús pejwuajan" —an wut, kaen aton nabuxfiasaxil, japox jum-an wut.

¹¹ Asew jiw jum-aech xamal chiekal jumtaeliajwam xanliajwa: "Pablo xamal nejxasinkael. Samata, nejew plata kifs-elon" —aechi. Japox diachwuajnakolaxa-el. Dios chiekal matabijtax xamal nejxasinkaprox.

¹² Pejme xan patx wut xamalxot naewuajnalijwan, xamal mat-omwuljoeyaxinil. Me-ama majt, jachiyaxaelen. Asew, xamalxot patpi, japi xamal mat-omwuljow, naewuajan wuti Jesús pejwuajan. Samata, japi jiw jumchiyaxil: "Xanal isx puexa, me-ama Pablo is" —chiyaxil japi jiw xanliajwa.

¹³ Japi diachwuajnakolax apóstoles-el. Xamal jum-aech wuti: "Xanal apóstoles" —aech wut, japi japox jum-aech xamal naekichachajbaliajwa. Japi xamalxot naewuajan wut, me-ama xanal, Cristo pejiwan wut, apóstoles, ja-aech japi jiw xamal naekichachajbaliajwa. Pe xanal tajjiwa-el japi jiw.

¹⁴ ¡Xamal nabej nejchaxoelanuile', apóstoles-elpi is wut, me-ama xanal apóstol, ja-an wut! Satanásbej xajup itlikaliajwa, me-ama Dios pej-ángeles, jachiliajwa jiw naekichachajbaliajwa.

¹⁵ Samata, Satanás pejiwbej xajup, me-ama jiw pachaempi wut, kakuanchiliajwa. Japi ja-aech xot, asamatkoi Dios xabich kastikaxaesi, babijaxan is xot.

Pablo xabich nabijatpox, apóstol xot

¹⁶ Xan pejme jum-an. ¡Xamal nabej nejchaxoele' xanliajwa: "¡Pablo na-acha, pajut ispoxan chapaei xoton!" —nabej aeche', nejchaxoelam wut! Xamal nakiowa xanliajwa jasox nejchaxoelam wut, natapaeyaxaelam xan jumchiliajwan tajut ispoxanliajwa, me-ama nachax wut, jachiliajwan, japoxan jum-an wut. Asew, me-ama apóstoles, ja-aechi, pajut ispoxan chapaeipi xamal naekichachajbaliajwa, japi sitaeliajwam. Samata, xanbej tajut ispoxan chapaeiyaxaelen xamal nasitaeliajwam.

¹⁷ Tajpaklon nato'a-el xan tajut isxpoxan xamal chapaeliajwan. Pe nakiowa, xan me-ama na-achanan, jasonan, tajut ispoxanliajwa xamal chapaeaxaelen xan nasitaeliajwam.

¹⁸ Xamalxot patpi pajut ispoxankal xamal chapaeipi. Japi buxdala-el chapaeliajwa japoxan xamalxot, japi chiekal xamal sitaeliajwam. Samata, xanbej tajut isxpoxan chapaeaxaelen xamal chiekal xan nasitaeliajwam.

¹⁹ Xamal najut nejchaxoelam: "Xatis kaes pejme chiekal matabijas" —am, nejchaxoelam wut. Pe diachwujnakolax xamal chiekal matabija-emil. Xamal nalala-el japiliajwa, japoxan chapaei wuti. Xamal chiekal naewetam na-acha, japi pat wut xamalxot naekichachajbaliajwa.

²⁰ Xamalxot patpi, japi jiw xamal tato'al. Samata, xamal, japi pamakam wut, ja-am. Japi jiw xamal naekichachajba nejew wenosliajwa. Xamal naekichachajba wut, xamal nalala-el. Japi xamal mastaen wut, asaxan is wutbejpi, xamal nalala-el japiliajwa.

²¹ Xanallax jasox is-enil, xamalxotan wut.

Xamalxot patpi, pajut ispoxan chapaeipi xamal japi chiekal sitaeliajwam. Xanbej tajut isxpoxan chapaeaxaelen xamal chiekal nasitaeliajwam, me-ama na-achan, jachiliajwan.

²² Japi pajut jum-aech xamal sitaeliajwam: "Xanal judiosan" —aechi. Xanbej, judios-atonan. Japi pajut jum-aechbej: "Xanal israelitan, Dios pejiwan" —aechi. Xanbej israelita-atonan, Dios pej-atonan. Japi pajut jum-aechbej: "Xanal Abraham pamojiwan" —aechbejpi. Xanbej Abraham pamonan.

²³ Japi pajut jum-aechbej: "Xanal Cristo pamakjiwan" —aechi. Xan kaes pejme Cristo pamaknan. Me-ama japi, jachi-enil. Japox tajutliajwa jum-an wut, me-ama na-achan, ja-an xamalliajwa. Xan xabich kaes pejme nabistax Cristoliajwa. Me-ama japi, jachi-enil. Ja-an wut, pin-iaveces asew jiw namatwujaselt. Me-ama japi jiw, xan jachi-enil. Jiw jebachantat asew jiw xan najia pin-iaveces. Me-ama japi jiw, xanbej jachi-enil. Pin-iaveces asew jiw mox pejnaboesabej.

²⁴ Cinco veces judios najaelt wut, nakastika. Do jawutbej, namatwujaselt treinta y nueve veces jiw xaselsmuatat.

²⁵ Pejme tres veces najaelt wut, naeyatat namatwujabe'bala. Kaeveces jiw ia'tat nadadap namatkaejabaliajwa. Tres veces barkamtat chafolx wut, chabu'lax. Kaeveces chabu'lax wut, kaematkoi chatuulx mintat. Kaemadoi mintat chanlianxbej.

²⁶ Xan xabich nanamtax jiw naewujnaliajwan Jesus pejwujajan. Asamatkoi, chafolx wut minlel, xabich chachoel xanliajwa. Asamatkoi, putel nanamtax wut, xabich chachoelbej xanliajwa nawenatkowasamata namfatat. Asamatkoi xabich chachoelbej xanliajwa jiw tajtawujnapijijw babijax nawe-isasamata. Asamatkoi chachoelbej xanliajwa asatwujnuchanpijijw babijax nawe-isasamata. Asamatkoiyan chachoelbej xanliajwa paklowaxanxotx wut, pajilaxotx wutbej, marxotx wutbej. Asamatkoiyan xanliajwa chachoelbej, jiw naexasis-elpixotx wut Jesus pejwujajan.

²⁷ Asamatkoiyan xabich damlax, xabich nabistax xot. Asamatkoiyan moeys-enil madoi. Asamatkoiyan xan xabich litaxaelax. Xabich minsilabej. Asamatkoiyan piach naxae-enil. Asamatkoiyan xabich nabijatax, xabich thunk wut, nawewe'p xot naxoe.

²⁸ Xamal chapae-enil pejme kaes asaxan nabijataxjapoxan. Amwutjelbej nabijatax, nejchaxoelx wut Jesus pejwujajan naexasitiliajwa, kaenanula paklowaxanxot duilpiliajwa.

²⁹ Jesus pejwujajan naexasiti mamnika-el wut Dios chiekal xanaboejapoxan, ja-aech wut, japi nejxaejwas wut, xanbej nanejxaejow japi jiwliajwa. Aton, Jesus pejwujajan naexasitpon, asew jiw naekichachajbas wut, japon babijax is wut, xanbej xabich nanejxaejow japon atonliajwa. Xabich talalabej japi jiwliajwa, naekichachajba xoti japon aton.

³⁰ Asan nabuxto'a wut asew jiw tajut jumchiliajwanpox, ja-aech wut, chapaeaxaelen japi jiw pajut chiekal matabijaliajwa xan chiekal mamnika-enilpox.

³¹ Xatis Diosliajwa, Jesucristo pax, jumtis: "Dios, xam xabich pachamam" —tis pomatkoicha. Japon chiekal matabijit xan jum-anpox diachwujnakolax.

³² Damasco paklowax ia' chaxajialsjapox, xabich pinjiyax. Xabich athubejpoj. Japox xajajialsjapox pejfafachan jiw leliajwa japapaklowaxxot. Damasco paklowaxpijin, gobernador, japon makafich rey Aretas gobernadorliajwapon japapaklowaxxot. Xan pa'ax wut Damasco paklowaxxot, japon gobernador kito'a pejsoldaw xan najaelsliajwa. Jawut jum-aechon: "iPaklowaxfafachan wesfulde, Pablo nakolt wut jaelsliajwam!" —aech gobernador pejsoldawliajwa.

³³ Ja-aech wut, naexasiti Jesus pejwujajan, pinjiyax canastotat nachakakofan ventana tathoetleldik, ia' xajajialsleldik. Ja-aech wut, xan wiax Damasco paklowaxxot.

12

Pablo chapaeipox masoxtat taenpoxliajwa wajpaklon Jesus

¹ Wajut isaspoxan asew jiw chapaes wut japi jiw naksitaeliajwa, japox pachaema-el wajutliajwa. Pe nakiowa, xamal chapaeyaxaelen xan masoxtat tajut taenxpo, xamal chiekal jumtaeliajwam wajpaklon Jesús natulaeltpo xanxot. Japon natulaelt xanxot chiekal tajut taeliajwan, xan isfulaliajwan japon nejxasinkpoxan.

²⁻³ Catorce waechanlisox Dios naba'folpox athu poxase, japon duk poxase. Xan naxtae-enil, naba'fol wut Dios. Jalape. Matabijs-enil, tathualnan naba'fol wut, o, taj-aelkal bu'fol wut. Kaen Dios japox chiekal matabijt.

⁴ Xan chiekal matabijtax Dios naba'folpox, japon duk poxase. Jaxochax wut, jumtaenx asew jiw majt jumtae-eljamechan. Dios natapae-el japox asew jiw chapaeliajwan.

⁵ Xan tajut chapaesian wut, japox chapaeyaxaelen asew jiw nasitaeliajwa, athu poxase naba'folpox. Pe japox xan jiw chapaeyaxinil. Xanlax chapaeyaxaelen chiekal mamnika-enilpoxan.

⁶ Xan xabich chapaeyaxaelen wut Diosxotse taenxpo, me-ama na-acha-enil wut, jachiyaxaelen, diachwujnakolax xot japoxan. Pe japoxan chapaeyaxinil jiw nasitaesamata. Xan nejxasinkax jiw nasitaeliajwa Diosliajwa isxpoanliajwa, asew jiw naewuajnapoxanliajwabej.

⁷ Dios natapaei pomatkoicha tajbu't nawexaenkaliajwa, japoxtat nabijasliajwanbej. Ja-an wut, Satanás, me-ama pokcho-etat, na-e'etat, naxua'at wut, ja-aech tajbu't nawexaenkaliajwa. Jasox ja-aech, Dios natapaei xot xan nejchaxoelasamatan: "Dios na-itpaei pachaempoxan xan taeliajwan japonxotse. Samata, xan kaes pejme pachaeman. Me-ama asew jiw, jachi-enil" —chisamatan, tajut nejchaxoelx wut.

⁸ Xan tres veces wajpaklon Jesucristo kawuajnapx naboejthusliajwa japox waxae.

⁹ Pe naboejthus-elon. Jawut Jesucristo najum-aech: "Xam wewe'p tajnejxasiyaxkal. Xam boejthusaxinil puexa jiw matabijaliajwa xam chiekal mamnika-emilpox" —aech wajpaklon. Samata, xan chiekal nejchachaemlax, jiw pajut matabijaxael xot. Xan puexa chiekal isx, Cristo nakajachawaesful xot.

¹⁰ Chiekal mamnika-enil wut, nakiowa nejchachaemlax. Asew jiw jum-aech wutbej babejjamechan xanliajwa, Jesús pejuwajan naexasitx xot, xan nakiowa nejchachaemlax. Asaxan nawewe'p wutbej, xan nejchachaemlax. Asew jiw babijaxan is wutbej xanliajwa, naexasitx xot Jesús pejuwajan, xan nakiowa nejchachaemlax. Pachaema-el wutbej nabichliajwan Cristoliajwa, xan nakiowa nejchachaemlax. Jiw pajut taen wut xan mamnika-enilpox, ja-aech wut, japi pajut chiekal matabija, puexa xan japoxan isx Cristo pejkajachawaesaxtat.

Pablo xabich nejchaxoelx Corinto paklowaxpijwliajwa

¹¹ Xan chapaex tajut isxpoan. Me-ama na-achan pajut ispoan chapaex wut, xan ja-an. Jasox chapaex, xamal asew jiw chiekal chapaex-emil xot xan isxpoan. Xanlax pachaema-enil. Pe xan kaes pachaeman. Diachwujnakolax apóstoles-elpi, xamal naewetampi, xan jachi-enil.

¹² Xamalxot dukx wut, naewuajnapx pin-iamatkoian, Dios nato'a xot. Isxbej koechaxan. Samata, xamal najut chiekal matabijam, diachwujnakolax xan Cristo pej-apóstolan.

¹³ Xan dukx wut xamalxot, puexa chiekal isfulax xamalliajwa, me-ama asapaklowaxan-pijiw, Jesús pejuwajan naexasitiliajwa, puexa chiekal isx. Ja-an wut, xan asax is-enil xamal taliasliajwan. Xamal wuljoe-enilbej nakajachawaesliajwam nawewe'poxanliajwa. Jasox ja-an wut, xamalliajwa chiekal pachaema-el wut, xan nabeltaem!

¹⁴ Xan thiltax xamal pejme taeliajwan. Amwut xamal taeyaxaelen wut, japoxtat tres vecesaxael taenxpo xamal. Pejme xamalxot pa'ax wut, xamal wuljoeaxinil plata nakajachawaesliajwam. Me-ama majt wuljoe-enil plata, pejme xan jachiyaxaelen. Xan nejxasinka-enil nejew plata. Nejxasinkaxlax xamal chiekal naexaxisliajwam Dios. Paxjiw chaxduw plata paxiliajwa. Paxi plata chaxdui-el paxjiw. Xamal, taxi wut, ja-am xanliajwa. Samata, plata xamal wuljoe-enil nachaxduiliajwam.

¹⁵ Xan nejchaxoelx xamalliajwa: "Corinto paklowaxpijw wewe'pas wut kajachawaesax, puexa xan tejew toesaxaelen japi kajachawaesliajwan. Xan xajupx wut, puexa isaxaelenbej japi kajachawaesliajwan" —an, nejchaxoelx wut xamalliajwa. Xamal kaes nejxasinkax wut, xamallax xan nanejxasinkampox toepaful.

¹⁶ Xamalxotx wut, xan asaxan nawewe'p wut, xamal wuljoe-enil. Pe nakiowa, asew jiw nakaewa najum-aech xanliajwa: "Pablo xatis naknaekichachajba plata nakwenosliajwa" —na-aechi nakaewa xanliajwa.

¹⁷ Xamalkat nejchaxoelam xanliajwa: "Pablo to'api xatisleldin, kaen japixot plata not Pabloliajwapi" —amkat xamal xanliajwa, nejchaxoelam wut? Japox nejchaxoelam wut, diachwujnakolaxa-el.

¹⁸ Tito to'ax wut xamal taeliajwa, jawut asan, Jesús pejwajaan naexasitpon, to'axbej fulaeliajwa, Tito swapich. Japamatkoi, ¿Titokat xamal naekichachajba? ¡japon naekichachajba-el! Xan, Tito swapich, chiekal kaenejchaxoelaxan. Samata, Titobej xamal wujoyeayaxil plata.

¹⁹ Xamal xanliajwa nejchaxoelambej: “Pablo puexa japoxan pajut pijaxtat nakjum-aechbej xatis tasala-elaliajwas” —ambej, nejchaxoelam wut xanliajwa. ¡E! Japoxliajwa xan jumchi-enil. Xan puexa jum-an, Cristo nejxasinkpoxan, Dios nejchachaemlialiajwa. Xamal nejxasinkax. Samata, puexa japoxan jum-an xamal kajachawaesliajwan, kaes Dios chiekal xanaboejalijwam.

²⁰ Xan xabich nejchaxoelx xamalliajwa, ma-am xamal amwutjel, duilam wut. Chiekal bej duila-emilbej, me-ama xan nejxasinkax xamal duilialijwam. Xamal nakaewa bej nalotambej. Bej nusasiowlambej. Nalala wut, xabich piach bej nalalabej. Kaenanula xabich bej nejchaxoelambej nejewkalliajwa. Puexa xamal bej jum-ambej babejjamechan asew jiwliajwa. Xamal asew jiw maliach bej bu'wajaanpraeyambej. Bej nejchaxoelambej: “Xatis kaes pejme pachaems. Me-ama asew jiw, jachi-esal” —bej ambej, nejchaxoelam wut. Xamal duilam wut, chiekal bej duila-emilbej. Samata, xamal bej nasaladuilambej. Ja-amsfulam wut, xamalxot patx wut, xan xabich talalaxael japoxanliajwa. Samata, xamal xabich losaxaelen.

²¹ Samata, xan talalaxael Diosliajwa, xamal amwutjel babijaxan isam xot. Samata, amwutjel xabich nejchaxoelx xamalliajwa. Asew jiw xamalxot chajiakolaxtat babijaxan is. Amwutjelbej asew xamalxot nakiowa japoxan babijaxan isfulfuk. Asew watho' bu'moejtbejpi. Kaes asaxan babijaxan isfulbejpi, japi jiw padaeyax wejisaal xot. Xamalxot patx wut, japi jiw isful wut babijaxan, xan noeyaxaelen japoxanliajwa, xabich naneyaxaejwaxael xot.

13

Pablo kitoesaxaelpox carta lelux Corinto paklowaxpijiwliajwa

¹ Amwut, xamal taeyaxaelen wut, ampoxtat tres veces wulxael. Dios pejjamechan, chajia lelspxox, jum-aech wut, jum-aechox babijaxan ispijiajwa: “Kaen aton babijax is wut asew jiwliajwa, japi jiw tasala wuti japon aton kastikalijawas, japi jiw buflaeyaxael kolenje, o, tres aton, chiekal taenpikal, japon aton babijax is wut” —aechox.

² Majt asaviaje wut, xamalxot pa'ax wut, asew jiw fiatx babijaxan ispxoxan kofaliajwa, japi bu'wajaanjilialiajwa Diosliajwa. Xamalxot asew jiw naewuajnaexbej babijaxan isasamata. Amwutjel, atuajan wut, xamal pejme fiatx babijaxan isasamatam. Pejme xamal taenx wut, nakiowa babijaxan isfulam wut, ja-amsfulam wut, xamal beltaeyaxinil.

³ Jasoxtat xamal kastikaxaelen chiekal matabijaliajwam xan diachwujnakolax Cristo nabuxto'aponan. Cristo mamnika-ele-el. Pe xamal kajachawaet wuton, ja-aech wut, xamal chiekal matabijam japon pejpamamax.

⁴ ¡Diach japox ja-aechdo! Cristo, me-ama mamnika-el wut, ja-aechon, cruztat kimatamatlas wut, tup wutbejpon. Pe Dios mat-echpon pejme dukaliajwa. Me-ama Cristo mamnika-el wut, ja-anbej xanal apóstoles. Xanal tajut mamnika-enil. Xanal, Cristo swapich, kaemutan. Samata, chiekal duilafulax xamal kajachawaesliajwan, Dios nakajachawaesful xot.

⁵ ¡Xamal najut chiekal nejchaxoelde, diachwujnakolax xamal chiekal naexasitam wut Cristo pejwajaan, o, chiekal naexasis-emil wutfuk! Ja-am wut, diachwujnakolax najut chiekal matabijaxaelam, ma-am xamal, Cristo pejwajaan naexasitam wut.

⁶ Xan nejchaxoelx xamalliajwa: “Corinto paklowaxpijiw chiekal nejchaxoel wut, ja-aech wut, japi pajut chiekal matabijaxael diachwujnakolax apóstolanponanpox” —an, nejchaxoelx wut xamalliajwa.

⁷ Xanal Dios kawuajnaex xamal babijaxan isasamatam. Nejchaxoela-enil xamalliajwa: “Corinto paklowaxpijiw chiekal duil wut, diachwujnakolax puexa jiw chiekal nakmatabijaxael xatis Cristo pejiwspis” —chi-enil, nejchaxoelx wut. Jasox nejchaxoela-enil. Xanal nejxasinkax xamal isliajwam pachaempoxankal. Jiw xanliajwa jumchiyaxael wut: “Pablo pachaema-el apóstolliajwa” —chiyaxael wuti, xan nejchaxoelaxinil japoxliajwa.

⁸ Pe xan asbuan jumch xamal chanaekabuanaxaelen Jesús pejwajaan, diachwujnakolaxpox, jiw naexasisliajwa. Xan asax jumchiyaxinil jiw itsalsasamatan japi naexasisliajwa japawuajan.

⁹ Samata, xanal nejchachaemlax, asew jiw najum-aech wut xanalliajwa: “Japi, Jesús pejwajaan chanaekabuanapi, mamnika-el wut, ja-aechi” —aech wut asew jiw xanalliajwa. Xanallax nejxasinkax Dios xanaboejampox chiekal mamnikaliajwa. Xanal Dios kawuajnafulax xamal kaes chiekal Dios xanaboejalijwam.

¹⁰ Xan ampox carta lelx xamal poxade xato' aliajwan kofaliajwam babijaxan isampoxan tajpasax wuajna. Ja-am wut, xamal losaxinil. Dios nato'a xamal tataeflaliajwan. Samata, xamalxot pa' ax wut, xan nejchachaemlaxinil xamal losliajwan. Xanlax nejxasinkax xamal kajachawaesliajwan, kaes chiekal Dios xanaboejalijwam.

¹¹ Takoew, ampox carta kitoesliajwan wut, lelaxaelen ampoxan. Xan nejxasinkax xamal nejchachaemlaliajwam. Nejxasinkaxbej nejchaxoelaliajwam isliajwam pachaempoxan. Nejxasinkaxbej naewesliajwam naewuajnaxpox, xamal chiekal nejchachaemlaliajwam. Nejxasinkaxbej kaenejchaxoelaxliajwam chiekal duilaliajwam. Ja-am wut, Dios naknejxasinkpon, nakkajachawaetponbej chiekal duilaliajwas, asew jiw suapich, japon xamalxotaxael.

¹² Xamal, Jesús pejwuajjan naexasitampim, natamejlam wut, jchiekal nakaewa nasaludam!

¹³ Puexa jiw, naexasiti Jesús pejwuajjan, saludos xato'a xamalliajwa.

¹⁴ Xan Dios kawuajnax wajpaklon Jesucristo xamal kajachawaesliajwa. Dios kawuajnaxbej xamal asew jiw nejxasinkaliajwam, me-ama Dios xamal nejxasink, jachiliajwambej xamal. Dios kawuajnaxbej Espíritu Santo pomatkoicha puexa xamalxotaliajwapon.

Pablo lelpox carta Galacia tɯajnpɨjiwliajwa

Pablo lelpox carta Galacia tɯajnpɨjiwliajwa, Jesús pejwɯajan naexasitilajwa

¹ Xan, Pablo, Jesucristo namakafit apóstolliajwan potɯajnpɨcha jiw naewɯajnalajwan japon pejwɯajan. Jesús tɔp wɯt, pax Dios mat-echpon pejme dukaliajwa. Do jawɯt, Dios xan namakafitbej apóstolliajwan. Jiw nato'a-el. Japi jiw xan namakafis-el naewɯajnalajwan Jesús pejwɯajan.

² Lelx amprox carta xamal, Jesús pejwɯajan naexasitampimliajwa, Galacia tɯajnpɨjiwamliajwa. Puexa xanxotpi, naexasiti Jesús pejwɯajan, japi, xan sɯapich, saludos xato'a xamalliajwa.

³ Xan kawɯajnaɯ waj-ax Dios, wajpaklon Jesucristobej, xamal kajachawaesliajwapi, chiekal duilaliajwam, asew jiw sɯapich.

⁴ Waj-ax Dios, japon to'a Jesucristo pajut natapaeliajwa asajiw boesaliajwas, nakwemosliajwa xatis babijaxan isasproxanliajwa. Samata, Dios nakkajachawaesaxael Jesús pijaxtat babijaxan isasamatas, me-ama asew jiw babijaxan isful ampamatkoiyantat, jachisamatas xatis.

⁵ Samata, xatis pomatkoicha jumchiyaxaes Diosliajwa: “¡Xam xabich pachaemam!” — chiyaxaes. ¡Jasox nej ja-aech' Diosliajwa!

Kaes asawɯajan ajilpox, me-ama Jesús pejwɯajan Dios jiw bu'weliajwa

⁶ Dios xamal nejasink xot, tadɯt bu'weliajwa. Samata, xamal naexasitam Jesús pejwɯajan. Do jawɯx, piacha-el wɯt, wɯltaenx xamal kofasiampox naexasitamprox Jesús pejwɯajan. Samata, amwɯtjel xan xabich nejchaxoelx xamalliajwa, asawɯajan asbɯan jumch naexasisiam xot.

⁷ Diachwɯajnakolax xan jum-an. Jiw chiekal naexasit wɯt Jesús pejwɯajan, ja-aech wɯt, Dios bu'weyaxaes. Kaes asawɯajan ajil, me-ama japawɯajan Dios bu'weliajwa jiw. Asew jiw pat xamalxot naewɯajnalajwa asawɯajan, xamal naexasisfula-elaliajwam majt xan naewɯajnaɯprox, kaenejchaxoelaxa-elaliajwam, xanal sɯapich. Japi jiw asaxantat xaliaxasiapi chimiawɯajan, Jesús pejwɯajan, Jesús isproxanliajwa.

⁸ Xanal naewɯajnaɯ chimiawɯajan, Jesús pejwɯajan. Japawɯajan naexasitam wɯt, Dios xamal bu'weyaxael. Xanal xaliaxaxinil Jesús pejwɯajan. Kaen ángel pask wɯt, japonbej xaliaxaxil japawɯajan. Asew jiwbej japawɯajan xaliaxaxil. Asan aton asawɯajan naewɯajan wɯt, Jesús pejwɯajana-elpox, japon aton Dios xabich kastikaxaes pomatkoicha infiernoxtodik.

⁹ Majt jum-anpox pejme xamal jumchiyaxaelen. Xamalxot asan aton naewɯajan wɯt asawɯajan, Cristo pejwɯajna-el wɯt, xamal majt naexasitamwɯajna-el wɯt, ¡Dios xabich kastikaxaes japon aton pomatkoicha infiernoxtodik!

¹⁰ Jiw naewɯajnaɯ wɯt Jesús pejwɯajan, naewɯajna-enil jiw asbɯan jumch nejchachaemlaliajwa xanliajwa. Xan naewɯajnaɯ japawɯajan Dios nejchachaemlaliajwa xanliajwa. Naewɯajnaɯaelen wɯt asawɯajan, Cristo pejwɯajna-elpox jiwkal nejchachaemlaliajwa xanliajwa, jachiyaxaelen wɯt, kaes Cristo pamaknaxinil.

Pablo Dios makafichpox apóstolliajwa

¹¹ Takoew, xan nejasinkax xamal chiekal matabijaliajwam, Dios bu'weyaxaelpox Jesús pejwɯajan naexasiti. Xan jiw naewɯajnaɯprox, Jesús pejwɯajan, japawɯajan jiw pajut faena-el.

¹² Jesucristo pejwɯajan majt chinax kaen aton nachapae-el xan matabijsliajwan. Jesucristo xan natapaei matabijsliajwan japon pejwɯajan.

¹³ Xamal nawɯltaenam, ma-an xan majt naexasitx wɯt Moisés chajia lelpox. Me-ama asew judíos, xanbej ja-an. Xamal nawɯltaenam, ma-an xan, chakinanuamtax wɯt Jesús pejwɯajan naexasiti, jaelaliajwan wɯt. Japi jiw chinax beltae-enil. Ja-an xan japi jiw chiekal toesliajwanlach.

¹⁴ Moisés chajia lelpox naexasitx wɯt, xan xabich kaes pejme xentax japoxliajwa. Me-ama asew judíos, kaewɯtje najɯpati'taxpi, xan jachi-enil. Xan, me-ama tajwɯajnapijiw, ja-an japoxliajwa.

¹⁵ Xan nalaels-enil wɯtɯuk, Dios nabeltaen xot, namakafit japon pijax bichax nabichliajwan.

¹⁶ Samata, baxael, Dios pijaxtat chiekal matabijtax Jesús, Dios paxɯlanpon, xan naewɯajnalajwan japon pejwɯajan judíos-elpi, japibej Dios bu'weliajwas. Jesús pejwɯajan matabijtax wɯt, xan fulae-enilde chinax kaen aton poxade wɯajnaɯchaeliajwan. Jumchi-enil: “¿Machiyaxaelenkat xan?” — chi-enil.

¹⁷ Fulae-enilbej Jerusalén paklowax poxade taeliajwan apóstoles wuajnaechaemsliajwan. Japi matxoela-apóstolespi, xan apóstola-enil wutfuk. Xanlax fulaechx Arabia tuajnu poxade. Do jawux, Arabia tuajnu xotx wut, baxael, Damasco paklowaxxot nawia'nax.

¹⁸ Nawia'nax wut, xan dukx tres waechan Damasco paklowaxxot. Do jawux, xan fulaechx Jerusalén paklowax poxade Pedro taeliajwan, japon apóstolpon, xan matabijsliajwan. Japonxotx kolesemana.

¹⁹ Jerusalén paklowaxxot kaes asew apóstoles tae-enil. Kaen Santiago taenx, japon wajpaklon Jesús pakowean.

²⁰ Xan lelxpox Dios chiekal matabijt, diachwuajnakolaxpox.

²¹ Do baxael, Jerusalén paklowaxxot chijian wut, fulaechx Siria tuajnu poxade, Cilicia tuajnu poxadebej.

²² Japamatkoitat Judea tuajnu pijiw, Jesús pejwuajan naexasiti, japi xan chiekal namatabija-elfaki.

²³ Judea tuajnu pijiw jumtaen asew jiw jum-aechpox xanliajwa: “Pablo, japon majt nakchakinanamt xabich naktoesliajwa, Jesús pejwuajan naexasich xot, amwutjel japonbej Jesús pejwuajan naexasit. Japon asew jiw naewuajnafulbej Jesús pejwuajan japi jiw naexasisliajwa japawuajan” —aech japi jiw xanliajwa.

²⁴ Samata, Judea tuajnu pijiw, naexasiti Jesús pejwuajan, japi Dios kawuajan wut xanliajwa, jum-aechi: “Dios, ¡xam xabich mamnikam! ¡Xam nijaxtat Pablo naexasit naxulan Jesús pejwuajan!” —aechi, Dios kawuajan wut xanliajwa.

2

Asew, apóstoles, chiekal bu'kulapox Pablo

¹ Catorce waechanwux, xan pejme kaxa fulaechx Jerusalén paklowax poxade. Jawut xan fulaechx, Bernabé suapich. Bu'folxbej Tito.

² Xan fulaechx Jerusalén paklowax poxade, Dios nato'a xot. Jerusalén paklowax patx wut, natameja Jesús pejwuajan naexasiti, japi paklochow. Do jawut, paklochow chiekal chanaekabuanax judíos-elpi naewuajna xpox. Xan ja-an paklochow jumchisamata xanliajwa: “Pablo naewuajanpox, chimiawuajan, Jesús pejwuajan, judíos-elpi naexasisliajwa, japox chiekal pachaema-el” —chisamata paklochow xanliajwa.

³ Paklochow jumtaen wut judíos-elpi naewuajna xpox, japi paklochow xabich ne-jchachaemil. Tito, tajnachalanpon, japon judíos-atona-el. Pe paklochow jumchi-esal japonliajwa: “¡Titobej nej circuncidas Dios pejmarkaxliajwa, chiekal naexasisliajwa Moisés chajia lelpox!” —chi-esal Titoliajwa.

⁴ Asew judíosxot, me-ama Jesús pejwuajan naexasit wut, ja-aechi. Japi xanalxot pat asbuan jumch naewesliajwa, natasalaliajwabejpi, chiekal naexasis-enil xot puexa Moisés chajia lelpox, xanal amwutjel chiekal naexasitx xot Jesús pejwuajan. Japi jiw xanal nato'a pejme naexasisliajwan puexa Moisés chajia lelpox.

⁵ Japi xanal nato'apox naexasis-enil. Samata, xanal to'a-enil xamal naexasisliajwan Moisés chajia lelpox. Xamallis chimiawuajan, Jesús pejwuajan, naexasitam pejme pachaealiajwan Diosliajwa. Japawuajan diach chiekal wuajnakolax. Samata, xanal nejxasinka-enil japawuajan xalixaliajwan.

⁶ Jesús pejwuajan naexasiti, paklochow, chapaeix wut xan naewuajna xpoxan judíos-elpijiajwa, japi paklochow xan najumchi-el: “Japi jiw naewuajnam wut Jesús pejwuajan, xam wewe'pfuk kaes asax japi chiekal naewuajnalijawam” —nachi-el paklochow. Xan nejchaxoela-enil paklochow nejchaxoelpoxanliajwa, puexa xatis chiekal najups xot Diosliajwa.

⁷ Japi paklochow nakaewa najum-aech xanliajwa: “Diachwuajnakolax Pablo Dios to'as naewuajnalijwa judíos-elpi, Dios bu'weliajwasbej japi jiw. Me-ama Pedro Dios to'as naewuajnalijwapon judíos, jatisbej Pablo” —aech paklochow nakaewa xanliajwa.

⁸ Pedro Dios makafich apóstolliajwa, japon naewuajnalijwa judíos. Xanbej Dios namakafit apóstolliajwan naewuajnalijwan judíos-elpi.

⁹ Samata, Santiago, Pedro suapich, Juanbej, japi paklochow Jerusalén paklowaxxot naexasitpiliajwa Jesús pejwuajan, japi pajut chiekal matabija Dios xan namakafitpox naewuajnalijwan judíos-elpi. Samata, japi xanal chiekal nakijacha, kaenejchaxoelax xoti, xan, Bernabé suapich, naewuajnalijwan judíos-elpi Jesús pejwuajan. Santiago, Pedro suapich, Juanbej, japilax naewuajna xael judíoskal Jesús pejwuajan.

¹⁰ Japi paklochow asbuan jumch nato'a xanal nejkiowasamatan kijila kajachawaesfulaxpox. Pelis xanal kajachawaesfulax kijila.

Pablo lotpox Pedro Antioquía paklowaxxot

¹¹ Pedro Antioquía paklowaxxot wut, xan jiw pejwuaajnael japon chiekal jum-an, is xoton isaxilpox.

¹² Pedro majt naxael, judíos-elpi suapich, koft xoton wajwuaajnapijiw fiatpox. Samata, Pedro nejmach jixaelpon, judíos-elpi suapich, japi naexasiti Jesús pejwuaajan. Pe Santiago pejiw pasax taen wuton Antioquia paklowaxxot, Pedro japi wuaajna nakolt judíos-elpixot. Nakoftbejpon, japi suapich, naxaelpox. Ja-aech Pedro, pejlwla xot Santiago pejiwliajwa. Santiago pejiw jum-aech: “Judíos-elpi, naexasiti Jesús pejwuaajan, japi nej circuncidas, me-ama xatis judíos, jachiliajwa!” —aech Santiago pejiw.

¹³ Asew judíos, naexasiti Jesús pejwuaajan, Pedro nakolsax taen wut, japibej nakola judíos-elpi pejbaxot. Bernabébej nakolt jaxot.

¹⁴ Xan japi taenx wut naexasis-elpox Jesús pejwuaajan to'apox, jawut xan puexa jiw pejwuaajnael, jum-an chiekal Pedroliajwa: “Xam Pedro, diachwuaajnakolax chiekal judíos-atonam. Pe xam, judíos-atonam-emil wut, ja-am. Ja-am wut, ¿ma-aech xotkat to'asiam judíos-elpi duilialiajwa, me-ama xatis judíos?” —an Pedroliajwa.

Judíos, judíos-elpibej, naexasit wut Jesús pejwuaajan, japi Dios bu'weyaxaesopox

¹⁵ Xanal diachwuaajnakolax judíosjiwan, taj-axjiw judíosjiw xot. Samata, xanal chiekal matabijax Moisés chajia lelpox. Me-ama judíos-elpi, matabija-el Moisés chajia lelpox, xanal judíosnanpin jachi-enil japoxliajwa.

¹⁶ Xanal chiekal matabijax, Moisés chajia lelpox chiekal naexasisaxinil chiekal pachaemaliajwan Diosliajwa. Pelax Jesucristo pejwuaajan naexasitx wut, ja-an wut, chiekal bu'wuaajanjilaxaelen Diosliajwa. Samata, xanal naexasitx Jesucristo pejwuaajan Dios nabu'weliajwa. Samata, xanal bu'wuaajanjinil Diosliajwa. Bu'wuaajanjila-enil Diosliajwa, naexasitx xot Moisés chajia lelpox. Chinax kaen aton puexa chiekal naexasisaxil Moisés chajia lelpox bu'wuaajanjilialiajwa Diosliajwa.

¹⁷ Amwutjel xanal Jesucristo pejwuaajan naexasitx Dios nabu'weliajwa. Ja-an wut, asew judíos najumchiyaxael xanalliajwa: “Xamal babijaxan isam, kaes naexasis-emil xot Moisés chajia lelpox” —chiyaxaeli xanalliajwa. Xanal Jesús pejwuaajan naexasitx wut, ¿xanalkat isx babijax, kaes naexasis-enil wut Moisés chajia lelpox? ¡Diachwuaajnakolax xanal is-enil babijax!

¹⁸ Xan jiw jum-an wut: “Moisés chajia lelpox nakwewe'pa-el naexasisliajwas” —an wut, do jawux, pejme jiw to'ax wut naexasisliajwapi Moisés chajia lelpox, xan ja-an wut, tajbu'wuaajnaxaelen Diosliajwa.

¹⁹ Xan chiekal matabijtax wut Moisés chajia lelpox, jawut tajut matabijtaxbej chiekal naexasisaxinilpox japoxan. Samata, xan koftax naexasitxpxox Moisés chajia lelpox Diosliajwa chiekal pachaemaliajwan. Amwutjel naexasitx Jesús pejwuaajan. Samata, chiekal pachaemx Diosliajwa. Cristo tux wut cruztat, jawutbej, xan, me-ama tux cruztat, Cristo suapich, ja-an Diosliajwa.

²⁰ Amwutjel, xan dukx wut, nejchaxoela-enil tajut isasianpoxan isfulaliajwan. Amwutjel, dukx wut, Dios paxulan chiekal xanaboejsfulax japon nakajachawaesfulaliajwa. Japon nanejxasink xot, pajut natapaei asajiw boesaliajwas, tupaliajwapon xanliajwa.

²¹ Xan nejwesla-el Dios nanejxasinkpox. Jiw chiekal naexasisaxael wut Moisés chajia lelpox japi jiw chiekal pachaemaliajwa Diosliajwa, ja-aech wut, Cristo tuxpox masox chiekal namanaxael.

3

Amxot jum-aechpox Moisés chajia lelpoxliajwa, Abraham chiekal Dios xanaboejtpoxliajwabej

¹ Xamal, Galacia tuajnupijwam, ¡nejliaklawam! ¿Ma-aech xotkat tapaeyam asew jiw xamal naekichachajbaliaw kofaliajwam naexasitampox, diachwuaajnakolaxpox? Chajia xam-axotx wut, chiekal naewuaajna Jesus cruztat kimatamatlasopox. ¿Xamalkatlis japox chiekal nejkiowam?

² ¡Xamal ampxox, wuaajnachaemsaxaelenpox, chiekal najumno'e! ¿Xamalkat nejmatpumatantat Espiritu Santo, naexasitam wut Moisés chajia lelpox? ¡E! Espiritu Santo nejmatpumatantat, xamal naexasitam xot Jesús pejwuaajan.

³ Diachwuaajnakolax xamal nejnejchaxoelaxan pawe-ajil. Tuaduwan wut naexasitam-pox Jesús pejwuaajan, Espiritu Santo xamal kajachawaet. Amwutjel xamal nejchaxoelam najut nijaxtat duilialiajwam Cristoliajwa, hasta tuxpam wut.

⁴ Xamal majt nabijatam, asew jiw babijaxan is wut xamalliajwa, Jesús pejwuaajan naexasitam xot. Ma amwut, kofam wut Jesús pejwuaajan naexasitam-pox, ja-am wut, majt chajia nabijatampox, naexasitam wut Jesús pejwuaajan, japox omjilaxael xamalliajwa.

⁵ Dios to'ak Espíritu Santo xamal nejmatsuatanxotaliajwa. Dios isbej koechaxan xam-alxot. ¿Ma-aech xotkat Dios japoxan is xamalliajwa? Dios is japoxan, xamal Jesús pejwuajan chiekal naexasitam xot. Japoxan is-elpon, xamal naexasitam xot Moisés chajia lelpox.

⁶ Abraham chiekal naexasit Dios jumtispos japonliajwa. Samata, Abraham chiekal pachaempon Diosliajwa.

⁷ Samata, ¡xamal chiekal matabijam! Abraham pamojiwkola, japilap chiekal Dios xanaboejapi.

⁸ Dios pejjamechan, chajia lelpox, jum-aech wut, jum-aechox judíos-elpiliajwa. Japibej chiekal Dios xanaboeja wut, babijaxan ispoxan wejilaxaespi. Japox chimiawuajanliajwa Dios jum-aech Abrahamliajwa: “Potuajnychanpijiw xan kajachawaesaxaelen xam nijax-tat” —aech Dios Abrahamliajwa.

⁹ Samata, Dios kajachawaesaxael puexa jiw, japi chiekal Dios xanaboejapi, me-ama chajiakolaxtat Dios kajachawaet Abraham, japon xanaboejt wut Dios.

¹⁰ Aton pajut nejchaxoel wut, jum-aech wuton: “Diachwuajnakolax xan Dios nabu'weyaxael, Moisés chajia lelpox naexasitx xot” —aech wuton, japon aton Dios kastikaxaes, chiekal puexa naexasis-el xoton Moisés chajia lelpox. Japon aton japox wejachiyaxaes, Dios pejjamechan, chajia lelpox, jum-aech wut, jum-aech xot: “Aton chiekal naexasis-el wut puexa Moisés chajia lelpox, japon aton Dios kastikaxaes” —aech xot Dios pejjamechan.

¹¹ Samata, xatis chiekal matabijas. Diachwuajnakolax aton mason namanaxil bu'wuajanjilaxtat Diosliajwa, puexa chiekal naexasis-el wuton Moisés chajia lelpox. Dios pejjamechan, chajia lelpox, jum-aech wut, jum-aechox: “Jiw chiekal xanaboeja wut Dios, ja-aech wut, japi jiw bu'wuajanjilaxael Diosliajwa. Samata, japi jiw pomatkoicha duilaxael Diosxotse” —aech Dios pejjamechan, chajia lelpox.

¹² Jiw nejchaxoeli naexasisliajwa Moisés chajia lelpox, japi jiw xanaboeja-el Dios bu'welijaes. Dios pejjamechan, chajia lelpox, jum-aech wut, jum-aechox: “Jiw chiekal pachaemasiapi Diosliajwa, naexasit xoti Moisés chajia lelpox, japi jiw chiekal naexasisaxael puexa Moisés chajia lelpox” —aech Dios pejjamechan, chajia lelpox.

¹³ Moisés chajia lelpox puexa xatis chiekal naexasis-esal xot, Dios puexa xatis nakkastikaxael. Pe ja-aech wut, Cristo cruztat tup xatisliajwa. Jawut nakwemoton xatis babijaxan isaspoxanliajwa Dios nakkastikasamata. Dios pejjamechan, chajia lelpox, jum-aech wut, jum-aechox: “Aton naetat duch tupaliajwa, Dios kastikas xot” —aechox.

¹⁴ Cristo tup xatis nakbu'welijaes. Samata, Dios kajachawaesaxael judíos-elpibej, me-ama Dios jum-aech Abrahamliajwa. Dios jum-aech xatis Jesús pejwuajan naexasichpisliajwa, Espíritu Santo nakchalaliajwa, nakkajachawaesliajwabej.

Amxot jum-aechpox Moisés chajia lelpoxliajwa, Dios chajia jumdutpoxbej Abrahamliajwa

¹⁵ Takoew, xamal ampox jumchiyaxaelen. Kaen aton jumdut wut nabichliajwa contrato asan atonliajwa, jaxot lelon isliajwapoxan contratofutat. Do jawut, contratofutat pejwul lelon. Pejwul lel wut, kaes asax pejme isliajwa lelxilon. Japon aton chiekal toesaxael japox bichax, me-ama contratofutat jum-aech.

¹⁶ Dios jumdutpox Abrahamliajwa, kaen Abraham pamonliajwabej. Dios jumdutpox, japox, me-ama contrato wut, ja-aechox Diosliajwa. Dios japox jumdut wut, jumdus-elon puexa Abraham pamojiwliajwa. Dios japox jumdut kaen Abraham pamonliajwa, japon Cristoliajwa.

¹⁷ Xan jum-anpox xamal chiekal chanaekabuanaxaelen. Chajiakolaxtat Dios jum-aech Abrahamliajwa asamatkoi jachiyaxaelpoxliajwa. Dios japox jum-aech wut, do jawux, cuatrocientos treinta waechan toep wut, japamatkoiyan Dios kito'a Moisés lelaliajwa Dios jum-aechoxan Abraham pamojiwliajwa, japi israelitasliajwa, japox naexasisfulaliajwapi. Ja-aech wut, Dios jumdutpox Abrahamliajwa amwutjel nakiowa ja-aechfukox. Japox toepa-elfuk. Asamatkoi, Dios jum-aechpox diachwuajnakolax chiekal jachiyaxael.

¹⁸ Dios jumdutpox Abrahamliajwa, japox malech Dios kajachawaesliajwa Abrahamliajwa. Japox diachwuajnakolax jachiyaxael asamatkoi, Dios malech nakkajachawaesaxael wut xatis. Pelax Moisés chajia lelpox naexasisaxaes wut, Dios jumdusaxil malech nakkajachawaesaxaelpoxliajwa.

¹⁹ ¿Ma-aech xotkat pachaem Moisés chajia lelpox? Dios chaxdut pejtato'lanan puexa jiw pajut chiekal matabijaliajwa, is wut babijaxan. Moisés chajia lelpox fiat jiw babijaxan isasamata. Moisés lelpox, jiw chiekal naexasisfulaliajwa, hasta Abraham pamon pask wut. Pasaxaelpon, japon Cristo, Dios to'aspon. Dios pajut kito'a-el Moisés japox lelaliajwa. Dios to'alax pej-ángeles japi jumchiliajwa Moisés. Do jawux, Moisés jum-aech israelitasliajwa ángeles jum-aechpox japonliajwa. Lelbejpon japox.

²⁰ Dios jumdut wut isaxaelpox Abrahamliajwa, Dios pajut chiekal jum-aech Abrahamliajwa. Jawut Dios asan baxto'a-el, Abraham jumchiliajwa wut.

Ma-aech xot pachaempox Moisés chajia lelpox

²¹ Moisés chajia lelpoxot jumchi-el: “Pachaema-el Dios jumdutpoxan” —chi-elpox. Kaes pejme asax ajil, Dios tato'alpox, jiw chiekal naexasisliajwa pomatkoicha jiw duilialijwa Diosxotse.

²² Dios pejjamechan, chajia lelpox, jum-aech wut, jum-aechox: “Puexa ampathatpijiw babijaxan isla-ele-el” —aechox. Samata, wajut chiekal matabijas. Jesucristo pejuwajan naexasiti, japi Dios chaxduiyaxaes jumduchpox.

²³ Jesús pasax wuajna, japamatkoiyan, xanal judíos naexasisfulax xot Moisés chajia lelpox, me-ama esclavos wut, ja-an japawuajanliajwa. Pe xanal chiekal naexasis-enil Moisés chajia lelpox. Ja-an wut, Jesucristo xanaboeja-enilfuk Dios nabu'weliajwa.

²⁴ Me-ama yamxi tataeflan, naewuajan yamxi babijaxan isasamata, ja-aech Moisés chajia lelpox. Moisés chajia lelpox xanal nanaewuajan babijaxan isasamatan. Samata, Cristo nalaelt wut, baxael, tapon puexa xatistliajwa. Xatis naexasich wut Cristo pejuwajan, jatis wut, xatis babijaxan isasopoxan Diosliajwa chiekal nakwe-ajil.

²⁵ Amwutjel xatis chiekal xanaboejas Dios nakbu'weyaxaelpox, Cristo tapon xatistliajwa. Samata, kaes nakwewe'pa-el naexasisliajwas Moisés chajia lelpox.

²⁶ Xamal Jesucristo pejuwajan naexasitam xot, Dios xamal beltaen babijaxan isampoxanliajwa. Samata, amwutjel xamal puexa Dios paxim.

²⁷ Xamal bautisa wuti, asew jiw matabija xamalbej Cristo pejiwampox. Ja-am wut, xamal nejchaxoelam: “Xan chiekal dukasian, me-ama Cristo, jachisian” —am, nejchaxoelam wut.

²⁸ Xatisxot asew judíos, asew judíos-elpibej. Asew esclavos, asew esclavos-elpibej. Asew pejiw, asew watho'bej. Puexa xatis Jesucristo pejuwajan naexasich. Samata, xatis, me-ama kaemuch wut, jatis Diosliajwa.

²⁹ Xatis Cristo pejiw wut, jatis wut, Abraham pamojiwsbej. Samata, Dios nakchaxduiyaxael Abraham chajia jumduchpoxan.

4

¹ Xan kaes amwut jumchiyaxaelen Moisés chajia lelpoxliajwa, Dios jumdutpoxan Abrahamliajwabej. Kaen kimaeyan puexa pejew naetap wut, paxulan jam wutfuk, japon kamta pax pejew chaxduiyaxisalfuk. Baxael, japon chiekal ti't wut, pax pejew chaxduiyaxaeson pejewliajwa. Japon jam wutfuk, me-ama esclavo wut, ja-aechon, naexasisful xot tataeflaspi.

² Japon ti's-el wutfuk, asew tataeflas. Wetataeflasbejpon pejuwaxaelpi. Asamatkoi, japon ti't wut, pax jum-aechmatkoi pat wut, japamatkoi pax pejew puexa chaxduiyaxaeson.

³ Jatisbej majt xatis. Me-ama yamxuchas wut, jatis, chiekal matabija-esal xot Jesucristo pejuwajan. Xatis majt, me-ama esclavos wut, jatis. Xatisbej isas babijaxan, ampathatpijiw isopoxan.

⁴ Pat wut Dios markpox, matkoi, Dios to'ak paxulan nalaelsliajwapon kaew judíos-atowat. Nalaelt wut, baxael, chiekal ti'sful wutbejpon, japon naexasisful Moisés chajia lelpox.

⁵ Xatis xajupa-esal chiekal naexasisliajwas Moisés chajia lelpox. Samata, Dios paxulan fuloek nakwemosliajwa xatis babijaxan isasopoxanliajwa, xatis pejme chiekal pachaemalijwas Diosliajwa. Samata, amwutjel xatis Dios paxis.

⁶ Dios to'ak Espiritu Santo wajmatpaxatanxotaliajwa wajut chiekal matabijaliajwas Dios paxispox. Samata, xatis jumtis Espiritu Santo pijaxtat Dios nakjumtaeliajwa: “Taj-ax Dios” —tis.

⁷ Amwutjel xamal Dios paxim xot, esclavos-emil, isfula-emil xotlis ampathatpijiw isfulpoxan. Samata, asamatkoi Dios xamal chaxduiyaxael xabich pachaempoxan.

Pablo xabich nejchaxoelpox Galacia tuajnapijiw, Jesús pejuwajan naexasitiliajwa

⁸ Xamal majt Dios matabija-emil wut, brixtat nuilam ídolos kawuajnalijwam. Xamal chiekal matabija-emil xot, nejchaxoelam: “Japi ídolos nakajachawaesaxael” —am, nejchaxoelam wut. Pe ídolos Dios-el.

⁹ Amwutjel xamal chiekal Dios matabijam. Pe Dios kaes pejme xamal chiekal matabijton. ¿Ma-aech xotkat kofasiam Dios naexasitampox? ¿Ma-aech xotbejkat pejme naexasisasiam Moisés chajia lelpox, Dios xamal bu'weliajwa?

¹⁰ Xamalbej napatam, judíos pejmatkoi pat wut, napatamatkoi. Judíos fiestan is wut, xamalbej fulaemch japafiestan taeliajwam. Xamal ja-amfulam, fiestamatkoi wut, fiestajumt wutbej, fiestawaechan wutbej. Japafiestan xamalbej naktaenam wut, nejchaxoelam: “Dios

nejchachaemlaxael xatisliajwa, ampafiestan naktaens xot” —am xamal, nejchaxoelam wut.

¹¹ Samata, xan nejchaxoelx xamalliajwa: “Xabich naewuajna xrox japixot, bej nawe-nafo'abej” —an, nejchaxoelx wut xamalliajwa.

¹² Takoew, xamal jum-an amrox. Xamalbej, me-ama xan, ja-amde! Xan judíosnan, xamal judíos-emilpimxot xan dukx wut, me-ama xamal, judíos-emilpim wut, xan ja-an. Xamal babijax nawe-is-emil. ¡Amwutjelbej ja-amde!

¹³ Xamal chiekal matabijam. Xan bu'xaenkax wut, majt xamalxot patx. Jawut nakiowa, xamal naewuajna x Jesús pejuwajan Dios xamal bu'weliajwa.

¹⁴ Jawut, waxae nawaet wut, xan xabich kabuanchaemilan waxaetat. Pe nakiowa, xamal xan nanejxasinkam. Nato'a-emilbej asatujnulel. Najut xamal chiekal xan nabu'kulam. Me-ama Dios pej-ángel, Jesucristobej, chiekal bu'kulaxaelam wut, xamal ja-am xanliajwa.

¹⁵ ¿Ma-aech xotkat amwutjel nejchachaemla-emil xanliajwa? Xan naewuajna x Jesús pejuwajan, xamal majt chiekal xan nanaewetam. Jawutbej xabich nejchachaemlam. Japamatkoi xamal wuljowx wut, nejmach bej nachaxdusaxaelambej wuljowxrox, xabich nasiowlapox.

¹⁶ ¿Pe xankat amwutjel xamalliajwa, me-ama nadaelmanan wut, jakabuanchaemlan-ankat xamalliajwa, naewuajna xot diachwujnakolaxwujajan?

¹⁷ Asew jiw xamalxot, japi xamal naewuajna x circuncudaliajwam. Japi, me-ama xamal kajachawaesasia wut, ja-aechi. Pe japi kajachawaesaxael x pachamaxil xamalliajwa. Japi nejxasink xanalxot xamal nadijaliajwam, xamal japi pejiwaliajwam.

¹⁸ Pachaemaxael, japi is wut pachaempoxan, kajachawaet wutbejpi xamal. Pomatkoicha xamal kajachawaesasia wut, japox pachaemaxaelbej. Pe japi xamal asbuanchaemlan xamach kajachawaesasia, xan xamalxotx wut.

¹⁹ Xamal, me-ama taxi wut, ja-am xanliajwa. Atow naxuwlaliajwa wut, xabich, nejchaxoelaful. Xanbej xabich nejchaxoelx xamalliajwa. Ja-ansfulax, hasta xamal chiekal duilaliajwam Cristoliajwa.

²⁰ Amwutjel xan nejxasinkax xamalxotaliajwan tajut chiekal jumchiliajwan. Jalape. Xan matabijs-enil, achax nejchaxoelaxaelen xamalliajwa.

Amxot jum-aechrox Hagarliajwa, Saraliajwabej

²¹ Xamal jum-am: “Moisés chajia lelpox naexasisaxaes Dios nakbu'weliajwa” —am xamal. ¡Amwut chiekal xan nanaewe'e chiekal matabijaliajwam Moisés chajia lelpox!

²² Moisés chajia lelpox jum-aech Abraham kolenjapox paxulan. Matxoelapijin nalaelton Agartat. Japow esclava-atow. Asan paxulan nalaeltpon Abraham pijowkolowtat. Japow pawul Sara. Japow Sara esclava-atowa-el.

²³ Agar nafaena-el. Samata, piacha-el japow moejwaliajwa, naxuwlaliajwabej. Naxuwal wut, faenow paxuch, poich. Saralax nafaena. Pe Dios jumdut japow naxuwlaliajwa, paxuch faenaliajwapow, poich. Asamatkoi, Dios jumdutmatkoi pat wut, Sara naxuwal. Faenow paxuch, poich.

²⁴⁻²⁵ Agar pejuwajan, me-ama Moisés chajia lelpox, ja-aech. Moisés chajia lelpox naexasiti, japi, me-ama esclavos wut, ja-aechi, naexasisful xot japawujajan. Me-ama Agar, esclava, ja-aech japi jiw. Arabia tuajna xot xabich pinjijax mnaax, Sinaimnaax. Japamnaaxmatwujajtat Dios jum-aech Moisésliajwa. Do jawux, baxael, Moisés kito'as japox lelaliajwa. Sara pejuwajanlax, me-ama Dios jumdutpox Abrahamliajwa. Ja-aech japawujajan, Sara esclava-el xot.

²⁶ Xatis Jesucristo pejuwajan naexasich xot, me-ama Sara paxis wut, jatis, esclavos-esal xot. Samata, asamatkoi duilaxaes pomatkoicha Diosxotse, Dios pejpaklowaxxotse, jajelpaklowax, Jerusalén paklowaxxotse.

²⁷ Dios pejjamechan, chajia lelpox, jum-aech wut, jum-aechox Saraliajwa:

“Xam nafaenam xot, xijimil. Pe nakiowa, ¡nejchachaemilde xam boejtae-emilpowam yamxuchxaenkrox, nalaelsliajwa wut! Asamatkoi xabich chanoeyaxaelam, yamxuch boejpun wut nalaelsliajwa. Do baxael, asamatkoi, xabichaxael namojiw. Xam, me-ama namakow, jachiyaximil” —aechox Saraliajwa.

²⁸ Takoew, xamal, me-ama Abraham paxulan, Isaac wut, ja-am. Japon nalaeltpon Saraxot, Dios chajia jumduchpon Abrahamliajwa. Samata, xamalbej amwutjel Dios paxi wut, ja-am, Dios jumdut xot Abrahamliajwa.

²⁹ Abraham paxulan, nalaeltpon Agarxot, japon taliat pakoewan pajaman, nalaeltpon Saraxot, Espíritu Santo jumduxaxtat. Amwutjelbej, Moisés chajia lelpox naexasiti, xatis naktaliat, Jesús pejuwajan naexasichpis.

³⁰ ¿Achaxkat jum-aech Dios pejjamechan, chajia lelspx, Dios jum-aech wut Abrahamli-ajwa? Jum-aechon: “Naxulan, namakowxot nalaeltpon, xam tupam wut nejew waelax-imil japonxot. Puexa nejew waelaxaelam nijowkolowxot nalaeltponxot. Samata, jto'im namakow chijiyaliajwa xamxot, paxulan swapich!” —aech Dios Abrahamliajwa.

³¹ Takoew, xatis Diosliajwa, Abraham pamakow paxi wut, jachi-esal. Xatislax, Abraham pijowkolow paxi wut, jatis.

5

Jesús pejwajaan naexasiti wewe'pa-esalpx naexasisliajwa Moisés chajia lelpox

¹ Jesucristo tup nakwemosliajwa babijaxan isaspxoxan Dios nakbu'weliawja. Samata, Moisés chajia lelpox kaes nakwewe'pa-el naexasisliawjas Dios nakbu'weliawja. Xatis, me-ama judíos, jachiyaxisal. Samata, wajut chiekal nejchaxoelaxaes: “Dios nakbu'weyaxael, Cristo tup xot. Samata, peme kaxadik nejchaxoelaxisal naexasisliawjas Moisés chajia lelpox” —chiyaxaes, wajut nejchaxoels wut.

² ¡Xamal chiekal naewe'e xan lelspx! Nejchaxoelam wut, jnabej nejchaxoele': “Xan kitapaeyaxaelen nacircuncidaliajwa. Ja-an wut, Dios xan nabu'weyaxael” —nabej aeche', nejchaxoelam wut! Japox nejchaxoelam wut, diachwujnakolaxa-el. Japox nejchaxoelam wut, pachaemaxil Cristo tuppox cruztat xamal bu'weliawja.

³ Pejme lelaxaelen circuncidaxliajwa. Jiw pajut kitapaei wut circuncidaliajwas, japi jiw chiekal naexasisaxaelbej puexa Moisés chajia lelpox, japi babijaxan ispxoxanliajwa Dios bu'weliawjas.

⁴ Xamal nejchaxoelam: “Moisés chajia lelpox xatis naexasisaxaes Dios nakbu'weliawja” —am xamal, nejchaxoelam wut. Ja-am wut, kofaxaelam naexasitampox Cristo pejwajaan Dios xamal bu'weliawja. Ja-am wut, xamal nejxasinkaximil Dios kajachawaesaxaelpx.

⁵ Xatis naexasich Jesucristo tuppox cruztat nakbu'weliawja. Xatis chiekal matabijasbej Dios nakbu'weyaxaelpx. Samata, Espíritu Santo nakkajachawaesaxael piach wujnawesliawjas that toepaxmatkoi. Japamatkoi pat wut, Dios kaenanula nakjumchiyaxael: “Xam babijaxan isampoxan ajil xanliawja” —chiyaxael Dios kaenanula xatislajwa.

⁶ Xatis, Jesucristo pejiwi, nakcircuncida wut, o, nakcircuncida-el wutbej, japox, koloeyax, Diosliajwa chiekal najup. Kaes pejme pachaempox Diosliajwa, Jesucristo chiekal xanaboejaspx. Jesucristo chiekal xanaboejas xot, nejxasinkas asew jiw. Samata, isasbej pachaempoxan japiliajwa.

⁷ Xamal majt chiekal naexasitam Jesús pejwajaan. ¿Achankat xamal to'a kofaliajwam naexasitampox Jesús pejwajaan, diachwujnakolaxpx?

⁸ Dios xamal to'a-el kofaliajwam naexasitampox Jesús pejwajaan. Dios xamal tadut naexasisliawjam japawajaan.

⁹ Jiw jum-aech: “Pan isliawjas wut, cha-aelaxach lewadura tanialtas puexa pansap puthlaliajwa” —aechi. Ja-aechlap-is jiw babejchow. Kaeswapich wut, japi xajup puexa jiw tabejsliawja, naexasiti Jesús pejwajaan.

¹⁰ Xan Dios chiekal xanaboejtax xamal asax nejchaxoelasamatam, xatis chiekal kaenejchaxoelaxliawjas. Xamalxot kaen aton itsalt wut Cristo xanaboejampoxliawja, japon aton Dios kastikaxaes. Japon aton, paklon wut, o, paklona-el wutbej, nakiowa, japon aton Dios kastikaxaes.

¹¹ Takoew, xamal judíos-emilpim, to'axaelen wut circuncidaliajwam, ja-an wut, judíos xan nanejweslaxil. Ja-an wutbej, xan judíos pijaxtat nabijasaxinil. Judíos xan nanejwesla, jiw naewujnax xot Cristo tuppox cruztat xatis babijaxan isaspxoxanliawja.

¹² Xan nejxasinkax xamalxot itsaltpi kamta nakolaliajwa, kaes xamal itsalsasamatapi.

¹³ Takoew, Dios xamal tadut Jesucristo pejwajaan naexasisliawjam Dios xamal bu'weliawja babijaxan isampoxanliawja. Jesucristo pejwajaan naexasitam wut, nejchaxoelam wut, jnabej nejchaxoele': “Amwutjel asax na-it-ele-el. Samata, babijaxan isasianpx isaxaelen” —nabej aeche', nejchaxoelam wut! ¡Asbuan jumch nakaewa chiekal nakajachawaesfulde, xabich nanejxasinkam xot!

¹⁴ Dios pejjamechan, chajia lelspx, jum-aech wut, jum-aechox: “¡Xamal nejxasinkde asew jiw! Me-ama najut nanejxasinkam wut, jja-amde asew jiwliawja!” —aechox. Ja-am wut, kaewutje kamta naexasisaxaelam puexa Moisés chajia lelpoxbej.

¹⁵ ¡Najut chiekal taem nakaewa natoesasamatam! Xamal nakaewa nanejwesla wut, nakaewa najum-am wutbej babejjamechan, ja-am wut, asbuan jumch nakaewa natoesaxaelam Jesús pejiwampim.

Espíritu Santo kajachawaechpx Jesús pejwajaan naexasiti chiekal duilialijwa

¹⁶⁻¹⁷ Xatis babijaxan, wajut isasiaspoxan, japoxan Espírítu Santo nejxasinka-el. Espírítu Santo naktato'alpoxan pachaem xatis isliajwas. Pe xatis japoxan nejxasinka-esal isfulalajwas. Espírítu Santo naktato'alpoxan xatis wajut xajapaxisal japoxan isliajwas. Samata, ipomatkoicha japoxan isfulde Dios pejkajachawaesaxtat, xamal najut isasiampoxan, babijaxan, isasamatam!

¹⁸ Isfulam wut Espírítu Santo tato'alpoxan, xamal kaes pejme nejchaxoelaximil: "Xan naexasisaxaelen Moisés chajia lelpox pejme chiekal pachaemalajwan Diosliajwa" — chiyaximil, nejchaxoelam wut.

¹⁹ Tampa xatis wajut chiekal matabijalajwas, jiw babijaxan is wut. Poejiw asew watho' bu'moejt wut, pejwatho'a-elpi, japox pachaema-el Diosliajwa.

²⁰ Ídolos kawuajnxan, japoxanbej pachaema-el Diosliajwa. Pinjoe'iw pinjoe'axtat ispoxan, japoxanbej pachaema-el Diosliajwa. Jiw nejwesla wut asew, japoxbej pachaema-el Diosliajwa. Jiw kaenejchaxoelaxa-el wut, jum-aech wutbejpi palaeyajamechan, japoxbej pachaema-el Diosliajwa. Jiw xabich uwmaenk wut, japoxbej pachaema-el Diosliajwa. Jiw xabich kamta palala wut, japoxbej pachaema-el Diosliajwa. Asew jiw kaesasia wuti, pejew wut, me-ama asew jiw, jachi-elasia wuti, japoxbej pachaema-el Diosliajwa. Jiw chanaekabuanapoxtat asew jiw asbuan jumch nadija wut, japoxbej pachaema-el Diosliajwa. Jiw nadija wut kolemtjeliajwa, do jawux, jumchiyaxael wut babejjamechan nakaewa asamtpijwliajwa, japoxbej pachaema-el Diosliajwa.

²¹ Jiw kinusasiowal wut asew jiw, japoxbej pachaema-el Diosliajwa. Jiw saxa af wut saxsliajwas, japoxbej pachaema-el Diosliajwa. Jiw xabich xael wut, babijaxan is wutbej, japoxanbej pachaema-el Diosliajwa. Jiw is wutbej kaes asaxan babijaxan, japoxanbej pachaema-el Diosliajwa. Puexa japababijaxan ispi, japi jiw duilaxil Diosxotse. Majt xamal naewuajnxapox, japox pejme xamal naewuajnxax.

²² Jesús pejuwajan naexasiti, japi jiw kajachawaesfulas Espírítu Santo. Samata, japi nejxasink asew jiw. Japibej xabich nejchachaemil. Japibej asew jiw suapich, chiekal duilafal. Japibej piach boejtaliasful palala-elalajwa, asew jiw babijaxan is wut japiliajwa. Japibej asew jiw kajachawaet. Japibej jumduw wut asew jiwliajwa, japoxan chiekal isbejpi.

²³ Japibej nejchaxoela-el: "Xan kaes pejme pachaeman. Me-ama asew jiw jachi-enil" — chi-eli, nejchaxoel wut. Japibej pajut chiekal natataeful babijaxan isasiapoxan is-elalajwa. Japilax isful pachaempoxan. Japoxan japi is, Espírítu Santo kajachawaesfulas xot. Samata, japi fias-esal is-elalajwa pachaempoxan.

²⁴ Jesucristo pejuwajan naexasiti nejchaxoel: "Jesús cruztat kimatamatlas wut, jawutbej tajax padujnejchaxoelax, cruztat matamatlas" — aechi, nejchaxoel wut. Samata, amwutjel padujnejchaxoelax japixot ajil, majt tato'laspoxan babijaxan isliajwa.

²⁵ Amwutjel xatis Espírítu Santo nakkajachawaet xot, tapaeyaxaes japon naktato'lalajwa isliajwasbej japon nejxasinkpoxan.

²⁶ ¡Nabej nejchaxoelatis: "Xatis kaes pachaems. Me-ama asew jiw, jachi-esal" — nabej chitis, nejchaxoels wut! ¡Nakaewa nabej nataliatisbej na-uldüksliajwas! ¡Xatis nakaewa nabej nanusasiowlatisbej!

6

Jesús pejuwajan naexasiti nakaewa nakajachawaesaxaelpox

¹ Takoew, xamalxot Jesús pejuwajan naexasitpon, babijax is wut, ijapon fia'e kofsliajwa japox babijax! ijapon naewuajande pejme isliajwa Dios nejxasinkpoxan! Naewuajnam wut, ¡chiekal naewuajande! ¡ja-amde, kaes xamal naexasitam xot Espírítu Santo tato'alpox! ¡Xamalbej najut chiekal natataefulde babijax isasamatam!

² Xamalxot Jesús pejuwajan naexasitpon xabich nabijat wut, ijapon xamal kajachawaee! Ja-amsfulam wut, naexasisaxaelam Cristo tato'alpox.

³ Aton, chiekal pachaema-elpon, pajutliajwa jum-aech wut: "Xan kaes pachaeman. Me-ama asew jiw, jachi-enil" — aech wuton, japon pajut naekichachajba, diachwuajnakolaxa-el xot.

⁴ Kaenanula jiw pajut chiekal nejchaxoelaxael: "Xan dukx wut, ¿bej ma-anbejkat Diosliajwa?" — chiyaxaeli, pajut nejchaxoel wut. Japi ispoxan pachaem wut, xabich nejchachaem-laxaeli. Ja-aech wut, pajutliajwa japi jiw jumchiyaxil: "Xan kaes pejme pachaeman. Me-ama asew jiw jachi-enil" — chiyaxili.

⁵ Samata, xamal kaenanula chiekal isfulaxaelam Dios tato'alpoxan.

⁶ Aton xamal naewuajan wut Dios pejjamechan, japon aton xamal kajachawaesaxaelam nejewtat.

⁷ ¡Xamal najut naekichachajbaximil! Chinax kaen aton xajupaxil naekichachajbaliajwa Dios. Jiw pejlulantat pelapi pachaem wut, asamatkoi jolaxaeli pachaempi. Pelax pachaema-el wut pelasi, ja-aech wut, asamatkoi jolaxisal, pelasi pachaema-el xot.

⁸ Jachiyaxaelbej jiw ispoxan. Jiw babijaxan is wut, pajut isasiapoxan, asamatkoi, japi jiw tɔp wut, pomatkoicha Dios kastikaxaespi. Aton isfal wutlax Espiritu Santo tato'laspoxan, japon aton asamatkoi tɔp wut, pomatkoicha dukaxael Diosxotse.

⁹ Samata, xatis kofaxisal isfulaliajwas pachaempoxan. Damlaxisalbej isfulaliajwas Espiritu Santo naktato'alpoxan. Japoxan isfulas wut, Dios asamatkoi nakchaxduiyaxael pachaempoxan.

¹⁰ Samata, xatis xajups wut, puexa asew jiw kajachawaesaxaes. Pe kaes chiekal kajachawaesaxaes naexasiti Jesús pejwɔajan.

Pablo lelpox taxdukanaewɔajnajx Gálatas paklowaxpijiwliajwa

¹¹ Xan, Pablo, amxot tajut lelx. Samata, xamal taeyaxaelam pinaletan.

¹² Judíos to'a wut xamal circuncidaliajwam, japi japox to'a, nakaejudíos sɔapich, chiekal pachaemaliajwa, pejlwla xoti asew judíosliajwa. Japi judíos nejwesla nabijasliajwa, me-ama nabijatpi, japi jum-aechpi: "Dios nakbeltaen babijaxan isaspoxanliajwa, Cristo tɔp xot cruztat" –aechpi.

¹³ Xamal to'api circuncidaliajwam, japi pajut chiekal naexasis-el Moisés chajia lelpox. Asɔuan jumch japi to'a xamal circuncidaliajwam. Ja-aech wut, japi jumchisia asew judíos jumtaeliajwas: "Xanal kito'ax xot, xabich Galacia tuajnpijiw, japi judíos-elpi, circuncidaslisi. Samata, xanal kaes pejme xabich pachaeman" –chisiapi asɔuan jumch, asew judíos sitaeliajwas.

¹⁴ Xan tajut jumchixaxinil asew jiwliajwa: "Xan isxpoxan asew jiwliajwa xabich pachaem" –chiyaxinil. ¡E! Xanlax nejxasinkax asew jiw naewɔajnalialjwan wajpaklon Jesucristo cruztat tɔppoxkal. Xanliajwa Cristo cruztat tɔp xot, amwutjel nejxasinka-enil babijaxan isliajwan, me-ama ampathatpijiw is babijaxan. Samata, xan ampathatpijiwliajwa, xan, me-ama tɔpx wut, Jesucristo sɔapich, ja-an.

¹⁵ Poejiw circuncidaspi, o, poejiw circuncida-esalpibej, japoxan koloeyaxan, Diosliajwa chiekal najɔp. Kaes pejme pachaem, xatis pajelnejchaxoelaxan wuch, Jesús pejwɔajan naexasich wut. Jatis wut, me-ama jelnalaelaspis wut, jatis Diosliajwa.

¹⁶ Puexa xamal, chiekal duilampim, me-ama ampacartatat lelx wut, to'ax chiekal duilaliajwam, xan Dios kawɔajnajx. Dios kawɔajnajxbej xamal beltaeliajwapon. Dios kawɔajnajxbej puexa asew jiwliajwa, japi diachwɔajnakolax Dios pejjiwpi.

¹⁷ Xan naewɔajnajx xot Jesús pejwɔajan, asew jiw pin-iaveces xabich naselt wut, namatwɔajxakolbala. Japawajelan jiw taen wut, pajut chiekal matabija xan Jesúsliajwa nabistaxponan. Samata, xan kaes nejxasinka-enil asew jiw najumchiliajwa: "Pablo Jesúsliajwa nabistpona-el" –nachiliajwa.

¹⁸ Takoew, wajpaklon Jesucristo kawɔajnajx puexa xamal kajachawaesliajwa. ¡Jasox nej ja-aech' xamalliajwa!

Pablo lelpox carta Éfeso paklowaxpijwliajwa

Pablo lelpox carta Éfeso paklowaxpijwliajwa

¹ Xan Pablo, Dios namakafit Jesucristo pej-apóstol nadofaliajwan. Lelx ampox carta xamal Éfeso paklowaxpijwamliajwa, Jesucristo pejwuaian naexasitampimliajwa.

² Xan waj-ax Dios kawuajnx, wajpaklon Jesucristobej, xamal kajachawaesliajwa chiekal duilaliajwam, asew jiw suapich.

Dios kajachawaetpox naexasiti Jesucristo pejwuaian

³ J̄xatis jumchiyaxaes Dios, japon wajpaklon Jesucristo pax: “Xam xabich pachaemam” —chiyaxaes! Dios nakkajachawaesful puexa nejmach xatisliajwa chiekal pachaemaliajwa japonxotse, naexasisfulas xot Jesucristo pejwuaian.

⁴ Chajiakolaxtat, Dios ampathat is-el wutfuk, xatis nakmakanoton Jesucristo pejiwaliajwas, Dios pejwuaianale bu wuaianjilaliajwas.

⁵ Dios naknejxasink xot, japon chajia nejchaxoel xatis japon paxiliajwas, asamatkoi Jesucristo tapaxael xot xatis babijaxan isaspoخانliajwa. Samata, Dios japox nejxasink xot, Jesucristo tap xatis babijaxan isaspoخانliajwa.

⁶ Samata, amwutjel xatis pomatkoicha jumtis Diosliajwa: “Xam xabich pachaemam, nabeltaenam xot” —tis xatis japonliajwa. Jasoxtat Dios xatis nakbeltaen paxulan Jesucristo, xabich nejxasinkpon, pijaxtat.

⁷ Dios xabich naknejxasink xot, paxulan to'a tapaliajwa cruztat. Samata, xatis babijaxan isaspoخان ajil Diosliajwa.

⁸ Ja-aech wut, chiekal matabijas Dios xabich naknejxasinkpox. Ja-aech wutbej, Dios naktapaei pejjamechan chiekal matabijaliajwas.

⁹ Dios chajia nejchaxoel asamatkoi to'aliajwapon Cristo, japon tato'laliajwa puexa ampathatpijiw. Japox majt chinax kaen aton matabijs-elfuk. Dios xatis naktapaei japox chiekal matabijaliajwas.

¹⁰ Japoxlap asamatkoi jachiyaxael. Japamatkoi wut, Dios tapaeyaxael Jesucristo puexa tato'laliajwa ampathatpijiw, Diosxotsepibej.

¹¹ Xatis nalaela-esal wutfuk, Dios chajia nakmakanot Jesucristo pejiwaliajwas. Samata, Dios naktapaeiyaxael pomatkoicha duilaliajwas japonxotse, Cristo suapich. Japoxlap chajiakolaxtat Dios nejchaxoel.

¹² Xanal, judios, matxoela naexasitx Jesucristo pejwuaian. Samata, xanal jum-an Diosliajwa: “Xam xabich pachaemam” —an, japon xajur xot puexa isliajwa.

¹³ Xamalbej, judios-emilpim, jumtaenam wut chimiawuaian, Cristo pejwuaian, diachwuaianakolaxpox, naexasitam japawuaian Dios xamal bu weliajwa. Japawuaian naexasitam wut, Dios to'ak Espiritu Santo xamalxotaliajwa kajachawaesliajwabej, chiekal matabijaliajwam xamal japon pejiwampox. Ja-aech, Espiritu Santo xamalxot pask wut, Dios jumdutpox pat xotlisoخ xamalxot.

¹⁴ Espiritu Santo wajmatpuatanxot. Samata, chiekal matabijas diachwuaianakolax pomatkoicha duilaxaes Diosxotse. Dios nakchaxduiyaxaelbej puexa xatisliajwa owapipon, wejewliajwa. Samata, xatis jumtis Diosliajwa: “Xam xabich pachaemam” —tis, japon xajur xot puexa isliajwa. Asew jiw, we'ppifuk naexasisliajwa Jesús pejwuaian, japi puexa naexasit wut Jesús pejwuaian, Dios japoxan nakchaxduiyaxael, owapipon wejewliajwa.

Pablo kawuajanpox Dios, Jesús pejwuaian naexasiti chiekal matabijaliajwa

¹⁵ Xan xamal wultaenx chiekal naexasitampox wajpaklon Jesús pejwuaian. Wultaenxbej nejxasinkampox puexa Dios pejiw.

¹⁶ Samata, xan pomatkoicha Dios kawuajnx xamalliajwa. Kawuajnx wut, jum-an Diosliajwa: “Gracias-an, Éfeso paklowaxpijwbej naexasit xot Jesucristo pejwuaian” —an Diosliajwa.

¹⁷ Dios, athuxotsepon, japon wajpaklon Jesucristo pax, xabich pachaem. Dios kawuajnx wut xamalliajwa, Dios jum-an Espiritu Santo xamal kajachawaesliajwa Dios chiekal matabijaliajwam.

¹⁸ Dios kawuajnxbej xamal chiekal matabijaliajwam Dios chaxduiyaxaelpox. Xabich pachaem japox, xamal Dios pejiwam wuaianwetampox.

¹⁹⁻²⁰ Dios kawuajnxbej xamal chiekal matabijaliajwam, japon xabich mamnik. Samata, Dios xajur nakkajachawaesliajwa, Jesucristo pejwuaian naexasichpis. Cristo tap wut, Dios mat-echpon pejme dukaliajwa. Ja-aech wut, Dios itpaei pejpamamax. Do jawux, paxulan bu'folon athu poxase ekaliajwa japon pejpoklalel, tato'laliajwabejpon, japon suapich.

²¹ Samata, amwätjel Jesús kaes paklon. Me-ama puexa tato'alpi, athuxotsepi, ampathat-pijiwbej, jachi-el Jesús. Pomatkoicha tato'laxaelon.

²² Dios tapaei Cristo puexa tato'lalajwa. Samata, Cristo puexa jiw tato'lafal. Cristo tato'lafalbej puexa japon pejwajaan naexasitpi.

²³ Cristo pejwajaan naexasiti, puexa japi jiw Cristo pejbu't wut, ja-aechi. Samata, Cristo japixot. Japon xajur puexa isliajwa athuxot, ampathatxotbej.

2

Dios bu'wiapox jiw, xabich nejxasink xoton

¹ Xamal majt babijaxan isfulam wut, me-ama patäpa, ja-am Diosliajwa.

² Ja-am wut, xamal duilam, me-ama ampathatpijw, isfulam xot Satanás tato'alpoxan. Satanás puexa dep tato'al. Japi, dep, pothata xajur. Nanuamtbej athu. Satanás tato'albej jiw, naexasis-elpi Dios, babijaxan isliajwa.

³ Xatis majt, me-ama asew jiw, japi Dios matabija-elpi wut, jatis. Jatis wut, isfulas babijaxan, wajut isasiaspoxan. Me-ama asew jiw, Dios xabich kastikaxespi, Dios nak-jachisiabej xatisliajwa, nakkastikasias wut.

⁴ Jatis wut, Dios nakiowa nakkeltaefal, xabich naknejxasink xoton.

⁵ Xatis majt xabich babijaxan isfulas xot, me-ama patupawas wut, jatis Diosliajwa. Amwätjel xatis Jesús pejiws. Samata, xatis, Jesús suapich, me-ama Dios nakmat-ia wut, jatis pejme duilalajwas. Dios nakbeltaen xot, nakbu'wia.

⁶ Asamatkoi Dios xatisbej nakmat-eyaxael pejme duilalajwas. Me-ama Jesús mat-ech pejme dukalajwa, jachiyaxaelbej Dios xatisliajwa, Jesús suapich, chalakalajwas Diosxotse naktato'lalajwas.

⁷ Jasox Dios jachiyaxael xatisliajwa, puexa jiw pajut chiekal matabijalajwa, diachwajnakolax Dios xabich naknejxasink. Nakkeltaenbejpon, Jesucristo tär xot xatisliajwa.

⁸ Dios nakbeltaen xot, nakbu'wia, naexasich xot Jesús pejwajaan. Samata, xatis kaenanula jumchiyaxisal: "Dios nakbu'wia, isas xot pachaempoxankal" —chiyaxisal, Dios nakbu'wia xot malech.

⁹ Dios nakbu'we-el, isas xot pachaempoxan. Samata, [kaenanula nabej jumchitis: "Dios nabu'wia, pachaempoxankal tajut tajaxtat isx xot" —nabej chitis!

¹⁰ Dios nakbu'wia Jesucristo pejiwjalajwas, xatisbej isliajwas pachaempoxankal. Dios japox chajia nejchaxoel xatisliajwa, xatis nalaela-esal wutfak.

Chiekal duilpox Jesús pejwajaan naexasiti, asew jiw suapich, kajachawaech xoti Jesús

¹¹ Xamal, judíos-emilpim, nejchaxoelam wut, [nejchaxoelde ampo! Judíos, japi circuncidaspi Dios pejmarkaxliajwa, japi xamal majt nejwesla, xamal circuncida-emil xot.

¹² Jawut xamal matabija-emilfak Jesucristo pejwajaan naexasisliajwam. Majt xamal Dios pejiwa-emil. Me-ama judíos, jachi-emil. Matabija-emilbej Dios jumdutpox xamalbej bu'welajwa.

¹³ Xamal majt Dios matabija-emil. Pe amwätjel, Cristo tär xot xamallajwa, japon pejiwam. Chiekal matabijambej Dios.

¹⁴ Xanal judíos, xamal judíos-emilpimbej, amwätjel Jesucristo nakkajachawaet xot, me-ama koews wut, jatis. Samata, amwätjel kaemuch. Xanal judíos, xamal judíos-emilpimbej, majt xatis nakaewa nanejweslas. Pe amwätjel, japox chiekal toep, Cristo tär xot cruztat xatis babijaxan isaspoxanliajwa.

¹⁵ Cristo tär xot xatis babijaxan isaspoxanliajwa, Moisés chajia lelpox tato'alpox, japox toep. Samata, xanal judíos, xamal judíos-emilpim suapich, xatis Cristo pejiws, naexasich xot japon pejwajaan. Jatis wut, kaenanula xatis chiekal pachaems Diosliajwa, Cristo tär xot xatisliajwa.

¹⁶ Cristo tär wut cruztat, xanal judíos, xamal judíos-emilpimbej, kofas nakaewa xatis nanejweslaspo kaemutalajwas. Jawutbej xatis chiekal pachaems Diosliajwa, naexasich xot Jesucristo pejwajaan.

¹⁷ Cristo pat wut ampathatat, xapaton chimiawajaan xatis kaenejchaxoelaxliajwas, chiekal duilalajwas, asew jiw suapich. Japon naewwajaan japawwajaan judíos-elpi. Japi jiw majt Dios matabija-el. Naewwajaanbejpon judíos. Judíos chajia chiekal matabija Dios pejjamechan.

¹⁸ Xamal judíos-emilpim, xanal judíos-pinbej, Jesucristo tär xot puexa xatisliajwa, Dios pajut naktapaei japon Dios kawwajnalajwas. Jatis wut, Espíritu Santo nakkajachawaesful Dios kawwajnalajwas.

¹⁹ Samata, xamal judíos-emilpim, amwütjel, me-ama asajiwa-emil wüt, jachi-emil Diosliajwa. Amwütjel Dios pejiwam. Me-ama xanal judíos, ja-ambej xamal amwütjel, judíos-emilpim. Samata, Diosliajwa, xatis chiekal koews, Dios pejiwxs xot.

²⁰ Xamal, me-ama Dios pejba wüt, ja-am Diosliajwa. Jesucristobej, me-ama ia't, matxoe-lapijt batuaakso' tpijaliajwa, kaes pejme pachaempot, ja-aech Jesús. Apóstoles, profetasbej, xamal matxoe-la naewuajan xot Dios pejjamechan, japi, me-ama asew ia' wüt, matxoe-la-owaspi satat ba chiekal mamnikaliajwa, ja-aech japi jiw.

²¹ Xatis Cristo pejwajan naexasich xot, chiekal kaemuch. Samata, xatis, me-ama Dios pejtemploba wüt, jatis Diosliajwa.

²² Xamalbej, asew jiw swapich, Cristo pejiwam xot, me-ama Dios pejtemploba wüt, ja-am, Espíritu Santo duk xot nejmatruatantat.

3

Pablo to'aspoX naewuajnalijwa judíos-elpi chimiuwajan, Jesús pejwajan

¹ Xan Pablo, jiw jebatat najia, xamal, judíos-emilpim, naewuajnx xot chimiuwajan, Jesús pejwajan.

² Xamal chiekal matabijam. Dios nato'a xamal naewuajnalijwan japawajan, xabich pachaem xoton xanliajwa.

³ Dios nejchaxoel xamalbej beltaelajwa. Japoxliajwa Dios xan natapaei chiekal matabij-sliajwan, majt jiw matabija-elpoxfuk. Japoxliajwa amwütjel ampacartaxot kaejamechan lelx.

⁴ Xamal amprox carta xaljowam wüt, najut chiekal matabijaxaelam Cristo pejwajan xan matabijtaxpox. Japawajan xamallijwabej.

⁵ Majt Dios tapae-el japawajan asew jiw matabijaliajwa. Amwütjel Dios tapaei apóstoles, profetasbej, japi matabijaliajwa japawajan, Espíritu Santo kajachawaech xoti.

⁶ Majt japawajan chiekal maliach. Chajia jiw matabija-el. Japawajan amwüt lelae-a-len. Judíos bu'weyaxaes Dios. Jachiyaxaesbej judíos-elpi, naexasit wüti Jesús pejwajan. Amwütjel judíos-elpi, judíosbej, japi Cristo pejwajan naexasiti, puexa japi, Cristo pejbu't wüt, ja-aechi. Samata, Dios chaxduiyaxaes chajia jumdutpox judíos pejwajnapijiwliajwa.

⁷ Dios nato'a chimiuwajan, Jesús pejwajan, jiw naewuajnafalialijwan, xan nabeltaen xoton. Dios nakajachawaesfulbej pejbichax isliajwan.

⁸ Xan kaes pachaema-enil. Me-ama puexa asew, Dios pejiw, jachi-enil. Pe nakiowa, Dios natapaei naewuajnalijwan judíos-elpi chimiuwajan, Jesús pejwajan. Xatis chiekal matabijaxisal Jesúsliajwa, japon xabich pachaempon.

⁹ Dios, puexa ampathatat ispon, japon xan nato'a naewuajnalijwan puexa jiw jumatabijaliajwa Dios bu'weyaxaespoX, judíos-elpi-bej. Dios majt tapae-el puexa jiw matabijaliajwa japawajan.

¹⁰ Samata, amwütjel Jesús pejwajan naexasiti, japi naewuajnafal wüt japawajan, ja-aech wüt, ángeles, tato'alpi Diosxotse, pajut chiekal matabijaxael Dios puexa matabijtpox.

¹¹ Dios chajia nejchaxoel to'aliajwapon Jesucristo ampathat poxasik tupalijwapon puexa jiwliajwa. Do japox diachwajnakolax ja-aechlisox.

¹² Amwütjel xatis Jesús pejwajan naexasich xot, Dios nejchachaemil. Samata, wajdala-el Dios kawuajnalijwas.

¹³ Samata, xamal jum-an nejchaemilasamatam, jiw jebatat najia xoti nabijasliajwan, xamal, judíos-emilpim, naewuajnx xot. Xan amxotx pachaemaliajwa xamallijwa. Samata, xamal nejchachaemilde!

Cristo xabich naknejxasinkpox

¹⁴ Xan nejchaxoelX wüt Dios bu'weyaxaelpoxliajwa xamal judíos-emilpim, xan brixtat nukx waj-ax Dios kawuajnalijwan xamallijwa.

¹⁵ Japon kaen, waj-ax Dios. Puexa athxotsepi, puexa jiw ampathatpijwabej, waj-ax Dios isas xot, duilafal.

¹⁶ Dios xabich mamnik. Xan Dios kawuajnx Espíritu Santo xamal kajachawaesfulalijwa, kaes Dios chiekal xanaboejalijwam.

¹⁷ Dios kawuajnxbej xamal chiekal Cristo xanaboejalijwam pomatkoicha, nejxas-inkalijwambej asew, naexasiti Jesús pejwajan.

¹⁸⁻¹⁹ Dios kawuajnxbej xamal, puexa asew, Jesús pejwajan naexasiti swapich, chiekal matabijaliajwam Jesús xabich xatis naknejxasinkpox. Xatis chiekal matabijaxisal Jesús naknejxasinkpox. Xamal japox chiekal matabijaxaelam wüt, me-ama Dios nejchaxoel pachaempoxan, xamalbej jachiyaxaelam.

²⁰ Xatis jumtis Diosliajwa: “Xam xabich pachaemam” —tis. Dios xabich kaes xajup nakkajachawaesliajwa. Samata, wuljows wut nakkajachawaesliajwa, nakkajachawaes-elon wuljowspoxtat. Dios kaes pejme nakkajachawaet wuljowspoxliajwa. Japonbej ma inejchaxoelso'do', japoxtat nakkajachawaes-elon. Kaes pejme nakkajachawaeton. Dios nakkajachawaesful amwutjel xatis chiekal duilaliajwas, me-ama japon nejxasink.

²¹ Pomatkoicha xatis jumtis Diosliajwa: “Xam xabich pachaemam” —tis, Dios pejiwjs xot. Japox jumtis, Dios nakbu'wia xot, Jesucristo tup wut xatisliajwa.

4

Chiekal kaenejchaxoelapox Jesús pejwuaajan naexasiti, Espiritu Santo kajachawaech xot

¹ Xan jiw najia jiw jebatat, asew jiw naewuajna xot Jesucristo pejwuaajan. Xamal jum-an chiekal duilaliajwam, me-ama Dios xamal tato'al, japon xamal makanot xot pejiwualiajwam.

² Kaenanula xamal najutliajwa nejchaxoelam wut, ¡chiekal nejchaxoelde ampox: “Xan kaes pejme pachaema-enil. Me-ama asew jiw, jachi-enil” —amde, najut nejchaxoelam wut! ¡Pachaemdebej asew jiwliajwa! ¡Xamal kamta nabej nalale', asew jiw babijaxan is wut xamalliajwa! ¡Xamal nakaewa naboejtalia'e, nakaewa chiekal nanexasinkam xot!

³ Espiritu Santo xamal kajachawaet xot, kaemutam. Samata, ¡kaenejchaxoelaxde chiekal duilaliajwam bu'wuaajanjilaliajwam!

⁴ Xamal Cristo pejiwam xot, japon suapich, kaebu'tam wut, ja-am. Kaen Espiritu Santo xamal nejmatpuatanxotbej. Xamal wuajnewetam Dios chajia jumdutpox, xamal chaxduyaxaelpox.

⁵ Xamalbej, kaen nejpaklon. Japon xamal chiekal xanaboejam bu'welijaw. Xamal bautisam, kaen Cristo pejiwam xot.

⁶ Xamalbej kaen nejDios. Japonbej nej-ax. Puexa xamal tato'alpon. Japonbej xamal chalaful. Xamal kajachawaesfulbejpon.

⁷ Cristo nakxadiajk kaenanula bichaxan xatis nabichliajwas, japon pejbichax. Japon nakkajachawaetbej xajupaliajwas, nabistas wut japon pejbichax.

⁸ Samata, Dios pejjamechan, chajia lelspx, jum-aech wut, jum-aechox Cristoliajwa: “Cristo athu poxase wut, japon matxoela malecha padaelmajiw. Pejiw, waelapipon ampathatat, japi kajachawaesfulaxaelon japi xajupaliajwa, nabist wut Diosliajwa” —aechox Cristoliajwa.

⁹ Dios pejjamechan, chajia lelspx, jum-aech wut, jum-aechox Cristoliajwa: “Kaxa nawiasaxoeyon athu poxase” —aechox, majt fuloek xoton ampathat poxasik.

¹⁰ Samata, chiekal matabijas athuotsik fuloekpon, japon pajut pejme kaxa nawiasa tato'laliajwa Diosxotsepi, ampathatpijiwbej.

¹¹ Jesús makanot pejiwxot asew apóstolesliajwa, asew profetasliawabej. Makanotbejpon asew japon pejwuaajan naewuajnalijwa potuajnuchanpijiw. Makanotbejpon asew pastoresliajwa. Makanotbejpon asew japi chanaekabuanalijwa asew jiw japon pejwuaajan.

¹² Jesús jasoxtat pejiw makanot asew naewuajnalijwa japon pejwuaajan. Do jawux, japibej asew jiw naewuajna xael japon pejwuaajan. Ja-aech wut, asew, Jesús pejwuaajan naexasiti, kaes chiekal xanaboejaxaeli Jesús.

¹³ Do ja-aech wut, puexa xatis kaenejchaxoelaxaes Cristo xanaboejaspoxliajwa. Jawutbej, chiekal matabijaxaes Dios paxulan, japon Cristo. Jatis wutbej, chiekal duilaxaes. Kaes pejme chiekal Dios xanaboejaxaesbej. Me-ama Cristo chiekal Dios xanaboejt, jachiyaxaesbej xatis.

¹⁴ Xatis chiekal xanaboejas xot Cristo, tampoela-el xatis naknaekichachajbaliajwa, me-ama yamxi. Asew jiw chiekal matabija chanaekabuana xat naekichachajabaliajwa asew jiw. Japi jiw chanaekabuana wut pajelnaewuajna x, me-ama Dios pejjamechan wut, ja-aechipox. Japi jiw nejxasink xatis naexasisliajwas japi naewuajnapox naknaekichachajbaxtat.

¹⁵ Xatis jiw nejxasinkas xot, naewuajna xaes diachwuajnakolaxtat Diosliajwa. Jatis wut, chiekal pachaemaxaes. Me-ama Jesús wajpaklon, jachiyaxaes pachaemspox.

¹⁶ Puexa xatis, Jesús pejwuaajan naexasichpis, Cristo pejiwjs. Samata, xatis, japon suapich, kaebu'tas wut, jatis. Wajbu'anxot xabich maenk pawiwulan, pathiwulanbej. Pe puexa chiekal najupa-el. Japoxanxot, kaenanula wajbu'anxot, xabich pachaem asaxanliajwa. Jatisbej xatis. Kaenanula isas Cristo naktato'alpoxan. Xatis nakaewa nakajachawaesaxaes bichaxan isaspoxanliajwa. Nakaewa nanexasinkaxaesbej kaes pachaemaliajwas, me-ama wajpaklon Jesús, jachiliajwas xatis.

Jesús pejwuaajan naexasiti nejchaxoelpox, pajelnejchaxoelaxan, chiekal duilaliajwa

¹⁷ Xan lelx ampox xamalliajwa, wajpaklon Jesucristo nato'a xot. ¡Nabej is babijaxan! Me-ama asew jiw, Dios matabija-elpi, xabich babijaxan is, ¡xamal nabej ja-aeche'! Babijaxan ispi xabich asaxan nejchaxoel, pachaema-elpoxan Diosliajwa.

¹⁸ Japi nejxasinka-el matabijaliajwa Dios pejjamechan. Nejxasinka-elbejpi matabijaliajwa pajelnejchaxoelaxan chiekal duilaliajwa. Japi pejnechaxoelaxan itkua'nikxot, nejxasinka-elbejpi matabijaliajwa Dios.

¹⁹ Babijaxan is wutbejpi, chinax padala-el. Samata, puexa xabich pachaema-elpoxan isful. Kofa-eli japoxan.

²⁰ Xamal Cristo pejwuajan chiekal matabijam xot, ¡nabej is babijaxan! Me-ama japi jiw, ¡nabej ja-aeche'!

²¹ Diachwuajnakolax xamal jumtaenam, asew naewuajan wut Jesucristo pejwuajan. Chiekal matabijambej japawuajan, diachwuajnakolaxpox.

²² Samata, majt babijaxan isampoxan, ¡ma amwut kofim! Xamal japoxanliajwa nejchaxoelam wut, japoxan xamal naekichachajbaxael isliajwam babijaxan.

²³ Samata, ¡nejchaxoelde pachaempoxan isliajwam! Me-ama asew jiw, naexasiti Jesús pejwuajan, nejchaxoel pajelnejchaxoelaxan, ¡xamalbej ja-amde, nejchaxoelam wut!

²⁴ ¡Nejchaxoelde pajelnejchaxoelaxan! Me-ama Dios xabich pachaem, ¡xamalbej ja-amde! ¡Isfulde puexa pachaempoxan, me-ama Dios tato'al!

²⁵ Samata, ¡kaes asew jiw nabej kichachajbe'! ¡Amwutjel diachwuajnakolaxpoxkal nakaewaliajwa najum-amsfulde, xatis chiekal kaemuch xot!

²⁶ Xamal nalala wut, ¡babijaxan nabej is! Juimt tuila wut, ¡kaes nabej nalale'!

²⁷ Xamal nalala wut, ¡nabej tapae' Satanás naekichachajbajaliajwa, babijax isasamatam!

²⁸ Xamal natkowapijwam wut, ¡ma amwut kofim natkowampoxan! ¡Najut chiekal nabisde! Dios nejxasink xamal najut nabichliajwam bichaxn, pachaempoxan. Ja-am wut, xajupaxaelam kajachawaesliajwam jiw kijila.

²⁹ ¡Nabej jum-aeche'bej babejjamechan! ¡jum-amdelax chimiajamechan! Ja-am wut, asew jiw kajachawaesaxaelam japi jiw kaes Dios xanaboelijaliajwa.

³⁰ ¡Nabej is babijaxan Espiritu Santo nejxaejwasamatas xamalliajwa! ¡Nabej jum-aeche'bej babejjamechan! Dios to'a Espiritu Santo xamal nejmatpuatanxotaliajwa, kajachawaesliajwabej chiekal matabijaliajwam japon pejjiwampox. Samata, asamatkoi, wajpaklon Jesucristo pejme pask wut, xatis nakbuflaeyaxaelon atha poxase.

³¹ ¡Xamal kofim piach nejchaxoelampox asew babijaxan ispi liajwa xamalliajwa! ¡Xabich piach nabej ulatae'bej asew jiw! ¡Nabej losbej asew jiw! ¡Nabej bu'wuajanpa'e'bej asew jiw! ¡Kofimbej nejmachbabijaxan!

³² ¡Isfulade pachaempoxan nakaewaliajwa! Pe kaen aton babijax is wut, ¡beltaem japoxliajwa! Dios xamal beltaen babijaxan isampoxanliajwa, Jesucristo tup xot. Samata, ¡xamalbej beltaem, asew jiw babijaxan is wut xamalliajwa!

5

Jesús pejwuajan naexasiti machiyaxaelpox Dios nejchachaemlialiajwa japiliajwa

¹ Dios xamal xabich nejxasink, japon paxim xot. Samata, xamal isfulaxaelam pachaempoxan. Me-ama Dios isful pachaempoxan, ¡xamalbej ja-amsfulde!

² ¡Nejxasinkafulde asew jiw! Me-ama Jesucristo naknejxasink, ¡ja-amsfuldebej xamal asew jiw liajwa! Japon xatis naknejxasink xot, pajut natapaeipon asajiw boesaliajwas nakwemosliajwa xatis babijaxan isaspoxanliajwa, Dios nakbeltaeliajwa. Samata, Dios nejchachaemil, Jesús tup wut xatisliajwa.

³ Xamal Dios pejjiwam xot, ¡nabej is puexa pachaema-elpoxan, asew jiw xamal bu'wuajanpaesamata! Samata, nejchaxoelam wut, ¡nabej nejchaxoele' asew watho' bu'moejsaxan, nijwa-elpow! Nejchaxoelam wut, ¡nabej nejchaxoele'bej asew jiw pejew kinosliajwam!

⁴ ¡Nabej jum-aeche'bej babejjamechan, wajdalaxaelpoxan! ¡Nabej jum-aeche'bej nejliaklaxan! Japoxan jum-am wut, japoxan pachaemaxil. ¡jum-amdelax Diosliajwa: "Dios, xam xabich pachaemam, nakajachawaeta'm xot" —amde Diosliajwa!

⁵ Xamal chiekal matabijam. Asew poejiw pijowpi, asew watho' naebu'moejt wuti, japi poejiw pasaxil Jesucristoxotse, pax swapich, tato'alxotse. Asaxan pachaema-elpoxan ispi bej, japibej pasaxil jaxotse. Asew pejew kinosasiapi, japibej pasaxil Diosxotse, kaes nejxasink xoti pejewkal. Pe japi nejxasinka-el Dios.

⁶ ¡Nabej tapae'bej asew jiw xamal naekichachajbajaliajwa isliajwam Dios fiatpoxan! Jiw, ispi japoxan, Dios kastikaxaesi.

⁷ ¡Japi ispojan xamal nabej is!

⁸ Xamal majt babijaxan isfulam, chiekal naexasis-emil wutɸak Dios. Samata, majt nejnechaxoelaxan, me-ama itkua'nik wut, ja-aech. Amwutjel chiekal duilam, Dios pejjijwam xot. Samata, amwutjel nejnechaxoelaxan, me-ama itliak, naexasitam xot Jesús pejjuwajan.

⁹ Xatis laelpas wut, chiekal laelpaxaes, me-ama Dios nejxasink. Isfulaxaesbej pachaempoxan. Nakaewa najumchiyaxaesbej diachwujnakolaxpoxan.

¹⁰ Nejchaxoelam wut, nejchaxoelde isliajwam Dios nejxasinkpoxan!

¹¹ Naexasis-elpi Jesús pejjuwajan, japi babijaxan isful wut, jxamal japi nabej nakxatae' japoxan isasamatam! jXamallax japi jiw naewuajande kofaliajwa babijaxan ispoxan!

¹² Japi jiw maliach ispoxan, kaen aton jumchiyaxael wut asew jiwliajwa, japon aton xabich padalaxael japoxanliajwa.

¹³ Xamal naewuajnam wut japi jiw Jesús pejjuwajan, ja-am wut, japi pajut matabijaxael babijaxan ispoxan.

¹⁴ Samata, ja-aech wut, japilax isaxael pachaempoxan. Chajia lelspos jum-aech wut, jum-aechox:

“Xamal babijaxan isfulam wut, napelsaxaelam Diosliajwa. Samata, jkofim babijaxan isampoxan! Dios xamal bu'weliajwa, Cristo tɸp” —aechox.

¹⁵ Samata, duilam wut, jchiekal taem babijaxan isasamatam! jNabej duile', me-ama Jesús pejjuwajan naexasis-eli! jChiekal duilafulde! Me-ama chiekal matabijapi Jesús pejjuwajan, jja-amde, xamal duilafulam wut!

¹⁶ Ja-am wut, xajupaxaelam isliajwam pachaempoxan. jJapoxan isfulde, xabich asew jiw babijaxan isful xot!

¹⁷ Xamal, me-ama nejliaklawam wut, jnabej ja-aech'e! jMajt chiekal nejchaxoelde isaxaelampoxan, isliajwam Dios nejxasinkpoxan!

¹⁸ jXamal saxa nabej fe' babijaxan isasamatam! jXamallax naexasisfulde Espiritu Santo tato'alpoxan, chiekal duilalajwam, me-ama Dios nejxasink!

¹⁹ Asew jiw swapich, natamejlam wut, jjajuim Diosliajwa Dios pejjajui, xabich nejchachaemlam xot Diosliajwa!

²⁰ Waj-ax Dios naktaen, kawuajnas wut, naexasich xot Jesús pejjuwajan. Samata, pomatkoicha Dios graciaschiyaxaes puexa japon ispoxanliajwa xatishliajwa.

Machiyaxaelpox Jesús pejjuwajan naexasiti chiekal duilalajwa, pejbapijiw swapich

²¹ Nakaewa natato'lam wut, jchiekal na-ow-amde xamalxot wuajan ajilalialjwa! jJa-amde, xamal xabich sitaenam xot Cristo!

²² Xamal watho'am, nejmol tato'al wut, jow-amde! jNaexasisfulde, nejmol tato'al wut! Me-ama wajpaklon Jesucristo tato'alpox chiekal naexasisfulam wut, jja-amsfulde xamal watho'am nejmollialjwa!

²³ Dios tapaei Cristo tato'lalialjwa jiw naexasiti japon pejjuwajan. Dios tapaeibej kaenanula poejiw tato'lalialjwa pejwatho'. Jesucristo tɸp xot, nakwemot xatis babijaxan isaspoxanliajwa Dios nakbu'weliajwa. Samata, puexa xatis Cristo pejjijws, naexasich xot Cristo pejjuwajan.

²⁴ Xatis, naexasichpis Jesús pejjuwajan, naexasisaxaes Jesucristo tato'alpox. Watho'bej kaenanula naexasisaxael pamal tato'laspos.

²⁵ Xamal poejwam, nejxasinkde nejwatho'! Me-ama Jesucristo xatis kaenanula naknejasink, naexasichpis japon pejjuwajan, jja-amsfulde xamal poejwam, nejxasinkam wut nejwatho'! Japon pajut natapaei asajiw boesaliajwas. Tɸp wut, nakwemoton xatis babijaxan isaspoxanliajwa.

²⁶ Jesucristo jasoxtat nakwemot xatis babijaxan isaspoxanliajwa, naexasichpis japon pejjuwajan matabijalialjwas, pachaemalialjwas Diosliajwa. Xatis nakbautisa wut, japox jiw chiekal matabijalialjwa puexa xatis babijaxan isaspoxan nakwe-ajilpox Diosliajwa.

²⁷ Jesucristo pejme athalesik pask wut, japon taesia puexa xatis chiekal naexasichpox japon pejjuwajan.

²⁸ Samata, xamal poejwam, me-ama najut nanejxasinkam wut, jja-amsfuldebej kaenanula nejwatho'liajwa! Pijow nejxasinkpon, japon atonbej pajutliajwa chiekal nanejxasink.

²⁹ Kaen aton pajutliajwa nanejwesla-el. Japon aton pajutliajwa chiekal natataeful. Japon chiekal xaelbej naxaeyaxan mamnikaliajwa. Jatisbej xatis, Cristo pejjuwajan naexasichpis. Cristo chiekal naktataeflul.

³⁰ Puexa xatis, Cristo pejbu't wut, jatis. Samata, japon naktataeflul.

³¹ Dios pejjamechan, chajia lelspos, jum-aech wut, jum-aechox: “Aton pawis fit wut, pax, penxot dukaxil. Japon pejlel dukaxael, pijow swapich, japi pajut natataeflialjwa. Majt japi kolenje. Japi nanot wut, me-ama kaen wut, ja-aechlisi” —aech Dios pejjamechan.

³² Dios pejjamechan, chajia lelspos, japox jum-aech wut, xabich pachaem xatis matabijalialjwas. Majt matabija-esal japox. Japox jum-aechbej xatis amwutjel matabijalialjwas

Cristo pejiwspox. Samata, xatis Jesús pejwajaan naexasichpis, Diosliajwa, Cristo swapich, kaebu'tas wut, jatis.

³³ Samata, xamal poejwam, ¡chiekal nejxasinkafulde nejwatho'! Me-ama xamal najut nanejxasinkam wut, ¡ja-amsfulde! ¡Watho'bej, nej sitae' pamaljiw!

6

¹ Xamal yamxim, ¡kaenanula nej-ax, nej-enbej, chiekal naexasisfulde! ¡ja-amsfulde, xamal naexasitam xot Jesús pejwajaan! Japox Dios pejjamechan jum-aech xamal yamxim chiekal naexasisliajwam nej-ax, nej-enbej.

²⁻³ Dios pejjamechan, chajia lelspx, jum-aech wut, jum-aechox: “¡Sitaem nej-axjiw, nej-enjiwbej! Ja-amsfulam wut, puexa pachaemaxael xamalliajwa. Pin-iawaechan laelpaxaelambej ampathatat” —aech Dios pejjamechan. Dios to'a wut japox tato'lax, jumdutbejpon kajachawaesliajwa naexasitpi japox tato'lax.

⁴ Xamal paxjiwam, naxi to'am wut, ¡nabej tato'le' palaeyaxtat, naxibej palalasangata xamalliajwa! ¡Chiekal tato'alde naxi xamal chiekal naexasisliajwa, Dios nejchachaemlialiajwa xamalliajwa!

⁵ Xamal esclavos, ¡chiekal naexasisfulde, nejpaklochow tato'al wut! Japi owam wut, ¡isde chiekal! ¡Pomatkoicha chiekal nabichfuldebej nejpaklochowliajwa! Me-ama Cristoliajwa nabistam wut, ¡ja-amsfulde, nejpaklochow tanbistam wut!

⁶ Asew jiw chiekal nabist, pejpaklochow tataeflas wut, pejpaklochow chiekal nejchachaemlialiajwa japiliajwa. Pe paklochow tataefla-esal wut, japi chiekal nabich-el. ¡Xamal jasox nabej ja-aeché! ¡Xamal chiekal nabisde! Me-ama Jesucristo pejiw chiekal nabist, ¡xamal ja-amde puexa nejpamamaxtat, nabistam wut nejpaklochowliajwa! Japoxlap Dios nejxasink xamal isliajwam.

⁷ Xamal asew jiwliajwa nabistam wut, ¡chiekal nabisde! Jawut, nejchaxoelam wut, ¡nejchaxoelde ampx: “Nabistax wut, nabichaxaelen, me-ama Cristoliajwa nabistax wut, jachiyaxaelen” —amde, nejchaxoelam wut! Me-ama majt xamal asbuan jumch asew jiwliajwa chiekal nabich-emil, ¡jasox nabej ja-aeché!, amwutjel nabistam wut!

⁸ Xamal esclavos, esclavos-emilpimbej, chiekal matabijam Dios pajut xamal chaxduiyaxael, kaenanula chiekal nabistam wut Jesúsliajwa.

⁹ Xamal paklochwam, ¡pachaemde namakjiwliajwa! ¡Nabej bu'athiye', namak tato'lam wut! Xamal paklochwam, nejchaxoelam wut, ¡nejchaxoelde ampx! Xamalbej nejpaklon. Japon Dios, athuxotsepon. Diosbej paklon namakliajwa. Dios puexa xatis chiekal naktaen. Samata, xatis kaenanula Dios nakkastikaxael, isas wut babijaxan. Samata, xamal namak tato'lam wut, ¡chiekal tato'alde!

Pajut chiekal natataflaxaelpox Jesús pejwajaan naexasiti, Satanás naekichachajbasamatas

¹⁰ Takoew, Dios pejiwam xot, ¡xamal kaes mamnikde Dios pijaxtat japon xanaboejam-poxliajwa!

¹¹ Soldaw nabeliajwa wut, patiya naxoei, padaelmajiw xua'balas wut xakolasamatas. Xamalbej jachiyaxaelam. ¡Dios chaxduwpxan naxoem mamnikaliajwam! Japoxan naxoeyam wut, Satanás xajupaxil xamal malechaliajwa, xapaeja wuton xamal babijax isliajwam.

¹² Xatis nabaes wut, nabe-esal, jiw swapich. Xatislax nabaes, taeyaxisalpi swapich. Japi, Satanás pejiwpi, “dep” —tispi. Japon jiw tato'al, babijaxan ispi ampathatat. Tato'albejpon puexa dep, nanuamtí pothata.

¹³ Samata, xamal nabeyax wuajna, ¡chiekal thilsfulde! ¡Dios chiekal xanaboejimbej! Ja-am wut, Satanás pijaxtat babijax wat wut, xamal xajupaxaelam chiekal mamnikaliajwam.

¹⁴ Soldaw patiya naxoei, padaelmajiw xua'balas wut xakolasamatas. Do jawux, padaelmajiw swapich, naba wuti, japi soldaw dukpaxil. Kaekawutat nuilpi nabeliajwa. Xamalbej, ¡ja-amde! Samata, ¡Dios chiekal xanaboejim, Satanás xapaeja wut malechasamata, chiekal xamal matabijam xot Dios pejjamechan, diachwuajnakolaxpox! ¡isfuldebej puexa pachaempoxan!

¹⁵ ¡Xamal chiekal thilsfulde naewuajnalijwam chimiawuajan, Jesús pejwajaan, jiw chiekal pachaemaliajwa Diosliajwa!

¹⁶ Soldaw xafol patiyaxan, pawalpox escudo, xat-elbalaliajwa, itkua'balaliajwabej japoxantat, padaelmajiw buyan tamduwpi, xapajaldan wut japilel. Xamal, me-ama soldaw, ¡ja-amsfulde! Dios chiekal xanaboejam-pox, me-ama escudos, jachiyaxael. Samata, ¡Dios chiekal xanaboejim xamal kajachawaesliajwa, Satanás xapaeja wut, xamal babijaxan is-elaliajwam!

¹⁷ Soldaw matlua'abej patiyaxan, pawəlpox casco, padaelmajiw matnaebijlas wut buy-atat xakolasamatas. Xamal naexasitampim Jesús pejwəajan Dios bu'weyaxael. Japox xamalliajwa, me-ama casco, ja-aech. Soldaw xafol espada padaelmajiw beliajwa. Xamalbej, me-ama japi, ja-amde! Dios pejjamechan, me-ama espada, ja-aech, Espíritu Santo chaxdutpowa, xamal Satanás malechaliajwam, xamal naekichachajbasia wəton.

¹⁸ ¡Xamal Dios kawəajande pomatkoicha! Me-ama Espíritu Santo xamal tato'al kawəajnalialjwam, ¡ja-amfulde! ¡Dios kawəajandebej puexa asew jiwliajwa, Dios pejjiwpi-liajwa!

¹⁹ ¡Dios kawəajandebej xanliajwabej nakajachawaesliajwa, naewəajnax wut judíos-elpi! ¡Dios kawəajandebej, xan tajlewla-elaliajwa japi naewəajnax wut chiekal jumatabijaliajwa chimiawəajan, majt matabija-elpox Dios bu'welialjwas!

²⁰ Dios nato'a jiw naewəajnalialjwan japawəajan, wəajan xananəamsan wut, jachiliajwan. Samata, xan amwətjel jiw jebatatax. ¡Xanliajwa Dios nawekawəajande tajlewasamata, asew jiw naewəajnax wut Diosliajwa!

Pablo saludos xato'apox, carta lelax kitoesliajwa wut

²¹ Wajkoewan Tíquico, puexa xatis nejxasinkaspon, japon xamalxot pa'a wut, puexa tajwəajan chapaeyaxaelon. Tíquico chiekal nakajachawaet, Dios pijax bichax isfalax wut.

²² Samata, xan to'ax Tíquico xamal poxade. Ja-aech wut, kofaxaelam xabich nejchaxoelampox xanliajwa.

²³ Waj-ax Dios, wajpaklon Jesucristobej, kawəajnax xamal kajachawaesliajwa chiekal duillialjwam, asew jiw səapich. Kawəajnaxbej nakaewa nanejxasinkaliajwam, Dios xanaboejam xot.

²⁴ Xan Dios kawəajnaxbej japon kajachawaesliajwa puexa naexasiti Jesús pejwəajan, japi jiw, xabich nejxasinkpi wajpaklon Jesucristo.

Pablo lelpox carta Filipos paklowaxpijiwliajwa

Pablo lelpox carta Filipos paklowaxpijiwliajwa

¹ Xan Pablo, Timoteo s̄apich, nabistax Jesucristoliajwa. Lelx ampox carta xamal Filipos paklowaxpijwamliajwa. Dios pejjiwam, naexasitam xot Jesús pejw̄ujan. Ampox cartabej ancianosliajwa, diáconosliajwabej, japi xamalxotpi.

² Xan kaw̄ujnax waj-ax Dios, wajpaklon Jesucristobej, japi xamal kajachawaesliajwa, chiekal duilaliajwambej, asew jiw s̄apich.

Pablo Dios kaw̄ujanpox Jesús pejw̄ujan naexasitiliajwa

³⁻⁵ Nejchaxoelx w̄ut xamalliajwa, Diosliajwa gracias-an, japon xamal kajachawaet xot. Xamalxotx w̄ut, jelnaexasitam w̄ut Jesús pejw̄ujan, xamal xan nakajachawaetam, asew jiw naew̄ujnaliajwan chimiaw̄ujan, Jesús pejw̄ujan. Amw̄utjelbej nakiowa nakajachawaesfulam. Samata, xan nejchachaemlax xamalliajwa, Dios kaw̄ujnax w̄ut.

⁶ Xan chiekal matabijtax, Dios xamalxot tuadut kajachawaesliajwa nejnejchaxoelxan pachaemaliajwa, isfulaliajwam pachaempoxan. Dios japox isfulaxael, hasta Jesucristo pejme fuloek w̄ut.

⁷ Puexa xan nejchaxoelxprovan xamalliajwa, xabich pachaem, xamal xabich nejxasinkax xot. Xan jiw jebatax w̄ut, jiw tato'alpi w̄ujnalelan w̄utbej, jaw̄ut xan jum-an japi paklochow chiekal najumtaeliajwa: “Chimiaw̄ujan, Jesús pejw̄ujan, diachw̄ujnakolax jiw bu'weliaw̄was” –an, naew̄ujnax w̄ut. Xamal plata naxto'am xanliajwa nakajachawaesliajwam, jiw naew̄ujnax w̄ut Jesús pejw̄ujan. Dios nabeltaen xot, nato'a Jesús pejw̄ujan jiw naew̄ujnaliajwan.

⁸ Dios matabijt, xamal xabich taesianpox, xabich nejxasinkax xot. Me-ama Jesús xamal xabich nejxasink, xanbej, ja-an, xamal nejxasinkax w̄ut.

⁹ Xan Dios kaw̄ujnax xamal nakaewa kaes chiekal nanejxasinkaliajwam. Dios kaw̄ujnaxbej xamal japon kaes chiekal matabijaliajwam.

¹⁰ Xamal ja-am w̄ut, matabijaxaelam isliajwam kaes pachaempoxan. Ja-am w̄ut, chiekal duilaxaelam. Samata, asamatkoi Cristo pejme pask w̄ut, xamal chiekal bu'w̄ujanjilaxaelam.

¹¹ Kaen Cristo xajup xamal kajachawaesliajwa isliajwam pachaempoxan. Ja-am w̄ut, xamal chiekal duilaxaelam. Samata, asew jiw Dios sitaeyaxael.

Pablo chiekal dukpox, Cristo pejw̄ujan naexasit xot

¹² Takoew, xan nejxasinkax xamal chiekal matabijaliajwam jumchiyaxaelenpox. Jiw jebatat xan najia, potujnucha kaes asew jiw naew̄ujnasamatan chimiaw̄ujan, Jesús pejw̄ujan. Pe nakiowa, xabich jiw kaes naexasisful Jesús pejw̄ujan, xan jiw jebatax w̄ut.

¹³ Puexa gobernador pejbapijiw, asew jiwbej, matabija jiw jebatat asew jiw xan najiapox, naew̄ujnafulax xot Cristo pejw̄ujan asew jiwliajwa.

¹⁴ Jesús pejw̄ujan naexasiti nawultaen w̄ut asew jiw xan najiapox jiw jebatat, japi kaes Dios xanaboewa kajachawaesliajwas. Samata, pejlewla-eli naew̄ujnafulaliajwa Jesús pejw̄ujan asew jiwliajwa.

¹⁵ Diachw̄ujnakolax asew jiw naew̄ujan Jesús pejw̄ujan, xan nanusasiowal xoti. Japi xabich kaes jiw naew̄ujan, nejxasink xoti jiw kaes sitaeliajwas. Me-ama xan jiw nasitaen w̄ut, jachi-elasiapi. Japi jiw xabich kaes nejxasink jiw sitaeliajwas. Asew jiw lax naew̄ujan Jesús pejw̄ujan, japi nejxasink xot asew jiwbej Jesús pejw̄ujan chiekal naexasisliajwa.

¹⁶ Japilax naew̄ujan asew jiw Jesús pejw̄ujan, xan nanejxasink xot. Japi pajut chiekal matabija, Dios natapaei jiw jebatat jiw najeliajwa, jaxotx w̄ut paklochow jumchiliajwan: “Chimiaw̄ujan, Jesús pejw̄ujan, diachw̄ujnakolax jiw bu'weliaw̄was” –chiliajwan paklochow.

¹⁷ Jiw, xan nanusasiowalpi Jesús pejw̄ujan naew̄ujnaxpox, japi xabich kaes naew̄ujan jiw, xabich kaes sitaeliajwas. Samata, nakaewa najum-aechi: “Amw̄utjel Pablo jiw jebatat nakwultaen w̄ut xabich xatis jiw naew̄ujnaspox Jesús pejw̄ujan, kaes xabich nejxaejwaxaeson” –na-aechi nakaewa.

¹⁸ Xan japoxliajwa nanejxaejwaxil, japi jiw xamal chiekal naew̄ujan w̄ut Jesús pejw̄ujan. Puexa japi jiw naew̄ujanpoxliajwa, xan nejchachaemlax japoxliajwa.

Xan kaes nejchachaemlaxaelenbej.

¹⁹ Xamal pomatkoicha Dios kaw̄ujnam xanliajwa. Espiritu Santo, Jesucristo to'aspon, xan nakajachawaet. Samata, matabijtax asamatkoi nakolsaxaelenpox amxot, jiw jebatat.

²⁰ Xan tajlewt naew̄ujna-enil w̄ut Jesús pejw̄ujan, ja-aech w̄ut xan talaxael. Pe amw̄utjel, amxot, jiw jebatax w̄ut, nakiowa naew̄ujnafulax Jesús pejw̄ujan,

Dios xanaboefsfulax xot. Asamatkoi, paklochow wuajnalelan wut, jumchiyaxaelen naewuajnafulaxpox. Jawut, naboesa wut, o, naboesa-el wutbej, japoxan koloeyaxan xanliajwa chiekal pachaemaxael. Xan nejxasinkax jiw sitaeliajwa Cristo.

²¹ Japox koloeyaxliajwa nejchaxoelxbej: “Laejax wutfuk, isfulaxaelen Cristo nejxasinkpoxan. Pe tapx wutbej, Cristoxotaxoeyan. Tapx wut, japox xanliajwa kaes pejme pachaem” —an, nejchaxoelx wut.

²² Laejax wutfuk, nabichaxaelen Jesucristoliajwa. Samata, chiekal matabijs-enil, achax kaes pejme pachaem xanliajwa, ampathatat laejax, o, tupaliajwanpox.

²³ Japoxan, koloeyaxxot, tampoel chiekal matabijsliajwan, masox koloeyaxxot kaes pejme pachaem xanliajwa. Pachaem Cristoxotaliajwan, tapx wut. Japox xanliajwa xabich kaes pejme pachaem.

²⁴ Xan laejax wutfuk ampathatat, kaes pejme pachaem xamal kajachawaesliajwan.

²⁵ Xan chiekal matabijtax. Laejax wutfuk, xamal chiekal kajachawaesfulax kaes Dios chiekal xanaboelialiajwan, kaes chiekal nejchachaemlialiajwanbej, Jesús pejuwajan naexasisfulam xot.

²⁶ Asamatkoi, pejme xamalxotaxaelen wut, xamal jumchiyaxaelam Jesucristo jumtaeliajwa: “Gracias, Pablo pejme pat xot xanalxot” —chiyaxaelam xanliajwa.

²⁷ Xamal isfulde Jesucristo pejuwajanxot jum-aechpox! Jjasox ja-amfulde, xan xamalxotx wut, o, xamalxota-enil wutbej! Xan jumtaesianbej xamal chiekal duilampox kaenejchaxoelaxtat, Jesús pejuwajan naexasitam xot. Jumtaesianbej, xamal asew jiw naewuajnampox Jesús pejuwajan, japi jiwbej naexasisliajwa japawuajan Dios bu'weliajwasbejpi.

²⁸ Jesús pejuwajan naexasis-eli, is wut babijaxan xamalliajwa, jnabej nejlewlé! Ja-am wut, japi jiw pajut matabijaxael asamatkoi japi Dios kastikaxaespx. Jawutbej pajut chiekal matabijaxaeli xamallax Dios bu'weyaxaelpox. Puexa japoxan jachiyaxael.

²⁹ Dios tapaei xamal naexasisliajwan Jesús pejuwajan. Dios tapaeibej nabijasliajwan, naexasitam xot Jesús pejuwajan.

³⁰ Xan nabijatax, asew jiw babijaxan is wut xanliajwa, naexasitx xot Jesús pejuwajan. Xamalbej nabijatam japi jiw pijaxtat. Xamal nataenam, majt nabijatax wut. Amwutjel nakiowa nawultaenam nabijataxpxofuk.

2

Puexa jiw chimiajamechan jumchiyaxaelpox Cristoliajwa

¹ Jesús pejuwajan naexasitam xot, Dios xanaboejam. Xamal najut matabijambej Cristo xamal nejxasinkpox. Samata, xamal nejchaxoela-emil asaxan. Espiritu Santo xamal nejmatpatanxotpon. Samata, chiekal pachaemam nakaewaliajwa. Nabeltaenambej nakaewa.

² Samata, xamal isfulde xan to'axpox, xan nejchachaemlialiajwan xamalliajwa! Xamal nakaewa nanejxasinkde! Xamal isaxaelampox isfulde kaenejchaxoelaxantat!

³ Xamal nejchaxoelam wut, jnabej nejchaxoele' ampox: “Xan isxpoxan, japoxan xan tajutliajwa” —nabej aeche! jNabej nejchaxoele'bej: “Ampoxan isx jiw xabich nasitaeliajwa” —nabej aeche', nejchaxoelam wut! Xamal najutliajwa nejchaxoelam wut, jnejchaxoelde ampox: “Xan kaes pachaema-enil. Me-ama asew jiw, xabich pachaempi, xan jachi-enil” —amde, nejchaxoelam wut!

⁴ Xamal nejchaxoelam wut, jnabej nejchaxoele'bej isliajwan pachaempoxan xamal najutliajwakal! jNejchaxoelde isliajwan pachaempoxan asew jiwliajwabej!

⁵ Me-ama Jesucristo nejchaxoel, jjasox xamalbej nejchaxoelde!

⁶ Jesucristo chiekal najur, pax Dios suapich. Pe japon jumbisnika-el, me-ama pax Dios wut, jachiliajwa.

⁷ Samata, kofton tato'alpox Diosxotse fulaeliajwa ampathatasik. Ja-aech wut, nalaelton ampathatat. Japon chiekal ti't wut, me-ama nejmach-aton wut, ja-aechon.

⁸ Ampathatat wuton, pajut nejxasinkpoxan is-el. Japonlax isful Dios nejxasinkpoxan. Samata, pajut natapaeipon asajiw boesaliajwas, Dios to'as xoton japox jachiliajwas. Jatis wut, japon tap cruztat. Me-ama xabich babijaxan ispon wut, jakitison, kimatamatlas wut cruztat.

⁹ Jatis wuton, japon Dios mat-ech pejme dukaliajwa. Bu'fosbejpon athu'poxase, kaes paklon nadofaliajwa, puexa tato'lialiajwabejpon. Kaes asan ajil, me-ama japon, jason.

¹⁰ Dios jasox to'a Jesús, puexa jiw brixtat nuilialiajwa Jesús pejuwajnalel, puexa athuxotsepi, ampathatpijwbej, infiernoxotpijbej.

¹¹ Puexa jiw jumchiyaxael Jesúsliajwa: “Japon paklon puexa jiwliajwa” —chiyaxaespon. Ja-aech wut, puexa jiw pajut matabijaxael Dios diachwuajnakolax xabich pachaem.

Jesús pejuwajan naexasiti ampathatat, me-ama itliak wut, ja-aechi

¹² Takoew, xamal nejxasinkaxpim, majt xamalxotx wut, xamal xan nanaexasitam. Amwutjel, atuajan wut, ikaes pejme nanaexasisfulde! Kaenanula xamal chiekal duilam, Dios xabich sitaenam xot, naexasitam xotbej Jesús pejuwajan.

¹³ Dios xamal kajachawaesful xot, nejxasinkam isliajwam Dios nejxasinkpoxan. Dios nejxasinkpoxan isaxaelam wut, japon kajachawaesfulaxaelbej xamal japoxan isliajwam.

¹⁴ Kiwesla wut asax isliajwam, inakiowa isde! iNabej jum-aeché' babejjamechan japoxliajwa! iNakaewa nabej nalosbej!

¹⁵ Ja-am wut, asew jiw babejjamechan jumchiyaxil xamalliajwa. Dios paxim xot, ichiekal duilafalde jiw babejchowxot! Ja-am wut, xamal, me-ama ithaej, madoi itliak wut, jachiyaxaelam japi jiwliajwa.

¹⁶ jiw babejchowxot naewuajande Jesús pejuwajan japi jiw chiekal matabijaliajwa, chiekal duilaliajwabejpi pajelnejchaxoelaxantat! Ja-amsfulam wut, Cristo fuloek wut, xan nejchachaemlaxaelen xamalliajwa. Matabijtax xan nawenafo'axilpox, xamal naewuajnaexox.

¹⁷ Dios nejchachaemil, xamal naexasitam xot Cristo pejuwajan. Xan matabijtax wut Dios nejchachaemilpox xamalliajwa, xanbej nejchachaemlax. Xan bej nabu'aboesaxaelbej asew jiw, xamal naewuajnaex xot Jesucristo pejuwajan. Japi nabu'aboesa wut, xan nejchachaemlaxaelen Diosxotse.

¹⁸ iXamalbej xanliajwa nabej nejxaejwe'! iAsbuan jumch nejchachaemilde!

Pablo nejchaxoelpox to'aliajwa Timoteo, Epafrodito swapich, Filipos paklowax poxade

¹⁹ Wajpaklon Jesús nejxasink wut, kamtalejen xan to'axaelen Timoteo xamal poxade. Timoteo xamalxot nawia'an wut, wultaeyaxaelen, ma-am xamal, duilam wut. Wultaenx wut chiekal duilampox, xan xabich nejchachaemlaxaelen.

²⁰ Kaen Timoteo kaenejchaxoelax, xan swapich. Xanxot kaes asan aton ajil, xamalliajwa xabich nejchaxoelpon, me-ama xan, ja-aechpon.

²¹ Puexa amxotpijiw nejchaxoel pajut isasiapoxan. Samata, nejchaxoela-eli isliajwa Jesucristo pejbichax.

²² Xamal chiekal matabijam, Timoteo chiekal nabist Jesúsliajwa. Japon asew jiw naewuajan Jesús pejuwajan, xan swapich. Samata, Timoteo xanliajwa, me-ama taxulan wut, jabuan-anpon, nakajachawaesful xot naewuajnaexoxan.

²³ Xan tajut chiekal matabijtax wut jachiyaxaelpox xanliajwa amxot jiw jebatat, jawut to'axaelen Timoteo xamal poxade.

²⁴ Dios nejxasink wut, xanbej tajut fulaeyaxaelen xamal taeliajwan.

²⁵ Timoteo fulaeyaxil wutfuk, xan nejchaxoelx matxoela to'aliajwan wajkoewan Epafrodito xamal poxade. Epafrodito nakajachawaet xan jiw naewuajnaex wut Jesús pejuwajan. Xamal japon to'am wut, japon fulaen xanlel nakajachawaesliajwa nawewe'ppoxan.

²⁶ Epafrodito majt xabich bu'xaenk, xanxot wut. Amwutjel chiekal nejchaemlison. Samata, japon xamal xabich taesia. Xabich nejchaxoelon xamalliajwa, xamal xabich nejchaxoelam xot japonliajwa, wultaenam wut japon majt xabich bu'xaenkpox.

²⁷ Epafrodito bu'xaenk wut, diachwuajnakolax mox pejtupapon. Dios beltaens xot, kajachawechpon boejthulaliajwas japawaxae. Pe japonkal Dios beltae-esal. Xanbej Dios nabeltaen, Epafrodito tup wut xabich kaes nanejxaejwasamata.

²⁸ Samata, Epafrodito to'axaelen xamal poxade. Pejme xamal japon taeyaxaelam wut, xabich nejchachaemlaxaelam japonliajwa. Xanbej nejchachaemlaxaelen, xamal pejme japon taeyaxaelam wut, chiekal nejchaem xotlison.

²⁹ Epafrodito xamalxot pat wut, iXamal chiekal bu'kulim, nejchachaemlaxtat, japonbej naexasit xot Jesús pejuwajan! iChiekal sitaembejpon! iAsew jiw, Jesús pejuwajan naexasiti, japipej sitaem! Me-ama Epafrodito sitaenam wut, ija-amdebej japi jiwliajwa!

³⁰ Epafrodito xan nakajachawaet wut Cristo pejbichax, japon waxae waech wut, mox pejtupapon. Xamal japon to'am xan nakajachawaesliajwa, xamal najut nakajachawaesaximil xot.

3

Kaes pejme pachaempox, japox wajpaklon Jesucristo matabijasox

¹ Takoew, jamwutjel xamal nejchachaemilde, naexasitam xot Jesús pejuwajan! Chaemilael xan pejme lelaliajwan chajia lelxpox xamalliajwa. Ampox, lelxpox, xabich pachaem xamal najut chiekal natataeflaliajwam, asew jiw xamal naekichachajbasamata.

² iChiekal taem jiw babejchowliajwa! Japi naewuajan wut, jum-aechi: "Judios-elpi, naexasiti Jesús pejuwajan, japi circuncidaxaes Dios pejmarkaxliajwa Dios bu'weliajwas" —aechi, jiw naewuajan wut.

³ Diachwajnakolax xatis Dios pejiws. Espiritu Santo nakkajachawaet xot, xatis jumtis Diosliajwa: “Xam xabich pachaemam” –tis. Xatis chiekal nejchachaemlas, Jesucristo pejiws xot. Matabijas Dios nakbu'weyaxilpox wajut isaspoxtantat. Dios nakbu'weyaxael, Jesucristo nakwemot xot babijaxan isaspoxtanliajwa.

⁴ Kaen judiosxot pajut pijaxtat weyaxael wut babijaxan ispoxtanliajwa, xanlap japonaxaelen.

⁵ Xan nalaeltaxpox ocho matkoiyan wut, nacircuncida. Xan israelita-atonan. Benjamín pamonanbej. Tajjame hebreojame. Xan fariseo-atonan. Samata, me-ama fariseos chiekal naexasit Moisés chajia lelpox, xanbej ja-an, chiekal naexasitx wut Moisés chajia lelpox.

⁶ Xan majt xabich kaes naexasitx Moisés chajia lelpox. Samata, chakifolx naexasiti Jesús pejwajaan jaelaliajwan, japi jiw jeliajwan jiw jebatat. Samata, kaen najumchiyaxil xanliajwa natasalaliajwa: “Pablo chiekal naexasitx-el Moisés chajia lelpox” –nachiyaxil.

⁷ Chiekal majt matabijs-enil wut, xan nejchaxoelx: “Diosliajwa isxpoxan xabich pachaem” –an, majt nejchaxoelx wut. Pe amwutjel, Jesús pejwajaan naexasitx xot, chiekal matabijtax, majt isxpoxan Diosliajwa japoxan pachaema-el.

⁸ Amwutjel chiekal matabijtax. Kaes pejme pachaem tajpaklon Jesucristo matabijtaxpox. Samata, majt puexa isxpoxan, puexa japoxan chiekal koftax kaes matabijsliajwan Jesucristo.

⁹ Xan amwutjel naexasitx Cristo pejwajaan Dios nabu'welija. Samata, kaes nejchaxoela-enil: “Moisés chajia lelpox xan naexasisaxaelen Dios nabu'welija” –chi-enil, nejchaxoelx wut. Cristo tuppox cruztat xanliajwa, japox naexasitx xot, Diosliajwa bu'wajaanjinil.

¹⁰ Xan kaes chiekal matabijsasian Jesucristo. Japon tup wut, Dios mat-echpon pejme dukaliajwa. Xanbej chiekal dukasian Dios pejkajachawaesaxtat. Me-ama Jesucristo nabijat xanliajwa, xanbej jachisian. Aton tup wut, kaes babijaxan is-el. Xanbej japoxasian. Laejax wut, chiekal laejasian babijaxan is-elaxtat.

¹¹ Xan nejxasinkax xanbej Dios namat-esliajwa pejme dukaliajwan, asamatkoi Dios tapi mat-eyaxael wut pejme duilaliajwa.

Chiekal laelpaxaespx xatis kanaliajwas premio

¹² Xan tajut jumchi-enil asew jiwliajwa: “Xan chiekal isx puexa Dios nejxasinkpoxan” –chi-enil asew jiwliajwa. Nawewe'p chiekal nejchaxoelaliajwan, me-ama Dios nejxasink. Dios nakajachawaet wut, isaxaelen Dios nejxasinkpoxan. Me-ama Cristo nejchaxoel, xanbej jachiyaxaelen, namakafit xot Cristo pamakananliajwa.

¹³ Takoew, xan matabijtax puexa chiekal is-enilpox Cristo nejxasinkpoxan. Pe nakiowa, majt isxpoxan, amwutjel kaes japoxan is-enil. Amwutjellax isfulaxaelen Cristo nejxasinkpoxan.

¹⁴ Aton xabich najaet pasliajwa markasxot premio kanaliajwa. Xanbej chiekal dukasian, Dios namakafit xot chiekal dukaliajwan, xan naexasitx xot Jesús pejwajaan.

¹⁵ Jasox puexa xatis chiekal nejchaxoelaxaes, Dios piach naexasitx xot. Xamal japox nejchaxoela-emil wut, Dios kajachawaesaxael chiekal nejchaxoelaliajwam.

¹⁶ Xatis matabijas isliajwas Dios nejxasinkpoxan. Samata, japoxan isfulaxaes.

¹⁷ Takoew, xamal chiekal duilde! Me-ama xan chiekal dukx wut, ja-amde! Jiw chiekal duilpi, me-ama xanal, ja-aechpi, japi jiw xamal chiekal taem! ja-amde xamal chiekal duilaliajwam, me-ama japi jiw!

¹⁸ Pin-iaveces xamal jum-an. Amwutjel, pejme jum-an wut, jum-an itminxpoxtat, xabich jiw naexasitx-el xot Jesucristo tuppox cruztat. Japi jiw nejxasinka-el Jesús pejwajaan.

¹⁹ Ampathat toep wut, japi jiw Dios toesaxaes, babijaxan pajut isasiapoxan is xoti. Japi jiw buxdala-el chapaaliajwapi asew jiw babijaxan ispoxtanliajwa. Japi nejchaxoel wut, nejchaxoel ampathatpijxankal.

²⁰ Xatislax duilaxaes Diosxotse. Samata, wuaj nawesfulas wajpaklon Jesucristo pasliajwasik nakbu'welija.

²¹ Wajpaklon Jesucristo pask wut, wajbu'an, ampathatpijx, nakwexalixaxaelen, chiekal pachaema-el xotox. Do jawut, wajbu'an asabu'anaxael. Pajelbu'anaxaes. Jawut xatis wajbu'an, me-ama wajpaklon Jesucristo pejb'u't wut, jachiyaxael. Do ja-aech wut, japon puexa tato'laxael.

4

Pomatkoicha nejchachaemlaxaelpox naexasiti Jesús pejwajaan

¹ Takoew, xamal nejxasinkaxpin, xabich taesian xamal. Xabich nejchachaemlaxbej xamalliajwa, chiekal naexasitam xot Jesús pejwajaan. Samata, asew jiw japox chapaeix xamal chiekal naexasitampox Jesús pejwajaan. jChiekal xanaboelim wajpaklon Jesucristo!

² Xan ampox jum-an japow Evodialiajwa, asaow Síntiqueliajwabej, japi watho' chiekal kaenejchaxoelaxliajwa, nakaewaliajwa, naexasit xoti wajpaklon Jesucristo pejwuajan.

³ Xam, tajnachalnam, kaeyax nabistas xot Diosliajwa. Xan jum-an xam kajachawaesliajwam, japi watho' pejme chiekal kaenejchaxoelaxliajwa. Japi watho' xabich xan nakajachawaet, xamalxot naewuajna x wut Jesús pejwuajan. Jawut japon Clementebei, kaes asew jiw swapich, xabich nakajachawaet, xamalxot naewuajna x wut. Japi jiw wallels Dios pejfatat, pomatkoicha duilialiajwapi Diosxotse.

⁴ ¡Pomatkoicha xamal nejchachaemilde, wajpaklon pejiwam xot! Pejme jum-an xamal nejchachaemlialiajwam.

⁵ ¡Chiekal duilde asew jiw pajut matabijaliajwa, xamal pachaemampim! ¡Nabej nejkiowe'bej wajpaklon Jesucristo mox pawuajnapox pasliajwa ampathatasik!

⁶ ¡Xamal xabich nabej nejchaxoele' asaxliajwa! Asax pachaema-elpox wut xamalliajwa, ¡Dios kawuajande japox chiekal pachaemaliajwa! Dios kawuajnam wut, ¡nabej nejkiowe'bej Dios graciaschiliajwam puexa xamal kajachawaetpoxliajwa!

⁷ Ja-am wut, Dios xamal kajachawaesaxael xabich nejchaxoelasamatam nejchaxoelampox. Nejchachaemlaxaelambej. Japox nejchachaemlax, Dios pijax. Samata, asew jiw matabijaxil japanejchachaemlax. Xamal nejchachaemlam wut, nejlewlaxil. Nejchaxoelam wut, chiekal nejchaxoelaxaelambej, xamal Jesucristo pejiwam xot.

Pablo to'apox Filipos paklowaxpijw nejchaxoelaliajwa puexa pachaempoxan

⁸ Takoew, xamal jumchiyaxaelen matdukanaewuajna x. Nejchaxoelam wut, ¡nejchaxoelde puexa diachwuajnakolaxpoxan, puexa jiw sitaenpoxanbej! ¡Nejchaxoeldebej puexa pachaempoxan, Dios nejxasinkpoxan! ¡Nejchaxoeldebej isliajwam jiw jum-aechpoxan: "Ampoxan xabich pachaem xatis isliajwas" —aechpoxan!

⁹ ¡Xamal chajia naewuajna x pox, chanaekabuana x poxbej, naexasisfulde! Japoxan naexasitam wut, Dios kajachawaesaxael xamal chiekal duilialiajwam, asew jiw swapich.

Filipos paklowaxpijw ofrenda xato'apox Pablolialjwa

¹⁰ Xan nejchachaemlax xamal pejme xan nanejchaxoelam xot, ofrenda naxto'am xotbej xanliajwa. Samata, gracias-an Diosliajwa. Xan tajut chiekal matabijtax, xamal xan nejkiowa-emil. Majt xamal ofrenda naxto'a-emil xanliajwa, ajil xot aton nawexalaeliajwa ofrenda xanliajwa.

¹¹ Xan ampo x jumchi-enil xamal kaes ofrenda naxto'aliajwam. Xan tejew kaeyaxach wut, nakiowa xanejchachaemlax.

¹² Xan kijinil wutbej, xan nakiowa nejchachaemlax. Xabich wutbej tejew, xan nejchachaemlax. Litaxaelax wut, nuafnia x wutbej, xan nakiowa nejchachaemlax.

¹³ Puexa asaxan, pachaema-elpoxan, nawepat wut xanliajwa, xan tajlewla-el japoxanliajwa, Cristo nakajachawaet xot.

¹⁴ Xamal isam pachaempox xanliajwa, nakajachawaetam xot nawewe'ppoxanliajwa.

¹⁵ Macedonia tuajna xot chijian wut tuadusliajwan naewuajna liajwan Jesús pejwuajan Dios asew jiw bu'weliajwa, naexasiti Jesús pejwuajan, xan nakajachawaes-el nawewe'ppoxanliajwa. Jawut xamalkal, Filipos paklowaxpijwam, nakajachawaetam.

¹⁶ Majt Tesalónica paklowaxxot x wut, xamal nakajachawaetam pin-iaveces, ofrenda naxto'am wut xan tejew wuajsliajwan, nawewe'ppoxan.

¹⁷ Xan ampo x lelx wut, lela-enil xamal pejme naxto'aliajwam ofrenda xanliajwa. Xan nejxasinkax Dios nejchachaemlialiajwa xamalliajwa, nakajachawaetam xot.

¹⁸ Epafrodito puexa chiekal nachaxdut, xamal naxto'ampi xanliajwa. Samata, amwutjel xan xabich tejew. Nawewe'pa-el. Xamal xanliajwa naxto'ampi, ofrenda, japox Diosliajwa, me-ama incienso bowas wut xabejnikaliajwa, ja-aechox. Samata, Dios xabich nejchachaemil, xamal ofrenda naxto'am wut xanliajwa.

¹⁹ Samata, Diosbej xamal kajachawaesaxael puexa xamal wewe'ppoxanliajwa. Jesucristo pejiwam xot, Dios kajachawaesaxael japoxanliajwa, xajur xoton japox isliajwa.

²⁰ Puexa xatis pomatkoicha jumchiyaxaes: "Waj-ax Dios xabich pachaem" —chiyaxaes. ¡Jasox nej ja-aech'e Diosliajwa!

Pablo saludos xato'apox, asew swapich, Filipos paklowaxpijwliajwa

²¹ Xan saludos xato'ax asew, xamalxotpiliajwa. Japi Dios pejiwpi, naexasit xoti Jesús pejwuajan. Asew, naexasiti Jesús pejwuajan, xanxotpi, japibej saludos xato'a xamalliajwa.

²² Puexa asewbej, Dios pejjamechan naexasitpi, Roma paklowaxpijwi, japibej saludos xato'a xamalliajwa. Roma tuajna pijiw tato'lan, japon pejbaxot nabisti, asew japixot, naexasiti Jesús pejwuajan. Japibej xabich kaes pejme saludos xato'a puexa xamalliajwa.

²³ Xan wajpaklon Jesucristo kawuajna x puexa xamal xabich kajachawaesliajwa.

Pablo lelpox carta Colosas paklowaxpijiwliajwa

Pablo lelpox carta Colosas paklowaxpijiwliajwa

¹ Xan Pablo, Jesucristo pej-apóstol nadofax, Dios namakafit xot. Wajkoewan Timoteo nakajachawaet ampox carta lelaliajwan.

² Lelx ampox carta xamal Colosas paklowaxpijwamliajwa, Jesucristo pejuwajan naexasitam-pim. Xan waj-ax Dios kawuajna xamal kajachawaesliajwa puexa chiekal isliajwam. Japon kawuajna xbej xamal kajachawaesliajwa chiekal duilaliajwam, asew jiw swapich.

Pablo kawuajnapox Dios, Colosas paklowaxpijiwliajwa, Jesús pejuwajan naexasitiliajwa

³ Xanal xamalliajwa Dios kawuajna x, japon wajpaklon Jesucristo pax. Kawuajna x wut, xanal gracias-an Diosliajwa, xamal chiekal kajachawaet xoton.

⁴ Jasoxtat xanal Dios kawuajna x, wultaen xot xamal chiekal naexasitampox Jesucristo pejuwajan. Wultaen xbej puexa jiw nejxasinkampox, Dios pejiwpi.

⁵ Xamal naexasitam wut chimiawuajan, Jesús pejuwajan, Dios xamal buweliajwa, jawut chiekal matabijam Dios athuxotse xawuajna wet xabich pachaempox xamalliajwa. Samata, xamal Jesús xanaboejam. Nejxasinkambej Dios pejiw.

⁶ Jesús pejuwajan xamal naewuajan wuti, jumtaenam. Amwutjel, japawuajan potuajna x jiw jumtaena wuti, japi xbej naexasit japawuajan. Samata, japi kofa majt babijaxan isfulpoxan. Amwutjel ispi pachaempoxan. Me-ama xamal, ja-aech xbej japi jiw. Jumtaenam wut Jesús pejuwajan, xamal najut chiekal matabijam, diachwuajna kolax Dios xamal nejxasinkpox.

⁷ Epafras, xatis nejxasinkaspon, japon xamal matxoela naewuajan Jesús pejuwajan. Japon xbej, xanal swapich, nabist Cristoliajwa. Japon xbej xamal naewuajan, xanal tajut fulaeyaxinil xot xamal poxade.

⁸ Pa'an wuton xanal xot, xapa'non nejwuajan. Jawut xanal nachapaeipon nejxasinkampox asew jiw, naexasiti Jesús pejuwajan, Espiritu Santo xamal kajachawaet xot.

⁹ Xanal japox wultaen wut, buxkofa-enil Dios kawuajna xpo xamalliajwa. Dios kawuajna x chiekal matabijaliajwam isliajwambej Dios nejxasinkpoxan. Dios kawuajna xbej chiekal matabijaliajwam Dios pejmatabijsaxan Espiritu Santo pijaxtat.

¹⁰ Japox chiekal matabijam wut, chiekal duilaxaelam. Me-ama japon pejuwajan naexasiti chiekal duil, xamal jachiyaxaelam. Samata, Dios nejchachaemlaxael xamalliajwa. Xamal isaxaelam puexa pachaempoxan. Isam wut japoxan, xamal kaes chiekal matabijaxaelam Dios.

¹¹ Xanal Dios kawuajna xamal kajachawaesliajwapon, kaes chiekal xanaboejalijwam Dios. Ja-am wut, xabich boejtaliasaxaelam, asew jiw pijaxtat nabijatam wut.

¹² Dios xamal beltaen. Samata, Diosliajwa, xamal babijaxan isampoxan ajil. Ja-aech wut, xamal Dios tapaeyaxael pomatkoicha athuxotaliajwam, Dios pej-itliakaxotse. Samata, xanal nejxasinkax xamal waj-ax Dios graciaschiliajwam, Dios kawuajna wut.

¹³ Xatis majt matabija-esal chimiawuajan, Jesús pejuwajan. Samata, me-ama itkuataxxot duils wut, jatisfulas, naexasisfulas xot Satanás. Amwutjel naexasisfulas Dios paxulan pejuwajan, Dios nejxasinkaspon.

¹⁴ Dios paxulan tɔp wut, japon nakwemot xatis babijaxan isaspoxanliajwa. Samata, Dios nakbeltaen.

Pachaempox Diosliajwa Jesús pejuwajan naexasiti, Cristo tɔp xot japijiajwa

¹⁵ Xatis wajut Dios taeyaxisal. Pe nakiowa, Cristo pijaxtat chiekal matabijas, ma-aech Dios. Cristo kaes pejme pachaem. Me-ama puexa Dios ispi, jachi-elon.

¹⁶ Cristo puexa is Dios pijaxtat, athuxotse, ampathatatbej. Xabich japoxan xatis taens. Pe asaxan wajut taeyaxisal, tampoel xoti xatis taeliajwas. Cristo puexa is wut, isbejpon ángeles. Japi mamnik xot, xajɔp tato'laliajwa. Puexa japoxan Cristo is pajutliajwa.

¹⁷ Chajjakolaxtat, puexa is-esal wutfuk, Cristo jawut duk. Amwutjel puexa ispoxan nakiowa ja-aechfuluk japon pijaxtat.

¹⁸ Cristobej puexa jiw tato'al, naexasiti japon pejuwajan. Japon tɔp xot jiwliajwa, Dios beltaen japi jiw babijaxan ispoxanliajwa, japon pejiwaliajwabejpon. Cristo matxoela mat-ech pejme dukaliajwa, tɔp wuton. Samata, Jesucristo pejuwajan naexasitibej asamatkoi mat-eyaxaes pejme duilaliajwa. Cristo puexa japijiajwa paklon.

¹⁹ Dios nejchachaemil Cristoliajwa, me-ama Dios, ja-aech xoton.

²⁰ Chajiakolaxtat, Dios chajia nejchaxoel Cristo tupaliajwa cruztat puexa jiwliajwa, xabich jiw bu'wuañanjilalialjwa Dios pejwuañnalel. Samata, Cristo tup wut, puexa naexasiti japon pejwuañan, ampathatpijiw, athupijiwbej, amwutjel puexa chiekal pachaemlisi Diosliajwa.

²¹ Xamal majt naexasis-emil wutfuk Cristo pejwuañan, pachaema-emil Diosliajwa. Dios padaelmajiwambej, isam xot babijaxan.

²² Cristo xabich nabijat, xamal babijaxan isamproxanliajwa tup wuton cruztat. Samata, xamal pachaemam Diosliajwa. Amwutjel isfulam japon nejxasinkproxan, bu'wuañanjimil xot.

²³ ¡Xamal chiekal naexasisfulde Jesucristo pejwuañan! Japon pejwuañan xabich asew jiwbej naewuajnafal potuajñucha. Xan, Pablo, naewuajnafalaxbej japawuañan.

Pablo Dios to'aspos, japon naewuajnalialjwa Jesús pejwuañan naexasiti

²⁴ Xan amwutjel jiw jebatat nabijatax, majt xamal, judios-emilpim, naewuajñax xot Jesús pejwuañan. Me-ama majt Cristo nabijat cruztat jiw bu'welialjwa, xanbej amwutjel nabijatax, jiw jebatat najia xoti. Samata, nejchachaemlax. Nawewe'p'fuk xabich kaes nabijasliajwan, naewuajñax wut Jesucristo pejwuañan naexasiti. Japi, Cristo pejbu't wut, ja-aech.

²⁵ Dios nato'a xamal kajachawaesliajwan, asew jiwbej, naexasiti Jesús pejwuañan. Samata, xamal, asew jiwbej, jumchiyaxaelen puexa Dios pejjamechan jum-aechproxan Cristoliajwa.

²⁶ Japawuañan majt chinax kaen aton matabijs-elfuk. Japawuañanliajwa Dios tulaela jumchi-el. Amwutjel tapaeipon puexa pejiw chiekal matabijaliajwa japawuañan.

²⁷ Japawuañan xabich pachaem puexa jiwliajwa. Jesús, xamalxot dukpon, japon pejwuañan majt maliach. Pe amwutjel, puexa xamal chiekal matabijam. Samata, asamatkoi duilaxaelam Diosxotse.

²⁸ Samata, xanal naewuajñax Cristo pejwuañan puexa jiw chiekal jummatatabijaliajwa. Jan xanal, japibej chiekal pachaemalialjwa, Dios nejchachaemlialjwa japiliajwa.

²⁹ Samata, ampabichax chiekal nabistax wut, Cristo nakajachawaet xot, mamnikax naewuajnalialjwan japon pejwuañan.

2

¹ Xan nejxasinkax xamal matabijaliajwam Dios xabich kawuajñaxprox xamallialjwa. Dios kawuajñaxbej Laodicea paklowaxpijiwliajwa, asew jiwliajwabej, japi jiw xan namatabijaelpifuk.

² Dios xabich kawuajñax xamal nejlewasamata, jiw naewuajñam wut japi chiekal xanaboejaliajwa Dios. Xan xabich Dios kawuajñaxbej xamal kaenejchaxoelaxliajwam chiekal duilaliajwam, nakaewa nanejxasinkam xot. Dios xabich kawuajñaxbej xamal chiekal jummatatabijaliajwam Cristoliajwa, majt puexa jiw chiekal matabija-elprox'fuk. Samata, amwut chiekal matabijaxaelam Cristoliajwa. Dios majt tapae-el ampathatpijiw matabijaliajwa Cristoliajwa.

³ Xamal naexasitam wut Jesucristo pejwuañan, ja-am wut, chiekal matabijaxaelam Dios pejmatabijsax, xabich pachaemprox.

⁴ Japox jum-an asew jiw xamal naekichachajbasamata. Japi jiw jum-aech chimiajamechan xamal naekichachajbalialjwa.

⁵ Diachwuañakolax amwutjel xan tajut xamalxota-enil. Pe nejchaxoelx wut, me-ama tajut xamalxotx wut, ja-an. Samata, waltaenx wut xamal kaenejchaxoelaxtat duilamprox, Cristo chiekal xanaboejampoxbej, xan xabich nejchachaemlax.

Jesús pejwuañan naexasiti, japi pajelnejchaxoelaxan

⁶ Xamal jelnaexasitam wut Jesús pejwuañan, "Jesús tajpaklon" —am xamal. Samata, jamwutjel diachwuañakolax chiekal duilafalde! Me-ama jiw, naexasiti Jesús pejwuañan, duil wut, ja-amsfulde xamal!

⁷ Xamal nejpaklon Jesucristo. Samata, isfulde puexa japon tato'alpoxan! ¡Asew jiw xamal majt naewuajñanprox Cristoliajwa, japox chiekal naexasisfulde! Ja-am wut, kaes xanaboejaxaelam Cristo. Pomatkoicha Dios kawuajñam wut, graciaschiyaxaelam Diosliajwa.

⁸ ¡Chiekal taem! ¡Xamal nabej tapae' asew jiw xamal naekichachajbalialjwa, pajut pejnechaxoelaxan naewuajñanpi! ¡Xamal japi jiw nabej naexasis, asawuajñan naewuajñan wuti, Cristo naewuajna-elprox wut! Japi jiw asew jiw chanaekabuana pamjiw chanaekabuanasproxan. Chapaefulbejpi jiw nejchaxoelproxan, ampathatpijaxanliajwa.

⁹ Cristo ampathatat wut, me-ama pax Dios, ja-aechon. Samata, ¡nabej tapae' asew jiw xamal naekichachajbalialjwa, asawuajñan naewuajñan wuti!

¹⁰ Xamal Cristo pejiwam xot, wewe'pa-el asax. Cristo paklon puexaliajwa. Japon puexa, nejmachpaklochow, tato'al.

¹¹ Xamal Jesús pejwñajan naexasitam xot, me-ama judíos circuncidaspi, ja-am Diosliajwa. Samata, kaes nejchaxoela-emil isliajwam pachaema-elpoxan, Jesús xamal kajachawaet xot.

¹² Xamal jiw bautisa wut, jawut, xamal, Jesús swapich, muthtaspi wut, ja-am. Jesús tıp wut, Dios mat-echpon pejme dukaliajwa. Samata, xamal bautisa wuti, jawutbej, xamal, Jesús swapich, Dios mat-echpi wut, ja-am pejme chiekal duilaliajwam, Dios chiekal xanaboejam xot.

¹³ Xamal, judíos-emilpim, majt tıpawam wut, ja-am Diosliajwa, xabich babijaxan isfulam xot. Amwutjel, jachi-emil. Xamal amwutjel pajelnejchaxoelaxan, Dios beltaen xot babijaxan isampoxanliajwa, naexasitam xot Jesús pejwñajan.

¹⁴ Majt xatis naexasis-esal xot Dios tato'alpoxan, xatis wajbu'wñajan Diosliajwa. Pe Dios nakbeltaen xatis babijaxan isaspoxanliajwa. Cristo tıp wut cruztat, nakwemot xatis babijaxan isaspoxanliajwa. Ja-aech wut, Dios tato'alpoxan, me-ama toep wut, ja-aechox, japon nakkastikaxaelpox xatis babijaxan isaspoxanliajwa.

¹⁵ Cristo tıp wut cruztat, Dios malecha Satanás, Satanás pejiwbej, japi deppaklochowpi. Dios japox is wut, puexa jiw matabija Satanás malechaspox, japon pejiwbej.

Jesús pejwñajan naexasiti chiekal nejchaxoelaxaelpox isliajwa Dios nejxasinkpoxan

¹⁶ Xamal amwutjel Cristo pejiwam xot, jasew judíos nabej tapae' kaechafiasliajwa xamal xaelampoxan, feyaxaelampoxanbej! Japi judíos naexasit Moisés chajia lelpox. Samata, japi kaewaechful wut, fiesta is. Isbejpi fiesta, kaejuimsful wut. Fiesta isbejpi, napatamatkoisful wut. Japi judíos xamal to'a wut fulaeliajwam japafiestan poxade, jxamal nabej fulae'!

¹⁷ Majt jiw xabich fulalaecha fiestan poxade, Moisés chajia lelpox naexasit xoti. Japafiestan ispi jiw nejchaxoelaliajwa asamatkoi Cristo isaxaelpoxliajwa. Pelis Cristo pat. Japon pejwñajan xamal naexasitam xot, jamwutjel xamal wewe'pa-el japafiestan poxade fulaeliajwam!

¹⁸ Asew jiw xamal jum-aech wut: "Xanal ángeles kawuñajna. Xamal kawuñajna-emil wut ángeles, babijax isam" —aech wuti, japi jiw xamal nabej naexasis! Jum-aech wutbejpi: "Xanal matabijax, masoxtat taenx xot asew jiw tae-elpoxan" —aech wuti, jxamal japi jiwbej nabej naexasis! Japi japoxan jum-aech wut, pejnechaxoelaxan pachaema-el, pajut nejchaxoelpoxan jum-aech xoti.

¹⁹ Japi kofa naexasitpox Jesús pejwñajan. Puexa xatis Jesús pejwñajan naexasichpis, Cristo naktrato'al. Xatis, me-ama Cristo pejbüt wut, jatis, kaenechaxoelax xotch, Cristo swapich. Samata, Cristo nakkajachawaet chiekal duilaliajwas, me-ama Dios nejxasink.

²⁰ Xamal, me-ama, Cristo swapich, cruztat tıpam wut, ja-am. Samata, jnabej naexasis ampathatpijiw jum-aechpoxan! Xamal ja-am wut, jma-aech xotkat xamal nakiowa naexasiasiam Jesús pejwñajan naexasis-eli jum-aechpoxan?

²¹ Japi jum-aech, xamal fiat wuti: "jAmpox nabej jache"! jAmpoxbej nabej xae"! jAmpoxbej nabej fis!" —aechi, xamal fiat wut.

²² Japi jum-aechpoxan xamal fiat wut, japoxan asamatkoi chiekal toepaxael, pajut nejchaxoelpoxankal xot.

²³ Japi xabich asew jiw tato'al kawuñajnalijwa ángeles. Japibej tato'al jiw pajut nejchaxoelaliajwa: "Xan kaes pejme pachaema-enil. Me-ama asew jiw, jachi-enil" —chilijwa, jiw nejchaxoel wut. Japi jiw naewñajanbej jiw babijaxan isasamata. Japi jiw jasox naewñajan wut, me-ama xabich matabija wut, ja-aechi. Pe japi naewñajanpoxan pachaema-el, asew jiw kajachawaes-esal xot kofaliajwa babijaxan nejchaxoelpoxan is-elaliajwa.

3

¹ Cristo tıp wut cruztat, mat-ech wuton pejme dukaliajwa, jawutbej, xamal, me-ama Dios mat-ia wut, ja-am pejme duilaliajwam, Cristo swapich. Samata, xamal nejchaxoelam wut, jnejchaxoelde pomatkoicha duilaxaelampox Cristo ekxotse, Dios pejpoklale!

² jXamal nejchaxoeldebej isliajwam Dios nejxasinkpoxan! jNabej nejchaxoele' babijaxan isliajwam, me-ama ampathatpijiw isful!

³ Ampathatat laelpam wut, jchiekal duilafulde! Me-ama Cristo Diosliajwa chiekal duk wut, jja-amsfuldebej xamal! Samata, xamal, me-ama majt duilam wut, jnabej ja-aechi! Cristo chiekal duk pax Diosxotse. Amwutjel xamal tataefulpon.

⁴ Chiekal duilaxaelam tanbichliajwam Cristo. Asamatkoi Cristo pejme fuloek wut, puexa jiw taeyaxaeson, japon xabich mamnikpox. Xatisbej asew jiw naktaeyaxael, Cristoxotas wut.

Colosas paklowaxpijiw ma-aechpox, majt duil wuti Jesús pejwñajan naexasis-elaxtat

⁵ ¡Kofim babijaxan isfulampoxan! Aton tɔp wut, kaes babijaxan is-elon, tɔp xotlison. ¡Xamalbej ja-amsfulde! ¡Nejwatho' nabej naebu'moejs asew watho'! ¡Nabej isbej asaxan, pachaema-elpoxan! ¡Nabej nejxasinke'bej babijaxan isaxan! ¡Nabej nejxasinke'bej nejew xabichaliajwa! Xabich wut nejew, ja-am wut, Dios nejxasinkaximil, japoxan kaes xabich nejxasinkaxaelam xot.

⁶ ¡Xamal jasox nabej ja-aeché', Dios xabich kastikaxael xot jasi jiw!

⁷ Xamal majt japoxan babijaxan isfulam, naexasis-emil wutfuk Dios.

⁸ Pe amwɔtjel, ¡xamal kofim xabich nalalapoxan asew jiwliajwa, babijaxan isampoxanbej asew jiwliajwa! ¡Buxkofimbej babejjamechan jum-ampoxan asew jiwliajwa! ¡Nabej jum-aeché'bej jiwɔtat pachaema-elpoxan!

⁹ ¡Kofimbej nakaewa naekichachajbampoxan, kofam xot padujnejchaxoelaxan, majt isampoxanbej!

¹⁰ Amwɔtjel kofam padujnejchaxoelaxan, naexasitam xot Dios. Samata, ¡duilafulde, me-ama Dios nejxasink! Ja-am wut, chiekal xamal matabijaxaelam Dios.

¹¹ Jesús pejuwajan naexasiti pajelnejchaxoelaxan. Samata, Dios puexa japi taen wut, japi jiw puexa chiekal najupanejxasinkpon. Judíos, judíos-elpibej, atɔaj fulaenpi, asatɔajɔnchanpijiwbej, jiw estudia-elpibej, esclavos, esclavos-elpibej, japi puexa naexasiti Jesús pejuwajan, Dios chiekal najupanejxasink puexa japi jiw.

¹² Dios xamal nejxasink. Makanotbejpon xamal japon pejiwaliajwam. Samata, ¡asew jiw beltaem! ¡Kajachawae'ebej! Nejchaxoelam wut, ¡nejchaxoelde: "Xan kaes pejme pachaema-enil. Me-ama asew jiw, jachi-enil" —amde, nejchaxoelam wut! Asew jiw tato'lam wut, ¡nabej tato'le' palaeyaxtat! Asew jiw is wut pachaema-elpoxan xamalliajwa, ¡xamal boejtaliasfulde japoxanliajwa!

¹³ Asew jiw xamalxot nakaewaliajwa is wut pachaema-elpoxan, ¡xamal nabej nalale'! ¡Boejtaliasfulde! ¡Nakaewa nabeltaembej! Me-ama Dios xamal beltaen babijaxan isam wut, ¡xamalbej ja-amsfulde nakaewaliajwa!

¹⁴ Jumchiyaxaelen kaes pejme pachaempox. Japox nakaewa nanejxasinkampox. Ja-am wut, chiekal duilaxaelam kaenejchaxoelaxtat.

¹⁵ Cristo xamal kajachawaet xot, ¡xamal chiekal kaenejchaxoelaxde! Dios xamal tadat kaemɔtiajwam, Cristo sɔapich. Samata, Dios kawuajnam wut, ¡gracias-amde!

¹⁶ Xan Dios kawuajnam xamal kajachawaesliajwa pomatkoicha nejchaxoelaliajwam Jesús pejuwajan. ¡Dios pejjamechan xamal nakaewa nanaewuajande kaes pejme chiekal Dios xanaboejalijawam! Jajuwam wut salmos, himnosbej, ¡xabich gracias-amde Diosliajwa!

¹⁷ ¡Puexa isaxaelampoxan isde, wajpaklon Jesús pijaxtat! ¡Puexa jumchiyaxaelampoxanbej jum-amde, wajpaklon Jesús pijaxtat! Ja-am wut, ¡gracias-amde waj-ax Dios Jesús pijaxtat!

Jesús pejuwajan naexasiti machiyaxaelpox pejbapijiwliajwa

¹⁸ Xamal watho'am, ¡nejmol chiekal naexasisfulde, to'a wut! ¡ja-amsfulde, xamal Jesús pejuwajan naexasitam xot!

¹⁹ Xamal poejwam, ¡kaenanula nejwatho' chiekal nejxasinkafulde! Nijow to'am wut, ¡to'im chamoeyaxtat! Me-ama esclavas wut, ¡nabej ja-aeché' nejwatho'liajwa!

²⁰ Xamal yamxim, ¡pomatkoicha chiekal naexasisfulde nej-axjiw, nej-enjiwbej, xamal to'a wut! Ja-am wut, Dios nejchachaemlaxael xamal yamximliajwa.

²¹ Xamal paxjiwam, ¡naxi chamoeyaxtat tato'alde naxi palalasangata, nejchaemilasamatabejpi!

²² Xamal esclavos, ¡isfulde nejpaklochow puexa tato'alpoxan! ¡Chiekal nabichfulde japiliajwa! Asew jiw nejpaklochow chiekal tataefla-esal wut, chiekal nabich-eli. Pelax nejpaklochow tataeflas wut, ja-aech wut, japi jiw, me-ama chiekal nabist wut, ja-aechi nejpaklochow nejchachaemlaliajwa japiliajwa. ¡Xamal jasox nabej ja-aeché'! Pomatkoicha chiekal nabichaxaelam nejpaklochowliajwa, xamal sitaenam xot wajpaklon Jesús.

²³ Xamal nabistam wut nejpaklochowliajwa, puexa chiekal isaxaelam nejchachaemlam-poxtat. Me-ama wajpaklon Jesúsliajwa nabistam wut, jachiyaxaelam, nejpaklochowliajwa nabistam wut.

²⁴ Chiekal nabichaxaelam wajpaklon Jesúsliajwa, japon chiekal xamal mosaxael xot. Jesús xamal chaxduiyaxael Dios chajia jum-aechpox. Cristo diachwuajnakolax nejpaklon, nabistam xot japonliajwa.

²⁵ Pe asew jiw, babijaxan ispi, japi jiw Dios kastikaxaes. Samata, puexa jiw babijaxan is wut, japi puexa diachwuajnakolax Dios kastikaxaes.

4

¹ Kamal paklochwam, ¡xamal chiekal pachaemde nej-esclavosliajwa! Me-ama Dios nejxasink, ¡ja-amsfulde japiliajwa! ¡Xabich nabej tato'le' nej-esclavos xabich nabichliajwa bichaxan! ¡Chiekal nejchaxoelde! Xamalbej nejpaklon athxotse.

Pablo to'apox Colosas paklowaxpijiw, japi Dios kawuajnalijwa japonliajwa

² ¡Xamal Dios kawuajnafulde! ¡Gracias-amsfuldebej Diosliajwa, kawuajnam wut!

³ ¡Xanallijwabej Dios kawuajande japon xanal natapaeliajwa pejme jiw naewuajnalijwan Jesús pejwuajan, majt jiw matabija-elwuajan! Japawuajan naewuajnax xot, amwutjel jiw jebatat asew jiw xan najia.

⁴ ¡Dios kawuajande, xan jiw naewuajnax wut chiekal naewuajnalijwan, japibej chiekal matabijaliajwa Jesús pejwuajan!

⁵ Xamal Jesús pejwuajan naexasis-elixotam wut, ¡chiekal duilafulde! Japixot pachaem wut naewuajnalijwam Jesús pejwuajan, ¡naewuajande!

⁶ Xamal nospaeyam wut, jiw suapich, ¡nospaem pachaempoxan jiw chiekal nejchachaem-laliajwa! ¡Matabijimbej chiekal jumnosliajwam kaenanula japi jiw!

Pablo saludos xato'apox asew jiwliajwa

⁷ Wajkoewan Tiquico, xatis nejxasinkaspon, chiekal nabist wajpaklonliajwa, xan suapich. Tajwuajan japon xalaeyaxael xamal chapaeliajwa, pa'a wuton xamalxot.

⁸ Samata, japon to'axaelen amwut xamal poxade jumchiliajwapon, ma-an xanal, amxotan wut. Ja-aech wut, xamal xabich nejchachaemlaxaelam xanalliajwa.

⁹ Tiquico fulaeyaxael wut xamal poxade, wajkoewan Onésimo, xatis xabich nejxasinkaspon, japonbej fulaeyaxael xamal poxade. Onésimo majt xamalxoton. Japon chiekal nabistbej wajpaklonliajwa. Kofs-elpon. Japi xamalxot pa'a wut, xamal chapaejaxaelon xanliajwa amxot ja-aechpoxan.

¹⁰ Aristarco, japon tajnachalan jiw jebatat, saludos xato'a xamalliajwa. Marcos, Bernabé pakoewan, japonbej saludos xato'a xamalliajwa. Xamal chajia to'ax, Marcos pat wut xamalxot chiekal bu'kulaliajwam.

¹¹ Asan pawul Jesús. Japonbej saludos xato'a xamalliajwa. Japon asawul Justo. Japi tres poejiw, judíos, naexasiti Jesús pejwuajan. Puexa judíosxot, japi koew, xan suapich, nabist Diosliajwa, asew jiw Dios naexasisliajwa. Samata, xan xabich nejchachaemlax, japi nakajachawaet xot.

¹² Epafrafras majt xamalxoton, japon nabist Jesucristoliajwa. Japonbej saludos xato'a xamalliajwa. Japon xabich Dios kawuajan nejxanaboejaxan kaes mamnikaliajwa Diosliajwa. Xabich Dios kawuajanbejpon xamal kajachawaesliajwa isliajwam puexa Dios nejxasinkpoxan.

¹³ Xan taenx, Epafrafras xabich nejchaxoel wut xamalliajwa, Laodicea paklowaxpijiwliajwabej, Hierápolis paklowaxpijiwliajwabej.

¹⁴ Lucas, japon médico, xatis nejxasinkaspon, japonbej saludos xato'a xamalliajwa. Asan, pawulpon Demas, japonbej saludos xato'a xamalliajwa.

¹⁵ Xan saludos xato'ax naexasiti Jesús pejwuajan, Laodicea paklowaxpijiwliajwa. Saludos xato'axbej japon Ninfaliajwa. Saludos xato'axbej, japi natamejapi Ninfa pejboxot, naexasiti Jesús pejwuajan.

¹⁶ Xamal ampox carta xaljoeyax toetam wut, ¡xato'im Laodicea paklowaxpijiw poxade, japi naexasiti Jesús pejwuajan, japibej xaljoeliajwa ampox carta! Asacarta chajia xato'ax Laodicea paklowaxpijiwliajwa. Japox carta japi xato'axaen xamal poxadin. Carta xamal chaxdut wuti, ¡xamalbej xaljoem japox carta!

¹⁷ ¡Arquipo jum-amde chiekal toesliajwa Jesucristo to'aspox japon isliajwa!

¹⁸ Xan Pablo, tajut lelx xamal saludaliajwan. Xamal Dios kawuajnam wut, ¡nabej nejkiowe' xanliajwabej Dios nawekawuajnalijwam, xan jiw jebatatapoxliajwa! Xanbej Dios kawuajnax xamalliajwa japon xabich kajachawaesliajwa xamal.

Matxoelacarta, Pablo lelpox, Tesalónica paklowaxpijwliajwa

Pablo lelpox carta, Silvano swapich, Timoteo swapichbej, Tesalónica paklowaxpijwliajwa

¹ Xan Pablo, Silvano swapich, Timoteo swapichbej, lelx ampox carta xamal, naexasitam-pimliajwa Jesús pejwuajan, Tesalónica paklowaxpijwamlliajwa. Waj-ax Dios, wajpaklon Jesucristobej, xamal japi pejiwam. Xanal Dios kawuajna xamal kajachawaesliajwa, chiekal duilaliajwambej, asew jiw swapich.

Tesalónica paklowaxpijw chiekal xanaboejapox Dios

² Xanal Dios kawuajna xamal, xamalliajwabej Dios kawuajna xamal. Ja-an wut, jum-anbej Diosliajwa: “Gracias-an, xam kajachawaetam xot naexasiti Jesús pejwuajan, Tesalónica paklowaxpijw” –an Diosliajwa.

³ Xanal waj-ax Dios kawuajna xamal, nejchaxoelx xabich Dios tanbistampoxliajwa, Jesucristo pejwuajan naexasitam xot. Xamal kajachawaetambej asew jiw, japi jiw nejxasinkam xot. Xamal xabich nabijatam wut, xabich nejxaejwa-el. Ja-am xamal, wuajna xamal xot wajpaklon Jesucristo pejme pasliajwa ampathatasik.

⁴ Takoew, Dios nejxasink xamal. Xanal chiekal matabijax, Dios xamal makanot japon pejiwaliajwam.

⁵ Xanal majt Jesús pejwuajan, chimiawuajan, xamal naewuajna xamal, naewuajna xamal xot. Jawutbej koechaxan isaxbej Dios pijaxtat, Espiritu Santo nakajachawaet xot. Samata, xamal chiekal najut matabijam xanal naewuajna xamal, diach chiekal wuajna xamal. Xamalbej chiekal matabijam, ma-an xamal, xamal xot duilx wut. Ja-an xanal jasoxtat xamal kajachawaesliajwan.

⁶ Xanal ja-an wut, xamalbej chiekal duilam. Me-ama wajpaklon Jesucristo ampathatat chiekal duk wut, xamalbej ja-am. Naewuajna xamal Jesucristo pejwuajan, xamal chiekal naexasitam. Naexasitam wut Jesús pejwuajan, asew jiw palala xamalliajwa. Samata, japi jiw xabich babijaxan is wut xamalliajwa, xabich nabijatam. Pe nakiowa, nejchachaemlam, Espiritu Santo xamal kajachawaesful xot.

⁷ Puexa naexasiti Jesús pejwuajan, Macedonia tuajna pijiw, Acaya tuajna pijiwbej, japi wultaen xamal chiekal duilampox. Samata, japi chiekal duil. Me-ama xamal, ja-aechi.

⁸ Xamal xabich jiw naewuajna Jesús pejwuajan. Samata, amwutjel Macedonia tuajna pijiw, Acaya tuajna pijiwbej, japi matabija japawuajan. Potuajna chanpijwbej matabija japawuajan. Japibej matabija xamal Dios xanaboejam pox. Samata, xanal kaes jumchixaxinil xamal, Tesalónica paklowaxpijwamlliajwa, japi jumtaeliajwa xamal Dios xanaboejam poxliajwa.

⁹ Puexa asew jiw, potuajna chanpijw, nakaewa najum-aech xamalliajwa: “Tesalónica paklowaxpijw chiekal bu'kulapi Pablo, asewbej, japon swapich, pat wuti japixot. Japibej kofa ídolos kawuajna xamal. Amwutjel chiekal naexasitlisi Dioskal, pomatkoicha dukpon.

¹⁰ Tesalónica paklowaxpijw wuajna xamal Jesús, Dios paxulan. Japonlap Dios mat-ech pejme dukaliajwa. Japonbej pejme fuloeyaxoek. Jesús nakbu'weyaxael, kastikamatkoi pat wut. Japamatkoi asew jiw xabich kastikaxaes, xabich babijaxan isful xot” –aech japi jiw xamalliajwa, nakaewa najum-aech wuti.

2

Pablo nabistpox Dios pijax, bichax, Tesalónica paklowaxpijw xot

¹ Takoew, xamal najut chiekal matabijam, xamal poxandax wut taeliajwan, chiekal naexasitam naewuajna xamal. Samata, xanal naewuajna xamal naxo' a-el.

² Xamal matabijambej ampox. Patx wut Filipos paklowaxxot, japapaklowaxpijw babej-jamechan jum-aech xamalliajwa. Japi jiw is pachaema-el poxan xanal nabijasliajwan. Do jawux, xanal patx wut nejtuajna, Tesalónica paklowaxxot, asew jiw, nejtuajna pijiw, palalapi xamalliajwa. Japi jiw nejchachaemla-el xamal naewuajna xamal Dios pejjamechan. Pe nakiowa, naewuajna xamal. Naewuajna xamal, Dios nakajachawaet tajlewla-elaliajwan, xamalbej Dios bu'weliajwa.

³ Xanal Dios pejjamechan naewuajna xamal, chiekal naewuajna xamal. Kaes asawuajan naewuajna-enil xamal naekichachajbaliajwan.

⁴ Xanal Dios namakanot jiw naewuajnalijwan japi jiw bu'weliawwasbej. Xanal ja-an, jiw naewuajnax wut Dios chiekal nejchachaemlialijwa xanallijwa. Naewuajna-enil jiw asbu'an jumch nejchachaemlialijwa xanallijwa. Dios chiekal matabijt xanal nejchaxoelxprovan.

⁵ Xamal chiekal matabijam. Xan jum-an wut chimiajamechan xamallijwa, japox jumchi-enil asbu'an jumch xamal nejchachaemlialijwan xanallijwa. Naewuajnax wutbej, nejchaxoela-enil nejew kinoslijwan. Dios japox chiekal matabijt.

⁶ Dios pejjamechan naewuajnax wut xamallijwa, asew jiwliawwabej, xan nejchaxoela-enil: "Xan Dios pejjamechan naewuajnax jiw chiekal nasitaelijwa" —chi-enil, nejchaxoelx wut.

⁷ Xamalxotx wut, xabich tato'la-enil islijawam tato'laxprovan. Xanal Jesucristo pej-apostolan xot, xajupx xamal xabich tato'lialijwan. Pe nakiowa, jasoxtat tato'la-enil. Me-ama kaew pawis chimiajamechan chiekal jum-aech, paxi fiat wut, xanalbej ja-an, xamal naewuajnax wut.

⁸ Xabich nejxasinkax xamal. Samata, xamalxotan wut, Dios pejjamechan chiekal naewuajnax. Ja-an wut, xanal nejchaxoelx xamallijwa: "Asew jiw nabesia wut xanal naewuajna-elalijwan Tesalónica paklowaxpijw, japox ja-aech wut, nakiowa xanal buxkofaxinil naewuajnaxprovan" —an, nejchaxoelx wut.

⁹ Takoew, xamal nejchaxoelam wut, jchiekal nejchaxoelde, ma-an xanal, xamalxotan wut! Naewuajnafulax wut Dios pejjamechan, xanal tajut nabistaxbej tejew wuajsliajwan. Naewuajna-enil wut, japamatkoi nabistax. Madoibej nabistax. Ja-an xanal, xamal nawemosasamatam xanal nawewepprovan.

¹⁰ Xamalxotan wut, chiekal duilx. Asax pachaema-elpox is-enil xamallijwa, xamal naexasitampimliajwa Jesús pejwuajan. Xamal japox chiekal matabijam. Diosbej japox chiekal matabijt.

¹¹ Xamal chiekal matabijambej, kaenanala xamal naewuajnax kaes chiekal Dios xan-aboejalijwam. Me-ama paxjiw paxi chiekal naewuajan, xanalbej ja-an, xamal chiekal naewuajnax wut.

¹² To'ax xamal chiekal duilalijwam, me-ama Dios nejxasink duilalijwam. Dios xamal makanotbej japon pejiwaliajwam, chiekal matabijaliajwambej, Dios kaes pejme xabich pachaem.

¹³ Naewuajnax wut Dios pejjamechan, xamal nejchaxoelam: "Dios pejjamechan, japi naknaewuajanpox, diachwajnakolax. Samata, Dios pejjamechan naexasisaxaes" —am, nejchaxoelam wut. Jawut japoxliajwa nejchaxoela-emil: "Japajamechan jiw pajut faekprovan" —chi-emil, nejchaxoelam wut. Xanal naewuajnax diachwajnakolax Dios pejjamechan. Samata, xamal Dios naexasitam xot, chiekal duilafulam. Samatabej, xanal Dios kawuajnax wut, gracias-an xamallijwa.

¹⁴ Jesús pejwuajan naexasiti, Judea tuajnuapijw, nabijat nakaetuajnuapijw, judíos pijaxtat, naexasit xoti Jesús pejwuajan. Xamalbej nabijatam nejtuajnuapijw pijaxtat, Jesús pejwuajan naexasitam xot.

¹⁵ Judíos pejwuajnuapijw bapi profetas. Baxael, japi pamojiwbej boesapi wajpaklon Jesús. Amwutjelbej japi judíos pijaxtat, xanalbej nabijatax. Japi judíos nejwesla puexa asew jiw. Samata, Dios nejchachaemla-el japiajwa.

¹⁶ Xanal Dios pejjamechan naewuajnax wut asew jiw, judíos-elpi, japibej Dios bu'weliawwas, judíos asbu'an jumch nabuxfiat. Ja-aech wut, japi judíos xabich pejb'u'wuajan Diosliajwa. Samata, Dios xabich kastikaxaespi.

Pablo nejchaxoelxox pejme taeliajwa Tesalónica paklowaxpijw

¹⁷ Takoew, xamalxot majt nakolax wut, xabich piach xamal tae-enil. Pe nakiowa, xamal nejkiowa-enil. Nejchaxoelx pejme xamal taeliajwan.

¹⁸ Xan, Pablo, pin-iaveces xamal taesian. Pe Satanás pachaema-elpoxan is xot xanliajwa, xamal taeyaxinil.

¹⁹ Wajpaklon Jesucristo pejme pask wut, xanal xabich nejchachaemlaxaelen. Japon jumtaeliajwa xan jumchiyaxaelen xamal chiekal naexasitampoxliajwa, naewuajnax wut chimiawuajan, japon pejwuajan.

²⁰ Samata, xabich nejchachaemlax xamallijwa.

3

¹ Xan kaes boejtaliasaxinil matabijslijwan, ma-am xamal, amwutjel duilam wut. Samata, xan, Silas suapich, Atenas paklowaxxot kaweta namax.

² Xanal ja-an wut, wajkoewan Timoteo to'ax xamal taeliajwapon. Japon nabist Diosliajwa. Xan, japon suapich, jiw naewuajnax chimiawuajan, Jesucristo pejwuajan. Timoteo

to'axbej xamal naewuajnalijawa kaes Dios xanaboejalijawam, chiekal nejchachaemlaliajwambej.

³ Samata, Timoteo to'ax xamal kajachawaesliawja, xamalxot kaen nejxaejwas wut, asew jiw pijaxtat nabijat wuton. Xamal najut matabijam, Dios naktapaei nabijasliawjas.

⁴ Xamalxotx wut, chajia jum-an: "Asamatkoi xatis nabijasaxaes asew jiw pijaxtat, Jesús pejwuajan naexasich xot" —an xamallijawa. Amwutjel xamal chiekal matabijam, ja-aech xotliso xatisliawja.

⁵ Kaes boejtaliasaxinil, chiekal matabijsasian xot, ma-am xamal, duilam wut. Samata, Timoteo to'ax xamal taeliajwapon, ma-am xamal, Dios xanaboejam wut. Xanlach nejchaxoelx ampo xamallijawa: "Satanás bej xapaejasbej Tesalónica paklowaxpijw. Samata, bej kofabejpi naexasitpox Jesús pejwuajan. Samata, wajbichax japixot nakwenaf'o'a" —anlach, nejchaxoelx wut xamallijawa.

⁶ Pe Timoteo nawia'an wut xamalxotdin, chimiawuajan xapaton. Xamalpil nakiowa chiekal naexasisfulam Jesús pejwuajan. Nakaewa chiekal nanejxasinkambej. Xamal nejkiowa-emilbej nejchaxoelaliajwam xanallijawa, nanejxasinkam xot. Xamalpil xabich xanal nataesiam. Me-ama xanal xabich xamal taesian, xamalpil-is ja-ambej xanallijawa.

⁷ Takoew, asew jiw pijaxtat xanal nabijatax wut, wultaenx xamal chiekal Jesús pejwuajan naexasisfulampox. Samata, xabich nejchachaemlax xamallijawa.

⁸ Wultaenx wut Jesús pejwuajan chiekal naexasisfulampox, xanal kaes Dios xanaboejax.

⁹ Samata, xanal Dios kawuajna x wut, gracias-an xamallijawa. Nejchachaemlaxbej xamallijawa, Dios chiekal xanaboejam xot.

¹⁰ Xanal xabich Dios kawuajna x natapaeliajwapon xamal pejme tajut chiekal taeliajwan. Xamal pejme naewuajnasian kaes pejme matabijaliajwam, kaes pejme chiekal Dios xanaboejalijawam.

¹¹ Xanal kawuajna x waj-ax Dios, wajpaklon Jesucristobej, nakajachawaesliawja xamal taeliajwan.

¹² Dios kawuajna xbej xamal kajachawaesliawja nakaewa nanejxasinkaliajwam, puexa asew jiwbej, me-ama xamal nejxasinkax, xamalbej jachiliajwam, asew jiwliawja.

¹³ Dios kawuajna xbej xamal kaes Dios xanaboejalijawam, babijax isasamatambej, duilam wut. Ja-am wut, bu'wuajanjilaxaelam, asamatkoi, waj-ax Dios pejwuajna lel nuilam wut, wajpaklon Jesús kaxasik wut, puexa pejiw suapich.

4

Machiyaxaelpox Jesús pejwuajan naexasiti chiekal duilaliajwa, Dios nejchachaemlaliajwa japiliajwa

¹ Takoew, xanal chajia xamalxotan wut, naewuajna x machiyaxaelampox, duilam wut Dios nejchachaemlaliajwa xamallijawa. Amwutjel chiekal duilam. Pe nakiowa, wajpaklon Jesús nato'a xot, kaes naewuajna xaelen xamal kaes chiekal duilaliajwam.

² Xamal matabijam, chajia xanal naewuajna x wut wajpaklon Jesús pijaxtat, machiyaxaelampox, duilafulam wut.

³ ¡Xamal duilafulde, me-ama Dios nejxasink duilaliajwam! Dios nejwesla xamal poejwam bu'moejsliawam asew watho'. Dios nejweslabej watho' bu'moejsliawja asew poejw.

⁴ Dios nejxasink kaenanala xamal poejwam matabijaliajwam ampo. Pawis fitam wut nijowliawja, ¡nijowxot chiekal laelpde, me-ama Dios nejxasink!

⁵ Pawis fitam wut nijowliawja, ¡nabej fis asbuan jumch japow pijaxkal nejxasinkaliajwam! Me-ama asew jiw, naexasis-elpi Dios, ¡nabej ja-aech'e xamal!

⁶ Dios nejwesla aton bu'moejsliawja asan pijow. Japox is wut, japon aton Dios xabich kastikaxaeson. Japoxliawja chajia xamal naewuajna x, xamalxotan wutfuk.

⁷ Dios nakmakanot wut, nakmakanos-el isliawjas babijaxan. Dioslax nakmakanot chiekal duilaliajwas japonliawja.

⁸ Asew jiw naexasis-el xanal naewuajna xroxan. Japi japoxan naexasis-el xot, naexasis-elbejpi Dios, japon to'apon Espíritu Santo xatis nakkajachawaesliawja.

⁹ Xamal nakaewa nanejxasinkam, Dios pajut xamal kajachawaet xot. Samata, lelaxinil xamal to'aliajwan nakaewa nanejxasinkampoxliawja.

¹⁰ Xamal nejxasinkam puexa wajkoew, Jesús pejwuajan naexasiti, potuajnuchapijw, Macedonia tuajnu pijw. Amwutjel xamal jum-an kaes nejxasinkaliajwam japi jiw.

¹¹ ¡Chiekal duilafulde! Chajia jum-an xamal chiekal nabichliawjam. Samata, ¡najut nejbachaxan nabichfulde! ¡Nabej xandadus, asew jiw pijaxan!

¹² Xamal japoxan isfulam wut, kaeyax wewe'paxil. Ja-am wut, asew jiw, Jesús pejwuajan naexasis-eli, xamal chiekal sitaeyaxael.

Wajpaklon Jesús asamatkoi pejme pasaxoekpox ampathat

¹³ Takoew, xanal nejxasinkax xamal chiekal matabijaliajwam, machiyaxael jiw tɔpiliajwa. Kaen nejjiwxot, tɔp wɔt, xamal xabich nejxaejwaxillejen. Me-ama asew jiw, naexasis-eli Jesús pejwɔajan, pejjiw tɔp wɔt, xabich nejxaejwas, ɔxamal nabej ja-aeche', najut chiekal matabijam xot!

¹⁴ Xatis naexasich Jesús tɔppox cruztat. Naexasichbej Jesús Dios mat-echpox pejme dukaliajwapon. Samata, chiekal matabijas, xatis naexasichpis Jesús pejwɔajan asamatkoi tɔps wɔt, diachwɔajnokolax Dios nakmat-eyaxael pejme duilaliajwas.

¹⁵ Samata, xanal lelx Jesús chajia jum-aechpox. Asamatkoi japox diach chiekal jachiyaxael. Xatis ampathatat laelpaspisfuk Jesús pask wɔt, xatis matxoela fulaeyaxisal Dios poxase. Matxoelatɔpi, japilax, matxoela fulaeyaxael Dios poxase.

¹⁶ Japamatkoi, Jesús fuloeyaxoek wɔt, Dios pej-ángelespaklon pinjametat nejlakchaxael. Do jawɔt, Dios pejtrompeta nejmesaxael. Jawɔt wajpaklon Jesús fuloeyaxoek. Jiw tɔpi, naexasiti Jesús pejwɔajan, matxoela mat-eyaxaes pejme duilaliajwa.

¹⁷ Do jawɔt, xatis, Jesús pejwɔajan naexasichpis, ampathatat laelpas wɔtfuk, wajpaklon Jesús nakbɔflaeyaxoi Dios poxase, mat-iaspi sɔapich, jaxotse pomatkoicha duilaliajwas.

¹⁸ ɔPuexa xamal nejchachaemilde, nakaewa nanaewɔajnam wɔt ampawɔajan!

5

¹ Takoew, xanal ampox lelx wɔt, lela-enil jumchiliajwan: “Japamatkoitat Jesús pasaxoek” –chiliajwan. Japon asamatkoi pajut chiekal pasaxoek.

² Xamal chiekal matabijam wajpaklon Jesús asamatkoi pejme pasaxoekpox. Chalechkal pasaxoekon, jiw japox nejchaxoela-el wɔt. Me-ama kithakan madoi chalechkal pat wɔt, jachiyaxael, wajpaklon Jesús chalechkal pasaxoek wɔt.

³ Jiw jum-aech wɔt: “Potɔajnaucha chiekal wɔajan ajil. Puexa jiw nejmach chiekal duil” – aech wɔti, jawɔt chalechkal Jesús pejwɔajan naexasis-eli Dios kastikaxaes. Me-ama pawis xabich waxaens naxɔwɔlaliajwa wɔt, jachiyaxaelbej jiw, naexasis-eli Jesús pejwɔajan, xabich kastikaxaes wɔt. Japi jiw xabich nabijasaxael.

⁴ Takoew, xamal, me-ama asew jiw, naexasis-eli Jesús pejwɔajan, ɔnabej ja-aeche'! Japi pejnechaxoelaxan, me-ama itkuá'nik, babijaxan is xot. Xamal wɔajnwetam wajpaklon Jesús pasaxoekpox athulelsik. Japamatkoitat fuloek wɔton, ɔxamal nabej belwe'! Me-ama kithakan chalechkal pat wɔt, jiw beljow, ɔxamal nabej ja-aeche', Jesús chalechkal pasaxoek wɔt!

⁵ Puexa xamal Jesús pejjiwam xot, itliakaxpijwam. Itkuatxpijwa-emil.

⁶ Samata, Jesús pejjiwis xot, chiekal nejchaxoelaxaes babijax isasamatas. Me-ama asew babijaxan is, xatislax jachiyaxisal.

⁷ Madoi jiw moejt. Jiw saxtapi, japi madoi saxtas.

⁸ Xatis itliakaxpijwas xot, wajut chiekal natataeflaxaes babijaxan isasamatas. Kaes naexasisaxaesbej Dios pejjamechan, Satanás nakmalchasamata. Nakaewa nanejxasinkaxaesbej. Dios xanaboejxaxesbej nakbɔ'welija.

⁹ Dios xatis nakmakanot wɔt, nakmakanos-el nakkastikaliajwa. Nakmakanotlax nakbɔ'welija wɔt wajpaklon Jesucristo pijaxtat.

¹⁰ Jesucristo tɔp xatis nakbɔ'welija. Samata, Jesús pejme fuloek wɔt, xatis ampathatat laelpaspisfuk, o, tɔps wɔtbej, jawɔt Jesús puexa xatis nakbɔflaeyaxael duilaliajwas japonxotse.

¹¹ Xamal nakaewa nanaewɔajnampxolis nejchachaemlaliajwam, kaes Dios xanaboejalijawambej, ijapoxlap xamal nakaewa nanaewɔajnafalde!

Pablo pejme naewɔajanpox naexasiti Jesús pejwɔajan

¹² Takoew, xamal jum-an sitaeliajwam nabisti Diosliajwa xamalxot. Japi Dios makianoch xamal tataeflaliajwa, naewɔajnalijawabejpi Dios pejjamechan.

¹³ ɔJapi jiw chiekal sitaem! ɔNejxasinkdebej, nabist xoti Diosliajwa! Duilam wɔt, ɔchiekal duilafalde, asew jiw sɔapich!

¹⁴ Takoew, xamal to'ax jiw kiwecha nabichax to'aliajwam. Jesús pejwɔajan naexasiti, nejchaemil wɔt, ɔjapi jiw naewɔajande nejchachaemlaliajwa! ɔKajachawae'ebey jiw Dios xanaboejapox chiekal mamnika-elpi, kaes chiekal Dios xanaboejalija! Asew jiw xamal taliat wɔt, ɔkamta nabej nalale'!

¹⁵ Asew jiw babijaxan is wɔt xamalliajwa, ɔxamal chiekal taem babijaxan isasamatam japi jiwliajwa! ɔXamallax isfulde pachaempoxan nakaewaliajwa, puexa asew jiwliajwabej!

¹⁶ ɔPomatkoicha nejchachaemildebej!

¹⁷ ɔDios kawɔajandebej pomatkoicha!

¹⁸ ɔDiosliajwa gracias-amdebej puexa Dios ispoxanliajwa xamalliajwa! Japoxlap Dios xabich nejxasink xamal jumchiliajwam, naexasitam xot Jesucristo pejwɔajan.

¹⁹ Espíritu Santo xamal to'a wut isaxaelampox, ijapoxliajwa nabej nejchaxoele': "Xan japox isaxinil" —nabej aeche', nejchaxoelam wut!

²⁰ Profetas jum-aech wutbej asamatkoi jachiyaxaelpoxliajwa, jxamal nejchaxoelam wut, nabej nejchaxoele': "Japox asamatkoi diachwajnakolax jachiyaxil" —nabej aeche', nejchaxoelam wut! jProfetas naewwajanpoxanliajwabej nabej jum-aech': "Japi naewwajanpoxan, Dios buxto'aspoxana-el" —nabej aeche'!

²¹ jProfetas jum-aechpoxan xamal majt chiekal xapaejam Dios pejjamechantat! Do jam wut, xamal chiekal matabijaxaelam. Do jawutbej, jum-amde: "Diachwajnakolax japi Dios buxto'as naewwajnalialjwa japajamechan" —amde, nejchaxoelam wut! Do jawut, japi chiekal naexasi'e!

²² jPuexa pachaema-elpoxan nabej is! jPuexa babijaxan ispixot xamal atwajimbej!

²³ Dios, xabich pachaempon, ijapon pajut nej kajachawaes xamal chiekal duilialjwam, is-elalialjwambej babijaxan! Dios xamal kajachawaet wut, xamal xabich pachaemaxaelam, wajpaklon Jesucristo pasliajwa wut.

²⁴ Jasoxtat Dios kajachawaesaxael, xamal makanot xoton japon pejjiwaliajwam. Isaxaelbejpon puexa chajia jumdupoxan.

Pablo to'apox naexasiti Jesús pejwajan nakaewa nasaludaliajwa, Tesalónica paklowax-pijiw

²⁵ Takoew, jxamal Dios kawwajande xanallialjwa!

²⁶ jJesús pejwajan naexasitampim, nakaewa chiekal nasaludam!

²⁷ Dios pijaxtat xamal to'ax ampox carta chanaexaljoeliajwam puexa wajkoew, Jesús pejwajan naexasitiliajwa.

²⁸ Xan wajpaklon Jesucristo kawwajnaj xamal xabich kajachawaesliajwapon.

Wachakalcarta, Pablo lelpox, Tesalónica paklowaxpijwliajwa

Pablo lelpox carta, Silvano swapich, Timoteo swapichbej, Tesalónica paklowaxpijwliajwa

¹ Xan Pablo, Silvano swapich, Timoteo swapichbej, lelx ampox carta, xamal Jesús pejwñajan naexasitampimliajwa, Tesalónica paklowaxpijwamliajwa. Waj-ax Dios, wajpaklon Jesucristobej, xamal japi pejiwam.

² Xanal Dios kawñajna, Jesucristobej, japi xamal xabich kajachawaesliajwa, chiekal duilaliajwambej, asew jiw swapich.

Dios kastikaxaelpox jiw, babijaxan ispi, Cristo pejme pask wut

³ Takoew, xamal Dios xanaboejampox kaesful. Asew jiw nejxasinkampox kaesfulbej. Samata, xanal Dios kawñajna wut, jum-an: "Gracias-an, xam jasoxtat kajachawaesfulam xot Tesalónica paklowaxpijw" —an Diosliajwa xamalliajwa.

⁴ Xamal xabich nabijatam wut asew jiw pijaxtat, kofa-emil Dios xanaboejampox. Samata, xanal xabich nejchachaemlax xamalliajwa. Samatabej, asapaklowaxanpijw, naexasiti Jesús pejwñajan, chapaeix japoxliajwa.

⁵ Xamal Dios chiekal xanaboejam xot, puexa jiw pajut chiekal matabija, Dios puexa ispoxan xabich chiekal pachaem. Samata, xamal pasaxoemch Dios tato'axotse, ampathatat xabich nabijasfulam xot.

⁶ Japi jiw xabich babijaxan is xot xamalliajwa, Dios kastikaxaespi.

⁷ Amwñtjel xamal nabijatampim, me-ama xanal, ja-ampim. Nabijataspoxan toep wut, kaes nabijasaxisal, wajpaklon Jesús fuloek wut athulelsik, ángeles swapich, xabich mamnikpi. Japi fuloek wut, fulaeyaxoeki tamdadusaxtat.

⁸ Wajpaklon Jesús fuloek wut, kastikaxaelon jiw, naexasis-elpi Dios. Kastikaxaelbejpon naexasis-elpi chimiawñajan, wajpaklon Jesucristo pejwñajan.

⁹ Japi pomatkoicha kastikaxaes. Atwaj pelsaxaesbejpi Dios pejwñajnael. Japon Dios, xabich mamnikpon, tapaeyaxilbejpon japi japonxotse pasliajwa.

¹⁰ Wajpaklon fuloek wut, japamatkoi, puexa naexasiti Jesús pejwñajan jumchiyaxael japonliajwa: "Xam xabich pachaemam" —chiyaxaeli. Japi xabich sitaeyaxaelbej Jesús. Xanal naewñajna wut Jesús pejwñajan, xamalbej chiekal naexasitam. Samata, xamalbej asamatkoi Jesúsxotaxaelam.

¹¹ Samata, xanal Dios kawñajna xamal pachaemaliajwam, me-ama Dios nejxasink. Dios kawñajna xot japi japon kajachawaesliajwa, puexa pachaempoxan isasiam wut isliajwam, naexasitam xot Jesús pejwñajan.

¹² Japoxan isam wut, puexa jiw jumchiyaxael chimiajamechan wajpaklon Jesúsliajwa. Jam wut, asew jiw xamal sitaeyaxael, Dios, wajpaklon Jesucristobej, xamal kajachawaet xot.

2

Babejolan matxoela pasaxaelpox, Jesucristo pejme pasliajwa wut

¹ Takoew, wajpaklon Jesús pejme pask wut, xatis naktamejaxaelon. Xanal lelx ampox xamal matabijaliajwam. Jesucristo pasliajwa wut, majt asaxan jachiyaxael.

² Aton jum-aech wut: "Xan matabijtax Espíritu Santo pijaxtat. ¡jesús pasklison!" —aech wuton, ijapon aton nabej naexasis! Asan aton jum-aech wutbej: "Xan tajut taenx Jesús. ¡japon pasklison!" —aech wuton, ijapon atonbej nabej naexasis! Asan aton jum-aech wutbej: "Pablo carta naxto'a xanliajwa. ¡jesúspilis pask!" —aech wuton, ijapon atonbej xamal nabej naexasis!

³ Japoxan jiw jum-aech wut, xamal chiekal taem Jesús pasaxaelpoxliajwa xamal naekichachajbasamatapi! Mox pawñajna wut Jesús pasliajwa, xabich jiw kofaxael naexasitpox Dios pejjamechan. Japi jiw Dios padaelmajiw nadofaxael. Japamatkoi kaen, babejkolan, pasaxael. Japon babejkolan asamatkoi Dios xabich kastikaxaeson.

⁴ Dios padaelmanaxaelon. Nejweslaxaelbejpon Dios. Japonbej nejweslaxael asaxan, jiw kawñajanpoxan. Japon leyaxael Dios pejtemploba. Jaxot nosaxaelon pejtua-ekax jiw tato'laliajwa, Dios pejtemplobat. Do ja-aech wut, pajut najumchiyaxaelon: "Xan Diosnan" —nachiyaxaelon xabich jiw naekichachajbaliajwa.

⁵ Xamalxotx wut, chajia jum-an japon babejolan pasaxaelpoxliajwa. ¿Xamalkat nekjiowam, jum-an wut japoxliajwa?

⁶ Xamal chiekal matabijam, Dios tapae-el babejolan pasasamatafuk. Dios markpox, matkoi, pat wut, jawut japon babejkolan pasaxael.

⁷ Ampamatkoiyan jiw xabich kaes babijaxan is. Pefuk babejkolan pasaxilfuk. Dios tapaeis wut, jawut babejkolan pasaxael babijaxan isliajwa.

⁸ Babejkolan tapaeis wut pasliajwa, japon pasaxael. Do jawux, wajpaklon Jesús pask wut, jiw taeyaxael Jesús pijax pamamax. Do jawut, Jesús kaefulaxtat matkaelaxaelon babejkolan.

⁹ Japon babejkolan ampathatat wutfuk, xabich kajachawaesaxaeson Satanás puexa jiw taeliajwa babejkolan pejpamamax. Samata, babejkolan nejmachkoechaxan isaxael xabich jiw naekichachajbaliawja.

¹⁰ Isaxaelbejpon xabich babijaxan jiw naekichachajbaliawja. Japon pijaxtat xabich jiw napelsaxael Diosliawja, naexasis-el xoti Jesús pejwuajan, diachwuajnakolaxproh, Dios bu'weliawjas.

¹¹ Samata, Dios tapaeiyaxael babejkolan jiw naekichachajbaliawja. Jiw naexasisaxael naekichachajbaspoxan.

¹² Samata, puexa japi jiw Dios kastikaxaes, naexasis-el xoti diachwuajnakolaxproh. Japi jiw asbu'an jumch nejchachaemil, isful wut babijaxan.

Dios makanotpox Tesalónica paklowaxpijw, japi bu'weliawjapon

¹³ Takoew, Dios that is-el wutfuk, Dios chajia nejchaxoel xamal makanosliawja japon pejiwaliajwam, bu'weliawjabejpon xamal. Naexasitam xot Dios pejjamechan, diachwuajnakolax Dios pejiwam Espiritu Santo pijaxtat. Samata, xanal Dios kawuajnax wut, Dios gracias-an xamalliajwa.

¹⁴ Dios xamal makanot japon pejiwaliajwam. Samata, Dios xanal nato'a xamal naewuajnalijwan chimiawuajan, Jesús pejwuajan, Dios xamal bu'weliawja. Ja-an wut, xamal naexasitam japawuajan. Samata, duilaxaelam, Jesucristo suapich, Diosxotse.

¹⁵ Samata, takoew, ¡Dios chiekal naexasisfulde! ¡Nabej nejkiowe' naewuajnaxproh, Jesús pejwuajan! ¡Nabej nejkiowe'bej xanal tajut naewuajnaxprohan, naewuajnaxprohanbej cartanxot!

¹⁶ Wajpaklon Jesucristo, waj-ax Diosbej, japi naknejxasink. Nakkeltaenbejpi. Nakkajachawaetbejpi xatis wajlewlasamatas. Nakkajachawaetbejpi xatis wuajnawesliawjas wajpaklon Jesucristo pasliawja athulelsik.

¹⁷ Xanal Dios kawuajnax xamal kaes Dios xanaboejalijwam. Dios kawuajnaxbej puexa xamal jum-ampoxan pachaemaliajwa, isfulampoxanbej.

3

Pablo to'apox Tesalónica paklowaxpijw Dios kawuajnalijwa japonliawja

¹ Takoew, kaes lelaxaelan ampox xamalliajwa. ¡Dios kawuajande xamalliajwa, jiw naewuajnax wut chiekal naewuajnalijwan! ¡Dios kawuajandebej, xanal jiw potuajnu'cha naewuajnax wut kamtalejen jiw chiekal naexasisliawja Jesús pejwuajan, me-ama xamal kamta naexasitam, jachiliajwabej japi jiw!

² ¡Dios kawuajande japon xanal natataeflaliajwa, jiw babejchow babijaxan isasamata xamalliajwa, puexa jiw naexasis-el xot Jesús pejwuajan!

³ Pe nakiowa, Dios nakkajachawaesaxael. Dios kajachawaesaxael xamal kaes xanaboejalijwam japon. Dios tataeflaxaelbej xamal malechasamata, Satanás xapeja wut xamal.

⁴ Xanal nejchaxoelx xamalliajwa: "Tesalónica paklowaxpijw Dios kajachawaesaxaes. Samata, japi puexa isaxael xatis tato'laspoxan" — an xanal, nejchaxoelx wut xamalliajwa.

⁵ Xanal Dios kawuajnax xamal kajachawaesliawjapon asew jiw nejxasinkaliajwam, me-ama Dios nejxasink xamal, jachiliajwam xamal asew jiwliawja. Dios kawuajnaxbej, xamal nabijatam wut japon kajachawaesliawja. Me-ama Cristo nakiowa Dios naexasisful, nabijat wut, ¡xamalbej ja-amsfulde!

Jesús pejwuajan naexasiti nabichaxaelpox pajut natataeflaliajwa

⁶ Takoew, xanal lel x wut, jum-an wajpaklon Jesucristo pijaxtat. Aton, naexasitpon Jesús pejwuajan, kiwechan wut nabichliajwa, japon atonxot xamal nadiajim, naexasis-el xoton xanal naewuajnaxproh!

⁷ Xamal chiekal matabijam, ma-an xanal, xamalxot duilx wut. Ja-an xanal, xamalbej matabijaliajwan chiekal duilaliajwam. Xamalxotan wut, tajut nabistax wuajsliajwan nawewe'ppoxan.

⁸ Xamalxotan wut, malech naxaeyaxan wuljoe-enil. Wuljowx wut, xatamotx. Naewuajna-enil wut, tajut nabistax matkoi, madoi wutbej, plata kanaliajwan, kaen xamalxot xanal nawewe'ppoxan nawemosasamata.

⁹ Wajpaklon Jesús xanal natapai xamal wuljoeliajwan nawewe'ppoxan, xamal naewuajnax wut japon pejwuajan. Pe nakiowa, wuljoe-enil xamal. Xanallax tajut nabistax, xamalxotan wut, xamalbej najut nabichliajwam wuajsliajwam xamal wewe'ppoxan.

¹⁰ Xamalxotan wut, jum-an: “Aton kiwesla wut nabichliajwa, ijapon nej xae-ele!” —an xan.

¹¹ Xanal wultaenx xamalxot asew nabich-elpox. Pomatkoicha japi jiw asbuan jumch mathun. Nabichaxaelpi itsalti asbuan jumch.

¹² Jasi jiwliajwa wajpaklon Jesucristo xan nato'a jumchiliajwan: “jJapi jiw pajut nej nabich wuajsliajwa wewe'paspojan!” —chiliajwan.

¹³ Takoew, jnabej kofe' isliajwam pachaempoxan asew jiwliajwa!

¹⁴ Jiw naexasis-el wut xan lelpxox carta, ijapi suapich, nabej nanuams! Ja-am wut, japi jiw pajut padalaxael.

¹⁵ jPe xamal nabej nejchaxoele' japi jiwliajwa: “Japi jiw tadaelmajiw” —nabej aeche', nejchaxoelam wut! jAsbuan jumch chiekal naewuajande, japi naexasit xot Jesus pejwuajan!

Pablo amxot kitoesaxaelpox lelpox

¹⁶ Wajpaklon Jesucristo nakkajachawaet chiekal duilaliajwas. Dios kawuajnaj xamal pomatkoicha chalaliajwapon, kajachawaesliajwabej xamal chiekal duilaliajwam nej-machtuajnjchanxot.

¹⁷ Xan Pablo, ampox tajut lel xamal saludaliajwan. Ja-an, xan kaenanula cartan lel xot. Tajwulbej jaxot lel xamal puexa chiekal matabijaliajwam xan xato'axpox.

¹⁸ Xan wajpaklon Jesucristo kawuajnaj puexa xamal kajachawaesliajwa.

Matxoelacarta, Pablo lelpox, Timoteoliajwa

Pablo lelpox carta Timoteoliajwa

¹ Xan Pablo, Jesucristo pej-apóstolan, japon pejwuaajan jiw naewuajnalijwan. Dios, jiw bu'weyaxaelpon, japon xan namakafit Jesucristo pej-apóstolliajwan. Wajpaklon Jesucristo, xatis wuajnowechpon pasliajwasik, japonbej namakafit pej-apóstolliajwan.

² Timoteo, ampox carta lelx xamliajwa. Xam, me-ama taxulnam, naknaexasitam xot Jesús pejwuaajan, naewuajna xwut. Samata, xan waj-ax Dios kawuajna xwut, wajpaklon Jesucristobej, xam kajachawaesliajwapi, xam beltaeliajwabejpi. Dios kawuajna xwut xam chiekal dukaliajwam Diosliajwa, Jesúsliajwabej, jiwliajwabej.

Pablo to'apox Timoteo, japon buxfiasliajwa asawuajan naewuajanpi

³ Macedonia tuajnu poxadax wut, xam to'ax namanaliajwam Éfeso paklowaxxot japi jiw chiekal naewuajnalijwam. Xan nejxasinkax xam jaxot namanaliajwam asew jiw buxfiasliajwam, japi naewuajanpi asawuajan Jesús pejwuaajanliajwa.

⁴ Japi jiw naewuajanbej asawuajan, pajut faekwuajan. Chapaeibejpi puexa pejwuaajanpijw ispoxan. Japawuajan pachaema-el japiliajwa. Japawuajanliajwa jiw nakaewa najum-aech wut, asbuan jumch nakaewa nabunloti. Samata, jiw kaes Dios xanaboeja-el naexasisliajwapi Jesús pejwuaajan.

⁵ Samata, xam to'ax japi jiw buxfiasliajwam. Dios nejxasink xatis naewuajnalijwas, nakaewa nanejxasinkaliajwasbej. Samata, nakaewa nanejxasinkas wut, isaxaes pachaempoxan nakaewaliajwa. Dios chiekal xanaboejaxaesbej. Nejchaxoelaxisal isliajwas pachaema-elpoxan.

⁶ Asew japixot nakaewa nanejxasinkpox nakofapi. Amwutjel japi jiw asbuan jumch nakaewa najum-aechful pachaema-elpoxan.

⁷ Japi naewuajan wut Moisés chajia lelpox, nejxasink asew jiw jumchiliajwas japiliajwa: "Ampi jiw chiekal naewuajan Moisés chajia lelpox" —chiliajwas. Japi, me-ama chiekal matabija wut, ja-aechi. Pe japi jiw pajut chiekal matabija-el Moisés chajia lelpox.

⁸ Xatis matabijas, Moisés chajia lelpox pachaem japox jiw naewuajnalijwas. Pe jiw chiekal pajut matabijaxael, ma-aech xot Moisés japox lel.

⁹ Xatis wajut matabijaxaes ampox. Paklochow lel wut tato'alpox, japi japox lela-el fiasliajwa jiw, ispi pachaempoxan. Japilax japox lel jiw fiasliajwa, babijaxan is wut, kastikaliajwabejpi. Japox lelbejpi kastikaliajwa jiw, sitae-elpi Dios, naexasis-elpipej Dios. Japox lelbejpi kastikaliajwa paxjiw bapi, penjiwbej, asew jiwbej.

¹⁰ Japox lelbejpi fiasliajwa poejiw bu'moejsasamata asew watho', watho'bej asew poejiw bu'moejsasamata. Japox lelbejpi fiasliajwa nakaepoejwa nabu'moejsasamata, watho'bej nakaewatho'a nabu'moejsasamata. Japox lelbejpi fiasliajwa asew jiw mowasamata asatuajnumchanlel, japi jiw esclavos nadofaliajwa. Japox lelbejpi fiasliajwa jiw kichacha-jbasamata. Japox lelbejpi fiasliajwa, jiw jumduw wut japox is-elasamata. Japox lelbejpi fiasliajwa naexasislasamata diachwuajnakolaxwuajan.

¹¹ Jesús pejwuaajan, chimiawuajanxot, jum-aech japox diachwuajnakolaxwuajan, Dios nabuxto'apox naewuajnalijwan. Dios, japon xabich pachaem.

Pablo gracias-aechpox Jesucristoliajwa, Jesucristo kawuajan wuton

¹² Wajpaklon Jesucristo chiekal matabijt, japon nato'apox isaxaelenpox. Samata, japon pajut nakajachawaesful, asew jiw naewuajna xwut japon pejwuaajan. Samata, gracias-an Jesucristoliajwa, Jesucristo kawuajna xwut.

¹³ Majt naexasis-enil wutfuk Jesús pejwuaajan, xan jum-ansfulax babejjamechan Jesúsliajwa. Chakifolxbej naexasiti Jesús pejwuaajan. Japox isx wut, Dios nakiowa nabeltaen. Japox isfulax wut, xan tajut chiekal matabijs-enil, babijax isfulax wut, naexasis-enil wutfuk Jesús.

¹⁴ Wajpaklon Jesucristo xan xabich nakajachawaet. Samata, japon naexasitx kaes xanaboesliajwan. Do jawut, japon nakajachawaetbej asew jiw nejxasinkaliajwan.

¹⁵ Ampox diachwuajnakolax. Samata, puexa jiw chiekal naexasisaxael. Jesucristo fuloek ampathatasik jiw, babijaxan ispi, bu'welija. Xan kaes babijaxan isx. Me-ama puexa asew jiw, xan jachi-enil.

¹⁶ Xan japoxan isx wut, Dios nakiowa nabeltaen. Ja-aech wut, puexa jiw chiekal matabija Jesucristo xabich piach palala-elpox xanliajwa. Japon kamta xan nakastika-el, naexasisfula-enil wut. Samata, jiw pajut chiekal matabijaxael, xabich wuti babijaxan ispoxan, Dios nakiowa beltaeyaxaesi, me-ama xan Dios nabeltaen. Japi jiw Dios beltaens wut, duilaxael pomatkoicha Diosxotse.

¹⁷ Samata, pomatkoicha jumchiyaxaes Diosliajwa: “Xam xabich pachaemam” – chiyaxaes. Dios, kaen paklon puexa jiwliajwa, pomatkoichaliajwabej. Pomatkoicha dukpon. Chinax kaen aton taeyaxil Dios. Japon Dios chiekal kaekolan. Japon jachiyaxael pomatkoicha.

¹⁸ Xam Timoteo, taxallan wut, ja-am. Samata, jizde xan to'axpox asew jiw naewuajnalijwam Dios pejjamechan! Japoxliajwa asew jiw, naexasiti Jesús pejwuajan, majt jum-aechi xam naewuajnaexaelampoxliajwa. Asew jiw naewuajnam wut Dios pejjamechan, tampoelaxael. Ja-aech wut, ixam nakiowa naewuajande! Me-ama soldawan nakiowa naba, chachoe wut japonliajwa, ixamlap-is ja-amde, Dios pejjamechan jiw naewuajnam wut!

¹⁹ Japox isam wut, ¡Dios xanaboejsfulde! ¡isfuldebej pachaempoxan, me-ama xam matabijtam isfulalijwam! Asew jiw matabija wut pachaempoxan isliajwa, japoxan is-eli. Samata, japi jiw kofa Dios xanaboejapoxan.

²⁰ Japox ja-aech Himeneo, Alejandro suapich. Samata, jum-aechi babejjamechan Diosliajwa. Japoxan japi buxkofaliajwa, xan japi jiw woeyax Satanásxot, wuxataeliajwapi jaxot wut.

2

Jesús pejwuajan naexasiti Dios kawuajnaexaelpox puexa asew jiwliajwa

¹ Timoteo, xan xabich nejxasinkax naexasiti Jesús pejwuajan Dios kawuajnalijwa puexa asew jiwliajwa. Japi jiw Dios kawuajan wut, graciaschiyaxaelbejpi Diosliajwa, Dios puexa jiw kajachawaetpoxliajwa.

² Japi, naexasiti Jesús pejwuajan, Dios kawuajnaexaelbejpi Dios chiekal kajachawaesliajwas jiw tato'alpi, nabistibej japiliajwa. Ja-aech wut, ajilaxael nabeyax. Samata, xatis chiekal duilaxaes. Ja-aech wut, xatisliajwa chiekal pachaemaxael Dios naexasisfulalijwas, me-ama japon nejxasink.

³ Pachaem, xatis Dios kawuajnas wut asew jiwliajwa. Dios, nakbu'wiapon, nejchachaemilbej, japon kawuajnas wut asew jiwliajwa.

⁴ Dios bu'wesia puexa jiw. Nejxasinkbejpon puexa jiw matabijaliajwa Jesús pejwuajan, diachwuajnakolaxpox.

⁵ Dios kaen. Do kaes asan Dios ajil, me-ama Dios, jason. Jesucristobej kaen. Japonlap asamatkoi jiw buflaeyaxael Dios poxase.

⁶ Cristo pajut natapaei asajiw kimatamatlaliajwas puexa jiw babijaxan ispoxan wemosliajwapon, Dios puexa jiw bu'weliajwa. Japawuajan Dios naktapaei matabijaliajwas, naewuajnalijwasbej asew jiw ampamatkoiyan.

⁷ Samata, Dios xan namakafit apóstolliajwan, potuajnucha judíos-elpi naewuajnalijwan chimiawuajan, Jesús pejwuajan. Xan jum-anpox, diach chiekal wuajnakolax. Kichachajbani.

⁸ Xan nejxasinkax poejiw potuajnucha Dios kawuajnalijwa. Japi muaxxachoejaxael, Dios kawuajan wut. Japi poejiw, chiekal pachaempi, me-ama Dios nejxasink. Palalalpibej, asew jiw suapich. Majt nalot wut, asew jiw suapich, chiekal chaemptibejliis.

⁹ Xan nejxasinkaxbej watho' naxoeliajwa, mado' ipachaem. Do japoxantat watho' naxoeyaxael. Watho' nachaemt wut, chiekal mathiayaxael. Xabich duiyaxil oro, perlasbej. Watho' naxoeyaxilbej yiafan, xabich ommaenkpi.

¹⁰ Jachiyaxil watho', naexasiti Jesús pejwuajan. Japi watho'lax isaxael pachaempoxan asew jiw kajachawaesliajwa. Ja-aech wut, asew jiw sitaeyaxaesi. Japi watho'liajwa jumchiyaxaesbej: “Japi watho' xabich pachaem” –chiyaxaesi.

¹¹ Poejiw Dios pejjamechan naewuajnalijwa wut, watho' boejlach chalakaxael chiekal naewesliajwa. Ja-aech wut, asew jiw nejchaxoelaxael japi watho'liajwa: “Japi watho' diachwuajnakolax chiekal sitaen, asew jiw naewuajan wut Dios pejjamechan” –chiyaxael jiw, nejchaxoels wut japi watho'liajwa.

¹² Xan tapae-enil watho' naewuajnalijwa Dios pejjamechan, jiw natameja wut. Watho'lax chiekal boejlach chalakaxael naewesliajwa Dios pejjamechan. Watho' tato'laxil poejiw.

¹³ Dios matxoela is Adán. Do jawux, Adán pijow ispon. Samata, watho' tato'laxil poejiw.

¹⁴ Adán naekichachajba-esal Satanás. Eva naekichachajbas Satanás. Samata, japow naexasis-el Dios.

¹⁵ Watho', paxipi, chiekal isful wut puexa Dios tato'laspoxan paxi chiekal ti'sliajwa, ja-aech wut, Dios bu'weyaxaes japi watho'. Japi watho'bej chiekal naexasisaxael Jesús pejwuajan. Asew jiw nejxasinkaxaelbejpi. Chiekal duilaxaelbejpi, me-ama Dios nejxasink.

3

Masi poejiw makanosaxaespo x ancianosliajwa, japi chiekal tato'laliajwa Jesús pejwujajan naexasiti

¹ Ampox diach chiekal wujnakolax. Kaen ancianosa wut naexasiti Jesús pejwujajan tato'laliajwa, japox bichax xabich pachaem.

² Makafisaxaespon ancianoliajwa, japon aton chiekal pachaempon asew jiwliajwa, japonaxaellape. Japonbej puexa jiw jumtispon: "Ampon aton babijax is-el" —tispon. Japonbej kaeow pijow. Japonbej chiekal natataeful pajutliajwa isasamata pachaemelpoxan asew jiwliajwa. Japonbej asew jiw sitaenspon. Japonbej chiekal asew jiw bu'kula, pejbatat jiw pat wut. Japonbej chiekal xajup asew jiw naewujajnalijwa.

³ Japonbej saxa fe-el saxsliajwas. Japonbej nabeyax nejxasinka-el. Japonbej nejxasinka-el nalosax, asew jiw swapich. Japonbej nejxasinka-el xabich plata kanaliajwa.

⁴ Japonbej chiekal tato'alpon pejbapijiw. Japonbej paxi to'a wut, chiekal owtis. Japonbej chiekal sitaens paxi.

⁵ Kaen aton chiekal tato'la-el wut pejbapijiw, ja-aech wut, japon chiekal tato'laxilbej naexasiti Jesús pejwujajan.

⁶ Jesús pejwujajan jelnaexasitpon, japon aton chiekal pachaema-elfak ancianoliajwa. Japon aton makafich wut ancianoliajwa, nejchaxoelaxaelon: "Xan kaes pejme pachaeman. Me-ama asew jiw, jachi-enil" —chiyaxaelon, nejchaxoel wut. Japox nejchaxoel wut, japon aton Dios kastikaxaes. Me-ama Dios kastika wut Satanás, jachixaesbej japon aton.

⁷ Makafisaxaespon ancianoliajwa, japon chiekal sitaeyaxaes asew jiw, naexasis-eli Jesús pejwujajan. Ja-aech wut, asew jiw japon aton wujjumchiyaxisal. Satanásbej xajupaxil japon anciano naewujajnapox wetoesliajwaspon.

Masi poejiw makanosaxaespo x diáconosliajwa, japi kajachawaesliajwa ancianos

⁸ Makanosaxaespi diáconosliajwa, japipej puexa jiw chiekal sitaenspilis. Japibej kichachajba-el. Japibej saxa fe-el saxsliajwas. Japibej nejchaxoela-el isliajwa babijaxan xabich plata kanaliajwa.

⁹ Japibej babijax is-el, chiekal naexasiti xoti diachwujnakolaxpox, Cristo pejwujajan. Japi nejchaxoel wut Jesús pejwujajnalijwa, nejchaxoela-el: "Ampawujajan diachwujnakolaxael" —chi-eli, nejchaxoel wut.

¹⁰ Makanosaxaespi diáconosliajwa, japi matxoela xapejaxaes naexasiti Jesús pejwujajan, matabijaliajwa japi pachaem wut. Japi pachaem wut, makanosaxaes diáconosliajwa.

¹¹ Makanosaxaespi diáconosliajwa, japi pejwatho' chiekal sitaeyaxaespi asew jiw. Japi watho'bej buxwujajanmaenkaxilpi asew jiwliajwa. Japi watho'bej pajut chiekal natataefulpi, asax isasamata, pachaema-elpox.

¹² Poejiw makanosaxaespi diáconosliajwa, japi kaenanula pijowaxaelpi. Japibej chiekal matabijapi paxi tato'laliajwa, pejbachanpijiwbej.

¹³ Japi diáconosbichax chiekal isful wut, puexa jiw chiekal sitaeyaxaes. Ja-aech wut, diáconos buxdalaxil pajut chapaellajwapi puexa jiw naexasitpox Jesucristo pejwujajan.

Pablo lelpox naewujajnalijwapon Timoteo diachwujnakolaxpox Jesucristoliajwa

¹⁴ Timoteo, xan ampox carta lelx wut, nejchaxoelx: "Asamatkoi chalechkal pasaxaechan Éfeso paklowaxxot Timoteo taeliajwan" —an, nejchaxoelax wut.

¹⁵ Pe nakiowa, xan piach kijlax wut pasliajwan xamxot, ampox carta xaljowam wut, xam matabijsaxaelam, naexasiti Jesús pejwujajan machiyaxael, duil wut. Japi jiw, Dios pomatkoichapon pejiwpi. Samata, japi jiw naewujajnael asew jiw Jesús pejwujajan. Japibej buxfiasaxael, asew jiw naewujajan wut asawujajan, Jesús pejwujajana-el wut.

¹⁶ Jesús pejwujajan diach chiekal wujnakolax xabich pachaem, xatis naexasichpox. Dios nakkajachawaet japawujajan jumatabijaliajwas. Jiw himnotat jajuw wut, jum-aechi:

"Cristo nalaelt ampathatat. Do jawux, Cristo tup wut cruztat, tres matkoi wut, Dios mat-ech wutbejpon, pejme dukon, jiw pajut matabijaliajwa Cristo Dios paxulanpon. Jawux japon bu'fos Dios athuse, Dios poxase. Jawut ángeles taenpi Cristo. Do jawux, Cristo pejnachala naewujajan xabich asew jiw, asatujajnanpijiw, Cristo pejwujajan. Samata, japi xanaboeja Cristo" —aech jiw, jajuw wut himno.

4

Asew jiw kofaxaelpox Jesús pejwujajan naexasitpoxliajwa

¹ Espiritu Santo nakjum-aech xatis chiekal matabijaliajwas ampox. That toepax mox pawujajna wut, naexasitpox Jesús pejwujajan, asew jiw kofaxael, japi jiw naekichachajbaxaes xot. Japi asew jiw naewujajnaspo x naexasisaxaeli. Japanaewujajna, Satanás pejnaewujajna.

² Japi naexaxisaxael naekichachajbapijiw naewuajanpoxan. Japawuajan, me-ama diachwujnakolax wut, wejachiyaxaesipox. Naekichachajbapijiw asew jiw naewuajan wut, padalaxili. Samata, chiekal nejmach naewuajnaexaeli.

³⁻⁴ Japi naekichachajbapijiw naewuajan wut, japi asbuan jumch jiw fiasaxael nakjijasamata. Kaechafiasaxaelbejpi asanaxaeyaxan, nejmachnaxaeyaxan jiw xaesamata. Pe xatis, Jesús pejwuajan naexasichpis, chiekal matabijas. Xatis Diosliajwa graciastis wut, puexa Dios ispoxan pachaem xaeliajwas. Kaen aton jumchiyaxil: “Ampox xaelx wut, pachaemaxil Diosliajwa” —chiyaxilon. Dios ispoxan xaes wut, graciashiyaxaes Diosliajwa.

⁵ Dios pejjamechan, chajia lelspx, jum-aech wut, jum-aechox: “Puexa nejmachnaxaeyaxan pachaem xatis xaeliajwas” —aechox. Samata, Diosliajwa graciastis wut, japoxan pachaem xatis xaeliajwas.

Pablo naewuajanpox Timoteo

⁶ Xam chiekal naewuajnam wut naexasiti Jesús pejwuajan xan jum-anpoxan, ja-am wut, xam pachaemaxaelam Jesucristo tanbichliajwam. Xam kaes Dios xanaboejsliajwam, chiekal naexaxisaxaelam chajia xan jum-anpoxan, xam naewuajnaex wut.

⁷ ¡Nabej naexaxis jiw pajut faekwuajan, japi naewuajan wut japox! Japawuajan pachaema-el, Dios pejjamechana-el xot. ¡Xam chiekal matabijtam naexasisliajwam Dios jum-aechpoxan!

⁸ Najaesax pachaem wajbu'anliajwa. Pe kaes pejme pachaem xatisliajwa Dios xanaboejaspox. Samata, xatis laelpas wut, Dios nakkajachawaesaxael. Baxael, tups wutbej, Dios nakkajachawaesaxael duilalajwas japonxotse.

⁹ Ampoxlap diachwujnakolax. Samata, xatis puexa chiekal naexaxisaxaes.

¹⁰ Samatabej, xatis xabich nabistas Dios pijax bichax. Jatis Dios, pomatkoicha dukpon, xanaboejas xot. Dios puexa jiw bu'weyaxael, naexasiti Jesús pejwuajan.

¹¹ ¡Xan lelxpoxan xam jiw naewuajande! ¡Jiw tato'aldebej ampoxan chiekal naexasisliajwapi!

¹² Diachwujnakolax xam chiekal pati'na-emil. Pe nakiowa, xam naewuajnam wut, ¡nabej tapae' jiw naewuajnampoxan naexaxislasamata, chiekal pati'na-emil xot! Jesús pejwuajan naexasitixotam wut, ¡chiekal dukde xam japi jiw nakxataeliajwa! ¡Jiw naewuajnam wutbej, chiekal chamoe yaxtat naewuajande! ¡Nejxasinkdebej asew jiw! ¡Dios chiekal xanaboejsfuldebej xam kajachawaesliajwapon! ¡Nabej isbej babijaxan!

¹³ Xan pas-emil wutfuk xamxot, naexasiti Jesús pejwuajan suapich, natamejlam wut, ¡Dios pejjamechan, chajia lelspx, chanaexaljoem! Do jawut, ¡chiekal chanaekabuanimbej japoxanliajwa jiw nejchachaemlialajwa, Dios kaes xanaboejalialjwabejpi!

¹⁴ ¡Isfulde Dios xam tato'alpoxan! Ja-am wut, Dios kajachawaesfulaxael. Nejchaxoelam wutbej, ¡nejchaxoelde ancianos majt ki-owapoxliajwa nejta'tat, Dios kawuajan wuti xamliajwa! Jawut ancianos Dios to'as japi xam jumchiliajwa: “Dios xam makafit japon tanbichliajwam” —chiliajwapi.

¹⁵ ¡Puexa xan tato'laxpoxan chiekal isfulde! Ja-am wut, puexa jiw xam taeyaxael chiekal dukampox.

¹⁶ ¡Najut chiekal natataeflfulde babijax isasamatam! Jiw naewuajnam wutbej Dios pejjamechan, ¡naewuajande, me-ama Dios nejxasink! ¡Nabej kofs Dios naexasitampox! Ja-am wut, Dios xam bu'weyaxael. Xam naewetibej, Dios bu'weyaxaesbej japi jiw.

5

Machiyaxaelpox Timoteo, duk wuton Jesús pejwuajan naexasitixot

¹ Aton, pati'in, is wut pachaema-elpox, japon fiatam wut, ¡nabej los! Naewuajnam wut ispoxliajwa, ¡chiekal naewuajande! Me-ama nej-ax jum-am wut, ¡ja-amde japon atonliajwa! Watho', pansiachow, naewuajnam wutbej, me-ama nakoew naewuajnam wut, ¡ja-amde!

² ¡Watho', pakdiachow, sitaem! Me-ama nej-en wut, ¡ja-amde! ¡Watho', pansiachow, sitaembej! Me-ama nakoewkola wut, ¡ja-amde! ¡Nabej bu'nejchaxoele' asax isax, japi watho' suapich!

Amxot jum-aechpox, watho', pamaljiw naetwpspi, japi naexasiti Jesús pejwuajan

³ ¡Naewuajande naexasiti Jesús pejwuajan, japi kajachawaesliajwa asew watho', pamaljiw naetwpspi, japi watho' pejjiw chiekal kijilpi kajachawaesliajwas!

⁴ Watho', pamaljiw naetwpspi, paxi, pamojiwbej, pakdiachow wut, ja-aech wut, nej kajachawaesas japi watho'. Amwutjel, japi pakdiachow xot, ¡nej tataefle' penjiw, pae'jiwbej! Ja-aech wut, Dios nejchachaemlaxael japi jiwliajwa.

⁵ Watho', pamaljiw naetǫpspi, diachwǫajnakolax pejiw chiekal kijilpi, japi watho' Dios xanaboeja kajachawaesfulalijawas. Japi watho' bǫxkofa-elbej Dios kawǫajnaproxan matkoi, madoibej, Dios kajachawaesfulalijawas.

⁶ Asew watho', pamaljiw naetǫpspi, pajut isasiapoxan, pachaema-elpoxan, isful wut, ja-aech wut, japi watho', me-ama patǫpa, jachiyaxaeli Diosliajwa.

⁷ Jesús pejwǫajan naexasiti to'im kajachawaesliajwapi watho', pamaljiw naetǫpspi! Jesús pejwǫajan naexasiti chiekal kajachawaet wut japi watho', chinax kaen aton, Jesús pejwǫajan naexasis-elpon, wǫjǫmchiyaxil babejjamechan Jesús pejwǫajan naexasitiliajwa.

⁸ Aton, Jesús pejwǫajan naexasitpon, japon kajachawaes-el wut pejiw, pejiwkolabej, ja-aech wut, asew jiw matabijaxaeson, japon aton koft Jesús pejwǫajan naexasitpox. Me-ama naexasis-eli Jesús pejwǫajan, jachiyaxil japon. Kaes pejme chaemilaxaelon. Naexasis-elpi Jesús pejwǫajan, japi chiekal tataeful pejiw.

⁹ Watho', pamaljiw naetǫpspi, japi kaes sesenta waechanpi wut, japi pejwǫalan lelaxaes pelfutat, kajachawaesliajwas naexasiti Jesús pejwǫajan. Japi watho' pamaljiw naetǫps wut, pejme poejiw nos-eli.

¹⁰ Japi watho' chiekal matabijas asew jiw, majt is xoti pachaempoxan asew jiwliajwa, pamaljiw naetǫpa-esal wuti. Japi watho'bej majt paxi wut, chiekal tataeful. Japi watho'bej chiekal bǫ'kǫla, asew jiw pat wut japi pejbatat. Japi watho'bej majt tǫakkiatpi, naexasiti Jesús pejwǫajan pat wut japi pejbatat chiekal bǫ'kǫlialijwa. Japi watho'bej majt kajachawaetbej asew jiw, nabijat wut. Isbejpi puexa pachaempoxan asew jiwliajwa. Me-ama japi watho', jasi watho'lap, kajachawaesaxaes naexasiti Jesús pejwǫajan.

¹¹ jWatho', pamaljiw naetǫpspi, sesenta waechana-elpifǫk, japi pejwǫalan nabej lele' pelfutat, naexasiti Jesús pejwǫajan kajachawaesliajwas! Japi watho' pejme nosaxael wut poejiw, ja-aech wut, bej kofaxaelbejpi Jesús pejbichax nabistpox.

¹² Ja-aech wut, japi watho' pejbǫ'wǫajnaaxael Diosliajwa, chiekal is-el xoti jǫmduwprox, Dios tanbichaxaelpox.

¹³ Ja-aech wut, japi watho' asbǫan jǫmch nanǫamsaxael asabachan mathǫnaliajwa. Ja-aech wutbej, japi watho' kiwecha nadofaxael. Bǫxwǫajanmaenkaxaelbejpi. Bǫxǫandadǫsaxaelbejpi. Japi watho'bej jǫmchiyaxael asew jiwliajwa pachaema-elpoxan jǫmchiliajwa asew jiw.

¹⁴ Samata, watho', pamaljiw naetǫpspi, japi chiekal pakdiachowa-el wutǫk, xan jǫm-an japi watho' pejme nakjiyalijwa. Ja-aech wut, paxi wǫlxaeli. Chiekal tataeflaxaelbejpi jiw pejbachanpijw. Ja-aech wut, wajdaelmajiw babejjamechan jǫmchiyaxisal japi watho'liajwa.

¹⁵ Xan japox jǫm-an, asew watho', pamaljiw naetǫpspi, kofa xoti Jesús pejwǫajan naexasitpox. Do jawǫx, asbǫan jǫmch islisi Satanás tato' alpoxan.

¹⁶ jWatho', naexasiti Jesús pejwǫajan, japi watho' kaenanǫla nej kajachawaes pejiw, watho', pamaljiw naetǫpspi! Japi japox isful wut, ja-aech wut, asew, naexasiti Jesús pejwǫajan, xajǫpaxael kajachawaesliajwa asew watho', pejiw chiekal kijilpi.

Jesús pejwǫajan naexasiti, japi sitaeyaxaelpox ancianos

¹⁷ Ancianos chiekal tataeful wut naexasiti Jesús pejwǫajan, ja-aech wut, jchiekal nej sitaes! jAncianosbej chiekal nej mosas, pomatkoicha naewǫajan wuti, chiekal chanaekabuana wutbejpi jiw Dios pejjamechan!

¹⁸ Dios pejjamechan, chajia lelpox, jǫm-aech wut, jǫm-aechox: "Woei xanbistam wut trigo matbokkiyanaliajwa, jwoei nabej kaechjoele' bozal trigo xaesamata!" —aechox. Jǫm-aechbejpo: "Kaen aton nabist wut asanliajwa, japon nej mosas!" —aechox. Samata, jancianos chiekal nej mosas, pomatkoicha chiekal naewǫajan wuti, chanaekabuana wutbejpi asew, Jesús pejwǫajan naexasiti!

¹⁹ Asan aton xam jǫm-aech wut: "Xan taenx, anciano babijax is wut" —aech wǫton, jǫpox kamta nabej naexasisǫk! Pe kolenje, o, tres aton, japox kaeyax chiekal jǫm-aech wut, ja-aech wut, jjapi chiekal naexasi'e!

Pablo kaes lelpox, naewǫajnaaxan Timoteolijwa

²⁰ Diachwǫajnakolax ancianos babijaxan isful wut, jfia'e puexa Jesús pejwǫajan naexasiti pejwǫajnale! jǫpoxlap xamal ja-amde puexa Jesús pejwǫajan naexasiti pejlewǫaliajwa, japijeb babijaxan isasamata!

²¹ Paklon babijax is wut, o, paklona-elpon wutbej, jjapi fia'e! Xam japox to'ax isliajwam. Dios chiekal matabijt, Jesucristo swapich, ángelesbej, xam to'axpox isliajwam.

²² Xam Timoteo, ki-osasiam wut aton pejta'tat japon aton makafisliajwam ancianoliajwa, japon tato'laliajwa naexasiti Jesús pejwǫajan, jxam majt chiekal nejchaxoelde japon atonliajwa! Chiekal matabijs-emilpon makafitam wut ancianoliajwa, asamatkoi japon aton

babijax is wut, ja-aech wut, japi jiw xam wuljumchiyaxael: “Timoteo kaenejchaxoelax, japon aton swapich, japox babijaxliajwa” —chiyaxael japi jiw xamliajwa. Dukam wut, ichiekal najut tataefulde pomatkoicha babijax isasamatam!

²³ Asamatkoi xam nejpoklawoejt chalechkal xabich jiwexaenk. Ja-aech wut, inabej fe' minkal! iCha-aeldoeh tanialede vinomint!

²⁴ Asew jiw babijaxan is wut, puexa jiw japoxan chiekal matabija. Samata, japi tasalas. Pelax asew jiw maliach babijaxan is wut, matabija-esal. Pe baxael, japi tasalas wut, jawut puexa jiw matabija japi babijaxan ispoxan.

²⁵ Jiw tulaela is wutbej pachaempoxan, puexa jiw chiekal taen. Asew jiw, tulaela is-el pachaempoxan. Pe japoxan asamatkoi puexa jiw chiekal matabijaxael.

6

¹ Jesús pejwajaan naexasiti, esclavos wut, japi chiekal sitaeyaxael pejpaklochow. Ja-aech wut, asew jiw wuljumchiyaxial esclavosliajwa: “Japi esclavos naexasitwajaan, chiekal pachaema-el” —chiyaxil asew jiw. Japi jiwbej jumchiyaxil babejjamechan Diosliajwa.

² Japi esclavos nejchaxoelaxilbej: “Tajpaklon Jesús pejwajaan naexasit xot, chiekal sitaeyaxinil” —chiyaxil esclavos, nejchaxoel wut pejpaklochowliajwa. iJapi kaes chiekal nej nabich pejpaklochowliajwa!

Jesús pejwajaan naexasiti, japi xanejchachaemlaxaelpox pejew

³ Asew jiw naewwajan, asawwajan, wajpaklon Jesucristo pejwajaan-elpox. Japi naewwajna-el diachwajaanakolaxwajaan. Japi jiw naewwajna-elbej asew jiw chiekal duililajwa, me-ama Dios nejxasink.

⁴ Japi jiw, asawwajan naewwajanpi, nejchaxoeli: “Xatis puexa matabijas. Me-ama asew jiw, jachi-esal” —aechi, nejchaxoel wut. Pe japi pajut chiekal matabija-el asew jiw naewwajnaspo. Japi nejxasink wajaan nabunlosliajwa, pachaema-elpox. Nakaewa nusasiowlamaenkbejpi. Nakaewa najum-aechmaenkbejpi babejjamechan. Chiekal nakaewa naxanaboeja-elbejpi.

⁵ Nabuxkofa-elbejpi nabunlosax, pejnechaxoelaxan chaemil xot. Matabija-elbejpi diachwajaanakolaxpox. Kaenanula asbuan jumch nejchaxoel: “Xan naewwajna xwut Dios pejjamechan, xabich plata kanaxaelen” —aechi asbuan jumch, nejchaxoel wut.

⁶ Xatis, Jesús pejwajaan naexasichpis, Diosliajwa, me-ama kimaenkax wut, jatis, xanejchachaemlas wut Dios nakchaxduwpoxan.

⁷ Ampathatat nalaelas wut, chiekal masox nalaelas. Asamatkoi tups wutbej, kaeyax xalaeyaxisal, ampathatpijaj.

⁸ Samata, ampathatat xatis naxaeyaxan wut xaeliajwas, naxoe wutbej naxoeliajwas, japoxanliajwa xanejchachaemlaxaes.

⁹ Pelax kimaenkasiapi, japijajwa tampoela-el naekichachajbaliajwas japi babijaxan isliajwa. Samata, japi babijaxan is kimaenkaliajwa. Ja-aech wut, kofaxili babijaxan isfulpoxan. Samata, baxael, xabich babijaxan is xot, nabijasaxaeli. Napelsaxaelbejpi Diosliajwa. Me-ama choef muthadik natacholika, jachiyaxael japi kimaenkasiapi. Japamuthxotdik japi weyaxil. Tup wut, chiekal toepaxaeli.

¹⁰ Jiw xabich kimaenkasia wut, babijaxan is plata kanaliajwa. Ja-aech wut, kofapi Dios naexasitpox. Samata, amwutjel japi jiw pajut ispoxantat xabich nabijat.

Pablo Timoteo naewwajanpox Dios kaes xanaboejliajwapon

¹¹ Timoteo, xam nabistamponam Diosliajwa, nejchaxoelam wut, inabej nejchaxoele' kimaenkaliajwam! Me-ama asew jiw nejchaxoel kimaenkaliajwa, ixam nabej ja-aechel' iIsfulde pachaempoxan! Dukam wut, ichiekal dukde, me-ama Dios nejxasink! iDios xanaboejde xam kajachawaesliajwa! iNejxasinkdebej asew jiw, naexasiti Jesús pejwajaan! Nabijatam wutbej, inabej kofs Dios naexasitampox! Nejchaxoelam wut, inabej nejchaxoele': “Xan kaes pejme pachaeman. Me-ama asew jiw, jachi-enil” —nabej aechel', nejchaxoelam wut!

¹² iXam chiekal naexasisfulde Dios! Me-ama kaen aton xabich najaet puexa pejpamamaxtat premio kanaliajwa, ixambej ja-amde, dukam wut! iChiekal dukde, me-ama Dios nejxasink! Ja-am wut, asamatkoi, dukaxaelam pomatkoicha Diosxotse. Japoxliajwa Dios xam chajia makafit. Asew jiw xam bautisa wut, jawut xabich jiw pejwajaanale xam jum-am: “Xan pomatkoicha chiekal naexasisfulaxaelen Jesús pejwajaan” —am xam jiw pejwajaanale.

¹³ Amwutjel lelx xam to'aliajwan isaxaelampox. Japox lelx wut, Dios matabijit. Japon pijaxtat puexa xatis chiekal duilafulas. Jesucristobej matabijit xan lelxpox xamliajwa. Jesús nuk wut Poncio Pilato pejwajaanale, jawut jum-aechon diachwajaanakolaxpox pajutliajwa.

¹⁴ Xan jum-an xam puexa chiekal naexasisliajwam xan lelxpoxan. ¡Chiekal naexasisfulde puexa xan jum-anpoxan, asew jiw xam wuljumchisamata: “Ampon aton chiekal naexasis-el Dios” —chisamata asew jiw xamliajwa! ¡Xan jum-anpoxan naexasisfulde, hasta wajpaklon Jesucristo pejme fuloek wut!

¹⁵ Pat wut Dios markpox, matkoi, Jesucristo pejme pasaxoek. Dios, kaen, japon paklokolan puexa jiw tato'laliajwa. Japonbej xabich pachaem. Ampathatpijiwtato'alpi, puexa japibej Dios tato'laxaesi.

¹⁶ Dios, kaen, japon tuxaxil. Dios dukxotse xabich itliak. Chinax kaen aton jaxotse pasaxil, tuxa-el wutfik ampathatat. Chinax kaen aton taeyaxilbej Dios. Pomatkoicha puexa jiw jumchiyaxael: “Dios, xam xabich pachaemam” —chiyaxael jiw pomatkoicha. ¡Diachwujnakolax japox jachiyaxael!

¹⁷ ¡Naewuajande kimaenkpi, japi nejchaxoelasamata: “Xan xabich tejew. Samata, kaes pejme xan pachaeman. Me-ama asew jiw, jachi-enil” —chisamatapi, nejchaxoel wut! Kimaeyax chalechkal toepaxael. Samata, ¡xam naewuajande kimaenkpi japi pejew xanaboejasamata! ¡japi naewuajande Dios xanaboejalijwapi, japon tataeflaliajwas! Dios puexa xatis nakwewe'ppoxan nakchaxduw chiekal duilaliajwas.

¹⁸ ¡Kimaenkpi to'im, japi jiw kajachawaesliajwa!

¹⁹ Ja-aech wut, kimaenkpi Dios chaxduiyaxaes kaes pejme ommaenkpoxan japonxotse. Japoxan pomatkoichaliajwa. Ja-aech wut, japi kimaenkpi pomatkoicha duilaxael Diosxotse.

Pablo lelpox ampacarta taxdukanaewuajnax Timoteoliajwa

²⁰ Timoteo, ¡chiekal jiw naewuajande Dios pejjamechan, me-ama Dios xam to'a! ¡Nabej naewes asew jiw pajut faekwujajan! Japawuajan Diosliajwa pachaema-el. Japi pajutliajwa najum-aech asew jiw jumtaeliajwas: “Xan kaes pejme matabijtax. Me-ama asew jiw, jachi-enil” —na-aechi pajutliajwa. Jasi jiw naewuajan wut, ¡nabej naewes, japox wujajan diachwujnakolaxa-el xot!

²¹ Asew jiw lax japox wujajan naexasit, naewuajnas wut. Samata, amwutjel kofalisi Jesús pejuwajan naexasitpox.

Xan Dios kawuajnax xam kajachawaesfulaliajwapon, asew naexasitpiliajwabej Jesús pejuwajan, Éfeso paklowaxpijw.

Wachakalcarta, Pablo lelpox, Timoteoliajwa

Pablo lelpox carta Timoteoliajwa

¹ Xan, Pablo, Dios namakafit Jesucristo pej-apóstolliajwan, jiw naewuajnalajwan Jesús pejwuajan. Dios nejxasink xan jiw naewuajnalajwan Dios jam-aechpox, naexasiti Jesús pejwuajan duilaliajwa japonxotse.

² Timoteo, ampox carta lelx xamliajwa. Xam taxulnam wut, ja-am xanliajwa, xambej naexasitam xot Jesús pejwuajan. Samata, xam nejxasinkax. Xan waj-ax Dios, wajpaklon Jesucristobej, kawuajntax xam kajachawaesliajwapi. Japi kawuajntaxbej xam chiekal beltaeliajwa. Japi kawuajntaxbej xabich xam kajachawaesliajwa chiekal dukaliajwam, asew jiw suapich.

Pablo Timoteo naewuajanpox, japon kofs-elaliajwa Dios pijax bichax

³ Me-ama tajwuajnapijiw nabist Diosliajwa, xambej ja-an amwutjel. Ja-an wut, xan babijax is-enil asew jiwliajwa. Matkoi, madoibej, Dios kawuajntax wut, xam nejchaxoelx. Samata, jawut Dios gracias-an xamliajwa.

⁴ Xan nejchafaetx xam nowampox, xan chijyaliajwan wut asalel. Samata, pejme xam taesian nejchachaemlaliajwan.

⁵ Xan nejkiowa-enil xam Jesucristo pejwuajan chiekal naexasitampox. Nej-ae' Loida matxola naexasit Jesús pejwuajan, nej-en Eunice suapichbej. Xan matabijtax, xambej diachwuajnakolax naexasitam Jesús pejwuajan.

⁶ Samata, jxam nejchaxoelde Dios pijax bichax isfulaliajwam! Xan nejta'tat ki-otx wut Dios kawuajnalajwan, jawut Espiritu Santo taadut xam kajachawaesfulaliajwa Dios pijax bichax isliajwam.

⁷ Dios to'ak Espiritu Santo xatis wajmatpuatanxotaliajwa. Samata, wajlewlixil asew jiwliajwa. Espiritu Santo nakkajachawaet isliajwas Dios nejxasinkpoxan. Nakkajachawaet-bejpon asew jiw nejxasinkaliajwas. Nakkajachawaetbejpon babijaxan isasamatas.

⁸ ¡Xam nabej nadale' asew jiw naewuajnalajwam wajpaklon Jesús pejwuajan! ¡Nabej nadale'bej xan jiw jebatat najiapoxliajwa, jiw naewuajntax xot Jesús pejwuajan! Nabijatam wut, asew jiw is wut babijaxan, Jesús pejwuajan naewuajntax wut, ja-am wut, jnakiowa naewuajnafulde! Ja-am wut, Dios kajachawaesfulaxael xam mamnikaliajwam, me-ama xan Dios nakajachawaesful.

⁹ Dios nakbu'wia xatis. Nakmakanotbejpon japon pejiwaliajwas tanbichliajwas. Dios nakmakanos-el, pachaempoxan isas xot. Pe japon nakmakanot, pajut nejchaxoel xot, xatis naknejxasink xoton. Chajiakolaxtat Dios is-el wutfak ampathat, Dios nejchaxoel to'aliajwa Jesucristo ampathatpijw bu'weliajwa.

¹⁰ Wajpaklon Jesucristo ampathatat nalaelt. Do baxael, japon boesas tupaliajwa xatisliajwa. Japon tup wut, Dios mat-echpon pejme dukaliajwa. Ja-aech wut, Jesucristo malecha patupax. Jesucristo tup wut xatisliajwa, matabijas Dios xabich naknejxasinkpox. Jiw matabija wut chimiawuajan, Jesús pejwuajan, japi matabijaxael pomatkoicha duilaxaelpox Diosxotse.

¹¹ Dios nato'a xan jiw naewuajnalajwan Jesús pejwuajan. Dios namakafitbej Jesús pej-apóstolliajwan, jiw naewuajntax wut chiekal chanaekabuanaliajwanbej japon pejwuajan.

¹² Samata, asew jiw pijaxtat amwutjel xan nabijatax jiw jebatat. Pe nakiowa, tadala-el, matabijtax xot Jesucristo, xabich xanaboejtaxpon. Matabijtaxbej japon pomatkoicha xan nataaeflaxaelpox, jiw naewuajnalajwan japon pejwuajan.

¹³ Samata, jchimiawuajan, Jesús pejwuajan, chiekal naewuajjande, majt xam naewuajntaxpox! Me-ama xam naewuajntax wut, jja-amdebej, asew jiw naewuajntax wut! ¡Pomatkoicha Jesús pejwuajan chiekal naexasisfulde! Xatis Jesús pejiw xot, jnakaewa chiekal nanejxasinkaxaesbej!

¹⁴ Dios to'a xam jiw naewuajnafulaliajwam chimiawuajan, Jesús pejwuajan. ¡Jarawuajan nabej xaliaxe' asawuajantat! Espiritu Santo, xatis wajmatpuatanxotpon, japon xam kajachawaesfulaxael japawuajan xaliaxsasamatam.

¹⁵ Xam chiekal matabijtam ampox. Xan jiw jebatax wut, puexa Asia tuajnapijiw, naexasiti Jesús pejwuajan, japi chajia nakofaliajwa. Kaes nawultatae-ellisi. Xanxot chajiapixot ampilape. Kaen pawul Figelo. Asan pawul Hermógenes.

¹⁶ Xan Dios kawuajntax Onesiforoliajwa, japon pejiwliajwabej, Dios kajachawaesliajwas. Xan jiw jebatax wut, japon kaen xabich nataent. Japon padala-elbej xan nataentaliajwa. Japon nataent wut, xan xabich nejchachaemlax.

¹⁷ Japon Roma paklowaxxot pat wut, damlathula-elon. Kamta nawulwekaxenton nafaenaliajwa. Do baxael, nafaenpon.

¹⁸ Xam matabijtam, japon xabich nakajachawaet, xan Éfeso paklowaxxotx wut. Samata, Dios kawuajjnx japon xabich kajachawaesliajwas, asamatkoi Cristo pejme pask wut.

2

Machiyaxaelpox Jesús pejwujajan naexasiti, nabist wuti Jesúsliajwa

¹ Wua, Timoteo, Jesucristo xam kajachawaet xot, imamnikde Dios pijax, bichax, chiekal nabichliajwam!

² Xam chiekal jumtaenam xabich jiw pejwujajnael xan naewuajjnx wut. Japanaewuajjnxlap xam asew jiw naewuajjande, japi jiw, matabijtampi, chiekal xajuppi naewuajjaliajwa asew jiw japanaewuajjnx!

³ Xam nabijasaxaelam asew jiw pijaxtat, nabistam xot Jesucristoliajwa. Soldawan nabijat wut, nakiowa nabeful. Boejtaliatbejpon. iXamlap-is ja-amde, nabijatam wut Jesucristoliajwa!

⁴ Soldawan wujnawet isliajwa pejpaklon to'aspoxxal. Pajut isasiapoxan isaxilon.

⁵ Najaesaxaelpon kanaliajwa premio, jachiyaxaelbej. Japon aton chiekal naexaxisaxaelbej to'aspox najaesliajwa. Najaesaxaelpon chiekal naexaxis-el wut, ja-aech wut, japon aton premio kanaxil.

⁶ Nabistpon pejlul, jachiyaxaelbej. Xabich nabistpon. Pe baxael, chiekal weti'tas wut, wepachaems wutbej, jolaxaelon pajutliajwa, pejbichax chiekal is xoton.

⁷ Samata, xam nejchaxoelam wut, ichiekal nejchaxoelde japoxanliajwa! Ja-am wut, Dios kajachawaesaxael puexa chiekal matabijsliajwam.

⁸ Xam jiw naewuajnam wut, inejchaxoelde Jesucristo, Dios mat-echpon pejme dukaliajwa, japon rey David pamon! Xan jiw naewuajjnx japon pejwujajan. Japi naexasit wut japawuajjan, Dios bu'weyaxaespi.

⁹ Xan nabijatax, asew jiw najia xot jiw jebatat, Jesús pejwujajan jiw naewuajjnx xot. Cadenamuatat namuaxwasixawaet. Me-ama babejnan wut, naki-aechpi. Pe Jesús pejwujajan chinax kaen aton xawaesaxil cadenamuatat. Samata, Jesús pejwujajan xabich potuajjnucha xajup.

¹⁰ Xan japox matabijtax xot, boejtaliatx, nabijatax wut, Dios makanochpi, japibej naexaxisliajwa Jesús pejwujajan. Samata, japi jiwbej bu'weyaxaes, Jesucristo pejwujajan naexasit wut pomatkoicha duilaliajwapi Diosxotse.

¹¹ Diachwujjnakolax himnotat jum-aech wut, jum-aechox:

“Xatis, Cristo suapich, tups wut, xatisbej duilaxaes Diosxotse, Cristo suapich.

¹² Asew jiw pijaxtat nabijatas wut, boejtaliasaxaes. Jatis wut, xatis, Cristo suapich, Diosxotse tato'laxaes. Xatis jumtis wut asew jiwliajwa: ‘Xanal Cristo pejjijwa-enil’ –tis wut, Cristobej asamatkoi xatisliajwa jumchiyaxael: ‘Ampi, jiw, tajjiwa-el’ –chiyaxaelbejpon.

¹³ Xatis wajut jumduwspox is-esal wut, Cristolax isaxael nakjumdutpox xatisliajwa. Cristo asanejchaxoelaxa-el, jum-aech wut” –aech himnotat.

Ma-aechpox aton, japon chiekal nabist wut Diosliajwa

¹⁴ Xan ampox jum-an wut, Dios chiekal matabijt. iXam jiw chiekal naewuajjnafulde japi nejchafaekaliajwa, kaes nakaewa nabanlos-elaliajwa asaxan, pachaema-elpoxan! Japi nakaewa asaxanliajwa nabanlot wut, japox chinax pachaemaxil. Asew jiw japox jumtaen wut, naexaxisaxili Jesucristo pejwujajan.

¹⁵ Jiw naewuajjande diachwujjnakolaxwujjan, me-ama Dios xam to'a! Ja-am wut, asamatkoi xam nadalaxil, Dios pejwujajnael nukam wut. Ja-am wutbej, Dios nejchachaemlaxael xamliajwa.

¹⁶ Jiw naewuajjnxamil Dios pejjamechana-el wut, japanaewuajjnx pachaema-el xot. Asew jiw japox naewuajjan wut, japi jiw xabich tabejt asew jiw, Dios xanaboejapi.

¹⁷ Japi naewuajjanpox, me-ama bu'xaxaeflawaxae wut, ja-aechox, xabich asew jiw tabejt xot. Himeneo, Fileto suapich, japibej tabejt asew jiw, naewuajjan wuti Dios pejjamechanaelpox.

¹⁸ Japi kolenje kofa Dios pejjamechan, diachwujjnakolaxwujjan. Asbuan jumch jum-aechi, asew jiw naewuajjan wut: “Xatis, Jesús pejwujajan naexasichpis, Dios nakmat-eyaxaelpox pejme duilaliajwas, japox toeplixox. Samata, Dios kaes xatis nakmat-eyaxil pejme duilaliajwas” –aech japi jiw, asew jiw naewuajjan wut. Samata, jiw, japi majt naexasiti Jesús pejwujajan, amwutjel chiekal matabija-el achawuajjan kaes pachaem naexaxisliajwapi.

¹⁹ Diachwəajnakolax Dios pejjamechan xaliaxaxil. Japon pejjamechan, chajia lelspx, jum-aech wət, jum-aechox: “Wajpaklon matabijt pejjiw” —aechox. Jum-aechbejpx: “Puexa jiw jum-aechpi: ‘Xanal Cristo pejjiwan’ —aechpi, japi jiw kofaxael babijaxan ispxoxan” —aechbej Dios pejjamechan, chajia lelspx.

²⁰ Pinjiyax batutat chalak oroplafachan. Chalakbej plataplafachan, fiestamatkoi wət, japaplafachantat jiw xaxaeliajwa. Japabatutat chalakbej plafachan isaspi naechantat, bux-astatbej, nejmachmatkoi wət japaplafachantat jiw xaxaeliajwa.

²¹ Jachiyaxaelbej jiw, naexasitpixot Jesús pejwəajan. Asew jiw chiekal kaelel kofa babijaxan ispxoxan. Ja-aech wət, chiekal isful Dios pejbichaxan. Samata, xajwə isliajwa nejmachpachaempoxan.

²² Timoteo, ixam pomatkoicha chiekal taem babijax isasamatam, me-ama asew, pansia-achow, isful babijaxan, jachisamatam! ixamlax isfulde pachaempoxan! ichiekal xanaboeksfuldebej Cristo! ichiekal nejxasinkdebej asew jiw, naexasiti Jesús pejwəajan! Dukam wət, ichiekal dukdebej! ja-amde asew jiw, naexasiti Jesús pejwəajan swapich, japi jiwbej chiekal pachaemaliajwa Diosliajwa!

²³ Xam matabijtam. Jiw nalot wət, japi nakaewa nanejwesla. Samata, xam, asew jiw swapich, jnabej nabunlos wəajan, pachaema-elwəajan!

²⁴ Xatis nabistaspis Jesúsliajwa, nalosaxisal, asew jiw swapich. Asbuan jumch chiekal pachaemaliajwa asew jiwliajwa. Chiekal matabijaxaesbej Dios pejjamechan jiw chanaekabuanaliajwas. Piach wajlalaxilbej, asew jiw babejjamechan jum-aechful wət xatistliajwa.

²⁵ Chiekal naewəajnaxae asew jiw, Dios naexasis-elpifak. Wəajnaewesaxaes asamatkoi japibej Dios kajachawaesliajwas naexasisliajwapi Dios. Naexasit wəti Dios, jawət chiekal pajut matabijaxaeli Jesús pejwəajan, diachwəajnakolaxpox.

²⁶ Ja-aech wətbej, japi pajut matabijaxael chiekal nejchaxoela-elpox Dios pejjamechanliajwa. Japi naexasit wəti Dios, ja-aech wət, nadijaxaeli Satanás tato'alxot. Ja-aech wətbej, pajut chiekal matabijaxaelbejpi majt Satanás naekichachajbaspx, japi isful wət Satanás nejxasinkpoxan.

3

Machiyaxaelpox jiw, mox pawəajna wət ampathat toepaliajwa

¹ Timoteo, xam chiekal matabijsaxaelam ampox. Mox pawəajna wət ampathat toepaliajwa, puexa jiwliajwa xabich chachoelaxael. Matkoiyan xabich chaemilaxaelbej japi jiwliajwa.

² Japamatkoiyantat jiw nejchaxoelaxael isliajwa pachaempoxan pajutliajwakal. Japi jiw xabich nejchaxoelaxaelbejpi kimaeyax. Nejchaxoel wət, jumchiyaxaelbejpi: “Xatis kaes pejme pachaems. Me-ama asew jiw, jachi-esal” —chiyaxaeli, nejchaxoel wət. Jumchiyaxaelbejpi babejjamechan Diosliajwa. Naexasisaxilbejpi paxjiw, penjiwbej, tato'laspxoxan. Asew jiw kajachawaech wət, graciaschiyaxilbejpi. Sitaeyaxilbejpi Dios.

³ Nejxasinkaxilbejpi asew jiw. Beltaeyaxilbejpi asew jiw. Buxwəajanmaenkaxaelbejpi. Kofaxilbejpi babijaxan ispxoxan. Japi asew jiw ba wət, beltaeyax chiekal wejisal. Nejweslaxaelbejpi jiw, pachaempoxan ispi.

⁴ Japibej woeyaxael pejnachala padaelmajiwxot. Isaxaelbejpi babijaxan pajut isasi-apoxan. Japibej naewesaxil, asew jiw naewəajnas wət, pajutliajwa nejchaxoel xot: “Xatis kaes pejme matabijas. Me-ama asew jiw, jachi-esal xatis” —chiyaxael xoti, nejchaxoel wət. Nejchaxoelaxaelbejpi pajut nejxasinkpoxan isliajwa. Ja-aech wət, nejchaxoelaxili isliajwa Dios nejxasinkpoxan.

⁵ Japi jiw pajutliajwa najumchiyaxaelbej asew jiwliajwa: “Xanalbej chiekal naexasitx Dios” —chiyaxaeli. Pe japi isaxael babijaxan. Ja-aech wət, puexa jiw matabijaxaes japi Dios naexasis-elpi.

Jiw ja-aechpi, ixam nabej nachale', japi swapich!

⁶ Japi jiw asabachan low. Naewəajan wət japabachanpijiw, watho', naekichachajbapi. Japi watho', nejxaejwaspi, xabich babijaxan is xot. Ja-aech wət, nakiowa kaes pejme asaxan babijaxan isasia. Samata, tampoela-el naekichachajbaliajwas japi watho'.

⁷ Japi watho' matabijasia pajelnaewəajna. Pe matabijaxili diachwəajnakolaxpox, japox xabich tampoel xot japiliajwa.

⁸ Japi poejiw nejxasinka-el naewəajnalialjwa diachwəajnakolaxpox. Nejchaxoelpi babijaxan. Naexasis-eli Jesús pejwəajan. Samata, japi poejiw, me-ama chajiakolaxtat janes, jambresbej, ja-echi. Chajiakolaxtat Moisés naewəajan wət faraón, japi kolenje asbuan jumch bəxtasalti Moisés, faraón naexasis-elaliajwa Moisés jum-aechpox, diachwəajnakolaxpox.

⁹ Japi poejiw, lowpi watho' pejbachantat, japi piach jiw naekichachajbaxil. Asamatkoi puexa jiw pajut chiekal matabijaxael, japi nejliaklapi. Me-ama chajiakolaxtat jiw matabija, Janes, Jambresbej, japi nejliaklapi, jachiyaxaeslap-is japi poejiw.

Pablo to'apox Timoteo, japon kaes jiw naewuajnalajwa

¹⁰ Timoteo, xam chiekal matabijtam, ma-an xan, jiw naewuajntax wut Jesús pejwuajan. Xam matabijtambej, ma-an xan, nabistax wut Diosliajwa, Dios chiekal nejchachaemlaliajwa xanliajwa. Xambej chiekal matabijtam, ma-an xan, Dios chiekal naexasitx wut. Xambej chiekal matabijtam, asew jiw babijaxan is wut xanliajwa, xan talala-el japoxanliajwa. Xambej chiekal matabijtam, ma-an xan, puexa jiw nejxasinkax wut. Xambej najut chiekal matabijtam xabich boejtaliasfulaxpox.

¹¹ Xambej najut matabijtam, ma-an xan, nabijatax wut, naewuajntax xot Jesús pejwuajan. Xambej puexa chiekal matabijtam xanliajwa ja-aechpoxan, Antioquia paklowaxxotx wut, Iconio paklowaxxotx wutbej, Litra paklowaxxotx wutbej. Japapaklowaxanxotx wut, japapaklowaxanpijw pijaxtat xan xabich nabijatax, Jesús pejwuajan naewuajntax wut. Pe nakiowa, wajpaklon Jesucristo nakajachawaet weliajwan japapaklowaxanpijiwxot.

¹² Puexa jiw, duilasiapi, me-ama Jesucristo nejxasink japi duilaliajwa, japi nabijasaxael asew jiw pijaxtat.

¹³ Jiw babejchowlax kaes babijaxan isaxael. Jiw naekichachajbapibej, asew jiw kaes naekichachajbaxael. Japibej asew jiw naekichachajbaxaes.

¹⁴ Timoteo, xam nabej tapae' japi jiw xambej naekichachajbaliajwa! ¡Chiekal naexasisfulde matabijtam poxan! Xam chiekal matabijtam jiw xam naewuajanpi diachwuajnakolaxpox.

¹⁵ Xam yamxulnam wut, matabijtam wut Dios pejjamechan, chajia lelspx, ja-am wut, matabijtam Dios xam bu'weyaxaelpox, Jesús pejwuajan naexasitam xot.

¹⁶ Chajiakolaxtat Dios pejiw, profetas, asew jiwbej, Dios kito'as lelaliajwa Dios pejjamechan. Jawut, japi kaenanula lel wut, Espiritu Santo pijaxtat chiekal matabija lelaliajwa. Samata, Dios pejjamechan xabich pachaem, chiekal naknaewuajnalajwa xatis chiekal matabijaliajwas diachwuajnakolaxpox naexasisliajwas. Dios pejjamechanbej pachaem xatis chiekal matabijaliajwas, masox naexasisaxial. Dios pejjamechan xabich pachaembej kofaliajwas, babijaxan isas wut. Dios pejjamechan xabich pachaembej naknaewuajnalajwa isliajwas pachaempoxan. Dios pejjamechan xabich pachaembej naknaewuajnalajwa chiekal duilaliajwas.

¹⁷ Samata, Dios naexasiti chiekal matabija wut Dios pejjamechan, japi jiw matabijaxael isliajwa puexa pachaempoxan.

4

¹ Xam to'ax jiw naewuajnalajwam Dios pejjamechan japon pijaxtat, Jesucristo pijaxtatbej. Jesucristo pejme pask wut, japon kaenanula ampathatpijiw tato'laxael. Jumchiyaxaelbejpon kaenanula jiw chajia tupiliajwabej: "Xam Dios kastikaxael, nejbu'wuajan xot" —chiyaxaelon tupiliajwa. O, jumchiyaxaelbejpon: "Xam Dios kastikaxil, nejbu'wuajan ajil xot" —chiyaxael Jesucristo.

² Samata, jasew jiw naewuajande Jesús pejwuajan! Jiw naewet wut, japi jiw naewuajande! Nejxasinka-el wutbejpi xam naewuajnapox, jnakiowa naewuajande! ¡Naewuajande japi jiw kaenanula pajut chiekal nejchaxoelaliajwa: "Ampawuajan diachwuajnakolax. Samata, xambej naexasisaxaelen" —chiliajwapi, pajut nejchaxoel wut! Japi babijaxan is wut, ifia'e! ¡To'im naexasisliajwapi Dios pejjamechan! Naewuajnam wut, jnabej buxkofe! ¡Nakiowa naewuajnafalde!

³ Asamatkoi jiw nejweslaxael naewesliajwa diachwuajnakolaxwuajan. Japi wulwekaxael asew jiw naewuajnalajwas asawuajan, naewesasiawuajan.

⁴ Nejweslaxaeli naewesliajwa diachwuajnakolaxpox. Japi naewesaxael puexa nejmachwuajan, asew naewuajanpoxan, jiw pajut faekwuajan.

⁵ ¡Xamlax nabej tapae' japi jiw naekichachajbaliajwa! ¡Naexasisfulde diachwuajnakolaxpox! ¡Japawuajan asew jiwbej naewuajnafalde! Cristoliajwa nabijatam wut, ¡boejtaliasfulde! ¡Jiw naewuajnafalde chimiawuajan, Jesús pejwuajan, japi Dios bu'welialjwas! ¡Chiekal puexa isde Dios xam tato'alpoxan!

⁶ Tajmatkoi moxlisox asew jiw xan naboesaliajwa, naewuajnafalax xot wajpaklon Jesús pejwuajan.

⁷ Me-ama aton xabich najaet puexa pejpamamaxtat premio kanaliajwa, xambej ja-an. Dios tanbistax wut, puexa tajpamamaxtat chiekal nabistax. Bichax toetx, isxpx, Dios nato'apox. Xan jiw naewuajntax diachwuajnakolaxpox, me-ama Dios nato'a.

⁸ Amwutjel Dios naxawuajnwet corona xan nachaxdusliajwa. Wajpaklon Jesucristo, japon juez, xabich pachaempon. Japon asamatkoi xan najumchiyaxael: “Xam chiekal nabistam xanliajwa” —chiyaxaelon. Do jawut, nachaxdusaxaelon corona. Jawut xan kaenan japon nachaxdusaxil corona. Puexa a sew jiwbej kaenanula chaxduiyaxaes corona. Japi jiw, nejxasinkpi Cristo, wuajnwetibej japon pejme pasliajwapox.

Pablo wullalapox Timoteo

⁹ Timoteo, xam kamta fulaesiam wut, ixabua'tlejno xan nataeliajwam!

¹⁰ Japon Demas, xanxot chijia wut, fulaechon Tesalónica paklowax poxade, kaes nejxasink xoton ampathatpijixan. Crescente to'ax japon naewuajnalijwa Jesús pejuwajan Galacia tuajnujijiw. Tito to'axbej japon Jesús pejuwajan naewuajnalijwa Dalmacia tuajnujijiw.

¹¹ Lucas, japon kaen, naman xanxot. Samata, iwulwekde Marcos! Faenam wut, japon buflaeman xanle! Japon xan nakajachawaesaxael Dios pijax bichax.

¹² Tiquico to'ax Éfeso paklowax poxade.

¹³ Xam fulaeman wut, inawexalaemno tajax, thuch naxoelxrox! Japox Troas paklowaxxot waeltax, Carpo pejbaxot. inawexalaemanbej tejew libros, asa-uafbej, xakoeyasi! Japapel-uaf xabich xan nawewe'p.

¹⁴ Alejandro, anaeltat nejmach-isan, japon babijaxan is xanliajwa. Samata, japon asamatkoi Dios kastikaxaes, japoxan is xoton xanliajwa.

¹⁵ iXam chiekal taem Alejandroliajwa! Japon xabich nejwesla xatis naewuajnasrox.

¹⁶ Roma paklowaxxotx wut, tadaelmajiw natasala wut paklochow pejuwajnalel, xan jumnotx wut, tajut chiekal jum-an: “Diachwuajnakolaxa-el japi xan natasalapox” —an xan japi paklochowliajwa. Jawut asan aton chinax asalel jumchi-el xan nakajachawaesliajwa. Puexa tajnachala asbuan jumch tamach nawaelti. Xan japi liajwa Dios kawuajnax Dios kastikasamatatas.

¹⁷ Tajnachala tamach nawaelt wut, Dios nakajachawaet tadaelmajiw naboesa-elalijwa. Dios nakajachawaetbej mamnikaliajwan naewuajnalijwan chimiawuajan, Jesús pejuwajan, puexa jaxotpijiw, judios-elpi.

¹⁸ Dios nakajachawaesaxael, a sew babijaxan is wut xanliajwa. Dios nabuflaeyaxaelbej japon tato'axotse. Samata, xatis Diosliajwa pomatkoicha jumchiyaxaes: “iXam xabich pachaemam!” —chiyaxaes. iJasox nej ja-aече' Diosliajwa!

Pablo saludos xato'apox a sew jiwliajwa

¹⁹ iNawesaludam Aquila, japon pijowbej, Prisca! iNawesaludambej Onesiforo pejiw!

²⁰ Erasto kaweta naman Corinto paklowaxxot. Tróximo bu'xaenk xot, namanax to'ax Mileto paklowaxxot.

²¹ iKamtalejen fulaemno pasliajwam iama wuajna! Saludos xato'api xamliajwa ampilape, Eubulo, Pudente, Lino, Claudiabej, puexa a sew jiw, Jesús pejuwajan naexasitibej.

²² Xan Dios kawuajnax Jesucristo xam chalalijwa. Xan Dios kawuajnaxbej puexa xamal kajachawaesliajwapon.

Pablo lelpox carta Titoliajwa

Pablo lelpox carta Titoliajwa

¹ Xan Pablo nabistax Diosliajwa. Xanbej Jesucristo pej-apóstolan. Dios nato'a kachawaesliajwan Dios makanochpi, japi naexasisliajwa Jesús pejuwajan. Ja-an wut, japi matabija xatis Jesús pejuwajan naexasichpox, diachwujnakolaxpox.

² Samata, japi jiw naexasisaxael Jesús pejuwajan pomatkoicha duilialajwapi Diosxotse. Chajiakolaxtat Dios ampatat is-el wutfik, jumduton jiw pomatkoicha duilaxaelpox japonxotse. Dios kichachajba-el.

³ Dios chajia markpox, matkoi, amwutjel patlisox xatis matabijaliajwas Jesús pejuwajan. Dios, nakbu'weyaxaelpon xatis, japon xan nato'a jiw naewuajnalajwan chimiawuajan, Jesucristo pejuwajan.

⁴ Tito, xam taxulnam wut, ja-am xanliajwa, Jesús pejuwajan naexasitam xot. Samata, lelx ampox carta xamliajwa. Waj-ax Dios, Jesucristobej, kawuajna xam beltaeliajwapi, kachawaesliajwabej, chiekal dukaliajwam, asew jiw suapich.

Pablo to'apox Tito namanaliajwa Creta tanaetxot, isliajwapon Dios pejbichax

⁵ Tito, xam chajia to'ax namanaliajwam Creta tanaetpijixot we'poxfik chiekal toesliajwam. To'axbej kaenanula paklowanaxot makanosliajwam ancianos, japi tato'laliajwa Jesús pejuwajan naexasiti japapaklowanaxot. Chajia xam jum-an, masi poejiw xam makanosaxaelam ancianosliajwa.

⁶ Xam makanosaxaelampi jiw ancianosliajwa, japi jiw chiekal pachaempi asew jiwliajwa. Japi tasala-esalpibej, babijaxan is-el xot. Kaenanula japibej pijowpi. Japi paxibej, chiekal naexasiti Jesús pejuwajan. Japi paxibej bu'wuajanjilpi. Japi paxibej chiekal naexasichpi, naewuajnas wut.

⁷ Xam makanosaxaelampi ancianosliajwa, japi tato'laliajwa Jesús pejuwajan naexasiti, japi jiw chiekal nabichaxael Diosliajwa. Samata, xam makanosaximil jiw, babijaxan ispi. Makanosaximilbej nejchaxoelpi: "Xan kaes pejme pachaeman. Me-ama asew jiw, jachienil" —aechpi, nejchaxoel wut. Xam makanosaximilbej kamta palalapi. Makanosaximilbej saxa afpi. Makanosaximilbej nabeyax wulwekpi. Makanosaximilbej xabich plata kanaxkal nejchaxoelpi.

⁸ Xam makanosaxaelampi ancianosliajwa, japi jiw chiekal bu'kulapi, asew jiw pat wut japi pejbachanxot. Japi nejxasinkpibej isliajwa pachaempoxan. Japibej majt chiekal nejchaxoelpi isaxaelpoxanliajwa. Japibej chajia xapaejas babijaxan isliajwa. Pe nakiowa, japi is-eli babijaxan.

⁹ Xam makanosaxaelampi ancianosliajwa, japi jiw Jesús pejuwajan chiekal naexasitpiyaxael, me-ama xatis majt naewuajnas, jachiliajwa japi jiw. Japawuajan kichachajba-el. Japi ancianos japawuajan naewuajan wuti, asew jiw, Jesús pejuwajan naexasiti, kaes xanaboejaxaeli Jesús. Asew jiwbej, majt nejweslapi naexasisliajwa Jesús pejuwajan, japibej naexasisaxael Jesús pejuwajan.

¹⁰⁻¹¹ Jasi poejiw xam makanosaxaelam ancianosliajwa! Creta tanaetpijiw xabich chiekal naexasis-elfuk xatis naewuajnaspox, Jesús pejuwajan. Japixot xabich judios, jum-aech: "Judios-elpi, naexasiti Jesús pejuwajan, japibej wewe'pas circuncidaliajwas Dios pejmarkaxliajwapi" —aechi asbuan jumch. Judios japox kito'a wut, jumchi-el diachwujnakolaxpox. Japi japox kito'a asbuan jumch jiw naekichachajbaliajwa, japoxantat plata kanaliajwa. Samata, judios japoxan jum-aech xot, xabich jiw, judios-elpi, kofa naexasitpox Jesús pejuwajan. Samata, xam buxfiasaxaelam japi judios.

¹² Kaen Creta tanaetpijin, xabich matabijsan, japon chajia jum-aech nakaetanaetpijiwliajwa: "Creta tanaetpijiw kichachajbamaenk. Xabich chachoebejpi. Me-ama nuth chachoe wut, ja-aechi. Japi jiw xaemaenkbejpi. Kiwechabej" —aech chajia Creta tanaetpijin nakaetanaetpijiwliajwa.

¹³⁻¹⁴ Creta tanaetpijin jum-aechpox pejiwliajwa, japox diachwujnakolax. Samata, xam Tito, buxfia'e japi judios naekichachajbasamatapi Creta tanaetpijiw, Creta tanaetpijiw chiekal naexasisliajwa Jesús pejuwajan! Japi judios fia'ebey naexasisfula-elaliajwa judios pajut faekwuajan! Japi judios fia'ebey naexasislaliajwa, to'as wut Jesús pejuwajan naexasis-eli!

¹⁵ Jesús pejuwajan naexasiti chiekal nejchaxoel taenpoxanliajwa, japoxantat pejnechaxoelaxan tabejasamatatas. Pe Jesús pejuwajan naexasis-eli, taen wuti babijaxan, japi nejchaxoel isliajwa japababijaxan. Ja-aech wut, pejnechaxoelaxan tabejtas. Japi matabija-elbey pachaempox.

¹⁶Japi jum-aechbej: “Xan Dios matabijtax” –aechi asbuan jumch. Babijaxan is wut, puexa asew jiw matabija, japi Dios matabija-elpi. Japi jiw nejwesla naexasisliajwa Dios. Japi jiw xajpa-elbej isliajwa pachaempoxan.

2

Pablo to'apox Tito naewuajnalijwa asew jiw, Pablo majt naewuajanpoxan Titolijwa

¹ Tito, xam naewuajnam wut Jesús pejwuajan naexasiti, xam naewuajnamwuajan, japawuajan nej kaenejchaxoelax, chimiawuajan, Jesús pejwuajan suapich!

² Xam naewuajnaaxaelam poejiw, pakdiachowpi, chiekal pajut natataeflialijwa isasamata pachaema-elpoxan asew jiwliajwa, asew jiw japi sitaeliajwasbej. japi pakdiachowpi naewuajandebej majt chiekal nejchaxoelaliajwa isaxaelpoxan, isasamata babijaxan! japi pakdiachow naewuajandebej chiekal naexasisliajwa xan naewuajnaaxpox, diachwuajnakolaxpox! japi pakdiachow naewuajandebej asew jiw nejxasinkaliajwapi! japi pakdiachow naewuajandebej, nabijat wut kofasamatapi Dios naexasitpox!

³ jNaewuajandebej watho', pakdiachowpi, chiekal duilaliajwa asew jiw japi watho' sitaeliajwas! japi watho' naewuajandebej buxwuajanmaenkasamata! jSaxa feyaxan nejxasinkaxilpibej! japi watho' chiekal nej duile', asew watho'bej nakxataeliajwas!

⁴ Samata, japi watho', pakdiachow, nej naewuajne' asew watho', kaes pansiachowpi, japi watho' nejxasinkaliajwa pamaljiw, paxibej!

⁵ japi watho' nej naewuajne' asew watho', kaes pansiachowpi, chiekal nejchaxoelaliajwa isaxaelpoxanliajwa, asax isasamata, pachaema-elpox! jNej naewuajne'bejpi chiekal tataeflialijwa pejbachanpijiw! jNej naewuajne'bejpi watho' pansiachow naexasisliajwa pamaljiw, asew jiw jumchisamata babejjamechan Diosliajwa!

⁶ Tito, xam naewuajande poejiw, pansiachow, chiekal nejchaxoelaliajwa isaxaelpoxan, japi isasamata babijaxan!

⁷ jXambej chiekal dukde puexa pansiachow xam nakxataeliajwa! Naewuajnam wut, jchiekal naewuajande diachwuajnakolaxtat!

⁸ Naewuajnam wut, jnaewuajande chimiajamechan, asew jiw xam wuljumchisamata! Xam asax is-emil wut, nadaelmajiw padalaxael nakjumchiliajwa babejjamechan, xatis naexasichpis Jesús pejwuajan.

⁹ jNaewuajandebej esclavos, japi naexasiti Jesús pejwuajan, chiekal naexasisliajwa puexa pejpaklochow tato'laspoxan, buxfafonasamatabeji!

¹⁰ jNaewuajandebej esclavos, japi natkawasamata paklochow pejew! Ja-aech wut, esclavos bu'wuajanjilaxael pejpaklochowliajwa. Ja-aech wut, puexa jiw matabijaxael Dios nakbu'weyaxaelpox, diachwuajnakolax.

¹¹ Xatis chiekal matabijax. Dios nakbeltaen xot, paxulan to'ak ampathatasik puexa jiw bu'welijwapon, japi naexasit wut Jesús pejwuajan.

¹² Dios nakbeltaen xot, kofas babijaxan isaspoxan, wajut isasiaspoxan. Me-ama ampathatpijiw isful babijaxan, jnabej jachitis! Amwutjel, jchiekal nejchaxoelaxaes isaxaespoxanliajwa, babijaxan isasamatas! jIsfulaxaelsax Dios nakto'apoxan! jSitaeyaxaesbej Dios, laelpas wut ampathatat!

¹³ jJachiyaxaes, wuajnewesfulas wut Jesús pasliajwa, me-ama Jesús nakjum-aech! Japon pask wut, xabich nejchachaemlaxaes. Jesucristolap Dios. Jawut japon itpaeyaxael pama-max, xatis nakbu'wia wut.

¹⁴ Jesús pajut natapaei asajiw jaelsliajwas, boesaliajwasbejpon, xatis nakbu'welijwa. Jatis wuton, xatis babijaxan isaspoxan nakwejl xatisxot, japon pejiwaliajwas xatis isfulalijwas pachaempoxan.

¹⁵ jJapoxanlap xam naewuajande Jesús pejwuajan naexasiti! Japi nejxaejwas wut, xam naewuajande nejchachaemlaliajwa! Japi is wutbej isaxilpoxan, babijaxan, xam japi fia'e, me-ama Dios pejjamechan jum-aech! Japoxanlap Dios xabich nejxasink xam isliajwam. jNabej tapae' asew jiw xam mastaeliajwa!

3

Machiyaxaelpox, duil wut Jesús pejwuajan naexasiti

¹ Xam Tito, jnaewuajande naexasiti Jesús pejwuajan, japi naexasisliajwa gobierno lelpojan, gobiernopaklochow tato'alpoxanbej! Naexasiti Jesús pejwuajan chiekal nejchaxoelaxael isliajwa pachaempoxan.

² jNaewuajandebej naexasiti Jesús pejwuajan jumchisamata babejjamechan asew jiwliajwa! japi naewuajandebej nalosamata, asew jiw suapich! jNaewuajandebej japi pachaemaliajwa, asew jiw suapich! jNaewuajandebej japi nejchaxoelaliajwa: “Xan kaes pejme pachaema-enil. Me-ama asew jiw, jachi-enil” –chiliajwapi, nejchaxoel wut!

³ Xatisbej majt matabija-esal Dios. Naexasis-esalbejpon. Samata, ampathatat laelpas wut, chiekal napeltas Diosliajwa. Laelpas wut, nejmachbabijaxan isasias. Xatis majt nusasiowlamaenkasbej asew jiw pejew, taens wut. Majt asew jiw naknejweslabej. Xatisbej asew jiw nejweslas.

⁴ Majt xatis jatis wut, Dios naktapaei matabijaliajwas nakbeltaenpox, puexa xatis nakne-jxasinkpoxbej.

⁵ Dios nakbeltaen xot, nakbu'wia. Dios nakbu'we-el, isas xot pachaempoxan. Espiritu Santo nakkajachawaet xot, xatis pajelnejchaxoelaxan.

⁶ Jesucristo, nakbu'weyaxaelpon, to'ak Espiritu Santo xatis wajmatpuatanxotaliajwa.

⁷ Dios nakbeltaen xot, xatis bu'wujajajisal babijaxan isasproxanliajwa japonliajwa. Samata, pomatkoicha duilaxaes Diosxotse. Japoxlap xatis amwutjel wujajawesfulas.

⁸ Japox diach chiekal wujajakolax. Samata, ¡chiekal naewujajande puexa naexasiti Jesús pejuwujaj isfulaliajwa pachaempoxan! Japoxan xabich pachaem puexa jiwliajwa.

⁹ Tito, ¡xam nabej buxxandadus, jiw nabunlot wut wujaj pachaema-elproxliajwa! ¡Nabej buxxandadusbej, judíos nabunlot wut pejuwujajapijw pejuwulanliajwa! ¡Nabej buxxandadusbej, jiw nabunlot wut Moisés chajia lelproxliajwa! Puexa japoxan nabunlot wut, pachaemaxil.

¹⁰ Aton naewujaj wut asawujaj wut asawujaj jiw kofaliajwa diachwujajakolaxwujaj, ¡japon aton xam buxfia'e! Buxkof-el wut, ¡pejme buxfia'e buxkofsliajwapon japox! Pe japon buxkof-el wut naewujajprox, ¡japon aton nabej tapae' kaes naewujajaliajwa naexasiti Jesús pejuwujaj!

¹¹ Japon aton asawujaj naewujaj wut, xam matabijsaxaelam japon chiekal naewujajna-el Jesús pejuwujaj. Ja-aech wut, japon aton pajut tasalaxaes babijax isproxanliajwa.

Pablo to'apox Tito isliajwa we'ppoxanfuk

¹² Xan to'axaelen Artemas xam poxade. Ja-el wut, to'axaelen Tiquico. Japon pa'a wut xam-xot, ¡xabua'de Nicópolis paklowax poxade, jaxot xatis nafaekaliajwas! Japapaklowaxxot xan iama chatoepaxaelen.

¹³ Abogado, pawulpon Zenas, Apolos suapich, japi thilt wut fulaeliajwa kaes atuj poxade, ¡xam kajachawae'e japi wewe'pasproxanliajwa!

¹⁴ Puexa naexasiti Jesús pejuwujaj matabijaxael kajachawaesliajwa asew naexasiti Jesús pejuwujaj, xabich wewe'pas wut. Kaen kajachawaes-el wut asew jiw, japon aton chiekal pachaema-el Diosliajwa.

Pablo saludos xato'apox asew Jesús pejuwujaj naexasitiliajwa

¹⁵ Puexa xanxotpi saludos xato'a xamliajwa. ¡Nawesaludam jaxotpijw, naexasiti Jesús pejuwujaj! Xan puexa xamalliajwa Dios kawujajna xajachawaesliajwapon.

Pablo carta lelpox Filemónliajwa

Pablo carta lelpox Filemónliajwa

¹ Xan Pablo, jiw jebatat jiw nabu'ajia chimiawuajan, Jesucristo pejuwajan, naewuajnxaxot. Filemón, xan, wajkoewan Timoteo suapich, ampox carta lelx xamliajwa, xanal xam nejxasinkax xot. Xambej nabistam Jesucristo pejbichax, me-ama xanal.

² Xanal lelxbej ampacarta wajkoewow Apialiajwa, Arquipoliajwabej. Arquipobej naknaewuajan Jesucristo pejuwajan, xam Filemón suapich. Lelxbej asewliajwa, japi naexasiti Jesucristo pejuwajan, natamejapi nejbatat.

³ Xan waj-ax Dios kawuajnxax, wajpaklon Jesucristobej, xamal xabich kajachawaesliajwapi, chiekal duilaliajwambej, asew jiw suapich.

Pablo Dios kawuajanpox Filemónliajwa

⁴ Xan xabich Dios kawuajnxax wut xam Filemónliajwa, gracias-an Diosliajwa.

⁵ Wultaenx xam chiekal naexasisfulampox wajpaklon Jesucristo. Wultaenxbej asew jiw nejxasinkampox, japi naexasiti Jesús pejuwajan. Japoxan wultaenx wut, xan Dios kawuajnxax xamliajwa.

⁶ Xan Dios kawuajnxax xam naewuajnalialjwam Jesucristo xanaboejaspoxliajwa. Xam chiekal naewuajnam Jesús pejuwajan naexasitampoxliajwa. Ja-am wut, xam chiekal matabijsaxaelam puexa pachaempoxan xatisliajwa Jesucristo pijaxtat.

⁷ Takoewan, xam xabich nejxasinkam asew jiw, japi naexasiti Jesús pejuwajan. Samata, xabich japi jiw nejchachaemil xamliajwa. Samata, xanbej xabich nejchachaemlax xamliajwa. Xabich nejchaxoelxpxox xamliajwa, amwutjel nejchaxoela-enillejen.

Pablo to'apox Filemón pejme bu'kulsliajwapon Onésimo

⁸ Xan apóstolan, Dios nato'a xot. Samata, xajux xam tato'laliajwan. Pe nakiowa, xam to'axinil isaxaelampoxliajwa.

⁹ Xanlax ampox to'ax xam nawe-isliajwam, nanejxasinkam xot. Xan Pablo, pati'nan, nabistax Jesucristoliajwa. Samata, jiw jebaxot jiw nabu'ajia, naewuajnafulax xot Jesucristo pejuwajan asew jiwliajwa.

¹⁰ Samata, xam to'ax chamoeyax isliajwam Onésimoliajwa. Onésimo, me-ama taxulan, xan naewuajnxax wut jiw jebaxot, japon naexasit xot Jesús pejuwajan.

¹¹ Onésimo nej-esclavo wut, japon najaet xamxot. Ja-aech wut, diachwuajnakolax japon chaemil xamliajwa. Pe amwutjel, japon chiekal pachaemlison xamliajwa, xanliajwabej.

¹² Xan japon to'ax xam poxade nawiasliajwa. ¡Chiekal bu'kuldepon! Me-ama xan chiekal nabu'kultam wut, ¡ja-amde Onésimoliajwa!

¹³ Xan nejchaxoelx: "Pachaem Onésimo xanxot namanaliajwa, Filemón pijaxtat Onésimo nakajachawaesfulaliajwa, xan jiw jebaxotx wut, chimiawuajan, Jesucristo pejuwajan, naewuajnafulax xot jiw" —an, nejchaxoelx wut japonliajwa.

¹⁴ Pe xanliajwa chiekal nawepachaema-el Onésimo namanaliajwa xanxot, xam najut tapae-emil wut. Xanbej nejxasinka-enil xam wuljoeliajwan japon to'aliajwam naka-jachawaesliajwa. Xam najut to'asiam wut Onésimo, pachaem to'aliajwam xan naka-jachawaesfulaliajwapon.

¹⁵ Dios bej tapaeisbej Onésimo najaesliajwa xamxot japox kaematkoijanliajwa asbuən jumch. Amwut nawiasaxaelon xam poxade pomatkoicha jaxot namanaliajwa.

¹⁶ Japon nawiat wut pejme xamxot, malech nabichaxaelon. Pe japon amwutjel esclavokala-el. Amwutjel japon kaes pejme pachaem. Japon wajkoewanbej, naexasit xoton Jesús pejuwajan, me-ama xam, ja-aech xoton. Xan japon nejxasinkax. Xambej japon nejxasinkaxaelam.

¹⁷ Xam nejchaxoelam wut xanliajwa: "Pablo, me-ama takoewan, japon Jesús pejuwajan naexasit xot" —am wut, ja-aech wut, Onésimo xamxot pat wut, chiekal bu'kulsaxaelampon. Me-ama xan chiekal nabu'kulsaxaelam wut, jachiyaxaelam Onésimoliajwa.

¹⁸ Onésimo xam chajia dewat wut, is wutbejpon babijax xamliajwa, ¡xan namat-omwuljoem! Xan mosaxaelen japon dewatpoxan.

¹⁹ Xan, Pablo, tajut ampox lelx. Xan tajut xam mosaxaelen Onésimo dewatpoxanliajwa. ¡Xambej chiekal nejchafae'e xan xabich nadewatpox! Xam kajachawaetx xot naexasisliajwam Jesús pejuwajan, pomatkoicha dukaxaelam Diosxotse.

²⁰ Takoewan, ampox jum-an xam nawe-isliajwam pachaempox Onésimoliajwa, xambej naexasitam xot Jesucristo pejuwajan. ¡Isde pachaempox Onésimoliajwa xan nejchachaemlaliajwan, xatis Jesucristo pejiwax xot!

²¹ Xan chiekal matabijtax xam na-owchiyaxaelampox. Matabijtaxbej xan jəm-anpox, xam kaes pejme isaxaelam. Samata, ampox carta lelx xamliajwa.

²² Kaes asax jəmchiyaxaelen. ¡Tajpasax wəajna batu chiekal nawechaemde xanliajwa! Xamal piach Dios kawəajnam soldaw nakolsax natapaeliajwa xan dukxbatat, xamalxot pasliajwan. Samata, xan nejchaxoelx wut, jəm-an: "Jari pejkawəajnaxantat xan ampabatat nakolsaxaelen" –an, nejchaxoelx wut.

Pablo, a sew jiw sɛapich, saludos xato'apox

²³ Epafra, japon tajnachalan, amwətjel japon jiw jebatat jiasbej, Jesucristo pejwəajan a sew jiw naewəajnaful xoton. Japonbej saludos xato'a xamalliajwa.

²⁴ Marcosbej saludos xato'a. Aristarco, Demasbej, Lucas sɛapichbej, japibej saludos xato'a. Jari xan nakajachawaesful, Dios pejbichax isfulax wut.

²⁵ Xan wajpaklon Jesucristo kawəajnax xamal kajachawaesfulalialiajwapon.

Ampox carta xato'as judíosliajwa, Jesús pejuwajan naexasitiliajwa

Dios to'apox paxulan, japon naewuajnalijwa jiw

¹ Chajiakolaxtat Dios pin-iaveces xabich buxto'a pejprofetas, japi profetas jumchilijawapi wajwujnapijiw Dios buxto'aspojan. Do jawux, profetas naewuajan wajwujnapijiw Dios buxto'aspojan.

² Do baxael, Dios to'a paxulan xatis naknaewuajnalijwa Dios matabijaliajwas. Chajiakolaxtat Dios to'a paxulan isliajwa ampathat, puexa thatbaxotatpibej. Do jawux, Dios paxulan to'a japon puexa japoxan tateflaliajwa.

³ Dios paxulan xabich pachaempon. Me-ama pax Dios xabich pachaem, ja-aechbej paxulan. Dios paxulan xajur puexa isliajwa jum-aechpoxtat, mamnik xoton. Puexa japon ispojan ampathatat, athuxotsebej, nakiowa amwutjel pachaemsful japon pijaxtat. Dios paxulan tur cruztat xatis babijaxan isaspojan ajlaliajwa Diosliajwa. Jawux chijialison athu poxase ekaliajwa pax poklalel, japon suapich, puexa tato'laliajwa.

Dios paxulan kaes pejme pachaempox, me-ama ángeles, jachi-elon

⁴ Dios paxulan kaes pejme pachaem. Me-ama ángeles, jachi-elon. Dios tapaei paxulan puexa tato'laliajwa, japon suapich. Dios tapaeibej ángeles kaesuapich tato'laliajwa.

⁵ Dios jum-aech paxulanliajwa:

“Xam taxulnam. Amwutjel puexa jiw matabijaxael xam diachwujnakolax taxulnam” — aech Dios. Dios jum-aechbej asew jiw chiekal matabijaliajwa japon paxulanliajwa: “Xanlap japon paxnan. Japon xan taxulan” — aech Dios. Dios japox jumchi-el kaen ángelliajwa. Dios japox jum-aech paxulankalliajwa. Samata, matabijas Dios paxulan kaes pejme pachaempon. Me-ama ángeles, jachi-elox.

⁶ Dios paxulan to'aliajwa wut ampathatlelsik, jum-aechon ángelesliajwa:

“Xamal puexa brixtat nuilaxaelam taxulan pejuwajnael, sitaeyaxaelam xot” — aech Dios ángelesliajwa.

⁷ Dios jum-aechbej:

“Taj-ángeles tajjamechan xananuamspijwaxael asew jiwliajwa. Ángeles pabisla. Me-ama joewa wut, ja-aech. Japibej, me-ama jitkaech-ia'an wut, ja-aech jiw toejafaliajwa, pejbu'wujjanpi xanliajwa” — aech Dios.

⁸ Dios jum-aech paxulan jumtaeliajwa:

“Xam Diosnam. Tato'laxaelam pomatkoicha. Xam puexa tato'lam wut, chiekal tato'laxaelam.

⁹ Xam nejxasinkam isliajwam pachaempoxan. Xambej nejwesla isliajwam pachaema-elpoxan. Samata, xam makafitx tajaxtat kaes nejchachaemlialijwam. Me-ama nejnachala nejchachaemil wut, xam jachiyaximil” — aech Dios paxulanliajwa.

¹⁰ Dios pejme jum-aech paxulanliajwa:

“Xam paklonam. Isam ampathat, puexa ajil wut. Isambej thatbaxo.

¹¹ Puexa xam isampoxan, baxael, paduj nadofaxael. Me-ama padujnaxoe, jachiyaxael japoxan, asamatkoi, puexa toep wut. Pelax xam toepaximil, pomatkoicha dukaxaelam xot.

¹² Me-ama jiw truka padujnaxoe, xambej asamatkoi jakichiyaxaelam thatbaxoliajwa, ampathatliajwabej. Do jawux, pajelthatbaxo, pajelthatbej, xam isaxaelam. Pelax xam, me-ama amwutjel, jachisfulaxaelam pomatkoicha, xam toepaximil xot” — aech Dios paxulanliajwa.

¹³ Dios jumchi-el kaen ángelliajwa:

“¡Eke tajpoklalel puexa jiw tato'laliajwam! Nadaelmajiw malechaxaelen japi xam naexasisliajwa to'axaelampox” — chi-el Dios pej-ángelesliajwa. Pelax Dios japox jum-aech paxulankalliajwa.

¹⁴ Puexa ángeles, japi espíritu. Samata, japi taeyaxisal. Japi duil isfulaliajwa Dios tato'alpoxan. Japi to'as potuwajnychu kajachawaesliajwa jiw. Japi jiw Dios bu'weyaxaes.

2

Xatis naekuanjiamsaxisalpox Jesús pejuwajanliajwa

¹ Xatis chiekal matabijas Dios paxulan kaes pejme pachaem. Me-ama ángeles, jachi-el Dios paxulan. Samata, xatis naekuanjiamsaxisal, naknaewuajan wut chimiawuajan, japon pejuwajan. Kaes chiekal naexasisaxaes kofasamatas japawuajan.

² Chajiakolaxtat Dios pajut buxto'a ángeles, japi chapaelialjwa Moisés Dios pejtato'laxan, japoxan jiw naewuajnalialjwas. Do jawux, Moisés japatato'laxan lel. Jiw naexasis-elpi japatato'laxan, japi Dios kastikas.

³ Samata, xatis naekuanjiamsaxisal chimiawuajan, Dios paxulan pejuwanliajwa, xatis Dios nakbu'welialjwa. Wajpaklon Jesucristo jum-aech jiw bu'weyaxaelpox. Japi jiw pajut matabija wut japawuajan diachwuajnakolaxpox, ja-aech wut, xatisbej japox chiekal naknaewuajanpi.

⁴ Japi jiw, xatis naknaewuajan wut, isbejpi koexaxan Dios pijaxtat. Espiritu Santobej kajachawaech japi kaenanula isliajwa Dios nejxasinkpoxan. Samata, xatisbej matabijas naknaewuajanpoxan, diachwuajnakolaxpoxan.

Jesucristo nalaelt wut, me-ama yamxi nalaela wut, ja-aechpox

⁵ Asamatkoi, ampathat pajelthat wut, jawut Dios tapaeayaxil ángeles tato'laliajwa japathatat.

⁶ Dios pejjamechan, chajia lelspos, jum-aech wut, jum-aechox jiw kaes pejme pachaemaxaelpoxliajwa. Me-ama Dios pej-ángeles, jachiyaxil jiw. Japoxbej Dios pejjamechan, chajia lelspos, jum-aech wut, jum-aechox:

“Dios, xam kaes xabich pachaemam. Me-ama jiw, jachi-emil. Ja-am wut, ¿ma-aech xotkat xam nakiowa nejchaxoelam jiwliajwa?”

⁷ Xam jiw isam wut, japi jiw puexa chiekal pachaema-ellejen. Me-ama ángeles xabich pachaem, jachi-el japi jiw. Pe nakiowa, asamatkoi, japi jiw xam chiekal naexasit wut, japi kaes pejme pachaemaxael xamliajwa. Me-ama ángeles, jachiyaxilpi pachaem-pox. Ja-aech wut, puexa kaes pejme sitaeyaxaesi.

⁸ Samata, asamatkoi xam tapaeayaxaelam japi jiw tato'laliajwa puexa isampoxan” —aech Dios pejjamechan, chajia lelspos, japi jiwliajwa.

Dios tapaei wut jiw tato'laliajwa puexa Dios ispoxan, japi tato'laxael puexa. Tataeflaxael-bejpi. Pe xatis amwutjel tae-esal jiw puexa tato'alpox, tuadus-el xotfuk.

⁹ Jesús ampathatat nalaelt wut, kaes xabich pachaempon. Me-ama ángeles, xabich pachaem wut, jachi-el Jesús. Dios naknejxasink xot, paxulan to'a nalaelsliajwa ampathatat, xabich nabijasliajwa. Do baxael, Cristo tup xatis babijaxan isaspoxanliajwa. Samata, Dios tapaei japon ekaliajwase Dios poklalel, puexa jiw tato'laliajwa.

¹⁰ Dios puexa is wut, japoxan japon pajutliajwa. Dios xabich nejxasink japi jiw chiekal naexasisliajwapi japon pejjamechan. Nejxasinkbejpon japi jiw japon pejiwaliajwa. Nejxasinkbejpon japi jiw chiekal pachaemaliajwa, me-ama Dios pachaem, jachiliajwa japi jiw. Samata, Jesucristo tapaeis xabich nabijasliajwa, tup wuton cruztat jiw babijaxan ispoxanliajwa.

¹¹ Amwutjel xatis babijaxan isaspoxan ajil xatisliajwa, Jesús tup xot cruztat xatisliajwa. Japon pax, xatisbej japon waj-ax. Samata, Jesús buxdala-el jumchiliajwa: “Ampi jiw takoew” —chiliajwapon xatisliajwa.

¹² Dios pejjamechan, chajia lelspos, jum-aech wut, jum-aechox Jesús jumchiyaxaelpox pax Dios jumtaelialjwa:

“Asamatkoi jumchiyaxaelen, puexa takoew suapich, xamliajwa. Puexa takoew suapich, natamejlax wut, xanal xabich himno jajuyaxaelen xam nejchachaemlaliajwam” —aech Jesús jum-aechpox pax Diosliajwa.

¹³ Dios pejjamechan, chajia lelspos, jum-aech wut, jum-aechox Jesús jumchiyaxaelpox pejnachalaliajwa:

“Xan taj-ax, Dios, xanaboejsaxaelen nakajachawaesliajwa” —aechox.

Japafatxot jum-aechbej Jesús jumchiyaxaelpox pejnachalaliajwa:

“Xan amxotx, japi suapich, Dios nachaxdutipi suapich” —chiyaxaelpox.

¹⁴ Jesús ampathatat nalaelt wut, me-ama yamxi nalaela wut, ja-aechon. Samata, Jesús xajup tupaliajwa, xatis babijaxan isaspoxanliajwa. Samata, Jesús tup wut, malechapon Satanás. Jiw tup Satanás pijaxtat.

¹⁵ Jesús tup wut, chiekal toep pomatkoicha wajlewlapox tupaliajwas.

¹⁶ Diachwuajnakolax Jesús fulae-elsik ampathatasik japon kajachawaesliajwa ángeles. Pelax japon fuloek kajachawaesliajwa Abraham pamojiw, japi naexasitpi Dios, me-ama Abraham, ja-aechpi.

¹⁷ Samata, Jesús nalaelt ampathatat Dios kawuajnalialjwa xatisliajwa. Naktbeltaenbejpon. Ispox Dios to'aspox. Samata, pajut natapaeipon padaelmajiw kimatamatlaliajwas cruztat. Japon tup wut, Dios nakbeltaen toepaliajwa wajbu'wuajanpox.

¹⁸ Jesús nabijat, Satanás xapaejtas wut babijax isliajwa. Pe Jesús is-el babijax. Samata, Jesús xajup pejiw kajachawaesliajwa, japibej xapaejas wut Satanás.

3

Amxotpox jum-aechpox Jesús kaes pejme pachaempon, me-ama Moisés pachaem wut, jachi-elpon

¹ Takoew, xamal Dios pejiwam, makanot xoton japon pejiwaliajwam. Nejchaxoelam wut, jchiekal nejchaxoelde Jesucristoliajwa, japon Dios to'akas ampathatasik xatis naknaewuajnalijwa Dios pejjamechan! Jesús diachwujnakolax sacerdotekolan, japon Dios nakwekawuajnalijwa Dios nakkajachawaesliajwa xatis.

² Chajiakolaxtat Moisés chiekal tataeful puexa Dios pejiw, Dios japox to'as xoton japi israelitas tataeflaliajwapon. Jesúsbej chiekal is Dios pijax bichax ampathatat.

³ Jesús kaes pejme pachaem. Me-ama Moisés pachaempon, jachi-el Jesús. Jesús kaes pejme xabich sitaens, jiw bu'weyaxael xoton, naexasiti japon pejwuajan. Bachan isanbej sitaens. Me-ama japon ba ispox sitaens wut, jachi-esal.

⁴ Xatis bachan taens, jiw isbachan. Pe Dios ampathatat puexa nejmach is.

⁵ Chajiakolaxtat Dios pajut to'a Moisés chiekal tataeflaliajwa puexa Dios pejiw. Samata, Moisés chiekal naexasit, Dios to'as wut. Moisés jum-aechbej asamatkoi Dios jumchixaxaelpoxan jiwliajwa.

⁶ Cristo, Dios paxulan, chiekal naktataeflaful, Dios pejiws xot. Chiekal naexasich wut Cristo pejwuajan, nejchachaemlas wutbej Dios nakbu'weyaxaelpoxliajwa, jatis wut, pomatkoicha Dios pejiwaxaes.

Dios tapaeyaxaelpox pejiw leliajwa japonxotse

⁷⁻⁸ Kaes pejme pachaem Jesucristo. Me-ama Moisés, ángelesbej, jachi-el Jesucristo. Samata, jesús chiekal naexasisfulde! Dios pejjamechan chajia lelsxot jum-aech, Espíritu Santo jum-aechpox:

"Amwutjel, xamal jumtaenam wut Dios jum-aechpox, jnabej naexasisle' Dios naexasisliawam! Me-ama asew nejuwajnapijiwxot, naexasis-eli Dios, jxamal nabej ja-aeché! Chajiakolaxtat pajilaxtat japi duilaful wut, japi nejwesla isfulaliajwa Dios tato'laspoxan. Japi naexasisfula-el Dios. Pe nakiowa, japi toes-esal Dios.

⁹ Nejuwajnapijiw naexasis-el, Dios pajilaxtat wuti. Naexasis-elbejpi, Dios to'as wut. Cuarenta waechan Dios is koexaxan nejuwajnapijiwliajwa. Japoxan taen wut, nakiowa naexasisfula-eli, Dios tato'las wut.

¹⁰ Samata, Dios palala nejuwajnapijiwliajwa. Dios jum-aech: 'Japi naexasisfula-el, xan tato'lax wut. Nejwesla isliajwa xan tato'laxpoxan' —aech Dios nejuwajnapijiwliajwa.

¹¹ Samata, Dios palala wut, jum-aechon: 'Japi pasaxil xan chaemtaxotse damlathulaliajwa' —aech Dios nejuwajnapijiwliajwa" —aech japox Espíritu Santo.

¹² Takoew, jnajt chiekal natataefulde! Nejchaxoelam wut Diosliajwa, jnabej nejchaxoele': "Xan kofsaxaelen Dios naexasitxot, Dios chiekal ajil xot" —nabej aeché, nejchaxoelam wut! Diachwujnakolax Diosjila-el. Japon duk.

¹³ Xamal ampathatat laelpam wutfik, jpomatkoicha nakaewa nanaewuajande Dios pejjamechan Dios kaes xanaboejalijwam! jJa-amde, kaen xamalxot Satanás naekichachajbasamatas babijax isasamatapon! jJa-amde kaen xamalxot naexasislasamata Dios, asew jiw xamal naewuajan wut!

¹⁴ Xatis chiekal naexasisaxaes Jesús pejwuajan. Me-ama akasestat chiekal naexasisfulas wut, jachisfulaxaes. Laelpas wut ampathatat, kofaxisal naexasichpox Jesús pejwuajan. Jatis wut, xatis duilaxaes Cristo tato'alxotse.

¹⁵ Dios pejjamechan, chajia lelsxot, jum-aech wut, jum-aechox xamal naexasislasamatam:

"Amwutjel, xamal naewetam wut Dios jum-aechpox, jnabej naexasisle' chiekal naexasisliawam! Me-ama nejuwajnapijiw pajilaxtat naexasis-el, jxamallax nabej ja-aeché!" —aech Dios pejjamechan, chajia lelsxot.

¹⁶ Xamal chiekal matabijam, Moisés bu'fol wut, israelitas nakola wut Egipto tujnuxotdin. Japibej Dios naexasis-el, jumtaen wuti, Dios pajut chiekal jum-aech wut.

¹⁷ Xamal chiekal matabijambej, israelitas babijaxan is wut Diosliajwa, cuarenta waechan pajilaxtat wuti, Dios palala. Samata, japi tap pajilaxtat.

¹⁸ Japi naexasis-el wut Dios jumtisxot, japi leyaxil Dios chaemtaxotse jiw damlathulaliajwa.

¹⁹ Xatis matabijas, wajwuajnapijiw le-el damlathulaxxotse, naexasis-el xoti Dios jum-aechpox.

4

¹ Xatis Dios nakwuajnewesful damlathulaxxotse, me-ama Dios nakjumdut. Samata, chiekal naexasisfulaxaes Jesús pejwuajan. Nakaewa nakajachawaesfulaxaes chiekal

naexasisfulaliajwas Jesús pejwajaan, asamatkoi kaeyaxtat damlathulaliajwas damlathulaxxotse.

² Xatisbej jumtaens chimiawajaan damlathulaliajwas, me-ama wajwajaanpijiw majt jumtaen. Wajwajaanpijiwliajwa japawajaan chiekal wepachaema-esal, naexasis-el xoti.

³ Pe naexasichpis Jesús pejwajaan, damlathulaxaes Dios nakjumdutxotse. Jesús pejwajaan naexasis-eli jaxotse damlathulaxil. Dios japox jum-aech, palala wut: "Japi leyaxil xan chaemtaxxotse damlathulaliajwa" —aech Dios.

Dios toet wut that isax, thatbaxobej, jawut toetbejpon isax wajwajaanpijiw damlathulaxaelxotse.

⁴ Dios pejjamechan, chajia lelsprox, jum-aech wut, jum-aechbejprox Dios isprox, séptimomatkoi wut:

"Séptimomatkoi wut, kaes Dios is-el. Jawut damlathulon" —aechox.

⁵ Dios pejjamechan, chajia lelsprox, jum-aech wut, jum-aechbejprox Dios jum-aechprox asew jiw naexasisaxilprox Jesús pejwajaan:

"Japi jiw leyaxil damlathulaliajwa xan chaemtaxxotse" —aech Dios jum-aechprox.

⁶ Matxoelajumtaenpi chimiawajaan naexasis-el xoti, japi leyaxil damlathulaxxotse. Samata, xabich jiw we'pfak leliajwa jaxotse.

⁷ Asew jiw naexasis-el xot chimiawajaan, Dios jumdut asamatkoi asew jiw leyaxaelprox damlathulaxxotse. Chajia Dios to'a rey David jumchiliajwa ampamatkoiyan asew jiw leyaxaelprox damlathulaxxotse. Rey David jum-aech japoxliajwa:

"Xamal jumtaenam wut Dios jum-aechprox, ¡nabej naexasisle' Dios naexasisliajwam!" —aech rey David.

⁸ Josué bu'pat wut israelitas Canaán tuajnxot, japatuajnu Dios xapae-el pomatkoicha israelitas damlathulaliajwa. Japatuajnu Dios xapaei wut pomatkoicha israelitas damlathulaliajwa, ja-aech wut, Dios jumduxaxil asamatkoi pejjiw israelitas damlathulaxxotse leliajwa.

⁹ Samata, matabijas, asamatkoi Dios tapaeyaxael pejjiw leliajwa damlathulaxxotse. Jatis wuti, Dios pejjiw damlathulaxael jaxotse. Me-ama Dios damlathul séptimomatkoi wut, jachiyaxaelbej Dios pejjiwpi.

¹⁰ Japi leyaxael damlathulaxxotse damlathulaliajwa. Me-ama Dios damlathul, isax toet wut, jachiyaxaelbej japi jiw.

¹¹ ¡Ma xamal ixajupamdo' puexa isliajwam, do japoxtat isde lelaliajwam damlathulaxxotse! Chajiakolaxtat wajwajaanpijiw Dios naexasis-el japi leliajwa damlathulaxxotse. Samata, puexa xatis, me-ama japi, jachiyaxisal.

¹² Dios pejjamechan xabich mamnik. Me-ama espada, nataelapabua'powa, xua'la wut xabich funiachde, ja-aechbej Dios pejjamechan. Dios pejjamechan xajup leliajwa xabich funiach jiw pejmatpuatan poxade, japi pajut chiekal matabijaliajwa, ma-aech pejnechaxoelaxan, pachaem wut, o, chaemil wut.

¹³ Puexa Dios isproxan, japoxan namoexaxil Dios pejwajnalel, Dios puexa chiekal taen xot japoxan. Asamatkoi xatis kaenanula Dios chapaeyaxaes, ma-aech xot isas kaenanula isasproxan.

Amxot jum-aechprox Jesús sacerdotekolanpon, Dios kawuajnalijwapon puexa jiwliajwa

¹⁴ Jesús, Dios paxulan, athu poxasepon wajsacerdotekolnaliajwa. Japon Dios kawuajnafal xatisliajwa, Dios xatis nakkajachawaesliajwa. Samata, ¡Dios chiekal naexasisaxaes!

¹⁵ Jesús ampathatat wut, Satanás xapaejaspon babijax isliajwa. Pe nakiowa, Jesús is-el babijax. Samata, Jesús chiekal matabijt, ma-aech Satanás nakxapaeja wut babijax isliajwas.

¹⁶ Samata, Satanás nakxapaeja wut, xatis kamta Dios kawuajnaxaes nakkajachawaesliajwa. Jatis wut, Dios nakkajachawaesaxael, nakbeltaen xoton, naknejasink xotbejpon.

5

¹ Puexa sacerdotesxot, kaen sacerdote makafich Dios, japon puexa sacerdotespaklokolnaliajwa. Do jawux, japon puexa sacerdotespaklokolnaxael, Dios kawuajnafalaliajwa puexa jiwliajwa. Choef xua'atbejpon Dios beltaeliajwa puexa jiw babijaxan isproxanliajwa.

² Ampathatat tampoela-el sacerdotes isliajwa babijaxan, Satanás xapaejas wut, asbuan jumch jiwkal xoti. Samata, puexa sacerdotespaklokolan xajup jiw beltaeliajwa, jiw is wut babijaxan matabijs-elaxtat.

³ Puexa sacerdotespaklokolan, choef xua'asliajwa wut, kaen choefan matxoela xua'lapon, pajut babijaxan isproxanliajwa Dios beltaeliajwas. Japox kitoet wut,

sacerdotespaklokolan pejme asew choef xua'aton asew jiw babijaxan ispoxanliajwa japibej Dios beltaelajwas.

⁴ Sacerdotes pajut namakafisaxil puexa sacerdotespaklonkolnaliajwa. Sacerdote Dios makafich wut, ja-aech wutlax, japon puexa sacerdotespaklokolnaxael. Me-ama chajiakolaxtat wajwujnapijin Aarón Dios makafich sacerdotespaklokolnaliajwa, jachiyaxael japon sacerdote.

⁵ Cristoliajwa japox ja-aechbej. Japon pajut namakafis-el sacerdotekolnaliajwa. Dios makafichpon. Dios jumtisbejpon: "Xam taxulnam. ¡Puexa jiw nej matabijs diachwujnakolax xam taxulnamponam!" —tison Dios.

⁶ Dios pejjamechan, chajia lelspxox, jum-aech wut, jum-aechbejpxox Dios jum-aechpxox Cristoliajwa:

"Xam pomatkoicha sacerdotnaxaelam. Me-ama Melquisedec pomatkoicha sacerdote, xamlap-is jachiyaxaelam" —aech Dios jum-aechpxox Cristoliajwa.

⁷ Jesucristo ampathatat wut, pin-iaeves pinjametat Dios kawujjanpon. Dios kawujjan wut, xabich nejxaejwas wut, itminpon. Jasoxtat Jesucristo Dios kawujjan Dios bu'weliawas, matabijt wut padaelmajiw boesaxaespxox. Pe jawut, Jesucristo nakiowa nejchaxoel: "Xan isaxaelen taj-ax Dios nejxasinkpxox" —aechon, nejchaxoel wut. Samata, Dios kajachawaechpon isliajwa Dios nejxasinkpxox.

⁸ Jesucristo, Dios paxulan, xabich pachaempon. Japon nejchaxoel: "Xan nabijasaxaelen. Pe nakiowa, Dios chiekal naexasisaxaelen" —aechon, nejchaxoel wut. Samata, naexasitpon pax Dios.

⁹ Cristo chiekal naexasit xot pax Dios, japon tup puexa jiw bu'wujjanjilialiajwa Diosliajwa. Samata, puexa jiw, naexasiti Jesús pejwujjan, japon bu'weyaxael japi jiw pomatkoicha duilalijwapi Diosxotse.

¹⁰ Samata, Dios makafit Jesús sacerdotekolnaliajwa, me-ama Melquisedec pomatkoicha sacerdote, jachiliajwa Jesús.

Jesús pejwujjan naexasiti naewujnaspxox kofasamata naexasitpxoliajwa

¹¹ Xan xabich lelaliajwan Jesucristoliajwa, sacerdotekolanpxoliajwa. Pe pachaema-el puexa chiekal chanaekabuanaliajwan, xamal makach matabija-emil xot.

¹² Xamal piach Jesús pejwujjan naexasitam. Pelis, ama xamal jiw chanaekabuaniwaxaelam. Pe nakiowa, xamal xabich we'pamfuk asew jiw chiekal chanaekabuanaliajwam Dios jum-aechpxoxan, matabija-emil xot kaes tampoelpoxan chiekal jummatajibialiajwam. Samata, xamal, me-ama yamxi naxaeyaxan xaeyaxilpi, ja-am xamal. Me-ama yamxi mitan afpi, ja-ambej xamal.

¹³ Jiw wewe'paspi naewujnalijwas tmapoxan, Dios pejjamechan, japi pejnechaxoelaxan, me-ama yamxi, mitan afpi, ja-aechi. Japi matabija-el isliajwa Dios nejxasinkpxoxan.

¹⁴ Jiw chiekal matabijapi Dios pejjamechan, japi matabija isliajwa pachaempoxan. Matabijabejpi is-elalialjwa pachaema-elpoxan. Samata, japi jiw Diosliajwa, me-ama pakdiachow xaeyaxaelpi naxaeyaxan, ja-aech japi jiw.

6

¹ Samata, Dios pejjamechan kaes matabijaxaes chiekal naexasisliajwas Dios. Jatis wut, diachwujnakolax Diosliajwa, xatis, me-ama pakdiachwas wut, jachiyaxaes. Jatis wutbej, asew jiw nakwewe'paxil kaeyax naknaewujnalijwa majt naknaewujjanpxoxan, akases-tat tuaduws wut naexasisliajwas Jesús pejwujjan. Jatis wut, japoxanliajwa pomatkoicha naknaewujnaxil. Asaxan nakwewe'paxil kaes naknaewujnalijwa, chiekal matabijax xotlis japoxan. Samata, nakwewe'paxilbej nakfiasliajwa babijaxan is-elalialjwas Dios nakkastika-elalialjwa. Nakwewe'paxilbej naktato'lialijwa Dios chiekal naexasisliajwas.

² Nakwewe'paxilbej kaes naknaewujnalijwa bautisapoxliajwa. Nakwewe'paxilbej kaes naknaewujnalijwa ancianos ki-owapoxliajwa naexasiti Jesús pejwujjan, japi pejta'antat, Dios kawujnalijwa wut. Nakwewe'paxilbej kaes naknaewujnalijwa tupi mat-eyaxaespxoliajwa pejme duilalijwa. Nakwewe'paxilbej kaes naknaewujnalijwa pejbu'wujjanpi pomatkoicha kastikaxaespxoliajwa.

³ Dios naktapaeti wut, ¡kaes chiekal naexasisaxaes Jesús pejwujjan!

⁴ Asew jiw matabija diachwujnakolaxpxox. Samata, naexasiti Jesús pejwujjan Dios bu'weliawas. Japi jiw pejmatpuxatanxotbej Espíritu Santo.

⁵ Japi matabijabej Dios pejjamechan xabich pachaempox. Matabijabejpi Jesús asamatkoi ampathatat tato'laxaelpxox.

⁶ Pe kofa wuti naexasitpxox Jesús pejwujjan, diachwujnakolax japi jiw chiekal napel-saxael Diosliajwa. Ja-aech wut, japi jiw pijaxtat puexa asew jiw bu'wujjanpaeyaxaeli

Jesúsliajwa. Kofapi Jesús pejwajaan naexasitpox, japi jiwlap, me-ama cruztat pejme kimatamatali Jesús, jachiyaxaeli.

⁷ Dios pijaxtat iam thilan ampathatat. Samata, muthaspi chiekal nakweti't.

⁸ Iam thilan wut, toeixkal naboela wut, pachaema-el. Toeixkal wut, asamatkoi toejafaxaes. Jachiyaxaes jiw, Jesús pejwajaan naexasitpox kofapi. Asamatkoi Dios kastikaxaes infiernoxotdik.

Xatis chiekal naexasisaxaes pox Jesús pejwajaan, Dios nakkajachawaet xot

⁹ Takoew, xamal nejxasinkaxpim, xan chiekal matabijtax, asew jiw kofa naexasitpox Jesús pejwajaan. Xamal kofa-emil. Xan matabijtaxbej chiekal duilampox. Chiekal naexasitam xot Jesús pejwajaan, Dios xamal bu'wia.

¹⁰ Dios is pachaempoxan. Japon nejkiowaxil xamal isampoxan japonliajwa. Nejkiowaxilbejpon asew jiw, naexasiti Jesús pejwajaan, kajachawaetampox, japi jiw xamal nejxasinkam xot. Xamal amwutjelbej japi jiw nakiowa kajachawaesfulde!

¹¹ Xan nejxasinkax xamal kaenanula nakaewa nakajachawaesliajwam pomatkoicha. Jam wut, Dios xamal kaenanula chaxduiyaxael pachaempox. Diachwajnakolax xamal chaxduiyaxaelon wujawetampox.

¹² Xamal nabej nejwesle' naexasisliajwam Dios! Pomatkoicha naexasisfulde Dios! Me-ama asew jiw pomatkoicha chiekal naexasisfuli Dios, xamalbej ja-amfulde! Japi jiw kofael naexasitpox Dios. Japoxlap xamal jachisfulaxaelambej! Dios chajia jum-aechpox xabich pachaem. Japi jiw chaxduiyaxaes pachaempox, Dios chajia jum-aechpox chaxduiliajwa.

¹³ Chajiakolaxtat Dios jum-aech Abrahamliajwa chiekal naexasisliajwa: "Xan Diosnan xot, tajut jum-anpox xamliajwa, diachwajnakolax" —aech Dios Abrahamliajwa, japon chiekal matabijsliajwa. Dios japox jum-aech, kaes pachaempon ajil xot, me-ama Dios.

¹⁴ Dios chajia jum-aech wut, jum-aechon Abrahamliajwa: "Diachwajnakolax xam kajachawaesaxaelen. Samata, namojiw xabichaxael" —aech Dios Abrahamliajwa.

¹⁵ Do jawux, Abraham wujawesful piach Dios jumduchpox. Baxael, japox ja-aechlisox Abrahamliajwa.

¹⁶ Jiw jumduw wut asew jiwliajwa, jum-aechi ampox: "Xamal jumdutpox, Dios chiekal japox najumtaen" —aechi asew jiwliajwa, chiekal naexasisliajwas jumduw pox. Kaes pejme asax jumchiyaxili asew jiw chiekal naexasisliajwas.

¹⁷ Dios jumdut wut jiwliajwa, nejxasinkon jiw chiekal naexasisliajwas japon jum-aechpox. Samata, jumdut wut, jum-aechbejpon: "Xan Diosnan xot, jumdutpox diachwajnakolax japox xamalliajwa" —aech Dios, jiw chiekal pajut matabijaliajwa japon jum-aechpox diachwajnakolax.

¹⁸ Dios kichachajba-el. Samata, puexa japon jum-aechpox diachwajnakolax. Dios nakjum-aech nakbu'weyaxaelpox. Samata, xatis nejchaxoels wut, nejchaxoelaxisal: "Xatis Dios nakbu'weyaxil" —chiyaxisal, nejchaxoels wut. Diachwajnakolax Dios nakbu'weyaxael.

¹⁹⁻²⁰ Jesús tap wut, jawut Dios poxasepon. Jaxotse Jesús Dios kawujanaful puexa xatisliajwa. Jesús sacerdotekolan. Me-ama Melquisedec pomatkoicha sacerdote, ja-aechbej amwutjel Jesús Diosxotse. Samata, xatis chiekal Jesús xanaboejas. Asamatkoi japon xatis nakbu'flaeyaxael duilaliajwas Diosxotse.

7

Amxot jum-aechpox Jesús sacerdotekolanpox, me-ama Melquisedec, ja-aechpon

¹ Melquisedec chajiakolaxtat duk wut Salem paklowaxxot, japon rey japapaklowax-pijiwliajwa. Pe japonbej sacerdote, Dios, athxotsepon, pejsacerdote. Japamatkoiyan Abraham, pamak suapich, malechapi asapaklowaxanpijiw, reyes. Puexa chiekal bapon. Jawut Abraham, pamak suapich, noti padaelmajiw pejew. Abraham, pamak suapich, nawen wut, Melquisedec xabu'kult nuamfatat. Do jawut, Melquisedec Dios kawujajan Abraham kajachawaesfulaliajwas Dios.

² Do jawut, Abraham tameja kaeyaxtat padaelmajiw pejew. Jawutbej Abraham diajk diezmuxat, najupamuxatje. Jawut kaemuxat malech chaxduton Melquisedec. Abraham chaxdutupox Melquisedec, japox pawul diezmo. Diajkpoxan wenamanson, nuevemuxat, Abraham pamakliajwa. "Melquisedec" —aech wut hebreojametat, japox jumchiliajwa: "Rey, xabich pachaempon" —chiliajwa Melquisedec pejwul. Japawulbej jumchiliajwa: "Rey, wujajan chaemsan jiw chiekal duilaliajwa" —chiliajwa Melquisedec pejwul. Japonbej rey Salem paklowaxpijiwliajwa.

³ Dios pejjamechan, chajia lelspox, jumchi-el Melquisedec paxliajwa, japon penliajwabej, pejwuajnapijwliajwabej. Dios pejjamechan jumchi-elbej Melquisedec nalaelt-poxliajwa, tuppoxliajwabej. Samata, Melquisedec, pomatkoicha sacerdotepon. Me-ama Dios paxulan pomatkoicha sacerdoti, ja-aechbej Melquisedec.

⁴ Nejchaxoelde chiekal! Melquisedec kaes pejme pachaem. Japon pachaempox, me-ama Abraham, jachi-el. Samata, Abraham chaxdut diezmo Melquisedec itpaeliajwa sitaeyax.

⁵ Moisés chajia lelspox to'a sacerdoti, japi Levi pamojiwpi, mat-omwuljoeliajwa nakae-israelitas. Samata, israelitas chaxduiful kaesnapich kanapi, muthapibej. Japox pawul diezmo. Jasox to'as sacerdoti mat-omwuljoeliajwapi nakae-israelitas, Abraham pamojiw.

⁶ Melquisedec Levi pamonael. Kaes pejme xabich pachaempon. Japon, me-ama Abraham, jachi-elbejpon. Samata, Abraham diezmo chaxdut Melquisedec itpaeliajwa sitaeyax. Do jawut, Melquisedec Dios kawuajan Abrahamliajwa Abraham Dios kajachawaesfulaliajwas.

⁷ Xatis chiekal matabijas, Dios kawuajanpon asew jiwliajwa japi Dios kajachawaesliajwas, japon kaes pachaem. Me-ama Dios kajachawaesaxaespi, jachi-elon.

⁸ Sacerdoti kinot, jiw chaxduws wut diezmo. Japi sacerdoti tupaful, jiwkal xot. Pe Dios pejjamechan jum-aech wut Melquisedecliajwa, ja-aech wut, me-ama Melquisedec nakiowa laeja wut, ja-aechon.

⁹⁻¹⁰ Chajiakolaxtat, Abraham malech chaxdut wut diezmo Melquisedec, japamatkoi Levi chiekal jilful, nalaels-el xoton. Abraham xijilful-is. Pamojiwbej jil. Pe baxael, Levi pamojiw, japi lap amwutjel sacerdoti nadofaful. Dolis Abraham chaxdut wut diezmo Melquisedec, jawutbej puexa Levi pamojiw, me-ama chaxduti japadiezmo Melquisedec.

¹¹ Ampamatkoiyantat Levi pamojiw, sacerdoti. Japi naewuajnaful judios naexasisliajwa Moisés chajia lelspox. Me-ama chajiakolaxtat sacerdoti Aaron naewuajan, ja-aechbej japi jiw amwutjel. Pe judios chiekal naexasis-el Moisés chajia lelspox, japi bu'wuajanjilialiajwa Diosliajwa. Samata, japi wewe'pas asan sacerdoti, me-ama Aaron, jasonael. Japi wewe'pas asan sacerdoti, japon pomatkoichaxaelpon, me-ama Melquisedec, jason.

¹² Samata, Jesus makafich wut sacerdotekolnaliajwa, jawut judios kaes wewe'pa-esal Levi pamojiw, japi sacerdotnaliajwa.

¹³ Dios pejjamechan chajia lelsxot jum-aech wajpaklon Jesusliajwa. Jesus Levi pamonael. Japon asamutpijin. Majt chiekal ajil sacerdoti japamutpijwxot.

¹⁴ Puexa jiw chiekal matabija, wajpaklon nalaelt wut ampathatat, japon nalaelt Judá pamowtat. Moisés chajia lelspox jumchi-el Judá pamojiwxot sacerdotnaliajwa.

¹⁵ Samata, xatis chiekal matabijas, wajpaklon nalaelt sacerdotnaliajwa. Japon, me-ama asew sacerdoti wut, jachi-elon. Japonlap pomatkoicha sacerdotnaxael. Me-ama Melquisedec pomatkoicha sacerdoti, japonbej jachiyaxael.

¹⁶ Levi pamojiw sacerdoti nadofa, to'as xoti Moisés chajia lelspox. Baxael, wajpaklon Jesus sacerdoti wut, japon to'a-esal Moisés chajia lelspox sacerdoti nadofaliajwa. Japonlap pomatkoicha dukaxael. Samata, japon sacerdotekolan nadofa.

¹⁷ Dios jum-aech Jesus jumtaeliajwa:

“Xam pomatkoicha sacerdotnaxaelam. Me-ama majt chajiakolaxtat Melquisedec pomatkoicha sacerdoti, xamlap, jachiyaxaelam” —aech Dios Jesusliajwa.

¹⁸⁻¹⁹ Judios chiekal naexasis-el Moisés chajia lelspox, bu'wuajanjilialiajwapi Dios pejwujnalel. Samata, Moisés chajia lelspox, amwutjel japox jiw wewe'pa-esal naexasisliajwa. Amwutjel asawuajan xatis naexasisliajwas. Japawuajan kaes pejme pachaem. Jesucristo tupa xatis bu'wuajanjilialiajwas Diosliajwa. Samata, japon pijaxtat, Diosliajwa xatis bu'wuajanjisal. Xatis Jesucristo xanaboejaxaesbej Diosxotaliajwas.

²⁰ Dios pajut jumdut Jesucristo pomatkoicha sacerdotnaxaelpox. Dios majt japox jumds-el asew sacerdoti.

²¹ Japox Dios pejjamechan, chajia lelspox, jum-aech wut, jum-aechox Dios jum-aechpox Jesusliajwa:

“Xan Diosnan xot, diachwujnakolax chiekal jum-an. Asax nejchaxoelaxinil. Xam sacerdotnaxaelam pomatkoichaliajwa” —aech Dios, jumdut wut Jesusliajwa.

²² Dios jasox jum-aech xot Jesusliajwa, chiekal matabijas, Jesus ispox xatisliajwa kaes xabich pachaem. Samata, me-ama Moisés chajia lelspox, jachi-el Jesus ispox xatisliajwa.

²³ Chajiakolaxtat sacerdoti tupa wut, asan makafich japon sacerdotnaliajwa. Japox ja-aechful judiosxot. Samata, xabich sacerdoti.

²⁴ Pelax Jesus tupa xil. Samata, japon pomatkoicha sacerdotekolnaxael. Jesus sacerdoti wut, asan naliaxsaxil japon aton sacerdotekolnaliajwa.

²⁵ Samata, Jesus xajupa pomatkoicha jiw bu'weliajwa, pasliajwapi Diosxotse. Jesus duk Diosxotse. Japon pomatkoicha Dios kawuajan japon pejwujnalel naexasitiliajwa.

²⁶ Jesús, sacerdotekolan, kaes pejme pachaempon. Jasonlap majt xatis nakwewe'p. Japon pomatkoicha is pachaempon. Babijax is-elon. Dios bufoeisbejpon athu poxase.

²⁷ Jesús, me-ama puexa sacerdotespaklokolan, jachi-el. Japi choef xua'at ofrenda isliajwa Diosliajwa. Japox isliajwa wut, majt kaen choefan xua'la pajut pejbu'wuaianpoxliajwa. Do jawux, asew choef xua'at asew jiw pejbu'wuaianpoxanliajwa. Jesús jasox is-el. Japon pajut natapaei asajiw kimatamatlialijwas cruztat. Jasoxtat japon boesas wut, japon pajut, me-ama ofrenda Diosliajwa. Jesús boesas wut asajiw, kamta moton puexa jiw babijaxan ispoxanliajwa. Japox pomatkoichialijwa.

²⁸ Moisés chajia lelpox jum-aech kaen makafisliajwa puexa sacerdotespaklokolnialijwa. Pe nakiowa, japon xajupa-el isliajwa puexa Dios nejxasinkpoxan. Do baxael, pejme Dios jumdut paxulan sacerdotekolnialijwa. Japon xabich pachaem pomatkoichialijwa. Japonlax xajup puexa isliajwa, Dios nejxasinkpoxan.

8

Amxot jum-aechpox Jesucristo, wajsacerdotekolanpon, japon pomatkoicha Dios kawuajan xatisliajwa

¹ Jesús, wajsacerdotekolan, japon Dios kawuajan xatisliajwa. Amwutjel japon ek Dios poklalel. Japox kaes pejme pachaem xamal chiekal matabijalijwam.

² Jesús nabist Diosxotse tabernáculobat sacerdotebichax. Dios pajut japaba is. Japaba jiw is-el.

³ Puexa sacerdotespaklokolan makafich choef xua'asliajwa, ofrenda isliajwa Diosliajwa. Jesucristo wajsacerdotekolnialijwa wut, pajut natapaeipon asajiw boesalijwas. Ja-aech wut, Jesucristo pajut, me-ama ofrenda wut, ja-aechon Diosliajwa.

⁴ Sacerdotes ampathatat choef xua't ofrenda isliajwa Diosliajwa, me-ama Moisés chajia lelpox jum-aech. Jesús amwutjel ampathatata-elon. Amwutjel Jesús Diosxotse. Jesús ampamatkoitat ampathatataxael wut, ja-aech wut, choef xua'asaxilon. Me-ama asew sacerdotese choef xua't wut, jachiyaxilon.

⁵ Sacerdotes nabistpox ampathatat, japox, me-ama Jesucristo nabistpox Diosxotse, ja-aechox. Moisés Dios pejtabernáculoba isliajwa wut, Dios jum-aech: "¡Nabej nejkiowe' puexa itpaeixpoxan pinamuaxxot! Tajtabernáculoba isam wut, iisde, me-ama xan chajia chiekal xam chanaekabuanax!" —aech Dios Moisésliajwa.

⁶ Pe Jesucristo, wajsacerdotekolanpon, japon nabist Dios to'aspox Diosxotse xatisliajwa. Japox kaes pejme pachaem. Me-ama sacerdotese ispox ampathatat jiwliajwa, jachi-el japon nabistpox. Jesucristo pomatkoicha Dios kawuajan xatisliajwa. Japon tup wut, xatis babijaxan isaspoxan chiekal nakwetoep Diosliajwa. Nakkajachawaetbejpon Dios nakchaxduilialijwa chajia nakjumdutpox duilialijwas pomatkoicha Diosxotse. Japoxanlap xatisliajwa xabich kaes pejme pachaem. Me-ama Moisés chajia lelpox, jachi-el.

⁷ Moisés chajia lelpox chiekal pachaemaxael wut, japox jiw chiekal naexasit wutbej pachaemalijwapi Diosliajwa, ja-aech wut, jiw wewe'paxisal asawuajan naexasisliajwa chiekal pachaemalijwapi Diosliajwa.

⁸ Pe nakiowa, jiw chiekal naexasis-el puexa Moisés chajia lelpox. Samata, Dios jum-aech: "Asamatkoi xan to'axaelen pajelwuajan naexasisliajwa Israel tuajnujijiw, Judá tuajnujijiwbej, pomatkoicha duilialijwapi xanxotse.

⁹ Pajelwuajan najupaxil majt jum-anpox pejwuajnapijiwliajwa. Japi Egipto tuajnuxot wut, xan japi jukk. Japibej xan nanaexasis-el, chajia jum-an wut. Samata, japi jiw koftax" —aech Dios.

¹⁰ Dios kaes jum-aech: "Xan jum-an ampox Israel tuajnujijiwliajwa pajelwuajanliajwa. Asamatkoi tajjamechan kaenanula jiw matabijaxael. Samata, nejxasinkaxael naexasisliajwa tajjamechan. Xan japi pejDiosnaxaelen. Japibej tajjiwaxael.

¹¹ Japamatkoiyon puexa paklochow, paklochowaelpibej, xan chiekal namatabijaxael. Samata, chinax kaen aton jumchiyaxil xanliajwa asew jiwxot.

¹² Xan japi jiw beltaeyaxaelen. Kaes nejchaxoelaxinil japi majt babijaxan ispoxan. Nejkiowaxaelen japoxan" —aech Dios.

¹³ Dios jum-aech pajelwuajanliajwa, matxoelapejwuajan chiekal pachaema-el xot. Matxoelapejwuajan kaematkoiyon suapich we'p toepalijwa.

9

Amxot jum-aechpox Dios pejtabernáculobalijwa, asatabernáculobalijwabej, Diosxotsepox
¹ Moisés chajia lelpox tato'las israelitas isaxaelpoxan, tabernáculobat Dios kawuajan wuti.

² Dios pejtubernáculoba, ampathatpijax, japox kolepiezax. Matxoelapiezax pawul Lugar Santo. Jaxot chanuk candelabro itliakaliajwa japapiezaxxot. Jaxotbej kaemesa nuk. Japamesamatwúajtat pomatkoicha sacerdotes pan owa Diosliajwa.

³ Jaxot asapiezaxliajwa duch pinabú'. Japapiezax pawul Lugar Santísimo.

⁴ Japapiezaxtat altar nuk, oro matxafafasfox, japa-altarmatwúajtat bowaliajwa xabe-jasapan, pawulpi incienso. Jaxotbej baúl ek, oro matxafafasfox patulel, fuletlelanbej. Japabaúltutat ek baext, orotat isaspot. Japabaextutat cha-ek maná. Aarón pejkilachalanaeyabej japabaúltutat ok. Japox kilachalanaeya chajia uafnakola. Japabaúltutat oelbej kole-ia't, papa'a. Japa-ia' lels diez tato'laxan, Dios tato'alpoxan jiw naexasisliajwa.

⁵ Japabaúlfafamatwúajtat kolenje, ángeles-ael isaspi, nows. Ba'dolanuili. Japa-ángeles-aelanliajwa israelitas wultaen wut, japi pajut chiekal matabijaliajwa Dios japatabernáculobatapox. Pe amwutjel, kaes lelaxinil japoxan chanaekabuanaliajwan.

⁶ Ja-aech majt Dios pejtubernáculoba. Sacerdotes pomatkoicha low matxoelapiezaxxot isliajwa pejbichaxan.

⁷ Pe asapiezaxxot, Lugar Santísimoxot, tapaeis puexa sacerdotespaklokolanlank tamach leliajwa. Japon low japapiezaxxot, kaewaechful wut. Low wut, chaxlowpon choefjal matsasalsliajwa baúlmawuaj. Jasox ispon Dios beltaeliajwas pajut babijaxan ispoxanliajwa. Jawux pejme jasox ispon puexa asew jiw babijaxan ispoxanliajwa, japi pajut chiekal matabija-el xot, is wut babijaxan.

⁸ Israelitas chiekal matabija kaen, puexa sacerdotespaklokolan, leyaxaelpox Lugar Santísimoxot. Samata, Espiritu Santo nakkajachawaet matabijaliajwas xatis jaxot wajut leyaxisalfox Dios kawuajnalijwas, xatis babijaxan isaspoxan nakbeltaeliajwapon. Puexa sacerdotespaklokolan, japon kaen, Dios kawuajnaxael xatisliajwa.

⁹ Puexa sacerdotes ispoxan, japoxan ampamatkoian xatisbej chiekal matabijaliajwas. Sacerdotes choef xua't wut ofrenda isliajwa Diosliajwa, puexa jiw babijaxan ispoxanliajwa Dios beltaeliajwas, japoxan is wuti, nakiowa kajachawaes-esal kaes chiekal pachaemaliajwapi Diosliajwa.

¹⁰ Moisés chajia lelpox israelitas naexasit wut, pe japi nakiowa, chiekal pachaemael Diosliajwa. Japawuajantat japi tato'las pajut chiekal natataeflaliajwa, naxaeyaxan xaeliajwa wut, feliajwa wutbej. Japibej naexasit wut japox, pin-iveces kikakiati chiekal pachaemaliajwa Diosliajwa. Jasox majt chajia israelitas isful, Jesucristo pas-el wutfuk ampathatat. Jesucristo pat wut, Moisés chajia lelpox toep, pajelwuajan taadut wut.

¹¹ Cristo pask wut ampathat, japon wajsacerdotekolan nadofa. Samata, puexa chiekal pachaem xatisliajwa japon pijaxtat. Pe pejme kaxasepon pax Dios poxase. Cristo nabist Dios pejtubernáculobaxotse. Jaxotse kaes pejme pachaem. Me-ama ampathatat jiw isba, Dios pejtubernáculoba, jachi-el japaba.

¹² Cristo low wut Dios pejtubernáculobaxotse, Lugar Santísimoxot, chaxle-el chivojal, pakjalbej, mosliajwa xatis babijaxan isaspoxanliajwa. Pelax japon tɔp wut, me-ama pejjal xalow wut, ja-aechon. Tɔp wut, moton xatis babijaxan isaspoxanliajwa nakbu'weliajwa pomatkoichaliajwa.

¹³ Israelitas babijaxan is wut, tapae-esal Dios pejtubernáculoba leliajwa. Ja-aech wut, israelitas majt matsasaltas torjal, o, chivojal. Pakxulan, altarmatwúajtat bochpon, jap-athumba min tanialtas, jalmint suapich. Do jawut, israelitas matsasaltas japajalmint. Ja-aech wut, pachaem israelitas pejme leliajwa Dios pejtubernáculoba.

¹⁴ Cristo pejjal xabich kaes pejme ommaenk Diosliajwa. Me-ama choefjal, jachi-el. Cristo kajachawaech Espiritu Santo, japon pomatkoichapon. Samata, Cristo pajut natapaei asajiw boesaliajwas xatis babijaxan isaspoxan nakwemosliajwa. Me-ama choefan xua'las wut ofrenda isliajwa Diosliajwa, jakitis Cristo. Samata, Cristo tɔp xot cruztat, Dios nakbeltaen xatis babijaxan isaspoxanliajwa. Babijaxan isas xot, xatis wajut chiekal napeltraslach Diosliajwa. Pe Cristo, babijax is-elpon, nakwemot xot, xatis xajɔps Dios tanbichliajwas, japon Diosxotse dukpon.

¹⁵ Samata, Jesucristo tɔp xot cruztat, Dios nakkajachawaet. Puexa xatis Dios nakmaknot pomatkoicha duilaliajwas Diosxotse, me-ama Dios chajia jumdut. Cristo tɔp xatis babijaxan isaspoxanliajwa bu'wuajanjilaliajwas Diosliajwa. Samata, Dios nakbeltaen.

¹⁶⁻¹⁷ Aton laeja wutfuk, lelon pelfut puexa pejewliajwa. Japapelfutat pawulan lelon nosaxaelpi japon pejew japon pejuwlela. Baxael, japon tɔp wut, puexa japon pejjiwpi kaenanula chiekal matabijaxael, nosaxaelpi naetɔpon pejew. Japon laeja wutfuk, pelfut, pajut lelpox, pa-oma-elfuk. Pe japon aton tɔp wut, japox pelfut pa-omliso. Samata, japon pejjiw chiekal diajkaxael, me-ama pelfut lelpox jum-aech, japi jiw kaenanula nosliajwa pejewaxaelpi.

¹⁸ Ja-aechlap-is Moisés chajia lelpox israelitas naexasisliajwa. Choef xua'at wuti ofrenda isliajwa Diosliajwa, Moisés lelpox pa-om.

¹⁹ Moisés pajut chiekal chanaekabuaana puexa israelitas naexasisliajwa Dios tato'alpoxan. Do jawut, fiton cha-aelnaedalach. Japox pawul hisopo. Jawux pasoeimuat, lanamuat, nae-ofexakoeyapon. Japox xatho'bala jalmint poxadik. Japajalmint taniales, torjal, chivojal, min soapichbej. Moisés japajalmint pajut lelpox matsasaltton. Do jawut, puexa israelitas matsasaltbejpon.

²⁰ Jawut jum-aechon puexa israelitasliajwa: "Xamal matsasaltax choefjalmin. Samata, naexaxisaxaelam xan lelpox. Ja-am wut, Dios isaxael jumdutpox xamalliajwa" —aech Moisés israelitasliajwa.

²¹ Jawutbej Moisés japajalmint matwuaajsasalt Dios pejtabernaculoba. Matsasaltbejpon sacerdotes xanbistpoxan japabaxot.

²² Moisés chajia lelpox to'a puexa xanbistpoxan matsasalsliajwa choefjalmin, japoxan puexa chiekal pachaemliajwa Diosliajwa. Jatislap-is puexa israelitasliajwa. Choef xua'la-el wuti ofrenda isliajwa Diosliajwa, ja-aech wut, ajil Dios jiw beltaeliajwa babijaxan ispoxanliajwa.

Dios nakbeltaenpox xatis babijaxan isaspoxanliajwa, Jesús tup xot cruztat

²³ Moisés chajia choefjalmin matwuaajsasalt Dios pejtabernaculoba ampathatat. Matsasaltbejpon puexa sacerdotes xanbistpoxan japabat. Japox ispi puexa jiw matabijalijaw a samatkoï Cristo tupaaxaelpox ampathatpijw bu'wuañanjilialijaw Diosliajwa. Cristo choefjalat Diosxotse matwuaajsasals-el Dios pejtabernaculoba. Cristolax pajut natapaei asajiw boesaliajwas. Samata, Cristo tup wut cruztat, Dios beltaen ampathatpijw babijaxan ispoxanliajwa.

²⁴ Cristo tup wut, mat-echpon pejme dukaliajwa. Do jawut, athu poxasepon nabichliajwa Dios pejtabernaculobaxotse. Jaxotse pax Dios pejwuañanlel kawuañanful xatisliajwa. Dios pejtabernaculoba ampathatpijax, japox, me-ama Dios pejtabernaculoba Diosxotsepon, jakabuan-aechox chiekal.

²⁵ Puexa sacerdotespaklokolan, kaewaechful wut, choefjal chaxlowpon tabernaculobat, Lugar Santisimoxot, ofrenda isliajwa Diosliajwa. Pe Cristo kaewaechful tupafulaxil. Kaetupaxtat jiw bu'wuiapon. Samata, Cristo pejme tupañil jiw bu'wuañanjilialijaw Diosliajwa.

²⁶ Cristo tup kaeveces. Jachi-el wut, kaewaechful wut, Dios to'axael Cristo tupafulalijaw jiw bu'wuañanjilialijaw Diosliajwa. Ampamatkoïyan, Cristo kaeveces ampathatat nalaelt boesaliajwas puexa jiw babijaxan ispoxanliajwa. Cristo boesapox pomatkoichaliajwa.

²⁷ Puexa jiw, ampathatpijw, pejmatkoï wepach wut, tupaaxael kaeveces. Do jawux, Dios jumchixaxaesi kaenanula babijaxan ispoxanliajwa kastikaliajwas.

²⁸ Jasoxtatbej Cristo tup cruztat kaevecesliajwa. Pajut natapaeipon asajiw boesaliajwas, xabich jiw babijaxan ispoxanliajwa. Jawux pax Dios poxasepon. Asamatkoï pejme pasaxoekon. Pask wut, pejme jiw boesaxisalpon tupalijaw jiw babijaxan ispoxan ajilalijaw. Japon pasaxoek jiw bu'welijaw, japi jiw wuañawetpi japon pejpasax.

10

¹ Moisés chajia lelpox pachaem israelitas naexasisliajwa. Japox amwutjel xatis matabijas. Pe kaes pejme pachaem Cristo ispox xatis naexasisliajwas. Xabich chajia wuañna, Jesús pas-el wutfuk, Moisés chajia lel wut, to'a sacerdotes isaxaelpoxan isliajwa. Samata, sacerdotse kaewaechful wut, choef xua'at ofrenda isliajwa Diosliajwa, Dios beltaeliajwa jiw babijaxan ispoxanliajwa. Pe jiw nakiowa babijaxan isful Diosliajwa.

² Sacerdotes choef xua'at ofrenda isliajwa Diosliajwa. Japox is wuti, jiw babijaxan ispoxan kaelel wejila-esal. Jiw babijaxan ispoxan kaelel wejilaxaes wut, japi jiw kaenanula chiekal nejchaxoelaxael: "Xan babijaxan ispoxan nawe-ajil Diosliajwa" —chixaxaeli, nejchaxoel wut. Ja-aech wut, kaes choef xalalaeyaxili sacerdotselel, japi sacerdotes choef xua'asliajwa ofrenda isliajwa Diosliajwa.

³ Kaewaechful wut, sacerdotes choef xua'at ofrenda isliajwa Diosliajwa jiw nejchaxoelalijaw majt babijaxan ispoxanliajwa.

⁴ Sacerdotes xua'at wut toros, chivosbej, japajal pijaxtat jiw babijaxan ispoxan kaelel wejila-esal Diosliajwa.

⁵ Samata, Cristo pasliajwa wut ampathatasik, jum-aechon pax Diosliajwa:

"Ax, xam chiekal nejchachaemla-emil, sacerdotes choef xua'at wut, xamliajwa ofrenda is wuti jiw babijaxan ispoxan beltaeliajwam. Samata, xan nato'axaelam nalaelsliajwan thatxotdik, me-ama yamxi nalaela wut, jachilijawan. Do baxael,

nato'axaelambej tupaliajwan puexa jiw babijaxan ispoxanliajwa, japi jiw bu'wujanjilialiajwa.

⁶ Sacerdotes choef xua'at bowaliajwa altarmatwujat ofrenda isliajwa xamliajwa, xam beltaeliajwam jiw babijaxan ispoxanliajwa. Pe xam chiekal nejchachaemla-emil japoxanliajwa.

⁷ Samata, xan amxotx isliajwan xam nejxasinkampox, me-ama nejamechan, chajia lelpox, jum-aech wut, jum-aechox xanliajwa" —aech Cristo Diosxotse pax Diosliajwa.

⁸ Cristo japox jum-aech xot, matabijas Dios chiekal nejchachaemla-el, sacerdotes choef xua'at wut ofrenda isliajwa japonliajwa. Jasox jum-aech Moisés chajia lelpox sacerdotes isliajwa japox. Pe nakiowa, Dios chiekal nejchachaemla-el japoxliajwa.

⁹ Cristo pejme jum-aech pax Diosliajwa: "Xan amxotx isliajwan xam nejxasinkampox" —aechon. Samata, Cristo tuj ampathatat puexa jiw bu'wujanjilialiajwa Diosliajwa, Dios to'as xoton. Samata, jawut toep sacerdotes choef xua'atpox ofrenda isliajwa Diosliajwa.

¹⁰ Cristo is Dios nejxasinkpox. Samata, Cristo pajut natapaei asajiw boesaliajwas puexa jiw bu'wujanjilialiajwa Diosliajwa. Cristo tuj wut, japox patupax kaevecesliajwa, pomatkoichaliajwabej.

¹¹ Sacerdotes pomatkoicha choef xua'at ofrenda isliajwa Diosliajwa. Sacerdotes japox is wut, Dios kael el wepels-el jiw babijaxan ispoxan japi bu'wujanjilialiajwa.

¹² Me-ama sacerdotes ispox, jasox is-el Jesucristo. Japon pajut natapaei asajiw boesaliajwas puexa jiw babijaxan ispoxanliajwa. Japon kaetupaxtat jiw bu'wiapon. Do jawux, Jesucristo Dios poxase. Jaxotse ek pax Dios poklalel.

¹³ Jesucristo jaxotse wujawnawet pax Dios malechaliajwa japon padaelmajiw, japi naexasisliajwa japon tato'alphon.

¹⁴ Cristo tuj wut japox kaevecesliajwa, jawut Dios naexasiti bu'wujanjillisi pomatkoichaliajwa Diosliajwa, babijaxan ispoxanliajwa.

¹⁵ Espiritu Santo nakkajachawaet xot, matabijas, diachwujnakolax Cristo tuj xatisliajwa. Dios jum-aech:

¹⁶ "Asamatkoi tajjiw kajachawaesaxaelen chiekal

matabijaliajwa tajamechan. Samata, tajamechan naexaxisaxaeli.

¹⁷ Xan kaes nejchafaesaxinil japi babijaxan ispoxanliajwa" —aech Dios.

¹⁸ Samata, Dios beltaen wut jiw babijaxan ispoxanliajwa, ja-aech wut, kaes choef xua'asaxili ofrenda isliajwa Diosliajwa.

Wajnejchaxoelaxantat moxaxaes pax Diosxot

¹⁹ Takoew, Cristo tuj xot, xatis bu'wujanjisal Diosliajwa. Samata, amwutjel Dios naktapaei wajnejchaxoelaxantat nejmach chiekal moxaliajwas Diosxotse, Dios pejtubernaculobaxot, Lugar Santisimoxot.

²⁰ Cristo tuj xatis bu'wujanjilialiajwas Diosliajwa. Samata, japon, me-ama pajelt nuamt wut, ja-aechon xatis pasliajwas Diosxotse. Samata, Dios naktapaeiyaxael pomatkoicha duilialiajwas jaxotse.

²¹ Jesús wajsacerdotekolan tataeful Dios pejtubernaculoba Diosxotse.

²² Samata, puexa wajnejchaxoelaxantat moxaxaes Diosxotse, chiekal matabijas xot, Dios diachwujnakolax nakbu'weyaxael. Xatisbej matabijas, Dios nakbeltaen xatis babijaxan isaspoxanliajwa. Samata, me-ama nawaenspi wut, jatis. Samatabej, me-ama bu'asjwal wut, jatis Diosliajwa.

²³ Nejchaxoels wut Dios nakbu'weyaxaelpoxliajwa, nejchaxoelaxisal: "Dios bej nakbu'weyaxilbej" —chiyaxisal, nejchaxoels wut. Dios isaxael nakjumdutpox xatisliajwa.

²⁴ Nejchaxoelaxaes nakaewa nakajachawaesliajwas. Jatis wut, kaes pejme pachaemaxes. Isaxaesbej pachaempoxan nakaewaliajwa.

²⁵ Asew jiw xatisxot kofa culto ispoxan. Xatislax kofaxisal. Nakaewa naewujnaxaes kaes Dios xanaboejalijwas. Jasox isaxaes, matabijas xot matkoiyan moxsfulpox wajpaklon Jesucristo pejme pasliajwasik.

²⁶ Xatis chiekal matabijas, Cristo tuj cruztat nakwemosliajwa xatis babijaxan isaspoxanliajwa. Pe jawut, xatis babijaxan isfulas wut, jatis wut, Dios beltaeyaxil babijaxan isaspoxanliajwa, kaes asan ajil xot pejme tupaliajwa, xatis bu'wujanjilialiajwa.

²⁷ Babijaxan kaes isfulas wut, kaeyax nakwewe'paxael. Japox kastikax, xabich chaemilpox. Jawut jit itkuawa-elpoxtat Dios nakkastikaxael chiekal naktoejafaliajwa japajitat, puexa Dios padaelmajiw suapich.

²⁸ Chajjakolaxtat aton naexaxis-el wut Moisés chajia lelpox, kolenje, o, tres aton, taens wut japon ispox, ja-aech wut, tasalas. Do ja-aech wutbej, japi jiw beltae-esal. To'as beliajwas.

²⁹ Dios xabich kaes kastikaxael kofapi Jesucristo pejuwajan naexasitpox. Japi nejchaxoel wut, jum-aechi: "Jesucristo tɔp wut, japox ma-aech asbuan jumch xatis babijaxan isaspoxan nakwemosliajwa" —aechi. Japi jum-aechbej babejjamechan Espiritu Santoliajwa, xatis naknejxasinkpon. Dios paxulan diachwuajnakolax tɔp japi jiw babijaxan ispoxanliajwa, bu'wuajanjilialijwa.

³⁰ Xatis matabijas Dios jum-aechpox: "Asew jiw babijaxan is wut asew jiwliajwa, japi xan kastikaxaelen" —aechox. Dios jum-aechbej: "Jiw babijaxan ispi xan kastikaxaelen. Asew jiwlix, babijax is-elpi, japi jiw kastikaxinil" —aech Dios.

³¹ Dios tɔpaxilpon. Japon pejkastikax xabich chaemil!

³² Xamal nejchaxoelam wut, nejchaxoelde, akasestat Jesús pejuwajan naexasitam wut! Japamatkoiyan xamal xabich nabijatam, asew jiw babijaxan is wut xamalliajwa, naexasitam xot Jesús pejuwajan. Ja-am wut, xamal kofa-emil. Nakiowa Jesús pejuwajan naexasisfulam, Dios xamal kajachawaesful xot.

³³ Asew xamalxot jumtis babejjamechan asew jiw pejuwajnalel, Jesús pejuwajan naexasit xoti. Japi jiw nabijat asew jiw pijaxtat. Ja-aech wut, xamalxotpijiw, asew jiw pejlewla-el itpaeliajwa japibej naexasitpox Jesús pejuwajan.

³⁴ Asew jiw, naexasiti Jesús pejuwajan, jiw jebatat jias wut, xamal japi jiw kajachawaetam wewe'paspoxanliajwa. Asew jiw xamal wenot wut nejew, xamal Jesús pejuwajan naexasitam xot, nalala-el. Nakiowa nejjachaemlam nejmatruatatant Diosliajwa. Ja-am xamal, wuajnowetam xot kaes pejme pachaempox Diosxotse, pomatkoichaliajwapox.

³⁵ Samata, jxamal nabej kofe! Dios xanaboejampox! Ja-am wut, Dios xamal chaxduiyaxael xabich pachaempoxan xotse.

³⁶ Xamal nabijatam wut, jnakiowa isfulde, me-ama Dios nejxasink! Ja-amsfulam wut, Dios xamal chaxduiyaxael jumdutpox.

³⁷ Dios pejjamechan, chajia lelspx, jum-aech wut, jum-aechox Dios jum-aechpox Cristo pejme pasaxoekpoxliajwa: "Kamtalejen pasaxoekon. Piach kijlaxilon pasliajwa.

³⁸ Tajjiw isful wut xan nejxasinkaxpoxan, xan naxanaboeja wuti, japi duilaxael pomatkoicha xanxotse. Pe asew jiw kofa wut naxanaboejapoxan, ja-aech wut, xan nejjachaemlaxinil japi jiwliajwa" —aech Dios jum-aechpox.

³⁹ Xatislax kofa-esal Dios xanaboejaspx napelsasamatas Diosliajwa. Xatis chiekal Dios naexasisfulas wut, jatisfulas wut, japon xatis nakbu'weyaxael.

11

Jiw xanaboejapox Dios

¹ Xatis chiekal Dios xanaboejas wut, jatis wut, kaenanula chiekal nejchaxoelaxaes ampx: "Dios jum-aechpox diachwuajnakolax jachiyaxael. Xan tae-enil wut japox, nakiowa matabijtax jachiyaxaelpox. Japox Dios isaxael" —chiyaxaes kaenanula, nejchaxoels wut.

² Wajwuajnapijiw chiekal naexasisful Dios jumtispx. Japi kaenanula chiekal nejchaxoel: "Diachwuajnakolaxdo", Dios najum-aechpox xanliajwa" —aechi, nejchaxoel wut. Samata, Dios nejjachaemil wajwuajnapijiwliajwa.

³ Xatis chiekal Dios xanaboejas xot, matabijas, Dios is ampathat, thatbaxobej, jum-aech wuton. Puexa amwutjel taenspoxan, japoxan puexa taens, Dios is xot. Amwutjel taenspoxan, majt japoxan chiekal ajil.

⁴ Chajiakolaxtat Abel chiekal xanaboejt Dios. Samata, Abel naexasit Dios tato'alpox. Samata, Abel ofrenda is wut Diosliajwa, japox xabich pachaem. Me-ama Cain pijax ofrenda, jachi-el Abel pijax ofrenda. Samata, Abel babijaxan ispoxanliajwa bu'wuajanjilon Diosliajwa. Japon Abel chajiakolaxtat boesas wut, tɔpon. Pe nakiowa, ampamatkoiyan Abel Dios xanaboejtpx nakiowa wultaeflas. Samata, xatisbej Dios chiekal xanaboejaxaes.

⁵ Chajiakolaxtat Enochbej chiekal Dios xanaboejt. Samata, Dios bu'foson tathualin athu poxase. Kaes pejme faena-esal, Dios bu'fos xoton. Dios pejjamechan, chajia lelspx, jum-aech wut, jum-aechox: "Enoc Dios bu'floe-esal wutfuk, Dios nejjachaemil japonliajwa" —aechox.

⁶ Dios nejjachaemla-el, jiw xanaboeja-el wuti japon. Jiw xanaboejalijwa wut Dios, japi jiw matxoela chiekal nejchaxoelaxael ampx: "Diachwuajnakolax Dios duk athuxotse. Samata, Dios nabu'weyaxael, wulwekx xot Dios tajnejchaxoelaxtat" —chiyaxaeli, nejchaxoel wut.

⁷ Chajiakolaxtat Noé chiekal Dios xanaboejt. Dios jumtis wut matabijsliajwa puexa ampathat bu'laxaelpox, Noé chiekal naexasit. Samata, Dios kito'aspon pinjiyax barkam isliajwa bu'welajwapon pejiw. Noé, pejiw suapich, Dios naexasit xoti, japi babijaxan ispoxanliajwa bu'wuajanjil Diosliajwa. Japamatkoiyan puexa jiw, potuajnuhanpijiw, chiekal bu'al, Dios naexasis-el xoti.

⁸ Chajiakolaxtat Abrahambej chiekal Dios xanaboejt. Dios to'as wut nakolsliajwa pejtʉajnyxot, naexasiton. Samata, Abraham fulaech Dios chaxdusaxaestʉajnyxot. Jawut Abraham chiekal matabijs-elon, fulaeyaxaech poxade.

⁹ Abraham pat wut Dios jumduchʉajnyxot, japatʉajnyxot asajiw wʉajna duil. Abraham naexasit jumduchprox. Samata, japatʉajnyxot dukjepon. Abraham chimiaba is-el japatʉajnyxot. Dukjepon carpatat. Baxael, asamatkoiyan, Abraham paxulan Isaac, Abraham pamon Jacobbej, japi carpabachantat duilalap japatʉajnyxot. Japibej Dios jumtis asamatkoi chaxdusliajwas japatʉajnyxot.

¹⁰ Abraham laeja wut, wʉajnawesfulon asamatkoi Dios bʉflaeliajwas athʉ poxase, pomatkoicha dukaliajwa Dios pajut ispaklowaxxotse. Samata, Abraham dukje carpatat asbʉan jumch.

¹¹ Chajiakolaxtat Abraham pijow, Sarabej, chiekal Dios xanaboejt. Samata, japow xabich pati'ow wut, naxʉwal, Dios jumduch xotow.

¹² Abraham pijow naxʉwal wut, Abraham xabich pati'in. Pe nakiowa, Abraham paxulan nalaelt. Do baxael, Abraham pejwulela, xabich kaesful pamojiw. Me-ama ithaej, thaejbelinbej, xabich pin-iakola, ja-aechful Abraham pamojiw. Samata, xajʉpaxil xajuiliajwas japi jiw.

¹³ Chajiakolaxtat puexa, japi chiekal Dios xanaboeja hasta pejpatʉaxtat. Dios jumduchproxan chaxduiliajwas, japi japoxan naetʉapafʉ chaxdui-esalproxtat. Pe nakiowa, japi chiekal matabija pejwulela Dios jumduchproxan asamatkoi chaxduiyaxaesprox japi pamojiw. Samata, japi xabich nejchachaemil. Japi pajut chiekal matabija xot, jum-aechi: "Xatis ampatʉajnyxot asbʉan jumch nanʉamspijwas. Wajʉajnyxot ajil pomatkoicha xatis duilaliajwasprox" —aechi.

¹⁴ Japox jum-aech wuti, xatis matabijas japi wʉajnawesfulprox, asamatkoi Dios bʉflaeyaxaesprox athʉ poxase, Diosxotse, pomatkoicha duilaliajwapi.

¹⁵ Japi nejchaxoel wut, nejchaxoela-el kaxa nawelija, Abraham nakoltʉajnyxot. Naweyax nejchaxoelaxael wut, japi naweyaxael japatʉajnyxot poxade.

¹⁶ Pe japi kaes nejxasink Dios poxaliajwase, jaxotse kaes pejme pachaem xot. Me-ama ampatʉat, jachi-el jaxotse. Samata, Dios nejchachaemil japijiajwa jumchiliajwapon: "Ampi tajjiw" —chiliajwapon japijiajwa. Dios chaemt paklowax, pejiw pat wut japapaklowaxxot duilaliajwase.

¹⁷⁻¹⁹ Dios chajia jum-aech Abrahamliajwa: "Naxulan Isaac asamatkoi xabichaxael pamojiw" —aech Dios. Do asamatkoi, Abraham Dios xapaejtas wut, kito'as paxulan Isaac xʉa'laliajwapon ofrenda isliajwa Diosliajwa. Jawut Abraham ow-aech. Samata, Abraham xʉa'laliajwa wʉton paxulan Isaac, nejchaxoelon: "Dios xajʉp tʉpi mat-eliajwa pejme duilaliajwa" —aech Abraham, nejchaxoel wut. Samata, Abraham xʉa'laliajwa wʉton paxulan, jawut Dios kifiachpon. Do jawut, Abraham paxulan xʉa'la-el wut, ja-aech wut, Abrahamliajwa Isaac, me-ama Dios mat-ech wut, ja-aechon pejme dukaliajwa.

²⁰ Abraham xabich Dios xanaboejsful. Abraham paxulan, Isaac, japonbej Dios chiekal xanaboejsful. Samata, Isaac xabich pati'in wut, jum-aechon paxulan Jacobliajwa, Esaʉuliajwabej. Kaenanʉla japijiajwa jum-aechon: "Dios xam kajachawaesfulaxael" —aech Isaac.

²¹ Isaac paxulan, Jacobbej, chiekal Dios xanaboejsful. Samata, baxael, asamatkoi, Jacob mox pawʉajna wut tʉpaliajwa, japon kaenanʉla Jos e paxiliajwa Dios kawʉajan asamatkoi japi Dios kajachawaesfulaliajwas. Jacob jum-aech kaenanʉla japijiajwa: "Dios xam kajachawaesfulaxael" —aech Jacob. Do jawut, Jacob Dios kawʉajan wut, jum-aechon Diosliajwa: "Xam xabich pachaemam" —aech Jacob, kilamamsnik wut pejkilachalanaeya.

²² Chajiakolaxtat Jacob paxulan, Jos e, japonbej chiekal Dios xanaboejsful. Samata, Jos e mox pawʉajna wut tʉpaliajwa, jum-aechon israelitas asamatkoi nakolaxaelprox Egipto tʉajnyxot. Do jawut, Jos e to'anadoft, asamatkoi israelitas Egipto tʉajnyxot kaelel nakola wut, japi chaxlaeliajwa Jos e pejbʉt.

²³ Chajiakolaxtat Mois s pax, japon penbej, japi chiekal Dios xanaboejafʉlbej. Faraon, puexa Egipto tʉajnyxot tato'lan, japon israelitas kito'a, paxi poejiw nalaela wut israelitas kamta beliajwapi paxikola. Mois s nalaelt wut, pax, japon penbej, japi pejlewla-el owchilaliajwa rey Egipto tʉajnyxot tato'lan kito'asproxliajwa. Mois s xabich chamian xot, pax, pen saapich, moesti tres juintje. Do baxael, faraon paxulow fitow chaxti'aliajwas Mois s.

²⁴ Mois sbej chiekal Dios xanaboejsful. Chiekal ti't wut, Mois s nejchaxoel: "Xan nejwesla jiw kaes najumchiliajwa: 'Mois s, faraon paxulow paxulan' —nachiliajwa" —aech Mois s, nejchaxoel wut.

²⁵ Do jawut, Mois s nejchaxoelbej: "Tajjiw israelitas, Dios pejiwpi. Samata, tajjiw xan kajachawaesaxaelen. Tajjiw nabijat, Egipto tʉajnyxot xabich nabichax to'as xoti. Xanbej

naknabijasaxaelen, japi suapich” —aech Moisés, nejchaxoel wut. Moisés nejwesla dukaliajwa Egipto tuajnuþijiwxot, Egipto tuajnuþijiw babijaxan ispoxan nak-isasamatapon.

²⁶ Moisés Dios xanaboejt bu'weyaxaespoX Egipto tuajnuXot pueXa japon pejiw, israelitas suapich. Samata, Moisés matabijt xot, nejchaxoelon: “Asamatkoi Mesias, Dios makafisaxaespon, japon xabich nabijasaxael. Samata, xanbej amwut nabijasaxaelen Egipto tuajnuþijiw pijaxtat. Ja-an wut, xan isaxaelen Dios nejxasinkpox. Dios nachaxdusaxaelpox Diosxotse, kaes pejme xabich pachaemaxael. Me-ama Egipto tuajnuþijiw pejew, pachaempoxan, jachi-el Dios nachaxdusaxaelpox” —aech Moisés, nejchaxoel wut.

²⁷ Moisés xanaboejt Dios kajachawaesaxaespoX. Samata, Egipto tuajnuXot Moisés chijapon. Faraón palala wut japonliajwa, pejlwla-elon faraónliajwa. Dios, taeyaxisalpon, Moisés is japon to'aspoxan. Pe Moisés, me-ama pajut chiekal Dios taen wut, ja-aechon. Samata, japon Dios xanaboejsful.

²⁸ Moisés chiekal Dios xanaboejt xot, kito'apon israelitas xua'asliajwa ovejas, Pascuafiesta isliajwa wut. Moisés kito'abej kaenanula israelitas, paxipi, bafafachanlelan joelaliajwa ovejajal. Japox is israelitas japi paxi, matxoelanalaelapi, poejiw, Dios pej-ánel wematkaesasamatap.

²⁹ Chajiakolaxtat israelitasbej chiekal Dios xanaboejaful. Samata, israelitas Mar Rojo likaliajwa wut, min najupanadijan Dios pijaxtat. Japox put, me-ama mintata-el wut, ja-aech. Chiekal mamó'al. Israelitas japoxade fulaech likaliajwa. Do jawut, Egipto tuajnuþijiw, soldaw, japoxadin fulaen wuchakal. Jawut, min namatawaekcha wut, pueXa Egipto tuajnuþijiw, soldaw, chiekal bu'al.

³⁰ Israelitasbej chiekal Dios xanaboejaful xot, siete matkoiyan masajjiani Jericó paklowax tathoetlel, ia' xajajialsipox. Japox xabich pinjiyax, athubejpoX. Jawut japox tatukpaxtat pueXa natacholan Dios pijaxtat.

³¹ Jericó paklowaxpijiwXot pawis duk. Pe asamatkoi, Dios xanaboejtow. Japow pawul Rahab. Japow pejbichax, poejiw bu'moejsax, plata kanaliajwa. Kolenje israelitas pat wut chawuajnataempi japapaklowax, japow chiekal bu'kult, japi israelitas pat wut japow pejbaxot. Do jawutbej, kajachawaetow japi weliajwa. Samata, asamatkoi, israelitas naba wut, Dios naexasis-elpi suapich, Jericó paklowaxpijiw suapich, japow boesa-esal, Dios xanaboejt xotow.

³² Amwutjel tiempo nawewe'p xot, kaes lelaxinil asew jiwliajwa, Dios xanaboejapilijaw. Samata, lelaxinil Gedeón pejwuajan, Barac pejwuajanbej, Sansón pejwuajan, Jefe pejwuajanbej, David pejwuajan, Samuel pejwuajanbej, kaes asew jiw, profetas pejwuajanbej.

³³ PueXa japi jiw chiekal Dios xanaboeja, laelp wuti. Samata, israelitas, asatuajnuþijiw suapich, naba wut, padaelmajiw xabich malechapi, Dios kajachawaech xoti. Asew japixot makanoch paklochowliajwa. Japi paklochow wut, chiekal jiw tato'al, Dios kajachawaesfulas xot, me-ama Dios chajia jumdut japilijaw. Asew japixot peltas xabich leónxot xaeliajwas. Jatis wuti, Dios kajachawaech japi xae-elaliajwas leónes.

³⁴ Asew japixot peldas jit tamdadut poXade. Jatis wut, Dios kajachawaech xot, japi toejwa-esal. Asew japixot espadatat beliajwas wut, Dios kajachawaech japi weliajwa. Asew japixot majt chiekal matabija-el nabeliajwa, asatuajnuþianpijiw suapich. Baxael, japi chiekal matabija nabeliajwa, Dios kajachawaech xoti. Samata, japi malecha padaelmajiw.

³⁵ Asew watho', chiekal Dios xanaboejapi, pejiw tup wut, Dios wemat-echpi, japi jiw pejme duilaliajwa.

Asew jiw Dios chiekal xanaboeja. Japi xabich nabijatbej asew jiw pijaxtat kofaliajwapi Dios naexasitpox. Pe ja-aech wut, japi kofa-el Dios naexasitpox, japi kaenanula nejchaxoel xot: “Kaes pejme pachaem dukaliajwan Diosxotse. Me-ama ampathatat, jachi-el” —aechi, nejchaxoel wut. Ja-aech wut, japi jiw baes.

³⁶ Asew, Dios xanaboejapi, xabich itxaelaxafafolspi. Xabich seltasbejpi. Asew muaxwasixawaeks cadenamuatat. Jiasbejpi jiw jebachantat.

³⁷ Asew, Dios xanaboejapi, ia'tat matkaejabas, dadaps wut. Asew fatarariowlas. Asew baes espadatat. Asew naxoei ovejabu'an, o, chivobu'an, xabich kijil xoti. Xabich nabijat japi jiw. Japi jiw taduktas atuaj.

³⁸ Japi jiwlap, majt nabijatpi, japi jiw xabich pachaem, Dios xanaboeja xoti. Me-ama asew jiw ampathatpijiw, jachi-el japi jiw. Pe nakiowa, nabijati. Nanaamti pajilaxanxot, muaxanxotbej. Duilpi pinamuaxanwuajantat. Japixot asew duilbej pinamathanxotdik.

³⁹ PueXa, japi jiwlap, majt nabijatpi, japi chiekal Dios xanaboeja. Pe nakiowa, kaen japixot Dios chaxdus-esalfuk jumtisipox.

⁴⁰ Dios chajia jum-aech japi wuajnwesfulalijawafuk japox. Dios xatis matxoela nak-tapaeyaxael wut Diosxotse duilalijawas, ja-aech wut, majt nabijatpibej tapaeyaxaes po-matkoicha duilalijawa Diosxotse.

12

Wajpaklon Jesucristo xanaboejaxaespoj

¹ Xatis chiekal matabijas, wajwuajnapijiw xabich nabijat wut asew jiw pijaxtat, japi kamta palala-el, Dios chiekal xanaboeja xoti. Xatisbej jachiyaxaes, nabijatas wut. Isfulaxaes puexa wajpamamaxtat Dios nejxasinkpoxankal. Samata, kofaxaes asaxan it-elbalapoxan isaxaelpoxan is-elalijawas. Kofaxaesbej babijaxan isfulaspojoxan, nak-tabejsfulpoxan wajnejchaxoelaxan Dios xanaboejaspojoxanlijawa.

² Wajpaklon Jesucristo chiekal naexasisfulaxaes. Japon pijaxtat xatis Dios naexasisch. Japon pijaxtatbej Dios chiekal naexasisfulaxaes pomatkoicha. Cruztat tupax japox xabich padaeyaxkolax. Pe Cristo padala-el cruztat tupalijawa xatislijawa, japon chiekal matabijit xot, pejnabijasaxwux cruztat, xabich nejchachaemlaxaelpox. Amwutjel Cristo ek pax Dios poklalel puexa jiw tato'lalijawa, pax Dios swapich.

³ Xamal nejchaxoelam wut, ¡nejchaxoelde Jesús xabich nabijatpox, jiw babejchow babijaxan is wut Jesúslijawa! Samata, xatisbej kofaxisal Dios xanaboejaspoj, asew jiw babijaxan is wut xatislijawa.

⁴ Xamal nabijatam wut, nabijas-emil, me-ama Cristo. Samata, ¡boejtaliasfulde babijax isasamatam!

⁵ Xatis Dios paxis. Samata, nejkioyawixal Dios naknaewuajanpoxan. Dios pejjamechan, chajia lelspoj, jum-aech wut, jum-aechox:

“Wua, ¡nabej naexasisle' Dios fiatpox!

¡Nabej kofe'bej Dios xanaboejampox!

⁶ Aton, Dios nejxasinkaspon, japon Dios fiach babijax is-elalijawa. Dios kastikaxaesbejpon, babijaxan is wut, japon aton, me-ama Dios paxulan wut, ja-aech xoton” —aech Dios pejjamechan, chajia lelspoj.

⁷ Dios xamal kastika wut, ¡boejtaliasfulde! Jasoxtat Dios xamal kastika, japon paxim xot. Jiwbej paxi kastika, babijaxan is wut.

⁸ Babijaxan isam wut, Dios xamal fias-el wut, kastika-el wutbejpon, diachwuajnakolax xamal Dios paxikola-emil. Dios paxikolam wut, babijaxan isam wut, Dios xamal kastikaxael.

⁹ Xatis jams wut, babijaxan isas. Jatis wut, kaenanula waj-axjiw nakfiat. Nakkastikabej. Samata, ampathatat waj-ax sitaens. Samatabej, ¡amwutjel kaes pejme naexasisaxaes waj-ax Dios, japon athuxotsepon, jaxot duilalijawas pomatkoicha!

¹⁰ Xatis jams wut, waj-ax nakfiat. Nakkastikabejpi, babijaxan isas wut. Ja-aech, waj-ax nakkastika wut, me-ama japi nejchaxoel. Dios, xabich kaes pejme matabijit. Samata, xatis babijaxan isas wut, nakfiaton. Nakkastikabejpon kofalijawas babijaxan isaspojoxan, xatis chiekal pachaemalijawas, me-ama Dios pachaem, jachilijawas xatis.

¹¹ Babijaxan isas wut, Dios nakkastika wut, jawut nejchachaemla-esal. Jawutbej, naliixt xaeyaxkal. Kofas wut babijaxan isaspojoxan islijawas pachaempoxan, jatis wut, chiekal duilaxaes Dioslijawa.

Chachoelpox, naexasis-esal wut Dios

¹² Dios xamal fiat wut, kastika wutbejpon babijaxan isam xot, ¡xamal nejchachaemlafalde, jasoxtat Dios kajachawaesfulaxael xot!

¹³ Xamal nejchaxoelam wut, ¡nejchaxoelde pachaempoxan! ¡Japoxan chiekal isde! Xamal ja-am wut, asew jiw chiekal duila-elpi, pajut matabijaxael. Ja-aech wut, japi xamal nakxtaeyaxael islijawapi pachaempoxan.

¹⁴ ¡Chiekal pachaemde asew jiwlijawa, duilam wut! ¡Xamal duilafaldebej, me-ama Dios nejxasink! Jiw, babijaxan ispi, pasaxil Diosxotse.

¹⁵ Dios xabich pachaem xatislijawa. Samata, ¡nabej kofe' Dios naexasitampox! ¡Chiekal taem babijax isasamatam! Isam wut babijax, asew jiw, Dios xanaboejapi, japox taen wut, japibej isaxael japox babijax.

¹⁶ ¡Xamal asew watho' nabej bu'moejs! Nejchaxoelam wut, ¡nabej nejchaxoele': “Xan nawewe'pa-el Dios pejkajachawaesax” —chiyaximil, nejchaxoelam wut! Chajiakolaxtat Esaú matxoelapijin xot, xabich kaes pax pejew nosaxaelon, pax naetup wut. Pe asamatkoi, Esaú xabich litaxaela wut, asbuan jumch pakoewanxot kaenaxaeyaxtat xanafonpon pax pejew, japon nosaxaelpi, pax asamatkoi naetup wut.

¹⁷ Xamal chiekal matabijam, baxael, Esaú jum-aech paxlijawa: “Ax, ¡xam Dios kawuajande xanlijawa, pomatkoicha Dios nakajachawaeslijawa!” —aechon paxlijawa. Pe pax owchi-esalpon. Samata, jawut Esaú xabich wunow, japox kaes ajil xot japonlijawa.

¹⁸ Xamal, Jesús pejuwajan naexasitampim, amwätjel tae-emil majt wajwuajnapijiw taen-poxan. Chajiakolaxtat wajwuajnapijiw, israelitas, pat pinjiyax m̄axxot. Jaxot itkua'nik wut, japi taen pinjiyax jit, jaramuaxmatwajtat xabich itliak wut. Do jawut, xabich pinajoewa. Xabich pina-iambej.

¹⁹ Jawutbej wajwuajnapijiw thiataenpi trompeta nababapox. J̄m̄taenbejpi, Dios naksiyas wut japiilajwa. Jawut xabich pejlwla xot, j̄m̄-aechi Dios kaes naksiya-elalajwas japiilajwa.

²⁰ To'as wut, Dios j̄m̄t̄ispi: "Nejmach-aton ampam̄axxot julan wut, japon aton ia'tat dadaepaxaelam matkaejabaliawampon. O, lanzatat chaxpiyaxaelampon. Jachiyaxaelambej, choefan wut" —tispi Dios wajwuajnapijiw.

²¹ Wajwuajnapijiw japox j̄m̄taen wut, xabich pejlwłapi. Moisésbej j̄m̄-aech: "Xan tajlewt tathulax" —aech Moisés.

²² Xatis Jesús pejuwajan naexasich xot, wajnejchaxoelaxtat moxslis pinam̄ax, pawłpox Sión, Dios dukxot, Jerusalen paklowaxxotse. Japapaklowaxxot natameja ángeles xabich pin-iakola. Japi j̄m̄-aech Diosliajwa: "Xam xabich pachaemam" —aech ángeles Diosliajwa.

²³ Dioslap juez puexa jiwliajwa. Xatis mox soepas, Diosxotse, asew jiw swapich, japi naexasiti Jesús pejuwajan. Japi pejwulan wecha-oels Diosxotse. Jiw chajia wuajna t̄api, japi jaxotse taeyaxaesbej. Dios beltaen japi babijaxan ispoxanliajwa.

²⁴ Xatis naexasich Jesús t̄appox xatisliajwa. Jesús boesas wut, nakwemot babijaxan isaspoxanliajwa, Dios nakkastikasamata. Samata, amwätjel Diosliajwa babijaxan isaspoxan bu'wuajanjisal. Chajiakolaxtat Abel boesapon, japon aton masox namana-el. Japon Dios kastikas. Pe Dios beltaen jiw, Jesús boesapi.

²⁵ Samata, j̄chiekal naexasisfulde Dios j̄m̄-aechpox xamalliajwa! Wajwuajnapijiw chajiakolaxtat naexasis-el wut Moisés chajia lelpox, japi we-eli kastikaxxot. ¡Xamal naexasisfulde japon j̄m̄-aechpoxan! Xatisbej naexasis-esal wut japon j̄m̄-aechpoxan, xabich nakkastikaxaelon.

²⁶ Dios naksiya wut pinam̄axmatwajtat, japon pejjametata sat xabich najuiya. Amwätjelbej Dios j̄m̄-aech: "Asamatkoi kaes pejme that, thatbaxobej, xan tajaxtat xabich najuiyaxael" —aech Dios.

²⁷ Dios japox j̄m̄-aech xot, asamatkoi ampthat, thatbaxobej, xabich najuiya wut, puexa Dios ispoxan ampthatat, japoxan chiekal toepaxael. Pe namaeyaxael juiyaxisalproxankal Diosxotse.

²⁸ Dios tato'alxotse juiyaxisal. Jaxotse pomatkoicha xatis, Dios swapich, duilaxaes. Samata, ampamatkoiyan Dios kawuajna wut, graciaschiyaxaes Diosliajwa. Me-ama Dios nejxasink xatis j̄m̄chiliajwas, j̄m̄chiyaxaesbej: "Xam xabich pachaemam" —chiyaxaes, Dios xabich sitaens xot.

²⁹ Me-ama jit toejow toeix, majowpi, jachiyaxael, wajDios jiw babejchow kastika wut.

13

Machiyaxaesprox, laelpas wut ampthatat Dios nejchachaemliajwa xatisliajwa

¹ Xamal, Jesús pejuwajan naexasitampim, j̄nakaewa nanejxasinkampox nabej nakofe'!

² Matabija-emilpi pat wuti nejbaxot, j̄nabej mastae' japi jiw chiekal bu'kulalijwam! Chajiakolaxtat asew jiw matabija-elpi bu'kula wut, ja-aech wut, japi jiw bu'kula Dios pej-ángeles.

³ Jiw jebachantat jiaspiliajwa, xamal nejchaxoelafulde! Japiilajwa nejchaxoelam wut, j̄m̄-amde: "Xanbej, me-ama najia jiw jebatat, jiaspi swapich" —amde, nejchaxoelam wut japiilajwa! ¡Nejchaxoeldebej nabijatpiliajwa asew jiw pijaxtat! Japiilajwa nejchaxoelam wut, j̄m̄-amde: "Xanbej, me-ama nabijatax, japi jiw swapich" —amde, nejchaxoelam wut!

⁴ Puexa jiw chiekal sitaeyaxael nakjiyax. Samata, poejiw pijowpi wulwekaxil asew watho'. Watho' pamalpiwej wulwekaxil asew poejiw. Poejiw pijowpi, japi asew watho' wulwek wut, japi poejiw Dios kastikaxaes. Watho' pamalpi wulwek wuti asew poejiw, ja-aech wut, japi watho'bej Dios kastikaxaes.

⁵ ¡Xabich plata nabej nejxasinke'! Ma nejew wut, j̄do japoxankal xanejchachaemilde! ¡Ja-amde, Dios chajia j̄m̄-aech xot: "Xamal kofsaxinil tajjiwampox. Xamal tamach waelaxinil-bej" —aech xot Dios!

⁶ Samata, Dios xanaboejas xot, nakaewa naj̄m̄chiyaxaes: "Dios xatis nakkajachawaet. Samata, wajlewlaxil, jiw asax isasia wut xatisliajwa" —nachiyaxaes nakaewalijwa.

⁷ ¡Xamal chiekal nejchaxoelde majt xamal tato'lpiliajwa! ¡Asewbej, xamal naewuajanpi Dios pejjamechan, japiilajwa chiekal nejchaxoeldebej! ¡Chiekal nejchaxoeldebej japi

jiwliajwa, ma-aech japi jiw, laelp wut ampathatat, is wutbejpi pachaempoxan! ¡Xamallap-is, me-ama japi, ja-amsfulde! ¡Chiekal Dios xanaboejimbej!

⁸ Jesucristo pomatkoicha xabich pachaempon. Asax nejchaxoela-elon.

⁹ ¡Xamal nabej naexasis, asew jiw xamal naewuajan wut asawuajan, Jesús pejuwajana-el wut! Kaes pejme pachaem Dios naexasisliajwam, japon xamal kajachawaesaxael xot, xamal nejxasink xoton. Asew jiw xae-el nejmachnaxaeyaxan, kaechafiach xoti. Ja-aech wut, japi pejxanaboejaxan nakiowa kaes chiekal mamnika-el Diosliajwa.

¹⁰ Moisés chajia lelpox naexasiti, japi jiw nejchaxoel: “Xatis naexasisaxaes Moisés chajia lelpox. Samata, choef xua'asaxaes templobaxot ofrenda isliajwas Diosliajwa” —aechi, nejchaxoel wut. Pe nakiowa, japi jiw Dios beltaeyaxisal. Pe naexasich wutlax Jesús tuppox xatisliajwa, jatis wut, Dios nakbu'weyaxael.

¹¹ Puexa sacerdotepaklokolan Lugar Santísimo poxade chaxlech choefjal ofrenda isliajwa Diosliajwa, jiw babijaxan ispoxanliajwa japi bu'wuajanjilialijwa. Pe choef, xua'ataspi, xafolipi bowaliajwa tathoetlel jiw duihxot.

¹² Jatisbej Jesucristo. Paklowax tathoetlel kimatamatlas cruztat. Japon tup wut cruztat moton puexa jiw babijaxan ispoxanliajwa, japi jiw bu'wuajanjilialijwa Diosliajwa.

¹³ Jesús kimatamatlas wut tupaliajwa paklowax tathoetlel, japox xabich padalapox. Asew jiw xatis nakjum-aech wut Jesús pejuwajan naexasichpoxliajwa: “Japawuajan naexasisliajwa xabich padalapox” —nak-aech wuti, nakiowa xatis naexasisfulaxaes Jesús pejuwajan.

¹⁴ Ampathatat ajil wajpaklowax pomatkoicha duilialijwas. Samata, xatis wuajnawesfulaxaes asamatkoi Dios pejpaklowaxxotse pomatkoicha duilialijwas.

¹⁵ Jesucristo tup wut xatisliajwa, Dios naktapaei kawuajnalijwas Dios. Samata, xatis pomatkoicha Dios jumchiyaxaes: “Xam xabich pachaemam” —chiyaxaes. Japox jumtis wut Diosliajwa, me-ama ofrenda chaxduws wut, ja-aechox. Samata, japox pomatkoicha Dios jumchiyaxaes.

¹⁶ ¡Nabej nejkiowe' isliajwam pachaempoxan! ¡Kajachawae'ebej kijila! Japoxan isam wut, Diosliajwa, me-ama ofrenda chaxduwam wut, jachiyaxaelpox. Samata, Dios nejchachaemlaxael japoxanliajwa.

¹⁷ ¡Xamal chiekal naexasisfulde, paklochow tato'al wut! Japi paklochow kofa-el xamal tataeflafulpox. Japi chiekal matabija. Chiekal xamal tataeflafula-el wut, ja-aech wut, japi jiw pejbu'wuajnaaxael Diosliajwa. Samata, ¡chiekal duilaxaelam japi nejchachaemlialijwa xamallialjwa! ¡Babijaxan nabej is paklochow nejxaejwasamatas xamallialjwa! Babijaxan isam wut, xamallialjwa pachaemaxil.

¹⁸ ¡Xamal Dios kawuajanafulde xanallialjwa! Xanal nejchaxoelx: “Xan babijax is-enil Diosliajwa, asew jiwliajwabej” —an, nejchaxoelx wut. Samata, ¡xamal Dios kawuajande xanallialjwa pomatkoicha chiekal duilialjwan!

¹⁹ ¡Dios kawuajandebej xan Dios natapaelijwa xamal poxaliajwan! Xan nejxasinkax xamal kamtalejen pejme taeliajwan.

Ampox carta lelpon saludos xato'apox

²⁰ Dios nakkajachawaet chiekal duilialijwas, asew jiw suapich. Dios mat-et wajpaklon Jesucristo pejme dukaliajwa, tup wuton cruztat. Jawut tuadut pajelwuajan, xatis Jesús pejuwajan naexasich wut nakbu'weliawwa babijaxan isaspoxanliajwa. ¡Japox pomatkoicha chiekal naexasisfulde! Samata, Jesús chiekal naktataeful. Me-ama oveja tataeflan chiekal pejew oveja tataeful, ja-aech Jesús, xatis naktataeful wut amwutjel, pomatkoichialijwabej.

²¹ Samata, Dios kawuajnaax chaxduiliajwa puexa xamal wewe'ppoxan, isliajwam Dios nejxasinkpoxan. Dios kawuajnaaxbej nakkajachawaesliajwa Jesucristo pijaxtat pachaemalijwas wajmatpuatanxot, me-ama Dios nejxasink, jachillijwas. Pomatkoicha jumchiyaxaes Jesucristoliajwa: “¡Xam xabich pachaemam!” —chiyaxaes japonliajwa.

²² Takoew, xan lelpox xabicha-ellejen xamal naewuajnalijwan. Samata, ¡nabej naewes naewesliajwam ampajamechan!

²³ Xan xato'ax ampawuajan xamal chiekal matabijalijwam. Timoteo tapaeis nakolsliajwa jiw jebaxot. Japon piach kijla-el wut, xanxot pa'an wut, buflaeyaxaelen xamal poxade xamal taeliajwam japon.

²⁴ ¡Nawesaludam xamal tato'alpi! ¡Nawesaludambej puexa asew jiw, japi Dios pejiwpi, naexasiti Jesús pejuwajan! Italia tuajnu'pijw xamallialjwa saludos xato'a.

²⁵ Xan pomatkoicha Dios kawuajnaax puexa xamal kajachawaesliajwapon.

Santiago lelpox carta Jesús pejwajan naexasitilajwa

Santiago saludos xato'apox

¹ Xan, Santiago, nabistax Diosliajwa, wajpaklon Jesucristoliajwabej. Saludos xato'ax xamal Jesucristo pejwajan naexasitampinliajwa. Xamal Israel pamojiwam, docematanpijwam, potuajnycha nasaladuilampim.

Jesucristo pejwajan naexasiti wewe'pas wut matabijsax, japi kawuajnaaxaelpox Dios

² Takoew, puexa pachaema-elpoxan xamalliajwa pasfulaxael xapaejalaajwa. Ja-aech wut, xamal nejchachaemilde!

³ Xamal matabijam. Nabijatam wut, kaes naexasisaxaelam Jesús pejwajan. Ja-am wut, diachwuajnakolax xajupaxaelam boejetaliasliajwam, nabijatam wut.

⁴ Xamalliajwa pat wut pachaema-elpox, inakiowa kaes naexasi'e Jesús pejwajan! Ja-am wut, pachaemaxaelam, me-ama Dios nejxasink xamalliajwa. Ja-am wutbej, wewe'paxil Jesús pejwajan kaes chiekal naexasisliajwam.

⁵ Kaen aton xamalxot wewe'pas wut matabijsax isaxaelpoxliajwa, japon aton matxoela kawuajnaaxael Dios chiekal matabijsliajwa. Do ja-aech wut, japon aton Dios kajachawaesaxaes chiekal matabijsliajwa. Dios kajachawaet puexa jiw japi chiekal matabijaliajwa. Dios bu'alos-el, jiw xabich waljow wut matabijsax.

⁶ Xamal Dios kawuajnam wut, jmajt chiekal nejchaxoelde wuljoeyaxaelampox! Do jawut, jchiekal nejchaxoelde: "Diachwuajnakolax Dios nakajachawaesaxael matabijsliajwan isaxaelenpox" — amde, nejchaxoelam wut! jNabej nejchaxoele: "Dios bej nakajachawaesaxil-bej matabijsliajwan isaxaelenpox" — nabej aeche', nejchaxoelam wut! Asan aton nejchaxoel wut: "Dios bej nakajachawaesaxilbej matabijsliajwan. O, bej nakajachawaesaxaelbej" — aech wuton, japon aton kaeyax chiekal nejchaxoela-el Dios kajachawaespoxliajwa.

⁷ Japon aton kolenejchaxoelax xot, Dios kawuajan wut, Dios kajachawaesaxisal chiekal matabijsliajwa isaxaelpoxliajwa.

⁸ Japon aton kaenejchaxoelaxa-el wut isaxaelpoxliajwa, asan aton xanabejsaxisal japon aton.

⁹ Aton, Jesús pejwajan naexasitpon, japon kijilan wut, asew jiw taens wuton, japon, me-ama pachaema-el wut, ja-aechon japi jiwliajwa. Pe ja-aech wut, japon aton nakiowa nejchachaemlaxael, japon xabich pachaem xot Diosliajwa.

¹⁰ Kimaeyan, Jesús pejwajan naexasitpon wut, chiekal pajut matabijt wuton pejew omjilpox Diosliajwa, japon nejchachaemlaxael. Kimaeyan piachaliajwa-el. Me-ama naetalt kamta toep, jachiyaxaelbej kimaeyan.

¹¹ Juint masxaenk wut, xabich tuajnik wut, naexi selil. Do talselil wut, nachola satadik. Ja-aech wut, talchaempox chiekal toep. Jachiyaxaelbej kimaeyan. Japon pejew mowa wut, wuajsful wutbejpon, chalexkal naetapaxaelon japon pejew.

Dios xapaajs-elpox jiw babijaxan isliajwa

¹² Aton xapaejtas wut babijax isliajwa, xabich boejetaliat wuton, japon xabich nejchachaemlaxael. Ja-aech wut, Dios chaxdusaxaeson premio, pomatkoicha dukaliajwa Diosxotse. Japoxliajwa Dios jum-aech jiw, Dios nejxasinkpiliajwa.

¹³ Aton xapaejtas wut babijax isliajwa, nejchaxoelaxil: "Dios naxapaajt xan babijax isliajwan" — chiyaxilon, nejchaxoel wut. Dios chinax kaen aton xapaajs-el babijax isliajwa. Diosbej pajut nejchaxoela-el babijax isliajwa.

¹⁴ Pe aton pajut nejchaxoel babijaxan isliajwa, isasiapoxan. Do jawux, japoxan ispon.

¹⁵ Is wuton japoxan, babijaxan, japon aton kaelel chiekal nafa'a Diosliajwa.

¹⁶ Takoew, xamal nejxasinkaxpim, jmajt nabej naekichachajbe! Samata, nejchaxoelam wut, jnabej nejchaxoele: "Dios xan naxapaajt babijax isliajwan" — nabej aeche', nejchaxoelam wut!

¹⁷ Dios puexa nakchaxduwpojan xabich pachaem. Japon isbej juint matkoipijin, madoipijinbej, ithaejbej, athuxotit itliakaliajwa. Asamatkoi japoxan chiekal itliakaxil. Pelax Dios pomatkoicha pachaem. Nejchaxoel wut, kaeyax chiekal nejchaxoelon nejchaxoelpoxliajwa. Jachiyaxaelbej, Dios nejchaxoel wut xatisliajwa.

¹⁸ Xatis naexasich xot Jesús ispox xatisliajwa, Dios nakchaxduw pajelnejchaxoelaxan japon pejiwaliajwas. Dios nakmakanot jiwxot xatis matxoela Jesús pejiwaliajwas. Jesús pejwajan diachwuajnakolax. Samata, xatis, Jesús pejiwus, xabich pin-iataxas.

Machiyaxaelpox duil wut Jesús pejwajan naexasiti

¹⁹ Takoew, xamal nejxasinkaxpim, jampox lelaxaelenpox xamal chiekal nejchaxoelde! Jiw jum-aech wut xamal jumtaeliajwam, xamal chiekal naewe! Jumchisiam wut, imajt chiekal nejchaxoelde jumchiyaxaelampox, pachaem wut! Pachaem wut, do ja-aech wut, jum-amde! Xamal nalalasangata, imajt chiekal nejchaxoeldebej jumchiyaxaelampox!

²⁰ Aton palala wut, isaxil Dios nejxasinkpox.

²¹ Samata, puexa pachaema-elpoxan kaelel kofim! iKaes japoxan nabej is! iDios naexasisfulde isliajwam pachaempoxan! iChiekal naewesfulde, asew jiw xamal naewuajan wut Dios pejjamechan! Ja-am wut, Dios xamal bu'weyaxael.

²² iNabej naewes asbuun jumch Dios pejjamechan! Ja-am wut, xamal najut nanakichachajbaxaelam. iChiekallax xamal naexasisfulde Dios pejjamechan!

²³ Aton asbuun jumch naewet wut Dios pejjamechan, pe naeaxis-el wuton Dios tato'alpoxan, ja-aech wut, japon aton kajachawaesaxisal Dios pejjamechan naewetpoxliajwa. Ja-aech wut, japon aton, me-ama chapot xu-aeltaen wut, jachiyaxaelon.

²⁴ Xu-aeltaeyax toet wut, kamta itfunekiwapon pejxu tala-achpox.

²⁵ Aton nekiowa-elpon jumtaempoxan, Dios tato'alpoxan, japon aton Dios kajachawaesaxes puexa ispoxanliajwa. Dios tato'alpoxan xabich pachaem. Jiw naexasit wut japox tato'lawan, japi jiw xabich nejchachaemlafalaxael.

²⁶ Aton jum-aech wut: "Xan isx Dios nejxasinkpox" —aech wut, pe japon aton nejmach paeje wut pachaema-elpoxan, ja-aech wut, japon aton pajut naekichachajba. Samata, japon Jesus pejwuajan naexasitpox, Diosliajwa chiekal pachaema-el.

²⁷ Japon aton diachwajnakolax chiekal naexasit wut Jesus pejwuajan, is-elon babijaxan, asew jiw ispoxan. Ampathatat laeja wutfukon, kajachawaet yamxi, pasoelkola. Kajachawaetbejpon watho', pamaljiw naetapsi, japi watho' kijil xot. Japon aton japoxan is Diosliajwa.

2

Jesus pejwuajan naexasiti, japi puexa jiw chiekal sitaeyaxaelpox

¹ Takoew, xamal xanaboejam wajpaklon Jesucristo, xabich pachaempon. Samata, xamal puexa jiw sitaem! iNabej mastaele' asew jiw!

² Xamal culto isam wut, jaxot kimaeyan pasaxael. Japon xabich oro-anillos kothiyaxajoeyaxael. Japon xabich naxoelaxael chamoeyax. Do jawut, kijilan jaxot pasaxael. Japon naxoelaxael pachaema-elpox. iXamal machiyaxaelamkat, japi kolenje bu'kulam wut?

³ Jawut chiekal bu'kulaxaelam kimaeyan. Japon to'axaelam ekaliajwa tua-ekax, kaes chamoeyaxtat. Kijilanlax nukax to'axaelam. Ja-el wut, to'axaelampon satat ekax. Xamal ja-am wut, isaximil pachaempox Diosliajwa.

⁴ Japi kolenjeliajwa kaeyax nejchaxoelaximil. Xamal sitaeyaxaelam xabich naxoelpon chamoeyax. Asan sitaeyaximil. Japox ja-am wut, jado' japox pachaemaxil.

⁵ Takoew, xamal nejxasinkaxpim, xan lelpox xamal chiekal naexasisfulde! Dios makanot jiw kijila japon naexasisliawapi. Ja-aech wut, japi jiw Diosliajwa kimaenk wut, ja-aechi. Japi tapaeయాaxes pomatkoicha duilaliajwa japonxotse, me-ama Dios jumdut jiwliajwa, Dios nejxasinkpiliajwa.

⁶ Xamal chiekal bu'kula-emil wut kijila, ja-am wut, diachwajnakolax xamal sitae-emil kijila. iXamal najut nejchaxoelde kimaeya pijaxtat xamal nabijatampoxan, buflaech wuti jueces poxade, jaxotde xamal tasalaliajwapi!

⁷ Japi jiw jum-aechbej babejjamechan Jesusliajwa, japon xabich pachaempon. Xatis japon pejiw.

⁸ Dios pejjamechan, chajia lelpox, jum-aech wut, jum-aechox: "iNejxasinkde asew jiw! Me-ama xam najut nanexasinkam wut, ja-amde asew jiwliajwa!" —aechox. Xamal diachwajnakolax jasox ja-am wut, kaes pejme pachaempox isaxaelam.

⁹ Asew jiw chiekal sitaenam. Pe asew jiw chiekal sitae-emil wut, ja-am wut, xamal is-emil Dios nejxasinkpox. Isaxaelam babijax. Ja-am wut, nejb'uwanaxaelam Diosliajwa, puexa jiw chiekal sitae-emil xot, Dios japox to'a wut.

¹⁰ Aton naexasisful wut Moisés chajia lelpox, pe japon aton kaeyax wewe'pas wut naexasisliawapi, japox wewe'pas xot naexasisliawapi, japon aton pejb'uwanaxael Diosliajwa. Ja-aech wut, japon aton, me-ama puexa chiekal naeaxis-elon Moisés chajia lelpox, jachiyaxaelon.

¹¹ Dios pajut chajia jum-aech: "iNijow nabej naebu'moejs asew watho'!" —aech Dios. Dios jum-aechbej watho'liajwa: "iNabej naebu'moejs nejmol asew poejiw!" —aech Dios. Dios jum-aechbej: "iNabej be' asew jiw!" —aech Dios. Aton pijowpon, japon asew watho' naebu'moejs-el wuton pijow, pe japon aton, asan aton boesa wut, ja-aech wut, japon aton

nakiowa pejbu'wajaan Diosliajwa. Ja-aech wut, japon aton Diosliajwa, me-ama puexa Moisés chajia lelpox chiekal naexasis-el wut, ja-aechon.

¹² Xamal chiekal isam wut Dios to'apox, ja-am wut, xamal bu'wajaanjilaxaelam Diosliajwa. Chiekal naexasis-emil wut Dios to'apox, ja-am wut, Dios xamal kastikaxael. Xamal jum-am wut, jum-amde pachaempoxan! ¡Isdebej pachaempoxan asewliajwa, Dios japox to'a xot!

¹³ Jiw beltae-el wut asew jiw, Diosbej japi jiw beltaeyaxil, asamatkoi, Dios jiw babejchow kastika wut. Jiw beltaenpi asew jiw, japi jiw Dios kastikaxil, pat wut kastikamatkoi.

Jesús pejwajaan naexasiti isaxaelpox pachaempoxan

¹⁴ Takoew, asew jiw asbuan jumch jum-aech wuti: “Xan Jesús pejwajaan naexasitx” — aech wuti, pe is-el wut pachaempoxan asew jiwliajwa, japi jiw jum-aechpox pachaema-el Diosliajwa. Japox jum-aech wut, Dios bu'weyaxisal japi jiw.

¹⁵⁻¹⁶ Xamal, Jesús pejwajaan naexasitampimxot, asew jiw wewe'paxaes wut naxoelajwa, xaeliajwabej, pe xamal asbuan jumch jumchixaxaelam wut japijajwa: “¡Chijiamde! ¡Dios xamal nej kajachawaes naxoelajwam! ¡Dios nej chaxdui naxaeyaxan xamal xaeliajwam!” — chiyaxaelam wut, xamal jum-ampox pachaemaxil japi jiwliajwa.

¹⁷ Asew jiw jumchixaxael wutbej asew jiwliajwa: “Xanal chiekal naexasitx Jesús pejwajaan” — chiyaxael wuti, pe japi jiw isaxil wutbej pachaempoxan asew jiwliajwa, ja-aech wut, japi jiw jum-aechpox Diosliajwa pachaemaxil, isaxil xoti Dios jum-aechpox.

¹⁸ Kaen aton jumchixaxael ampo: “Jesús pejwajaan naexasitixot asew is-el pachaempoxan asew jiwliajwa. Asew, Jesús pejwajaan naexasitilax, is pachaempoxan asew jiwliajwa” — chiyaxaelpon. Japon aton japox jum-aech wut, xan jumchixaxaelen japon atonliajwa: “Xatis chiekal matabijaxisal, asew jiw diachwujnakolax naexasit wut Jesús pejwajaan, is-el wuti pachaempoxan asew jiwliajwa. Xanlax isfulax pachaempoxan asew jiwliajwa, me-ama Dios nato'a japoxan isliajwan. Ja-ansfulax wut, jiw matabijaxael diachwujnakolax xan chiekal naexasitx Jesús pejwajaan” — chiyaxaelen japon atonliajwa.

¹⁹ Xan pejme japon aton jumchixaxaelenbej: “Xam nejchaxoelam wut, jum-am: ‘Dios kaen. Kaes asan Dios ajil, me-ama Dios, jason’ — am wut, japox diachwujnakolax. Japox nejchaxoelam wut, diachwujnakolax. Depbej matabija, Dios kaenpon. Japi dep pejlewla xot, tathalalbejpi Diosliajwa. Pe nakiowa, dep kofa-el babijaxan ispoخان asew jiwliajwa. Samata, xan matabijsaxinil, diachwujnakolax xam chiekal naexasitam wut Jesús pejwajaan. Pe is-emil wut pachaempoxan asew jiwliajwa, ja-am wut, diachwujnakolax xam naexasis-emil Jesús pejwajaan.

²⁰ ¡Xam nabej nejliakle! Xatis jumchixaxaes wut: ‘Xan naexasitx Jesús pejwajaan’ — chiyaxaes wut, pe is-esal wutbej pachaempoxan asew jiwliajwa, jatis wut, xatis jumchixaxaespo, Diosliajwa japox pachaemaxil.

²¹ Wajwujnapijin Abraham is Dios kito'aspo. Samata, paxalan xua'laxael wuton ofrenda isliajwa Diosliajwa, ja-aech wut, Abraham Diosliajwa bu'wajaanjilon.

²² Abraham naexasit Dios jumtispo. Samata, Abraham paxalan xua'laxael wut, ja-aech wut, puexa jiw chiekal matabija Abraham diachwujnakolax chiekal xanaboejtpox Dios.

²³ Samata, Abraham is, me-ama Dios pejjamechan, chajia lelpox, jum-aech wut, jum-aechox japonliajwa: ‘Abraham naexasit Dios jumtispo. Samata, Abraham Diosliajwa bu'wajaanjilon’ — aechox. Asew jiw chajiakolaxtat Abrahamliajwa jum-aech: ‘Abraham, Dios pejnachalan’ — aechi” — chiyaxaelen japon atonliajwa, xan jumnosaxaelen wut.

²⁴ Samata, puexa xatis matabijas, aton xanaboejt wut Dios, japon aton bu'wajaanjil Diosliajwa, chiekal is xot Dios tato'alpoxan.

²⁵ Rahab pejbachax, poejiw bu'moesax plata kanaliajwa. Japow asamatkoi is pachaempox, chiekal bu'kult wutow kolenje, israelitas, pat wut Jericó paklowaxxot. Japi chawujnataen asamatkoi nabeliajwa, japapaklowaxpijiw suapich. Rahab kajachawaet japi weliajwa padaelmajiwxot. Asanamtade to'ach besamatas padaelmajiw. Japox is xot, Rahabbej bu'wajaanjil Diosliajwa.

²⁶ Jiw fakjola-el wut, tuxaxael. Ja-aech wut, kaes asaxan isaxilbejpi. Xatisbej jatis, puexa naexasichpis Jesús pejwajaan. Nejchaxoels wut: “Xatis Jesús pejwajaan naexasich” — chiyaxaes wut, pe is-esal wut Dios nakto'apoxan, jatis wut, japox pachaemaxil Jesús pejwajaan naexasichpoxliajwa. Jachiyaxaes wut, Diosliajwa xatis, me-ama patupa wut, jachiyaxaes.

3

Jesús pejwajaan naexasiti buxfiachpox babejjamechan jumchisamata asew jiwliajwa

¹ Takoew, xamal chiekal matabijam, xanal, Jesús pejuwajan naewuajna xpin, babijaxan isaxaelen wut, Dios xabich kaes xanal nakastikaxael. Samata, xamalxot nej xabicha-ele' jiw, naewuajanpi Jesús pejuwajan!

² Puexa xatis isas pachaema-elpoxan asew jiwliajwa, majt chiekal nejchaxoela-esal wut isliajwaspoxan. Kaen aton jumchi-el wut kaejame, pachaema-eljame, asew jiwliajwa, japon atonlap Diosliajwa chiekal pachaemaxael. Japon aton pajut chiekal natataeflaxael-bej isasamata babijax.

³ Xatis kawaei kaechaxajoels freno. Jatis wut, pachaem kawaei xajiasliajwas, chaflaesias poxade chaflaeliajwas.

⁴ Ja-aechbej pinjiyax barkamliajwa. Timón cha-aelaxachpoxat aton xajup xajiasliajwa barkam, xabich pinajoewa wut, chaflaesia poxade chaflaeliajwa.

⁵ Ja-aechbej jit. Cha-aeljit wut, xajup pinjiyax lul toejwaliajwa. Ja-aechbej wajkaech-ia'an. Xajup nejmach jumchiliajwas: "Xan xajupx isliajwan pinjiyaxan" —chiliajwas asbuan jumch wajkaech-ia'antat.

⁶ Wajkaech-ia'anbej, me-ama jit, tabejsaxaes xot asew jiw. Wajkaech-ia'antat xabich jumis babijaxan asew jiwliajwa. Japox tuaduws, jams wut. Amwutjelbej nakiowa jatisfalas. Jachiyaxaes pomatkoicha ampathatat, Satanás nakbuxto'apoxan naksiyas xot.

⁷ Jiw matabija nejmachchoef, tathoetpijiw, itfelaliajwa. Samata, tato'al wuti, tathoetpijiw, mia, jom, minpijiwbej, japi choef jumtaenspi. Naexasichbejpi.

⁸ Pe aton fiasaxil pejkaech-ia't naksiya-elaliajwa pachaema-elpoxan. Buxkofaxil babijaxan jumtisepoxan. Japoxan asew jiwliajwa, me-ama jombua'nael wut, ja-aechox. Samata, asew jiw xabich tabejtas.

⁹ Xatis jumis wajkaech-ia'antat waj-ax Diosliajwa: "Xam xabich pachaemam" —tis. Do jawux, jumisbej wajkaech-ia'antat babejjamechan asew jiwliajwa, japi jiw isaspi Dios, me-ama Dios wut, ja-aechpi.

¹⁰ Wajkaech-ia'antat jumis chimiajamechan Diosliajwa. Do jawutbej, jumisbej babejjamechan asew jiwliajwa. Takoew, xatis japoxan jumchiyaxisal asew jiwliajwa.

¹¹⁻¹² Satlel min nakakolsanxot, jaxot chimiamin nakakolsan. Jaxot nakola-el xasaxamin. Ja-aechbej muthasi. Higonae naboet wut, japanaexot naboes-el asabaech. Uvanaechanxot-bej naboes-el asabaech. Me-ama japox ja-aechbejlap-is wajkaech-ia'an. Chimiajamechan jumis wut, kamta kaewutje, jumchiyaxisal babejjamechan.

Dios pijax, matabijsax, kaes pejme pachaempox xatis matabijaliajwas

¹³ Xamalxot kaen aton xabich matabijsan wut, japon nej is pachaempoxan! japon nej nejchaxoelebej: "Xan kaes pachaema-enil. Me-ama asew jiw, jachi-enil" —nej aechepon, nejchaxoel wut!

¹⁴ Xamal asew jiw nusasiowlam wut, kaes paklonasiam wutbej, ja-am wut, asew jiw matabijaxael diachwujnakolax xamal matabija-emilpin.

¹⁵ Xamal asew jiw xabich nusasiowlam wut, kaes paklonasiam wutbej, japoxan Dios to'a-el. Ja-am wut, nejchaxoelaxaelam ampathatpijiw nejchaxoelpox. Ja-amwutbej, nejchaxoelaxaelam, me-ama Satanás to'a xamal nejchaxoelaliajwam.

¹⁶ Xamal asew jiw nusasiowlam wut, kaes paklonasiam wutbej, jachiyaxaelam wut, xamal kaenejchaxoelaximil. Isaxaelambej puexa nejmach, chaemilpoxan.

¹⁷ Jiw matabijapi Dios pijax matabijsax, japi jiw chiekal duil, me-ama Dios nejxasink japi duilaliajwa. Duil wut, nabe-eli, asew jiw suapich. Japibej talias-el asew jiw. Nejchaxoelbejpi naexasisliajwa asew jiw tato'alpoxan. Japibej beltaen, asew jiw nabijat wut. Jiw kajachawaet wutbejpi, puexa jiw chiekal kajachawaeti. Naekichachajba-elbejpi asew jiw. Isbejpi pachaempoxan asew jiwliajwa.

¹⁸ Aton chiekal duk wut, asew jiw suapich, japon naewuajan wutbej asew jiw chiekal duilaliajwa, ja-aech wut, japi jiw chiekal duilaxael.

4

Jesús pejuwajan naexasiti chiekal naexasisfalaxaelpox Dios

¹ ¿Ma-aech xotkat xamal nakaewa nalotam? ¿Ma-aech xotbejkat xamal nakaewa nabam? Xamal japoxan isfulam, chajia nejchaxoelam xot japox isliajwam.

² Xamal xabich nejxasinkam wut asan pijax, japon aton bu'aboesam wefisliajwam japox. Xamal nusasiowlambej, taenam wut asew jiw pejew. Xamal xajupa-emil wut wuajsliajwam taenam pox, bu'alotam japi jiw. Ja-am wut, bu'abambej. Xamal nejxasinkampoxan faekam-emil, majt Dios chiekal kawuajna-emil xot japoxanliajwa.

³ Xamal japoxanliajwa Dios kawuajnam wut, japoxan Dios chaxdui-el, najut isasiampoxan babijaxan, isaxaelam xot japoxantat.

⁴ ¿Ma-aech xotbejkat xamal kofasiam Dios xanaboejampox? Xamal kofasiam Dios xanaboejampox, xabich nejxasinkam xot ampathatpijixan. Xamal babijaxan isam wut, me-ama a sew jiw ampathatpijiw, ja-am wut, xamalbej Dios padaelmajiw nadofaxaelam.

⁵ Dios pejjamechan, chajia lelspx, jum-aech wut, jum-aechox: “Dios to’ak Espiritu Santo wajmatpuatanxotaliajwa. Espiritu Santo nejxasink xatis kaes pejme Dios nejxasinkaliajwas” —aechox.

⁶ Dios nakkajachawaet, naknejxasink xot. Dios pejjamechan, chajia lelspx, jum-aech wut, jum-aechox: “Dios jiw kajachawaet, japi nejchaxoel wut ampx: ‘Xan kaes pachaema-enil. Me-ama a sew jiw, jachi-enil’ —aech wuti. Pe jiw nejchaxoelpi: ‘Xan kaes pachaeman. Me-ama a sew jiw, jachi-enil’ —aech wuti, Dios kajachawaes-el japi jiw” —aech Dios pejjamechan, chajia lelspx.

⁷ Samata, ixatis naexasisfulaxaes Dios tato’alpx! Ja-am wut, Satanás xamal xapaeja wut isliajwam Satanás nejxasinkpox, isaximil babijax. Ja-am wut, Satanás atəaj najaesaxael xamalxot.

⁸ ¡Xamal Dios kaes chiekal xanaboejim! Ja-am wut, Dios kaes xamalxotchfulaxael. ¡Babijaxan isampoxan kofim! Xamal, Dios nejxasinkasiampim, ikamta kofim ampathatpijiw nejxasinkpoxan! ¡Dioskalk nejxasinkde!

⁹ ¡Kofim xanejchachaemlampoxan, ampathatpijixan! Xamal babijaxan isam wut, nadalaxael. Samata, japoxanliajwa noeyaxaelambej.

¹⁰ Xamal Dios kawəajnam wut, jum-amde: “Xan babijaxan isx. Samata, pachaema-enil xan nanejxasinkaliajwam” —amde, Dios kawəajnam wut! Ja-am wut, Dios xamal kajachawaesaxael chiekal pachaemaliajwam.

Jesús pejwəajan naexasiti nakaewa najumchiyaxil: “Ampi babejchow”

¹¹ Takoew, ixamal nabej jum-aech’ babejjamechan a sewliajwa, japi, naexasiti Jesús pejwəajan! Kaen aton xamalxot jum-aech wut babejjamechan asan atonliajwa, japon aton, me-ama juez wut, ja-aechon. Japon diachwəajnakolax naexasis-el Dios tato’alpx. Kaen Dios, japon juez. Samata, asamatkoi Dios jumchiyaxael kaenanəla Jesús pejwəajan naexasitiliajwa: “Japon aton chiekal pachaem” —chiyaxaelon, o, jumchiyaxaelon: “Japon aton chiekal pachaema-el” —chiyaxael Dios kaenanəla jiwliajwa, Jesús pejwəajan naexasitiliajwa.

¹² Kaen Dios waelt pejjamechan xatis japox naexasisliajwas. Japonbej juez. Samata, japon Dios, kaen, xəjəp jiw bu’weliajwa, pomatkoicha duilaliajwapi Diosxotse. Xəjəpbejpon babejchow to’aliajwa japi kastikaliajwas pomatkoicha. Samata, Dios tapae-el xamal jumchiliajwam a sew Jesús pejwəajan naexasitiliajwa: “Japi jiw chiekal pachaema-el xot, Dios kastikaxaespi” —chiliajwam.

Xatis matabija-esalpx asamatkoi jachiyaxael xatisliajwa

¹³ ¡Chiekal naewe’e ampx! Xamalxot a sew jiw jum-aech: “Amwutjel, o, kandiawa, fulayaxaes asapaklowax poxade. Jaxotde kaewaech chatopaxaes. Jaxotde xabich moxaxes wejew. Xabich plata kanaxaes” —aech a sew jiw xamalxot.

¹⁴ ¡Xamal jasox nabej jum-aech’, chiekal matabija-emil xot kandiawa jachiyaxaelpox xamalliajwa! Matabija-emilbej, ahamatkoi təpaxaelam. Kandiawasap itnoj nakola. Pe kamta toep. Me-ama itnoj kamta toep, xamalbej jachiyaxaelam, asamatkoi təpaxaelam wut.

¹⁵ Asamatkoi, xamal nejchaxoelam wut isaxaelampoxliajwa, jum-amde: “Dios nakta-paei wut, laelpaxaes. Nabichaxaesbej. Ja-el wut, isaxaes asax pachaempox” —amde!

¹⁶ Pe nakiowa, xamal najut nejchaxoelam: “Xan matabijtax isaxaelenpox. Me-ama a sew jiw, jachi-enil” —am, nejchaxoelam wut. Japox nejchaxoelax pachaema-el, nejchaxoela-emil xot Dios nejxasinkpox.

¹⁷ Aton matabijt wut pachaempox isliajwa, pe is-el wuton, ja-aech wut, japon aton pejbəwəajna xael Diosliajwa.

5

Santiago lelpox ampəwəajan naewəajnalijwa kimaeya

¹ Xamal kimaenkampim, ¡chiekal naewe’e ampanaewəajnaxan! ¡Amwutjel noem! ¡Noem, asamatkoi xabich nabijasaxaelam xot!

² Nejew tamejampi toepaxael. Nejew ponan xabich itxaeyaxaesbej.

³ Nejew oro, platabej, asnadut wut, japoxan jiw taen wut, japi matabijaxael xamal nejew xanbich-emilpox kajachawaesliajwam jiw kijila. Samata, Dios xamal xabich kastikaxael, nejew xabich asbuan jumch tamejam xot najutliajwa.

⁴ Jiw nabistpi nejew lulanxot, xamal japi mos-emil. Japi chapaei asew jiwxot xamal naekichachajbampox japi jiw. Samata, wajpaklon Dios, xajupon puexa isliajwa, japon jumtaen nabistpi xamalliajwa jum-aechpoxan.

⁵ Xamal laelpam wut, najut isasiampoxan isfulam. Samata, xamal, me-ama pak, xabich dalpi wut pachaem xua'asliajwas, ja-am xamal, mox pawuajna xot Dios xamal kastikalijwa.

⁶ Xamal jiw tasalam, bu'wuajanjilpi. Japi jiw xamal jumnos-el wut, xamal pabam wut, chiekal kijtam japi jiw.

Jesucristo pejme pasaxoekpox ampathat poxasik

⁷ Takoew, xamal piach wuajnewesfulde wajpaklon pasaxoekpox! Jiw, pejlulanpi, wuajnewesful, matxoelapej-iam thilan wut pelaliajwa pejlulantat. Do jawux, pelapi wuajnewesful asamatkoi jolaliajwa.

⁸ Xamalbej kofaximil naexasitampox Jesús pejuwajan. iPiach wuajnewesfulde chalechkal Jesús pejme pasaxoekpox!

⁹ Takoew, inabej jum-aech' babejjamechan nakaewaliajwa, asew xamalxotpiliajwa, xamal bu'wuajanjilaliajwam Diosxot! ijasoxan nabej jum-aech'! Mox pawuajna Dios jumchiliajwa kaenanula jiw babijaxan ispliajwa.

¹⁰ Takoew, inejchaxoelde profetasliajwa, chajia laelpiliajwa! Japi chiekal Dios xanaboeja, nabijasful wut, asew jiw babijaxan is wut japiajwa, japi naewuajan wut Dios buxto'aspojan. Japi nabijatpox malecha-esal. Samata, japi boejetaliat, piach nabijat wut. iXamalbej jachiyaxaelam!

¹¹ Jiw nabijasful wut asew jiw pijaxtat, nakiowa Dios xanaboejaful wut, japi jiw nejchachaemil. Xamal wultaenambej Job xabich chajia nabijatpox. Ja-aech wut, japon nakiowa Dios xanaboejsful. Matabijambej, Job nabijasful wut, Dios xabich kachawaesfulas, xabich beltaens xoton.

¹² Takoew, xan laxaelenpox kaes pejme pachaem xamal chiekal naexasisliajwam. Asew jiwliajwa jum-am wut, ijum-amde diachwuajnakolaxpoxkal! Samata, jumduwam wut isaxaelampoxan, ijum-amde jumduwampoxkal! iKaes pejme asaxan xamal nabej jum-aech', asew jiw xamal naexasisliajwa jumduwampoxan! Samata, inabej jum-aech'bej: "Xan diachwuajnakolax isaxaelen jumduxpox, Dios najumtaen xot" —nabej aech'! Japox isaxaelam wut, ikamta chiekal jum-amde: "iXan diachwuajnakolax japox isaxaelen!" —amde! Japox jum-am wut, iJapox chiekal isde! Japox is-elasiyam wut, ikamta chiekal jum-amde: "iXan japox isaxinil!" —amde! Ja-am wut, Dios xamal kastikaxil, jumduwampoxanliajwa.

¹³ Kaen xamalxot nabijat wut, japon pajut Dios nej kawuajne! Kaen xamalxot nejchachaemlaful wutbej, japon jajuw wut, jumchiyaxael: "Dios, xam xabich pachaemam" —chiyaxaelon.

¹⁴ Kaen aton xamalxot bu'xaenk wut, japon aton asan nej buxto'a wullalaeliajwapon ancianos, japi naexasiti Jesús pejuwajan tataefulpi! Ancianos pat wut, japi ancianos Dios kawuajna xael bu'xaeyan boeithulaliajwas. Ancianos olivosimint bu'joelaxaelpibej bu'xaeyan, Dios kawuajan wuti.

¹⁵ Japi ancianos Dios kawuajan wut, nejchaxoelaxaeli: "Ampon, bu'xaeyan, diachwuajnakolax Dios boeithulsaxaeson" —aech wuti, nejchaxoel wut, diachwuajnakolax bu'xaeyan boeithulaxaes. Dios beltaeyaxaesbejpon majt babijaxan ispojanliajwa.

¹⁶ Samata, japon bu'xaeyan babijaxan majt is wut, chapaejaxael ancianos jumtaeliajwa japi Dios kawuajnalijwa. Ja-aech wut, bu'xaeyan boeithulaxaes bu'xaenkpox. Aton, pachaempon Diosliajwa, japon xabich Dios kawuajan wut, Dios kajachawaesaxaeson.

¹⁷ Profeta Elías, me-ama xatis wut, ja-aechon. Chajiakolaxtat, japon Dios kawuajan wut, xabich kawuajan iam thilnasamata. Do jawux, tres waechan y medio iam thilna-el.

¹⁸ Do jawux, Elías pejme Dios kawuajan iam thilnalijwa. Do ja-aech wut, iam thilan. Samata, muthapi chiekal naboela.

¹⁹ Takoew, xamalxot kaen aton Jesús pejuwajan naexasitpox koft wut, iasan xamalxot nej naewuajnason, japon aton pejme naexasisliajwa Jesús pejuwajan!

²⁰ Jesús pejuwajan naexasitpon naewuajan wuton asan aton, japon kofsliajwa babijaxan ispojan, ja-aech wut, japon aton, Jesús pejuwajan naexasitpon, kajachawaet asan aton nafo'asamata Diosliajwa, pomatkoicha japon aton dukaliajwa Diosxotse. Ja-aech wut, naewuajnaspon Dios beltaeyaxaeson xabich babijaxan ispojanliajwa.

Matxoelacarta, Pedro lelpox, Jesús pejwajaan naexasitiliajwa

Pedro lelpox carta Jesús pejwajaan naexasitiliajwa

¹ Xan Pedro, Jesucristo pej-apóstolan, lelx ampacarta xamal Dios pejiwampimliajwa. Xamal nejpaklowaxanxot amwutjel atəaj nasaladuilampim. Asewam duilam Ponto tuajnuxot. Asewam duilam Galacia tuajnuxot. Asewam duilam Capadocia tuajnuxot. Asewam duilam Asia tuajnuxot. Asewam duilam Bitinia tuajnuxot.

² Xamal nalaela-emil wut, waj-ax Dios chajia nejchaxoel, xamal makanosliajwa japon pejiwaliajwam. Matabijtejpon xamal isaxaelampox, pachaempoxan japonliajwa. Amwutjel xamal Espíritu Santo makanot naexasisliajwam Jesús pejwajaan. Samata, amwutjel Dios xamal beltaen babijaxan isampoxanliajwa, Jesucristo tər xot. Xan Dios kawuajnxax xamal xabich kajachawaesliajwa chiekal duilaliajwam, asew jiw swapich.

Dios tapaeyaxaelpox duilaliajwa Diosxotse naexasiti Jesús pejwajaan

³ Xatis jumchiyaxaes Diosliajwa, japon wajpaklon Jesucristo paxliajwa: “Xam xabich pachaemam” –chiyaxaeson. Jesucristo mat-ech xot pejme dukaliajwa, Dios xabich nakbeltaen xatis babijaxan isaspoxxanliajwa. Samata, Diosliajwa, pajelnejchaxoelaxan xotch, me-ama jelnalaelas wut, jatis amwutjel. Samata, wuajnowesfulaxaes pomatkoicha duilaliajwas Diosxotse.

⁴ Jaxotse Dios nakchaxduiyaxael xabich pachaempox. Japox toepaxil. Ommaenkaxael-bejpoxx.

⁵ Japox Dios nakchaxdusaxael jaxotse, xanaboejas wut Cristo. Xatis ampathatat laelpas wut, Dios naktataeful. Asamatkoi, ampathatat matdukamatkoi wut, xatis matabijaxaes Dios nakchaxdusaxaelpox.

⁶ Samata, xabich nejchachaemlaxaelam, laelpam wut. Xamal nabijatam wut nejmachxapaejapoxantat, nakiowa xamal nejchachaemlaxaelam.

⁷ Dios tapaei wut xamal nabijasliajwam, jasoxtat Dios xamal xapaeja matabijsliajwapon, diachwuajnakolax xamal chiekal naexasitam wut Jesucristo pejwajaan. Jiw xapaeja oro jitat matabijaliajwa, diachwuajnakolax orokola wut. Diosbej jachiyaxael xamalliajwa, xamal xapaeja wuton Jesucristo pejwajaan naexasitam poxliajwa. Japox kaes pejme ommaenk Diosliajwa. Me-ama oro, jachi-el. Japoxbej toepaxil. Xamal nabijatam wut, jnakiowa Dios xanaboejim! Ja-am wut, asamatkoi wajpaklon Jesucristo pask wut athulelsik, nejchachaemlaxaelon xamalliajwa.

⁸ Xamal najut tae-emil Jesucristo. Pe nakiowa, japon nejxasinkam. Naexasitambej japon pejwajaan. Samata, nejchachaemlam japonliajwa. Japanejchachaemlax xabich pachaem xamalliajwa. Pe xajupa-emil asew jiw chiekal chanaekabuanaliajwam xamal nejchachaemlaxaelpoxliajwa, japibej matabijaliajwa, ma-aech nejchachaemlaxaelpox.

⁹ Dios xamal bu'weyaxael, naexasitam xot Jesucristo pejwajaan.

¹⁰ Chajiakolaxtat profetas xabich studia Dios pejjamechan. Wuajnachaemtbejpi chiekal matabijaliajwa, machiyaxael Dios jiw bu'weliajwa wut. Profetas matabija wut, japi naewuajan jiw Dios beltaeyaxaesopox japi babijaxan ispoxxanliajwa.

¹¹ Profetas matabija Espiritu Santo pijaxtat Cristo nabijasaxaelpox puexa jiw babijaxan ispoxxanliajwa. Matabijabejpi Cristo təraxaelpox. Do jawut, pejme kaxaxoeipon pax Dios poxase ekaliajwa poklalel tato'laliajwapon, pax swapich. Samata, profetas nakaewa nawuajnachaemt wut, najum-aechi: “¿Achatatkoitatkat, Cristo pasaxoek ampathatasik? Japon pask wut, ¿machiyaxaeskat xatis matabijaliajwas japon?” –na-aechi nakaewa.

¹² Profetas laelp wut, matabija asamatkoi japi pejwulela jachiyaxaelpox. Japox matabi-japi, Dios kajachawaech xot. Samata, xatis amwutjel laelpaspis profetas pejwulela, matabijas japi profetas jum-aechpox Cristoliajwa, japox xatisliajwa. Amwutjel asew jiw jarawuajan naewuajan asew jiwliajwa, japibej bu'weliajwas. Japi naewuajan wut asew jiwliajwa, Espiritu Santo kajachawaechpi. Japon Dios to'akason. Ángelesbej japoxan chiekal kaes matabijasia.

Dios nakmakanotpox xatis, Jesús pejwajaan naexasichpis, isasamatas babijaxan

¹³ Xamal Dios pejiwam xot, imajt chiekal nejchaxoelde isaxaelampox! ¡Xamal najut chiekal natataefuldebej babijax isasamatam! ¡Wuajnowesfuldebej Jesús pasaxoekpox! Jesús pejme fuloek wut, Dios puexa xamal bu'weyaxael, me-ama Dios chajia jumdut xamal bu'weliajwa babijaxan isampoxanliajwa.

¹⁴ ¡Isfulde waj-ax Dios tato'alpox! Nejchaxoelam wut, ¡nabej nejchaxoele' babijaxan isliajwam, majt isampoxan, Dios naexasis-emil wutfuk!

¹⁵ ¡Duilafulde, me-ama Dios nejxasink! Japon xamal makanot japon pejiwaliajwam. Japon pajut pachaem. Babijax is-elon.

¹⁶ Dios pejjamechan, chajia lelspos, jum-aech wut, jum-aechox Dios jum-aechpox: "¡Nabej is babijax, xan xabich pachaeman xot!" —aechox.

¹⁷ Xamal Dios kawuajnam wut, jum-am: "Taj-ax Dios" —am. Dios puexa pejiw taen wut, paklochow, paklochowa-elibej, puexa chiekal taenpon. Samata, Dios jumchiyaxael kaenanula jiw, babijaxan is wut, o, babijaxan is-el wut. Samata, ampathatat laelpam wut, ¡pomatkoicha chiekal duilaxaelam Diosliajwa!

¹⁸ Xamal majt napeltam Diosliajwa, duilam xot, me-ama nejwuajnapijiw. Pe japox pachaema-el Diosliajwa. Xamal chiekal matabijam. Cristo tup mosliajwa xamal babijaxan isampoxanliajwa xamal bu'weliajwapon. Cristo pejmosax toepaxil. Me-ama oro, platabej, jachiyaxil japox.

¹⁹ Cristo tuppox xabich ommaenk, japon Dios paxulan xot. Samata, Cristo tup wut cruztat, moton jiw babijaxan ispoxanliajwa. Cristo boesas xatis babijaxan isaspoxanliajwa. Me-ama cordero chimian xaa'las ofrenda isliajwa Diosliajwa, jatisbej Cristoliajwa.

²⁰ Chajiakolaxtat, Dios is-el wutfuk ampathat, Dios nejchaxoel Cristo tupaliajwabej mosliajwapon xatis babijaxan isaspoxanliajwa.

²¹ Xamal matabijam Cristo pejwuajan. Samata, chiekal Dios xanaboejam. Cristo tup wut cruztat, Dios mat-echpon pejme dukaliajwa. Jawux buflouispon athu poxase ekaliajwa pax Dios poklalel, puexa jiw tato'laliajwa. Samata, xamalbej Jesucristo pejwuajan naexasitam xot, Dios xanaboejam pomatkoicha duilaliajwam japonxotse.

²² Amwutjel xamal kofam babijaxan isampoxan, naexasitam xot diachwuajnakolaxpox, Jesús pejwuajan. Samata, xamal chiekal nejxasinkam asew jiw, naexasiti Jesús pejwuajan. ¡Nakaewa chiekal nanejxasinkafulde!

²³ Jesús pejwuajan pomatkoichaliajwa. Japox toepaxil. Naexasitam xot Jesús pejwuajan, xamal amwutjel, me-ama jelnalaelam wut, ja-am Diosliajwa, duilaliajwam pomatkoicha Diosxotse. Xamal pejme nalaela-emil nej-ax pijaxtat. Me-ama majt nalaelam nej-enxot, jachi-emil. Samata, xamal nejnejchaxoelaxan, pajelnejchaxoelaxan, me-ama nej-axjiw pejnechaxoelaxan, jachi-el.

²⁴ Dios pejjamechan, chajia lelspos, pajut jum-aech toepaxilpoxliajwa: "Puexa jiw, ampathatpijiw, piach laelpaliajwa-el. Me-ama naetalan piachliajwa-el. Selil wut, nachola satadik. Ja-aechlap-is jiw. Ja-aechbej jiw pejew, xabich pachaempoxan. Japoxanbej pomatkoichaliajwa-el.

²⁵ Pe Dios pejjamechan toepaxil" —aechox.

Asew jiw japajamechan naewuajan Dios xamal bu'weliajwa.

2

¹ Samata, ¡kofim puexa nejmachbabijaxan, majt isampoxan! ¡Kaes nabej naekichachabej'bej! Babejchowam wut, me-ama pachaemam wut, ¡nabej kabuan-aech'e'bej! ¡Nabej nusasiowle'bej asew jiw! ¡Nabej buxwuajanmaenke'bej asew jiwliajwa!

² Yamxi, jelnalaelapi, mitan af mamnikaliajwa. ¡Xamalbej Dios pejjamechan xabich nejxasinkde nejnejchaxoelaxan kaes mamnikaliajwa Diosliajwa! Dios pejjamechan, me-ama naxaeyaxan wut, ja-aech xamalliajwa. Chiekal matabijam wut Dios pejjamechan, Dios kaes xanaboejaxaelam xamal bu'weliajwa.

³ ¡Jachiyaxaelam xamal, chiekal matabijam xot Dios xabich pachaempon!

Amxot jum-aechpox Diosliajwa Jesucristo, me-ama matxoelapijt, ia't

⁴ ¡Xamal nejxasinkde kaes chiekal matabijaliajwam wajpaklon Jesucristo pejwuajan! Dios to'a japon tupaliajwa puexa jiwliajwa. Samata, Jesucristo, me-ama ia't, matxoela-echpot, xabich ommaenkpot, isliajwa Dios pejba, ja-aechon. Japon, me-ama ia't, mastaenspot, ja-aechbejpon asew jiwliajwa.

⁵ Jesús pejwuajan naexasitam xot, Diosliajwa, xamalbej, me-ama ia' wut, ja-am Dios pejba isliajwa. Xamalbej, sacerdotes, najut Dios kawuajnafulam xot, isfulam xotbej Dios pijax bichaxan. Xamal ja-amsfulam wut, Jesús pejiwam xot, Dios nejchachaemlafal xamalliajwa.

⁶ Dios pejjamechan, chajia lelspos, jum-aech wut, jum-aechox Dios jum-aechpox Jesucristoliajwa:

"Xan makafitxpon dukaxael Jerusalén paklowaxxot. Japon xabich kaes pachaem xot, me-ama ia't, kaes pejme pachaempot itfech-ia'xot, ja-aechon. Samata, jiw, naexasiti

japon pejuwajan, asamatkoi japi jumchiyaxil: 'Japon xanaboejas xot, napeltas Diosliajwa! —chiyaxil jiw' —aech Dios jum-aechpox Jesucristoliajwa.

⁷ Xamal nejchaxoelam wut Jesúsliajwa, jum-am: "Jesús, me-ama ia't, xabich kaes om-aenkpot, ja-aechon" —am, nejchaxoelam wut. Asewlax, Jesús pejuwajan naexasis-eli nejchaxoel: "Jesús, me-ama ia't, pachaema-elpot, ja-aechon" —aechpi, nejchaxoel wut. Jasox japi nejchaxoel Jesúsliajwa, pat xot Dios jumdutpox. Dios pejjamechan, chajia lelspx, jum-aech wut, jum-aechbejpox Jesúsliajwa:

"Ia'bachan ispi nejchaxoel: 'Ampot, ia't, pachaema-el' —aechi, nejchaxoel wut. Pe asew nejchaxoel wut japotliajwa, jumchiyaxael: 'Ampot, ia't, kaes pejme pachaem' —chiyaxaeli" —aechox Dios pejjamechan Jesúsliajwa.

⁸ Dios pejjamechan, chajia lelspx, jum-aech wut, jum-aechbejpox Jesúsliajwa:

"Japon, me-ama ia't, jiw tuakbebalialajwa fiapaliajwa" —aechox Dios pejjamechan, chajia lelspx.

Jasox jum-aech Dios pejjamechan, asew jiw naexasisaxil xot Jesús pejuwajan.

⁹ Dios xamal makanot sacerdoteliajwam, japon tanbichliajwambej. Xamal amwutjel kofam babijaxan isfulampoxan, Dios pejjiwam xot. Samata, jiw naewuajnam puexa Dios ispoxanliajwa, xabich pachaempoxan. Majt xamal matabija-emil wutfuk Jesús pejuwajan, nejnejchaxoelaxan, me-ama itkua'nik, babijaxan isfulam xot. Ja-am wut, Dios xamal tadat naexasisliajwam Jesús pejuwajan. Amwutjellax chiekal duilafulam. Samata, nejnejchaxoelaxan pachaem xot, me-ama itliak wut, ja-aech, naexasisfulam xot Jesús pejuwajan.

¹⁰ Xamal majt Dios pejjiwa-emil. Amwutjellax Dios pejjiwam. Dios majt xamal beltae-el. Amwutjel Dios xamal chiekal beltaen.

Jesús pejuwajan naexasiti, japi jiw duil Dios tanbichliajwa

¹¹ Takoew, xamal jum-an kaenanula chiekal nejchaxoelaliajwam: "Xan ampathatat laejaxaelen kaematkoiyaniajwa. Pelax xan asamatkoi dukaxaelen pomatkoicha Diosxotse" —chiliajwam, xamal nejchaxoelam wut. Samata, jnabej is babijaxan, xamal najut nejchaxoelampoxan! jNejchaxoelde isliajwam pachaempoxan!

¹² Xamal duilam wut Dios naexasis-elpixot, nanuamtam wutbej, japi suapich, jchiekal duilde! Japi jum-aech wut xamalliajwa: "Japi jiw, babejchow" —aech wuti xamalliajwa, asamatkoi japi jiw pajut chiekal matabijaxael, xamal isampoxan xabich pachaem. Samata, jawut japi jiw jumchiyaxael Diosliajwa: "Dios, jxam xabich pachaemam!" —chiyaxaeli, Dios kastika wut jiw, babijaxan ispi.

¹³ Xamal Dios pejjiwam xot, jpuexa paklochow, ampathatpijiw tato'alpi, naexasisfulde! jNaexasisfuldebej rey, puexa jiw tato'alpon, japon kaes pejme paklon xot!

¹⁴ jNaexasisfuldebej gobernadores! Japi to'as kastikaliajwa jiw, babijaxan ispi. To'asbejpi jumchiliajwa jiw, ispi pachaempoxan: "Xamal isampoxan xabich pachaem" —chiliajwapi jiwliajwa.

¹⁵ Dios nejxasink xamal isliajwam pachaempoxan. Ja-am wut, jiw nejliakla wejlaxaes xamal tasalaliajwa.

¹⁶ Amwutjel xatis nakwewe'pa-el naexasisliajwas Moisés chajia lelspx. Pe nejchaxoelaxisal isliajwas babijaxan. Samata, jchiekal duilafulde! Me-ama asew jiw, Dios pejjiwpi, chiekal duilafal, jxamalbej ja-amsfulde!

¹⁷ jPuexa jiw chiekal sitaembej! jNejxasinkdebej asew jiw, naexasiti Jesús pejuwajan! jChiekal sitaembej Dios! jSitaembej rey, japon puexa jiw tato'all

Machiyaxaelpox, Jesús pejuwajan naexasiti, nabijat wut

¹⁸ Xamal esclavos, jchiekal sitaem naexasisliajwam nejpaklochow! jNejpaklochow tato'alpoxan puexa isde chiekal! jJa-amsfulde pomatkoicha, nejpaklochow pachaempi wut, o, pachaema-elpi wutbej!

¹⁹ Xamal is-emil wut babijax, pe nakiowa, nejpaklochow xamal kastika wut, jboejtaliasfulde! Japox asamatkoi pachaemaxael xamalliajwa, Dios wuajnalelam wut.

²⁰ Pelax xamal babijaxan isam wut, nejpaklochow kastika wut, xamal boejtaliatampox, japox Diosliajwa pachaemaxil. Pelax xamal isfulam wut pachaempoxan, pe nabijatam wut boejtaliatampox, asamatkoi xamalliajwa xabich pachaemaxael, Dios wuajnalelam wut.

²¹ Dios xamal makanot nabijasliajwam, Cristo majt nabijat xot xamalliajwa. Cristo, babijax is-elon, nabijat. Samata, xamalbej nabijasaxaelam.

²² Cristo babijax is-el. Chinax kaen aton naekichachajba-elbejpon.

²³ Asew jiw babejjamechan jumtis wut, Cristo jumnos-el babejjametam. Nabijat wutbejpon, japi jiw babijaxan is wut japonliajwa, thiya-elon. Cristolax tapaei japi Dios kastikaliajwas. Dios kastika wut jiw, babijaxan ispi, xabich babijaxan is-elpi, bijiat kastikaxaelon. Pelax jiw, xabich babijaxan ispi, japi xabich kastikaxaelon.

²⁴ Cristo cruztat tɔp xatis kofaliajwas babijaxan isaspoxan, me-ama Dios nejxasink. Tɔpɔn xatis nakbu'welijaɟwa, pachaemaliajwas Diosliajwa.

²⁵ Majt xamal napeltam Diosliajwa. Me-ama oveja napeltpi, ja-am xamal. Amwɔtjel xamal Cristo pijaxtat Dios pejjiwam. Me-ama oveja tataefulpon chiekal tataeɟlafal pejew oveja, ja-aech Cristo, amwɔtjel xamal tataeɟlafal wɔton.

3

Machiyaxaelpox nakjyapi chiekal duilaliajwa

¹⁻² Xamal watho'am, nejmɔlpim, naewuajnaɟ chiekal naexasisliajwam nejmol. Nejmol, Jesuɟ pejwuajan naexasis-elpon wɔt, pe xam laejasiam wɔt, iɟchiekal kaelel laejim japonxot, me-ama Jesuɟ xamal tato'al! iSitaembej Dios! Xamal, watho'am, ja-am wɔt, nejmɔljijwbej pajut naexasisaxael Jesuɟ pejwuajan, xamal naewuajna-emil wɔt.

³ Xamal watho'am, nejmɔlpim, nejchaxoelam wɔt, inabej nejchaxoele': "Xan kaes chamiowaliajwan chiekal matlapapu'waxaelen. Tajyiaɟtatbej duiyaxaelen xabich oro. Jachi-enil wɔt, xan naxoeyaxaelen yiafan, xabich ommaenkpi" —nabej aeche' xamal watho'am, nejchaxoelam wɔt!

⁴ Xamal watho'am, xabich chamiachwasiam wɔt, inejchaxoelde pachaempoxan! iNaksiyambej chimiajamechan asew jiwliajwa! Ja-am wɔt, diachwuajnakolax xabich chamiachwaxaelam nejnejchaxoelaxantat. Pe japox jiw taeyaxil. Japoxbej toepaxil. Japoxlap kaes Dios nejxasink xamal watho'amliajwa.

⁵ Chajiakolaxtat asew watho', Dios sitaenpi, pejnechaxoelaxantat xabich chamiachowpi. Japi watho' isfal Dios nejxasinkpoxan. Dios xanaboɟaɟfulbejpi. Chiekal naexasitbejpi, pamal to'as wɔt.

⁶ Ja-aechbej Sara, naexasisɟul wɔtow Abraham. Pamalliajwa jum-aech wɔt, jum-aechow: "Tajpaklon" —aechow. Samata, xamal watho'am, me-ama Sara paxi wɔt, jachiyaxaelam, isɟulam wɔt pachaempoxan, nejlewɟaxil wɔtbej nejmachliajwa.

⁷ Xamal poejwam, nejwatho'pim, kaenanuɟa xamal naewuajnaɟ. iNijow chiekal bu'laejim! iNijow chiekal sitaembej, Dios japox to'a xot! Watho' pejppamamax najuɟpa-el, poejiw pejppamamax suapich. Watho'bej pomatkoicha duilaxael Diosxotse. Samata, iɟxamal kaenanuɟa poejwam chiekal sitaem nejwatho'! iJa-amɟulde, xamal Dios kawuajnam wɔt Dios chiekal jumtaeliajwa!

Jesuɟ pejwuajan naexasiti nabijasaxaelpox, asew jiw babijaxan is wɔt japiajwa

⁸ Xamal naexasitam Jesuɟ pejwuajan. Samata, iɟxamal kaenejchaxoelaxde! Asew jiw xamalxot nejchaemil wɔt, iɟkajachawae'e japi nejchachaemlaliajwa! Asew jiw xamalxot nejchachaemil wɔtbej, ja-aech wɔt, iɟxamalbej nejchachaemilde, japi jiw suapich! iNejxasinkdebej asew jiw! Me-ama nakoewkola nejxasinkam wɔt, ija-amde asew jiwliajwa! iNakaewa nabeltaembej! Nejchaxoelam wɔt, inabej nejchaxoele': "Xan kaes pachaeman. Me-ama asew jiw, jachi-enil" —nabej aeche', nejchaxoelam wɔt asew jiwliajwa!

⁹ Asew babijaxan is wɔt xamalliajwa, iɟxamallax nabej is babijaxan japi jiwliajwa! Asew jiw babejjamechan jum-aech wɔtbej xamalliajwa, iɟxamallax nabej jum-aech' babejjamechan japi jiwliajwa! iAsbuɟan jumɟch Dios chiekal kawuajande japi jiw Dios kajachawaesliajwas! Jasox Dios to'a xamal isliajwam, Dios kajachawaesliajwabej xamal.

¹⁰ Japoxliajwa Dios pejjamechan, chajia lelsɟox, jum-aech wɔt, jum-aechox: "Xamal chiekal duilasiam wɔt, inabej jum-aech' babejjamechan asew jiwliajwa! iNabej kichachajbe'bej!

¹¹ iKofimbej babijaxan isampoxan! iɟsɟuldelax pachaempoxan! Nejchaxoelam wɔt, inejchaxoelde chiekal, machiyaxaelam xamal pachaemaliajwam, asew jiw suapich!

¹² iJa-amɟulde, japi Dios tataeɟulas xot, isɟulpi pachaempoxan! Japi Dios kawuajan wɔt, Dios chiekal naewech. Pelax Dios kastikaxael jiw, babijaxan ispi" —aech Dios pejjamechan, chajia lelsɟox.

¹³ Isɟulam wɔt pachaempoxan, ja-am wɔt, asew jiw isaxil babijaxan xamalliajwa.

¹⁴ Pe nakiowa, xamal nabijatam wɔt, asew jiw is xot babijax xamalliajwa, iɟchiekal nejchachaemilde! iXamal nabej nejlewl'e'bej japi jiwliajwa!

¹⁵ iPelax Cristo sitaem, wajpaklon xot! Nejchaxoelam wɔt, imajt chiekal nejchaxoelde jumnosliajwam, asew jiw xamal wuajnaɟchaemt wɔt Dios xanaboɟeamɟoxanliajwa!

¹⁶ Asew jiw xamal wuajnaɟchaemt wɔt, iɟchiekal jumno'e! iJapi jiw sitaembej! iChiekal duilafaldebej, Cristo pejwuajan naexasitam xot! Samata, inajut chiekal matabijaxaelam xamal bu'wuajanjimilpox Diosliajwa! Ja-am wɔt, babejjamechan jum-aechpi xamalliajwa pajut nadasaxaeli, jum-aech xoti japoxan.

¹⁷ Dios nejxasink wut xamal nabijasliawam, nawoesa kaes pejme pachaem xamal nabijasliawam, isam wut pachaempoxan. Pe nabijatam pachaemaxil, babijaxan isam wut.

¹⁸ Cristo nabijat, Dios nejxasink xot japon nabijasliawja. Tupbejpon xatishliawja. Japon tup wut, japox kaewecesliawja, pomatkoichaliajwabejpo. Samata, pejme tuxaxilon. Japon kaen xabich pachaem. Pe nakiowa, nabijat xatis babijaxan isaspoanliawja Dios nakbu'weliawja. Japon diachwajnakolax chiekal tup. Pe japon pej-espíritu tupa-el.

¹⁹ Jesús pej-espíritu fulaek jiw tupi pej-aelan jias poxadik, naewuajnaljawapon japi pej-aelan.

²⁰ Japi jiw, tupi, chajia duil ampathatat, Noé laeje wut. Japi jiw naexasis-el, Noé naewuajan wut Dios pejjamechan. Noé barkam isful wut, Dios piach wuajnwawet japi jiw naexasisliawja Noé naewuajanpo. Pothata bu'al wut, jawut ocho jiw asbuan jumch wia barkamat.

²¹ Jatisbej, xatis kaenanula nakbautisa wut mintat. Xatis mintat juls wut, jiw japox taen wut, matabija Dios nakbu'wiapox, Cristo tup xot cruztat xatishliawja. Nakbautisa-el asbuan jumch asjilialjwas. Nakbautisalax puexa asew jiw matabijalialjwa, xatis Dios kawuajnaspi nakbeltaelajwa babijaxan isaspoanliawja. Samata, wajpaklon Jesucristo tup wut, mat-echpon pejme dukalialjwa. Samata, xatis Dios nakbu'wia.

²² Jesucristo mat-ech wut, pejme duk wuton, fuloeipon athu poxase ekalialjwa pax Dios poklalel, Dios suapich, puexa jiw tato'lalialjwa. Amwutjel, japon tato'al Dios pej-angeles. Tato'albejpon puexa paklochow, Diosxotsepi.

4

Jesús pejuwajan naexasiti chiekal duilaxaelpo

¹ Cristo ampathatat wut, asew jiw babijaxan is wut japonliawja, xabich nabijat. Xamalbej nejchaxoelam wut, nejchaxoelde nabijasaxaelampox! Nabijatam wut, inabej nejchaxoele' babijaxan isliawjam!

² Ampathatat laelpam wut, inabej is babijaxan nejchaxoelampoxan isliawjam! isfulde pachaempoxan Dios nejchachaemlialjwa!

³ Majt Jesús pejuwajan naexasis-emil wutfuk, babijaxan isfulam, asew suapich. Me-ama Jesús pejuwajan naexasis-eli babijaxan is, ja-ambej xamal. Majt xabich nejchaxoelam asew watho' bu' moejsaxan. Fiestamatkoi wut, xamal saxtbej. Nejbachantat saxa afam wut, pasaxt. Ídolos kawuajnambej. Pe amwutjel, japoxan kofam.

⁴ Majt nejnachalapi, japi amwutjel matabija-el, ma-aech xot xamal kofam isampoxan, japi suapich. Samata, japi babejjamechan jum-aechful xamallialjwa.

⁵ Asamatkoi, Dios pejuwajnalel wut, kaenanula japi pajut jumchiyaxael, ma-aech xot babejjamechan jum-aechi xamallialjwa. Japamatkoi wut, Dios kastikaxael jiw laelpifuk, jiw tupibej.

⁶ Samata, Jesucristo pajut naewuajan pejuwajan, chimiawuajan, tupi pej-aelan pejuajnuotdik, japi napelsasamata Diosliawja. Japatuajnuipijw chajia tupi, me-ama Dios waelt patupax jiw tupalalialjwa.

⁷ Mox pawuajnalis ampathat toepalialjwa. Samata, ichiekal duilafulde babijax isamatam! Dios kawuajnam wut, ichiekal kawuajande!

⁸ Kaes pejme pachaempox, nakaewa nanejxasinkampox. Nakaewa nanejxasinkam wut, ja-am wut, xamalxot jiw babijaxan is wut xamallialjwa, japi beltaem!

⁹ Xamal nakaewa chiekal nabu'kulim nejbachantat!

¹⁰ Xamal kaenanula Dios kajachawaet isliawjam asabichaxan, asew naexasiti Jesús pejuwajan kajachawaesliawjam. Samata, xamal kaenanula kajachawaesfulde asew jiw, Jesús pejuwajan naexasiti!

¹¹ Dios naexasitpon, japon nej naewuajne' asew jiw, me-ama Dios buxto'aspon jiw naewuajnalialjwa! Asanbej kajachawaet wut asew jiw, japon nej kajachawaes, Dios kajachawaech xoton! Xamal Cristo pejiwam xot, puexa chiekal isde asew jiw sitaelialjwa Dios! Dios, puexa jiw tato'al. Japon xabich mamnik pomatkoichaliajwa. jasox nej ja-aech' Diosliawja!

Jesús pejuwajan naexasiti nejchachaemlaxaelpo, nabijat wut

¹² Takoew, inabej belwe', nabijatam wut, asew jiw babijaxan is wut xamallialjwa! Majt xamal nabijasaxaelam Dios matabijsliawja, diachwajnakolax xamal japon chiekal xan-aboejam wut.

¹³ Xamal nabijatam wut, me-ama Cristo nabijat, ja-am wut, xamal nejchachaemilde! Asamatkoi, Cristo fuloek wut puexa jiw tato'lalialjwa, japox xamal taenam wut, xabich nejchachaemilde!

¹⁴ Asew jiw babejjamechan jum-aech wut xamalliajwa, Jesus pejwajaan naexasitam xot, jawut Dios pej-Espiritu Santo, xabich pachaempon, xamal chalaxael. Samata, jne-jchachaemilde!

¹⁵ Asew jiw nabijat, ba xoti asew jiw, natkowa xotbejpi asew jiw pejew, matxandadat xotbejpi asew jiw pijaxan. iXamal jasox nabej is, jasoxtat nabijasasamatam!

¹⁶ Xamal nabijatam wut, naexasitam xot Jesus pejwajaan, iXamal nabej nadale! Ja-am wut, iGracias-amde Diosliajwa, xamal makanot xoton naexasisliajwam Jesus pejwajaan!

¹⁷ Mox pawwajnalis Dios jumchiliajwa jiw kaenanula ispoخانliajwa. Xatis, Dios pejijs, matxoela nakjumchiyaxaelon kaenanula isaspoخانliajwa. Do jawux, jiw naexasis-elpi Dios pejjamechan, japi jiw kaenanula jumchiyaxaes ispoخانliajwa. Do jawut, kastikaxaes-bejpi.

¹⁸ Jiw pachaempi Dios bu'weliajwas tampoel wut, imachiyaxaelkatlax babejchow bu'weliajwas, japi naexasis-elpi Dios? Diachwujnakolax japi jiwlap napelsaxael Diosliajwa.

¹⁹ Dios nejxasink wut, xamal nabijasaxaelam. Ja-am wut, isde pachaempoxan! iDios xanaboejimbej xamal kajachawaesliajwa! Dios xamal is duilaliajwam ampathatat. Japon jumdut wut, diach ji-isbejpon.

5

Naewwajnanaxan paklochowliajwa, Jesus pejwajaan naexasiti

¹ Ma amwut naewwajnaaxaelen nejpaklochow, japi nej-ancianos. Japi ancianos tataeflaful kaenanula xamal, Jesus pejwajaan naexasitampim. Xanbej ancianowan. Me-ama japi, janbej xan. Xan taenx, Cristo nabijat wut, tup wuton cruztat. Asamatkoi, Cristo pejme pask wut tato'laliajwa, jawut xanbej naktato'laxaelen, ancianos suapich.

² Xamal ancianos, ichiekal tataefulde naexasiti Jesus pejwajaan! Japi jiw, me-ama oveja, ja-aech. Dios xamal to'a japi jiw chiekal tataeflaliajwam. Samata, ichiekal tataefulde! Me-ama Dios nejxasink tataeflaliajwam, jia-amsfulde! Nejchaxoelam wut, inabej nejchaxoel: "Xan nejwesla japi jiw tataeflaliajwan. Pe nakiowa, tataeflax, Dios nato'a xot" —nabej aeche', nejchaxoelam wut! iNabej nejchaxoel'bej: "Namat wut, chiekal tataeflaxaelen" —nabej aeche', nejchaxoelam wut!

³ Xamal Dios to'a japi jiw chiekal tataeflaliajwam. Tato'lam wut, ichiekal tato'alde! Me-ama asew paklochow, jiw tato'al wut, tato'ali, me-ama pej-esclavos wut, ja-aechi pejiwliajwa. iXamallax nabej ja-aeche' jasox! iJesus pejwajaan naexasiti, japi jiw chiekal tato'alde, japi jiw xamal nakxataeliajwa!

⁴ Cristo wajpaklokolan, japon naktato'al puexa japon pejwajaan naexasichpis. Samata, pask wuton, japon xamal kaenanula chaxduiyaxael corona, xabich pachaempox. Japox pomatkoichaliajwa. Toepaxilpox.

⁵ Ma amwut naewwajnaaxaelenbej, xamal pansiachwam. Ancianos xamal tato'al wut, ichiekal naexasi'e! Kaenanula nakaewa nakajchawaetam wut, nejchaxoelam wutbej, nejchaxoelde: "Xan kaes pejme pachaema-enil. Me-ama asew jiw, pachaempi, xan jachi-enil" —amde, nejchaxoelam wut! Dios pejjamechan, chajia lelsprox, jum-aech:

"Dios nejwesla jiw jum-aechpi: 'Xan kaes pejme pachaeman. Me-ama asew jiw, pachaema-elpi, jachi-enil' —aechpi. Pelax Dios kajachawaet jiw jum-aechpi: 'Xan kaes pejme pachaema-enil. Me-ama asew jiw, pachaempi, xan jachi-enil' —aechpi" —aechox Dios pejjamechan, chajia lelsprox.

⁶ Samata, xamal, Dios mamnikpon matabijam xot, nejchaxoelam wut, nejchaxoelde: "Xan kaes pejme pachaema-enil. Me-ama asew jiw, pachaempi, jachi-enil" —amde, nejchaxoelam wut! Asamatkoi, japon xamal kajachawaet wut, jiw xamal sitaeyaxael.

⁷ iDios kawwajande xamal wewe'poxan kajachawaesliajwa, Dios xamal tataeflaful xot! Samata, xabich nejchaxoelam wut, nejchaxoelde japoxanliajwa!

⁸ Xamal, naexasitampim Jesus pejwajaan, ichiekal taem! Nuth chachoel, jumbu'a wut. Nuth choefan jalwek xaeliajwa. Nadaelman Satanás, ja-aechbej, nanuamt wut tabejsliajwapon xamal, Dios xanaboejampim.

⁹ Satanás xamal naekichachajbasia wut, xamal naekichachajbasamata, iDios chiekal xanaboejim! Xamal matabijam, potuwajucha wajkoew, naexasiti Jesus pejwajaan, xabich nabijat. Me-ama xamal nabijatam wut, ja-aech japi.

¹⁰ Xamal kaematkoijan nabijatam wut, Dios kajachawaesaxael chiekal pachaemaliajwam, Dios kaes xanaboejalijwambej. Dios nejxasink xot, nakmakanot pomatkoicha duilaliajwas Diosxot, xate Jesucristo pejijs wut.

¹¹ Dios puexa jiw tato'laxael pomatkoicha. iJasox nej ja-aeche' Diosliajwa!

Pedro toesliajwa wut ampacarta, saludo xato'apox Jesus pejwajaan naexasitiliajwa

¹² Silvano, me-ama takoewan, japon naexasit xot Jesús pejwajaan. Silvano naka-jachawaet ampox carta, cha-aelaxach, lelaliajwan, xamal poxade xato'aliajwan. Ampox xamal chiekal naewajaanx Jesús pejwajaan chiekal naexasisliajwam. Dios xatis chiekal nakkajachawaesful xot, matabijas, diachwajaankolax Dios naknejasink. Samata, inabej kofe' Dios xanaboejampox!

¹³ Jesús pejwajaan naexasiti, Babilonia paklowaxpijiw, xato'a saludos xamalliajwa. Japi Dios makanoch pejiwaliajwa, me-ama xamal, jachiliajwa. Marcosbej, xato'a saludos xamalliajwa. Japon Marcos, me-ama taxlan wut, ja-aechon.

¹⁴ ¡Xamal nakaewa chiekal nasaludam, nakaewa chiekal nanejasinkam xot, Jesús pejwajaan naexasitam xot!

Puexa xamal nejasinkax chiekal duilaliajwam, asew jiw saapich.

Wachakalcarta, Pedro lelpox, Jesús pejuwajan naexasitiliajwa

Pedro lelpox carta Jesús pejuwajan naexasitiliajwa

¹ Xan Simón Pedro, Jesucristo pej-apóstolan, lelx ampox carta. Xan nabistax Jesucristoliajwa, nato'a xot xamal naewuajnalijwan japon pejuwajan. Lelx ampox carta xato'aliajwan xamal poxade, xamalbej naexasitam xot Jesús pejuwajan, me-ama xan. Jesús tɔp xatis nakbu'weliajwa. Samata, Jesús pejpatɔpax xabich pa-om Diosliajwa, xatisliajwabej. Jesucristo xatis nakbu'wia. Japon pajut Dioslape. Xabich pachaembejpon.

² Dios kawuajna xamal xabich kajachawaesliajwapon. Kawuajna xbej kaes Dios xan-aboejalijwam. Xamal jachiyaxaelam, Dios chiekal matabijam wɔt, wajpaklon Jesucristobej.

Machiyaxaelpox Jesús pejuwajan naexasiti

³ Dios puexa nakchaxduw nakwewe'poxan xatis Jesucristo pejuwajan chiekal naexasisliajwas, chiekal duilaliajwasbej, me-ama Dios nejasink. Jasoxtat Dios puexa nakchaxduw, Cristo chiekal matabijas xot. Dios nakmakanot, me-ama japon xabich pachaem, jachiliajwas, xatis nakkajachawaesxat.

⁴ Samata, xatis Jesucristo pejuwajan naexasichpis, Dios chiekal nakkajachawaet, me-ama jumɔt, isasamatas pachaema-elpoxan, me-ama asew jiw, ampathatpijw, isful pachaema-elpoxan, jachisamatas xatis. Samata, xatisbej isfulaxaes pachaempoxan, me-ama Dios isful.

⁵ Samata, Jesucristo pejuwajan naexasitam xot, xamal puexa nejpamamaxtat isfulde pachaempoxan! Ja-am wɔt, kaes chiekal matabijaxaelam Dios nejasinkpox isfulaliajwam.

⁶ Ja-am wɔt, kaes chiekal matabijaxaelam boejtaliasliajwam babijaxan isasamatam. Satanás piach xamal xapaewa wɔt, matabijaxaelam kaes chiekal xanaboejalijwam Dios. Ja-am wɔt, matabijaxaelam chiekal duilaliajwam, me-ama Dios nejasink.

⁷ Ja-am wɔt, xamal kaes chiekal matabijaxaelam kajachawaesliajwam asew jiw, naexasiti Jesús pejuwajan. Ja-am wɔt, kaes chiekal matabijaxaelam nakaewa nanejasinkaliajwam, me-ama nakoew nejasinkam wɔt, jachiliajwam. Ja-am wɔtbej, kaes chiekal matabijaxaelam nejasinkaliajwam asew jiwbej, me-ama Dios xamal nejasink.

⁸ Puexa japoxan matabijam wɔt, kaes pejme pachaemaxael. Kaes matabijaxaelambej wajpaklon Jesucristo. Samata, chiekal nabichaxaelambej Jesucristoliajwa.

⁹ Japoxan chiekal matabija-emil wɔt, matabijaximil chiekal duilaliajwam, me-ama Dios nejasink. Ja-am wɔt, xamal, me-ama itliakla, o, atɔaj taeyaxilpi fulaeliajwa, jachiyaxaelam xamal Diosliajwa. Jachiyaxaelam, xamal nejkio waxaelam xot Dios, japon beltaenpon babijaxan isampoxanliajwa.

¹⁰ Samata, takoew, jchiekal duilfulde asew jiw taeliajwa xamal Dios pejjiwampim! Ja-am wɔt, jnabej kofe' Dios naexasitampox!

¹¹ Ja-am wɔt, wajpaklon Jesucristo, xatis nakbu'wiapon, japon pijaxtat Dios tapaeyaxael pasliajwam Diosxotse, pomatkoicha wajpaklon Jesucristo tato'alxotse.

¹² Xamal japoxan chiekal matabijam. Pe kaes xamal naewuajna xaelen chiekal nejchaxoelaliajwam. Chiekal naexasitam Jesús pejuwajan, asew jiw chajia xamal naewuajanpox.

¹³ Xan ampathatat laejax wɔtɔk, xamal naewuajnafulaxaelen chiekal nejchaxoelaliajwam japawuajan.

¹⁴ Wajpaklon Jesucristo pijaxtat xan matabijtax xan nawemo xpo x tɔpaliajwan.

¹⁵ Pe ampatkoiyan chiekal naewuajnafulaxaelen Jesús pejuwajan, asamatkoi, xan tajwalela, xamal nejchaxoelaliajwam xan naewuajnapoxan.

Apóstoles taenpox Jesucristo pejpamamax

¹⁶ Majt xamal Jesús pejuwajan naewuajna x wɔt, xanal jum-an: “Wajpaklon Jesucristo xajɔp puexa isliajwa. Japon pejme pasaxoek athɔlelsik” —an xanal. Japawuajan asew jiw pajut faeka-el. Xanal tajut chiekal taenx wajpaklon Jesucristo pejpamamax. Samata, xanal chiekal matabijax, diachwajnakolax japon pejme kaxaxoek.

¹⁷ Xanal wajpaklon Jesucristo taenx wɔt mɔaxmatwuajtat, jawɔt pax Dios xanal najum-aech Jesucristo diachwajnakolax xabich pachaempon. Jawɔt athɔlelsik Dios, xabich mamnikpon, jum-aechon paxulanliajwa: “Ampon taxulan, xabich nejasinkaxpon. Xabich nejchachaemlax japonliajwa” —aech Dios xanalliajwa.

¹⁸ Xanal, Jesús suapichan wut, muaxmatwujattan wut, tajut japox chiekal jumtaenx, Dios athulelsik jum-aechsik wut.

¹⁹ Samata, xanal Jesucristo taenx wut japamuaxmatwujattat, kaes chiekal naexasitx profetas chajia jum-aechpoxan, japoxan chiekal ja-aech xotliso. Samata, ichiekal naexasifulde profetas jum-aechpoxan babijaxan isasamatam! Profetas chajia jum-aechpoxan diachwujnakolax. Xamal matabijam wut profetas jum-aechpoxan, matabijaxaelambej isliajwam Dios nejxasinkpoxan, babijaxan isasamatam. Samata, profetas jum-aechpoxan, me-ama lámpara wut, ja-aechox. Me-ama aton wewe'pas lámpara itkua'nik wut, matabijsli-ajwa fulaeyaxael poxade, ja-aech profetas naewuajnapoxan. Asamatkoi Cristo pejme pask wut, japon pajut chiekal xamal kajachawaesaxael puexa chiekal matabijaliajwam.

²⁰ Xamal chiekal matabijam, profetas chajia lel wut Dios pejjamechan, kaen japixot lela-el pajut pejnejchaxoelaxtat. Japoxan pajut faeka-elbejpi.

²¹ Profetas jum-aech wut asamatkoi jachiyaxaelpoxanliajwa, jumchi-el pajut nejchaxoelpoxan. Japilax jum-aech Dios pijaxtat, me-ama Espiritu Santo buxto'as.

2

Asamatkoi asew naewuajnaexaelpox naekichachajbaliajwas Jesús pejuwajan naexasiti

¹ Chajiakolaxtat nakaejudios naekichachajba. Japi profetakola-elpi. Asamatkoi japox jachiyaxaelbej xamalxot. Asew jiw pasaxael xamalxot. Japi xamal naewuajnaexael asawuajan naekichachajbaliajwa. Pe japawuajan diachwujnakolaxil. Japi pajut kofaxael Jesús pejuwajan naexasitpox, japon motron japi jiw babijaxan ispoxanliajwa. Xabich isaxaelbejpi babijaxan. Samata, Dios kamta toesaxaesi, japi jiw kastikas wut.

² Xamalxot pasaxaelpi asawuajan naewuajnalialjwa, japi jiw naewuajnaexael japawuajan. Naewuajan wut, xabich jiw xamalxot isaxael babijaxan. Samata, Jesús pejuwajan naexasiseli babejjamechan jumchiyaxael xatis Jesús pejuwajan naexasichpoxliajwa.

³ Japi jiw, asawuajan naewuajnaexaelpi xamalxot, naewuajnaexael xamal naekichachajbalialjwa, plata japi mosliajwam. Dios nejchaxoel japi jiw kastikalialjwa. Samata, diachwujnakolax asamatkoi japi jiw Dios kastikaxaes.

⁴ Chajiakolaxtat Dios beltae-el asew ángeles, babijaxan is wut. Japi peldikon infierno poxadik. Japi ángeles muaxwasixawaeks cadenamwatan. Jaxotdik itkua'nik. Asamatkoi, kastikamatkoi pat wut, Dios kastikaxael japi ángeles.

⁵ Chajiakolaxtat Noé xabich jiw fiat japi jiw babijaxan is-elialjwa, chiekal duilialjwapi. Dios beltae-el, japi jiw kastika wuton. Samata, Dios xabich pina-iam to'a thilnalialjwa, that bu'lialjwa, jiwbej. Jawut Dios bu'wia kaen Noé, japon pijowbej, japon paxibej, japi pejwatho'bej.

⁶ Chajiakolaxtat Dios toejaf jitat Sodoma paklowaxpijw, Gomorra paklowaxpijwbej. Do jawut, thumbakal chiekal nama. Jasoxtat Dios jiw toejaf jitat, asew wachakalpijwbej matabijaliajwa babijaxan isasamata, japibej kastikasamatas.

⁷ Dios toejaf wut japakolepaklowax, jawut kaen Lot bu'wias, duk xoton, me-ama Dios nejxasink. Dios toejafa-el wutfak, japi jiw xabich babijaxan isfal wut, Lot xabich nejxaejwas japakolepaklowaxpijwliajwa.

⁸ Lot duk wut Sodoma paklowaxxot, japon is pachaempoxan. Pomatkoicha xabich nejxaejwas, taen wuton, waltaen wutbejpon, asew jiw babijaxan ispoxan.

⁹ Samata, matabijas, Dios xajup kajachawaesliajwa jiw, japi Dios xanaboejapi, bu'welialjwas, xapaejas wuti. Kastikamatkoi pat wut, Dios kastikaxael jiw, babijaxan ispi.

¹⁰ Poejiw, asew watho' bu'moejtpi, japi poejiw kaes pejme kastikaxaes Dios. Jiw, nejweslapi wajpaklon tato'laspoxan, japibej Dios kastikaxaes. Xamalxot pasaxaelpi, japi jiw xamal naekichachajbaxael. Japi jiw chinax kaen aton sitaeyaxil. Nejchaxoelaxaeli: "Xatis kaes pejme matabijas. Me-ama asew jiw, jachi-esal" —chiyaxaeli, nejchaxoel wut. Buxlewlixilbejpi babejjamechan jumchiliajwa ángelesliajwa.

¹¹ Ángeles kaes mamnik. Kaes xajupbejpi tato'lialjwa. Me-ama xamalxot pasaxaelpi, jachi-el ángeles. Pe nakiowa, ángeles talasaxil wajpaklon pejuwajnalel xamalxot pasaxaelpi asawuajan xamal naewuajnalialjwa.

¹² Xamalxot pasaxaelpi, japi jiw, me-ama pejmachoeff. Samata, nejchaxoel wut, nejchaxoelaxili pachaempoxan. Isasiapoxan isaxaeli. Me-ama pejmachoeff belialjwas wut, jachiyaxaesbejpi, asamatkoi, Dios chalechkal toesliajwas wut.

¹³ Asew jiw xabich nabijasaxael xamalxot pasaxaelpi pijaxtat. Samata, xamalxot pasaxaelpibej, asamatkoi japi xabich nabijasaxael. Japi jiw babijaxan is wut, asbuan jumch nejchachaemili. Xamal suapich, japi jiw kaenejchaxoelaxil. Pe nakiowa, japi naknatamejlaxael, xamal suapich. Fiesta isam wut, japibej nakxaejaxael. Fiesta wut, xabich babijaxan isaxaeli. Japi jasox is wut, jumchiyaxaeli xamal naekichachajbalialjwa:

“Xanal ampox isx wut, Diosliajwa chiekal pachaem” —chiyaxaeli. Japi babijaxan is wut, xamal xabich nadalaxael japi jiwliajwa.

¹⁴ Japi poejiw, asew watho' taen wut, nejchaxoel bu'moejsaxan. Japi jiw babijaxan isfal wut, damla-el. Naekichachajbabejpi asew jiw babijaxan isliajwa, japi jiw pejxanaboejxan chiekal mamnika-elpi Diosliajwa. Puexa taen wut, xabich nejxasinkbejpi pajutliajwakal. Samata, asamatkoi japi Dios kastikaxaes.

¹⁵ Japi jiw duil wut, chiekal napelt Diosliajwa, diachwuaajnakolax Dios naexaxis-el xoti. Me-ama chajiakolaxtat profeta Balaam, Beor paxulan, nejchaxoel babijax isliajwa xabich plata kanaliajwa, ja-aechbej japi jiw.

¹⁶ Balaam fulaech wut babijax isliajwa, chalechkal nuamtat pijan bur naksiyaspon Dios pijaxtat. Me-ama aton chapaeis wut, jajumtispon pijan bur, Balaam fulae-elaliajwa. Samata, Balaam, is-el isasiapox, nejliaklax.

¹⁷ Xamalxot pasaxaelpi naewuajnalijwa, japi naewuajanpox diachwuaajnakolaxil. Japi naewuajanpoxbej asaxliajwa pachaemaxil. Satlel min nakakolsanxot minjil wut, chaemil. Pachaema-elbej asaxliajwa. Itloejen iampibej, thilna-el wut, joewa xafos wutbej, japi itloejen pachaema-elbej asaxliajwa. Jachiyaxaelbej japi jiw naewuajnaelxelpoxan xamalliajwa. Chinax asaxliajwa pachaemaxil. Samata, japi jiw asamatkoi Dios xabich kastikaxaesi. Pomatkoicha duilaxaeli itkuaatxot.

¹⁸ Pasaxaelpi xamalxot, japi nakaewa najum-aech: “Xatis kaes pachaems. Me-ama asew jiw, jachi-esal” —na-aechi nakaewaliajwa. Jum-aechbejpi nejliaklaxan asew jiw naekichachajbaliajwa babijaxan isliajwa, japi suapich. Samata, japi jiw jum-aech, babijaxan is wut: “Ampox, xatis isasiapox, pachaem isliajwas” —aechi. Jasox jum-aechi jelnaexasitpiliajwa Dios, ma amwutjel kofapi babijaxan ispoxan.

¹⁹ Jum-aechbejpi: “Xamal it-ele-el Dios fiatpoxan. Samata, jisasiampoxan isde!” —aechi asew jiwliajwa. Pe japi jiw is-el Dios nejxasinkpoxan. Kofa-elbejpi babijaxan ispoxan. Samata, japi jiw, me-ama babijaxan tato'lafulas wut, jatisipox.

²⁰ Jiw matabijapi wajpaklon Jesús, japon nakbu'wiapon, japi jiw kofa wut babijaxan ispoxan, ampahatpijiw ispoxan, japi jiw pejme is wut babijaxan, pajut nejxasinkpoxan, ja-aech wut, japi jiw kaes xabich pejbu'wuaajan Diosliajwa. Me-ama majt pejbu'wuaajan wut, jachi-eli.

²¹ Japi jiw kofa wut Jesús pejwuaajan naexasitpox, diachwuaajnakolax japi jiw Diosliajwa xabich pejbu'wuaajan. Kaes pachaemaxael, japi matabijaxil wut Jesús pejwuaajan. Pelisi japi matabija xot Jesús pejwuaajan, pachaema-el japi jiw kofaliajwa Jesús pejwuaajan naexasitpox.

²² Jiw kofa wut Jesús pejwuaajan naexasitpox babijaxan pejme isfulaliajwa, japi jiw, me-ama asew jiw jumtisi: “Wur pajut chakapox pejme xael” —tisi. Japibej diachwuaajnakolax, me-ama asew jiw jumtisi: “Maran, jelmatwaenson, pejme sap naju'a” —tisi.

3

Jesucristo pejme pasaxaelpox ampahatasik

¹ Takoew, xamal xabich nejxasinkaxpim, chajia asacarta xato'ax xamalliajwa. Samata, amwutjel wachakalpijx carta lelx xamal naewuajnalijwan, nejchaxoelaliajwam pachaempoxan.

² iChiekal nejchaxoelde chajiakolaxtat Dios pejprofetas jum-aechpoxan! iNejchaxoeldebej wajpaklon Jesucristo tato'alpox, japon nakbu'wiapon! Japawuaajan apóstoles xamal naewuajan.

³ iChiekal nejchaxoeldebej xan lelaxaelenpox kaes pejme matabijaliajwam! Mox pawajna wut ampahat toepaliajwa, japamatkoiyan asew jiw pasaxael xamalxot. Japi pajut isasiapoxan, babijaxan, xabich isaxael. Japi jiw xamal xafafolaxaelbej, bu'wuaajanpaei wut Jesús xanaboejampoxliajwa.

⁴ Xamal jumchiyaxaeli: “Cristo chajia pajut jumdut pejme pasliajwapox. ¿Ma-aech xotkat Cristo pejme pas-elfak? Wajwuaajnapijiw xabich piach wuaajnewesful Cristo pasaxaelpox. Pe japi asbuan jumch tupaful tae-elaxtat. Me-ama Dios ampahat is wut, ja-aechlisox puexa. Samata, Cristo pejme pasaxil” —chiyaxael japi jiw xamalliajwa.

⁵ Pasaxaelpi xamalxot, japi nejwesla pajut matabijaliajwa, chajiakolaxtat Dios is that, thatbaxobej. Japi nejweslabej pajut matabijaliajwa, sat nakolsanpox minxotsin Dios pejjametat.

⁶ Chajiakolaxtat Dios tapaei that bu'laliajwa. Jawut jiw bu'al pothata, pejew suapich.

⁷ Thatbaxotat, ampathatatbej, amwutjel taenspoxan, japoxan pachaemsful Dios pijaxtat. Asamatkoi, Dios pajut japoxan toejafaxael jitat, kastikamatkoi pat wut. Puexa jiwbej, japi Dios naexasis-elpi, toejafaxaes.

⁸ Takoew, xamal xabich nejxasinkaxpim, wajpaklon Cristoliajwa mil waechan wut, me-ama kaematkoi wut, ja-aech japonliajwa. Japonliawabej, kaematkoi, me-ama mil waechan wut, ja-aech. Samata, ijapox nabej nejkiowe!

⁹ Asew jiw nejchaxoel: "Cristo makach pasaxil, me-ama chajia jumdut pasliajwa" — aechi asbuan jumch, nejchaxoel wut. Wajpaklon nejthisla-ele-el pasliajwa. Japon piniamatkoian wuaj nawesful. Nejthis-elon. Pasaxilfukon, asew jiw naexasis-el xotfuk japon pejwuajan. Nejweslapon kaen aton nafa'aliajwa Diosliajwa. Nejxasinkon puexa jiw kofaliajwa babijaxan ispoxan, japi jiw isliajwa pachaempoxan.

¹⁰ Asamatkoi wajpaklon chalechkal pejme pasaxael. Me-ama kithakan chalechkal pat wut, jachiyaxael, wajpaklon pejme pask wut. Jawut, xabich thiachoenk wut, toepaxael thatbaxo. Puexa athupijiwbej toejwaxaes. Puexa ampathatat taenspibej, japoxan chiekal toejwaxaes.

¹¹ Jasoxtat puexa chiekal toepaxael. Samata, ichiekal duilafulde, me-ama Dios nejxasink xamal duilafulaliajwam!

¹² ¡Dios markpox, matkoi, wuaj nawesfulde Jesús pejme pasliajwasik! ¡Isfulde Dios pejbichax japamatkoi kamtalejen pasliajwa! Japamatkoi pat wut, thatbaxo toejwaxaes. Ju'waxaesbej ampathat.

¹³ Do jawux, Dios isaxael pajelthatbaxo, pajelthatbej, me-ama chajia jumduton. Samata, xatis wuaj nawesfulaxaes japoxan taeliajwas. Pajelthat wut, puexa jiw isfulaxael pachaempoxankal.

¹⁴ Samata, xamal takoew, nejxasinkaxpim, wuaj nawesfulde pajelthatbaxo, pajelthatbej! ¡Pachaempoxankal isfuldebej! Ja-amsfulam wut, wajpaklon pask wut, xabich nejchachaemlaxaelon xamalliajwa.

¹⁵ Chiekal nejchaxoelde, ma-aech xot wajpaklon Jesús pas-elfuk! Japon pasaxilfuk, asew jiw naexasis-el xotfuk japon pejwuajan bu'welija was japi jiw. Japoxliajwa wajkoewan Pablobej, xatis nejxasinkaspon, cartaxot chajia lelpon xamalliajwa. Japox carta lel wut, Dios kajachawaechpon.

¹⁶ Wajkoewan Pablo lel wut cartan, kaenanula cartaxot lelon Jesucristo pejme pasaxoekpoxliajwa. Pablo cartan lelpoxan, asacartanxot, xabich tampoel xatis chiekal jummatajibialiajwas, japon lelpoxan. Asew jiw majt pajut chiekal jummatajibia-el wutfuk, japoxan nakiowa japi naewuajan asew jiw Pablo lelpoxanliajwa. Jesús pejwuajan jelnaexasiti, japi chiekal Jesús pejwuajan naexasis-el wutfuk, japi jiwbej naewuajan asew jiw Pablo lelpoxanliajwa. Jelnaexasiti Jesús pejwuajan, asew jiw suapich, jiw naewuajan wut, japi kaes asaxan naewuajanbej Pablo lelpoxanliajwa. Kastikamatkoi pat wut, japi jiw Dios xabich kastikaxaes.

¹⁷ Takoew, xamal xabich nejxasinkaxpim, matabijam xan lelpoxan. Samata, ¡najut chiekal natataefulde xamalxot pasaxaelpi xamal naekichachajbasamata, naewuajan wut! Japi xamal naewuajna xael kofaliajwam Dios xanaboiejampox.

¹⁸ ¡Kaes matabijim wajpaklon Jesucristo, nakbu'weyaxaelpon! Xan Dios kawuajna xamal kajachawaesliajwa Jesucristo. Dios kawuajna xbej puexa jiw amwutjel Jesucristo sitaeliajwa, pomatkoichaliajwabej. ¡Jasox nej ja-aeché' Jesucristoliajwa!

Matxoelapijax carta, Juan lelpox

Jesucristo majt waj-ax Diosxotsepo

¹ Xanal ampox lelx xamal matabijaliajwam akaseskolaxtat wuajna chajia dukponliajwa. Japonlap Jesucristo. Akaseskolaxtat japon duk, ampathat is-esal wutfuk. Hasta amwutjelbej japon dukaful. Japon kaen xajup jiw bu'welijawa, jiw pomatkoicha duilalijawa Diosxotse. Tajut chiekal jumtaenx, japon naksiya wut. Tajut chiekal taenxbej. Nat-achaemax japon is wut pachaempoxan. Tajut chiekal jachaxbej. Samata, jiw naewuajna Jesucristo pejwuajjan.

² Japon ampathatat wut, xanalxot dukpon. Xanal japon taenx. Samata, naewuajna nejthu'axtat taenxpojan, jumtaenxpojanbej. Jesucristo majt waj-ax Diosxotse. Do jawux, to'ason ampathatasik, dukaliajwapon, xanal swapich.

³ Xanal taenxpojan, jumtaenxpojanbej, japoxan xamal naewuajna naexasisfulalijwam, kaenejchaxoelaxliawambej, xanal swapich. Xanal kaenejchaxoelax, waj-ax Dios swapich, Dios paxulan, pawulpon Jesucristo, swapichbej.

⁴ Samata, lelx ampox carta xamallijawa, xamalbej chiekal nejchachaemlialijwam, xanal swapich.

Dios itliakaxpo

⁵ Jesús jum-aech, jiw naewuajan wut: “Dios babijax is-el. Samata, japon, me-ama itliakax wut, ja-aechon. Itkuatax, jachi-elon” —aech Jesús, jiw naewuajan wut. Xanal tajut jumtaenx, japon naewuajan wut jiw. Samata, xamal japawuajan naewuajnafulax.

⁶ Xatis jumtis wut: “Xanal Dios naexasitx” —tis wut, pe nakiowa, isas wutfuk babijaxan, jatis wut, nakiowa kichachajbapijwaxaes. Jatis wut, duila-xisal diachwuajnakolaxtat.

⁷ Pelax xatis isfulas wut pachaempoxankal, me-ama Dios isful pachaempoxankal, jatis wut, xatis, me-ama chiekal nakaewakolwas wut, jachiyaxaes. Jatis wut, Jesús, Dios paxulan, kaelel nakwepelsaxael babijaxan isaspoxan japon pejjal pijaxtat, tup xoton cruztat xatislialjwa.

⁸ Xatis jumtis wut: “Xatis babijaxan is-esal” —tis wut, diachwuajnakolax xatis wut naekichachajbas. Japox jumtis wut, jumchi-esal diachwuajnakolaxpox. Ajilbej diachwuajnakolaxpox xatixot.

⁹ Pe xatis babijaxan isaspoxan chapaeis wut Diosxot, Dios nakbeltaeyaxael babijaxan isaspoxanliajwa. Jasoxtat Dios nakbeltaeyaxael, japon pachaem xot xatislialjwa, me-ama japon jumdut. Puexa wajbabijaxan isaspoxan kaelel nakwepelsaxaelon.

¹⁰ Dios chajia jum-aech: “Puexa ampathatpijw babijax isla-ele-el. Puexa jiw babijaxan ispikal” —aech Dios. Pelax jumtis wut: “Xatis is-esal babijaxan” —tis wut, diachwuajnakolax xatis naexasis-esal Dios jum-aechpox. Jatis wut, me-ama jumtis: “Dios kichachajbapijin” —tis asbuan jumch.

2

Jesucristo naksiyaxaelpox Diosxotse xatislialjwa

¹⁻² Xamal, Jesús pejwuajan naexasisfulam xot, me-ama taxikola wut, ja-am. Xan lelx ampox carta babijaxan isasamatam. Asan aton nakiowa xamalxot babijax is wut, ja-aech wut, Jesucristo naksiyaxael Diosxotse, waj-ax Dios beltaelajwa japon aton babijax ispoxlialjwa. Jesucristo babijax is-el. Pe pajut natapaeipon asajiw kimatamatlialjwas cruztat. Jasox ja-aechon babijaxan ispi Dios beltaelajwas. Samata, Dios nakbeltaen, babijaxan isas wut. Jesucristo tup wut, tapa-el xatiskallialjwa. Japon tapbej puexa ampathatpijwliajwa.

³ Isfulas wut Dios tato'alpox, xatis matabijaxaes, diachwuajnakolax xatis matabijas Dios.

⁴ Aton jum-aech wut: “Xan Dios matabijtax” —aech wuton, pe naexasis-el wuton Dios tato'alpox, japon aton kichachajbapijin. Japon is-el Dios nejxasinkpoxan. Ja-aech wut, japon aton duka-el diachwuajnakolaxtat.

⁵ Nejmach-aton chiekal naexasit wut Dios tato'alpox, japon xabich Dios nejxasink. Ja-aech wut, xatis matabijas, Dios swapich, kaeyax nejchaxoelxspox.

⁶ Aton jum-aech wut jiwliajwa: “Xan Dios naexasitx” —aech wuton, japon chiekal dukaxael Diosliajwa. Me-ama Jesús chiekal duk pax Diosliajwa, jachiyaxaelbej japon aton, duk wut.

Pajeltato'laxpox

⁷ Takoew, xabich nejxasinkaxpim, lelx Dios tato'alpox xamalliajwa, xamal nakaewa nanejxasinkaliajwam. Ampox pajeltato'laxa-el. Chajiakolaxtat xamal jumtaenam wut, naexasitam Jesucristo pejwajjan. Japatato'lax chajia xamal jumtaenambej.

⁸ Pe nakiowa, lelx pajeltato'lax wut, ja-an xamalliajwa. Diachwajnakolax Jesucristo naewajjan xamal nakaewa nanejxasinkaliajwam. Xamalbej naksiyam diachwajnakolaxpox. Samata, matabijam diachwajnakolaxpox. Me-ama itliakax xenafal itkuataxxtot, xamalbej ja-am.

⁹ Nejmach-aton jum-aech wut: "Xan dukx Dios pej-itliakaxtat" —aech wut, japon aton nejwesla wut asew jiw, Jesús pejwajjan naexasiti, japon aton, me-ama itkuataxpijin wut, ja-aechon.

¹⁰ Aton nejxasinkpon Jesús pejwajjan naexasiti, japon aton dukafal itliakaxtat. Japon pajut natatafeul babijax isasamata.

¹¹ Pe nejweslapon asew, Jesús pejwajjan naexasiti, japon aton, me-ama nanuamt itkuataxxtot. Matabijs-elon fulaeyaxael poxade. Itkuatax itliaklan, kiladofas xoton.

¹² Xan ampox lelx xamal, Jesús pejwajjan naexasitampimliajwa. Dios beltaen xamal babijaxan isampoxanliajwa, Jesús tɔp xot nejbabijaxantat.

¹³ Xan lelx xamal pakdiachwamliajwa, matabijam xot Jesucristo. Japon wujna duk, ampathat ajil wutfuk. Lelxbej xamal pansiachwamliajwa, malecham xot dep pejpaklon Jesús pijaxtat.

¹⁴ Lelxbej xamal Jesús pejwajjan naexasitampimliajwa, matabijam xot waj-ax Dios. Lelxbej xamal pakdiachwamliajwa, matabijam xot Jesucristo. Japon duk akaseskolaxtat, ampathat ajil wutfuk. Lelxbej xamal pansiachwamliajwa, chiekal Dios xanaboejam xot, naexasisfulam xotbej Dios pejjamechan, malecham xot dep pejpaklon Jesús pijaxtat.

¹⁵ ¡Nabej nejxasinke' ampathatpijaxan! Ampathatpijaxan nejxasinkpi, japi nejxasinka-el waj-ax Dios.

¹⁶ Jiw is wut pajut isasiapoxan, babijaxan, japoxan chaemil. Jiw xabich nejxasink wut asew jiw pejew, japoxanbej chaemil. Jiw pajutliajwa xabich naksiya wut, pejewliajwa, ispoxanbej, japoxanbej chaemil. Puexa ampathatat chaemilpoxan, japoxan Dios pijaxana-el. Japoxan ampathatpijaxankal.

¹⁷ Ampathat bijiat matatoepafal, babijaxan swapich, jiw nejxasinkpoxan isfulaliajwa. Pe jiw isful wut Dios nejxasinkpoxan, ja-aech wut, duilaxaeli pomatkoicha Diosxotse.

Diachwajnakolaxxot, jaxot ajil kichachajbapox

¹⁸ Xamal, Jesús pejwajjan naexasitampim, matabijam mox pawajnapox that toepaliajwa. Xamal chajia jumtaenam Jesucristo padaelman pasaxaelpox. Ampamatkoian xabich nalaelafal Cristo padaelmajiw. Samata, xatis matabijas diachwajnakolax mox pawajnapox that toepaliajwa.

¹⁹ Japi jiw nakola xatisxot. Samata, xatis matabijas japi jiw naexasis-eli Jesús pejwajjan. Japi naexasit wut Jesús pejwajjan, japi xatisxotaxael. Pe japi jiw chajia wut xatisxot, diachwajnakolax japi jiw wajjiwa-el.

²⁰ Puexa xamal chiekal matabijam, Cristo to'a Espiritu Santo xamal nejmatpuatanxotaliajwa. Japon xamal amwutjel kajachawaesful chiekal matabijaliajwam diachwajnakolaxpox, diachwajnakolaxa-elpoxbej.

²¹ Xan lelx ampacarta xamal matabijam xot diachwajnakolaxpoxan. Lela-enil, xamal matabija-emil xot diachwajnakolaxpoxan. Xamal chiekal matabijam masox diachwajnakolaxan. Matabijambej masox diachwajnakolaxana-el. Japi jum-aech wut diachwajnakolaxpox, jaxot ajil kichachajbax.

²² ¿Achantat kichachajbapijin? Kichachajbapijin, japon jum-aechpon: "Jesús Dios paxulna-el. Jesús Mesías-elbej" —aechpon. Japonbej Jesucristo padaelman. Japon naexasis-el Dios, Dios paxulanbej.

²³ Nejmach-aton naexasis-el wut Jesús, japon Dios paxulanpon, japon atonbej naexasis-el Dios. Pelax nejmach-aton jum-aech wut: "Jesús Dios paxulan" —aech wut, japon atonlax Dios naexasit.

²⁴ Samata, ¡chiekal naexasisfulde chajia akaseskolaxtat jumtaenampoxan! Ja-amsfulam wut, kaes chiekal xanaboejaxaelam Jesús, japon paxbej.

²⁵ Jesucristo chajia jumdut pomatkoicha duilaxaesepox japonxotse.

²⁶ Xan ampox lelx xamal chiekal matabijaliajwam, masi jiw xamal naekichachajbasia.

²⁷ Pelis xamal nejmatpuatanxot Espiritu Santo, Jesucristo to'akpon. Samata, xamal wewe'pa-el asew jiw xamal chanaekabuanaliajwa, Espiritu Santo pajut chiekal chanaekabuanafal xot, puexa isaxaelampoxanliajwa, xamal matabijaxaelampoxanliajwabej. Espiritu Santo pejnaewajjnx diachwajnakolax. Japanaewajjnx kichachajba-el. Samata, ¡xanaboejim Jesucristo! ¡Nabej kofe'! ¡Isfulde Espiritu Santo naewajjanpoxan!

²⁸ Xamal, Jesús pejuwajan naexasitampim, ¡chiekal xanaboejim Jesucristo! Ja-amsfulam wut, duilafulaxaelam nejlewa-elaxtat, hasta Jesús pejme pask wut. Japamatkoitat xamal nadalaxil Jesús pejuwajnalel.

²⁹ Xamal chiekal matabijam Jesús xabich pachaempon. Japonbej is pachaempoxan. Samata, matabijaxaes, jiw is wut pachaempoxan, japi diachwuajnakolax Dios paxi.

3

Jesús pejuwajan naexasiti, japi Dios paxipox

¹ Waj-ax Dios xabich naknejxasink. Samata, Dios nakwulduw Dios paxis. Diachwuajnakolax xatis Dios paxis. Ampathatpijiw matabija-el Dios. Samata, japi jiw xatisbej nakmatabija-el.

² Takoew, xabich nejxasinkaxpim, amwutjel diachwuajnakolax Dios paxis. Pe wajut chiekal matabija-esalfuk wajbu'an asamatkoi nakwemachiyaxaelpox, tups wut. Xatis japox matabija-esal, Dios nak-itpae-elxotfuk. Pe nakiowa, matabijas, Jesucristo pejme pasaxoek wut, xatis japon taeyaxaes. Japamatkoitat wajbu'an, me-ama Jesucristo pejbu't wut, jachiyaxael kaenanula wajbu't.

³ Jesucristo pomatkoicha pachaempon. Is-elon babijax. Samata, kaenanula Jesucristo pejuwajan naexasichpis, chiekal duilafulaxaes. Me-ama japon, is-el babijax, jachiyaxaes-bej xatis.

⁴ Puexa jiw babijaxan ispi, japi jiw is babijaxan Diosliajwa, Dios nejxasinka-elpoxan.

⁵ Xamal matabijam. Jesucristo pask ampalthasik babijaxan isaspojan nakwepelsliajwa kaelel. Pe japon pajut babijax is-el Diosliajwa.

⁶ Samata, xanaboejapi Jesús, japi is-el babijaxan. Pelax jiw babijaxan isfulpi, japi jiw matabija-el Jesucristo.

⁷ Xamal Jesús pejuwajan naexasisfulam xot, me-ama taxikola wut, ja-am. ¡Nabej tapae' asew jiw xamal naekichachajbaliaw! Jesucristo pomatkoicha pachaempon. Japon is-el babijax. Samata, xamalxot isfulpi pachaempoxan, japi, me-ama Cristo wut, ja-aechi.

⁸ Satanás, dep pejpaklon, chajiakolaxtat babijax isful. Kofs-elon babijaxan ispojan. Amwutjel nakiowa isfulbejpon babijaxan. Jiw, babijaxan ispi, japi Satanás pejiw. Samata, Jesucristo, Dios paxulan, pask ampalthasik toesliawapon Satanás ispojan.

⁹ Dios pejjamechan naexasiti isfula-el babijaxan, japi Dios paxi xot. Diachwuajnakolax japi Dios paxi. Samata, isfulaxili babijaxan.

¹⁰ Xatis chiekal matabijas, jiw isful wut pachaempoxan ampalthat, japilap Dios paxi. Xatis chiekal matabijasbej, jiw isfula-elpi pachaempoxan, nejxasinka-elpipej asew jiw, japilap Dios paxi-el. Japilap Satanás paxi.

Dios paxipi nakaewa nanejxasinkpox

¹¹ Ampanaewuajnajxamal chajia jumtaenam. Nakaewa nanejxasinkas wut, me-ama wajkoewkola nejxasinkas wut, ¡jachiyaxaes asew jiwliajwa!

¹² Xatis, me-ama wajwuajnapijin, Caín, jachiyaxisal. Wajwuajnapijin, Caín, babejenpon Satanás pijaxtat. Samata, boesapon pakoewan, Abel. ¿Ma-aech xotkaton pakoewan boesa? Abel ispojan pachaem xot Diosliajwa, japoxliajwa Caín pakoewan boesa. Caín japoxan taen wut, xabich nusasiawalpon pakoewan Abelliajwa. Caín nejwesla pakoewan. Samata, boesapon pakoewan.

¹³ Takoew, ampalthatpijiw jasoxtat xamal nejwesla wut, ¡nabej nejchaxoelanuile' japoxliajwa!

¹⁴ Xatis matabijas. Majt xatis Diosliajwa, me-ama tupsispis wut, jatis, isfulas xot babijaxan. Pe Jesús pejuwajan naexasich wut, kofasbej babijaxan isaspojan. Samata, duilaxaes pomatkoicha Diosxotse. Xatis chiekal matabijas japox diachwuajnakolaxpox, nejxasinkas xot wajkoew, japi naexasiti Jesús pejuwajan. Asew xamalxot nejwesla wut asew jiw, Jesús pejuwajan naexasiti, japi jiwfuk, me-ama patupa wut, ja-aechi Diosliajwa.

¹⁵ Jiw, nejwesla wut asew jiw, japi, me-ama jiw beow. Xamal chiekal matabijam, jiw bapi asew jiw, japi duilaxil Diosxotse.

¹⁶ Jesucristo tuj xot cruztat xatisliajwa, xatis chiekal matabijas, machiyaxaes, nejxasinkas wut asew, Jesús pejuwajan naexasiti. Xatisbej jachiyaxaes. Naknejsesit wut tupaliajwas, ¡tupaxaes kajachawaesliajwas wajkoew! Japi xabich xatis nejxasinkas xot, jachiyaxaes japox.

¹⁷ Jesús pejuwajan naexasitpon, kimaeyan wut, pe japon kajachawaes-el wut asew, Jesús pejuwajan naexasiti, japi xabich wewe'pas wut kajachawaesax, kajachawaes-el wuton, japon itpaei nejxasinka-elpox japi jiw. Me-ama Dios nejxasink asew jiw, jachi-el japon kimaeyan.

¹⁸ Takoew, kamal jum-an ampox. Wajnejxasiyax asew jiwliajwa, jumchiyaxisal chimi-ajamechankal. Kajachawaech wut asew jiw, Jesús pejwuajan naexasiti, jatis wut, itpaeis diachwuajnakolax xatis nejxasinkaspox japi jiw.

Dios paxi, padala-elpox Diosliajwa, japi pachaem xot

¹⁹⁻²⁰ Asew jiw nejxasinkas wut, Jesús pejwuajan naexasiti, jatis wut, xatis matabijas, xatis isas Dios nejxasinkpox.

Pe babijax isaspoxlajwa xabich nejchaxoelafulas wut, nejchaemilas wutbej, ja-aech wut, nakiowa pachaemsfuk Diosliajwa. Dios kaes pejme pachaem. Me-ama xatis, jachi-el Dios. Puexa pajut matabijton xatis isaspoxanliajwa.

²¹ Takoew, xatis chiekal matabijas wajbu'wuajan jisalpox Diosliajwa. Jatis wut, chiekal matabijas chiekal matabemspox Diosliajwa.

²² Dios nakchaxduiyaxael puexa wuljowspxoxan, naexasisfulas xot japon tato'alpoxan, isas xotbej japon nejxasinkpoxan.

²³ Dios nakto'a xatis naexasisfulalajwas Dios paxulan Jesucristo pejwuajan. Dios nakto'abej nakaewa nanejxasinkafulalajwas.

²⁴ Dios tato'alpox naexasisfulpi, japi jiw chiekal xanaboejafal Dios. Diosbej chalafulas japi jiw. Dios to'ak Espiritu Santo wajmatpuatanxotalajwa. Samata, chiekal matabijas Dios nakchalafulpox.

4

Amxot jum-aechpox, ma-aech jiw duil wut pejmatpuatanxot Espiritu Santopi

¹ Takoew, xamal xabich nejxasinkaxpim, chiekal xan nanaewe'e! Xabich profetakola-eli, japi ampathatpijiw naekichachajbaful. Samata, najut natataeflam wut, chiekal natataeflafalde! Asew jiw pajutliajwa najum-aech wut: "Espiritu Santo jum-aech xanalliajwa. Samata, xanal japoxan jum-an xamalliajwa" —aech wuti, xamal kamta nabej naexasis japox! jMajt chiekal taem, diachwuajnakolax japi jiw naewuajan wut Diosliajwa!

² Ja-am wut, xamal chiekal matabijaxaelam, japi diachwuajnakolax jum-aech Espiritu Santo pijaxtat. Jum-aech wuti: "Diachwuajnakolax Jesucristo pat wut ampathatat, nalael-ton kaeow atowtat. Me-ama yamxi ampathatat nalaela wut, ja-aech, Jesucristo nalaelt wut ampathatat" —aech wuti, japi jiw diachwuajnakolax jum-aech Espiritu Santo pijaxtat.

³ Asew jum-aech wut: "Jesús Dios paxulna-el" —aech wuti, japi jiw Espiritu Santo chala-esal. Dios pejiwa-elbejpi. Japilax dep pijaxtat naksiya. Samata, japi Cristo padaelmajiw. Xamal chajia jumtaenam Jesucristo padaelman pasaxoekpox. Pelis Jesucristo padaelman ampathatatlison.

⁴ Xamal naexasitampim Jesús pejwuajan, Dios pejiwampim. Espiritu Santo xam-alxotpon, japon kaes pejme mamnik. Me-ama Cristo padaelman ampathatat, jachi-el Espiritu Santo. Samata, xamal malecham naekichachajbapijiw, naexasis-emil xot japi naewuajanpoxan.

⁵ Japi ampathatpijiwkal. Samata, naksiyaful ampathatpijaxankalliajwa. Japi jiw naewuajan wut, ampathatpijiwkalpi chiekal naewech japi naewuajanpoxan.

⁶ Pe xatislax Dios pejiwiws. Samata, Dios pejjamechan naexasiti naewuajnas wut, chiekal naknaewet wut, naexasitbejpi. Asew lax, Dios pejiwa-elpi, naknaewes-el, naewuajnas wut Dios pejjamechan. Naexasis-elbejpi. Ja-aech wut, matabijas, masi jiw, pejmatpuatanxot Espiritu Santo. Ja-aech wut, matabijasbej, masi jiw naekichachajbapijiw.

Jiw nakaewa nanejxasinkaxaelpox, Dios xabich nejxasink xot pejiw

⁷ Takoew, kamal nejxasinkaxpim, Dios pajut xatis nakkajachawaet asew jiw nejxasinkalajwas. Samata, nakaewa nanejxasinkafulaxaes. Nejmachjiw nejxasinkpon, japon Dios paxulan. Japon aton chiekal matabijtbej Dios.

⁸ Dios puexa jiw nejxasink. Nejxasinka-elpon asew jiw, japon aton Dios matabijs-el.

⁹ Dios to'ak wut kaekolan paxulan ampathatasik, japox is wut, Dios nak-itpaei pejnejasasiyax xatisliajwa. Samata, naexasich wut Jesús pejwuajan, xatis pomatkoicha duilaxaes Diosxotse.

¹⁰ Dios jasox is wut, nak-itpaeiapon nejxasiyax diachwuajnakolaxpox. Dios to'ak kaekolan paxulan, japon tupaliajwa cruztat nakwemosliajwapon babijaxan isaspoxanliajwa. Xatis nejxasinkaspox Diosliajwa xabicha-el. Me-ama Dios naknejxasinkpox, jachi-el wajnejxasiyax Diosliajwa.

¹¹ Takoew, kamal nejxasinkaxpim, jasoxtat xatis Dios naknejxasink xot, jnakaewa chiekal nanejxasinkde kaenanula!

¹² Xatis wajut tae-esal Dios. Pe nakiowa, xatis nakaewa nanejxasinkas wut, jatis wut, jiw chiekal matabija Dios nakchalafulpox xatis. Jatis wut, jiw chiekal matabijabej Dios pejnejasasiyax kaesfulpox xatisxot.

¹³ Dios to'ak Espíritu Santo wajmatpuatanxotaliajwasik xatis wajut chiekal matabijaliajwas Dios pajut nakchalafulpox.

¹⁴ Xanal tajut taenx Dios paxulan. Japoxlap asew jiw chapaeixbej, waj-ax Dios paxulan to'akpox ampathatasik japon bu'welijaewa ampathatpijiw.

¹⁵ Aton, jum-aechpon: "Jesúslap, Dios paxulan" —aechpon, japon diachwuaajnakolax Dios xanaboejsful. Japon aton Dios chalafulas ampathatat.

¹⁶ Do ja-aech wut, xatis chiekal matabijas Dios naknejxasinkpox. Jawutbej, chiekal xanaboejas Dios pejnejasiyax. Jiw, nejxasinkpi Dios, japi jiw diachwuaajnakolax Dios chiekal xanaboejaful. Japi Dios chalafulasbej.

¹⁷ Jasoxtat Dios pejnejasiyax xatisxot kaesful. Samata, wajlewlixil, Dios kastika wut jiw babejchow. Xatis wajlewlixilbej, chiekal matabijas xot, xatis nakaewa nanejxasinkas, me-ama Jesús naknejxasink.

¹⁸ Jiw nakaewa nanejxasink wut, jaxot ajil pejlewax. Poklanejxasiyaxxot, jaxot atwaj pejlewax. Jiw pejlewla wut, japi pejlewla, chiekal matabija xoti kastikaxaesxot. Samata, nejmach-aton pejlewla wut, japonfuk chiekal nejxasink-el asew jiw.

¹⁹ Dios matxoela naknejxasink xatis. Samata, amwutjel xatisbej japon nejxasinkas.

²⁰ Aton jum-aech wut: "Xan Dios nejxasinkax" —aech wuton, pe japon asew jiw nejxasinka-el wut, japon kichachajbapijin. Japon aton nejxasinka-el wut asew jiw, taenpi, japon nejxasinka-elbej Dios, taeyaxisalpon.

²¹ Ampoxlap Jesucristo xatis nakjum-aech: "¡Dios nejxasinkpi, japi jiw nejxasinkbej asew jiw!" —aech Jesús xatisliajwa.

5

Jesús pejwuaajan naexasiti isaxilpox babijaxan, ampathatpijiw isfulpoxan

¹ Puxa jiw nejchaxoel wut, jum-aech wuti Jesúsliajwa: "Japon Mesías, Dios to'ason" —aech wuti, japi jiw Dios paxi nadofa. Aton nejxasink wut asan aton, japon nejxasinkbej japon paxi.

² Samata, xatis waj-ax Dios nejxasinkas wut, isas wutbej Dios naktato'alpoxan, jatis wut, chiekal matabijas, xatis nejxasinkaxes Dios paxipi.

³ Xatis Dios nejxasinkas wut, naexasisaxaesbej japon tato'alpoxan. Japoxan xabich tampoela-el xatis naexasisliajwas.

⁴ Puxa Dios paxipi, japi jiw duilafulaxael Dios pejkajachawaesaxtat babijax isasamata ampathatat, japi chiekal Dios xanaboejaful xot.

⁵ Naexasisfulpi Jesús, Dios paxulanpon, japi jiw isaxil ampathatpijiw isfulpoxan, babi-jaxan.

Jesucristo Dios paxulanpox

⁶ Jesucristo nalaelt ampathatat. Do baxael, jiw chiekal matabijaspon, japon Dios paxulanpon, bautisas wuton mintat, tɔp wutbejpon cruztat. Jaxot japon pejjal nakola. Samata, bautisaxkala-el. Boesasbejpon. Espíritu Santo pajut jum-aechbej, achan japon. Espíritu Santo jum-aech diachwuaajnakolaxpoxkal.

⁷⁻⁸ Jiw chiekal matabija Jesucristo diachwuaajnakolax Dios paxulanpon, japonliajwa Espíritu Santo japox jum-aech xot, bautisas xotbej mintat, tɔp xotbejpon cruztat. Japanejchaxoelaxan, tres nejchaxoelaxanliajwa, jiw chiekal matabija diachwuaajnakolax Jesucristo Dios paxulan.

⁹ Jiw jum-aechpox, diachwuaajnakolax wut, xatis japox naexasich. Pe kaes pejme naexasich Dios jum-aechpox, pachaem xot naexasisliajwas. Samata, naexasisfulas Dios nakjum-aechpox paxulanliajwa.

¹⁰ Jiw naexasiti Dios paxulan pejwuaajan, diachwuaajnakolax japi jiw naexasit Dios jum-aechpox. Pelax jiw naexasit-eli Jesús pejwuaajan, japon Dios paxulanpon, japi jiw nejchaxoel Diosliajwa: "Dios naekichachajbapijin" —aechi, nejchaxoel wut, naexasis-el xoti Dios jum-aechpox paxulanliajwa.

¹¹ Dios jum-aech ampo: "Xan jiw kajachawaetx taxulan pijaxtat pomatkoicha duilaliajwa xanxot.

¹² Taxulan pejwuaajan naexasiti, japi pomatkoicha duilaxael xanxot. Pelax asew jiw, taxulan pejwuaajan naexasis-elpi, japi duilaxil xanxot" —aech Dios.

Taxdukanaewuaajnan ampacartatat

¹³ Xan ampawuaajan lelx xamal naexasitampimliajwa Dios paxulan, chiekal matabijaliajwam pomatkoicha duilaxaelampox Diosxotse.

¹⁴ Xatis chiekal Dios xanaboejas, matabijas xot, Dios naknaewet, xatis kawuaajnas wut, me-ama Dios nejxasink.

¹⁵ Xatis chiekal matabijas, Dios nakjümtaen, kawuajnas wüt. Samata, Dios kawuajnas wüt, chiekal matabijasbej Dios nakchaxduiyaxaelpox, wuljows wüt kawuajnaxtat.

¹⁶ Taenam wüt, Jesús pejwuajan naexasiti babijaxan is wüti, ijapiliajwa Dios kawuajande! Dios kawuajnam wüt, japi Dios kajachawaesaxaes kofaliajwa babijaxan ispoخان. Ja-aech wüt, pomatkoicha duilaxaeli Diosxotse. Pe asax babijax xabich kaes chaemil. Japox jiw is wüt, diachwuajnakolax napelsaxaeli Diosliajwa pomatkoicha. Xamal taenam wüt, asew, Jesús pejwuajan naexasiti, japox babijax is wüti, xabich chaemilpox, xan jümchi-enil: “¡Dios kawuajande japiajwa!” —chi-enil.

¹⁷ Puexa babijaxan jiw is wüt, japoxan chaemil Diosliajwa. Puexa japoxan Dios nejwesla. Pe puexa japababijaxan is wüti, japi jiw napelsaxil.

¹⁸ Chiekal matabijas ampox. Waj-ax Dios paxipi isfulaxil babijaxan, Dios paxulan, Jesucristo, tataeflas xot japi jiw. Samata, Satanás, dep pejpaklon, machiyaxil japi jiw tabesliajwapon.

¹⁹ Xatis chiekal matabijas, Dios paxispis. Chiekal matabijasbej Satanás tato'alpox ampathatpijw.

²⁰ Xatis chiekal matabijasbej, Dios paxulan pask wüt, japon nakkajachawaetbej xatis chiekal matabijaliajwas Dioskolan. Samata, xatis kaeyax nejchaxoels, Jesucristo suapich. Japon diachwuajnakolax, Dios paxulankolan. Nakkajachawaetbejpon xatis pomatkoicha duilaliajwas, japon pajut duk xot pomatkoicha.

²¹ Xamal naexasitpim Jesús pejwuajan, ¡chiekal najut nataefulde idolos kawuajnasamatam! ¡Kawuajnafulde kaen Dioskal!

Wachakalpijax carta, Juan lelpox

Amxot jum-aechpox diachwujnakolaxpox, nejxasiyaxbej

¹ Xan, anciano, lelx ampacarta xamal Dios naexasitampimliajwa, xamal Dios makanot-pimliajwa. Diachwujnakolax xamal xabich nejxasinkax. Xan kaenan xamal nejxasinkanenil. Puexa asew jiw chiekal matabijapi diachwujnakolaxpox, japi jiwbej xamal nejxasink.

² Xamal nejxasinkax, xatis puexa naexasich xot diachwujnakolaxpox Diosliajwa. Amwutjel japox naexasisfulas. Japox naexasisfulaxaes pomatkoicha.

³ Xan kawujnax waj-ax Dios, paxulan Jesucristobej, japi xamal xabich kajachawaesliajwa, beltaeliajwabejpi, chiekal duilaliajwambej, asew jiw suapich. Xan waj-ax Dios kawujnax, Jesucristobej, diachwujnakolax xamal nejxasinkam xot Dios.

⁴ Xan xabich nejchachaemlax, taenx wut asew jiw xamalxot kofa-elpox naexasisfulpox Jesús pejwujajan. Japi jiw chiekal duilaful, me-ama waj-ax Dios naktato'al duilafulaliajwas, asew jiw naekichachajba-elaxtat.

⁵ Takoew, xamal nejxasinkaxpim, to'ax nakaewa nanejxasinkaliajwas. Japatato'lax jela-el. Japatato'lax chajiakolaxtat xatis jumtaens wut, naexasisfulas.

⁶ Dios tato'alpox naexasisfulas wut, asew jiw chiekal nakmatabija xatis Dios nejxasinkaspox. Dios tato'alpox nakjum-aech: "¡Xatis nakaewa nanejxasinkaxaespox kaematkoisful!" —nak-aechox, tato'al wut. Japox xatis chajia chiekal matabijas, akaseskolaxtat naexasisfulas wut Jesucristo pejwujajan.

Ampathatat xabich maenkpox naekichachajbapijiw

⁷ Ampathatat xabich maenk naekichachajbapijiw. Japi asew jiw naewujajan. Japi naexasis-el Jesucristo, Dios paxulan paskpon atontat ampathatat. Jasox nejchaxoelpi, japilap jiw naekichachajbapijiw. Japibej Jesús padaelmajiw.

⁸ ¡Xamal kaenanula najut chiekal natataeflafulde napelsasamata nabistampoxanliajwa, Dios chaxdusaxaelpox chiekal puexa kifisliajwam!

⁹ Xamal naexasisfulam wut Jesucristo naewujajanpox, ja-am wut, waj-ax Dios, japon paxulan Jesucristobej, xamal kajachawaesfulaxael. Pe asax naexasisfulam wutlax, ja-am wut, Dios xamal kajachawaesfulaxil.

¹⁰ Nejmachjiw pat wut xamalxot naewujanliajwa asawujajan, japi jiw naexasis-el wut Jesús naewujajanpox, ¡japi to'im asalel! ¡Nabej tapae' nejba leliajwa asawujajan xamal naewujanliajwapi! ¡Moi! —¡nabej aeche'bej japi jiw!

¹¹ Japi jiw bu'kulaxaelam wut, tapaeyaxaelam wutbej nejba leliajwa, ja-am wut, japi pejnaewujanax, babijaxpox, xamal, me-ama kajachawaesaxaelam.

Amxot Juan kitoesaxaelpox lelpox

¹² Xan xabich wujajan xamal naewujanliajwan. Pe xanliajwa chiekal nawepachaemael japoxan lelaliajwan cartatat. Xanlax tajut chiekal nospaesian, xamal suapich. Samata, asamatkoi xamalxot patx wut, nospaeyaxaes kaeyaxtat, chiekal nejchachaemlaliajwas.

¹³ Amxot duili, naexasiti Jesús pejwujajan, Dios makanochpi, japibej saludos xato'a xamalliajwa.

Trespíjax carta, Juan lelpox

Juan lelpox chamoeyaxan Gayoliajwa

¹ Gayo, xan, anciano, lelx ampox carta xamliajwa. Xam tajnachalnam, xabich pachaemamponam xanliajwa. Diachwəajnakolax xam nejxasinkax.

² Takoewan nejxasinkaxponam, me-ama xam pachaemam Diosliajwa, xan Dios kawəajnajax puexa pachaemaliajwa xamxot, bə'xaenkasamatambej.

³ Xan xabich nejchachaemlax, wajkoew pa'an wət, japi xan nachapaei wət xam chiekal naexasisfulampox Dios.

⁴ Jiw, naexasiti Jesús pejwəajan, xan naewəajnajax wət, japi jiw, me-ama taxikola wət, ja-aechi xanliajwa. Samata, xan xabich nejchachaemlax, wətaenx wət japi chiekal duilafulpox diachwəajnakolaxtat.

⁵ Takoewan, xam nejxasinkaxponam, pomatkoicha isam pachaempoxan asew jiwliajwa, japi naexasiti Jesús pejwəajan. Japi, me-ama wajkoew. Asew jiw, asatəajnjəchanpijiw, nejboxot pat wət, nakiowa xam japi chiekal bə'kəlam. Kajachawaetambej.

⁶ Xamxot nawenpi natamejlaxtat xanal nachapaeipi xam xabich nejxasinkampox japi. Japi, wajkoew, pejme xamxot pat wət, jənewəkajachawae'e Dios nejxasinkpoxtat, japi fulaeliajwa wət asatəajnjəchanlel!

⁷ Japi nanəamt Jesús pijaxtat isliajwa Jesús pijax, bichax. Kajachawaesax kinos-eli naexasis-eli Dios. Japi kinotlax kajachawaesax Jesús pejwəajan naexasitpikal.

⁸ Samata, xatis japi kajachawaesaxaes, japi jiw naewəajan wət Dios pejjamechan. Japox isas wət, xatis kajachawaech naewəajnafulaliajwapi diachwəajnakolaxpox.

Diótrefes ispox babijaxan

⁹ Xan chajia lelx asacarta japi Jesús pejwəajan naexasitiliajwa xamxot. Pe Diótrefes nejchaxoela-el naexasisliajwa, xanal cartaxot lelx wət jəm-anpox, japon pajut jiw tato'lasia xot.

¹⁰ Asamatkoi xamalxot patx wət, chapaeyaxaelen xamal nejwəajnalel japon ispoxanliajwa xanalliajwa. Japon jəm-aech kichachajbapoxan xanalliajwa. Kaes chaemilpoxan isfalbejpon. Kajachawaes-elon wajkoew, japi nabistpi Jesúsliajwa, pat wəti japonxot. Tapae-elbejpon asew wajkoew, japi kajachawaesasia wət japi patpi. Japi kajachawaet wət wajkoew, iglesiaxot nakolax to'apon.

¹¹ Takoewan Gayo, nejxasinkaxponam, jənabej is babijaxan, me-ama asew jiw isful! jXamlax isde pachaempoxan! Pachaempoxan ispi, japi Dios pejjiw. Asew jiwłax, ispi babijaxan, japi jiw chiekal matabija-el Dios.

¹² Amwət jəmchiyaxaelen Demetrioliajwa. Puexa jiw chiekal naksiya japonliajwa. Chiekal naexasisfulon Dios pejjamechan, diachwəajnakolaxpox. Xanalbej naksiyax pachaempoxan japonliajwa. Xam matabijtam xanal jəm-anpoxan diachwəajnakolax.

Amxot Juan lelpox kitoesaxael

¹³ Xan xabich wəajan xam jəmchiliajwan. Pe nejxasinka-enil lelaliajwan japoxan ampacartatat.

¹⁴ Xanlax tajut chiekal nospaesian, xam səapich, nejchaxoelx xot xamal taeyax. Jawət chiekal nospaeyaxaes.

¹⁵ jPuexa jiw xamxot chiekal nej duile' wəajanjilaxtat! Nejnachala, amxoti, japi xato'a saludos xamliajwa. jKaenanula nawesaludam wajnachala!

Judas lelpox carta Jesús pejwajan naexasitilajwa

Judas lelpox carta Jesús pejwajan naexasitilajwa

¹ Xan Judas, Santiago pakoewnan, nabistax Jesucristolajwa. Xan lelx ampox carta xamal waj-ax Dios nejxasinkpimilajwa. Dios xamal makanot japon pejiwialajwam. Jesucristobej pomatkoicha xamal tataeflalul.

² Xan Dios kawuajna xamal beltaelajwa, kajachawaeslajwabejpon chiekal duilalajwam, asew jiw suapich. Dios kawuajna xbej xamal nakaewa nanejxasinkalajwam.

Judas naewuajanpox naexasiti Jesús pejwajan asew jiw naekichachajbasamatas

³ Takoew, xamal xabich nejxasinkaxpim, xan kaes lelasan chiekal matabijalajwam wajpaklon nakbu'weyaxaelpox. Pe japox lelaxinil ampapelfutat. Xan wultaenx asew jiw xamalxot patpox. Japi pat xamal naewuajnalajwa, naekichachajbalajwabej. Samata, lelaxaelen xamal naexasisasamatam japi jiw naewuajanpoxan. Pe japi naewuajanpoxan chiekal najura-el, Dios pejwajan suapich, xatis naexasislajwaspox. Japawuajan pomatkoichalajwa. Samata, japi jiw bu'xia'e bu'xkofalajwa naewuajanpoxan!

⁴ Asew jiw xamalxot pat. Japi pat xamal naekichachajbalajwa. Japi, me-ama Jesús pejwajan naexasit wut, jakabu'an-aechi. Pe japi jumchi-el diachwujnakolaxpox. Asbu'an jumch jum-aechi: "Dios nakbeltaen xatis babijaxan isaspoxanlajwa. Samata, kaes babijaxan isfulas wut, Dios nakkastikaxil" —aechi asbu'an jumch. Naexasis-eli Jesucristo, japon kaenpon wajpaklon, japi isfulalajwabej Jesucristo nejxasinkpoxan. Samata, asamatkoi Dios kastikaxaesi. Me-ama Dios chajia jum-aech japi jiwliajwa, jasox jachiyaxaes japi jiwliajwa.

⁵ Diachwujnakolax xamal matabijamlis lelaxaelenpox. Pe nakiowa, lelaxaelen kaes chiekal nejchaxoelalajwam ampox. Chajiakolaxtat wajpaklon Dios bu'wia wut pejiw, israelitas, Egipto tujnuxot ampatuajnueldin, do jawux, japixot asew toech, naexasis-el wuti Dios tato'laspoxan.

⁶ ¡Nejchaxoeldebej Dios kastikapox asamutpijiw, ángeles! Japi ángeles nejwesla islajwa Dios tato'alpoxan. Samata, japi ángeles kofa Dios pijax bichax. Ja-aech wut, japi ángeles itk'uataxxotdik jias. Japi jaxot machiyaxil nakolalajwa. Japi ángeles wuajnawet Dios kastikalajwas. Asamatkoi, kastikamatkoi pat wut, jiw babijaxan ispi pomatkoicha kastikaxaes. Jawut japi ángelesbej kastikaxaes.

⁷ Nejchaxoelam wut, ¡nejchaxoeldebej Sodoma paklowaxpijiwliajwa, Gomorra paklowaxpijiwliajwabej, asew jiw, mox duilpilajwabej japapaklowaxanxot! Japapaklowaxanpijiw nakaepoejwa nabu'moejt. Watho'bej nakaewatho'a nabu'moejt. Samata, Dios to'a jit, pin-jiyax, natacholnalajwa japapaklowaxan poxasik. Jasoxtat japapaklowaxanpijiw toefafas. Samata, amwutjel puexa jiw, babijaxan ispi, pajut chiekal matabija Dios asamatkoi jitat kastikaxaespox pomatkoichalajwa. Japajit toepaxil.

⁸ Poejiw, xamalxot patpi, japi pat xamal naekichachajbalajwa. Japi babejchowbej. Me-ama pejuwajnapijiw, ja-aech japi poejiw. Japi poejiw babijaxan is, masoxtat taenpoxan, asew jiw tae-elpoxan. Nejweslabejpi Dios tato'alpoxan islajwa. Japi jum-aechbej babejamechan Dios pej-áγγελislaajwa.

⁹ Dios pej-áγγελ, japon pawulpon Miguel, puexa Dios pej-áγγελes tato'lan, jumchi-elon kaejame, babejjame, Satanásliajwa. Me-ama poejiw, xamalxot patpi, jum-aech babejjamechan Dios pej-áγγελislaajwa, jachi-el Miguel. Chajiakolaxtat Moisés tuj wut, Satanás fisasia Moisés pejb'u't. Pe jawut, Miguel kitapae-el Satanás fisliajwa Moisés pejb'u't. Jawutbej Miguel jumchi-el babejjamechan Satanásliajwa. Asbu'an jumch jum-aechon Satanásliajwa: "¡Dios xam nej kastike!" —aechon.

¹⁰ Pelax poejiw, xamalxot patpi, babejjamechan jum-aech pajut jummatabi-elpoxanlajwa. Me-ama choef matabija-el islajwa, ja-aech japi jiw. Samata, Dios kastikas wut, toesaxaesi.

¹¹ Diachwujnakolax japi jiw Dios xabich kastikaxaes, babijaxan is xot, me-ama Cain babijax is chajiakolaxtat, ja-aech xoti. Xabich platakak kanasiapi. Me-ama profeta Balaam isasia, chajia laeja wut, ja-aechlap-is japi jiw. Samata, japi jiw Dios pejjamechan naewuajan wut, chiekal naewuajna-el. Japibej pajut naexasis-el Dios tato'alpoxan. Chajiakolaxtat Coré naexasis-el wut Moisés tato'alpox, japon tuj, Dios kastikas wut. Xamalxot patpi, jachiyaxaeslap-is. Dios kastikas wuti, japibej tujpaxael.

¹² Xamal natamejlam wut xaelajwam kaeyaxtat, jawut japibej xamalxot pat xaelajwa, xamal suapich. Xamal nadala japilajwa. Pelax japi padaeyax chiekal wejisal, xamal suapich, xaelajwa, felajwabej. Xabich xael wuti, japi xanejchadus-el asew jiw, puexa jiw

kaechxajupaliajwa. Me-ama oveja tataeflan, nejchaxoel pejew oveja chiekal tataeflaliajwa, jachi-el japi jiw. Nejchaxoel asbuan jumch pajut natataeflaliajwa. Nejchaxoela-eli xamal tataeflaliajwa. Japi ispoxan xabich pachaema-el. Me-ama itlojen, iampi, joewa xafos, ja-aech japi jiw, pachaema-el xot asew jiwliajwa. Me-ama naebaechnae baechjil wut, kaelel tup, ja-aechlap-is japi jiw, pachaema-el xoti asew jiwliajwa. Japibej, me-ama nae, potathina chakuchnae, kaelel fo'aliajwas, ja-aech japi jiw.

¹³ Japibej, me-ama pintruxan pijabaspoX pamaklelde putase oelaliajwa, ja-aech japi jiw, isful xot babijaxan, padalapoxan. Japibej, me-ama ithaej fol wut, matxalpi, ja-aech japi jiw. Pomatkoicha japi jiw Dios kastikaxaes. Samata, duilaxaeli itkuaatxot.

¹⁴ Enoc chajiakolaxtat duk. Japon Adán pamon. Enoc Dios kajachawaech xot, jum-aechon ampox: “Wajpaklon Dios asamatkoi xabich pin-iakola pej-ángeles bu'pasaxael.

¹⁵ Dios tasalaxael puexa jiw, pejbu'wuaajanpi, japi jiw is-el xot japon tato'alpoxan. Kastikaxaelbejpon puexa jiw, jum-aechpi babejjamechan Diosliajwa” —aech Enoc. Enoc chajia jum-aech japoxliajwa, matabijot xot asamatkoi xamalxot pasaxaelpliajwa.

¹⁶ Japi jiw, xamalxot patpi, jum-aechi babejjamechan puexa jiwliajwa. Puexa pachaem wutbej japi jiwliajwa, nakiowa jum-aechful babejjamechan japoxanliajwa. Babijaxan isbejpi, pajut isasiapoxan. Do jawux, japi ispoxan asew jiw chapaeipi sitaeliajwas. Jum-aechbejpi asew jiwliajwa: “Xam chiekal pachaemam” —aechbejpi chaxduiliajwas wewe'paspoXan.

Judas naewwajanpox Jesús pejwuaajan naexasiti naekichachajbasamatas

¹⁷ Takoew, xamal xabich nejxasinkaxpim, nejchaxoelam wut, inejchaxoelde Jesucristo pejjiw, apóstoles, chajia jum-aechpox!

¹⁸ Japi apóstoles chajia jum-aech: “Matkoijan toepax wuaajna, jiw jumchiyaxael babejjamechan Dios pejjamechanliajwa. Bu'wuaajanpaeyaxaelbejpi Dios pejjiw. Xabich babijaxan isaxaelbejpi, pajut isasiapoxan” —aech apóstoles.

¹⁹ Japi jiw xamalxot naewwajan wut, jiw kaenejchaxoelaxil. Samata, xabich jiw nasalaxael. Japi, xamalxot patpi, isful babijaxan, pajut isasiapoxan. Japi jiw pejmatruatanxot jil Espíritu Santo.

²⁰ Takoew, xamal nejxasinkaxpim, ichiekal naexasisfulde Jesús pejwuaajan, Dios kaes chiekal xanaboejalijawam! ¡Dios kawwajandebey, me-ama Espíritu Santo xamal tato'al kawwajnalijawam Dios!

²¹ Dios xamal xabich nejxasink. Samata, Dios to'a xot, ixamal chiekal duilde! ¡Wuaajnawesfulde wajpaklon Jesucristo fuloeyaxoekpox, xamal pomatkoicha duilaliajwam Diosxotse, xamal beltaan xoton babijaxan isampoxanliajwa!

²² Asew jiw chiekal naexasis-elfuk Jesús pejwuaajan. Samata, naewwajnam wut, ¡japi jiw chiekal naewwajande, japibey chiekal naexasisliajwa Jesús pejwuaajan!

²³ Jiw, naexasis-eli Jesús pejwuaajan, japi jiwliajwa chachael, infierno poxaxaek xoti. Samata, ixamal kamta naewwajande japi jiw chiekal jummatajibialiajwa, Dios bu'welialjwas infierno poxasamatapi! Asew jiwliajwa tampoel Jesús pejwuaajan, japi jiw chiekal jummatajibialiajwa. Samata, ¡japi jiw chiekal naewwajande naexasisliajwapi Jesús pejwuaajan! Japi babijaxan is wut, ixamal japoxan nabej nejxasinke! ¡Chiekal taem xamalbej isasamatam babijax, japi jiw babijaxan is wut!

Puexa Jesús pejwuaajan naexasiti, japi chimiajamechan jumchiyaxaelpox Diosliajwa

²⁴⁻²⁵ Kaen Dios, japon xatis nakbu'weyaxael babijaxan isaspoxanliajwa. Japon naktataeflaxael isasamatam babijaxan. Asamatkoi, nuilaxaes wut Dios pejwuaajnalel, wajpaklon Jesucristo tup xot babijaxan isaspoxanliajwa, bu'wuaajanjilaxaes Diosliajwa. Jaxotaxaes wut, Dios pej-itliakax taens wut, xabich nejchachaemlaxaes. Samata, jumchiyaxaes Diosliajwa: “¡Xam xabich pachaemam!” —chiyaxaes, xabich mamnik xoton. Puexa jiw matabijaxael Dios. Japon xajup puexa jiw tato'laliajwa. Jasoxtat Dios chajiakolaxtat majt puexa jiw tato'al. Amwutjel nakiowa, ja-aechfuk japox. Dios puexa jiw tato'laxaelpox, japox pomatkoichaliajwa.

That toepax pat wut, machiyaxael ampathat

Jesucristo itpaeipox pejiw, japi matabijaliajwa asamatkoi that puexa jachiyaxaelpoxan

¹ Dios puexa itpaei Jesucristo matabijsliajwa asamatkoi puexa that jachiyaxaelpoxan, Jesucristobej japoxan itpaeliajwa pejiw, naexasiti japon pejwñajan. Samata, Jesús to'ak pej-ángel xanlelsik na-itpaeliajwa japoxan. Xan Juan, Jesucristo pejnachalnan, lelaxaelen ampapelfutat japoxanliajwa.

² Samata, puexa taenxproxan, jumtaenxproxanbej, lelaxaelen ampapelfutat. Japoxan Jesucristo na-itpaei. Nachapaeibejpon Dios pejjamechan.

³ Aton chanaexaljow wut ampapelfut asew jiw jumtaeliajwa, japon aton nejchachaemlaxael. Nejchachaemlaxaelbej naeweti ampawñajan, Dios to'apox. Japi matabija wut, naexasiti wutbej, Dios chajia jum-aechpox, puexa japi jiw chiekal nejchachaemlaxael. Puexa japi jiw nejchachaemlaxael, mox pawñajna xot pasliajwa puexa ampapelfutat lelaxaelenpoxan.

Juan lelpox ampawñajan siete iglesiaspijw poxade xato'aliajwa

⁴ Xan, Juan, ampawñajan lelx xamal, Asia tuajñupijwamliajwa, siete iglesiaspijwamli-ajwa. Dios jila-el. Amwutjelbej dukon. That is-el wutfuk, jawutbej japon duk. Dukaxaelbejpon pomatkoichaliajwa. Xan Dios kawñajna xamal kajachawaesliajwa, chiekal duilalialjwambej. Espíritu Santo xabich pachaem. Japon nuk Dios pejwñajnael. Japonbej xamal kajachawaesaxael.

⁵ Jesucristobej kawñajna xamal kajachawaesliajwa. Japonbej jiw naewñajan Dios pejjamechan. Japon tur wut, matxoela mat-ech pejme dukaliajwa. Japon kaes pejme paklon. Me-ama asew jiw, ampathatpijw tato'alpi, jachi-elon. Jesús xabich xatis naknejxasink xot, turpon xatisliajwa. Jakitison xatis Dios nakbu'welialjwa.

⁶ Jesús xatis nakmakanot japon pejiwaliajwas. Asamatkoi, xatis puexa jiw tato'laxaes, japon swapich. Jesús pijaxtatbej sacerdotexaes, waj-ax Dios kawñajnalialjwas asew jiwli-ajwa. Samata, pomatkoicha Dios jumchiyaxaes: "¡Xam xabich pachaemam!" —chiyaxaes. Jesús pomatkoicha puexa jiw tato'laxael. Japox toepaxil.

⁷ ¡Cristo fuloeyaxoek itloejentat! Jawut puexa jiw taeyaxaeson. Jiw kimatamatalpibej Cristo cruztat, japi jiwbej taeyaxaeson. Puexa ampathatpijw, naexasis-elpibej Dios, Cristo taen wuti, xabich pejlwnt noeyaxaeli. Jachiyaxaeli asamatkoi.

⁸ Wajpaklon Dios xajur puexa isliajwa. Pajut jum-aechon: "Xan akaseskolaxtat, puexa isx wut, kaes pejme wñajna xan dukx. Amwutjelbej nakiowa dukx. Asamatkoi, puexa isxproxan toetx wutbej, xan pomatkoichaxaelen" —aech Dios pajutliajwa.

Jesús natulaelt wut, itliakpox

⁹ Puexa xatis nakaewas, Jesús pejiwis xot. Samata, xatis nabijatas, asew jiw habi-jaxan is xot xatisliajwa. Pe nakiowa, Jesús nakkajachawaet boejtaliasliajwas, nabijatas wut. Samata, xatis, Jesús swapich, naktato'laxaes, asamatkoi, japon puexa ampathatpijw tato'al wut. Jiw naewñajna xot Dios pejjamechan, Jesús pejwñajanbej, asew jiw najaelt nabuflaelialjwa Patmos tanaetxot nakastikaliajwa.

¹⁰ Patmos tanaetxotx wut, dominkomatkoj wut, Espiritu Santo pijaxtat masoxtat chalechkal taenx asamatkoi ampathat jachiyaxaelpox. Jawut tajwuchakallel pinjame jumtaenx. Japajame, me-ama trompeta nababaes wut, jathia-aechox.

¹¹ Japajame najum-aech: "¡Lelde taenampoxan, taeyaxaelampoxanbej! Lelax toetam wut, japox xato'im Jesús pejwñajan naexasiti poxade, siete iglesiaspijw poxade! Japi Éfeso paklowaxpijw, Esmirna paklowaxpijw, Pérgamo paklowaxpijw, Tiatira paklowaxpijw, Sardis paklowaxpijw, Filadelfia paklowaxpijw, Laodicea paklowaxpijwbej. Puexa japi siete paklowaxanpijw, Asia tuajñupijw" —na-aech japajame.

¹² Japajame jumtaenx wut, xan wultataenx taeliajwan najum-aechpon. Pe jawut, taenx siete candelabros. Japoxan, orocandelabros.

¹³ Siete candelabrosxot, jaxot xan Jesús taenx. Naxoelon pakchowax. Pejtuaktajmexot wewe'pas pejnaxoelax. Matiafkaku'apon orocinturónmuat.

¹⁴ Pejmatla papoei. Pej-iftu, me-ama jitkaech-ia'an wut, ja-iftu-aechon.

¹⁵ Pejtuak xabich nakliafan. Bronce jijasox wut, jatuak-aechon. Jesús pejjame, me-ama xabich minaposnik wut, jajum-aech Jesús pejjame.

¹⁶ Jesús pejpoklake-elel siete ithaej ki-oelsson. Japon kaechmatalusponbej espada. Japowa xabich nataelapabua'. Puexa pejxu xabich itliak. Me-ama juimt itliak wut, jaxu-aechon.

¹⁷ Xan Jesús taenx wut, okjabax japon pejwuajnalel. Me-ama tux wut, ja-an. Do jawut, najachapon pejpoklake-elel. Jawutbej najum-aechon: "¡Xam nabej nejlewlé! Xan chajiakolaxtat puexa tuadutx. Asamatkoi puexa toesaxaelenbej japoxan.

¹⁸ Xan majt jiw naboesa. Pe taj-ax Dios xan namat-et pejme dukaliajwan. Taj-ax natapaei tajjiw bu weliajwan, japi jiw tux wut infierno poxasamatapi.

¹⁹ ¡Lelde taenam-poxan! ¡Leldebej asamatkoi jachiyaxael-poxan!

²⁰ Siete ithaejt, taenampi tajpoklake-elel, japoxan jiw taen wut chiekal nejchaxoelaliajwa siete poejiwliajwa. Japi, siete poejiw, kaenanula tataefal kaepaklowaxpijiw, tajwuaian naexasiti. Siete orocandelabros, jiw japoxan taen wut, japi nejchaxoelaliajwa siete paklowaxanpijiw, japi tajjiw, tajwuaian naexasitiliajwa" —na-aech Jesús.

2

Jesús kito'apox Juan lelaliajwa carta Éfeso paklowaxpijiwliajwa

¹ Jesús, pejpoklake-elel siete ithaej ki-oelsson, siete candelabros chanuilxot, japon nakito'a wut lelaliajwan carta Éfeso paklowaxpijiwliajwa, japi pejtataeflanliajwabej, japon jum-aech ampox japiliajwa:

² "Xan chiekal matabijtax xam puexa isampoxan, nejjiw swapich. Xamal xabich nabistam Diosliajwa. Samata, nabijatam, asew jiw babijaxan is wut xamalliajwa. Nabijatam wut, nakiowa nabistam Diosliajwa. Matabijtaxbej, xamal nejwesla jiw babejchow. Xan matabijtaxbej, asew jiw pajutliajwa najum-aech wut xamalxot: 'Xanal apóstoles' —na-aech wuti, xamal japi jiw majt xapaejam. Do jawut, chiekal matabijam japi diachwuaajnokolax apóstoles-elpi. Japi asbuan jumch naekichachajbaripijiw.

³ Xamal nabijatam, tajjiwam xot. Ja-am wut, nakiowa xan naxanaboejafulam.

⁴ Pe kaeyax jumchiyaxaelen xan nejweslapox xamalliajwa. Xamal chiekal xan nanejxasink-emil. Me-ama majt xan nanejxasinkam wut, jachi-emil xanliajwa.

⁵ Samata, nejchaxoelam wut, ¡chiekal nejchaxoelde, majt xamal xabich nanejxasinkam! ¡Xan pejme chiekal nanejxasinkde! Me-ama majt xan nanejxasinkam wut, ¡ja-amsfulde! Jachi-emil wut, xamal tajjiwaximil.

⁶ Pe xan kaeyaxliajwa nejchachaemlax xamalliajwa. Me-ama xan nejwesla nicolaítas ispoxan, xamalbej ja-am, nejwesla wut nicolaítas ispoxanliajwa.

⁷ Xamal matabijasiam wut, ¡chiekal jumtaem Espiritu Santo jum-aechpox xamalliajwa! Espiritu Santo jum-aech: 'Jesús pejwuaian naexasiti nakiowa naexasisful wuti, hasta japi tux wut, japi pomatkoicha duilaxael Diosxotse' —aech Espiritu Santo" —aech Jesús Éfeso paklowaxpijiwliajwa.

Jesús kito'apox Juan lelaliajwa carta Esmirna paklowaxpijiwliajwa

⁸ Jesús chajiakolaxtat puexa ispon, japonbej pajut asamatkoi puexa japoxan toesaxael. Japon majt tux cruztat. Do jawux, Dios mat-echpon pejme dukaliajwa pomatkoicha. Japon pejme nakito'a wut lelaliajwan Esmirna paklowaxpijiwliajwa, japi pejtataeflanliajwabej, japon najum-aech ampox japiliajwa:

⁹ "Xan chiekal matabijtax nabijatampoxan, asew jiw babijaxan is wut xamalliajwa. Taenxbej, xamal kijimil wut. Pe diachwuaajnokolax xamal kimaenkam Diosliajwa. Matabijtaxbej, judíos, tajjiwa-elpi, jum-aech wut babejjamechan xamalliajwa. Japi judíos, Satanás pejiw.

¹⁰ Xamal nabijatam wut, ¡nabej nejlewlé! Xamalxot asew jeyaxaes jiw jebatat Satanás pijaxtat. Japoxan jachiyaxael, puexa xamal xapaeja wut. Japox ja-aech wut, asbuan jumch nabijasaxaelam diez matkoiyan. Pe nakiowa, xamal xan naxanaboejam wut, hasta xamal tuxam wut, pomatkoicha duilaxaelam Diosxotse.

¹¹ Chiekal matabijasiam wut Espiritu Santo jum-aechpox xamal tajjiwampim, ¡chiekal xan nanaewe'e! Espiritu Santo ampox jum-aech: 'Jesús pejwuaian naexasiti chiekal naexasisful wuti, hasta japi tux wut, japi kastikaxisal, Dios asew jiw kastika wut' —aech Espiritu Santo" —aech Jesús Esmirna paklowaxpijiwliajwa.

Jesús kito'apox Juan lelaliajwa carta Pérgamo paklowaxpijiwliajwa

¹² Jesús, kaechmataluspon espada, nataelapabua'powa, japon pejme nakito'a wut lelaliajwan carta Pérgamo paklowaxpijiwliajwa, japi pejtataeflanliajwabej, japon jum-aech ampox japiliajwa:

¹³ "Xan matabijtax xamal puexa isampoxan. Matabijtaxbej, xamal duilamxot Satanás pejiw jaxot tato'al. Jaxotam wut, nakiowa xan tajwuaian naexasisfulam. Pawulpon Antipas, japon chajia naewuaian tajwuaian. Baxael, Satanás pejiw japon boesas wut, xamal taenam. Japox ja-aech wut, xamal nakiowa kofa-emil xan tajwuaian naexasisfulampox. Samata, xan xabich nejchachaemlax xamalliajwa.

¹⁴ Pe jumchiyaxaelen xan nejweslapoxan xamalliajwa. Xamalxot asew jiw naewuajan asawuajan jiw babijaxan isliajwa, me-ama chajia profetakolna-elpon. Japon pawul Balaam. Japon xabich jiw naekichachajba. Balaam naewuajan xot, Balac fiesta is judíos tadusliajwa. Samata, japafiestatat judíos xabich babijaxan is, xael xoti pawl, idolosliajwawi. Japafiestatatbej judíos asew watho', asajiwpi, bu'moejtbejpi.

¹⁵ Asew xamalxot, xan tajjiwpi, naexasitbej nicolaits naewuajanpox. Samata, japi nejwesla kofaliajwa japi naewuajanpox, xabich sichaems xotipox.

¹⁶ Samata, jkofim babijaxan isampoxan, Dios pejme chiekal naexasisliajwam! Xamal jachi-emil wut, ja-am wut, xan tajut pasaxaelen xamalxot nabeliajwan, babejchow sarpich, espadatat, tajkaechatat matalupowatat.

¹⁷ Xamal matabijasiam wut, jchiekal naewe'e Espiritu Santo jum-aechpox naexasisliajwam! Espiritu Santo jum-aech: 'Jesús pejwuajan naexasiti nakiowa naexasisful wut, hasta japi tup wut, chaxduiyaxaelen xaeliajwa maná, moechasi. Kaenanula chaxduiyaxaelenbej papoei-ia't. Japa-ia'tmatwuajtat lelaxaelen pajelwul. Japawul asew jiw matabijaxil. Kaemutpijw, ia' nosaxaelpi, japikal matabijaxael japawul' —aech Espiritu Santo" —aech Jesús Pérgamo paklowaxpijwliajwa.

Jesús kito'apox Juan lelaliajwa carta Tiatira paklowaxpijwliajwa

¹⁸ Jesús, Dios paxulan, me-ama jitkaech-ia'an wut, itfu-aechpon. Xabich tuaknakliafanbejpon. Me-ama bronce jojaspox, jatwak-aechon. Japon pejme nakito'a wut lelaliajwan carta Tiatira paklowaxpijwliajwa, japi pejtataeflanliajwabej, japon jum-aech ampox japiliajwa:

¹⁹ "Xamal isampoxan, xan chiekal matabijtax. Asew jiw nejxasinkam. Xan chiekal nanaexasitambej. Xamal chiekal nabistambej Diosliajwa. Asew jiw pijaxtat nabijatam wut, xan nakiowa nanaexasitambej. Amwutjel kaes pejme xanliajwa nabistambej. Samata, xan nejchachaemlax xamalliajwa.

²⁰ Pe xan kaeyax jumchiyaxaelen, nejweslapox xamalliajwa. Xamal fias-emil Jezabel, babijaxan is wut. Japon pajut najum-aech asew jiwliajwa: 'Xan profeta-atowan, Dios nabixto'apowan' —aechow asbuan jumch. Japox jum-aech wut, japow asew jiw naekichachajba, xamalxot japi tajjiwpi. Japow naewuajan poejiw, japi poejiw asew watho' bu'moejsliajwa, pejwatho'a-elpi. Japow japi jiw naewuajanbej xaeliajwapi pawl, ofrenda, idolosliajwawi.

²¹ Xan piach wuaj nawetx japow kofsliajwa babijaxan isfulpoxan, Dios naexasisliajwapow. Pe japow kofs-el babijaxan isfulpoxan. Japow asew poejiw xabich bu'moejt.

²²⁻²³ Samata, japow waxae chato'axaelen kamaxtat cha-okaliajwa. Japow paxibej tupaxael xan ki-anpoxtat. Asew jiw babijaxan is wut, japow ispoxan, japi kofa-el wutbej, japi jiwbej japawaxaetat nabijasaxael. Ja-aech wut, puexa jiw, tajwuajan naexasiti, chiekal pajut matabijaxael, xan chiekal matabijtax puexa jiw nejchaxoelropoxan. Xamal kaenanula xanliajwa chiekal nabistam wut, japabichaxanliajwa xamal kaenanula chaxduiyaxaelen. Chiekal nabistpi xanliajwa, japi xabich chaxduiyaxaelen. Chiekal nabich-elpi xanliajwa, japi chaxduiyaxinillejan.

²⁴ Xamal, Tiatira paklowaxpijwam, naexasis-emil Jezabel naewuajanpoxan. Samata, xan ampox jum-an xamalliajwa. Japow naewuajan Satanás pijaxan. Samata, asew jiw babijaxan is japow pijaxtat. Kaes matabijasiapi Satanás pijaxan. Pe xamal jachi-emil. Samata, xan xabich nejchachaemlax xamalliajwa. Xamal to'axinil naexasisliajwam asanaewuajnan, tampoelpoxan.

²⁵ ¡Xamal xan naxanaboejim! ¡Pomatkoicha ja-amde, hasta xan paskax wut!

²⁶ Tajwuajan naexasiti is wut xan nejxasinkaxpoxan, hasta japi tup wut, asamatkoi japi xan to'axaelen tato'laliajwa puexa ampathatpijw.

²⁷⁻²⁸ Taj-ax nato'a ampathatpijw tato'laliajwan. Pamamaxtat tato'laxaelen xan nanaexasisliajwapi. Xan xabich kastikaxaelen jiw nanaexasis-elpi. Me-ama xan taj-ax nato'a wut, jachiyaxaelen xamalliajwabej. Samata, ¡xamalbej nejjiw chiekal tato'alde! Ja-am wut, ithaejt, nalianapijin, xamal chaxdusaxaelen.

²⁹ Xamal matabijasiam wut, jchiekal naewe'e Espiritu Santo jum-aechpox tajwuajan naexasiti jumtaeliajwa!" —aech Jesús Tiatira paklowaxpijwliajwa.

3

Jesús kito'apox Juan lelaliajwa carta Sardis paklowaxpijwliajwa

¹ Jesús, ki-oespon siete ithaejt poklalel, japon to'a Espiritu Santo siete iglesiapijwliajwa. Japon pejme nakito'a wut lelaliajwan Sardis paklowaxpijwliajwa, japi pejtataeflanliajwabej, japon jum-aech ampox japiliajwa: "Xan matabijtax xamal isampoxan. Jiw chimiajamechan jum-aech xamalliajwa. Japi jiw jum-aech: 'Sardis paklowaxpijw chiekal

naexasit Jesús pejuwajan' —aech japi jiw xamalliajwa. Pe xamal diachwuajnakolax chiekal pachaema-emil. Xan chiekal matabijtax. Majt chiekal Dios naexasis-emil xot, xamal, me-ama tupam wut, ja-am Diosliajwa.

² Samata, xamal, me-ama jelnathikampim wut, ja-amde chiekal nejchaxoelaliajwam Dios nejxasinkpoxan! ¡Dios kawuajande xamal kajachawaesfulaliajwa pomatkoicha kaes chiekal Dios xanabojaliajwam! Xan matabijtax. Xamal asbuan jumch, me-ama damlam Diosliajwa. Japoxlap Dios nejwesla.

³ ¡Chiekal nejchaxoelde, asew jiw naewuajan wut xanliajwa! Japox nejchaxoelam wut, ¡xan nanaexasi'e! Ja-am wut, ¡kofim babijaxan isampoxan! Pe kofa-emil wut, nawuajawesfula-emil wutbej tajpasax, xan chalechkal pasaxaelen xamalxot. Me-ama kithakan chalechkal pat natkowaliajwa, xanbej jachiyaxaelen, chalechkal pasaxaelen wut.

⁴ Xamal Sardis paklowaxpijwamxot, kaeswapich jiw babijaxan is-el. Samata, japi jiw, chapona-asda'nika-el wut, ja-aechi Diosliajwa, chiekal duilxoti. Samata, japi jiw asamatkoi xanxot duilaxael. Naxoeyaxaelbejpi papoei, xabich chamoeyaxan, xan tajjiw xoti.

⁵ Tajwuajan naexasiti nakiowa naexasisful wut, hasta japi tup wut, japi naxoeyaxael papoei. Xan japi pejuwalan joeyaxinil, pelfatat wullelspilis. Samata, pomatkoicha japi duilaxael Diosxotse. Xan jumchiyaxaelen japi jiwliajwa: 'Ampi xan tajjiw' —chiyaxaelen taj-ax Dios pejuwajnalel, japon pej-ángeles pejuwajnalelbej.

⁶ Xamal matabijasiam wut, ¡chiekal naewe'e naexasisliajwam Espiritu Santo jum-aechpox tajwuajan naexasitiliajwa!' —aech Jesús Sardis paklowaxpijiwliajwa.

Jesús kito'apox Juan lelaliajwa carta Filadelfia paklowaxpijiwliajwa

⁷ Jesús, xabich pachaempon. Japon puexa jiw tato'laxael. Chapaebijpon diachwuajnakolaxpox. Me-ama chajiakolaxtat majt rey David puexa israelitas tato'al, jachiyaxaelbej Jesús. Japon tapaeaxael asew jiw pasliajwa Diosxotse. Jumchiyaxaelbejpon asew jiwliajwa: "Ampi jiw pasaxael Diosxotse" —chiyaxael Jesús. Jumchiyaxaelbejpon asew jiwliajwa: "Ampi jiw pasaxil Diosxotse" —chiyaxaelbejpon. Japon pejme nakito'a wut lelaliajwan Filadelfia paklowaxpijiwliajwa, japi pejtataeflanliajwabej, japon jum-aech ampox japijliajwa:

⁸ "Xan chiekal matabijtax xamal isampoxan. Matabijtaxbej nejxanaboejaxan chiekalaelpox xanliajwa. Pe nakiowa, xamal tajwuajan naexasitam. Xanali-emil tajjiwampox asew jiwliajwa. Samata, to'axaelen xamal asew jiw naewuajnalijwam tajwuajan. Asew jiw xamal buxfiasasia wut, xan tapae yaxinil japi jiw xamal buxfiasliajwa. Samata, asew jiw naewuajnaaxaelam tajwuajan.

⁹ Asew judíos naexasis-el tajwuajan, chajia naewuajnas wuti. Samata, japi, me-ama judíos-el wut, ja-aechi. Japi judíos, Satanás pejiw. Asamatkoi japi to'axaelen brixtat nulalialjwa xamal nejwuajnalel. Ja-aech wut, japi judíos pajut chiekal matabijaxael xamal nejxasinkaxpim.

¹⁰ Xamal to'aliajwan wut, majt jum-an: 'Asew jiw babijaxan is wut xamalliajwa, ¡nakiowa xan tajwuajan naexasisfulde!' —an xan chajia xamalliajwa. Do jawux, japox ja-aech xamalliajwa. Samata, asamatkoi xabich chachoel wut, xamal kajachawaesaxaelen. Japamatkoi puexa jiw xapaexaxaes, ampathatpijiw.

¹¹ Asamatkoi xan kamtalejen pasaxoekam xamalxotsik. Samata, ¡Dios chiekal naexasisfulde, kaenanula xamal Dios chaxduiyaxaelpox asew jiw xamal kinosasamata!

¹² Tajwuajan naexasiti nakiowa naexasisful wut, hasta japi tup wut, japi duilaxael pomatkoicha Diosxotse. Jaxotse kaes nakolaxillisi. Jawut xan japi pejbu'antat lelaxaelen Dios pejuwal. Dios pijax pajelpaklowax, Jerusalén paklowax, pasaxaekpox athulelsik. Japapaklowaxwulbej lelaxaelen japi jiw pejbu'antat. Lelaxaelenbej tajwal, pajelwal, japi pejbu'antat.

¹³ Xamal kaes chiekal matabijasiam wut, ¡chiekal naewe'e naexasisliajwam Espiritu Santo jum-aechpox tajwuajan naexasitiliajwa!' —aech Jesús Filadelfia paklowaxpijiwliajwa.

Jesús kito'apox Juan lelaliajwa carta Laodicea paklowaxpijiwliajwa

¹⁴ Jesús, diachwuajnakolaxpox chapaepion. Japon chiekal chapaebij Dios pejjamechan jiwliajwa. Japon puexa isbej Dios ispoxan ampathatat. Japon pejme nakito'a wut lelaliajwan Laodicea paklowaxpijiwliajwa, japi pejtataeflanliajwabej, japon jum-aech ampox japijliajwa:

¹⁵ "Xan matabijtax puexa isampoxan. Matabijtaxbej xamal chiekal xan nanejxasinka-emilpox. Xabichbej nanejwesla-emil. Xan nanejxasinkasiam wut, ¡chiekal nanejxasinkde! O, jachi-elasiem wut, ¡kaelel diachwuajnakolax xan nanejweslade!

¹⁶ Xamal chiekal nanaexasisfula-emil tajwuajan. Samata, xamal pelsaxaelen.

¹⁷ Xamal nejchaxoelam wut, jum-am: 'Xan kimaenkax. Puexa chiekal nawepachaem isxopoxan. Samata, xan chinax kaeyax nawewe'pa-el' —am xamal, nejchaxoelam wut. ¿Pe

ma-aech xotbejkat xamal najut chiekal matabija-emil xabich nabijatampox Diosliajwa? ¿Pe ma-aech xotbejkat xamal najut chiekal matabija-emil Diosliajwa xabich kijmilpox, itliaklawampoxbej, chiekal bu'jumchalaelpampoxbej?

¹⁸ Samata, xamal naewhajnax kaes chiekal matabijaliajwam Dios. Ja-am wut, xabich kimaenkaxaelam Diosliajwa, Dios chiekal xanaboejam wut. Xamal naewhajnaxbej chiekal naexasisfulaliajwam xan cruztat tuxpox xamalliajwa. Ja-am wut, Dios xamal beltaeyaxael babijaxan isampoxanliajwa. Ja-am wutbej, naxoeyaxaelam papoei Diosliajwa. Xamalbej naewhajnax Espiritu Santo kajachawaesliajwa chiekal tataeflialiajwam Dios pijaxan. Ja-am wut, Espiritu Santo pijaxtat kaes chiekal taeyaxaelam Dios pijaxan. Me-ama waxaewhaintat najut na-iffuwuam wut, jachiyaxaelam chiekal taelliajwam.

¹⁹ Xan puexa jiw, nejxasinkaxpi, japi is wut pachaema-elpoxan, xan japi jiw fiatx. Japi babijaxan is wutbej, xan japi jiw kastikax. Samata, ¡kamta kaelel chiekal kofim padujnejchaxoelaxan! ¡Dios pejme chiekal naexasisfulde!

²⁰ ¡Xan najumtaem chiekal! Aton nejxat pat wut, japon lapox jumtaenam wut, xamal ba fafasaxaelam japon aton laliajwa. Xanbej lesian nejmatruatanxot. Xan leyax natapaeyam wut, pomatkoicha xamal chalaxaelen.

²¹ Xan taj-ax Dios naexasisfulax. Samata, xan ekx taj-ax Dios pejpoklalel athuxotse tua-ekaxtat, taj-ax suapich, puexa tato'laliajwan. Tajwuajan naexasiti, japibej nakiowa naexasisful wuti, hasta japi tux wut, japi duilaxael pomatkoicha Diosxotse. Japi jiw xan tapaeyaxaelen, xan suapich, jiw tato'laliajwapi.

²² Xamal matabijasiam wut, ¡chiekal naewe'e naexasisliajwam Espiritu Santo jum-aechpox tajwuajan naexasitiliajwa!" —aech Jesús Laodicea paklowaxpijwliajwa.

4

Juan taenpox Diosxotsepi, japi jum-aech wut chimiajamechan Diosliajwa

¹ Baxael, xan pejme taenx Diosxotse fafachpox. Me-ama xamoejtax wut, ja-an, japox taenx wut. Pejme jumtaenx Jesús, majt xanliajwa jum-aechpon. Japon naksiya wut, pejjame, me-ama trompeta, jathia-aechox. Do jawut, najum-aechon: "¡Julaman xanlelsan! Xam itpaeyaxaelen, asamatkoi machiyaxael japathatxotdik" —aech Jesús xanliajwa.

² Jawut tajut chiekal matabijtax Espiritu Santo nachalapox. Xan taenx, Dios ek wut athuxotse pejtua-ekaxtat.

³ Dios xabich itliak japatua-ekaxtat. Me-ama ia', ommaenkpi, pawali jaspe, cornalina pawulibej, ja-itdel-aech japa-itliakax. Xan jaxot taenx japon pejtua-ekaxtabijlasik alwaera. Japa-alwaera xabich nakliafanpox. Me-ama esmeralda wut, ja-itdel-aechpox japa-alwaera.

⁴ Japatua-ekaxxot asatua-ekaxan masajiasnuil, veinticuatro tua-ekaxan. Japatua-ekaxantat chalal veinticuatro ancianos. Papoei naxoeipi. Kaenanula matlua'api oro-corona.

⁵ Dios ekxot xabich nakliafbala chamx. Dios naksiya wut, me-ama chamx jumsia wut, jajum-aechon. Dios pejwuajnael siete baenthaeyan kabuan-aechpi, tamdadusnuil. Japabaenthaeyan, jiw taen wut, nejchaxoelaliajwa Espiritu Santo pejpamamax.

⁶ Dios ekxot, me-ama puka pinjiyax, kabuan-aech. Japox xabich thujal. Tinkbejpox.

Dios pejtua-ekaxxot masajiasnuil cuatro choef kabuan-aechpi. Japi choef xabich pona itfu.

⁷ Cuatro choef kabuan-aechpixot, kaen japixot, nuth pasoeyan kabuan-aech. Asan japixot, tor kabuan-aech. Asan, trespijn, atonxu wut, jaxu-aechon. Asan, taxdukapijn, me-ama kakoef papun wut, ja-aechon.

⁸ Cuatro choef kabuan-aechpi, kaenanula seis ba'an. Pejba'anmatwuajtat, patulelbej, xabich itfu. Japi matkoi, madoibej, buxkofa-el, jum-aech wuti Diosliajwa:

"Xabich pachaempon wajpaklon Dios. Xabich mamnikbejpon. Xajap puexa isliajwa. Amwutjel dukon. That is-el wut, jawutbej japon duk. Pomatkoichaliajwabej dukaxaelon" —aech japi Diosliajwa, cuatro choef kabuan-aechpi.

⁹ Cuatro choef kabuan-aechpi jum-aech Diosliajwa: "¡Xam kaenam jiw tato'lam! ¡Xam puexa jiw sitaenponambej! ¡Isampoxan xabich pachaem xanalliajwa!" —aech choef kabuan-aechpi Diosliajwa.

¹⁰ Do jawux, veinticuatro ancianos brixtat nuil Dios pejwuajnael, pomatkoicha dukpon pejwuajnael, itraeliajwapi sitaeyax. Jawut jaxot kaenanula veinticuatro ancianos pejcorona jolpi owaliajwa Dios pejwuajnael. Japibej jum-aech Diosliajwa:

¹¹ "Tajpaklon Dios, xam ampathatat puexa isam. Amwutjelbej puexa japoxan ja-aechful. Japoxan isam, isasiam xot. Samata, xam kaenam puexa jiw chiekal tato'lamponam.

Samata, puexa jiw xam sitaen. Xam xabich mamnikambej” —aech ancianos Diosli-
ajwa.

5

Dios xa-ekpox pelfut athuxotse

¹ Xan taenx Dios athuxotse, pejtua-ekaxtat ek wut. Pejpoklake-elel xa-ekon chaxkoeyasfut. Japafut pakchowax. Lels matwajlel, patulelbej. Kaenanula wujajan toepxot, xape'tas kaeyax sello taesamatade asawujajan. Ja-aech kaenanula xape'aspoخان siete wujajan chaxkoeyasfutxot.

² Jawut taenx ángel, xabich mamnikpon. Japon wujajnachaemt wut, pinjametat jum-aechon: “¿Achankat pachaem xape'taspoخان thialnaliajwa siete wujajan xaljoeliajwa?” —aechon.

³ Aton, xabich pachaempon, ajil ampathatat xape'taspoخان thilnaliajwa japawujajan xaljoeliajwa. Thatbaxotatbej ajil. Tupi pej-aelan, japi pejtuajnuxotdikbej ajil.

⁴ Samata, xan xabich nowx, ampathatat aton ajil xot xabich pachaempon japapelfut xaljoeliajwa.

⁵ Jawut kaen anciano ancianospixot najum-aech: “¡Kaes nabej noe! Kaen Judá pamon, japon xabich pachaem japapelfut xaljoeliajwa. Japon, rey David pamon. Japonbej malecha Satanás. Samata, pachaempon siete xape'taspoخان thialnaliajwa” —aech anciano xanliajwa.

⁶ Jawut xan taenx Cordero, oveja pajelxulan, nuk wut Dios ekxot wujajnalel. Japon nukxot, cuatro choef kabuan-aechpi masajiachpon. Choef kabuan-aechpi nuilxotbej, masajiach veinticuatro ancianos. Cordero xua'laspoخان bu'wajelnukon. Japon siete mat-etje. Siete itfutejbejpon. Japi itfu, Dios pej-Espíritu Santo. Japon Espíritu Santo, Dios to'akason potuajnuachaliajwa.

⁷ Japon Cordero kaes mox soepan Diosxot kifisliajwa chaxkoeyasfut. Jawut japon kifit japapelfut, Dios pejpoklake-elel xa-ekfut.

⁸ Cordero kifit wut japapelfut, jawut cuatro choef kabuan-aechpi, veinticuatro ancianos suapich, brixtat nuil cordero pejwujajnalel. Japi ancianos kaenanula xanuilpi arpa dakaliajwa. Kaenanula xanuilbejpi orocopa. Japacopan wulus pawulpi incienso. “Incienso” —aech wut, jumchiliajwapox: “Jiw kawujajanpoخان Dios, japi jiw Dios naexasiti” —chiliajwapox.

⁹ Japi pajelajuit jajuw Corderoliajwa. Japajajuitat jajuw wut, jum-aechful: “Xam pachaemam xot, Dios tapaei chaxkoeyasfut kifisliajwam, xape'taspoخان thilnaliajwambej. Xam japoخان isliajwam pachaemam, asajiw xam boesa xot. Do jawut, tupam wut cruztat, motam puexa jiw bu'welialjwam, japi jiw Dios pejiwaliajwa. Japi jiw duil potuajnuachan. Kaenanula kaematanpijw naksiya pejjamekolaxan.

¹⁰ Xam to'am japi jiw sacerdotesiajwa, wajDios tanbichliajwapi. Xam to'ambej japi jiw tato'laliajwa puexa ampathatpijw” —aechful ancianos jajuitat, jajuw wut Corderoliajwa.

¹¹ Dios pejtua-ekaxxot cuatro choef kabuan-aechpi masajiat. Ancianosbej masajiat cuatro choef kabuan-aechpixot. Dios pej-ángeles masajiat ancianosxot. Dios pej-ángeles xabich pin-iakola. Japi millones.

¹² Xan jumtaenx ángeles, pinjametat jum-aech wut Corderoliajwa. Jum-aechi: “Ampon Cordero, xabich pachaempon, boesas. Samata, Dios tapaeispon japon Cordero puexa ampathatpijw tato'laliajwa. Tapaeisbejpon kimaenkaliajwa, puexa matabi-
jsliajwabejpon. Tapaeisbejpon xabich pejpamamaxliajwa. Japon Cordero tapaeis-
bej jiw pomatkoicha jumchiliajwas: ‘Xam xabich pachaemam, nakajachawaetam
xot’ —chiliajwas” —aech ángeles Corderoliajwa.

¹³ Jumtaenxbej puexa Dios ispi, athuxotpi, thatxotpijbej, tupi pej-aelan, japi pejtuajnuxotbej, marxotbej. Puexa japi jum-aech:

“Dios, ekpon pejtua-ekaxtat, Corderobej, japi kolenjeliajwa jumchiyaxaes: ‘Ampi kolenje xabich pachaem. Xatis sitaeyaxaesbejpi. Xabich itliaki. Xabich pejpamamaxbejpi. Jachiyaxaelbejpi pomatkoichaliajwa’ —chiyaxaes japijaliajwa” —aech puexa Dios ispi.

¹⁴ Do jawut, cuatro choef kabuan-aechpi jum-aech: “¡Jasox nej ja-aeché' Diosliajwa, Corderoliajwabej!” —aechi. Jawut veinticuatro ancianos brixtat nuil Dios pejwujajnalel. Jum-aechbejpi Diosliajwa, Corderoliajwabej: “Diachwujajnakolax xamal xabich pachaemam” —aech puexa japi.

6

Chaxkoeyasfutat xape'taspoخان siete sellos

¹ Xan taenx, Cordero thialan wut pelfut xape'taspox, matxoelasello. Do jawutlejen, jumtaenx kaen, choefan kabuan-aechpon, naksiya wut. Japon pejjame, me-ama chamx jumnsia wut, jum-aechon, jum-aech wuton kawaeipijinliajwa: "¡Xabua't!" —aech wuton choefan kabuan-aechponliajwa.

² Jawut taenx kawaei papoeyan. Kawaei tua-ekpon, japon xafol fadoet. Chaxduchpon corona matlua'sliajwa. Jawut chijiapon nabeliajwa, padaelmajiw suapich. Naba wut, padaelmajiw xabich malech toeton.

³ Do pejme Cordero wachakalpijx xape'sax thialan. Jawut jumtaenx wachakalpijin, choefan kabuan-aechpon, jum-aechpox. Japon, choefan kabuan-aechpon, jum-aech: "¡Xabua't!" —aechon asan kawaeipijinliajwa.

⁴ Jawut xan taenx, asan chapa'an wut kawaei pasoeyantat. Dios pijaxtat japon kawaeipijin ampathatpijiw to'apon nakaewa nabeliajwa. Jawut Dios chaxdutbej espada kawaeitat chatponliajwa.

⁵ Do jawut, Cordero pejme asaxape'sax thialan. Jawut jumtaenx trespijin, choefan kabuan-aechon, jum-aech wut: "¡Xabua't!" —aech wuton asan kawaeipijinliajwa. Jawut xan taenx, asan chapa'an wut. Tua-ekon kawaei, pafoyan. Japon xa-ek balanza xajajuiliajwa.

⁶ Pejme jumtaenx, cuatro choefan kabuan-aechpixot kaen jum-aech wut. Jum-aechon: "Kaematkoi bichaxliajwa pa-omprox amwutjel asbuan jumch xajur wuajsliawam kaekilo trigo. Xamal wuajs-elasiam wut trigo, xajuraxael wuajsliawam tres kilos cebadafu. Pe xajura-el chawuajsliawam pasimint, vinominbej. Japox koloeyax chawuajsliawam, kaes xabich ommaenkaxael" —aechon.

⁷ Do jawut, Cordero cuartopijax, xape'sax, thialan. Thialan wut, jawut jumtaenxbej, cuatropijin, choefan kabuan-aechpon, jum-aech wut: "¡Xabua't!" —aech wuton asan kawaeipijinliajwa.

⁸ Jawut xan taenx, asan chapa'an wut. Japon tua-ek kawaei pawaerlan. Japon pawul Patupax. Asan wuchakal fulaen. Japon pawul Turitujnu. Cordero pijaxtat japi kolenje xabich jiw beyaxaelpi, una cuarta parte ampathatpijiw. Samata, japi pijaxtat xabich jiw tupaaxael, baes wuti. Xabich jiw tupaaxaelbej pejlit, waxaetatbej. Xabich jiw kajsaxesbej pejmachoeff.

⁹ Do jawut, Cordero quintopijax, xape'sax, thialan. Thialan wut, xan taenx jiw baespi, oel wuti altarbuxfaltat. Japi jiw baes, naewuajan xoti Dios pejjamechan asew jiwliajwa.

¹⁰ Jiw baespi pinjametat jum-aech Diosliajwa: "Xam xabich pachaemam. Chajia najum-ampoxan xam isam. ¿Masmatkoiyan suapichkat we'p xam jiw babejchow kastikaliajwam, ampathatpijiw? ¿Maswutbejkat xanal nachamamosaxaelam xanal nabapi, japi jiw xam beliajwam, kastikaliajwam?" —aechi Diosliajwa.

¹¹ Do jawut, japi jiw chaxduws naxoeliajwa papoei. Jawut Dios jum-aech japiliajwa: "¡Xamal damlathulde! ¡Wuajnowesfuldebej! Asew tajjiwpijbej we'pfuk beliajwas, japi nabistpi Jesucristoliajwa" —aech Dios japi jiwliajwa.

¹² Do jawut, Cordero sextopijax, xape'sax, thialan. Thialan wut, that xabich najaet. Juimt matkoiijin xabich pafoyan. Me-ama yiafbu', pafoyax, ja-aech juimt. Juimt madoipijin xabich pasoyan. Me-ama jal, ja-aech, juimt madoipijin itliak wut.

¹³ Ithaej xabich natcholan that poxadik. Me-ama palolbaech pi'ba wut joewa, ja-aech ithaej, natcholan wut that poxadik.

¹⁴ Thatbaxo kijchas. Me-ama pelfut xakoeyas wut, ajsinat wut, ja-aech thatbaxo. Puexa pinamuxan, tanaetanbej, asalel xaliabxas.

¹⁵ Puexa reyes, ampathatpijiw, namoecha pinamuxanwuajanxot, ia'botanbuxfalantatbej. Reyes namoechaxot, jaxotbej namoecha puexa paklochow, puexa soldawpaklochowbej, jiw kimaenkpijbej, asew jiw xabich sitaenspibej. Puexa esclavos, esclavos-elpijbej, namoecha jaxot.

¹⁶ Jiw namoechapi jum-aech pinamuxanliajwa, ia'botanliajwabej, jumtaeliajwas: "¡Xanal tajmatwuajasiak natcholnamik namoechaliajwam, Dios, ekpon pejtua-ekaxtat, nataesamata, Cordero nakastikasamatabej, xabich palala xoti!"

¹⁷ Matkoi pat, Dios xabich jiw kastikaxaelmatkoi. Samata, kaen xanalxot weyaxil, xanal nakastika wut" —aech namoechapi.

7

Israelitas makmarkaspox Dios pejsellotat

¹⁻² Baxael, taenx cuatro ángeles. Japi tapaeis that tabejsliajwa, marbej. Japi kaenanula xabich atuaj nuil. Kaen nuk be'klel. Asan nuk bi'alel. Asan nuk beselel. Asan nuk bi'alel. Japi it-el joewa wikasamata puexa ampathatpijiwxot, puexa naechan uafwilbasamatasbej.

It-elbejpi joewa wikasamata marxot. Do jawut, taenx asan ángel, fulaen wat juimt julanllesan. Japon ángel xalaen Dios pejsello, pomatkoicha dukpon pejsello. Ángel taen wat cuatro ángeles, pinjametat jum-aechon japilijawa:

³ “Xatífuk kitoes-esal Dios pejjiw makmarkaspo. Samata, ¡xamal nabej tabejsfuk that, mar, naechanbej!” —aech ángel, Dios pejsello xalaenpon.

⁴ Do jawux, ángeles kitoet wat jiw makmarkax, xan jumtaenx jassuapich jiw makmarkaspo Dios pejsellotat. Makmarkas ciento cuarenta y cuatro mil israelitas.

⁵ Israelitas makmarkaspixot, makmarkas doce mil Judá pamojiw. Doce mil Rubén pamojiwbej makmarkas. Doce mil Gad pamojiwbej makmarkas.

⁶ Makmarkasbej doce mil Aser pamojiw. Makmarkasbej doce mil Neftalí pamojiw. Makmarkasbej doce mil Manasés pamojiw.

⁷ Makmarkasbej doce mil Simeón pamojiw. Makmarkasbej doce mil Leví pamojiw. Makmarkasbej doce mil Isacar pamojiw.

⁸ Makmarkasbej doce mil Zabulón pamojiw. Makmarkasbej doce mil José pamojiw. Makmarkasbej doce mil Benjamín pamojiw.

Xabich jiw, pin-iakola, papoeipox naxoew

⁹ Do jawux, xan xabich jiw taenx, makmarkaspi Dios pejsellotat, potuajñuchanpijw. Kaenanula japatuañuchanpijw xabich pinamutan. Japi nuil Dios pejtua-ekax wuajnalel, Cordero wuajnalelbej. Puexa japi papoeikal naxoei. Japi xabich pin-iakola xot, kaen xajupaxil japi jiw xajulijawa.

¹⁰ Puexa japi pinjametat jum-aech:

“WajDios, ekpon pejtua-ekaxtat, Corderobej, japi nakbu'weyaxael” —aechi.

¹¹ Dios ekxot masajiasnuil cuatro choef kabuan-aechpi. Japi choef kabuan-aechpixot ancianos masajiasnuil. Japi ancianosxot masajiax ángeles. Puexa japi brixtat nuil wat, sat makxabijnik.

¹² Sitaen xot, jum-aechi Diosliajwa:

“Dios, xam diachwuajnakolax xanal nabu'weyaxaelam. Samata, pomatkoicha xamliajwa gracias-an. Xam pachaemam. Xabich puexa matabijtambej. Samata, xanal xam xabich sitaenx. Xam puexa jiw tato'lambej. Pomatkoicha xabich mamnikambej. ¡Japox nej ja-aech' xamliajwa!” —aechi Diosliajwa.

¹³ Do jawut, kaen anciano nawuajnachaemt wat, jum-aechon: “¿Masikat ampi jiw, papoei naxoew? ¿Amxotkat ampi jiw fulaen?” —na-aechon.

¹⁴ Xan jumnotx wat, jum-an: “Xam chiekal matabijtam” —an xan. Samata, japon anciano najum-aech: “Japilap xabich nabijat, that toep wat. Japi jiw naexasitpi Cordero tæppox japi bu'weliawas. Samata, japi naxoei papoei, bu'wuajanjil xotlisi Diosliajwa.

¹⁵ “Samatabej, japi jiw nuil Dios pejtua-ekaxtat ekxot wuajnalel. Nabichfali Dios pejtemplobatat matkoi, madoibej. Japi jiw Dios tataeflafulaxaes pachaema-elpoxan tapasasamatas.

¹⁶⁻¹⁷ Japi tataeflafulaxaes xoti Cordero, japon nukpon Dios pejtua-ekaxtat ekxot wuajnalel, kaes liboejtaeyaxilpi. Kaes minsilaxilbejpi. Masxaeyax kaes bu'foenaxisalbejpi. Cordero japi buflaeyaxael satlel minan nakakolsan poxade. Samata, jaxot japi jiw xabich nejchachaemlaxael. Majt nowpi, japi kaes noeyaxil” —aech anciano xanliajwa.

8

Séptimopijax, xape'sax, xakoeyasfutat

¹ Anciano suapich, nospaeixpox buxtoetx wat, jawut xan taenx Cordero, thialan wat taxdukaxape'sax xakoeyasfutat. Do jawut, Diosxotse xabich buansisjisnat. Japox ja-aech media hora.

² Do jawut, xan taenx siete ángeles, Dios pejwuajnalel nuil wati. Japi kaenanula chaxduws trompeta.

³⁻⁴ Baxael, asan ángel fulaen. Japon ángel xalaen, me-ama orobaemt, japatutat bowaliajwa incienso. Nukon altar wuajnalel. Xabich chaxduwson incienso bowaliajwa altarmatwuajtat. Japox altar isas orotat. Japox nuk Dios pejwuajnalel. Ángel incienso bot wat, japa-itnumtat matajul, Dios pejjiw kawuajan wat jum-aechpoxan.

⁵ Do jawut, ángel wulut baext altarjtdelan. Japajtdelan ángel thokcha that poxadik. Jawut xabich chamx nakliafbala. Jumse'balabej. Satbej najaat.

Seis ángeles kaenanula nababapox trompeta

⁶ Siete ángeles kaenanula thilt nababeliajwa trompeta.

⁷ Kaen ángel matxoela nababa trompeta. Jawut xabich granizo thokchikas that poxadik. Japagranizo, jit swapich, matnatacholan, jal swapichbej. Japagranizo natacholan wut, me-ama iam thilan wut, ja-aech. Japagranizo jajaera. Xabich thunkbejpi. Jawut that, la tercera parte, toejwas, naechanbej. Toejwasbej pola, majwa-elpi.

⁸ Do jawux, asan ángel nababa trompeta. Do jawutbej, taenx muax pinjiyax, tamdadut wut jakabuan-aechox. Japamuax fo'akas mar poxadik. Jawut la tercera parte, mar, itjal.

⁹ Samata, la tercera parte marxoti, baxibej, xabich tup. Ja-aechbej, la tercera parte toejwas wut barkammochan marxot.

¹⁰ Baxael, asan ángel, trespijin, nababa trompeta. Jawutlejen ithaejt toejwas, jopafal wut. Jopdik thatel. Jopxot, la tercera parte, toejwas nawelan, satlel minan nakakolsanxotbej.

¹¹ Japa-ithaejt pawul Xasaxa-ithaejt. Puexa nawelanxot, satlel minan nakakolsanxotbej, japa-ithaejt jopxot, min xabich xasaxnik. Japamin jiw af wut, xabich chawulatup.

¹² Asan ángel, cuatropijin, nababa trompeta. Jawut juimt matkoipijin, madoipijinbej, kaetafa itkua'nik. Ja-aech wut, chiekal itliaka-el. Ithaejbej kaetafalel itliaka-el. Cuatro horas juimt matkoipijin, juimt madoipijinbej, itliaka-el.

¹³ Do jawux, taenx kakoef, athukal fulaen wut. Pinjаметат jum-aechon: "Ampathatpijiw xabich nabijasaxael, a sew, tres ángeles, kaenanula nababa wuti trompeta" —aech kakoef.

9

¹ Baxael, asan ángel, cincopijin, nababa trompeta. Jawut xan taenx, asan ángel fulaek wut that poxadik. Me-ama ithaejt jopafal wut, ja-aechon. Japon ángel chaxduch llave, pinamuthfapijax. Japox muth chinax matduka-el.

² Japallavetat fafaton pinamuth. Do jawut, japamuthxotsin xabich itnum nakolin. Me-ama lul pinjiyax lautas wut, xabich itnum wut, ja-aechox. Japox itnum it-el thatbaxo juimt matkoipijin itkua'nikaliajwa.

³ Japa-itnumxot xabich pin-iakola sui' nakola. Potuajnucha japi sui' xajup. Japi sui' tua-epi. Samata, xajupi jiw pajlaliajwa. Me-ama afu, kabuan-aech japi sui'.

⁴ Japi sui' jumtis: "¡Nabej tabejs pola, naexbej, naechanbej! ¡Dios pejsellotat jiw makmarka-esalpi, japikal tabeje!" —tis, japi sui' to'as wut.

⁵ Japi sui' tapae-esal, jiw pajal wut jiw chatupaliajwa. Pe japi sui' tapaeis, jiw pajal wut cinco juimtje xabich xaenkaliajwa. Me-ama afu piafda wut, jaxae-aech japi sui'.

⁶ Jiw, pajlasi, nejchaxoelaxael: "¡Xan xabich nawexaenk. Samata, tupasian kaes pejme paxaechax boejaeflasamatan!" —chiyaxaeli, nejchaxoel wut. Pe Dios tapaeyaxil japi jiw chatupaliajwa.

⁷ Japi sui' kawaei kabuan-aech. Patiyaxan xafafaspi. Me-ama nabeyax poxade fulaeliajwa wut, ja-aech japi sui'. Sui' pejmatnaetanxot, me-ama orocorona matlua'a wut, jamatnae-aechi. Sui' pejxubej, me-ama jiwxu wut, jaxu-aechi.

⁸ Japi sui' lakasnikbej. Me-ama watho' lakasnikpi, jala-aech japi sui'. Sui' pejbua'anbej, me-ama nuthbua'an wut, jabua'-aechi.

⁹ Japi sui' chanlaelabej pabok, xua'las wut xakolasamatas. Pejba'anbej xabich thiaxan-el. Me-ama kawaei zorra xadaduk wut, nabeliajwa fol wut, jaba' thia-aech japi sui'.

¹⁰ Tua-ebejpi. Me-ama afu, jatua-e-aechi. Japi sui' pejtua-etat pajal wut, jiw wexaenkaxaes cinco juimtje.

¹¹ Ángel, pinamuth tataeflan, chinax matduka-elmuth, japon japi sui' tato'al. Hebreojametat japon ángel pawul Abadón. Griegojemetat pawulon Apolión.

¹² Matxoelapijax babijax toep. Pefuk we'p koleyax babijax pasliajwa ampathatat.

¹³ Pejme asan ángel, seispijin, nababa trompeta. Do jawut, jumtaenxbej jamekal, jum-aech wut altaxotdin. Japox altar isas orotat. Nukox Dios pejwuajnalel. Japa-altarmatwajtat, kaenanula esquinaxot nuil, me-ama pakmat-e, jasi. Japacuatro mat-exot japajame jum-aech wut, jumtaenx.

¹⁴ Japajame jum-aech seispijinliajwa: "¡Cuatro ángeles, kuspi pinjiyax nawelbabu'xot, japi jolde! Japox nawel pawul Éufrates" —aechox altaxot.

¹⁵ Do jawut, japi ángeles jols, pejmatkoi wepach xot japi ángeles beliajwa xabich jiw, la tercera parte ampathatpijiw. Japi ángeles xabich piach wuajnwet japox isliajwa.

¹⁶ Samata, jawut japi ángeles kito'api soldaw potuajnuchanpijiw jiw beliajwa. Jumtaenx doscientos millones soldaw kito'aspo. Chijia wuti, kawaeitat chafolpi.

¹⁷⁻¹⁸ Ja-aech japox, masoxtat taenx wut, soldaw chaflaech wut kawaeitat. Japi mati-afxafafas patiyaxan, padaelmajiw xaa'balas wut xakolasamatas. Japi kaenanula matiafx-afafas pasoeiyax, pathoeiyaxbej, pawaelax saapichbej. Kaenanula japi pejkawaei, pejmat-naetan, me-ama nuthmatnaetan wut, jamatnae-aech japi sui. Kawaeikaechanxot kaech-nakakolas jit, itnuman, azufre-itnumanbej. Japoxantat japi xabich jiw, potuajnuhanpijiw, matkaejwas.

¹⁹ Japi kawaei pejto'thimatduilxot, me-ama jommatnaet wut, jatothi-oef-aech jiw lik-laliajwas. Samata, jiw liklas wut, xabich jiw tap. Jasoxtat japi kawaei xabich jiw tabejt pejkaechantat, pejto'thitantatbej.

²⁰ Asew jiw, tupa-elpi japoxtat, japi kofa-el babijaxan ispoxan. Kofa-elbejpi dep kawuajanpoxan, idolos kawuajanpoxanbej. Japoxan idolos isas orotat, platatat, bron-cetat, ia'antat, naechantatbej. Idolos asbuan jumch idolos. Samata, japoxan taeyaxil. Jumaeyaxilbejpoj. Laejaxilbejpoj.

²¹ Jiw, namapi ampathatat, kofa-elbejpi asew jiw bapoxan, pinjoe'axanbej, asew watho' bu'moejtpoxanbej. Kofa-elbejpi natkwaliajwa.

10

Ángel xafolpox xakoeyasfut, cha-aelfut, lelspx

¹ Do jawut, xan taenx asan ángel, pamaman, fuloek wut athulelsik itloejentat. Pejmat-naetabijlasik alwaera duk. Pejbe, me-ama jit tamdadut wut, jabe-aechon. Xunakthianbejpon. Me-ama juimt nakthian wut, jaxu-aechon.

² Xanukon pelfut, cha-aelfut, lelspx. Japafut ba'tas. Majt japafut xakoeyas. Poklatuaklel tuaknoton marminmatwajtat. Soenatuaklel tuaknoton satat.

³ Japon ángel xabich nejlat. Nejlat wut, me-ama nuth jumbu't wut, jajum-aechon. Japox jumtaenx wut, chamx siete veces xabich jumse'bala.

⁴ Do jawut, xan lelasian chamx jum-aechpox. Pe jawut, asajame jumtaenx athulelsik najum-aechsik wut. Japajame najum-aech ampx: "¡Asew jiw nabej chapae' jumtaenampon, chamx siete veces jumse'balapoxan! ¡Japoxanliajwa nabej lelabej, jumtaenampon!" —aech japajame xanliajwa.

⁵⁻⁶ Japon ángel poklalel muaxxachose wut, jum-aechon: "Dios, pomatkoicha dukpon, japon thatbaxo is, puexa nejmach-athuotpijbej. Isbejpon that, puexa nejmach that-otpijbej. Isbejpon mar, puexa nejmach marxotpijbej. Ampox jumchiyaxaelen, diachwajnakolax, xan jum-an xot Dios pijaxtat. Dios chajia jum-aechpox moxlisox pasliajwa.

⁷ Pejme asan ángel, sietepijin, trompeta nababeyax tuadut wut, jawut Dios tuadusaxael isliajwa puexa chajiakolaxtat nejchaxoelpoxan. Jawutbej, tuadusaxael puexa profetas jum-aechpoxan jiwliajwa" —aech ángel, poklalel muaxxachosnik wut.

⁸ Majt jumtaenxjame pejme athulelsik najum-aech: "¡Ángel, martat tuaknotpon, satatbej, japon mox soepande kifisliajwam japacha-aelpelfut, ba'tasfut!" —aechox, athulelsik najum-aech wut xanliajwa.

⁹ Do jawut, xan mox soepandax japon ángel. Xan wuljowx japapelfut nachax-dusliajwapon. Wuljowx wut, xan najum-aechon: "¡Maj! ¡Xaembej! Xaelam wut, kaechxathu'axaelam. Me-ama miel wut, kaechxachiyaxaelam. Do jawux, xaelam wut, nejwoejtat xasaxnikaxael. Samata, chawulawoejxaelnaxaelam" —aech ángel xanliajwa.

¹⁰ Do jawut, xan ángel kifitx japapelfut. Xaelx wut, chiekal kaechxathu'an. Me-ama miel wut, jakaechxa-an. Biajlx wut, xasaxnik tajwoejtat.

¹¹ Jawut ángel pejme najum-aech: "¡Puexa jiw xam chapaem Dios jum-aechpoxan! Japoxan asamatkoi jachiyaxael xabich asatuaajnuhanpijiwliajwa, asajamechan naksiyapiliajwabej, reyesliajwabej" —na-aech ángel, jum-aech wut japoxan xanliajwa.

11

Asamatkoi kolenje aton jiw naewuajnaelapox Dios pejjamechan

¹ Do jawut, japon ángel nachaxdud naeya xajuiliajwan. Do jawut, najum-aechon: "¡Nande xajuiliajwam Dios pejtemploba, altarbej! ¡Jiw xajuimbej Dios pejtemplobaxoti, japi jiw Dios kawuajanpi!

² Dios tapaei judíos-elpi japatemplobafulmaktxot pasliajwa. Samata, ¡nabej xajajui' templobafulmakt! Asatuaajnuhanpijiw, judíos-elpi, pasaxael Jerusalén paklowaxxot. Japi jiw duilaxael cuarenta y dos juimtje japapaklowaxxot.

³ Asamatkoi to'axaelen japapaklowaxxotade kolenje aton. Japi kolenje naxoeyaxael papopa. Japi naewuajnael jiw Dios pejjamechan mil doscientos sesenta matkoiyan" —na-aech ángel.

⁴ Dios pejuuajnalel kole-olivonae nuk. Jaxot koloeyax candelabrobej. Japoxan, kolecan-delabro, kole-olivonaebej, jiw taen wut, nejchaxoelaliajwa japi kolenje, Dios to'axaespi, japi jiw naewuajnalajwa Dios pejjamechan.

⁵ Japi, kolenje, padaelmajiw besias wut, pejkaechaxot jit kaechnakakolsaxaespi padaelmajiw matkaejwaliajwas. Japoxtat xabich nejmachjiw tuxaxael, besias wuti japi kolenje.

⁶ Japi kolenje naewuajan wut Dios pejjamechan, xajuxaxael Dios pijaxtat piach iam thilna-elaliajwa. Xajuxaxaelbejpi min jal itxalixaliajwa. Japi kolenje nejxasink wut asew jiw chapasliajwas pachaema-elpoxan, japi jiw chalechkal chapasaxaes japoxan.

⁷ Do jawux, japi kolenje Dios pejjamechan naewuajna x buxtot wut, pejmachoe fan, babejkan, nakolsaxoen pinamuthxotsin, chinax matduka-elmuthxot. Jawut pejmachoe fan nabeyaxael, japi kolenje suapich. Pejmachoe fan malechaxael japi kolenje, naba wuton, japi suapich. Samata, japi kolenje tuxaxael, baes wuti.

⁸ Japi kolenje tux wut, oelaxael pinjiyax, Jerusalén paklowaxthialaxxot. Japapaklowaxxot majt wajpaklon kimatamatlas cruztat. Asew jiw jum-aech Jerusalén paklowaxliajwa: "Sodoma paklowax" —aech jiw. O, jum-aechbejpi: "Egipto tuajnu" —aechbej jiw Jerusalén paklowaxliajwa, Jerusalén paklowaxpijiw, xabich babijaxan is xot.

⁹ Japi kolenje tres matkoi y medio oelaxael paklowaxthialaxxot. Potuajnu chanpijiw taeyaxaespi, oel wut. Jiw tapaeayaxil japi muthaliajwas.

¹⁰ Japi kolenje be-esal wutuk, japi naewuajan wut jiw Dios pejjamechan, japi, me-ama jiw xabich taliat wut, jachiyaxaeli. Samata, xabich jiw nejchachaemlaxael, taens wuti baespo x. Do jawut, japi kolenje tux wut, padaelmajiw, jiw babejchow, fiesta isaxael. Jawutbej nakaewa malech nachaxduiyaxaeli.

¹¹ Jawux, tres matkoi y medio wut, japi kolenje Dios mat-eyaxaes pejme duilaliajwa. Japi nana wut, jiw belwanaxael, japox taen wut.

¹² Do jawux, japi kolenje jumtaeyaxael, pinjame athulelsik jumtiskas wuti: "Julaman xanlelsan!" —tiskas wuti. Jawut japi kolenje julaxoei itloejentat. Padaelmajiw fultaeyaxaes, julach wut.

¹³ Japi kolenje athu poxase julach wut, jawut sat xabich najaesaxael. Samata, jawut Jerusalén paklowaxxot bachan xabich tuxkaxael. Jawut sat xabich naejaesaxtat tuxaxael siete mil jiw. Jiw namapi ampathatat xabich belwaxael. Samata, Dios kawuajna xael wut, jumchiyaxaelpi: "Dios, xam xabich mamnikam!" —chiyaxaeli Dios, athupijinliajwa.

¹⁴ Japox jachiyaxael, wachakalpijax babijax. Pefuk we'p asababijax. Japoxdo' asamatkoi pasaxael.

Ángel, sietepijin, nababapox trompeta

¹⁵ Ángel, sietepijin, nababa wut trompeta, jawut xan jumtaenx Diosxotse pinjаметat najum-aechsikpox:

"Wajpaklon Dios, Cristo suapich, japi tato'laxael potuajnu chanpijiw. Jachiyaxaes pomatkoicha jiwliajwa" —aechi.

¹⁶ Veinticuatro ancianos, chalakpi tua-ekaxantat Dios pejuuajnalel, japi brixtat nuil. Makxabijniki sat. Jawut chimiajamechan jum-aechi Diosliajwa itpaeliajwa sitaeyax.

¹⁷ Jum-aechi ampox Diosliajwa:

"Tajpaklon Dios, xanal gracias-an xamliajwa, tuadutam xot puexa ampathatpijiw tato'laliajwam. Xabich xajuxam puexa isliajwam. Xam chajia wuajna dukam. Amwutjelbej nakiowa dukam.

¹⁸ Puexa ampathatpijiw, nejjamechan naexasis-eli, japi jiw xabich palala xamliajwa. Xam markampox, matkoi, pat japi jiw kastikaliajwam, xabich nalala xot. Jiw, matxoelatupi, kastikaxaelam. Profetas, xamliajwa nabisti, chaxduiyaxaelam pachaempoxan. Chiekal nabist wuti xamliajwa, ja-aech wut, chiekal chaxduiyaxaelam. Chiekal nabich-el wut, xam chiekal chaxduiyaxamil. Asew jiwbej, xam sitaenpi, paklochow, pamakbej, xam japi chaxduiyaxaelam pachaempoxan. Xamlax jiw toesaxaelam, asew jiw bapi" —aech ancianos Diosliajwa.

¹⁹ Diosxotse Dios pejtemplobafafa pajut nafafat. Templobatutat xan taenx Dios pejbaúl. Japabaúltutat cha-ek Dios tato'alpoxan, matxoelalelspox. Japatato'laxanxot Dios jum-aech asamatkoi pejjiw bu'weliajwapox. Jawutbej taenx chamx nakliablapox, jumse'balapoxbej. Jawutbej sat xabich najaetbej. Taenxbej granizo, xabich natacholan wut. Me-ama iam thilan wut, ja-aech granizo, xabich natacholan wut.

¹ Thatbaxotat kaeow atow natulaelt. Japox xan taenx matabijsliajwan asamatkoi jachiyaxaelpoxliajwa. Japow puexa chapona-itliak. Me-ama juimt matkoipijin, chapona-aechow. Japow nuk juimt madoipijinmatwajtat. Japow corona matlua't, doce ithaejpjijax.

² Japow moejow. Xabich chanowpow, boejpuns xot naxawlalijaw.

³ Do jawut, jaxot pinjikolan dragón natulaelt. Japon maklej kabuan-aech. Japon pasoeyan, siete matnaetjepon, diez mat-etjebejpon. Kaenanula pejmatnaetanxot matlua'a corona.

⁴ Pejto'thit xawilcha wut, xabich pi'chapon ithaej. Jawut una tercera parte ithaej natacholan that poxadik. Jawut dragón nukjaba japow pejwajnalel, yamxuch nalaelt wut kamta xaeliajwapon yamxuch.

⁵ Naxawal wutow, faenow poich. Japoch yamxuch asamatkoi tato'laxael pothatapijw. Jiw tato'al wut, chiekal tato'laxaelon. Yamxuch nalaelt wut, kamta bu'fos Dios poxade, Dios suapich chalakaliajwa.

⁶ Jawut najaetow pajilaxlelde, Dios chaemt poxade. Jaxotde pomatkoicha japow naxaeyaxan chaxduiflas mil doscientos sesenta matkoianliajwa japow xaeliajwa.

⁷ Baxael, athuxotse Miguel, Dios pej-ángelespaklon, Dios pej-ángelesbej, naba, dragón suapich, dragón pej-ángeles suapichbej.

⁸ Miguel, pej-ángeles suapich, malechapi. Samata, dragón, pej-ángeles suapich, kaes athuxotaxili.

⁹ Jasoxtat pinjin dragón fo'akas that poxadik, pej-ángeles suapich. Dragón asawal Satanás. Japon puexa dep pejpaklon. Chajiakolaxtat natulaelton jomtat. Japonlap xabich jiw pothata naekichachajba.

¹⁰ Do jawux, jumtaenx athuxotse pinjemetat jum-aechpox:

“Satanás pomatkoicha, pomadoichabej, Dios pejwajnalel xabich tasalaful jiw, Dios naexasiti. Japonlap fo'akas that poxadik. Samata, matkoi pat Dios xatis nakbu'welijaw babijaxan isapoxanliajwa. Dios nak-itpaeyaxaelbej pejpamamax. Matkoi patbej Dios pajut jiw chalaliajwa, tato'laliajwabejpon. Cristobej jiw tato'laxael.

¹¹ Wajkoew, naexasitpi Cristo tuppox japi babijaxan ispoxanliajwa, japi chapaeibej asew jiw Cristo pejwajjan naexasitpox. Ja-aech wut, pejlewla-eli tupaliajwa. Samata, malechapi Satanás.

¹² Xamal athuxot duilampim, jnejchachaemilde, Satanás fo'akas xot that poxadik! Xamallax, japathatxot duilampim, marxotbej, xabich nabijasaxaelam. Jachiyaxaelam Satanás pijaxtat. Japon pajut chiekal matabijt, kaematkoian suapich, wewe'paspox Dios kastikaliajwas” —aech athuxotse pinjemetat jumtaenxpo.

¹³ Dragón that poxadik fo'akas wut, wulchakal najaeton pawis jaelisliajwa, naxawalpow.

¹⁴ Jawut japow ba'duchas, kakoefba'. Samata, japow punjala pajilax poxade, dukaxael poxade. Jawut dragón xabich atwaj waeltas. Japow pajilaxxot tres waechan y medio naxaeyaxan pomatkoicha chaxduiyaxaes japow xaeliajwa.

¹⁵ Do jawut, dragón min pinjijax xul wut, japox nawel nadofa japow bu'laliajwa japoxtat.

¹⁶ Pe jawut, Dios pijaxtat sat tawakfula. Jawut japamin natoek, sat tawakfula poxadik.

¹⁷ Samata, dragón xabich palala, japow wia xot. Jawut dragón fulaech nabeliajwa, japow pamojw suapich, japi naexasiti Dios tato'alpoxan, Jesús pejwajjan naexasitibej.

¹⁸ Do jawux, dragón nuk marbabu'tat wullalasiajwapon asan marpijin, japon kachawaesliajwas.

13

Kolenje pejmachoe fan, babijaxan ispipox

¹ Xan taenx marxot pinjikolan pejmachoe fan, xabich babijaxan ispon, matlusan wut, julan wutbejpon. Japon nuk marbabu'tat. Japon siete matnaetan, diez mat-etjebejpon. Kaenanula pejmat-etxot matlua'as corona. Pejmachoe fan pejmatnaetantat lels pawulan. Japawulan jum-aech babejjamechan Diosliajwa.

² Pejmachoe fan, taenxpon, marxot julan wut, japon, me-ama nuth nacheklan, jakabuan-aechon. Pejtuakbej, oso pejtuak wut, jatuak-aechon. Pejkaechabej, nuth pejkaecha wut, jakaecha-aechon. Dragón chaxdut pejtua-ekax, malis pamamaxbej, pejmachoe fanliajwa. Dragón tapaeibej japon pejmachoe fan xabich jiw tato'laliajwa.

³ Japon pejmachoe fan kaematnaetxot xabich pinmatnae-itfapon. Puexa jiw japox taen wut, nejchaxoeli: “Ampon bej tupaaxaelbej amwut” —aechi, nejchaxoel wut. Do jawut, japa-itfa kamta chiekal koel. Pothatapijw japox taen wut, nejchaxoelanuili. Samata, xabich japi jiw japon pejiw nadofapi.

⁴ Japi jiw nuil brixtat dragón pejwajnalel itpaeliajwa sitaeyax. Jasox ja-aech, japi jiw pajut chiekal matabija xot dragón chaxdutupox pamamax pejmachoe fanliajwa. Nuilbejpi

brixtat pejmachoeфан pejwajnalel. Nakaewa najum-aechi: "Pejmachoeфан xabich mamnik. Kaen malechaxisal, naba wut, japon suapich" —na-aechi nakaewa.

⁵ Dios tapaei pejmachoeфан jumchiliajwa babejjamechan Diosliajwa. Dios tapaeibej pejmachoeфан jiw tato'laliajwa tres waechan y medio.

⁶ Samata, pejmachoeфан jum-aechful babejjamechan Diosliajwa, Dios pejtemplobaliajwabej, Diosxotsepjiwliajwabej.

⁷ Tapaeisbejpon nabeliajwa, Dios pejjiwpi suapich, malechaliajwabejpon japi jiw. Tapaeisbejpon xabich jiw tato'laliajwa.

⁸ Xabich ampathatpijiw nuilaxael brixtat pejmachoeфан pejwajnalel itpaeliajwa sitaeyax. Japi jiw pejwulan lela-esal Cordero pepelfatat, kimatamatlaspon cruztat. Japapelfatat wullefepikal duilaxael Diosxotse pomatkoicha. Japawulan chajia lels, Dios ampathat is-el wutfuk.

⁹ Xamal chiekal matabijasiam wut ampoх, chiekal naewesaxaelam xan jumchiyaxaelenpox:

¹⁰ "Jiw jiapi jiw jebatat, japibej asamatkoi jeyaxaes jiw jebatat. Jiw asew bapi espadatat, japibej asamatkoi beyaxaes espadatat."

Samata, Dios pejjiw nabijat wut asew jiw pijaxtat, japi jiw boejtaliasfalaxael. Japi xanaboejafalaxaelbej Dios chajia jum-aechpox japiliajwa jachiyaxaelpox.

¹¹ Do jawux, xan taenx asan pejmachoeфан, babejkolan, satlel nakolsan wut. Japon kolemat-etje. Me-ama cordero wut, jamat-e-aechon. Naksiya wut, naksiyapon, me-ama dragón.

¹² Pejmachoeфан, marxot matxoelanakolsanpon, japon pijaxtat satlel nakolsanpon puexa jiw tato'al. Jawut satlel nakolsanpon puexa jiw to'a japi jiw jumchiliajwa marxot nakolsanponliajwa: "Xam xabich pachaemam" —chiliajwa japi jiw. Japon majt pinmatnae-itfa. Asew jiw japox taen wut, nejchaxoeli japonliajwa: "Amwut bej tuxaxaelbejpon" —aechi, nejchaxoel wut. Pe jawut, japox itfa kamta chiekal koel.

¹³ Satlel nakolsanpon is koechaxan jiw taeliajwa. To'abejpon jit natacholnaliajwa athulelsik.

¹⁴ Japoxan japon is, marxot nakolsanpon suapich, xabich jiw, ampathatpijiw, naekichachajbaliajwa. Satlel nakolsanpon, japon jiw kito'a marxot nakolsanpon, me-ama japon pej-ael isliajwapi, japi jiw japox kawwajnalialjwa.

¹⁵ Jiw kitoet wut japox isax, satlel nakolsanpon pijaxtat japox, ídolo, pajut laeje. Do jawut, japox ídolo jiw to'a nuilaliajwa brixtat kawwajnalialjwapi japox. Kito'abejpon beliajwa jiw nuila-eli brixtat japox wujnalel jumchiliajwa: "Xam xabich pachaemam" —chiliajwa.

¹⁶ Satlel nakolsanpon kito'a puexa jiw kimarkaliajwas poklalel. Ja-el wut, makmarkaliajwas. Jakitis, puexa jiw markas wut, paklochowpi, paklochow-elpibej, kimaeyow, kijilabej, esclavospi, esclavos-elpibej.

¹⁷ Jiw marka-esalpi, japi kitapae-esal pejew mowaliajwa, wujsliajwabej. Pejmachoeфан pejwultat markaspi, japikallax tapaeis pejew mowaliajwa, wujsliajwabej. Pejmachoeфан pejwula-el wut, japon pejnúmero markaspi, japilax tapaeis pejew mowaliajwa, wujsliajwabej.

¹⁸ Jiw nej nejchaxoele chiekal matabijaliajwa! Ja-aech wut, matabijaxaeli marxot nakolsanpon pejnúmero. Japon pejnúmero, seiscientos sesenta y seis. Japanúmero jiw matabijaliajwa japon pejwul.

14

Jajuwpi, puexa 144.000 jiw

¹ Xan taenx Cordero, nuk wut muaxmatwajtat. Japamuax rawul Sión. Japamuaxmatwajtat Cordero bu'nuk pejjiw, ciento cuarenta y cuatro mil jiw. Japi pejmaktat lels Cordero pejwul, Cordero pax pejwulbej.

² Jawux thiaetaenx, thia-okafulik wut. Xabich minafurt wut, jathia-aechox. Najubala wut, jathia-aechbejpon. Xan thiaetaenxpox, xabich jiw arpa daka wut, jathia-aechox.

³ Cordero pejjiw pajeljajuit jajuw Dios pejwajnalel, cuatro choef kabuan-aechpi wujnalelbej, ancianos wujnalelbej. Asew jiw, asamatpijiw, matabija-el jajuilialjwa japajajuit. Ciento cuarenta y cuatro mil jiw, bu'wiaspi ampathatat, japikal matabija japot jajuit jajuilialjwa.

⁴ Japi poejiw chinax watho' nos-el. Chinax asew watho' bu'moejs-elbejpi. Cordero fulaeyaxael poxade, japi jiw fululaeyaxael japoxade. Cordero tux wut cruztat, japon mot japi jiw babijaxan ispoxanliajwa. Japi jiwlis Dios bu'wias. Japi matxoela bu'wias Dios pejjiwaliajwa, Cordero pejjiwaliajwabej.

⁵ Japi chinax kichachajba-el. Samata, chiekal bu'wajanjillisi Diosliajwa.

Tres ángeles jum-aechpox asamatkoi jachiyaxaelpoxan ampathatat

⁶ Do jawut, asan ángel xan taenx, athu fulaen wut. Chimiawuajan japon xalaen chapaeli-ajwa puexa ampathatpijiw. Japawuajan pomatkoichaliajwa ampathatpijiwliajwa.

⁷ Japon ángel pinjametat jum-aech jiwliajwa: “¡Xamal sitaem Dios! jumchisfulde: ‘Xam xabich pachaemam’ –amsfulde Diosliajwa! Patlisox Dios kastikaxaelpox jiw, babijaxan isfulpi. Dios is thatbaxo. That, marbej, ispon. Isbejpon satle minan nakakolsanpoxan. Samata, ¡nuilde brixtat Dios kawuajnalajwam!” –aech ángel jiwliajwa.

⁸ Do jawux, asan ángel taenx, athu wachakal fulaen wut. Japon pinjametat jum-aech: “Babilonia paklowaxpijiw chiekal toejwas, pomatkoicha ídolos kawuajan xoti. Samata, xabich asew jiwbej, potuajnychanpijiw, nakxataeful ídolos kawuajntaxan. Japi jiw, Dioskal kawuajna-el. Samata, japi, me-ama pawis pamalkal bu’moejs-el, ja-aech japi jiw” –aech japon ángel.

⁹⁻¹¹ Do jawux, asan ángel taenx. Japon trespijin. Japon ángel athu fulaen wut, pinjametat jum-aechfuldinpon: “Jiw sitaen wut, nuil wutbeji brixtat marxot nakolsanpon pejuwajnalel, japon pej-ael isaspox, ídolo, wuajnalelbej, ja-aech wut, Dios xabich palalaxael japi jiwliajwa. Kitapaei wutbeji makmarkaliajwas, o, kimarkaliajwasbej, ja-aech wut, Dios xabich kaes pejme palalaxael japi jiwliajwa. Japi jiw xabich Dios kastikaxaes. Kakamwaxaesi jit, azufre swapich, tamdadutpox. Japoxantat japi jiw xabich nabijasaxael Dios pej-ángeles pejuwajnalel, Cordero wuajnalelbej. Japajit pomatkoicha athu itnum julaxael. Pomatkoicha japi jiw nabijasaxael, matkoi, madoibej. Japox nabijasax toepaxil. Jachiyaxaes, japi jiw Dios kastikas wut” –aech ángel, trespijin, athu fulaen wut.

¹² Samata, Dios pejiw boejtaliasfulaxael, nabijat wut. Japi chiekal naexasisfulaxaelbej Dios. Japi kofaxilbej Jesús pejuwajan naexasitpox.

¹³ Pejme jumtaenx, athulelsik kaejame jum-aech wut xanliajwa: “¡Lelde Cristo pejuwajan naexasitliajwa! Jiw Cristo pejuwajan naexasit wut, hasta japi tɔp wut, japi jiw xabich nejchachaemlaxael” –aech athulelsik xanliajwa najum-aechsikpox.

Espíritu Santobej jum-aech: “Diachwuajnakolax japi jiw nejchachaemlaxael. Cristo pejuwajan naexasiti damlathulaxael nabistpoxanliajwa Diosliajwa. Japi is pachaempoxan asew jiwliajwa ampathatat. Samata, Dios chaxduiyaxaes malechpoxan Diosxotse” –aech Espiritu Santo.

Dios kastikaxaelpox babijaxan ispi

¹⁴ Pejme taenx itloejen, xabich papoeyax. Japa-itloejenmatwuajtat aton ek. Matlu’a’ton orocorona. Xa-ekon pawulox hoz. Japox xabich pabu’a’.

¹⁵ Do jawut, asan ángel nakolt Dios pejtemplobaxot. Japon jum-aech pinjametat itloejenmatwuajtat ekon jumtaeliajwa: “Patlisox matkoi xam chatsiapsliajwam that poxadik. ¡Nejhoztat chatsiapde foelpi, pachaem xotlisi chatsiapsliajwam!” –aech ángel, Dios pejtemplobaxot nakoldinpon.

¹⁶ Itloejenmatwuajtat ekpon chatsiapsdiklison foelpi. Jawut chanotlison japi.

¹⁷ Do jawut, asan ángel nakolt athuxot Dios pejtemplobaxot. Japonbej xafol hoz, xabich pabu’a’pox.

¹⁸ Jawut asan ángel fulaen altarxot. Japonlap altarjit tataeflan. Jawut pinjametat lapon asan ángel, Dios pejtemplobaxot nakoltponliajwa. La wut, jum-aechon: “¡Xabu’a’dik that poxadik uvadunan xabich tasiapaliajwam hoztat, xabich foei xotlisi!” –aechon.

¹⁹⁻²⁰ Japon ángel fulaeklison that poxadik uvadunan tasiapaliajwa. Tasiapa wut, japauvadunan chanoton. Kaeyaxtat thondik xabich pinjokolat poxadik uva-ufan jukaliajwa. Japot ek paklowax tathoetle. Jaxot uva-ufan jukon. Xabich uva-ufan nakola wut, atuaj uffol. Japa-uva-ufan, trescientos kilómetros pakchowax uffolpox. So’nik kaemetro y medio.

15

Siete ángeles kaenanula orocopantat chaxfolpox babijaxan, tabejsliajwapi that

¹ Athuxot taenx asamatkoi jachiyaxaelpox ampathat. Japox taenx wut, xan xabich bejwax. Siete ángeles kaenanula orocopantat chaxfol babijaxan, tabejsliajwapi ampathat. Japoxan ja-aech wut, Dios kaes palalaxil jiw babijaxan ispijiajwa.

² Do jawut, pejme taenx mar kabuan-aechpox. Japox vídrio kabuan-aech. Pe xabich tinkpox. Xabich thuajalbejpo. Patuleldik jit kabuan-aechox. Taenxbej, jiw nuil wut marbabu’xot. Japi jiw kaenanula arpa xanuil, Dios chaxduwspoxan. Japi jiw malecha pejmachoeffan. Malechabejpi ídolo, pemachoeffan-aeltat isaspox. Kitapae-elpi markaliajwas pejmachoeffan pejnúmero, japon pejuwalbej.

³ Japi jiw jajuw Moisés pejjajuit, Cordero pejjajuitbej. Japon Moisés, nabistpon Diosliajwa. Japi jajuw wut, jum-aechi Diosliajwa:

“Dios, xam xabich mamnikam. Puexa jiw tato'lamponambej ampathatat. Puexa isampoxan xabich pachaem. Xam jiw naekichachajba-emil.

⁴ Xam puexa jiw sitaeyaxael. Japi jiw jumchiyaxaelbej: ‘Xam xabich pachaemam’ — chiyaxaeli. Xam kaenam chinax babijax is-emil. Potuajnuhanpijiw xamxot pasaxael. Jiw nuilaxael brixtat xam nejwujnalel kawujnaliajwa. Japox japi jiw isaxael xamliajwa, pajut taen xot xam isampoxan, xabich pachaempoxan” —aechi, jajuw wut jajuitat.

⁵ Do jawux, taenx athuxot Dios pejtemploba, pajut nafafasful wut. Samata, templobatutat taenx kaepiezax. Japox pawul Lugar Santisimo.

⁶ Templobaxot siete ángeles nakola. Japi ángeles kaenanula xafol babijaxan that tabejsliajwa. Japi pejnoxoe xabich chimia, xabich papoeikolaxanbej. Xabich nakliafanbej japi pejnoxoe. Kaenanula pejmatiafanxot duw orocinturónmuatan.

⁷⁻⁸ Do jawux, cuatro choef kabuan-aechpi, kaen japixot chaxduw orocopan kaenanula siete ángelesliajwa. Japacopan kaenanula wulus. Japoxan jiw taen wut matabijaliajwa, Dios jiw babejchow xabich kastikaxaelpox. Jawut, Dios pejtemploba xabich itnumsful wut, itnum wulukaful japatemplobatat. Japox jiw taen wut matabijaliajwa, japon xabich mamnikpon, xabich pachaemponbej. Samata, chinax kaen aton leyaxil Dios pejtemploba. Chiekal toet wut siete babijaxan ampathatat, ja-aech wut, Dios pejme tapaeyaxael jiw leliajwa japon pejtemploba.

16

Dios kastikaxaelpox babijaxan ispi

¹ Do jawux, jumtaenx pinjemetat jum-aechpox Dios templobaxotdin siete ángeles jumtaeliajwa: “¡Xalaemk siete copan that poxadik! ¡Japacopan kaenanula chafa'balam thatxotdik!” —aech japajame Dios pejtemplobaxotdin.

² Do jawut, kaen ángel pejcopa chafakcha thatadik. Ángel japox is wut, ampathatpijiw, pejmachofan markaspi, japi jiw pobu'ta wenaduws bu'xaxaeflawaxae. Xabich pinaboejsbejpi. Jatisbej kawujjanpi idolo, pemachofan-aeltat isaspox.

³ Do jawux, asan ángel, wachakalpijin, chafakcha pejcopa mar poxadik. Jawut mar jal nadofa. Me-ama aton, xua'laspon, pejjal wut, ja-aech mar. Samata, puexa choef, baxibej, tɔp, margpijiw.

⁴ Do jawux, asan ángel, trespijin, pejcopa chafakcha nawelanxotdik, pinalajanxotdikbej, satlel minan nakakolsanxotdikbej. Puexa japaminan jal nadofa.

⁵ Do jawux, pejme jumtaenx asan ángel, japon puexa minan tataefulpon, jum-aech wut Diosliajwa:

“Dios, xam babijax is-emil. Xam amwutjel dukam. Xamlap majt dukambej, is-emil wutfuk that. Xabich jiw kastikam, japi jiw babijaxan is wut. Xabich babijaxan is-el wut, bijiat kastikam japi jiw. Samata, xam xabich pachaemam.

⁶ Amwutjel xam jiw kastikam, japi jiw chajiakolaxtat nejjiw xabich ba xoti. Japibej ba nejprofetas. Samata, amwutjel xam min itxaliaxam jal nadofaliajwa, japi jiw feliajwa japajal. Jasoxtat japi jiw xam kastikam” —aechon Diosliajwa, japon ángel, puexa minan tataefulpon.

⁷ Pejme jumtaenx asan ángel, altarxotdin jum-aech wut Diosliajwa: “Xam xabich mamnikam. Jiw xabich kastikam, xabich babijaxan is wut. Babijax is-el wut, japi jiw kastika-emil” —aech ángel Diosliajwa.

⁸ Do jawux, asan ángel, cuatropijin, pejcopa chafakcha juimt matkoipijin poxadik. Jawut xabich kaes pejme tuajnik jiw kakamwaliajwas.

⁹ Samata, puexa jiw xabich bu'forwas masxaeyax. Japi jiw nakiowa Dios naexaxis-el. Diosliajwa jumchi-elbejpi: “Xam xabich mamnikam” —chi-eli. Japi jiw lax asbuan jumch babejamechan jum-aech Diosliajwa, japon xajupon xabich jiw kastikaliajwa, babijaxan ispi.

¹⁰ Do jawux, asan ángel, cincopijin, chafakcha pejcopa pejmachofan pejtua-ekax poxadik. Jawut xabich itkua'nik pejmachofan tato'altuajnuxot. Japatuajnupijiw xabich boejtaliat paxaechax.

¹¹ Jasoxtat japi jiw xabich nabijat wut, nakiowa asbuan jumch babijaxan isful. Japi jiw xabich nabijat paxaechaxtat. Waeisbejpi bu'xaxaeflawaxae. Samata, japi jiw babejamechan jum-aechful Diosliajwa, athuxotse dukponliajwa.

¹² Do jawux, asan ángel, seispijin, pejcopa chafakcha nawel poxadik. Japox nawel pawul Éufrates. Jawut nawel kamta siow likaliajwa reyes, xabich pejsoldaw suapich. Japi fulaen juimt julanlelsan.

¹³ Jawux taenx tres dep. Japi kaboethyl kabuan-aech. Kaen kaboethyl nakolt dragón pejkaechatat. Asan kaboethyl nakolt pejmachoe fan, babejkolan, pejkaechatat. Asan kaboethyl nakolt profeta-elpon pejkaechatat.

¹⁴ Japi kaboethyl isful koechaxan. Jawut kaboethyl fulaech puexa reyes tamejalijawa, nabeliajwabejpi, Dios suapich. Pe Dios kaes pejme xabich mamnik. Me-ama puexa ampathatpijiw, reyes, jachi-el Dios. Diachwajnakolax pat Dios markpox, matkoi, nabeliajwapon dragón, pejiw suapich.

¹⁵ Jawut jumtaenx, Jesús jum-aech wut asamatkoi jachiyaxaelpoxlijawa: “iChiekal naewe'e! Pejme fuloekx wut, asamatkoi chalechkal pasaxoekan. Me-ama kithakan chalechkal pat, xan jachiyaxaelen, chalechkal pasaxoekan wut. Aton pajut chiekal natataeflafal wut, is-el wutbejpon asaxan babijaxan, asamatkoi xan paskax wut, japon aton xabich nejchachaemlaxael. Japon padalaxil xanlijawa, babijax is-el xoton” —aech Jesús, jum-aech wut asamatkoi jachiyaxaelpoxlijawa.

¹⁶ Do jawux, japi dep tameja reyes. Reyes tamejas, pejsoldaw suapich. Natamejaxot pawul hebreojametat Armagedón.

¹⁷ Do jawux, asan ángel, sietepijin, chafakcha pejcopa joewa poxadik. Jawut, Dios pejtemplobatat Dios pejtua-ekaxtat ek wut, pinjаметat jum-aechon: “Puexa tuadutlisox, xan jum-anpoxan” —aechon.

¹⁸ Do jawut, xabich chamx nakliafbala. Jumse'balabej. Sat xabich kaes najaetbej. Ampathatxot majt jasox jachi-el, sat najaet wut.

¹⁹ Jawut pinjiyax, Babilonia paklowax, tawakfala wut, trestafaje nadijan. Asapaklowax-anxotbej bachan xabich jwawal. Jawut Dios tuadut Babilonia paklowaxpijiw kastikaliajawa. Dios xabich palala japapaklowaxpijiwlijawa, xabich babijaxan is xoti.

²⁰ Sat xabich najaet wut, puexa tanaetan, pinamuxanbej, kijchas.

²¹ Jawut xabich granizo natacholanbej. Xabich pinjitan. Japi granizo jajaera. Xabich thunkbejpi. Japotan kaenanula dewnik, me-ama kaes cuarenta kilos. Samata, japatajnapijiw jum-aech babejjamechan Dioslijawa, xabich kastikas xoti Dios.

17

Dios kastikaxaelpox ídolos kawuajanpi

¹ Siete ángelesxot, kaen japixot xan napa'an. Japon, ángel, najum-aech: “iXabua't! Xam itpaeyaxaelen Dios kastikaxaelpox pinjiyax, Babilonia paklowaxpijiw. Japapaklowax isas nawelanbabu'antat. Japapaklowaxpijiw, me-ama pawis, poejiw bu'moejtpow plata kanaliajwa, ja-aech japapaklowaxanpijiw, kawuajnaful xoti ídolos.

² Puexa ampathatpijiw, reyes, japi majt Dioskal kawuajan. Japi reyes Babilonia paklowaxot papat wut, japibej ídolos kawuajnaful. Kaen Dioskal kawuajnafula-ellisi” —na-aech ángel xanlijawa.

³ Do jawux, xan Espíritu Santo pijaxtat masoxtat taenx, ángel nabu'fol wut pajilax poxade. Jaxotde taenx kaeow pawis, tua-ek wut pejmachoe fan, pasoeyan. Pejmachoe fan siette matnaetje, diez mat-etjebejpon. Pobu'ta xabich pawulan lels. Japawulan jum-aech babejjamechan Dioslijawa.

⁴ Japow pejyiaf xabich pasoeyax. Xatafals, asacolor suapich. Japacolor pawul púrpura. Pejyiaf xabich duws oro chapachaemaliajwa, ia' ommaenkpipej, asewbej, pawuli perlas. Japow chaxfol orocopa. Xan japacopa taenx wut, chiekal matabijtax japow xabich babijaxan ispoxan, ídolos kawuajnanbej.

⁵ Japow pejmaktat kaewul lels. Japawul jum-aechpox puexa jiw matabija-el. Pe japawul amprox jumchiliajwa: “Pinjiyax, Babilonia paklowax, japapaklowaxpijiw kofa Dios kawuajanpoxan. Amwutjel japi jiw kawuajnaful ídolos. Isfulbejpi kaes asaxan, babijaxan. Ja-aech wut, puexa asapaklowaxanpijiw nakxataeful japoxan isaxan” —chiliajwa japawul, japow pejmaktat lelspx.

⁶ Do jawut, xan tajut chiekal matabijtax, japow saxtas Dios pejiw pejjal, japi baespi, Jesús pejwujjan naewuajan wut.

Japox taenx wut, xan xabich nejchaxoelx.

⁷ Do jawut, ángel najum-aech: “iMa-aech xotkat xam xabich nejchaxoelam? Xam amwut chiekal chanaekabuanaxaelen asew jiw matabija-elpoxfuk ampow pawislijawa, pejmachoe fanlijawabej, japon siete matnaetje, diez mat-etjebejpon.

⁸ Pejmachoe fan, xam taenampon, majt japon duk. Pe amwutjel, japon amxota-el. Japon asamatkoi nakolsaxoen muthxot. Japox muth xabich funiachdik. Jiw matdukax taesal. Jiw, wullela-esalpi Cordero pejfutat, kimatamatlaspon cruztat, japi jiw pejme taen wuti pejmachoe fan, xabich nejchaxoelaxaeli. Pe nakiowa, pejmachoe fan asamatkoi, Dios pejkastikamatkoi pat wut, japon pejmachoe fan kastikaxaesbej” —na-aech ángel.

⁹ Ángel pejme najum-aech: “Jiw matabijapi, japi jiw matabijaxael xan jumchiyaxaelenpox. Pejmachoefan, siete matnaetjefon, japon pejmatnae japi jiw taen wut nejchaxoelaliajwa siete m̄axanmatw̄ajantat isaspox Babilonia paklowax. Japon pejmachoefan pejmatnae, siete matnaetjepox, japi jiw taen wut nejchaxoelaliajwa siete reyes tato'alpox japapaklowaxpijiw.

¹⁰ Cinco reyes, Babilonia paklowaxpijiw tato'alpi, japolis kaenan̄la nakolaful. Amw̄utjel asan reywich tato'al japapaklowaxpijiw. Japontat seis reyes. Tato'la-elfuk sietepijin. Asamatkoi, japon sietepijin rey wut, xabich piach tato'laxilon.

¹¹ Pejmachoefan, majt tato'alpon, japonliajwa amw̄utjel chiekal matabija-esal, chiekal ajil wut, o, nakiowa w̄ton. Japonlap asamatkoi ochopijnaxael, rey w̄ton. Siete reyesxot, japon kaen majt rey nadofa. Japon pejme rey wut, japonlap Dios chiekal toesaxaeson” —na-aech ángel xanliajwa.

¹² Do jawut, pejme ángel najum-aech: “Diez mat-etje taenam̄pox, jiw japox taen wut, nejchaxoelaliajwa diez reyes tato'laxaelpoxliajwa. Japi reyes tuadui-elfuk jiw tato'lax. Asamatkoi japi reyes kamta kaewutje jiw tato'al wut, asbuan jumch tapaeyaxaes kaehora jiw tato'laliajwa. Japi reyes tato'al wut, tato'laxaeli, pejmachoefan swapich.

¹³ Diez reyes asamatkoi tato'al wut, japi kaenejchaxoelaxael. Japi kaenan̄la tapaeyaxael pejmachoefan tato'laliajwa pejiw.

¹⁴ Japi reyes nabeyaxael, Cordero swapich. Pe Cordero malechaxael, puexa jiw tato'lan xot, japon puexa reyes tato'lan xotbej. Puexa jiw, Dios makanochpi japon pejiwaliajwa, japi jiw, Cordero swapich, malechaxaeli pejmachoefan, japon pejiwbej” —na-aech ángel.

¹⁵ Ángel pejme najum-aech: “Nawelan mox xam taenampi Babilonia paklowaxxot, japi nawelan, jumchiliajwa am̄pox: ‘Ampathatpijiw’ —chiliajwapox.

¹⁶ Japi, diez reyes, pejmachoefan swapich, japi xabich nejweslaxael Babilonia paklowaxpijiw. Samata, japi Babilonia paklowaxpijiw ba wuti, japapaklowaxpijiw pejew xabich nosaxaeli. Do jawux, japapaklowax lausaxaelbeji.

¹⁷ Diez reyes asamatkoi kaenejchaxoelaxael tapaeliajwapi japon pejmachoefan tato'laliajwa puexa am̄pathatpijiw. Japox jachiyaxael, me-ama Dios chajiakolaxtat jum-aech japoxliajwa.

¹⁸ Xam taenampow, pawis, tua-ekpow pejmachoefan, pasoeyan, japow taenan wut, nejchaxoelaliajwam: ‘Ampow, me-ama Babilonia paklowaxpijiw, ja-aechow’ —chiliajwam, nejchaxoelam wut. Babilonia paklowaxpijiw tato'al puexa am̄pathatpijiw, reyes” —na-aech ángel xanliajwa.

18

Babilonia paklowaxpijiw toejafaspox

¹ Do jawux, taenx, asan ángel fuloek wut athulelsik. Japon ángel xabich asew ángeles tato'al. Japonbej chapona-itliak. Japox itliakax itliak thatat.

² Japon ángel pinjametat jum-aech:

“¡Pinjiyax, Babilonia paklowax, toejafas! Amw̄utjel japapaklowax dep pejpaklowax nadofa. Japapaklowaxxot xabich thutha, kakan, pejmachoef. Japikal amw̄utjel naliaxa, Babilonia paklowax toejafas wut.

³ Babilonia paklowaxpijiw, japi jiw kaw̄ajan ídolos. Reyesbej ja-aech, pejiw swapich. Babilonia paklowaxpijiw ídolos kaw̄ajan wut, kaes asaxan babijaxan isbejpi. Samata, Babilonia paklowaxpijiw asapaklowaxanpijiw xabich tabejt. Babilonia paklowaxpijiw xabich kimaenk. Japi xabich kimaenk wut, asapaklowaxanpijiw nejmachpejew xapapat mowaliajwa. Samata, japi mowa wut pejew, japibej kimaeya nadofa. Babilonia paklowaxpijiw Diosliajwa babijaxan is xot, toejafas” —aech ángel.

⁴ Do jawux, pejme jumtaenx athulelsik, asan ángel jum-aech wut: “Tajjiwampim, ¡nakolim Babilonia paklowaxxot nak-isasamatam babijaxan, japi jiw ispoxan! ¡ja-amde xamal, Dios kastika wut japi jiw, xamalbej matkastikasamata, japi jiw swapich!

⁵ Babilonia paklowaxpijiw xabich babijaxan is. Samata, japi ispoxan babijaxan kaeyaxtat thuch tamejafulas wut, japoxan babijaxan pasaxael thatbaxo. Dios nejkiowa-el Babilonia paklowaxpijiw babijaxan ispoxanliajwa.

⁶ Babilonia paklowaxpijiw japoxan is xot, asew jiw nabijat japoxantat. Samata, asamatkoi Babilonia paklowaxpijiw Dios kastikas wut, xabich kaes pejme nabijasaxael.

⁷⁻⁸ Babilonia paklowaxpijiw nejchaxoel: ‘Xatis kaes pejme pachaems. Me-ama asew jiw, jachi-esal’ —aechi, nejchaxoel wut. Japi xabich babijaxan isfulpoxantat xabich plata kanapi. Samata, japi xabich ommaeyaxan w̄ajti. Nejchaxoelbejpi: ‘Xatis, me-ama reyes wut, jatis, xabich xot wejew. Chinax kaeyax xatis nakwewe'pa-el. Kaematkoi nejchaemilaxisalbej’ —aechi, nejchaxoel wut Babilonia paklowaxpijiw. Japi

asbuan jumch japox nejchaxoel xot, Dios xabich kastikaxaesi. Samata, asamatkoi chalechkal wepasaxaes babijaxan. Pejjiw wetups wat, xabich wunoeyaxaeli. Xabich litaxaelaxaelbejpi. Chalausaxaesbejpi toejafaliajwas. Jasoxtat japi jiw kastikaxaes wajpaklon Dios, xabich mamnikpon” — aech ángel athuxotsik.

⁹ Babilonia paklowaxpijiw pijaxtat, puexa ampathatpijiw, reyes, kawuajanbejpi ídolos. Samata, Babilonia paklowax lautas wat, itnum taen wuti, japi reyes xabich wunoeyaxael.

¹⁰ Japi reyes atuaj natachaemanuilaxael, pejlwla xoti, Babilonia paklowaxpijiw kastikas wat. Japi reyes jumchiyaxael:

“¡Xabich jiw nabijat, pinjiyax Babilonia paklowaxpijiw, japi majt puexa jiw xabich sitaenspi! Japi jiw kastikas wat Dios, kaehoratat puexa japi jiw chiekal toejafas” — chiyaxael reyes Babilonia paklowaxpijiwliajwa.

¹¹ Asatuajnjuchanpijiw xalalaelnapi pejew mowaliajwa, japi jiwbej wunoeyaxael japapaklowaxpijiwliajwa. Jasoxtat wunoeyaxaeli, ajilaxael xot wuajsiw.

¹² Japi jiw majt xalalaena pejew, oro, platabej, mowaliajwa. Xalalaenabejpi chimia-ia', ommaenkpi, perlasbej. Xalalaenabejpi chimiabu'an, asabu'anbej, pabujabu'an. Japabu'an pasoeibu'an. Asacolorpi, púrpurabu'anbej. Xalalaenabejpi nejmachtalafachan, xabich xabejniki. Xalalaenabejpi isaspi marfiltat, isaspibej chimianaechantat. Xalalaenabejpi isaspi broncetat, anaeltatbej, mármoltatbej.

¹³ Xalalaenabejpi canela, asaxanbej, naxaeyaxan chaxsipi. Xalalaenabejpi xabejniki, incienso, mirra, perjumaminanbej. Xalalaenabejpi vinominan, olivosiminan, harinabulan, trigobulanbej. Buflaenbejpi pak, ovejas, kawaei. Xalalaenabejpi carrozas jiw chananauamsliajwa. Buflaenbejpi jiw mowaliajwa, japi jiw esclavosliajwa, nabichliajwapi japatuajnutat.

¹⁴ Asatuajnjuchanpijiw, xalalaenapi pejew mowaliajwa, japi nakaewa najumchiyaxael Babilonia paklowaxpijiwliajwa:

“Babilonia paklowaxpijiw laelp wat, ¡puexa naebaech kaechnejxasink xaeliajwa! Amwutjel japi tıp xot, ¡kaes xaeyaxillisi kaechnejxasinkbaech xaeliajwa! ¡japi pejew plata, ponan, xabich chimiapibej, puexa japoxan chiekal nafo'a!” — nachiyaxael japi jiw nakaewa Babilonia paklowaxpijiwliajwa.

¹⁵ Pejew xabich mowaxpoxantat Babilonia paklowaxxot, japi kimaeya nadofalisi, japi taen wat Babilonia paklowaxpijiw kastikaspo, japi lap pejlwut atuaj natachaemanuilaxael. Japibej wunoeyaxael japapaklowaxpijiwliajwa.

¹⁶ Jumchiyaxaeli:

“¡Babilonia paklowaxpijiw xabich nabijat! Majt japi jiw, me-ama kaeow pawis, xabich chamoeyax naxoelpow. Japow pejyiaf, me-ama pasoeiyax, xatafasox color púrpura. Japow pejyiafot, me-ama duws oro japow chimiowliajwa. Japow pejyiafotbej, me-ama duws ia' ommaenkpi, perlasbej.

¹⁷ ¡Babilonia paklowaxpijiw chalechkal wetoepe kimaeyax!” — chiyaxael japi jiw, pejew majt mowapi Babilonia paklowaxxot.

Puexa paklochow, japi barkamochanpijiw, marinerosbej, nakxananuampibej pejew mowaliajwa, puexa japi atuaj chaduilaxael natachaemaliajwa, Babilonia paklowax lautas wat.

¹⁸ Puexa japi barkamtat nanuamtpi, Babilonia paklowax-itnum taen wuti, jumchiyaxaeli: “¡Ampox, kaeyax paklowax, pinjiyax! ¡Do kaes asapaklowax, pinjiyaxpox ajil, me-ama ampapaklowax, jasox!” — chiyaxael japi jiw japapaklowaxliajwa.

¹⁹ Japi puexa Babilonia paklowax-itnum taen wat, thumba pajut namatnaetholaxaeli, asew jiw japox taen wat matabijaliajwas japi xabich nejxaejwaspo. Wunoeyaxaelbejpi Babilonia paklowaxpijiw. Barkamochanpijiw pinjametat jumchiyaxael:

“¡Xabich nabijat Babilonia paklowaxpijiw! Barkamtat nanuamti Babilonia paklowaxxot pejew mowaliajwa, japi xabich kimaeya nadofa. Chalechkal Babilonia paklowaxpijiw Dios kastikas wat, ¡puexa japi chiekal toejafas!” — chiyaxael barkamochanpijiw.

²⁰ Jasoxtat Babilonia paklowaxpijiw Dios kastikaxaes, japi pijaxtat Dios pejiw nabijat xot. Ja-aech wat, puexa jiw, Diosxotsepi, xabich nejchachaemlaxael. Xabich nejchachaemlaxaelbej puexa Dios pejiw, ampathatpijiw. Nejchachaemlaxaelbej apóstoles, profetasbej.

²¹ Do jawux, ángel, xabich mamnikpon, ia't pinjit xachot, me-ama trigofu xatkianapot, jasot. Japot ia't fo'ak wuton mar poxadik, japot ia't kaes tae-esal. Jawut ángel jum-aech: “Me-ama japot ia't jiw kaes pejme taeyaxil, jachiyaxaesbej Babilonia paklowax.

²² Babilonia paklowaxxot jiw chiekal toejafaxaes wat, thiakijlanikaxael arpa dakapoxan. Thiajilaxaelbej flauta nababapoxan, trompeta nababapoxanbej. Jaxot chiekal ajilaxaelbej nabistpi. Samata, thiajilaxaelbej trigo xatkianapoxan ia'tat.

²³ Babilonia paklowaxxot lámpara itdeljilaxaelbej. Japapaklowaxxot jiw chiekal ajilaxael xot, ajilaxaelbej nakjiyaxan. Samata, atúaj jum-okpoxan fiesta is wut, japoxbej chiekal jumjisnikaxael. Asatúajnúchanpijiw, pejew mowapi potúajnúcha, japibej ajilaxael. Pinjoe'iwbej, jiw naekichachajbapi, japi ajilaxael" —aech ángel, jum-aech wut asamatkoi jachiyaxaelpox Babilonia paklowaxliajwa.

²⁴ Dios matabijt, Babilonia paklowaxpijiw ba wuti profetas, asew jiwbej, Dios pejiwipi. Japapaklowaxpijiw pijaxtatbej Dios pejiwipi baes potúajnúcha. Samata, Dios xabich kastikaxael Babilonia paklowaxpijiw.

19

¹ Do jawux, jumtaenx Diosxotse, xabich Dios pejiw jum-aech wut. Jum-aechi ampox: "Xatis Dios jumchiyaxaes: 'Xam xabich pachaemam' —chiyaxaes. Dios nakbu'wiapon, japon kaen paklon, puexa jiw tato'lan. Japon xabich mamnik. Samata, xajup puexa isliajwa.

² Dios matabijt puexa pachaempoxan isliajwa. Jiw xabich babijaxan is wut, Dios xabich kastika. Samata, Dios xabich kastika Babilonia paklowaxpijiw, japi pijaxtat pothatapjiw is xot babijaxan. Japi pijaxtatbej Dios pejiwipi baes" —aech Dios pejiw Diosxotse.

³ Do japi Diosxotse pejme jum-aech: "Xatis Dios jumchiyaxaes: 'Xam xabich pachaemam' —chiyaxaes. Babilonia paklowax toejwas wut, makach itnum toepaxil. Pomatkoicha itnumaxael" —aech Dios pejiw Diosxotse.

⁴ Veinticuatro ancianos, cuatro choef kabuan-aechpibej, Dios ekxot wúajnalel nukapaoeli itpaelialjwa sitaeyax Diosliajwa. Jum-aechi Diosliajwa: "¡Pachaem xam isampox Babilonia paklowaxpijiwliajwa! ¡Xam xabich pachaemambej!" —aechi Diosliajwa.

⁵ Do jawut, Dios ekxot kaejme jumtaenx, jum-aech wut japajame: "Puexa xamal Dios sitaenampim, paklochwam, paklochwa-emilpimbej, jum-amde Diosliajwa: '¡Xam xabich pachaemam!' —amde!" —aech wut japajame.

Diosxotse fiesta ispox Corderoliajwa

⁶ Do jawut, xan pejme jumtaenxbej, me-ama jiw xabich jumxan-el wut, jajum-aechpox. Japox, minaposnik wut, jathia-aech. Japoxbej, xabich chamx jumse'bala wut, jathia-aechbej. Jawut japi jum-aech:

"WajDios, japon xabich mamnik. Japon xajup puexa isliajwa. Japon pajut tñadutbej pothatapjiw tato'lalialjwa. Samata, xatis japon jumchiyaxaes: '¡Xam xabich pachaemam!' —chiyaxaeson.

⁷ Nejjachachaemlaxaes. Asew jiwliajwa jumchiyaxaesbej: 'Kaen Dios xabich mamnik' —chiyaxaes. Japox jumchiyaxaes, pat xot Cordero pejnakjiyamatkoi. Japon pijwaxaelpow, thiltisow.

⁸ Japow naxoelox xabich chamoeyax, xabich papoeikolax, nakliafanbej. Yiaf, xabich papoeikolax, japox jiw taen wut nejjchaxoelalialjwa: 'Japi Dios pejiw laelp wut, isfulaeli babijaxan' —chilialjwapi, nejjchaxoel wut" —aechox, me-ama jiw xabich jumxan-el wut, jajum-aechpox.

⁹ Do jawux, japon ángel xan najum-aech: "Lelde xan jumchiyaxaelenpoxan: 'Taduchpi naktaelialjwa Cordero pejnakjiyafiesta, japi jiw nejjchachaemlaxael' " —na-aech ángel xanliajwa.

Do jawut, japon ángel jum-aech xanliajwa: "Japajamechan diach chiekal wúajnakolax, Dios pejjamechan xot" —aech japon ángel xanliajwa.

¹⁰ Do jawut, japon ángel pejuajnalel xan brixtat nukx, sitaenx xot. Jawut najum-aechon: "¡Xam nabej nuke' brixtat xan tajwúajnalel! Xanbej nabistax Diosliajwa. Me-ama xam, asew jiwbej nabisti Diosliajwa, xanbej, ja-an. Kaen Dios sitaeyaxaelam" —aech ángel xanliajwa.

Nejmachjiw naewúajan wut Jesús pejuwúajan asew jiwliajwa, japi Dios.

Jesús tñ-ekpox kawaei, papoeyan

¹¹ Do jawut, taenx, thatbaxo pajut nafafat wut. Jawut natulaelt kawaei papoeyan. Kawaei papoeyan tñ-ekpon, japon jiw tato'lan. Japon kichachajba-el, jiw tato'al wut. Naba wutbejpon, japon naba babejchow toesliajwa. Samata, japon pawul, Fiel y Verdadero.

¹² Japon pej-itu, me-ama jitkaech-ia'an, ja-itu-aechon. Xabich corona, pin-iat, matlua'apon. Pejmakttat kaewul maklelson. Japawul asew jiw matabija-el. Japon kaen pajut chiekal matabijt.

¹³ Japon naxoelpox, jal xathochpox wut, ja-aechox. Japon pawul, Dios Pejame.

¹⁴ Japon xabich ángeles fulalaelpas. Japi ángeles naxoei papoei, pabujabu'an. Japi ángeles chalaelp kawaei papoeitat.

¹⁵ Matxoelachafolpon kawaeitat, kaechmataluspon espada, xabich pabua'powa. Japowa espadatat nabeyaxaelon, ampathatpijiw suapich, chiekal naexaxisliajwas. Japon chiekal tato'laxaelbej potuajnuchanpijiw. Me-ama aton uva sae'en, uva-ufan nakolaliajwa, jachiyaxael Dios, jiw babejchow kastika wat. Jawut xabichaxael jal. Dios, xabich mamnikon, jasox jachiyaxael, xabich palala xot jiw babejchowliajwa.

¹⁶ Matxoelachafolpon kawaeitat thuch naxoelaxxot, jaxot japon pejwal lels. Japon pejbetat pejwal lels. Japawul lelspon jam-aech: "Ampon puexa jiw tato'lan. Puexa reyes tato'lanbej" —aech japawul.

¹⁷ Do jawux, asan angel taenx, nuk wuton juimt matkoipijinmatwujat. Japon pinjametat jam-aech puexa thuthaliajwa, kakanliajwabej, kaboerliajwabej, jiwchoelliajwabej: "¡Xabua't natamejalijwam, Dios pinjiyax fiesta is xot!

¹⁸ ¡Xabua't jiw patupa xaelijwam! Xaeyaxaelam reyes. Xaeyaxaelambej soldaw-paklochow. Xaeyaxaelambej poejiw, pejlewla-elpi nabeyaxanliajwa. Xaeyaxaelambej soldaw, japi pejkawaeibej. Xaeyaxaelambej puexa esclavos, esclavos-elpibej, paklochow, paklochowaelpibej" —aech angel puexa japilijwa.

¹⁹ Do jawut, xan taenx pejmachofan, babejkolan. Jawut taenxbej, puexa reyes natameja wat, pejsoldaw suapich, nabeliajwa kawaei papoeyan chafolpon suapich, japon pejiw suapichbej.

²⁰ Kawaei papoeyan chafolpon jaelt pinjin pejmachofan, marxot nakolsanpon. Jaelt-bejpon profetakolna-elpon, japon xabich jiw naekichachajbapon. Do jawut, japi peldikon jipuka poxadik, jit xabich tamdadutxot, azufre suapich. Japon profetakolna-elpon, majt koechaxan is pejmachofan pejwujnalel. Koechaxan is xot, jiw xabich naekichachajbapon. Samata, jiw kitapaei makmarkaliajwas pejmachofan pejmarkaxtat. Nuilbejpi brixtat kawuajnalijwa pejmachofan pej-ael, japox idolo isaspox.

²¹ Jawut kawaei papoeyantat chafolpon espada kaechmataluspon. Japowatat xabich bapon pejmachofan pejiw. Do jawux, puexa, japi jiw, xabich xaeslisi thutha, kakan, kaboer, jiwchoelbej. Jawut japi jiw, patupa, xabich winafniaspi.

20

Mil waechan Cristo tato'laxaelpox ampathatpijiw

¹ Xan pejme taenx angel, fuloek wat athulelsik. Japon xaloek llave, pinamuthfapipijax. Japox muth chinax matduka-el. Xaloekbejpon pinamuat, cadenamuat.

² Japon angel jaelt dragón. Xawaeton dragón cadenamuatat mil waechanliajwa. Dragón, japon Satanás. Chajiakolaxtat jomtat natulaeltpon.

³ Do jawut, japon angel fo'akpon Satanás xabich pinjiyax, muth, poxadik. Chafaxawaech-bejpon. Chafaxape'tason sello. Samata, Satanás mil waechan jiw naekichachajbaxil. Mil waechan xent wat, jolsaxaeson kaematkoijanliajwa pejme jiw naekichachajbalijwa.

⁴ Do jawux, xan pejme taenx, asew jiw chalax wat paklochow chalaxpoxantat. Japi jiw Dios to'as kastikaliajwapi jiw babejchow. Taenxbej asew jiw pej-aelan, chajiakolaxtat taxtasiapbalaspi. Japi jiw laelp wutfuk, asew jiw naewuajnalap Jesús pejwujajan, Dios pejjamechanbej. Japi kawuajna-elbej pejmachofan. Kawuajna-elbejpi japox idolo. Kitapae-elbejpi makmarkaliajwas pejmachofan pejmarkaxtat. Kitapae-elbejpi pejkechan wemarkaliajwas. Samata, taxtasiapbalas japi jiw. Taenxbej japi jiw, Cristo suapich, asew jiw tato'al wat mil waechanliajwa.

⁵ Pe asew jiw, tupi, mat-e-esalfuk pejme duilaliajwa, mil waechan toepa-el xotfuk. Pe mil waechan toep wat, jawut japi jiw mat-eyaxaes pejme duilaliajwa. Japox jachiyaxael, tupi matxoela mat-eyaxaes wat pejme duilaliajwa.

⁶ Japi jiw matxoela mat-eyaxaes wat pejme duilaliajwa, japi xabich nejchachaemlaxael, Dios pejiw xoti. Asamatkoi, Dios jiw kastika wat, babejchow, Dios pejiw kastikaxisal xabich jit tamdadutxot. Japi jiwlap Dios pejsacerdotsaxael kawuajnafalialijwapi Dios, Cristobej. Japi suapich, Cristo asamatkoi jiw tato'laxael mil waechan ampathatat.

Satanás fo'axaekspon pomatkoicha jaxotdik kastikaliajwaspon Dios

⁷⁻⁸ Mil waechan toep wat, Satanás tapaeyaxaes nakolsliajwa muth, pinjiyax, chinax matduka-elxotsin. Japon nakolsaxael pejme naekichachajbalijwa potuajnuchanpijiw, Dios naexaxis-eli. Puexa japi jiw pawul Gog, Magogbej. Do jawut, Satanás xabich japi jiw tamejaxael nabeliajwa, Dios pejiw suapich. Me-ama thejfu marxot xabich pin-iakola, jachiyaxael japi jiw, naexaxis-elpi Dios.

⁹ Japi jiw chakipasaxael Jerusalén paklowaxpijiw. Japi chamasajoeyaxael Dios pejiw beliajwapi, japi jiw nejxasinkpi Dios. Jawut chalechkal jit, pinjiyax, jopaxoek masajoeyapi pejmatwujasik puexa japi toejwaliajwas.

¹⁰ Do jawut, Satanás, jiw naekichachjapijin, fo'axaes jitpuka poxadik, xabich jit tamdadut poxadik, azufrebej. Pe japajitpuka poxadik matxoela fo'axaeks pejmachoefan, profetakolna-elponbej. Jaxotdik Dios japi pomatkoicha kastikaxaes. Samata, japi xabich nabijasaxael pomatkoicha.

Asamatkoi jiw, babijaxan ispi, nuilaxael pox Dios pejwajnael

¹¹ Taenx pinjiyax tua-ekax, papoeikolax Diosxotse. Taenxbej Dios, ek wut japatua-ekaxtat. Do jawut, japon pijaxtat that chiekal ajisnat, thatbaxobej. Japoxan pejme tae-enil asalel.

¹² Taenxbej jiw, naexasiti Jesús pejwajnan, ampathatat t̄pi, paklochow, paklochowaelibej, nuil wut Dios pejwajnael. Taenxbej pel-ufan, fafalspoxan, oel wut. Japapel-ufantat lels puexa pachaempoxan, japi jiw ispoxan asew jiwliajwa, laelp wuti ampathatat. Taenxbej asafat. Japapelfatbej fach. Japafatat pejwulan lels, duilaxael pi Diosxotse pomatkoicha.

¹³⁻¹⁴ Xabich jiw, t̄pi marxot, japi bej Dios pejwajnael nuil. Puexa asew jiw, ampathatat xot chajia t̄pi, jaxotse nuilbej. Puexa japi kastikas, babijaxan is xot. Babijaxan kaes ispi, japi kaes xabich kastikas. Japi jiw pomatkoicha jitpukaxot kastikas. Japoxlap wachakalpijax, patupax wulxael.

¹⁵ Japafatat jiw wullela-esalpi, japi kal peltas jitpuka poxadik.

21

Dios isaxael pox pajelthat, pajelthatbaxobej

¹ Baxael, pejme taenx pajelthat, pajelthatbaxobej. Dios matxoela-ispoxan, that, thatbaxobej, marbej, puexa japoxan chiekal ajil.

² Jawutbej, xan taenx Dios pejpaklowax, Jerusalén paklowax, pajelax, fulaeflik wut Diosxotsik. Dios xabich chaemt japapaklowax pachaemaliajwa, puexa pejiw duilaliajwa japapaklowaxxot. Me-ama pawis chiekal nachaemt wut chamiowaliajwa pejbabijnaw wuljaesax wujna, ja-aech amwutjel Dios pejpaklowax.

³ Do jawux, jumtaenx, pinjametat jum-aech wut athulelsik Dios pejtua-ekaxtat. Jum-aechox: “Dios pajut amwutjel dukaxael pejiwitat. Japon Dios pomatkoicha japi jiw pejDiosnaxaelon. Japi jiwbej Dios pejiwaxael.

⁴ Ajilaxael noeyax. Ajilaxaelbej patupax. Ajilaxaelbej wunoeyax. Ajilaxaelbej bu'xaeyax. Puexa japoxan chiekal ajilaxael” — aech athulelsik.

⁵ Dios ek wut pejtua-ekaxtat, jum-aechon: “Puexa nejmach matxoela-isxroxan, japoxan chiekal toetx. Do jawux, puexa pejme pajel isx” — aech Dios. Jum-aechbejpon: “¡Lelde ampawujnan puexa jiw naexasisliajwa, diachwujnakolax xot!” — aech Dios.

⁶ Do jawut, Dios pejme jum-aech xanliajwa: “Puexa xan chajia jum-anpoxan, japoxan ja-aechlisox. Xan akasestat puexa isx. Xan tajut pejme japoxan puexa toesaxaelenbej. Jiw, minsilapi, japi jiw xan malech chaxduiyaxaelen min, satlel nakakolsanmin. Japamin japi jiw af wut, duilaxael pomatkoicha.

⁷ Xan nanaexasiti, is-el wut babijaxan, Satanás tato'laspoxan, ja-aech wut, xan japi pejDiosnaxaelen, me-ama chajia jum-an. Japi jiwbej tajjiwaxael.

⁸ Asew jiw xan to'axaelen jitpuka poxadik, xabich jit tamdadutxot, azufre swapich. Jaxot jiw kastikax wut, japoxlap wachakalpijax, patupax. Jaxot pomatkoicha jiw babejchow kastikaxaelen. Jaxotaxaelbej jiw xan nanaexasis-elpi, japi pejlewlap nabijasliajwa asew jiw pijaxtat. Jaxotaxaelbej jiw kofapi, majt xan nanaexasiti. Jaxotaxaelbej xabich babijaxan ispi xanliajwa. Jaxotaxaelbej asew jiw bapi. Jaxotaxaelbej poejiw, asew watho' bu'moejtpi. Jaxotaxaelbej pinjoe'iw. Jaxotaxaelbej jiw ídolos kawujnanpi. Jaxotaxaelbej jiw kichachjapijin” — aech Dios japox xanliajwa.

Pajelpaklowax, Jerusalén paklowax

⁹ Siete ángelesxot, kaen japixot xan napa'an. Japi kaenanula copa. Japacopa wulux siete matdukababijaxan toesliajwapi ampathat. Japon ángel xanxot pat wut, najum-aechon: “¡Xabua't! Xam itpaeyaxaelen Cordero pijwaxaelpow” — na-aech ángel.

¹⁰ Jawut Espíritu Santo pijaxtat masoxtat taenx, ángel nabu'fol wut xabich pinamuxax poxase. Japamuxaxmatwujtatse ángel na-itpaei pajelpaklowax, Jerusalén paklowax, Dios pejpaklowax, fulaeflikpaklowax Diosxotsik.

¹¹ Japapaklowax itliak Dios pej-itliakaxtat. Japa-itliakax, me-ama ia't, ommaenkpot, pawulpot jaspe, ja-itdel-aech, itliak wut japapaklowax. Japox paklowax xabich thuajal, me-ama vidrio, jakabuan-aechbejpox.

¹²⁻¹³ Japapaklowax tathoetlel ia'kal chaxxajajials. Japox xabich da'nik. Xabich athubejpox. Puexa doce fafajebejpox. Be'klel tres fafaje. Bi'alel tres fafajebej. Beselel

tres fafajebej. Asalel, bi'alel, tres fafajebejpoj. Kaenanula fafachanxot kaen ángel nuk wesliajwa. Japafachanxot Israel paxi, docepijiw, wullelspi.

¹⁴ Japapaklowax chaxxajajials wut, ia' matxoela owas, pinanul, doce ia'. Japa-ia' fuletlelan lels doce apóstoles pejwulan. Japi Cordero pejiwiwi.

¹⁵ Japon ángel, xan najum-aechpon, japon xafol oronaeya japapaklowax xajajuliajwa, doce fafachanbej, paklowax chaxxajajialsposbej.

¹⁶ Do jawut, japon ángel naeyatat xajajupon japapaklowax. Kaelel paklowax xajajupon dos mil doscientos kilómetros. Japapaklowax puexa fuletlelan chiekal najup. Najupbej athulel.

¹⁷ Do jawux, xajajulison paklowax chaxxajajialspos. Japox xajajupon sesenta y cinco metros athulel. Me-ama xatis xajajus wut métratat, ja-aechbej japon ángel, xajaju wut.

¹⁸ Japox paklowax chaxxajajials ia', pawulpitat jaspe. Japapaklowax isasbej chiekal orokolatat. Japa-oro, me-ama vidrio bujaspi wut, jakabuan-aechi.

¹⁹ Doce ia', pinanul, nasala-owas chaxxajajialialajwas Jerusalén paklowax. Japa-ia'lelanxot, xape'as asat ia't, ommaenkpot, pachaemaliajwa. Matxoelapijt ia't, xape'tas ia't, pawulpot jaspe. Wuchakalpijt ia't, xape'tas ia't, pawulpot zafiro. Trespijt ia't, xape'tas ia't, pawulpot ágata. Cuatropijt ia't, xape'tas ia't, pawulpot esmeralda.

²⁰ Cincopijt ia't, xape'tas ia't, pawulpot ónice. Seispijt ia't, xape'tas ia't, pawulpot coralina. Sietepijt ia't, xape'tas ia't, pawulpot crisólito. Ochopijt ia't, xape'tas ia't, pawulpot berilo. Nuevepijt ia't, xape'tas ia't, pawulpot topacio. Diezpijt ia't, xape'tas ia't, pawulpot crisoprasa. Oncepijt ia't, xape'tas ia't, pawulpot jacinto. Docepijt ia't, xape'tas ia't, pawulpot amatista.

²¹ Puexa kaenanula doce fafachan isas kaeperlatat. Japapaklowax xabich pathialaxan maenk. Kaethiala pinathiala. Asathialaxan wut, jachi-el. Japapaklowaxthialaxan, chiekal orothialaxankal. Xabich thuajal. Me-ama vidrio wut, kabuan-aech japapaklowaxthialaxan.

²² Dios, xabich mamnikpon, jaxot duk, Cordero suapich, japapaklowaxxot tae-enil temploba, puexa japapaklowax, me-ama Dios pejtemploba wut, jakabuan-aech xot.

²³ Dios pej-itliakaxtat, Cordero pej-itliakaxtatbej, japaklowax xabich itliak. Samata, japapaklowaxpijiw wewe'pa-esal juimt matkoipijin, madoipijinbej, itliakaliajwa.

²⁴⁻²⁶ Potuajnuchanpijiw, Dios bu'weyaxaesi, japi duilaxael japapaklowax-itliakaxtat. Puexa reyes xalaeyaxael pejew, xabich ommaenkpi, malech chaxduiliajwapi Dios. Japapaklowax pejfafachan pomatkoicha fafa jumch nuilaxael. Jaxot ajilaxael madoi, pomatkoicha itliakaxael Dios pej-itliakaxtat.

²⁷ Pe jiw, babijaxan ispi, leyaxil japapaklowax. Asew jiw, ídolos kawuajjanpi, naekichachajbapibej asew jiw, japi leyaxil japapaklowax. Cordero pejfatat wullelspikal, japikal japapaklowax leyaxael, pomatkoicha duilaliajwa Diosxotse.

22

¹ Do jawut, ángel, Jerusalén paklowax xajajupon naeyatat, japon na-itpaeipon nawel xabich itatu'alpox. Jiw, japamin afpi, laelpaxael pomatkoichaliajwa. Japamin nakolan Dios ekxot, Cordero suapich.

² Japanawel fulaek pinathialatuchadik. Japanawel nataelachanuifal naebaechnaechan. Japabaech jiw xael wut, pomatkoicha laelpaxaeli. Kaejuimsful wut, japanaebaechnaechan naboesful. Japanae-uafbej pachaem potuajnuchanpijiw nawoeliajwa.

³ Japapaklowaxot ajilaxael jiw babejchow kastikaliajwas. Dios, Cordero suapich, japi pejtua-ekax jaxotaxael. Dios pejiwiwi, puexa japi jiw nuilaxael brixtat Dios pejwuajnalel, Cordero wuajnalelbej, kawuajnalialjwa.

⁴ Dios pejiwi, maklelspi japon pejwul, japi jiw pajut chiekal taeyaxaeli Dios.

⁵ Japapaklowaxxot ajilaxael madoi, Dios itliakafal xot. Samata, japapaklowaxxot duilpi wewe'paxisal lámparas. Juimt wewe'paxisalbejpi. Jaxot duilpi pomatkoicha nakaewa natato'laxael.

Jesucristo pejfulaeyax mox pawuajnapox

⁶ Do jawux, ángel pejme najum-aech xanliajwa: “Xan jumchiyaxaelenpox diachwuajnakolax. Samata, pachaem xam chiekal naexasisliajwam. Chajiakolaxtat Dios kajachawaet profetas jumchiliajwa asamatkoi jachiyaxaelpoxan. Amwutjel Dios to'a pej-ángel jumchiliajwa Dios pejiwi matabijaliajwa mox pawuajnapox jachiyaxaelpoxan ampathatat” —na-aech japon ángel.

⁷ Do jawut, ángel pejme najum-aech xanliajwa Jesús jum-aechpox: “Xan piach kijlax-inil. Kamtalejen pasaxoekan pejme. Tajwuajan chiekal naexasitpi, japi jiw asamatkoi nejhachaemlaxael, nejhaxoel wuti ampapelfutat lelspxoxanliajwa: “Diachwuajnakolax

asamatkoi japoxan jachiyaxael' —aech wutı japoxanliajwa” —aech ángel xanliajwa Jesús jum-aechpox.

⁸ Xan Juan, taenxpoxan, jumtaenxpoxanbej, lelx ampapelfutat. Japoxan ángel na-itpaei wut, xan brixtat nukx japon pejwujnalel jumchiliajwan: “Xam xabich pachaemam” —chiliajwan.

⁹ Pe jawut, ángel najum-aech: “ıTajwujnalel brixtat xam nabej nuke! Xanbej nabichnan Diosliajwa. Me-ama xam, asew profetasbej, ja-an xan Diosliajwa. Asew jiwbej, japi naexasisaxaeli xam lelampoxan ampapelfutat, nabichaxaelpi Diosliajwa, ja-anlap-is xan Diosliajwa. Kaen Dios pejwujnalel brixtat nukaxaelam jumchiliajwam: ‘Xam xabich pachaemam’ —chiliajwam” —aech ángel xanliajwa.

¹⁰ Do jawut, ángel pejme najum-aech xanliajwa: “Diachwujnakolax asamatkoi japoxan jachiyaxael, xam ampapelfutat lelampoxan. Japawujanliajwa xanaliyaximil, mox pawujana xot japoxan jachiliajwa.

¹¹ Samata, ampathatat laejam wut, jiw babejchow is wut babijaxan, ıjapoxan japi jiw nej isfule! Asew jiw, nejchaxoelpi pachaema-elpoxan, ıjapibej japoxan nej nejchaxoelafule! Jiwłax, isfulpi pachaempoxan, Dios nejxasinkpoxan, ıjapi jiw nej isfule japoxan! Asew jiwbej chiekal naexasisasiapi Dios, ıjapi chiekal nej naexasisfule Dios!” —na-aech ángel.

¹² Do jawut, ángel pejme najum-aech xanliajwa Jesús jum-aechpox: “Xan piach kijlaxinil. Kamta pejme pasaxoekanlejen. Xapasaxoekan kaenanula malech chaxduiliajwan. Xabich kaes nabisti xanliajwa, japi jiw kaes chaxduiyaxaelen. Chiekal nabich-elpi xanliajwa, xabich chaxduiyaxinillejen.

¹³ Diachwujnakolax xan jum-an: ‘Matxoela-isxpoxan, puexa toesaxaelen ajilaliajwa’ —aech Jesús” —na-aech ángel.

¹⁴ Jiw nejchachaemil, naexasit xoti Cordero tıppox bu'welıajwas japi babijaxan ispoxanliajwa. Jiw, papoei naxoeipi, japi Dios bu'wiaspi. Japi tapaeyaxaes pasliajwa Dios pejpaklowaxxotse. Kaechtapaeyaxaesbejpi naebaech xaelıajwa, duılaliajwa pomatkoıcha Diosxotse.

¹⁵ Asew jiw, Jesús pejwujan naexasis-eli, leyaxil japapaklowaxxotse. Namaeyaxaeli tathoetat. Jiw leyaxil japapaklowax, xabich babijaxan ispi, pinjoe'ıwbej. Leyaxilbej poejıw, asew watho' bu'moejtpi. Leyaxilbej watho', asew poejıw bu'moejtpi. Leyaxilbej asew jiw bapi. Leyaxilbej jiw, ıdolos kawujanpi, asew jiw naekichachajbapibej.

¹⁶ Do jawut, Jesús pajut chiekal xan najum-aechon: “Xan to'ax taj-ángel, japon xam kito'aliajwa lelaliajwampoxan tajwujan naexasisaxaelpıliajwa. Xan, rey David pamonan, me-ama ithaajt, nalianapıjin, xabich itliak wut, ja-an xan” —na-aech Jesús.

¹⁷ Espıritu Santo jum-aech, Jesús pejwujan naexasiti suapich, Jesúsliajwa: “ıXam nabej kijle' piach ampathatxot pejme pasliajwam!” —aechi Jesúsliajwa. Asew jiw, jumtaenpibej japajame, japi jiwbej nej jum-aechi Jesúsliajwa: “ıXam xabu'ahmik!” —nej aecheıpi. Jiw wesia wut, ıjapi jiw nej xabuata Dioslel malech bu'welıajwas babijaxan ispoxanliajwa, duılaliajwapi pomatkoıcha Diosxotse!

¹⁸ Puexa jiw jumtaenpi xan lelxpoxan ampapelfutat, ıjapi jiw chiekal naewe'e ampxo! Asan aton kaes lel wut asaxan xan lelxwujanxot, japon aton Dios xabich kastikaxaes. Me-ama Dios chajia jum-aech ampapelfutat babejchow kastikalıajwas, japon atonbej jasoxtat kastikaxaes.

¹⁹ Asan aton kaejame joi wutbej xan lelxpox ampapelfutat, japon atonbej Dios xabich kastikaxaes. Tapaeyaxisalbejpon leliajwa Dios pejpaklowaxxotse pomatkoıcha dukaliajwa.

²⁰ Jesús pejme xan najum-aech: “Diachwujnakolax xan xabich piach kijlaxinil. Kamtalejen pasaxoekan” —aech Jesús xanliajwa.

ıJapox nej ja-aech! ıXabu'at paklon Jesús!

²¹ Xan wajpaklon Jesús kawujanax puexa xamal kajachawaesliajwa.